

ESUQUIDISTU CHUIQUIN
TANTIAMETE

El Nuevo Testamento
de nuestro Señor Jesucristo
en el idioma matsés
del Perú



LA LIGA BIBLICA

LAS SAGRADAS ESCRITURAS PARA TODOS

El Nuevo Testamento
de nuestro Señor Jesucristo
en el idioma matsés
del Perú

Primera edición, 1993
Segunda edición, 2005
Tercera edición, 2008

Publicado por
© LA LIGA BIBLICA 2008

Usted es libre de copiar, distribuir y comunicar públicamente la obra bajo las condiciones siguientes:

- Reconocimiento. Debe reconocer los créditos de la Liga Bíblica (pero no de una manera que sugiera que tiene su apoyo o apoyan el uso que hace de su obra).
- No comercial. No puede utilizar esta obra para fines comerciales.
- Sin obras derivadas. No se puede alterar, transformar o generar una obra derivada a partir de esta obra.

CONTENIDO

Mateyon Dada uaid	<i>Mat.</i>	5
Madcosën Dada Uaid	<i>Mad.</i>	84
Ducasën Dada uaid	<i>Duc.</i>	130
Uanën Dada uaid	<i>Uan</i>	206
Esus Chuibenequidon Naid	<i>E.Ch.N.</i>	265
Doma yacnocquidon Iste	<i>Dom.</i>	336
Codinto yacnocquidon Iste I	<i>Cod.I</i>	374
Codinto yacnocquidon Iste II	<i>Cod.II</i>	406
Cadasia yacnocquidon Iste	<i>Cad.</i>	425
Epeso yacnocquidon Iste	<i>Ep.</i>	439
Pidipos yacnocquidon Iste	<i>Pid.</i>	451
Codosas yacnocquidon Iste	<i>Codo.</i>	459
Tesadonica yacnocquidon Iste I	<i>Tes.I</i>	467
Tesadonica yacnocquidon Iste II	<i>Tes.II</i>	474
Timoteyon Iste I	<i>Tim.I</i>	478
Timoteyon Iste II	<i>Tim.II</i>	488
Titon Iste	<i>Tit.</i>	495
Pidemonën Iste	<i>Pide.</i>	500
Ebedeyon Isadaidbon Iste	<i>E.I.I.</i>	502
Santiacon Dada Uaid	<i>San.</i>	525
Petedon Dada uaid I	<i>Pet.I</i>	534
Petedon Dada uaid II	<i>Pet.II</i>	545
Uanën Dada uaidëmpi I	<i>Uan.I</i>	551
Uanën Dada uaidëmpi II	<i>Uan.II</i>	560
Uanën Dada uaidëmpi III	<i>Uan.III</i>	562
Udasën Dada uaid	<i>Ud.</i>	564
Esusën Uan Ismiaid	<i>E.U.Is.</i>	567

MATEYON DADA UAID

Esuquidistun tsusedpabotedi chiaid

(Duc. 3.23-38)

1 ¹Esuquidistu chuiquin dada uanu. Aidën tsusedpa Abadauan nec. Aidën tsusedpabidi Abadauanën tsyuecquid Dabid nec. Abadauanën tsyuecquido chuiquinc aidën tsyuecquid Dabidën tsyuecquido chuiquinc caquin Esusën tsusedpabotedi chuinu. Tanta.

²Abadauanquiobi bedanquin chuinu. Abadauanën mado Isac cuëmëdpampic. Isaquën madobic Acobo cuëmëdquid. Acobon mado dadpen icpampic. Abentsëc Uda cuëmëdnuc aton buchiado utsi-utsiec cuëmëdpampic.

³Adnubien Acobon mado Uda caidën Tamad caid abentsen chudpampic. Aden chudaqui bacuë daëd usundoshon abi ushëmbi aton mado daëdpambo tishpampic. Abentsëc Pades cuëntanquin utsi Sada cuëmpampic. Padesën mado Eston cuëmëdpampic. Estonën madobic Adan cuëmëdquid.

⁴Adanën madobic Aminidad cuëmëdquid. Aminidadën madobic Nason cuëmëdquid. Nasonën madobic Sadmon cuëmëdquid icpampic.

⁵Adshumbic Sadmonën aton chido Daba bedshun aton mado Bos tishmepampic. Adoac canishumbi Bosën aton chido Dud bedshun aton mado Obed tishmepampic. Obedën mado Isai cuëmëdquid icpampic. ⁶Adshumbic Isain aton mado Dabid isadaidbo

chuiquid dapambo tishmepampic. Adoac canishumbic Dabidën dada utsi Udias caid cuesunetanquin aton chido bedshun aton mado Sadomon tishmepampic.

⁷Sadomonën mado Doboan nepampic. Doboanën madobic Abias cuëmëdquid. Abiasën madobic Asa cuëmëdquid.

⁸Asan madobic Osapad cuëmëdquid. Osapadën madobic Odan cuëmëdquid. Odanën madobic Usias cuëmëdquid.

⁹Usiasën madobic Otan cuëmëdquid. Otanën madobic Acas cuëmëdquid.

Acasën madobic Esequias cuëmëdquid.

¹⁰Esequiasën madobic Manases cuëmëdquid. Manasesën madobic Amon cuëmëdquid. Amonën madobic Osias cuëmëdquid. ¹¹Osiasën madobic Econias cuëmëdquid. Aid Econias caid aton matsesadobëdtabi yuanuen Babidonia yacnocquidon aton nidaidën buampampic.

¹²Buanac shubu dadpen icquid Babidonia caid yacnoshon Econiasën aton mado Sadatied tishmepampic. Sadatiedën mado Sodobabed

cuëmëdpampic. ¹³Sodobabedën madobic Abiud cuëmëdquid. Abiudën

madobic Ediaquin cuëmëdquid. Ediaquinën madobic Asod cuëmëdquid.

¹⁴Asodën madobic Sadoc cuëmëdquid. Sadoquën madobic Aquin cuëmëdquid.

Aquinën madobic Ediud cuëmëdquid.

¹⁵Ediudën madobic Ediasad cuëmëdquid. Ediasadën madobic Matan

cuëmédquid. Matanën madobic Acobo cuëmédquid. ¹⁶Acobon madobic Ose cuëmédpac caondash. Aidquio Madian bënë nepac caondash. Aidën inabi Madian Esus usundoshon tishpac caondash. Esus Nuquin Papan chomiaid yec matses bédambo icmequidquio nec. Isadaidbon cainaidquio nec.

¹⁷Aidtedi Esusën tsusedpabo icpampic. Abadauamba bedanquin aton matses 14tedi chuiquin Dabid ënquin chiombi. Adoshombic Dabid ënquin chuiboed chuiquaquin padpiden bedanquin aidën matses 14tedbidi chuiquin Econias aton matsesbédta buanaid ënquin chiombi. Adoshombic Econias ënquin chuiboed chuiquaquin padpiden bedanquin aton matses 14tedbidi chuiquin Esusquiobi ënquin chiombi.

Esuquidistu tishaid

(Duc. 2.1-7)

¹⁸Nëbi aid tishaidquio chuinu. Esus tishabi yec aton tita Madia icpac caondash. Abi inuequidën Osen bedabi icshobi Nuquin Papan Mayanën bacuë usundomepac caondash. ¹⁹Usundoacsho isun abi inuequidën Osen dada utsin chudaid danec: —“Nëbi mibi bedtiapimbo iquebi,” quequin bedenquio icnuen dada uashun Madia menenu —queuidpac caondash. Nuquin Papan chiacpadquio bédambo icquid icquin naden chiambo icpac caondash. —Bedabi bacuë usundoaque. Cuidquimbien ictiad —quequin aton matses chienquio yequi: —Bedenquio icnuen dada uaid menenu —queuidpac caondash.

²⁰Adnubien Nuquin Papan abi yacnoshon uaidën mayan bédan Ose ushquin ismepac caondash. —Dabid yampidën tsyuequid icsho mibi chuinu, Ose. Tantia. Chudenquio icquin Nuquin Papan Mayanën Madia bacuë

usundomiaye. Dacuëndenda. Dacuëdenquio icquin Madia min shubuno buanta. ²¹Adoshombic dada bacuë tishacsho Esus cuënta. “Matses icsaid bedshunquin Nuquin Papa aton matses cuidmenquio iquendac,” quequin Esus cuënta —quequin mayan bédan Ose ushquin ismepac caondash.

²²Aden mayan bédan Esus tishte chiacpadomboen Nuquin Papan ambi chiaid naden dada uamepampic.

²³“Dadan inacmaidëmbi bacuë usundoshon dada bacuë tishendac.

Aidi Imanued cuënendac.

‘Nuquin Papapadquidquiodidi matsesbéd tabadnuec choash nec,’ quequin Imanued cuënendac,”

quequin Esus tishte Nuquin Papan dada uamepampic.

²⁴Aden mayan bédan chiac isucunshumbien aidën chiacpadomboen Osen aton shubuno Madia buampac caondash. ²⁵Buanshun Osen chudenquio icnubi dada bacuë tishpac caondash. Tishacsho Esus cuëmpac caondash.

Uispa isquido Esus isec choaid

2 ¹Nidaid Udeya caid yacno tabadquin shubu daëdpactsëcquid Beden caid yacnoshon Esus tishpac caondash. Adnubien shubu dadpen icquid Edusaden caid yacno isadaidbo matses ancaquid Edodes cuëmédquid icpac caondash. Aid icnubi matses utsibo uispa isquido Esus isnuec ushë choacmiuësh chopac caondash. Edusaden yacno choquin ²anocquido chuituidpac caondash. —Min matses isadaidbo chuiquid dapa ictequidquio nëbi tishtsaidëmpi ÷midambo ictseque? Isnu. Aid tishaid tantiamete uispa isombique. ÷Mitsimbo ictseque? Isnu. “Chuiquid dapa bédamboshë ictequid

nec,” quiash aid isnuec chopobi
—quetuidpac caondash.

³Adsho tantiash dacuëdcuededpac
caondash abitedimbo. —Padtec.
¿Midapadquid bacuë nependabac?
—quecuededpac caondash Edodes
isadaidbo ancaquid ambi ancaidobëdi.

⁴Adshumbien Edodesën abi yacno
tsusiobo cho-chomepac caondash.
—¿Mitsicquid caique? Tantianu
—qeshun abi yacno Moisesën dada
uampid chuibanquido abi chuiquid
dapabobëdta cho-chomepac caondash.
Cho-chomeshumbic: —¿Mitsishunquio
Nuquin Papan chomiaid min matses
chuiquid dapa ictequid tishpash? ¿Ada
Nuquin Papan chiaid isbanquin tantio?
—caquien: ⁵—Ai, tantiemi. “Nidaid
Udeya caid yacno tabadquin shubu
daëdpactsëcquid Beden caid yacnoshon
aid bacuë tishendac,” quiampicpadembi
tantiemi. Nuquin Papan ambi chiaid
nuquin tsusedpa dada uamepampic
naden. ⁶Shubu daëdpactsëcquid Beden
caid yacnocquido chiec:

“Beden yacno tabadec nidaid Udeya
caidën tabadquido mibi nec.

‘Chuiquid dapa nibëdnuc icsambo
iquendac,’ quedenedi mibi
yacnoshon chuiquid dapa
ictequid tishendac.

Aidëmbi isadaidbo matses chuiquid
dapa icquin bëdamboen
tabadmendac,”

—quequin Nuquin Papan Esus tishte
chiaid chuipac caondash tsusiobon
Edodes caid chuiquin.

⁷Adoquien Edodesën ambi ancaido
isadaidbo ismenquio icquin matses
utsibo uispa isquido chomeshun
chuimepac caondash. —¿Nëbida tishaid
tantiamete uispa isquin tauao? ¿Nëid
inchëshën ushëmbida isbeno? ¿Ëndenda
isbenonda? En chui. Tantianu —cac
chuisho ⁸tantiashun: —Beden yacno

istan. Ano nidshun mimbi chiacpadquid
bacuë istan. Aid bacuë istanec cuenquin
ëbi chuibenta. Ëmbitsen istanu. “Nuquin
Papan chomiaid chuiquid dapa ictequid
bëdambo iquec,” quequin ëmbitsen
istanu —capac caondash Edodesën
muaquimbi. —Cuesunenu —quequimbi
adopac caondash.

⁹Adoquien ushë choacmiuësh
bed-bedquesho ambi isbëquin
tsibambëboedi uispa tsibanec Beden
yacno nidpac caondash. Adec nidnubien
uispa shubu ismec nidtuidpac caondash:
—Bacuë ictsaid shubu nëid iquec
—quec. ¹⁰Adsho isashien cuishonquepac
caondash uispa isquido. ¹¹Adash shubun
puedeshun isquien aton tita Madiabëd
bacuë ictsec. Aid isashic: —Matses
chuiquid dapa ictequid nec. Matses
bëdambo icmetequid nec —quequin
aton matsesën nacpadomboen ismequin
danëshën sebudpac caondash.
Adshumbic ambi bëboed aton na
bëdambo icquid chicshun menepac
caondash nëidtedi. Nëidic shocosh piu.
Nëidic bëdambo nuadnuc tauitequid.
Nëidic bëdambo noadec danoshquete.
Aidtedi menepac caondash. Adoash
ushtopac caondash. ¹²Adec ushtoacsho
Nuquin Papan ushquin ismepac
caondash. —Isadaidbo ancaquid Edodes
chuibidanenda —quequin ushquin
ismiac isucunanec abi choboedën
nidenquio yec podqued utsin nidpac
caondash aton shubuno nidec.

Equipito yacno Osen buanaid

¹³Esus isuanquido nidambien Nuquin
Papan abi yacnoshon uaidën mayan
bëdan Ose ushquin ismepac caondash.
—Isucunanec cuenta. Bacuëmpi aton
titabëdta buanec nidaid utsi Equipito
caid yacno cuenta. Ëmbi chiabi
choenda. Anobi tabadta. Edodesën:
“Bacuëmpibo cuesun siatanta,” cac

cho-choeque. Cuenta —quequin Ose ushquin ismepac caondash mayan bēdan.

¹⁴Aden ushquin ismiac isucuntantsequi inchēshēmbi puduanec aton bacuē anibēdta buanec nidaid utsi Equipito caid yacno Ose nidpac caondash. ¹⁵Equipito yacno nidash ambobi tabadpac caondash. Isadaidbo ancaquid Edodes unēsabi icnuc Equipito yacno tabadpac caondash. Esus tishabi icnubi ēndenquimboshē Nuquin Papan tantiamiac ambi chiaid chuibanquidēn Esus Equipito yacno buante chuiquin dada uapampic naden chuiquin. “Equipito yacno nidash tabadsho: ‘Auēshquio cho, Mado, caindami,’ quiosh Nuquin Papa,” quequin Nuquin Papan chiaid dada uapampic.

Bacuēbo dadpen cuesun siatanaid

¹⁶Adnubien isadaidbo ancaquid Edodes: —Uispa isquidon cacuidposhi —quiash comapenec nēshun aton yuabo sondado chuipac caondash. —Uispa isquidon chuibocpadtsēcquid comapenec onquecuenabi ictsēcquidotedi dada bacuēmpibotedi cuesun siatan. Beden yacnocquidon bacuēbobēdtabi uano pauequidon bacuēbotsen cuesun siatan —cac cuesun siatampac caondash. ¹⁷Aden cuesun siatanambo icnubi Nuquin Papan adote chiaid ēndenquimboshē Edemias cuēmēdquidēn dada uapampic naden chuiquin.

¹⁸“Abi yacnuēsh aton bacuēbo nibēdansho isash isadaidbon chidobo sedenquecuededendac. Unēsaid tantiec baded ēnēdenquio yec sedenquebudnendac,” quequin chiampicpadomboen aton bacuēbo nibēdamepac caondash.

¹⁹Yuecquio ictaniashic isadaidbo ancaquid Edodes caid unēsapac

caondash. Adambic nidaid utsi Equipito caid yacno tabadsho Nuquin Papan abi yacnoshon uaidēn mayan bēdan Ose ushquin ismepac caondash.

²⁰—“Bacuēbo cuesun siatan,” quiondaid unēsaccoshe. Min chido min bacuēbēdta buanec min nidaid Isadaid caidēn nidoata —caquien ²¹isucunanec aidēn chuibocno buanec nidpac caondash.

²²Aton nidaidēn nidshun aton matsesēn chiaid tantiapac caondash. —¿Ada tantio? Udeya yacnocquido ancadened unēsaidēn mado Adquedayo caid ancanquidquibidien nechitec —quesho tantiashien dacuēdtampac caondash Ose. Adshobien Nuquin Papan Ose ushquin ismeoapac caondash. —Cuesunenushē. Min nidaid Udeya caidēn nidenda —quequin ushquin ismiac isucunanec aid nidaid Isadaid caidēmbidi nidec aid nidaid cuēshē utsi Cadidia caidēn nidpac caondash. Udeya caidēn nidenquio yec uquēmbō nidpac caondash. ²³Uquēmbō nidec shubu dadpen icquid Nasaded caid yacno choash ambo tabadtuidpac caondash. “Nasaded yacnocquid nendac,” quequin Nuquin Papan chiaid dada uampicpadec anobi tabadpac caondash. Auēshquio canipac caondash Esus.

Uan acten mentoanquidēn chuibeniaid

(*Mad. 1.1-8; Duc. 3.1-9, 15-17; Uan 1.19-28*)

3 ¹Adash yuecquio ictaniashien Uan caid Nuquin Papa tantiabenquido acten mentoquid icpac caondash. Nidaid Udeya caid yacno shubu nibēdacno capucuenequin Nuquin Papan chiaid chuibenequid nepac caondash. ²Adquid icquin Esus chote chuibampac caondash naden. —Mibi icsaid ēnash bēdamboec tabadta. Nuquin Icbombo choeque —quequin chuipac caondash. ³Aden Uanēn chuite chuiquin Nuquin Papan isadaidbo tsusedpa Isayas cuēmēdquid dada uamepampic naden.

“Masiuidpambo yacno shubu
nibëdacno capuquin ëcac matses
chosho chuibenendac.

‘Chuiquid dapa choeque. Podqued
andëdbanshunta,’ quiacbimboen:

‘Nuquin Icbombo choeque.

Icsaid ënash bëdamboec tabadta,’
quequin chuibenendac,”

quequin Isayasën Uanën chuite
chuiampic.

⁴Nadquid Uan icpondash. Aton
dashcute nëish yua dapa cameyo caidën
bu daëdcaid dasiuidpondash.

Tsipantebic nidaidën capuquid yua bitsi
nacnenaid tsiupondash. Aton pete
bacumbëd shioshbimboecquid

icpondash. ⁵Aidën Nuquin Papan chiaid
chuibenesho tantianuec nëidtedi matses
cho-chopac caondash. Nëidic shubu

dadpen icquid Edusaden caid
yacnocquido. Nëidic nidaid Udeya caid
yacnocquido. Nëidic acte Odan caid

cuëman tabadquido. Aidtedi cho-chopac
caondash. ⁶Cho-choshon Uanën chuisho
tantiash: —Nuquin Papan chiaid

niac-niaquec icsapobi. Icsaboedi aid
tantiec bëdamboec tabadtiadquio iquebi
—qesho: —“Nëid Nuquin Papa

tantianu,” quequid nec —quequin acte
Odan caidën mentopac caondash
Uanën.

⁷Adnubien padiseyobëd saduseyobo
Uan isec cho-chopac caondash.

Padiseyobo isadaidbo tsusedpabon
chiaid namequido nec. Saduseyobobic:

—Matses unësaid uincuenenquio
iquendac —quequido nec. Aido

cho-chosho isun Uanën:

—Nisibimboecquido mibi nec.

Adquidën icsa uacbimboen matses icsa
uaquido mibi nec. Bëdambo icquid

damianquieq mibi iquec. “Nuquin Papan
mibi cuidnushe. Tantiatan,” quequin

Ëtsuntsin chiac cho? ⁸Mentomete bunec
Nuquin Papan chiaid niac-niacboedi

ënash bëdamboec tabadta.

⁹“Ëbipadquid Abadauanën

tsyuecquidouditsëqui Nuquin Papan
bëdamboen isec,” quequin tantienda.

ËAdquidta Nuquin Papan bëdamboen
ispec? Abadauampadquid abi

tantiaquidien Nuquin Papan bëdamboen
isec. Mimbi bëdamboen tantiatipimbo

icsho isun nëid cuënotebi matses
uashun Nuquin Papan

Abadauampadquid abi tantiaquidombo
icmetsiash icnushe. Nuquin Papambo

tantiata. ¹⁰“Icsambo icquid nec,”

qeshun ambi nitsinaid cuëte bacuëesa
dëdshun nëdëncacbimboen ambi

chiacpadomboen naisa Nuquin Papan
cuidendac —quepac caondash Uan

padiseyobo saduseyobëdta chiec.

¹¹Adshumbic padpidien chuiquin

Esusën nate chuiyac caondash. —Nuquin
Papa tantianuequid acten mentobanquin

chuiabanquid nebi. Padnuen con
tsyuecquid choshon aidëtsen

chuibanendac. Ëbi bëdiactëc tantiaquid
ictëcencud aidquien comapenen

tantiaquidquio yec bëdamboshë

iquendac. “Aidquio bëdamboshë icquid
icnuc Ëatotsieshun icsaquidquio: ‘Aid

choec,’ quequin chuiquidquio Nuquin
Papan ëbi icmeposh?” quec tsadebi.

Ëmbi chuiboed choshon: “Ëbi tantiaquid
nec,” qeshun aton Mayan menequin

bëdamboec tabadte mibi tantiamendac.
Abi tantiesaboen cuidendac. ¹²Piacbo

choeshashun putu bushcaquin
secacbimboen abi tantiesabo chian

anëdënquiacono nësecaindac. Adshumbic
abi tantiaquido abëdi tabadmendac

—quepac caondash Uan acten
mentoanquid.

Uanën Esus mentoaid

(*Mad. 1.9-11; Duc. 3.21-22; Uan 1.32-34*)

¹³Acte Odan caidën matses mentoec
adpac caondash Uan. Adnubien Uan

yacno Esusquo chopac caondash. Aton nidaid Cadidia caid yacnuësh tauamboen matses ismenuec choec: —Ëbitsen mento —quetuidpac caondash. ¹⁴Adshobien Uanën: —Padenquo iquembi. Nuquin Papan chomiaid icquin mimbibi ëbi naquien bédambo ictsiash. ¿Atotsieshun ëbi aden chie? Padi —qeshobien: ¹⁵—En na. Bédambo iquec. Ëbi mentoquin mimbi Nuquin Papan chiacpadomboen natsiaque. Ëbi acten mento —quesho tantiashun Esus acten mentopac caondash Uanën.

¹⁶Adoac Esus pudundonobien canchedacimboec abu shëcuë yampac caondash. Adsho isaquien aid shëcuë yacnuëshquo dëbimbimboec budec Nuquin Papan Mayan Esusquo matsadtopac caondash abëd icnuec. ¹⁷Adnubien abucuëshquo Nuquin Papa onquiampac caondash. —Nëid ëmbi tantiaidquo con Mado nec. Ëmbi chiacpadomboen nasho isash bédambo iquebi —quepac caondash Esus caic.

Satanasën Esus icsamenuequin tanuidaid
(*Mad. 1.12-13; Duc. 4.1-13*)

4 ¹Uanën acten mentobocshobien Nuquin Papan Mayanën masiuidpambo yacno matses nibëdacno Esus nidmepac caondash. —Ma Nuquin Papa chieshënuquid Satanasën Esus icsamenuequin ma tanu —quequin ambo nidmepac caondash.

²Adoquien buna mëmunquin penquo yec Esus tsadpac caondash. Inchëshën ushë abentsëc nidmiash utsi tashquecuntsëcncuc 40tedec ushquin penquo yec comapenec bumpac caondash. ³Bunec tsadshobien Satanasën istuidpac caondash. Istuidtanquimbien: —¿Nuquin Papan Madombobida mibi neque? Aidën Madombo icquin nëid cuënote cain:

“Pete icta,” cata —caquien ⁴Esus: —Padi. Nuquin Papan chiaid dada uapampid nad iquec. “¿Peteuidi tantiecta matses bédamboec tabadpec? Nuquin Papan chiacpadomboenuidi naiquien matses bédamboec tabadtsiash,” quequin dada uapampid iquec —quepac caondash Esus.

⁵Adsho tantiashumbien shubu dadpen icquid Edusaden caid yacno buanshun Nuquin Papan tabadte shubu uashunaid macano Satanasën Esus manidtomepac caondash abucquo. ⁶Adotanquimbien padpiden chuiquoquin: —¿Nuquin Papa caidën Madombobida mibi neque? Aidën Mado yec nëuëshquo pudunta. Nuquin Papan mibi paëdmenquo ictsiashe. Nadentsen Nuquin Papan chiaid dada uapampic.

“ ‘Uidën uata,’ quequin ambi abi yacnoshon uaido mayan bédabo Nuquin Papan chiac mibi uidën uaindac paëdenquo icnuc.

‘Cuënoten tadquëdnushe,’ qeshun adoendac,”

quequin Nuquin Papan chiaid dada uapampique. Pudunta —caquien ⁷Esus: —Padi. Nuquin Papan chiaid dada uapampid nad iquec. “ ‘¿Icsamboen tantiaquin ëmbembi nashodabi Nuquin Papan cuidpatsiashe? Tanu,’ quenda,” quequin dada uapampique. Padi —quepac caondash Esus.

⁸Adoquien Satanasën padpiden buanquin macuësh dapa abucquiocquid manidtomeshun nidaid abichobi Esus ismepac caondash. Chuiquid dapabotedi ismequinc aidobëd icquido ismequinc aidon dayun uaidtedi ismequinc capac caondash. ⁹Adoshombic: —Nëidtedi mibi menetsiambique. Ëbi con icbo cata. Ëbi aden chuiquin ismenuen danëshën sebudta. Adsho isun ëmbi ismiactedi mibi menembi. Aidën icbo mibi icmembu —caquien ¹⁰Esusën: —Padi.

Baded cuenta. Nuquin Papan chiaidquo
chuiquin naden dada uapampique.
“Nuquin Papa abentsēcquiobi mimb
tantiuidtsēqui min Icbombo neque.
Aidēn namiaidquo icta,” quequin dada
uapampique. Cuenta —capac caondash
Esusēn. ¹¹Adoaquien Satanas cuempac
caondash. Cuenubien Nuquin Papan abi
yacnoshon uaido mayan bēdabo
choshon abēdi tabadquin Esus bēdambo
icmepac caondash.

Cadidia yacnoshon Esusēn chuibeniaid
(*Mad. 1.14-15; Duc. 4.14-15*)

¹²Adashic aton nidaid Cadidia caidēn
Esus nidpac caondash. —Mibi acten
mentonaid Uan bedshun quēnēn
nauedac caosh —quesho tantiash nidpac
caondash. ¹³Nidashic shubu dadpen
icquid Nasaded caid yacno tabadash
nidēc chian dapa cuēman shubu dadpen
icquid Capednaun caid yacno nidash
anotsen tabadoapac caondash. Aid
nidaid Netadi capampic. Aid
anoentsēqui icquid nidaid utsi con
tsusedpabon Sabudon capampic. ¹⁴Esus
ambo tabadte chuiquin Nuquin Papan
con tsusedpa Isayas cuēmēdquid dada
uamiampicpadec ambo tabadpac
caondash Esus. Naden dada uapampic.

¹⁵ “Nuquin Papa tantiamēquidēn
chuisho nēidtedishun tantiendac.
Nēidic nidaid cuēshē utsi Netadi
caidēn tabadquidon.
Nēidic nidaid cuēshē utsi Sabudon
caidēn tabadquidon.
Nēidic chian dapambo anoentsēqui
tabadquidon.
Nēidic acte dapa Odan caid cuēman
tabadquidon.
Nēidic isadaidpembro dadpen
tabadacno Cadidia caidēn
tabadquidon.

¹⁶ Aidtedishun Nuquin Papan
chomiaid tantiendac.

Pabiate cuēnēdacimboec
icsamboec tabadquin Nuquin
Papa tantienquo icboedombi
tantiabenendac.

Nuquin Papa tantiamenuen
chuibansho tantiashun matsesēn
pashquiacimboen Nuquin
Papa tantiabenendac.

Abi tantienquo icsho Nuquin Papan
cuidtsenaidombi Nuquin Papa
tantiabenendac ushash
isucunacimboen,”

quequin Isayas Esus choash tabadte
dada uamepampic Nuquin Papan.

¹⁷Ashunquiobi Nuquin Papan chiaid
chuiquin tauamboen Esusēn matses
abitedimbo chuibenepac caondash.
—Icsaid ēnash Nuquin Papa tantiec
ambi chiacpadec bēdamboec tabadta.
Nēbi Nuquin Papan abēd tabadtequido
icmequin matses bēdamboen
tabadmendac —quepac caondash Esus
ambibi naid chiequi.

Nuēcquid bedquido Esusēn: Cho, caid
(*Mad. 1.16-20; Duc. 5.1-11*)

¹⁸Aden chuibenec chian dapa Cadidia
caid cuēman nidquin isquien dadan
aton utsibēdtambi nēshaid dapambo
acte nēnepec. Aid Simombidi Petedo
capec. Aton utsi Andedes nec. Aid
daēdshun nuēcquid bedquidombo
icquin aton nēshaid acte nēnesho
istuidpac caondash Esusēn.

¹⁹Adshumbien Esusēn: —Nuquibi icnu.
Cho. Nuēcquid bedquid icboedi nēbi ēbi
chuihanquid mibi icmenu ²⁰—caquien
aton nēshaid nianec nidquimbi Esus
tsibanampac caondash.

²¹Udictsēc nidquin isquien dada daēd
cano antabēdpec. Acobo aton utsi
Uambēd icpac caondash. Aton papa
Sebedeyo caidbēdi cano antabēdquin
nuēcquid bednun aton nēshaid dapa
nacnempac caondash. Adsho istuidshun

Esusën: —Nuquibi icnu. Cho —caquien
²²aton papabëdta cano nianec Esusbëd
 icnuec nidpac caondash.

Matses dadpen Esusën chuibeniaid

(Duc. 6.17-19)

²³Adashic aton nidaid Cadidia caid
 yacnobi capucuenec Nuquin Papan chiaid
 chuibante shubun-shubunquiec
 puduedcuenequin Esusën Nuquin Papan
 chiaid chuibenepac caondash. Abi yacno
 tabadmenun Nuquin Papan bédamboen
 iste matses chuibeniac caondash.
 Adshumbic daicsaidotedi bédamebampac
 caondash. ²⁴Adosho istanquin:
 —Bédamequidquio nec —quequin
 isboedon Esusën naid chuibenepac
 caondash. Ènapen nidec nidaid utsi Sidia
 caidën nidshun chuibeniac caondash.
 Aden chiac daicsaidotedi bē-bēpac
 caondash. Dada paëmboshë icquido yec
 podobitsi icsa dapuduedaido yec
 unēsanequido yec dada shëquëquenquio
 icquido yec quenec bē-bëacsho aidtedi
 bédamepac caondash Esusën. ²⁵Aden:
 —Bédamiosh —quequin chiac isec
 cho-choash dadpenquio
 tsucus-tsucustsëcquio yec tsidadash
 niqianquin Esus tsibanampac caondash.
 Nëidtedshun tsibananac caondash. Nëidic
 nidaid Cadidia caidën tabadquidon.
 Nëidic shubu dadpen icquid Decapodis
 caid yacno tabadquidon. Nëidic shubu
 dadpen icquid Edusaden caid
 yacnocquidon. Nëidic nidaid Udeya
 caidën tabadquidon. Nëidic acte Odan
 caid uquë cuëma utsiuc tabadquidon.
 Aidtedshun Esus tsibanampac caondash.

**Nadquido bédambo iquendac,
 quequin Esusën chiaid**

(Duc. 6.20-23)

5 ¹Matses dadpenshun tsibananac
 macuësh dapa cuëte
 nibëdpamboecquid pudundoec poctsebi

Esus tsadtuidpondash. Abi tsibananash
 matses dadpen abi datsidadnubien abëd
 icquido Esusën dayunquio
 tabadpondash. ²Adshobien Nuquin
 Papan matses bédamboen isquin
 bédambo icmete Esusën matses abitedi
 chuibampondash.

³—¿Mitsipadquid Nuquin Papan
 bédambo icmepec? Nadquid caimbique.
 Tantia. Mibitedi chuinu. “Èbemb
 bédamboec tabadtiaimbo iquebi.
 Bédapenquio iquebi. Nuquin Papan
 bédamboen tabadmiaquini bédamboec
 tabadtsiac,” quequid Nuquin Papan:
 “Èbëd tabadtequid nec,” quequin
 bédambo icmendac.

⁴“Matses abitedi icsamboec tabadnuc
 ëbitsen icsamboec tabadquid nebi,”
 quec shubiquimbi abi tantiasho Nuquin
 Papan bédamboen isquin bédambo
 icmendac.

⁵Aton nauidi tantienquio icquin
 Nuquin Papa tantiaquin utsibotsen
 tantiaquid Nuquin Papan bédambo
 icmendac. Yuecshun ambi nidaid chuca
 uaidën tabadmendac.

⁶Pete bunacimboec ambi chiacpadec
 bédamboec tabadte bunquid Nuquin
 Papan bédamboen tabadmendac.

⁷Abi chieshëquidi chieshënenquio
 icquin bédamboen isquid Nuquin Papan
 bédamboen isendac.

⁸Ambi chiacpadomboenuidi nate
 bunquid Nuquin Papan bédambo
 icmequin abibi bëismendac.

⁹Aton matses chieshënanasho isash:
 “Padi. Chën. Bédamboequien
 tabadtiaid,” quequid Nuquin Papan
 bédambo icmequin con mado caindac.
 Adquidbidi adembidi con champi
 caindac.

¹⁰Nuquin Papa tantiec bédamboec
 tabadsho utsin chieshënaid Nuquin
 Papan bédambo icmequin unēsacsho
 abëdi tabadmendac. ¹¹“Esus tantiaquid

nec,” qeshun utsin mibi chieshënquin chiacsho Nuquin Papan abèd tabadmenuen mibi bédambo icmendac. Mibi cueso adembidi mibi bédambo icmendac. Adembidi mibi muuasho Nuquin Papan mibi bédambo icmendac. ¹²Aden utsibon: “Esus tantiaquid nec,” qeshun chieshënaqui cuishonqueta. “Ènden tsusedpabon Nuquin Papan chiaid chuisho chieshënquin cuesunepampic. Adoacsho Nuquin Papan bédamboen isquin abèdi tabadmec. Adembidi utsibon chieshënacsho èbi bédamboen isquin unèsacsho abèdi tabadmendac,” quiaish cuishonqueta —quequin chuipondash Esusèn.

**Abi tantiaquido bédamboec
tabadte chiaid**

(Mad. 9.50; Duc. 14.34-35)

¹³Abi macuësh dapa poctse tsadquin Esusèn chuibampondash. —“Ma utsibotsen Nuquin Papa tantianu,” quec sa pambid casecac batambo yec petiadquio yac bimboec icta. Aden Nuquin Papan chiacpadec bédamboec tabadquin mimbi utsibo bédamboec tabadte bumetsiac. Sa batambo icquid bédambo iquec. Sa batambo icboedi batapenquio yec icsasho ùmitsipadentsi batambo icmeoapec? Adotiapimbo iquec. Sa icsambo yanacsho penquio icquin secatequid nec. Adembidi matses bédamboec tabadenquio yec icsambo icsho Nuquin Papan chian anèdënquiacno nèsecatequid nendac —quepondash Esus.

¹⁴Adashic padpidec onquec: —Nuquin Papan chiacpadec bédamboec tabadte utsibo tantiamequido mibi neque. Aden tantiamenuc bédamboec tabadta. ¿Nuntanshunda èapadic? Padenquio. Umanuschumbien ma tantianueshun èaquid. Adembidi: “Ma Nuquin Papan

chiacpadec tabadte tantianu,” quiaish ènèdenquio yec bédamboec tabadquin ismeta. Adsho isash: “Nuquin Papa tantiec bédamboec tabadquid nec,” quetsiash utsibo. ¹⁵¿Utsibo chuinuecta abentsëqui uano icpadic? Padenquio. “Ma nèidèn tantianu,” quec aibdèdi bédamboec tabadquin chuibanquid. ¹⁶Adembidi èbi tantiesabobèd tabadquin: “Ma Nuquin Papa tantianu,” quequin ènenquio icquin Nuquin Papan chiacpadamboen nata. “ ‘Nuquin Papa bédambo iquec,’ ma utsibotsen quenu,” qeshun adota —quequin Esusèn chuipondash.

Nuquin Papan Moises chuimiaid chiaid

¹⁷Nadentsen Esusèn chuipondash. —Èmbi chuibansho tantiashun: “Nuquin Papan chiaidquio chienquio iquec,” quequin tantienda. “Nuquin Papan Moises dada uamiampidbèdta con tsusedpabo utsibo dada uamiampid chienquio icquin utsi uapec,” mimbi èbi capec. Mambi utsi uainquio yoc. Nuquin Papan chiaid utsi uainquio icquin ambi chiactedimbo namenuc nebique. ¹⁸Abimbo chuinu. Tantia. Abubèdta nidaid nibèdamiabi icnuc Nuquin Papan chiaid bènudtiapimbo iquendac. Ambi chiactedimbo naquin Nuquin Papan nainendac.

¹⁹Padnubic Nuquin Papan: “Nadomboen nata,” quequin chiaid abentsëqui niacquid aid chiaidbidi adomboembidi niacmequid Nuquin Papan: “Bédambo icquid nec,” catiapimbo iquec. Utsibic Nuquin Papan chiacpadec tabadec: “Nuquitsen bédamboec tabadnuna,” quequid abi yacno nidacsho Nuquin Papan: “Bèdamboshè icquid nec,” caindac.

²⁰Moisesèn dada uampid chuibanquido padiseyobobèd Nuquin Papa yacno puduedtequidoen mimbi dampec. Aido

bëdambo icquid damianashi ompodash icsaic. Adashic Nuquin Papa yacno puduedtiapimbo iquendac. Adembidi Nuquin Papan chiaid niac-niaquec adecbidi Nuquin Papa yacno mibi puduedtiapimbo iquendac. Nuquin Papa tantiec bëdamboec tabadquidien puduedtsiash —quequin chuipondash Esusën.

Chieshëmënuquido nëish bëdante chiaid
(Duc. 12.57-59)

²¹Adshumbic Esusën padpiden chuiopondash. —Nuquin Papan chiaid chuiquin isadaidbo tsusedpabon: “Cuesunenda. Cuesunianquid Nuquin Papan chiapadomboen matses cuidte chuiquidën cuesunemequin cuidquid,” quequin chuiampid mimbi tantiec. ²²“Nadquidotsen cuidtequido nec,” quequin chuinu. Tantia. Aton matses nëishënash aton nëish bëdanenquio icsho Nuquin Papan cuidtequido nendac. Utsibic chieshëmënecc icsamboec cuëmënuquido isadaidbo tsusiobon cuidacsho isun: “Bëdamboen naic,” catsiambi. Nëidic aton matses chieshënquin shëpiaquid Nuquin Papan icsano nësecaquin cuidtequido nendac. ²³“Chieshëmënuquid Nuquin Papan cuidtequid nendac,” quequin ëmbi chuisho tantiashun bëdamboen nata. Nuquin Papa tabadte shubu uashunaidën puduedash: “Ambi chiapadomboen musuc menenu,” mibi quepec. Aden musuc menenumbi mimbi naid tantiata. “¿Ada ëbi chieshënquid icpec? ¿Ëmbi chieshëmeboedta icpec?” quequin tantiata. ²⁴Adshun: “Ai, ëmbi chieshëmeboed iquec,” qeshun Nuquin Papa tantiaquin mimbi bëboed meniabi mibëd chieshënamboed yacno nidash aidbëd bëdamboec onqueta. Adec bëdamboec onquiash padpidec choashun Nuquin Papa tantiaquin meneta. Adec

mibëd chieshënamboedbëdi bëdamboec onqueta.

²⁵Mibëd chieshënamboed utsimbic: “Nëid cuidmenuen cuidte chuiquid yacno buanchitembimbi iquec,” qeshun: “Baded nid,” cac podquedën nidec aidbëd bëdamboec onquenidta: “Ma nëish bëdanu,” quiash. “Matses cuidte chuiquidën cuidchitoshe,” quiash badedquio mibëd chieshënamboedbëd bëdamboec isnanta. Abi yacno buanacsho cuidte chuiquidën: “Icsambo iqueque. Quënën nauedta. Ëmbi chiacted piucquid ëmbi bedabi icnuc ma tsadpanu,” mibi catsiash. Quënën nauedshun ²⁶ambi chiacted piucquid nibëdnuc mibi cuemenquio ictsiash. Mibëd chieshënamboedbëdi bëdamboec onqueta. “Nuquin Papan adembidi cuidnushe,” quiash adta —quequin Esusën chuipondash.

Icsaquin chudaidd chiaid

²⁷Adshumbic naden Esusën chuipondash. —Chiaid utsitsen mimbi tantiec. “Min chidopenquio chudenda. Min bënëpenquio chudmenda. Aben uequid chudenda. Aben uequidën dada chudmenda,” quequin Nuquin Papan chiaid nuquin tsusedpan dada uapampic. ²⁸Aden chiaid niac-niaquec icsambo icquid icnubi nadquid icsambo icoaic. Aton chidopenquio isec: “Aidquio chudtiadquio icchitebi,” quequin otacquio tantiequi matses icsapec. ²⁹Ëshën isec mibi min chidopenquio bunec icsaic. Ëshë chichshuniacimboec icsainquio yec ënëdash mibi bëdambo ictsiac. Icsaid ënenquio icquid Nuquin Papan chian anëdënquiacno nësecaquin cuidendac. ³⁰Min chidopenquio chudte bunquin mëismec mibi icsaic. Mëteshuniac bedtiapimbo yacimboen mibi icsaid ënta. Ënenquio icquid Nuquin Papan

cuidendac —quequin Esusën
chuipondash.

Aton chidobëd cuëshëdte chiaid
(*Mat. 19.3-9; Mad. 10.11-12; Duc. 16.18*)

³¹Nadentsen Esusën chuipondash.
—Nuquin Papan Moises chuimiaid
utsitsen mimbi tantiec. “Aton chido
bunenuo icquin naden dada uashun
menequid. ‘Mibi intiapimbo yanobi,’
quequin dada uashun aton chidobi
menequin nidmequid,” quequin
Moisesën dada uapampic. ³²Utsitsen
chuiu. Aton chidon bënëpenquo
chudmesho istuidshun Moisesën
chiacpadomboen nac bëdambo ictsias.
Aton chido dada utsi chudmesa icshobi
dadan ambembi dada uaid menequin
nidmiac icsambo ictsias. Aden
nidmequin chido icsametsias. Chido
nidmiacsho bedquidtsen icsatsias
—quepondash Esus.

**Abimbo chiacbimboen chienda,
quequin Esusën chiaid**

³³Adshumbic Esusën padpiden
chuipondash. —Naden Nuquin Papan
ambi chiaid nuquin tsusedpa Moises
dada uamepampic. “‘Nuquin Papa utsi
uatiapimbo yacbimboen abimbo
caimbi,’ quequin chiaid niactemaid nec.
Niacsho Nuquin Papan cuidendac,”
quequin Moisesën chuiampic.
³⁴⁻³⁶Aidën chiacpadec muainquo
ictiadquid mimbi abimbo
chiacbimboen utsi uain icsamboen
chiec. “Abi cuëmëdquid cuënen
muasho ëbi cuidtsias. Nuquin Papa
cuëmëdquid cuënenquo yec muasho
Nuquin Papan ëbi cuidenquo ictsias,”
queshun mimbi utsi chiec. “Abu utsi
uatiapimbo yacbimboen ëmbi
chiacpadomboen naimbi. Muainquo
iquebi,” mibi quepec. Adecbidi: “Nidaid
utsi uatiapimbo yacbimboen ëmbi

chiacpadomboen naimbi,” mibi
queoapec. Adembidi chiec mibi
Edusaden queoapec. Adembidi con mapi
quequin mimbi chieque. Aden abimbo
chiacbimboen chienda. “Nuquin Papa
cuëmëdquid cuënenquo iccombi,” mibi
quenubi abu abi tabadaid icnuc
ashunquo Nuquin Papan abitedi
namendac. Nidaid Nuquin Papan
tincate nec. Edusaden yacnoshobic
Nuquin Papan chomiaidën bëdamboen
namendac yuecshun. ¿Min mapin
icboda mibi nedi? Padenquo. ¿Mimbida
min mapi masedcamedi? Padenquo.
Aton Icbombien Nuquin Papan naique.
Abimbo chiacbimboen icsamboen
chienda. ³⁷Adec muainquo icquin
abimbo chuita. “Ai, adembi naimbi,”
quequin mimbi chiacpadomboen nata
muainquo icquin. Adembidi: “Padi.
Natiapimbo iquebi,” qeshun mimbi
chiacpadomboen nainda. Utsi uaic
matses icsamequidën Satanasën
tantiamiacpadec mibi muapeque.
Adenda —quepondash Esus.

Chieshë nec cuidnanenda, quiaid
(*Duc. 6.29-30*)

³⁸Adashic padpidec Esus onquec:
—Nuquin Papan Moises chuiquin dada
uamiampid mimbi tantiaboed nad
iquec. “Chieshënquin ëshë ansiac
adecbidi cuidnanec ëshë ansenanquid.
Chieshënquin sëcsiac adecbidi
cuidnanec sëcsenanquid,” quequin
chiaid icnuc ³⁹utsitsen chuiu. Tantia.
Mibi cuesquid cuidenda. Chieshënaqui
cuidnanenquo icquin adembi
bëdamboen ista. ⁴⁰Min matses: “Ëbi
cuidquin mimbi ëbi meniampo iqueque.
Min dashcute beccho,” qesho mimbi
menenquo icsho isun: “Cuidte chuiquid
yacno buanshun dashcute
dachicmechitomane,” qesho aid
dashcute meneshumbic min dashcute

utsitsen chicshun meneta. Adec bédamboec tabadta. ⁴¹Utsibic: “Nëbi nidtuidquin con na buanec nid,” quequin ancabudac nëbi nidtuidenquio icquin udimbo buanshunta. ⁴²Aton na nibédquid: “Mitsana beccho,” qesho meneta. Utsibic: “Mitsana buanshun bëuaindami,” qesho: “Padi,” cainda. Meneta. Aden bédamboen nata —quepondash Esus.

Chieshënuquidobi bédamboen iste chiaid
(*Duc. 6.27-28, 32-36*)

⁴³Adshumbic abi macuësh dapa poptse tsadquin bédamboec tabadte Esusën chuipondash. Nuquin Papan Moises chuiquin dada uamiampid mimbi tantiaboed nad iquec. “Mibi tantiaquidombo tantiaquin mibi chieshënuquido chieshënta,” quequin chuiampic. ⁴⁴Utsi mibi chuinu. Tantia. Mibi chieshënuquidobi bédamboen isquin tantiata. Chieshënaqui: “Ëbi chieshënuquid bédamboen ista, Papa,” quequin Nuquin Papan chianeta. ⁴⁵Aden chianec Nuquin Papabimboec mibi ictsiac. Mibi utsibo bédamboen nashunquid ictsiac. ¿Bédambo icquido yacnoudida Nuquin Papan ushë chëncamepadic? Padenquio. Icsaido yacnotsen ushë chëncamec. ¿Bédambo icquido yacnoudida ue chomepadic? Padenquio. Icsaido yacnotsen ue chomec. Bédambo icquidobédtabi icsambo icquido Nuquin Papan bédamboen nashunec. ⁴⁶¿Mibéd tantiananquido min shubun icquidoudi mimbi bédamboen nashunsho isunda Nuquin Papan mibi: “Bédambo iquec,” capec? Padenquio. Mimbi icsambo iquec caidontsen ambi tantiaido nashuntsiash. Aidombien piucquid bedshumënuquido icquimbi aton shubun icquidoudi nashuntsiashe. Aden nainda. Utsibotsen bédamboen nashunta. ⁴⁷¿Min shubun

icquidobëduidida mibi onquec tabadpe? Nuquin Papa tantiesaboec adpec. Utsibotsen bédamboen ista. ⁴⁸Nuquin Papabimboec icta. Bédambo icquid icta. Bédambo icquidobédta icsambo icquidobi Nuquin Papan bédamboen tantiacpadomboen utsibotsen bédamboen tantiata —quepondash Esus.

Utsibo bédamboen nashunte chiaid

6 ¹Adshumbic abi macuësh dapa poptse tsadquin Esusën chuipondash. —Nadquid icsambo iquec. Nuquin Papa tantienquio icquimbi aton matses ismenuenuidi naic icsambo iquec. Adquid Nuquin Papan bédamboen istiapimbo iqueque. “Utsibo nashunu,” quequin utsibo ismenquio icquin nata. ²“Aton na nibédquido menenu,” qeshun utsibo ismequin menenda. Ismenquio icquin meniac bédambo ictsiash. “Nuquin Papa tantiaquid nebi,” quec muaquidën nacpaden nainda. Nuquin Papa tantiaquid damenuembien muaquidën matses dadpen yacnoshonuidi menedenepec. Adosho isun aton matsesënuidi bédamboen isnubi Nuquin Papan bédamboen istiapimbo iquec. ³Aton na nibédquido menequin utsibo ismenda. Meneshun: “Menebanombi,” quequin utsibo chienda. ⁴Adsho isun mimbi utsibo ismenquio icquin naid tantiaquid icquin Nuquin Papan bédamboen isquin abëdi mibi tabadmendac —quequin Esusën chuipondash.

Nuquin Papa chianete Esusën chiaid
(*Duc. 11.2-4*)

⁵Adshumbic Nuquin Papa chianetetsen Esusën chuipondash naden. —Bédambo icquid damianquidën nacpaden nainda. Aidon Nuquin Papan

chiaid chuibante shubun puduedshun
 utsibo tantiamenuuidi nidtoshon
 comapenec onquequin Nuquin Papa
 chianepec. Adash umanuc puduenshun
 matses dadpen ismenuuidi padpiden
 adembidi chianec. Adquid aton
 matsesën: “Bëdambo iquec,” canubi
 Nuquin Papan padenquio iquec.
 Bëdamboen istiapimbo iquendac. ⁶Mibi
 adenda. Utsibo ismenuuidi nainquio
 icquin matsesën isacmaidquio Nuquin
 Papambo tantiaquioquin chianeta. Aden
 chianequid mibi icsho Nuquin Papan
 mimbi utsibo ismenquio icquin naidtedi
 tantiaquid icquin mibi bëdamboen
 isquin abëdi tabadmendac.

⁷Nuquin Papa chuiquin bëdamboen
 chianeta. Nuquin Papa tantiesabon ambi
 tantiaid chuibudac bimboen Nuquin Papa
 chuibudenda. “Yuenquio chuibudac
 nuqui tantiaboedën nuqui nashuntsiash.
 Padenquio icac nuqui nashunenquio
 ictsiash,” qeshun Nuquin Papa
 tantiesabon yuen chuibudac bimboen
 nainda. ⁸Adoenquio icquin Nuquin Papa
 chianeta. Mimbi chiabi: “Adopashuni.
 Aid nibëdnuc unësebi. Utsi icnuc
 bëdambo ictsiabi,” quequin mimbi
 otacquo tantiaid Nuquin Papan
 tantieque. ⁹Naden Nuquin Papa chuita.

“Bëdamboshë icquid icsho matses
 abitedishunquio mibi
 tantiapashun, Papa.

¹⁰ Matses abitedishunquio mibi con
 Ibo capashun. Mibi yacnoshon
 mimbi uaido mayan bëdabon
 mimbi chiacpadomboenuidi naic.
 Adomboembidi mimbi
 chiacpadomboen matses
 abitedishunquio napashun.

¹¹ Bumianenda, Papa. Badiadquidën
 badiadquidënquien con pete
 icmeta.

¹² Utsibon chieshënaqui ëbi
 cuidnanenquio icsho isun ëbi

icsashobi cuidenquio icquin ëbi
 bëdamboen ista, Papa.

¹³ Mimbi chiaid ëbi niacmenda, Papa.
 ‘Icsamenushe,’ qeshun Satanasho ëbi
 yuamenda, Papa.

Abitedishun Icbombo yec
 abitedimbo namequidquio mibi
 nec, Papa.

Ëmbi mibi chuisho tantiata, Papa.
 Ënenquio icquin abitedishunquio:
 ‘Bëdambo iquec,’ mibi capashun.
 Padi,”

quequin Nuquin Papa chianeta
 —quequin Esusën chuipondash.

¹⁴ Adashic nadpondash: —Utsibo
 bëdamboen ista. Cuidnanec
 chieshënanenda. Cuidnanec
 chieshënanenquio icsho isun Nuquin
 Papan mibi cuidenquio icquin
 bëdamboen istsiash. ¹⁵Cuidnanec
 chieshënanasho isun Nuquin Papan mibi
 bëdamboen istiapimbo ictsiash
 —uequin Esusën chuipondash.

Buna mëmunte chiaid

¹⁶ Adshumbic utsibo ismenquio icte
 utsi Esusën naden chuipondash.
 —Tantia. Nuquin Papauidi
 tantianuequin buna mëmunquid chuinu.
 Muaquidën nac bimboen ismenda.
 Muaquido: “Buna mëmunquid nec,”
 aton matses camenuc abibi
 maniumëdash nënquidbitsëcquiec
 mamënenquio iquec. Adec buna
 mëmunquid tanec muaic. Adsho isun
 matsesën bëdambo icquid danubi
 Nuquin Papan: “Icsambo icquid nec,”
 qeshun bëdamboen istiapimbo iquec.
¹⁷ “Nuquin Papauidi tantiaquin
 nëidtedec ushquin buna mëmunu,”
 qeshun Nuquin Papambo tantiaquin
 nata. “Utsibon tantianushe,” qeshun
 bëdamboen min manëdaid shueshcata.
 Adash bëdamboec mamënta. Aden
 utsibo ismenuuidi nainda. ¹⁸ Aden

bëdamboen manëdaid shueshcaid isun:
 “Buna mëmunec nec,” cainquo ictsiash
 utsibon mibi chuiquin. Nuquin
 Papambien: “Ëbiuidtsëqui tantianuen
 naic,” quequin tantiatsiash. Adshun
 mimbi utsibo ismenquo icquin naidtedi
 tantiaquid icquin abëdi mibi
 tabadmendac —quequin chuipondash
 Esusën.

Nuquin Papa yacno tabadte bunta, quiaid
(Duc. 12.34)

¹⁹Adshumbic padpiden Esusën
 chuipondash. —Ëmbi chuiboedquo
 tantiashun mimbi dayun uatequiduidi
 tantienda. Dayun uatequid nadquo
 iquec. Chodquetequid yec shocosh
 chiuidtequid yec matsesën
 ampeshuntequid yec quec icsabudtequid
 nec. Adquiduidi tantienda.

²⁰Icsabudesambo tantiata. Nuquin
 Papambo tantiec aibëd tabadte
 bunquin ambi chiacpadomboen nata.
 Chodquetiapimbo icquid yec
 shëñibudtiapimbo icquid yec quec
 Nuquin Papa yacno iqueque. Aidquo
 tantiata. ²¹Mibi bunaidquo ënenquo
 icquin tantiec mibi tabadtsiac. Nuquin
 Papabëd tabadte bunquin aid tantiata
 —quepondash Esus.

Pabiate shëcuë cuembo icquid chiaid
(Duc. 11.34-36)

²²Adshumbic abi macuësh dapa
 poptse tsadquin utsitsen Esusën
 chuipondash. —Pabiate shëcuë cuembo
 icquin Nuquin Papa tantiaquie
 mitsanauidi tantienquo yec mibi
 bëdamboec tabadtsiac. ²³Pabiate
 cuënëdacbimboec yec Nuquin Papa
 tantienquo yec mitsanauidi tantiec
 ðbëdamboecta tabadtsia? Padenquo.
 Adec mibi icsamboec tabadtsiaque.
 Aenda —quequin chuipondash Esusën.

Bedteuidi tantienda, quiaid

(Duc. 16.13)

²⁴Adshumbic naden Esusën
 chuipondash. —Mitsanauidi tantiec
 mibi icsamboec tabadtsiac. ð“Naic cho,”
 quequin daëdshun chiacta aid daëdi
 mimbi nashumpatsia? Padenquo mimbi
 ictsiac. Abentsëc nashunquin utsin
 chiaid mimbi natiapimbo ictsiac. Aden
 mitsana bedtequiduidi tantiaquin aid
 bednuenuidi mimbi natsiac. Aden
 naquin Nuquin Papan chiacpadomboen
 mimbi natiapimbo ictsiaque. Mitsana
 bedteuidi tantienda. Nuquin
 Papauidtsëqui tantiata —quequin
 Esusën chuipondash.

Nuquin Papan abi tantiaquido dayun uaid
(Duc. 12.22-31)

²⁵Adshumbic Esusën padpiden
 chuipondash. —Ëmbi aden chuisho
 tantiash dacuëndenda. “ËAtotsimbi pepe?
 ðAtotsimbi acpe? ðAtotsimbi dasiuidpe?”
 quec dacuëndenda. Nuquin Papan nac
 unësabi mibi tabadeque. Aidëmbien
 petebëdta dasiuidte icmeque. “Con na
 nibëdtsiash,” quiash dacuëdec
 tabadenda. ²⁶ËUicchunënda ambibi
 cuëte ëshë siac bacuëacsho chepadic?
 Padenquo. Adecbidi ambi pete dayun
 uatequid shubumpi nibëdec. Adquid
 icsho Nuquin Papan aton pete bedmec.
 Uicchun abipadquidpenquo icshobi
 aton pete Nuquin Papan bedmec. ðAd
 icnuc ambi abipadquid uaidobi matses
 icsho aton pete bedmenquioda icpadic?
 Nuquin Papan mibi nashunquin min
 pete icmeque. Dacuëndenda.
²⁷Ë“Unëstiapimbo iquebi. Dacuëdebi,”
 quequidta unësenquo icpadic? Adequi
 dacuëdquid unëstiashe. Unësteuidi
 dacuëndenda.

²⁸“ËAtotsimbi dasiuidpeba?” ðquecta
 mibi dacuëdec tabadpe? Tantia. Chuinu.

“Cuëte bacuëec bédamboshë isadtsec,” quepec nuquin matses. ¿Aton sedquidi shoyontsécshun abi dasiuidte daëdcash dasiuidtsashta bédamboshë isadpadic? Padenquio. Nuquin Papan uacpadquiobi iquec. ²⁹¿Cuëte bacuëec bédamboshë isadquidbimboecta nuquin tsusedpa chuiquid dapa Sadomon cuëmëdquidën dashcute icpampic? Padenquio. Adpenquien icpampic. ³⁰Cuëte bacuëec bédamboshë isadboed abadiadtsécshumbi isac ënden chodquiac. Aid badedquio chodquequid nec. Ad icnuc ¿abipadquid Nuquin Papan uaido mibi icsho mibi dasiuidte bedmenquioda icpadic? Padenquio. Mibi dasiuidte icmeque. Dacuëdenda. Mitsana nibëdquio icte dacuëdënquimbi mimbi Nuquin Papa bëdiactsëc tantiatseque. ³¹Dacuëdec tabadenda. “¿Atotsimbi pepe? ¿Atotsimbi acpe? ¿Atotsimbi dasiuidpe?” quec dacuëdenda. ³²Nuquin Papa tantiesaboen adquid bedteuidi bunquieque. Adenda. Mitsana nibëdsho isun Nuquin Papan mitsana icmetsiashe. Abi tantiaquido yec dacuëdec tabadenda. ³³Adenquio yec: “Con Icho mibi nec, Papa,” quequin ambi tantiacpadec bédamboec tabadte bunta. Adec tabadec: “Aid nibëdnuc enësebi,” quequin mimbi tantiaidtedi Nuquin Papan mitsana icmetsiashe. ³⁴Ëbi adsho tantiashe badiad utsi caic: “Aid badiadën ¿atotsimbi nape?” quec dacuëdenda. Aid badiadën Nuquin Papan ambi tantiacpadomboen mibi nametsiashe. Nëid ushëmbi: “Naden naimbi,” quequin tantiec tabadnuna dacuëdenquio yec —quequin chuipondash Esusën.

Utsibo icsaid chienda, quiaid

(Duc. 6.37-38, 41-42)

7 ¹Naden Esusën Nuquin Papan chiapadec tabadte chuipondash. —Mibi icsaid ucudambobi utsibo

icsaiduidi chienda. Adembidi Nuquin Papan: “Icsambo iquec,” mibi canushe. ²“Icsambo aid iquec,” mimbi cac adembidi aidontsen mibi adoatsiashe. Adembidi Nuquin Papantsen: “Mibi icsambo iquec,” canushe. Utsibo icsaiduidi chienda. ^{3,4}¿Abi bëtsiadaid bëchish nua bëuequid bëbedadabi icquidënda: “Mibi bëtsiadaque. Bëbednu,” capatsiashe utsi chuiquin? Padenquio. ⁵Abi bëtsiadaid abia bëbedadashien: “Mibitsen bëbednu,” quetsiashe. Adembidi mimbia mibi icsaid ënshun: “Icsaid ënash bédamboequien tabadtiad,” quequin utsibo bédamboen chuita. Bédambo icquid damianquidën abi icsaid ënabi: “Aid icsambo iquec,” quequin utsibo icsaid chuibanec. Adquid tanenda. ⁶Mimbi bédamboen chiaqui tantienquio icsho chuidonenda. Nuquin Papan chiaid chuibudaqui tantiatiapimbo icquin niac-niacsho isun adenuidi chuidonenda. Opa icsan abi pemequid piacimboen mibi chieshëntiashe. Chancon icbon dashcute nebudshun bëchish uaquin tin-tincacimboen Nuquin Papan chiaid niac-niactiashe. Adquid chuidonenda —quepondash Esus.

Ënenquio icquin Nuquin Papa chianete chiaid

(Duc. 11.9-13)

^{7,8}Nadembidi Esusën chuipondash. —Nuquin Papa ënenquio icquin chuidoneta. Bacuëbon: “En na,” cadoniacimboen chuidonia Nuquin Papan mibi tantiatsiashe. Adembidi: “Ëbi bédamboen name, Papa,” mimbi cacpadomboen bédamboen mibi nametsiashe. Adembidi: “Ëbi nashunquin ëbi bédambo icmeta, Papa,” quequin chuidoniac Nuquin Papan mibi bédambo icmendac.

⁹¿Icsambo icquidta Nuquin Papa icpadic? Padenquio. Bédambo

icquidquo nec. Bacuëmpi:
 “Bundobique. Penu. Beccho, papa,”
 ¿queshoda amèn cudasenquin cuënotebi
 menepadic? Padenquo. ¹⁰¿Adembidi
 aton bacuën: “Nuëcquid chenu. Beccho,
 papa,” cacta cudasquin nisimbo
 menepadic? Padenquo. ¹¹Matses yec
 icsaquito icquimbi min bacuëbo abimbo
 mimbi menenubien Nuquin Papan ambi
 uaido matses: “Èbi nashunta, Papa,”
 qesho tantiashun bédamboen
 nashuntsiashe. Nuquin Papa chianeta.

(*Duc. 6.31*)

¹²Nuquin Papan tantiaido icquin utsibo
 bédamboen isquin bédamboen nashunta.
 Utsibo caic: “Aidon nashumpashuni,”
 quequin mimbi otacquo
 tantiapadomboembidi utsibotsen
 nashunta. Aden Nuquin Papan chiaid
 Moisesbëdtan nuquin tsusedpabo utsibon
 dada uaquin chiampicpadomboen mimbi
 natsiaque. Aden utsibo nashunta
 —quequin chuipondash Esusën.

Daëdpactsëcshun Esus tantiabente chiaid

(*Duc. 13.24*)

^{13,14}Adshumbic Esusën naden
 chuipondash. —Nuquin Papabëd
 tabadnuec aid tantiec bédamboec
 tabadta. Shëcuë aniambo icquidën matses
 abentse-abentsec puduedacimboec
 abentse-abentsec Nuquin Papa yacno
 puduednuec aid tantiec bédamboec
 tabadec. Padnuen antied dapan abi mai
 nidadacimboec matses dadpenquo abi
 tantiesabo yec Nuquin Papan icsaido
 nësecacno nidendac —quepondash Esus.

**Icsambo icquid nec,
 quequin tantiate chiaid**

(*Duc. 6.43-44*)

¹⁵Abi macuësh dapa poctse tsadquin
 naden Esusën chuipondash. —Utsibo:
 “Nuquin Papan chiaidquo chuiquid

nebi,” quec bédambo icquid damianquid
 iquendac. Adquid choshon Nuquin
 Papan chiaid niac-niacmequin
 icsamendac. Bëdi dapa nëish yua pete
 bunquiacimboec mibi icsamete
 bunquieque. Adquidën chuisho
 tantienda. ¹⁶“¿Mitsipadembimbi
 muaquid tantiapatsia?” ¿quecta ique?
 Ambi naid isun mua quequin mimbi
 tantiatsiac. Adembidi Nuquin Papan
 chiaidquo chienquo icscho tantiashun:
 “Utsi uain chiec,” mimbi catsiac.
 Chetequid isun cuëte dada matsesën
 tantiec. Aden tantiec nisanquidën bacuë
 bësho isash: “Dadainën bacuë nec,”
 quesa matses nec. Adecbidi echo bacuë
 bësho isash: “Bata nec,” quesa matses
 neoaic. ¹⁷Cuëte bédan bacuë adquiobidi
 bacuëec. Cuëte icsan bacuë adquiobidi
 bacuëoaic. ¹⁸¿Cuëte bédan bacuë
 chetemaidda nepec? Padenquo. ¿Cuëte
 icsan bacuë chetequidta icpec?
 Padenquo. ^{19,20}Chetemaiddimboec
 muaquid bédambo ictiapimbo iquec.
 Nuquin Papan chiaid niac-niaquec
 icsamboec tabadsho isun: “Muaquid
 nec,” quequin mimbi tantiatsiac.
 Adembidi Nuquin Papan chiaidquo
 chienquo icscho: “Muaquid nec,”
 quequimbidi mimbi tantiatsiaque.
 Adquidën chuisho tantienda. Cuëte
 bacuëesa dëdshun nëdëncacimboen:
 “Nuquin Papan chiaid chiemi,” quec
 muaquid Nuquin Papan icsaido cuidacno
 nësecaindac —quepondash Esus.

**Nuquin Papa yacno puduednu,
 queuidte chiaid**

(*Duc. 13.25-27*)

²¹Utsitsen Esusën chuipondash. —Èbi
 caic: “Con Icbo mibi nec. Mibi
 tantiambique. Mibi yacno èbi puduedme,”
 ¿quequidtedida Nuquin Papa yacno
 puduedpatsiashe? Padenquo. Nuquin
 Papan chiacpadomboen naquidquien abi

yacno puduedtsiash. ²²Nuquin Papa yacno ëmbi yuedte ushën matses dadpeshun ëbi chuiuidendac. “Con Ico mibi nec. Mibi caic: ‘Aidën namiaidquo nebi,’ quequin dadpen naombi. Nuquin Papan chiaid chuiquinc, podobitsi icsabo matses dapuduedaido cuemequinc comapenen tantiaquin ismequinc caombique. Nuquin Papa yacno ëbi puduedme,” ²³quesho ëbimbo tantiec Nuquin Papan chiacpadec bédamboec tabadabi icsho: “Ëmbi tantiacmaidquo mibi neque. Baded cuenta. Icsamboec tabadquid mibi neque,” caindambi. Ëbi adsho tantiash muainquo yec bédamboec tabadta —quepondash Esus.

Shubu uaquidbimboecquid chiaid

(Duc. 6.47-49)

²⁴Adshumbic Esusën padpiden chuipondash naden chuiquin. —Ëmbi chiacpadomboen nata. Aden mimbi bédamboen natsiaque. Shubu uaquin bédamboen tantiaquidbimboec mibi ictsiaque. Tantia. Chuinu. Bédamboen tantiaquidën mananënquo shubu uaquin buintad nitsinquid. ²⁵Aden shubu uan ue dapa conquequidbëdi chonoc shubu chimeshadenquo icquid. Shubu nuntan anchiuidenquo icquid. ²⁶Aden ëmbi chiacpadomboen naquid icnubi utsibo ëbi tantiesa iquendac. Aido shubu uaquin tantienquo icquidbimboec iquec. Tantienquo icquidën nadoquid. Acte cuidi cuëmanquiobi shubu uaquin badedi unëstsëcquidquo cuate nitsinquid. ²⁷Adquid nitsinaid ue dapabëd conquequid choquin shubu chimeshquid. Adecbidi acte cubudtoquidën shubu nuntan mauanquid. Aden tantesa uatsëcquidbimboec ëbi tantiesa iquec. Adquid Nuquin Papan cuidtequido neque. Ëbi tantiata —quequin chuipondash Esusën.

(Mad. 1.22)

^{28,29}Adsho tantiash: —Ma comapenen tantiaquidquo Esus neyoc. Nuquin matses tsusiobon Moisesën chiampid bëdiactsëc tantiatsëcquin chuitsëccosh. Padnuen Esusënquo comapenen tantiaquin chuiplash —quecuededpondash matses dadpenquo.

Esusën daicsaid bédamiaid

(Mad. 1.40-45; Duc. 5.12-16)

8 ¹Ambobi macuësh poctse tsadquin ënquin chuitanequien Esus macuësh budpondash. Adec budanec nidsho isumbien matses dadpeshun tsibanampondash.

²Adnubien dada ushumbo yec daicsaidquo choshon Esus ismenuen danëshën sebudpondash. —Ëbi bédamete bunquin mimbi ëbi bédametsiaque. Ëbi bédame, Ico —caquien Esus: ³—Ai, mibi bédamete bunebi. Mibi bédanendac —quequin mishtemaidquiobi mishnubi badedquo bédampondash daicsaid nibëdquiec. ⁴Adsho Esusën: —Utsibo chienquo yec nëish yua abided nës uaquido ismenuec nidta. Mibi isash: “Bédamiaid nec,” quequin ma aidon tantianu. Moisesën chuiampicpadomboen nanuen: “Nuquin Papan bédamioshi,” quequin Nuquin Papa menetequid buanquin ismec nidta —quequin Esusën chuipondash. Adtanec shubu dadpen icquid Capednaun caid yacno chopondash Esus.

Sondado chuiquid dapan yua Esusën bédamiaid

(Duc. 7.1-10)

⁵Capednaun yacno choash Esus tabadpondash. Adnubien Doma yacnoquido sondado 100ted chuiquid dapan Esus chuituidpondash. ⁶—Tantia.

Chuinu, Icbo. Con shubun icquid con yua shëquëquenquo iccosh. Natiambo yec unëstiadtsëcquo iccoshe. Bëdameta ⁷—quesho tantiashun: —Ai, bëdamec nidnu. Nid —caquien: ⁸—Padi. Mibi bëdamboshë icquidquo nec. Èbibi icsactsëcquid icquin mibi con shubun puduedmetiapimbo iquebique. Nëshunquiobi bëdameta. Nidenquo icquin nëshunquiobi mimi: “Bëdanta,” cac con yua bëdantsiashe. Mimi tantiapadomboen namequidquo mibi nec. ⁹Èbibi chuiquid dapan namiac sondado utsibo namequid nebi. Èmbi: “Nid,” cac badedi nidec. Èmbi: “Baded cho,” cac badedquo choec. Con yuan èmbi: “Nata,” cac èmbi chiapadomboen naic. Mibi adquidquiobidi neque. Con yua bëdameta —quepondash sondado chuiquid dapa.

¹⁰Adsho tantiashun Esusën abi tsibambëquido chuipondash. —Bëdamboen nëidën chuipec. “Comapenen tantiaquin chuiquinuidi con yua bëdametsiashe,” quequin èbi bëdamboen tantiaquid nec. Isadaidbo adquid nibëdec. Isadaidbon èbi bëdiactsëc tantiabededtsec. ¹¹Tantia. Chuinu. Matses utsi icquimbi sondado chuiquid dapan èbi bëdamboen tantiec. Adec nidaid utsi-utsiec yacnoquido isadaidpemo èbi tantiaquido yanash Nuquin Papa yacno puduedendac. Ambo puduedash isadaidbo tsusedpabobëd tabadendac. Abadauan caid yec Acobo caid yec Isac caid yec quequidobëd tabadendac. ¹²Padnuen Nuquin Papan con matses caido isadaidbo dadpenquo Nuquin Papa yacno puduedenquo iquendac. Abi tantiesabo icsho Nuquin Papan cacumequin icsaido nësecacno mibi nidmendac. Adoac mibi tènquebudquiendac —quequin abi

tsibambëquido isadaidbo chuipondash Esusën. ¹³Adshumbic sondado chuiquid dapa chuiquin: —Nidec nid. Mimi tantiapadec min yua bëdaneque —cac nidshun isquien bëdanac Esusën chuibocpadequi.

Petedon nachi Esusën bëdamiaid

(*Mad. 1.29-31; Duc. 4.38-39*)

¹⁴Adash yuec-yuecpactsëc ictanec Esus Petedon shubun puduedpondash. Puduedshun isquien Petedon nachi chumbo yec ueten uepec. ¹⁵Uesho istuidshun mëdinquin Esusën bëdamepondash. Aden bëdamiac Esus pemepondash.

Esusën matses dadpen bëdamiaid

(*Mad. 1.32-34; Duc. 4.40-41*)

¹⁶Petedon nachi bëdamiaid inchëshbudtsëqui Esus ismenuequin matses daicsaido dadpen bë-bëpondash. Bë-bëshobien podobitsi icsa dapuedehaido comapenec cuëdquin cuemeshumbic daicsaidotsen Esusën bëdamebampondash. ¹⁷“Nuqui icsaid ucquin nuqui daicsaidobi bëdamiac,” quequin èndenquo Nuquin Papan Esusën nate Isayas dada uamepampicpadomboen nanuen adopondash Esusën.

Abëd icte bunquido Esusën chiaid

(*Duc. 9.57-62*)

¹⁸Adashic abi isnuec matses dadpenquo datsidadsho isash abëd icquido chiec: —Chian potec nidnu. Nid —quianec chian yacno nidec puduampondash Esus. ¹⁹Puduanec nidaneshobien Moisesën dada uampid chuibanquidën Esus chinuntuidpondash. —Con Icbo mibi caindambi. Mibëd nidendabi —caquien: ²⁰—ÿÈbëdta nide? Tantia. Mibi chuinu. Bëdi chëshë shëcuën ushquid. Uicchun shubu uash

abuc ushquid. Padnueni con shubu nibëdnuc Nuquin Papan matsesmiaid yec quenenenquio yec capucuenendac. ¿Ada mibi adpatsia? —capondash Esusën Moisesën chiampid chuiquanquid chuiquin.

²¹Adnubien abëd capucueboed utsin: —Chiata, Icho. Con pa unësoshe. Chococatambono —caquien: ²²—Padi. Cho. Ma unësaidën tantienquio yacimboen ëbi tantienquio icquidon ma papa chococanu. Èbëdta bëdamboen naic cho —capondash Esusën amë unësaid chuiquin. Adobidanec nidanepondash chian yacno.

**Natiambo cunquenuc acte tèccuasquiaid
Esusën ënëdmiaid**

(*Mad. 4.35-41; Duc. 8.22-25*)

²³Chian budash Esus chedo cano antabëdtopondash. Adashic potenuc puduampondash. ²⁴Aden potenubi nënantanquio icnuc cunquetuidpondash. Adnubien acte comapenc tèccuasquiampondash. Adec acte tèccuasquenuc cano acte ancushad-ancushadquiec yampondash cano mentoadtiadtsëcquio yec. Adsho isun abëd icquidon: —Dacuëdampambo iquec —quetanquin isquien Esus ushpec.

²⁵Adshobien tinquin: —Nuqui mentoaddeque. Isucun, Icho. Baded ëbi nashun —caquien: ²⁶—¿Atotsi quiash dacuëde? Èbi bëdiactsec tantiatsec dacuëdquidquio mibi neque. Istac —quetanec nidtoshon actebëdtabi cunquequid chuipondash. —Padi. Ènëdta —caquien natiambo cunqueboedi badedquio ënëdpondash cano mentoadtsenquionobi. Actetsen tèccuasquenquio yampondash. ²⁷Adsho isashien: —¿Mitsipadquidënquio actebëdta cunquequid ënëdmepashba? —quecuededpondash Esusbëd icquido.

**Dada daëd dapuduedaido podobitsi
icsabo Esusën cuemiaid**
(*Mad. 5.1-20; Duc. 8.26-39*)

²⁸Aden chian potiash pudundonobien Cadada yacnocquid podobitsi icsa dadpen dapuduedaid dada daëd choshon Esus chuituidpondash. Aid daëd unësaido chococaid shëcuëmbi tabadpondash. Matses cuesunete bunquieac dacuëdampambo icsho isash aid yacno matses nidenquio icpondash. ²⁹Aidon podobitsi icsabon oncamiacpadomboen comapenec cuëdquin Esus chuituidpondash. —¿Nuquin Papa caidën Madombo icquin ëbi natiamequin cuidnuecta cho? ¿Nuquin Papan cuidte ushë choabi icnubida ëbi cuide? —capondash dada daëdshun abi oncamequidën chiaid chuiquin.

³⁰Uano chancho dadpeshun natiacquin udquin pebededpondash.

³¹Adnubien podobitsi icsabon aid dada daëd oncameoac: —Èbitedi cuemiac chancho icbo-icboec dapuduedtsiabi —quecuededpondash podobitsi icsabo.

³²Adsho tantiashun Esusën: —Ai, mimbi tantiacpadecec nid —cac nidash chancho icbo-icboec dapuduednubi chancho abitedi macuësh budec acte nësebudec mentoadbudnepondash nibëdquiec yec. Adec podobitsi icsabo dapuduenanec nidnubi dada daëd bëdambo yampondash.

³³Adsho istanequien chancho pemequido aton matses chiech niquianec shubu dadpen yacno nidanepondash. Chancho mentoadbudneboedbëdta podobitsi icsabo dapudueboed uesquin chuituidpac caondash. —Nuqui dacuëdëmoedobi bëdambo yanosh —quequin ³⁴chuituidaquien anocquido abitedi Esus isec cho-chopondash. Adec cho-choshobien: —Dacuëdampambo

mibi iqueque. Ĕbi yacno choenda. Nidec nid —cabededpondash. Adoac Esus nidpondash.

Shëquëquenquo icquid Esusën bëdamiaid
(*Mad. 2.1-12; Duc. 5.17-26*)

9¹—Nid —cac nidanec chian budash cano antabëdtoshon chian potiash abi iccondacnobidi Esus choapondash. ²Adnubien utsibon dada shëquëquenquo icquid Esus ismenuen aton uetechobi bëpondash. Bësho isumbien Esusën: —Ĕbi caic: “Aidën bëdametsiash,” qeshun bëac —quequin daicsaid chuipondash naden. —Dacuëdenda, madosio. Ambi chiaid niac-niaquec icsaboedi cuidmenquo icquin Nuquin Papa mibi bëdamboen ismembique —capondash Esusën.

³Adsho tantiaish aid datsidadash tabadquido Moisesën dada uampid chuibanquido: —ĔAdpecta matses icquid? “Nuquin Papapadquidquibini nec,” quepequien iquec. Icsamboen chiec —quecuededpac caondash Esus caic.

⁴Uanuësh adsho ambembi tantiaishumbien Esusën aido chuipondash. —ĔAtotsi quequin mimbi ëbi chieshëmpe? ⁵Ambi namiaid icquin ëmbi: “Nuquin Papa cuidmenquo icquin mibi bëdamboen ismembi” cac Nuquin Papan nëid cuidenquo iquendac. Adembidi ambi namiaid icquin ëmbi: “Caputa,” cac nëid capuendac. ⁶Istac. Mibi ismembique. “Nuquin Papan chomiaid nec. Icsaidobi Nuquin Papa bëdamboen ismequid nec,’ mabi canu,” qeshun naimbique. Istac —quetanquin dada shëquëquenquo icquid chuiquin: —Caputa —capondash Esusën. ⁷Adoac bëdanash aton shubuno nidpondash. ⁸Adsho isashien: —Adquidshenda nepec. Nuquin Papan namiaid icquimbien adochitec. Abi

namequid Nuquin Papa bëdambo iquec —quecuededpondash isquido.

Ĕbëd iquec cho, quequin
Esusën Mateyo chiaid
(*Mad. 2.13-17; Duc. 5.27-32*)

⁹Adnubini con matses aton piucquid bedshunuec podqued cuëman tsadquid shubumpin tsadpondac. Con matses yuaquid ancaquid dapan: —Min matsesën na ëmbi chiactedi piucquid bedshun ëbi meneta —cac niondabi. Ambo tsadshobini Esusën istuidpondash. Istuidshumbini Esusën: —Nuquibi icnu. Cho —capondash. Adoac badedi tsibananec ¹⁰nidequi con shubun Esusbëd puduedpondabi.

Adec puduedsho isashien matses dadpen pudued-puduedpondash. Esusbëd pec tabadnuec ëbëdtan piucquid bedshunquidobëdi con matsesën: “Icsaido nec,” caidombo pudued-puduedpondash. ¹¹Adsho isumbien Esus chieshënquido Padiseyobo caidon Esusbëd icquido chuituidpondash. —ĔAtotsi quiash mibi chuiquid Esus caid icsaquidobëdi pec tabadpec? Icsambo iquec —capondash Esus chieshënquidon.

¹²Adsho tantiaish Esus nadpondash. —ĔBëdambo icquidta dauëchoquidën dauë menepadic? Padenquo. Ma daicsaidi dauëchoquidën menepaid yoc. Adembidi icsaidobi abi icsaid ucquin bëdambo icmenuc nebi. ¹³Nuquin Papan naden dada uamiampid pausudshun bëdamboen naic nid. “Ĕmbi chiacpadomboen abentse-abentsen mimbi naic. Adoquimbi ëmbi chiaid utsi niaquec mimbi icsaido caido mimbi bëdamboen istiapimbo iquec. Adsho isun: ‘Mibi bëdambo iquec,’ catiapimbo iquebi” quequin Nuquin Papan dada uamiampid pausudta. Ĕbibi matses bëdamboen ismequid nebi. Muaquido:

“Bëdambo icquid nebi,” qesho
bëdambo icmetiapimbo iquebi.
Icsaquidobi: “Nuquin Papan chiaid
niac-niaquec icsapobi,” qesho:
“Icsainquio yec ënëdta,” canuec nebi
—quepondash Esus abi chieshënquido
chiec.

Esusën buna mëmunquido chiaid

(*Mad. 2.18-22; Duc. 5.33-39*)

¹⁴Adnubien Uan acten
mentoanquidbëd icquidon choshon Esus
chuituidpondash. —Nuquin
tsusedpabon nacpadomboen Nuquin
Papauidi tantianuen buna
mëmunquidquio nebi. Padiseyobo
adembi naquidquio nec. ¿Atotsieshun
mibëd icquidon aden nainquio icpec?
¿Natiapimboda iquec? —caquien ¹⁵Esus
nadpondash. —¿Icbon: “Pec cho,” cacta
aid tantiec sedenquecuededquin buna
mëmumpadic? Padenquio.
Adquidbëd tan pec cuishonquec
tabadquid. Ico nibëdanan
sedenquecuededquin buna mëmunquid.
Ëbi nibëdanan ëbëd icquidon ëbiuidi
tantianuen buna mëmunendac
—quepondash Esus.

¹⁶Adshumbic Esusën naden
chuipondash. —Dashcute chuca
cuëshun dashcute shëni
nedesquiaidbëdta tuscaisa. Aden
tuscashun panac shëni badedquio
nedesquequid. ¹⁷—¿“Machi sandono,”
qeshun tsitsan shënimbida sandopadic?
Padenquio. “Machi sebudnushe,”
qeshun tsitsan shënin sandoenquio
icquid. Tsitsan chuca daëdcashumbien
machi sandoquid —quepondash Esus.
—Adembidi tsusedpabon: “Naden nata,”
quequin chiaid chienquio icquin ambi
bëdamboen iste chuiquin Nuquin Papan
chiaid utsi chiec nebi —quequin tantiec
adpondash Esus Uan acten
mentoanquidbëd icquido chiec.

**Champi uincuemaiidbëdta
chido bëdamiaid**

(*Mad. 5.21-43; Duc. 8.40-56*)

¹⁸Aden chuishobien Nuquin Papan
chiaid chuibante shubun tabadsho
isquid dapan chuituidpondash. —Con
champi unëstiadtscëquio iccoshe.
Mishec cho. Mimi mishac bëdantsiashe
—capondash. —Mibi con Ico canu
—quequin danëshën sebudquin
ismepondash. ¹⁹Adoaquien Esus aidbëdi
nidpondash.

^{20,21}Nidnubien chido intac
budted-budtedec seta 12tedi matamec
bëdanenquio yec nacchoadbudquidën
Esusën cachoctsëqui choquin:
—Bëdamanquidën dashcute mishec
bëdampatsiashe icmanendac —qeshun
ismenquio icquin dashcute cuëmano
mishtsac caondash. ²²Adoaquien
bidiadquin isun Esusën chuipondash.
—Dacuëdenda. Mibi: “Aidën nac
bëdantsiabi,” quiacpadec mibi
bëdanendac —Esus quenubi
bëdampondash.

²³Aid bëdamebidanec nidequi
chuibante shubun tabadsho isquidën
shubun puduedshun isquien matses
dadpen tabadec. Champi unëscasho
isash sedenquecuededec tabadec. Nëidic
matses unësan con matsesën
nacpadomboen shoncate shoncaquido.
Nëidic comapenec
sedenquecuededquido dadpen. Aidtedi
icpondash. ²⁴Adshobien Esusën abitedi
chuiquin: —Baded umanuc niecun.
Champi unësabi iqueque —capondash.
Adoac: —“Champi unësabi iquec,”
quepequien iquec —qeshun Esus
mamëshumbededpondash. ²⁵Niecunan
Esusën champi uiacno quënën
puduedtanquin mëdinac champi
uincuenash bëdambo yec capupondash.
²⁶Adsho isun champi unësaid

uincuemiaid chuibenepac caondash shubu utsin-utsinquien. Anocquido Capednaun caid yacno pauequidotedishun tantianuc chuibeniac caondash.

Bëshuaid daëd Esusën bédamiai

(*Duc. 18. 35-43*)

²⁷Auëshquio puduanec nidshobien bëshuaid daëdshun chinunshun companec cuëdquin Esus chuituidpondash. —Dabidën tsyuecquid Nuquin Papan chomiaid icquin bédamboen isquin ëbi bédame —quebud-quebudpondash. ²⁸Shubu utsin puduedash abëdi tabadshobien Esusën: —“Ëbi bédametsiash,” çcaïn dabi ique? —caquien: —Ai, adebi —quepondash.

²⁹Adshobien aid daëdi bëmishquin: —Mimbi tantiacpadec bédanta —cac ³⁰bédampondash. Adsho isun Esusën: —“Bédamiohi,” quequin utsibo chienda —capondash. ³¹Adoboqui anocquidotedi chuiben-chuibempac caondash.

Esusën onquesa bédamiai

³²Bëshuaid bédamiai puduenubien podobitsi icsa dapuduedaid onquesa dada Esus ismenuen bëpondash.

³³Bëacsho isun Esusën podobitsi icsa dapuduemiac bédanash onquiampondash. Aden bédamesho isash: —Nuquin nidaid Isadaid caidënshun adoen ictenec —quecuededpondash isquido.

³⁴Adnubien Esus chieshënuquido Padiseyobo: —Podobitsi icsan icbon namiaid icquin podobitsi icsa cuemequidien nechitec —quecuededpondash Esus caic.

Esusën matses tantiaquiaid

³⁵Aden onquesa bédamianec nidash capucuen-capucuenquin shubu dadpen

icquid yacno Nuquin Papan chiaid chuibante shubun puduedshun Nuquin Papan matses icsaido bédamboen iste chuipondash. Adshumbic anocquido daicsaidotedi bédamebampondash. Adenuidi shubu dadpen yacno-yacnomboen chuibanquimbi matses bédamebampondash. ³⁶Abi tantienquio icquido dadpen cho-chosho isash unëshquio icnuc shubiantiadquio icpondash Esus. —Abi isquid nibëdnuc bacuëbo icsamboec tabadacimboec icsambo iquec. Nuquin Papa bédamboen ismete chiabi yac tantienquio yec natia chieshëmënc bédamboec tabadtiapimbo iquec —quiash shubiantiadquio icpondash Esus.

³⁷Adshumbic abëd icquido chuipondash. —Pete dadpen nitsinaid caniacsho bedtanenquio icnuc sinash chodquebudnequid. Adecbidi Nuquin Papan chiaid chuibanquid nibëdnuc matses icsamboec tabadec. Aden chuibanquid nuquipadquid daëdpactsëcquio iqueque. ³⁸Nuquin Papa chianeta. “Matses dadpenshunquio mimbi bédamboen iste tantiabi iqueque. Mimbi chiaid chuibanquid dadpen icmeta, Papa,” quequin Nuquin Papa chianeta —quequin chuipondash Esusën abëd icquido chuiquin.

Esusbëd icquido 12tedi chiaid

(*Mad. 3.13-19; Duc. 6.12-16*)

10 ¹Adshumbic Esusën abëd icquido 12tedi chuipondash. —Ëmbi naid chuibeneta. Ëmbi namiaid icquin ëmbi nabocpadomboen podobitsi icsa matses dapuduedaid mimbi cuemendac. Adembidi daicsaido abitedi mimbi bédamendac —quequin chuipondashi nëidtedi. ²Nëidic Petedo caidbidi Simon cuëmëdquid. Nëidic abëdta tishaid Andedes cuëmëdquid.

Nëidic Sebedeyon mado abi daëdi. Abentsëc Acobo icnuc utsi Uan icpondash. ³Nëidic Uedipe. Nëidic Badtodome cuëmëdquid. Nëidic Tomas. Nëidic ëbibi Mateyo con matses piucquid bedshundenedi. Nëidic Acobo cuëmëdquid utsi Adpeon mado. Nëidic Debeyo caidbidi Tadeyo cuëmëdquid. ⁴Nëidic Simon cuëmëdquid utsi con matses yuaquido cuemete bunquid. Nëidic Iscadiote caidbidi Udas cuëmëdquid abi chieshënquido Esus bedmequid. Aidededi abëd icquido icsho chuipondashi.

Abëd icquido: Chuibeneta, caid

(*Mad. 6.7-13; Duc. 9.1-6*)

⁵Adshumbic: —Ëmbi chiacpadomboen chuibenenuc nidshun isadaidpembe chienda. Aido yacno nidenda. Nidaid cuëshë Samadia caid yacnoquidon shubu datambidanta. ⁶Nuquin matses isadaidboudi chuibeneta. Bënudshun podqued tantienquo yacimboen nuquin matsesën Nuquin Papambo tantienquo iqueque. ⁷“Mibi icsaid ënash bëdamboec tabadta. Nëbi abëd tabadtequido icmequin Nuquin Papan matses bëdamboen tabadmendac,” quequin chuibeneta. ⁸Adembidi daicsaido bëdamequinc unësaido uincuemequinc dada ushumbo yec daicsaido bëdamequinc podobitsi icsa dapudedaido cuemeshunquinc cabeneta. Adoshon: “Piucquid beccho,” cainda. Ëmbi nabocpadomboembidi mibi namembique. “Piucquid beccho,” quequin nainquo iccombique. Adembidi nashumbanta. ⁹Aden chuibenec nidquin min piucquid buanenda. ¹⁰Adembidi pete sandoaid buanenda. Dashcute utsibëdta tapucudte utsi sandoshon buanenda. Mibi tidinquette cueste abentsëqui buanta. Adec mëdadauidquido chosho

isun mimbi bëdamiaidon: “Mibi bëdambo iquec. Ëbi yacno ushec cho,” mibi cac bëdambo ictsiash. Adembidi: “Mitsana nibëdsho isun mibi menenu,” mibi cac bëdambo ictsiash.

¹¹Aden chuibenec shubu dadpen icquid yacno nidshun bëdambo icquid istuidta. Istuidshun: “Min shubu yacno ushec nidnu,” mimbi cac: “Ai,” qesho tantiash aidën shubun ushta. Auëshquio nidabi yec aidën shubunuidi ushta. ¹²Aidën shubun puduedshun: “Mibi isnuec chopobi,” cata. Adoshombic: “Nëid shubun icquido Nuquin Papan bëdambo icmepashun,” quequin aido bëdamboen ista. ¹³Adoac anocquidon mibi bëdamboen iso: “Nuquin Papan bëdambo icmepashun,” mimbi canubi Nuquin Papan aido bëdambo icmendac. Anocquidon mibi chieshënsho Nuquin Papan aido bëdamboen istiapimbo iquec. ¹⁴Shubu dadpen icquid utsi yacno mibi nidacsho anocquidon cuemiac naden ismeta. Auëshquio puduanec nidnun: “Nuquin Papa tantiesabo yec Nuquin Papan cuidtequidombo mibi nec. Icsaidombo mibi nec,” quequin ismec nidaid putu tasequeta. ¹⁵Mimbi adosho isun matses cuidte ushëmbi Nuquin Papan aido comapenen cuidendac. Ëndenquimbo shubu dadpen yacnoquidotedi cuidquin Nuquin Papan uesquin unës uapampic. Aid shubu dadpen icquid abentsëc Sodoma canubi shubu dadpen icquid utsi Comoda capampic. Aid daëd yacnoquido bëdiactsëc cuidshun mimbi chiaid tantienquo icquido comapenen cuidendac —quepondash Esus abëd icquido chiec.

Esus tantiaquido chieshënte chiaid

¹⁶Adashic padpiden chuioaic: —Ëmbi naid chuibenequido icsho utsin-utsinquien mibi chieshëndac.

Bëdi nëish yua acte bunacimboec chieshëmënguïdo mibi cüeste bunendac. Aidobëd chieshënanenda.

“¿Mitsipadomboen chiac Nuquin Papan chiaïd tantiaabempatsiash?” qeshun bëdamboen tantiaquin bëdamboen chuïta. ¹⁷Mibi chieshënquin cuesunetiadquïo iquendac. Mibi bedshun: “Cuesmenu,” qeshun abi chuiquïdo mibi cuidmenuen Nuquin Papan chiaïd cuidbante shubuno mibi buanendac. Ashunquïo mibi cüeshcaten cüeshcaindac. ¹⁸Utsibombic adembidi cuesmenuen chuiquïd dapa cobenadod yacno mibi buanendac. Adembidi chuiquïd dapa utsi yacnotsen mibi buanendac. “Ma ëbi chuiquïdon chuiquïd dapabëdta isadaïdpembo ëmbi naid chuïbanu,” ëbi quenuc mibi aden buanendac. ¹⁹Adoac dacuëdenda. “Chuiquïd dapa yacnoshon ¿atotsimbi chuïpatsiaba? ¿Adambi bëdamboen chuïpatsiaba?” quec dacuëdenda. Chuiquïd dapa mimbi bëisnubi Nuquin Papan ambi tantiacpadomboen mibi oncamendac. ²⁰Aden aton Mayanën ambi tantiacpadomboen mibi oncamendac —quepondash Esus.

²¹Adashic padpïdec onquec: —Ëbi chieshënquïdon ëbi tantiaquïdotsen comapenen chieshënendac. “Esus tantiaquïd nec,” qeshun aton buchimbi aton utsi cuesunemendac. Amëmbi ambi tishmiaïd cuesunemendac. Aton bacuëbombi chieshtoshon anibëdta amë cuesunemendac. ²²“Esus tantiaquïd nec,” qeshun matses dadpëshun aden chieshënaquï chieshtoenquïo icquin ëbi tantiasho Nuquin Papan abi yacno mibi puduedmendac. ²³Shubu dadpen yacno nidacsho chieshënac shubu dadpen icquïd utsi yacno cuenta. Anoshontsen ëmbi naid chuïsho chieshënoac shubu dadpen icquïd utsi yacnotsen cuenoata. Adecuïdi cuendeneta. Nëïd nidaïd

Isadaïd caidën shubu dadpen icquïd abitedi yacno nidabi icnubi choaindabi. Nuquin matses isadaïdbo abitedi chiabi icnubi Nuquin Papa yacnuësh choaindabi.

²⁴Mibi tantiamequïd nebi. Ëmbi tantiamiaïdo icsho ëbi icbocpadomboembidi mibi chieshënendac. Abi chuiquïd dapa chieshënacpadembidi ambi namiaïdotsen chieshënquïd. Icbo chieshënquïmibi yuabotsen chieshënquïd. ²⁵Adembidi ëmbi chiacpadomboen natiadquïo icsho mibitsen chieshënendac. Nuquin Papa yacno puduedmianquïd icsho: “Ma podobitsi icsan icbo Betsibu caïd neyoc,” ¿cainquïodabi ictiosh? Adembidi mibi Nuquin Papa yacno puduedtequïdo icsho mibitsen chieshënendac —quequin chuïpondash Esusën abëd icquïdo chuiquïn.

**Dacuëdenquïo icquin chui,
quequin chiaïd**
(Duc. 12.2-7)

²⁶Adshumbic padpïden chuiquïn: —Mibi chieshënquïdo dacuëdënenda. Aidon ompodshon icsamboen naid Nuquin Papan utsibo ismendac. Adembidi aidon shoshquetsëcquin chiaïd Nuquin Papan utsibo tantiamendac. Adembidi mimbi bëdamboen naidtedi Nuquin Papan utsibo tantiamendac. ²⁷Nëbi ëmbi mibïdedsëqui chuïboed dacuëdenquïo icquin utsibo chuïbeneta. ²⁸Chuïbenesho min dadauïdsëqui cuesunetequïd dacuëdënenda. Min tantiate unëstiapimbo icquïd icsho nibëdametiapimbo iquëc. Min dada unësan min tantiate abi icsho cuidnuequin chian anëdënquequïd nëscanquïd tantiaata. Adquïd Nuquin Papa icsho dacuëdënta.

²⁹Utsibon chieshënaqui dacuëdenda. Nuquin Papan mibi tantieque. ¿Padichucu cuesaid isashta unësquo icti? Padenquo. Padnuen ambi tantiapadomboembi padichucu dadpen icquid abentsëc cuesac paëdsho Nuquin Papan tantiec. ³⁰Adembidi min manëdaid Nuquin Papan tambanaidquo nec. Aden min manëdaid abentsëc paëdsho aidën tantiec. ³¹Aden min manëdaid tambanquid icquin padichucu bëdiactsëc tantiatsëcquin mibien comapenen tantieque. Mibi chieshënquido dacuëdënenda —quequin chuipondashi Esusën.

Esus con Icho nec, quequido chiaid

(Duc. 12.8-9)

³²Adshumbic padpiden chuiquin: —Utsibo chuiquin: “Con Icho Esus nec. Nuquin Papa yacno ëbi puduedmequid nec,” quequin chianequid Nuquin Papa yacno chosho isun: “Nëid ëbi tantiaquid neque. Puduedmeta, Papa,” quequin Nuquin Papambo chiendambi. ³³Padnuen utsibo chieshec: “Con ico Esus catiapimbo iquebi. Tantiatiapimbo iquebi,” quequid bëdamboen istiapimbo iquebi. “Nuquin Papa yacno puduednu,” qesho: “Padi. Ëbi tantiaquidpenquo neque. Puduedmenda,” quequin Nuquin Papa chiendambi —quequin Esusën chuipondashi.

Esus tantiaquidobëdi cuëshëdte chiaid

(Duc. 12.51-53; 14.26-27)

³⁴Adshumbic padpiden chuiquin: —Ëmbi chuiboed tantiashun: “Nuquin Papa yacnuësh choquid icquin abitedimbo bëdamboen tabadmetsiash,” ¿caquindabi ique? Padenquo ictsiambi. Ëbi tantiaquidobëd ëbi tantiesabo cuëshëdenquo icte danenda. Ëbi tantiaquidobëdi ëbi tantiesabo cuëshëdendac. ³⁵Amëbëd aton mado

cuëshëdendac. Adecbidi anibëd aton champi cuëshëdendac. Adecbidi aton chayabëd aton babanën cuëshëdendac. ³⁶Aden aton shubun icquidombi ëbi tantiaquid chieshënendac.

³⁷Padnubic aton matsesuidi tantiaquidën ëbi bëdiactsëc tantiatsëctsiash. Aton tita tantiaquinc aton papa tantiaquinc cain aidën chiacpadomboenuidsëqui naquidën ëbi bëdiactsëc tantiatsëcquin ëmbi chiacpadomboen natiapimbo ictsiash. Adembidi aton mado tantiaquinc aton champi tantiaquinc cain aid bëdambo icmeteuidsëqui bunquin ëbi bëdiactsëc tantiatsëcquin ëmbi chiacpadomboen natiapimbo ictsiash. Adquido bëdamboen istiapimbo iquebi. Ëbi tantiesabo nec. ³⁸Utsibon chieshënac ëbi tantiatsëcboedi badedi chieshtoshon ëmbi chiacpadomboen natiapimbo yantsiash. Adquidotsen ëbi tantiaquidpenquo iquendac. ³⁹Matses ambi naiduidi naquid Nuquin Papa yacno puduedtiapimbo iquendac. Padnuen ëbi tantiaquin ëmbi chiacpadomboen naquid Nuquin Papa yacno puduedendac. Adquid chieshënaqui chieshtoenquo ictsiash —quequin Esusën chuipondashi.

Nuquin Papan bëdambo icmete chiaid

(Mad. 9.41)

⁴⁰Adshumbic Esusën ëbi chedo padpiden chuipondash. —Mibi chieshënquido icnubi mibi bëdamboen isquid iquendac. Ëmbi naid mimi chuisho tantiash: “Ai, abimbo caic,” qeshun ëbi tantiabenquin ëbi chomequidtsen tantiabenendac. ⁴¹“Naden naindambi,” quequin ambi chiaid chuibenequid Nuquin Papan bëdamboen isaido nec. Adquid shubu utsi yacno nidacsho isash: “Nuquin Papan chiaid chuibenequid choeque.

Bédamboen chuisho tantianu,” quequid icsho Nuquin Papan bédamboen isendac. Adembidi abi tantiec ambi chiacpadec bédamboec tabadquid Nuquin Papan bédamboen isaidobidi nec. Adquid shubu utsi yacno nidacsho isun: “Nuquin Papan chiacpadec tabadquid nec,” queshun bédamboen isquidotsen Nuquin Papan bédamboen isendac. ⁴²Adembidi ëbi tantiaquid yec acte bundoacsho acte menequid Nuquin Papan cuidnanquin bédambo icmendac. Adembidi utsibon Esus tantiaquido bédamboen nashunsho Nuquin Papan bédambo icmendac —quequin Esusën chuipondashi. Adshun: —Chuibenetan —cac nidshumbimbi chuibenepondac.

Uan acten mentoanquidën chuimiaid

(Duc. 7.18-23)

11 ¹Esusën: —Chuibenetan —cac abéd icquido nidanenubi auëshquiobi puduanec nidquin shubu dadpen icquid shubu dadpen icquidquien Esusën Nuquin Papan chiaid chuibeniact caondash. Aid nidaid cuëshë Cadidia caidën capucuenequin adoac caondash. Adnubini yuec-yuecpambo ictanec Esusbéd icoaic cho-chopondac.

²Adnubien Uanën Esus acten mentondaidëmbi quënëna naudaiddac icquin Esusën naid tantiapac caondash. Adshumbic abéd icquido chuiquin: —¿Nuquin Papan chomiaid nuqui cainaidta nepec? Esus chuitan —cac choshon Uambéd icquidon Esus chuituidpondash. ³—Uanën: “Chuitan,” cac chobi. ¿Ëmbi cainaid Nuquin Papan chomiaidquioda mibi nepe? Mibi adquidpenquio icnuc ¿ada utsi chopatsiash? —caquien ⁴Esusën: —Ëmbi nadatiambo icquin nabamboedbédta ëmbi chuiboed Uan chiec nid. ⁵“Bëshuacboedën isbenosh.

Canite icsaidi capucuenosh. Daushumbo icquid nami mishadenquio icquid bédanosh. Pashuacboedën tantiabenosh. Adoshombic unësaidi uincuemiosh. Adoshombic Nuquin Papa tantienquio icquido Nuquin Papan bédamboen iste chuiposh,” quequin Uan chiec nid. Aden chiac Uanën: “Nuquin tsusedpan chiampicpadquid Nuquin Papan chomiaidquio nec,” quequin ëbi tantiendac. ⁶Adshumbic nadentsen chuita. “Muambo nec, ëbi cainquio icquin: Ambi chiacpadquid Nuquin Papan chomiaidien nec, quequin ëbi tantiaquid Nuquin Papan bédambo icmendac,’ quiosh,” quequin chiec nid —cac nidanepondash Uambéd icquido.

Uan acten mentoanquid chiaid

(Duc. 7.24-35)

⁷Aido nidanebon Esusën Uan acten mentoanquid chuiquin abi datsidadquido naden chuipondash. —Mates nibédacno ¿atotsi queneuc nidonda? ¿Cunquequidën ishcunaid isnuecta nidtionda? Padenquio. ⁸¿Dashcute bédaidquio dasiuidaid isnuecta nidtionda? Padenquio. Icsactsëcquid Uan dasiuidpondash. Dashcute bédamboshë icquid dasiuidquido ancanquidën shubu dapan tabadquido nec. ⁹Ad icnuc ¿atotsi queneuc nidonda? “Naden naindambi,” quequin Nuquin Papan chiaid chuibenequid chuisho tantianuec ma mibi nidondac. Adec Nuquin Papan oncamiaidquio Uan nec. ¹⁰Uanën abia choshon chuite chuiquin Nuquin Papan naden dada uamepampic.

“Mibi chote chuiquidba chomembi, Mado.

Aid: ‘Bédambo icquid choeque.

Icsainquio yec ënédta,’ quequin mibi chote chiendac, Mado,” quequin Nuquin Papan ambi chiaid dada uamepampic. ¹¹“Nuquin Papan

chomiaidquio choec,” quequin chuiquid Uanpadquid utsi nibëdec. Adquid yequi: “Abi choec,” quequin ambi chuiboedën ëmbi nabansho isabi yequi bëdapabi Uan ictsec. Padnuen ëmbi Nuquin Papan chiacpadomboen nabansho isash ëbi tantiaquido bëdamboshë iquendac. ¹²Uanën chuisho Nuquin Papa tantiabenacpadomboen ëmbitsen Nuquin Papan bëdamboen iste chuisho tantiashun adembi abi icsaid ënshun icsaboedon dadpenshun Nuquin Papa tantiendac. ¹³Nëbi Uanën: “Nuquin Papan abi yacnoshon bëdambo icquid chomendac,” quequin chuipondash. ¿Ambiada adopondash? Padenquio. Èndenquimboshë tauamboen nuquin tsusedpa Moisesën chuibempampic. Adshumbic utsintsen. Adshumbic utsintsen. Aden Nuquin Papan ambi bëdambo icquid chomete chuiquin dada uamianepampic. ¹⁴Adembidi Uan chote chuiquin dada uamepampic. “Nuquin Papan ambi tantiacpadomboen oncamiaidquio Edias cuëmëdquid choendac,” quequin Ediasbimboecquid Uan chote chuipampic. Bëdamboen tantiaquin: “Nuquin tsusedpa Ediasbimboecquid Uan nec,” mimbi catsiac. ¹⁵Bëdamboen tantiaquidën adembi tantiatsiash —quepondash Esus abi datsidadquido chiec.

¹⁶Aden chuisho tantiash chieshtoshobien Esusën chuipondash naden. —Nuquin Papan chiaid tantienquio icquido yec nëmo icquido ðmidapadquidoen nec? Bacuëbo nëishnanacbiçtsëcquiec mibi iquec. Bacuëbo: “Ëmbi chiacpadomboen nanuna,” queuidash ambi chiacpadomboen aton utsibon nainquio icsho isash nëishash chushcananquid. ¹⁷“ ‘Cuëdënuna,’ queuidbosh ëbi cuëdënubi ma mibi cuëdënenquio icboc. ‘Sedenquenuna,’ queuidbosh ëbi

sedenquenubi ma mibi sedenquenquio icboc,” quetsash bacuëbo nëishnanacbiçtsëcquiec ma mibi iqueyoc. Adec nëishëmëncquido yec icsambo ma mibi iqueyoc. ¹⁸Uan pete utsi-utsien pesa iccosh. Adecbidi acte paëmbo icquid aquesambo niosh. Adquid icsho isash nëishash: “Ëmbi nacpadomboen naisa nec. Podobitsi icsa dapudedashien nechitec,” mibi quepondac. ¹⁹Ëbien nuquin matsesën piacimboen pequid nec. Adembi actequid acquid nebi. Adsho isash nëishun ëbitsen icsamboen chuishunquin: “Peteuidi tantiaquin nua pequid nec. Tantiadenuen acte paëmbo icquid acquid nec. Adecbidi nuquin matses piucquid bedshunquidobëd onquec icsambo icquid caidobëd onquec quequid ma aidobëdi icsambo icquid nepayoc,” mimbi ëbi capec. Padnuen bëdamboen tantiaquidën Nuquin Papan chiacpadomboen nasho isun Uambëda ëbi: “Bëdambo iquec,” caindac —quepondash Esus abi chieshëncquido chiec.

**Shubu dadpen icquidën
tabadquido cuidte chiaid**
(Duc. 10.13-15)

²⁰Adshumbic Esusën padpiden chuipondash. —Nëbi shubu dadpen icquid shubu dadpen icquidquien comapenen tantiaquid icquin dadpen nabanquin ismebeniombi. Aden ismiac: “Icsaboedi bëdamboec tabadtiadquio iquebi,” quetiadquidi chieshec adenquio iquec —queshun Esusën naden chushcapondash. ²¹—Shubu dadpen icquid Codasin caid yacnocquidobëdi shubu dadpen icquid utsi Betsaida caid yacnocquido Nuquin Papan cuidtequido nec. Ëmbi aido ismebocpadomboen ismiac isadaidpempo cuidadenquio ictsempampic. Aden ismiaqui: “Ai,

icsapobi,” quiash shubibudequi icsainquo yec ënëdtsempampic. Shubu dadpen icquid Tido caid yacnocquidobëdi shubu dadpen icquid utsi Sidon caid yacnocquido adtsempampic. ²²Nuquin Papan matses abitedi cuidte ushën: “Nadatiambo icquin nabanquin ismiacmaido nec,” qeshun Tido caid yacnocquido Sidon caid yacnocquidobëdta bëdiactsëc cuidendac. Adoshombic: “Comapenen tantiaquin ismiaqui tantienquo icquido nec,” qeshun Codasin caid yacnocquidobëdta Betsaida caid yacnocquido comapenec sidquenuc cuidendac. ²³Adembidi nëmbo icquido Capednaun caid yacnocquido mibitsen Nuquin Papan cuidendac. “Nuquin Papa yacno tabadtequido nuquitedi nec,” ¿quecta ique? Adquidpenquo yec Nuquin Papa chieshënquido cuidacno nidmetequido ma mibi nepayoc. Èndenquimboshë yampido shubu dadpen icquid Sodoma caid yacnocquido cuidquin Nuquin Papan nibëdamepampic. Èmbi mibi ismebocpadomboen ismiac aidon abi icsaid ëntsempampic. Abi icsaid ënsho Nuquin Papan cuidenquo ictsempampic. Cuidenquo yac nëbi aton matses abi ictsiash. ²⁴Nuquin Papan matses abitedi cuidte ushën: “Comapenen tantiaquin ismiacmaido nec,” qeshun Sodoma caid yacnocquido bëdiactsëc cuidendac. Nuquin Papan chomiaid icquin ëmbi ismeboedo Capednaun caid yacnocquidoen comapenec sidquenuc cuidendac —quequin abi tantiesabo Esusën chushcapondash.

Esusën dayacquiobimboecnuc
icmete chiaid
(Duc. 10.21-22)

²⁵Adshumbic Esusën Nuquin Papa chuipondash. —Mibi bédamboshë iquec,

Papa. Mibi yacnocquidotedishun Icbombo yec nidaidën tabadquidotedishun Icbobidi mibi nec. Mimbi tantiamiabi: “Dadpen tantiaquid nebi,” quequidombi ëbi tantiabi iquec. Mimbi tantiamiac nëidon ëbi tantiec. Aden mimbi bédamboen naic. ²⁶Mimbi tantiacpadomboen mimbi bédamboen naic. Mibi bédamboshë iquec, Papa —quequin Esusën Nuquin Papa chuipondash.

²⁷Adshumbic abi datsidadquido chuipondash. —Nuquin Papan ambi tantiaidtedi ëbi chuimec. Èmbi naboedbëdta ëmbi nate abitedi con Pan ambentsëqui tantiec utsibon tantienquo icnuc. Adembidi Nuquin Papan natebëdta ambi naboed abitedi ëmbentsëqui tantiemi. Aden Nuquin Papa tantiaquin: “Nëidtedi matses bédamboen tantiamembi,” qeshun: “Nuquin Papa nadquido iquec,” quequin tantiamembi. ²⁸Èbi tantiata. Dayacquio yacimboecnuc mibi bédambo icmembique. “¿Mitsipadequibi Nuquin Papa yacno puduedpe?” quec ¿uimambo yacimboecta mibi icpe? Adquidën ëbi tantiasho Nuquin Papa yacno puduedtequid mibi icmembique. Èbi tantiata. ²⁹Con Icho ëbi cata. Con yuambo icquin ëmbi chiacpadomboen nasho mibi bédamboen isquin dayacquio yacimboecnuc mibi bédambo icmembique. Ancanesambo yec bédambo icquidini neque. Con Icho ëbi cata. Adsho mibi bédambo icmembique. ³⁰Mibi ancainquo icquin dayacquio yacimboecnuc bédamboen mibi tabadmembique. Con Icho ëbi cata —quequin chuipondash Esusën.

Esusbëd icquidon petsëcsho
istuidshun chushcaid
(Mad. 2.23-28; Duc. 6.1-5)

12 ¹Adshumbic chonoadtemaid ushën Esusbëd capucuenequin tied matanquin bundotsëcshun tiedën

caniquid èshchicshun petempi
 petsèccondambi. ²Pesho istuidshumbini
 con tsusedpabon chiampid namequido
 padiseyobon: —Is. Mibèd icquido
 chonoadtemaid ushèmbi chonoadeque
 —capondash Esus chuiquin.

³Adoquien Esus: —Ma icsapenquio
 icpayoc. ÌNuquin tsusedpa Dabidèn
 bundoshon ambi petemaidquio
 pepampid chuiquin dada uapampid
 isamboda ictio? ⁴Aidèn Nuquin Papa
 tabadte shubu uashunaid abi
 puduedtemaidèn puduedshun ambi
 petemaid pan sanaid istuidpampic. Aid
 panèmpi nèish yua abided unès
 uaquidon petequid nepampic. Aid
 panèmpi bedshun abèd icquidobèdtan
 Dabidèn pepampic. Aden nuqui
 bédambo icquid caidèn ambi natemaidi
 napampic. ⁵Adembidi chonoadtemaid
 ushèn natemaid chiaid niacquimbi nèish
 yua abided unès uaquidon aid ushèmbi
 Nuquin Papa tabadte shubu
 uashunaidèn puduedshun
 nacnendenepec. Nuquin Papan
 chiacpadomboen naiqui icsainquio
 icpec. ⁶Nuquin Papa tabadte shubu
 uashunaid tantiaquin adopec. Aid shubu
 bédapabi icnuc bédamboshè icquid
 nebi. ⁷Nuquin Papan naden chiaid
 mimbi bédamboen tantienquio iquec.

“Èmbi chiacpadomboen
 abentse-abentsen mimbi naic.

Adoquimbi èmbi chiaid utsi niaquec
 mimbi icsaido caido mimbi
 bédamboen istiapimbo iquec.

Adsho isun: ‘Mibi bédambo iquec,’
 catiapimbo iquebi.”

quequin Nuquin Papan chiaid
 bédamboen tantiasahun èbèd icquidon
 bédamboen nasho mimbi chushcainquio
 ictsenoc. ⁸Tantia. Nuquin Papan
 chomiaid icquin chonoadtemaid ushè
 èmbibi chiampid icnuc èmbi
 tantiacpadomboen aid ushèmbi èbi

tantiaquido namembique —quepondash
 Esus èmbi petsècsho istuidquido chiec.

Mëicsatsaid bédamiaid

(*Mad. 3.1-6; Duc. 6.6-11*)

⁹Adanec nidec Nuquin Papan chiaid
 chuibante shubun puduedshun
¹⁰isaquien mëicsatsaid icpondash.
 Adnubien padiseyobon:
 —Chonoadtemaid ushèmbi bédamequid
 Nuquin Papan chiaid niacquidien
 nechitec. Nuquin Papan chiaid Esus
 niacmenuna. Aden niacmeshun:
 “Icsambo mibi iquec,” canuna
 —qeshun Esus chuituidpondash.
 —ÌNadquid chonoadtemaid ushèmbi
 matses bédamequinda Nuquin Papan
 chiaid niacpec? —caquien ¹¹Esusèn:
 —ÌAda min nèish yua obeca caid icpec?
 Adquid chonoadtemaid ushèn shècùè
 uquèduc ampaèdacsho istuidshun
 ìchiquenquioda mimbi icpatsia? Ai,
 mimbi chictsia. Chonoadtemaid
 ushèmbi mimbi chonoadquid
 chicpatsia. ¹²Aden min obeca
 bèdiactsèc tantiec mibi bédapabi icnuc
 matses tantiaquioquin nashunquid
 bédamboshè ictsiash. Nadquid
 chonoadtemaid ushèmbi matses aden
 bédamboen nashunquidèn Nuquin
 Papan chiaid niaquenquio ictsiash
 —quequin Esusèn abi icsamenu caquido
 chuipondash.

¹³Adotanquimbien Esusèn mëicsatsaid
 chuiquin: —Mècueta —cac mècuc
 bédampondash aton mèdante abiuc
 daèdi bédambo yec. ¹⁴Adsho isashien abi
 chieshènquido padiseyobo nèishquopac
 caondash. Adece nèishanec nidash aton
 matses utsibobèd: —Cuesunequimbien
 Esus ictiad —quecuededpac caondash.

Esusèn nate èndenquimboshè chiampid

¹⁵Adnubien Esus: —Èbi
 cuesunetiadquio iquec —quianec

auëshquiobi puduanec nidpondash.
Nidsho isumbien matses dadpenshun
tsibanampondash. Adshumbic aidon
bèaid daicsaidotedi
bèdamebampondash. ¹⁶Adshumbic ambi
bèdamiaido chuiquin: —“Bèdamioshi,”
quenda —quequin chuipondash Esusèn:
—Èbi abi chuiquid dapa icmenushe
—quiash adpondash Esus. ¹⁷Aden
Esusèn nate chuiquin Nuquin Papan
isadaidbo tsusedpa Isayas dada
uamepampic naden chuiquin.

¹⁸ “Èmbi chomiaid èmbi
chiacpadomboen naquidquio nec.
Aid tantiaquiec bèdambo iquebi.
Con Mayan bèdambo icquid abèdi
tabadmembì.

Adoac èmbi bèdamboen iste
isadaidbobèdta matses utsibo
abitedi bèdamboen chiendac.

¹⁹ Chushcanante bunenquio yec
ancanenquio iquendac.

Chuiquid dapa ictiapimbo iquendac.

²⁰ Icsambo icquido yec shubiquido yec
nataic tabadquido yec daicsaido
yec quequidon abi bèdiactsèc
tantiabentsècsho bèdamboen
isquin bèdamboen tantiamendac.

Nuquin Papan chiacpadec cuidte
ushè choabi icnuc adoendac.

²¹ ‘Nuquin Papan tantiacpadomboen
matses bèdamboen namendac,’
qeshun nidaid utsi-utsiec
yacnocquidon matses
dadpenshun aidi tantiendac,”

quequin Esusèn bèdamboen nate
chuipampic Isayasèn.

Podobitsi icsan namiaidi Esus nec, quiaid
(*Mad. 3.20-30; Duc. 11.14-23; 12.10*)

²² Adnubien Esus ismenuen daicsaid
bèpondash. Dapuduedshun podobitsi
icsan bèshu uain eme uaidi onquesa
nepondash. Isenquio yec onquenquio
icshobien Esusèn bèdamepondash.

Adoac isbenequi onquiampondash.

²³ Adsho isashien Esus datsidadquido:
—Is. Comapenen tantiaquin
nabanquidquio nèid neque. ¿Nuquin
tsusedpa Dabidèn tsyuecquidta nepec?
Adquid yec nuqui cainaidquio Nuquin
Papan chomiaidien nechitec
—quecuededpondash.

²⁴ Adsho tantiaash Esus chieshènquido
padiseyobo: —¿Aidta medic? Ma
aidpenquio neyoc. Betsibu caidèn
podobitsi icsan icbon namiaid
icquimbien Esusèn podobitsi icsa
cuemehitec —quequin otacquo
tantiapanèdash.

²⁵ Adshobien Esusèn aidon otacquo
tantiad ambembi tantiaashun naden
chuipondash. —¿Adquidènda aton
yuabi cuemepatsiash? Padenquio.
Chuiquid dapan aton yuabo
nèishtanquin chushcac cuèsh-cuèshèdec
aton yuabo uesadec nietsiash. Aido
nibèdnuc chuiquid dapa ictiapimbo
ictsiash. Adecbidi shubu dadpen
icquidèn tabadquido chushcananash
cuèsh-cuèshèdec niquian shubu dadpen
icboedi daèdpactsèc yanec. ²⁶ “Betsibu
caidbidi Satanas caidèmbi namiaquien
podobitsi icsa cuemehitec,” mimbi èbi
capoc. ¿Ambi naid nashobida Satanasèn
aton yuabo podobitsi icsabo
cuemepatsiash? Padenquio ictsiash.
Satanasèn cuemiac aibdèdi aton yuabo
cuèsh-cuèshèdtsiash. Adnuc Satanas
aton icbopenquio yantsiash. ²⁷ Mibèd
icquidon podobitsi icsa dapuduedaid
cuemiac caosh. ¿Cuemesho isun mimbi
èbi chiacpadomboen: “Betsibu caidèn
namiaquien nachitec,” cainda ictio? Ma
mimbi padenquio icpaboc. Mimbi
adoac: “Mimbi icsamboen chiec,”
quetsenosh podobitsi icsa dapuduedaid
cuemequido mibèd icquido. ²⁸ Nuquin
Papan Mayanèn namiaquimbi podobitsi
icsa cuemio. Èmbi adosho isash: “Nèbi

matsesbëd icquin Nuquin Papan namiaidën naosh,” quetiadquidi mibi nec —quepondash Esus.

²⁹Adashic abi onquec: —Tantia. Mibi chuinu. Ampenuesho icbon istuidac ampequidën icbo uidën uabi ampeshuntiapimbo iquec. Icbo uidënquico icquid bucun cataneshun ampeshunquid. Adecbidi Satanas bëdiactsëc tantiaquid icnuc ëbieni comapenen tantiaquidquico nec. Uidën uacimboen nadatiambo icquin nabanquin aton yua cuemepombi. ³⁰Ëbi con icbo cainquico icquido Satanasën yuabo nec. Adquid icquin ëbi chieshënquin ëbi tantiatsëcquido cuëshëdmendac. Adquidbidi mibi nec —quequin Esusën abi chieshënquido chuipondash.

³¹Adshumbic nadentsen chuipondash. —Nuquin Papan chiaid niac-niacboedëmbi ënacsho Nuquin Papan bëdamboen isec. Nuquin Papan icsamboen chuishunquidëmbi abi icsaid ënacsho Nuquin Papan bëdamboen isec. Aton Mayanën namiacsho isash: “Icsambo iquec,” quequin bëdamboen tantienquico icsho Nuquin Papan bëdamboen istiapimbo iquec. ³²Ëbi chieshënquin icsamboen chuishunquidëmbi ënacsho Nuquin Papan bëdamboen isec. Aton Mayanën namiacsho isash: “Icsambo iquec,” quequin icsamboen tantiasho Nuquin Papan bëdamboen istiapimbo iquec. Aden ënenquico icquin icsamboen tantiasho adembidi ënenquico icquin bëdamboen istiapimbo iquendac —quequin abi chieshënquido Esusën chuipondash.

**Bëdambo icquid nec,
quequin tantiatie chiaid**
(*Mat. 7.15-20; Duc. 6.43-45*)

³³Adshumbic naden bëdamboec tabadte Esusën chuipondash. —Cuëte

bëdan bacuë bëdambo iquec. Cuëte icsan bacuë icsambo iquec. Chetequid isun cuëte dada matsesën tantiec. Adembidi matses bëdambo icquid bëdamboec onquec bëdamboec tabadsho isun: “Aid bëdambo icquid nec,” quequin matsesën tantiatsiash. ³⁴Ma mibi adquidpenquico neyoc. Nisibimboec icsa uanquido mibi nec. ¿Icsambo icquinda mimbi bëdamboen chuidio?. Ma mimbi padenquico icboc. Mimbi icsamboen tantiaid ma mimbi utsibo icsamboen chuiboc. ³⁵Bëdambo icquidën ambi bëdamboen tantiaid bëdamboen chuitsiash. Icsambo icquidëmbien ambi icsamboen tantiaid icsamboen chuitsiash. Aden mimbi icsamboen chuihoc. ³⁶Ambi cuidte ushën Nuquin Papan: “¿Ada bëdamboen tantiaquin chuidenio?” quequin matses abitedi chuimendac. ³⁷Adoac abimbo chiec: “Ai, bëdamboen nadeniombi,” qesho icsano nidmenquico iquec. Padnuen utsi: “Padenquico. Icsamboembimbi chuidenechitoc,” qesho icsano nidmequin cuideque. Icsamboec onqueboedi ënëdta —quequin Esusën abi chieshënquido chuipondash.

**Padiseyobon: Ëbi isme,
quequin Esus chiaid**
(*Mad. 8.12; Duc. 11.29-32*)

³⁸Aden chuisho tantiashumbien abi chieshënquido utsibon Esus chuituidpondash. —“Nuquin Papan chomiaidini nec,” quequin ëbi ismequin nadatiambo icquin nabanta. Isnu —quepondash padiseyobo Moisesën dada uapampid chuibanquidobëdi.

³⁹Adoquien Esus: —Padi. Nuquin Papan chiaid niac-niaquec mibi icsamboshë iquec. Ëbi tantiatie bunenquico icquimbi mimbi: “Ëbi isme,” ëbi capec. Adsho nëbi mibi ismenquico

iquembi. Yuecshumbimbi mibi ismendac. ¿Ada nuquin tsusedpa Onas caidën nampid tantie? Aid yampicpaden naindambi. ⁴⁰Chishcambiecquid dapan chebudac aidën pucun uec daëdec ushacsho ucbudac Onas padpidec nidpampic. Adecbidi unësacsho chococac Onas yampicpadec daëdec ushash uincuenendabi. Aden ismendambi. ⁴¹Ëbi tantienquo yec mibi icsambo iquec. Padnuen Nuquin Papan chiaid Onasën chuibanac shubu dadpenquo icquid Ninibe caid yacnocquido badedi icsainquo yec ënëdpampic. Nuquin Papan chiaid chuibanquid Onas bëdambo icpampic. Èbien bëdamboshë icquidquo nec. Adquid icquin nadatiambo icquin dadpen ismiaqui mimbi ëbi tantienquo iquec. Aden ëbi tantienquo icquido icsho Nuquin Papan matses abitedi cuidte ushën Ninibe caid yacnocquidon: “Icsambo iquec,” mibi caindac. ⁴²Adquid cuidte ushëmbi matses utsi Sud yacnocquido ancaquidën nuquin tsusedpa Sadomonën chuisho tantiec chopampidëntsen: “Icsambo mibi iquec,” mibi caindac. Aid ancaquid chido nepampic. “Isadaidbo ancaquid Sadomon cuëmëdquid dadpen tantiaquid nec,” quequin chuituidac Sadomonën chuisho tantianuec nidshun aid chidon tantiatuidpampic. Adash: “Nuquin Papan tantiamiaidënquo Sadomonën bëdamboen chuipec,” quepampic. Èmbien abitedi tantiaquid icquin nadatiambo icquin ismeuidpoc. Adoquimimbi tantienquo icpec —quepondash Esus abi chieshënquido chiec.

Abi nianaid podobitsi icsa dapuedoaid
(*Duc. 11.24-26*)

⁴³Adshumbic naden Esusën chuipondash. —Icsaquido mibi nec.

Podobitsi icsa dapuedoaidbimboecquid mibi nec. Tantia. Mibi chuinu. Abi dapuedoaid matses nianashi podobitsi icsa abi dapuedtequid nibëdacno yuec capucuen-capucuenec. Adtanequi: “Ëbi icbocnobidi dapuedoaid nidebi,” quianec choec. ⁴⁴Chonobi ambi niamboed matses: “Ëbi dapuedoaid podobitsi icsa nibëdnuc bëdambo iquebi. Adquid chomeoatiapimbo iquebi. Èmbimbo naic bëdamboec tabadquidquo nebi,” queuidpec. Adshobien ambi niamboed podobitsi icsan istuidoapec. Istuidoashic: “Dapuedtequidquo nëid nec,” quianec ⁴⁵abipadquid utsi bedec nidoaic. Nidshumbic 7tedi icsamboshë icquido istuidshun bëash aidobëdi dapuedec. Adnuc podobitsi icsa abentsëc dapuedoaid yec ënden icsambo icboedi aido dadpen dapuedoaid yec buëdanquiec aid matses icsamboshë yanec. Adquimibi iquec. “Bëdambo iquebi,” queboedi nëbi mibi icsamboshë yanec —quequin Esusën chuipondash.

Anibëdi Esusën utsibo choaid
(*Mad. 3.31-35; Duc. 8.19-21*)

⁴⁶Adanec shubun puduedshun Esusën abëd puduedquido dadpen chuinubi aton utsibo aton titabëdi Esus isnuec chopac caondash. Umanuc tabadnubi ⁴⁷utsin puduedshun Esus chuituidpondash. —Mibi isec tita min utsibobëdi choaccosh. Umanuc tabadec —caquien badedi nidenquo yec ⁴⁸Esus: —Utsitsen con ta caimbi. Adembidi utsitsen con utsi caimbi —quetanquin ⁴⁹abëd icquido mëdquin ismepondash. —Nëid ëbëd icquido con utsibo caimbi. ⁵⁰Nuquin Papan chiacpadomboen naquidquo icsho con matses caimbi. Con utsi caquinc con chibi caquinc con ta caquinc caimbi —quepondash Esus.

Piacbo ëshë siaid chiaid*(Mad. 4.1-9; Duc. 8.4-8)*

13¹Adtanec nidec chian budash cuëmano tabadtuidpondash.
²Tabadtuidsho isash matses dadpenquoio cho-choash tsucus-tsucustsëcquoio yec Esus datsidadpondash. Adsho istanec cano dapa antabëdtoash cuëma anoentsëc canon nuadquin Esusën chuipondash cuëmano tabadquidon tantianubi.

³Adshumbic abi tantiate chuinen naden ompoacbimboen chuipondash. —Piacbo ëshë siaid utsi-utsiec bëdamboec caniec. Utsi-utsiec padenquoio. ⁴“Abitedi ansecanu,” caidi utsi-utsiec shëcuë nibëdacno paëdec. Paëdacsho paëdaid uicchunën chequid. ⁵Ëshë utsibic nidaid tsasimbo yacno siac badedi dëyucuidash ⁶aton tapun nidaidën puduedenquoio icnuc ushë chënquequidën badedi unësquid. ⁷Ëshë utsibic nisanquid diadacno siaid dëyucash canidouidsëcsho nisanquidën dayunac unësquid. ⁸Padnuen ëshë utsi-utsiec nidaid bëdanquoio siac dëyucash caniasht dadpenquoio ëshëquid. Utsi-utsiec 100ted ëshëquid icnubi utsi-utsiec 60ted ëshëquid icnuc utsi-utsiec 30ted ëshëquid —quepondash Esus.

⁹Adashic: —¿Min pabiate shëcuë nibëdquiecta iquec? Ëmbi chuiboed bëdamboec pausudta —quepondash Esus.

Ompoacbimboen chiec nebi, quiaid*(Mad. 4.10-12; Duc. 8.9-10)*

¹⁰Adsho tantiashtun abëd icquidon Esus chuipondash. —¿Atotsieshtun ompoacbimboen nëid matses dadpen chie? —caquien ¹¹Esus nadpondash. —Utsibo tantiamenquoio icquin Nuquin Papabëd tabadte chuiquin nëbi

mibiuidtsëqui tantiamembi. ¹²Nuquin Papa tantiatiadquoio icquidën ëbi tantiasht bëdamboen tantiamendambi. Nuquin Papa tantiauidtsëcquidën ëbi tantienquoio icsho ëmbi ompoacbimboen chiac tantienquoio ictsiash.

¹³Ompoacbimboen aido dadpen chuibanembi. Ëmbi naid isun ëbi tantienquoio iquec. Ëmbi chuisho pamumëdacbimboen tantienquoio iquec. Adsho aidon tantiatiapimbo icnuc chiembi. ¹⁴Nëidon tantienquoio icte chuiquin Nuquin Papan nuquin tsusedpa Isayas caid naden dada uamepampic.

“Chiac tantiaboshombi tantienquoio iquendac.

Ismiac isquiboshombi: ‘Ai, aidi nec,’ cainquoio iquendac.

¹⁵Ai, ëmbi chiaid tantiatiapimbo iquec.

Ushacbimboen tantienquoio yec pamumëdacbimboec chieshëmënnquidombo iquec. Ëbi tantiate bunenquoio iquec. Ëmbi chiaid tantiaquidombien paposhquiacbimboen bëdamboen tantiabentsiash.

Pausunacbimboen tantiashtun ëmbi chiacpadomboen natiadquoio yansho aton chiesh bëdametsiambi. Aton chiesh bëdamete bunenquoio iquec,”

quequin Nuquin Papan dada uamepampic —quepondash Esus abëd icquido chiec. ¹⁶Adashic aïdobidi chiec: —Isayasën chiacpadomboen utsibon ëbi tantienquoio icnubi mimbien ëbi tantiec. Ëbi isec mibi tabadec. Ëmbi chuibansho tantiasht: “Ai, abimbo caic,” quec mibi bëdambo iquec. ¹⁷Ëbi chote chuiampidobëdtan bëdamboec tabadquido dadpenshtun mimbi ëbi isacpadomboen ëbi iste bunequi ëbi isambobi nëspampic. Mimbi ëmbi

chuisho tantiacpadomboen
tantiatiadquo yequi tantiambobi
unëspampic —quepondash Esus.

Piacbo siaid seabadënquo chiaid

(*Mad. 4.13-20; Duc. 8.11-15*)

¹⁸Adashic abi onquec: —Tantia. Ęmbi piacbo ëshë siaid quequin chuiboeod seabadënquo mibi chuinu. ¹⁹Nuquin Papanëd tabadë chiaid piacbo ëshë siaidbimboecquid nec. Nuquin Papan chiaid chiaqui tantiaenquo icsho Satanasën nac badedi bëshumpec. Uicchunën piacbo ëshë paëdaid badedi chiacbimboen adopec. ²⁰Utsibic Nuquin Papan chiaid chiaqui bëdiactsëc tantiauidtsash: “Bëdambo iquec,” quec cuishonqueuidtsec. ²¹Adsho: “Nuquin Papan chiaid tantiaquid nec,” qeshun utsibon chieshënac badedi chieshtoshon tantienquo yanendac. Piacbo ëshë tapunuidtsash unësacbimboen adoendac. ²²Utsibic Nuquin Papan chiaid tantiatshahi ambi dacuëdquin tantiauidi tantiequi chieshtopec. Utsibic tantiauidtsash ambi bedtequiduidi tantiequi chieshtopec. Nuquin Papan chiaid tantienquo icpec. Isitodon dayunac unësacbimboen adoendac. ²³Padnuen utsibon tantiate nidaid bëdan siaidbimboecquid nec. Nuquin Papan chiaid chuisho tantiaquioshon ambi tantiaid bënuainquo icquin tantiabudec bëdamboec tabadec. Adshun aidën chiac utsi dadpenquioshë ëbi tantiaquid yanendac. Utsin chiac dadpen adecbidi ëbi tantiaquid yanendac. Utsin chiac daëdpacksëc adquidbidi yanendac —quequin abi tantiate chuipondash Esusën.

Ëshë icsambo icquid seuanaid chiaid

²⁴Adshumbic Esusën naden chuipondash. —Tantia. Nuquin Papan

namiaid tantiamenuen utsi chiacbimboen chuinu. Tiedën caniquid pete adosbiecquid icbon siac caondash. ²⁵Adanec nidambic inchëshëmbi choshon chieshëmënuquidën ëshë icsambo icquidtsen daëd uain seuanac caondash. ²⁶Adoac adosbiecquid canidotsëcnubi abëdi tancandaëdpamboec icsambo icquid canidotsac caondash. ²⁷Adsho istanquin yuabon aton icbo chuituidpac caondash. “¿Pete ëshëda sio?” cac: “Ai,” qesho tantiahi: “Icsambo icquidbëd tancandaëdec canidopacbo. ¿Mitsipaden sio?” quequin yuabon icbo chuipac caondash. ²⁸Adoquien: “Chieshëmënuquidëmbien seuanchitash,” cac: “¿Chicshunetanquindambi icpe?” yua qesho: ²⁹“Padi. Petebëdi chiquidtsiash. ³⁰Aidbëdi ma canipanuna. Ëshëacsho tacuesquimbi teshun sianun nanuna. Adoshombic icsambo icquid tsindobanshun nëdëncanun nanuna. Icsambo icquid nëdëncatanquimbic pete bedshun sandoshon shubun dectandonon nanuna,” quepac caondash tied icbo —quequin Esusën chuipondash.

Esus tantiaquido dadpen yante chiaid

(*Mad. 4.30-32; Duc. 13.18-19*)

³¹Adshumbic abi tantiaquido dadpen yante tantiamenuen Esusën naden chuipondash. —Cuëte bacuë ëshëmpi ³²pistsëcquidi nuamboshë caniec. Aid cuëte cuidin uicchun dadpen tabadtonec. Adecbidi ëbi tantiaquid abentsëcshun bëdamboec tabadquin ismiac ëbi tantiaquid dadpenquo yanendac —quepondash Esus.

Abi bëdamboen tantiate Esusën chiaid

(*Mad. 4.33-34; Duc. 13.20-21*)

³³Adshumbic Esusën abi bëdamboen tantiate chuipondash. —¿Mitsipad nami

uaid icpec? Aniactšec nami uashun
utsibēdta daēd uain cabiunac abichobi
batambo yanec. Adembidi ēbi
bēdiactšec tantiatsēchoedi ēmbi chiaid
tantiash ēbi bēdamboen tantiaquid
yanendac ³⁴—quequin Esusēn
chuipondash. Sebadēnquoio chienquoio
icquin ompoacbimboenuidi Esusēn
chuipondash. ³⁵Aden Esusēn chuite
chuiquin Nuquin Papan dada
uamepampicpadomboen nanuen
adopondash. Nuquin Papan dada
uamepampid nad iquec.

“Sebadēnquoio chienquoio icquin
ompoacbimboenuidi
chuiibanendambi.

Ēndenquimboshē matses
uaboshombi Nuquin Papan ambi
tantiaini ambi uaido chiampo
iquec. Adembidi aidon
tsyuecquidotedi chiambobidi
iquec.

Nēbimbi chuiibanendac,”
quequin nuquin tsusedpan Esusēn
chuite dada uapampic.

**Ēshē icsambo icquid seuanaid
sebadēnquoio chiaid**

³⁶Adashic matses dadpen
tabadacnuēsh nidec Esus shubun
puduedondash. Puduedshobien abēd
icquidon chuipondash.
—“Chieshēmēnquidēn ēshē icsambo
icquid siaid nec,” quequin mimi
chuiboed en sebadēnquoio chui, Icho.
Tantianu. ¿Atotsi chuitiadquoio icquin
aden chio? ³⁷—caquien Esusēn
chuipondash naden. —Tantia. Mibi
chuiu. Pete ēshē bēdambo icquid
sequidbimboecquid nebi. Nuquin Papan
chiaidquoio tantiamequin matses
bēdambo icmequid nebi. ³⁸Padnuc tied
dapabimboecquid nidaidēn
tabadquidtedi nec. Padnuc pete
ēshēbimboecquid ēbi tantiaquid nec.

Nidaid utsi-utsiec yacno tabadquido
utsi-utsien ēbi tantiaquid icmendambi.
Padnuc ēbi chieshēnquid Satanasēn
yuaido icsambo icquid
siaidbimboecquid nec. ³⁹Padnuc ēshē
icsambo icquid sequidbimboecquid
Satanas nec. Aidēn yuaido matses
icsambo icquidon ēbi tantiaquidobēd
tabadquin icsametiadquoio iquec. Adsho
badedi cuidenquoio icquin Nuquin Papan
cuidte ushē choabi icnuc matses
icsambo icquidobēd bēdambo icquido
tabadmendambi. Padnuc ambi
chiacpadēn Nuquin Papan abi
yacnoshon uaido mayan bēdabon ēmbi
chiacpadomboen naindac. ⁴⁰Icsambo
icquid tsindoshon nēdēncacimboen
Nuquin Papan cuidte ushēmbi icsambo
icquido cuidendac. ⁴¹Ēmbimboen
mayan bēdabo namendac.
“Icsamianquidobēdta icsaidotedi
bedshun chian anēdēnquiacno nēseca,”
quequin ēmbi chiac ⁴²bedshun chian
anēdēnquiacno nēsecaindac. Adoac
nataic mēyadbudec sidquequindac.
⁴³Padnuc ēbi tantiec bēdamboec
tabadquido Nuquin Papa yacno nidash
icsatiapimbo icquid iquendac. Ēmbi
aden chuiboed tantiashun ēmbi
chiacpadomboen nata —quepondash
Esus.

**Nuquin Papabēd tabadte
bunquiota, quiaid**

⁴⁴Adshumbic padpiden Esusēn
chuipondash. —Tantia. Matses ambi
istuidaid bedte comapenec bunquiaid
mibi chuinu. Utsin tied nantan nidshun
dadān ēndenquimbo ompoampid
piucquid dadpenquoio icquid istuidpac
caondash. Istuidash aid bedte comapenec
bunquiopac caondash. Adshun aton na
abitedimbo menequin piucquid bedshun
tied icho aid piucquid meneshun: “Nēbi
con tied nec,” qeshun piucquid

ompoampid bedpac caondash. Adomboen matsesën Nuquin Papabéd tabadte bunquin aton nauidi nainquo icquin Nuquin Papan chiacpadomboenuidi nac bédambo ictsiash.

⁴⁵Tantia. Casëdu bédaidquo bunaidtsen mibi chuinu. Dadan casëdu bédaidquo bunquin bednuen nibëbenepac caondash. ⁴⁶Adshun bédaidquo istuidash: “Nadquid utsi nibëdec,” quiaash comapenec bunquiaic caondash. Adshun aton na abitedimbo menequin piucquid bedshun casëdu icbo menequin aid casëdu bedac caondash. Adomboen Nuquin Papabéd tabadte bunquin matsesën ëbi tantiaquiaic bédambo ictsiash —quepondash Esus.

Nuquin Papan cuidte ushë Esusën chiaid

⁴⁷Adshumbic Esusën naden chuipondash. —Tantia. Mibi chuinu. Nuëcquid nibedacimboen naindambi. Isadaidbon nuëcquid dadpenquo bedte nëshaid dapa acte nënequin ⁴⁸nëshaid cubu-cubuctsëcquo icnuc nuëcquid bedshun acte cuëman tabadquin nuëcquid nibedquid. Nuacquid sandobanquin pistsëcquid acte nësecaquid. Aden Isadaidbon nuëcquid bedquid. ⁴⁹Adomboembidi namendambi. Nuquin Papan cuidte ushë chonoc ambi abi yacnoshon uaido mayan bédabo namendambi. Adoac choshon nibedacimboen matses bédambo icquido Nuquin Papa yacno nidmequimbi ⁵⁰icsambo icquido chian anëdënquiaicno nësecaindac. Adoac natiaic shubiquendac —quequin Esusën Nuquin Papan cuidte chuipondash.

⁵¹Adshumbic: —¿Ada ëmbi chuiboedtedi tantie? —caquini: —Ai, tantiembi —quepondac. ⁵²Adsho tantiashun Esusën chuipondashi. —Nuquin Papan chiaid chuibanquid mibi iquendac. Matsesën aton na ëndenquimbo

dayun uanëdaidbëdta aton na chuca ismequin chiacimboen mimbi naindac. Nuquin Papan chiaid ëndenquimbo dada uampidbëdtabi Nuquin Papan chiaid utsi ëmbi chuiboedquo mimbi chiendac —quepondash Esus.

Nasaded yacno Esus nidaid

(*Mad. 6.1-6; Duc. 4.16-30; Uan 4.44*)

⁵³Adanec auëshquiobi nidequi ⁵⁴abi caninëdacno shubu dadpen icquid Nasaded caid yacno chopondash. Ambo choshombic Nuquin Papan chiaid chuibante shubun puduedshun aton matses chuipondash. Adoaquien: —¿Mitsipaden comapenen tantiabempash neba? ¿Mitsipadec comapenen tantiaquin bédamequid yampash? ⁵⁵¿Nuqui isacmaidta nedic? Ma aton papa cuëte nacnenquid nepaboc. Ma aton tita Madia nepayoc. Aton utsibo nëidtedi iccosh. Nëidic Acobo. Nëidic Ose. Nëidic Simon. Nëidic Udas. Aidedi aton utsibo iccosh. ⁵⁶Aido nëmbo tabadosh. Aton chibichedotsen nëmbo tabadosh. ¿Comapenen tantiaquidta nedic? Ma adquidpenquo neyoc —quequin ⁵⁷Esus chieshënquin tantienquo icpondash.

Adsho tantiashun Esusën nadopondash: —Nuquin Papan: “Ëmbi tantiamiacpaden chuibanta,” caidën chiac utsibon tantiaquid. Adquidën abi caniacnoshon chuibancho tantienuo icquid —quepondash Esus. ⁵⁸Adshun nadatiambo icquin nabanquin daëdpactsëc ismetsëcchondash: —“Nuquin Papan chomiaidquo nec,” quetiapimbo iquec —queshun.

Uan acten mentoanquid unës uaid

(*Mad. 6.14-29; Duc. 9.7-9*)

14 ¹Adnubien ancaquidën Edodes caidën Esusën comapenen tantiaquin nabanaid chuisho tantiapac

caondash. ²Adshumbic aton yuabo chuipac caondash. —Uan pado acten mentoandened nepash icnui. Ĕmbi mapi butemiondaidi uincuepash icnui. Adquid icquin comapenen tantiaquin nabampash icnui —quepac caondash Edodes.

^{3,4}Edodesĕn Uan cuesuniac caondaic chuinu. Tantia. Uanĕn: —Mimbi bedaid Edodias caid min chidopenquo nec. Min utsi Uedipe caidĕn chido bedshun Nuquin Papan chiaid mimbi niaquec —cadoniaquien Edodesĕn chieshtoshon uidĕn uameshun Uan quĕnĕn nauedmepac caondash.

⁵Adshumbic Uan cuesunetiadquio icquimbi aton matses: —Nuquin Papan chiaid chuibanquidquio nec —quesho tantiaishun aido dacuĕdĕnquin Uan badedi cuesunenquo icpac caondash.

⁶Adshumbic Edodesĕn: —Ĕbi tishaid ushĕ nec —qeshun matses dadpen aton shubun puduedmeshun pemepac caondash. Adnubien ambi inaidĕn champin Edodesĕn pemiaido baidaquin ismepac caondash. Adsho isumbic Edodesĕn: —Bĕdamboenshĕ mimbi naic —qeshun ⁷naden chuipac caondash. —Tantia, champi. ĔAtotsi buneque? Mibi bunaidquio mibi menenu. “Nuquin Papan cuidnushe,” quiaish muatiapimbo iquebique. En ĕbi chui —capac caondash Edodesĕn. ⁸Adoquien champin aton tita chuitampac caondash. Chuitanec choshon anin chiaid chuituidpac caondash. —Uan acten mentoanquidĕn mapi butetanquin pada-padaid dapan anashun baded ĕbi mene —capac caondash champin Edodes chuiquin. Uanĕn —Min bĕnĕ nianshun utsi bedmec mibi icsaic —cac champin tita Uan cuesunemetē bumpac caondash.

⁹Adoquien Edodesĕn: —ĔAtotsi quepequini ado? ĔAdoenquio

ictiadtsimbi icpoba? —quequin ambi chuiboed niactiadquio icpac caondash. —Ĕbi isedquidon: “Mibi muambo nec,” canushe —quetanquin champin chiacpadomboen aton yuabo: —Uan mapi butetan —capac caondash.

¹⁰Adoac quĕnĕn tsadacnobi Uan mapi buteshun ¹¹mapi pada-padaid anashun buanshun champi menepac caondash yuabon. Adoquien champin ani menenun buampac caondash.

¹²Adnubien Uanbĕd ictenedon Uan mapi butiacsho dada bedanquin buanshun chococatampac caondash. Adotanec Esus chiec nidpac caondash.

Comapenen tantiaquin 5000tedi pemiaid
(*Mad. 6.30-44; Duc. 9.10-17; Uan 6.1-14*)

¹³Nidshumbic: —Mibi acten mentondaic mapi butiacchosh —catuidpondash. Adsho tantianec cano antabĕdtoshon chian potiaish pudundoanec matses nibĕdacnombo Esus nidanepondash. Aden chian potesho isash: —Nuquitsen nidnu. Nid —quianec matses dadpen chian dĕquiadec podqued nidquidĕn nidanepac caondash.

¹⁴Adnubien Esus matses nibĕdacno istanec chian yacno choapondash. Choashun isquien abi cainec matses dadpen tabadec. Adsho isun aido tantiaquidquio icquin daicsaidotedi bĕdamebampondash.

¹⁵Ushĕ budambi Esusbĕd icquidon: —Inchĕsheque. Pete nibĕdacno nuqui tabadeque. Nidaneme, Icho. Shubu dadpen icquid utsi-utsiec yacno nidshun ma piucquid menequin ma pete bednu —caquien ¹⁶Esusĕn: —Padi. Ma tabadnu. Mimibi peme —capondashi.

¹⁷Adoquini: —Ma panĕmpi Stedpactsĕc icpayoc. Nuĕcquidĕmpi daĕdquioibi ictsec —quepondac.

¹⁸Adsho: —Aidtedtsĕqui beccho —cac meniondambi.

¹⁹Adoaquien Esusën abi datsidadquido chuiquin: —Uasinën tabadbud —capondash. Adoac tabadbudnubi abuc isquin Nuquin Papa chuipondash. —Mimbi uaid pete bédambo iquec, Papa —quetanquin panëmpi cuësh-cuëshun abëd icquido menebanac aidontsen matses abitedi menebampondash. Adembidi nuëcquidëmpi bushtebantsecshun menebampondash.

²⁰Adoaquien nua cubudcuededquin pebededpondash abitedishumbi. Piacsho isun napi uaid bedtanequin tsitsan dapan sandotanquin isquien tsitsan dapa 12tedi cubu-cubuctsëcquio iquec pete cuësh-cuëshaid napi uaid. ²¹Aden matses dadpenquo pemebampondash. Aido dadatedi tambanac 5000tedi icpondash. Aton chido aton bacuëbobëdta tambanambo iccondambi.

Acte bëntse Esus choaid
(*Mad. 6.45-52; Uan 6.16-21*)

²²Adshumbic Esusën abëd icquido chuiquin: —Chian potec nidta —capondash. Adoac cano antabëdtoanec potec nidnubi Esusën abi datsidadquidotsen: —Nidanec nid —cac nidanepac caondash. ²³Adec nidanebon Nuquin Papa chuinuec macuësh dectatoash abentsëqui Esus inchëshpac caondash.

²⁴Adnubien chian dapa potequi abëd icquidotsen inchëshpondash. Chian nënantanquo yanubi cunquetuidpondash. Adnuc acte comapenec tëccuasquiampondash uncadenquo yec. Comapenec acte ishcutnuc cano mentoadtiadpambo icpondash.

²⁵Adnubien badiadte anoentsëqui acte bëntse Esus chopondash. ²⁶Acte bëntse chosho isashini: —Podobitsi nec —quiash dacuëdtanec

sidquecuededpondac. ²⁷Adshobini Esusën: —Ëbien neque. Dacuëdenda —capondash. ²⁸Adoaquien Petedon: —¿Con Icbombobida ne? Con Icho icquin: “Acte bëntse cho,” ëbi ca —capondash.

²⁹Adsho tantiashun Esusën: —En cho —caquien Petedo canonoësh budanec acte bëntse Esus bëquedbanec niduidtsëcondash. ³⁰Esusuidi isec bédamboec niduidtsequi acte comapenec tëccuasquesho isash dacuëdtanec acte bëntse niduidtsëcboedi mentoadtsempondash. —Ëbi bed, Icho. Mentoadebique —caquien ³¹Esusën badedquio bedtanquin indopondash. Aden indoequi: —“Con icbon ëbi bédamboen nametsiash,” queboedi ¿atotsi quiaish dacuëdtano? Ëbi bëdiactsec tantiatsëcquid mibi nec —quepondash Esus Petedo caic.

³²Adtanec Petedobëdi cano antsadtonobien cunqueboedi cunquenquo yampondash. Actetsen tëccuasquenquo yanondash. ³³Adsho isun cano antabëdquidon: —Mibi bédamboshë iquec. Comapenen tantiaquidquo yec Nuquin Papan Madombo mibi nec —quequin Esus tantiabededpondash.

Quenesaded yacnoshon Esusën bédamiaid
(*Mad. 6.53-56*)

³⁴Adashic chian potiaish Quenesaded yacno pudundopondash. ³⁵Pudundoshon isun anocquidon: —Esus chosh —quequin uanocquido abitedi chuibeniac daicsaido abitedi bë-bëpondash. ³⁶Bë-bëshumbic: —Dashcuteuidtsëqui mishashi bédantsiash —queshun Esus chuituidquin: —Min dashcute cuëmano daicsaido mishme —cac mishmiaqui bédampondash abitedi.

Padiseyobo icsaid Esusèn chiaid

(Mad. 7.1-13)

15¹Adnubien padiseyobo Moisesèn dada uampid chuibanquidobèdi shubu dadpen icquid Edusaden caid yacnuèsh cho-choquin Esus istuidpondash. ²Istuidashic: —¿Atotsieshun mibèd icquidon nuquin tsusedpabon chiaid niac-niacposh? Penush mëpamèdenquio icquin nuquin tsusedpabon chiaid ma niac-niacpaboc —quepondash Esus chieshènquido. ³Adsho tantiashun Esusèn: —Ma mimbi. ¿Atotsieshun Nuquin Papan chiaidquio niac-niaque? Nuquin tsusedpabon chiacpadomboen naquin ma mimbi Nuquin Papan chiaidquio niac-niacpayoc. ⁴Tantia. Mibi chuinu. “Titabèdta papa chieshènenquio icquin bédamboen tantiata,” quequin Nuquin Papan chiampidquio ma mimbi niacpaboc. Adembidi: “ ‘Con pa unèspashun,’ quec chieshèmènquid icsho unès uaquid. Adembidi ani icsamboen chuishunsho unès uaquid,” quequin Nuquin Papan chiampid utsi mimbi niacpec. ⁵Aid niacquin nuquin tsusedpabon ambembi chiaidien mimbi chiec. “Anibèdta amè naden cudasènac bédambo ictsias,” mibi quepec. “ ‘Nuquin Papa menetequid nèidted con piucquid iquec. Mitsana nibèdsho menetiadquidi mibi menenquio iquembi. Nuquin Papa menetequid nec,’ quequidèn ⁶cudasènac bédambo ictsias,” mibi quepec. Aden nuquin matsesèn chiaid naquin Nuquin Papan chiaidquio ma mimbi niac-niacpayoc. ⁷“Nuquin Papa tantiaquidquio nebi,” quec muaquid mibi nec. Èndenquimboshè Nuquin Papan chuimiatic nuquin tsusedpa Isayas caidèn mimbi icsamboen tantiata chuiquin dada uapampic naden.

⁸“Isadaidbo: ‘Nuquin Papambo tantiembi,’ quepec.

Adboedèmbi èmbi chiaid niacquin èbi tantienquio iquec.

⁹‘Ma Nuquin Papan èbi bédamboen isnu,’ queboedèmbi èbi bédamboen tantienquio iquec.

Èmbi chiaidquio namenquio icquin aton matsesèn chiaiduidi namepec,”

quequin Isayasèn Nuquin Papan chiaid dada uapampic —quequin Esusèn abi chieshènquido chushcapondash.

Ana shècuènuèsh choaid chiaid

(Mad. 7.14-23)

¹⁰Adshumbic abi isec datsidadquido ompoacbimboen chuipondash. —Tantia. Mibitedi chuinu. ¹¹Ana shècuèn

puuedaidèn matses icsaten mimbi dampec. ¿Adquidènda matses icsapec? Padenquio. Ana shècuènuèsh

choaidèmbien matses icsatsias —quequin Esusèn chuipondash.

¹²Adnubien abèd icquidon: —Mimbi aden chuiboed tantiashun padiseyobon mibi chieshènosh, Icbo —caquien:

¹³—Dacuèdènda. Icsa bescatanquin tsindoshon nèdèncacimboen ambi tantiamiabi yaido ambembi chuiquido Nuquin Papan cuideque. ¹⁴Dacuèdènda.

Padiseyobo bèshuaidimboec icquido neque. Bèshuaidèn aton matses bèshuaid utsi bédamboen buantiapimbo iquec. Buanuec abi shècuèmpaèdtsias. Adembidi Nuquin Papan chiaidpenquio namequin aton matses bédamboen tantiametiapimbo iquec —quepondash Esus abèd icquido chiec.

¹⁵Adshobien Petedon: —Mimbi ana shècuènuèsh choaid quequin chuiboed tantiambo iccombique. Aid sebadènquio chui. Tiantianu, Icbo —caquien:

¹⁶—¿Tantiamboda icco? ¹⁷Chuinu.

Tantia. Ana shècuèn puuedaid mimbi

peboed min pucun uedoash chimute shëcuënuësh choec. Adquidën Nuquin Papan chiaid niacmenquio iquec.
¹⁸Matses onquaiidimbi ana shëcuënuësh choaid caoc. Abibi uquëducuësh onquec: “Adoembi,” quequin otacquo tantiaquin naic matses icsatsiash.
¹⁹Icsambo icquido yec: “Ai, adoembi,” quequin otacquo tantiashun Nuquin Papan chiaid niactsiash nadquidën. Nëidic unësh uanquid. Nëidic aton chidopenquio chudquid. Nëidic aton bënëpenquio chudmequid. Nëidic aben uequid. Nëidic ampequid. Nëidic muaquid. Nëidic icsamboec chuishumënquid. ²⁰Adquidtedi: “Ai, adote bunebi” quequin otacquo tantiash icsaquid nec. Padnuen penush mëpamëdenquio icquin Nuquin Papan chiaid niaquenquio ictsias —quepondash Esus abëd icquido chiec.

Isadaidpembo chidon Esus tantiaid
(Mad. 7.24-30)

²¹Adanec auëshquiobi Esus nidpondash. Shubu dadpen icquid Tido caid anoentsëqui datambidanec choec shubu dadpen icquid utsi Sidon caid anoentsëqui chopondash.

²²Adnubien anocquid cananeyabo chidon Esus cuëntuidpondash. —Tsusedpa Dabidën tsyuecquid Nuquin Papan namiaid icquin ëbi bëdamboen ista. Con champi podobitsi icsa dapuduedaid yec natiambo iqueque. Con champi bëdameta —caquien ²³Esusën ëcbedenquio ipondash. Ëcbedenquio yaqui chidon tsibanbanquin cuënbampondash. Adsho tantiashun Esusbëd icquidon: —Chieshanquiecuëdpeque. Cuemepa —caquien ²⁴Esusën cuemenquio icquimbi aid chuiquin: —Nuquin Papan chiapaden Isadaidbo matsesba Nuquin Papa bëdamboen ismete tantiamenuec

nebi. Bënudacbimboec icquin Nuquin Papa tantienquio icsho aidoba tantiamenuec nebi —quepondash Esus.

²⁵Adsho tantiash nidenquio yec chido cuëdboed Esus ismequin danëshën sebudtsec: —Ëbi nashunta, Icbo. Con champi bëdameta —qeshobien Esusën: ²⁶—iAton bacuëbo pemenquio icquimbi aton opa pemiacta bëdambo icpatsias? Padenquio. Adembidi Nuquin Papan con matses caidotedi tantamiabi utsibo ëmbi nashunac icsambo ictsias. Isadaidboba tantiamenuec nebi —quepondash Esus.

²⁷Adsho tantiashun chidon: —Ai, abimbo mimbi caic. Padnuen bacuëbon pequin paëdmiaid opashëmpin petsëcquid. Adembidi mimbi comapenen tantiaquin nabanaqui isadaidbo dadpen bëdanubi isadaidpembo abentsëc tantiaquid icsho ëbi nashunquin con champi bëdameta ²⁸—caquien Esusën: —Ai. Ëbi tantiaquidquio mibi nec. Mimbi chiacpadece min champi bëdanendac —qesho tantianec aton shubuno nidshun isquien aton champi bëdanac Esusën chuinubi.

Daicsaido dadpen Esusën bëdamiaid

²⁹Adanec auëshquiobi nidec chian dapa Cadidia caid cuëman nidquid podquedën nidanepondash. Adashic macuësh dapa dectatoec poctsebi tabadtuidpondash.

³⁰Tabadtuidsho isun matses dadpenquio cho-choquin daicsaido dadpen Esus ismenuen bë-bëpondash. Tidinquiquido yec bëshuaido yec shëquëquenquio icquido yec onquesabo yec daicsaido utsibotedi yec quenuec bë-bëpondash. Adsho Esusën bëdamebampondash. ³¹Bëdamiac onquenquio icboedi onquianondash. Bëshuacboedëmbi isbenondash.

Capuenquo icboedi capucuenondash.
Daicsaido utsibo adecbidi bēdanondash.
Adsho isquido nadpondash.
—¿Adquidta ictenec? Nuquin matses
isadaidbon tantiaidēn Nuquin Papan
namiaid icquin bēdamēpash icnui.
Nuquin Papa bēdambo iquec
—quepondash Esusēn bēdamiaid
tantiaish.

Matses 4000tedi pemiaid
(*Mad. 8.1-10*)

³²Adec tabadsho isashien Esus:
—Nēido tantiac unēsquo iquec. Ēmbi
nabansho isnuec choash 3tedec ushquin
piac ambi bēboed pete naimēdaccosh.
Ēmbi: “Nid,” cac nidnuequi bunambi
padishtsiash. Pemiabi nidmetiapimbo
iquebi —quepondash. ³³Adsho
tantiaishun abēd icquidon: —¿Midambo
pete bedtiapimbo iquec? Pemetiapimbo
matses dadpen iquec —capondash.

³⁴Adoquien Esusēn: —¿Tedtsti
panēmpi iquec? —cac: —Sieteted ictsec.
Nuēcquidēmpi daēdpactšēc ictsec
—quesho ³⁵tantiaishumbien abi
datsidadquido chuiquin: —Nēmbo
tabadbud —capondash. Adoac
tabadbudpondash abitedi.

³⁶Adshumbic panēmpibēdta
nuēcquidēmpi bedshun Nuquin Papa
chuipondash. —Nēid mimbi uaid
bēdambo iquec, Papa —queshun pete
cuēsh-cuēshbantsēcshun abēd icquido
menebampondash: —Pemban
—quequin. Adoac abitedimbo
pembampondash. ³⁷Aden pemiāc
abitedimbo nua cubudcuededpondash.
Piacsho isun pequin napi uaid
bedbanquin tsitsan 7ted icnuc
cubu-cubuctšēcquio icnuc
sandobampondambi. ³⁸Esusēn pemiaido
dadpenquo icpondash. Tambanac
4000tedi dada icpondash. Chido
bacuēbobēdta tambanambo iccondambi.

³⁹Adashic: —Nidanec nid —quepondash
Esus ambi pemēboedo caic. Aido
nidanenubi chian budash cano
antabēdtoshon Esusēn chian
potepondash. Chian potiaish nidaid
Mactada caid yacno pudundopondash.

Saduseyobon: Ēbi isme, quiaid
(*Mad. 8.11-13; Duc. 12.54-56*)

16 ¹Pudundoanec nidshobi
anocquidon abi chieshēnquidon
Esus chuituidpondash. —“Nuquin Papan
chomiaid nebi,” quequin comapenen
tantiaquin nabanquin ēbi isme
—cabededpondash padiseyobobēdtan
saduseyobon.

²Adshobien Esusēn: —Nuquin
matsesēn chiaid mimbi tantiec.
“Inchēshbudtsēqui abu piumbo icsho
isash: ‘Tanunquo badiadec,’ quequid.
³Badiadnubi abu inchēshpambo icsho
isash: ‘Ue dapa choec,’ quequid,”
quequin nuquin matsesēn chiaid mimbi
tantiec. Aden chiaid tantiacimboen
bēdamboen tantiatiaidqui Nuquin
Papan nēbimbobi naid mimbi
tantienquo iquec. ⁴Icsambo icquid
icquimbi mimbi: “Ēbi isme,”
cadednepec. Nēbi mibi ismenquo
iquembi. Nuquin Papan nuquin
tsusedpa Onas chishcambiecquid dapan
chebudacsho daēdec ushun
ucbudmiacbimboec unēs uacsho
chococac daēdec ushash uincuenendabi.
Aden ēbi tantiesabo ismendambi
—quianec nidpondash Esus.

Padiseyobon chiaid tantienda, quiaid
(*Mad. 8.14-21*)

⁵Adanec nidec chian budash cano
antabēdtoshon chian poteoapondash.
Chian potequien Esusbēd icquido:
—Pete nianchitombi. Bētiadquidi
nepobi —quepondash. ⁶Adshobien
Esusēn abēd icquido chuiquin:

—Padiseyobëdtan saduseyobon naid pan bidiscamete bimboecquid iqueque. Ista —caquien ⁷tantienquio yec abëd icquido nadec onquecuededpondash. —Nuqui niamboed pete chiequi nepanui —quepondash. ⁸Adsho ambembi tantias Esus: —Ëbi bëdiactsëc tantiasëcquid mibi nec. ¿Mimbi pete niamboed chiectabi nedi? Padenquio. ⁹¿Bëshunashta mibi nepe? Pete 5tedtsëcboedi ëmbi 5000tedi pemiaidën napi uaid dadpen iccondaid ¿tantienquioda yano? ¹⁰¿Adembidi pete 7tedi ictsëcboedi ëmbi 4000tedi pemiaidën napi uaid dadpen tsitsanën sandoboed tantienquioda yano? ¹¹¿Aden comapenen tantiaquid icquimbidambi pete niamboed chuipadi? Padenquio. Pan bidiscamete pictsëc cabiunac pan abichobi nua bidisquiac bimboecquid padiseyobobëdtan saduseyobon chiaid iquec —quepondash Esus.

¹²Aden chuisho tantias abëd icquido nadpondash. —Pan chienquio icquimbi nuquin matses tsusiobon chiaidshenda capec. Aido caic: “Icsamenda,” quepecshenda niosh. “Padiseyobon chiaidbëdta saduseyobon chiaid tantienda,” quepecshenda niosh —quepondash Esusbëd icquido.

Nuquin Papan Mado mibi nec, quiaid
(*Mad. 8.27-30; Duc. 9.18-21*)

¹³Adash yuectaniash puduanec nidequien Esus nidaid utsi Sesadeya Uedipo caidën nidanepondash. Adshumbic abëd icquido chuimepondash. —Utsibon ¿tsutsi ëbi caosh? —caquien: ¹⁴—“Uan pado acten mentoanondaidien nec,” mibi caosh. Utsimbic: “Edias cuëmëdquid Nuquin Papan ambi tantiaid oncamiampid nepanui,” mibi caosh. Utsimbic: “Edemias cuëmëdquid Nuquin Papan

oncamepamid nepanui,” mibi caosh. Utsimbic: “Nuquin Papan oncamiampid utsi nepanui,” mibi caosh —capondash abëd icquidon. ¹⁵Adsho tantias Esus: —Ma mimibi. ¿tsutsi ëbi mimibi cao? —caquien ¹⁶Petedo Simon caidën: —“Quidistu caid Nuquin Papan chomiaidquio nec,” caombi mibi. Aton Madombo mibi nec —capondash.

¹⁷Adsho tantias Esus: —Nuquin Papan aden tantiamiac mimbi bëdamboen chioc, Petedo. Onasën mado Simon caid yec matsesien mibi nec. Adquid icquimbi matsesën tantiaid chienquio icquin Nuquin Papan tantiamiaidquio mimbi abimbo chioc. ¹⁸Tantia. Ëmbitsen mibi chuinu.

“Cuënotebimboecquid nec,” quequin mibi Petedo cuënondami. “Cuënote dapa utsi ictiapimbo yac bimboec chieshtoenquio icquid iquendac,” qeshun mibia ëbi tantiaquido chuiquid dapambo icmendambi. Adec mimbi namiaido ëbi tantiaquido iquendac. Satanasën aido: “Nëid yuanu. Utsibic chieshtomenu. Utsibic unës uamenu,” caqui abi ëbi tantiaquido iquendac.

¹⁹Padnuc Nuquin Papan chiacpadomboen ëbi tantiaquidon nate mimbi chiendac. Adembidi ëbi tantiaquidon natemaidtsen mimbi chiendac —quepondash Esus Petedo chiech.

²⁰Adashic abëd icquido abitedi chuioaic: —“Nuquin Papan chomiaidquio nec,” quequin utsibo ëbi chienda —quepondash Esus.

Abi unës uate Esusën chiaid
(*Mad. 8.31-9.1; Duc. 9.22-27*)

²¹Adshumbic tauaquin abi unës uate chuidondash. —Shubu dadpen icquid Edusaden caid yacno nidendabi. Anoshon nuquin matsesën ëbi chieshënquendac nëidtedshun. Nëidic

tsusiobon. Nēidic nēish yua abided unēs uaquido chuiquid dapabon. Nēidic Moisesēn dada uampid chuibanquidon. Aidtedishun mēyanquioquin ēbi unēs uamendac. Adoacsho chococac daēdec ushash uincuenendabi —quequin chuisho ²²tantiashun Petedon uanotantsēcquin tsadumbudshun Esus chuipondash. —Unēsquo icnuc mimbi chieque. Aden chienda. Ma mibi unēs uatiapimbo icpayoc —capondash Petedon. ²³Adoacquien Esusēn: —Satanasēn oncamiac Petedo adec onquec —qeshun Petedo isquin Satanas chushcapondash naden. —Cuen, Satanas. Nuquin Papan chiaid mimbi ēbi niacmetiadquio iqueque. Cuen —quetanec Petedobi chiec: —Matsesēn tantiaid chuiquimbi Nuquin Papan tantiaidquio mimbi chienquio iccō —capondash.

²⁴Adashic abēd icquidotedi chuioaic: —Ēbi tantiaquidon aton nauidi nainquio icquin ēmbi chiacpadomboen natsiash. Adsho chieshēmēnquidon: “Unēs uachitōmane,” cac chieshtoenquio icquin ēbi tantiatsiash. Adquid ēbi tantiaquidquio nec. ²⁵Padnuen ēbi tantiatsēcquid: “Esus tantiasho unēs uachitōshe,” quiash ēbi tantienquio yanec unēsash Nuquin Papan cuidaidobēd nidendac. Padnuen chieshtoenquio icquin ēbi tantiaquid Nuquin Papa yacno tabadendac. ²⁶¿Nuquin Papa tantienquio yec tabadecta matses bēdambo icpatsiash? Abi bunaidtedi bedquin Nuquin Papa tantienquio yec unēsash ¿mitsimbo tabadpatsiash? Nuquin Papabēd tabadte bunquin ¿atotsi menepatsiash? ¿Piucquid meniashta Nuquin Papa yacno tabadpatsiash? Padenquio. Adotiapimbo iquec. ¿Atoda meniantiapimbo iquec? ²⁷Ēmbien matses cuidte chiendac. Nuquin Papa

yacnuēsh ambi abi yacnoshon uaido mayan bēdabobēd cho-choshon Nuquin Papan abitedishun icbo icmiaid icquin matses cuidte chiendambi. Nuquin Papa tantiec bēdamboec tabadquid Nuquin Papabēd tabadmequin Nuquin Papa tantienquio yec icsaquido icsano nidmendambi. ²⁸Tantia. Chuinu. Utsi-utsiec unēsabi icquin ēbi tantiaquido dadpen yansho mimbi isendac —quepondash Esus.

Esus bēchamauanquiecscho isaid

(Mad. 9.2-13; Duc. 9.28-36)

17 ¹Aden chias 6tedec ushanec nidquimbi Esusēn abēd icquido 3tedtsēqui buampondash. Petedo yec Acobo yec Acobon buchi Uan yec quetsēcncuc buanash macuēsh dapa dectatoash mananēnquio tabadtuidpac caondash. ²Tabadtuidshun isquien Esus utsiacimboec isadpec. Aton dashcutebēdi aton bētantete ushēbimboec bēchamauanquiecscho yanac caondash.

³Esus bēchamauanquiecscho icnubien dada utsi daēd isadcuenash Esusbēd onquiampac caondash. Abentsēc Moises yampid icnubi utsi Edias Nuquin Papan ambi tantiaid oncamiampid icpac caondash. ⁴Adsho isashien Petedo: —Mibi adec tabadsho isash bēdambo iquebi. Mibi nēmbobi tabadmenun abentsēc chotsecncuc shubumpi uatsēcncuna, Icbo. Mitsana natsēcquinc Moisesēn na natsēcquinc Ediasēn na natsēcquinc canuna. ¿Ada bēda icpec? —quenubi ⁵abu ushu bēchamauanquiecscho icquidēn isadenquio icnuc bētimpac caondash. Adnubien abu ushu nēnantanuēshquio Nuquin Papa onquiampac caondash. —Nēid con Madombo nec. Ēmbi tantiaidquio yec ēmbi bēdamboen isaidquio neque. Nēidquio tantiaata —quec

dacuëdampamboec onquenubien ⁶uinte paëdtampamboec dacuëdtanec uebudcuededpac caondash Petedo chedo.

⁷Adshobien Esusën camishquin: —Dacuëdenda. Nidto —cac ⁸nidtoquin isquien Esus abentsëqui iquec.

⁹Adtanec macuësh budequi Esus: —Mimbi isboed nëbi utsibo chienda. Unës uac ëbi uincuenacsho isun chianta —quepac caondash abëd icquido chiec.

¹⁰Adsho tantiash Petedo chedo: —“Nuquin Papan chomiaidquo nec,” quequin nëbi mibi tantiembi. Mibi adquid icnuc ÷mitsipadquid nuquin matses tsusiobon chuiposh? Nuquin Papan chiaid isash: “Nuquin Papan chomiaid choabi icnuc Edias yampidba choendac,” quepequien iccosh —qeshobien ¹¹Esusën: —Abimbo chiosh. “Edias yampid bëyuc choshon: ‘Nuquin Papan chomiaic bëdambo icquid choeque. Bëdamboec tabadta,’ quequin chiendac,” quequin abimbo chiosh. ¹²Adquid Ediasbimboecquid chondash. Choacsho tantienquo icquin matsesën abi bunacpaden unës uapac caondash. Adembidi Nuquin Papan chomiaid icsho ëbitsen chieshënquin unës uaindac —qesho tantiashien:

¹³—“Ediasbimboecquid nec,” quequinshenda chuiposh. Uan pado acten mentoandened caquinshenda Edias capec —quepac caondash Petedo chedo.

**Madompi dapuedaid
podobitsi icsa cuemiaid**
(*Mad. 9.14-29; Duc. 9.37-43*)

¹⁴Bëchamauanquieic ictanec choequin abëd icquido utsibo yacno choquin matses dadpen aido datsidadacsho Esusën istuidpondash. Adec Esus chosho isumbien unësanetsëcquidën papan Esus ismequin danëshën

sebudshun chuipondash. ¹⁵—Con mado bëdamboen isquin bëdameta, Icho. Baded-badedquieic unësanec cuëten pichiquianec. Adecbidi unësanec acten mentoadtsenaccosh. ¹⁶Mibëd icquidon bëdamete danquin bëuidombi. “Në bëdame,” cac bëdamenuen tanuidosh. Bëdamenquo iccoshe. Mimbimbo bëdameta —caquien ¹⁷Esusën ambo icquidotedi chuipondash. —Ëmbi nadatiambo icquin nabanquin ismiaqui mimbi ëbi tantienquo iquec. Adsho isash chieshtoash cuentiadquo icchitebi. Adtiadquo yequi padenquo iquec nebique. Min mado beccho —cac ¹⁸bësho istanquin Esusën podobitsi icsa chushcapondash. —Padi. Daicsa uainda —cac podobitsi icsa cuenubi madompi bëdampondash.

¹⁹Adsho isun abëd icquidon Esus chuipondash utsibo tantiamenquo icquin. —Ëmbi: “Cuemenu,” cac ÷tatotsi quiaish podobitsi icsa cuenenquo icposh? —caquien: ²⁰—Nuquin Papa bëdamboen tantiaquin mimbi bëdamboen natsenoc. Mimbi bëdiactsëc tantiatsec. Pete ëshëmpi mostasa caid pistsëcquidi siac nua yec canitsiash. Adecbidi Nuquin Papa tantiatsëcboedi: “Ambi natiapimbo ictequid nibëdec,” quequin abimbo tantiaquidquo yanshun comapenen tantiaquidbimboec mibi ictsiac. Adquidën nëid macuëshquiobi cain: “Uquë manëd,” cac manëdtsiash. Aden mimbi: “Ëbi bëdamboen nameta, Papa,” quequin Nuquin Papa chianiac aidëmbi mimbi: “Ëmbi natiapimbo ictequid nec,” caid mibi bëdamboen nametsiash. ²¹Nëbi ëmbi cuemeboed abembi cuentiapimbo icquid nec. Nuquin Papauidi tantianuen buna mëmunquin Nuquin Papa chianeshun adquid cuemequid —quequin Esusën chuipondashi.

Abi unëste Esusën chuioaid*(Mad. 9.30-32; Duc. 9.43-45)*

²²Adanec aton nidaid Cadidia yacnobi capucuenequimbi Esusën abëd icquido chuipondash. —Ëbëd icquid abentsëcshun ëbi chieshëncquido ëbi bedmendac. ²³Bedshun ëbi unës uamendac. Aden unës uamiacsho chococaquini daëdec ushash uincuenendac —quesho tantiatanequien abëd icquido: —Unësquio icnuc chiec —quiash shubiantiadtsëcquio icpondash.

Chuiquid dapa menetequid piucquid Petedon istuidaid

²⁴Aden chianec nidequi shubu dadpen icquid Capednaun caid yacno Esus chopondash. Adnubien Nuquin Papa tabadte shubu uashunaid nacnemenuequin piucquid bedquidon Petedo chuituidpac caondash. —Nuquin Papa tabadte shubu uashunaid nacnemenuen ðada min icbon dos dada uatsaid piucquid shocoshëmpi abentsëc menepatsiash? —cac ²⁵Petedo: —Ai, menetsiash —quepac caondash. Adanec nidec shubun puduedshobien Esusën ambia Petedo chuipondash. —ËAtotsi mimbi chie, Simon? Aton matsesën na nacnemenuen ðtsutsi chuiquid dapabon piucquid bedshumpec? ðAda aton matses piucquid bedshumpec? Aido bedshunenquio icquin ðada ambi bedaïdo aton yuabo piucquid bedshumpec? —caquien ²⁶Petedo: —Ma aton yuabo bedshumpaid yoc. Aton matses piucquid bedshunenquio iquec —quesho tantiashien: —Adembidi aton Mado icsho aton shubu nacnemenuen Nuquin Papan ëbi bedshuntiapimbo iquec. ²⁷Aden tantiaquimbi: “Nëishnushe,” qeshun menenun nanuna. Chianën ansetetan. Tauaquin

ansemaïdi ancanshun anisquin 4 dada uatsaid piucquid shocoshëmpi abentsëc mimbi istuidendac. Aid bedshun piucquid bedshumëncquido menetanta. “Në con icbon nabëdi con na nec,” quequin menetanta —capondash Esusën. Adoac Petedon Esusën chiacpadomboen menetampac caondash.

ËMitsicquid chuiquid dapa mimbi icmepatsia? quequin chiaïd*(Mad. 9.33-37; Duc. 9.46-48)*

18 ¹Adshumbic abëd icquidon Esus chuipondash. —Abitedishun Icbo icquin matses mimbi namendac. Ëbi chedo caic ðmitsicquid mibëdntan chuiquid dapa mimbi icmepatsia? —quesho ²tantiashun abi tabadacno nënantanquio bacuë tsaduntsëcshun Esusën chuipondash. ³—Tantia. Mibi chuinu. Mitsanauidi tantiec Nuquin Papan namiaïd mibi ictiapimbo iquec. Mitsanauidi tantiaboedi nadquid bacuën amën chiacpadomboen nacnimboen ëbi tantiaquiota. Adash ambi namiaïd yanash Nuquin Papa yacno mibi puduedendac. ⁴Aden ëmbi chiacpadomboen naquidquio icsho mibi Nuquin Papan: “Bëdamboshë iquec,” caindac. ⁵Nadquid bacuëbëdnta ëbi tantiabentsëcquid bëdamboen tantiaquidën ëbitsen bëdamboen tantiendac —quepondash Esus.

Tantiabentsëcquido icsamete chiaïd*(Mad. 9.42-48; Duc. 17.1-2)*

⁶Adshumbic padpiden chiec: —Ëbi tantiabentsëcquid caic: “Nuquibi Nuquin Papan chiaïd niac-niacquiec icsaquionona,” quequid Nuquin Papan cuidendac. Icsamiabi yec unësacsho isun: “Bëdambo iquec,” catsiami. “Cuënote yuëmboshë icquid tēdectanshun acte nënepatecñëdan,”

caimbi icsamiente bunquidquio. ⁷Aden ëbi tantiatsëcquid utsibon icsamendac. Adec icsamianquid Nuquin Papan cuidendac.

⁸Aden Nuquin Papan cuidte chuisho tantiequi icsainda. Mëdanten naic mibi icsaic. Mëteshuniac bedtiapimbo yac bimboec icsainquio yec ënëdta. Taën capuec mibi icsaic. Tateshuniac caputiapimbo yac bimboec icsainquio yec ënëdta. Ënëdenquio icsho Nuquin Papan mibi cuidendac. ⁹Adecbidi ëshën isec mibi icsate bunquieac. Ëshë chicshuniac bimboec icsainquio yec ënëdacsho: “Bëdambo iquec,” catsiambi. Ënëdenquio icsho Nuquin Papan chian anëdënquiacno nësecaindac —quequin Esusën chuipondash.

**Matses ëbi tantiamete
Nuquin Papa bunaid**

(Duc. 15.3-7)

¹⁰Adashic padpidec: —Nadquid bacuëmpin ëbi tantiatsëcsho isun: “¿Adtsëcquidëmpin quibida bëdamboen tantiapec?” cainda. Nuquin Papan abi yacnoshon uaid mayan bëda aid bacuëbo dayun uaquid icquin Nuquin Papa yacno puduedshun mimbi mamëns humboed Nuquin Papa chuinushe. Adtsëcquidëmpi mamëns hunenda. Ëbi tantiabentsëcquido con Pan tantiaqueque. ¹¹Ëmbitsen aido tantiembi. “Bënudaid istuidac bimboen ëbi tantienquio icquidobi ëbi tantiaquido icmenu,” quiash matsesondabi —quepondash Esus.

¹²Adashic padpidec: —¿Mitsipadquio nuquin matses icpec? Nëish yua obeca dadpen 100ted dayun uaquidën aton yua tambanac abentsëc nibëdsho istanquin utsitedi nianshun aid abentsëc nibënbenequin istuidquid. ¹³Aden istuidash comapenec cuishonquequid:

“Con yua nibëdantsenquiac,” quiash. Aton yua utsi yacno bëash abi icbocetedi icsho isash bëdambo icquid. Adecbidi matsesën ëbi tantiabensho isash Nuquin Papabëd cuishonquebi bënudaid istuidac bimboec. ¹⁴Icsaido cuidacno matses nidmete Nuquin Papa bunenquio iquec. Matses bëdamboen isquin abëd tabadmete Nuquin Papa bunquieac —quepondash Esus.

Chieshënuquidobëdi onquete chiaid

(Duc. 17.3)

¹⁵Adashic padpidec: —¿Ada ëbi tantiaquid utsin mibi icsa uaosh? “Ai, icsa uaoshi. Chieshëmiantiadquio icchitosh,” qeshun nadoac bëdambo ictsiash. Aid abentsëqui chuiquin aidbëd bëdamboec onquequin: “Ëbi icsa uaquin Nuquin Papan chiaid mimbi niac-niacoc. Adec icsainquio yec ënëdta,” mimbi cac: “Ai, adebi,” quiash mibëdi bëdamboec tabadtsiash Nuquin Papa tantiesabimboec icuidboedi.

¹⁶Mimbi: “Icsainquio yec ënëdta,” caqui: “Padi. Adequi icsaibi,” qesho tantiaashun ëbi tantiaquid utsi beduanshun aidbëdtan chuitanta. “Nuquin Papan chiaid niac-niacsho isun daëdshun chiaid abimbo chiaid nec,” quequin chiaid tantiaquin adota.

¹⁷Mimbi buanaidënsen: “Adec icsainda,” caqui: “Adequi icsaibi,” qesho tantiatanec choashun mibëdtan ëbi tantiec iccuededquido chuiquido chuituidta. “Mimbitsen chuitanta,” cac aidontsen chiaqui tantienquio icsho isun: “Nuquin Papan chiaid niac-niacquid yec Esus tantiesabimboecquid nec,” qeshun ëbi tantiaquido cuëdënacno chomenda.

¹⁸Aden mimbi: “Esus tantiesabimboecquid neque. Cuëdënacno chomenquio ictiad,” casho Nuquin Papan: “Bëdamboen naic,” mibi

catsiash. Adembidi mimbi: “Adec icsaboedi icsainquo yec ënédsho isun cuëdënacno chomeoanuna,” qeshun chomeoasho Nuquin Papan: “Bëdamboen naic,” catsiash.

¹⁹Padpiden chuinu. Tantia. Mimbi: “Nuquin Papa chuinuna,” cac: “Ai, adonona,” qesho tantiashun aidbëdñan mimbi Nuquin Papa chianiac mimbi chiapadomboen Nuquin Papan natsiash. ²⁰Ëbi tantiec daëd tabadnuc aidbëd con Mayan yec ëbëd yacbimboec tantiadendac. Adec tabadsho isun: “Con Mado tantiaquido nec,” qeshun aidon chianiaid Nuquin Papan tantiendac.

Yuan bëdamboen istiapimbo yaid

²¹Adec: —Icsa uanec chieshtomiantiadquo iquec —Esus qesho tantiashumbien Petedon Esus chuipondash. —Ïcsa uanec chieshtomianquid tedentsimbi chieshenquo icquin bëdamboen ispe? Chieshëñquin padpiden icsa uac ðpadpidendambi bëdamboen isoape? ðMëdante utsiuc daëd tauadoquin sietetedembi nashun padpiden bëdamboen isenquo icquin ënacta bëdambo icpatsiash? —caquien ²²Esusën: —“Mëdante utsiuc daëd tauadoec sietetedi” quequin daëdpacksëcquo mimbi chuipec. 70 por 7 caid ðtedtsi icpec? Aidteden 490tedembi ënenquo icquin bëdamboen isoadonic bëdambo ictsiash —quepondash Esus.

²³Adashic abi onquec: —Nuquin Papan chiapadomboen matses bëdamboen iste mibi chuinu. Tantia. Tsusion yuabo dadpen icpac caondash. “Ma bënu,” quequin ambi meniactedi piucquid bednuen aton yuabo aton shubuno chomepac caondash. ²⁴Abia chomiaidën piucquid dadpenquioshë bedshun aton icbo meniampo icpac

caondash. ²⁵Adsho icbon: “Mimbi bedactedi beccho,” cac: “Nibëdec,” quepac caondash yua. Adshobien icbon: “Aidtedi piucquid bednuen matses utsibo mibi yuamenu. Min chido min bacuëbëbëdñabi cuësh-cuëshëdmeshun aidtedi piucquid bednu. Mibi icsambo iqueque,” cac ²⁶yua abi yuaquid ismequin danëshën sebudash: “Padi. Ëbi yuamenuen cuësh-cuëshëdmenda. Chiata. Yuecshun aidtedi bedshun mibi menenun nanu,” capac caondash. ²⁷Adoquien icbon bëdamboen isquin: “Padi. Ëbi menenda. Mibi utsibo yuamenquo iquembique. Dacuëdenda. Nidec nid,” quequin icbon aton yua bëdamboen nidmepac caondash.

²⁸Adoac nidquimbien aid yuan icbon bëdamboen isboedën ambi: “Ma bënu,” quequin piucquid daëdpacksëc meniaid yua utsi istuidpac caondash. Istuidshumbic bedtanquin tëtëdinquin: “Mimbi bedactedi piucquid beccho. Unës uachitomane,” caquien ²⁹aidtsen ambi piucquid bedshunondaid ismenuen danëshën sebudtsec: “Chiata. Ëbi unës uainda. Yuecshun bedshun mibi menenun nanu. Chiata,” quepac caondash yua utsi. ³⁰Adsho tantiashun icbon bëdamboen isboedëmbi chieshëñquin: “Padi. Mibi cuidmembi,” qeshun quënën nauedmepac caondash. “Piucquid aidted abi menianenquo yacpadequi ma quënënuësh mëyadbudchitono,” qeshun nauedmiac caondash.

³¹Aden chieshëñquin quënën nauedmiacsho isumbien yua utsibon: “Chieshanquiec,” qeshun icbo chuituidpac caondash. “Mimbi bëdamboen isboedëmbi min yua utsi quënën nauedmiac: ‘Piucquid menianenquo iquec,’ qeshun,” quequin icbo chuiyac caondash. ³²Adsho tantiashun icbon ambi

cuidenquo icquin bēdamboen isboed chomeshun chushcapac caondash. “Icsambo icquidquo mibi nec. ‘Chiata. Mibi menenun nanu,’ mibi qesho: ‘Padi. Ēbi menenda,’ quequin mibi bēdamboen isombi. ³³Ēmbi mibi adobocpadomboen utsi bēdamboen istiapimboda icco? ‘Ma bēnu,’ qeshun mimbi meniactedi bēabi icsho bēdamboen isec mibitsen bēdambo ictsenac. Mibi yacpadec nēishun mibi cuidembi,” quepac caondash icbo. ³⁴Adshun quēnēn nauedmepac caondash. “Ambi bedactedi piucquid dadpenquo meniash ma puduempānu,” qeshun quēnēn nauedmiac caondash. ³⁵Aden matses yuan icbon nacpadomboen Nuquin Papan naindac. Utsibon chieshēnaqui chieshēnansho Nuquin Papan mibi bēdamboen istiapimbo iqueque. Chieshēnanenda. Mibi chieshēnquidobi bēdamboen ista —quepondash Esus.

Chidobēd cuēshēdte Esusēn chiaid
(*Mad. 10.1-12; Duc. 16.18*)

19 ¹Adanec nidaid cuēshē Cadidia caid yacnuēsh puduanec nidec nidaid cuēshē utsi Udeya caidēn nidquin acte Odan caid potebidanec Esus nidpondash. ²Adec nidshobien matses dadpenšun tsibanampondash. Abi tsibanansho isun nidtuidshun daicsaidtedi Esusēn bēdamepondash. ³Adnubien tsusedpabon chiampid namequido padiseyobon chieshēnquin: —Nuquin Papan chiaid niacmenu —quequin Esus chuituidpondash. —Ātotsi mimbi chuipe? Dada uashun aton chidobi nidmete ĩmitsipaden mimbi chuipe? En chui. Tantianu —capondash.

⁴Adoaquien Esus: —ĀNuquin Papan chiaid isamboda ictio? “Nuquin Papan dadaba uashun aton chido uapampic,”

quequin dada uaid ma mimbi ispaboc. ⁵Adembidi: “Dadan canite chido uaid icsho dadan aton chido bedquid. Amē chedobēd icboedi aton chido bedash aid nianenquo yec aibbēd tantiananquieic dada aton chidobēd abentsēc yacimboc tabadquid,” quequin dada uaid ma mimbi ispaboc. ⁶Aden Nuquin Papan tantiacpadomboen aton chido nianenquo yec aibbēdi tantiananquieic abentsēc yacimboc tabadac bēdambo ictsiash. Padnuen aton chido nianec aibbēdi cuēshēdquin Nuquin Papan chiaid niactsiash. Adecbidi chido aton bēnē nianec icsaquid —Esus qesho ⁷tantiashumbien abi chieshēnquidon: —ĀAbimboda mimbi capadi? Nuquin Papan chiaid dada uaqin ātotsieshūn Moisesēn naden chuipampic? “Aton chido bunenquo yanshun dadan naden dada uashun menequid. ‘Mibi intiapimbo yanobi,’ quequin dada uashun aton chidobi menequin nidmequid,” quequin Moisesēn dada uapampid ma icpayoc —quequin chuipondash Esus chieshēnquidon.

⁸Adsho tantiashun Esusēn chuipondash. —Ai, Nuquin Papan chiacpadec aton chidobēd bēdamboec tabadtiaimbo icsho isun Nuquin Papan Moises aden dada uamepampic. Tauamboen matses uaqin Nuquin Papan aden chiambo icpampic. ⁹Tantia. Mibi chuinu. Aton chidobēd cuēshēdshun chido utsi bedquin Nuquin Papan chiaid niactsiash. Padnuen aton chidon bēnēpenquo chudmesho istuidash aibbēd cuēshēdquin Nuquin Papan chiaid niaquenquo ictsiash —quepondash Esus.

¹⁰Adnubien abēd icquidon: —Adotiapimbo icte mimbi chuipec. Aton chidobēd cuēshēdenquo icte mimbi chuisho tantiashun: “Aton chido bedesambo dada bēdambo ictsiash,”

caimbi —quepondash abëd icquido.

¹¹Adsho tantiash Esus: —Ai, utsi-utsiec pabiate shëcuë nibëdabimboen ëmbi chiaid tantiatiapimbo iquec. Utsiboen aton chido bedash Nuquin Papan chiacpadec bëdamboec tabadquid nec. ¹²Utsibic mimbi chiacpadquid chido bedesa iquec. Nëidtedi chido bedesa iquec. Nëidic aton padibi impadishtsaid. Nëidic matsesën inicsa uaid. Nëidic: “Nuquin Papan yuambo icquin aidën chiacpadomboenuidi naquin chido bedtiapimbo iquebi,” qeshun chido bedesa. Adquidtedi chido bedesa nec. Ëmbi chuiboed tantiashun ëmbi chiacpadomboen nac bëdambo ictsiash —quepondash Esus.

Esusën bacuëbo chiaid

(*Mad. 10.13-16; Duc. 18.15-17*)

¹³Adnubien Esus ismenuen bacuëbo bë-bëpondash. —Mamishquin ma Nuquin Papa Esusën chuinu —quequin bë-bësho isumbimbi: —Padi. Bëenda —cauidpondac. ¹⁴Adshobini Esusën: —Chën. Ma bënu. Cuemenda. Bacuëbimboecquid Nuquin Papa yacno puduedtequid nec. Amën chuisho tantiash bacuë badedi: “Abimbo caic,” quiacbimboen ëbi tantiaquid Nuquin Papa yacno puduedtequid nec. Bacuëbo bëdambo iqueque. Beccho —cac bë-bëpondash. ¹⁵Adshobien mamishbanquin Nuquin Papa chuipondash. Adobidanec nidondash Esus.

Cania aton na dadpenquio dayun uaquid Esusbëd onquiaid

(*Mad. 10.17-31; Duc. 18. 18-30*)

¹⁶Adnubien dada caniampinquio Esus chuituidpondash. —Mibi bëdambo iquec. Bëdamboen chuiquidquio mibi neque. Ëbi chui. Padpidec unëstiapimbo icquid icmenun bëdambo icquid Nuquin

Papan abi yacno puduedmetsiash.

¿Atotsi nasho Nuquin Papan ëbi bëdambo capatsiash? —caquien ¹⁷Esusën: —¿Mitsipadquid bëdambo icquid cai? Nuquin Papauidtsëqui bëdambo icquid nec. Aidbëd tabadnuen ambi Moises dada uamiampictedi nata —capondash. ¹⁸Adoquien cania: —Nuquin Papan chiaid ¿mitsipadquid cai? —quesho tantiashumbien: —Naden chiaid caimbi. “Cuesunenda. Min chidopenquio chudenda. Min bënëpenquio chudmenda. Ampenda. Muainda. ¹⁹Titabëdta papa chieshënenquio icquin bëdamboen tantiata. Adembidi mibibi datantiadacimboen matses utsi abitedi tantiaquiota,” quequin chiaid caimbi —capondash Esusën. ²⁰Adsho tantiash cania: —Aidtedi niaquenquio icquin nabanquidquio nebi. Bacuëctsëc icquimbi tauaondambi. “Nuquin Papabëd tabadnuen ¿atotsimbi utsi nape?” caimbi —quepondash.

²¹Adsho tantiashumbien Esusën: —Nuquin Papan chiaid niaquesambo ictiadquio icquin mimbi dayun uaidtedi uesquin menequin piucquid bedta. Piucquid bedshun piucquid nibëdquido min piucquid uesquin menebanta. Adsho abëd tabadmenun Nuquin Papan mibi bëdamboen istsiashe. Adota. Adotanequic ëbëd iquec cho —caquien ²²cania: —Con na dadpenquio icsho uesquin menetiapimbo iquebi —quiash shubiantiadtsëcquio ictanec nidpondash Esusën chiacpadomboen natiapimbo yec.

²³Adsho isun Esusën abëd icquido chuipondash. —Chuinu. Tantia. Aton na dadpen dayun uaquid aton na tantiequi: “Nuquin Papa yacno tabadte bunebi,” queboedëmbi ëbi tantiatiapimbo iquec. Aton nauidtsëqui tantiec. ²⁴¿Ada nëishamën pinchuc chichte ancumpadic?

Padenquio. Adecbidi aton na dadpenquio dayun uaquidën aton nauidsëqui tantiaquin ëmbi chiacpadomboen natiapimbo yec Nuquin Papa yacno tabadtiaximbo iquendac —quequin Esusën chuipondash.

²⁵Adec: —¿Ada nëishamën pinchuc chichte ancumpadic? —quesho tantiashien abëd icquido nadpondash. —¿Tsudain Nuquin Papa yacno puduedtequid icchitotsiash? Nibëdchitequien iquec —quesho tantiashumbien ²⁶Esusën abëd icquido bëisquin naden chuipondash. —Matses namiantiapimbo icnuc Nuquin Papain namianquidquio nec. Ambi natiapimbo ictequid nibëdec —quepondash.

²⁷Adsho tantiashun Petedon: —Mimbi: “Nuquibi icnu. Cho,” cac con na abitedi nianec mibëd icnuc chopondabi. ¿Mitsimbo tabadtequidini nepe? ¿Atotsimbi nape? —caquin ²⁸Esusën: —Tantia. Mibi chuinu. Nuquin Papan ambi uaid abitedi chuca uabocnoëshquio ëbëdtan chuiquid mibitedi iquendac ëmbi abitedi namiacnuëshquio. Èbëd icquido icsho isun Nuquin Papan mibi chuiquid icmendac. Nuquin tsusedpa Acobon mado ¿tedtsi icpampic? Aidedi 12tedshun tsyuecquidon shubu 12tedi shubun-shubunquiec chuiquid dapabo mibitedi iquendac. ²⁹Utsibontsen ëbi tantiendac. Aton shubu nianquinc abëdta tishaido nianquinc aton tita nianquinc aton papa nianquinc aton bacuëbo nianquinc aton tied nianquinc cain ëbi tantiaquin ëmbi chiacpadomboen naquid iquendac. Adsho nëbi unësabi icsho ambi nianaidobëd tabadacimboecnuc bëdambo icmendambi. Adoshombic unësacsho Nuquin Papa yacno tabadmendambi padpidec unësenquio

icnuc. ³⁰Nidaidënuësh chuiquid dapambo icboedi Nuquin Papa yacnuësh utsi-utsiec chuiquidpenquio iquendac. Utsibic nëuëshquio chuiquidpenquio icboedi Nuquin Papa yacnoshon: “Bëdambo icquid nec,” quequin chuiquid dapa icmendac —quepondash Esus.

Chonoadquido chiaid

20 ¹Adshumbic abëd icquido Esusën ompoacximboen chuipondash. —Tantia. Èbi tantiaquido Nuquin Papa yacnoshon namete mibi chuinu. Badiadnubi tied icbon piucquid menequin aton tied neshcamenuen matses istuidpac caondash.

²Istuidshumbic: “Badiadnubi tauashun ushë budtsambi mimbi ënacsho nëidtedi piucquid mibi menenu. Naic cho,” cac chonoadec cho-chopac caondash. ³Ushë abucquio yanubi tied icbon pete meniacno nidshun utsibo nainquio yec samëdsho istuidpac caondash.

⁴Adoshombic aidotsen chuiquin: “Con tied neshcaic cho. Mibi bëdamboen cuidquin menenu,” cac ⁵tied neshcaic nidpac caondash. Ushë cuembo icnubi tied icbon padpidec pete meniacno nidoashun utsitsen istuidshun adembidi aton tied neshcamepac caondash. Ushë budambic padpiden utsitsen.

⁶Inchëshbudtsëqui nidoaquin utsibo nainquio yec samëdsho istuidoashun: “¿Atotsi quiash samëduidequi ique?” cac ⁷samëdquido: “Chonoa uanquid nibëdosh,” quesho tantiashun tied icbon: “Mimbitsen con tied neshcaic cho. Mibi menenu,” cac tied neshcaic nidaneoapac caondash inchëshbudtsëqui neshcaquin tauaic.

⁸Inchështsëcnubi tied icbon ambi chonoa uaido isquid chuipac caondash. “Chonoadquido piucquid meneban. Tsyuec choeboedba menequin

tauatanquin ushë budambi choboedotsen meneta. Adoshombic ushë cuembo icnuc choboedotsen. Adoshombic ushë abuctoan choboedotsen. Adoshombic badiadnubi abia chobedo ënquimbi meneta,” cac menequin tauapac caondash. ⁹Inchëshbudtsëqui chonoadec chobedooba menequin badiadnuc chonoadec taëboed tied icbon: “Menenu,” cactedquo puicquid menepac caondash.

¹⁰Adosho isashien badiadnubi chobedo: “Aido aden meneshun nuqui chonoadquioboed yuapambo nuqui menec,” qeshobi aیدtedtsëcbidi puicquid menepac caondash.

¹¹Aیدtedtsëcbidi meniaquien tied icbo chushcapac caondash. ¹²“Tsyuec chonoadboed meniactedsëcbidi menioshi. Icsambo iquec. Inchëshbudtsëqui chotsash daëdpactsëc chonoadtsëcquid meniactedsëc yuec chonoadquid puicquid meniac icsambo iquec. Chun mëyadec yuecquo chonoadobi. Aیدtedtsëc menianec mibi chieshanquieq iquec. Èbi dadpen meniac bëdambo ictsiash,” quequin chushcapac caondash.

¹³Adoquien tied icbon: “¿Chieshanquiectabi ique? Èmbi: ‘Nëidted puicquid menenu. Naic cho,’ cac ma mibi: ‘Ai,’ quepaboc. Mambi mibi aیدtedquo menepaboc. ¹⁴Mimbi bedboed buanec nid. Èbi bunacpaden tsyuec choash chonoadquid mibi meniactedquiobi meniombi. ¿Icsamboda iquec? ¹⁵¿Icbon ambi tantiacpadomboen aton na dadpen meniac ada aid icsambo icpec? ¿Utsibotsen menesho isunda mimbi ëbi nëishëmpe? Aden nëishënac ¿ada bëdambo iquec?” quequin tied icbon chuipac caondash —quequin ompoacbimboen chuipondash Esusën. ¹⁶Adashic: —Adembidi abi yacnoshon

ambi tantiacpadomboen Nuquin Papan naindac. Utsi-utsien chuiquid dapa icmequin utsi-utsien padenquio icmendac —quequin chuipondash Esusën.

Abi unëste Esusën padpiden chuioaid
(*Mad. 10.32-34; Duc. 18.31-34*)

¹⁷Adanec: —Edusaden yacno nidnu. Nid —quianec Esus nidpondash. Adec nidquimbi utsibo tantiamenquio icquin abëd icquido 12tedi icquid chuinen uanotantsëcquin buampondashi.

¹⁸Buanshun chuipondashi naden: —Edusaden yacno nidacsho Nuquin Papan matsesmiad icsho ëbi chieshëquido ëbi bedmendac. Nëish yua abided unës uaquido chuiquid dapabobëdtan Moisesën dada uampid chuibanquidon ëbi bedshun: “Ma unës uamenu,” qeshun ¹⁹matses utsibo isadaidpembo ëbi bedmendac. Aden bedmiac matses utsibon mamëshunquin ëbi cueshcaten comapenen cueshcaindac. Adshumbic ëbi unës uanuen cuesten dectanendac. Aden unës uaqui daëdec ushah uincuenendabi —quequin Esusën abi unës uate padpiden chuioapondashi.

Uanën titan chiaid
(*Mad. 10.35-45*)

²⁰Adnubien Sebedeyon chido Uanën titan Esus chuituidpondash. Uambëdta Acobo aton mado daëdi bëshun ismequin danëshën sebudtanquin chuipondash. —Èmbi chiacpadomboen ëbi nashunta, Icbo —caquien: ²¹—¿Atotsi cai? —capondash Esusën. Adoquien: —Nëid con mado daëdi nec. Abitedishun icbo icquin mibëdtan chuiquid dapa con mado abi daëdi icmeta. Chuiquid dapa icmequin min dayun tsadmeta. Opioc utsi tsadunquin abiuc utsi tsadunta —caquien Esusën:

²²—Ĕmbi naid tantienquoio icquin mimbi chuipec —quequin ani chuishumbic Uanbēdta Acobo Esusēn chuipondash. —ĈAda ēbi mēyadacpadquiecbidi mēyadtsia? ĈAda chieshtoenquoio icpatsia? —caquien Uan: —Ai, chieshtoenquoio ictsiabi. Mibēd mēyadtsiabi —quepondash.

²³Adsho tantiashtien: —Ai, ēbi tantiaquid yec mibi mēyadendac. Padnuembi ēbēdtan chuiquid dapa icmequin mibi ēbi datsadmetiapimbo iquec. Nuquin Papambien ambi tantiacpadomboen ēbēdtan chuiquid dapa icmendac —quequin Esusēn chuipondash.

²⁴Adnubimbi: —Chuiquid dapa ēbi icme —Esus casho tantiashtun Uan chedo nēishēmpondac. ²⁵Adsho Esusēn ēbitedi chuipondash. —ĈMitsipadquid matses utsibo isadaidpembo chuiquid dapa icpec? Abi chuiquid dapan baded-badedquien ancabudac dacuēdquin aton yuabon badedi naic. ²⁶Ĕbi tantiaquido icquin mimbi adoenuo iquendac. “Bēdambo mibi iquec,” Nuquin Papa cametiadquio icquin utsibo tantiaquin mimbi utsibo nashuntsiac. ²⁷Bēdambo icquid ictiadquio icquin yuan aton icbo nashunacbimboen mimbi utsibo nashuntsiac. ²⁸Adembidi Nuquin Papan matsesmiaid icquin matses nashunquid nebi. Ancainquoio icquin matses tantiaquin Nuquin Papa icsaquidobi cuidmenquoio icneuc ēbided cuidadec unēsēndabi —quequin Esusēn abēd icquido chuipondash.

Bēshuaid daēd Esusēn bēdamiaid
(*Mad. 10.46-52; Duc. 18.35-43*)

²⁹Adashic yuecquio ictanec shubu dadpen icquid Edico caid yacno tabadash auēshquiobi Esus nidpondash. Adsho isanec nidquin matses

dadpenshun Esus tsibanampondash.

³⁰Adnubien aid podqued cuēman bēshuaid dada daēd tsadpondash. —Esus cuenec —quesho tantiashtien aid daēdi comapenec cuēdpondash. —Tsusedpa Dabidēn tsyuecquid Nuquin Papan namiaidquio icquin ēbi bēdamboen ista, Icbo —quepondash Esus caic.

³¹Adsho tantiashtun matses dadpenshun chushcapondash. —Padi. Chēn. Adece cuēdec chieshanquieci mibi iqueque —caquien abi niacbidanec buēdanquieci cuēdpondash. —Tsusedpa Dabidēn tsyuecquid Nuquin Papan namiaidquio icquin ēbi bēdamboen ista, Icbo —queoapondash.

³²Adoacquien Esusēn nidtuidshun ēcbedpondash. —ĈAtotsi chuinec ne? —caquien: ³³—Isbente bunquiebi, Icbo —quepondash. ³⁴Adsho tantiasht: —Unēsquoio iquec —quetanquin Esusēn bēshuaid daēdi bēmishpondash. Adoac abi daēdi bēdampondash. Bēdanshun aidēntsen Esus tsibanampondash bēshuacboedēmbi.

Edusaden yacnoshon chuiquid dapabimboecnuce Esus bēdamboen isaid
(*Mad. 11.1-11; Duc. 19.28-40; Uan 12.12-19*)

21 ¹Adanec nidequi shubu dadpen icquid Edusaden caid anoentsēqui macuēsh dapa Odibos caid poctse shubu daēdpacksēcquid Bedpaque caid yacno Esus nidpondash. Adshumbic anoentsēqui choshon abēd icquido daēd chuipondash. ²—Nēid podquedēn nidquin shubu daēdpacksēc yacno nidshun cabayobitsecquid aton bacuē caniatsēcbēdta mimbi badedquio istuidendac. Istuidshun tēnēshaid tēdiadsho tēchicta. ³Mimbi tēchicsho isquidēn: —ĈAtotsi acnun nai? —cac: —Nuquin Icbo: “‘Bedtan,’ quiosh,” mimbi cac: “Ai, buantan,” quendac

—quequin Esusën chuipondash. ⁴Ambi Esusën nate chiaid Nuquin Papan con tsusedpa dada uamiampicpadomboen nanuen Esusën adopondash. Naden dada uapampic.

⁵“Shubu dadpen icquid Sion caidën tabadquido chui. Edusaden cain Sion capec.

‘Is. Mibi chuiquid dapa cabayobitsecquidën bacuë caniatsëc catsadtoash choeque. Ancanenquio yec bédamboshë icquidquio neque. Is,’ quequin chui,”

quequin dada uapampic. ⁶Aden dada uampicpadomboen ambi: —Bedtan —caidon bedtampondash.

⁷Adotanquin cabayobitsecquid anibëdta caniatsëc bëachshobimbi con dashcute bëntse dasiuidboed chictanquin casanondac. Aden ëmbi cabayobitsecquid casansho isash caniatsëquën Esus catsadtopondash.

⁸Adanec nidsho istanquin matses dadpeshun aton dashcute abi dasiuidaid bëntse icquid chictanquin Esus nidte podqued ansambampondash. Adnubien utsibon niste podobiecquid tetanequin podqued ansambampondash: —Chuiquid dapa Esus nec —queshun.

⁹Matses dadpen bëyuc nidnubi aidtedbidi tsyuec nidpondash. Abitedi cuëdënidpondash.

“Adeduya. Nuquin tsusedpa Dabidën tsyuecquid Nuquin Papan namiaid yec mibi bédamboshë iquec.

Nuquin Papan chomiaid yec mibi bédamboshë iquec.

Mibi chomequid Nuquin Papatsen bédamboshë iquec. Adeduya,”

quec cuëdëncuededpondash.

¹⁰Adec Edusaden yacno matses dadpenquio cuëdënidëc nidsho isashien Edusaden yacnoquido: —¿Ttsutsi

tantiec cuëdëncuededpec?

—quepondash. ¹¹Adsho tantiashun Esusbëd nidquido: —Esusquio tantiec nec. Nuquin nidaid cuëshë Cadidia caidën shubu dadpen icquid Nasaded caid yacnuësh caniondaid Nuquin Papan chiaidquio chuiquid Esus tantiec nec —quepondash.

Esusën chushcaquin cuemiaid

(*Mad. 11.15-19; Duc. 19.45-48; Uan 2.13-22*)

¹²Edusaden yacno choash Nuquin Papa tabadte shubu uashunaid umanuc daquënë uabenaidën Esus puduedpondash nuntanquio puduedenquio yec. Adshun isquien piucquid bednuequido dadpen tabadpec. Utsi-utsiec nidaid utsin icquido piucquid dadpen bedshunquimbi muaquin piucquid utsi daëdpactsëc menequid icnubi utsi-utsiec: —Nëid bedquidën: “Ma Nuquin Papan ëbi bédamboen isnu,” qeshun pichicametsiash —quequin aton nëish yua menequien piucquid dadpenquio bedquid nepondash. Adsho istanquin Esusën cuemepondash. Ambi tabëcaid bidiacbanquin aton yua dëbimbitsecquido cuemequin piucquid bednuequidotedi cuemepondash naden chuiquin. ¹³—¿Adenda mimbi Nuquin Papan chiaid bédamboen nape? Naden Nuquin Papan chiaid dada uapampic.

“Èbi tabadte shubu uashunaid ëbi chianete shububidi nec,”

quequin Nuquin Papan chiacpadomboen aton shubun puduedshun aid chianetiadquidi mimbi adoenuo iquec. Mitsana bedteuidi bunec ampec tabadte shubu mimbi icmiaye. Cuen —quequin cuemepondash.

¹⁴Adnubien Nuquin Papa tabadte shubu uashunaid yacno bëshuaid yec daicsaid yec quenec bë-bëpondash. Aden bë-bëshobien Esusën bédamepondash.

¹⁵Adsho isashien Esus chieshënquido nëishpondash. Adec nëish yua abided unës uaquido chuiquid dapabobëd Moisesën dada uampid chuibanquido nëishpondash. Adec comapenen tantiaquin Esusën nabansho isash nëishboedi bacuëbotsen: —Nuquin tsusedpa Dabidën tsyuecquid Nuquin Papan namiaid yec mibi bëdamboshë iquec —quec Esus caic cuëdëncuedesho tantiasch nëishquiopondash. ¹⁶Adshumbic: —Icsambo iquec —queshun Esus chuituidec: —¿Ada bacuëbo cuëdënsho tantio? —caquien: —Ai, tantiombi. ¿Nuquin Papan chiaid isabida ictio? Naden bacuëbo cuëdënte chuiampic.

“Nuquin Papan oncamiac

bacuëmpin aton bacuë

utsibëdtan:

‘Nuquin Papa bëdambo iquec,’
caindac.”

quequin chuiampic —quepondash Esus. ¹⁷Adanec nidec shubu dadpen icquid Betania yacno nidash ushtuidpondash.

Esusën cuëte unës uaid

(*Mad. 11.12-14, 20-26*)

¹⁸Badiadnubi ënden aucbidi nidoaic Edusaden yacnobidi nidoapondash. Piabi nidec bundoshon ¹⁹podqued cuëman nidquid cuëtempi icueda caid istuidash: —¿Ada bacuëaye? Chenun isbono —quepondash Esus. Adshun isquien bacuë nibëdec. Podouidquio icpec. Adsho isumbien Esusën: —Adequi bacuësambo yec unësta —capondash. Adoac badedquio unëspondash.

²⁰Adosho isun abëd icquidon: —¿Atotsi quiash badedquio unësposh? —caquien ²¹Esusën: —Tantia. Mibi chuinu. Adembidi mimbi natsiac. “Nuquin Papan ambi chiaid nainquien icchitec,” quenquio icquin: “Nuquin

Papan ambi chiacpadomboen naquidquio nec,” qeshun mimbi Nuquin Papa chianesho aidëmbi mimbi: “Natiapimbo iquec,” caidi mibi nametsiash. Aden tantiaquin mimbi nëid macuësh cain: “Mananuc tabadboedi adquiecbidi acte nantan tabadoata,” mimbi cac nëid macuësh acte nantan tabadoatsiash. ²²“Ambi chiacpadomboen naquidquio Nuquin Papa nec,” qeshun mimbi aid chianiac mimbi chiaid Nuquin Papan mibi nashuntsiash —quequin Esusën abëd icquido chuipondash.

¿Tsuntsin: Naic nid, cac nai?

quequin Esus chuimiai

(*Mad. 11.27-33; Duc. 20.1-8*)

²³Adcuidanec Edusaden yacno padpidec nidshun Nuquin Papa tabadte shubu uashunaid daquënë uaidën puduedshun Esusën Nuquin Papan chiaid chuipondash. Adsho tantiashun con matses tsusiobon Esus chieshënquidon chuituidpondash. —¿Tsuntsin: “Naic nid,” cac nai? En chui. Tiantianu —caquien ²⁴Esusën: —En mimbia chui. Ëmbia tiantianu. Mimbi chuisho tantiashun ëbi namequidtsen chuinu. ²⁵¿Tsuntsin namiac Uan padon acten mentopadenec? ¿Ambembida napadenec? —capondash Esusën. Adoquien badedquio chienquio yec uanotantsec tabadec onquecuededpondash Esus chieshënquido. —¿Atotsi nuqui chuipeba? “Nuquin Papan namiaidquio Uan pado nepadenec,” cac Esusën: “¿Atotsieshun aidën chiacpadomboen nainquio iquec?” canushe. Aden chienquien ictiad. ²⁶Nuqui: “Ambembi napondash,” qesho tantiashun nëmbo icquidon nëishënushe: “Nuquin Papan namiaid Uan pado niondash,” qeshun.

Aden chienquien ictiad —quepac caondash Esus chieshënquido. Isadaidbo tsusiobobëdi nëish abided unës uaquido chuiquid dapabo adpac caondash.

²⁷Adashien Esus padpiden chuioaic: —Tsaudi. ¿Tsundan chiaquien nachitondash? —queshobien: —Mimbi chienquio icsho tantiashun ëmbitsen ëbi namequid chienquio iquembi —capondash Esusën abi chieshënquido cuidquin chuiquin.

Mado daëdshun nacbimboecquido chiaid

²⁸Adshumbic Esusën padpiden chuipondash. —Tantia. Mibi chuinu. Ëmbi chiaid tantiashun ¿mitsicquid: “Bëdambo iquec,” catsia? Dada aton mado daëdpambo icquid icpac caondash. Abentsëc chuiquin: “Neshcaic nid, mado,” cac: ²⁹“Padi,” quec chieshuidboedi yuec-yuecpactsëctanec: “Tiedimbi neshcatanchitec,” quiaish neshcaic nidac caondash.

³⁰Adshumbic amën aton mado utsi chuiquin: “Neshcaic nid, mado,” cac badedi: “Ai, adonona,” queboedi neshcaic nidenquio icpac caondash.

³¹¿Mitsicquidën aton papan chiapadomboen napac caondash? En chui. Tantianu —caquien Esus chieshënquido: —Abia chiac chieshuidboedën —quesho tantiashumbien Esusën:

—Adquidpenquien mibi nec. Mibi tantiatiapimbo yec tabadnubi mimbi icsambo caido Nuquin Papa yacno puduedendac. Chieshuidacimboecquid aido nec. Aton matses piucquid bedshundenedo yec aton piucquid bednuen dada chudmeboedo chido yec quequin Nuquin Papa tantiabenash abëd tabadtequido yanendac. Mibien padenquio iquec. ³²Uan pado acten mentoandenedën Nuquin Papan chiaid chuiquin bëdamboec tabadte

chuipadenec. Adsho mimbi tantienquio icnubi mimbi icsambo caidombi Nuquin Papa tantiabempondash. Adsho isun Uan padon chiapadomboen mibi icsaid ëntiadquidi mimbi ënenquio iccondac. Aton papan chiaid niacquidbimboecquid mibi nec —quepondash Esus abi chieshënquido chieci.

Abi chieshënquido icsaid Esusën chuioaic (Mad. 12.1-12; Duc. 20.9-19)

³³Adshumbic Esusën abi chieshënquido ompoacbimboen chuipondash naden. —Tied icbon chetequid nidtsinac caondash. Adoshombic aid tied daquënë uatanquimbic chetequid chintetsen nacnempac caondash. Adoshombic: “Ampequid chosho isnu,” quesun shubu abucquio icnuc shubu uapac caondash. Adoshombic: “Nëid tiedën caniquid chetequid iquec. Aid chequin ëbi neshcashunta,” utsibo canec ënapen nidpac caondash. ³⁴Adash yuectaneshumbien abëd nidondaido aton yuabo chuiquin: “Nëen chetequid sinashe. Bedtan,” cac aton yuabo nidanepac caondash. ³⁵Adec aton icbon tiedno nidaniacshobien neshcaquidon cudasënquin chieshëmpac caondash. Abentsëc cuesunetanquin utsi cuënoten seshunequiopac caondash. Utsibic cuesquin cuemepac caondash. ³⁶Aden cuemiaid choshon chuituidaquien icbon nidboedtedpenquio dadpenquio aton yua utsibo chuipac caondash. “Bedtan,” cac nidanec tiedno choacsho isun ademvidi cuesun siapac caondash.

³⁷Adoacsho tantiash aton madombo caic: “Bedtan,” quepac caondash. “Con mado cuesunenquio icquin ëmbi chetequid menetsiash,” quesun aton madotsen nidmepac caondash ³⁸Adoac nidec aton papan tiedno choacsho

chetequid cudasquidon: “Tied icbo unësan aidën natedi aton madon bedtsiash. Nëbien aton mado cuesunetiad. Aid nibëdnuc icbo unësan aidën natedi nuquin nabi ictsiash,” qeshun ³⁹tied tsitsuno buanshun cuesunepac caondash —quequin Esusën chuipondash.

⁴⁰Adshumbic ambi chuiboedquio abi datsidadquido chuimenuen chuipondash. —Ëmbi chuiboed tantiash ðatotsi mibi quepatsia? “Min mado cuesuniacchos,” cac ðatotsi tied icbon napatsiash? —qesho ⁴¹tantiash datsidadquido: —Aido icsamboshë icsho comapenen cuidtsiash. Adshumbic ambi chetequid sinacsho abi cudasënesambo utsibo aton tied neshcametsiash —quecuededpondash datsidadquido.

⁴²Adsho tantiashun Esusën: —Ai, abimbo caic. Adembidi ambi chomiaid chieshënsho Nuquin Papan mibi cuidendac. ¿Nuquin Papan chiaid isabida ictio? Naden chiampid ma mimbi ispaboc.

“Buintad bëdambo icquid istuidashi: ‘Nëidquio shubu uanun nitsinemi,’ quetiadquidi isuidacimboen Nuquin Papan namiaid chieshënac.

Aden buintad isuidaid utsin bedshun shubu uanun nitsinacimboen Nuquin Papan tantiamiacpadomboen utsibon ambi namiaid tantiosh.

Adsho isun: ‘Nuquin Papan namiaid bëdambo iquic,’ caimbi,”

quequin dada uapampic. ⁴³Aden ambi namiaid ëbi chieshënsho isash mibi caic Nuquin Papa nadpec. “Ëmbi con matses caid isadaidbo ëbi bëdamboen tantiametiadquidi chuiquid dapabon namenquio icsho isun utsibotsen: ‘Ëbi chuiquid icta,’ caindami,” quepec Nuquin Papa. Aden ambi

chiacpadquidën bëdamboen chuibanac abi tantiaquido dadpen yanendac.

⁴⁴Mibien Nuquin Papan cuidtequido nec. Cuëte uebudquin catashac canite uesadec

podquëd-podquëdacimboecnuc mibi comapenen cuidendac —quepondash Esus abi chieshënquido chiec.

⁴⁵Adsho tantiashun padiseyobobëdtan nëish abided unës uaquido chuiquid dapabon: —Nuquien cachitec —quequin tantiabempanëdash. ⁴⁶Adshumbic Esus cuesunemenuen bedtiadquio icquimbi bedenquio icpanëdash. —Abi datsidadquidon: “Nuquin Papan chiaid chuibanquidquio Esus nec,” qeshun Esus bedsho isun nuqui cuesnushe —qeshun aton matses dacuëdënquin bedenquio icpanëdash.

Cacuidanaid chiaid

(Duc. 14.15-24)

22 ¹Adshumbic Esusën padpiden ompoacimboembidi chuipondash naden. ²—Tantia.

Isadaidbon nacpadomboen aton mado chido bednuesho tantiashun amën matses dadpen: “Pec cho,” cauidaïd mibi chuinu. ³Chuiquid dapan aton yuabo chuiquin: “ ‘Con icbon madon chido bedequic. Aïdbëd cuishonquenuen pec cho,’ quequin ëmbi tantiaïdotedi chuitan,” cac yuabon chuitanaqui choenquio icpac caondash.

⁴Adsho isumbien chuiquid dapan aton yua utsibo chuiquin: “Nëish nua bëchichoquidquido dadpen codoquiaccoshe. Padpiden chuitan,” cac chuitanoaqui ⁵choenquibidi icpac caondash. Adec cacuidanquieac abentsëc aton tied nantan nidnubi utsi piucquid bednuequin ambi aton na menebante shubuno nidpac caondash. ⁶Utsimbic abi: “Pec cho,” cashobi yuabo mëyanquin cuesun secapac caondash.

⁷Adoshobien chuiquid dapan nēishtanquin shēpiapac caondash. “Uesquin cuesun siatan,” cac aton sondado chedon aton yuabo cuesun siaquido uesquin cuesun secatanquin aton shubutsen uesquin nēdēncapac caondash. ⁸Adomeboshombic chuiquid dapan: “Abi pete codocaid dadpen iqueque. ‘Pec cho,’ cac cacuidanoshe. Utsibo chuitan. ⁹Ēmbi: ‘Pec cho,’ cacmaidobi chuibenetan. Podquedēn nidquin mimbi istuidaidtedi: ‘Pec cho,’ cabenetan,” cac nidshun ¹⁰ambi istuidaidtedi chuibenetanac matses dadpenquo pec cho-chopac caondash. Icsambo icquidobēdi bēdambo icquido cho-choash chuiquid dapan shubun puduedash pec tabadte quēnē dapan tabadcuededpac caondash tsucus-tsucustsēcquo yec.

¹¹Adshun chuiquid dapantsen puduedshun isquien dashcute bēdaidquo dasiuidabi icquid abentsēc tsadtsec. ¹²Adshobien chuiquid dapan: “Ātotsi quiaash dashcute bēdaidquo dasiuidambobi cho, buchi?” caqui ēchedenquo yec tsadec. ¹³Adshobien chuiquid dapan: “ ‘Chido bedacno isnuec dashcute bēdaidquo dasiuidquid,’ quepadenec. Mibi icsambo iqueque. Mibi cuidnu,” qeshun aton yuabo chiec: “Shēbunshun buanshun icsano netan,” capac caondash. Adoac taneshun netanac mēyadquieq natiac shubiquiopac caondash.

¹⁴Adembidi Nuquin Papan ambi matses bēdamboen iste dadpen tantiamiaqui utsin-utsinquien tantienquo iquendac. “Abi yacno puduednu,” queuidboedi bēdambo icte bunenquo yec abi tantiatipimbo icsho Nuquin Papan comapenen cuidendac. Utsi daēdpactsēquien Nuquin Papan tantiacpadec abēd tabadtequid iquendac —quequin Esusēn chuipondash.

Chuiquid dapa piucquid menete chiaid

(*Mad. 12.13-17; Duc. 20.20-26*)

¹⁵Adsho tantianec nidash abi chieshēnquido padiseyobo: —Esus icsamboen chuimenuna. Icsamboen chuisho tantiashun bedshun unēs uamechitono —qeshun ambi chuibanquin tantiamiaido chuipac caondash. ¹⁶—Icsamboen chuimetan —caquien chuiquid dapa Edodes caid tantiaquidobēdtan icsamboen chuimenuc cho-choshon chuituidpondash. —Bēdamboen chuiquid mibi neque. En ēbi chui. Tantanu. Muesambo icquin Nuquin Papan chiacpadec bēdamboec tabadte mimbi abimbo chuipoc. Matses dacuēdēnenquo icquin Nuquin Papan chiaidquo mimbi chuipoc. ¹⁷Adquid icquin Ātotsi mimbi chuie? Tantanu. Chui. Nuquin matses yuaquid chuiquid dapa Sesad caidēn: “Piucquid shocoshēmpi dadpen beccho,” cac nuqui —capondash. ¹⁸Adoquien Esusēn ambembi tantiashun: —Bēdambo icquid damianquieq mibi muambo nec. Ātotsieshun ēbi icsamboen chuimetiaidquo ique? —quetanquin: ¹⁹—Chuiquid dapa menetequid piucquid shocoshēmpi beccho —ambi cac ²⁰bēsho bedshun Esusēn chuipondash. —ĀNē tsutsibimboecnuc dada uaid nē iquec? ĀTsutsi cuēmēdquidbēdta dada uac? En chui. Tantanu —caquien: ²¹—Ma nuqui yuaquid chuiquid dapambo Sesad neyoc —quepondash. Adsho tantiashumbien Esusēn: —Abibimboecnuc dada uaid abi cuēmēdquid dada uaid bedtequid shocosh icnuc Sesadēn na neque. Icbon: “Beccho,” cac meneta. Adecbidi Nuquin Papa nuquin Icbombo neque. Aidēn chiacpadomboen nabanta —quequin

Esusën bédamboen chuipondash.

²²Adsho tantiasch icsamboen chuimetiadquio icboedi: —Bédamboen chuipec —quetanec nidanepondash.

Matses uincuemete chiaid

(Mad. 12.18-27; Duc. 20.27-40)

²³Adnubien aid ushëmbi Saduseyubo: —Matses unësaid uincuenesambo nec —quequidotsen: —Esus icsamboen chuimenu —quec cho-chopondash. ²⁴—Bédamboen chuiquidquio mibi neque. Mimbi chuisho tantianu. ¿Mitsipaden mimbi chuipatsia? Nuquin tsusedpa Moisesën naden chuiquin dada uapampic. “Aton chido bedash bacuë tishmiabi unësacsho aton utsin aid chido bedshun: ‘Con buchin bacuëbo nibèdeque. Con buchin madobimboecnuc tishmenu,’ quequin tishmequid,” quequin Moisesën dada uapampic. ²⁵Aid tantiaquin chuinu. Dada aton utsibobëd tabadpac caondash. Aton utsibo seistedi icpac caondash. Bëyucquid aton chido bedashi bacuë tishmiabi unëspac caondash. Adsho isun abi tsibanquidën aidën chido bedash ²⁶bacuë tishmiambobidi unësoapac caondash. Adsho isun aid tsibanquidën aid chidobidi bedoashic bacuë tishmiambobidi unësoapac caondash. Adenuidi abi tsibanquidën abi tsibanquidënquien aton buchi unësan-unësanquien aid chidouidi beduid-beduidpac caondash. Bacuë tishmiabi-tishmiabiec abitedi unësbudnepac caondash. ²⁷Adashic bacuë tishambobi aid chidotsen unëspac caondash. ²⁸Aid abitedi uincuemiatic ¿mitsicquidën chido icpatsiasch? —caquien ²⁹Esusën: —Nuquin Papan chiaidquio tantienquio icquin Nuquin Papan nadatiambo icquin nabanquin uincuemete mimbi tantienquio iqueque. Chuinu. Tantia.

³⁰Uincuemiatic dadan aton chido bedesa. Adembidi amën aton champi menesa. Nuquin Papan abi yacnoshon uaido mayan bédabobimboec matses uincuemiatic iquendac. Aden uincuemiatic chido bedesa —quepondash Esus. ³¹Adshumbic padpiden chuipondash. —Ambi unësaid uincuemete chuiquin Nuquin Papan dada uamepampid ¿isbanabida ictio? Ma mimbi aid isbampaboc. ³²Naden dada uapampic. “Abadauan caid yec Acobo caid yec Isac caid yec quequidtedishun ëbi Papa capec,” quepampic Nuquin Papa ënden unësampid chiequi. Unësun matses tantienquien mimbi danec. Unësash aton dada chodquiambic aton tantiate unësambo icnuc abi Nuquin Papa tantiasch —quepondash Esus. ³³Adsho tantiasch abi datsidadquido: —¿Mitsipadquid nepac? Bédamboenshëen chuipec —quepondash.

Moisesën dada uampid chiaid

(Mad. 12.28-34)

³⁴Aden unësaid uincuemete chuisho tantiaschumbien Saduseyobon padpiden: —En chui —cainquio icpondash. Adsho isashien Esus chieshëncquid utsibo Padiseyobo: —Nuquin Papan chiaid Esus icsamboen chuimenu. Nid —quianec Esus chuimec cho-chopondash. ³⁵Cho-choquin abentsëcshun Nuquin Papan Moises dada uamiampid tantiaquidquio icquin chuimetuidpondash. ³⁶—Chuiquidquio mibi neque. En ëbi chui. Tantianu. Nuquin tsusedpa Moisesën dada uaquin dadpen chiampic. ¿Mitsicquid abentsëc ëmbi nasho Nuquin Papan: “Bédamboshë iquec,” capatsiasch? —caquien ³⁷Esus: —“Nuquin Papa tantiaquieci ambi chiacpadec tabadte bunquiota,” quequin ³⁸chiampidba naic Nuquin Papan chiacpadec mibi bédamboec

tabadtsiandac. ³⁹Adembidi Moisesën chiampid utsitsen naic matses bédamboec tabadtsiash. “Min dada mibibi datantiadac bimboen utsibotsen tantiaquiota,” quequin chiampicpadomboen nasho Nuquin Papan bédambo catsiash. ⁴⁰Aden matses bédamboen namenuen Nuquin Papan ambi chiaid utsi abitedi Moisesba chuishun nuquin tsusedpa utsibo chuiquin dada uamepampic —quequin Esusën bédamboen chuipondash abi chieshënquido chuiquin.

Nuquin Papan chomiaidquo chiaid

(*Mad. 12.35-37; Duc. 20.41-44*)

⁴¹Adshumbic Esusënsen abi icsamboen chuimete bunquido Padiseyobo chuipondash. ⁴²—Ëmbitsen mibi chuimenu. Tantia. Nuquin Papan chomiaid ðmitsipadquid nec? ðMatsesën madouidida nepec? —capondash Esusën abibi cadquimbi. Adoquien badedi: —Nuquin tsusedpa yampid Dabidën tsyuecquid icsho Dabidën mado caimbi —quepondash Padiseyobo.

⁴³Adsho tantiashumbien Esusën: —ðBédamboenda chuidio? Mimbi chiacpadquid aton mado icsho ðatotsieshun Nuquin Papan Mayanën tantiamiacpadomboen Dabidën con Icbo capampic? Naden Dabidën dada uapampic.

⁴⁴“Nuquin Papan con Icbo naden chiendac.

‘Con abiuc tsadash abitedishun Icbombo icnush nëmbo cho.

Mibi chieshënquidobi con Icbo mibi camenu,’ quequin Nuquin Papan con Icbo chiendac,”

quequin Dabidën dada uapampic. ⁴⁵Con mado cainquio icquin con Icbo capampic Dabidën. ðAtotsieshun mimbi: “Dabidën mado nec,” quequin tantiapē? —caquien ⁴⁶ëcbedenquio yec otacquio

tabadpondash. Esusën bédamboen chuisho tantiash: —Icsamboen chienquien icchitec. Ëmbi padpiden: “Icsamboen chuimenu,” cac bédamboembidi chuiotsiash —qeshun abi chieshënquido abitedishun Esus padpiden chuimenquio icquin ënaccondash.

Bédambo icquid damianquido tanenda, quiaid

(*Mad. 12.38-39; Duc. 11.43,46; 20.46*)

23 ¹Adshumbic Esusën abèd icquidobèdta abi datsidadquido tantiamequin chuipondash. ²—Tantia. Moisesën dada uampid chuibanquidobèdta tsusedpabon chiampid namequido Padiseyobon naid mibi chuinu. Aidon: “Moisesën chiampicpadomboen nata,” quequin nuquin matses isadaidbo chuidenepec. ³Aden Moisesën dada uampid abimbo chiac adenuidi mimbi nac bédambo ictsiash. Aden naquin padiseyobon nacpadomboen nainda. Aidon Moisesën chiampid chuiquimbi ambibi aidën chiaid niac-niaquec. ⁴Chieshëmënquido nec. Nuquin Papan chiaid nametiadquidëmbi tsusedpabon ambembi chiaid dadpenquio namepec chushcanquin. “Matsesën aitedi natiapimbo iquec. Padi icnuna. Nuquin matsesën chiampidtedi nainda,” catiadquidi adoenuquio iquec.

⁵Aden padiseyobon Nuquin Papa tantiaquidquio damequin matses ismenuenuidi naic. Nuquin Papan chiaid dada uaidëmpi sauedtsash bédectamëdec abiuc daëdi pèdectamëdec qeshun matses ismenuenuidi naic. Adembidi aton dashcute tédiahte nacnenuequin: “ ‘Nuquin Papa chianequidquio nec,’ ma ëbi canu,” qeshun sedquid shoyonaid ënapenpactsëcnuc cuididicash matses ismenuec matses tabadacno

capucuenep. Adec Nuquin Papa chianequid damianquiec. ⁶“Chuiquid dapa nec,” cameteuidi bunec. Isedec puduedash: “Chuiquid dapa icsho icbon abēdi tsadmequid,” quiash icbobēdi tsadte bunifuiec. Nuquin Papan chiaid chuibante shubun puduedash: “Tsusio dapambo nec,” camenuc utsibobēd tabadenquio yec tsusiobobēduidi tabadquid nec. ⁷“Chuiquidquio yec mibi bēdambo iquec,” camete bunifuiec mases dadpen tabadacno nidtenepec.

⁸Mibitsen adenda. Utsibo: “Mibiuidtsēqui bēdambo iquec, Icbo,” camenuc adenda. Min Icbo abentsēcquiobi ēbi iquec. Ēbi abentsēqui con Icbo cata. Con yuabo yec con utsibo mibi neque. Bēdamboec isnanta. ⁹Adembidi mibi chuibanquid chuiquimbi: “Mibiuidtsēqui bēdambo iquec, Papa,” cainda. Nuquin Papauidtsēqui aden chuita. ¹⁰Adembidi: “Chuiquid dapa yec mibiuidtsēqui bēdambo iquec,” utsibo camenuenuidi nainda. Ēbiuidtsēqui mibi chuiquid dapa nec. Nuquin Papa yacnuēshquio choquid ēbipadquidquio utsi nibēdec.

¹¹Padnuen ambi chiacpadomboen utsibo nashunquidquio utsibo dēniacte bunenquio icquid Nuquin Papan bēdambohē catsiash. ¹²Utsien abibi cadequi: “Ēbiuidtsēqui bēdambo iquec,” quequin utsibo ismenuenuidi naquido Nuquin Papan icsambo catsiash. Utsibic Nuquin Papan chiacpadomboen naquin utsibo nashunquid yec utsibo ismeteuidi bunenquio icsho Nuquin Papan bēdambo caindac —quepondash Esus abi datsidadaido chiec.

Abi chieshēnquido Esusēn chushcaid
(*Mad. 12.40; Duc. 11.39-45,52; 20.47*)

¹³Adshumbic abi chieshēnquidotsen chuipondash. —Tantia. Moisesēn chiampid chuibanquidobēdta

Padiseyobo mibi chuinu. Nuquin Papan cuidtequidombo mibi nec. Bēdambo icquid damianquiec mibi icsambo iquec. Nuquin mases: “Nuquin Papabēd tabadte tantianu,” qeshobi mimbi bēdamboen chienquio iquec. Ēmbi Nuquin Papabēd tabadte bēdamboen chuisho mimbi tantienquio iquec. Aden tantienquio icquin: “Aidēn chiaid tantienda,” quequin mimbi utsibotsen Nuquin Papabēd tabadte tantiametiapimbo iquec.

¹⁴Nuquin Papan cuidtequido mibi nec. Muaquin unēsboedēn niante piucquid bedshunquido mibi nec. Nuquin Papa tantiaquidquio damenuen utsibo tantiamequinuidi buēdpambo cuēdquin Nuquin Papa chiacbimboen mimbi chianepec. Aid abimbo mimbi chienquio iquec. Adec chieshanquiecsho isun Nuquin Papan mibi comapenen cuidendac.

¹⁵Nuquin Papan cuidtequido mibi nec. Mimbi tantiacpadomboenuidi tantiamenuen mimbi mases utsibo chuiben-chuibenec. Nidaid utsi-utsiec yacno nidshun mimbi chuibenesho tantiaquido mimbi tantiacpadquio yanash Satanasēn yuambo yanec Nuquin Papan cuidtequidombo iquendac.

¹⁶Nuquin Papan cuidtequido mibi nec. Isadaidbo chuiquid icquin bēdamboen tantiamenuen mimbi icchitec. “ ‘Nuquin Papa utsi uatiapimbo yacpaden abimbo caimbi,’ quequid muaisa nec. Muaquidēn Nuquin Papan chiaid niacquid,” quetiadquidi mibi adenquio iccoc. “ ‘Nuquin Papa tabadte shubu uashunaid utsi uatiapimbo yacpaden abimbo chiombi,’ quequid muesa nec,” quetiadquidi mibi adenquio iccoc. Padenquio yec: “ ‘Nuquin Papa tabadte shubu uashunaid dapan icquid shocosh piu nacnenaidquio utsi uatiapimbo

yacpaden abimbo chiombi,' quequid muesa nec," quechitequien mibi iquec.

¹⁷Aden tantienquo icquin mimbi icsamboen chiec. Nuquin Papa tabadte shubu uashunaid Nuquin Papa tabadtequid yec ðbèdapenquioda icpec? "Aid bèdambohè icnubi aid nuntan icquid bèdiactsèc bèdambo iquec," caimbi. Mimbien icsamboen tantiec.

¹⁸Nadentsen mimbi icsamboen chiec. "Nuquin Papa tabadte shubu uashunaid dapa yacnoshon: Mabi Nuquin Papan bèdamboen isnu, quequin nèish pichicate nacnenaaid dapa utsi uatiapimbo yacpaden abimbo caimbi,' quequid muesa nec," quetiadquidi mibi adenquo iccoc. "Nuquin Papa mabi bèdamboen isnuquin pichicatequid nèish utsi uatiapimbo yacpaden abimbo caimbi,' quequid muesa nec," mibi quepec.

¹⁹¿Adenda mimbi bèdamboen chuipe? Pashuacimboen mimbi bèdamboen tantienquo iquec. ¿Mitsicquid bèdambo iquec? "Mabi Nuquin Papan bèdamboen isnu," quequin nèish pichicate nacnenaaid dapa bèdambo icnu aidèn pichicatequidi nèishquo bèdapabi ictsec. Nuquin Papamboen bèdambohè iquec.

²⁰Nèish pichicate nacnenaaid caic: "Aid utsi uatiapimbo yacpaden abimbo caimbi," quequin aid nantequid nèish abitedi chiaidbidi nec. Adembidi ambi: "Mabi bèdamboen isnu," caid Nuquin Papatsen chuipec. ²¹Adembidi Nuquin Papa tabadte shubu uashunaid caic: "Aid utsi uatiapimbo yacpaden abimbo caimbi," quequin ambo tabadquid Nuquin Papatsen mimbi chiec.

²²Adembidi abu caic: "Abu utsi uatiapimbo yacpaden abimbo caimbi," quequin Nuquin Papa tsadaidsen chiec. Nuquin Papa tsadaid cain Nuquin Papambo chiec. Aidèn chiaidquo tantiec: "Abimbo cacimboen chuiquid icsaquid nec," quetiadquidi mibi adenquo iccoc.

²³Bèdambo icquid damianquid yec Nuquin Papan cuidtequido mibi nec. Nuquin Papan chiaid abentsèqui tantiatècquin min tiedèn canitècquid musuquèmpi bedshun Nuquin Papa mimbi menepec. Aden menequid icquimbi mimbi Nuquin Papan chiaid utsi dadpen niac-niacpec. Chieshèmianquid icboedi: "Èbi bèdamboen ista," qesho bèdamboen istiapimbo mibi iquec. Adembidi bèdambo icquidi muauaquin mimbi tsusio icsamboen cuidmec. Adembidi mimbi Nuquin Papa abimbo tantienquo iquec. Aden mimbi Nuquin Papan chiaid niac-niacpec. Ambi chiacpadomboen Nuquin Papa menequid icquimbi ambi chiaid utsi abitedi natiadquidi ma mimbi nainquo icpaboc.

²⁴Tantesa uatsècquimbi mimbi utsibo icsamboen chiec. Manuampi nibedbantsècquimbi utsi nuacquid nibedquiabi abi nèsamèdpanumbobi acacimboembien mimbi nachitec. "Nuquin Papa meneta," quequin chiaiduidtsèqui natsècshun adenuidtsèqui mimbi utsibo namepec. Adenuidtsèqui namequimbi Nuquin Papan chiaid utsien mimbi niac-niacchitec.

²⁵Nuquin Papan cuidtequido mibi nec. Padiseyobo yec Moisesèn dada uapampid chuibanquido yec quequimbi mimbi icsamboen naic. Pada-padaidbèdta dèshote chieshquin cachocuidtsèqui dapanshun anauc ampanambo icquidi ampanaid damianacimboec mibi bèdamboec tabadquid damianquiec. Nuquin Papan chiaid dadpen nainquo icquin mitsanauidi bednuen mibi bunaiduidi mimbi napec. ²⁶Pamumèdacimboec tantiatiapimbo mibi iquec. Dèshote abichobi bèdamboen ampanacimboec icsaid ucodash bèdambo icta. Adec icsainquo yec ènèdash Nuquin Papan chiacpadec mibi bèdamboec tabadtsiac.

²⁷Bëdamboec tabadquido mimbi damesho isun Nuquin Papan mibi cuidendac. Unësaid chococacno bëdamboen nacenac bëdambo isadec ënden pisenambi. ²⁸Adembidi bëdamboec tabadquid mimbi damec. Matses ismec bëdamboec tabadshumbic omposhon Nuquin Papan chiaid niac-niacquin mimbi natemaidien mimbi nachitec.

Padiseyobo chedo cuidte chiaid

(Duc. 11.47-51)

²⁹Nuquin Papan cuidtequidombo mibi nec. Nuquin Papan oncamiaidobëdta bëdamboec tabadquido nuquin tsusedpabon unës uampido tantiaquin aido chococampicno shubu uaquin mimbi nacenpec. ³⁰Adoshombic: “Nëmbo con tsusedpabon chieshënquin unës uampid chococac. Aidbëd tabadquin ëmbi unës uainquio ictsenëdac. Èmbien bëdamboen istsenëdac,” qeshun mimbi aido chococacno nacenpec. ³¹Adoboedëmbi nuquin tsusedpabon bëdambo icquid unës uampicpadomboen adoante bunquin mimbisen chieshtoshon adoaindac. ³²Ai, nuquin tsusedpabon Nuquin Papan oncamiampid unës uacpadombota —quepondash Esus abi unës uate chiec.

³³Adashic abi padiseyobo chiec: —Nisibimboec icsa uanquido mibi nec. Adquido icsho Nuquin Papan icsano nësecaquin mibi cuidendac. ³⁴Icsaido icsho isun: “Ma Nuquin Papan bëdamboen iste tantiamenu,” qeshun Nuquin Papan chiaid chuibanquido utsi-utsien mibi yacno nidmendambi. Adquid mibi yacno cho-choacsho mimbi dadpen unës uaindac. Utsi-utsien cuesten dectanquin utsi-utsien Nuquin Papan chiaid chuibante shubunoshon cueshcaten mimbi cueshcaindac.

Utsi-utsien cuesnuequin nadancatanequin shubu utsin shubu utsinquin mimbi cuemetanendac. ³⁵Adosho isun Nuquin Papan mibi cuidendac. Nuquin Papan chiacpadec bëdamboec tabadsho tsusedpan chieshënquin tauamboen cuesuniampid Abed nepampic. Adoshombic adecbidi bëdamboec tabadsho tsusedpa utsibon utsi-utsien unës uapampic. Adoshombic ënquin Bedequias caidën mado Sacadias caid unës uapampic. Aidi Nuquin Papa tabadte shubu uashunaid dayunshunquio cuesunepampic. Aidedi unës uampido tantiaquin aido unës uaquido cuidacimboen Nuquin Papan mibitsen cuidquiendac. ³⁶“Yuecshun min tsyuecquido cuidendac,” quec nenquio iquebi. Nëbi caimbi —capondash Esusën abi chieshënquido chuiquin.

Edusaden yacnocquido Esusën shubi uaid

(Duc. 13.34-35)

³⁷Adshumbic Esusën chuiopondash. —Tantia, Edusaden yacnocquido. Mibitsen chuinu. Mibi tantiac unësquio iquec. Mibi yacnobidi tabadquin Nuquin Papan oncamiaidon chuisho nuquin tsusedpabon unës uapampic. Adembidi Nuquin Papan: “Isadaidbo chiec nid,” caido chosho utsi-utsien cuënoten seshunequiopampic. Adembidi mimbi nëbi naindac. Adquidombo icsho mibi tantiaquiemi. ¿Mitsipadec cachina aton bacuë cudaspec? “Penushe,” quiaish aton bacuëmpi nua shoccoshon madadec cudasquid. Adecbidi: “Satanasën yuanushe,” quiaish cudasquiec mibi Nuquin Papa bëdamboen ismete tantiametiadquio iccobi. “Tantiamenu,” cac tantiate bunenquio mibi icchitoc. ³⁸Èbi nidambic ëbi tantiatipimbo icsho Nuquin Papan namiac min shububëdtabi mibi nibëdamendac.

³⁹Nëbi mimbi ëbi isenquio yanendac. Padnuen min matsesën yuecash chosho ëbi isendac. Aden isash: “Nuquin Papa yacnuësh choquid bédambo iquec,” min matses quendac —quequin Edusaden yacnocquido Esusën chuipondash.

Nuquin Papa tabadte shubu uashunaid nibédante chiaid

(*Mad. 13.1-2; Duc. 21.5-6*)

24 ¹Adash Nuquin Papa tabadte shubu uashunaid daquënë uacno tabadanec nidequi Esusbéd icquido Nuquin Papa tabadte shubu uashunaid caic: —En is, Icho. Nèid shubu bédamboen nacnenaidquio neque —quepondash.

²Adsho tantiashun Esusën: —Mimbi isboedquio cuënote bédamboen nacnenaid matses utsibon cuënote chic-chiquendac nibédquiecnuc —capondash.

Nuquin Papan cuidte ushë chiaid

(*Mad. 13.3-13; Duc. 21.7-19*)

³Adanec nidequi macuësh dapa Odibos caidën pudundoec poctsebi tabadtuidshun abéd icquidon utsibo tantiamenquio icquin Esus chuipondash. —En mibi chote chui. Tantianu. “Nëbi choec,” quequin mibi chote ðmitsipadembimbi tantiape? Adecbidi ðatotsi isashini: “Nuquin Papan cuidte nëbi nec,” quepe? —capondash abéd icquidon. ⁴Adoquien Esusën naden chuipondash: —Tantia. Mibi chuinu. Muaquidoba choendac. Aidon chuisho tantiash: “Abimboen chuichitec,” quenda. ⁵Adquido choshon: “Nuquin Papan chomiaidquio Quidistu caid nebi,” quequin muaquin chiaqui dadpeshun: “Ai, abimboen mimbi caic,” capendac.

⁶Ëbi choabi icnuc: “Matses dadpenquio cuesnan-cuesnanac caosh,” quecuededendac. Adsho tantiash dacuëndenda. Nuquin Papan matses abitedi cuidte ushë choabi icnuc ambi

tantiacpadec matses adonanendac. ⁷Adec matses utsi dadpen icquido matses utsibobéd cuesnanendac. Nidaid utsi-utsiec yacno pete nibédquiec icted-ictedendac. Nidaid utsi-utsiec yacno nidaidquiobi comapenec uédëquedenendac. ⁸Adsho isash chido bacuë nëncuenacsho isun: “Nëbien tishchitec,” quequin tantiacnimboen tantiata. “Nuquin Papan abitedi cuidte nëbi nec,” quequin tantiata —quepondash Esus.

⁹Adashic abi onquec: —Ëmbi chiacpadquio icnuc chieshëmënkuidon ëbi tantiaquido bedshun chieshënquin utsi-utsien cuesendac. Utsi-utsien unës uaindac. Aden nidaid utsi-utsiec yacno tabadquidon dadpeshun ëbi tantiaquido chieshënquendac. ¹⁰Adoac ëbi tantiatsëchoedëmbi chieshtoshon ëbi tantienquio yanendac. Aidëmbi ëbi tantiaquid ompodacsho istuidmeshun mëyamendac. Adashic abipadquid utsibobéd chieshënanendac.

¹¹Padnuen muaquido: “Nuquin Papan chuiboedquio chuinu. Tantia,” quependac dadpen. Adsho tantiashun dadpeshun: “Ai, abimboen mimbi chiec,” caindac. ¹²Matses dadpenquio icsamboecshë tabadsho isun ëbi tantiatsëchoedëmbi ëbi tantienquio yanendac. ¹³Padnuembi ëbi choabi icshobi ënenquio icquin ëbi tantiaquido Nuquin Papa yacno tabadmendac.

¹⁴Ëbi choabi icnuc: “Ma matses abitedishun Nuquin Papabéd tabadte tantianu,” qeshun ëbi tantiaquidon nidaid utsi-utsiec yacno nidshun chuiben-chuibenendac. Matses abitedi chuibenequin nainambi choaindabi —quepondash Esus.

Matses icsamboshë icquid chote chiaid

(*Mad. 13.14-20; Duc. 21.20-24; 17.22-24*)

¹⁵Adashic abi onquec: —Ëbi chote ushë nëbi yanuc matses icsamboshë

icquid Nuquin Papa tabadte shubu uashunaid dapa icsa uanuec puduedshun: “Mimbi Nuquin Papa caid tantienda. Ĕmbi chiacpadomboenuidi nata,” quequin Nuquin Papa chieshēnquin chiendac. Ĕndenquimbo nuquin tsusedpa Danied caidēn aden icsa uate chuiquin Nuquin Papan chiaid dada uapampic. Aidēn dada uampid mimbi isaidquio nec. ¹⁶Aden: “Nuquin Papa tabadte shubu uashunaid dapa icsa uanuec puduedosh,” qesho tantiash Udeya yacnocquido macuēsh dapa yacno ompodec cuenac bēdambo ictsiash.

¹⁷Adec cuenec shubu dayun icquido puduedenquio yec: “Con na bednu,” quenquio yec umanucuēshi cuenac bēdambo ictsiash. ¹⁸Adecbidi badedquio cuenuen tied nantan icquidon aton dashcute utsi aton shubuno beduanenquio yac bēdambo ictsiash.

¹⁹Nidequi bacuē usunquid yec bacuē chishmequid yec quec badedquio cuentiapimbo yec mēyadquidendac.

²⁰Adec cuente tantiec: “Ue sequenumbo cuemenquio icpashuni,” queta. “Pete bedmianenquio icnushe,” quiaish “Chonoadenquio icte ushēnquio cuemenquio icpashuni,” queoata.

²¹Aden Nuquin Papa tabadte shubu uashunaid dapa icsa uate bunquid icsamboshē icquid choan matses dadpenquio natiambo chieshēmēnquieci tabadendac. Nuquin Papan tauamboen matses uac adec tabadenquio ictenec. Nēbi adec tabadenquio iquec. Aido icsamboecshē tabadquido nibēdanambic utsibo adquidpenquio yanoaindac.

²²Adec icsamboecshē tabadte tantiaquin Nuquin Papan: “Ĕmbi Esus tantiaquid icmiaido uesquin cuesun sianushe. Matses abitedi nibēdanushe,” qeshun yuenquio icsamboen tabadmenquio icquin Ĕnēdmendac —quepondash Esus.

²³Nuquin Papan aden Ĕnēdmiabi yac icsamboecshē tabadec utsibo: “Is. Nēid Nuquin Papan chomiaidquio Quidistu neque,” quependac. Utsibic: “Is. Nēidquien Nuquin Papan chomiaidquio Quidistu caid neque,” quequin icsamboen chuioaindac. Adsho tantiashun: “Nuquin Icho Esus choashien nec,” cainda.

²⁴Adec muaquidoba choendac. “Nuquin Papan chomiaidquio nebique. Is,” quequin comapenen tantiaquin nabanquin ismendac. Utsibontsen: “Nuquin Papan oncamaiaid nebique. Is,” quequin nadatiambo icquin nabanquin ismendac. Adsho isun dadpenshun: “Ai, abimbo caic,” caindac. Padnuen Nuquin Papan: “Muambo nec,” quequin tantiamiabi yac Ĕbi tantiaquidontsen: “Ai, abimbo caic,” catsempendac. Nuquin Papan bēdamboen tantiamiaido yec adtiapimbo iquendac. ²⁵“ ‘Chieshēmēnquido iquendac,’ quequin tantienquio icquidēn Ĕbi tantienquio yanushe,” qeshun: “Aden Ĕbi tantiaquido chieshēnquidendac,” quequin chiombi —quepondash Esus.

²⁶Adashic padpidec onquec: —Ĕmbi aden chuiboed tantiashun utsibo muasho tantienda. Ĕbi caic: “Utsibo ismenquio yec matses nibēdacno choac caoshe. Isnu. Nid,” cac istanenda. Adembidi: “Choash nēid shubun puduedac caoshe. Isnu. Nid,” cac adembidi istanenda. Muambo neque. ²⁷Ĕbimbo padpidec choquimbimbi abitedimbo ismendac. Abu ushēmbi yec bed-bedquetanesho ĩada matsesēn abitedishunquio isenquio icpadic? Ai, isec. Adembidi Ĕbi choasho matses abitedishunquio isendac. ²⁸Adec choendabi. ĩAda edeste pisen chec budenquio icpadic? Ai, budec. Adecbidi Nuquin Papan cuidte ushē chonoc choendabi —quepondash Esus.

Abi chote Esusën chiaid*(Mad. 13.24-37; Duc. 21.25-33)*

²⁹Adashic padpiden chiec: —Aden matses icsamboshë icquidon ëbi tantiaquido natiamenubi ushë chënquenquio yanendac. Inchëshën ushëtsen chënquenquio yanendac. Uispa chedo paëdbudnendac.

Uispabimboecquid abitedimbo uëdëquendac. ³⁰Adnubini abitedishun Icho yec dacuëdampambo yec abucuësh choendac. Ëbi nadatiambo icquin nabanquidquio yec chosho isash cuidadtequido abitedimbo dacuëdec natiaic shubiquiendac. ³¹Adnuc nua shoncanubimbi Nuquin Papan abi yacnoshon uaido mayan bëdabo: “Bedtan,” caindac. Adoac nidaid utsi-utsiec yacno nidshun ëbi tantiaquido abitedimbo bedtanendac.

³²Ëmbi chuibocpadquiec yansho isun: “Esus chote nëbi nec,” quequin tantiaata. Ìmitsipaden: “Seta taëec,” quequin tantiapec? Suc seccuduquiaid isun: “Nëbi seta taëec,” quequin tantiaquid.

³³Adembidi ëmbi chuibocpadquie isun: “Nëbimbobi Esus choec,” quequin tantiaata. ³⁴Ìmuectabi nedi? Ëmbi chuibocpadquio iquendac. Ëmbi chiacpadec yanabi matses abitedi nibëdantiapimbo iquendac. ³⁵Abimbo caimbi. Abu nibëdanendac. Nidaidtsen nibëdanendac. Padnuen ëmbi chuibocpadquio nibëdantiapimbo iquendac. Bënuendenquio iquendac. Ucuotiapimbo iquendac. Ëmbi chuibocpadquio iquendac —quepondash Esus abëd icquido chiec.

Esus chote ushë tantienquio icte chiaid*(Mad. 13.32-33; Duc. 17.26-35)*

³⁶Adashic abi onquec Esus: —Ëbi chote tantienquio iquembi. “Aid ushënquio choendabi,” quetiapimbo iquebi.

Adembidi mayan bëdabon tantienquio iquec. Ëmbibi Nuquin Papan

Madonquiobi tantienquio iquembi.

Nuquin Papanuidtsëquien tantiec.

³⁷Matses ëbi caic: “Nëbi choec,”

quetiapimbo icnuc choendabi. Noen cano nacnenubi Ìmitsipaden aton matses icsambo icquidon tantiapampic?

³⁸Nidaid abichobi mauanabi icnuc:

“Nuquin Papan nuqui cuidendac,”

quequin tantienquio icquin peshun

acquinc aton chido bedquinc aton

champi bedmequinc capampic. Adnubien

Noe Nuquin Papan chiacpadomboen

cano dapa anshubu uaquin nacnenash

puuedpampic. ³⁹Aton matses:

“Nëbimbobini Nuquin Papan cuidchitec,”

quenquio icnubi ue dapambo choec

mauanquidën matses abitedimbo

unësbudnepampic Noe ambi cano

anshubu uaidën nuadtonobi. Adecbidi

Nuquin Papan cuidtequido ëbi caic:

“Choec,” quenquio icnubini choendac.

⁴⁰Choquin Nuquin Papa yacno

tabadmenuen beduamendambi. Ëmbi:

“Bedtan,” cac tied nantan dada daëd

icsho istuidshun ëbi tantiaquid abentsëc

icsho beduanendac. Utsibic ëbi tantiesa

icsho nianendac. ⁴¹Adembidi Nuquin

Papa yacno tabadmenuen chido

daëdshun macueso istuidshun abentsëc

ëbi tantiaquid icsho aid abentsëc

beduanendac. Chido utsibic ëbi tantiesa

icsho nianendac.

⁴²Aden ëmbi chuibocpadquie tantiasun:

“Ìnëbida con Icho chopeba?” quequin

ënenquio icquin tantiaata. Ëbi chote

mimbi tantienquio iquec. ⁴³Ì“Nëbi

ampequidën ampec,” quequinda

tantiapadic? Padenquio.

Tantiaquidënquien aid ushënquio aton

na bëdamboen isquin ampemenquio

ictsiash. Aden tantienquio icquin:

“Ampesho isnu,” quequin ënenquio

icquin isquid. ⁴⁴Adembidi ëbi chote

ushë mimbi tantienquoio ye. ¿“Nëbida nuquin Icbo chopeba?” quec Nuquin Papabëd tabadte bunec bédamboec tabadta. Matses dadpen: “Nëbien chochitec,” quenquoio icnubini choendac —quepondash Esus abëd icquido chieci.

Esus bédamboen cainte chiaid

(Duc. 12.41-48)

⁴⁵Adshumbic abi bédamboen cainte Esusën chuipondash. —Tantia. Aton icbo tantiaquin yua bédambo icquidën naid mibi chuinu. Icbon: “Ëbi nidan mibëdta yuaido pete sandoaid musucshun ëmbi chiacpadën ëmbi chiacpadënquien menianeta,” cac yua bédambo icquidën adotsiash. ⁴⁶Adnubien icbon choshon ambi chiacpadomboen yuan nasho isun bédamboen istsiash. ⁴⁷Adshumbic aton yua chuitsiash. “Bédamboen tantiaquid mibi neque. Con yua utsibo namequin con natedi dayun uata,” catsiash icbon yua bédambo icquid caquin. ⁴⁸Padnuen yua icsambo icquid: “Ëndenquimbo con icbo nidondash. Choenquien icchitec. Con nauidi nanu,” ⁴⁹quiampatsiash. Adshumbic chieshtoshon abëdta yuaido cuesanetsiash. Adashic icsambo icquidobëdi icsamboec tabadtsiash. ⁵⁰Adec: “¿Nëbida con icbo chopeba?” quenquoio icnubien aton icbo chotsiash. ⁵¹Choshon ambi chiacpadomboen nainquoio icsho istuidshumbic: “Icsambo iquec,” queshun comapenen cuesquin cuesunetsiash. Adembidi Nuquin Papan icsambo icquido cuidendac. Bédambo icquid damianquido cuidacno icsamboshë yacno nidmendac. Adoac natiaic shubiquiendac —quequin abi bédamboen cainte Esusën chuipondash.

Chido 10tedshun cainaid chiaid

25 ¹Adshumbic Esusën ompoacbimboen chuiquin abi chote ushë tantienquio icte

chuipondash. —Tantia. Mibi chuinu. Nuquin matses isadaidbon nacpadomboen chido bednuequid aton chido bedtanec inchëshëmbi chosho aton matsesën bëquedtanquid. Bëquedtanec choec shubun puduedash cuishonquec aibbëd pec tabadquid. Adquido icpac caondash. Chido 10tedishun: “Champi bedtanec choquid bëquedtanu,” queshun aton tabote bëchin taboadquid icbo-icboen buanuen sanambededpac caondash. ²Aid chido 5tedi tantienquoio icquido icnubi 5tedbidi bédamboen tantiaquido icpac caondash. ³Tantienquoio icquidon: “Tabote bëchi naimëdsho cushtonon buanu,” quenquoio icquin bëchi uesadbudtsaid taboteuidtsëqui sananquin caimpac caondash. ⁴Padnuen bédamboen tantiaquidon naimëdsho cushtonoequin tabotebëdta sedunten cushtoaïd bëchi sananquin caimpac caondash. ⁵Aden cainaqu: “Chido bedtanu,” quianec nidboed choenquoio icsho isash abitedi ushcastoash ushcuededpac caondash. ⁶Inchësh poctsemboen: “Choeque. Bëquednu. Nid,” cac ⁷isucunshun chidobon tabonoen tabote dëbedpac caondash. Adoshon bédamboen tantiaquidon ambi bëboed bëchi cushtonobien ⁸icsamboen tantiaquidon: “Bëchi beccho. Con na naimëdeque,” caquien bëchi bëboedën ⁹bédamboen tantiaquidon: “Padi. Mibi meniac con na uesadtsiash. Aid uesadan shubun puduedabi nuquitedi inchështsiac. Piucquid menequin bëchi cushtoquid baded cushtometan,” capac caondash. ¹⁰Adoac bëchi bedec nidnubien chido bedtanec dada chopac caondash. Chosho bédamboen tantiaquidon aton tabote taboshon chido bedtanec choquid bëquedtampac caondash. Adtanec abëdi choash puduedshun bëtashte puduedtiapimbo

icnuc bédamboen bétashpac caondash. ¹¹Adnubien bédamboen tantienquo icquido bëchi bedtanec chopac caondash. Choshon shëcuë bétashacsho isun: “Shëcuë shëcne, buchi. Èbitsen puduednu,” ¹²caquien chido bedquid: “Padi. Èmbi tantiacmaido mibi nec,” quepac caondash.

¹³Èmbi chuiboed tantiahsun chido icsamboen tantiaquido tanenda. Bédamboen nabi icsho: “Èmbi tantiacmaid mibi neque. Puduedenda,” aido cacbimboen èmbitsen Nuquin Papa yacno puduedmenquo icquin cacumechitomane. Èbi chote ushë tantiaquid icnuc: “¿Nëbida con Icho chopeba?” quequin èbi bédamboen tantiec èmbi chiapadec bédamboec tabadta —quepondash Esus abéd icquido chiec.

Icbon piucquid daëd uaid chiaid

(Duc. 19.11-27)

¹⁴Adshumbic abi tantiaquidon ambi chiapadomboen nate Esusën ompoacbimboen chuioapondash. Ènapen nidnun aton piucquid dadpen dayun uaquidën aton yuabo: “Èbi piucquid daëd uashunta,” quequin chuipac caondash. ¹⁵“Nëidën bédamboen tantiaquidquo icquin con piucquid èbi daëd uashuntsiash,” qeshun aton yua piucquid 5tedi meniac caondash. Adshumbic: “Nëidënsen bédamboen tantiaquin adembidi con piucquid èbi daëd uashuntsiash,” qeshun utsitsen 2tedi menepac caondash. Adshumbic: “Nëidënsen bëdiactsëc tantiahsëcquin adembidi èbi con piucquid daëd uashuntsëctsiash,” qeshun utsitsen piucquid abentsëcquiobi menetsac caondash. Adanec nidpac caondash icbo. ¹⁶Adnubien piucquid 5tedi bedboedën aton matsesën

nacpadomboen piucquid daëd uanuen utsibo menequin yuecshun ambi meneboed udictsëc dëniacquin bedoapac caondash. Sincoted icboedi 5tedbidi bedoapac caondash 10ted icnuc. ¹⁷Adembidi piucquid 2ted meneboedën 2bidi daëd uapac caondash 4tedi icnuc. ¹⁸Padnuen abentsëc meneboedën chieshquin aid daëd uainquo icquin ambi uëdëshcaboed shëcuë anantsëcquin piucquid abentsëqui ompopac caondash.

¹⁹Yuecquo ictaneshumbien icbon choshon ambi piucquid meniondaido chuituidpac caondash. “¿Atotsi nao?” cac ²⁰sincoted meniondaidën: “Is, icbo. Mimbi èbi meniondaidtedbidi daëd uaombi. Nëbi mitsana 10tedi iquec,” caquien ²¹icbon: “Ai, con na daëdpactsëc icboedi daëd uaquin mimbi bédamboen nac. Nëbi èbëd tan chuiquid dapa icta. Èbëd cuishonquec tabadec cho,” capac caondash. ²²Adnubien piucquid 2tedi meniondaidën: “Is, icbo. Mimbi meniondaid 2ted icboedi daëd uaondambique. Nëbi mitsana 4tedi iquec,” caquien ²³icbon: “Ai, èmbi chiapadomboen mimbi con na daëd uac. Nëbi èbëd tan chuiquid icta. Mibitsen èbëd cuishonquec tabadec cho,” capac caondash.

²⁴Adnubien piucquid abentsëcquiobi meniondaidën chieshquidënsen: “Mimbi ancaidon nidtsinaid peteuidi bedquid mibi nec, icbo. Mimbi chiapadomboen nainquo icsho isash chushcanquidquo mibi nec. ²⁵Adec dacuëdampambo icquid icsho mibi dacuëdënsin mimbi meniondaid piucquid ompoquin chococaondambi. Në mimbi meniondaiduidtsëqui ictsec,” caquien ²⁶icbon: “Chieshquiec mibi icsac. Èmbi chiapadomboen nambo mimbi iquec. Èbi caic: ‘Ancanquid icquin èbi chushcanushe,’ qeshun

²⁷nuquin matsesën nacpadomboen utsibo meneshun piucquid daëd uaquin mimbi bedtsempac. Adoacsho aid daëd uaquin bedtsenombi. Chieshquin mimbi icsamboen nac,” ²⁸quepac caondash. Adshun aton yua utsi caic: “Chieshquidën na bedshunshun piucquid 10ted dayun uatsëchoed mene,” cac meniac 10ted icboedi 11ted yanac caondash. Adshumbic chieshquid comapenen cuidpac caondash. ²⁹Adembidi naindambi. Èbi tantiaquin ëmbi chiacpadomboen naquid adembidi namequin bëdamboen tantiamendambi. Èbi tantiesabo ëmbi chiaid niacquid bëdamboen tantiamenquio iquendambi. ³⁰Aid yua icsambo icquid cuidacbimboen Nuquin Papan ëbi tantiesabo cuidquiendac. Ambi icsaido cuidquiagno nësecac natiaic shubiquiendac —quepondash Esus abëd icquido chiec.

Matses nashunesa cuidte chiaid

³¹Adshumbic Esusën padpiden chuipondash. —Nuquin Papan abi yacnoshon uaido mayan bëdabobëd choec: “Abitedishun Icbomboeni nec,” quiash bëchamauampamboec dacuëdampamboec choequi chuiquid dapan tsadten tsadtoquin abitedi ismendambi. ³²Adshumbic matses abitedimbo cho-chomequin tsidadmendambi. Adshumbic icbon aton nauidquio tsinacacimboen ëbi tantiaquido naden chiendambi. ³³“Èbëd tabadtequido mibi neque. Nëmbo con abiuc tabadec cho,” caindambi. Adshumbic ëbi tantiesabo chuiquin: “Èbi tantiesabo cuidadtequido mibi neque. Con copioc tabadec cho,” caindambi. ³⁴Adshumbic ëbi tantiaquido padpiden chuiioaindambi. “Èbëdi tabadec cho. Matses uaquin tauabi ëndenquimboshë mibi caic: ‘Aido

ëbi tantiaquido icmeshun ëbëdi tabadmendambi,’ quequin Nuquin Papan tantiaidombo yec ëbëdi bëdamboec tabadec cho. ³⁵Mimbi ëbi nashundenec. Bundoacsho mimbi ëbi pemedenedec. Acte bundoacsho adembidi mimbi ëbi acmedenedec. Mimbi isacmaidquio icsho mimbi ëbi yuedtenec. ³⁶Con dashcute nibëdsho mimbi ëbi dashcute menenedec. Daicsabudtsash unëstiadtsëcquio icsho ëbi tantiec mibi datsadtenec. Quënën nauedacsho mimbi ëbi isuan-isuandenec,” caindambi. ³⁷Adoquien bëdamboec tabadquido: “Tantiadenquio icnuc mimbi chuipec, icbo. ¿Bundoacshodambi mibi pemedionda? Mambi mibi pemiambo yoc. Mambi mibi acte bundoacsho acmiambo yoc. ³⁸¿Èmbi isacmaidquio icshodambi mibi yuedtionda? Mambi padambo yoc. ¿Dashcute nibëdshodambi mibi dashcute menepacti? Mambi padambo yoc. ³⁹Mibi daicsacsho datsadambo iquebi. Quënën nauedacsho mibi istaniambo iquembi. Mimbi tantiadenquio icnuc chuipec,” ëbi caindac. ⁴⁰Adoac naden chiendambi. “Tantia. Mibi chuinu. Èmbi chiacpadomboen ëbi tantiaquido utsibo bëdamboen isquin mimbi nashundenec. Aden ëbibi nashunacimboen mimbi utsibo nashundeneque. Èbëdi tabadec cho,” caindambi. ⁴¹Adoshombic ëbi tantiesabotsen chiendambi. “Nuquin Papan cuidtequido mibi neque. Mibi icsaid ënte bunenquio icquid mibi neque. Nuquin Papan Satanas aton yuabo podobitsi icsabobëdta ënenquio icquin cuidacno nid. ⁴²Èmbi chiacpadomboen ëbi tantiaquido nashunesambo mibi icteneque. Bundoacsho mimbi ëbi pemenquio ictenec. Acte bundoacsho mimbi ëbi acmenquio ictenec. ⁴³Mimbi

isacmaid icsho mimbi ëbi cacumedenec. Dashcute nibëdsho mimbi ëbi menenquo ictenec. Daicsacsho isash mibi ëbi datsadenquo ictenec. Quënën nauedacsho mimbi ëbi istanenquo ictenec,” caindambi. ⁴⁴Aden chiaquien: “Tantiadenquo icnuc mimbi chiec. ‘Pete bundopash,’ quequin tantienquo iccondambi. ‘Acte bundopash,’ quequin tantienquo iccondambi. Ĕmbi isacmaid icsho mambi mibi isambo yoc. ¿Min dashcute nibëdshodambi mibi istionda? Mambi padambo yoc. Mambi mibi daicsacsho isambo yoc. Mibi quënën nauedaid tantiambo iccondambi. Tantiadenquo icnuc mimbi chuipec,” caindabi Ĕmbi chiacpadomboen naisabon. ⁴⁵Adoac naden chiendambi. “Ĕbi tantiaquido nashunenquo icquin Ĕbibi nashunenquo yacimboen Ĕmbi chiacpadomboen naisabo mibi neque. Nuquin Papan cuidacno nid,” caindambi. ⁴⁶Adoac icsamboec tabadquido Ĕnenquo icquin cuidacnombo nidnubi bëdamboec tabadquido Nuquin Papa yacno Ĕnëdenquo yec tabadendac —quequin Esusën chuipondash.

Esus bedshun unës uanuequin chiaid

(*Mad. 14.1-2; Duc. 22.1-2; Uan 11.45-53*)

26 ¹Aden abi chote Ĕnquin chuitanquimbic abi unës uatetsen abëd icquido Esusën chuipondash. ²—Daëdec ushun nuquin matsesën obeca bacuë unës uaindac. Tsusedpabon: “Ma con mado unës uainquo icnu,” qeshun obeca bacuë abided unës uampid tantiaquin badiadshun penun obeca bacuë unës uaindac. Aid ushëmbi ëbi bedshun cuesten dectamendac —quepondash Esus.

³Adnubien tsusiobobëdi con matses chuiquid dapa dadpen abi chuiquid

dapambo Caipas cuëmëdquidën shubun pudued-puduedpac caondash. ⁴Adashic: —Nëbien Esus unës uametiad utsibo ismenquo icquin bedshun. ⁵Nuquin matses obeca pec tabadnuc bedenquien ictiad. “Esus bëdambo icquidi cuesunec,” qeshun obeca penuec cho-choquidon nuqui cuesnushe —quepac caondash.

Chidon Esus machiuinaid

(*Mad. 14.3-9; Uan 12.1-8*)

⁶Adnubien Esus shubu dadpen icquid Betania caid yacno choash ambi daushumbo yec daicsaid bëdamiondaid Simon caidën shubun puduedpondash. ⁷Puduedshun pec samëdshobien chidon puduedshun ambi piucquid dadpenquo menequin bedaid tëchumpin icquid bëdambo nuadquid Esus machiuimpondash: —Esus bëdamboshë icquid nec —qeshun. ⁸Adsho isumbien Esusbëd icquidon: —¿Adenda bëdamboen nai? Ma icsambo yoc. ⁹Utsibo menequin dadpen piucquid bedshun piucquid nibëdquido aid piucquid menetiadquidi mibi nec —quequin chido chushcapondash.

¹⁰Adsho tantiaashumbien Esusën: —¿Atotsieshun chido chushcai? Ĕbi bëdamboen tantiaquin Ĕbi ismequin bëdamboen nashunebique. Chushcainda. ¹¹Mimbi chuiboed piucquid nibëdquido Ĕnëdenquo yec mibëdi tabadendac. Ĕbien mibëdi tabadenquo yanendac. ¹²Ĕbi unës uashun chococate tantiacimboen machiuiunoshibique. Chushcainda. ¹³Ĕmbi chiaid chuibeniacnoshon nëid chidon Ĕbi machiuimboed chiendac —quepondash Esus abëd icquido chiec.

Udasën Esus bedmenun piucquid bedaid

(*Mad. 14.10-11; Duc. 22.3-6*)

¹⁴Adnubien Udas Iscadiote caid Esusbëd icboedi Esus chieshënquido

chuiquid dapabo chiec nidpac caondash.
¹⁵Nidshumbic chuituidpac caondash.
 —Utsibo ismenquo icquin
 mibiuidtsëqui Esus bedmenu. ¿Ttedtsi
 piucquid ëbi menetsia? —caquien
 badedi pudunquin piucquid
 shocoshëmpi 30ted icnuc
 tambantanquin menepac caondash:
 —Baded ëbi bedme —quequin.
¹⁶Meniac bedanec nidec:
 —¿Mitsishunquiemi utsibo ismenquo
 icquin Esus bedmepeba? —quepanëdash
 Udas. Adashic Esusbëdi tabadoaic
 chopondash.

Unësnush abëd icquidobëd

Esus pec tabadaid

(1 Cod. 11.23-26)

¹⁷Adnubien Esusbëd icquidon:
 —Equipito yacnuësh cuenun pan
 bidiscamiabi yampid 7tedec ushquin
 tantiaquin tauaid ushë nëid nec
 —queshun Esus chuipondash. —Nuquin
 Papan nuquin tsusedpabo unës
 uamenquo icquin matamiampid
 inchësh tantiaquin obeca bacuë penuen
 ¿mitsishunquiemi mibi codocashumpe?
 —caquien Esusën: ¹⁸—Edusaden yacno
 nidshun ëmbi tantiaid dada chiec nid.
 “Nuquin Icbon: ‘Chiec nid,’ cac chobi.
 ‘Nëbi Nuquin Papan chiacpadomboen
 uesquin nabanemi,’ quiosh. Min
 shubumbo caic: ‘Aidën shubun
 puduedshun Nuquin Papan nampid
 tantiaquin obeca bacuë pec
 tabadcuëdnu,’ quiosh,” quequin chiec
 nid ¹⁹—cac nidquimbi shubu icbo
 chuituidac caondash. Adoac: —Ai, ma
 chobono —quesho tantiashumbien abia
 nidboedon aidën shubun puduedshun
 penuen nëish yua obeca
 codocapaccondash. Adnubien Esus
 chedo puduedpondash.

²⁰Inchëshëmbi abëd icquido 12tedbëd
 samëdquin Esusën pepondash. ²¹Pec

samëdquin Esusën chuipondash.
 —Tantia. Mibi chuinu. Èbi
 chieshënquido ëbi bedmequid abentsëc
 nëmbobi iquec —quesho tantiashun
²²unësquo yanshun abentsëcshun
 abentsëcshunquien Esus chuipondash
 abëd icquidon. —¿Èbida cai, Icbo?
 —quequin abi chuishobien ²³Esusën:
 —Èbëdtan pete codocaid ënë punquid
 ëbi bedmequid nendac. ²⁴Èbi Nuquin
 Papan chiaid dada uamepampicpadquid
 matesmiaid yec unësendabi. Padnuen
 ëbi bedmequid comapenen
 cuidtequidquo nec. Anin aid tishenquo
 icpatecnëdan. Cuidac natiaquiendac
 —quepondash Udas caic.

²⁵Adoquien Udasën abi
 bedmequidënquo: —¿Èbida cai, Icbo?
 —caquien: —Ai, mibibimbi caic
 —capondash. Adoac Udas puduenanec
 nidpondash.

²⁶Adshumbic Esusën pete sananquin:
 —Mimbi pete uaid nëid nec. Mibi
 bëdambo iquec, Papa —quequin Nuquin
 Papa chuitanquin cuësh-cuëshbanshun
 abëd icquido menebampondash. —Nëid
 cuësh-cuëshquin nibëdamiacimboen ëbi
 mëyanquin unës uaindac. Èbi unës uate
 tantiaquin nëid peta —cac
 pebededtsëccondambi. ²⁷Adshumbien
 Esusën dëshoten actequid cushtoshon
 sananquin: —Mimbi uaid nëid nec. Mibi
 bëdambo iquec, Papa —quequin Nuquin
 Papa chuishun: —Nëid abitedishun
 acbeded —cac dëshoten abentsen
 cushtoaid pictsë-pictsen acbampondambi.
²⁸Aid actequid acshobien Esusën:
 —Nuquin Papan chiaid nuquin tsusedpan
 dada uapampicpadec ëbided cuidadec
 unësendabi. Nëid acquin: “Esused
 Nuquin Papan cuidac aton intac
 siebudpamboec unësposh. Aton Madoded
 cuidshun Nuquin Papan ëbi padenquo
 iquec,” quequin nëid acquin tantiata
 —capondashi.

²⁹Adashic: —Nadquid actequid padpiden aquec cuishonquec mibéd tabadenquo iquendabi. Nuquin Papan abitedishun Icbombo icmiac abi yacnombo mibédi cuishonquec tabadendabi —quepondash Esus ëbi chedo chiec. ³⁰Adashic cuëdënten abentsec cuëdênash macuësh dapa Odibos caid pudundonoec nidanepondash Esus Udas Esus chieshênquido chiec nidbon.

Petedo chieshuidte Esusën chiaid

(*Mad. 14.26-31; Duc. 22.31-34; Uan 13.36-38*)

³¹Macuësh dapa Odibos caid yacno nidquimbi Esusën chuipondashi. —Nëid inchëshëmbi Nuquin Papan chiapadec ëbi nianec mibitedi niquendac. Nuquin Papan naden chuipampic. “‘Icbo cuesnu,’ canubi aton yuabo niquendac,” quequin Nuquin Papan dada uamepampicpadec mibitedi adec niquendac. ³²Padnueni unëshash uincuenendac. Adanec mibi cainuec nidaid cuëshë utsi Cadidia caid yacno ëbia nidendabi —quepondash Esus abéd icquido chiec.

³³Adoquien Petedo: —Mibi cuesnuec cho-chosho isash utsibo dacuëdec niquenuc ëbimboen cuenenquimbo ictsiandac —qeshobien ³⁴Esusën: —Tantia. Mibi chuinu. Nëid inchëshëmbi cachina bënë cuëdanabi icnuc: “Ëmbi isacmaidquo aidi nec,” mimbi ëbi caindac. Cachina bënë cuëdanabi icnuc 3tedec mibi adendac —caquien ³⁵Petedo: —Pada. Adtiapimboeni iquec. Chieshëmênquidon: “Esusbéd icquid mibi neque. Mibi cuesunenu,” caqui: “Ëmbi isacmaid neque. Padi,” quenquo iquendabi. Mibédquiobi unëshsiandabi —Petedo quenubini: —Ai, ëbibic adecbidi ictsiac —quecuededpondabi Esusbéd icquidotedi.

Quetsemani caid yacnoshon Esusën

Nuquin Papa chiaid

(*Mad. 14.32-42; Duc. 22.39-46*)

³⁶Adanec nidequi cuète dadpen nitsinacno Quetsemani yacno nidpondash. Auëshquo Esus nadpondash. —Ambobi tabadta. Udictsëc nidshun Nuquin Papa chuitanu —quepondash.

³⁷Adashic Petedobédta Sebedeyon mado daëd buanec nidpondash. Udictsëc nidequi unëshquo yanec shubiantiadtsëcquo yampac caondash.

³⁸Adshumbic Petedo chiec:

—“Matsestedi icsaid ëmbi bedshunsho isun Nuquin Papan ëbi istiapimbo yanendac,” quiash unëshquo iquebi. Ëbi yacpadec ushenquo yec nëmbobi isec tabadta —quianec ³⁹udictsëc nidash nidaidën uebudshun Nuquin Papa chuipac caondash. —¿Ada mimbi ëbi unësh uamenquo icpatsia, Papa? Mimbi: “Ai, mibi unësh uamenquo iquembi,” cac bédambo ictsiabi. Mimbi: “Nëbi mibi unësh uamenu,” cac mimbi tantiacpadequi unëshendabi —quepac caondash Esus Nuquin Papa chiec.

⁴⁰Adtanec choshon isquien Petedo chedo ushpec: —Ushenquo yec isequi tabadta —caboqui. —¿Yuec-yuecpactsec ushenquo icquin istiapimboda icco?

⁴¹“Satanasën icsamenushe,” qeshun ushenquo icquin Nuquin Papa chuita. “Ushenquo iquebi,” queboedobi ushcas mëmunenquo yec mibi ushpec —capac caondash Esusën Petedo chedo chuiquin.

⁴²Adtanec padpidec nidoashun Nuquin Papa chuioaic: —Ëbi unësh uametiadquo icquin ëbi unësh uameta, Papa. Ëbi unësh uametiapimbo icquin mimbi ëbi unësh uamenquo ictsiac. Mimbi tantiacpadomboen nata, Papa —quetanec ⁴³choaquin isquien Petedo

chedo ushoaic ushcas mēmuntiapimbo yec.

⁴⁴Adsho istanec nidoashun ambi chuibocpadomboembidi Esusēn Nuquin Papa chuitanepac caondash tedesteden.

⁴⁵Adtanec choaquin ushash uesho istuidoashun: —¿Ushecta ue? Nēbimbobi ēbi unēs uamenuen ēbēd icboedēmbi icsambo icquido ēbi bedmeque. ⁴⁶Nidnu nid. Is. Ēbi bedmuenec ēbi bedmequid choque —quepondash Esus Udas chosho isash.

Abi chieshēnquidon Esus bedaid

(*Mad. 14.43-50; Duc. 22.47-53; Uan 18.2-11*)

⁴⁷Adnubien Udasēn Esusbēd icboedēn bedtanac matses dadpen cuesantiadpambo yec chēshtebēdta cuate sanambededtsēcquieic cho-chopondash. Nēish yua abided unēs uaquido chuiquid dapabobēdta con matses tsusiobon: —Bedtan —cac cho-chopondash. ⁴⁸Ambi bedtanaidobēd cho-choquimbien Udasēn: —“Nēid Esus nec,” quequin adoendambi —abi quiacpadembi ⁴⁹Esus tansudcatuidpondash: —Chobi, Icbo —quequin. ⁵⁰Adoaquien Esusēn: —Ēmbi tantiaboedquio mibi nec. Ēmbi adoboedēnquiobi mimbi tantiacpadomboen nata —qeshobien cho-choquidon Esus bedtuidpondash. Aden bedshun: —Cuidmenun chuiquid dapa yacno mibi buanu —capondash.

⁵¹Aden Esus bedshobien abēd icquidēn abi tsiusudaic chēshte chictanquin chuiquid dapan yua pateshunepondash. ⁵²Adoshobien Esusēn: —Padi. Chēn. Mīn chēshte tsiusudoata. Cuesanquid icsho adembidi cuidnushē. ⁵³¿Tantienquioda ique? Ēmbi chiac con Pan ambi abi yacnoshon uaido mayan bēdabo dadpenquioshē ēbi cudasmenuen chometsiash. ⁵⁴Nuquin Papan aden ēbi cudasmiac

bedadtiapimbo icsho ¿mitsipaden Nuquin Papan chuiquin dada uamiampicpadomboen ēbi naden bedpatsiash? —capondash pateshunianquid chuiquin.

⁵⁵Adashic abi bedquido chieic: —¿Atotsi quenuec chēshtebēdta cuate sanambededtsēcquieic ēbi bednuec cho? ¿Nuqui chuiquid dapan chiaid niac-niacquin matses cuesanquido chuiquid dapadabi nedī? Mabi mimbi isboedquiobi neyoc. Badiadquidēn badiadquidēnquien Nuquin Papa tabadte shubu uashunaid daquēnē uaidēn puduedshun chuideneshobi ma mimbi ēbi bedenquio icboc.

⁵⁶Padenquio icboedombi Nuquin Papan tantiacpadēnquiobi mimbi ēbi bedec. Ēbi bedte chuiquin Nuquin Papan nuquin tsusedpa dada uamiampicpadomboen mimbi ēbi bedec —quequin Esusēn chuinubini niquepondac: —Cuenenquio ictsiabi —queboedi.

Caipas caid yacno Esus buanaid

(*Mad. 14.53-65; Duc. 22.54-55, 63-71; Uan 18.12-14, 19-24*)

⁵⁷Adnubien chuiquid dapambo Caipas cuēmēdquid yacno Moisesēn dada uampid chuibanquidobēdi tsusio utsibo cho-chopac caondash. Adnubien ambobi Esus bēpac caondash. ⁵⁸Adnubien Petedo uanoshon isbēec tsyuec chopac caondash. Choash chuiquid dapabo tabadacno daquēnē uaidēn puduedpac caondash. Adashic Esus mēyansho isnuec puduedash chuiquid dapan namiaido sondadobēdi tsadtuidpac caondash Petedo.

⁵⁹Adnubien cho-choboedo tsusio dapabo: —Esus unēs uamenuen: “Esus icsasho isombi,” quequin muaquidon chuisho tantianuna —qeshun chomiac muaquido dadpenshun: —Esusēn

icsamboen nasho isombi —quequin chui pac caondash. ⁶⁰Aden Esusën naid muaquin chuiquin Esus unës uatiadquo icquid chiambu icpac caondash. Adnubien muaquid daëdshun chuituidpac caondash. ⁶¹—Nuquin Papa tabadte shubu uashunaid caic: “Uesquin chic-chictanquin padpiden nacnenoaquin daëdec ushquin nainendambi,” ma Esus quepondac —quepac caondash.

⁶²Adshobien chuiquid dapabo chuiquidën Esus chuiquin: —¿Atotsi quenuc ado? ¿Atotsi nëidën chiec? —caquien ⁶³Esusën ëcbedenquo icpac caondash. Adshobien chuiquid dapan: —Abimbo chuita. “Nuquin Papan cuidchitoshe,” queshun abimbo cata. ¿Nuquin Papan chomiaidquo aton Madombobida mibi nepe? —caquien ⁶⁴Esusën: —Ai, mimbi chiaidquo nebi. Tantia. Mibitedi chuinu. Nuquin Papan abitedishun Icbombo icmiacshobini mimbi isendac. Adecbidi Nuquin Papa yacnuësh padpidec choec abu ushu yacnuësh choshobini mimbi isendac —quepac caondash Esus.

⁶⁵Adsho tantiash chuiquid dapambo chieshtotanquin aton dashcute bëntse icquid dached-dachedquepac caondash. —¿Ada tantio? “Nuquin Papan Madombobi nebi,” quequin Nuquin Papambo icsamboen chiec muaposh. Ambi icsamboen naid utsi chuisho tantiatiapimbo iquebi. Ambibi Nuquin Papa muauasho tantiashun ⁶⁶¿Atotsi natiadquo ique? —caquien abëdtan chuiquid utsibo: —Adquid cuidquid quedeneque. Unës uamequimbien ictiad —quecuededpac caondash.

⁶⁷Adshumbien Esus chieshënquin bëcuishtuabudnetanquin mëshëbudtanquin mëdanten bëse-bësepac caondash. Bëse-bësesho istanquin utsibontsen istiapimbo icnuc

Esus dashcuten bëpuctanquin mëdanten bëcues-bëcuespac caondash.

⁶⁸Bëcuestanquin: —“Nuquin Papan madombobien nec,” canu. En chui. Tiantianu. ¿Tsundan mibi naoshe? —cabededsëcquien mamëshumpac caondash Esus.

Esus caic: Ëmbi isacmaid nec, quequin Petedon chiaid

(Mad. 14.66-72; Duc. 22.56-62; Uan 18.15-18, 25-27)

⁶⁹Adnubien Petedo tabadacno choshon chido yuan chuituidpac caondash. —Cadidia yacnocquid Esus caidbëd ma mibi icpaboc —caquien: ⁷⁰—Tantiadenquo icnuc mimbi chiec. Ëmbi isacmaidquo mimbi chiec —quec Petedo muaic taëpac caondash.

⁷¹Adanec daquënë uaidën puduedte shëcuë dayun nidash nitudpac caondash.

Adshobien chido yua utsin: —Nasaded yacnocquid Esusbëd ma nëid icpaboc —caquien ⁷²Petedo: —Ma ëmbi isacmaidquo Esus neyoc. Abimbo caimbi. Nuquin Papan cuidchitoshe muasho —queoapac caondash muequi.

⁷³Adash yuec-yuecpectsëcshumbien ambo tabadquidontsen Petedo chuipac caondash. —Aidbëd icquidien mibi nec. Cadidia yacnocquid onquiacbimboec ma mibi onquepayoc —quesho tantiash ⁷⁴Petedo: —Comapenen Nuquin Papan cuidchitoshe muasho. Abimbo caimbi. Ma ëmbi isacmaidquo neyoc —queoapac caondash.

Adec 3tedec Petedo muanubien cachina bënë cuëdampac caondash. ⁷⁵Adsho tantiashun Petedon Esusën chuiboedquo tantiactampac caondash. —Cachina bënë cuëdanabi icnuc mimbi ëbi caic: “Ëmbi isacmaid nec,” capendac tedesteden —quequin Esusën chuiboedquo tantiactanec umanuc

puđenanec nidec Esus muauabosh natiac shubinidpac caondash.

Pidato caid yacno Esus buanaid

(*Mad. 15.1; Duc. 23.1-2; Uan 18.28-32*)

27 ¹Adnubien chuiquid dapabo aton tsusio utsibobëdi Esus isec ushenquoio badiadpondash. Badiadshun Esus chieshënquin: —Nuqui yuaquid ancanquid Esus unës uamec nidnu. Nid —qeshun ²podo cataneshun ancanquid Pidato cuëmëdquid ismenuen Esus buampac caondash.

Esus bedmequid Udas têtaniadaid

³Adnubien Udas Esus bedmeboed: —Unës uamechitembien iquec. Unës uametiapimbo iquebi. Èmbi bedboed piucquid shocoshëmpi 30ted meneoatanu —quianec abi meneboed tsusiobo menenuc nidpac caondash. ⁴Nidshun tsusiobo chuituidpac caondash. —Icsachitobi. Unës uanuequido bëdambo icquidi bedmechitombi. Nëid mimbi meneboed mibi menenuc chobi. Në bed —caquien tsusiobo: —Padi. ¿Atotsieshun nai? Ma mimbi bedmepaboc —quepac caondash Udas caic. ⁵Adoquien Nuquin Papa tabadte shubu uashunaid shëcuën ambi bedboed shocoshëmpi piucquid ansecanec nidash uano cuenash têtaniadpac caondash Udas.

⁶Aden piucquid shocoshëmpi ansecacsho bedashien tsusio dapabo: —Nuqui dayun uaid shocosh utsibëdta dayun uatiapimbo iquec. Unës uanuen meniaid shocoshëmpi dayun uatëmaid quedeneque. ⁷Matsu nacenquidën tied bedquin nëid menenuna. Nuquin matsespenquoio isedquido unësacsho ambo chococanun aid tied bednuna —qeshun piucquid meniac caondash. ⁸Aidon bedacsho isun nëbi aid tied cuënquin nadopec. —Unës uamequidën

bedaid tied nec —capec. ⁹Aden Udasën shocoshëmpi 30ted menete nuquin tsusedpa Edemias caidën dada uapampicpaden napac caondash. Naden dada uapampic. “ ‘Aid bednuen Isadaidbon piucquid shocoshëmpi 30ted meneuidaaid bedoashun ¹⁰matsu nacenquidën tied bedquin meneoapondash,’ quequin Nuquin Papan chiaid dada uaombi,” quepampic Edemias.

Pidato caidën Esus chuimiaid

(*Mad. 15.2-5; Duc. 23.3-5; Uan 18.33-38*)

¹¹Adnubien isadaidbo yuaquid ancanquid Pidaton Esus bëacsho chuipac caondash. —¿Min matses isadaidbo chuiquid dapamboda mibi nepe? —caquien Esusën: —Ai, aid nebi —capac caondash. ¹²Adnubien abi chieshënquidon muaquin Esusën naid Pidato chuipac caondash. Adsho tantiashun Esusën ëcbedenquoio icpac caondash.

¹³Adshobien Pidaton Esus padpiden chuiuoquin: —Mibi icsaid dadpen chuipec. ¿Tantienquioda ique? ¿Ëcbedantiapimboda ique? —caquien ¹⁴ëcbedenquoio icpac caondash Esusën. —Nëidon muauac nebi —quequin chienquoio icsho tantiash: —Adquid tantiambo iquembi —quepac caondash Pidato.

Esus unës ua, quequin chiaid

(*Mad. 15.6-15; Duc. 23.13-25; Uan 18.38-19.16*)

¹⁵Nuquin Papan isadaidbo unës uainquoio icquin matamiampid tantiate ushëmbi seta utsin-utsinquien Pidaton quënën nauedaid isadaidbo abentsëc cuemedeneq. Pidaton: —¿Tsutsi abentsëquimbi cuemepe? —cac isadaidbon chiacpadquid abentsëc cuemedeneq. ¹⁶Esus bëabi icnuc

uimanēmēnquidquio Badabas
cuēmēdquid nauedpac caondash.

¹⁷Adnubien Esus cuidte chuisho
tantianuec cho-choash dadpenquio
tabadpondash. Adsho isumbien Pidaton:
—¿Tsutsi abentsēquimbi cuemepe?
¿Badabastambi cuemepe? ¿Nēbi mimbi
bēboed Esus Quidistu caidtambi
cuemepe? —capondash. ¹⁸—Esus
chieshēnquidon: “Nuqui padenquio
yanuc nuqui dēniaquec Esus chuiquid
dapa yanushe,” qeshun Esus bēaccosh.
Nēmbo tabadquidon: “Esusquio cueme,”
capashuni —quequin tantiaquin aden
chuiipanēdash Pidaton.

¹⁹Adashic matses icsaido cuidte
chuinuec tsadte dapan abucquio
tsadtopondash Pidato. Adshobien yuan
chuituidpondash. —Min chidon:
“Chuitan,” cac chobi. Esus caic: “ ‘Aid
dada bēdambo icquid neque. Unēs
uamenda. Dacuēdampambo icsho
ushquin isombique. Unēs uamenda,
quiosh’ quequin chuitan,” min chidon
cac chobi mibi chiec —quequin aton
yuan chuituidpac caondash.

²⁰Adnubien Esus chieshēnquido
tsusiobon ambo tabadquido
chuiбудpondash. —Pidaton:
“¿Mitsicquidimbi cuemepe?” cac:
“Badabas cuemequin Esus unēs ua,”
cado-cadota —cac: —Ai, adoendambi
—quecuededpondash.

²¹Adnubien Pidaton padpiden:
—¿Mitsicquidimbi cuemepe? —caquien
ambo tabadquidon: —Badabas cuemeta
—cadonepondash. ²²Adoquien Pidaton:
—Ma Esus Quidistu caid.
¿Mitsipadopembimbi aid ique?
—caquien: —Unēs ua. Cuesten
dectanquin unēs ua
—quecuededpondash.

²³Adoquien Pidaton: —¿Atotsieshun
mimbi adope? ¿Atotsi icsa uasho mimbi
adope? —caquien buēdanquiecuēdec:

—Cuesten dectanquin unēs ua
—quecuededpondash.

²⁴Adsho —Padi icnuna —caqui
niacbidanquiecuēdec unēs uate
bunquiecuēcuesantiadpambo yansho
isash: —Acte beccho —quepondash
Pidato. Bēacsho tasun dapan
cushtotanec mēpamēdquin abitedi
ismepondash. Adashic Esus caic: —Nēid
unēs uametiapimbo iquebi. Nēid unēs
uamete bunec mibien
cuidadtequidombo nendac. Ēmbien
adotiapimbo iquecuēc. Mēpamēdec bēchish
ucudacimboec mimbi icsamiaid
ucudebi —quiash mēpamēdquin
ismepondash Pidaton. ²⁵Adsho
tantiasien: —Con nabobēdtsēqui
adequi cuidadtequidombo icnuna
—quecuededpondash abitedimbo.

²⁶Adsho tantiasien Badabas caid
cuemequin Esus cueshcaten
cueshcamepac caondash. Adshumbic:
—Cuesten dectanquin unēs uatan
—quequin sondado buamepac caondash
Pidaton.

Esus mamēshunaid

(*Mad. 15.16-20; Uan 19.2-3*)

²⁷Adoquien sondadon Pidaton
shubun Esus yuedshun: —Isec cho —cac
aton sondado utsibo dadpen cho-chopac
caondash. Cho-choshon Esus
mamēshumbededpac caondash unēs
uanumbi. ²⁸Abi dasiuidaid ēnapen
icquid chicshun: —¿Chuiquid dapada
nedi? —quequin dashcute piumbo
icquid dasiuintanquin ²⁹mauete
pinchuc-pinchucpambo icnuc nacnenaid
mauemepac caondash. Adshumbic aton
matses chuiquid dapan sananacimboen
sananuc abiucshun cueste sanamepac
caondash. Adshumbic aton matses
chuiquid dapa ismiacimboen
mamēshunquin: —Is. Isadaidbo
chuiquid dapambo neque —qeshun

danëshën sebudquin Esus ismepac caondash. ³⁰Adshumbic dacuishtucatanquin ambi cueste sanameboed bedshuntanquin aidëmbi matombudnepac caondash. ³¹Aden mamëshuntanquin ambi dasiuimboed chictanquin aton dashcutebidi dasiuinoapac caondash. Adoshon: —Ma unëshnuequin cuesten dectanec nidnu. Nid —quequin Esus buampac caondash.

Esus cuesten dectanaid
(*Mad. 15.21-32; Duc. 23.26-43;*
Uan 19. 17-27)

³²Buanquin Esus abi dectante cueste yuëmemebanquimbi dada nidaid Sidene caid yacnuësh choquid Simon cuëmëdquid Esusën yuëmiaid sondadon chiadtomebidampondash. ³³Adobidanec nidec macuësh dapa yacno matses mapi canitebimboec isadquid Codocota caid yacno chopondash.

³⁴Choshombien sondadon uba chinaid actequid paëmbo dauë nēcushaid Esus meneuidpondash. —Në. Ac —cac pictsäc tantanec: —Padi —quepondash aquenquio yec. ³⁵Adshobien cueste napotiaid bëboedën dectampondash. Dectanshumbic ambi chicshumboed Esusën dashcute bednuequin sondadobon abi cuëmëdquidtedi dada uabanshun tēchun sandoshon cadotanequin dada uatempi puduemiaid isbanquin Esusën dashcute bedbampondash. ³⁶Adash: —Esus unësho isnu —quec sondado tabadcuededpondash.

³⁷Adshumbic: —“Nadquid icsho cuidquin unësh uac,” quequin ma isquidon tantianu —qeshun cueste cuëshën naden dada uapaccondash. —Nëidquio Esus nec. Isadaidbo chuiquid dapambo nec —quequin dada uaid Esusën mapino dectampondash. ³⁸Ampequid daëd cuesten èquë

dectambudcuenquin dectantanquin nënantanquio Esus dectampondash.

³⁹Adshobien podqued cuëmankuio Esus diadsho isbidanequin chieshënquin chuipondash. ⁴⁰—“Nuquin Papa tabadte shubu uashunaid chic-chictanquin daëdec ushquin nacnenquin nainendambi,” quiondaid yec bud. Nuquin Papan madombo yec unëshenquio yec auëshquiobi bud —cabidanepondash. ⁴¹Adecbidi chuiquid dapabo yec Moisesën dada uampid chuibanquido yec tsusiobo yec quequido Esus icsamboen mamëshshunec nadpondash. ⁴²—Utsibo ismenuembien comapenen tantiaquin matses bédamechitosh. Adembidi comapenen tantiaquin nacnenash budsho isnuqui. “Isadaidbo matses chuiquid dapambo nebi,” quequid neque. Ma budnu. Dectamboedi abibi budsho isash: “Nuquin Papan chomiaid yec Nuquin Papan Madombo nec,” quetsiabi. ⁴³“Nuquin Papa tantiaquid yec Nuquin Papan madombo nebi,” quequid icsho: “Ai, con madombo nec,” quequin ma Nuquin Papan budmenu. Unëshenquio icsho isnu —quepondash tsusiobo. ⁴⁴Adnubien abëdta cuesten dectamboedon ampequidontsen Esus mamëshshumpondash.

Esus unëshaid
(*Mad. 15.33-41; Duc. 23.44-49;*
Uan 19.28-30)

⁴⁵Adnubien ushë cuembo icnuc inchëshbocpadquieic inchëshpondash. Ushë cuembo icnuc inchëshstanec ushë budambi ushëmbo yanoapondash. ⁴⁶Ushëmbo yanubien Esus comapenec cuëdec nadpondash. —Eloi, Eloi, lama sabactani —quec con onqueten cuëdpondash. —¿Atotsieshun ëbi bédamboen isenquio yano, Papa Edoen? —quec adondash.

⁴⁷Adec cuëdsho tantiash isquido nadpondash. —Edias yampid cuënhitequien nec —quiampondash.

⁴⁸Adnubien Esus isec tabadquid abentsëc titinquianec nidshun shapu-shapupactsëcquid bedtampondash. Bedtanshumbic actequid mucacquid anidtsëcquidën shapu-shapupactsëcquid punshun cueste dëdectanshun abuc sananec:

—Chishmenu —queuidpondash.

⁴⁹Adnubien abi isquido: —Padi. Nuquin tsusedpa Edias yampid choshon budmesho isnu —quepondash.

⁵⁰Adnubien padpidec buëdanquieic cuëdtanec Esus unëspondash. ⁵¹Esus unësnuibi Nuquin Papa tabadte shubu uashunaid yacnuësh: —“Quëñë uquëducquidën Nuquin Papa tabadtembo nec,” caidën utsi puduednushë —qeshun dashcute ënapen icquid dectanaid abucuësh canchedbudcuenac caondash abitiombi. Nuquin Papan ambi bëdamboen iste tantiamenuen nanëdash. Adnubien nidaid uëdëquequidën cuënote dapa dadpen cuëshëdbudnepac caondash.

⁵²Adec unësaid nauedaid shëcuë bëtashte cuënote dapambo cuëshëdnubien Nuquin Papa tantiaquido ënden unësaido abentse-abentsec uincuenanec chopac caondash. ⁵³Esus uincuenan adec uincuenaidon shubu dadpen icquid Edusaden caid yacno nidshun matses dadpen ismepac caondash.

⁵⁴Nidaid uëdëquenec dacuëdampambo icsho isashien: —Esus unëso isnu —quiash tabadquido sondado chedo abi chuiquidbëdi dacuëdtanec: —Ma Nuquin Papan Madombobi nepayoc —quepac caondash.

⁵⁵Adnubien chidobo Cadidia yacnuësh Esusbëd choquin abi codocashumboedo

Esus unëso isnuec ancuenashun isec tabadpac caondash. ⁵⁶Nëidted icpac caondash. Nëidic Madia Mactada yacnuësh choquid. Nëidic Madia utsi Acobon tita. Aid Ose cuëmëdquidën titabidi niosh. Nëidic Sebedeyon chido Uanën tita. Aid Acobo cuëmëdquidën titabidi niosh. Aidedi uanoshon isbededec tabadpac caondash.

Esus chococaid

(*Mad. 15.42-47; Duc. 23.50-56; Uan 19.38-42*)

⁵⁷Adnubien inchëshbudtsëqui aton na dadpen dayun uaquid shubu dadpen icquid Adimateya caid yacnocquid Ose caid: —Esus tantiaquid nebi —quianec Esus bedec chopac caondash.

⁵⁸Choshombic chuiquid dapa Pidato caid chuituidpac caondash. —Esus bednuec chobi —cac aton yua chuiquin: —Ma buanu. Bedmetan —capac caondash Pidaton. ⁵⁹Aden bedtanshun Osen Esus dashcute bëchish nibëdquidënquo nuamboshë icnuc datanedonepac caondash.

⁶⁰Adotanquimbic nidaid cuënoteuidpambo icquid macuësh tsimpiduc shëcuë uaboed ambi: —Ëbi unësacsho nauedte nendac —caidëmbi Esus nauedpac caondash Osen. Adotanquimbic cuënote dapabidi bëtashte uaid bincumbëshun bëtimpac caondash. Adotanec nidpac caondash Ose. ⁶¹Adnubien Madia utsibëd Mactada yacnuësh choquid Osen Esus nauedsho isbosh ambobi tsadpac caondash.

Esus nauedaid isec sondado tabadaid

⁶²Isadaidbon obeca bacuë unës uacpadën Esus unës uamiash abentsec ushashi chonoattemaid ushëmbi Esus chieshënquido Pidato caid chiec nidpac caondash. Padiseyobobëdi nidshun chuiquid dapabon Pidato chuituidpac

caondash. ⁶³—Esus nadpadenec. “Unēsash daēdec ushah uincuenendabi,” quec muapadeneque. ⁶⁴Daēdec ushquin min sondado Esus nauedaid cudasmeta. Esusbēd icboedon chicshun buanushe. Aden buanash: “Uincuenaccosh,” quec muanushe. Unēsabi yec abi: “Nuquin Papan madombo nebi,” quec muaic icsambo iccosh. Adembi: “Uincuenaccosh,” quequin muauac icsamboshē ictsiashe. Min sondado: “Cudasta,” quequin chuita —capac caondash Esus chieshēnquidon. ⁶⁵Adoquien Pidaton: —Ai, con sondado buantan. Aden buanshun: “Unēsaid nauedaid cudasec databēdta,” cata —capac caondash. ⁶⁶Adoquien isadaidbo tsusiobon sondado buanshun cuēnote dapa bētashaid bucin bēbitaccapac caondash. —Bēbitaccaid isash: “Chuiquid dapan bēbitaccamiad nec. Cuidnushe. Esus chictiapimbo iquebi,” ma quenu —qeshun bucin bēbitaccapac caondash. Adoshon: —Beduanushe. Isquiec tabadta —capac caondash sondado chedo chuiquin.

Esus uincuenaid

(*Mad. 16.1-8; Duc. 24.1-12; Uan 20.1-10*)

28 ¹Esus unēsbon abentsec ushah abi chonoadtemaidēnsen abentsecbidi ushah dominco badiadnuc chidobo Esus nauedshun bētimboed isec tabadnuec padpidec choapac caondash. Mactada yacnuēsh choquid Madia utsibēd isec choapac caondash. ²Choash isec tabadnubi nidaid uēdēquiampac caondash. Adnubien Nuquin Papan abi yacnoshon uaid mayan bēda abucuēsh budtanquin cuēnote dapa bētashaid shēcbempac caondash. Adtanec cuēnoten tsadtopac caondash. ³Mayan bēda yec abu bed-bedquiacbimboec ushēmboshē bēchamuanquiec icpac caondash. Aton dashcute adquiobidi

bēchish nibēdquiec ushumboshē icpac caondash. ⁴Adec dacuēdampambo icsho isashien unēsaid cudasquido sondado dacuēdtanec uēdēquiec tantiadempambo yec padishbudnepac caondash abitedi.

⁵Adnubien mayan bēdan Madia chedo chuipac caondash. —Dacuēdenda. Cuesten decetanquin unēs uaboed Esus isnuec mibi tabadec. ⁶Nibēdec. Nidosh. Ambi chuibocpadequi uincuenash nidosh. Abi uebocno en isec cho —cac chidobon anisnubien padpidec onquequin chuiopac caondash. ⁷—Mimbi isboed Esusbēd icboedo chiec nid. Badedquio nidshun naden chuita. “Unēsboedi uincuenash Cadidia yacno abia nidshun mibi cainendac. Anoshon mimbi Esus isendac,” quequin chiec nid —caquien ⁸auēshquiobi chidobo dacuēdboedi cuishonquec titinquier nec nidaneapac caondash.

⁹Titinquier nec nidanesobien Esusēnquiotsen bēquedpac caondash. Adash: —Mibi isnuec nebi —quepac caondash. Adshobien chidobon: —Con Icbo nec —quequin ismenuen danēshēn sebudquin taē uidēn uapac caondash. ¹⁰Adoquien Esusēn: —Dacuēdenda. Con utsibo ēbēd icboedo chiec nid. “Cadidia yacno nidec nid. Anoshon mimbi Esus isendac,” quequin chiec nid —caquien chiec chopondash Madia.

Esus uincuenasho isun sondadon muauaid

¹¹Madia nidnubien Esus nauedaid isquido sondado abi chomeboedo isadaidbo chuiquido chiec chopac caondash. Mayan bēda chonoc Esus uincuenboed chuituidpac caondash.

¹²Adoquien isadaidbo chuiquidon aton chuiquid utsibobēd onqeshun aid sondado chedo chuipac caondash. —Mimbi chuiboed utsibo chienda. Mibi piucquid dadpen menenu —qeshun piucquid dadpenquio

menepac caondash. ¹³—Mimbi isboedquoio chienquoio icquin naden chuita. “Èbi chedo ushtoan abéd icboedon Esus ampequin beduanaccosh,” quequin utsibo chuita. ¹⁴Mibi caic: “Sondado ushtoac caosh,” quequin chiac mibi chuiquid dapa Pidaton chushcaquin mibi cuidnushe. Aid: “Chushcaquin cuidenda,” quequin chiendambi —qeshun ¹⁵piucquid meniac bedanec nidec isadaidbo chuiquidon chiacpadec muapac caondash sondado. Adembidi nëbi isadaidbo dadpeshun: “Esus ampiac,” quequin chuioaic.

Èbi chuibeneta, quequin Esusèn chiaid
(Mad. 16.14-18; Duc. 24.36-49;
Uan 20.19-23)

¹⁶Adnubini Esusbéd icboedo 11tedi yec Esusèn chiacnombo Cadidia yacno nidec macuësh dapa yacno nidanepondac. ¹⁷Macuësh dapa yacno nidquimbi Esus istuidpondambi. Istuidshumbic: —Con Icbo neque. Ismenu —qeshun danëshèn

sebudpondambi. Utsibombien: —¿Con Icbombobida nepeba? —capondash.

¹⁸Adsho isun Esusèn anoentsèqui choquin chuituidpondash. —Èbipadquid utsi nibèdec. Nuquin Papan uaido abitedi con na nec. Abitedishun Icbombo icquin abitedimbo namequidquoio nebique. Mibitsen namenu. ¹⁹Nidaid utsi-utsiec yacno nidshun èbi tantiaquido icmenuen matses abitedi èmbi chiaid chuibeneta. Adoac èbi tantiabensho utsibo ismequin acten mentobeneta. “Esus tantiabenshun Nuquin Papatsen tantiaquid nec. Nèidbéd Nuquin Papan Mayan tabadeque. Utsibo ismenu,” quetanquin aden acten mentobeneta. ²⁰Mimbi mentoaido chuiban. “Nuquin Icbon chiacpadec bédamboec tabadnuna,” quequin èmbi chuiboedtedi chuiban. Mimbi adosho isash mibéd iquendabi. Nidaid abitedi nibèdanabi icnuc mibi chedo nianenquoio iquendambi. Adembidi èbi tantiaquidotedi niantiapimbo iquebi —quepondash Esus ènquimbi chiec.

MADCOŠËN DADA UAID

Bëyuc choshon Uanën Esus chote chiaid
(*Mat. 3.1-12; Duc. 3.1-18; Uan 1.19-28*)

1 ¹Madcos nebi. Nuquin Papan tantiampicpadquieac aton madombo Esus abi yacno matses yuedquid chote tauamboen chiaid bëda chuinu. Tantia.

²Abi aton mado Esus chiec onquiaid Nuquin Papan Isayas dada uamiampid nad iquec:

“Naden naimbique. Tantia, mado. Mibi chotequid chuibanquidba chomendambi. Aidën chuibanac ambi tantiaid icsa ënshun mibi cainquidombo iquendac, mado.

³Shubu nibëdacnoshon comapenec onquequin mibi chotequid aidën chuibanendac naden:

Nuquin Icho choeque.
Aid tantianu quequin mibi icsaid ëmbanta quequin mibi bëyuc chuiquidën mibi chotequid chuibanendac, mado,”

quequin aton mado chiec onquiaid Nuquin Papan Isayas dada uamiampid nec.

⁴Aden chiampicpadquiequi Esus bëyuc chuitequid Uan chopondash. Shubu nibëdacno tabadquin comapenec onquequin chuibampondash. Mibi icsaid ënshun Nuquin Papan chiaid tantiaquin nabanta. Aden tantiaquidquio icsho mibi cuidenquio yec mibi icsaid Nuquin Papa bëpiscudendac quequin chuibampondash. Aden chuibanquimbi

ambi chiacpadomboen naquid acten mentobampondash Uanën. ⁵Aden Uanën chuibanubien matses dadpen tantianu quec choded-chodedpondash. Nidaid Udeya caid yacnoësh chopondash. Edusaden caid yacnoëshbidi cho-choapondash. Cho-choash tabadquin tantiashien, Icsapobi, quec abi icsaid chiec utsi-utsiec onquecuededpondash. Aden abi icsaid chuibanquidtedictsëqui Uanën acte Odan caidën mentobampondash. ⁶Ambo iquec Uan nidaidën capuquid cameyo bu daëdcaid dasiuidquid niondash. Nidaidën capuquid yua bitsi nacnenaid tsiuquid niondash. Shioshbimboecquid shuishun pequid niondash. Bacun chequid niondash. ⁷Aidëmbi naden chuibampondash: —Con tsyuecquid choendac. Aidi nadatiambocquin naquidquio nendac. Aidi bëdamboshëcquid icnuc ëbi icsaquid icsho ðatotsieshun aid choec quequin chuiquidquio Nuquin Papan icmioshi? quec tsadebi. ⁸Mibi acten mentoquid nebi; aidien abipadquiocquid aton Mayan menianquidquio nendac —quepondash Uan.

Esus acten mentoaid
(*Mat. 3.13-17; Duc. 3.21-22*)

⁹Adnubien ambi chian-chianaidquio Esus chopondash. Nidaid Cadidia caid shubu dadpen icquid Nasaded caid

yacnoësh chopondash. Adshobien Uanën Esus acten mentopondash. ¹⁰Aden acten mentoac Esus pudundonobi abu bëcadoacnoëshquio dëbimbimboec isadquid abipadquiocquid aton Mayan bede-bedequemboec Esusbëd icnuec budpondash. ¹¹Aden budmetanec ambi bëcadoacnoëshi: —Mibentsëcquiobi icsho ëmbi tantiaidquio mibi nec, mado. Ëmbi bëdamboen isaidquio mibi nec —quepondash aton Papa Esus chiec.

Esus Nuquin Papan chiaid niacmenuequin Satanasën tanaid

(Mat. 4.1-11; Duc. 4.1-13)

¹²Aden chuibon budmeboed Mayanën: —Shubu nibëdacno nid —cac nidash Esus tsadpondash abentsëcquiobi. ¹³Ambo tsadquimbi ushë abentsëc nidmec utsi choaid abutometsëcquieci tabadpondash. Ambo tabadshobi Nuquin Papan chiaid niacmenuequin tanu quianec mayan icsan icbo Satanas caid chopondash. Aden tanaqui niaquesambo yec tsadpondash. Adec tsadnubi nidpondash Satanas. Ambobi bëdi nibëdquid deon caid chedo icpondash. Ambo tsadshobi ambi uaido mayan bëdabon cho-choshon nashumbededpondash.

Cadidia yacnoshon tauamboen chuibanaid
(Mat. 4.12-17; Duc. 4.14-15)

¹⁴Ambo yuec tabadash Esus choambien isadaidpembo ancaquidën acten mentoanquid Uan bedmeshun quënën nauedmepondash. Uan nauedmiambi nidaid Cadidia caid yacno nidshun Nuquin Papa yacno shubu abentsëquën tabadte iquec quequin Esusën chuibampondash. ¹⁵—Nuquin Papan chiampidpadquid abi yacno yuedanquid nëmbobi iqueque. Mibi

icsaid ënshun ëmbi chiaid bëda tantiaata —quepondash Esus comapenec onquec.

Ëbëd iquec cho Esusën abia caido
(Mat. 4.18-22; Duc. 5.8-11)

¹⁶Aden chuibanashic chian Cadidia caid cuëman capupondash. Ambo capuquin Petedo Simombëdtan aton utsin Andedesën nëshaid acte nënebansho istuidpondash. Aid daëdi nuëcquid bedquid niondash. ¹⁷Aden nuëcquid bednuen nëshaid nënesho isec: —Nëshaidën nuëcquid bedquid icboedi nëbi Nuquin Papa yacno yuedanquid iquec quequin chuitequid mibi icmembique. Ëbëd iquec cho —quepondash Esus. ¹⁸Adsho tantiashe nëshaid abëd icquid menianec abi chuiquidbëd nidanepondash.

¹⁹Adanec udictsëc nidanequin Sebedeyon mado daëd Acobobëdta Uan Esusën istuidpondash. Aidon aton nëshaid nacenpondash cano antabëdquin. ²⁰Aden nacenesho isun Esusën ambi utsi chuibocpadomboen chiaquien aid daëdshuntsen aton papabëd aton yua cano antabëdsho nianec Esusbëd nidanepondash.

Mayan icsa Esusën dapuduemiaid
(Duc. 4.33-37)

²¹Adashic chian Cadidia caid yacnoësh nidequi shubu dadpen icquid Capednaun caid yacno Esusbëd icquido chopondash. Choash chonoadtemaid ushë icnuec ënapen capuenquio yec Nuquin Papan chiaid chuibante shubun puduedpondash. Puduedshun iccuededquido Nuquin Papan chiaid Esusën chuipondash. ²²Aden chuisho tantiashe: —Ambia tantiaquidën chiacpadomboen Esusën chuibanec. Utsimbien adomboen chienquio iccosh —quec onquec tabadcuededpondash. ²³Aden Esusën chuisho tantianubien

mayan icsa dapuduedaid
tsadacnoëshquiobi comapenec
onquiampondash: ²⁴—Esus Nasaded
yacnoësh choquid mibëd icquidpenquo
nebique. Nidec nid. ðChian
anëdënquiacono ëbitedi nidmenuecta
cho? Nuquin Papan Madombo icsaisa
nec quequin ëmbi tantiaid mibi nec
—quec mayan icsa dapuduedatsaid
onquepondash. ²⁵Adoaquin:
—Otaquoio tabad —quetanquin:
—Dapuduen —capondash Esusën.
²⁶Adoac comapenec abi dapuduedaid
uëdëquenec sidquianec
dapuduempondash.

²⁷Adsho isash: —ðAbimbodambi ispo?
ðMitsipadquidquo nepec? Ambi
tantiamiaid utsien nechitec. Chuiquidën
nacpadomboen naid nec. Dapuduen,
ambi cac ambi chiacpadomboen mayan
icsan naic —quec onquecuededpondash
Esusën naid chiec. ²⁸Adec
onquecuededash auëshquoio nidaneshun
ambi isboed, Esusën naid,
chuibampondash. Aden chuibansho
nidaid Cadidia caid
yacnocquidtedishuntsen
tantiabededpondash.

Simonën nachi bëdamiaid
(*Mat. 8.14-15; Duc. 4.38-39*)

²⁹Ambi chuisho tantiaboedo
nidanenubien Petedo Simon caidën
shubu yacno Esus Acobo Uan aidtedi
nidpondash. Aidën shubun icquidbidi
aton utsi Andedes icpondash. ³⁰Aidën
shubun icquidbidi Simonën nachi
icpondash. Ambo Simonën nachi
chumbo yec uepondash. Ambobi Esus
choshu isun utsin chuipondash chumbo
iquec quequin. ³¹Aden chiaquin
Simonën nachi yacnombo choshon
Esusën mëdinquin uëtsëndoac abi
chumbo yaid badedquoio bëdampondash.
Adec bëdanash nidtoshon codocashun

abi choquidtedi pemebampondash
Simonën nachin.

Esusën dadpen bëdamiaid
(*Mat. 8.16-17; Duc. 4.40-41*)

³²Adnubien inchëshbudtsëqui
Capednaun caid yacnocquidën
daicsaidtedi bë-bëpondash. Adembidi
mayan icsa dapuduedaidtedi
bë-bëpondash. ³³Bë-bëash Simonën
shubu shëcuë cuëmano puduedabi
tabadcuededpondash. ³⁴Adsho isun
daicsaidtedi Esusën
bëdamebampondash. Adembidi mayan
icsa dapuduedaid
dapuduemebampondash
oncamenquiocquin. Nuquin Papan
Madombo abi yacno yuedmianquid
abentsëcquiobi mibi nec quequin
chuinushe qeshun
oncamenquiocpondash.

**Shubu nibëdacno Nuquin Papabëd
onque Esus onquiaid**
(*Duc. 4.43-44*)

³⁵Adashic badiadte anoentsëqui
yanubi isucunanec puduanec shubu
nibëdacno Esus nidpondash. Nidec
tabadtuidshun Nuquin Papabëd
onquequin chuibampondash. ³⁶Esus
nidacshobi isucunshun Petedo
Simombëd icquidën nibënampondash.
³⁷Aden nibënquin istuidashi: —Mibi
isec cho-choquidtedishun mibi
nibëmbededec —quepondash Esus caic.
³⁸Adoaquin Esus: —Capucuenequin
utsibotsen Nuquin Papan shubu
abentsëquën yuedanquid iquec quequin
chuibenec chobique. Shubu utsi-utsiec
dadpen yacno nidnu. Nid
—quepondash. ³⁹Aden chuibidanec
nidaid Cadidia caid yacno capuequi
shubu dadpen yacno choshon Nuquin
Papan chiaid chuibante shubun
puduedshun Nuquin Papa yacno shubu

abentsëquën yuedanquid iquec quequin chuibampondash. Adembidi shubu dadpen icquid utsi-utsiec yacno choash puduedshun adomboembidi chuiopondash. Adembidi mayan icsa dapuduemeopondash.

Nami mishac tantiadenquiocquid bëdamiaid

(Mat. 8.2-4; Duc. 5.12-13)

⁴⁰Aden Esusën chuibanubien daushac bimboecquid nami mishac tantiadenquiocquid chopondash. Esus yacno choash: —Dada icsambo iquebique. Mibi adquid tantiaquid icquin ëbi bëdame —quequin Esus chiec comapenec cuëdpondash.

⁴¹Adec cuëdshobi nëid isash unësquio iquebi quequin ëquëducshun tantiaquin mishec Esus: —Mibi bëdamembique. Bëdambo icta ⁴²—quenubi daicsaid nibëdquio yec bëdampondash.

⁴³Aden bëdametanquin nidmepondash: —Nidec nid.

⁴⁴Nidquimbi, Esusën bëdamioshi quequin chuituidenda. Naden nata. Edusaden yacno nidash Nuquin Papa tabadte shubu uashunaid yacno nidec puduedta. Ambo puduedshun min dada bëdambo icquin anocquid, Nuquin Papa matses chiec onquianequid, isme. Adoshon dëbimbiyecquid daëd meneta Moisesën chiapadomboen ma anocquidën napanueshun. Aden meniac abentsëc cuesuneshun utsi cuesunenu quenquiocquid cuesuniaidën intac puntanequin intac mibi daseccashun dëbimbiyecquid utsi cuemeshun naden aidën mibi chuipec. Nuquin Papan mibi bëdamboen istiapimboeboedi nëbi bëdamboen mibi isendac. Aden chuiquin mibi bëdamiaid Nuquin Papan naid nec quequin tantiatsiash —quepondash Esus ambi bëdameboed chiec. ⁴⁵Adsho tantiaboshombi

niacbidanquin Esusën bëdamioshi quequin chuibenepondash. Aden chuibanac Esus yacno matses dadpen cho-chopondash. Adec cho-chosho isash shubu dadpen icquid yacno Esus tabadtiapimbo yec shubu nibëdacno capupondash. Adnubien Esus nibënac nidaid utsi-utsiec yacnoësh dadpen cho-chopondash.

Cuemo yec uishquiaid Esusën bëdamiaid
(Mat. 9.2-8; Duc. 5.18-26)

2 ¹Adashic Capednaun yacno nidoash shubun puduedpondash Esus.

Adnubien, Esus chosh qesho tantiash padpidec dadpen cho-chopondash.

²Dadpen cho-choash puduedash tsucus-tsucustsëcquio yec tabadnubi adecbidi shëcuë cuëmano tabadpondash.

Adec tabadsho isun Esusën Nuquin Papa yacno shubu abentsëquën tabadte iquec quequin chuibampondash. ³Adnubien cuemo yec uishquiaid bëec dada daëd-daëdquiec 4ted cho-chopondash.

⁴Cho-choshon matses tsucus-tsucustsëcquio yec tabadsho isun dectatoshon macano nacnenaid chic-chictanquin Esusën dayunquio uishquiaid imbudpondash. ⁵Aton dayunquio imbudsho isun Esusën bëdamec quequin abi imbudoedën tantiec quequin ambibi tantiapondash Esusën. Adashic: —Mado, mibi cuidenquio yec mibi icsaid bëpiscudobi —quepondash Esus.

⁶Adnubien isadaidbo tsusedpabon nadomboen nata quequin chiaid tantiamequidon ambobi tabadquin naden onquenquiocquid icsamboen tantiapondash. ⁷¿Atotsi quiash adec Esus onquepeque? Tantaranu. Nuquin Papa icsamboen chuiquidien aid nechitec. Nuquin Papauidi matses cuidenquio yec abi icsaid bëpiscudquid nec, quetsëcquiec tabadpondash.

⁸Aidon tantiaid tantiec nadpondash Esus: —¿Atotsieshun aden mibbi icsamboen tantiape? ⁹¿Mibi cuidenquo yec mibi icsaid bēpiscudobi quequin ěmbi chiaidquo bēdantequidpenda nedic? Adecbidi, ¿Mibi icsamboeboedi mibi bēdanoque. Nidtoson mibi imbudoed chiadtoson buanec nid quequin ěmbi chiaid bēdantequidpembidida neoadic? ¹⁰Ai, adquidquibidi nec. Mibi cuidenquo yec mibi icsaid bēpiscudobi queboed chidon tishac matses yanaid yequi chuiquidquo Esus nec quequin tantiesabo mibi nepec. Adquid icsho ěbi tantiamenuquin ¹¹cuembo yec uishquiaid naden chiembique Tantia. Mibi icsamboeboedi mibi bēdamiombique. Nidtoson mibi imbudoed chiadtoson buanec nid —capondash Esusēn. ¹²Adoquien nidtoson abi imbudoed chiadtoanquin buampondash. Aden buansho isash: —Nideque. Is. Adomboen nasho isambocondambi —quetsēcquieq onquiash Nuquin Papan naid nec quec cuēdēncuededpondash.

Ěbēd iquec cho Esusēn Debi caid
(*Mat. 9.9-13; Duc. 5.27-32*)

¹³Adashic padpidec chian Cadidia caid cuēmāno nidoapondash Esus. Ambobi tabadnubien aidēn chiaid tantianuec matses dadpen cho-choapondash. Cho-choasho isun Nuquin Papan chiaid chuibanopondash Esusēn. ¹⁴Aden chuibanec nidquimbi Debi, Adpeon madombo, tsadsho istuidpondash. Aidi Mateyobidi cuēnondash. Nidaid utsi yacno aton na utsibon buan-buansho isun piucquid bedshunquid Debi nepondash. Adembidi nidaid utsi yacnoshon aton na bē-bēsho isun piucquid bedshunoquid Debi nepondash. Isadaidpembro ancaquidēn,

Con matsespembon piucquid bedshunta, cac bedshunoquid Debi nepondash. Adshobien: —Ěbēd iquec cho —Esusēn cac: —Ai, mibēd nidnu. Nid —quianec badedi Esus tsibananec Debi nidpondash.

¹⁵Adshumbic Debin shubuno nidshun Esusbēd icquidon pepondash. Ashunquibidi aton na buansho isun piucquid bedshunquid Debipadquidēn utsin-utsinquien pepondash. Ashunquibidi isadaidbo tsusedpabon nadomboen nata quequin chiaid naisan utsin-utsinquien pepondash. Debin shubuno Esus tsibanec choquid dadpen icpondash. ¹⁶Aden adquidbēdtan Esusēn pesho isun isadaidbon nadomboen nata quequin chiaid tantiamequid padiseyobo caid: —¿Atotsieshun piucquid bedshunquidbēdtambi isadaidbon nadomboen nata quequin chiaid naisabēdtambi mibi chuiquidēn pepec? Tantianu. Ěbi chui —quepondash padiseyobo Esusbēd icquido chieq.

¹⁷Adsho tantiashien Esus: —¿Dada bēdambocquidta dauēchoquidēn bēdametequid nedic? Padenquo. Daicsaidien dauēchoquidēn bēdamec. Adquiecbidi, icsaisa nebi quequin ambibi tantiaquid icsho mibi icsaid ěnta. Aden ěnash ěbēd icquid mibi iquendac quequin chiesā nebi. Icsaquid nebi queshun mibi icsaid ěnta. Aden ěnash, ěbēd icquid mibi iquendac quequin chuiquid nebi —quepondash Esus.

¿Atotsi quiaq mibēd icquid buna mēmunesa nec? quiaid
(*Mat. 9.14-17; Duc. 5.33-39*)

¹⁸Adnubien abi chuiquid quēnēn nauedan aid tantiec unēsquiocquin Uan acten mentoanquidbēd icquidēn buna mēmunubi padiseyobobēd icquidon

unësaid tantiec unësquiocquin buna mēmunoapondash. Aden buna mēmunsho isanec nidequi Esus yacno nidash Esusbëd icquidon buna mēmunenquo icsho isash utsibo: —¿Atotsieshun Uambëd icquidon adembi didiseyobëd icquidon buna mēmunubi mibëd icquidon buna mēmunenquo icpec? Tantianu. Chui —quepondash.

^{19,20}Adoaquien Esus: —Aton chido bednun pambid meniac chidon codocacsho abi inquidën abëd icquido menec. Aden meniac isuidesa abëd icquido nec. Adecbidi ëbi abi chuiquid icnuc ëbëd icquidon buna mēmunenquiocquin isuidenquo iquec. Yuecash chido inquid nibëdanan abëd icboedo unësquiocquin buna mēmunquin isuidpec. Adecbidi ëbi nibëdanan abëd icboedo unësquio yampec.

²¹“Adembidi dashcute shënbëdta chucambocquid bëtuscaisa matses nec. Shënbëdta chucambocquid bëtuscatsaid amëec canchedoaic. Adecbidi abi icsaid ënesa tantiaid bëda pausudtiapimbo yec icsabudec. ²²Adembidi dadpen icquid chodo uashun sandoec. Adotanquimbic istuidshun chuca uain chodo uashun sandoaic. Chodo shënin icsa sandoshon nequid bëenquiocquin. Adecbidi Nuquin Papan tantiacpadec pausudnu queshun mibi icsaid ënacsho isun Nuquin Papan pausunendac —quepondash Esus.

Chonoadtemaid ushë icbo nebi quiaid
(*Mat. 12.1-8; Duc. 6.1-5*)

²³Adnubien chonoadtemaid ushë utsi icnuc ënapen capuenquiocquin tied matanquin adosbiecquid trico caid ëshë bedshun Esusbëd icquidon pepondash. ²⁴Adshobien: —Mibëd icquido is. Chonoadtemaid ushën chonoadeque. Abi chuiquid mibi iquec ¿atotsi quiash,

Padi. Chën, quenquo ique?
—quepondash padiseyobo Esus caic.

²⁵Adoaquien Esus: —¿Chuiquid Dabidbëd icquidon natia bunquin ambi petemaid pepondash quequin dada uapampid tantiamboda icconda? ²⁶Nad icpampic. Abëd icquidobëd yuec capuash Dabid comapenec bundopampic. Bundoash Nuquin Papa tabadte shubu uashunaid yacno choash puduedtemaid quënën puduedshun Nuquin Papa tantianuequin pan meniac sanaid bedshun ambi petemaid abëd icquidobëdtambi abi chuiquidën Dabidën pepampic. Puduedtemaid quënën puduedquid, Nuquin Papa matses chiec onquianequid, Abiatad abentsëqui icnubi aid quënën puduedshun bedshun Dabidën pepampic. Abiatadpadquidën peteuidtsëqui nec quenquiocquin abëd icquido tantiaquin pan bedshun aidobëdtambi pepampic chuiquid dapa Dabidën —quepondash Esus padiseyobo caic.

²⁷Aden chuishumbic naden padiseyobo Esusën chuiopondash: —Nabanash tiboedte matses bumpec quequin tantiaquin abitedi uabanquin ënashini con pabëdi tiboquepampic. Adashic yuecash, Chonoadtemaid ushë nec, quepadenebi con pabëdi. Aden chiequi matses tiboedte ushë aton icbo ictiapimbo iquec. ²⁸Aid ushë icbo icquin ëbëd icquidon bunquin pebededsho isash, Padi. Chonoadtemaid ushë neque. Aden penda, quenquioccobi —quepondash Esus abi chieshënquido padiseyobo chiec.

Mëuesadaid Esusën bëdamiaid
(*Mat. 12.9-14; Duc. 6.6-11*)

3 ¹Adashic padpidec Nuquin Papan chiaid chuibante shubun Esus puduedpondash. Ambo dada

mëuesadaid tsadnubi ²Esus chieshëquid padiseyobo dadpen tabadpondash. Adec tabadec, Nëbi chonoadtemaid ushë icnuda Esusën mëuesadaid bédamepeque. Nëid badiadën bédamesho isun bedmeshun quënën nauedmenu quetsëcquie padiseyobo tabadcuededpondash. ³Aden tantie padiseyobo tabadnubien mëuesadaid chuiquin Esusën: —Nënantanquio nidto —capondash.

⁴Adoac nënantanquio nidtoash mëuesadaid nidnubi iccuededquido chieci Esus onquepondash: —¿Chonoadtemaid ushën matses tantiaquindambi nape? ¿Adoenquiocquin matses icsa uapendambi ique? ¿Nëid ushëndambi matses bédamepe? ¿Bédamenquiocquindambi cuesunepe? —quepondash. Aden chieci Esus onquenubien onquenquio yec tabadpondash padiseyobo.

⁵Adoquien nëishtanquimbi abi chieshëquido bëisbanec Esus, Nuquin Papan chiaid tantiabanquin naisa yec pausudtiapimbo icquido nec, abibi quiashic, Unësquio iquebi, quec tsadpondash. Adec tsadquin mëuesadaid chuiquin Esusën: —Ëbi mëd —cac mëdequi bédampondash. ⁶Adosho isash puduenanec nidquin edodesbo padiseyobon badedquido istuidpondash. Aido istuidash: —Esus cuesunete mibi bunacpadquieci bunebi. ¿Mitsipadentsimbi cuesunemenuen bedmepeba? —quecuededpondash padiseyobo.

Esus yacno matses dadpen choaid

⁷Adnubien Esusbëd 12ted icquido chian Cadidia caid yacno nidoapondash. Adnubien nidaid Cadidia caid yacnoësh utsibo dadpen cho-choapondash.

⁸Adnubien Esusën nabansho isboedon

chiac nidaid Udeya caid yacnocquido dadpen cho-chonobi adecbidi Edusaden yacnocquido cho-chonobi adecbidi Idumeya yacnocquido cho-chonobi adecbidi acte Odan caid uquë cuëma utsiucquido cho-chonobi adecbidi shubu dadpen icquid Tido caid yacnocquido cho-chonobi adecbidi shubu dadpen icquid Sidon caid yacnocquido cho-chopondash. Esus yacno ambi nabanaid utsibon chuisho tantias cho-chopondash. ⁹Adec cho-choash tsucus-tsucustsëcquio yec tabadquin tsicatiac nënantanquio tsadacnoëshi catashnushe quiash Esus: —Cano bec cho —quiampondash abëd icquidquico caic. ¹⁰Dadpen bédamiosh cadoshe. Ëbitsen bédanu quequin ambibi tantiaquin Esus mishbededpondash. ¹¹Adembidi tantiaquin mishnuec mayan icsa dapuduedaid choquin Esus istuidequi uebudec comapenec sidquianec: —Nuquin Papan madombobi mibi nec —quec comapenec cuëdpondash. ¹²Adoquien: —Padi. Aden ëbi chienda —quepondash Esus.

Abëd 12ted icquid Esusën tantiamenu caid

(*Mat. 10.1-4; Duc. 6.12-16*)

¹³Adashic macuësh dapa yacno nidnushi abëd 12ted icquido chomeshun nadopondash: ¹⁴Ëmbi tantiacpadomboen mibitedi tantiamembi. Adquid icquin ëbëd tabadquin ëmbi chiacpadomboen mimbi tantiabenendac. Aden tantiabenacsho isun ëmbi chiacpadomboen chuimenuen mibitsen nidmembi. ¹⁵Adembidi mayan icsa dapuduedaid dapuduemequidbidi mibi icmembi quequin abëd icquido Esusën chuipondash. ¹⁶Ambi tantiamenu caid nëidtedi icpondash: Simon cashumbic Esusën Petedo capondash, ¹⁷utsibic

Sebedeyon mado daëd, Acobobëd Uan. Aid daëdi, abu cuëdtequidën mado nec quequin oncain Buanedquis quequin Esusën cuëmpondash. ¹⁸Utsibic Andedes, utsibic Uedipe, utsibic Badtodome, utsibic Mateyo cuënshumbic Debi cuëmpondash. Utsibic Tomas, utsibic Acobo, aidi Adpeon mado nepondash. Utsibic Tadeyo, utsibic Simon, aidi cananistabo caidbidi nepondash. ¹⁹Utsibic Udas Iscadiote, aidi abi chieshënquido Esus bedmenush Esusbëd capuquid nepondash. Aidedi Esusën tantiemequin chuiquin ismiaido niondash.

**Bedtsibu caidën dausunaid
Esus nec quiaid**

(Mat. 12.22-32; Duc. 11.14-12; 12.10)

²⁰Aidedi chianec nidequi Esusbëd icquido shubun puduedpondash. Shubun puduednubien matses dadpen cho-choapondash. Adshobien Esusën Nuquin Papan chiaid chuibanubi Esusbëd icquidon penquio icpondash. ²¹Aden penquiosho isanec nidshun Esus yuedquid yacno choshon chuituidpondash. Aden chuituidac anocquidtsen Esus bednuec chopondash. Icsabudashien nec quianec chopondash.

²²Adomboembidi Esus icsabudec quequin icsamboen chuiquid utsibo icpondash. Isadaidbo tsusedpabon nadomboen nata quequin chiaid tantiemequid chuiquid dapabo niondash. Aido Edusaden caid yacnoësh choquido niondash. Aido mayan icsa Esusën dapuduesho isboed Esus chieshënquid yec nadpondash: —Mayan icsan icbo Satanas cashumbic Bedtsibu caidën tantiamiaid Esus nec. Adquid icquin mayan icsa matses dapuduedaid dapuduemec —quepondash.

²³Adoaquien Esus: —Mimbi icsamboen tantieque. Mibi chuibanu.

Tantieci tabadta. ¿Mayan icsan icbo ambi dapuduedmiaid dapuduemequidta nepadic? Padenquio. ²⁴Adquiecbidi shubu icbo abëd icquido cuëshëdmesa nec. ²⁵Icbon abëd icquido cuëshëdmias shubu abentsëquën tabadtiapimbo iquendac. ²⁶Adembidi ambi dapuduedmiaid dapuduemias adquidën icbo ictiapimbo Satanas iquec. Icbo icnuequid abëd icquid puduemesa nec. ²⁷Dadpeshun icbo Satanas nec. Adquid icquin ambi matses dapuduedmiaid dëniacanquidënuidquio nadatiambocquin nabanquin cuemepec. Adquid icquin ëmbi nac mayan icsa dapuduedaid Satanasën yua icboedi icbombo tantieci bëdambo yanec ëbëd iquendac. ²⁸Abimbo chiembique. Tantiata. Matses cuidenquiocquin abi icsaid bëpiscudquin paucquid Nuquin Papa nendac. Adecbidi Nuquin Papa icsamboen chuiboedi, Icsaobi, Papa, qesho tantiasun Nuquin Papan aid pauquendac. ²⁹Utsien Nuquin Papan Mayan abipadquidën tantiamiac nasho isun Satanasën naid nec qesho pauquenquio iquendac. Adquid ënëdenquio yec icsaquid nendac —quepondash Esus ³⁰Satanasën tantiamiac mayan icsa dapudemequid Esus nec abi caquido chieci.

Esus yacno aton utsibo anibëd choaid
(Mat. 12.46-50; Duc. 8.19-21)

³¹Adashic Esus yacno aton utsibo anibëd chopondash. Aido choshon matses dadpen nuntan tabadsho istuidash: —Ëbi choaid con mado chuita —quepondash utsi chieci. ³²Adoac puduedshun Esus nënantan tsadsho isun: —Titabëd min utsibo choshon umanucshun mibi isnuen cainec —quequin chuituidpondash. ³³Adoaquien Esus: —Adquid utsi chuinu. Tantiata. ³⁴Në tabadquido ëbëd

icquido neque. Is —quepondash Esus abëd iccuededquido chiec. ³⁵Adashic: —Nuquin Papan chiacpadomboen nabanquid ëbëd icquid nec. Adquid buchi caindambi. Adquid chido chuchu caindambi. Adquid utsi tita caindambi —quepondash Esus.

Tantiamequin pete ëshë nësecain chiaid
(*Mat. 13.1-9, 18-23; Duc. 8.4-15*)

4 ¹Adashic padpidec chian cuëmano nidshun Esusën tantiamequin chuibanopondash. Aden chuibanuc cho-choquid dadpen icsho isash cano antabëdtopondash cho-choquid acte cuëmano tabadnubi. ²Adec tabadshobi, matses nadquio iquec quequin tantiaquin tiedën caniquid ëshë Esusën tantiamequin naden chuibampondash: ³—Tied icbo pete ëshë nësecanuec aton tied yacno nidquid. ⁴Adec nësecanuec nidshun pete ëshë nësecac maisec pudun-pudunaid uicchunën chequid. ⁵Adnubien nidaid cuënote dadpen samëdacno utsi-utsiec paëdash badedquio dëyucuidtsash ⁶tapunenquio iquec ushën shoedec. ⁷Adnubien pete ëshë utsi-utsiec nisanquid dëyucacno paëdash dëyucash canidouidsacsho nisanquidën bëtinac podo sinash bacuëtiapimbo iquec. ⁸Adnubien nidaid bëdambo yacno paëdaid dëyucaid caniaash dadpen pete ëshë icquid. Utsi-utsiec 30ted icnuc, utsi-utsiec 60ted icnuc, utsi-utsiec 100ted iquec —quepondash Esus.

⁹Aden chiash: —Ëmbi chuiboed tantianu quiaish bëdamboen tantiec papuedta —quepondash Esus.

¹⁰Aden chuibanash udictsëc Esusbëdi nidshun utsibo choenquiocsho isun databëdtuidquin abëd icquidon: —Mimbi chuibamboed tantianu. Ëbi chui —capondash Esus chuiquin.

¹¹Adoquien: —Nuquin Papan shubun tabadquid tantiamendambi utsiboembi,

Mibi nadquido iquec, quenquiocquin chuibanoc. ¹²Aden chiac:

“Nuquin Papan nabamboed isto-istoboedi ma padenquio tabadteneyoc.

Adembidi tantiado-tantiadoneboedi ma padenquio tabadteneyoc.

Aidon abimbo tantiaquin abi icsaid ëntsiandac. Aden abi icsaid ënsho isun cuidenquio yec Nuquin Papa abi icsaid bëpiscudtsiandac”

—quepondash Esus abëd icquido caic.

¹³Aden chiashic: —ÏMimbtsen ëmbi chuiboed tantienquioda ique? Aidi tantienquiocquin ïmitsipadentsi adomboembidi chuibanasho mimbi tantiapë? Ëmbi chuiboed nad iqueque. Tantia. Chuinu. ¹⁴Pete ëshë sequidbimboecquid Nuquin Papan chiaid chuibanquidquio nec. Ëshë ambi siaidbimboecquid Nuquin Papan chiaid nec. Abi paëdacno nidaidbimboecquid matsesën tantiate nec. ¹⁵Nidaidën paëdash pete ëshë dëyuctiapimbocsho uicchunën chiaidbimboec matses utsi-utsiec iquec. Adquid Nuquin Papan chiaid tantiaash papuednu qesho Satanasën bëpiscudmiac tantienquio yanec Nuquin Papa yacno puduedtiapimbo iquec. ^{16,17}Nidaid cuënote dadpen samëdacno pete ëshë paëdash badedquio dëyucuidtsash tapunenquio yec ushën shoedaidbimboec matses utsi-utsiec iquec. Adquid Nuquin Papan chiaid tantiauidash bëdambo iquec queboedi ïEsus tantiaquid nebi quecta icco? quequin utsibon mamënsnunac badedquio tantiesa nebi quendac. ^{18,19}Nisanquid dëyucacno pete ëshë paëdash dëyucash canidouidsacsho nisanquidën bëtinac podo sinash bacuëesabimboec matses utsi-utsiec iquec. Adquid Nuquin Papan chiaid tantiauidash abi bunaid, abi nënaid, abi

icsaid aitedi tantiaquin Nuquin Papan chiaid tantiesa yanshun bédamboec tabadaid ismesa yanec. Adquidën Nuquin Papan chiaid tantiaquid utsi icmetiapimbo iquec. ²⁰Ëshë utsibic nidaid bédambocquidën paëdash dëyucash caniaash dadpen bacuë icquidbimboec matses utsi-utsiec iquendac. Adquid Nuquin Papan chiaid tantiadonec bédamboec tabadquin utsi ismequid nec. Aden ismiac Nuquin Papan chiaid tantiaquid daëdpactsëc yanubi utsin ismiac Nuquin Papan chiaid tantiaquid dadpen yanubi utsin ismiac Nuquin Papan chiaid tantiaquid dadpenquioshë yanendac —quepondash Esus abëd icquido tantiamenuc.

**Tabote nënantan nanac
chënquiacbimboec ictiad quiaid**
(*Duc. 8.16-18*)

²¹Aden chuishumbic abëd icquido naden Esusën chuipondash: —¿Tabote icbon ambi dayun uaboed taboshon tsadte tédion nanshun isaidta nedic? Adembidi ¿Tabote matsun bëtashun isaidta neoadic? Padenquio. Nënantan tabote nanac chënquiacbimboec ismenu quec ictiad. ²²Adquiobidi abi yacno yuedanquid ambi dayun uapampidi nëbi Nuquin Papan dayun uainquiocquin ëbi chomeshun ismec. Adembidi con mado chuiban quenquiocboedëmbi nëbi ëbi ismec ma con mado chuibanu quequid con Pa nec. ²³Ambi chiaid tantianu qeshun tantiaquieç papuduedta —quepondash Esus.

²⁴Aden chiaash Esus: —Chiaid bëda tantiatequidquio iquec qeshun tantiaquieç papuduedquid icta. Aden chiaiduidi tantiec papuduedquid abipadquid bédambocquid ambia tantiaquidën Nuquin Papan mibi icmendac. ²⁵Adquid ambi tantiadoniaidquio iquendac. Aden

tantienquioçtsëcquidën tantiaid bëda uesadendac nibëdquieç —quepondash.

**Ambi siaboed icbon isenquiocnoc
bacuëc quiaid**

²⁶Adec onquequin abëd icquidquio chuishumbic cho-choquidtsen naden Esusën chuipondash: —Nuquin Papan shubu abentsëquën tabadec caidaidquio chuibanu. Tantiata. Nidaid bédan tiedën caniquid pete ëshë siash ²⁷tabadquin cainquidquio icbo nec. Dadpen ushquin ambi seboed isenquio yec icbo tabadnubi ²⁸ambi seboed dëyucash caniec tautanec bacuëc. ²⁹Ambi siaid isenquiocnoc canitanec bacuëacsho badedquio bedquid icbo nec. Adquieçbidi Nuquin Papan chiaid chuiban-chuibanubi papudedquid utsi-utsiec yanec chuibanquidën isenquiocnobi. Papuduedquioshon tantiabeneç. Adquid isash con shubun puduedquido neque. Bednu quependac Nuquin Papa —quepondash Esus.

Mostasa caid ëshë chiaid
(*Mat. 13.31-35; Duc. 13.18-19*)

³⁰⁻³²Adec onquequin chuibanashic Esus: —Nadquio Nuquin Papan shubun icquido iqueque. Chuinu. Tantiata. Mostasa caid pistsëc ëshëmpi ictsëcquid nësecaid dëyucash nuamboshë caniec cuidi-cuidipambo iquec shubu-shubupambo yec podoeç. Ambo uicchunën shubu uaic. Adomboembidi aton shubun abi tantiaquid dadpen dayun uaquid Nuquin Papa nec —quepondash.

³³Aden chuibanashumbic adomboembidi Esusën chuibampondash. Aden chuibanash, aitedquio tantiapeç abibi qeshumbic aden chiaid chuiquin ëmpondash Esusën. ³⁴Aden abited chuibanashumbic abëd icquiduidtsëqui bédamboen tantiamequin chuipondash.

Acte tëccoasquiaid ënëd cac ënëdaid*(Mat. 8.23-27; Duc. 8.22-25)*

³⁵Adashic abi ushëmbi inchëshbudtsëc cano antabëdtoanec Esus: —Chian uquë cuëma utsiuc nuquiuiddtsëqui nidnu. Nid —quiampondash abëd icquido caic.

³⁶Aden chiac chian cuëman tabadcuededquido niananec badedquio nidquin canon Esus buampondash. Abëd icquidon potenubien cano antabëdtoanquin utsin-utsinquier potepondash. ³⁷Aden potenubien cunquequid dapan acte tëccoasquequin cano acte uemiaidën mentoadtsempondash Esus tëotadec ushñubi. ³⁸Adec uec usho: —Cunquequid dapan acte tëccoascaidën nuqui mentoeque. Isucunta, icbo —quequin Esus timpondash.

³⁹Aden tinac uëtsëdtoshon Esusën: —Mibi comapenec cunqueque. Ënëd —cac badedquio ënëdpondash. Adembidi: —Mibi comapenec tëccoasqueque. Ënëd —cac badedquio ënëdoapondash acte.

⁴⁰Aden ënëdmetanec Esus: —¿Atotsi quiash ëbi tantienquio yec dacuëdcedede? Ëbi tantiesa mibi nepec —quepondash abëd icquido caic.

⁴¹Adec Esus cuënubi badedquio cunquequid dapa ënëdposh. Adecbidi acte tëccoasquequid ënëdoaposh. ¿Mitsipadquidën napeba? Ënëd cacpadequi ënëdposh —quec abibi onquecudedequi uëdëquianquiopondash abëd icquido.

Mayan icsa dadpen dapuduedaid bëdamiaid*(Mat. 8.28-34; Duc. 8.26-39)*

5 ¹Adshumbic acte tëccoasquec ënëdmebon nidquimbi cuëma utsiuc potiaash nidaid Cadada cashumbic Quedasa caid yacno choapondash.

²Ambobi choash pudundosho mayan icsa dapuduedaidën Esus bëquedpondash. Cuënote dapa macuësh dapaten icquid yacnoësh choquin bëquedpondash. ³Aidi unësaid chococate cuënote dapa shëcuë uaidën tabadquid icpac caondash. Aidi shocosh bucun mëdantebëdta taë taniaid icboedi nadatiambo yanshobi mëtanetiapimbo yampac caondash. ⁴Abi mëtaniaid shocosh bucu secuduatanquin tës-tëstenepac caondash. Adosho isac abi tanebocpadquid utsi nibëdpac caondash. ⁵Aidi inchëshën capucuenequi mëyanacimboec sidquecuenepac caondash. Adec capuequi cuënoten abibi dasiadcuenepac caondash. Adec siadcuenequi dastidquebudnepac caondash.

⁶Aidi abi yacno Esus canon chosho isanec titinquianec choash: —¿Tsiusio, ada cho? —quiashic: ⁷—¿Mibëd icquidtabi nedi? Mimbim namiaidpenquio nebi. Abia Yampidën madombo mibi icquin naden ëbi chuita. Mibi chian anëdënquiacno nësecainquio iquembi. Abimbo chiembi quequin ëbi chuita —quepondash mayan icsa dapuduedaid Esus chiec. ⁸Adec mayan icsa dapuduedaid abi onqueshobien Esusën: —Dapuduen —cashic: ⁹—¿Ttsutsi cuëmëdquid mibi ne? —quepondash Esus.

Adoquien: —Dadpenquioshë. Cuëte podotedi dapuduedondaid nebi —quepondash mayan icsa dapuduedaid abentsëc yacimboec onquec.

¹⁰Adashic: —Mibi nadatiambocquid cadoque. Ëbitedi chian anëdënquiacno nidmenquiocnuequin ñnëid nidaidën adabi tabadmetsia? —quepondash mayan icsatedi.

¹¹Adnubien macuësh potseshun chanco dadpenshun pec tabadpondash.

¹²Aden pec tabadsho isashien: —¿Ada mimbi ëbitedi chancho dapuduedmetsia? —quepondash mayan icsa Esus caic.

¹³Adoaquien: —Dada dapuduencuededash chancho dapuduedcuededta —Esusën cac dapuduencuededash acte dapa quiusudacnombo comapenec niquec pudun-pudunec mentoadbudnepondash chancho nibëdquiec.

¹⁴Adsho isash chancho pemequin isquido chiec nidanepondash. Adec nidquimbi shubu dadpen icquid uano-uanoec tabadquido chuituidac aidotsen isec cho-chopondash. ¹⁵Esus yacno cho-choshon mayan icsa dapuduedaid bédamiosh quequin chuituidac mayan icsa dapuduedaid icboed naden isbededpondash. Dashcute dasiuidesa icboedi dasiuidash tsadsho abimbo iquec quequin isbededpondash. Aidën tantienquicboedi tantiec tsadsho adembidi isbededoapondash. Adec tsadsho comapenen isbededequi nadatiambocquin naid nepec quetsëcquiec tabadcuededpondash. ¹⁶Adec tabadsho isun mayan icsa dapuduedaid bédamequin chancho dapuduedmesho isboedon cho-choquido tantiamenuen chuibampondash. ¹⁷Aden chuisho tantiasun cho-choboedon: —Nëmbo tabadenquio yec nidec nid. Mibëd tabadtiapimbo iquebique —capondash comapenen Esus chushcaquin.

¹⁸Adsho tantiasun cano yacno nidequi cano Esus antabëdtonobien mayan icsa dadpen dapuduemboed choash: —Mibëd icte bunebi. ¿Adabi buane? —quepondash. ¹⁹Adoaquien: —Padi. Min shubuno nidtan. Ambo nidshun mibi bédamequin mayan icsa dadpen dapuduemeboed Nuquin Papa tantiaquin chuiban. Nuquin Papan ëbi

ad icsho unësquiocquin dapuduemiacc quequin chuiban —quepondash Esus.

²⁰Aden Esusën chiaquien nidpondash. Nidequi shubu dadpen icquid yacno-yacnomboec nidanec nidaid Decapodis caid yacno choshon Esusën naid chuiban-chuibampondash. Aden chuiban-chuibansho tantiaquidtedi, Adopenshenda Esusën bédamiasun, quec abibi onquec tabadcuededpondash.

Nua intac budaid bédameshun champi unësaid bédamiaid

(*Mat. 9.18-26; Duc. 8.40-56*)

²¹Adshumbic canon Esusbëd icquidon padpiden abi chobocmibidi chian poteoapondash. Adec chosho isash matses dadpen chian cuëmano padpidec cho-choashun mananuc Esus pudundotsëcshobi badedquio tsucus-tsucustsëcquio yec datsidadpondash. ²²Adnubien Nuquin Papan chiaid chuibante shubun tabadquido isquid, Aido cuëmëdquid, chopondash. Adec choquimbi Esus istuidash mibi bédambocquid nec quequin ismenuec Esus tauebudshun: ²³—Con champi unëseque. Aid mishquin bédamec cho —cac ²⁴Aidobëdi Esus nidpondash.

Adec nidshobi matses dadpenshun tsibanampondash. Tsucus-tsucustsëcquio yec nidquin Esus tsibanampondash.

²⁵Esus tsibanquidquido chido utsi icpondash. Aid chido seta 12ted matamec intac budash bédanenquiocquid icpac caondash.

²⁶Dauë meniaqui bédanenquio icpac caondash. Dauëchoquid utsi-utsien piucquid menequin dauë bedshun chequi bédanenquio yec intac nuambo yampac caondash aton piucquid naimëdnubi. ²⁷Adec intac icnubi capuquin Esusën nabanaid chuisho tantianec nidquimbi matses dadpenshun

tsibananubi aidënsen tsibanampondash. Aden matses dadpenshun tsibananubi ismenquiocquin cachoc choshon Esusën dashcute mishpac caondash. ²⁸Aden aton dashcuteuidtsëqui mishec bédampatsiash icmane qeshun mishtsequi bédampac caondash. ²⁹Intac bédanenquiocquid Esus mishec bédampac caondash. Ëmbi tantiacpadquiequi bédanobi quequin ambibi tantiapondash.

³⁰Adec chido bédanubien ëmbi nadatiambocquin naoc quequin tantiec amibidi bidiadquin isec Esus: —¿Tsuntsimbini mishposh? —quepondash.

³¹Aden chuisho tantiashun abëd icquidënquo: —Tscus-tscustsëcquo matses dadpen iquec, ¿tsuntsimbini mishosh, quecta ique? —capondash.

³²Adec abëd icquid cuëdnubi onquenquiocquin, ¿Midaquidënquo mishoshibique? Isnu, abibi quequin matses utsi-utsien bëispondash Esusën.

³³Aden bëisbanubi, ëmbi mishoc quenquo yec bédamboed uëdëquec choequi mibi nadatiambocquin naquid nec quequin tantiequi Esusën taëno uebudshun abi mishec bédanaid chuibampondash. ³⁴Adoquien Esusën: —Champi, mimi tantiacpadquiequi mibi bédanoc. Dada icsambo icboedi nëbi dada bédambo mibi iqueque. Bédambo yec nid —capondash chido chuiquin.

³⁵Aden nidmenubien Aidon shubun icquid cho-choshon: —Min champi unësoshe. Tsusio chomenda —capondash Aido chuiquin.

³⁶Adnubien Aido Nuquin Papan chiaid chuibante shubun tabadquido isquid caic: —Dacuëdenquiocquin ëbi tantiata —quepondash Esus.

³⁷Aden Aido chuishun Esusën: —Cho-choenda —capondash abi

tsibanuequido chuiquin. Aden chianec Petedobëdta Acobo Uan, Acobon utsimbo aitedi buanec Esus nidpondash. ³⁸Adec nidequi Aidon shubuno choquin comapenec shubicuededsho tantiatuidpondash. ³⁹Aden tantiequi puduedash Esus: —¿Atotsi quec comapenec shubicuedede? Champi unësenquo yec ushac bimboec uec nec —quepondash.

⁴⁰Adshobien tantiesa icquin mamëshumbededpondash. Adoquien aitedi puduemiasch champin tita aton papa chedo abëd icquidbëd champi yacno Esus puduedpondash. ⁴¹Ambo choshon mëdante mëdintanquin Esusën: —Talita, cumi —capondash. Aton onqueten, Champi, isucunash nidto, quequin adopondash. ⁴²Adoac badedquio isucunash nidtoash capupondash. Champi seta 12ted icquid niondash. Aidi bédansho isun abitedishun, Adopenshenda iquec quequin isbededpondash. ⁴³Aden champi bédameshun Esusën: —Ëmbi naboed utsi chienda. Abimbo caimbi. Abentsëcquibochienda —capondash. Aden chuitanequi: —Champi peme —quepondash Esus.

Abi icnëdacnoshon Esus chieshënquido
(*Mat. 13.53-58*)

6 ¹Auëshquo puđuanec nidequi abi icnëdacno Nasaded caid yacno Esus choapondash. Abëdi abëd icquido chopondash. ²Ambo tabadashic chonoadtemaid ushën Nuquin Papan chiaid chuibante shubun puduedshun Nuquin Papan chiaid chuibanquin tauapondash Esusën. Aden chuibansho tantienquiocquid abentsëc: —¿Mitsishun chuibansho tantiashun adomboen Esusën chuibampec? —quepondash.

Adnubien utsi: —¿Mitsicquidën ismiac Esusën nadatiambocquin nabampec? —queoapondash.

³Adnubien utsi: —Nëmbocquid, cuëte nacnenquid, Osen mado nec —queoapondash.

Adnubien utsi: —Ani Madia nec. Aton utsibo nëidtedi nëmbo tabadquid nec. Nëidic Acobo, utsibic Ose, utsibic Udas, utsibic Simon. Nëmbobidi aton chibi chedo tabadoaic —quetsëcquieci tabadec onqueuededec chieshcuededpondash.

⁴Aden chieshënaqui Esus nadpondash: —Utsi yacno nidshun Nuquin Papan chiaid chuibansho tantiaquid dadpen icnubi abi yacno chuibansho chieshënquid aton matses iquendac. Aton shubun icquido adecbidi iquendac —quepondash Nasaded yacnocquido chieci. ⁵Aido abi chieshënquid icsho isun nadatiambocquin nabantiapimbo icpondash. Èbi bédamepec quequin tantiaquidquido daëdpactsëc icsho mishquin bédamepondash. ⁶¿Atotsi quiash èmbi chiaid tantiatipimbo icpec? Adembidi nadatiambocquin nasho istiapimbo icpec quepondash Esus abibi onquec.

Abëd icquido Esusën nidmiaid

(Mat. 10.5-42; Duc. 9.1-6)

Adashic auëshquiobi puduanec nidaniash shubu daëdpactsëc yacno puduedcuenequin Nuquin Papan chiaid Esusën chuibenepondash. ⁷Adec cuenadquin chuibanequi abëd icquido caic: —Cho —quetanec tabadtuidpondash. Adec tabadtuidash Esus: —Nëbi mibi daëdshun-daëdshunquien chuibanec nid. Chuibanquimbi mayan icsa dapuduedaid dapudemeta. ⁸Nidquin dadpen mitsana sauedshun buanenda. ⁹Tapucudte sandadia caiduidtsëqui tapucudash nidaneta. Adecbidi utsi bedenquio yec mibi dasiuidaiduidtsëqui dasiuidec nidaneta. ¹⁰Shubu dadpen yacno nidash mibi yuedaid shubun

puduedash ambouidi tabadquin chuibanta. Auëshquio puduanec nidequi shubu dadpen yacnobidi nidshun adquiecbidi tabadquin chuibanoata. Adenuidi naquin chuibanta. ¹¹Mibi yuedquid nibëdsho isash nidaneta. Auëshquio nidash shubu ënëdacno choash, Nëmbo icquido tantiate icsachoquid yec abibi cuidadtequido nec, Papa. Adquid icsho isun abi capuaid nidaid pututedi tasequequin Nuquin Papan chiacpadomboen ismeta —capondash Esusën abëd icquido chuiquin.

¹²Aden Esusën chiaquien nidanepondash. Adec nidshumbic, mibi icsaid ënshun padpiden tantianu quenquiocquin Nuquin Papan chiacpadomboen nabanta quequin chuibampondash Esusën nidmiaidon. ¹³Adembidi mayan icsa dapuduedaid dadpen dapudemepondash aidëmbidi. Adembidi nënquid dadpen daicsaid chedo cuëte bacuë bëchichoquid ënë dachinquin bédameoapondash Esusën nidmiaidon.

Uan acten mentoanquid mapi butiaid

(Mat. 14.1-12; Duc. 9.7-9)

¹⁴Adnubien, Chuibanquimbi Esusën nadatiambocquin nabanosh, quequin isboedon ancanquid Edodes chuipondash. Aden chuiban-chuibanac dadpenshun Esusën nabanaid tantiapondash. Aden tantiash: —Uan acten mentoanondaid mapi butemeboed uincuemash icnui. Adec uincuenshun nadatiambocquin nabanec nepanui —quecuededpondash tantiaquido.

¹⁵Adnubien utsibo: —Ediasien nechitec. Nuquin Papan chiampicpadquieci choashien nec —quecuededpondash.

Adnubien utsibo: —Nuquin Papan chiaid chuiampidien Esus yanchitash —quecuededpondash.

¹⁶Adnubien Edodes: —Ëmbi mapi butemiondaid, Uan pado, uincuempash icnui —quepac caondash.

¹⁷Ënden aidëmbi Uan bedmeshun tanemeshun quënën nauedmepac caondash. Aidëmbi aton utsin chido, Edodias caid, bedacsho isash: ¹⁸—Min utsin chido mimbi bedaid natemaid niosh —qeshun Nuquin Papan Moises dada uamepampicpaden Uanën Edodes chuipac caondash. Adoac, Uanën chuisho dadpeshun tantianushe qeshun Uan bedmeshun quënën nauedmepac caondash Edodesën.

¹⁹Adoaquien Uan Edodiasën chieshënquin: —Uan cuesunemetiadquidi mibi nec —quepac caondash aton bënë Edodes caic. ²⁰Uan bédambocquid Nuquin Papan chomiaidbidi nec qeshun Edodesën Uan cuesunemetiapimbo iquec cudaspac caondash con chidon cuesunemenushe quiash. Aden tantiaquin Edodesën abi tsadacno Uan chuibamenuen chomedenepac caondash. Uanën chuibansho tantiash: ¿Atotsimbi nëid napeba? Ambi chuibanaid bédambo iquec. Aidën chuisho tantiash bédambo iquebi, abibi qeshumbic Edodesën chomedednepac caondash chuisho tantianuen.

²¹Adnubien aton chido bunacpadomboen Uan cuesunemete ushë chonobi naden napac caondash: Aton bënë abi tishte ushë tantiaquin abipadquid dadpen pemenuen chomepac caondash. Adembidi sondado tsusio dadpembidi chomeoapac caondash Edodesën. Cadidia yacnoequido chuiquid dapabobidi chomeoapac caondash. ²²Aden aidtedi cho-chomiash tabadnubien aton chidon champi puduedpac caondash. Puduedacsho: —Baidata —cac baidapac caondash. Adsho isash: —Bédamboen

mimbi naoc —quecuededpac caondash Edodesën chomiaido champi caic.

Adec onquesho tantiashien Edodes aton chidon champi caic: —Mibi bunaid mibi menenu. Ëbi chui. ²³Abimbo caimbi. Mibi bunaid ëbi chuita. Mitsanatedi bunebi ëbi casho tantiashun dadpen mibi menembi —quepondash.

²⁴Aden Edodesën chuisho tantiash: —¿Atotsibi bumpeba? —quetanec aton tita yacno puduedshun: —“Mibi bunaid mibi menenu. Ëbi chui,” Edodesën caoshi. ¿Atotsimbi chuipe, tita? —quepac caondash ani chiec.

Adsho tantiashun anin: —Uanën mapi bunebi quequin chuita —capac caondash aton champi chuiquin.

²⁵Aden chiaquien badedquio Edodes yacno titinquec choec puduedshun champin: —Nëbimbobi Uan acten mentoanquidën mapi maspanën nandoshon ëbi mene —capac caondash anin chuibocpadomboen chuituidquin.

²⁶Adsho tantiash Uan tantiec unësquio icpac caondash Edodes. Adec unësquiocquin ambi champi chiacpadomboen natiapimbo iquec ëmbi chomiaido quenushe qeshun adoembi abibi qeshun: ²⁷—Uanën mapi bec cho —capac caondash Edodesën ambi cuesuneta caid chuiquin. Aden chiac Uan quënën nauedacno nidshun mapi butanquin ²⁸maspanën nandoshon bëshun champi meniac bedshun champin aton tita menetuidpac caondash. ²⁹Adnubien, Uan mapi butiac, qesho tantiash Uambëd icquido nidshun Uanën dada bedshun buanshun chococapac caondash.

Dada 5000ted Esusën pemiaid

(Mat. 14.13-21; Duc. 9.10-17; Uan 6.1-14)

³⁰Adambic Esusbëd icquido ambi nidmeboedo Esus yacno cho-choshon ambi nabamboedbëdtabi ambi

chuibamboed chuibampondash. ³¹Aden chuibanash tabadnubi matses dadpen cho-chonobi utsi dadpen nidanepondash. Adec cho-chonobi penquio iccuededpondash Esusbëd icquidon. Adnubien Esus: —Matses nibëdacno tabadec nidnu. Nid —quepondash abëd icquido caic.

³²Aden chiashic cano antabëdtoanec matses nibëdacno nidpondash aidtedtsëqui. ³³Adec nidsho isash matses dadpen abi nidte yacno tantiec: —U nidanec —quiash titinque choec abia cho-chopondash. Abia titinquequid cuensho isash utsi-utsiec dadpen titinquec cho-choapondash. ³⁴Adec aidtedi abia cho-choambien Esusbëd icquido choapondash. Pudundoquimbi matses dadpeshun abi cainec tabadsho isashien Esus, Abi tantiemequin Nuquin Papan chiaid chuiquid nibëdacbimboecnuc matses cho-choec quequin tantiec unësquo iquebi qeshun tauain chuibampondash Esusën. Yuen chuibampondash.

³⁵Yuen Esusën chuibanubi ushë budpondash. Ushë budsho isun abëd icquidon: —Icbo, ushë budaque. Nëmbo tiedën caniquid nibëdec; adecbidi yuedanquid nibëdec. Matses nidme. ³⁶Nidmiac shubu yacno nidshun piucquid menequin ma aton pete bedpanuna penun —capondash Esus chuiquin.

³⁷Adoaquien Esusën: —Mimbibi nëidtedi pemeban —capondash. Adsho tantiashien: —¿Adambi nidshun piucquid menequin panëmpi bedpe? Ma matses dadpenquio yoc —quepondash abëd icquido Esus caic.

³⁸Adoaquien: —¿Panëmpi penun bëaid iccuededquidon na tedtsi iqueque? Ista —capondash Esusën.

Aden chiac ashunquiobi matsesën bëaid isbanash abëd icquido: —Panëmpi

sincoted icnubi nuëcquid doted iquec —quepondash.

³⁹Aden bësho isun: —Uasinën tabadbud mibëd icquid 50ted icnuc, utsibëd icquid 100ted icnuc quec tabadbud —capondash Esusën iccuededquido chuiquin. ⁴⁰Adoac ambi chiacted-tedqueic tabadbudpondash. ⁴¹Adec tabadbudsho isun panëmpibëdta nuëcquid bedshun sananquin abuc isec: —Mimbi meniaid nec Papa. Nëbi mimbi nadatiambocquin naid ismembu —qeshun cuësh-cuëshun: —Meneban —Esusën cac abëd icquidon menebampondash. ⁴²Menebanac piash: —Padi. Piombi —quecuededpondash pequido. ⁴³Aden piambien abëd icquidon napi uaid bedbampondash. Napi uaid sandobanaid tsitsan 12ted icpondash. ⁴⁴Peboedo dada caniaid tambanac 5000ted icpondash. Aton chidon aton bacuëbòbëdtambi pepondash. Aido tambanenquiocquin dadatedictsëqui tambampondash 5000ted iquec quequin.

Acte bëntse Esus choaid

(*Mat. 14.22-27, 34-36; Uan 6.16-21*)

⁴⁵Aden iccuededquido pemiashic: —Cano antabëdtoanec mibia shubu dadpen icquid Betsaida caid yacno potec nid. Mibi nidnubi matsestedi nidmembu —quepondash Esus abëd icquido caic. ⁴⁶Adoac canon potenubi matsestedi nidmianec matses nibëdacno macuësh yacno Nuquin Papa chuinuic Esus nidpondash. ⁴⁷Adnubien inçhëshbudtsëqui abëd icquido acte nënantanquio canon noadpondash. Ambobi noadnubi Esus abentsëqui mananuc tsadpondash. ⁴⁸Ashunquio Esusën isaquien abëd icquido bëdiactsëcquido nidquimbi comapenen cano uncapondash cunquequid dapan bëdëd-bëdëdnubi. Adnubien cachina

cuëdanabi badiadtiapimbocon acte bëntse choquin abëd icquido Esusën ismetuidpondash. ⁴⁹Datantsensho isash, Mayambien nechitec, quequin ambibi tantiec sidqueuededec ⁵⁰dacuëdcuededpondash.

Adsho isumbien: —Ëbibi nebique. Dacuëdenquo yec tabadta —capondash Esusën. ⁵¹Aden chuitanec cano antsadtonobi comapenec cunqueboedi ënëdpondash. Aid ënëdsho isash: —Adquidshenda nepec —quepondash abëd icquido. ⁵²Panëmpi daëdpectsëc ictsëcquid matses dadpen menebamboedën naid nec quequin tantienquiocpondash. Adembidi Esus acte bëntse capusho isun, Nadatiamboquin naquidën naidbidi nec, quequin tantienquo icoapondash pamunacbimboecquin.

⁵³Ashunquo chian potiashic nidaid Quenesaded caid yacno choshon cano nëshpondash. ⁵⁴Aden nëshash mananuc pudundosh isec anocquido, Aidi bëdambianquid nec, quequin ambibi tantiaquimbi ⁵⁵daicsaid aton ueten nandoshon Esus yacno bë-bëpondash. ⁵⁶Adecbidi shubu dadpen yacno-yacnomboec Esus puduedcuenesho isun adembidi anocquidon, Bëdamequid nec, queshun daicsaido bë-bëpondash. Adoac —Min dashcute ëbi mishme —capondash bë-bëaidon. Aden ambi tantiacpaden Esusën dashcute mishash bëdancuededpondash.

Nuquin Papan paucaid

(Mat. 15.1-20)

7 ¹Adashien Edusaden caid yacnoësh padiseyobobëdi isadaidbo tsusedpabon chiaid tantiaquin chuiquido Esus yacno choshon, ²Ëmbi mishboed mishtemaid ictsish, quesa iquec tsusedpabon chuinëdacpadquiec

mëpanudabi Esusbëd icquidon pesho ispondash. ³Padiseyobo isadaidbobidi yec tsusedpabon chuinëdacpadquiec penush mëpanudanequid nec. ⁴Tiedën caniquid ambi piucquid menequin bedacnoësh choec adecbidi penush tsusedpabon chuinëdacpadquiec mëpanudanequido isadaidbo nec. Isadaidbo tsusedpabon naden nata quequin ambibi chuinëdaid utsi-utsiec dadpen iquec. Ambi chuinëdacpadomboen dëshotetsen cachonouidi dapanquidquibidi nec. Adembidi matsu nacnenaid cachonouidi dapanoquidquibidi nec. Shocosh matsu cachonouidi dapanoquidquibidi neoaic. Tsusedpabon chuinëdacpadomboen naquidquo nec.

⁵Aden nabanquidquo padiseyobo nec. Adquibidi abipadquid utsibo isadaidbo tsusedpabon naden nata quequin chuinëdaid tantiaquid neoaic. Adec tsusedpabon chuinëdacpadquiec Esusbëd icquido mëpanudenquiocsho isash padiseyobo: —Atotsieshun mibëd icquidon tsusedpabon chuinëdacpadomboen nainquiocquin mëpanudabi pepec —quepondash Esus caic.

⁶Adoquien Esus: —Isayasën ëdenquo dada uaquin mibitedi bëdamboen chiampidpadquid mibi nec. Ambi dada uampid nad iqueque. Tantia:

“Nuquin Papa bëdambocquid nec quequin chiacpadomboen tantiesa isadaidbo nec.

⁷Abia Yampidënquo Nuquin Papan nadomboen nata quequin chiaid tantiesa icquin tsusedpabon nadomboen nata quequin chuinëdaid tantiaquidquo nec.”

⁸Aden tsusedpabon chuinëdacpadomboen nabanquin Abia Yampidënquo chiaid niacquid mibi nec

—quepondash Esus isadaidbo tsusiobo caic Nuquin Papan Isayas dada uamepampid tantiamenuc.

⁹Aden chuishumbic adomboembidi chuiuoic: —Badedquo Nuquin Papan chiaid chieshënquin tsusedpabon nadomboen nata quequin chuinëdacpadomboen nabanquidquo mibi nec. ¿Aden naquinda Nuquin Papan chiacpadomboen mimbi nape? ¹⁰Nuquin Papan chiacpadomboen Moisesën dada uampid nad iquec: “Titan papabëdtan chiaid chieshenquiocquin naban.” Adquidën chiaid utsi nad iqueque. Tantia: “Aton papa icsamboen chuiquid unës ua. Adembidi aton tita icsamboen chuiquid unës uaoa,” quequin Nuquin Papan chiac Moisesën dada uampid nec. ¹¹Mibien tsusedpabon chuinëdaid tantiaquin adoesa nec. Papan na naimëdacsho isun naden mimbi chiec. Mibi nashunquin menetiapimbo iquebi, papa. Mibi menenquiocquin Nuquin Papa Abia Yampid nashunquin menenun ëmbi dayun uaid nec, papa, quequin mimbi chiec. Adembidi titatsen mimbi chuiuoic. Aden chuiquin papabëdta tita tantiaquin nashunenquiocquin Nuquin Papan chiaid niacquid mibi nec. ¹²Aden mimbi nashunenquiocquin ismiacpadec, Papa, mibi nashunquin menetiapimbo iquebi, queoic utsibo. Adecbidi, Tita, mibi nashunquin menetiapimbo iquebi, queoic. ¹³Aden chuiquimbi titabëdta papa tantiaquin nashunta quequin Nuquin Papan chiacpadomboen nainquiocquin tsusedpabon chuinëdacpadomboenuidi nata quequin chuiquidien mibi nechitec. Adembidi Nuquin Papan chiaid utsi-utsien naisa mibipadquid utsibo icmequin tsusedpabon chuinëdaid nata quequin mimbi chiec —quepondash Esus isadaidbo tsusiobo caic.

¹⁴Aden Nuquin Papan chiacpadomboen niacquido chishic: —Utsibo, tantiec cho. Mibi bëdamboen chuinu. Bëdamboec papuedta.

¹⁵Tsusedpabon chuinëdacpadquiec mëpanudabi mimbi piaid min tantiate icsabudtemaid nendac. Icsamboen tantiec mibi icsaic. ¹⁶Ëmbi chiaid tantiaquin utsi chuibanta —quepondash Esus.

¹⁷Aden chiasch iccuededquido abi tabadnubi shubun puduedash tabadpondash Esus. Tabadsho isash: —Mimbi chuiboed ëbitedi tantiamc —quepondash abëd icquido.

¹⁸Adoquien: —Utsitedishun tantienquo icbocpadquido mibitedi neque. Tantia. Mimbi piaidën mimbi tantiaid icsabudtiapimbo iquec. ¹⁹¿Min tantiate yacnoda mimbi piaid nidpec? Padenquo. Mimbi piaid min pucu yacno bud-budec auëshquo chimu nëncuenash puduenec —quepondash abëd icquido caic.

²⁰Aden chiec onquiashic: —Mimbi tantiacpadquiequi mibi icsabudec.

²¹Chido mimbi inacmaid isash chudtiadquo iquec quequin mimbi tantiacpadomboen chido isuidtiapimbocquin mimbi chudted-chudtedec. Utsin na bedtiadquo iquebi quequin mimbi tantiacpadomboen mimbi ampec. Cuesunetiadquo iquebi quequin mimbi tantiacpadomboen mimbi cuesunepec. Utsin chido chudtiadquo iquec quequin mimbi tantiacpadomboen aidi mimbi chudpec. Dada utsin ëbi bëdaidquiocsho ispec quequin mimbi tantiacpadomboen min bënëpenquo chudmequid mibi nec. ²²Utsin bedactedi bednu quequin mimbi tantiacpadomboen bedquid mibi nendac. Adecbidi utsin bedaid isash adomboembidi bednu queshun isuidesa iquec adomboen bedbanquidquo mibi

yampec. Mibibi icsambocquid nec
 quiash chieshëmëñquid mibi nendac.
 Adquid abimbo chiacimboen chuiquid
 mibi nendac. Icsauidi bunquin adenuidi
 nabanec. Mibi icsaquin
 ompoenquiocquin nabanquid mibi
 yanec. Utsi bédambo icsho isash
 chieshënquid mibi icpec. Utsi
 icsamboen chuiquid mibi nendac. Utsin
 chuisho, Èbentsëqui tantiaquidquo
 nebi, quequin mamëñshunquid mibi
 nendac. Adembidi nasho
 mamëñshunoaquidbidi mibi nendac.
 Èmbia tantiaquid nebi, quequin
 mimbibi nabanaid icsa isash bédambo
 iquec quec mibi mamëñec tsadec.
²³Èmbi chuiboedtedi icsaquidën naid
 nec. Aden tantiaquid icsabudte nec
 —quepondash Esus.

**Sidopenisia caid yacnoësh chido ambi
 tantiacpadquieç bédanaid**
(Mat. 15.21-28)

²⁴Aden chiashic isadaidbo yacnoësh
 puduanec nidequi isadaidpembe yacno
 nidpondash. Shubu dadpen icquid Tido
 caid anoentsëqui yacno choash shubun
 puduedash: —Nëmbo ëbi choaid
 chienda —quepondash Esus. Ambi
 chiacpadpenquiocnoc chuisho
 tantiapondash anocquidon. ²⁵Adoac:
 —Esus chosh —quesho tantiañshien
 mayan icsa dapuduedaidën tita Esus
 tabadacno nidpondash. Adec nidec
 puduedequi Esus tauebudpondash
 chuiquid dapa nec quequin tantieç.
²⁶Isadaidpembe chido nidaid
 Sidopenisia caid yacnocquid niondash.
 Aidi Esus tauebudash: —Con champi
 mayan icsa dapuduedaid dapudueme,
 tsusio, —quepondash comapenen chieç.
²⁷Adoaquien Esus: —Mabi con matses
 isadaidboba bédamenuec choboc.
 ¿Bacuëbo cubudabicnubi opashëmpida
 pete menequin anin bënëpadic?

Padenquio. Adembidi, ¿isadaidbotedi
 bédamiabidambi matses utsibo,
 isadaidpembe, bédamepadi?
 —quepondash Esus.

²⁸Adsho tantiañshien chido: —Icbo,
 mimbi bédamboen chieç. Padnuen anin
 meniac bacuëbon pete sananaid
 cuëshëmpi paëdtsacsho opashëmpin
 ambibi bedshun pec. Adembidi mimbi
 nadatiambocquin nabanac isadaidbo
 dadpen bédanubi isadaidpembe
 abentsëc tantiaquid yec bédanoapeç
 —quepondash chido.

²⁹Aden chidon chuishobien:
 —Bédamboen mimbi chieç. Aden
 tantiaquid mibi neque. Nidec nid
 shubuno. Mayan icsa dapuduedaid
 dapuduenaque. Isec nid —capondash
 Esusën isadaidpembe chido chuiquin.

³⁰Adsho tantianec choec shubun
 puduedquin isaquien aton champi
 uebocno ënden mayan icsa niqian
 bédanash abi ushaidëmbi uec.

**Pashu buëd onquenquiocquid
 Esusën bédamiad**

³¹Adashien Tido caid anoentsëcuësh
 nidequi Sidon caid matambidanec chian
 Cadidia caid yacno choapondash Esus.
 Nidaid Decapodis caid shubu dadpen
 yacno-yacnomboec capucueniañsh
 choapondash. ³²Ambo choash
 tsadnubien dada icsa, pashu buëd
 onquenquiocquid, Esus yacno bëash
 tsadquin: —Nëid mishquin bédame
 —capondash.

³³Adsho tantiañshun iccuededquido
 ismenquiocnuen udictsëc dada icsa
 buanshun aton mëdante bushbi pashun
 pabiate pausuntanquin chicpondash
 Esusën. Adshun, min anatsen mishnu
 quetanquin ismequin uicchun
 mëpidadatanquin pashun ana
 mishpondash. ³⁴Aden amishec abuc
 isec: —Epata —quepondash. Paucud,

quec adpondash Esus. ³⁵Adec Esus cuëdnubi pashu buëd onquenquicoboedi tantiadcuenash onquiampondash.

³⁶Aden pashuaid bëdamiash: —Esusën naid nec quequin chienda —quepondash Esus. Adoboqui niacbidanquin chuibampondash. ³⁷Aden chuisho tantiash: —Adquidshenda Esus nepec. Ambi naidtedi bëdambo iquec. Pashu paucquid nec. Adembidi ana onquesa oncamequid nec —quec onquecuededpondash.

4000ted matses Esusën pemiaid

(*Mat. 15.32-39*)

8 ¹Adashic Esus yacno matses dadpen padpidec cho-choash yuec tabadec bundocuededpondash. Adsho isun abëd icquido chomiash Esus nadpondash:

²—Matses bunec tabadsho isash unësquoio iquebi. Daëdec ushec ëbëd tabadquin aton pete uesquin piac. ³Aton pete nibëdsho isash, Pec nid, quetiapimbo iquebi padishnushie quiash. Ënapenuësh dadpen cho-choash nec —quepondash Esus abëd icquido chieci.

⁴Adoquien: —Pete nibëdacno nuqui tabadec. Pemenun ¿Mitsimbo nidshumbimbi pete bedpatsia? —quepondash abëd icquido.

⁵Adsho tantiashien: —¿Ttedtsi panëmpi mitsana iquec? —quepondash Esus.

Adoquien: —Siete iquec —quepondash abëd icquido.

⁶Adnubien: —Tabadbud —quetanquin Esusën panëmpi sieteted bedshun sananquin Nuquin Papa ambi pete icmiaid chuishun panëmpi cuësh-cuëshun: —Nëid meneban —cac abëd icquidon iccuededquido menebampondash. ⁷Adembidi nuëcquid dëmishaid daëdpacktsëcbidi bedshun: —Mimbi meniaid nec quequin tantiembi, Papa —qeshun: —Nëidtsen

meneban —Esusën cac menebanoapondash. ⁸Aden menebanac piash: —Padi. Piombi —quecuededpondash. Aden piambien napi uaid tsitsanën sandoquin abëd icquidon bedaid tsitsan sieteted icpondash. ⁹Peboedo dada caniaid dadpen 4000ted icpondash. Chidon aton bacuëbobëdtambi pepondash. ¹⁰Aden pemeshun peboedotedi nidmiash Esus abëd icquidobëd cano antabëdtoanec nidquin Dadmanuta caid yacno potepondash.

Nadatiambocquin nata. Isnu, padiseyobo quiaid

(*Mat. 16.1-4; Duc. 12.54-56*)

¹¹Aden potiaash tabadnubien cho-choshon padiseyobon: —¿Nuquin Papan chomiaid nebi quepecta mibi icco? Aidën chomiaid icquin nadatiambocquin nata. Isnu —capondash Esus chuiquin.

¹²Adsho tantiash, Èbi tantiesha nec, quec unësquoio yec tsadequi —Èmbi naid dadpen mimbi ispaboc. ¿Adosho isboshida, Èbi isme, queoape? Nadatiambocquin nabanquin èbi isme caqui ismenquoio iquembi. Abimbo caimbi —quepondash Esus. ¹³Aden chianec nidec cano antabëdtoanquin uquë cuëma utsiuc poteoapondash.

Nuquin Papan chiaidbëdta ambi chiaid daëd uaquin chuiquid padiseyobo

(*Mat. 16.5-12*)

¹⁴Badedquio Esus nidnuesho tantiash cano antabëdtopondash abëd icquido. Panëmpi bedabi puduampondash panëmpi abentsëqui tsitsanën anuetsëcnuc. ¹⁵Aden potequimbi Esusën nadopondash: —Pan uanuequidën trico caid putubëdta bidiscamete acte pistscëc cacushaqui nua yec bidisquëc. Adembidi padiseyobon Nuquin Papan

chiaidbëdtabi ambibi tantiaquin chiaid daëd uaquin chuibanec. Aden chuiquidbidi Edodesbëd icquido nec quequin tantiata. Aden tantiaquin padiseyobopadquid adecbidi Edodesbopadquid icmane queshun ambi tantiacpadomboen nabanenda —capondash Esusën abëd icquido chuiquin.

¹⁶Adsho Esusën chuiboed icsamboen tantiec abëd icquido: —¿Ëmbi panëmpi bëambo yaidta icbon chuipec? —quec onquecuededpondash.

¹⁷Aden chiec onquecuedednubien tantiaquidquio icquin Esusën nadopondash: —¿Atotsi quiash ¿ada panëmpi bëambo yaid con Icbon chuipec? quepe, mibi? ¿Ëmbi nabamboed isenquio yec bëshu tsadacbimboecta tsadpo? ¹⁸Adecbidi ¿Ëmbi chuibanaid tantienquio yec pashuacbimboecta tsadoapo?

¹⁹¿Panëmpi 5ted bedshun cuësh-cuëshun menebanaqui napi uaid tsitsanën sandoaid tedtsi iccoshe? Chui —capondash Esusën.

Adoaquien: —Doseted iccosh —quepondash abëd icquido.

²⁰Adoaquien: —Adembidi, ¿nëbi siete panëmpi bedshun matsesën piaid napi uaid tedtsi tsitsanën sandoaid icposh? Chui —caoapondash Esusën.

Adoaquien: —Siete iccosh —quepondash abëd icquido.

²¹Adoaquien Esus: —¿Nadatiambocquid Esus nec quequin ëbi tantienquioda mimbi icpe? —quepondash abëd icquido caic.

Betsaida caid yacnoshon bëshu bëdamiaid

²²Adshumbic Betsaida caid yacno poteoapondash Esusbëdtambidi. Aden potiaish chosho isun bëshuaid bëpondash anocquidon. Aden bëshun ismequin: —Nëid bëshumbo neque.

Mibi bëdamianquidquio icquin mishquin bëdame —capondash Esus chuiquin. ²³Adsho Esusën bëshu mëdinanquin Betsaida caid anoentsëqui buanshun uicchun bëcuishtuatanquin bëmishec: —¿Ada mimbi iseqe? Ëbi chui —capondash Esusën.

²⁴Adsho tantiaish Esus isquin: —Bëdamboen isenquioicquin cuëte podo inchëshquio yacnimboecnuc mibi isembi —capondash bëshuaidën. ²⁵Aden chuishobi Esusën bëshuaid padpiden bëmishoaquien bëucudquiopondash bëdamboen isec. ²⁶Aden bëdamboen iso isun: —Nëbi min shubuno nid. Shubu dadpen icquid Betsaida caid datambidanec nid —quequin Esusën nidmepondash.

Quidistu mibimbo neyoc, Petedo quiaid
(*Mat. 16.13-20; Duc. 9.18-21*)

²⁷Aden nidmiashic ancanquid Uedipo caid tabadaid nidaid Sesadeya caid yacno nidequi: —¿Atotsi Matsesën ëbi capec? —quepondash Esus abëd icquido chiec.

²⁸Adoaquien: —Utsi-utsiec, Acten mentoamboed, Uan Esus nec, quenubic; utsi-utsiec, Edias, Nuquin Papan chiacpadomboen chomiaidien Esus nechitec, quenubic; utsi-utsiec, Nuquin Papan chiaid ëndenquimbo chiampidpadquidien Esus nechitec, quec —quepondash abëd icquido Esus caic.

²⁹Adsho tantiaishun: —Ma mibitedishun ¿atotsibi cai? —capondash Esusën.

Adoaquien: —Quidistu, Nuquin Papan ambi tantiampicpaden abi yacnoshon chomiaidquio mibi neyoc —quepondash Petedo abëd icquid utsibo onquiacbimboen chuioaic.

³⁰Adsho: —Mimbi chuiboed utsi chienda. Abentsëcquiobi chienda —capondash Esusën abëd icquido comapenen chuiquin.

Abi unës uate Esusën chiaid*(Mat. 16.21-28; Duc. 9.22-27)*

³¹Aden chuishun abi unës uate tantiamequin abëd icquido Esusën chuipondash. Nuquin Papan chomiaid yec matsesacsho isadaidbo tsusiobon chieshënquin ëbi mëyanendac. Aden mëyanquin unës uaqi daëdec ushash uincuenoaindabi, quequin Esusën chuipondash. ³²Abi unës uatequid chuipecshenda niondash. Aden Esusën chiaquien aibdëdtsëqui uano nidshun Petedon: —Aden tantiaquin chienda —capac caondash.

³³Aden Petedon chuisho tantiash aucbidi bidiadquin abëd icquid utsibo isec Esus nadpondash: —Nïdec nid, Satanas. Nuquin Papan tantiacpadpenquiocnoc ëbi niacmenuequin icsamboen chuiquid mibi neque. Satanasën mua uac matsesën tantiacpaden mimi tantiec —quepondash Esus Petedo comapenen chushcaic. Petedo Satanasbimboecquid nec quequin Satanas capondash Esusën Petedo chuiquin.

³⁴Aden Petedo chuibanashic abëd icnuec cho-choquid utsibo caic: —Cho —quepondash Esus. Chosho isash: —Esuspadquid icnu queshun mibi bunaid nainquiocquin ëmbi chiaid tantiaquin nabanta. Ëbi mëyanacpadembidi mibi mëyante icnuc niaquenda. ³⁵Esus tantiaquin ambi chiacpadomboen nanu queboedi unësmane quequin naisa Nuquin Papa yacno puduedtiapimbo iquendac. Esus tantiaquid nebi quequin tantiec mëyante icnuc unësmane quenquiocquin ëbi chuibanec tabadquid Nuquin Papa yacno tabadendac. ³⁶Aden aton na dadpen bedbanashic Esus tantiesha yec unësash Nuquin Papa yacno puduedtiapimbo iquendac. ¿Adquidta

bëdambo icpadic? ³⁷¿Nuquin Papa mitsana menecta abi yacno puduedpatsia? Padenquio. ³⁸Utsi icnubi dacuëdec Esus tantiaquid nebi quesa chido aton bënë bunenquio yec dada utsibëd tabadquidbimboecquid nec. Adquid chuiquin, Con utsi nec, caisa nendabi. Adembidi ëmbi chiaid chiesha caic, Con utsi nec, quequin Nuquin Papa chienquio iquendambi. Chuiquid dapa abipadquidquio con pan ëbi icmiac ëmbi abuchshun uaido mayan bëdabobëdi nidaidën choaindabi. Adeç aidobëdi choashun ëbi chieshënquid isec, Con utsi nec, queoatiapimbo iquendabi —quepondash Esus cho-choquido caic.

9 ¹Aden chiashic Esus: —Nëbimbobi tabadquid ëbi tantiaquid utsi-utsiec unësabicquin nidaidën tabadquin Nuquin Papan nadatiambocquin nabanaqui Nuquin Papan shubun icquid abi tantiaquid utsi dadpen yansho isendac —quepondash.

Esus bëdaidquio icmiaid*(Mat. 17.1-13; Duc. 9.28-36)*

²Aden chuibanashic 5ted ushash: —Nidnu. Nid —quianec Esusbëd Petedo, Acobo, Uan, aitedi ambi chiacctedi macuësh dapa yacno nidpondash. Ambo nidash tabadquimbi abi bëdambo isadaid aidon ispac caondash. ³Abi dasiuidaid dashcute icboedi nac-nacquio yampac caondash. ⁴Edias, Moises, aid daëd ënden yampidi Esusbëd onqesho ispac caondash Esusbëd choaedon. ⁵Aden isequi: —Chuiquid Dapa, nuquibi nëmbo choash tabadquin mibi isec bëdambo iquebi. Min shubumpi 3ted icnuc shubu uanuna mitsana, Moisesën na, Ediasën na, aited icnuc —quepac caondash Petedo. ⁶¿Atotsimbi chuipe? quetiapimbo yec dacuëdcuededquin aden chuipac caondash Petedon.

⁷Adec tabadshobien abu ushu choquidën ambo tabadquidtedi bêtimpac caondash. Aden bêtinacnoëshquiobi Esus chiec onquiampac caondash: —Esus, con madombo con dayunquiocquid nec. Adquid icquin chuibansho bédamboen tantiata —capac caondash Nuquin Papan.

⁸Adsho isbanquin isaquien Esusbëd choboeuidi icoapac caondash.

⁹Adanec macuësh yacnoësh budtanequi: —Mimbi isboed nëbi chienda. Èbi Nuquin Papan mado mattsacsho unëshmiac èbi uincuenan mimbi isboed chuita —capac caondash Esusën. ¹⁰Adsho tantiash utsi chienquio yec abi uincumete ìmitsipadquio icpec? quec abibi onquecuededpac caondash Esusbëd chobedo.

¹¹Adec onquecuededash: —Nuquin Papan chomiaidquio choabicnuc Ediasba choendac quequin tsusedpabon nadomboen nata quequin chiaid tantiaquidon chuibanec. Ma Edias èndenquimboshë chopampic —quepondash abëd icquido Esus caic.

¹²Adoaquien: —Ai, Ediasën mattses bédamboen tabadmenuen chiampidpadquidba choendac quequin Nuquin Papan chiaid nendac. Adembidi Nuquin Papan chomiaidquio yec mattsesash nëbi tabadsho mattsesën chieshënquin mëyanendac quequin chuiampid nec. ¹³Ediasën chiampicpadquiec Uan acten mentoanquid chopondash. Aidi choacsho abi bunacpadomboen abi chieshënquidën mëyanac. Èndenquimboshë Edias chiec onquequin dada uampicpadomboen Ediaspadquid chomiaid Uan choshon, Mibi icsaid ènta, quequin chuisho abi chieshënquidën mëyanondash —quepondash Esus abëd icquido chiec.

Mayan icsan buëd onquetiapimbo icmiaid Esusën bédamiaid
(*Mat. 17.14-21; Duc. 9.37-43*)

¹⁴Adec onquetanec choquin isquien mattses dadpeshun abëd icquid utsibo Esusën niamboed tsusedpabon nadomboen nata quequin chiaid tantiamequidon comapenec onquecuededquin bêtimpodash.

¹⁵Adnubien Esus chosho isash iccuededquido, Bédamianquid choec. ÌAtotsi aidën napatsiashe? Isnu, quetanec titingue choec: —ÌAda cho? —quepondash.

¹⁶Adoaquien: —ÌAtotsi quec èbëd icquidbëd comapenec onquecuedede? —quepondash Esus.

¹⁷Adshobien: —Chuiquid Dapa, mibi ismenuen con mado bëombi. Mayan icsan buëd oncamenquio yaid nec. ¹⁸Aid Mayan icsan comapenen nebudteniac ècbacush-ècbacushpambo yec uedeniosh. Adecbidi, uebudash unëshanec shëta chëquëdëshcaic uiosh. Adquio yanesho, Bëombique. Bédame, cauidombi mibëd icquido chuiquin. Adoaqui bédamenquio iccosh —quepondash mayan icsan buëd onquetiapimbo icmiaidën papa.

¹⁹Aden chuisho tantiash abëd icquido caic: —Esus nadatiambocquid nec quequin èbi tantiesa mibi nepec. ÌTedectsi icshun èmbi chiacpaden mimbi tantiabempe? Mibi tantiesa icsho ìmitsipadembimbi tantiamepe? —qeshumbic: —Madompi bec cho —capondash Esusën.

²⁰Adsho tantiashun bëpondash. Bëshobi Esus istanquin mayan icsan abi dapuduedaid comapenen cuididicamiampondash. Aden nac madompi uebudec ècbacush-ècbacushpambo yec cuididiquepondash.

²¹Adsho isash: —¿Tedtsi seta matamec ad iccondashe? Chui. Tiantianu —quepondash Esus madompin papa chiec.

Adoaquien: —Bacuë ictsequi ad iccondash. ²²Cuëte dêtsiadaoid nënedeniosh abi dapuduedaidën. Actetsen nënedeniosh unësmenuequin. Mibi bédamequidquico icquin ëbëdta tantiaquin ëbi con mado bédameshun —quepondash madompin papa Esus caic.

²³Adoaquien: —¿Mibi bédamequidquico icquin ëbi con mado bédameshun quecta ique? Nuquin Papa nadatiambocquin naquid nec quequin tantiaquidën tantiacpadomboen Nuquin Papan naindac —quepondash Esus.

²⁴Adsho tantiash: —Tantiambi. Ëmbi abimbo tantienquiocsho isun ëbi tantieme, Icbo —quepondash madompin papa Esus caic.

²⁵Adsho tantiashun matses dadpen titinquec chosho isun mayan icsa chuiquin: —Matses buëd oncamenquiocquid mibi nec. Adembidi tantiametiapimbo icmequidbidi mibi neque. Ambo tabadenquico yec dapuduen —capondash Esusën.

²⁶Aden chiaquien sidquec madompi cuididiquenubi dapuduempondash. Adnubien unësacimboec madompi uesho isash: —Unësosh —quepondash isquido. ²⁷Adnubien madompi mëdintanquin Esusën uëtsëndopondash. Adoac abembi nidtopondash.

²⁸Adnubien shubun puduedacsho: —¿Atotsieshumbimbi mayan icsa dapuduemetiapimbo icpo? —quepondash abëd icquido Esus caic utsibon tantienquiocnobi.

²⁹Adoaquien Esus: —Dapuduen quequinuidi chuibudaqui adquidquico dapuduenesa nec. Ma Nuquin Papan nadatiambocquin napanuna quequin Nuquin Papa chuideneshun mayan icsa

dapuduen cac dapuduenendac —quepondash.

Abi unës uate chuioid
(*Mat. 17.22-23; Duc. 9.43-45*)

^{30,31}Aden chianec nidaid Cadidia caid matanec nidpondash. Nidquimbi, Ëbëd icquid 12tedtsëqui chuibanu, quec utsibo ismenquico yec nidpondash Esus. Aden chuibanec nidequi: —Nuquin Papan Madombo matsesacsho bedendac. Aden bedshun meniac cuesuniac uincuempndac —quepondash Esus. Abi uincuentequid chiecshenda adec Esus onquepondash. ³²Aden chuisho bédamboen tantienquico yequi dacuëdec ëbi bédamboen tantiamequin chui quetiapimbo icpondash abëd icquido.

¿Mitsicquid chuiquid dapa icpec? quequin chiaid

(*Mat. 18.1-5; Duc. 9.46-48*)

³³Adanec shubu dadpen icquid Capednaun caid yacno Esus choapondash. Adec choash shubun puduedshun: —¿Podquedën choec atotsi chiec onquecuededo? —capondash Esusën abëd icquido chuiquin. ³⁴Adsho tantiash cuëdenquiocpondash abëd icquido. ¿Esusbëd icquid mitsicquid chuiquid dapa icpeque? Tiantianu, quec onquequin ambi chiaid chienquico yec tabadpondash. ³⁵Adec tabadnubi abi tsadacnoëshi: —Cho —quiampondash Esus abëd icquido caic. Aido choacsho isash: —Chuiquid dapa ëbentsëqui icnu quequid utsi nashunquidbidi ictiad —quepondash Esus.

³⁶Adec onqueshumbic bacuëmpi abentsëc mëdintanquin abëd icquid tabadacno nënantanquico tsadumbudpondash. Aden tsadumbudshun bacuë icuquequi: ³⁷—Esus tantiaquid nebi quequin ismequin bacuë yuedquin nashunquid ëbi yuedquin

nashunacimboecquid nendac. Ēbi yuedquin nashunquid ēbi chomiondaid Nuquin Papa yacno yuedquin nashunoacimboecquid neoaindac —quepondash Esus abēd icquido chiec.

**Nuqui chieshēnesa nuqui bēdamboen
chuiبانquid nec quiaid**
(*Mat. 10.42; Duc. 9.49-50*)

³⁸Adnubien utsin naid chiec Uan onquedopondash: —Icbo, mimbi chiacpadomboen utsin chuisho tantiapombi. Aidēn: “Esus nadatiambocquin naquidquio nec, quequin tantiembi. Aden tantiaquin aidēn chiacpadomboen mibi chiembique. Dapuduen,” cac mayan icsa dapuduemposh. Adosho isun, Esusbēd icquidpenquio mibi neque. Adenda quequin chuipombi —quepondash Uan.

³⁹Adoaquien Esus: —Padicnuna. Nadatiambocquin naquidquio Esus nec quequin abimbo tantiaquin ēmbi nacpadomboen nabanquidēn ēbi icsamboen chuitiapimbo iquec. ⁴⁰Nuqui chieshēnesa nuqui bēdamboen chuiبانquid adquid nec. ⁴¹Abimbo chiembique. Tantia. Esus tantiaquid nec quequin mibi nashunquid Nuquin Papan cuidnanquin bēdamboen naoaindac —quepondash Esus.

**Icsa uanquin tantiabenabicquid
ismequid cuidendac quiaid**
(*Mat. 18.6-9; Duc. 17.1-2*)

⁴²Abi Esusēn onquequin chuiبانec: —Adembidi abi icsacpadomboen bēdamboen tantiabenabicquid ismequid Nuquin Papan comapenen cuidendac. Adquid abi icsacpadomboen ismiabicsho cuēnote yuēmbocquidbēdta tētaneshun acte dapa nēnepatecnēdan. ^{43,44}Adembidi mimbi icsamboen tantiaquin mishaid ēntiapimboquin ismedeniāc adomboembidi utsin tantiec. Bednu

quenquio yec mētaniacimboec tsad ēnēdenquio yec chian anēdēnquiacno nidmane quiaish. ^{45,46}Adecbidi capuquin mibi icsaid mimbi ismebeneque. Capunu quequin tantienquio yec tateshuniacimboec tsadta ēnēdenquio yec chian anēdēnquiacno nidmane quiaish. Adec mibi tsadnuc adquiecbidi mimbi ismiaid tantiec tsadendac. ⁴⁷Adecbidi ēshēn isec mibi icsaid ēntiapimboquin mimbi ismedoniāc adomboembidi utsin tantiec. Ēshē chicshuniacimboec tsad ēnēdenquio yec chian anēdēnquiacno nidmane quiaish ma mibi tsadacpadece mimbi ismiaid tsadoapanu. ⁴⁸Icsa uadenequin ēnenquio yash unēsash chian anēdēnquiacno nidash unēsenuocioshobi chodquiaid pequid macun mibi pendac. Ēnēdenquio yec chian anēdēnquiacno mibi tabadendac. Icsadenequin ēnenquiocquid comapenen cuidtequid nendac. ⁴⁹Sa casecac pambid batambo yacimboec Esuspadquid icnu quiaish mibi icsaid ēnēdnuen mēmunc mibi bēdambo yampec. ⁵⁰Sa batambocquid bēdambo iquec. Sa batambochoedi batapenquio yec icsasho ōmitsipadentsi batambo icmeoapec? Sa batambocquid casecac daēdash batambo yacpadece utsibēd bēdamboec tabadta —quepondash Esus.

Aton chido bedshun nidmequid
(*Mat. 19.1-12; Duc. 16.18*)

10 ¹Aden abēd icquido chuiquin nainashic Esus aidobēdi nidaid Cadidia caid yacnoēsh nidquin nidaid Udeya caid yacno matambidanec nidquin acte Odan caid potepondash. Ambo choash tabadsho isash padpidece matses dadpen cho-choapondash. Adec cho-chosho isun Nuquin Papan chiaid chuibanoapondash Esusēn.

²Adecbidi cho-choquid padiseyobon Esus Nuquin Papan chiaid icsamboen

chuiu qeshun: —Aton chido bedash bunenquoio yanshun cuemec. ¿Aden naicta bēdambo iqueque? Tantienu. Chui —capondash Esus chuiquin.

³Adoquien: —¿Atotsi quequin Moisesën chuiampic? —queopondash Esus.

⁴Adoquien: —Aton chido bedash bunenquoio yanshun, Con chido icsambocquid nec, quequin ambi tantiacpaden aton bēnēn dada uashun nidmiascho isash, Padi, quenuicpampic Moises —quepondash padiseyobo.

⁵Adoquien Esus: —Nuquin Papan chiaid tantiesa tsusedpabo yansho isash, Padi. Adenda, quenuio Moises icpampic. ⁶Nadomboen Nuquin Papan tauapampic. Dada abentsēc uashumbic chido abentsēcibidi uashun dada menepampic. ⁷Adomboembidi nanuec dada aton tita aton papabēd tabadenquoio yec aton chido bedash abēdi ambi quēnē uaidēmbi tabadec. ⁸Aden aton chido bedash tabadequi matses abentsēc icboedi daēdec. Matses daēd icboedi abentsēc yacimboc tabadec. ⁹Aden dada aton chidobēdta Nuquin Papan daēd uacsho ma cuēshēdmenquoio icpanuna —quepondash Esus.

¹⁰Aden chiash shubun puduedacsho: —Mimbi chuibocēd ēbitēdi tantiamē —capondash abēd icquidon.

¹¹Adoquien: —Aton chido bedshun chudshun nidmeshun chido utsi bedquid Nuquin Papan menepampid niacquin tantiesa nec. ¹²Adembidi chido aton bēnēn bedac aton bēnē nianshun dada utsi bedmequid Nuquin Papan menepampid niacquin tantiesa neoaic —quepondash Esus.

Esus yacno bacuēbo bē-beaid
(*Mat. 19.13-15; Duc. 18.15-17*)

¹³Adnubien: Con bacuē mishquin Esusën bēdambo icmetsiash, quequin

Esus yacno aton bacuēbo anin bē-bēpondash. Aden bē-bēsho isun: —Padi. Esusën naid utsi neque. Bacuēbo buantan —capondash Esusbēd icquidon.

¹⁴Aden nidmesho isash nēishash: —Bacuēbo nidmenda. Ma cho-chono. Anin chiacpadomboen tantiaquidquid bacuēbo neque. Adomboembidi badedquid Nuquin Papan chiaid tantiadac. Nuquin Papan shubu abentsēcquēn tabadquid aido nec. ¹⁵Abimbo chiembique. Tantia. Nuquin Papan chiaid bacuēbon badedquid tantiacpaden tantiesa Nuquin Papa yacno puduedtiapimbo iquendac —quepondash Esus. ¹⁶Aden chuitanquin bacuēbo dayumbanquin mamishec, Nēid bacuē bēdambo icme, Papa, quequin Nuquin Papa chuipondash Esusën.

Na dadpen icquid chiaid
(*Mat. 19.16-30; Duc. 18.18-30*)

¹⁷Aden bacuēbo chianec auēshquio puduanec nidshobien dada abentsēc titinquec choquin bēquedtanec danēshēn sebudash tsadec: —Chuibanquin tantiamianquid, bēdambocquid mibi neque. ¿Nuquin Papan shubu abentsēcquēn tabadnuequin atotsimbi napeba? —quepondash chobocēd Esus chiech.

¹⁸Adoquien Esus: —¿Nuquin Papabēdtabidabi mibi bēdambocquid nec, ēbi cape mimbi? Nuquin Papauidsēqui bēdambocquidquid nec ¹⁹—quequin chiech abi onquec: —¿Nuquin Papan nadomboen nata quequin dada uamiampidtedi nabanquidta ne? Aidtedi mimbi tantiapec. Nad iqueque. Tantia: “cuesunianenda; adembidi min chidouidi chudquid icta; adembidi, ampenda; adecbidi, utsi chiech muainda; adecbidi, utsin na bedesabimboc

muainda; adembiđi papabēđtan titan chiaid chiešhēnenda.” ¿Aidtedi Nuquin Papan dada uamiampid nabanquidta ne? —quepondash Esus choboed caic.

²⁰Adoaquien: —Abimbo chiembique. Tántia, Ico. Aidtedi nabanquidquio nebi. Bacuēctšēc icquimbi adquid nabanondambi ēnenquiocquin —quepondash choboed.

²¹Adšo tantiaš, Aidbēđ icte bunebi, quequin ambibi tantiec Esus nadpondash: —Nuquin Papan chuiquin dada uamiaid nabanec mibi nec. Ambi dada uacmaid iquec. Aidi mimbi nabi iquec. Nadquid iqueque. Tántia. Min shubuno nidshun mitsana mimbi tantiaidquio menebanquin piucquid bedshun aton na nibēđquid meneban. Aden menebanash Nuquin Papan chiaid tantiaquidquio mibi iquendac. Adec Nuquin Papa tantiaquidquio yec ēbēđ iquec cho —quepondash Esus.

²²Adšo tantiaš choboed mamēnenquio yec unēsquio yec nidpondash con na menebantiapimbo iquebi quiash.

²³Adec nidšo isun abitedi bēisbanec Esus: —Aton na dadpen icquidēn, Con na tantiequi Nuquin Papan shubu abentsēquēn tabadnu, quequin tantiauidtsec. Adquid Nuquin Papan shubun puduedesa nec —quepondash abēđ icquido chiec.

²⁴Aden Esusēn chuisho tantiaš, ¿Abimboda capec? quequin ambibi tantiec abēđ icquido otacquio tabadsho isec Esus: —Abuido, Nuquin Papan shubu abentsēquēn matses badequio puduedtiapimbo iquec. ²⁵Adembidi shēcuēn puduedte nidaidēn capuquid dapan badequio tantiatiapimbo iquec. Puduedquin ismiac puduedec. Adembidi Nuquin Papan shubu abentsēquēn puduedmianquid matsesēn badequio tantiatiapimbo iquec. Ambi

tantiacpadequi puduedte bunec —quepondash Esus.

²⁶Adšo tantiaš abēđ icquido, ¿Abimbobida capec? quetsēcquiec onquecuededpondash. Adec tabadequi: —Ambi tantiacpadequi puduedtiapimbo noc icšutsi puduedquid icpeba? —quepondash abēđ icquido Esus chiec.

²⁷Adoaquien comapen bēisec Esus nadpondash: —Ambibi tantiaquin naquid Nuquin Papan shubu abentsēquēn puduedtiapimbo iquec. Matses abibi puduedtiapimbo noc Nuquin Papambien abi yacno yuedanquid mibi tantiamendac —quepondash Esus.

²⁸Aden chiaquien Petedo nadpondash: —Chuinu. Tántia, Ico. Mibēđ icnu, quequin abitedi nianondambi. Adembidi mibēđ icquid utsibon abitedimbo nianondash. ¿Atotsi ēbitedi menetsia? —quepondash Petedo Esus chiec.

²⁹Adoaquien: —Abimbo chiembique. Tántia. Esusbēđ icnu qeshun Nuquin Papan shubu abentsēquēn tabadte iquec quequin chuinuequidēn aton shububēđta nianquin aton shubun icquid aton tied chedobēđta nianendac. Adquid ambi nianēdaidtedimbo sho

³⁰daēđ uaquin Nuquin Papan menendac. Nēbi shubu utsin-utsinquiec mibi puduedcuenec. Adecbidi Nuquin Papan shubu abentsēquēn tabadquid abi tantiaquido mibēđ icquid dadpen iquec. Adquid icnu mibi chiešhēnquidbidi iquendac. Yuecash ēnēdenquio yec Nuquin Papan shubun mibi tabadendac mibi chiešhēnquid nibēđacno.

³¹Nidaidēnshun chuiquid icboedi Nuquin Papa yacno tabadquin utsi nashunquid mibi iquendac. Adecbidi nidaidēn tabadquin nashunquid icboedi Nuquin Papa yacno tabadquin chuiquid iquendac. Nashunesa yec chuiquid

icboedi Nuquin Papan shubun puduedash utsi nashunquid adquid iquendac —quepondash Esus.

Ëbi unës uaindac quequin Esusën chiaid
(*Mat. 20.17-19; Duc. 18.31-34*)

³²Aden chianec Edusaden caid yacno podquedën nidec Esus bëyucanec nidpondash. Edusaden yacno padpidec choacshobini bedshun unës uaic quequin chiaishi, ¿Dacuëdenquioda ambo Esus nidoapec? quetsëcquiec abëd icquido tsyuec nidanepondash. Adnubien abi tsibanquid utsibo dacuëdecbidi nidanepondash. Adnubien: —Ëbëd icquiduidtsëqui padpiden chiuoanu —quiash Esus nidtuidshun cho-chosho isquin naden abi mëyante chuiquin tauapondash: ³³—Chuinu. Bëdamboen tantia. Nuquibi Edusaden yacno nidec. Ambo nidacsho ëbi bedshun ëbi matsesaid Nuquin Papan madombo isadaidbo tsusiobo menendac. Aden meniac icsaquidbimboecnuc ëbi icsamboen chuibanec onquecuededash, Icsambocquid Esus nec. Unës uamequimbien ictiad, quendac ëbi caic. Adec onqueshun ëbi buanshun isadaidpembo ancaquid ëbi meneoaindac. ³⁴Aden meniac bedshun aidon ëbi oncain mamëshumbedequimbi dacuishtuashumbi cuestanquin buanshun ëbi unës uaindac. Aden unës uac daëdec ushash uincuenoaindabi —quepondash Esus abi uincuenta ambibi chiec.

Ëbi daëdi nashunta Acobo Uambëd quiaid
(*Mat. 20.20-28*)

³⁵Aden chiaquien Acobo Uambëd Esusën dayuntsëqui choash: —Mibi chuinu. Tantia. ¿Ëbi daëdshun chiacpadomboen ëbi daëdi nashunenquioda mimbi icpe? —quepondash.

³⁶Adoquien: —¿Atotsimbi mibi nashuneque? Ëbi chui. Tantuanu —capondash Esusën.

³⁷Adoquien: —Abuc nidoash chuiquid dapambo mibi icquin utsi ismequin min dayunquio ëquë tsadumbudcuenquin ëbi daëdi tsadunta —capondash Uanën Acobobëdtan Esus chuiquin.

³⁸Aden aid daëdshun chiaquien: —Tantienquiocquin mimbi chioc. Icsaquid matsestedi nec, quequin Nuquin Papan aido cuidenquiocquin ëbi aton madombo bëdambocquididd cuidendac. ¿Ada ëbipadquid mibi icpatsia? —capondash Esusën.

³⁹Adoquien: —Ai, adquid tantiembi —quepondash.

Adoquien: —Ai, adomboembidi mimbisen tantiendac —quepondash Esus.

⁴⁰Aden chiec abi onquec: —Abuc nidash chuiquidquio iquec con dayunquio ëquë tsadbudcuenec tsadec cho, quetiapimbo iquebi. Nuquin Papambien ambi tantiaidquio aden chiendac. Ëmbi padenquio iquec —quepondash Esus Uambëdta Acobo chiec.

⁴¹Aden Esusën chiaqui abëd icquidquio utsitedi Acobobëdtan Uanën chuiboed tantiash nëishcuededpondash.

⁴²Adec nëishash tabadsho isash: —Cho —quepondash Esus. Aden chomiash:

—Utsi namequid isadaidpembo nec quequin mimbi tantiec. Aidon matses utsi yuaquin mëyanquin namebanec.

⁴³Aden namesa mibi nec. Chuiquid dapa icnu quiash utsi nashunquid icta.

⁴⁴Adecbidi tsusio icnu quiash yuabimboe yec utsin namiaid icta.

⁴⁵Adquid icnuec Nuquin Papan madombo matsesash nidaidën tabadobi. Ancanquid iquenquio yec nashumënquidquio nebi. Adquid yec matses icsaid bedshunash ëbided cuidadec unësëndabi —quepondash Esus.

**Bëshuaid, Badtimeyo cuëmëdquid
bëdamiaid**

(*Mat. 20.29-34; Duc. 18.35-43*)

⁴⁶Aden chiashic Edico caid yacno chonobi abi tsibanquid utsibo dadpen cho-chopondash. Ambo tabadash abitedi puduampondash. Pudianash nidquin isaquien bëshuaid, Timeyon mado, Badtimeyo cuëmëdquid podqued cuëman tsadpondash. Piuquid bednu quequin cainec podqued cuëman tsadpondash. ⁴⁷Ambo tsadquimbi, Esus Nasaded caid yacnocquid choec, quequin utsin chiac: —Esus, Chuiquid Dapa, Dabidën madon, ëbi tantiaquin nashun —quequin chiec cuëdpondash bëshuaid.

⁴⁸Adec cuëdsho tantiaashun: —Esus cuënenquo yec otacquo tsad —cabededpondash utsibon.

Adnubien: —Chuiquid Dapa, Dabidën madon ëbi nashun —quepondash bëshuaid comapenec cuëdoaic.

⁴⁹Adoac nidtuidshun Esusën: —Cuënuquid chome —capondash. Adoquien: —“Chome,” queque. Nidtoash nid —capondash utsibon.

⁵⁰Adsho tantiaash bëshuaid aton dashcute bëntsecquid chicanec badedquo nidtoanec Esus yacno chopondash. ⁵¹Adec chosho isun: —¿Atotsimbi mibi nashumpeba? —capondash Esusën.

Adoquien: —Iste bunebi, Icbo —quepondash bëshuaid.

⁵²Adoquien: —Esusën ëbi bëshuaid bëuquec quequin mimbi tantiacpadquiec mibi bëdanoque. Nidec nid —Esus quenubi isbenquiopondash bëshuaidën. Adec bëdänshun Esus nidsho isun tsibampondash.

**Chuiquid dapabimboec yec Edusaden
yacno Esus choaid**

(*Mat. 21.1-11; Duc. 19.28-40; Uan 12.12-19*)

11 ¹Adec nidequi Edusaden anoentsëqui Esus chopondash. Edusaden anoentsëqui Bedpaque caid icpondash. Edusaden anoentsëcbidi Betania caid icoapondash. Aidtedi macuësh Odibos caid potsembo icpondash. Ambo choash ëbëd icquid daëd shubuno nidmenu quequin tantiec nadpondash Esus: ²—Në shubu dadpen yacno nidec nid. Ambo nidshun cabayobiecquidën bacuë caniabictsëcquid tënëshac tsadsho mimbi istuidendac. Aidi matses catsadabicquid neque. Aidi istuidshun tënëshaid tëchicshun sananquin bëta. ³Aden bedsho isun, ¿Atotsi canun aid bede? cac, Bëoaambi. Nëid nuquin icbo bunaid nec, cata. Mimbi aden chiac, Buanec nid, quendac —quepondash Esus abëd icquid daëd chiec.

⁴Aden Esusën chiaquien abi daëdi nidpondash. Adec nidanequimbi cabayobiecquid caniabictsëcquid shubu shëcuë cuëmano tënëshac tsadsho istuidshun tënëshaid tëchicpondash.

⁵Aden tënëshaid tëchicsho isun: —¿Mitsipaden tantiaquin ëmbi tënëshaid mimbi tëchiqueque? Tantuanu. Chui —capondash anocquidën.

⁶Adoquien: —Tënëshaid tëchicshun bëta, con icbo quebocpaden naimbi —capondash tëchicquidën.

Adoquien: —Buanec nid —queoapondash.

⁷Adoac Esus yacno buampondash. Aden bëshun aton dashcute bëntsecquid chicshun cabayobiecquid capupondash ma chuiquid aidën catsadtonoeshun. Adoaidën Esus catsadtopondash.

⁸Adembidi chuiquid Esus nec quequin

ismequin utsibontsen aton dashcute bëntsecquid chicbededshun podqued ansambampondash ma chuiquid dapa bédambocquid capunueshun. Adembidi tantiaquin utsibon budëdbieccquid podo tebededshun podqued ansambanoapondash. ⁹Aden ansambanash matses dadpen bëyucanec nidanenubi Esus nënantanquio nidnuc aiteddbidi tsyuec choquin tsibambëpondash. Adec abitedi nidanec Esus tantiec nadece cuëdëncuededpondash: —iAdeduya! Nuquin Papan bédambo icmiaid ambi tantiacpadomboen chuitanta quequin chomiaid nec. Tsusedpa chuiquid dapa, Dabid cuëmëdquidëñ tsyuecquid, shubu abentsëqui tabadquido chuiquid dapambo choec nec. ¹⁰Ëbi chuiquid dapa Nuquin Papan abuc tabadquidëñ chomiaid Esus nec. Nuquin Papa bédamboshë iquec. iAdeduya! —quec cuëdëncuededpondash Esusbëd nidquido.

¹¹Adec cuëdëncuededequi Edusaden yacno cho-chopondash. Choashic Nuquin Papa tabadte shubu uashunaid quënë dadpen yacno nidash Esus puduedpondash. Adec puduedshun abitedi isbanash ushë budtsambi Betania caid yacno nidaneoapondash Esus.

Cuëte bacuëesa chiaid

(*Mat. 21.18-19*)

¹²Abadiadtsashi Betania yacnoësh nidanec Esus bundopondash. ¹³Adec bundoshombi cuëte icueda caid podo buntac-buntacpambo ancuenquio nidsho istuidec Esus: —Icueda podo buntac-buntacpambo podoash nideque. Isbono. ¿Bacuëashida neque? —quianec nidpondash. Adec nidquimbi icueda podoudiquio icsho ispondash. Ushë utsin bacuëtiadquidi bacuëabi podopac.

¹⁴Ad icsho isun Esusën: —Adequi bacuëesa icsho ma matsesën chenquio icpanuna —capondash. Aden chuisho tantiapondash abëd icquidon.

Nuquin Papa tabadte shubu uashunaid yacnoshon cuemiaid

(*Mat. 21.12-17; Duc. 19.45-48; Uan 2.12-22*)

¹⁵Aden cuëte chuibëtsenec choequi Edusaden yacno choapondash. Ambo choashic Nuquin Papa tabadte shubu uashunaidëñ puduedoapondash. Adec puduedshun piucquid bedquin piucquid sanaid cuestetedi bidiacbanquin piucquid bednun nidaidëñ capuquidbëdta podochoquid chedo menebanquidëñ tsadtetsen nebudquin icbotedi puduemebampondash. ¹⁶Aden puduemeshun Nuquin Papa tabadte shubu uashunaid nasiadquin aton na buansho isun: —Nuquin Papa tabadte shubu uashunaid neque. Adec nasiadec capuenda —capondash Esusën chushcaquin. ¹⁷Aden chushcasic: —¿Ëbi tabadte shubu uashunaid matsesën ëbi onquianete shubu iquendac, quenquioda Nuquin Papa icpampic? Aden Nuquin Papan chiaid tantiesabimboecquin muaquin piucquid bedte shubu mimbi icmiayoc —quepondash Esus. ¹⁸Aden Esusën chuisho tantias, Icsambocquid Esus neque. Unës uatiad, quequin ambibi tantiabededec isadaidbo tsusiobo tabadcuëdedpondash. Utsiboen: —Chuiquid dapan chiacpadomboen Esusën chiec —quepondash. Adsho tantias, Esus bednu, quetiapimbo yec dacuëdcededec tabadpondash isadaidbo tsusiobo. ¹⁹Adnubien inchëshbudtsëqui Edusaden yacnoësh nidoapondash Esus.

Cuëte bidiquiaid

(*Mat. 21.20-22*)

²⁰Abadiadtsashi Edusaden yacno nidoaquimbi cuëte icueda caid

bidiquiacsho istuidpondash. ²¹Aden istuidash Esusën icueda bacuëesa chiaid tantiec Petedo: —Cuête bacuëabicsho mimbi chuiboed bidiquiaye. Is, Icho —quepondash.

²²Adoquien Esus: —Nuquin Papa nadatiambocquin nabanquid nec, quequin tantiaquiota. ²³Abimbo chiembique. Nuquin Papa nadatiambocquin nabanquidquo nec, quequin abimbo tantiasho isun mimbi chiacpadomboembidi naindac. Aden tantiaquin mimbi nëid macuësh cain, Mananuc tabadoedi adquiecbidi acte nantan tabadoata, mimbi cac nëid macuësh acte nantan tabadoaindac.

²⁴Ëmbi chiacpadomboen Nuquin Papan naindac, quequin abimbo tantiaquin mimbi chuisho tantiashun Nuquin Papan adomboembidi naindac. ²⁵Aden Nuquin Papa chuinish mibi utsin icsambocquin naid tantienquo yec bëpiscudta. Adsho abucshun isash Nuquin Papan mimbi icsa uanquin naid tantienquo yec bëpiscudendac.

²⁶Adenquo mibi icsho isun Nuquin Papan mibi icsa uanaid bëpiscudenquiocquin mimbi chiaid tantiatipimbo iquendac —quepondash Esus abëd icquido caic.

**¿Mitsicquidën chuibanta
caid mibi ne? quiaid**

(*Mat. 21.23-27; Duc. 20.1-8*)

²⁷Adashic padpidec Edusaden yacno choapondash Esus. Adec choash Nuquin Papa tabadte shubu uashunaidën puduedash capusho isash isadaidbo tsusiobo: ²⁸—¿Mitsicquidën chuibanta cac chuiquid dapabimboecquin mimbi chieque? Tantianu. Chui —capondash.

^{29,30}Adoquien: —Adembidi ¿Atotsi tantiaquin mimbi chuipe? Chui. Tantianu. ¿Matses mentondaidën, Uan padon Nuquin Papan

chuiamiacpadomboen nabanquinda nadiondash? Padenquo, quequin, ¿Ambibi tantiacpadomboen Uan padon naondash, quequinda mimbi tantiapeque? En chui. Tantianu. Aden mimbi chiac ëmbitsen mibi chiembi —capondash Esusën tsusiobo chuiquin.

³¹Aden Esusën chuisho tantiash udictsëc nidash isadaidbo tsusiobo onquec nadcuededpondash: —Nuquin Papan tantiamiacpadomboen Uan padon naondash, nuqui qesho tantiash, ¿Atotsieshun aidën chiaid tantienquo icconda? quetsiash Esus. ³²Naden Uan padon ambi tantiacpadomboen naondash, nuqui qesho tantiashun, ¿atotsi napatsiash Uanën chuisho tantiondaidon? Aidon, Nuquin Papan chuimiai Uan pado niondash, quequin tantiabededquin nuqui cuënoten seshunetsiash —quecuededpondash. ³³Aden chiec onquecuededashic —¿Tsuntsin tantiamiacpadomboen Uan padon nabampondash? quequin tantienquo iquembi —quepondash isadaidbo tsusiobo Esus chiec.

Adoquien: —¿Tsuntsin tantiamiacpadomboen Uan padon nabampondashba? quequin mimbi chienquo yacpadembi ëbi chuiquin tantiamequid mibi chienquo icoaimbi —quepondash Esus abi chieshënquido isadaidbo tsusiobo chiec.

Tied icbo nashunta quequin chiaid

(*Mat. 21.33-46; Duc. 20.9-19*)

12 ¹Aden chiasheic, isadaidbo tsusiobon nacpadomboen naid nec quequin tantiec utsi chiacbimboec Esus nadpondash: —Chuinu. Tanta. Icbon aton tiedën uba caiduidquo nitsinshun cueste bënitsinaidën otadnidec cuidian-cuidianec dadpen bacuëec. Sinash didiesho icbon bedec. Aid nitsinshun icbon daquënë uaic.

Aden daquënë uashun yuecshun uba
ënë chinun tsuc-tsucte nacnemposh.
Aden nacnenshun uba ampenushe
qeshun isec tabadte shubutsen shubu
uaposh. Aden aid shubu uash
nidnuequin abi tied nashunquid, Ista,
quequin chianec nidposh icbo.

²“Adec nidequi nidaid utsi yacno
choash yuec tabadash, Uba sinashe. Con
uba bedtan, cac, aton yua nidposh.

³Adec nidboed tied yacno chosho isun
tied icbo nashunquidon bedshun
cuestanquin menenquiocquin aton icbo
yacno nidmeoaposh. ⁴Adoacsho
isboshic, Uba bedtan, cac yua utsitsen
nidoaposh. Tied yacno chosho bedshun
cuestanquin aidtsen aton icbo yacno
nidmeoaposh tied icbo nashunquidon.

⁵“Adosho isash, Padi,
quenquiocquimbidi, Con uba bedtan,
cac yua utsitsen nidoaposh. Aidi tied
icbo nashunquidon cuesuneposh.
Adembidi, tied icbon nidmiaid
utsi-utsien abi tied nashunquidon
cuesosh. Aden nabanquimbi utsi-utsien
cuesuneposh.

⁶“Adsho isash tied icbo nadposh:
Nëid, con madombo abentsëqui nec. Ëbi
cudasaid nec. Aidi tsyuec con tied yacno
nidmembi. Aidi chosho isun, Tied icbon
madombo nec, qeshun bëdamboen
istsiash, qeshun aton madombo
nidmeposh.

⁷“Aden nidmiac ancuenquo chosho
isash, Tied icbon madombo choeque. Is.
Aton papa unësan aton papa yacpadec
icbo icoanushe qeshun tied icbo nuqui
icnun aidi cuesunenuna, quecuededposh
tied icbo nashunquido.

⁸“Adec onquetanquin aton icbon
madombotsen bedshun cuesuneshun
daquënë uaid mabudacquin nebudposh.
⁹Adoacsho tantiashun ðatotsi tied icbon
napec? Naden naindac. Utsibëd aton
tied yacno nidshun abi nashunuidboed

cuesuneshun utsibo abi nashunquido
icmendac —quepondash Esus.

¹⁰Aden chuishumbic Esusën:
—ËAdomboembidi chuiquin Nuquin
Papan dada uamiampid tantienquioda
icco? Nad iqueque. Tantia.

“Shubu uanuequidën buintad
isuidaidi utsin abia nitsinaid
icoaposh.

Adquiobidi Nuquin Papan
chuiimiaid matesën tantiauidaid
iquendac.

¹¹ Nuquin Papan naid bëdambo iquec.
Ambi Chomiaid abi yacno yuedquid
icmequin Nuquin Papan
nadatiambocquin naid nec
quequin abi tantiaquidënquo
tantiec”

—quepondash Esus Nuquin Papan
chiampidquo chieci. Nuquin Papan
shubu abentsëquën abi tantiaquido
yuedanquid nendac, quequin utsi
chiacimboeci abibi chiadquin Esusën
chuibampondash.

¹²Adsho tantiash, Ëbitedishun
isuidaidbimboecnuc chuibanec quequin
tantiec isadaidbo tsusiobo Esus
bedtiadquo icpondash. Adnubien Esus
onqesho dadpenshun
tantiabededpondash. Dadpen icsho isash
dacuëcuededec Esus bednu quenquo
yec nidanepondash chieshëmënkuido
isadaidbo tsusiobo.

**Bec cho quequin bedshunquid nec,
quequin chiaid**

(*Mat. 22.15-22; Duc. 20.20-26*)

¹³Isadaidbo tsusiobo nidshun
padiseyobo edodesbobëdta istuidshun:
—Nëidon Esus icsamboen chuimetsiash
—qeshun aido Esus yacno
nidmepondash. ¹⁴Aden nidmiac Esus
yacno choshon abentsëcshun Esus
nadopondash: —Ambia tantiaquid,
matesën tantiamiacpadpenquiocquid

mibi yec Nuquin Papan tantiacpadomboen chuibanquidien mibi nec. Adquid icquin ëbi chui. Tantianu. Shocosh piucquid bec cho quequin bedshunquid, isadaidpembo ancaquid, Sesad cuëmëdquid nec. ¿Aden meniaid bëdambo iquec, quequin Nuquin Papan chiaidta nepec? ¹⁵¿Adambi menepaba? —quepondash padiseyobobëd edodesbo Esus caic.

Adoaquien, Èbi icsamboen chuimenuc adeg onquec, quequin ambibi tantiec: —Shocosh piucquid bec cho ma isnu —quepondash Esus.

¹⁶Adsho tantiashun bëpondash. Adoaquien: —Sananquin isme. ¿Tsutsibimboecnuc dada uaid iqueque? Chui. Tantianu —capondash Esusën.

Adoaquien: —Isadaidpembo ancaquid, Sesadbimboecnuc dada uaid nec —quepondash.

¹⁷Adoaquien: —Ai, aidën na nec. Aid bec cho, qesho meneta. Adembidi Nuquin Papa Nuquin Icbo icquin, Nata, nacpadomboen naban —capondash Esusën.

Aden bëdamboen chuisho tantiash, Bëdamboenshenda tantiapec, quequin ambibi tantiec Esus chieshënquido tabadcuededpondash.

Abuc tabadequi, ¿mitsicquidën chido neque? chui quiaid

(Mat. 22.23-33; Duc. 20.27-40)

¹⁸Adnubien saduseyobotsen Esus yacno cho-chopondash. Unësaid uincuentiapimbo iquec quequin tantiaquido aido nepondash. Aido cho-choash nadpondash: ¹⁹—Moisesën dada uapampid nad iqueque. Tantia. chuinu. Chidochoquid bacuë tishmiabi yec unësan unësboedën chido aton utsin bedtequid nec. Aden bedshun ma bacuë tishmepanuna. Aden tishmiac unësaidën tishmiaidbimboec ma icpanuna, quequin chuiampid nec —quepondash

saduseyobo. ²⁰Aden chuishumbic: —Aden nata quequin Nuquin Papan chiaid icnuc, aton mado 7ted tishpondash. Abia tishaid canishun aton chido bedshun bacuë tishmiabi yec unëspondash. ²¹Adsho isun abi tsibanquidën aid chidobidi bedshun bacuë tishmiambo yec unësoapondash. Adembidi abi tsibanquidën ²²aton utsi unësan aid chidobidi bedshun tishmiambo yec unësoapondash bacuë nibëdquio yec. Adecbidi dadatedi unësbudnepondash. Adecbidi chidotsen unësoapondash. ²³Adec unësash abuc tabadequi, ¿mitsicquidën chido aid icpatsiashe? Chui. Tantianu —capondash saduseyobon Esus chuiquin.

²⁴Adoaquien Esus: —Nuquin Papan chiaid mimbi icsamboen tantiec. Adembidi ambi nadatiambocquin naid mimbi icsamboen tantiaoaic. ²⁵Nad iqueque. Tantia. Unësaid uincuenash abuc tabadquin chido bedesa nendac. Adecbidi aton champi bedmesa aton papa nendac. Nuquin Papan uaido mayan bëda unësesa yacpadquiec matses uincuenash unësesa iquec caidesa nendac. ²⁶Adembidi unësash uincuenaid tantianu qeshun ¿Moisesën dada uaid isenquioda ictionda? Aidën cuëtempa abibi nëdënqesho istanec nidtuidquin naded Nuquin Papa onqesho tantiapampic: “Min tsusedpabon Papa nebi. Abadauanën Papa nebi. Adecbidi Isaquën Papa nebi. Adecbidi Acobon Papa nebi,” quequin Nuquin Papan chuisho tantiampic Moisesën. ²⁷Nuquin Papan chiacpadpenquiocquin Moisesën dada uapampid nec quequin mimbibi muaquin chienda. Chuinu. Tantia. Unësaidën Papa nebi quesa Nuquin Papa nec. Nami chodquiaid icquin Nuquin Papa tantiatiapimbo iquec. Aton nami chodquenubi aton tantiate icsho ambi uincuen uatequido Nuquin Papan

tantiendac —quepondash Esus matses uincuente iquec quequin saduseyobo tantiamenuc.

Naden nata quequin chiaid ðmitsicquid adquidpadquid utsi nibëdpec? quiaid
(*Mat. 22.34-40*)

²⁸Adec Esusbëd saduseyobo onquecuedednubien tsusedpabon nadomboen nata quequin chiaid tantiamequid abentsëc chopondash. Bëdamboen Esusën saduseyobo chuisho tantiaish Esus icsamboen chuimenuc aidtsen: —Ëmbitsen tantianu. Chui. Nadomboen nata quequin chiaid Nuquin Papan dada uamepampid dadpen iquec. Dadpen icnuc, ðmitsicquid aidpadquid utsi nibëdpec? —quepondash.

²⁹Adoquien Esus nadpondash: —Nëid chiaidpadquid utsi nibëdeque. Chuinu. Tanta. “Nuquin Icbo Nuquin Papa nec. Nuquin Icbo Abentsëcquiobi iquec. ³⁰Adquid icsho ëbi tantiaquid isash bëdambo iquebi camequin Nuquin Papa tantiadoneta. Adecbidi ëbi yacpadecuidi icnu quenquoio yec Nuquin Papa bunacpadquieic icnu quec bëdamboec tabadta. Adembidi ambi tantiacpaden tantianu quequin adombota. Adembidi aid tantiaquin bëdamboen nabanquiota. ³¹Aden nabanquin Nuquin Papa bëdambo icmequin utsibo adembidi bëdambo icmequin nabanta. Ëbi tantiaquin utsibon ëbi nashuntiadquidi nec, mimbi cacpaden utsibo tantiaquin nashunta.” Aden nata quequin Nuquin Papan dada uamepampid nec. Aidpadquid utsi nibëdec —quepondash Esus.

³²Adoquien Esus icsamboen chuimenuc choboed nadpondash: —Mimbi chuiboed abimbo iquec. Nuquin Papa abentsëcquiobi iquec. Aidpadquid utsi nibëdec. ³³Adembidi, ëbi tantiaquid isash bëdambo iquebi

Nuquin Papa camequin tantiadoneta. Adecbidi mimbi tantiacpadomboen nainquoio yec Nuquin Papan tantiacpadquieic icnu quec bëdamboec tabadta. Adquid icquin ambi tantiacpaden tantianu quequin adombota. Adembidi abi tantiaquin bëdamboen nabanquiota quequin chuitequidpadquid utsi nibëdec. Aden Nuquin Papa bëdambo icmequimbi utsibo adembidi bëdambo icmequin nabanta. Ëbi nashuntiadquidi nec, mimbi cacpaden utsibo tantiaquin nashunta, quequin chuitequidpadquid utsi nibëdec. Aden naquid Nuquin Papan bëdamboen isendac. Aden naisa, Con na Nuquin Papa menenu, qesho Nuquin Papan bëdamboen istiapimbo iquendac —queoapondash choboed.

³⁴Aden choboedën bëdamboen chuioasho tantiaish: —Nuquin Papan shubu abentsëquën tabadaid mimbi bëdamboen tantiatsempoc —quepondash Esus.

Adoac Esus icsamboen chuimenu quetiapimbo icpondash utsibo.

ðTsuntsin mado Quidistu nepec? quiaid
(*Mat. 22.42-46; Duc. 20.41-44*)

³⁵Abi icsamboen chuimenuquid utsi nibëdnuc Nuquin Papa tabadte shubu uashunaidën tabadquimbi Esusën Nuquin Papan dada uamiampid chuibanquin nadopondash: —Nuquin Papan chomiaidquio tsusedpa Dabidën mado nendac, quequin tsusedpabon chiaid tantiamequidon chiec. ðAtotsi chuiquin naden chieque? Tanta. Chuinu. ³⁶Naden Nuquin Papan Mayanën Dabid chuimiampic:

“Icbo utsi icsho mibi chiembique.

Tanta, mado, quequin chiec Icbo Dapa nadpampic:

Ëquë con dayun abiucquio cainec tsadec cho ma mibi

chieshënquidtedi mimbi namiaid ma icpanu,”
 quequin chuipampic. ³⁷Aden Nuquin Papa icbo dapanquo aton dayunquo chomiaid chiec Dabid pado, Con icbo nec, quishic, ðmitsipadquiec, Con mado nec, queopampic? Nuquin Papan chometequid, aton mado, Dabidën icbo yec ðmitsipadectsi Dabidën tsyuecquid icoapec? —quepondash Esus abibi chiaequi.

Aden chiec onquesho tantiasb badedquo tantiatiadquo yampondash utsibo. Bëdamboen chiec, quequin comapenen tantiapondash.

Nuquin Papan chiaid tantiamequidon chuisho tantienda quiaid

(*Mat. 23.1-36; Duc. 11.37-54; 20.45-47*)

³⁸Aden tantiamequimbi Esusën nadopondash: —Tsusedpabon nadomboen nata quequin chiaid tantiamequidën chuibansho tantienda. Aido nadquid iqueque. Tanta. Tsusiobimboec isadnu quiasb abidasiuidaid ënapen icquid dasiuidtenequid aido nec. Adecbidi tantiaquidquo yec tsusiobimboec isadnu quiasb aton matses dadpen yacno capuquid nec. ³⁹Adomboembidi ëbi isoanu quiasb Nuquin Papan chiaid chuibante shubun puduedash tsusiobëd tsadec. Adomboembidi ismenu quiasb isedquido dadpen yacno choash shubu icbon dayunquo tsadoaic. ⁴⁰Aido bëdamboen nashumbimboen nianten na ampequid nec. Adembidi bëdambocquid nec camenuen yuen Nuquin Papa chiec. Adquid comapenen cuidtequid nendac —quepondash Esus.

Nuquin Papa tantiaquin nianten meniaid

(*Duc. 21.1-4*)

⁴¹Aden chiasb aton na bedtequid sandote tabëcaid tabadacno choash isec

Esus uano tsadpondash. Nuquin Papa tabadte shubu uashunaid tantiaquin nashunquidën nacnentsiasb quequin aton na bedtequid bë-bëquin sandobansho isec tsadpondash. Adecc tsadquin isquimbi aton na dadpen icquidën aton na bedtequid sando-sandonobi ⁴²aton na daëdpactsëcquidquo nianten choquimbi aton shocosh piucquid daëdquibictscquid sandopondash aton na utsi nibëdquiocnoc.

⁴³Adosho isun abëd icquido chomeshun Esusën nadopondash: —Abimbo chiembique. Tanta. Nianten aton na bedtequid dayun uanu quenquioctscquimbi Nuquin Papa tantiaquiquin sandoquidquo nec utsibon aden sandoenquiocnobi.

⁴⁴Utsibon aton na bedtequid dadpen uesenquiocquin sandobedposh. Aido daëdpactsëc icquid sandoacimboen sandoquido nec quequin tantiembi. Adquidpenquo nianten nec. ðBednun tedtsimbi dayunoape? quenquiocquin aton na daëdquibictscquid nibëdquiocnoc sandoposh nianten. Dadpen icquid sandoacimboen sandosho aid isembi —quepondash Esus.

Nuquin Papa tabadte shubu uashunaid chic-chicte chiaid

(*Mat. 24.1-2; Duc. 21.5-6*)

13 ¹Aden chianec Nuquin Papa tabadte shubu uashunaidën puduenubien: —Nuquin Papan shubu cuënote nacnenaid bëdaidquo iqueque. Is, Icbo —quepondash abëd icquid abentsëc Esus caic.

²Adoquien: —ðNëid shubu dapa isecta ne? Shubu uaquin cuënote dapa tsindonëdaid mimbi nëbi isaid chic-chicac nibëdquidendac —quepondash Esus.

Abitedi naimbudte tauanun ismete chiaid*(Mat. 24.3-28; Duc. 21.7-24; 17.22-24)*

³Aden chiasic auëshquio nidanec macuësh Odibos caid yacno tabadtuidpondash Nuquin Papa tabadte shubu uashunaid uano tsadnuc. Ambo tabadec abèd icquid 4ted icpondash. Petedo, Acobo, Uan, Andedes aideded icpondash. Utsibon tantienquiocnoc aidon: ⁴—Cuënote nacenaid nebudte mimbi chuiboed ùmitsipadèn nebudte icpeque? Tantianu. Èbi chui. Adembidi aidi tauanun ismete ùtatotsi icoapeque? Tantianu. Aid chuióa —capondash.

⁵Adoquien Esusèn nadopondash: —Muaquin chiaid tantiamane qeshun Nuquin Papan chiaid isban-isbanquiota. ⁶Nuquin Papan chomiaid nebi quec muaquid cho-choendac. Aid chosh, quequin chiac utsin-utsinquien, Abimbo caic, quequin tantiabededendac. ⁷Adecbidi cuesnancuededosh quendac. Adembidi cuesnancuededosh, quequin chuituidsho tantiaoaindac. Aden chuituidsho tantiash dacuëndenda. Ad icnuc abitedi naimbudte ushè choabi iquendac. ⁸Ai, adquio iquendac. Adashic abèd tabadquidobèdi cuesnancuededendac. Adecbidi abi ancaquid dapan, Cuestan, quequin nidmiac nidaid utsin icquidobèdi cuesnancuededoaindac. Adecbidi utsi-utsiec yacno nidaid ishcludendac canchednuec. Adecbidi bunquiqote iquendac. Aidedi icsamboshècquid taèyendac.

⁹“Adquid yanubi Nuquin Papan chiacpadomboen nabanec tabadta. Mibi bedshun, Icsambocquid neque. Cuidta, quequin tsusio utsibo menenun mibi buanendac. Adembidi bedshun Nuquin Papan chiaid chuibante shubuno buanacsho nuqui tsusiobon cuesendac. Adembidi bedshun isadaidpembo

ancaquid dapabo yacno buanaqui mimbi tantiaid Nuquin Papan chiaid mimbi chuibanendac. ¹⁰Nuquin Papa yacno yuedanquid iquec quequin mimbi chiendac. Nidaidtedi yacnoshon aden Nuquin Papa tantiaquidèn chuitiad. Aden chiabicnuc abitedi naimbudtiapimbo iquec. ¹¹Adembidi, Icsamboen naquid nec, quequin muaquin bedshun icsaqui cuidnuequid yacno mibi buanaqui ùtatotsimbi cape? quequin mimbibi tantiec tsadenda. Nuquin Papan Mayanèn mibi tantiamiacpadomboen mimbi chuibanendac.

¹²“Adembidi Nuquin Papan chiaid tantiesan aton utsimbo Nuquin Papan chiaid tantiaquid bedmec, Nèid cuesuneta, quendac. Adembidi aton papan aton bacuè cuesuneta, caindac. Adembidi aton bacuèbo tantiesa icquin aton papan chiaid niacquin adembidi aton titan chiaid niacquin cuesunemendac. ¹³Esus tantiaquid chieshènquid dadpen iquendac. Adquidèn mëyanaqui Esus tantiaquid nebi quec niaquesa icta. Aden niaquenquio yec unèsash Nuquin Papa yacno nidacsho bédambo icmiaid mibi iquendac.

¹⁴“Adnubien Nuquin Papa chieshènte ushè choendac. Aid chonoc Edusaden yacno abi chieshènquid dapa choash, Nuquin Papa caid nebi, quiash Nuquin Papa tabadte shubu uashunaidèn tsadendac. Adsho isash cuesunenushè quiash anoentsèqui icquido cuenenquicoboedi ma cuempanuna. Abimbo chiembique. Bédamboen tantiatia caimbi. ¹⁵Adecbidi shubu macano pada-padapambo yacno tabadquido yec umanuc dectatote uaid dectandoaidèn budanec con na bednu quenquio yec cuenta. ¹⁶Adecbidi aton tied nantan tabadquid yec aton dashcute

bëntsecquid chicshun dectanaid bednuec
 bidiadenquo yec badedquo cuenta.
¹⁷Bacuë usunquid adecbidi bacuë
 chishmequin buanquid badedquo
 cuentiapimbocsho mëyampec. Adquid
 tantiec utsibo unësquio icchitec. Nuquin
 Papa chieshënte ushë icsamboshë
 iquendac. Adnuc badedquo cuenta.
¹⁸Nuquin Papa chieshënte ushë icnuc
 ma ue dapa sequenquiocpanuna,
 quequin Nuquin Papa
 chuided-chuidedta. Adoac ma badedquo
 cuempanu. ¹⁹Comapenen Nuquin Papa
 chieshënquin abi tantiaquido icsa
 uaquin mëyanendac. Yuen naindac.
 Adoaidpadquid ënden nibëdondash.
 Adecbidi adoaidpadquid nibëdendac.
²⁰Nuquin Papa ëmenuen chuideneta.
 Nuquin Papa chuiquin, Chën, Papa,
 mimbi cainquiocnoc matsested
 nibëdtsiandac. Ëbi tantiaquid ambi
 cuënaido tantiec, Chën, quequin Nuquin
 Papan ëmendac. ²¹Nuquin Papa
 chieshënte ushë icnuc, Nëid, Quidistu,
 Nuquin Papan chomiaid neque. Isec cho,
 qesho tantienquo icta. ²²Aid ushë
 icnuc, Nuquin Papan chomiaid nebi,
 quec muaquid dadpen cho-choendac.
 Adecbidi, Nuquin Papan chuimaid nebi,
 quec muaquid dadpembidi iquendac.
 Nuquin Papan cuënaido ëbi tantiaquid
 icmenu quequin abi chieshënquidombidi
 nadatiambocquin nabanendac. Adosho
 isun ëbi tantiaquidëmbi utsin-utsinquien
 tantiauidtsendac adquid. Nuquin
 Papapenquo aid nec, quequin Nuquin
 Papambo tantiata. ²³Ad iquendac
 quequin chiombique. Ad icnuc
 chieshenquiocquin Nuquin Papan chiaid
 tantiaquiota —capondash Esusën.

Nuquin Papan madombo choaid
(Mat. 24.29-35, 42-44; Duc. 21.25-36)

²⁴Aden chiash abi onquec:
 —Adnubien Nuquin Papa chieshënte

ushë nidan inchëshquio yanendac.
 Badiadën ushëbëdtabi inchëshën
 chënquequid nibëdquiocnoc unës
 uaindac. ²⁵Adecbidi uispa
 paëdted-paëdtedendac. Adecbidi abuc
 tabëcaid nibëdnuc ambo icquido
 Satanasbëd icquido ïmitsimbo nuqui
 cuempeba? quendac.

²⁶“Adnubien Nuquin Papan madombo
 matsesaid ëbi choasho matsesën
 isendac. Abu ushun nadatiambo yec
 ushumbo yec bëdaidquio iquequi ëbi
 choasho isendac matsesën. ²⁷Adnubien
 Nuquin Papan uaido mayan bëdabo,
 Ëmbi nidtan, cac nidanendac. Nuquin
 Papan cuënaido bednuec nidaidtedi
 yacno nidaneshun bedbanash ëbi
 tsadacno choec, Bëombi, quetuidendac
 bedtanec choquido —quepondash Esus.

²⁸Aden chiashic: —Abi chiembique.
 Tantia. Suc seccuduquiac nëbi
 cunquecuenec, quequin matsesën
 tantiec. ²⁹Adomboembidi ëmbi
 chuibamboed tauadosho isash Nuquin
 Papa chieshënte ushë choeque. Ista,
 quec chuinanta. ³⁰Abimbo chiembique.
 Tantiata. Ëmbi chuibamboed
 naimbudabien nuc ëmbi chuibamboed
 tantiaquidën tsyuecquido
 naimëdbudenquo iquendac. ³¹Aden
 matsesën isnubien nidaidbëdi abu
 ënëdendac. Ëmbi chiaidtedi abimbo yec
 adquiouidi iquendac.

**Nëid ushënquo tauadoendac,
 quetiapimbo matses iquec quiaid**

³²“Adnuc nëid ushënquo Nuquin
 Papa chieshënquin tauaindac
 quetiapimbo matses iquec. Ambi uaido
 mayan bëdabo adecbidi quetiapimbo
 icoaic. Aton madombo yec adtiapimbo
 iquebi. Nuquin Papa abentsëcquibien
 adquid tantiaquid nec. ³³Aid tauadote
 ushë choaid tantiatiapimbocquin
 Nuquin Papan chiaid niacmane qeshun

isbanquin nabanta. ³⁴Nad iqueque. Tantia. Chuinu. Utsibo yacno nidnun abëd tabadquido naden chuiposh. Min utsibo chieshënenquiocquin shubu isquid icta quequin chianec nidposh. ³⁵Adec icbo nidan abi choate ushë mimbi tantienquio iqueque. Bëshunenquiocquin tantiaquiota. Inchëshbudtsëqui choapatsiash, quequin tantiaata. Adembidi inchëshpotsembo chopatsiash qeshun adembidi tantiaquiota. Adembidi, cachina cuëdanubi chopatsiash, qeshun isucunshun tantiadenequiota ³⁶ëmbi tantienquiocnoc con icbo chochitondac, qeshun. ³⁷Adquiecbidi bëdamboec tabadquin Nuquin Papan chiaid isted-istedta Nuquin Papa chieshënuquidën niacmenushe qeshun —quepondash Esus.

Esus cuesunete bunaid chiaid

(*Mat. 26.1-5; Duc. 22.1-2; Uan 11.45-53*)

14 ¹Adashic, bëyuc tishaid unëshmenuequid aton shubu datamenuequin Isadaidbo tsusedpabon nidaidën capuquid yuaded cuesunepampic. Aid tantiaid ushëbëdtabi pan bidisquesa tantiaid ushë Pascuas caid daëdec ushash choendac. Aid chonoshe qeshun isadaidbo tsusiobon Esus nibëmbededpondash. ²Aden nibënenec: —Pascuas ushë tantiec Edusaden yacno matses dadpen cho-choec. Matses dadpen choabicnuc ismenquiocquin Esus bedtiad. Bedsho isash, Padi. Bedenda, queuidash nëishun comapenen nuqui cuestasiashe —quepondash isadaidbo tsusiobo.

Esus unëshec qeshun nacbimboen noadte machiuinte chiaid

(*Mat. 26.6-13; Uan 12.1-8*)

³Adnubien Betania caid yacno tabadquin Esusën Simonën shubun

puduedshun pepondash. Simon daushacbimboecquid, nami mishac tantiadenquiocquid icsho Esusën bëdamiaid nepondash. Adec puduedshun pec tabadnubi comapenec noadquid bëec chido puudedpondash. Piucquid dadpen menequin comapenec noadquid bedquid chido nec. Ambi bedaid sedunte postichoquid dëusunaid dëchictanquin Esus chidon machiuimpondash.

⁴Aden machiuinsho isash utsibo nëishun: —¿Atotsieshun machiuino? ⁵Noadte menequin piucquid dadpen bedshun aton na nibëdquid dadpen menetsiandac —quec onquecuededpanëdash Esus machiuimboed chido chushcaic. ⁶Aden chushcasha tantiashien Esus onquec nadpondash: —Chushcainda. ¿Mitsanada nediosh? Ambi noadte machiuimboed bëdaidquio nec. ⁷Badiadquidën-badiadquidënquiec ënëdenquio yec aton na nibëdquid ënabi iquec. Aidi menenu qeshun mimbi menepec. Ëbien nashuntiapimbo iquendac. ⁸Ëbi unëshabicnuc nëid chidon tantiaquin chococanuequin nacbimboen noadte machiuimpaboc. ⁹Abimbo chiembique. Tantia. Nuquin Papan shubu abentsëquën tabadaid chuiquimbi ëbi machiuimboedën naidtsen tantiaquidon chuiben-chuibenendac —quepondash Esus.

Esus bedmembali, Udas quiaid

(*Mat. 26.14-16; Duc. 22.3-6*)

¹⁰Adnubien Udas Iscadiote, Esusbëd icquid abentsëc, Esus bedmenu, quianec isadaidbo tsusiobo yacno nidpondash.

¹¹Adec nidequi isadaidbo tsusiobo yacno choshon Esus mibi bedmembali quequin chuituidac bëdambo icpac caondash aido. Adembidi: —Esus ëbi bedmesho isun piucquid mibi menembali

—quecuededpac caondash. Adsho tantiash nidanec, ¿Mitsipadentsimbi bedmepe? quec tabadquin caimpac caondash Udasën.

Nidaidën capuquidded cuesuniaid abëd icquidobëdtan piaid

(*Mat. 26.17-29; Duc. 22.7-23; Uan 13.21-30; 1 Cod. 11.23-26*)

¹²Adashien penun isadaidbo utsibon nidaidën capuquid cuesunenubien: —Cuesuniaid pambid penu qeshun, ¿mitsishunquiembi nacnempatsia? —quepondash Esusbëd icquido.

¹³Adsho tantiash Esus abëd icquid daëd chiec nadpondash: —Edusaden yacno nidquimbi dadan acte bësho istuidash tsibananec aibdëdi nida.

¹⁴Aden aid tsibanec puduedash, ¿Ëbi tabadte quënë mitsimbo iquec? ëbëd icquidobëdtan penu, quiosh chuiquid, quequin shubu icbo chuita. ¹⁵Aden chiac buanshun decatatomeshun abuc quënë dapa mibi ismendac. Ambo pete sante cuate iquendac. Ashunquo penun nacenata —quepondash Esus ambi daëd chuimiaid caic.

¹⁶Aden chiac abëd icquid daëd Edusaden yacno nidquin Esusën chiacpadomboen bëquedshun tsibananash puduedshun penun nacnempodash.

¹⁷Adnubien inchëshbudtsëqui aid daëdtsëqui yacno Esusbëd icquid utsibo chopondash. ¹⁸Adec choash pec tabadnubien: —Abimbo chiembique. Tantia. Èbëdtan pequid abentsëcshun isadaidbo tsusiobo ëbi bedmendac —quepondash Esus.

¹⁹Adsho tantiash, Icsambo iquec, quequin tantiec: —¿Ëbida chienquo ique? —quepondash abëd icquidtedi.

²⁰Adoquien: —Mibëd icquid nebi, quec mibitedi. Padnuen abentsëcshun ëbëdtambi pete cuëshën ënë punshun

pequidën ëbi chieshënquido bedmendac. ²¹Nuquin Papan chuimiapadomboen aton madombo chidon tishac matsesaid ëbi unës uate anoentsëqui yanec. Ëbi bedmequid icsamboshë iquendac. Abi cuidte icsamboshë icnushe qeshun aidi tishenquiocpatecnëdan —quepondash Esus.

²²Adashic pebededquin pete bedshun Nuquin Papa chiec onquetanquin pete cuësh-cuëshun abëd icquido menebanquin: —Nëid pete cuëshë ëmbi piaid con dadabëd daëdacpadquiec Esus unësash abi tantiaquid ëbi icnuc Esus ëbëdi iquec quequin tantiata —capondash Esusën.

²³Adembidi dëshote bedshun uba caid actequid icnuc Nuquin Papa padpiden chuishun abëd icquido menebanac acpondash.

²⁴—Nëid acquin Esusded Nuquin Papan cuidac aton intac siebudpamboec unësposh. Aton madoded cuidshun Nuquin Papan ëbi padenquo iquec quequin nëid acquin tantiata. ²⁵Uba caid ënë nidaidënshun padpiden aquenquiocquimbi Nuquin Papan shubunshun actequid chuca mibëdtambi aquendambi —quepondash Esus abëd icquido caic.

²⁶Aden chiasch Nuquin Papan naid chiec cuëdënanec macuësh Odibos caid yacno nidoapondash.

Esus tantiesa nebi quequin Petedon chuite chiaid

(*Mat. 26.30-35; Duc. 22.31-34; Uan 13.36-38*)

²⁷Adshumbic Esusën: —Esus tantiaquid nebi quesa mibitedi nendac. Nuquin Papan chiampidpadquid mibitedi nad iqueque. Chuinu. Tantia, mibi.

“Abi tantiaquid bëyucanquin yuedquid unës uaimbi. Adosho

isash abëd icquido cuenec
cuëshëd-cuëshëndac,”
quequin Nuquin Papan chuiampid nec.
²⁸Unës uac uincuenash Cadidia yacno
ëbia nidoaindabi. Mibitsen ambo nidta
—capondash Esusën abëd icquido
chuiquin.

²⁹Adoaquien: —Esus tantiaquid nebi
quenquo utsitedi icnuc ëbien
padenquo iquec —quepondash Petedo.

³¹Aden Petedon chuisho tantias:
—Abimbo chiembique. Tanta. Nëid
inchëshëmbi cachina bënë daëdec
cuëdanabicnuc Esus tantiesa nebi,
quequin mimbi tedesteden chiendac
—quepondash Esus Petedo caic.

³¹Adsho tantias: —Esus tantiaquid
mibi icsho mibi aibdëdta unës uaimbi,
cac, Esus tantiesa nebi, quenquo
iquendabi —quepondash Petedo
comapenec onquec. Adecbidi Esusbëd
icquidtedi onquepondash.

**Quetsemani caid yacno choash
tabadaid chiaid**

(Mat. 26.36-46; Duc. 22.39-46)

³²Adashic cuëte odibo caid dadpen
icsho Quetsemani quequin cuënacno
choash nidtuidash: —Nuquin Papa
chuinuac udi nidebique. Nëmbobi tabad
—quepac caondash Esus abëd icquido
caic.

³³Aden chianec Petedo, Acobo, Uan
nëidted cho quianec bëyucanec nidec
Esus, Matsestedi icsaid cuidtequid ëmbi
bedshunsho isun Nuquin Papan ëbi
istiapimbo iquec, quequin tantiec
unësquioshë yampondash. ³⁴Adquo
iquec: —Ëbibi unësquioshë yec udictsëc
nidebi. Chieshtomane qeshun nëmbobi
tabadquin Nuquin Papa chuiban
—quepac caondash Esus ambi nëid
3ted, Cho, caboed chiec. ³⁵Aden chianec
udictsëc nidash Nuquin Papa chuinuac
nidaidën uebudash uec onquec:

—¿Adabi adquid icmenquioctsia? Papa
—quepac caondash Esus Nuquin Papa
chiec. ³⁶Aden chuishumbic: —Papa,
mimbi natiapimbo ictequid nibëdec.
Adquid icquin matses cuidtequid
bedshunquid con mado icmenquo
iquembi qeshun mimbi
adoenquioctsiandac, Papa. Ëbi
bunacpaden nainquiocquin mibi
bunacpadomboen natin, Papa —capac
caondash Esusën Nuquin Papa chuiquin.

³⁷Aden chiasch choquin abëd choboed
3ted icquid usho istuidec Petedo caic:
—Simon, ¿ushecta ne? ¿Ëbibi
chieshmane quiasch yuecpectsëc iquec
ushenquo yec tabadtiapimboda icco?
³⁸Chieshmane qeshun Nuquin Papa
chuita Nuquin Papan chiaid
niacmenuequidën Satanas caidën chiaid
tantiamane qeshun. Chieshenquo
iquebi quiasch dacuëdash badedquo mibi
chieshendac —quepac caondash Esus.

³⁹Aden chiasch ambi Nuquin Papa
chuibocno nidoashun ambi
chuibocpadembi Nuquin Papa Esusën
chuiuoapac caondash. ⁴⁰Adtanec
choashumbic abëd chobedo adecbidi
ushacsho istuidoapac caondash.
Ushcasquiec tabadec, Ushenquioccobi,
quequin chuitiapimbo yec otacquo
tabadpac caondash.

⁴¹Adnubien padpidec nidoashun
Nuquin Papa chuiotanec choec:
—¿Uimabudashta tiboquec ushec ne?
Padi. Ushenquo yec isucun. Nuquin
Papan madombo chidon tishac matsesaid
ëbi icsho nëmbobi ëbi chieshënuquidon
bedmeque. ⁴²Nidtoash ëbëdi nid. Ènden
choaye. Is —quetuidpac caondash Esus
abi bednuac choquido isec.

Esus bedshun buante chiaid
(Mat. 26.47-56; Duc. 22.47-53; Uan 18.2-11)

⁴³Aden chuinubien Esusbëd
icboedquibi Udasbëd matses dadpen

cho-chopondash. Cho-choquid utsi-utsiec chështe sanampamboec chonobi utsi cueste sanampamboec chopondash. Aided Udasën chiac isadaidbo tsusiobon chomiaido nepondash.

⁴⁴Esus bednuequid tantiamenuen ambiabi Udasën: —Ëmbi tanchoccaid mimbi bedtequid nendac. Aidquiobi bedshun buanta. Cuenushe qeshun bédamboen ista —capac caondash. ⁴⁵Aden chiashic aidobëdi choquimbi: —Icbo —quequin Udasën Esus tanchoccatuidpondash.

⁴⁶Aden Udasën tanchoccasho isun Esus bedpondash. ⁴⁷Adnubien anocquid abentsëcshun chështe sananquin isadaidbo tsusio dapan ancaidën pabiate auc abentsëc pateshunepondash.

⁴⁸Adnubien: —¿Cuesanquid Esus nec, qeshun utsin cueste sananubi utsibon chështe sananec ëbi bedecta cho-choec ne? ⁴⁹Badiadquidën-badiadquidënquiec Nuquin Papa tabadte shubu uashunaid umanuc daquënë uaidën tabadquin matses tantiamenuen chuibaniombi mibitedi tabadnubi. Ambo icshobi ¿atotsieshumbini mimbi bedenquiocpo? Nuquin Papan chiacpadomboen nëbi mimbi ëbi bedec, —quepondash Esus abi bedquido caic. ⁵⁰Adec onquesho tantiashun cuenquin abëd icquidtedishun Esus niampondash.

⁵¹Adec cuenubini nëbi caniquid yequi Esus tsibananec nidpondac. Dashcute isad-isadquid dasiuidanec nidquin Esus tsibampondambi. Aden tsibanshobi Esus chieshënuquidon bedpondashi. ⁵²Aden bedac dasiuidte bëdaidquio nianec dadaidquio cuempondabi.

**Isadaidbo tsusiobo iccuededacno
Esus buante chiaid**

*(Mat. 26.57-68; Duc. 22.54-55, 63-71;
Uan 18.12-14, 19-24)*

⁵³Adnubien, isadaidbo tsusio dapa, matses tantiec Nuquin Papa chiec

onquequido yacno Esus buampondash. Aden buanec puduednu quiacnombobi isadaidbo tsusiobo utsibo iccuededec tabadpondash. ⁵⁴Aden Esus buanubi tsyuec choquin Petedo cuemboedën tsibananec isadaidbo tsusio dapan shubu umanuc daquënë uaidën puduedpondash. Adec puduedash Esus cuenushe quequin isquido tabadacno ambotsen cuëte cuëc tsadpondash Petedo. ⁵⁵Adec Petedo tsadnubien Esus unës uate bunquin Esus icsambocquid nec quequin chuiquid ¿Ada icpec? quequin nibënquin adquid tsusiobon istuidabicpondash. ⁵⁶Abimbo chiacbimboen dadpeshun chuibededpondash. Aden chuiquin abentsëcshun chiacpadomboen chienquiocquin utsin chuiopondash.

⁵⁷Adnubien, Chuinu. Tantia, qeshun Esusën chiacbimboen utsi uain chuipondash utsibon. ⁵⁸Aden chuinubien utsi onquec: —Naden Esusën chuisho tantiombique. Tantia. Chuinu. “Nëid, Nuquin Papa tabadte shubu uashunaid chicbanendambi. Aden chicbanshumbic daëdec ushquin matsesën naidpenquio isadnuc ëmbibi naindambi,” quequin Esusën chuipondash —quepondash utsi. ⁵⁹Aden abentsëcshun chuinubi utsin aden chienquiocquin chuipondash.

⁶⁰Aden chuisho tantiash isadaidbo tsusio dapa nënantanquio nidtoash nidquin: —¿Mimbi chiacpadomboen chiecta nec? ¿Abimbo chuiquidta nëidtedi neque? Chui. Tiantianu —capondash isadaidbo tsusio dapan Esus chuiquin.

⁶¹Adsho tantiash ëcbedenquio yec otacquio nidsho isash: —¿Nuquin Papan chomiaidquio, Quidistu caid, Bëdambocquidën mado nebi, quecta mibi ique? —queopondash isadaidbo tsusio dapa Esus caic.

⁶²Adoaquien Esus: —Ai, aidi nebi. Nuquin Papan madombo matsesaid abuc nidoashic Nadatiambocquidën dayun abiucquio tsadash abu ushun ëbi chosho matsesën isendac —quepondash Esus.

⁶³Adsho tantiash, Icsamboen chiec, quec abi daëd dasiuidaid bëntsecquid dached-dachedquiash: —¿Atotsieshun Esusën icsamboen naosh, quequin chuimenuen utsi nibëmpe nuqui?

⁶⁴Nuquin Papa icsamboen Esusën chuisho mimbi tantioc. ¿Midapaden mimbi chieque? Tiantianu. Chui —capondash isadaidbo tsusio dapan tsusio utsibo chuiquin.

Adoaquien: —Icsambo iqueque. Unës uametiad —quecuededpondash.

⁶⁵Adsho tantiashun Esus dacuishtuquin utsibon tauapondash. Adotanquin dashcuten bëpucshun ambibi cuestanequi: —¿Tsuntsin mibi cuesposh? Comapenen tantiaquidquo mibi neque. Èbi chui. Tiantianu —capondash Esus chuiquin.

Adnubien cuenushe quequin Esus bedshun sondadon comapenen cuesbededpondash.

Esus ëmbi tantiacmaidquo nec quiaid

(*Mat. 26.69-75; Duc. 22.56-62;*

Uan 18.15-18, 25-29)

⁶⁶Adnubien Petedo umanuc daquënë uaidën tsadnubi isadaidbo tsusio dapan yua chido chopondash. ⁶⁷Choshon Petedo cuëte cuëec tsadsho isun: —Nasaded caid yacnocquid Esusbëd icquid mibi nec —capondash.

⁶⁸Adoaquien, Esusbëd icquid nebi, quetiapimbo yec Petedo: —¿Atotsi mibi quepe? Tantienuo yec tsadebi —quepondash.

Adtanec puduedte shëcuë anoentsëqui nidtuidash tsadnuc cachina bënë cuëdpondash.

⁶⁹Adec Petedo ambo tsadsho chido yuaidën istuidtanquin padpiden: —Esusbëd icquidquo nëid nec —quequin anocquido chuiopondash.

⁷⁰Adoaquien: —¿Aidbëd icquidtabi nedi? —quepondash Petedo.

Adnubien yuecpectsëc yash: —Aidbëdi Cadidia yacnocquid mibi nec —quepondash ambobidi tabadquido.

⁷¹Adoaquien: —Èmbi tantiacmaidquo nec quequin abimbo chiemi. Èmbi abimbo chienquo icsho ma ëbi chian anëdënquiacno Nuquin Papan nënapanuna —quepondash Petedo comapenen chiec.

⁷²Adnubien cachina padpidec cuëdpondash. Adsho tantiashun, “Cachina daëdec cuëdabicnuc ëmbi tantiacmaidquo Esus nec, quequin mimbi chiendac tedestedec onquequin,” quequin Esusën chioshi quequin tantiec unësquo yanec shubianquiopondash Petedo.

Pidato yacno nidshun Esus meniaid

(*Mat. 27.1-2, 15-31; Duc. 23.1-5, 13-25;*

Uan 18.28-19.16)

15 ¹Badiadnuc isadaidbo tsusiobo iccuededpondash. Nëidted icpondash: isadaidbo tsusio dapabo, tsusio utsibo, tsusedpabon nadomboen nata quequin chiaid tantiamequido. Adec iccuededash onqueshun Esus mëtaneshun buanshun isadaidpemo ancaquid Pidato caid menepondash. ²Aden meniac Pidato: —¿Isadaidbo ancaquidta mibi neque? Èbi chui. Tiantianu —capondash Pidonon Esus chuiquin.

Adoaquien: —Mimbibi aden chuipayoc —quepondash Esus.

³Adnubien, Esus icsaded-icsadedosh, quequin chiec isadaidbo tsusiobo onquecuedednuc cuëdenquo yec Esus tsadpondash. ⁴Adec tsadsho isun:

—¿Ëcbedanenquio yec otacquioda tsade? Mibi icsaid dadpen nëidon chuiabanec —Pidaton caqui ⁵adquiecbidi Esus tsadpondash. Adec tsadsho isash ¿Mitsipadquidquio Esus nepec? Utsimbien, Icsapenquiocquid nebi, quequin chuipec, Aden chienquio Esusën iquec, quequin ambibi tantiec Pidato tsadpondash.

⁶Adashic, isadaidbon nidaidën capuquidded cuesunepampid tantiaid Pascuas caid ushë choaidën-choaidënquien, Quënën nauedmiaid abentsëc nidmenu. ¿Mitsiquidimbi nidmepeque? Chui. Tantianu, quequin isadaidbo Pidaton chuided-chuidedpadenec. Adoquien ismequin, Nëid nidme, cac nidmedenepadenec. ⁷Aden chuidenequin ambi quënën nauedmiaid Badabas cuëmëdquid nepondash. Aidëmbi utsibobëdtan Domanobo bunenquiocquin cuesquin tauasho isun bedmeshun quënën nauedmepac caondash. ⁸Adnubien Pidaton seta utsin quënën nauedmiaid abentsëc ambi nidmiondacadpen nëbi adquid utsi nidmepatsiash icnui quequin tantiec Pidato yacno chopondash isadaidbo iccuededquido. Aden tantiec choash: —Quënën nauedmiaid abentsëcta mimbi nidmepatsia —quecuededpondash aido Pidato caic.

⁹Adec onquesho tantias Esus nidmetiadquiocquin Pidaton: —Mibi ancaquid caid, Esus, nidmependambi iqueque. Isadaidbon, ëbi chui. Tantianu —capondash. ¹⁰Esusbidi tsusio icpec mates quenushe quiash isadaidbo tsusiobo Esus unës uate bumpec quequin tantiaquin Pidaton aden chuipondash. ¹¹Aden tantiec, ¿Adambi Esus nidme? quequin Pidaton chiac, Padi. Badabas nidmeta, quequin isadaidbo iccuededquin chuipondash

aton tsusiobon chiacpadomboen. ¹²Aden chuibededaquien: —Badabas nidmequimbi mibi ancaquid caid Esus ¿atotsimbi napeque? Chui. Tantianu —capondash Pidaton.

¹³Adoquien: —Cueste nitsinshun dectan —quec comapenec cuëdcuededpondash isadaidbo.

¹⁴Adoquien: —¿Atotsi icsa uaosh? —quepondash Pidato.

Adoquien: —Cueste nitsinshun dectan —queoaic comapenec cuëdcuededpondash.

¹⁵Adsho tantias Esus ëmbi nidmesho isun, Pidato icsambocquid nec, quequin ëbi chuiquid dapa isadaidbo tsusiobon chuiushe qeshun Badabas nidmepondash. Adshumbic: —Cueshcaten Esus comapenen cuesmebededshun cuesten dectanun buanec nid —capondash Pidaton sondado chuiquid chuiquin.

Sondadon Esus mamënshumbedaid chiaid

¹⁶Adoac Esus bedshun Pidaton shubu umanuc daquënë uaid yacno sondadon buampondash. Aden buanshumbien sondado utsibo 600ted icnuc chomepondash. ¹⁷Choshon dashcute abichobicquid bëdaidquio bedshun ancanquid dasiuidacimboecnuc dasiuinshun pinchuc-pinchucquid mauete uashun Esus matoncashun ¹⁸ancanquid cuënacpaden cuënëc: —Mibi isash bëdambo iquebi. Isadaidbo ancaquid dapa caid mibi neyoc —quequin Esus oncaic onquecuededpondash sondado. ¹⁹Adoquimbi ancanquidën sanante cueste bëdaidquibimboecnuc sananquin sondadon abentsëcshun-abentsëcshunquien Esus macuestanquin dacuishtucabudniash Esusën taëno danëshën sebudash

uepondash. ²⁰Aden mamëshumbededquin mëyanshun dashcute bédambocquid ambi dasiuimboed dachichshun aton dashcutebi dasiunshun cuesten dectanuequin Esus buampondash.

Esus cuesten dectante chiaid
(*Mat. 27.32-44; Duc. 23.26-43;*
Uan 19.17-27)

²¹Aden abi dectante cuate Esusën buantiapimboenoc nidquimbi abi datanquid cuate chiadtometanquin buamepondash sondadon. Abi datanquid Sidene caid yacnocquid nëbi Edusaden caid dëuequiacoësh choquid nepondash. Adecandedo, Dupo chedon papa Simon cuëmëdquid niøndash.

²²Aden cuate Simonën buanubi macuësh Codocota caid yacno abitedi chopondash. Macuësh mapi canitebimboecsho Codocota quequin isadaidbon aton onqueten cuëmpondash. ²³Ambo choshon uba sicaid paëacsho paëmbocquid dauë cacushtanquin meniäc aquenquicopondash Esusën. ²⁴Aden isuidsho isun cuesten dectampondash. Aden dectanshun aton dashcute bednu quequin sondadon abi cuëmëdquidtedi dada uabanshun tēchun sandoshon cadotanequin dada uatsaidēmpi puduemaiid isbanquin Esusën dashcute bedbampondash.

²⁵Ushë dectatoec 9 yanuc Esus cuesten dectampondash. ²⁶Esus dectanaid mapino dada uaid cuate podectanaid diadpondash. Isadaidbo ancaquid nec quequin dada uaid nepondash. Esusën naden chiosh quequin isadaidbo tsusiobon chiacpaden dada uaid nepondash. ²⁷Cuesunetanquin ampequid daëd ëquë dectambudcuenshun nënantanquio Esus dectampondash. ²⁸“Dectanquin

icsaquidbēdta dectanendac,” quequin Nuquin Papan chuimiampicpadembi napondash. ²⁹Aden Esus dectanaid mapino abuc: “Isadaidbo ancaquid nec” quequin dada uaid podectanaid diadsho isash, Adquidshenda diadpec, quequin tantiaquin datanquin mamëshumbededpondash. Adec cuenquin mamëshunquin: —Nuquin Papa tabadte shubu uashunaid chiebanshun daëdec ushquin chuca uaimbi, quequin chiec mibi onquiondaque. ³⁰Abimbo chuiquid yec unëstiapimboquid nebi quianec mibibi budta —cabidanepondash.

³¹Aden cuenquidën chuinubi ademibidi isadaidbo tsusio dapabotedi tsusedpabon nadomboen nata quequin chiaid tantiamequid chedo onquecuededec: —Utsi-utsien bēdamequimbi utsi unēsacsho uincuemboed yec mētoccaid abembi chiquidtiapimboquid nec —quepondash isadaidbo tsusiobo Esus caic. ³²—Quidistu, Nuquin Papan chomiaid, isadaidbo ancaquid nebi queboed mibibi bud. Mibi budaid isash, Quidistu nec, quequin tantiendambi —quepondash. Aden cuenquidën mamëshunubi abēdta dectanaidën ademibidi chuiopondash.

Esus unēs uate chiaid
(*Mat. 27.45-56; Duc. 23.44-49;*
Uan 19.28-30)

³³Adnubien ushë cuembocnoc 12 yanan inchëshquio icboedi ushë budec 3 yanuc uëshëmbo yanoapondash.

³⁴Ushë 3 yanuc: —Eloi, Eloi, ðlama sabactani? —quequin aton papa chiec Esus comapenec cuëdpondash. Aton onqueten: Papa Edoen, ðatotsieshumbini bidiadquin isenquio ique? quec adpondash Esus.

³⁵Aden Nuquin Papa Esusën chuisho tantiaquido, Nuquin Papa cuënëc,

quenquo yec: —Edias cuëneque. Tantia —quepondash.

³⁶Aden tantianubi badedi titinqeshun sicaid mucambocquid nēcushtanquin puntanquin cüeste dēdectanshun acmenuequin ēccüescadonequi: —Chiata. Edias Esus bedec chonoshe caimbono —quepondash.

³⁷Adnubien comapenec cuēdec Esus unēsbudpondash.

³⁸Esus unēsbudnubi abi inchëshac bimboecnubi Nuquin Papa tabadte shubu uashunaid quënë uaid nuntan dectanaid dashcute bitsipambocquid tsincabudquin dectanac diadquid canchedbudcuempac caondash tembi daēdquio yec. ³⁹Adec Esus cuēdbud-cuēdbudec unēsō isash: —Abimbo chuiquid niosh. Nuquin Papan madombo nēid nec —quepondash sondado chuiquid uquē tsadbudec.

⁴⁰Adnubien ancuenquo isec chidobo nēidtedi tabadpondash: Madia Mactada caid yacnocquid; Madia utsi, Acobo bushcuctsēcquidēn tita, aidi Osen tita nepondash. Utsibic Sadome nepondash. Aidon Esus ancuenquo diadsho isbededpondash. ⁴¹Aidon Esus Cadidia caid yacno capusho isun abi nashumboedo nepondash. Aidobēdtan isquido chido utsibo Edusaden yacno choshon Esus buansho isun tsibanquido icpondash.

Esus chococate chiaid

(*Mat. 27.57-61; Duc. 23.50-56; Uan 19.38-42*)

⁴²Adashic biednes ushē budtsambi: —Inchëshbudtsēqui seis icnuc chonoadtemaid ushē chonoshe Esus unēsōshe chococatanu —quianec Esus tantiaquid utsi nidpondash. ⁴³Aidi, Ose Adimateya caid yacnoshon tishaid

Pidato yacno nidpondash. ⁴⁴Adec nidshun: —Esusën dada bedshun chococatiadquio iquebique. ¿Ada buantan mihi quepe? —caquien, ¿Ēndenda unēsaccosh? quequin tantiesa icquin sondado chuiquid Pidaton chomeshun: —¿Ada Esus unēsōsh? —capondash.

⁴⁵Adoac: —Ai —quesho tantiashun: —Ai, bedshun buanta —capondash Pidaton Ose chuiquin.

⁴⁶Adoac nidshun unēsaid dabiadiate bedshun Esusën dada imbudshun dataneshun macuësh dapa cuēnote shēcuē uaquin ambi nacnenaidēn nauedshun cuēnote dapan bētashpondash. ⁴⁷Aden Osen Esus chococasho Madia Mactada caid yacnocquidbēdtambi Madia, Ose utsin titan ispondash.

Esus uincuenta chiaid

(*Mat. 28.1-10; Duc. 24.1-12; Uan 20.1-10*)

16 ¹Aden isashic sabado chonoadtemaid ushē inchëshbudtsēqui seis icnuc naimēdnubi Madia Mactada yacnocquid; Madia, Acobon tita; Sadome aitedi nidshun aton na bedtequid menequin comapenec noadte dadpen bedpondash Esus danoshcanuequin. ²Bedtsash badiadtsēcnuubi dominco ushē caidēn Esus chococacno nidanequi: ³—¿Tsuntsin cuēnote shēcnepeba? —quec onquecuededpac caondash.

⁴Adec onquequin ancuenquo isquien cuēnote ēnden shēcniac. Cuēnote dapa yuēmboquid nepondash. ⁵Aden isequi nidash chococaid shēcuēn puduedquin isaquien dada nēbi caniaid dashcute ushumbocquid dasiuidash abiucquo tsadpondash. Aidi isash dacuēdcuededec tabadpac caondash chidobo.

⁶Adec dacuēdec tabadsho isun: —Dacuēdenquo yec tabad. Esus

cuesten dectanaid mimbi nibënaid tantiembi. Uincuenash nidac. Nëmbobi nanac ueuidoshe. Is. ⁷Nadoshi: “Cadidia caid yacno ëbia nidebi. Ambo nidshun ëmbi chiacpadomboen mimbi ëbi isendac, quiosh quequin nëmbo choacsho isun chuita,” Esusën caoshi. Nëbi ëmbi chiacpaden Petedo Esusbëd icquidquio utsibobëdta chuituidec nid —quepondash nëbi caniquid chidobo chiec.

⁸Aden chuisho tantiash uedëquequi chococaid shëcuënuësh puduenanec titinquec dacuëdec onquenquio yec nidanepac caondash chidobo.

Esus abuc indote chiaid

(*Mat. 28.16-20; Duc. 24.13-53;*

Uan 20.11-23)

⁹Adnubien abi nibëmboed uincuenashun Madia Matcada caid yacnocquidba Esusën ismetuidpondash. Ambi mayan icsa 7ted dapuduemaiad Madia Mactada yacnocquid nepondash.

¹⁰Aden ismiac Esusbëd icboedo yacno nidash puduedshun aido shubisho Esusën abi ismiaid Madian chuituidpondash. ¹¹Esus uincuenash capusho isombi, Madia qesho tantiash, Aidquio mimbi isambo iquec, quec tantienquio yec tabadcuededpondash.

¹²Adashic tantienquio yec tabadboed dada daëd Edusaden yacnoësh podquedën nidsho Esusën chinumpondash. Chinunanec aidobëd nidanec puduedshun ismebempac caondash Esusën. ¹³Aden ismiac aid daëdi aucbidi Edusaden yacno nidshun ambi isboed chuiopondash. Adembidi tantienquio icoapondash utsibon.

¹⁴Adashic, abëd icquidquio 11ted pete sante cuesten tabadnubi Esus

chopondash. Adec choshon: —Uincuenac quequin ëbi isquidon chiaid tantienquio mimbi icpoc. Chobique. Is —capondash Esusën.

¹⁵Adashic: —Nëbi nidaidtedi yacno nidaneta. Adec nidshun Nuquin Papan shubu abentsëquën tabadtequid iquec, quequin matsestedi mimbitsen chuiban.

¹⁶Aden chuisho tantiaquid, Èbi cuidenquocquin Esusded Nuquin Papan cuidpanëdash. Adoac ëbi icsaid ënu, quequin ismenuequin acten mentomiaid abi yacno Nuquin Papan puduedmendac.

Tantiesain Nuquin Papan cuidendac abi yacno puduedtiapimboconoc. ¹⁷Abi tantiaquid utsi-utsien Nuquin Papan nadatiambocquin nabanquid icmendac.

Adquid icmiaidën ëmbi nacpaden mayan icsa dapuduemendac. Adembidi, utsi onquiaid tantienquicboedëmbi tantiaquin ëbi chuibanendac.

¹⁸Adecbidi, nisinquio piaqui bidisquenquio iquendac. Adecbidi, unësmenuequin acmiaqui unësenquio iquendac. Adembidi, utsi unëstsensho mishac bëdanendac. Nuquin Papan nadatiambocquin namiaidënquio adobanendac —quepondash Esus.

¹⁹Aden chuiquin ënacsho Esus abuc buanaqui Nuquin Papan dayun abiucquio Esus tsadtuidpondash.

²⁰Ambo tsadquimbi nadatiambocquin namiac nidaidën tabadquimbi abëd icquido nidaid utsi-utsiec yacno capuquin Nuquin Papan shubu abentsëquën tabadaid chuibenepondash nadatiambocquin nabanquimbi.

Èmbi abimbo chuibodquio mimbi isec aidquio tantianeta. Padi. Aidtedi dada uaombi.

DUCASËN DADA UAID

Mibi ismenuequin dada uaquid Ducas nebi.

1 ¹Utsin-utsinquier ambi naidbëdtabi Esuquidistu chuibanquin dada uaid dadpen iquec. ²Aidon Esuquidistun tauain naidbëdtabi ambi naid utsitedi isted-istedquin chuibanquin chiacpaden dada uaidtedi nec. ³Esuquidistu chuibanquin dada uaid isbanquimbi Esuquidistu isnëdaidon chuibanaid tantiashun aitedi mibi chuibanquin dada uaimbi, chuiquid dapa, Teyopido. ⁴Abimbo iquec quequin ëmbi dada uaid ma tantiapanueshun mibi chuiquin dada uaimbique. Isec onqueta.

Uan, acten mentoanquid tishte chiaid

⁵Nidaid Udeya caid yacno Edodes cuëmëdquid ancanquid icnubien Nuquin Papan namiaidquio Sacadias cuëmëdquid icpanëdash. Aidi, Abiasën tsyuecquid Adonën tsyuecquidbidi nepanëdash. Aidi, Nuquin Papa tabadte shubu uashunaid nuntanshun nashunquid icpanëdash. Aidën chido Adonën tsyuecquidbidi icpanëdash. ⁶Aton bënëbëdi Nuquin Papan chiaid tantiaquin naquidquio icpanëdash. Adquid icsho Nuquin Papan bëdamboen isaidquio aid daëdi icpanëdash. ⁷Edisabed bacuë tishesa icpanëdash. Adquid yequi aton bënëbëdi tsusio budpanëdash.

⁸Adashic, Nuquin Papa tabadte shubu uashunaid nuntanshun nabanuec

padpidemboec Sacadias puduedpanëdash. ⁹Ambi noadte bëda tauite ushë chonoc Sacadias aid shubun puduedpanëdash. Ënden abipadquid utsibobëdtan abi cuëmëdquid-cuëmëdquidquier dada uashun dada uatempï tëchun sandoshon cadotaniac ambi dada uatsaidëmpi abia puduenacsho isacpadece Sacadias puduedpanëdash. ¹⁰Noadte bëda tauinuec utsi puduedtemaid quënë yacno puduedpanëdash. Ambo Sacadias puduedash icnubi Nuquin Papa tabadte shubu uashunaid puduedte quënë yacno utsibo dadpen Nuquin Papa chiech onqueuededpanëdash.

¹¹Adnubien utsi puduedtemaid quënë yacno Sacadias icnubi ambobi Nuquin Icbon chomiaid, ambi uaid mayan bëda, chopanëdash. Noadte tauinun sanaid dayun abiucquio tabadpanëdash. ¹²Adec tabadsho isash dacuëdampambo iquec, quetanec Sacadias uëdëquiampanëdash. ¹³Adsho isash Nuquin Papan uaid mayan bëda nadpanëdash: —Bacuë bunquin mimbi chian-chiamboed Nuquin Papan tantiaidquio neque. Dacuëdenda, Sacadias. Min chido Edisabedën min mado tishendac. Min mado tishacsho Uan cuënta. ¹⁴Min chidon tishaid isash mibi bëdambo iquendac. Aidi mibi bëdambo icmequid iquendac. Aidën chuibanaid tantiash matses dadpen bëdambo iquendac. ¹⁵Aidi Nuquin Papan bëdamboen

isaidquio iquendac. Paëmbocquid min madon isuidendac. Abi tishaid ushën abëd icmenuequin Nuquin Papan aton Mayan meniaidquio min mado iquendac. ¹⁶Nuquin Papan chiaid tantiaquidquio icquin aidën chiac isadaidbo dadpen Nuquin Papan chiaid niacquid icboedi, Con Icbo Nuquin Papan nec, queoaindac. ¹⁷Min mado Nuquin Icbo bëyucanec choendac. Tsusedpa Ediasën chiampicpadquiequi dacuëdenquio icquin cuembo chuibanquidquio min mado iquendac. Aden chuibanquid Nuquin Icbo bëyucanec choendac. Tsusedpabon tishmiaidën tsyuecquid dadpen tantiesabo icboedi min madon chiac tsusedpabopadquid tantiaquidquio nëbi tabadquido iquendac. Aido Nuquin Papan chiaid niacboedi min madon chiac Nuquin Papan chiaid naquidquio iquendac. Nuquin Icbon matses aido icmenuen min madon chuibanendac —quepanëdash Nuquin Papan uaid mayan bëda.

¹⁸Aden Nuquin Papan uaid mayan bëdan chiaquien Sacadiasën: —¿Mitsipadentsimbi mimbi chuiboed tantiapè? Con chidobëdi tsusio budpobi —capanëdash.

¹⁹Adoquien: —Ëbibi, Cabaded nebi. Nuquin Papan abëd tabadquin namiaidquio nebi. Nuquin Papan ambi chiacpadomboen mibi chuimenuen chomiaid nebique. ²⁰Tantia. Chuinu. Min chidon bacuë tishendac, quequin Nuquin Papan chiaid ëmbi chuiboed tantienquio icsho mibi eme uaindac. Min chidon bacuë tishan padpidec mibi onquianoaindac —quepanëdash Nuquin Papan uaid mayan bëda Sacadias caic.

²¹Adnubien noadte bëda tauite quënënuësh Sacadias baded puduenenquiocsho isash, Baded puduenenquiocpec, quequin cainec

tabadpanëdash utsibo. ²²Aden yuen caimbudnubien puduenash onquenequi buëd cuëdenquiocpanëdash Sacadias. Adsho isun: —Ushquin isacimboen isbenac —cabededpanëdash. Adnubien Sacadiasën iccuededquido nidmenuen mëdante uic-uiccapanëdash.

²³Adashic, Nuquin Papan tabadte shubu uashunaid nuntanshan nashunte ushëted nainash aton shubuno Sacadias nidoapanëdash. ²⁴Ambo choash yuec tabadnubien aton chidon bacuë usundopanëdash. Aden usundoash mëdante auc abentsëcted ushë nidmec aton shubu nuntan icpanëdash. ²⁵Adec tabadec Nuquin Papan naid chiec nadec Edisabed onquepanëdash: —Bacuë usundoenquiocpec, cabededboedëmbi nëbi macho budshumbi ëmbi bacuë usundoacsho utsibon ëbi isec. Ëbi tantiaquin Nuquin Papan usundomiaid nebi —quepanëdash Edisabed.

Esus tishendac, quequin chiaid

²⁶Adashic, Edisabedën bacuë usundoan ushë 6ted nidan nidaid Cadidia caid yacno shubu dadpen icquid Nasaded caid yacno Nuquin Papan Cabaded chomeoapanëdash. ²⁷Ambo aton chido bedabicquid, tsusedpa Dabidën tsyuecquid Ose cuëmëdquid icpanëdash. Aidi ambo tabadnubien uano aton chido Madia cuëmëdquid tsadacno Cabaded chopanëdash. ²⁸Adec choshon: —Mibi tantiaquin Nuquin Papan bëdamboen icmiaidquio mibi nec. Nuquin Icbo mibëdi tabadendac —capanëdash Cabadedën.

²⁹Adoquien Madia, ¿Atotsi quepeba? quequin otacquio tantiec tsadpanëdash.

³⁰Adec tsadsho isun Cabadedën: —Dacuëdenda. Mibi bëdamboen tantiaquin Nuquin Papan naden nanu quequin chiaid nad iqueque. ³¹Chuinu.

Tantiata. Bacuë usundoshon min mado mimbi tishendac. Tishun, Ĕmibi tishaid Nuquin Papa yacno yuedanquidquo nec, quequin Esus cuënta. ³²Mimbi tishaid chuiquid dapa iquendac. Aden mimbi tishaid isec, Nadatiambocquidën madombo nec, quecuededpendac utsibo. Tsusedpa Dabid chuiquid dapa Nuquin Papan icmiacpadomboembidi chuiquid dapa min Mado Esus icmeoaindac. Adoac Chuiquid Dapa Abentsëcquiobi aid iquendac. ³³Adec tusedpa Acobon tsyuecquido ënenquiocquin chuiquid dapa min mado Esus iquendac —quepanëdash Cabaded Madia chiec.

³⁴Adoquien: —ċMitsipadentsimbi bacuë usundoshon bacuë tishpe? Chudabicquid nebi —quepanëdash Madia.

³⁵Adoquien: —Nuquin Papan Mayan mibëdi tabadnuc mimbi tishendac. Aden Nadatiambocquin naidënquo Madia usundomiaid, icsa nibëdquid, Nuquin Papan madombobi nec, utsibon cabededendac. ³⁶Min utsi Edisabed macho icquin bacuë usundoenquiocboedëmbi nëbi bacuë usundoac. Usundoenquiocquid nec, cabededboedëmbi nëbi ushë 6ted nidan usundoac. ³⁷Utsin natiapimbo yaid Nuquin Papan naidquid nec —quepanëdash Cabaded.

³⁸Adoquien Madia: —Ai, con Icbon namiaidquid nebi. Ma mimbi chiacpadquid icpanuna —quepanëdash. Aden chiaquien Cabaded nidpanëdash.

Madia Edisabed isedec nidaid

³⁹Adashic, aton na nacnenanec Madia tsusedpa Udan tsyuecquidon nidaid macuësh yacno badedi nidpanëdash.

⁴⁰Adec nidashic Sacadias oncamenquid yaidën shubu yacno choec puduedshun Sacadiasën chido, Edisabed istuidash: —Mibi isnuec chobi —Madia quepanëdash. ⁴¹Adsho Edisabedën

tantianubi aton bacuë comapenec cuididiquiampanëdash. Adec aton bacuë cuididiquenubi Nuquin Papan Mayanën tantiamiac Edisabed ⁴²Madia chiec naded comapenec onquepanëdash: —Nuquin Papan bëdamboshë icmiaidquid mibi nec. Mimbi usundoaid adembidi bëdamboshë icmiaidquid nec. ⁴³Nuquin Icbon tita mibi yec ïatotsi quia sh ëbi isnuec cho? ⁴⁴Mibi isec chobi, mibi qesho ëmbi tantianubi, Cuishon, quiacbimboec con bacuë cuididiquianosh. ⁴⁵Nuquin Icbon tantiacpadomboen chuisho tantiaquid mibi iquec mibi bëdambo icted-ictedendac —quepanëdash Edisabed Madia chiec.

Nuquin Papan naid chiec Madia cuëdënaid

⁴⁶Adnubien Madia naded onquec cuëdëmpañëdash:

“Nuquin Papan naid chuibanu. Tantia.

⁴⁷Ĕbi usundomiaid Nuquin Papa yacno Yuedanquid nec, quequin tantiec bëdambo iquebi.

^{48,49}Ĕbi ambi namiaid icsho bëdamboen isquin Nuquin Papan naosh. Adoacsho, Nuquin Papan bëdamboshë icmiaid Madia nec, quequin abitedishunquid tantiabedendac.

Adembidi aton tsyuecquidon tantiabededoaic.

Nuquin Papa icsaisa iquec. Icsatiapimbo iquec.

⁵⁰Ambi chiaid tantiaquin naquid icsho, Mimbi naid icsa cuidnu, quenquiocquin abëdi shubu abentsëquën tabadac bimboecnuc adquid tabadmendac. Adenuidi tantiaquin nampidquid abi iquec.

⁵¹Nadatiambocquin naded-nadedquidquid Nuquin Papan nec.

Ëmbibi tantiacpadomboen naimbi,
quequid icsho isun Nuquin
Papan cacumiac uano
tabadendac.

⁵² Ancanquid dapa icboedi utsin
namiaidquio adquid iquendac.
Utsin namiaid icboedi chuiquid
Nuquin Papan icmendac.

⁵³ Ambi chiaid tantiec bédamboec
tabadte comapenec
bunquiacpaden naquidquio
Nuquin Papan icmendac.
Con na ëmbi bedaiduidi tantiec
bédamboec tabadebi quequid
unësacsho cacumiac uano
tabadendac.

⁵⁴ Chuiquid Dapa Abentsëcquiobi
chidon usundoendac, quequin
ambi tsusedpabo
chuiamiapicpadomboen Nuquin
Papan ëbi usundomiac.

⁵⁵ Tsusedpa Abadauambëdta aton
tsyuecquidtedi ambi
tantiampicpadomboen Nuquin
Papan ëbi usundomiac.
Mimbi usundoaid ëbi yacno
yuedanquid nec, quequin Nuquin
Papan ambi tantiampicpadembi
ëbi isec,”

quec comapenec cuëdënash Madia
ënëdpanëdash. ⁵⁶Adec ënëdash
Edisabedbëd ushë daëd nidmec
tabadashic ushë utsi nidbudtsëcnubi
aton shubuno nidoapanëdash.

Uan tishaid

⁵⁷ Adnubien Edisabedën bacuë tishte
ushë chonoc dada bacuë tishpanëdash.
⁵⁸ Bacuë tishenquiochoedëmbi nëbi aton
bacuë tishosh, qesho tantiashton
matses ado shubu utsinquidotedi
Edisabedbëd bédambo icpanëdash.

⁵⁹ Adashic, 8tedec ushtanquin
Edisabedën madon shui dëbid
dëteshunu qesho tantiashton utsibo

cho-chopanëdash. Choash puduedash
bacuëmpi aton papa cuëmëdquid cuënu
quenubi ⁶⁰Edisabed: —Padenquio. Abi
cuëmëdquid Uan nec —quepanëdash.

⁶¹ Adoaquien utsibo: —Mïn matses utsi
Uan cuëmëdquid nibëdec —queshun

⁶² Sacadias ismenuequin mëdante
uic-uiccaquin: —Abi cuëmëdquid chui.
Tantianu —capanëdash utsibon.

⁶³ Adoaquien dada uate bedshun, Abi
cuëmëdquid Uan nec, quequin dada
uaquin Sacadiasën ismepanëdash.

Adoaquien: —¿Abimboda mimbi
cape? —quecuededpanëdash utsibo.

⁶⁴ Adnubien Nuquin Papan oncameoac
Nuquin Papan naid Sacadiasën
chuibampanëdash. ⁶⁵ Aden chuibansho
tantiashton: —Dacuëdampambo iquec.
¿Atotsiepashun onquenquiochoedëmbi
nëbi onquequin Nuquin Papan naid
chuibampec? —quecuededpanëdash
utsibo.

Aden tantianec aton shubuno
nidaneshun ambi isboedbëdtabi ambi
tantiaboed utsibon chuiapanëdash. ⁶⁶ Adoac:
—¿Mitsipadquidquio aton mado nepec?
—quecuededpanëdash Sacadiasën mado
Nuquin Papan tantiamiaidquio isbededec.

Sacadias oncamiaid

⁶⁷ Adnubien Uanën papa Sacadias
Nuquin Papan Mayanën oncamiac
nadec Esus chiec onquepanëdash:

⁶⁸ “Nuquin Papa isadaidbon Icho nec,
quequin chuibanuna.

Aidën isadaidbo icsaquid icsho
cuidnushe quiashton abided
cuidadquid chomiac mayan icsan
yuaid icboedi aidën
mënchictequidquio isadaidbo
iquendac.

⁶⁹ Abi mënchicquid nadatiamboquid
nendac.

Tsusedpa Dabidën tsyuecquidquio
aid nendac.

- 70 Ambi chuimaidon
chiampicpadembi
Nuquin Papan adquidquio icmianac.
- 71-73 Nuquin tsusedpa Abadauan
tantiaquin
Nuquin Papan ambi
chiampicpadembi nuquin
tsusedpabo
aton tsyuequidbëdtabi abi
chieshënkuido
nidtiapimbo yacnombo abi yacno
yuedanquid
Nuquin Icho Abentsëcquiobi nec.
- 74 Abi cudasquin mënchicaid yec
dacuëdenquio yec
Nuquin Papan namiaidombo
iquendac.
- 75 Adquid yec icsaisa abipadquio
bëdamboec tabadquid icsho
nuqui aidën isendac
ënenquiocquin.”
- Adec Esus chiec onquiashic nadec aton
mado chiec Sacadias onqueoapanëdash:
- 76 “Adnubien nëbi Nuquin Papan
chomiaid chuibanquidquio
mibi nec, quequin utsibon mibi
cuënendac, mado.
Nuquin Icho choec, quequin utsibon
tantiabincuc
bëyuc tantiaishun abi chuiquidquio
mibi iquendac.
- 77 Adquid icquin mibi icsaquid icsho
cuidnushe quiaish
abided cuidadquid tantiaisho isash
Nuquin Papa mibi icsaid
tantienquio yec bëpiscudendac,
quequin chuibanquid mibi
iquendac, mado.
- 78 Nuquin Papan matses tantiaquin
naquidquio icquin
abipadquidquio icsaisa abi
yacnoshon chomiaidquio
iquendac.
- 79 Aidën tantiamiac unësash abi
iquendac.

Adquid shubu abentsëquën
tabadacpadec tabadendac,
quequin mimbi chiendac, mado,”
quec Uanën papa Sacadias Nuquin
Papan Mayanën oncamiac
onqueapanëdash.

Matses nibëdacno Uan tabadcueniaid

⁸⁰Adashic, Sacadiasën bacuë Uan
caniascho Nuquin Papan tantiamiaid
yequi matses nibëdacno
tabadcuenepanëdash ambi Esus
chuibante ushë choabincuc.

Esus tishaid

(Mat. 1.18-25)

2 ¹Adnubien, Doma yacno tabadquid,
isadaidbo ancaquid dapambo,
empedadod caid, Aucusto cuëmëdquid
icpanëdash. Aucuston, ¿Ëmbi ancaido
isadaidbo aton nabëdta tedtsi iqueque?
Isquin tantiata, quequin Sidenio
cuëmëdquid chuipanëdash. ²Sidenio
nidaid Sidia caid yacnocquido chuiquid,
cobednadod caid icpanëdash.

³Min tsusedpa tishampid yacnoshon
mibi cuëmëdquid mitsanabëdtabi dada
uanuec nidtan, cac abëd icquido buanec
isadaidbo nidanepanëdash.

⁴Adec utsibo nidnubien Ose aton
chido Madiabëdi nidaid Cadidia caid
shubu dadpen icquid Nasaded caid
yacnoësh puduanec nidequi aton
tsusedpa Dabid caid tishampidnombobi
nidaid Udeya caid yacno shubu dadpen
icquid Beden caid yacno chopanëdash.
⁵Aton chido Madia bacuë nua
usunquidbëdi Ose abi cuëmëdquid aton
nabëdtabi dada uanuec Beden yacno
chopanëdash. ⁶Ambo choquin aton
bacuë nuambo usumpanëdash. ⁷Ambo
matses dadpen cho-choash shubu
abitedi puduedash tsucus-tsucustsëcquio
tabadnuc nidaidën capuquid tabadacno
puduedshun ambi bëyuc usundoaid

Madian tishpanëdash. Tishun dashcute cuësh-cuëshun dapucshun nidaidën capuquidën pete sanaid cuesten ambi bëyuc tishaid dada bacuë Madian nampanëdash.

**Obeca pemebanquin buanquido
Nuquin Papan uaidon chiaid**

⁸Aden Beden yacnoshon Esus tishnubien shubu nibëdacno obeca dadpen pemebanquin buanquido inchëshbudtsëqui choec tabadtuidpanëdash. ⁹Inchëshbudtsëqui choash tabadnubien inchëshnuc Nuquin Papan chomiatic ambi uaid mayan bëda abuc chopanëdash. Aid uëshëmbo chënquenuc obeca pemebanquin buanquido dacuëdcuededpanëdash.

¹⁰Dacuëdsho isash: —Chiaid bëda chuinec chobique. Dacuëdenquiocquin tantiata. Chuinu. Ëmbi chuitequid bëda mibi, Cuishon, quetequid nendac.

¹¹Nëbimbobi tsusedpa Dabid tishampid yacnoshon Beden caid yacnoshon mibi Nuquin Papa yacno yuedquid, Quidistu, Nuquin Papan Chomiaid tishosh. ¹²Abi tishacno nidshun naden mimbi aidi ispec. Dashcute cuësh-cuëshun dapucaid nidaidën capuquidën pete santen uesho mimbi istuidendac. Bacuëmpi adquieic uesho istuidash, Nuquin Papan chomiaid Quidistu nec, mibi quependac. ¹³Aden chiech Nuquin Papan uaid mayan bëda onquenubien abëdi abipadquid utsi dadpen choash Nuquin Papan naid chiech nadec cuëdëncuededpanëdash:

¹⁴“Nuquin Papa abucquio tabadquid abitedi uaquidquio bëdamboshë iquec.

Nuquin Papan bëdamboen isaido ma abëdi tabadpanuna,” quec cuëdëmpañdash. ¹⁵Adec cuëdënash Nuquin Papan uaido mayan bëdabo abuc nidoapanëdash. Adec nidan obeca pemebanquin buanquido

Nuquin Icbon chiaid nanuec: —Nuquin Papan nuqui tantiameboed bacuëmpi isnuec Beden yacno nidnu. Nid —quianec nidpanëdash. ¹⁶Adec nidshun nidaidën capuquidën pete santen bacuë nanacsho istuidpanëdash. ¹⁷Isanec nidquimbi ambi isboedbëdta ambi tantiaboed chiac ¹⁸tantiaquidtedi:

—¿Midapadquidien capec?

—quecuededpanëdash. ¹⁹Aden obeca pemebanquin buanquidon chiaid tantiash bëpiscudenquio yec Esusën tita, Madia, ¿Mitsipadquid con bacuë nepec? quequin bëpiscudenquiocquin tantiadenepañdash.

²⁰Adnubien Nuquin Papan chiaid chuibocpadquiocsho isash obeca yacno choash obeca pemebanquin buanquido: —Ëmbi isboed ëmbi tantiaboed Nuquin Papan naidquio nec —quequin chiech onquecuededpanëdash.

**Nuquin Papa tabadte shubu uashunaid
yacno Esus buanaid**

²¹Adnubien 7tedec ushtanquin aton madon shui dëbid dëtemiacsho isun, Nuquin Papan uaid mayan bëdan chiacpadomboen cuënaid Esus nec, quequin Madian aton mado cuëmpañdash.

²²Adshumbic, bacuë tishun aid bacuën shui dëbid dëtemeshun ushë abentsëc nidan utsi chotsëcnuc Moises Nuquin Papan dada uamiacpaden nanuen Madiabëdtan Osen Esus Edusaden yacno buampanëdash. Edusaden yacno choash Nuquin Papa tabadte shubu uashunaid yacno choshon, Con bacuë Nuquin Papan namiaidquio nec, quequin ismepañdash. ²³Nuquin Papan naden nata quequin chiaid nad iquec: Bëyuc tishaid dada bacuë ëmbi namiaidquio con na nec. ²⁴Mimbi bëyuc tishaid bedte bunquin ëbi tabadte shubu uashunaid

yacno mimbi buanaid min mado
 cuidtequidoain dëbin daëd
 cuesunemeta. Dëbin nibëdnuc masën
 bëdambocquid daëd cuesunemeta. Aden
 nanuec Edusaden yacno choash aton
 mado niantiapimbo yec Madiabëd Ose
 Nuquin Papan chiacpadomboen nanuec
 aton madobëdi puduedpanëdash.

²⁵Adnubien Edusaden yacnombo
 tabadquid Simeyon cuëmëdquid Nuquin
 Papan naden nata quequin chiaid
 tantiaquin naquidquio icpanëdash. Aidi
 isadaidbo chuiquid dapa abentsëcquiobi
 cainquidquio icpanëdash. Aidi Nuquin
 Papan aton Mayan meniaidquio
 icpanëdash. ²⁶Aidi Nuquin Papan
 Mayanën tantiamiac, Chuiquid Dapa
 Abentsëcquiobi Nuquin Papan
 bëdamboen isaidquio choacsho
 unësabicquiu isendambi, quequin
 tantiapanëdash. ²⁷Adembidi Nuquin
 Papan Mayanën nidmiac Nuquin Papa
 tabadte shubu uashunaid yacno nidequi
 Simeyon puduedpanëdash. Ambo
 puduedash capunubi Nuquin Papan
 naden nata quequin chiaidquio nanuen
 aton bënëbëdtambi Madian Esus
 bëpanëdash. ²⁸Esus bësho isun
 Simeyonën Esus bedshun icucquin
 Nuquin Papan naid naden
 chuibampanëdash:

^{29,30}“Abitedishun Ico icquin mimbi
 ëndenquio chiampid nëbi nëid
 isembi.

Nëid isash unësmane quenquio yec,
 Cuishon, quec unësebi, Papa.

³¹Mibi yacno yuedanquid nëbi isembi.
 Nëid mimbi chomiaid icsho ma
 abitedishunquio ispanuna.

³²Nëidëmbi mimbi tantiacpaden
 chuibanquin
 isadaidbo bëdambo icmendac,”
 quepanëdash Simeyon.

³³Aden chuibanubi,
 ¿Midapadquidquien con mado capec?

quequin Madian aton bënëbëdtambi
 tantiapanëdash. ³⁴Esus chuibanquin
 naimbudshun Osebëdta Madia chiec
 Simeyon: —Bëdambo icmiaid mibi
 daëdi nec —quepanëdash. Aden
 chuishumbic Madiuidtsëqui naden
 Simeyonën chuioapanëdash: —Chuinu.
 Tantiata. Nëid bacuë tantiesa isadaidbo
 utsi-utsiec icsho Nuquin Papan uquë
 nësecaindac. Min mado tantiaquid
 utsi-utsiec icsho Nuquin Papan abi
 yacno puduedmiaid iquec bëdambo
 iquendac. Min bacuë, Esus, Nuquin
 Papa yacno puduedmianquid nec,
 quesho tantiashun matses dadpenshun
 icsamboen chuided-chuidedendac.
³⁵Adsho ambi ompoquin naid icsabëdta
 ambi tantiaid icsa tantiamequid min
 mado iquendac. Adobanquin ismiac
 unës uasho isash mibibi unësquio yec,
 Con madon natiambo iquebi, mibi
 quendac —quepanëdash Simeyon Madia
 chiec.

³⁶Aden Simeyonën chuinubi Nuquin
 Papan naden nanu quequin chiaid
 chuiquid chido Ana cuëmëdquid
 icpanëdash. Aidën papa Panued
 icpanëdash. Aidën tsusedpa Ashed
 icpampic. Aid aton bënënen bedac abëdi
 seta 7ted matamiash tabadnubi ³⁷aton
 bënë unësapanëdash. Aton bënë unësan
 Nuquin Papa tabadte shubu uashunaid
 yacno nidshun Anan tabadec
 nidenquiocquin Nuquin Papauidi
 tantiaquin buna mëmumbudnequin
 Nuquin Papa chuidenepanëdash.

³⁸Ambo icnubi Esus bësho isun Anan
 Nuquin Papan naden nanu quequin
 chiampicpaden chuipanëdash:
 —Isadaidbo icsaquid icsho cuidnu caid
 mënchictequid nëid nec —quepanëdash
 Ana Esus chiec utsibon tantianubi.

³⁹Adashic, Nuquin Papan naden nata
 quequin chiacpaden nainash Osebëd
 Madia nidaid Cadidia caid yacno

nidoash Nasaded caid yacno abi tabadacno choapanëdash. ⁴⁰Ambo tabadnubi aton bacuë Esus dada bëdambo yec canicuepanëdash. Aidi comapenen tantiaquidquio Nuquin Papan bëdamboen isaidquio icpanëdash.

Canicuenash Nuquin Papa tabadte shubu uashunaidën Esus tabadaid

⁴¹Adashic, Ęmbi bëyuc tishaid unës uamenushe qeshun intaquën aton shubu shëcuë ëcnoshcacsho isun aidon bëyuc tishaid unësmenquiocquin Nuquin Papan uaid mayan bëdan matampampid tantiate ushë yanuc Madia Osebëd Edusaden yacno nidoapanëdash. Nuquin Papan chiapadequi setan-setanquieic nidtenapanëdash. ⁴²Adecbidi, Esus abi tishaid seta 12ted yanash canicuenash anibëd Edusaden yacno nidpanëdash. ⁴³Adec ambo nidashic nami uabicquid patequid tantiaid ushëtedi tantieic tabadtenapanëdash. ⁴⁴Adec ambo tabadquin nainash Esus ambobi icnubi tantienquio yec Madia Osebëd auëshquio nidoapanëdash. Adec nidash inchëshbudtsëqui abëd chobedo yacno capuquin Esus nibëmbenapanëdash. ⁴⁵Aden nibënquin istuidabi yec Edusaden yacno padpidec nidoapanëdash. ⁴⁶Daëdec ushquin nibënshun Nuquin Papa tabadte shubu uashunaid yacno puduedshun Esus tsadsho istuidpanëdash. Ambo tsadec Nuquin Papan chiaid tantiaequin chuibanquidbëd onqueuedesho istuidpanëdash. ⁴⁷Adec onquec tsadsho isquin, Bëdamboen tantiaquin chuibanquidquio nëid nec, quequin utsibon tantiabededpanëdash. ⁴⁸Adnubien, ¿Mitsipadquid con mado nepec? quequin otacquio Madian tantipanëdash. Aden tantiequi:

—¿Atotsi quiash ëbi daëdi tantienquio yec nëmbo choash mibi tabade, mado? Unësquiocquin papabëdtambi mibi nibëmbeniombi —capanëdash anin.

⁴⁹Adoquien Esus: —¿Atotsieshun ëbi nibëno? Con Pa shubu uashunaidën tabadnuec chobosh nebi. ¿Tantienquioda mimbi icpe? ⁵⁰Aden Esusën chuisho anibëdtan Osen tantienquiocpanëdash.

⁵¹Adashien: —Nidnu. Nid, mado —anin cac cacuidenquio yec Nasaded yacno anibëdi choash tabadquin Madian chiaidbëdta Osen chiaid tantiaquin Esusën nadenapanëdash. Adec tabadnubi aton titan ambi isboedbëdta ambi tantienquio yaid bëpiscudenquiocquin tantiadnenapanëdash.

⁵²Adnubien comapenen tantieic bëdamboec canidopanëdash. Adquid icsho Esus Nuquin Papan bëdamboen isacpadomboen adomboembidi matesën isbededpanëdash.

Esus choec, quequin Uan mentoanquidën chiaid

(*Mat. 3.1-12; Mad. 1.1-8; Uan 1.19-28*)

3 ¹Adashic, seta 15ted matamec Tibedio Sesad cuëmëdquid, Doma yacno tabadequi abitedi ancaquid dapa, empedadod caid icpanëdash. Aidi Doma yacnocquido ancaquid dapa icnubien Ponsio Pidato cuëmëdquid, nidaid Udeya caid yacnocquido ancaquid, cobednadod caid icpanëdash. Aid daëd ancanquid icnubien Edodes cuëmëdquid, nidaid Cadidia caid yacnocquido ancaquid, cobednadod caidbidi icpanëdash. Ancanquid aidtedi icnubien Edodesën utsi, Uedipe cuëmëdquid nidaid Itudeya caid yacnocquidobëdi nidaid Tëdaconite caid yacnocquido ancaquid, cobednadod caidbidi icpanëdash. Ancanquid aidtedi

icnubien Disanias cuëmédquid nidaid
Abidinia caid yacnocquido ancanquid
cobednadod caid icpanédash.

²Ancanquid aitededi icnubien Anasbëdi
Caipas isadaidbo tsusio dapabo
icpanédash. Aid daëdi isadaidbo tsusio
icnubien Uan, Sacadiasën mado matses
nibëdacnombo tabadshobi Nuquin
Papan, Èmbi chiaid chuibanta,
capanédash. ³Adoac acte Odan caid
cuëmano capuqimbi naden
chuibampanédash. Mimbi tantiaid icsa
ënta. Aden ënsho isun mimbi
icsambocquin naboed tantienquoio
yacimboen Nuquin Papan mibi
bëdamboen isendac. Èmbi tantiaid icsa
nainquiocquin ënu, mibi qesho
tantiashun mibi acten mentono,
quequin cho-choquid cho-choquidquien
Uanën chuidednepanédash.

⁴Ëndenquimbo Nuquin Papan
tantiamiac Isayasën Uan chuiquin dada
uampicpadequi Uan icpanédash. Naden
Isayasën Uan chuiquin dada uapampic:

“Matses nibëdacnombo tabadquidën
ëcauanshun naden chiendac:
Nuquin Icbombo choeque. Aid
tantianu, quequin mimbi tantiaid
icsa ëmbanta.

⁵Umbo ancuenquoio chosho isnu
quequin cuembocnoc andëdshun
ambescabanacimboen abimbo
chuiquidënquoio chiaid tantianu,
quequin mimbi tantiaid icsa
ëmbanta.

⁶Aden ënshun Nuquin Papa yacno
pudedmianquid chuiquid dapa
abentsëcquiobi cuembocnoc
mimbi tantiabënëdac,”
quequin Isayasën Uan tishabicnuc
chuiquin dada uapampid nec.

⁷Aden ënden chiampicpadequi Esus
bëyucanequin acten mentomenuec
cho-choquid dadpen icsho Uanën
nadopanédash: —Nisin bacuë

anipadquid nec. Aidbimboecquid
icsambocquid mibi neyoc. Mibi adquid
icsho isun ÷tsuntsin Nuquin Papan
cuidnushe qeshun ambi mënchictequid
icta, quequin mibi chiosh? ÷Aidën
chiaid tantiashta acten mentomenuec
cho? ⁸Mentomete bunquin mimbi
tantiaid icsa ënshun bëdamboec
tabadquin utsibo ismebanta. Nuquin
tsusedpa Abadauan Nuquin Papan
bëdamboen isaidquio icpampic. Ambi
tishmiaidën tishmiaid caidaid ëbi icsho
Nuquin Papan bëdamboen isaidquio
nebi, quequin tantienda.

Abadauampadquid ambi chiaid
tantiaquid bunquin, Matses icta, Nuquin
Papan cac cuënotebi matses iquendac
—quepanédash Uan. ⁹Adequi
onquebudec: —Cuëte icsatedi matenu,
quequin cuëte bacuëesa dëdshun
mateshun icbon nëdëncaquin tauiec.
Adquiecbidi tantiaid icsambocquid
cuëshëdmenu, qeshun bëdamboec
tabadaid ismesa cuëshëdmeshun chian
anëdënquequid Nuquin Papan nënendac
—quepanédash Uan.

¹⁰Adoquien: —Chian anëdënquequid
Nuquin Papan nësiate ictiapimbocquin
÷atotsimbi napeba? —quepanédash
iccuededquido.

¹¹Adoquien: —Mibi dasiuidaid daëd
icsho dashcute nibëdquid isun mitsana
abentsëc meneta. Adembidi pete nibëdquid
icsho isun meneta —capanédash Uanën.

¹²Adecbidi ancanquid dapan matses
utsin na bedtequid nëidted bedta
caidotsen acten mentomenuec
cho-chopanédash. Choshon Uanën
chuibansho tantiasht: —Chian
anëdënquequid nësiate ictiapimbocquin
÷atotsimbi napeba? —quepanédash.

¹³Adoquien: —Ancanquid dapan
chiactedtsëqui bedta. Muiquin mitsana
daëd uanuequin bedenda —capanédash
Uanën aido chuiquin.

¹⁴Adashic, adecbidi sondado cho-choash: —¿Atotsimbi napeba? —quepanëdash Uan caic.

Adoacquien: —Mitsana bedtequid bunquin icsamboen bedenda. Utsin naid tantianshun mua uaquin chienda. Mibi chuiquidën, Nëidtedi menenu, cac, Utsi bec cho, quenda —capanëdash Uanën sondado chuiquin.

¹⁵Aden Uanën chuibansho tantias: —¿Tsutsi nepec? ¿Nuquin Papan chomiaidta nepec? —quecuedepanëdash cho-choquido.

¹⁶Adsho tantias: —Mibi acten mentoquidquio nebi. Padnuen ëbipadquidpenquio nadatiambocquid choendac. Aidi bëdamboshëcquid nendac. Adquid icnuc ëbi icsaquid icsho ¿atotsieshun aid choec quequin chuiquidquio Nuquin Papan icmioshi? Aid choshon aton Mayan abi tantiaquidombo aidëmbi menendac. Aden meniac Esus tantiaquidombo ambi tantiaid icsa ënte bunquidquio icmendac aton Mayanën. Adoac ënsho isun pauquendac —quepanëdash Uan.

¹⁷Aden chuibanec nadpanëdash: —Piacbo ëshë uashun bitsi secatanquin nëdëncashun ëshë icbon dayun uacpadomboen abi tantiesa cuëshëdmeshun chian anëdënquequid nësiashun abi tantiaquidtedi abi yacno puduedmendac aidën. ¹⁸Aden Nuquin Papan chiaid dadpen chuibanquin: —Adomboen tantiaquin nabanta —capanëdash Uanën.

¹⁹Adshumbic, ancanquid Edodesën tantiaid icsatsen Uanën chuibampanëdash: —Min utsin chido, mimbi bedaid, mimbi tantiaid icsa neque. Mimbi tantiaid icsa ënta —capanëdash. Aden chuiboshombic adomboembidi padpiden abibidi Edodesën tantiaid utsibotsen chuiopanëdash. ²⁰Aden ambi tantiaid

icsa chuibansho tantianshun Edodesën Uan bedmeshun quënën nauedmepanëdash abitedishun tantianushe qeshun.

Esus acten mentoaid

(*Mat. 3.13-17; Mad. 1.9-11*)

²¹Quënën nauedabicquid matses dadpen acten mentobampanëdash Uanën. Utsiboba mentoshombic Esussten mentopanëdash. Adoacquien mentoacnoëshquiobi Esus Nuquin Papa chiec onquepanëdash. Adec onquenubien abu shëcuë nibëdboedi shëcnianec ²²dëbimbimboec cuembo budec Nuquin Papan Mayan Esusën mapino tsadtoec budpanëdash. Aid budnubien abucuësh Esus chiec naded aton Papa onquepanëdash: —Mibentsëquiobi icsho ëmbi tantiaidquio mibi nec, mado. Adembidi ëmbi bëdamboen isaidquio mibi nec —quepanëdash aton Papa.

Esuquidistun tsusedpabo chiaidtedi

(*Mat. 1.1-17*)

²³Adashic, abi tishaid seta 30ted icquimbi Nuquin Papan chiacpaden naquin tauapanëdash Esusën. Aden tauaquin chuibansho tantias aton matses nadpanëdash. Osen mado nec, quiash, Nuquin Papan mado nec, quenquio yec matses onquepanëdash. Esusën papapenquio Ose icnëdash. Madia aton tita icbo icnuc Esusën tsusedpabo nëidtedi iquec: aton buchido Edi cuëmëdquid icpanëdash. ²⁴Aidën papabic Matic cuëmëdquid, aidën papabic Debi cuëmëdquid, aidën papabic Ana cuëmëdquid, aidën papabic Ose cuëmëdquid, ²⁵aidën papabic Matatias cuëmëdquid, aidën papabic Amos cuëmëdquid, aidën papabic Naun cuëmëdquid, aidën papabic Esdi cuëmëdquid, aidën papabic Nacai

cuëmédquid, ²⁶aidën papabic Mac
 cuëmédquid, aidën papabic Matatias
 cuëmédquid, aidën papabic Semei
 cuëmédquid, aidën papabic Ose
 cuëmédquid, aidën papabic Uda
 cuëmédquid, ²⁷aidën papabic Uana
 cuëmédquid, aidën papabic Desa
 cuëmédquid, aidën papabic Sodobabed
 cuëmédquid, aidën papabic Sadatied
 cuëmédquid, aidën papabic Nedi
 cuëmédquid, ²⁸aidën papabic Medqui
 cuëmédquid, aidën papabic Adi
 cuëmédquid, aidën papabic Cosan
 cuëmédquid, aidën papabic Edmodan
 cuëmédquid, aidën papabic Ed
 cuëmédquid, ²⁹aidën papabic Osue
 cuëmédquid, aidën papabic Ediesed
 cuëmédquid, aidën papabic Odin
 cuëmédquid, aidën papabic Matak
 cuëmédquid, ³⁰aidën papabic Debi
 cuëmédquid, aidën papabic Simeyon
 cuëmédquid, aidën papabic Uda
 cuëmédquid, aidën papabic Ose
 cuëmédquid, aidën papabic Onan
 cuëmédquid, aidën papabic Ediaquin
 cuëmédquid, ³¹aidën papabic Medeya
 cuëmédquid, aidën papabic Menan
 cuëmédquid, aidën papabic Matata
 cuëmédquid, aidën papabic Natan
 cuëmédquid, ³²aidën papabic Dabid
 cuëmédquid, aidën papabic Isai
 cuëmédquid, aidën papabic Obed
 cuëmédquid, aidën papabic Bos
 cuëmédquid, aidën papabic Sadomon
 cuëmédquid, aidën papabic Nason
 cuëmédquid, ³³aidën papabic Aminidad
 cuëmédquid, aidën papabic Adan
 cuëmédquid, aidën papabic Eston
 cuëmédquid, aidën papabic Pades
 cuëmédquid, aidën papabic Uda
 cuëmédquid, ³⁴aidën papabic Acobo
 cuëmédquid, aidën papabic Isac
 cuëmédquid, aidën papabic Abadauan
 cuëmédquid, aidën papabic Tade
 cuëmédquid, aidën papabic Nacod

cuëmédquid, ³⁵aidën papabic Seduc
 cuëmédquid, aidën papabic Dacau
 cuëmédquid, aidën papabic Pedec
 cuëmédquid, aidën papabic Ebed
 cuëmédquid, aidën papabic Sada
 cuëmédquid, ³⁶aidën papabic Cainan
 cuëmédquid, aidën papabic Adpashad
 cuëmédquid, aidën papabic Sen
 cuëmédquid, aidën papabic Noe
 cuëmédquid, aidën papabic Damec
 cuëmédquid, ³⁷aidën papabic
 Matusaden cuëmédquid, aidën papabic
 Enoc cuëmédquid, aidën papabic Aded
 cuëmédquid, aidën papabic Macadaded
 cuëmédquid, aidën papabic Cainan
 cuëmédquid, ³⁸aidën papabic Enos
 cuëmédquid, aidën papabic Sed
 cuëmédquid, aidën papa abia uampid
 Adan cuëmédquid, aidën papambo
 Nuquin Papa abia yanampidquo nec.
 Abi tabadec. Aidtedi Esusën tsusedpabo
 nec.

Satanas Esus icsamete bunaid

(Mat. 4.1-11; Mad. 1.12-13)

4 ¹Adshumbic, Matses nebi, quequin
 Nuquin Papan chiacpaden nanuen
 acten mentomepanédash Esusën. Aden
 Uanën acten mentoaquien Nuquin
 Papan Mayanën chiacpadec acte Odan
 caid yacnoësh puduanec matses
 nibédacnombo nidash tsadpanédash.
²Ushë utsi nidash utsi choaid
 abuctotsécquiecnuc ambobi
 tsadpanédash. Aidtedi ushquin penquio
 yash Esus bundopanédash.
³Bundoacscho isash Nuquin Papa
 chieshënquid choash Satanas
 nadpanédash: —Nuquin Papan madombo
 icquin penun cuënotebi pete icta cata
 —capanédash Satanasën Esus chuiquin.
⁴Adoquien: —Padi: “Petuendi pec
 bédamboec tabadtemaid nec,” quequin
 dada uapampic —quepanédash Esus
 Satanas caic.

⁵Adoshombic, macuësh dapa abucquoio yacno Esus buanshun Satanasën badedquoio nidaidtedi ismebampanëdash. ⁶Ismiash: —Nidaidën icquidtedishun icbo icmiaidquoio nebi. Abitedi con na nec. Ëmbi menenu cac aitedi mitsana iquendac. Nidaidën tabadquidtedi chuiquid dapa mibi icmete bunebi. Adquid mibi icnuc mibi buntequid nibëdendac. ⁷Nidaidën tabadquidtedi chuiquid dapa icnu quequin, Con icbo mibi nec, ëbi casho adquid mibi icmambi —quepanëdash Satanas Esus caic.

⁸Adoquien: —Padi. Nuquin Papan chiaid dada uapampid nad iquec: “Nuquin Papa abentsëcquio bi mimi tantiaiduidtsëqui min icbombo neque. Aidën namiaidquoio icta” —quepanëdash Esus Satanas caic.

⁹Adoshombic Edusaden yacno Esus buanshun Satanasën Nuquin Papa tabadte shubu uashunaid macano abucquoio tsadumpanëdash. Aden tsadunshun: —Mibi Nuquin Papan madombo yec nëuëshquoio dacuëdenquoio yec pudunta. ¹⁰Naden dada uapampid iqueque. Tantia. Chuinu.

“Mibi pudunsho isun, Tscatequin bëdamboen budmeta, quequin Nuquin Papan ambi uaido mayan bëdabo chiendac.

¹¹Aidombi min taën tsasimbocquid tincanushe qeshun uidën uaquin mibi bëdamboen budmendac.” Aden min Papan chiaid icnuc dacuëdenquoio yec pudunta —capanëdash Satanasën Esus chuiquin.

¹²Adoquien: —Chuinu. Tantiata: “Nuquin Icbon ambi chiacpadembida natsiashe, Isnu, quequin tanenda,” quequin Nuquin Papan chiaid chiampid utsi iquec —quepanëdash Esus Satanas caic.

¹³Aden chiaquien Satanasën Esus icsamboen namenuen tanquin naimbudpanëdash. Aden naimbudequi, Padpidemboen ëmbi chiaid namenuequin Esus tanun nanuna, quequin ambibi tantianec Esus nianec Satanas nidpanëdash.

Nasaded yacnocquido Esus bunesabo

(*Mat. 4.12-17, 13.53-58;*
Mad. 1.14-15, 6.1-6)

¹⁴Adashic, Nuquin Papan Mayanën tantiamiaidquoio iquequi matses nibëdacnoësh Cadidia yacno Esus choapanëdash. Choacsho isun, Nuquin Papan Mayanën tantiamiaidquoio nec, quequin abi isquidon chiac dëuequidon tantiaipanëdash. ¹⁵Adnubic, Nuquin Papan chiaid chuibante shubu utsin-utsinquec puduedcuenequin Nuquin Papan chiaid Esusën chuibampanëdash. Aden chuisho tantiashe, Nuquin Papan chiaid tantiaquidquoio Esus nec, quec cuëdëncuededpanëdash.

¹⁶Adashic, Nasaded yacno abi caninëdacno Esus nidoapanëdash. Ambo choash chonoadtemaid ushën Nuquin Papan chiaid chuibante shubu yacno nidash abi puduedteniaccpadequi pudueddash Nuquin Papan chiaid isec onquenush niddopanëdash. ¹⁷Nidtosho isun Nuquin Papan chiaid Isayas cuëmëdquidën dada uapampid anocquidën Esus menapanëdash. Aden aid meniac sananquin seccudoabanquin isbanec naded Esus onquepanëdash:

¹⁸“Nuquin Icbon Mayanën namiaidquoio nebi. Aidën Nuquin Papan chiaid tantiambo yaid chuibanta caid nebi.

Quënën nauedaido ambi tantiaid icsa ëmenuen chuibanta caidquoio nebi. Aidëmbidi Satanasën yuaid Nuquin Papan bacuë

icmenuequin chuibanta caidquio nebi.

¹⁹ Aidën Nuquin Icbon bēdamboen iste chuibanta caidquio nebi.”

²⁰ Adec isec onquequin nainshun dada uaid bidicashun meniash tsadpanēdash Esus. Adec tsadsho shubu nuntan icquidtedishun bēisbededpanēdash.

²¹ Adoac: —Nuquin Papan chiaid mimbi tantiaboed nēbimbobi tauadoec —quepanēdash Esus abibi chiaidequi.

²² Adoaquien: —Bēdamboen chuipec. ¿Mitsipaden tantiaid ambi chiaid nepeba? —quecuededpanēdash. Adec onqueboedobi: —¿Osen mado Esus nenquioda ictic? —queoapanēdash.

²³ Adoaquien: —Bēdamequid yequi abibi daicsambo yanash bēdamiadacsho isash, Bēdamequidquio nec, quequin matsesën tantiapec, quequin chuiampid nec. Ēmbi Capednaun yacnoshon nabambocpadomboen nēshuntsen nabansho isun, Nadatiambocquin nabanquid nec, quequin mibitedishun tantiapec.

²⁴ Abimbo chiembique. Tantiata —quiash Esus abi onquec: —Nuquin Papan ěmbi tantiamiacpaden chuibanta caidën abi caniacnoshon chuibansho tantienquiocquid icpec.

²⁵ Ēndenquimboshē adomboembidi Nuquin Papan ěmbi tantiamiacpaden chuibanta caid Edias cuēmēdquidën chuibansho tantiesa icpampic. Aidi icnubien isadaidbon bēnua chidobo dadpen icpampic. Aido adquid icnubien seta abentsēc chotsēcnic matamec aton pete nibēdquiec yanubi isadaidbon bēnuabo bunec tabadpampic. ²⁶ Adec bunec tabadsho isun, Isadaidbon bēnua yacno nidta, quenquiocquin isadaidpembon bēnua yacno pemenuc nidta cac Edias nidshun ambi chiacpadomboen isadaidpembon bēnuan nanuc aton pete

uesadenquiocpampic. Aid chido shubu dadpen icquid Sadecta caid yacno tabadpampic. Sadecta shubu dadpen icquid Sidon caid anentsēqui icpampic. ²⁷ Adashic, adecbidi isadaidbo abi daushumbo yacno mishac mishadenquio yacimbocquido dadpen icpampic. Adquido icnubien Nuquin Papan namiaidquio utsi Ediseyo icpampic. Aiděmbi isadaidbo daushumbocquido bēdamenquiocquin isadaidpembon abentsēc Naman cuēmēdquid Ediseyon bēdamepampic. Ēbi bēdamepec, quequin tantiec aton nidaid Sidia caid yacnoěsh choacsho Ediseyon Naman bēdamepampic —quepanēdash Esus.

²⁸ Aden Esusën isadaidpembon nashumpampid chuisho tantiaish iccuededquido isadaidbo comapenec nēishpanēdash. Isadaidpembobēd isadaidbo ictiapimbo iquec, quec iccuededquido nēishpanēdash. ²⁹ Adec nēishash nidanec nuntanuěsh puduenanec shubu ěnědacno nidshun acte dapa quiusudacnombo nebudnuequin Esus buampanēdash. ³⁰ Aden nidmiaquien matses dadpen icquid natsusash Esus nidpanēdash.

Mayan icsa dapuedaid cuemete
(*Mad. 1.21-28*)

³¹ Adec abi caniacnoěsh Nasaded caid yacno nidtanashi nidaid Cadidia yacno nidequi Capednaun caid yacno Esus choapanēdash. Ambo choash chonoadtemaid ushē icnuc Nuquin Papan chiaid chuibante shubun puduedshun Nuquin Papan chiaid chuibampanēdash. ³² Aden chuibansho tantiaish: —Ambia tantiaquidën chiacpaden chuibanquidien Esus nechitec —quecuededpanēdash anocquido.

³³ Aden Esusën chuibanubien Nuquin Papan chiaid chuibante shubu nuntan

mayan icsa dapuduedaid icpanëdash. Aidi comapenec sidquetanec onquec: ³⁴—¿Nasaded yacnocquid Esus caid atotsi quec mibi cho? ¿Ëbipadquidtedi naimbudmuenecta cho? Ëmbi isaid mibi nec. Nuquin Papan bëdamboen isaidquio, icsapenquiocquidquio mibi nec —mayan icsan caquien: ³⁵—Otaquio tabad. Adec tabadec dapuduenta —Esusën cac mayan icsan abi dapuduedaid tacpanën nebudec icsa uainquio yec dapuduempanëdash. ³⁶Adosho isash tantiadempambo iquequi: —¿Chuiquid dapan chuitequidta neque? Tantiabono. Nadatiambocquin chuibanac mayan icsabo dapuduenchitequien nec —quepanëdash Capednaun yacnocquido. ³⁷Aden tantiaquin Esusën mayan icsa dapuduemiosh, quequin isquidon chuiban-chuibanac Capednaun yacno dëuequidtedishuntsen tantiapanëdash.

**Daicsambocquid dadpen
Esusën bëdamiaid**

(Mat. 8.14-17, 1.35-39; Mad. 1.29-34)

³⁸Mayan icsa dapuduemiaschic Nuquin Papan chiaid chuibante shubu yacnoësh puduenanec Simonën shubu yacno Esus nidpanëdash. Ambo puduedacsho isun: —Simonën nachi chumboshë iqueque. ¿Ada aid bëdametsia? —caquien: ³⁹Simonën nachi yacno choash dayunquio nidtuidec: —Chumbocquid dauebudta —Esus quenubi badedquio daebudpanëdash. Adec daebudash nidtoshon codocashun Esusbëd icquido pemepanëdash Simonën nachin. ⁴⁰Adshumbic, inchëshbudtsëqui daicsaid utsi-utsien bë-bëpanëdash. Aden bë-bësho isun damishquin Esusën bëdamepanëdash. ⁴¹Adembidi mayan icsa utsi-utsien dapuduemepanëdash. Adoac, Nuquin Papan madombobi mibi

nec, quec sidquesho tantiashun: —Nuquin Papan chomiaid nec, quequin ëbi chiec adec onquenda —Esusën cac mayan icsa ënëdpanëdash.

⁴²Adashic, badiadnuc matses nibëdacno Esus nidpanëdash. Esus nidacsho isun matses dadpenshun nibënquin istuidshun: —Nidenquio yec ëbëdi tabadta —capanëdash istuidquidon.

⁴³Adoquien: —Shubu dadpen icquid utsi-utsiec yacno nidshun Nuquin Papa yacno tabadaid iquec, quequin anocquidotsen tantiamenuec nidendabi. Nuquin Papan chomiaid icquin chuibanun nabono —quepanëdash Esus abi nibënquin istuidquido chiec.

⁴⁴Aden chiaschic Nuquin Papan chiaid chuibante shubu utsin-utsinquec puduedcuenequin Nuquin Papa yacno tabadte iquec quequin chuibampanëdash. Nidaid Udeya caid yacno shubu dadpen icquid utsi-utsiec yacno choshon aden Esusën chuibampanëdash.

Abëd tabadmenuen chomiaid

(Mat. 4.18-22; Mad. 1.16-20)

5 ¹Adashic chian Quenesaded caid cuëmambi tabadquin Esusën Nuquin Papan chiaid chuibansho tantiec iccuededquido dadpen tabadpanëdash. ²Adnubien masi yacno aton cano daëd nëshun icbon aton nëshaidtedi pambampanëdash. ³Adsho isanec nidash Simonën cano antsadtoshon, Uditsëc ëbi buan, Esusën cac Simonën uditsëc buampanëdash. Aden buanac chian cuëman iccuededec tabadshobi cano antsadquin Esusën chuibampanëdash.

⁴Aden chuibanquin nainshun: —Shodombo yacno nuëcquid bednuequin nëshaid nënebanta, Simon —capanëdash Esusën.

⁵Adoaquien: —Icbo, inchëshëmbi nuëcquid bednuen nëshaid nënebenequin ëbitedishun bedamboccombi. Mimbi nëshaid nënetan cac nënetanembi —quepanëdash Simon.

⁶Adash shodombo yacno nidshun nëshaid nënetanquin nuëcquid dadpenquioshë bedac nëshaid tësëdec taëpanëdash. ⁷Adsho isun abëdtan nuëcquid beduidboedo cuënquin, Cadoec cho, quequin ismiac aido cano utsin choshon cano cubu-cubutsëcquiocnoc nuëcquid sandoac cano daëd mentoadtsempanëdash.

⁸Adoanec Esus yacno choequi danëshën sebudec shuebudash Simon Petedon: —Icbo, ëbëd iqenquio yec nidaneta. Icsambocquid nebique —capanëdash Esus chuiquin. ⁹Abëd icquidobëdtan nuëcquid dadpen bedboed tantiadempambo iquec, Esus nadatiambocquid nec, quequin tantiec onquepanëdash Petedo. ¹⁰Acobo Uan chedo tantiadempambo yec tabadoapanëdash. Aid daëdi Sebedeyon mado icpanëdash.

Adec Petedo shuebudash onquesho tantiatanec Esus nadpanëdash: —Dacuëdenda. Mimbi nuëcquid penun acten bedbocpaden nëbi tauain ëbi tantiaquid icmenuen nidaidën capucuenquin abuc tabadaid mimbi chuiban-chuibanendac —quepanëdash Esus Petedo caic. ¹¹Aden chiaquien aton cano acte cuëman nëshanec aton natedi nianec, Esusën chiacpaden tantianuna, quianec abëdtan nuëcquid bedboedobëdtan Petedon Esus nidsho tsibanampanëdash.

Daushumbocquid bëdamaiaid

(*Mat. 8.1-4; Mad. 1.40-45*)

¹²Adashic, shubu dadpen yacno Esus icnubien daushumbocquid nami mishac

paëpenquiocquid chopanëdash. Aidi choash Esusën taëno shuebudec nadpanëdash: —Ëbi bëdamete bunquin ëbi mimbi bëdamepec —quepanëdash daushumbocquid.

¹³Adsho tantiashun adquid daushumbocquid mishtemaid nec, quenquiocquin damishec Esus: —Mibi bëdamete bunebique. Mibi bëdamenu —quenubi badedquio bëdampanëdash.

¹⁴Aden bëdametanec Esus: —Ëmbi naid utsibo chienda. Adenquiocquin isadaidbo tsusiobo ismetanta ma bëdamaiaid Nuquin Papan naid nec quequin ma aidon tantiapanu. Aido ismeshun Nuquin Papan ambi chiaid Moises dada uamiampicpadembi bëdambo icmiaid cuidequidquio meneta —capanëdash Esusën ambi bëdameboed chuiquin.

¹⁵Adnubien Esusën bëdamesho isquidon Esusën bëdamaiaid chuibanac matses dadpen Esusën chiaid tantianuec cho-chopanëdash. Adecbidi, daicsambocquido bëdanuec cho-choacsho Esusën bëdamepanëdash. ¹⁶Adashien matses nibëdacnombo nidash Nuquin Papa chiec onquepanëdash.

Dada shëquëquenquiocquid bëdamaiaid

(*Mat. 9.1-8; Mad. 2.1-12*)

¹⁷Adashic, ushë utsin Esusën chuibanuc padiseyobobëdi Nuquin Papan naden nata quequin chiaid tantiamequid dadpen tabadpanëdash. Utsi-utsiec nidaid Cadidia yacnoësh cho-chonobi utsi-utsiec nidaid Udeya caid yacnoësh cho-chonobi utsi-utsiec Edusaden caid shubu dadpenquioshë yacnoësh cho-chopanëdash. Adec aido cho-choash tabadnubien Nuquin Papan nadatiambocquin naquid icmiac matses bëdamenuc Esus icpanëdash. ¹⁸Aid icnubien dada shëquëquenquiocquid

aton din nandoshon aton utsibon bëpanëdash. Aden bëquin shubu nuntan nënantanquio Esus icnubi ¹⁹matses tsucus-tsucustsëcquiocsho isash puduedtiapimbo yec macano pada-padapambo yacno dada shëquëquenquiocquid buanec dectatoshon macano chic-chicshun dada shëquëquenquiocquid abi bëquidon imbudpanëdash.

²⁰Dada shëquëquenquiocquid ëmbi bëaid Esusën bédamec, quequin tantiaquin bëquidon ambi bëaid imbudsho isash dada shëquëquenquiocquid caic: —Mimbi tantiaid icsa cuidenquio yec bëpiscudtequidquio mibi nendac —quepanëdash Esus.

²¹Aden chuisho tantiaish padiseyobobëd Nuquin Papan naden nata quequin chiaid tantiaimequid: —¿Nuquin Papanuidi chuitequidquioda chuibamposh? ¿Tsutsi aden chuibanquid nepec? Nuquin Papauidi tantiaid icsa cuidenquio yec bëpiscudquidquio nec —quepanëdash ambibi tantiacpadec onquec.

²²Aidon tantiaid tantiec Esus: —¿Atotsi quiash mimbibi icsamboen tantiec onquepe? ²³¿Mimbi tantiaid icsa cuidenquio yec bëpiscudtequidquio nendac ëmbi chiaidquio bédantequidpenda nedic? Adecbidi, ¿Mibi icsambocboedi mibi bédanoque. Nidtoash nidta, quequin chiaid bédantequidpenda nedic? ²⁴Nuquin Papan chomiaid icquimbi mimbi tantiaid icsa cuidenquio yec bëpiscudtequidquio nendac ëmbi cac ad iquendac. Nuquin Papan chuimaidquio nec mibitedi camenuen dada shëquëquenquiocquid naden chiembique Tanta. Nidtoash nidquin min di buanec nid —capanëdash Esusën dada shëquëquenquiocquid chuiquin.

²⁵Adoac nidtoshon aton di bedanec Nuquin Papan naboed chuibanequi aton shubuno nidpanëdash.

²⁶Adsho isash tantiadempambo yec Nuquin Papan naid chiech onquecuededec tabadpanëdash: —Aden bédamiaid isenquiocboedëmbi nëbimbobi aid isbempombi —quecuededpanëdash.

**Debi, ëbi tsibanec cho,
quequin Esusën chiaid**
(*Mat. 9.9-13; Mad. 2.13-17*)

²⁷Adashic, capucuenequin Debi cuëmëdquid Esusën istuidpanëdash. Debi nec queshumbi Mateyo cuëmpanëdash. Ancanquid dapan utsibon na bedtequid bedshumbanta caid Debi icpanëdash. Ancanquidën chiacpaden Debin utsibon na bedtequid bedbansho isun: —Ëmbi chiaid tantianush ëbi tsibanec cho —Esusën cac ²⁸Debi nidtoanec aton natedi nianec Esus tsibananec nidpanëdash.

²⁹Adshun aton shubuno Esus buanshun Debin pemepanëdash. Ancanquidën utsibon na bedtequid bedbanta caido abipadquido dadpembëdtabi Esus Debin pemepanëdash. ³⁰Aden adquidobëdtan Esusën pesho isash padiseyobo: —¿Atotsieshun mibi chuiquidbëdtan mibitedishun icsambocquidbëdtan pepeba? —quepanëdash Esusbëd icquido caic.

³¹Aden chuisho tantiaish Esus nadpanëdash: —Ëbi bédamec cho, quenquio bédambocquid iquec. Daicsambocquidien, Ëbi bédamec cho, quendac. ³²Adecbidi, Nuquin Papan bédamboen isaidquio icsho, Mimbi tantiaid icsa ënta, quequin chuinuec choenquio iccondabi. Nuquin Papan icsamboen isaidquio icsho, Mimbi tantiaid icsa ënta, quequin chuinuec

chondabi —quepanëdash Esus padiseyobo caic.

Buna mëmunaid

(*Mat. 9.14-17; Mad. 2.18-22*)

³³Aden Esusën chuibanasho tantiaashun naden padiseyobon Esus chuipanëdash: —Uambëd icquido buna mëmunec Nuquin Papa chiec onquedenec. Adquiecbidi ëbëd icquido buna mëmunec Nuquin Papa chiec onquedenec. Adenquio mibëd icquido iquec. Aidon buna mëmunenquiocquin peshun sicaid actenec —quepanëdash padiseyobo Esus chiec.

³⁴Adoquien: —Aton chido bednun pambid meniac chidon codocacsho abi inquidën abëd icquido menec. Aden meniac isuidesa abëd icquido nec. Adecbidi ëbi abi chuiquid icnuc ëbëd icquidon buna mëmunenquiocquin isuidenquio iquec. ³⁵Yuecash chido inquid nibëdanan abëd icboedo unësquiocquin buna mëmunquin isuidpec. Adecbidi ëbi nibëdanan ëbëd icboedo unësquio yampec —quepanëdash Esus padiseyobo caic.

³⁶Aden chuibanequi abi Esus onquec: —Dashcute chuca cuëshun dashcute shë nibëdta nacnenquin bëtuscaisa matses nec. Cuëshquin dashcute chuca icsa uaic. Adecbidi shëni tuscaid bëtësëdec. ³⁷Adembidi dadpen icquid chodo uashun sandoec. Adotanquimbic istuidshun chuca uain chodo uashun sandoaic chodo shënin icsa sandoshon nequid bëenquiocquin. ³⁸Adembidi, ëmbi ënden tantiauidi tantianu, quequin Nuquin Papan nëbi chiaid pausudtequid bëda tantiauidquid yanec icsabudendac. Mibi adquid iquec, quequin tantiaquin utsi chiacimboen Esusën padiseyobo chuipanëdash. ³⁹Adashic ambi ënden chiaid tantienquiocboedi nëbi Nuquin Papan chiaid utsi chuibanac tantiaquidquio iquendac —quepanëdash Esus.

Chonoadtemaid ushë tantiaquid

(*Mat. 12.1-8; Mad. 2.23-28*)

6 ¹Adashic, chonoadtemaid ushë icnuc Esusbëdtan abëd icquidon tied matanquin tiedën caniquid ëshchicshun abëd icquidon bitsi tsucucashun pebededpanëdash. ²Aden pesho isquin padiseyobon: —¿Atotsieshun chonoadtemaid ushën chonoadpeque? Tiantianu. Èbi chui —capanëdash Esusbëd icquido chuiquin.

³Adoquien: —¿Tsusedpa Dabid caidbëd icquidon piasquin pepampid tantiamboda ique? ⁴Naden chuipampid neque. Tantia. Abëd icquidobëd Nuquin Papa tabadte shubu uashunaid puduedtemaid quënën puduedshun Nuquin Papa tantiaquin pan meniac nanaid chuiquid dapan bedshun abëd icquido menebanshun aidobëdtambi pepampic. Aid pan Nuquin Papan namiaidënuidtsëqui petequid nepampic —quequin padiseyobo chuishun Esusën nadopanëdash: ⁵—Èbia: Tiboquenu, quiash tsadacpadec matses: Nëid chonoadtemaid ushë nec, quequin tantiec. Adnubini aid ushë icbo yec tiedën caniquid ëshchicshun bitsi tsucucasho isash: Mimbi icsamboen naic, quetiapimbo iquebi.

Mëuesadaid bëdamiaid

(*Mat. 12.9-14; Mad. 3.1-6*)

⁶Adashic, chonoadtemaid ushë utsin Nuquin Papan chiaid chuibante shubun puduedshun Esusën chuibanubien abiucquid mëuesadaid dada icpanëdash. ⁷Ambobidi tabadquimbi Esus chieshënquidon, Chonoadtemaid ushën Esusën bëdamenushe. Isnu, quequin padiseyobon caimbededpanëdash. ⁸Aden cainubien abi chieshënquidon tantiaid tantiaquin mëuesadaid isquin: —Nënantanquio nidto —Esusën cac

mëuesadaid nënantanquio nidtoash nidpanëdash.

⁹Adsho isashien: —Tantianu. Chui. ðChonoadtemaid ushën matses tantiaquindambi bëdamboen nape? ðAdoenquiocquindambi bëdametemaid ushë nëid neque? ðMibi nëbi bëdametiapimbo iquebi, quequindambi chuipe? ðAdoac daicsaid utsi-utsiec unëspec? —quepanëdash Esus.

¹⁰Aden chuishumbic iccuededquido isbanquin: —Ëbi mëd —cac Esus mëdequi mëuesadaid bëdampanëdash.

¹¹Adec mëuesadaid bëdansho isashien comapenec nëishash: —ðMitsipadentsimbi Esus acpe? —quec onquecuededpanëdash abi chieshënquido.

Esusën, Ëbi chuibeneta, caido

(Mat. 10.1-4; Mad. 3.13-19)

¹²Adashic, ushë utsin macuësh yacno matses nibëdacno Nuquin Papa chiec onquenuec nidash inchëshën ushenquio yec Nuquin Papa chiec Esus onquepanëdash. ¹³Badiadshun abëd icquido dadpen chomeshun, Ëbi chuibeneta, quequin 12tedictsëqui chuipanëdash. ¹⁴Nëidic, Simon, Esusën Petedo caid; utsibic, Andedes, Simonën utsibi; utsibic, Acobo; utsibic, Uan; utsibic, Uedipe; utsibic, Badtodome; ¹⁵utsibic, Debi cashumbic Mateyo caid; utsibic, Tomas; utsibic, Acobo, Adpeon mado; utsibic Simon, ancanquid isadaidpembo bunesa; ¹⁶utsibic, Udas, Acobon mado; utsibic, Udas Iscadiote, yuecshun Esus chieshënquido Esus bedmequid. Aidtedi, Esusën, Ëbi chuibeneta, caido icpanëdash.

Nuquin Papan bëdamboen isaido icnuc ambi icsamboen isaido

(Mat. 4.23-25, 5.1-12)

¹⁷Adashic macuësh yacnoësh abëd 12ted icquido pada-padambo yacno budash abi tsibanquido dadpen icsho

isash Esus nidtuidpanëdash. Nëidted icpanëdash: Nëidic, Edusaden yacnoësh choquido; utsibic, Acte Dapa cuëman shubu dadpen icquid Tido caid yacnoësh choquido; utsibic, Sidon caid yacnoësh choquido. Aido Esusën chuibansho tantianuec cho-choash tabadnubi, Ëbi bëdamepec, quequin tantiec utsibo choash tabadpanëdash. ¹⁸Adec choquido mayan icsa dapudedaid icsho isun Esusën dapudemapanëdash. ¹⁹Adsho isun nadatiambocquid Esus neque. Mishnu, qeshun mishequi bëdancuededpanëdash.

²⁰Adshumbic abëd icquidombo isbanquin naden Esusën chuibampanëdash:

—Nëmbo mibi icnuc mitsana nibëdtenesho isun Nuquin Papan bëdamboen isaido iquec abuc nidan con natedi mitsana nendac.

²¹“Nëuëshquio bundodenesho isun Nuquin Papan bëdamboen isaido yec abuc ëbëd tabadec bundoesa iquendac.

“Nëuëshquio matses Nuquin Papan chiaid tantiesa icsho isash unësqiuo yec shubidednequid Nuquin Papan bëdamboen isaid yec abuc nidash ëbëd tabadec bëdambo iquebi quependac adquido.

²²“Esus tantiaquid icsho chieshënquin pudued cainquio yaid adembidi mua uaquin chuishunaid Nuquin Papan bëdamboen isaidquido nec.

²³“Adomboembidi ëmbi ëndenquimbo chuimaid aton matsesën icsamboen chuishundeniampic. Adomboembidi mibi min matsesën icsamboen chuishundenetsiash. Nidaidëshun adoaid iquec Nuquin Papa yacno choacsho ambi bëdambo icmiaid mibi iquendac. Adquid iquendabi quequin tantiec mibi icsamboen chuishunaqui, Cuishon, queta.

²⁴“Padnuen, con na dadpen iquec, quequin tantiec bëdamboec tabadebi, qesho Nuquin Papan icsamboen isaido

mibi nec. Nidaidënsun mimbi bedteniaiduidi tantiec Nuquin Papa yacno puduedtiapimboquid mibi iquendac. Nidaidën bédamboec tabadquin ënden bedondaïdi mibi nec.

²⁵“Nidaidënsun abi bunaidtedi bedquido Nuquin Papan icsamboen isaido nec. Abi bunaiduidi tantiaquin Nuquin Papan chiaid tantianu qeshun tantiatiapimbo iquendac.

“Mitsanauidi tantiec, Bédambo iquebi, quec mamë nec tabadquido icsho Nuquin Papan icsamboen isaido mibi nec. Adquido Nuquin Papa yacno puduedte bunsho, Padi, cac shubiquiendac.

²⁶“Bédambocquid nec, quequin mibi dadpenshun chuisho tantienda. Adomboembidi mua uain Nuquin Papan ëndenquimbo chuimaidpembon chuipampic. Aidon chiaid tantiasun tsusedpabon Nuquin Papan chiaid tantienquo yanampic. Adquido Nuquin Papan icsamboen isaido nec —quepanëdash Esus.

Mibi uimanënkuido tantiaquin nabanta, quiaid
(*Mat. 5.38-48, 7.12*)

²⁷Aden chiashic abi Esus onquec: —Ëmbi chiaid tantiaquidquid nad iqueque. Chuinu. Tantiata. Mibi chieshënkuido bédamboen tantiaquin nabanta. ²⁸Adembidi mibi icsamboen chuiquid bédamboen chuita. Adembidi, ëbi icsamboen naquido bédamboen tantiaquin cuidenda, Papa, quequin Nuquin Papa chuita. ²⁹Adembidi mibi cuesquid cuidenda. Adembidi mibi icsamboen nadenesho cuidenquiocquin adembi bédamboen nabanta. Adembidi ampequin min dashcute bedanec nidsho isun, Chiata. Dadamicquidtsen buan, cata. ³⁰Utsibic, aton na nibëdquid, Bec cho, qesho meneta. Adembidi utsin mitsana ampesho isun cuidenquiocquin

bédamboen naoata. ³¹Adembidi ëbi bédamboen nashuntiaquid nepec quequin mimbi tantiacpadomboen utsi tantiaquin nashunta.

³²“Ëbëd tantiananquiduidi tantianu, quec ÷bédamboda mibi icpe? Padenquo. Adembidi Esus tantiesan abipadquiocquido tantiec. ³³Adecbidi, Ëbi bédamboen tantiaquin nashunquiduidi tantiaquin nashunoanu quec ÷bédamboda mibi icpe? Padenquo. Esus tantiesan adembidi nashunquidquid nec. ³⁴Adecbidi, Ëbi menequiduidi menenu, quec ÷bédamboda mibi icpe? Padenquo. Esus tantiesan adenuidi menec. ³⁵Naden nata, quequin chuinu. Tantia. Mibi chieshënkuid icsho aid tantiaquin bédamboen nabanta. Adembidi mibi meniantiapimboquid, Bec cho, qesho, Yucash cuidnanun nanuna, quenquiocquin meneta. Mimbi adosho isun Nuquin Papan mibi bédamboen isendac. Adobanec bédambo iquebi quec mibi tabadendac. Adomboen nabanquido Nuquin Papan nacpadomboen nabanquid nendac. Adquido aton mado iquendac. ³⁶Nuquin Papan abi chieshënkuido nashundeniacpadomboen mibi chieshënkuido nashundeneta —quepanëdash Esus.

Icsambocquid nec, quequin chienda, quiaid
(*Mat. 7.1-5*)

³⁷Aden chuibanashic Esus abi onquec: —Ëmbi tantiacpadomboen naisa icsambocquid nec, quenda. Adesa abi yacno choacsho Bédambocquid neque. Puduedme, Nuquin Papan caindac. Adecbidi, Icsambocquid iquec. Aid cuidtiadquid Nuquin Papa nec, quenda. Adenquo icsho Nuquin Papan cuidenquioctequid mibi iquendac. Mibi icsamboen tantiaquin utsin nasho isash

cuidnanenquo yec bēpiscudta. Adquid, Cuidnu, quenquo yec mimi icsamboen tantiaquin naid Nuquin Papa bēpiscudendac. ³⁸Aton na nibēdquid bēdamboen tantiaquin meneta.

Adembidi, mibi tantiaquin abi utsibēd bēdamboec tabadtequid Nuquin Papan mibi menendac. Utsi tantiaquin mimi meniactpadomboen mibi tantiaquin bēdamboen tabadmetequid daēd uashun Nuquin Papan mibi meneoaindac —quepanēdash Esus.

³⁹Aden chuishumbic utsin tantienquo ictequid abēd icquido naden Esusēn chuipanēdash: —ĴPodquedēn nidnu quec bēshuaid utsi bēyucampecta nidtic? Nidnu, quianec nidec abi daēdi nidaid shēcuē ampaēdpatsiash.

⁴⁰Adembidi tantianuequidēn abi tantiamequid dēniactiapimbo iquec. Tantiamiac abi tantiamequidpadquid iquendac —quepanēdash Esus.

⁴¹Adoshombic adembidi tantiamequin naden Esusēn chuipanēdash: —ĴAtotsi quiash utsi bētsiadaid pistsēcquid isequi mibi bētsiadaid dapa isadtiapimbo icpec? ĴMibibi bētsiadaid dapa bēbedadabicquin mitsipadentsi mimi utsi bētsiadaid pistsēcquid bedshunuen ispe?

⁴²Adembidi, utsin tantiaid icsa abentsēc icnubien mimi tantiaid icsa utsi-utsiec icnuc ĵatotsieshun, Mimi tantiaid icsa ēnta, quequin utsi chuipe? Mimi tantiaid icsa nibēdacimboen mimi chuipeque. Adoenda. Mimi tantiaid icsa ēnshun utsin tantiaid icsa icsho isun ēmenuequin chui —capanēdash Esusēn.

Cuēte abipadquid aton bacuē nec, quequin chiaid

(Mat. 7.17-20, 12.34-35)

⁴³Adoshombic, adembidi Esusēn chuipanēdash: —Cuēte bēdan bacuē adquiobidi bacuēec. Cuēte icsan bacuē adquiobidi bacuēoaic. ⁴⁴Chetequid isun

cuēte dada matsesēn tantiec. Aden tantiec nisanquidēn bacuē isash, Dadain bacuē nec, quenquo matses iquec. Adecbidi, echo bacuē isash, Bata nec, quenquo matses icoaic. ⁴⁵Adembidi bēdamboen tantiaquidēn ambi tantiacpadomboen utsi bēdamboen tantiaquin nabanendac. Adecbidi ambi tantiacpadec bēdamboec onquec. Adembidi icsamboen tantiaquidēn ambi tantiacpadomboen utsi icsamboen tantiaquin nabanec. Adecbidi ambi tantiacpadec icsamboec onquec —quepanēdash Esus.

Tantiaquidquo icnuc tantiauidquid nec, quequin chiaid

(Mat. 7.24-27)

⁴⁶Adoshombic: —ĴAtotsieshun, Con Icbo mibi nec, qeshumbi ėmbi chiacpadomboen naisa mibi ne? ⁴⁷Ēbi yacno choshon ėmbi chuibansho tantiaquiash nidshun nadomboen naquidquo iqueque. Chuinu. Tantiata. ⁴⁸Cunquequid dapan chimeshnushe qeshun shubu uaquidēn shēcuē ėquēduc uēdēshcashun buintad nitsinquid. Adembidi, natiamianquiec cametequid yanabicnuc tantesa uainquiocnuen ėbi tantiaquidquo icquin ėmbi chiaid papuduedshun adomboembidi nabanquid nec. Adquidēn tantesa uainquo iquendac. ⁴⁹Utsibic nad iqueque. Tanti. Ēquēduc uēdēshcabi nitsinaid cunquequid dapan chimeshunendac. Adecbidi, ėmbi chiaid papudueduidtsacpadomboen nabanenquo yec natiamianquid chonoc abi papudueduidtsaid bēpiscudendac. Adquid uquē nēsecatequid nendac —quepanēdash Esus.

Sondado chuiquidēn tantiaid

(Mat. 8.5-13)

7 ¹Aden iccuededquido chuiquin nainash Capednaun caid yacno Esus nidoapanēdash. ²Capednaun caid yacno

choash Esus tabadnubien
isadaidpembon sondado chuiquidën yua
abi cudasaid unëstiadtsëcquio
icpanëdash. ³Aton yua unëstiadtsëcquio
icnubien, Nënquid bédamequid Esus
nëmbobi iquec, quequin utsibon chiac:

—Aidën con yua bédametsiash
—quianec isadaidbo tsusiobo yacno
nidshun istuidash: —¿Con yua chiec
Esus yacno ada mibi nidpatsia?
—quepanëdash sondado chuiquid.

^{4,5}Adoaquien: —Ai —quianec Esus
yacno isadaidbo tsusiobo nidshun
chuituidec: —Sondado chuiquidën
chuitan caido nebi. Con yua
unëstiadtsëcquio iqueque. Esus
bédamequid neque. Chuitan, cac mibi
chiec chobi. Sondado chuiquid
bédambocquid nec. Nuquin Papan
chiaid chuibante shubu uamiondaidquio
nioshe. Ambi chiacpadomboen aton yua
bédametiadquidi mibi nec
—quepanëdash isadaidbo tsusiobo Esus
caic.

Adoac aidobëdi Esus nidpanëdash.
⁶Adec aidobëd Esus nidshobi sondado
chuiquidën chomiaid utsibo choquin
bèquedtuiddash nadpanëdash: —Sondado
chuiquidën chomiaid nebi. Aidën chiaid
chuihuec chopobi. Naden chuita,
caposhi: “Padicnuna, Icho.
Icsambocquid nebique. Mibi
bédambocquid iquec con shubun
puduedenquioctiadquidi mibi nec. ⁷Ëbi
icsambocquid iquec mibi bèquedec
nidenquioccobi. Mibi bédamequid yec
con shubun puduedenquioquin mibi
yacnoshombi, Bédanta, mimbi cac con
yua bédampec. ⁸Ëbien sondado
chuiquid nec. Ëmbi nidta cacpadquiequi
sondado nidec. Adecbidi, Cho, ëmbi
cacpadquiecbidi choaic. Adembidi,
Nadota, cacpadomboembidi con yuan
nabanec,” quequin chuitan sondado
chuiquidën cabocpadembi mibi

chuiquidën chuitan caido Esus caic.

⁹Adoaquien: —¿Abimbobida cai?
—qeshun ambi chiaid
tantiamenuequin iccuededquido Esusën
bëisbanquin nadopanëdash: —Chuinu.
Tantiata. Sondado chuiquid
isadaidpembo ëbi tantiaquidpadquid
isadaidbo nibëdec —quepanëdash Esus.
¹⁰Aden chiaquien sondado chuiquidën
chuitan caido aucbidi nidoash shubun
puduedshun sondado chuiquidën yua
bédamiaid istuidpanëdash.

Nianten mado uincuen uaid

¹¹Adashic, ushë utsin shubu dadpen
icquid Nain caid yacno Esus
nidpanëdash. Aidbëdi abëd icquido
nidpanëdash. Adecbidi matses utsibo
dadpen nidpanëdash. ¹²Adec nidequi
Nain tsasi uaid quënë shëcuë
anoentsëqui choquimbi unësaid bëquido
bèquedtuiddash. Unësaid epa
icnubi ani nianten icpanëdash. Niantebëd
Nain yacnocquido dadpen
cho-chopanëdash. ¹³Adec cho-choec
nianten shubisho isash Esus unësqüio
yec: —Shubienquio yec ënëd
—quepanëdash. ¹⁴Adec, Ënëd, quetanec
udictsëc nidshun unësaid nanaid Esusën
mishnubi abi bëquido nidtuiddash.
Nidtuiddasho isun: —Abuido, uëtsëdtota
—cac ¹⁵uëdtsëdtoash tsadec unësboed
onquepanëdash. Adsho isash ani caic:
—Në, unësboedi min mado
uincuenoshe. Abëdi nidec nid
—capanëdash Esusën.

¹⁶Aden unësaid uincuemesho isash
cho-choquido: —Adopenshenda
uincuemec —qeshun Nuquin Papan
naid chuibanpanëdash. Aden
chuibanec: —Nuquin Papan matses
bédamboen isnuen ambi chomiaidquio
nuquibëd icmiosh —quec isquido
onquecuededpanëdash.

¹⁷Aden isash nidshun unësaid uincuemiaid isquidon chuibansho isadaidbon nidaid Udeya caid yacnocquidon tantiabempanëdash. Adembidi chiac dëuequidontsen tantiapanëdash.

**Ëbitedishun cainaid mibi nec,
quequin Uanën chiaid**
(*Mat. 11.2-19*)

¹⁸Adnubien, acten mentoanondaid Uan cuëmëdquid quënën nauedaid icsho abëd icquidon Esusën nabanaid chuibampanëdash. Adoquien abëd icquido daëd chomeshun Uanën nadopanëdash: ¹⁹—Esus yacno nidshun nadota. ¿Ëbitedishun cainaid Nuquin Papan chomiaid abentsëcquiobi mibida ne? ¿Aidtabi nedi? mibi quenuc, ¿Adambi utsi caimpe? quequin chuita —Uanën cac aid daëdi Esus yacno nidpanëdash.

²⁰Adec Esus yacno choash: —Acten mentoanondaidëmbi Uanën chomiaido nebi. Uan nadosh: “¿Ëbitedishun cainaid Nuquin Papan chomiaid abentsëcquiobi mibida ne? cac ¿Aidtabi nedi? mibi quenuc ¿Adambi utsi caimpe?” quiosh Uan —quepanëdash Uanën chomiaido Esus caic.

²¹Aden chiaquien icsambocquid bédamequinc, mayan icsa dapuduedaid dapuduemequinc, bëshuaid bédamequinc caquin Esusën ismëbampanëdash. ²²Aden nabanquin nainashic: —Mibi chuiquid Uan caid yacno nidshun ëmbi nabamboedtedi mimi isboed naden chuitanta. Bëshun isbenosh. Adecbidi canite icsaidi capuanosh. Adecbidi daushumbocquidon nami bédanosh. Adembidi pashun tantiabënosh. Adembidi unësaid uincuëmiosh. Adembidi aton na nibëdquido tantiamenuen Nuquin Papan chiaid

Esusën chuibanosh, quequin Uan chuitanta. ²³Ëmbi aden nabansho isun tantesa uainquiocquin Nuquin Papan bédamboen isaidquio nendac, Esus quiosh quequin Uan chuitanta —quepanëdash Esus Uanën chomiaid daëd chiec.

²⁴Adashic, Uanën chomiaido nidambi iccuededquido tantiamëbanuec Uan chiec Esus nadpanëdash: —¿Atotsi isnuec matses nibëdacno nidonda? ¿Cunquequidën ishacunaid isnuecta nidtionda? ²⁵¿Aid isnuec nidenquio yec atotsi isnuec nidonda? ¿Dashcute ushumbocquid dasiuidquid isnuecta nidtionda? Padenquio. Dashcute ushumbocquid dasiuidquido aton na dadpenquio icquido ancanquid dapan shubun tabadquido nec. ²⁶Ad icnuc, ¿atotsi isnuec matses nibëdacno nidonda? ¿Nuquin Papan ambi chiaid chuimiaid isnuec nidenquioda ictionda? Ai, matses nibëdacno Nuquin Papan chuimiaid isnuec mibi nidondac. Uanën ëbi chuiquidëmbi ispondashi. Ëbi ëndenquimbo chuiquido ëbi isesabo icpampic. ²⁷Ëbi cain naden Uan Nuquin Papan chuimiampid nec:

“Mibi choec quequin chuibanquidba chomëmbi.

Mibi choec quequin chuibanac ambi tantiaid icsa ënshun mibi cainquidombo iquendac.”

Aden ëbi cain Uan chuiquin dada uapampid nec.

²⁸“Adëmbi Uan chuibanu. Tantiata. Nuquin Papan chuimiaid Uampadquid matsesën tishaid utsi nibëdec. Aidën ëbi chotequid chuibanac choshon ëmbi nabansho isenquio icposh. Isash, Nëid Nuquin Papan chomiaid nec, quetsemposh Uan. Aidi quënën nauedac ëmbi nabanaid istiapimbo yec tsadec, Nuquin Papan chomiaid, ëbitedishun cainaid mibida ne, quepec —quepanëdash Esus.

²⁹Aden Esusën chuibansho tantiash: —Nuquin Papan naid bédambo iquec —quepanédash Uanën mentobanondaido. ³⁰Utsiboen ambi tantiaid icsa énenquo icquin Uan Esusën chuisho tantiash, Nuquin Papan naid bédambo iquec, quetiapimbo aido icpanédash. Aido padiseyobobéd matsesën naden nata quequin chiaid tantiamequido icpanédash.

³¹Aden Uan chiaish Esus: —¿Nuquin Papan chiaid nēbi chuisho tantiesa mitsipadquid nepeque? ³²Adquid chuinu. Tantia. Ambi tantiacpaden naisa icsho isash bacuēbo yacbimboec nēishun mimbi icsamboen tantiec. Adembidi ambi tantiacpaden naisa icsho isun Nuquin Papan chiaid tantienquo iquec. Adquidēn Nuquin Papan chuimiaidēn nabansho icsamboen ispec. ³³Nua cubudquin pesa Uan icsho isash, Mayan icsa dapuedaid nec, queposh Uanën chuisho tantiesa. ³⁴Ēmbi peshun acsho isec, Nua peshun tantienquiocquin acquid nepec. Aidbidi icsambocquidobéd icquid nec, ēbi caposh. ³⁵Aden tantienquiocquid, Bédamboen tantianu, qeshun bédamboen tantiaquidēnquo chuibansho tantiash abi tantiamequidpadquid iquendac —quepanédash Esus.

Chidon Esus tanoshcaid

³⁶Adashic, Ēbi yacno pec cho, padiseyobo abentsēcshun cac aibdēd nidash shubun puduedash pete santen cuēshnudash Esus uepanédash. ³⁷Adec Esus puduedash uesho isquidon chiac utsin, Icsambocquid nec, caid chido choquin noadte bēda danoshquete aton shubumpichobi bēpanédash. ³⁸Aden bēequi Esus yuedacno choash puduedshun abi bédamequid Esus

istuidash, Ēbi bédamequid bédambo iquec, quequin ambibi tantiec shubiec Esusën taēno tsadbudshun aton bēunēn tapascapanédash. Aden tapascac taē chucusho isun aton manēdaidēn taucshun taē tachoccabanshun noadte bēdan chidon tanoshcapanédash. Chidon aton na bedtequid dadpen menequin comapenec noadte bēda bedshun Esusën taē tanoshcapanédash chidon.

³⁹Chidon adosho isash Esus yuedquid, Simon caid, abibi onquec: “Ēmbi yuedaid Nuquin Papan chuimiaid iquec, Ēbi mishquid icsambocquid nec,” quequin chido mishmenquo icpec, quepanédash Simon.

⁴⁰Adoaquien, tantiaquidquo icquin Esusën: —Mibi tantiamequin chuinu. Tantiata, Simon —capanédash.

Adoaquien: —Aden chuiban. Tantanu —quepanédash Simon.

⁴¹Aden tantiashun Esusën Simon ambi tantiaid icsa tantiamenuen utsi chuiquin nadopanédash: —Bec cho. Yuecshun menenun nanuna, quepondash daēd. Abentsēcshun dadpen bedshunubi utsin daēdpectsēc bedshumpondash. ⁴²Aden bedshunshun yuecshun ambi bedshunacted abi daēdi meniantiapimbo icpondash. Adsho isun: “Padi. Mimbi bedondaid ēbi cuidenda,” quequin abi bedshunēdaidēn abi daēdi chuipondash. Adoacsho, ¿Mitsiquid abi bedshunēdaid énenquiocquin tantiec bēpiscudenquo icpec? —quepanédash Esus Simon caic.

⁴³Adoaquien: —Ambi dadpen meneshun cuidenda caidien nechitec —quepanédash Simon.

Aden chiaquien: —Ai, bédamboen tantiaquin mimbi chioc —quiash

⁴⁴Simon ismenuec Esus chido yacmi bidiaidshun naden chuipanédash: —Min shubun puduedacsho mimbi taē pante

ëbi menenquiococ. ¿Nëid chido isquindactio? Aidëmbien aton bëunën taë chucu uashun aton manëdaidën con taë bëchishaid ucposh. ⁴⁵Min shubun ëbi puduedsho isun tanchoccanesa mibi nec. Padnueni ëbi puduedacsho isun nëid chidon ëbi tantiaquioquin yuen con taë tachoccaniosh. ⁴⁶Bëchin manoshcanesa mibi iccoc. Padnueni nëid chidombi noadte bëdan tanoshcaniosh.

⁴⁷Adembidi mibi chiembique. Tantiata. Mayan icsa dadpeshun tantiamiaid icsho nëid chido bëdamepombi. Aden bëdamiashic abi icsaid tantienquo yec bëpiscudpobi. Èmbi aden nac ëbi comapenen tantiaquioquin ëbi nashunquidquo nëid chido nec. Padnuen utsi icsaid daëdpactsëc mibi icsaidtedtsëcbidi icpec. Adquid icsaid bëpiscudebi ëbi quenuc ëbi bëdiactsëc tantiatsec mibi nashumë nec —quepanëdash Esus Simon caic.

⁴⁸Aden Simon chiashic chido caic: —Icsaquid nec, quenquiocquin icsainquo yacimboecquid mibi isembi —quepanëdash Esus chido chuiوياic.

⁴⁹Adsho tantiaish: —Icsainquo yacimboecquid mibi isembi, quec ¿mitsipadquid Esus nepec? —quepanëdash iccuededquido. ⁵⁰Aden iccuededquidon tantianubi chido caic Esus: —Èbi tantiaquid yec Nuquin Papa yacno puduedquid mibi neyoc. Bëdamboec tabadaid tantiamiaid mibi iqueque. Dacuëdenquo yec nidta —quepanëdash chido caic.

Chidobo abi nashunquido

8 ¹Adshumbic, Esusën shubu dadpen yacno-yacnomboen chuibanquin Nuquin Papa yacno shubu abentsëqui yacimboec nidaidën tabadaid chuibenepanëdash. Abi bëdamequid tsibananec chidobo nidpanëdash. ²Ambi mayan icsa dapuduemiaidobëdtan ambi

bëdamiaidon Esus tsibanampanëdash. Madia, Macada yacnoshon tishaid chedon Esus tsibanampanëdash. Mayan icsa 7ted dapuduemiaid Madia icpanëdash. ³Abëd nidquid utsi Uana icpanëdash. Aidën bënë Chusa cuëmëdquid, ancanquid dapa Edodesën shubu nuntan nacnemequid icpanëdash. Abëd nidquid utsibic, Susana icpanëdash. Chido utsibo dadpen Esusbëd capucuenepanëdash. Aidon aton na dadpen icnuc Esusbëd icquidon aton na nibëdsho isun menebampanëdash.

Pete ëshë sequid

(*Mat. 13.1-23; Mad. 4.1-20*)

⁴Aden chuibeniash tabadtuidtsëcnubi ambi chuiquin tantiambeodo cho-choquin tsibanampanëdash. Cho-chosho isun, Mibibimboecnuc chiembi, quenquiocquin Esusën nadopanëdash: ⁵—Tiedën caniquid pete ëshë sianuec aton tied yacno nidquid icbo. Adec nidshun tiedën caniquid pete ëshë secabanac maisec utsi-utsiëc podqued nantan paëdacsho matsesën manenubi utsi-utsien uicchunën chec. ⁶Utsibic, cuënote dadpen samëdacno secac badedquid dëyucuidtsash nidaid ëquëduc tapun nidenquo iquec bidiquequid. ⁷Utsibic, nisanquid dëyucacno secac aibdëdi dëyucash canidoudtsacsho nisanquidën bëtinac unësquid. ⁸Utsibic, nidaid bëdan secac dëyucash caniaish dadpen ëshëndac —quepanëdash Esus.

Aden chuibanashic: —Tantiate bëdambocquidën ëmbi chuiboed tantiapec —quepanëdash.

⁹Adoquien: —¿Mitsipadquid tantiaid mimbi chuiboed icpec? Èbitedi tantiamequin chuiويا —capanëdash abëd icquidon.

¹⁰Adoquien: —¿Mitsipadequini Nuquin Papa yacno tabadpe?

queboedëmbi nëbi mimbi tantiabeneç.
Padnuen utsibon tantienquio yaid aid
iquec. Aden chiac:

“Ëshë bédambocquid icquimbi
tantiesa icquin ma Nuquin Papa
yacno isenquiocpanuna.
Adembidi tantiate bédambocquid
icquimbi tantiesa icquin ma
abimbo chiaid
tantienquiocpanuna”

—quepanëdash Esus.

¹¹Aden chiashic: —Ëmbi chuiboed
nad iqueque. Tantia. Chuinu. Tiedën
caniquid pete ëshë icbon
siaidbimboecquid Nuquin Papan chiaid
nec. Ëshë siacno nidaidbimboecquid
matsesën tantiate nec. ¹²Podquedën
nidaid tsasimbocquidbimboecquid nad
iquec. Nuquin Papan chiaid tantiaçh
papuduedtiapimboçsho Satansën
bëpiscudmiaid adquid nec. ¹³Cuënote
dadpen samëdacno nidaidbimboecquid
nadquid iquendac. Nuquin Papan chiaid
tantiaçh, Bëdambo iquebi, quiaçh
natiastianquieç cametequid icnuc aid
tantieç Nuquin Papan chiaid
papudueduidquid iquendac.

¹⁴Nisanquid dëyucaid dadpen yacno
nidaidbimboecquid nad iquec. Nuquin
Papan chiaid tantiaçh abi bunaid, abi
nënaid, ambi natequid adquid
tantiaquin Nuquin Papan chiaid
bëtashacimboeç icnuc bëdamboeç
tabadaid ismesa yampec. Aden
bëdamboeç tabadaid ismesa yanuc utsin
Nuquin Papan chiaid tantiatiapimbo
iquendac. ¹⁵Nidaid bëdabimboecquidien
nad iquec. Nuquin Papan chiaid
tantiadoneç bëdamboeç tabadquin utsi
ismequidquio nec. Adquid
natiastianquid chonoc tantesa
uainquiocquin ënenquiocquin ismendac.
Aden ismiac Esus tantiaquid utsi dadpen
yampec —quepanëdash Esus ambi
chuiboed abëd icquido tantiamenuc.

Tabote nënantan nanac chënquiacbimboecquid

(*Mad. 4.21-25*)

¹⁶Aden chuishumbic naden Esusën
chuiopanëdash: —Tabote taboshon
matsun bëtashesa. Adembidi tsadte
tëdion tabote nanesa icbo nec. Ma ëmbi
yuedaidon isnueshun nënantan tabote
nanquid. ¹⁷Adomboembidi mimbi
ompoquin chuibanaid Nuquin Papan
ompoenquiocquin chuibanendac.
Adomboembidi mimbi tantiamenquio
yaid aidëmbi chuibanendac. ¹⁸Ad icnuc
ëmbi chiaid bëdamboen tantiaquiota.
Nuquin Papan chiaid tantianuequin ambi
chiaid dadpen tantiaquid. Adquid ambi
tantiapadec tabadquid. Adec tabadquin
ompoenquiocquin utsi ismequid. Nuquin
Papan chiaid tantiauidboed, Bëdamboen
tantiembi, qeshun
papuduedmenquiocquin bëdamboen
ismesa nec. Aden ambi tantiauidaid
uesadendac —quepanëdash Esus.

Aton utsibo aton titabëd choaid

(*Mat. 12.46-50; Mad. 3.31-35*)

¹⁹Adashic, Esus isec aton utsibobëd
aton tita chopanëdash. Cho-choshon
matses dadpen nuntan tabadsho isun, Èbi
choaid chuita, cac ²⁰shubun puduedshun:
—Titabëd min utsibo choshon
umanucshun mibi cainec mibëd onquete
bunquin —capanëdash Esus chuiquin.

²¹Adoquien: —Adquid chuinu.
Tantia. Nuquin Papan chiaid tantiaçh
nabanquido ëbëd icquid nec. Adquid
buchu caindambi. Adquid utsi chido
chuchu caindambi. Utsibic tita
caindambi —quepanëdash Esus.

Acte tëccoasquesho ënëdmiaid

(*Mat. 8.23-27; Mad. 4.35-41*)

²²Adashic: —Chian cuëma utsiuc
nidnu. Nid —quianec abëd icquidobëd

cano antsadtoanec nidpanëdash. ²³Adec nidec cano anuequi Esus ushtopanëdash. Adec ushnuvien cunquequid dapa comapenec cunqueubi acte tècecoasquequidën acte uemiac cano mentoadtsempanëdash. Adsho isash dacuëdec ²⁴Esus ushacno nidshun tinec abëd icquido: —Nuqui mentoadeque. Isucun, Icho —quec comapenec cuëdpanëdash abëd icquido. Adsho tantiansh isucunash nidtoshon: —Mibi comapenec cunqueque. Ènëd —Esusën cac cunquequid badedquio ènëdpanëdash. Adembidi: —Mibi comapenec tècecoasqueque. Ènëd —Esusën cac badedquio acte tècecoasquequid ènëdoapanëdash. ²⁵Aden ènëdmetanec: —¿Atotsi quiash èbi tantienquio yec dacuëdcuedede? —Esusën caquien abëd icquido dacuëdcuededquiequi, ¿Mitsipadquid nepec? Cunquequidbëdtabi acte tècecoasquequid ènëd cacpadequi ènëdchitosh, quec abëd icquido abibi onquécuededpanëdash.

**Mayan icsa dapuduedaid
dapuduequin bëdamiaid**
(*Mat. 8.28-34; Mad. 5.1-20*)

²⁶Adshumbic, acte tècecoasquec ènëdan nidaid Cadidia yacno chian cuëma utsiuc Esusbëd icquidon poteoiaic nidaidëmpi Cadada caid yacno aido nidpanëdash. ²⁷Ambo nidequi canon choash dectatosho isash mayan icsa dapuduedaid dada Esus bëquedec chopanëdash. Aidi shubu dadpen yacno tabadboedi nëbi uano unësaid chococate macuësh cuënote yacno tabadpanëdash. ²⁸Aidi Esus bëquedec choash sidquianec Esusën taëno uebudash: —¿Atotsienuec èbi isec cho? Nuquin Papan madombo mibi cadoque. Èbi mëyanenda —quec onquenubien ²⁹mayan icsa chuiquin: —Dapuduenta

—capanëdash Esusën. Mayan icsa dapuduedaid nad icpanëdash. Shocosh bucun abi mëtaniaidbëdtabi abi tataniaid chictenesho isun, Mëtanenu, cainquio yampanëdash. Adoac mayan icsan matses nibëdacno nidmiaid icpanëdash.

³⁰Adquid nec, quequin tantiaquin Esusën: —¿Tsutsi cuëmëdquid mibi ne? —capanëdash.

Adoaquien: —Sinco midted dapuduedondaid nebi —quepanëdash mayan icsa dapuduedaid onquec.

³¹Aden chiashic: —Mibi bëdambocquid cadoque. Ènenquiocquin mëyanacno cuidnuequin èbitedi nidmenda —quiashic ³²chancho dadpenshun pec tabadsho isash: —Èbitedi chanchotedi dapuduedtiadquio iquebi. ¿Ada bëdambo icpec? —quepanëdash mayan icsa dapuduedaid.

Adoaquien: —Aido dapuduedtan —Esusën cac ³³dapuduequequi chancho mayan icsa dadpen dapuduedash acte quiusudacno chancho comapenec ni quec chian pudun-pudunec mentoadbudnec nibëdquieq unësibunepanëdash.

³⁴Adsho isash chancho pemequin isquido titinquianec shubu dadpen yacno choshon ambi isboed chuituidac ³⁵anocquido istanu quianec Esus yacno cho-chopanëdash. Adec choshon mayan icsa dapuduequin bëdamiaid dashcute dasiuidash bëdamboen tantiec Esusën taëno tsadsho istuidpanëdash. Adec aid onquesho isash anocquido, Uinsadpambo iquec, quiash dacuëdcuededpanëdash. ³⁶Dacuëdsho isun mayan icsa dapuduequin bëdamiaid isquidon ambi isboed dacuëdquido chuipanëdash. ³⁷Aden chiac: —Nëuëshquio nidenquio icpec —quepanëdash dacuëdquido Esus chieq. Adoac Esusbëd icquido canon antabëdtopanëdash.

³⁸Adsho isun: —Mibëd niadiquoio iquebi —quepanëdash ambi mayan icsa dapuduemequin bédamiad Esus chiec.

³⁹Adoquien: —Padi. Min shubuno nid. Ambo tabadquin Nuquin Papan naid mayan icsa mibi dapuduedaid dapuduemiaid anocquido chuibanta —quianec Esus canon nidpanëdash. Aid nidnubien mayan icsa dapuduemequin bédamiad nidanecon aton shubu yacno choshon anocquidtedi Esusën naid abi mayan icsa dapuduemequin bédamiad chuibanoapanëdash.

Chido intac budaid bédanai icnuc champi uincuemaiad

(Mat. 9.18-26; Mad. 5.21-43)

⁴⁰Adashic chian potiash cuëma utsiuc Cadidia yacno Esus padpidec chosho isash: —Mibi isec bédambo iquebi —quepanëdash iccuededquido abi cainquido. ⁴¹Adnubien, Nuquin Papan chiaid chuibante shubun tabadquid isquid Aido cuëmëdquid choash Esusën taëno uebudash: ⁴²—Con champi abentsëc tishaid unësanequidquio iccosh. Aton seta 12ted icquid niosh. Èbi cudasaid nec. ¿Aidi isnuec con shubuno ada nidtsia? —quepanëdash Aido.

Aden chiac Esus nidnubien cho-choquido dadpen tsucus-tsucustsëcquio yec Esus datsidadpanëdash. ⁴³Adnubien, chido seta 12ted matamec intac budaid chopanëdash. Aidi dauëchoquid dadpeshun bédametiapimbo icpanëdash. ⁴⁴Adoac bédanabi yec, Bédamequidën èbi bédamepec, abibi quianec Esusën cachoc choshon ismenquiocquin Esusën dashcute cuëmmano mishnubi aton intac badedquio bédampanëdash.

⁴⁵Aden mishac: —¿Tsuntsimbini mishosh? —quepanëdash Esus. Aden

chuisho tantiash abi datsidash capuquido mishambo yec otacquio tabadcuededpanëdash. Adecc tabadnubien: —Matses dadpeshun tsucus-tsucustsëcquiocquin mibi cuëscabededec —capanëdash Petedon.

⁴⁶Adoquien: —Matses abentsëcshun èbi mishosh. Èmbi nadatiambocquin natequid bëuesadtsac —quepanëdash Esus.

⁴⁷Adec Esus onquesho tantiash chido, Ambi tantiacpadomboen èbi isec, quec abibi onquequi dacuëdec uedëquequi Esusën taëno uebudtuidpanëdash. Adecc uebudec datsidadquidon tantianubi: —Intac bédanuequin min dashcute cuëscatsequi bédanobi —quepanëdash chido Esus caic.

⁴⁸Adoquien: —Mimbi tantiacpadquiecc mibi bédanaye. Dacuëdenquio yec bédamboec tabadec nid, champi —capanëdash Esusën.

⁴⁹Aden Esusën chuinubien Aidon shubun icquid utsibo Esus yacno cho-chopanëdash. Choash: —Min champi unësoshe. Chuibanquin tantiamequid min shubuno nidnunda —capanëdash abi yacnoësh choquidon Aido chuiquin.

⁵⁰Aden chuisho tantiash: —Dacuëndenda. Aden tantiequi nid. Mimbi tantiacpadquiecc min champi bédaneque —quepanëdash Esus Aido caic.

⁵¹Aden chianec Aidon shubuno nidash cho-choquidotedi, Èbëd puduedenda, quequin chianec Petedo, Uan, Acobo aitted buanec Aido cuëmëdquidën champi yacno Esus puduedpanëdash.

⁵²Ambo puduedshun anocquido unësquio yec shubisho tantiashun: —Mibi shubieque. Ènëdta. Champi unësenquio yec usheque —capanëdash Esusën.

⁵³Adsho tantiashun, Champi unësacsho isombi, quequin Esus

tantienquiocquin shubiquidon
mamënshumbededpanëdash.

⁵⁴Mamënshumbedednubi Esusën Aido
cuëmëdquidën champin mëdante
mëdinquin: —Nidto, champi
—comapenen cac ⁵⁵aton tiboedte
unësabi yec champi badedquio
nidtopanëdash. Champi nidtoso isash:
—Peme —quepanëdash Esus. ⁵⁶Aton
champi nidtoso isash: —Adopenshenda
ique —quepanëdash ani amëbëdi.

Adoquien: —Mimbi isboed
chuiibanenda —quepanëdash Esus.

**Esusën ëbi chuiবেনeta,
quequin ambi nidmiaido**

(*Mat. 10.5-15, 14.1-12; Mad. 6.7-29*)

9 ¹Adashic ambi ëbi chuiবেনeta caido
12tedtsëqui chometanquin Esusën
nadopanëdash: —Ëmbi
nadatiambocquin nabanacpaden
mibitedishun nabanendac. Mayan icsa
dapuduequinc daicsaido
bëdamequinc cain mibi
capucueniacnoshon mimbi
ismebenendac. ²Nëbi mibi nideque.
Adec capucuequin chuibenequimbi
bëdamebeneta. ³Nidquin cueste uidën
nidte buanenda. Shictoadte buanenda.
Petequid buanenda. Mitsana bedtequid
buanenda. Dashcute utsi buanenda.
Buanenquio yec dadauidquio nidtan.
⁴Adec nidash mibi yuedquidën shubun
puduedshun ëmbi chiacpadomboen
nabanec anouidi tabadta. ⁵Mibi nidacno
mibi yuedquid nibëdsho isun naden
nata. Mimbi tantiaid icsa mibibi
cuiddatte nec, quequin nidaid putu
tasequequin ismeta —capanëdash
Esusën abëd icquido chuiquin.

⁶Aden chiac nidash abëd icquido abi
yuedacno puduedash tabadquin Esusën
chiacpadomboen Nuquin Papabëd
tabadaid chuiabanquimbi daicsaido
bëdamebenepanëdash.

⁷Adnubien Esusën nabansho isquidon
Edodes chuibampanëdash. Edodes
Cadidia yacnocquido ancaquid
icpanëdash. Aden Esusën nabanaid
chuisho tantiashun, ¿Tsdain nepec?
Edodesën caquien,

Acten mentoanondaid, Uan
cuëmëdquid uincuepash icnui,
quenubien; ⁸Edias Nuquin Papan ambi
chiaid chuimiampid padpidec choapash
icnui, utsi-utsiec quenubien, Nuquin
Papan chuimiampid utsi uincuenoapash
icnui, utsi-utsiec quecuededpanëdash,
quequin chuiapanëdash Esusën nabansho
isun chuiquidon Edodes tantiamequin.

⁹Adoquien: —Mambi
uincuentiapimbocon Uan mapi
budtemiondac. ¿Tsdain ëmbi
tantiacmaidquio adobanquid icpec?
—quiashic Esus iste bumpanëdash
Edodes.

Matses dadpen pemiaid

(*Mat. 14.13-21; Mad. 6.30-44; Uan 6.1-14*)

¹⁰Adashic ambi nidmeboedo Esus
yacno padpidec choapanëdash.
Choashumbic ambi nabamboedtedi
chuibampanëdash. Aden chuibansho
tantiash Esus abëd icquido bëyucanec
shubu dadpen icquid Betsaida caid
anoentsëqui nidpanëdash. ¹¹Aido nidsho
isun cho-choquidon tsibanampanëdash.
Adsho isun Esusën Nuquin Papa yacno
tabadaid chuiabanquimbi daicsaido
bëdamepanëdash.

¹²Adashic ushë budtsan Esusbëd
icquidombo Esusën dayunquio choshon:
—Nëmo shubu nibëdeque. Shubu
utsi-utsiec yacno nidshun pete bedshun
pec tabadta, quequin cho-choquido
chuita —capanëdash Esus chuiquin.

¹³Adoquien: —Padi. Mimbibi aido
pemeban —capanëdash Esusën.

Aden chiaquien: —¿Ma nëmbobi
panëmpi mëdante auc abentsëcted

icnubi nuëcquid daëd iquec.
Aidtedtsëqui icsho isunda
cho-choquidtedi pemenuequin ëbitedi
bedtan, cai? —quecuededpanëdash
abëd icquido.

¹⁴Ambobi tabadsho chido
bacuëbobëdtabi tambanenquio icquimbi
dadauidquio, 5000ted icnuc
tambampanëdash.

Adoquien: —Nëidtedi uano
50ted-50tedquien tabadme —Esusën cac
¹⁵ambi chiacpadomboen
tabadmepanëdash. ¹⁶Aden tabadmesho
isun panëmpi 5tedbëdta nuëcquid daëd
sananquin abuc isec: —Mibi
bëdamboquid icquin mimbi meniaid
nëid pete nec, Papa —quec onqueshun
pete cuësh-cuëshun: —Meneban
—Esusën caquien abëd icquidon
menebampanëdash.

¹⁷Aden menebanac piash cubudambic
napi uaid sandobanquin tsitsan 12ted
icnuc Esusbëd icquidon
bedbampanëdash.

Chuiquid dapa abentsëcquiobi iquec, quiaid

(*Mat. 16.13-19; Mad. 8.27-29*)

¹⁸Adashic, matses nibëdacno abëd
icquido icnubi Nuquin Papa chiec Esus
onquepanëdash. Adec onqueshumbic:
—¿Tsutsi ëbi tsibanquidon ëbi capec?
—capanëdash Esusën.

¹⁹Adoquien: —Acten mentoanondaid,
Uan padoen Esus nechitec, quenubien,
Edias Nuquin Papan ambi chiaid
chuiemepampidien Esus nechitec, utsibo
quenubien, Nuquin Papan chiaid
chuiemampid uincuenoaidien Esus
nechitec, utsibo queoaposh
—quepanëdash abëd icquido.

²⁰Adoquien: —¿Ma, mimbi, tsutsi ëbi
cape? —capanëdash Esusën.

Adoquien Petedo: —Chuiquid dapa
abentsëcquiobi, Nuquin Papan

chomiaidquio yec Quidistu caid ma
mibi neyoc —quepanëdash.

Abi unëste chiaid

(*Mat. 16.20-28; Mad. 8.30-9.1*)

²¹Adoquien: —Mimbi ëbi tantiaid
nëbi utsi chienda —quepanëdash Esus
comapenen chiec. ²²Aden comapenen
chiashic Esus: —Ëbi matsesaid icsho
natiambocquin mëyantequid iquendabi.
Ëbi chieshënquido dadpen iquendac.
Nuquin matses tsusio dapabo yec tsusio
utsibo yec Nuquin Papan naden nata
quequin chiaid chuibanquin
tantiamequido yec quec aitedi ëbi
chieshënquido nec. Aidon naden
chiendac: ¿Esus chuiquid dapa
abentsëcquiobi Nuquin Papan
chomiaidta nedic? Aidpenquio nec,
quequin ëbi cuesunemependac aidombi.
Adoquini daëdec ushacsho uincuen
uaindac —quepanëdash Esus abi
uincuen uate chiec.

²³Aden chiashic: —Ëbi tantiaquid
icnuequin ambibi tantiacpadomboen
nainquiocquin ëmbi chiacpadomboen
nabantiadquidi nec. Ëbi mëyanacpaden
mëyanuc unësmene quenquiocquin
tantesa uainquiocquid. Ëbi
tantiaquidquio iquendac adquid.
Nidaidën tabadaiduidi tantiaquid iquec
Nuquin Papa yacno nidenquio iquendac.
²⁴Cuesunenu cac unësmene quiaish Esus
tantiaquid nebi queboedi Esus tantiesa
nebi quequid unëshash Nuquin Papa
yacno tabadenquio iquendac. Utsibo,
Esus tantiaquid nebi, quiaishic abi
cuesunenuequid icnuc adecbidi Esus
tantiaquid nebi, queoapec. Adquid
unëshash Nuquin Papa yacno
tabadendac. ²⁵¿Atotsieshun Nuquin
Papa yacno tabadaid tantienquio yec
nidaidën bëdamboec tabadnuequin
bedted-bedtede? Mimbi bedaidënquio
Nuquin Papa yacno puduedtiapimbo

mibi iquec. ²⁶Esusbëdtabi ambi chiaid tantiaquid nebi nidaidënuësh quetiapimboquid icsho adquidi ëmbi tantiaid nec, queoatiapimbo iquendabi con pa yacnocquidtedishun tantianubi. ²⁷Nad iquendac. Tantiiaquiota. Chuinu. Èbi tantiaquid dadpen yansho ënabicquid utsin-utsinquier isendac —quepanëdash Esus.

Esus bed-bedquesho istiapimbo yaid
(*Mat. 17.1-8; Mad. 9.2-8*)

²⁸Aden chiashic Esus mëdante utsiuc tauadoec ushash Nuquin Papa chiec onquenuc macuësh yacno nidoapanëdash. Petedo, Uan, Acobo aidted buanec macuësh yacno Esus nidpanëdash. ²⁹Adec macuësh yacno nidash Nuquin Papa chiec Esus onquenubi aton bësbed aton dashcutebëdi nac-nacquio ushë chënquiabimboec icpanëdash. ³⁰Adsho isnubien badedquio dada utsi daëd chosh adquiobidi Esusbëd nidec. Nëidic, Moises, Nuquin Papan ambi naden nata quequin chiaid dada uamiampid; utsibic, Edias, Nuquin Papan ambi chiaid chuimiampid. ³¹Aid daëdi Esusbëd tabadquin Nuquin Papan tantiampicpadec Edusaden yacnoshon Esus unës uate ushë chiec onquecuededpanëdash. ³²Adnubien Esusbëd chobedo abëd icquido 3ted ushcasdash tabadtuidquin Esusbëd utsi daëd nac-nacquiocquid dasiuidacimboec bed-bedquesho isbededpanëdash. ³³Esusbëd daëd nidtuidsho isash Petedo nadpanëdash: —Nëmbobi iquec bëdambo iquebique. Nëmbobi mibi tabadmenun abentsëc chotsëcnuc shubumpi uanuna, Icbo. Abentsëc mitsana, utsibic Moisesën na, utsibic Ediasën na, quequin shubu uanuna —quepanëdash Petedo. ³⁴Adec Petedo onquenubien abu ushun isadenquiocnoc abitedi

bëtimpanëdash. Adsho isash Esusbëd chobedo dacuëdpanëdash.

³⁵Adnubien abu ushunuësh onquec: —Nëidic ëbëd icte bunquidquio, con madombo, ëmbi bëdamboen isaidquio neque. Aidën chiaidquio tantiata —quepanëdash Nuquin Papa Esusbëd icquido tedestedshun isenquiocnobi.

³⁶Adec onquiash ënëdambi Esusuidtsëqui nidsho abëd icquidon ispanëdash. Adoshombic Esusbëd icquidon ambi isboed utsibo chienquiocpanëdash.

Mayan icsa dapuduedaid madompi
(*Mat. 17.14-21; Mad. 9.14-29*)

³⁷Adashic badiadash macuësh dapa yacnoësh Esus budsho isash bëquedec matses dadpen cho-chopanëdash. ^{38,39}Cho-choash abentsëc nadpanëdash: —Con mado abentsëc icquid mayan icsa dapuduedash icsambo iccoshe. Isec chota. Aidën bedto-bedtoac badedquio sidquianesho aidëmbidi bedshun bëcunedeniac con mado ëcbacushaniosh. Dapuduenenquio icquin con mado aidën uimambo icmedeniosh. ⁴⁰Adsho isash choshon mibëd icquido chuiquin, Dapuduemeta, cauidombi. Adoac mayan icsa dapuduemenuquin aidon tanac dapuduenenquio iccosh —quepanëdash dada abentsëc Esus caic.

⁴¹Adoquien ambi nianaïdo caic Esus nadpanëdash: —Nadatiambocquid Nuquin Papa nec, quequin tantiesia mibitedi neque. ¿Teductsi icshun ëmbi chiacpaden mimbi tantiabempe? ¿Mimbi tantienquiocsho isash tedectsiashini chieshtope? —quetanquin: —Min mado bec cho —Esusën cac aton mado aton papan bëpanëdash. ⁴²Aden bënubi mayan icsan bëcuniac madompi uëdëquiampanëdash.

Adsho isun: —Padi. Chën
—capanëdash mayan icsa chuiquin.
Aden madompi bëdametanquin aton
papa Esusën meneoapanëdash.

⁴³Adsho isash: —Nuquin Papan
nadatiambocquin naid uinsadpambo
iquec —quecuededpanëdash isquido.

Abi unëste chuoaid

(*Mat. 17.22-23; Mad. 9.30-32*)

⁴⁴Adoquien: —Chuinu.
Bëpiscudenquiocquin tantiaquiota.
Matsesacsho nëbi bedmendabi
—quepanëdash Esus abi unës uate
chiëc.

⁴⁵Aden chuisho abëd icquidon
tantienquiocpanëdash. Aden
tantienquio yec, Mimbì chiaid
tantienquio iquembi, quetiapimbo yec
otacquo tabadcuèdedpanëdash abëd
icquido.

**¿Tsutsi chuiquid dapa icpec?
quequin chiaid**

(*Mat. 18.1-5; Mad. 9.33-37*)

⁴⁶Adashic: —¿Nuquin Papa yacno
nidash chuiquid dapa mitsiquid icpec?
—quec Esusbëd icquido
onquecuededpanëdash. ¿Èbida chuiquid
dapa icpe? quec ambibi tantiequi
adpanëdash.

⁴⁷Adoquien Esus tantiaquidquio
icquin bacuëmpi chomeshun aton
dayunquio tabëcash: ⁴⁸—Chuiquid dapa
icnu, quesa icta. Èbi tantiaquid icquin
nëid bacuëmpi bëdamboen nashunquid
iquec èbi nashunoquid iquendac.
Nuquin Papan chiapadomboen
nabanquid Esus nec, quequin
tantiaquidquio iquec èbi chomiondaid,
Nuquin Papa tantiaquidquio icoaindac.
Nidaidënuësh utsi nashunquidquio
icboedi aidquiobi Nuquin Papan
chuiquid dapa icta caindac
—quepanëdash Esus abëd icquido caic.

Abimbo tantiaquid ëbëd icquid nec quiaid

(*Mad. 9.38-40*)

⁴⁹Adashic, Uan Esusbëd icquid
abentsëc nadpanëdash: —Mayan icsa
dapuduemebanquid ispombi. Aidi
mayan icsa dapuduemenuëc nadposh:
“Esus, nadatiambocquin naquidquio
mibi cadoque. Mayan icsa
dapuduemeta,” cac mayan icsa
dapuduemposh. Aidi ëbëd
icquidpenquio icsa isun: “Padicnuna,”
cauidpombi. ¿Adambi bëdamboen
chuiipo? —quepanëdash Uan Esus caic.

⁵⁰Adoquien: —Adquid, Padicnuna,
cainda. Nadatiambocquin naquidquio
Esus nec quequin abimbo tantiaquin
ëmbi nacpadomboen nabanquid icnuc
mibipadquid ëbëd icquid neque
—quepanëdash Esus Uan caic.

Esus bunesabo, Samadia yacnocquido

⁵¹Adashic Esus abi abuc indote ushë
chote anoentsëqui yanan, Unësmanc
quenquio yec nidebi, quequin ambibi
tantianec Edusaden yacmi Esus
nidoapanëdash. ⁵²Adec nidnun ambi
bëyucmiaido Esusën abia nidmiac
nidaid Samadia caid yacno shubu
daëdpactsëc yacno Esusbëd icquido
chopanëdash. Choash: —Edusaden
yacno Esus nideque. ¿Aidbëd icquido
ada mimbi yuedpatsia? —caquien
⁵³Esus isadaidbo nec, quequin
yuedenquiocpanëdash Samadia
yacnocquidon.

⁵⁴Adoquien, Acobobëd Uan
nadpanëdash: —¿Ènabicquido
unësmenuen mimbi nëdëncatequid
chome, Papa, quequindambi Nuquin
Papa chuipe, Ico? —quepanëdash.

⁵⁵Adoquien: —Padicnuna. ¿Matses
unësmenuectabi chodio? —quianec
⁵⁶shubu daëdpactsëc yacno
nidoapanëdash abëd icquidobëd.

Esus tsibante bunquidën natequid*(Mat. 8.19-22)*

⁵⁷Adec podquedën Esus nidsho abi databëdquid abentsëcshun nadopanëdash: —Mimbi chuibeniactnombobi mibi tsibananec nidendabi —quepanëdash Esus databëdquid abentsëc.

⁵⁸Adoaquien: —Bëdi chëshë aton shëcuën uec. Podochoquidën aton shubu uaic. Aden shubu uainquiocquin Nuquin Papa yacno tabadaid chuibenec nebi —quepanëdash Esus.

⁵⁹Adoshombic: —Ëbi tsibanta —Esusën caquien utsi:

—Con pa unësascho chococashun mibi tsibanec nidendabi, Icbo —quepanëdash.

⁶⁰Adoaquien: —Nuquin Papa yacno tabadnu quequin unësaid chococaquidëmbi ma chococapanuna. Mimbi Nuquin Papa yacno tabadnuequin abi yacno tabadaid tantiaquin mimbi chuibeneta —capanëdash Esusën.

⁶¹Adashic, utsi nadpanëdash: —Mibipadquid icnuequin mibi tsibanendambi. Con matses nidnu quiacnoba ëbi nidme, Icbo —caquien:

⁶²—Mibi tsibanu queboedi utsiba tantiec ëbipadquid ictiapimbo mibi icpec —quepanëdash Esus.

Abi bëyucanec nidquid 72ted icquido*(Mat. 11.20-27, 13.16-17)*

10¹Adshumbic ambi bëyucmiaido dadpen, 72tedi, Esusën nidmepanëdash. Daëd-daëdec shubu utsi-utsiec yacno nidshun chuibeneta, quequin nidmepanëdash. ²Nidmenun aid 72ted icquid Esusën nadopanëdash: —Mimbi ëbi chiac ëbi tantianuequid dadpen icpec. Adquido icnuc aido tantiamenuen ëbi chuibanquid

daëdpactsëc iqueque. Naden Nuquin Papa chui: Icbombo, mibi cadoque. Mibi tantiamenuen chuibanquid dadpen nidmeta, Papa, quequin chui. ³Aden mimbi chiacpaden mibi nidmembique. Ëbi chuibenec nidanetan. Mimbi nidshun chuibenenubi mibi chieshënquido dadpen iquendac. ⁴Ëbi chuibenec nidanequin mitsana buanenda. Mitsana bedtequidbëdta shictoadte buanenda. Tapucudte tapucudenquio yec nidanetan. Adec nidanequin utsi bëquedash tabadenquiocquin datambidanec shubun puduedec nidta. ⁵Shubun puduedshun naden shubu icbo chuita: Nuquin Papabëd abi yacnocquido bëdamboec tabadacpadquiec ma nëid shubun icquido tabadpanuna. ⁶Aden chiac shubu icbo bëdamboec tabadnuequid icsho Nuquin Papan abi bëdamboec tabadte aid shubun icquido menendac. Shubu utsi icbo ëbi chieshënquid ictsiash. Adquid yec mimbi chiaid tantianu quesaa aid shubu icbo icpec. Adquid icsho Nuquin Papan abi bëdamboec tabadte aid shubun icquido menenquio iquendac. ⁷Mibi yuedacnouidsëqui tabadta. Adembidi, mibi yuedquidën meniaid peshun acta. Mimbi chuibanaid cuidquin aidëmbi mibi menendac. Adoac anouidi tabadta.

⁸“Shubu dadpen yacno mibi choacscho yuedshun pete meniac isuidec, Utsitsen bec cho, quenda. ⁹Ambobi tabadquin daicsaid bëdameshun naden chuita: Nuquin Papan Chomiaid abi yacno yuedanquid neque. Aid tantiaata, quequin chuita. ¹⁰Shubu dadpen yacno choshon mibi yuedquid nibëdsho isun aton podquedën nidquin naden chuita: ¹¹Nuquin Papan chomiaid mibi chuinuec chobi. Ëbi daëdi yuedenquiocsho mibi chuitiapimbo iquebi. Adoac abi yacno ambi

chomiaidën mibitedi yuedtiapimbo iquendac. Nuquin Papan chomiaid tantiate bunesa mibi icsho isash mibi yacno capuec ëbi tabitacquiaid tabesquenu. Is, quequin ismequin adota —capanëdash Esusën ambi nidmeteuid 72ted icquido chuiquin. ¹²Aden chiashic aido chiec abi Esus onquec: —Naid icsabëdtabi naid bëda chuibante ushë chonoc mibi yuedesa Nuquin Papan comapenen cuidendac. Ëbi choabicnuc Sodoma yacnocquido icpampic. Ëbi choabicnuc aidon ëbi tantiatipimbo icpampic. Adquido Nuquin Papan bëdiactsëc cuidendac —quepanëdash Esus.

¹³Aden ambi nidmeteuid 72ted icquido chuibanshumbic utsibo isacbimboen Esusën nadopanëdash: —Nëbi icquido, shubu dadpen icquid tantiec unësqiioquin mibi chiembique. Tantiata. Shubu dadpen icquid Codasin caid yacnoshon ëmbi nadatiambocquin nabansho mibitedishun isted-istedshumbi Nuquin Papan chomiaid nec quequin tantienquo mimbi iccuededpec. Adembidi nadatiambocquin nabansho isted-istedboedi Betsaida yacnocquido mibi nec. Aden ëmbi nasho isash ëbi tantiesa mibi icoapec. Ënden yampido isadaidpembon ëmbi nadatiambocquin nabansho isun, Icsaquid nebi, qeshun unësqiioconoc shubiquin abi icsaid ëntsempampic. ¹⁴Aden Tido yacnocquidobëdtan Sidon yacnocquidon tantianshun abi icsaid ëntsempampic. Adquido Nuquin Papan bëdiactsëc cuidendac. Isadaidbo Codasin yacnocquidobëd Betsaida yacnocquido ëbi isquido mibitedi nec. Ëbi tantiesa icsho Nuquin Papan mibi comapenen cuidendac. ¹⁵Adecbidi, nëbi icquido, Capednaun yacnocquido mibi unësash ¿Nuquin Papa yacnoda mibi nidpe?

Padenquio. Ëmbi nadatiambocquin nabansho isun tantiesa yec chian anëdënquiacno mibi nidendac —quepanëdash Esus abi tantiesabo chiacbimboec onquec.

¹⁶Aden chiashic, ambi nidmenu caido 72ted icquido tantiamenuen chuibudec: —Mibitedishun ëbi chiac ëbi tantiaquido utsibo iquendac. Adquiobidi mimbi ëbi chiac ëbi tantiesabo icoaindac. Adomboembidi ëbi chuibansho tantienquo yash ëbi chomiondaid tantiesambo nendac —quepanëdash Esus. Aden chiac ambi nidmenu caido nidanepanëdash.

¹⁷Adec nidanequin Esusën chiacpaden nabeniashic, Bëdambo iquebi, quecuededec Esus yacno cho-choapanëdash. Adec cho-choash: —Mimbi chiacpaden nabanombi. Aden nabanquimbic, Esusën nadatiambocquin naidënquo dapuduenta ëmbi caidtedi mayan icsa dapuduemposh, Icbo —quecuededpanëdash ambi nidmiaido 72ted icquido ambi naboed Esus chuibanec.

¹⁸Adoquien: —Ëmbi nadatiambocquin nabanquin tantiamiac mibitedishun mayan icsa dadpen dapuduemebedednubi abi dëniacac bimboecnuc bedquetanac bimboec Satanabucüesh badedquio paëdsho isec niobi. ¹⁹Ëmbi nadatiambocquin nabanacpadquid mibitedi icmebanombi. Aden mibitedi adquid icmiacsho mibi chieshënquidon mibi icsa uatiapimbo iquendac. Mibi chieshënquin icsa uanuequido nisibimboecquido nec. Aidobidi icsa uanuequid yec chichumbimboecquido neoaic. Adquid nisi icsho catashac mibi petiapimbo iquec. Adomboembidi catashac chichunën mibi setiapimbo icoaic. Adquid bimboec mibi chieshënquid icsho ëmbi

chiacpadomboen nabanac mibi icsa uatiapimbo iquendac. ²⁰Aden nabanac mibi icsa uatiapimbo icsho isash, Bèdambo iquebi, quenda. Nuquin Papan abi yacno chomenuequin èbi cuëmèdquid ènden dada uaid iquec abi yacno èbi puduedte iquec, quequin tantiec, Bèdambo iquebi, quianta —capanèdash Esusèn ambi nidmiaido chuiquin.

²¹Aden chuibanshumbic ambi nidmiaidon chiaid tantiash, Bèdambo iquebi, quequin Nuquin Papa Esusèn nadopanèdash: —Abu icbo nidaid icbobidi mibi nec, Papa. Adquid icquin èmbi nidmiaido mimbi tantiamiacpadomboen nadatiambocquin aidon nabededosh. Aden nabededshun chuisho tantiash bèdambo iquebi. Dadpen tantiaquido mimbi nadatiambocquin naid tantiamenquiocquimbi, èmbi namiaido, daèdpactsèc tantiaquidobien mimbi tantiamioc, Papa. Mimbi tantiacpaden tantiamiac èmbi nidmiaidon nabededosh, Papa —quepanèdash Esus Nuquin Papa chiec.

²²Aden Nuquin Papa chiec onquequin nainec: —Con pa abia yampid icquin abitedi tantiaquidquio nec. Aidèn abipadquid icmiaid nebi. Aid abentsècquiobi èbi bèdamboen tantiaquidquio con pa nec. Adecbidi abèd abia yampid icquin con pa bèdamboen tantiaquidquio nebi. Adquid icquin, Con pa nad iquec, quequin èbi tantiaquido tantiamendambi —quepanèdash Esus abi tantiec choash iccuededquido caic.

²³Aden iccuededquido chuibanshumbic naden ambi 72ted icquido nidmian choboedouidsèqui Esusèn chuoapanèdash: —Èbi tantiaquido icquin èmbi tantiamiacpaden mimbi nabansho isun

Nuquin Papan bèdambo iquebi camiaido mibitedi nec. ²⁴Nuquin Papan chiaid chiampidobèd ancanquid icampido mimbi nadatiambocquin nabamboed iste bunquin aidon istiapimbo icpampic. Adembidi, ambi chiaid Nuquin Papan chomiaid abi yacno puduedmianquid chosho iste bunquin aidon èbi istiapimbo icoapampic —quepanèdash Esus.

Utsi tantiaquin bèdamboen naquidquio

²⁵Adashic, ¿Tantiaquidquioda Esus neque? Tantiabono, abibi quequin dada utsin: —¿Nuquin Papa yacno tabadnuen atotsimbi napeba? chuibanquin tantiamequidèn èbi chui —capanèdash.

²⁶Adoquien: —Ambi Nuquin Papan naden nata quequin chiaid Moises dada uamiampid ¿mitsipaden chuipec? ¿Aid isquin atotsi mimbi tantiape? —quepanèdash Esus abi chuimequid caic.

²⁷Adoquien: —Nuquin Papan chiaid nad iquec: “Nuquin Papa tantiadoneta.” Ambi chiaid utsibic: “Mibi icnèdacadpadpenquio yec Nuquin Papa bunacadquieic tabadnuec adquiota.” Ambi chiaid utsibic, “Nuquin Papa tantiaquid nebi quequin bèdamboen nadeneta.” Utsibic, “Nuquin Papa tantiaquid nebi quequin ambi chiacpadomboen tantiaquiota. Aden nabanquimbi utsibo adembidi bèdambo icmequin naban. Èbi tantiaquin nashuntiadquidi utsibo nec, mimbi cacpaden utsibo tantiaquin nashunta,” quequin Nuquin Papan chiaidquio nec —quepanèdash Esus chuimeboed Esus caic.

²⁸Adoquien: —Bèdamboen mimbi chioque. Nuquin Papan chiacpadomboen nabanec Nuquin Papa yacno mibi tabadendac —quepanèdash Esus.

²⁹Aden Esusën chiac ëbi otacquoio icsho isash Nuquin Papan chiacpadpenquiocquid nepec, quequin iccuededquid utsibon ëbi chuitsiash quequin tantiashun Esusën chuimeboed: —¿Mitsicquid con utsi nepec? —quepanëdash.

³⁰Adoaquien Esus: —Utsi chuinu. Tantiata. Edusaden yacnoësh shubu dadpen icquid Edico caid yacno nidsho isun ampequidon bedshun ambi aton na bedtequid aton dashcutebëdtabi chicshun icsa uabudtsëcquien cuestanquin niamposh. ³¹Adoambi, cuestanquin nianaid uiacno podquedën choquin isadaidbo tsusion, Con matses nenushe. Isnu, quenquiocquin uano datamposh. ³²Utsibic, Nuquin Papa tabadte shubu uashunaid nuntan nashunquid choquin, Con matses nenushe. Isnu, quenquiocquin adembidi uano datanoaposh. ³³Utsibic, Samadia yacnoësh choquid aid podquedëmbi choquin cuestanquin nianaid istuidash unësqiucquin ³⁴aton dayun tsadbudshun cuestanquin nia-naidën chiuëtedi aton dauëmbi bënoshcashun bëtaneshumposh. Aden bëtaneshunshun cuestanquin nianaid aton cabayo canandoash aton cabayobëdi nidequi capuquido puduedmete shubu yacno choash abëdi tabadquin bëdamboen isquin nashumposh. ³⁵Adec tabadashic badiadshun capuquido puduedmete shubu icbo cuidquin aton na bedtequid meneposh. Aden menequin nadoposh: “Nidebique. Ëmbi bëboed ampequidon cuestanquin nianaid bëdamboen isquin nashunta. Mimbi aid nashunacsho isun mimbi meneboed cuidquin mibi menendambi,” quequin chianec ampequidon cuestanquin nianaid istuidshun nashumboed nidposh —quepanëdash Esus. ³⁶Aden chuishumbic: —Ëmbi chuibod

utsi-utsiec icposh. ¿Mitsicquid ampequidon cuestanquin nianaidën utsibimboecquid icposh? —capanëdash Esusën.

³⁷Adoaquien: —Ampequidon cuestanquin nianaid istuidash unësquoio yanquin abi nashumboedien con utsi nec, capendac —quepanëdash Esus chuimequid.

Adoaquien: —Adembidi mimbembi ëmbi chuibodbimboecnuc utsibo tantiaquin nashunoata —quepanëdash Esus.

Madtan nabanubi Madian tantiaid

³⁸Adashic, Esusbëd nidequi abëd icquido shubu daëdpactsëc yacno chosho isun anocquid chidon Madta caidëmbi Esusbëdta abëd icquido aton shubun yuedpanëdash. ³⁹Adoac ambo puduedash tsadquin Esusën chuibansho Madian Madtan chibinquo datsadbudshun tantiapanëdash. ⁴⁰Adec tsadquin Madian tantianubi Madtan ambi natiadquoio yaidtedi tantiaquin nabampanëdash. Aden nabanequi Esus yacno choshon: —¿Con chibin ëbëdtambi nainquiocsho isenquioda mimbi ique? Min utsibëdtan nabanta, cata, Icbo —capanëdash Madtan Esus chuiquin.

⁴¹Adoaquien: —Mimbi natiadquoio yaid dadpen tantiaquidquio mibi iqueque. ⁴²Ëbi tantiaquidquio icta. Adquid min utsimbo Madia icsho, Padicnuna. Min utsibëdtan nabanta, catiapimbo iquebi —quepanëdash Esus Madta caic.

Nuquin Papa chiec onquianete

(Mat. 6.9-15; 7.7-11)

11 ¹Adashic ushë utsin Nuquin Papa chiec Esus onquepanëdash. Aden Nuquin Papa chiec onquequin nainacsho isun abëd icquidon nadopanëdash:

—Nuquin Papa chiec onquianeta quequin Uan padon abèd icquido tantiamapanèdash. Adembidi Nuquin Papa chiec onqueta quequin èbitedi tantiamequin chuioa, Icbo —capanèdash.

²Adoquien: —Nuquin Papabèd onquequin naden chuita:

“Bèdambocquidquio mibi nec, Papa.

Adquid mibi icsho matsestedishun mibi con icbo capashun, Papa.

Mibi yacnoshon mimbi uaido mayan bèdabon mimbi chiacpadomboenuidi naic.

Adomboembidi matses abitedishunquio napashun, Papa.

³Tantiaquidquio, mibi cadoque.

Bumianenquiocquin badiadquidèn-badiadquidènquien con pete èbi bedmedene, Papa.

⁴Adecbidi utsin èbi chieshènsho cuidenquio yec èbi abi icsaid bèpiscudacpadquiequi èbi icsasho cuidenquio yec bèpiscudoata, Papa.

Adembidi, Satanasën icsa uanushe qeshun èbi cudasquin dayun uata, Papa, quequin chuita”

—quepanèdash Esus.

⁵Adtanequic Esus nadpanèdash:

—Mibèd nashunanquid iquec. ¿Adquid icnuda inchèshpotsembo abi yacno nidshun pete mimbi bedshumpatsia?

⁶Inchèshpotsembo pete bedshunuec mibèd nashunanquid yacno nidash: ‘Èbi yacno utsi chosho pete nibèdnubi yuedombi. Con pete nibèdsho isash pemenun bedec chobi. Mimbi meniaid cuidquin adquidi mibi meneoaimbi,’ quepatsiac mibi mibèd nashunanquid caic.

⁷“Adoquien, nuntanuèshi: ‘Padi. Shècnandombi. Con bacuè ishacunec din ictoshon mibi menetiapimbo iquebi,’ quequin mibèd nashunanquidèn mibi chuitsiash.

⁸“Aden aidèn chiaqui min pete nibèdnuc chuidonetsiac mimbi. Aden chuidoniac mibi menetsiash. ¿Abèd nashunanquid icshoda mibi menepadic? Padenquio. Mimbi nidenquiocquin chuidonesho tantiaishun mimbi chuiboedtedi mibi menepatsiash —quepanèdash Esus.

^{9,10}Aden chiec abi onquec: —Adomboembidi Nuquin Papa chuidonesho mimbi bedtiadquio yaid aidèmbi mibi bedmendac. Adembidi, Nuquin Papa tantianu quequin abi chuidonesho mibi tantiamendac. Adembidi, abi chuidonesho Nuquin Papan aton Mayan mibèd tabadmiac aidèn Nuquin Papa mibi tantiamendac.

¹¹“Adembidi chuinu. Tantia. ¿Min mado, Nuècquid bec cho, qeshoda mimbi nisimbo menedi? ¹²Adembidi, ¿Cachinan bacuè bec cho, qeshoda mimbi chichun menedi? ¹³Padenquio. ¿Aden icsaquid icquin min bacuè tantiaquin bèdamboen menequid mibi icnuc Nuquin Papa icsaisa icquin mibi, Min Mayan èbi mene, qesho tantiaishun menenquioda mibi ictic? —quepanèdash Esus.

Bedtsibun namiaid Esus nec, quequin chiaid

(*Mat. 12.22-30; Mad. 3.19-27*)

¹⁴Adashic, mayan icsa dapuduedquin eme uaid icsho Esusèn istanquin: —Dapuduen —cac mayan icsa dapuduepanèdash. Adec dapuduenan ambi eme uaid onquepanèdash. Adsho isash tantiadempambo yec iccuededquid dadpen tabadcuèdedpanèdash.

¹⁵Utsiboen: —Mayan icsan icbo Bedtsibu caidèn tantiamiac mayan icsa Esusèn dapuduemepash icnui —quepanèdash Esus chieshènquido.

¹⁶Adnubien iccuededquid utsibo: —Nuquin Papan chomiaidquio icquin

Nuquin Papa mimbi chiac aidëmbi abucshun naquin ëbi isambo yaid nadatiambocquin ismepatsiashi. Aden mimbi Nuquin Papa chiac aidën nadatiambocquin nasho isash, Nuquin Papan chomiaid nebi quequin abimbo chuiquid mibi nec, mibi catsiambi —quepanëdash iccuededquid utsibo Esus caic.

¹⁷Aden chuisho tantiashtantiaquidquio yec abi icsamboen chuimenuquido chiec Esus nadpanëdash: —Chuiquid dapa nëishquin abëd icquido comapenen chushcac, Abëd ictiapibi, quianec cuëshëd-cuëshëdec nidanepec. Adec nidaniash chuiquid dapa ictiapimbo aid iquendac. ¹⁸Adembidi, Bedtsibu cashumbic Satanacaid mayan icsatedi chuiquid dapa nec. ¿Mayan icsa icquinda abëd icquido dapuduemequid ëbi icmepadic? Adembidi, ¿ambi mayan icsa dapuduemiaticaid abëd icquido nibëdenquioda ictic? ¹⁹Bedtsibun tantiamiaid nec, mimbi ëbi capec. Adembidi mibëd icquidon mayan icsa dapuduemec. ¿Tsuntsin tantiamiac aidon mayan icsa dapuduemepash? Nuquin Papan tantiamiaido nebi, aido qesho tantiasht, Abimbo caic, mibi quepec. Adomboembidi Nuquin Papan tantiamiaid nebi, quequin ëmbi chuisho ¿atotsi quiash, Abimbo chiec, quenquio mibi icpe? ²⁰¿Nuquin Papan tantiamiac mayan icsa dapuduemequid ëbi yec ambi chomiaidquio matses chuiquid dapa mibi yacno ënden choabida ictio? —quepanëdash Esus abi chuimequido chiec.

²¹Aden chiashic abi onquec: —Mibitedi tantiamenuen utsi chuinu. Bëdamboen tantiaata. Chuiquid dapa icquin abëd icquido cuëshëdnu quenquiocquin bëdamboen chuiquin namepec. ²²Aden namiac tabadnubi chuiquid dapa icnuequid utsi chopec.

Nëbi choquidën abia chuiquid dapan yuabo nameshun nua meniac aidën yuabo yanoapec —quepanëdash Esus.

²³Aden chiashic: —Èbëd icquido ëbi chieshënesa nec. Matses èbëd icquido icmenu quequid nebi. Matses Esusbëd icmenu quesa cuëshëdmianquid nec —quepanëdash Esus.

Abibi dapuduemoed mayan icsa dapuduedoaid
(*Mat. 12.43-45*)

²⁴Aden chiashic abi onquec: —Abi dapuduedaid mayan icsa abibi dapuduenanec abipadquid tabadacno icsano matses nibëdacno nidash capuquin abi dapuduedbocpadquid istuidenquio icposh. Adquid istuidambo yec, Abibidi dapuduedoanu, quianec anobidi nidoaposh. ²⁵Adec nidshun abi dapuduemoed naden istuidposh. Mayan icsa nidam, Èbibi bëdambo iquec. Adash bëdambo tabadnu, abibi quiaishic, Nuquin Papa tantianu, quenquiocposh. Aden chienquiocsho aton Mayan Nuquin Papan aid menetiapimbo icnuc abi dapuduemoed choshon aid abentsëcquio ²⁶istuidashic nidoashun abipadquid chuituidac utsi 7ted abëdi choash abitedi dapuduedcuededac dada icsamboshë yamposh —quepanëdash Esus.

²⁷Aden Esusën chiambien iccuededquid chido: —Mibi tishacsho shuma chishmiondaid Nuquin Papan bëdamboen isaid icpec —quepanëdash Esus caic.

²⁸Adoquien: —Aden nasho padenquio. Nuquin Papan chiaid tantiashtun nabansho Nuquin Papan bëdamboen isaidquio nec —quepanëdash Esus chido caic.

Onasën ismiampicpaden ismiaid
(*Mat. 12.38-42; Mad. 8.12*)

²⁹Adnubien abi yacno cho-choash utsi dadpen iccuededsho isun Esusën nadopanëdash: —Nëbi nidaidën

tabadquido icsanuequido yec Nuquin Papan abucshun nadatiambocquin naid iste mibi bunacpaden mimbi isenquio iquendac. Nuquin Papan Onas ismiampicpaden ismiaid mimbi isendac. ³⁰Ninibe yacno nidshun ambocquido icsaid cuidte Nuquin Papan chuimiapaden Onasën comapenen chuisho tantiash, Abimbo chuiquid nec, qeshun abi icsaid Ninibe yacnocquidon ëmbededpampic. ³¹Utsibic, Nuquin Papan dadpen tantiamiaid, Sadomon iquec qesho tantiash chuiquid dapa chido Sadomonën chiaid tantianuec ënapenuësh choshon tantiash, Abimbo iquec, quepampic. Nuquin Papan matsesën naid icsa ambi naid bëdabëdta chuibante ushë chonoc aïd chidon tantiampicpadomboen Nuquin Papan chiaid abimbo iquec quequin mibitedishun tantienquiocsho Nuquin Papan mibi isendac. Nuquin Papan bëdamboen tantiaquin chuiquid dapa Sadomon icmepampic. Abitedi tantiampidquio nëmbobi iqueque. Ëmbi chiaid tantiata. ³²Adembidi, matses icsaidbëdta ambi bëdamboen naid Nuquin Papan chuibante ushë chonoc Ninibe yacnocquidon Onasën chiaid tantiacpadomboen Nuquin Papan chiaid abimbo iquec, quequin tantienquio icsho Nuquin Papan mibitedi isendac. Nuquin Papan chuimiapaden Onasën chuisho Ninibe yacnocquidon tantiabededpampic. Onas Nuquin Papan matses icsaid cuidte chuimiaidquio icpampic. Padnuen mibi icsaid bedshunash abided cuidatequid nëmbobi iqueque. Ëmbi chiaid tantiata —quepanëdash Esus abibi chiadequi.

**Tabote taboshon bëtashenquio
yacbimboec abi bëdamboec
tabadaid ismequid
(Mat. 5.15; 6.22-23)**

³³Aden chuishumbic Esusën abi chuibanec: —Tabote taboshon ompoesa.

Adembidi matsun bëtashesambo icbo nec. Ma ëmbi yuedaidon isnueshun tabote nënantan nanquid.

³⁴Adoaidbimboec min tantiate iquec. Min tantiate bëdamboec icquin bëdamboec tabadquin ismequid mibi nendac. Bëtashacbimboec min tantiate icnuc icsamboen ismequid mibi nendac. ³⁵Con icbo ëbi bednuec choec qeshun bëpiscudenquiocquin isted-istedta. ³⁶Min tantiate icsaisa icsho Nuquin Papan chiacpadomboen tantiaquidquio aidi nec, quequin utsibon mibi isendac —quepanëdash Esus.

**Nuquin Papan icsamboen isaidquio
(Mat. 23.1-26; Mad. 12.28-40; Duc. 20.45-47)**

³⁷Aden Esusën chuibanshobien padiseyobo abentsëcshun: —¿Ada ëbi yacno pec nidtsia? —capanëdash. Adoac aïdbëdi nidash pete sanaid cuate dayunquio Esus tsadbudpanëdash.

³⁸Adec Esus tsadsho isash, ¿Adpecshenda iquec. Penush mëpamëdenquio Esus icpec? quec abibi onquequin padiseyobon Esus yuedquidëmbi tantiapänëdash.

³⁹Adoacuen, tantiaquidquio iquec Esus nadpanëdash: —Ëndenquimbo padiseyobon peshun acnun dëshote cachocbëdtabi pada-padaid cachoc bëdamboen dapanta quequin chuinëdacpaden mimbi naoaic. Aden dapanshun mimbi codocaidbëdtabi mimbi actequid nitsinaid anauc ampanenquio mimbi icpec. Mibitedi adquio iquec. Nesquin bëchish uquec dapanudquin mimbi tantiaid icsa ënenquio mimbi icpec. Adecbidi, mibi bunaid bednuen icsamboen naquin ampequid mibi nec. ⁴⁰Nuquin Papan chiaid tantiesabimboecquid mibitedi nec. Nuquin Papan matses uaquin dadabëdtabi tantiate uainquioda icpampic. ⁴¹Ai. Adquid icnuc aton na

nibëdquid tantiaquin mimbi pada-padaidën nitsinaidpadquid menebanta. Aden mimbi nadenesho isun Nuquin Papan min tantiatebëdta min dada bëdamboen isendac —quepanëdash Esus.

⁴²Aden chiashic padiseyobo caic Esus nadpanëdash: —Uno bedanquin dies yacno ënquin min tiedën caniquid ëshë tambanshun, Nuquin Papan chiacpaden con na 9ted icnubi abentsëc Nuquin Papan na nec, quequin aid abentsëc menenuequin mimbi dayun uaic penquiocquin. Aden nabanquin Nuquin Papan ambi matses bëdamboen tantiaquin nabanacpaden naisabo mibi nec. Min tiedën caniquid dies yacno cuëscacquin tambanshun Nuquin Papan chiacpaden abentsëc menebanshun utsibo bëdamboen tantiaquin nabantiadquidi mibi neyoc. Adesa icsho Nuquin Papan icsamboen isaidquio mibi nec, padiseyobo. ⁴³Adembidi, tsusio dapabimboecsho bëdamboen isplashuni, quequin tantiec Nuquin Papan chiaid tantiate shubun puduedash tsusiobo tsadacno mibi tsadtenec. Adomboembidi tantiec matses iccuededacno nidequi, Èbi bëquedquidon ëbi tsusio dapabimboecsho isash onquequin chuiplashuni quec mibi capuec. Aden tantiaquid Nuquin Papan icsamboen isaidquio mibi nec. ⁴⁴Adembidi, matses unësaid chococate manenushe queshun ismequin mabiunu, quenquio yacpadomboen ëbi icsaid tantianushe quequin ompoquid mibi nec —quepanëdash Esus padiseyobo chiec.

⁴⁵Adoquien, Nuquin Papan naden nata quequin chiaid tantiembi, quiash utsibo tantiamequid abentsëc: —Padiseyobo chuiquin ëbipadquido mimbi chuiuopec —quepanëdash.

⁴⁶Adoquien: —Nuquin Papan ëndenquimbo naden nata quequin

chiaidbëdta mimbi naden nata quequin chiaid dadpen chuibanquin matses mimbi namec. Adoac aited matsesën natiapimbo icpec. Adsho isash, Mimbi natequid dadpen iqueque. Mibi nashunu, quesa icsho Nuquin Papan icsamboen isaid mibi nec.

⁴⁷“Adembidi, Nuquin Papan chuimiaid dadpen min tsusedpabon cuesunepampic. Tsusedpabon cuesuniampido ënenquiocquin tantianu quiacimboen mimbi shubumpi uabanec. Èmbi shubumpi uaido isun utsibon bëdamboen isplashuni, quequin aden mimbi nabanec. ⁴⁸Aden naquin tantiec, Nuquin Papan chuimiaido cuesunequin bëdamboen tsusedpabon napampic, quiacimboen tantiaquid mibi icnuc ambi chuimiampido cuesuniampidobimboecsho Nuquin Papan mibi isec. Nuquin Papan icsamboen isaidquio mibi nec. ⁴⁹Èmbi chiacpaden chuibanta, cabicquin naden Nuquin Papan chuiampic. Èmbi chuimiaid utsi-utsien aton matsesën mëyampec. Utsi-utsien mëyanshun cuesunepec, quec Nuquin Papa abitedi tantiaquidquio adpampic. ⁵⁰Aden min tsusedpabo Nuquin Papan chuimiaidon chuisho tantiesa icquin aido mëyampampic. Min tsusedpabopadquid nëbi icquido icquin Nuquin Papan chuimiaid tantiesambo mibi nec. Adquido iquec ënden mëyanampidpadquido mibi neoaic. Aido cuesuniampidpadquido mibi neoaic. ⁵¹Tsusedpan abia abed cuesunepampic icnubi ambi tsyuec Sacadias cuesunepampic. Aid Nuquin Papa tabadte shubu uashunaid dayunquiobi aidon cuesunepampic. Ai, Nuquin Papan chiaid tantiesatedi ambi chuimiaido cuesuniampidpadquido nëbi icquid neoaic.

⁵²“Nuquin Papan naden nata quequin chiaid tantiembi, queshun utsibo tantiamenquiocsho Nuquin Papan

icsamboen isaido mibi nec. Nuquin Papan chiaid tantienquiocquin abi yacno yuedanquid tantiesa mibi nec. Adquid iquec mibi abi yacno puduedtiapimbo iquec. Adquid mibi icquin naden nata quequin chiaiduidi mimbi chiac utsibotsen abi yacno puduedmiantequid tantiesabo yec abi yacno puduedtiapimbo icoaic —quepanëdash Esus Nuquin Papan naden nata quequin chiaiduidi tantiaquido chiec.

⁵³Aden chiashic, Ēbëdtambi pec cho, queboedën shubunuësh puduenanec Esus nidpanëdash. Adec Esus nidambien abi comapenen chieshënnquidombo padiseyobo: —Esus icsamboen chuimenu —quiampanëdash. ⁵⁴Adquid icquin Esusën chuibanacno nidaneshun chuimeoanuequin naden padiseyobon tantiapänëdash: Ēbitedishun chuimiac Nuquin Papan chiaid icsamboen Esusën chuitsiash. Aden icsamboen chuisho tantiaish, Nuquin Papan chomiaid nec, quec mibi muasho tantiaishun, Unës uametiadquio iquebi, quequin Esus chiembi, quequin tantiaquin Esus chuimepanëdash padiseyobon.

Natiamiantequidbëdtabi dayacmetequad
(*Mat. 10.28-31*)

12 ¹Aden padiseyobon: Esus icsamboen chuimeoanembi, quequin tantianubien matses dadpenquioshë Esus yacno cho-choash tsucus-tsucustsëcquio yec tabadpanëdash. Aido tsucus-tsucustsëcquio yec tabadnubien abëd icquido Esusën nadopanëdash: —Sicaid nami uaid cabiunac amëec bidisquedoec matsesën isenquiocnobi. Adembidi padiseyobon Nuquin Papan naden nata quequin chiaidbëdta ambibi tantiacpaden naden nata quequin dadpen chuioaic. Aden padiseyobon

ambibi tantiacpaden naden nata quequin chuisho, Nuquin Papan naden nata quequin chiaidta nec, quequin Nuquin Papan chiaid bëdamboen ista. ²Matsesën ompoquin naid Nuquin Papan abitedi ismendac. Matsesën ompoquin chienquio yaidbidi abitedi tantiamendac. ³Inchëshën min nuntanuësh mibi icsamboec onquiaid Nuquin Papan matsestedi tantiaequin chuibanendac. Nuntanuësh shoshquequin mimbi chiaid Nuquin Papan matsestedi tantiamenuen chuioaindac.

⁴“Adembidi chuinu. Tantiata. Mibi cuesunenuequid dacuëdënenda. Adquidën mibi cunesuenequin mibi nibëdametiapimbo iquendac. ⁵Nuquin Papauidtsëqui dacuëdënta. Icsadednequid icsho aidën mibi cuesunemeshun chian anëdënquequid nësecaindac. Adoanquiduidtsëqui dacuëdënta. ⁶Nuquin Papa tantiaquid yec dacuëdënta. Nuquin Papan ambi uaidtedi tantiec. Padichucu dadpen icquid abentsëc cueso isun aid Nuquin Papan tantiapec. ¿Adquid tantiaquinda Nuquin Papan mibi tantienquio ictic. ⁷Ai, mibi tantiaquiec. Min manëdaidtedi ambi tambanaid nec. Aid pistsëcquidtedi tantiaquin Nuquin Papan mibi tantienquioda ictic? Mibi comapenen tantiec.

**Esus tantiaquid nebi,
quequin utsibon tantianubi chiaid**
(*Mat. 10.32-33; 12.32; 10.19-20*)

⁸“Abi chiembique. Tantiaquiota. Utsibo icnubi Esus tantiaquid nebi, quequin abimbo chuiquid Nuquin Papa yacno chosho isun, Nëid ëbi tantiaquid neque. Puduedme, quequin chiendambi. ⁹Adecbidi, utsibo icnubi, Esus tantiaquid nebi, quetiapimbocquid Nuquin Papa yacno chosho isun, Nëid

ëbi tantiesa neque. Puduedmenda, quequin Nuquin Papan uaido mayan bédabo chiendambi. ¹⁰Ëbi matsesacsho matsesën icsamboen chuipec. Aden icsamboen chuiboshombic, Icsamboen chiombique. Ëmbi mibi icsamboen chienquo yacimboec bëpiscudta, Papa, quesho tantiasch aidën icsamboen chienquo yacimboec Nuquin Papa bëpiscudendac. Nuquin Papan Mayanën tantiamiac nasho isash, Satanasën tantiamiaid nec, quequid icpec. Aidën chiaid bëpiscudenquiocquin Nuquin Papan abi yacno adquid yuedenquo iquendac.

¹¹“Adembidi chuinu. Tantiaquiota. Mibi chieshënquido iquendac. Adquid icquin chuiquid dapa yacno Esus tantiaquido ëmbi buanacsho aidën mëyantsiash, quequin mibi bedshun aid yacno buampec. Aden nanu, quequin buanaqui ¿Atotsimbi chuiquid dapa chuipe? quequin tantienda. ¹²Nuquin Papan Mayanën mimbi chuibante mibi tantiamique —quepanëdash Esus abëd icquido caic.

Aton na dadpen icquidën tantiaid icsa

¹³Adashic, abi datsidadquid abentsëcshun: —Con pa unësan con pan na dadpen con buchin bedbanosh. Mimbi dadpen bedbamboed musuctanquin min utsi meneta, quequin con buchi chuita —capanëdash Esus chuiquin.

¹⁴Adoaquien: —¿Buchibëdta mibi chuiquidtabi nepe? —quepanëdash Esus abi chuita caquid caic. ¹⁵Aden aid chuishumbic utsibo chuiquin nadopanëdash: —Con na dadpen bednu, quesa icta. Mimbi bedaidënquo mibi Nuquin Papa yacno puduedtiapimbo iquendac.

¹⁶“Aidpadquid chuinu. Bëdamboen tantiata. Aton na dadpen icnubi aton

tiedën caniquid bacuëash dadpen icsho isash icbo nadposh: ¹⁷Con tiedën caniquid bacuë dadpen iqueque. ¿Atotsimbimbi aidtedi dayun uapeba? ¹⁸Naden naimbi. Tiedën caniquid ëshë dayun uate shubu shënitedi chicbanshun aidtedi nuamboshëcnuc shubu uabanuna. Aden nuamboshëcnuc shubu uashun aidënquo con tiedën caniquid bacuëtedi sandoshon dayun uanuna. ¹⁹Aden dayun uashumbic nadopembi: Con na dadpen iquec yuecash naimëdenquo iquec. Ad icnuc nainquo yec tabadquin peshun aquendambi. Aden naic, Bëdambo iquebi, ’quec aton na dadpen icquid abibi onqueposh.

²⁰“Adec abibi onquesho tantiashun, ‘Mimbi icsamboen tantiec. Nëid inchëshëmbi mibi unësec. Adec mibi unësan ¿mimbi dadpen dayun uaid tsuntsin bedpatsiash?’ quequin Nuquin Papan aton na dadpen icquid chuiposh —quepanëdash Esus.

²¹Aden chiashic: —Aton na dadpenuidi tantiaquin Nuquin Papan chiacpaden naisa yec aton na nianec unësash Nuquin Papa yacno tabadtiapimbo iquec —quepanëdash Esus.

¿Atotsimbi napeba? quesa icta, quequin chiaid (Mat. 6.25-34)

²²Aden iccuededquido chuishumbic Esusën abëd icquido nadopanëdash: —Aton na dadpen icquidën tantiacpaden tantienda. ¿Con na nibëdnuc atotsimbi pepeba? quec dacuëdenda. Adecbidi, ¿Atotsimbi dasiuidpeba? quec dacuëdenda.

²³Bëdamboec tabadnuequin mibi piasteuidi tantienda. Adembidi, Con dada bëdambo icmenuequin, Dashcute bedteuidi tantienda. ²⁴¿Uicchunënda

ambibi cuëte ëshë siac bacuëacsho chepadic? Padenquio. Adecbidi, ambi dayun uatequid shubu nibëdnubi aton na nibëdec. Adquid icsho Nuquin Papan aton pete bedmec. Uicchun Nuquin Papapadquidpenquio icshobi aton pete Nuquin Papan bedmec. ²⁵Ad icnuc ambi abipadquid uaidobi matses icsho aton pete bedmenquioda icpadic Nuquin Papan? ²⁵Adecbidi, ðmibi unëste ushë abimbo chonoc, Padi, quepecta mibi icti? Padenquio. ²⁶Adec mibi unëste chonoc, Padi, quetiapimbo mibi iquec ðatotsi quiash ðatotsimbi pepeba? quepe mibi?

²⁷“Adembidi, cuëtempì chuinu.

Tantia. ðCuëtempinda aton bacuë ictequid daëdcapec? Padenquio. Adoenquio yaid aton bacuë ictequid bëdaidquio iquec. Cuëtempì bacuë ictequid bëdaidquio yacpadquid chuiquid dapa Sadomonën dashcute adquio ictiapimbo icpampic. ²⁸Padnuen cuëte bacuë ictequid bëdaidquio icboedi badedquio sequiash chodquiacsho tauiquid. Ad icnuc ðAbipadquid Nuquin Papan uaido mibi icsho mibi dasiuidte bedmenquioda icpadic? Èbi bedmenquio ictsiash quequin Nuquin Papan bëdiactsëc tantienda. ²⁹Aden tantienquio yec ðAtotsimbi peshun aque? quec dacuëdenda. ³⁰Nuquin Papa tantiesan abi bunaiduidi tantianubi Nuquin Papa tantiaquidquio icquin pete actequidbëdta ëbi bedmedonec, quequin tantiec tabadta. ³¹Adembidi, Nuquin Papabëd tabadnu quequin tantiec tabadta. Aden tantiaquin mimbi bedtiadquio yaid mimbi bedendac.

Abi yacno choacsho meniaid

(*Mat. 6.19-21*)

³²“Nuquin Papan abi yacno mibi chomeque. Dacuëdenda, ëbi tantiaquido caimbi. ³³Ambo nidabi icquin mitsana

menebanquin mitsana bedtequid bedshun aton na nibëdquid menebanta. Aden utsi tantiaquin mimbi nabanuc Nuquin Papa yacnoshon menetequid mitsana chodquetemaid iquendac. Ampequidën bedtemaidquio iquendac. Capishton petemaidquio aid iquendac. ³⁴Mimbi tantiaidquio mimbi dayun uaid mibi cudasaid nec. Nuquin Papa yacno nidnu quequin mimbi tantiaid icnuc mibi bëdamboec tabadte cudasquin mimbi dayun uaid iquendac —quepanëdash Esus.

Chieshenquiocquin caintequid

(*Mat. 24.45-51*)

^{35,36}Aden chuishumbic Esusën nadopanëdash: —Aton icbo u isec nidan con icbo chonoshe quiash dasiuidacshobi ushenquiocquin tabote dëbedtonequin, Con icbo chosho puduedmeshun nashunu, quequin aton yuabon caimpec. ³⁷Aden abi cainquido aton icbon bëdambo icmequin nadopec: “Èmbimbo mibi pemenu. Nëmbo tabadec cho,” qeshun ambi yuaido icbonquio pemequin bëdambo icmendac. ³⁸Adembidi, icbo inchëshpotsembo choshon abi nashunuequin cainquido icsho icbon bëdambo icmiaido iquendac. Adembidi, cachina cuëdanabi badiadabicnuc choshon abi cainquido icbon bëdambo icmiaido iquendac. ³⁹Adquidpenquio icbo utsi chuinu. Tantia. Aidi abi cainquid nibëdnubi aton na icnuc isedanec choshon isac ampequid ënden nidac. Adsho isash, Ampequid choec, quequin tantiaquid yec nidenquio ictsenobi, quependac icbo. ⁴⁰Adquiecbidi ampequid choacbimboec Nuquin Icho choeque. Ad icnuc, Chosho ëmbibi tantienquiocchitomane qeshun chieshenquiocquin ëbi cainta —capanëdash Esusën.

⁴¹Aden Esusën chuisho tantias
 Petedo: —¿Utsi chuiquin mibèd
 icquidoudi tantiamenuenda chio?
 ¿Abitedi tantiamenuenda chio?
 Tantaranu. Èbi chui —quepanèdash Esus
 caic.

⁴²Adoquien: —¿Icbon chiac
 mitsipadquiocquin ambi namiaido
 bédamboen napeba? Adquid chuinu:
 Pete tambanshun musucshun èmbi
 namiaid utsitedi bédamboen
 menebanta, quequin ambi namiaid utsi
 abentsëc chianec icbo nidac. ⁴³Adec
 nidashic choshon ambi chiacpaden
 ambi namiaidèn chieshenquiocquin
 nabanacsho isun icbon bédambo
 icmiaid nendac. Adquid naden chuipec:
 Èbi nidan chieshenquiocquin mimb
 nabanoque. ⁴⁴Èmbi namiaid utsibotedi
 èbipadquiocquin chuiquid icta. Adquid
 icquin con natedi dayun uata, quequin
 chiendac icbon. ⁴⁵Adquid icnubi
 adomboen naisa icbo utsin namiaid
 icpec. Aton icbo yuec choenquiocsho
 isun aton icbon namiaid utsibo
 chieshënquin cuesbanshun ambentsëqui
 nua peshun tantienquo yanquin aquec.
⁴⁶Aden nabanquin tantienquiocnoc aton
 icbo choshon ambi namiaidèn
 icsamboen cuesbanaido isun icbon
 comapenen cuesquin abi tantiesa utsibo
 ambi nidmiacnombo aidi
 nidmeoaindac.

⁴⁷“Adembidi, ambi chiacpaden
 nabanesa icsho isun, Comapenen cuesta,
 icbon cac cuesendac. ⁴⁸Aton icbo
 bunaid tantiabicquidèn
 cuesmetiadquiocquin nabansho aton
 icbon bēdiactsëc cuesmendac.
 Adembidi, Nuquin Papan dadpen
 tantiamiaido ambi chiacpaden
 nashuntiadquo iquendac. Adembidi,
 icbon dadpen meniaidon dadpen
 meneoatiadquidi nendac
 —quepanèdash Esus.

**Utsibèd bédamboec tabadnu
 quesa icquin cuëshèdmequid**
(Mat. 20.34-36)

⁴⁹Aden chiashic abi onquec: —Èbi
 tantiaquid icnuc èbi tantiesa yec
 cuëshèdendac. Aido ènden
 cuëshèdondan èbi tantiaquidombo
 bédamboec tabadtsiandac, quec tsadebi.
⁵⁰Adecbidi, Yuecshun èbi unès uanun
 mëyantequid iquendac, quequin tantiec,
 Ènden mëyanonday iquec abuc Nuquin
 Papabèd tabadtsiandabi, quec tsadebi.
⁵¹¿Nidaidëshun abitedi bédamboen
 tabadmenu quectabi chodionda?
 Padenquo. Èmbi chiaid tantiesa èbi
 tantiaquidbèd icboedi cuëshèdtsiash
 quianec chopondabi. ⁵²Nad iquendac:
 Mìn shubun icquid sincoted icboedi
 Esus tantiaquid utsi-utsiec yanubien utsi
 padenquo yec cuëshèdec adquid.
⁵³Nadec cuëshèdtsiash: aton papa èbi
 tantiaquid icnuc con papadquid icnu
 quesa aton mado cuëshèdendac. Shubu
 utsin aton mado èbi tantiaquid icnuc
 aton papa adquid icnu quenquo yec
 cuëshèdendac. Adecbidi aton tita èbi
 tantiaquid icnuc con tapadquid icnu
 quenquo yec aton champi
 cuëshèdendac. Shubu utsin, aton
 champi èbi tantiaquid icnuc aton tita
 padenquo yec cuëshèdendac. Shubu
 utsin aton chaya èbi tantiaquid icnuc
 aton babanèn padenquo yec
 cuëshèdendac. Shubu utsin, aton
 babanèn èbi tantiaquid icnuc aton
 chaya padenquo yec cuëshèdendac
 —quepanèdash Esus. Abi tantiesa
 cuëshèdtequid chuibanec.

**Nuquin Papan ismiantè isun nad
 iquendac, quequin tantiaid**
(Mat. 16.1-4; Mad. 8.11-13)

⁵⁴Aden abèd icquidombo chuishumbic
 Esusën naden iccuededquido

chuiopanëdash: —Inchësh chosho isec, Ue choec, quiacpadec choec. ⁵⁵Adecbidi, ushë chënquec chosho isash, Chumbo yampec quiacpadec iquec. ⁵⁶Aden isquin mimbi ëmbi nidaidëshun ismiaidbëdta abucshun ismiaid mimbi tantiec. Aden abucshun ismiaid isquin tantiaquidquo icquin ðatotsieshun abucshun Nuquin Papan chomiaid isumbi tantienquiocquin mibi icsaid ënenquo ique? —quepanëdash Esus iccuededquido caic.

Utsibëd chushcananquid

(Mat. 5.25-26)

⁵⁷Aden chiashic: —Utsibëd chushcananquido mibi nec. Adec tabadec ðatotsi quiash, Naden natiadquidi nebi, quequin tantiasahun mibi icsaid ënenquo ique? ⁵⁸Utsi icsambocquin mimbi nadenec. Adsho isun matses cuidte chuiquid yacno aidëmbi mibi buanshobi nëish bëdamenuen, Mimbi chiacpadomboen mibi nashunu, quequin bëdamboen chuita. Mibi adenquo icsho matses cuidte chuiquid yacno buanshun mibi icsaid chiac matses cuidte chuiquidën, Quënën nauedmenuen buanta, cac buanshun quënën nauedmequidën mibi quënën nauedmepec. ⁵⁹Aden nauedaqui mimbi icsamboen naboed cuidnante meniabicnuc quënë yacnoësh mibi puduentiapimbo iquendac —quepanëdash Esus.

Utsibo unësmiacpadec unësmemane quequin mibi icsaid ënta caid

13 ¹Aden Esusën chuibanubien iccuededquid utsibon, Esus chuimenu, quequin cainpanëdash. Aden cainequi Esusën chuibanquin nainsho tantiasahun iccuededquid utsibo: —Chuinu. Tantia. Cadidia yacnocquidon Nuquin Papan

chiacpadomboen nidaidën capuquido cuesunesho Pidaton aido cuesunemiosh, quiosh. Aden cuesuniac aidon intac ambi nidaidën capuquido cuesuniaiðen intacbëd daëdash chididiquiosh, quequin chuiopanëdash. Aid chiaid tantiasahun. ðAtotsi icsamboen nasho aido cuesunemepashba? caimbi mibi —quecuededpanëdash Esus chiec.

²Adoquien: —ðCadidia yacnocquido utsitedi icsaid daëdpactsëc icnuc cuesunemiaido icsaid dadpen icsho aido cuesunemias, quequina mimbi tantiape? ³Icsamboen mimbi tantieque. Mibitedishun mibi icsaid ënta utsibo unësmiacpaden unësmenushe qeshun. ⁴Chuinu. Tantiata. Shubu dadpen icquid Edusaden caid ënëdacno Sidoe yacno tabadquidon ambi abucshun nacnenaid uebudquin abëd icquido 18ted cuesac unësoh, quiosh. ðEdusaden yacnocquid utsibo icsaid daëdpactsëc icnuc Sidoe yacnocquido icsaid dadpen icquid unësoh, quequina mimbi tantiape? ⁵Mimbi icsamboen tantieque. Utsibo unësapadec unësmene quequin mibitedishun mibi icsaid ënta —capanëdash Esusën abi chuimeboedo chuiquin.

⁶Aden chuishumbic utsitsen chiec: —Icbon cuëte icnuc nadpec: ‘ðCon cuëte ada bacuëashe? Istanu,’ quianec icbo nidpec. Adec nidshun isquien bacuë nibëdec. ⁷Adsho isun icbon abi neshcashunquid chuiquin nadopec: ‘Seta tedested matamias chie cuëte bacuë cuësnuec chouidobi. Bacuëambo iqueque. ðBacuëenquiocquididambi dayun uape? Utsi nitsinun dëdshuneta,’ quequin abi neshcashunquid aton icbon chiosh.

⁸“Adoquien: ‘Cuëte bacuëesa ëbi dëdshunemenda. Naden ëbi nameta, icbo. Cuëte bacuëesa tadeshcatanquin seta abentsëc matamequin nidaid

chëshë chodquiaid ëbi bédamboen tasiameta. Adoac bacuëtsiash. ⁹Aden seta abentsëc matamiash choquin bacuëacsho isash bédambo mibi icpec. Padnuen bacuë nibédsho isun, Dëdshuneta, ëbi caoata, 'abi neshcashunquid quiosh —quepanëdash Esus. Ëmbi tantiacpadec tabadenquicoboedi bédamboen chiac bédamboec tabadsho isash ëbi tantiaquid dadpen yanendac, quequin tantiec adpanëdash Esus.

Cashuebudaïd bédamiïd

¹⁰Adashic, chonoadtemaid ushën Nuquin Papan chiaïd chuïbante shubun puduedshun Nuquin Papan chiaïd Esusën tantiamenubien ¹¹seta dadpen 18tedi matamequin mayan icsan shuabudaïd icpanëdash. ¹²Adquid icsho isun Esusën: —Shuabudaïd icboedi nëbi cacueoaid mibi iquendac, chido —cashun ¹³mishac cacuiash, Nuquin Papan nadatiambocquin naid nec, quequin chiec chido onquepanëdash.

¹⁴Aden chonoadtemaid ushën Esusën chido bédamesho isun Nuquin Papan chiaïd chuïbante shubu isquidon: —Nëid ushë chonoadtemaid ushë neque. Bédamenu quequin nëid ushënquïo bédamenda. Chonoadtequid ushënquïo bédameta —capanëdash iccuededquido chuiquin.

¹⁵Adoaquien Esus: —Mimbi chiacpaden naisa mibi neyoc. ¿Chonoadtemaid ushë incuc, Con yua acte acmebono qeshun mimbi yuaid tënëshachobi acte yacno buanequioda mimbi icpe? ¹⁶¿Aden chonoadtemaid ushën mimbi min yua acmenuc nëid ushëmbidi chido, min matses Abadauanën tsyuecquid, dadpen seta matamequin Satanasën yuaid icsho mënchiquenquiodambi icpe? —quepanëdash Esus nëid ushën

bédamenda quequido tantiamequin chiec.

¹⁷Aden Esusën chuïsho tantiasch, Adenda, quequin bédamboen chiombi, quetiapimbo yec otacquïo tabadcuedednubi utsibotedi, Esusën nadatiambocquin naidtedi bédambo iquec, quec bédambo yec tabadpanëdash.

Cuëte ëshëmpi chiaïd

(*Mat. 13.31-32; Mad. 4.30-32*)

¹⁸Adashic: —¿Nuquin Papan shubun icquido mitsipadquidquïo icpec? ¹⁹Nadquidquïo iqueque. Chuïnu. Tantia. Icbon cuëte ëshë pistsëcquïocquid mostasa caïd nësecaïd dëyucash nuamboshë caniec. Aid cuëte caniaïdën cuidin podochoquidën shubu uabededec. Adquiecbidi, Nuquin Papan chiaïd chuïsho tantiascquidën tantiabênash bédambocquid icsho isash matses utsibo ëbi tantiaquid Nuquin Papan shubun icquido dadpen yanec —quepanëdash Esus.

Sicaïd nami uaidpadquid

(*Mat. 13-33*)

²⁰Aden chuïshumbic utsitsen chuïoiaic: —¿Nuquin Papan shubun icquido mitsipadquidquïo icpec? ²¹Nadquid iqueque. Tantia. Sicanun nami uatepadquid nec. Sicaïd chidon nami uashun cabiunac amëec bidisquedoec. Adomboembidi ëmbi chiaïd ëbi tantiaquidën chuïbanac ëbi tantiaquid dadpen yanec utsibon isenquïocnobi —quepanëdash Esus.

Pudued-puduedtequid shëcuë pistsëcquïo chiaïd

(*Mat. 7.13-14, 21-23*)

²²Adashic, Edusaden yacmi nidoaquin shubu dadpen icquid utsi-utsiec yacno isbidanquin shubu daëdpactsëcquid

utsi-utsiec yacnotsen isbidanoaquin anocquidotsen tantiamenuen chuibenenu, quec Esus nidpanëdash. ²³Adec nidsho isun iccuededquid abentsëcshun nadopanëdash: —¿Nuquin Papa yacno matses daëdpectsëcta nidpec? Tantuanu. Èbi chui.

Adoaquien Esusën nadopanëdash:

²⁴—Nuquin Papa yacno pudued-puduedtequid shëcuë pistëcquio iquendac. Esusquio tantiec aidëmpinquo mibi puduedendac. Mimbi tantiaid utsi icnuc tsucusec puduedtiapimbo mibi iquendac. Adquid dadpen icnuc, ²⁵Nuquin Icbon, Èbi yacno puduedte ushë naimbudosh, caqui cho-choshon, Èbi puduedme, quequin comapenen cuëmbededpec.

“Adoaquien: ‘Èbëd icquidpenquo mibi neque. Mibi puduedmetiapimbo iquebique. Mibëd icquido yacno nidtan,’ caindac Nuquin Icbon adquid.

²⁶“Adoaquien: ‘Mibëdtambi peshun acbededombi. Èbi yacnoshon mimbi tantiamequin chuibansho tantiombi,’ quequin abi tantiesan Nuquin Icho chuipec.

²⁷“Adoaquien: ‘Icsaquido mibi neque. Nëmbo puduedenda,’ quepec Icho.

²⁸Aden chiaqui Abadauan yec Isac yec Acobo yec quec Nuquin Papan chuimiao aidtedi Nuquin Icho yacno tabadsho isash abi tantiesan adtiapimbo yec chian anëdënquiacno tabadec shubiquiec, Nuquin Papa icsambo iquec, quec nëishpec. ²⁹Nuquin Papa yacno abi tantiesan puduedtiapimbo nobien nidaidtedi yacnoësh utsibo dadpen cho-choshon Nuquin Papan abia yuedaidobëditan tsyuec choquidon peshun aquendac. ³⁰Abi yacno choquido utsin namiaid icboedi utsi-utsiec chuiquid iquendac. Choquid utsi chuiquid dapa icboedi utsi-utsiec utsin namiaido icoaindac —quepanëdash Esus.

Edusaden isash anocquido Esus

unësquio tequid

(Mat. 23.37-39)

³¹Aden Esusën chuibanquin naimbudnubien padiseyobo utsi-utsiec cho-choshon: —Ancanquid Edodes mibi cuesunemete buneque. Nëuëshquio nidec nid —capanëdash Esus chuiquin.

³²Adoaquien: —Edodes cuesunemenebimboec onquequidquio nec. Aid yacno nidshun naden chuita. Nëbi mayan icsa dapuduequien utsibo bëdamembi. Badiadshun adomboembidi nabanoaimbi. Abadiadshun adomboembidi nabanoaimbi. Ushë utsin-utsinquien adomboembidi nabanoaimbi. Adobanquimbi naimbudembi. ³³Adobanequi nëbi capuebi. Adobanequi badiadash capuoabi. Adobanequi abadiadash capuoabi. Adobanequi Edusaden yacno capuoabi. Adec capuec ¿Edusaden yacno choabidabi unësh uapec? quiosh, Esus quequin Edodes chuita —capanëdash Esusën.

³⁴Adashic choequi macuësh yacno tabadtuidash shubu dadpen icquid Edusaden caid uano icsho isec Edusaden yacnocquido chiacbimboec Esus nadpanëdash: —Nuquin Papan chuimiao cunesnequido mibi nec. Adembidi, Nuquin Papan mibi yacno chomiaido cuënoten se-sequido mibi neoaic. Èbi tantiaquid icmenu, quequin chuideniombi. Cachinan, Con bacuë chieshëquid choec, qeshun nua shoccotsëcshun aton bacuë cudasquin mabësec aton podon. Adembidi: Mibi chieshëquid choec, qeshun mibi cudasquin chuibanombi. Aden chuisho tantiatiapimbo yec mibi tabadpoc.

³⁵Adquido yec nëbi min shubun icquido cudasquid ëbipadquid nibëdec. Nad iqueque. Tantia. Mibi chieshëc

cuesunenuequido choabienuec ëbi nidacsho yuen ëbi isenquio mimbi iquendac. Yuecash abucuësh choasho isash, Ambi chomiaid Nuquin Papan bëdamboen isaidquio nec, quequin tantienquiochoedëmbi tantiendac —quepanëdash Esus Edusaden uano icnuc Edusaden yacnocquido tantiamequin chiacbimboec onquec.

**Padiseyobon shubun
Esus puduedash tabadaid**

14 ¹Adashic, chonoattemaid ushë utsin padiseyobo tsusio dapa isedec Esus puduedsho isun, Nëid ushën natemaid icnuc Esusën bëdamenushe qeshun isnuequin padiseyobo utsibo tabadquin caimbededpanëdash. ²Aden caimbedednubien podo nidte chedo bidisquiaid uano tsadsho isun Esusën: ³—¿Chonoattemaid ushën daicsambocquid bëdamenquiocte ushë nec, quequinda mimbi tantiapè? —caquien ⁴abi caimbededquido otacquo tabadcuededpanëdash. Adec aido otacquo tabadcuedednubien podo nidte chedo bidisquiaid dada Esusën bedshun bëdameshun: —Nidec nid —cac bëdambo yec nidpanëdash.

⁵Aden aid nidmeshun abi bëdamenushe quequin caimbededquido caic: —¿Chonoattemaid ushën nua uëdëshcaidën min baca ampaëdacsho isun badedquio bedtanquin indoenquioda mimbi ictsia? —quepanëdash Esus. ⁶Aden chuisho tantiash adquiobidi otacquo tabadcuededpanëdash.

⁷Adashic, tsusiobon dayunquio tsadsho isash, Chuiquid dapa nec, utsibo quetsiash, quec padiseyobo cho-choec, quequin tantiashun Esusën nadopanëdash: ⁸—Pec cho, cac choshon tsadte bëtinennda. Tsadte mimbi bëtinambien shubu icbon ambi pec cho

caid utsi mibi chuiquid tsusio chosho ⁹isun: “Chuiquid dapa choeque. Uano tabadad,” icbon cac icsamboen naombi quish natiaic uano tsadpec mibi.

¹⁰Naden nata. Pec cho, cac choash utsiuc tsadbudta. Adsho isun: “Uano mibi tsadeque. Nëmbo, chuiquidbëd tsadec cho,” capec mibi shubu icbon. ¹¹Chuiquidbimboecsho ispashuni, quequid Nuquin Papa yacno choacsho adquid ambi namiaid Nuquin Papan icmendac. Nashunquid icboedi Nuquin Papa yacno choacsho chuiquid Nuquin Papan mibi icmendac —quepanëdash Esus abëdta yuedaido caic.

¹²Aden aido chuishumbic abi yuedquid Esus nadpanëdash: —Pemenu, quequin mibëd icquid min utsibo aton na dadpen icquidoudi pec cho cainda. Aido pemiac, mibi pec cho caoac.

¹³Pemenu, quequin aton na nibëdquido, daicsaidobëdta bëshuaido pec cho cata.

¹⁴Adquido mibi cuidquin pemetiapimbo iquec. Adquido pemias, Bëdambo iquebi, mibi quepec. Nuquin Papa yacno nidash puduedsho ambi bëdambo icmiaid mibi iquendac —quepanëdash Esus abi yuedquid caic.

Nuquin Papa yacnoshon pequido

¹⁵Aden Esusën chuisho tantiash abëdtan pec tsadquid abentsëc: —Nuquin Papa yacno nidshun abëdtambi pec bëdambo iquebi —quepanëdash.

¹⁶Adoquien aidi tantiamenuen utsi chiacbimboec Esus nadpanëdash: —Yuednu, quequin nadënquio pec chota, quequin ambi yuedtequid dadpen chuiposh. ¹⁷Ambi chiacpadën ushë chonoc: ‘Ëmbi chuiboedtedi pec cho quequin chuitanta,’ cac aton yua nidposh. ¹⁸Adec nidshun chuituidaquien: ‘Nidtiapimbo iquebi,’ queposh abitedi. Abia chuituidaid

abentsëc nadposh: ‘Ëmbi sëuëmboed dëdabi nidtiapimbo iquebi,’ queposh.

¹⁹“Utsibic: ‘Baca bedshun, Bëdamboen nimbanquinda buaneque. Isnu,’ qeshun isedtanenquiocquin ambi bedboed nimbameposh.

²⁰“Utsibic: ‘Con chido bedombique. Nidenquo iquebi,’ queposh.

²¹“Aden chuisho tantiash nidshun aidon chiacpaden aton yuan icbo chuioposh. Adsho tantiash nëishun icbon: ‘Ëmbi isedacmaido yacno nidshun, Pec cho, cata. Aton na nibëdquidbëdta daicsaid, bëshuaid chedo chuitan,’ cac aton yua nidposh.

²²“Nidshun chuitanec aidobëdi choshon, ‘Mimbi chuiboedo bëombi. Aido icnubi abi tabadte iquec,’ queposh yua.

²³“Adoaquien: ‘Shubu ënëdacno nidshun ëmbi chuibocpadquido isun bëoata ma con shubun tsucus-tsucustsëcquio yec ma adquido tabadpanuna. ²⁴Abia ëmbi pec cho caidon ëbëdtambi petiapimbo iquendac,’ queposh icbo —quepanëdash Esus.

Esuspadquio ictequidquio

²⁵Adashic, nidsho matses dadpeshun tsibanac abi choacmi bidiadshun isec Esus nadpanëdash: ²⁶—Ëbipadquio icnuequid aton papabëduidi icquid iquec ëbipadquio ictiapimbo iquec. Adecbidi, aton titabëduidi icquid iquec ëbipadquio ictiapimbo icoaic. Adecbidi, aton chidobëduidi icquid iquec ëbipadquio ictiapimbo icoaic. Adecbidi aton bacuëbobëduidi icquid iquec ëbipadquio ictiapimbo icoaic. Adecbidi, aton utsibobëduidi icquid iquec ëbipadquio ictiapimbo icoaic. ²⁷Unësmanc quiash mëyanac dayactiapimbocquid ëbipadquio ictiapimbo icoaindac —quepanëdash Esus.

²⁸Aden chiec Esus abi onquec: —¿Shubu uanu, qeshun abia shubu uaid isec, Nëidtenquio nanu, qeshun aidtedquibidi bëshun toccashun shubu uainquioda icpec? ²⁹Aden tantienquiocquidën abentse-abentsen bë-bëtsëcquin baded naintiapimbo iquec. ³⁰Adsho isun utsibon mamëshumpec. Bëdamboen isun shubu uaquidpadquid, Esuspadquio icnu, qeshun ëmbi chiaid bëdamboen tantiabenash adquibidi icpec. Ëbi tantiauidtsëcquid ëbipadquio ictiapimbo iquec.

³¹“Adembi chuinu. Tantiata: ‘Mibëd icquidobëd cuesnanuec chuiquid utsi nëmbo cho-choec,’ qesho tantiashun nëmbobi icquido chuiquidën naden tantiapec: ‘Ëbëd icquido daëdpectsëc iquec. Aidtedtsëqui iquec dayacquiocquid icquin chuiquid utsi abëd icquido cuemepec, qeshun ma chobono,’ quequin caimpec. ³²Padnuen, abëd icquido dayactiapimbo icsho isun chuiquidën: Chuiquid utsi bëquedtanta. Bëquedshun, Mibëdi ictsiabi. Ëbëd icquido chuiquid icta, ëbi chuiquid quiosh, quequin chuita, quequin chuioposh. ³³Adembidi ëbipadquio icnuequidon bëdamboen tantiata. ¿Ëbi chuiquid Esus nec, quequin ambi chiacpadendambi nabampeba? Ai, adonona, qeshun adota. Adoesa, Esuspadquiocquid nebi, quenda —quepanëdash Esus abi tsibananquido chiec.

Sa batapentsëcquiocquid

(*Mat. 5.13; Mad. 9.50*)

³⁴Aden chiaschic Esus nadpanëdash: —Sa batambo iquec. Casecac utsibëd daëdash batambo iquec. ¿Sa batapentsëcquiocquid casecac batamboda icpadic? ³⁵Padenquio. Secatequid adquid nendac. Adecbidi

Esuspadquio icnu quiash ëbipadquio yanesa chian anëdënquequid nësiatequid nendac. Adquid ictiapimbo iquebi, quequin, Tantuanu, qeshun tantiacpadomboen nabanta —quepanëdash Esus.

Obeca abentsëc bënudtequid

(Mat. 18.10-14)

15¹Adashic, icsaquid utsibobëd ancanquidën matsesën aton na buansho isun aton na bedtequid nëidtedi bedta caido, Tantuanu, quiash Esus datsidadpanëdash. ²Adsho isash padiseyobo Esus tantiamenquio yec chushquiacbimboec, Abi datsidadquido icsambocquid icsho cacumenquiocquin aidobëdtambi peshun Esusën aquec, quec abibi onquecuededpanëdash.

³Adoaquien, tantiaquidquio iquec Esus: ⁴—¿Min obeca dadpen 100ted icboedi abentsëc bënudacsho isun, Nibënu, quequin min obeca utsi dadpen 99ted nianec nibënc nidenquioda mibi icpe? ⁵Aidi nibënquin istuidash, Con obeca istuidbosh bëdambo iquebi, qeshun chiadquin buanec icbo nidec. ⁶Shubuno choshon abëd icquido ambi yuedaidobëdta chomeshun: “Con obeca bënudaid istuidshun bëbosh bëdambo iquebique. Nuquibi penuna,” quequin icbon chuipec. ⁷Adecbidi Nuquin Papa tantiaquid dadpen icnuc matses icsaquid abentsëcshun abi icsaid ënsho isash abuc Nuquin Papabëd tabadquido bëdamboshë iquebi, quecuededpendac —quepanëdash Esus.

Aton na bedtequid bënudtequid

⁸Aden icbon aton yua bënudaid chuishumbic utsi chiec Esus nadpanëdash: —¿Aton na bedtequid shocoshëmpi 10ted icboedi abentsëc nibëdsho isun tabote taboshon bescaquin chidon nibënenquioda icpec?

⁹Ai. Aden nibënquin istuidshun abëd icquido chomeshun: ‘Con shocoshëmpi abentsëc niadacboedi nibënquin istuidash bëdambo iquebi,’ quepec chido.

¹⁰“Adecbidi matses abentsëcshun abi icsaid ënsho isash abi yacnocquido ambi uaido mayan bëdabobëdi Nuquin Papa bëdambo iquebi, quecuededec —quepanëdash Esus.

Aton mado cuëshëdquid

¹¹Aden chido chiasnic utsi chiacbimboec Esus nadpanëdash: —Aton mado daëd icnubi ¹²tsyuec tishaid aton papa caic: ‘Tsusio budquin mimbi chiondacaden nëbi ëbi aitted meneta, papa,’ quepondash. Adoac aton na musucshun aton mado abi daëdi menebampondash.

¹³Aden meniac daëdpactsëc ushash aton mado tsyuecquid aton natedi sandoshon buanec nidaid utsi yacno nidash icsamboen nabanec tabadnuc aton natedi naimëdpondash. ¹⁴Aden aton natedi naimëdambic tiedën caniquid unësbunian abi nidacnocquidon pete naimëdan tsusion mado chedo comapenec bundocuededpondash. ¹⁵Adec bundoquec abi nidacnocquid abentsëc yacno nidshun: ‘Mimbi namiaid ictiadquio iquebi,’ caquien: ‘Con chancho pemebanta,’ qeshun aton chancho yacno tsusion mado nidmepondash. ¹⁶Aden nidmiac nidquin chancho pemebanequi ambi chancho pemiaid petiadquio yec tabadshobi anocquidon menenquio icpondash.

¹⁷“Adec natiambo bunec tabadquin aton papa ambi nianondaidbëdta abi icsaid utsitedi tantiec abibi onquec nadpondash: ‘Con pan namiaidon pete dadpen icnubi con na nibëdnuc unëspebi. ¹⁸Nëbi con pa yacno nidshun

naden con pa chiembi: Nuquin Papan chiacpaden nainquiocquin mibi tantienquo yec nidshun icsamboen nabanombique. ¹⁹Adquid icsho con mado nec, ëbi cainda, papa. Nëbi min yuapadquid ëbi icme,' quequin chiembi, ²⁰abibi quianec aton papa yacno nidoapondash. Adec nidec ancuenquo yacno aton mado nidondaic casenash chosho isash unësquiocnoc aton mado bëquedquin dayumbudshun shubi uatanquin aton papan tanchoccapondash. ²¹Adoac ambibi tantiabocpaden aton papa chuiquin: 'Nuquin Papan chiacpaden nainquiocquin mibi tantienquo yec nidshun icsamboen nabanec tabadteniobi. Aden naquid con mado ëbi cainda, papa. Min yuapadquid ëbi icme,' capondash aton madon.

²²"Aden chiaquien bédambo yanshun ambi namiaidombo naden aton papan chuipondash: 'Con mado ënden nidondaic choasho. Dasiuidte bédaidquo bëshun con mado dasiuinta. Adoshombic mëusudtetsen mëusunta. Adoshombic tapucudtetsen tasiuinta. ²³Adoshombic, bacan bacuë nuacquid dapa bedshun cuesuneta nuquitedi bédamboec tabadquin penun. ²⁴Con mado unësacbimboecboedi nëbi ëbëdi tabadoaic. Aidi bënudacbimboecboedi nëbi istuidacbimboec choash iquec,' cac bacan bacuë cuesuneshun codocacsho pebedepondash.

²⁵"Adnubien bëyuc tishaid tied nantan icpondash. Auëshquoio nidec shubu anoentsëqui choquin tentencate cuëdëmec matses cuëdënsho tantiatuidpondash. ²⁶Aden tantiatuidashien aton papan namiaid istuidash: '¿Atotsi naic nec?' quepondash bëyuc tishaid.

²⁷"Adoquien: 'Min utsi ënden nidondaic choaposh. Aidi chosho isash

unësquiocquin nuquitedi bédamboec tabadquin pemenuequin aton bacan bacuë nuacquid dapa papan cuesunemiosh,' cac ²⁸bëyuc tishaid nëishash shubun puduedenquo icpondash.

"Adsho isash, Puduedenquo iccosh, quequin chiac bëyuc tishaid yacno nidshun: 'Min utsibobëd bédambo icnuec cho, mado,' capondash aton papan. ²⁹Adoquien: 'Seta dadpen matamequin mimbi chiacpadomboen nabanteniombi. Adquid icsho ëbëd capuquidobëdta ëbi pemenuen yua utsin bacuë mimbi cuesunemenquiocpaboc. ³⁰Nëbi mimbi meniaidtedi naimbudquinc, chido dada dadpen chudmequid chudquinc caic min mado choacsho isun bacan bacuë nuacquid mimbi cuesunemepacbob,' quequin bëyuc tishaidën aton papa chushcapondash.

³¹"Adoquien: 'Mado, ëbëd icquid mibi nec. Adquid icnuc con natedi mitsana neyoc. ³²Min utsi unësacbimboecboedi nëbi choash tabadoaic. Aidi bënudacbimboecboedi nëbi istuidaid nec,' quequin aton papan choboedën buchi chuipondash —quepanëdash Esus.

Icbon na icsamboen isquid

16 ¹Adshumbic, abëd icquido Esusën naden chuiapanëdash: —Icbon, Con na dadpen isquid icta, caid icnubi: Mimbi con na ista caidën mitsana uesbudec, quequin utsibon chuiposh. ²Adoac, ambi con na ista caid chomiash icbo nadposh: 'Mimbi con na ista caidën mitsana uesbudec, quequin chioshi. Adoac, con na isquid mibi ictiapimbo iquec, caimbi. Nëbi ¿Ëmbi tambamboed abitedida iqueque? Con na daëd uata quequin ëmbi meniac mimbi daëd uabanquin dada uaid bec cho. Isnu,' queposh icbo.

³“Aden chiac icbon na isquid otacquio onquec: ‘¿Icbon na isquid ictiapimbo yec mitsimbobi tabadpeba? Neshcashunquid ictiapimbo iquebi. Adecbidi, Con na nibèdeque. Bec cho, quetiapimbo icoaibi. ⁴Naden natsiambi. Con icbon na meniondaid abitedi cuidmenquio yac ëbi yuedtsiash,’ queposh.

⁵“Aden tantiashun ambi icbon na meniondaid abentse-abentsen chomiac bëyuc choquid chuiquin: ‘¿Tedtsi ëmbi con icbon na meniaqui mimbi cuidenquiocpaccoc?’ caquien:

⁶“ ‘Bëchi shocosh nuacquid dapan cushtoaid 15tedi bedshun cuidamboccombi,’ queposh.

“Adoquien: ‘Mimbi 15ted bedombi, quequin dada uaid secashun dada uatempi bedshun shocosh dapa bëchi cushtoaid 7ted bedshun cuidembi, quequin dada uata.’

⁷“Aden bëyuc choquid chuishumbic utsi chosho isun: ‘¿Con icbon na tedtsi bedshun cuidenquio mimbi icpo?’ caquien:

“ ‘Tsitsan dapa dadpen 1000ted tiedën caniquid ëshë bedombi,’ queposh.

“Adoquien: ‘Mimbi aited bedombi quequin dada uaid secashun dada uatempi utsin tsitsan dapa dadpen 800ted tiedën caniquid ëshë bedshun cuidembi, quequin dada uata,’ quequin icbon na isquidën chuiposh. Adoac ambi chiacpaden ambi bedaid cuidambocquidën dada uaposh.

^{8,9}“Aden dada uabansho isun dada uatempitedi bedshun icbo yacno nidshun meniac isbanec icbo tantiaquidquio iquec nadposh: ‘Muaquin mimbi dada uamebanquin mibi yuedmetequid con na mimbi aido menioque. Nidec nid,’ caposh icbon —quequin Esusën chuipanédash. Aden chuishun ambi chuiboed tantiamenuen

abi chuibudec: —Nuquin Papa yacno mitsana buantiapimbo icquin nidaidën tabadquin mitsana meniac mimbi meniaidotsen ëbi tantiaquid yanash unësash Nuquin Papa yacno nidshun mibi tsyuec chosho isun ëbëdtambi aidon mibi yuedendac —quepanédash Esus.

¹⁰Aden chuishumbic adomboembidi chuiquin Esusën nadopanédash: —Icbon na daëdpactsëc bédamboen isbanquin nashunquid icquin adembidi icbon na dadpen isbanquin bédamboen nashunendac. Padnuen, icbon na daëdpactsëc isbanquin icsamboen nashunquid iquin adomboembidi aton na dadpen icsamboen isbanoaindac.

¹¹Adembidi mimbi nidaidëshun bedquin mimbi icsamboen nabansho isun, ¿Ëbi tantiaquid bédamboen ista, quequina Nuquin Papan mibi chuipeba? Padenquio iquec.

¹²Adembidi, ¿utsin na isquin bédamboen nashunenquio icsho isun abi yacno chosho isun mibi menependa ictic? Padenquio.

¹³“Adecbidi, chuiquid daëd icnuc aid daëdshun namiaidquio ictiapimbo mibi iquec. Abentsëcshun chiaiduidi tantiaquin utsin chiaid mimbi chieshëneç. Adquiobidi Nuquin Papa mimbi tantiaidquio icquimbi mitsana bedtequid mimbi tantiaidquio ictiapimbo iquec —quepanédash Esus.

¹⁴Aden chuibanubi aton na bedtequid ambi tantiaidquio icnuc chieshec padiseyobo tabadcuededpanédash.

¹⁵Adec tabadsho isun Esusën: —Bédamboen nashumbimboen ismequido mibitedi icsho mimbi ompoquin naidtedi Nuquin Papan isquin tantiec. Adembidi, Bédamboen naquidbimboecsho matsesën ispashuni, quequin tantiaquin nasho Nuquin Papan bédamboen istiapimbo iquec.

¹⁶“Adembidi, acten mentoanquid Uan pado tishabicnuc Nuquin Papan naden nata quequin chiaid Moisesën dada uampidbëdta Nuquin Papan chuimiaid utsibon dada uampid mimbi ënden tantiondaid nec. Nuquin Papa yacno puduedmianquid iquec, quequin nëbi chiaid utsi nec. Ad icnuc Nuquin Papa yacno puduedmianquid tantianu, quenquio yec ambibi tantiacpavec puduede bunec. ¹⁷Abubëd nidaid ënëdtequid icnuc Nuquin Papan naden nata quequin chiaid ënëdtiapimbo iquendac.

Aton chido nianquid

(*Mat. 19.1-12; Mad. 10.1-12*)

¹⁸“Ad icnuc, aton chido bunenquiocquin aid nianshun chido utsi bedquin Nuquin Papan chiaid niacquid nec. Adembidi aton bënë niamboed chido bedquid Nuquin Papan chiaid niacquid neoaic —quepanëdash Esus.

Aton na dadpen icquid icnubien aton na nibëdquid

¹⁹Adequi onquequimbi utsi chiacbimboen Esusën naden chuipanëdash: —Dada, aton na dadpen icquid bëdaidquio dasiuidquidën badiadquidën-badiadquidënquien nua peshun acposh. ²⁰Adnubien aton na dadpen icquidën shubu dayun bëshun tsadunac aton na nibëdquid, Dasado cuëmëdquid, chiuë dadpen icquid tsadposh. ²¹Bunquieac ambo tsadec aton na dadpen icquidën peshun secaid bedshun penuec tsadtsëcsho menenquiocposh. Aden menenquiocnoc tsadshobi opa choquin aton chiuë bëtashuntuidposh.

²²“Adnubien, aton na nibëdquid Dasado unëso isun Nuquin Papan uaido mayan bëdabon abuc buanshun Abadauanën dayunquio tsadumposh.

Adoambic, aton na dadpen icquidtsen unësashi ²³chian anëdënquiacnoshon mëyanaid icquin abucquio isquien aton na nibëdquid unësboedi Dasado Abadauanën dayunquio tsadpec. ²⁴Adec aid daëdi tsadsho isun aton na dadpen icboedën Abadauan chuiquin: ‘Ëbi antauideque. Con ana dauebudoaquin ëbi ëcpanun Dasado acte bëme, papa,’ caposh.

²⁵“Adoaquien: ‘Chuinu. Tantia, abuido. Ënden nidaidën tabadquin mitsana dadpen bedbanec bëdambo mibi tabadnubien Dasado comapenec bunquieac tsadposh. Nëbi aidi ënabi bëdamboec tabadnubien anchumbo yec mibi tënquebudec. ²⁶Adboedi, uquëmbo mibi iquec cuëma utsiuc potetemaïd icnuc nëuëshquio nidtiapimbo iquec. Adquiobidi mibi yacnocquido nëmbo chotiapimbo icoaic,’ quequin Abadauanën aton na dadpen icboed chuiposh.

²⁷“Adoaquien: ‘Ëbi yacno potetemaïd icnuc con pan shubu yacno Dasado nidme. ²⁸Con buchi ado mëdante auc abentsëc 5tedi unësabi yec nidaidëmbi tabadeque. Con buchi ado nëmbo mëyanacno chonoshe qeshun Dasado aido chuimetanta, papa,’ queposh aton na dadpen icboed.

²⁹“Adoaquien: ‘Nuquin Papan chiaid, Moisesën dada uampidbëdta dada uaid utsi isec tsusiobo onquepayoc. Aden chiaid ma min buchi adon tantiaquiopanuna,’ quequin Abadauanën chuiposh.

³⁰“Adoaquien: ‘Aid tantienquioctsiash, papa. Unësboed nidshun chiac aïdon tantiapatsiash,’ quequin aton na dadpen icboedën chuiposh.

³¹“Adoaquien: ‘Padicnuna. Nuquin Papa tantiesa icquin uincuemiaidën chiaid min utsibon tantienquio icpatsiash,’ caposh Abadauanën aton na

dadpen icboed chuiquin —quepanëdash Esus.

Matses icsaid chiaid, ambi Esus tantiaid chiaid, ambi natequid chiaid
(*Mat. 18.6-7, 21-22; Mad. 9.42*)

17 ¹Aden chuishumbic abëd icquido Esusën nadopanëdash: —Icsa uanquid iquendac. Adquid Nuquin Papan comapenen cuidendac. ²Adquid ëbi tantiabenicquid icsa uanabicsho cuënote yuëmbocquid têtanetanquin acte shodomboshë yacno nënëpatecnëdan. ³Aid tantiec aidpadquid icmane quequin bëdamboec tabadquin ismedeneta.

“Utsi icsasho isun: ‘Mibi icsaique. Mibi icsaid ënta,’ mimi cac: ‘Ai, icsaobique. Ënëdnuna,’ qesho tantiaish aidi icsainquio yacbimboec bëpiscudta. ⁴Mibi icsamboen nash choec: ‘Icsaobique. Ënëdnuna,’ quenuc mibi icsamboen nacmaïdbimboec yec bëpiscudta. Mibi padpiden icsamboen nash choaic: ‘Icsaobique. Ënëdnuna,’ queoanuc mibi icsamboen nacmaïdbimboec yec bëpiscudoata. Mibi padpiden icsamboen nash padpidec choec: ‘Icsaobique. Ënu,’ queoanuc aidtedecbidi aidi icsambo yenquio yacbimboec bëpiscudoata —capanëdash Esusën abëd icquido chuiquin.

⁵Adoaquien: —Nuquin Papa nadatiambocquin nabanquidquio nec, quequin tantiaquidquio ictiadquio iquebique. Adquid ëbi icme, icbo —capanëdash abëd icquidon Esus chuiquin.

⁶Adoaquien: —Cuëtempi ëshë mostasa caid pistsëcquio iquec. Siac dëyucash nua yanec. Adecbidi Nuquin Papa nadatiambocquin nabanquid iquec quequin mimi bëdiactsëc tantiapec. Aden bëdiactsëc tantiaquin Nuquin

Papan nadatiambocquin naban-nabansho isun, Nuquin Papa nadatiambocquin nabanquidquio iquec, quequin tantiabenshun nëid cuëtempi caic, Cuëte mananuc tabadboedi adquiecbidi acte nantan tabadoata, quequin mimi chiacpadece acte nantantsen abi tabadacpadecebidi tabadoaindac —quepanëdash Esus.

⁷Aden chiashic Esus abi onquec: —ÏMin yua mimi neshcata cac nidshun neshcaquin nainash shubuno chosho isun: “Nëmbo tsadquin pec cho,” caquinda mimi icpe? ⁸Padenquio. “Con pete codocashun ëbi pemeshun acte menetanquin mimbisen peshun acta,” mimi caic. ⁹Aden mimi chiac mimi chuiboedtedictsëqui nabanquin mimi yuaidën naimbudec. Aden naimbudsho isash: “ÏBëdamboen mimi naoc,” quecta mimi icpe? ¹⁰Padenquio. Ambembi nainquio iccosh. Mimi chiacpaden min yuan nabanosh. Adembidi Nuquin Papan chuiboedtedtsëqui nabanash Nuquin Icbo caic: “Mimi chuiboedtedi nabampombi. Mimi namiaid icquin ëmbi naboed ëmbi natequiduidi napombi,” quequin mimi chuite nendac —quepanëdash Esus.

Daushumbocquido bëdamiaid

¹¹Adashic, Edusaden yacno nidequi nidaid Cadidia caid ënëdacno nidaid Samadia caid yacno datambëtsenec ¹²shubu daëdpactsëc yacno Esus chopanëdash. Ambo choshobien daushumbocquidon 10tedishun Esus bëquedtuïdpanëdash. ¹³Adquido yec uano tabadquin: —Ëbitedi bëdamboen tantiaquin nadatiambocquin naban, icbo —cabededpanëdash comapenen cuënquin.

¹⁴Adsho tantiaishun Esusën: —Isadaïdbo tsusiobo yacno nidshun

ismetanta —capanëdash. Adoac
nidanequi abitedi
bëdambudnepanëdash.

¹⁵Adoac bëdamboed abentsëc
dëbidiadanec Nuquin Papan naid chiec
onquec choaic ¹⁶Esusën taëno
tsadbudash: —Mimbi bëdameboe
bëdambo iquebi —quepanëdash Esus
caic. Aidi Samadia yacnocquid
isadaidpembo nepanëdash.

¹⁷Adoaquien: —¿Diestedidambi
bëdamepo? —quepanëdash Esus
dëbidiadanec choboed caic. ¹⁸Aden
chiashic iccuededquidtedi caic: —Nëidi
isadaidpembo yequi dëbidiadanec
choash Nuquin Papan naid chiec
onquenubi ambi chiacpadomboen
bëdameboed utsibo isadaidbo icquimbi
Nuquin Papan naid chienquo icpec
—quepanëdash Esus. ¹⁹Aden
chuishumbic: —Mimbi tantiacpadequi
mibi bëdanoque. Nidtoanec nid
—capanëdash Esusën daushumbo
icboedi chuiquin.

**Chuiquid dapabëd
bëdamboec tabadte chote ushë
(Mat. 24.23-28, 36-41)**

²⁰Adshumbic: —¿Chuiquid dapa
abentsëcbëd bëdamboec tabadte ushë
choaid mitsipadënquo nuqui ispeque?
Tantianu. Èbi chui —capanëdash
padiseyobon Esus chuiquin.

Adoaquien: —Chuiquid dapabëd
bëdamboec tabadte ushë chote ismete
nibëdendac. ²¹Adecbidi, nëmbobi
chuiquid dapa abentsëc choeque. Is,
quetiapimbo matses icpec. Adecbidi,
Umbo choeque. Is, quetiapimbo matses
icoaic. Chuiquid dapa abentsëcbëd
tabadte nëmbobi iquec caimbi
—quepanëdash Esus padiseyobo abi
chuimeboedo caic.

²²Aden padiseyobo chuishumbic abëd
icquido Esusën nadopanëdash:

—Yuecash natiamantequid icnuc abuc
Esusbëd tabadte ushë chopashun, quec
ëbi iste mibi bunquimbi ëbi isenquo
mimbi iquendac. ²³Adec ëbi iste
bunubien: “Bëdamboec tabadte
chuiquid ambo choshe. Istan,” cac abëdi
nidenda. Adembidi: “Nëmbobi choshe.
Isnu. Cho,” cac istanenda. ²⁴Nuquin
Papa yacno bëdamboec tabadte ushë
chonoc abu bedquetaniacimboec
uëshëmbo chënquec ëbi chosho
abitedishun isbededendac. ²⁵Aid ushë
choabicnuc ëbi natiametequid iquendac.
Adembidi, chuiquid dapa nec
cainquiocquin ëbi isadaidbon
chieshëmbededec —quepanëdash Esus.

²⁶Aden chiec Esus abi onquec:
—Ëndenquimboshë Noe tabadnuc
matsesën icsamboen
tantiaded-tantiadednëdacpadomboen
ëbi choate ushë icnuc adembidi
matsesën tantiadenepec. ²⁷Nadec
tabadpampic: Nuquin Papan chiaid
tantiesa cuidte ushë choec,
quenquiocquin abi bunaiduidtsëqui
tantiaquin nua peshun nua
acbededpampic. Adembidi tantiaquin
aton chido bedpampic. Adembidi
tantiaquin aton champi menepampic.
Aden tantiaquin nabanubien Noebëd
icquido cano dapan puduedambic nua
mauantequid ue dapambo sequenuc
cubudquin Nuquin Papan chiaid
tantiesabotedi acte mauanquin mabocac
abitedi unësbunepampic —quepanëdash
Esus.

²⁸Adec Noe tabadnuc icsamboen
tantiec matses tabadaid chiashic, Esus
nadpanëdash: —Adecbidi Dod caid
icnuc icsamboen tantiec matses
tabadpampic. Nuquin Papan chiaid
tantiesa iquec abi bunaiduidtsëqui
tantiaquid icoapampic. Nidaidën
tabadaiduidquid tantiaquin nua peshun
nua actenepampic. Adembidi tantiaquin

aton na dadpen bedtenepampic. Adembidi tantiaquin aton tied nitsindenequinc, shubu uadenequinc, caquin napampic. ²⁹Aden nabanquin Nuquin Papan chiaid tantienquio icnubi shubu dadpen icquid Sodoma caid yacnoshon Nuquin Papan abi tantiaquid Dod cuemepampic. Adnubien tabote dëpesh pasquiacbimboecquid nëdënquetequid ue sequiacbimboec sequequidën Sodoma yacnocquidtedi Nuquin Papan chiaid tantiesabo unës uabunepampic —quepanëdash Esus.

³⁰Aden chiashic: —Ëbi choate ushë icnuc ëmbi chuibocpadquiec Nuquin Papan chiaid tanties a yec abi bunaiduidtsëqui tantiaquid iquendac. ³¹Shubu macano yacno dectatoash mibi tsadnuc ëbi choate ushë chosho isash budanec mitsana bednu quec shubuno puduedenquio yec cuenta. Adecbidi, tied nantan mibi icnuc aid ushë chosho isash shubu yacno mitsana bednuec nidenquio yec badedquio cuenta. ³²Mibi yacnocquidtedi unës uanushe bidiadshun isenquio yec cuenta, cac Dod cuenubien aton na tantiec aton chido aubidi bidiadsho unës uampidpadquid iquenda. ³³Unësmane qeshun ambi tantiacpadec tabadquid unësash mëyanacno tabadnubien unësmanë quenquiocquin Nuquin Papa yacno tabadte tantiaquin chuiquido unësash Nuquin Papa yacnombo tabadendac. ³⁴Ëbi choate ushë icnuc nad iquendac: Inchëshën daëd usho Nuquin Papa yacno yuednuen abi tantiaquid bedquin abi tanties a nianendac. ³⁵Adembidi, chido daëdshun macueso Nuquin Papa yacno yuednuen abi tantiaquid bedquin abi tanties a nianoaindac. ³⁶Adembidi, dada daëd aton tied nantan icsho Nuquin Papa yacno yuednuen abi tantiaquid bedquin abi tanties a nianoaindac —quepanëdash Esus.

³⁷Aden chuisho bëdamboen tantienquiocquin abëd icquidon: —¿Mitsimbo budpec, icbo? —capanëdash.

Adoaquien: —Unësaid yacno edeste bud-budec. Adquiecbidi Nuquin Papan chiaid tanties a abi bunaiduidtsëqui tantiaquid yacno abi cuidtequid budendac —quepanëdash Esus abëd icquido caic.

Cadonequidquio chido chiaid

18 ¹Adashic, Ëbëd icquido chieshenquio yec Nuquin Papa chiec onquian-onquianquidquio ma icpanu quec aido tantiamenu quec Esus nadpanëdash: ²—Shubu dadpen yacno icsambocquid cuidte chuiquid icposh. Aidi Nuquin Papan chiaidbëdta utsibo tanties a icposh. ³Adnubien uano tabadquid niante chido icposh. Aidi icsambocquid cuidte chuiquid yacno nidshun: ‘Ëbi icsamboen naquid ma cuidnu chuiquiota,’ quequin chuiquosh. Aden chiaqui padenquiocsho isash choded-chodedquin adomboenuidi chuided-chuidedposh.

⁴“Aden chuidoniaqui abi icsambocquin naquid cuidte chienquiocboedëmbi chido ënëdenquio yec ⁵choded-chodedquin adomboembidi chuiasho tantishun: ‘Nuquin Papabëdta matses tanties a nebi, quequimbi niante ënëdenquio yec chodednesho isun uimabudmanë qeshun abi icsamboen naquid cuidte chuiquiono,’ qeshun cuidte chuiquidën chuiquioposh.

⁶Aden chiashic Esus: —Choded-chodedquin chidon chuiasho tantias h: “Mibi icsamboen naquid cuidte chuinu,” queposh icsambocquid cuidte chuiquid. ⁷¿Adomboembidi ambi cuënaidon, Ëbi chieshënquid cuidta, quequin chuidoniac, Cuidnu,

quenquioda Nuquin Papa icpec? Ai, adendac. ¿Nëbimbobida cuidpeba?

⁸Abitedi padenquioctsiash. Utsi nëbimbobi cuidenquiocquin choshon cuidendac. Badedquio cuidenquioscho isash choquin ¿tedectsishumbimbi ëbi tantiaquin caimbudnequido istuidpendac? —quepanëdash Esus.

Padiseyobo abentsëc icnuc ancanquidën utsin na bedtequid bedmianiaid chiaid

⁹Adashic, bëdambocquid nebi, quiaish utsitedi icsambo iquec, quequido tantiamenuen adquidën tantiaid icsa chuiquin Esusën nadopanëdash:

¹⁰—Nuquin Papa tabadte shubu uashunaid yacno Nuquin Papa chiec onquenuc nidnuequid daëd icposh. Abentsëc padiseyobo icnubi ancanquidën utsin na bedmianiaid utsi icposh. ¹¹Nuquin Papa tabadte shubu uashunaid yacno abi daëdi choash puduedash uano nidtuidshun padiseyobon ambi tantiacpaden naden Nuquin Papa chuiposh: Bëdambocquid nebi, Papa. Ampequido utsibo icnubi icsamboen nabanquido utsibo icnubi aton chidopen chudquido utsibo nec. Adoesambo nebi. Adecbidi, choboed, ancanquidën utsin na bedtequid bedmianiaidpadquidpenquio nebi, Papa. ¹²Adembidi, chonoadtemaid ushë yambi chonoadtemaid ushë utsi choabicnuc daëdec ushquin mibi tantiaquin buna mëmundenembi. Adembidi, uno bedanquin dies yacno cüescaquin con na tambanshun 9ted dayun uaquin abentsëc mibi menedenembi, Papa, quequin padiseyobon chuiposh.

¹³“Aden padiseyobon uanoshon chuinubien ancanquidën utsin na bedtequid bedmianiaid puduedash nidtuidash: ‘Icsambocquid nebi, Papa.’ Adquid nebi quequin ismec shuebudacchobi abuc Nuquin Papa

yacno isenquio yec abi onquec: ‘Icsambocquin nabanquid nebique. Ëbi tantiaquin pauc, Papa,’ queposh —quepanëdash Esus.

¹⁴Aden chiashic: —Chuinu. Tantia. Ancanquidën utsin na bedtequid bedmianiaid Nuquin Papan bëdamboen isaidquio icnubien padiseyobo ambi icsamboen isaidquio icposh. Icsaisa yacnimboec, Bëdambocquid nebi, quequid yuecshun Nuquin Papan aidën icsamboen tantiaid ismequin chiendac. Padnuen, icsambocquid nebi, quequin tantiaquid yuecshun ambi bëdamboen naid Nuquin Papan ismequin chuioaindac —quepanëdash Esus.

Bacuëbo Esus yacno bë-bëaid
(*Mat. 19.13-14; Mad. 10.13-16*)

¹⁵Adshumbic, aton bacuëbo Esus mishmenuequin utsin-utsinquien bë-bësho isun: —Bacuëbo bë-bëenda. Esusën nabanaid utsi iqueque. Nidanec nid —capanëdash Esusbëd icquidon.

¹⁶Aden chuisho tantiaash Esus nadpanëdash: —Bacuëbo nidmenquiocquin con dayunquio cho-chome. Chiac, Abimbo caic, quequin tantiaquidquio bacuëbo nec. ¹⁷Adomboembidi, Nuquin Papa yacno tabadte iquec, quequin chiac bacuëbon badedquio tantiacpadomboen tantiec Nuquin Papa yacno puduedtequid iquendac. Aden tantiesa ambo puduedtemaid iquendac —quepanëdash Esus.

Nëbi caniquid chuiquidën chiaid
(*Mat. 19.16-30; Mad. 10.17-31*)

¹⁸Adshumbic, nëbi chuiquid caniquidën: —Nuquin Papa yacno nidnuequin ¿atotsimbi nape? Bëdamboen tantiaquidquio icquin ëbi chui. Tantienu —capanëdash Esus chuiquin.

¹⁹Adoaquien: —¿Mitsipaden tantiec bédambocquid nec, quepe mibi? Nuquin Papauidsëqui bédambocquid nec. ²⁰Abi yacno nidnuequin ambi naden nata quequin chiaid naden mimbi tantiapec: “Mimbi inacmaid chudenda; ambi chiaid utsibic, cuesunianenda; utsibic, utsi mua uaquin chienda; utsibic, papan chiaidbëdta titan chiaid tantiaquin nabanta,” quequin chiampid mimbi tantiapec —capanëdash Esusën nëbi chuiquid caniquid chuiquin.

²¹Adoaquien: —Canidotsëcquimbi aden nadeniondambi —quepanëdash nëbi caniquid.

²²Aden chuisho tantias: —Abentsëc mimbi nabicquid iqueque. Mitsanatedi menequin bedtequid bedbanshun aton na nibëdquid menebanta. Aden mimbi menebanac ëbi tantiaquid dadpen yanash Nuquin Papa yacno nidendac. Aden meniash ëbëd iquec chota —quepanëdash Esus.

²³Aden Esusën chuisho tantias aton na dadpen tantiec unësquo yanshun Esusën chiacpaden natiapimbo icpanëdash. ²⁴Adsho isun: —Aton na dadpen tantiaquin Nuquin Papa badedquid tantiatiapimbo adquidën iquec. Nuquin Papa tantienquo yec abi yacno puduedtiapimbocquid iquendac. ²⁵Adquiecbidi shëcuë pistsëcquid puduedte nidaidën capuquid dapan badedquid tantiatiapimbo iquec. Tantiamic puduedec. Adembidi Nuquin Papan shubu abentsëquën puduedmianquid icsho aton na dadpen icquidën badedquid tantiatiapimbo icoaic. Aden aid tantiatiapimbocquid ambibi tantiacpadequi puduedte bunec —quepanëdash Esus.

²⁶Aden chuisho tantias iccuededquido nadpanëdash: —¿Tsutsi Nuquin Papa yacno puduedquid icpec? —quepanëdash Esus caic.

²⁷Adoaquien: —Matses ambibi tantiacpadec puduedtiapimbocnoc Nuquin Papambien abi yacno yuedanquid matses tantiamendac —quepanëdash Esus.

²⁸Adoaquien Petedo: —Mibëd icnu, quequin ëbëd icquidbëdntan con natedi nianondambi, icbo —quepanëdash Esus caic.

²⁹Adoaquien: —Abimbo mimbi chioque. Tantiata. Chuinu. Nuquin Papabëd shubu abentsëquën tabadaid chuibanuequin aton shubu icnuc aton chidobëdta aton bacuëbo nianacsho ³⁰ambi nianaidtedimbo tambanquin daëd uabanquin Nuquin Papan nëbi bédambo icmeshumbi abi yacno nidacsho bédamboshë icmiaid mibi iquendac —quepanëdash Esus Petedo chiec.

Ëbi unës uaindac, quequin Esusën chiaid
(*Mat. 20.17-19; Mad. 10.32-34*)

³¹Adashic, abëd icquido uano buanash: —Edusaden yacno nuquibi nidoaic. Ambo choacsho Nuquin Papan ëbi chuiquin dada uamiampicpaden icsambocquid ëbi nabanendac. ³²Anoshon bedshun buanshun isadaidbon isadaidpembo ëbi menendac. Aden meniac bedshun ëbi mamëshumbededquimbi, icsamboen chuibededquimbi, dacuishtuabededquimbi, dacuesbededsëcquien mëyanshun ëbi cuesten dectanquin unës uaindac. ³³Adoaqui daëdec ushtanec uincuenendabi —quepanëdash Esus abëd icquido chiec.

³⁴Aden abi unëste Esusën chuisho abëd icquidon bédamboen tantienquo yec tabadpanëdash.

Bëshuaid bédamiaid
(*Mat. 20.29-34; Mad. 10.46-52*)

³⁵Adashic, Edusaden yacmi nidequi Edico caid shubu dadpen yacno

anoentsëqui Esus chonobien podqued cuëmambi bëshuaid tsadpanëdash. Matses cuensho tantiash: “Mitsana bedtequid bec cho,” quepanëdash bëshuaid. ³⁶Adec tsadquimbi matses dadpen cuen-cuensho tantiashun: —¿Atotsi quec cuen-cuene? —capanëdash. ³⁷Adoaquien choquid abentsëc: —Nasaded yacnoësh choquid Esus cuenec nec —quepanëdash.

³⁸Adsho tantiashun bëshuaidën: —Dabid, tsusedpan mado mibi icquin ëbi tantiaquin nata —capanëdash Esus cuënquin.

³⁹Adshobien: —Adec cuëdenquio yec tsad —capanëdash choquidon.

Adoaquien bëdiactsëc cuëmboedëmbi comapenquien: —Tsusedpa Dabidën mado mibi icquin ëbi tantiaquin nashunta —caoapanëdash bëshuaidën.

⁴⁰Adoac nidtuidshun Esusën: —Aidi bec cho —cac abi yacno bësho isun: ⁴¹—¿Atotsimbi mibi nashumpeba? —capanëdash Esusën bëshuaid chuiquin.

Adoaquien: —Bëshuaid nebique. Èbi bëucshune, Ico —capanëdash.

⁴²Adoaquien: —Mimbi tantiacpadomboen padpidemboen is —cac ⁴³badedquio isbenshun bëshuacboedën Esus tsibanquimbi Nuquin Papan naid chuibanquin isbanec onquec nidpanëdash. Aid bëdansho isun Esusbëd nidanequidotedishuntsen Nuquin Papan naid chuibededpanëdash.

Saqueyo, ancanquidën utsin na bedtequid bedmianiaid dapa

19 ¹Adec nidequi Edico caid yacno datambidanec Esus nidpanëdash. ²Edico yacnocquid Saqueyo cuëmëdquid icpanëdash. Aidi ancanquidën utsin na bedtequid bedmianiaid dapa iquec aton na dadpen icquid icpanëdash. ³Adoaid icquimbi

utsi, Esus cuenec, queshe tantiash, ¿Mitsipadquidquio Esus neque? Isnu, abibi quianec nidquimbi matses ënapen icquid dadpen Esus datsidadacsho bushcuctsëcquid icquin Esus Saqueyon isenquio icpanëdash. ⁴Adash, Nëid podquedën Esus choec, quianec podqued cuëman nidquidën cuëte dapan dectatoash isec cuidin tsadpanëdash.

⁵Adec tsadnubien aid podquedënquio choec nidtuidshun Saqueyo bushcuctsëcquid istuidshun Esusën: —Nëbi mibi yacno nuquibi tabadec nidnu. Baded bud —cac ⁶Saqueyo badedi budpanëdash. Budanec nidquin Esus buanec aton shubuno choshon: —Mibi ëbëd icte bunsho isash bëdambo iquebique. Pudued —Saqueyon cac Esus puduedpanëdash.

⁷Adec puduedsho isash Esus tsibananquido: —Icsaquidën shubun Esus puduedosh —quecuededpanëdash.

⁸Adnubien, aton shubu nuntanuësh nidtoash Saqueyo: —Chuinu. Tantia, Ico. Nëbi con na mais uaqin aton na nibëdquid menenun nabono. Adoshombic, con matses: “Con na mimbi ampioc,” queshe tantiashun ëmbi ampiaidbëdta daëd-daëdquiecnuc daëd uaqin menebanembi —quepanëdash Esus chiec.

⁹Adoaquien: —Chian anëdënquequid nësiatsemboedi aton tsusedpa Abadauan yanampicpaden tantiaquid Saqueyo yanacsho nëbi mënchicaid iquec.

¹⁰Icsambocquid Saqueyo icbocpadquid nibënquin istuidshun nësecanushe quesun mënchicnuec chopobi —quepanëdash Esus Saqueyobëd icquido caic.

Aton na bedtequid 10ted icquid meniaid

¹¹Aden Esusën chuisho tantiashun Edusaden yacno choash chuiquid dapa

Esus yantsiash, quequin utsibon icsamboen tantiapänëdash. ¹²Aden tantianubi tantiaquidquio icquin utsi chiacbimboen aido tantiamenuen Esusën nadopanëdash: —Chuiquid dapan mado: ‘Ënden caniaid iquebique. Nëbi ëbitsen chuiquid icnuec chuiquid dapa yacno nidaid utsi yacno nidendabi. Anoshon chuiquid icmiac nëmbo choaindabi,’ ¹³qeshun ambi namiaido 10ted icquido chomeshun aton na bedtequid abentse-abentsen menebamposh. Aden menebanash: ‘Ëbi nidän ëmbi meneboed bëdamboen nabanquin daëd uata ma choshon dadpen bedoapanuna,’ quianec chuiquid ictiadquiocquid abi chuiquid dapa yacno nidposh.

¹⁴“Adec aid nidambic abi yacnoquidon abi chieshënkuido nadposh: ‘Aidi ëbitedi chuiquid icmenushe qeshun chuiquid dapa yacno chuitanta,’ qeshun abëd icquido chuimenuen chuiquid dapa yacno nidmeposh.

¹⁵“Adoquai, Chuiquid icnu, quianec nidboed chuiquid icmeposh. Aden chuiquid icmiac aton shubuno choash, Con na bedtequid ðtedtsi daëd uapashba? abibi qeshun ambi meneboedo chomeposh.

¹⁶“Adoac bëyuc choquid: ‘Mitsana bedtequid abentsëc icboedi utsi 10ted icnuc daëd uaombi, icbo,’ queposh.

¹⁷“Adoquien: ‘Ëmbi meneboed abentsëc bedshun bëdamboen mimbi daëd uaque. Nëbi mimbi daëd auidtedquioibi shubu dadpen icquid 10ted uano-uanoecquido chuiquid icta,’ caposh abi chuiquidën.

¹⁸“Adnubien utsi: ‘Mitsana bedtequid abentsëc icboedi utsi 5ted daëd uapombi,’ queposh.

¹⁹“Adoquien: ‘Mimbi daëd uaidtedquioibi shubu dadpen icquid 5ted

uano-uanoecquido chuiquid icta,’ caposh abi chuiquidën.

²⁰“Adnubien utsitsen: ‘Mimbi abentsëc menetsëcboed ëmbi dashcute cuëshaidën dayun uaboed në iquec, icbo. ²¹Mitsana bedtequid mimbi tantiactedimbo daëd uatiapimbo ictsiabi, qeshun dayun uaombi. Utsin na utsin nitsinaidbidi bedbanquid mibi icsho isash chushcanushe quiaash dacuëdec tsadteniobi,’ queposh.

²²“Adoquien: ‘Ëmbi chiaid niacquid mibi neyoc. Mimbi mua uaquin chiaidtedimbochsho mibi cuidtequid iquendac. ðUtsin na utsin nitsinaidbidi bedbanquid mibi icsho isombi, ëbi chiecc quecta icco? ²³ðAden tantiaquin atotsieshun ëmbi chiaid nanuequin ëmbi meneboed daëd uamequin utsi menenquio icco? Aden meniac daëd uashun bedtsenombi,’ queposh abi chuiquid.

²⁴“Aden aton na daëd uaisa chuishumbic iccuededquido chuiquin: ‘Ëbi chieshënkun con na daëd uainquiocquin ambi dayun uaboed bedshun ëmbi abentsëc meniaid 10ted icnuc daëd uaboed meneta,’ caposh abi chuiquidën.

²⁵“Adoquien: ‘Aton na dadpen iqueque. Aid menenda, chuiquid,’ queposh iccuededquido.

²⁶“Adoquien: ‘Chuinu. Tantia. Ëmbi chiacpaden nabanquin daëd uacsho isun ëmbi meneboed daëd uaquin menembi. Ëmbi chiacpaden chieshquin daëd uainquiocsho isun ëmbi meneboed bedshunembi. ²⁷Adembidi ëbi chieshënecc abi chuiquid dapa ëbi icmete bunesho nëmbo bec cho. Bëshun ëmbi isnubi abitedi cuesuneta,’ caposh abi chuiquidën —quepanëdash Esus.

Chuiquid dapabimboec yec Edusaden yacno Esus choaid

(*Mat. 21.1-11; Mad. 11.1-11; Uan 12.12-19*)

²⁸Aden chuibanashic Esus Edusaden yacmi nidequi anoentsëqui choash

nidtuidpanëdash. ²⁹Uano macuësh Odibos caid potsembo shubu daëdpactsëc icquid Bedpaque caid icnubi shubu daëdpactsëc icquid utsi Betania caid icpanëdash. Adec nidtuidash abëd icquid daëd caic: ³⁰—Nëid podquedën nidquimbi shubu daëdpactsëc yacno choshon cabayobitsecquidën bacuë caniaid catsadabicquid tënëshaid mimbi istuidendac. Aid istuidshun tënëshaid tēchicshun nēmbo bēta. ³¹Aden chicsho isash: “¿Atotsi canun mimbi aid chicpe?” quepec. Adsho tantiashun: “Con Icbo bunaid nec,” quequin chuita —quepanëdash Esus.

³²Adoac nidshun istuidtanquin ³³cabayobitsecquidēmpi tënëshaid tēchicsho isash: —¿Atotsi canuen aid tēchique? —capanëdash icbon.

³⁴Adoquien: —Con Icbo bunaid nec —qeshun Esus yacno nimbanquin abi tënëshaidën buampanëdash Esusbëd icquidon.

³⁵Aden bëshun, Chuiquid dapa Esus nepanui, quec onqeshun Esusbëd icquidon aton dashcute bëntsecquid chictanquin cabayobitsecquid capucshun Esus catsadumpanëdash. ³⁶Aden Esus catsadunash nidnubien iccuededquidontsen aton dashcute bëntsecquid chictanquin podqued ansambanec nidanepanëdash. Chuiquid dapa Esus nepanui, qeshun aidontsen adopanëdash.

³⁷Adec nidanec macuësh Odibos caid budtuidequi iccuededquidtedimbo bēdambo iquec comapenen Nuquin Papan nadatiambocquin naid ambi isboed naden chiec comapenec onquecuededpanëdash:

³⁸—Nuquin Papan chomiaid ambi chuiquid dapa icmiaid ambi bēdambo icmiaidquiobidi nec. Nuquin Papa yacno abēdi bēdamboec tabadequi

icsaisatedi iquendac —quepanëdash iccuededquido comapenec cuëdcuededec.

³⁹Adec cuëdcuededsho tantiashun padiseyobon: —Adec onquenda, quequin mibëd icquido chuita —capanëdash Esus chuiquin.

⁴⁰Adoquien: —Ēmbi naid chiec aitedi cuëdcuededenquiocnoc cuēnote podqued cuēman samëdquido onquianendac —quepanëdash Esus padiseyobo chiec.

⁴¹Adashic, adanec nidequi Edusaden anoentsëqui choquin anocquido abi tantiesabo tantiec shubiec Esus nadpanëdash: ⁴²—Ēbi bēdambo icmequid Esus nec, quec nēbi ěbi tantiaquid mibi ictsiandac. Tanties a icquin mibi chuiquid mimbi nibēnacpadquid mimbi istuidtiapimbo iquendac. ⁴³Yuecash choquin uimanēmēnquidon mibi cuentiapimbocnoc tsicatebudcuenendac. ⁴⁴Aden mibi tsicatebudcuenshun min bacuëbōbēdtabi naimbudquin mibi unēs uashun nendac. Min shubutedi nibëdquiendac. Nuquin Papan chomiaid ěbi tanties a icsho cuidtequido mibi nendac —quepanëdash Esus. Edusaden uano icnuc abi tantiesabo tantiec unēsquio icnuc anocquido chiacbimboec adpanëdash.

Nuquin Papa tabadte shubu uashunaid yacnoshon cuemiaid

⁴⁵Adashic, Edusaden yacno choash Nuquin Papa tabadte shubu uashunaidën puduedshun nuntanshunquio aton na bedtequid bednun menebanquido Esusën cuemepanëdash. ⁴⁶Cuemec: —Nuquin Papan chuipampid nad iqueque. Tantia: “Ēbi tabadte shubu uashunaid ěbi chiec onquianete shubu iquendac,” quepampic. Aden Nuquin Papan

chuiampid icnubi ampequido tabadte shubu Nuquin Papa tabadte shubu uashunaid mibitedishun icmebededayoc —quepanëdash Esus aitedi cuemec.

⁴⁷Adoshombic,

badiadquidën-badiadquidënquieic Nuquin Papa tabadte shubu uashunaidën puduedtenequin Nuquin Papan chiaid tantiamenuhen Esusën chuibampanëdash. Anoshen chuibansho isun isadaidbo tsusiobon: ¿Mitsipadentsimbi Esus cuesunepeba? quequin caimbededpanëdash. ⁴⁸Aden caimbededquimbi Esusën chiaid tantianu quec dadpen Esus datsidadacsho isun ashunquio isadaidbon Esus cuesunemenuen bedtiapimbo icpanëdash.

¿Tсандан chuibanta caid mibi ne?

(*Mat. 21.23-27; Mad. 11.27-33*)

20 ¹Adashic, Nuquin Papa tabadte shubu uashunaidën puduedshun, Nuquin Papa yacno yuedanquid iquec, quequin Esusën chuibanubien isadaidbo tsusiobo cho-chopanëdash. ²Cho-choshon: —¿Tсандан chuibanta caid mibi neque? Tantianu. Ëbitedi chui —capanëdash.

³Adoaquien: —Ëmbia tantianu. Ëbi chui. ⁴¿Nuquin Papan ëmbi chiaid chuibanshun mentobanta caidta Uan icpondash? Padenquio mibi quenec, ¿Matesën nata caidta nepondash, quequina mimbi tantie? —quepanëdash Esus isadaidbo tsusiobo caic.

⁵Aden chiac isadaidbo tsusiobo onquecuededec nadpanëdash: —Nuquin Papan nata caid Uan pado nepondash, ëbitedi qesho tantias Esus nadpendac. ¿Atotsieshun Uanën chuisho mibitedishun tantienquio icponda?

⁶Matesën nata caid Uan pado niondash, ëbitedi qesho tantiasun

iccuededquidon cuënoten nuquitedi se-sependac. Nuquin Papan chuimiaid, Uan icpondash, quequin iccuededquidon tantiec —quepanëdash isadaidbo tsusiobo.

⁷Adec onquecuededash: —¿Tsuntsin nata caid Uan pado icpondash? quequin tantiambo iccombi —quepanëdash tsusiobo.

⁸Adoaquien: —Mimbi chienquio yacpadembi ëmbitsen ëbi chuita caquid mibi chienquio icoaimbi —quepanëdash Esus.

Neshcashunquidon icsambocquin naid

(*Mat. 21.33-44; Mad. 12.1-11*)

⁹Aden isadaidbo tsusiobo chuishumbic, Utsi chuinu, quiacimboen Esusën nadopanëdash: —Tied icbon aton tied nitsinshun aton tied cuësh-cuëshquin ambi ëbi neshcashunta caidtedi istuidash tied icbo nidposh. Nidaid utsin yuec tabadshumbic: ¹⁰“Tiedën caniquid ënden bacuëpash. Ëbi neshcashunquidën musucaid con na bedmenu,’ qeshun ambi namiaid aton tied yacno icbon nidmeposh. Nidmiac ambi bedtan caid tied yacno chosho isun cuestanquin tiedën caniquid bacuë ambi musucaid menenquiocquin abi neshcashunquidon icbon chomiaid nidmeoaposh.

¹¹Adoshombic, icbon aton tied yacno ambi namiaid utsi nidmeoaposh. Aid chosho isun adembidi cuestanquin icsamboen nashun ambi musucaid menenquiocquin icbo neshcashunquidon aidtsen nidmeoaposh. ¹²Adoshombic, ambi namiaid utsitsen icbon nidmeoaposh. Aidi chosho isun chiuë-chiuëpambocnoc cuestanquin tied tsitsuno icbo neshcashunquidon aidi netamposh.

¹³“Netamboedi nidtoanec icbo yacno choacsho isash: ‘¿Mitsipadentsimbi

napeba? Con madombobi ëbi cudasaïd con tied yacno nidmembi. Aidi con tied yacno chosho bédamboen ispec,’ quequin aton mado nidmeposh.

¹⁴“Aden nidmiac aton mado aton papan tied yacno chosho isash icbo neshcashunquido nadposh: ‘Tied icbo unësan aton natedi bedquid aton mado nepec. Aden bednushe aidi cuesunenuna. ¹⁵Aden cuesunian icbo unësan aton natedi nuquin na ictsiandac,’ quecuededshun tied tsitsuno icbon mado buanshun icbo neshcashunquidon cuesuneposh —quequin chiashic Esus:

“ ‘Min mado cuesuniosh,’ quequin utsin chiac ïatotsi tied icbon napec? ¹⁶Naden napec. Abibi aton tied yacno nidshun abi neshcashunquido cuesuneshun aton tied ambi cuësh-cuëshaid abi neshcashunquid utsibo aton tied yacno tabadmendac —quepanëdash Esus.

Adsho tantiash: —Adoenquo icpashun —quepanëdash iccuededquido. ¹⁷Adoaquien iccuededquido bëisequi Esus nadpanëdash: —ïNuquin Papan dada uamiaidën naden chienquioda icpampic? Ai, aidën chuiampid nad iquec: “Shubu uanuequidën isuidaid buintad utsin ambia nitsinaid icposh.”

¹⁸Buintad sec uebudec podquëd-podquëdendac. Adembidi buintad uebudquin matses tish-tishendac. Adembidi, abi yacno puduedmianquid tantiaidquid Nuquin Papan cuëshëdmiac comapen cuidte yacno tabadendac —quepanëdash Esus.

¹⁹Aden Esusën chuisho tantiash: —Nuqui naid chiacbimboen chiec Esus niosh —quiash isadaïdbo tsusiobo Esus bedte buncuededquin iccuededquid dadpen icnuc Esus bedtiapimbo icpanëdash.

Sesadën shocoshëmpi neque.

Mene, quequin chiaïd

(Mat. 21.45-46; 22.15-22; Mad. 12.12-17)

²⁰Adec Esus bedte bunquin isadaïdbo tsusiobon ambi Esus ista caïdo Esus yacno nidmepanëdash. Ambi ista caïdo, Bëdambocquid nebi, quequin ismiac bimboecquid icsho Esusën chuibanacno tsusiobon nidmepanëdash. Esus yacno nidshun ëmbi ista caïdon chuimiac Esusën icsamboen chuitsiash. Aden chuisho isadaïdpembo ancaquidën Esus bedpashun, quequin tantiaquin nidmepanëdash. ²¹Aden nidmiac choash Esus ista caïd abentsëc: —Mimbi tantiamequin chuibanaïd bédambo iquec, quequin tantiembi, Abitedi Nuquin Papan chiaïd abimbo chuibanquid mibi nec. ²²Adquid mibi icquin ëbi chui. Tantanu. ïAncanquid Sesad cuëmëdquid isadaïdpembo icquin ambi piucquid shocoshëmpi bec cho caïd isadaïdbon menetiadquidida nepec? —quepanëdash isadaïdbo tsusiobon ista caïd Esus caic.

²³Aden chuisho tantiashun choboedën icsamboen tantiaïd tantiaquin Esusën nadopanëdash: ²⁴—Piucquid shocoshëmpi ancanquidën bec cho caïd sananquin abuc cadota —cac sananquin abuc cadosho isash: —ïTsuntsin podobitsi dada uaid aidën icpec? —quepanëdash Esus.

²⁵Adoaquien: —Ancanquid Sesadën na nec —quepanëdash tsusiobon ista quequin chomiaïd.

Adoaquien: —Ancanquid, Bec cho, qesho meneta. Nuquin Papan naden nata cac adobanta —capanëdash Esusën. ²⁶Aden chiac, Bëdamboen tantiaquid bimboec onquec, quequin tantiaquin icsamboen chuimetiapimbo yec tsusiobon chomiaïd otacquo tabadcuëdedpanëdash.

**Uincuen uaid chido bedesa nec,
quequin chiaid**

(*Mat. 22.23-33; Mad. 12.18-27*)

²⁷Adashic, saduseyobo caido yec
²⁸unësaid uincuen uate nibëdec quequin
chuiquido Esus yacno chopanëdash.
Aido choash: —Unësaidën chido
bedshun aidën tishmiaid unësaidën
bacuëbobimboecquid iquendac, quequin
Moisesën dada uapampic. ²⁹Aden
Moisesën dada uaid icnuc dada 7ted
iccuededposh. Aidedtada icnuc bëyuc
tishaidën aton chido bedshun bacuë
tishmiabi yec unësposh. ³⁰Aton buchi
unësan aidën chido bedash adecbidi
bacuë tishmiabi yec unësoaposh aton
utsi. ³¹Adembidi, bëyuc tishaid
tsibanquidën-tsibanquidënquien chido
abentsëqui bedto-bedtoec bacuë
tishmiabi yec unësbuneposh. ³²Yuecash
chidotsen unësoaposh. ³³Adec chido
abentsëcshun bënë dadpen icboedi
uincuen uate ushë icnuc ðmitsicquid
chidon bënë icpeque? Èbi chui.
Tantianu —quepanëdash saduseyobo
Esus caic.

³⁴Adoquien: —Nidaidënshun dadan
aton chido bedec. Adecbidi, Min
bënëbëd nidta, quequin aton papan
chiac aton champi aton bënëbëd nidec.
³⁵Uincuen uate ushë choan Nuquin
Papan bëdamboen isaïdo abëdi
tabadquin chido bedenquio iquendac.
Adembidi, aton champi menenquio aton
papan iquendac. ³⁶Adecbidi, Nuquin
Papan uaido mayan bëdabo unësesa
yacpadquiequi Nuquin Papan uincuen
uatequid unësenquio iquendac. Nuquin
Papan uincuen uatequido aton bacuëbo
nendac. ³⁷Adembidi chuinu. Tantia.
Cuëtempi nëdënquiacbimboecquid isun
Moisesën dada uapampid nec. Cuëte
nëdënquiacbimboecsho isun Nuquin
Papa chuiquin nadopampic: “Tsusedpa

Abadauanën papa cain cuënaid mibi
nec. Adecbidi tsusedpa Isaquën papa
cain cuënaid mibi neoaic. Adecbidi
tsusedpa Acobon papa cain cuënaid
mibi nec,” quequin Moisesën
chuiampic. ³⁸Moisesën tsusedpabo
ambi chuiboed ënden unësampidën
nami chodquaidën papa cain Nuquin
Papa cuëntiapimbo iquec. Aton nami
chodquiash abi tantiaquidquio icquin
tantiec tsadquidën papa cain Nuquin
Papa cuë nec —quepanëdash Esus
saduseyobo chiec.

³⁹Aden Esusën chuïsho tantiaish
Nuquin Papan naden nata quequin
chiaid tantiamequid padiseyobo
utsi-utsiec nadpanëdash: —Bëdamboen
mimbi chuiabanoc —quepanëdash Esus
chiec. ⁴⁰Aden Esusën chuïsho tantiaishun
Esus chuimetiapimbo utsibo icpanëdash.

¿Tsuntsin mado Quidistu nepec? quiaid

(*Mat. 22.41-46; Mad. 12.35-37*)

⁴¹Aden utsibon abi icsamboen
chuimetiapimbo icsho isun Esusën
nadopanëdash: —Èbi abia yampid icsho
ðmitsipadentsi tantiaquin tsusedpa,
Dabidën mado Quidistu caid nec,
quequin matsesën chuipec? ⁴²Dabidën
ambibi Sadmo caid dada uaquin naden
chuiampic:

“Icbo utsi yec con mado mibi
chiembique. Tantia, quequin
chiec icbo dapa nadpampic:
“Èquë con dayun abiucquio cainec
tsadec cho

⁴³ma mibi chieshënquidtedi mimbi
namiaid ma icpanu,”
quequin Nuquin Papan Esus chiaid
Moisesën dada uapampid nec. ⁴⁴Aden
Dabid padon dada uaquin
ðmitsipadomboentsibi con icbo
cashumbi con mado ëbi caoapampic
Dabidën? —quepanëdash Esus abi
chieshënquido caic.

**Naden nata quequin chiaid
tantiamequidpadquid iquenda,
quequin chiaid**

(*Mat. 23.1-36; Mad. 12.38-40; Duc. 11.37-54*)

⁴⁵Aden chuishun iccuededquidon tantianubi abëd icquido Esusën nadopanëdash: ⁴⁶—Nuquin Papan naden nata quequin chiaid tantiamequidpadquid iquenda. Aido ancanquidbimboecsho utsibon ispashuni quequin nabanesa dasiuidacpadec dashcute ënapen icquid dasiuidcuededpec. Adomboembidi tantiec matses dadpen iccuededacno nidash capuequi, Èbi bëquedquidon ëbi chuiquid dapabimboecsho isash onquequin chuipashuni quec tabadec. Adomboembidi tantiec Nuquin Papan chiaid chuibante shubun puduedash, Tsusio dapabimboecsho ispashuni, quec tsusiobo tsadacno tsatdenec. Adomboembidi tantiec, Pec cho cac chosho isash chuiquid dapabimboecsho ispashuni, quec tsusiobo tsadacno tsatdenec. Adquidpadquid iquenda. ⁴⁷Aidon bëdamboen nabanacimboen nianten natedi bedbanec. Aidombidi Nuquin Papa abimbo tantiacimboec yuen chiec onquec. Aden bëdamboen nabanacimboecquido Nuquin Papan comapenen cuidendac. Adoesa bëdiactscëc cuidendac —quepanëdash Esus abëd icquido chiec.

Nianten piucquid shocoshëmpi meniaid
(*Mad. 12.41-44*)

21 ¹Adashic, Nuquin Papa tabadte shubu uashunaid yacno tabadtuidash tsadquin Esusën isbampänëdash. Ambi isaido Nuquin Papa tabadte shubu nacnemete cuidnu, quequin menequin aid shubun shocosh tabëcaidën aton na bedtequid utsin-utsinquien sandobededpanëdash.

Aton na bedtequid dadpen icquidon dadpen sandobededsho isquimbi ²nianten aton na nibëdquidëmbi aton na bedtequid shocosh daëd ictsëcquid sandosho ispanëdash. ^{3,4}Adosho isash: —Chuinu. Tantia. Nianten aton na bedtequid abitedimbo sandoposh. Adosho, Dadpen menequid nec, quequin Nuquin Papan niante isec. Utsibon aton na dadpen abi icnubi dadpen menesho, Daëdpackscëc menequido nec, quequin Nuquin Papan aido isoaic —quepanëdash Esus.

**Abitedi naimbudte ushë
choec quequin chuite**

(*Mat. 24.1-35, 42-44; Mad. 13.1-37*)

⁵Adashic, Nuquin Papa tabadte shubu uashunaidbëdtabi matsesën dectanaid didiquesho isec: —Nuquin Papa tabadte shubu bëdaidquio iquec —quepanëdash utsibo.

⁶Adoquien: —Mimbi nëbi isaid yuecash nибëdquidendac. Matses utsibon nëid shubutedi chic-chicbudendac —quepanëdash Esus.

⁷Adoquien: —¿Mitsipadën Nuquin Papa tabadte shubu uashunaid chic-chicquin tauapec? ¿Aid ushë anoentsëqui yanuc mitsipadquid ismiantec icpeque? Tiantianu. Chui —quepanëdash utsibo.

⁸Adoquien: —Cho-choshon muaquin chuisho tantienquiocta. Adquid cho-choash: “Nuquin Papan Chomiaid Quidistu nebique. Èbëd iquec cho,” queded-quededendac. Aden chuiquid tsibanenda. ⁹Adecbidi: “Cuesnancuededec,” qesho tantiashtu dacuëndenda. Nuquin Papan chiampicpadequi cuesnancuededteba iquendac. Aid icnubi abitedi naimbudte ushë badedquio choenquio iquendac —quepanëdash Esus.

¹⁰Aden chiequi abi onquebudec: —Adecbidi, abi ancaquid dapan nidmiac nidaid utsin icquidobëd cuesnancuededendac. ¹¹Adecbidi, nidaid utsi-utsiec yacno canchednuec ishchud-ishcudendac. Adecbidi, utsi-utsiec yacno bunquieste iquendac. Adecbidi, utsi-utsiec yacno daicsabudnete iquendac. Adecbidi, mibi dacuëdmetequid iquendac. Adecbidi, mimbi isacmaid abucueësh natiambo icsho mimbi isbededendac.

¹²“Aidtedi choabicnuc ëbi tantiaquid utsi-utsien bedshun mëyanendac. Adobanshumbic, Icsamboen naquid nec, quequin muaquin icsaquid cuidnuequid yacno mibi buanendac. Utsi-utsien ancanquid yacno buanac ¹³aidotsen tantiaquid yantsiash qeshun ëbi chuibanta. ¹⁴Aden buanaqui, ¿atotsimbi ancanquid cape? quequin tantiec tsadenda. ¹⁵Nuquin Papan Mayanën tantiamiacpadomboen mimbi chuibanendac. Adoac, Icsambocquid mibi nec, quetiapimbo mibi chieshënkuido iquendac. ¹⁶Adembidi, Nuquin Papan chiaid tantiesan min shubun icquidën mibi bedshun cuidnuequid yacno buanash: ‘Cuidquin cuesuneta,’ quependac. Aton papambi adotsiash. Animbi aton mado adembidi adotsiash. Utsi aton buchimbi adoatsiash. Utsi aton chuchumbi adoatsiash. Utsin abëdtan isedquidëmbi adoatsiash. ¹⁷Ëbi tantiaquid chieshënkuid dadpen iquendac. ^{18,19}Aden nabanquin mibi cuesunemenu, cac chieshenquo yec, Esus tantiaquid nebi, quequid icta. Adquid iquec unësash ënëdenquo yec Nuquin Papabëd mibi tabadendac.

²⁰“Adecbidi shubu dadpen icquid Edusaden caid yacno cuesanquid dadpen cho-choshon tsicategudsho isash, Edusaden yacno naimbudte ushë

choec, quequin mimbi tantiendac.

²¹Aden tantiec ma Cadidia yacnocquido macuësh dapa yacno cuempanuna. Adecbidi, Edusaden yanocquido ma auëshquo cuempanuna. Adecbidi, dëuequido Edusaden yacno ma nidenquiocpanuna. ²²Aid ushë icnuc Nuquin Papan chiacpadomboen cuidtequid iquendac. ²³Aid ushë chonoc matses utsibon Edusaden yacno tsicategudac pete naimbudnuc bacuë usunquidobëd bacuë chishmequido mëyadec natiaquendac. Edusaden yacnocquido abi tantiesabo icsho Nuquin Papan natiambocquin cuidte iquendac. ²⁴Edusaden yacnocquid utsi-utsien chështen cuesendac. Utsi-utsien bedshun nidaid utsi yacno buanshun matses utsibon yuatequido iquendac. Isadaidpembo Edusaden yacno tsicategudo Edusaden yacno tabadendac. Nuquin Papa, Chën, quenquiocnoc adec tabadendac. Chën, quenuc nidendac.

²⁵“Adec Nuquin Papa, Chën, quian badiadën ushë, inchëshën ushë uispa chedo aidtedi ambi nadatiambocquin naid ismiantequid iquendac. Aid ismiente icsho isash, Uinsadpambo iquec, quec comapenec dacuëdec matsestedi tabadcuededendac. Acte natiambo chëuëdsho isash adquiecbidi comapenec dacuëdec matsestedi tabadcuededoaindac. ²⁶Adecbidi, uispa utsi-utsiec paëdted-paëdtednubi utsi-utsiec tididiquendac. Adsho isash matses dacuëdec padishendac.

²⁷Adnubini Nuquin Papan chomiaid matsesaid ëbi dasiuidaid bëchomauanquiec ushë chënquiacbimboec uëshëmbo yec nadatiambocquin nabanquidquo abu ushun ëbi budsho matsestedishun isbededendac. ²⁸Natiambocquin naid tauadoacscho isun, Nuquin Papa yacno

ëbi yuedte ushë chote anoentsëqui yanec, quequin bédambocquin abuc isteneta —quepanëdash Esus.

²⁹Aden chuishumbic ambi chuiboed ushë chote tantiamenuen nadopanëdash: ³⁰—Cuëtempî bacuëacsho isash, Ënden suc seccuduquiac nëbi seta taëec, quequin matsesën tantiec. ³¹Adembidi ëmbi chuiboed icsho isun, Nuquin Papabëd tabadte ushë choec, quequin mimbi tantiec. ³²Abimbo chiembique. Tantia. Ëmbi chuibamboed naimbudabicnuc con tan matses isadaidbo naimëdbudenquo iquendac. ³³Abubëdta naimbudtequid nidaid nendac. Ëmbi chiaid abimbo iquendac.

^{34,35}“Adembidi chuinu. Tantiata. Nidaidën capuquidën, Nëbi ëbi sec, quequin tantienquo yec capusho badedquo siac cuentiapimbo iquec. Adembidi, Natiata ushë choec, quequin tantienquo yec chieshquin badiadquidën-badiadquidënquien paëmbocquid actenepec. Adecbidi aton na bednuec abi buntequiduidi tantiec tabadpec. Adobanubien aid ushë choendac. ¿Matsestedî cuidte ushë choenda ictic? Ai, aid ushë choendac, quequin caimbudec bédamboec tabadta. ³⁶Ënenquiocquin aid ushë chote caimbunec tabadquin Nuquin Papa naden chuidoneta. Chieshmane mibi tantiaquidquo ëbi icme, Papa. Adembidi natiambocquin cuidte ushë chonoshe qeshun ëbi mënchicta, Papa. Aid ushë chonoc ëbi bedshun mimbi chomiac matsesaidën dayun tsadquidquo ëbi icmeta, Papa, quec onquedeneta —capanëdash Esusën.

³⁷Aden chuishumbic, badiadquidën-badiadquidënquien Nuquin Papa tabadte shubu uashunaid yacno nidshun matses tantiamenuen Esusën chuided-chuidedpanëdash.

Adecbidi inchëshquidën-inchëshquidënquiec macuësh Odibos caid yacno nidash tabadtenepanëdash. ³⁸Adembidi, badiadquidën-badiadquidënquien Esusën chuibansho tantianuequido Nuquin Papa tabadte shubu uashunaid yacno choded-chodedpanëdash.

Esus bedmenu, quequidquo Udas

(Mat. 26.1-5, 14-16; Mad. 14.1-2, 10-11; Uan 11.45-53)

22 ¹Adashic, nami uabicquid pete tantiate ushë, Pascuas caid, anoentsëqui yampanëdash. ²Aid ushë choabicnuc isadaidbo tsusiobobëd Nuquin Papan naden nata quequin chiaid utsibo tantiamequido iccuededtenequin, ¿Mitsipaden Esus bedshun cuesuneque? Isnu, quequin isted-istedpanëdash. Aden isted-istedtanquin Esus tantiec datsidquido dadpen icsho isash dacuëdquin Esus bedenquo icpanëdash. ³Adnubien Udas cashumbic Iscadiote caid Esusbëd icquid dapudedshun Satanasën tantiamiac ⁴Esus chieshëncquid yampanëdash. Adquid yanash padiseyobo tsusiobo yec isadaidbo tsusio utsibo yec Nuquin Papa tabadte shubu uashunaid isquido yec quec Esus chieshëncquid utsibo iquec quianec aido yacno Udas choash, Esus bedmete bunebi, quequin chuipanëdash. ⁵Aden chiac isadaidbo tsusiobo bédambo iquebi quetanquin: —Esus bedmiacsho mibi piucquid menenu —capanëdash Udas chuiquin. ⁶Adoquien: —Adonuna —quianec Esus yacno nidoash abëd capuquimbi Esus tantiec datsidquido nibëdacnoshon abi chieshëncquido, isadaidbo tsusiobo, Esus bedmimbi, quequin isted-istedpanëdash Udasën.

Ënquin nidaidëshun Esusën pebanaid

(*Mat. 26.17-29; Mad. 14.12-25;
Uan 13.21-30; 1 Cod. 11.23-26*)

⁷Adnubien, nami uabicquid pete tantiate ushë chopanëdash. Aid ushën isadaidbon bëyuc tishaid bacuë unës uanushe qeshun obeca bacuëded cuesuneshun shubu shëcuë ëcnoshcaid isun unës uainquocquin Nuquin Papan uaido mayan bëdabon matanampid tantiate ushë icpanëdash. ⁸Aid ushë chonoc Uambëdta Petedo chuiquin: —Matante ushë tantianuequin obeca bacuë cuesuniaid penun nacnenta —capanëdash Esusën.

⁹Adoaquien: —¿Mitsishumbimbi aid nacnempe? —quepanëdash Uambëd Petedo.

¹⁰Adoaquien: —Nëbi shubu daëdpactsëc yacno nidshun matsun acte bëquid dada mimbi bëquedendac. Aid bëquedshun tsibananc shubun aid puduedacno nidshun ¹¹shubun puduedabi naden shubu icbo chuita: ¿Mitsishumbimbi matante ushë tantiaquin ëbëd icquidobëdtañ pepe? quiosh Esus, quequin chuita. ¹²Aden chiac abuc dectatoshon abuc quënëcquid mibi aidëmbi ismendac. Ashunquio penun nacnenta —capanëdash Esusën.

¹³Aden Esusën chiac nidaneshun Esusën chiacpadomboen istuidshun matamepampid ushë tantiaquin penun Uambëdtambi Petedon nacnempanëdash.

¹⁴Adashic, inchëshën choash abëd icquidobëd pete sante cuate dayun uequi Esus: ¹⁵—Ëbi mëyante yanabicnuc bëyuc tishaid cuesunianquidën cuesunenquiocquin matanampid tantiaquin pec mibëdi tabadtiadquio yanobi. ¹⁶Matanampid tantiaquin obeca cuesuneshun nuqui pebocpadomboen

mibëdtambi nidaidëshun padpiden penquio iquendambi. Matses icsaquid icsho cuidnushe qeshun obecaded cuesuniaidpadquiocquid yanshun Nuquin Papa yacno choash tabadquidobëdtambi ashunquio pendambi —quepanëdash Esus.

¹⁷Adoshombic dëshote sananc Nuquin Papa chiec onqeshun actanquin abëd icquido menec: —Në, aniactse-aniactsen acban mibitedishun.

¹⁸Tiedën caniquid ënë nidaidëshun padpiden aquenquio iquendambi. Nuquin Papa yacno choash tabadquidobëdtambi ashunquio aquendambi —quepanëdash Esus.

¹⁹Adoshombic, pete bedshun Nuquin Papa chiec onqeshun cuësh-cuështanquin menebanquin: —Mibi icsaid bedshunacsho ëbided cuidquin mëyanquin cuesuniaid tantiaquin pebeded —capanëdash Esusën.

²⁰Adoshombic pete utsi petanquin dëshoten sicaid cushtoshon menec: —Ënden, Icsambocquin naombi, qeshun obecaded cuesunemenuen isadaidbon menedeniac. Aden cuesuniaidën intac siquec unëso isun, Obeca cuesuneboed ëbi icsaquid icsho cuidnushe qeshun cuidtequid nec, quiampicpaden abi chiec. Padnuen nëbi unës uashun siac aton intac siquec matses icsaid bedshunash Esusded cuidadac, quequin tantiatequidquio nendac. ²¹Ëbi chieshënquido ëbi bedmenuequin chuiquid pete sante dayun ëbëdi uec. ²²Nuquin Papan chiampicpaden ëbi matsesacsho unës uaid iquendac. Ëbi chieshënquido bedmenuequin chuiquid comapenen cuidte iquendac —quepanëdash Esus.

²³Aden Esusën chuisho tantiañ abëd icquido: —¿Midacquidien capec? —quecuededpanëdash.

²⁴Adashic: —Dosedet nuqui iquec. ¿Tsudain chuiquid icpec? quequin utsibon ispec —quepanèdash Esusbèd icquido.

Aden chuitanec, Chuiquid nec, quequin utsibon èbi ispec, Esusbèd abitedi nèishash comapenec chushcanampanèdash. ²⁵Adec chushcanansho tantias Esus nadpanèdash: —Isadaidpempo ancaquidèn comapenen aton matses namebanquin daèdpactsèc menebanec. Aden meneshun, Èmbi namiaido bèdambo icmequid nebi, quequin muaquin chiec. ²⁶Mibitedi adquid iquenda. Nadquidquio icta. Chuiquid nebi, quec tsyuec caniquidbimboecquid icta. Chuiquid icquin utsi namiacpaden nabanta. ²⁷Abi pemequid abi nashunquid nec. Adembidi pec tsadquid utsibo chuiquid nec, quequin utsibon ispec. Aden tantienda. Nèbi mibèdi pec tsadequi mibi nashunquid nebi. ²⁸Èbi chieshèquido icnuc èbi nianesa ²⁹icsho con Pan èbi chuiquid icmiacpadquid chuiquid mibitedi icmendambi. ³⁰Aden chuiquid icmiac èbèd icquin èbèdtambi peshun aquec mibitedi tabadendac. Chuiquid icquin abuc tsadte icquidèn tsadquin isadaidbon naid bèdabèdta ambi naid icsa cuidte èbèdtambi mimbi chuibanendac —quepanèdash Esus abèd icquido caic.

**Esus èmbi isacmaid nec,
quequin Petedon chiaid**
(*Mat. 26.31-35; Mad. 14.27-31;
Uan 13.36-38*)

³¹Aden chuishumbic Esusèn nadopanèdash: —Mibi chuinu. Bèdamboen tantia, Simon. Mibitedi Satanasèn yuatiadquio iquec. Aden yuanuequin piacbo macuesquin nainshun bitsi secacimboen mèyantankuin èbèd icboedi mibi

cuèshèdmetiadquio iquec. ³²Aden mibi Satanasèn yuatiadquio iquec, quequin tantiaquin Nuquin Papa naden chiombi. Simon èbèd icquidquio iqueque. Yuadnushe qeshun Satanasèn niac-niacmete chiaid Petedo tantienquio icmeta, Papa, quequin chiombi. Adec èbèd icboedi cuèshèdtsembosh choashun comapenen èbi tantiaquin èbèd icquid utsibo adomboebidi comapenen èbi tantiameta, Simon —capanèdash Esusèn Petedo chuiquin.

³³Adoquien: —Mibi caic, Quènèn nauednu, quenuc mibèdi nauedadebi. Adecbidi mibi caic, Unès uanu, quenuc adecbidi mibèdi unès uadebi, Icbo —quepanèdash Petedo Esus caic.

³⁴Adoquien: —Chuinu. Tantiata, Petedo. Cachina bènè cuèdanabicnuc nèid inchèshèmbi, Esus èmbi isacmaid nec, mibi queded-quededendac —quepanèdash Esus.

**Buanenda, queboedèmbi,
Buanta, quequin chiaid**

³⁵Aden Petedo chuishumbic abèd icquidtedi chuiquin: —Mitsana bedtequid buanenquio yec shictoade buanenquio yec dashcute utsi buanenquio yec quec nidaneta, èmbi cac nidash ùmibitedi bunecta tabado? —capanèdash Esusèn.

Adoquien: —Padenquio —quepanèdash abèd icquido.

³⁶Adoquien: —Ènden adquid buanenda, queboedi, Èbi nibèdnuc mitsana bedtequid shictoadebèdtabi buanta. Chèshte bednu, qeshun mitsana bedtequid nibèdnuc min dashcute abentsèc menequin chèshte bedshun adembidi buanta, caimbi nèbi.

³⁷Nuquin Papan èbi chuiquin dada uamiampid nad iqueque. Tantia. Chuinu: “Icsamboquidbèdta unès uaindac,” quepampic. Aden Nuquin

Papan ëbi chuiquin dada uamiampicpadomboëmbi nëbimbobi naimbudëmbi —quepanëdash Esus.

³⁸Adoquien Esusën chuiboed tantienquo yec abëd icquido: —Në, chështe daëd iqueque. Is, Icbo —quepanëdash.

Aden abëd icquidon tantienquiocsho isash: —Ai, padi —quepanëdash Esus.

Macuësh Odibos caid yacnoshon Esusën Nuquin Papa chiaid

(*Mat. 26.36-46; Mad. 14.32-42*)

³⁹Adashic, Edusaden caid yacnoësh macuësh Odibos caid yacno abi nidteniäpadën nidnuc abëd icquidon tsibanampanëdash. ⁴⁰Adec nidequi abi tabadteniäcno choshon Esusën: —Chieshëmënkuidën ëbi namete bunäcpaden natiäpimbocquid ëbi icme, Papa, quequin Nuquin Papa chuideneta —capanëdash abëd icquido chuiquin. ⁴¹Aden chiashic äbiuidtsëqui uano nidash danëshën nidäidën sebudash Nuquin Papa chiec nädëc yuec Esus onquetan-onquetampanëdash: ⁴²—Mëyanquin mibi unës uanu, ëbi chieshënkuidon casho tantiash bunenquo yec, Adoenda, quepatsiac mibi Papa. Adoshombic mibi bunäcpadomboen nameta, Papa —capanëdash Esusën Nuquin Papa chuiquin. ⁴³Aden Esusën bädëd-bädëdqüien chuishobi Nuquin Papan uaid mayan bëda choshon Esus chieshtomenquo icpanëdash. ⁴⁴Aden uidën uäqui ädec uëshquec Nuquin Papa chuiquiequi ichäcbëd intacash nidäidën siquepanëdash.

⁴⁵Aden Nuquin Papa chiashic nidtoash abëd icquido yacno choäquimbi ämbi chuisho tantiäboed tantiec uimäbudash ushec uesho istuidshun: ⁴⁶—Ätotsi quiash ushe? Nidtosshon ëbi chieshënkuidën nametiädqüo yäcpaden natiäpimbocquid ëbi icmeta, Papa, quequin ädenuidi

Nuquin Papa chuideneta —capanëdash Esusën abëd icquido chuiquin.

Esus bedaid

(*Mat. 26.47-56; Mad. 14.43-50; Uan 18.2-11*)

⁴⁷Adec Esus onquenubien Esusbëd icboedi, Esus bedmenu, quec bëyucanec matses dadpen bëec Udas chopanëdash. Adec choquimbi äbi tanchoccanuesho isash: ⁴⁸—ÄËbi matsesäid icsho bedmenuen tanchoccaquinda ëbi chieshënkuido isme, Udas? —quepanëdash Esus.

⁴⁹Aden Udasën nac Esus bednuesho isash Esusbëd icquido: —ÄCho-choquido nuquida cüesten cüespe? —quec ⁵⁰onquetanquin äbentsëcshun isädaidbo tsusio dapan yuan pabiäte opioc pateshunëpanëdash.

⁵¹Adosho isash: —Padi. Chën. Adoenda —quetanquin Esusën tsusio dapan yuan pabiäte patiacno mishquin bädamepanëdash.

⁵²Adoshombic, isädaidbo tsusio däpabo Nuquin Papa tabädte shubu uashunaid isquido tsusiobobëdta tsusio utsibo caic: —ÄMatses cüeshëdmequid nec, qeshunda utsin-utsinqüien chështe sananubi utsin-utsinqüien cüeste sananec cho-chopec?

⁵³Bädiädqüidën-bädiädqüidënküiec Nuquin Papa tabädte shubu uashunaid yacno icsho ëbi bedenquo mimbi icpoc. Mimbi ëbi bedte ushë nëidqüiobi nendac. Satanasën tantiämiäcpaden utsibo ismenqüiocquin inchëshëmbi mimbi icsa uänuen ëbi bedendac —quepanëdash Esus.

Ëmbi isacmäid nec, Petedo quiaid

(*Mat. 26.57-58, 69-75; Mad. 14.53-54, 66-72;*

Uan 18.12-18, 25-27)

⁵⁴Aden mimbi icsa uänuen näindac, quequin Esusën chiacsho bedanquin isädaidbo tsusio dapan shubu yacno

Esus buanubi Petedo uano tsyuec chopanëdash. ⁵⁵Adec choec umanuc cuëte dêtsiadaoid cuëec utsibo tabadacno Petedo cuëte cuëc tsadpanëdash. ⁵⁶Ambo Petedo tsadsho isash tsusion yuaid chido anoentsëqui choshon bëdamboen isec: —Nëid bëboedbëd icboedi nec —quepanëdash.

⁵⁷Adoaquien: —Bëboed ëmbi isacmaidquo nec —quepanëdash Petedo.

⁵⁸Adashic, yuecpactsëcshun Petedo isec utsitsen: —Ma mibi bëboedbëd icquid neyoc —quepanëdash.

Adoaquien: —Aidbëd iquenquo iccobi —quepanëdash Petedo.

⁵⁹Adashic yuec-yuecpactsëc ictanec utsitsen: —Nëid Cadidia yacnoshon tishaid iquec. Ma bëboedbëd icquidi neyoc —queopanëdash.

⁶⁰Adoaquien: —Mimbi chiaidbëd icquidpenquo nebi —quepanëdash Petedo. Aden chuinubien cachina bënë cuëdampanëdash. ⁶¹Adec cuëdanubi aton Icbon bidiadshun Petedo bëspanëdash. Adosho isun: “Nëbi, cachina bënë cuëdanabicnuc, ëmbi isacmaid nec, quequin tedesteden mimbi chiendac,” quequin aton Icbon chuiboed tantiash ⁶²unësqiuo yec umanuc nidash Petedo shubiquiopanëdash.

Esus sondadon mamëshunaid

(*Mat. 26.67-68; Mad. 14.65*)

⁶³Adshumbic Esus cuenushe qeshun abi isquidon, sondadon, Esus mamëshumbedequin cuesbededpanëdash. ⁶⁴Adoshombic, dashcute cuëshaidën bëpucshun cuestanquin Esus sondadon nadopanëdash: —Mibi tantiaquidquo icquin ðmidaquidën mibi nëbi cuesequë. Tiantianu. Chui —capanëdash Esus chuiquin. ⁶⁵Aden cuesbededquin Esus icsamboen chuipanëdash.

Isadaidbo tsusiobo yacno Esus buanaid

(*Mat. 26.59-66; Mad. 14.55-64;*

Jan 18.19-24)

⁶⁶Adshumbic badiadnubi isadaidbo tsusiobo iccuededacno Esus buanshun ⁶⁷nënantanquo nidtomesho isash: —Nuquin Papan chomiaid, Quidistu caid, nebi, quecta ique? Tiantianu. Chui —quepanëdash isadaidbo tsusiobo Esus caic.

Adoaquien: —Ëmbi abimbo chuisho mibitedishun tantienquo iquendac.

⁶⁸Adembidi, ðMitsipadquidquo Nuquin Papan chomiaid neque? Tiantianu. Èbi chui, cac ëcbedenquo mimbi iquendac.

⁶⁹Nad iqueque. Chuinu. Tiantia.

Matesash nidaidën tabadboedi ambi nadatiambocquin naidënquo Nuquin Papan dayunquo tsadendabi —quepanëdash Esus isadaidbo tsusiobo tantiamequin chiec.

⁷⁰Adoaquien: —ðNuquin Papan madombobi nebi, quequinda chio? —quepanëdash isadaidbo tsusiobo Esus caic.

Adoaquien: —“Esus Nuquin Papan madombobi nec,” quequin abimbo chuiquid mibi nec —quepanëdash Esus isadaidbo tsusiobo caic.

⁷¹Adoaquien: —Nuquin Papan madombobi nebi, quequin ambibi chiec Esus muc nec. Aden chuisho icsambo iqueque. Unës uatiad, quequin tantiashun, Esus icsaosh, quequin chuitiadquiocquin chuita, cainquo iquembi utsibo chuiquin. Adquid iquec, quequin nuqui tantiec —quepanëdash isadaidbo tsusiobo.

Pidato yacno Esus buanaid

(*Mat. 27.1-2, 11-14; Mad. 15.1-5;*

Jan 18.28-38)

23 ¹Aden ambibi chiec Esus muc nec, isadaidbo tsusio abentsëc qesho tantiash isadaidbo tsusiobotedi

nidtoshon Esus bedshun Pidato yacno buampanëdash. ²Aden Pidato yacno Esus bëec choash: —Esusën chuibansho tantiash, Cuëshëdmianquid nec, quequin mibi yacno bëombi. Nëid ancanquid dapa Sesadën, Shocoshëmpi bec cho, cac menenda quiosh. Aidbidi, isadaidbo chuiquid dapa nebi, quiosh —quepanëdash isadaidbo tsusiobo Pidato chiec.

³Adoquien Pidato: —¿Isadaidbo chuiquid dapada ne? —quepanëdash Esus caic.

Adoquien: —Mimbi chiaidquio abimbo iquec —quepanëdash Esus.

⁴Adsho tantiash: —¿Atotsi nashoembi cuidpe? Ambi icsamboen naid nibëdec —quepanëdash Pidato isadaidbo tsusiobo chiec.

⁵Adoquien: —Ambi tantiamiaidënquio Cadidia yacnocquido nëishmiac comapenec cuëdcuededosh. Anoshon tantiameshumbic Edusaden yacno choshon adomboemibidi tantiameoaposh —quepanëdash isadaidbo tsusiobo Pidato caic.

Edodes yacno Esus buanaid

⁶Aden chuisho tantiash: —¿Nidaid Cadidia yacnoësh choquidta Esus nec? —quepanëdash Pidato.

⁷Adoquien: —Ai. Cadidia yacnoësh choquid Esus nec —quepanëdash. Aden chiac Esus ancaquid Edodes nec, quequin Pidaton Edodes yacno Esus buamepanëdash Edusaden yacno Edodes choash tabadec, qesho tantiashun.

⁸Aden Edusaden yacno abi yacno bëacsho isash Edodes, Yuen Esus iste bunec nëbi bëdambo iquebi, quequin ëquëducshun tantiapanëdash. Nadatiambocquin nabanquidquio nec, quequin isquidon chiac Edodes Esus isec, Nadatiambocquin napashun. Isnu,

quequin ambibi tantiec ⁹Esus chuimenu quec Edodes onquepanëdash. Adoquien Esusën ëcbedenquio icpanëdash.

¹⁰Adnubien isadaidbo tsusiobo: —Esus icsambocquid nec —quepanëdash comapenec onquec Edodes chiec.

¹¹Adoac Edodesbëd sondado Esus icsamboen chuiquin mamënshumbedeshumbi chuiquid dapan dashcutebimboecquid abichobicquid Esus dasiunshun Pidato yacno buameoapanëdash. ¹²Mimbi tantiacpaden Esus cuidta, quequin Pidato chuita, quequin Edodesën chuitanquin Pidato yacno Esus padpiden buamepanëdash. Adoac Edodesbëd Pidato bëdambo yampanëdash.

Esus cuesten dectameta quiaid

(*Mat. 27.15-26; Mad. 15.6-15;*

Uan 18.39-19.16)

¹³Adashic, isadaidbo tsusiobobëdta isadaidbo utsibo chomeshun ¹⁴Esus ismetanquin Pidaton nadopanëdash: —Nëid dada bëash: “Cuëshëdmianquid nec,” quequin mimbi ëbi chioc. Adoac aidbëdi onquiash, ¿Cuëshëdmianquidta nedic? quendabi. ¹⁵Aden ëmbi tantiacpadomboen tantiaquin Edodesën ëbi yacno chomeoaposh. Esus unës uainquioctiadquidi nec. ¹⁶Aden tantiaquin mëyanshun aidi nidmenuna —quepanëdash isadaidbo tsusiobo caic.

¹⁷Aden chiac naden isadaidbon tantiapanëdash. Setan-setanquien icsambocquid con matses quënën nauedaid abentsëc ambi nidmiacpaden nëbi adquid utsi Pidaton nidmetsiash, quequin tantiec isadaidbo nadec cuëdcuededquin: ¹⁸—Nëid Esus caid unës uatiadquidi nec. Mimbi quënën nauednëdaid Badabas cuëmëdquid pudumeta —capanëdash comapenec cuëdcuededquin isadaidbon.

¹⁹Ancanquid bunenquiocquin utsibo cuëdcuededmiondaid utsi cuesuniondaidbidi Badabas icsho quënën nauedmepanëdash.

²⁰Adec isadaidbo cuëdcuededsho tantiaish Esus nidmetiadquio iquec: —Esus cuidenquioctiadquidi nec —quepanëdash Pidato isadaidbo caic.

²¹Adnubien: —Cuesten dectame —capanëdash isadaidbon yuec comapenec cuëdcuededquin.

²²Adec cuëdcuededsho tantiaish: —¿Atotsi canun, Cuesten dectame, cai? ¿Atotsi icsamboen nasho isun mimbi chieque? Chui. Tantianu. Ma unës uainquioctiadquidi neyoc. Aden tantiaquin mëyameshun Esus nidmembali —quepanëdash Pidato.

²³Adoaquien: —Cuesten dectame —quepanëdash cuëdcuededoaic isadaidbo Pidato, Ai, camenuc.

²⁴Adoac iccuededquidon chiacpaden namenuen ²⁵Pidaton: —Utsi cuesuniondaid Badabas puduemeshun Esus cuesten dectameta —capanëdash Pidaton cuesten dectamënquido chuiquin.

Esus mëyanaid

(*Mat. 27.32-44; Mad. 15.21-32;*

Uan 19.17-27)

²⁶Pidaton, Esus cuesten dectameta, cac sondadon abi dectante cueste Esus buamequimbi Simon, Sidene yacnoshon tishaid, chosho bëquedtuiddanquin Esus dectante cueste Simon buamiac Esus tsibambëpanëdash. ²⁷Adec Esus nidsho isun matses dadpeshun shubiquin tsibanampanëdash. Adembidi abi tsibanquid chidobo icpanëdash. ²⁸Adec chidobo abi tsibanec shubisho tantiaish bidadshun isec Esus: —Ëbi tantiec shubienda, Edusaden yacnocquidon chidobo. Mibibi tantiadec min bacuëbobëdta tantiec shubicuededta.

²⁹Yuecash mëyantequid ushë choendac. Aid ushë chonoc bacuë tishtiapiimbocquid caic utsibo nadendac: “Bacuëbo nibëdquid icquin min bacuëbo natiasho isenquio mimbi iquec. Adquid yec bëdamboshë mibitedi iquec.”

³⁰Mëyantequid ushë chonoc matses utsibon natiambocquin mëyanaqui naden mimbi Nuquin Papa chiendac: “Natiastianquieque. Acte quiusudquid macuësh dapa catashmetabi, Papa, mibi quendac.

Adecbidi, Acte quiusudquid macuësh masiametabi, Papa, utsi queoaindac.”

³¹Ëbi buansho isec shubiequi, Ëbi mëyantequid ushë choec, quequin tantiesa mibi ipec.

Nëdënquenquioctiadquidi achuëshquiocquid nëdëncasho isash: “¿Tanunquiocquid badedquio nëdënquenquio ipec,” quecta mibi icti? Adembidi: “Cuidenquioctiadquidi nec,” queboedëmbi ëbi icsaisa unës uasho isash: “¿Ëbitedi icsambocquid comapenen cuidenquio ipec,” queoapecta mibi ique? Ai, quequin tantiatiad —quepanëdash Esus.

³²Adnubien Esusbëdta icsambocquid dada daëd nidmequimbi ³³macuësh mapi canite caid yacno choshombi ëquë daëd dectambudcuentanquin nënantanquio Esus dectampanëdash. ³⁴Dectanac diadequi Esus Nuquin Papa caic: —Ëbi unës uanuequidon tantienquiocquin unës uainquioctiadquidi cuesten dectanoshibique. Aidon icsamboen nambo yacbimboec bëpiscudta, Papa —quepanëdash. Adnubic Esusën dashcute bednuequin sondadon dada uashun tëchun sandoshon cadotanequin dada uatempi puduemebanquin isquin Esusën dashcute bedbampanëdash.

³⁵Adnubien matses dadpeshun isnubi Isadaidbo tsusiobo isec tabadquin mamënshumbededec: —¿Utsi-utsien Nuquin Papa yacno yuedanquidta nec? Aidi matses mënchictequid Nuquin Papan chomiaidquio iquec abibi budtiadquidi diadpec. ¿Ada budeque? Isnu —quec onquecuededpanëdash.

³⁶Adembidi sondadon mamënshumbededquin paëmbocquid mucambocquid sananquin Esus ismequimbi: ³⁷—Isadaidbo chuiquid dapa iquec unësenquio iquebi, quiash nëid bednush bud —capanëdash sondadon.

³⁸Adnubic, abi dectanaid cuesten mapino abuc matoccaid Pidaton Esus chuiquin dada uamiaid nad icpanëdash: “Nëid, isadaidbo chuiquid dapa nec,” quequin dada uashun Esusën mapino dectamepanëdash.

³⁹Adnubien, Esus icsamboen chiec icsambocquid Esusbëdta dectamboed abentsëc: —¿Nuquin Papan chomiaid, Quidistuda ne? Adquid icquin mimbi budmiac ëbi daëdi mibëd budebi —quepanëdash abëd diadquid.

⁴⁰Adec Esusbëdta dectamboed abentsëc onquesho tantiash aidbëdta dectamboed utsi: —¿Aidi unës uatequid yacpadquid mibi yec, Nuquin Papan ëbi cuidendac, quec dacuëdënenquioda mimbi icpe? ⁴¹Icsamboen nabanacsho cuidaid ëbi daëdi nec. Aidi bëdambocquin nabanquid icsho cuidenquioctiadquidi nec —quepanëdash.

⁴²Aden chiashic Esus caic: —Mibi yacno choash chuiquid dapa icquin ëbi bëdamboen tantiaquin nata —quepanëdash Esusbëdta dectamboed utsi.

⁴³Adoquien: —Abimbo chuinu. Tantia. Nëid ushëmbi abuc ëbi bëdamboec tabadacno ëbëdi mibi

iquendac —quepanëdash Esus abëdta dectamboed abentsëc chiec.

Esus unësaid

(*Mat. 27.45-56; Mad. 15.33-41; Uan 19.28-30*)

⁴⁴Adec onquenubi ushë cuembo yanuc bëtinacbimboec inchëshquio yashic ushë budtsan chënquedoapanëdash.

⁴⁵Inchëshquio icnubi Nuquin Papa tabadte shubu uashunaid yacno puduedtemaid quënën dashcute bitsipambocquid tsincabudquin dectanëdaid tembi daëdquio yec canchedbudcuempanëdash. ⁴⁶Adnubien unësbudec comapenec cuëdec: —Mibi yacno ëbi yuedta, Papa —quiash Esus unësbudpanëdash.

⁴⁷Adec Esus unëso isequi ambi isboedtedi tantiaquin Nuquin Papan naid chiec sondado chuiquid: —Abimbo chiosh. Cuesten dectanaid Esus caid bëdambocquid niosh. Aidi unësenquioctiadquidi unës uaposh —quepanëdash. ⁴⁸Ambo tabadquin isquid utsibo Esus unëso isash unësquio yec aton shubuno nidanepanëdash. ⁴⁹Aido nidnubien nidaid Cadidia yacnoësh choshon chidobon Esus tsibanamboedon dadabëdtambi uano tabadquin isbededpanëdash.

Esus nauedaid

(*Mat. 27.57-61; Mad. 15.42,47; Uan 19.38-42*)

⁵⁰Adnubic, ambobi dada, Ose cuëmëdquid, isadaidbo tsusio utsibobëd iccuededquid abentsëc bëdambocquid icpanëdash. ⁵¹Isadaidbo tsusio utsibo, Esus unës uatiadquidi nec, quenubi, Padi. Unës uainda, quepanëdash Ose. Aidi nidaid Udeya caid shubu dadpen icquid Adimateya caid yacnoshon tishaid icpanëdash. Aidi Nuquin Papan chomiaid chuiquid dapa iste bunquin

cainquidquo icpanëdash. ⁵²Aidi Esus unëso isash Esusën dada nauedtiadquo yec Pidato yacno nidshun ambi tantiapaden Osen chuipanëdash.

⁵³Aden chiaquien Pidaton: —Adotan —cac nidshun Esusën dada imbudshun dashcute ushumbocquidën dataneshun buanshumbic ambi macuësh cuënote shëcuë nacnenaïd chucanquo Esus Osen badedquo nauedpanëdash.

⁵⁴Inchëshbudtsëqui seis yanuc chonoadtemaid ushë nec, qeshun Esusën dada Osen nauedpanëdash.

⁵⁵Adnubien: Nauednu, quequin Osen buansho isun Cadidia yacnoësh Esusbëd choboedon chidobon tsibanshun shëcuën Esusën dada Osen nauedsho aidon isbededpanëdash. ⁵⁶Aden isash aton shubuno nidaneshun noadte bëda Esusën dada danoshcanu qeshun danoshquete chidobon nacnempanëdash. Nacnenash inchëshbudtsëqui seis icnuc Nuquin Papan chiapadec chonoadtemaid ushë nec, quïash Esus nauedacno nidenquo yec tabadpanëdash. Nuquin Papan chiapadec tabadpanëdash.

Esus uincuenta

(*Mat. 28.1-10; Mad. 16.1-8; Uan 20.1-10*)

24 ¹Adashic, sabado inchëshbudtsëqui seis yanuc chonoadtemaid ushë naimëdan badiadnuc danoshcanun ambi nacnemboed buanec Esus nauedbocno isec chidobo nidpanëdash. ²Ambo choshon Esus nauedshun bëtashaid cuënote shëcniacsho isashi ³shëcuën puduedash aton Icbo Esusën dada nibëdsho isec tabadpanëdash. ⁴Adec tabadnubien dada daëd dashcute dasiuidacbimboec dasiuidash chënquec chopanëdash. ⁵Aid isash dacuëdcuedequi isenquo yec chidobo tabadpanëdash. Adsho isash dada daëd:

—*¿Atotsi canuen unësassho nauedac uincueniaïd nibëne? ⁶Nëmbo nauedboedi nibëdec. Aidi uincuenaccosh. ¿Aidi Cadidia yacno mibëdi tabadquin chuïsho tantienquïoda icco? ⁷Naden Esusën mibitedi chiondash: “Matsesaid ëbi icsho bedshun icsambocquid ëbi menendac. Aden meniac cuesten dectanac daëdec ushtanec uincuenoabi,” quequin Esusën chiondash —quepanëdash dada daëd chidobo caic. ⁸Aden chiac chidobon Esusën chiaïd abi bëpiscudaïd padpiden tantiapanëdash.*

⁹Aden tantiash Esus nauedaïd shëcuë yacnoësh puduenanec Esus tantiaquid dadpen tabadacno choec puduedshun ambi isboedbëdtabi ambi tantiaboed chidobon chuïbampanëdash. ¹⁰Madia shubu dadpen icquid Mactada caïd yacnoshon tishaid yec Uana yec Madia utsi Uambëdtan Acobon tita yec chido utsibo yec quec choshon Esusën Èbi chuïbeneta caïdo chuïpanëdash. ¹¹Aden chuïsho tantiash: —Mimbi chiaïd tantiatiapimbo iquebi —quecuededpanëdash iccuededquïdo.

¹²Adnubien Petedo nidtoanec titinquec nauedaïd shëcuë yacno choash shuebudquin shëcuë anisquin dataniaïd dashcuteuidi uesho ispanëdash. Aden isanec nidequi: —*¿Atodain nechitec? —quepanëdash Petedo tantienquo yec.*

Emaus yacmi nidte

(*Mad. 16.12-13*)

¹³Adashic abi ushëmbi Edusaden yacnoësh utsibobëd iccuededboed dada daëd shubu daëdpactsëc icquid Emaus caïd yacno nidpanëdash. ¹⁴Adec nidequi ambi Edusaden yacnoshon isboedbëdta ambi tantiaboed chiec onquepanëdash. ¹⁵Aden chiec onquec nidshobi Esusën aid daëdi chinunash aidobëd

nidpanëdash. ¹⁶Aden abi chinuntuidsho isac utsibimboec Esus isadpanëdash.

¹⁷Adec nidequi Esus: —¿Atotsi chuibanec onquec nide? —quepanëdash. Adsho tantiash unësquo yec mamënenquo yec nidtuidpanëdash.

¹⁸Adec nidtuidash Quëdeyopas cuëmëdquid: —¿Edusaden yacno tabadtuidquin anoshon naboed mimbiuidtsëqui tantiamboda icco? —quepanëdash Esus caic.

¹⁹Adoquien: —¿Atotsi naid chiec ne? —quepanëdash Esus.

Adoquien: —Esus Nasaded yacnoësh choquid chiec nebi. Aidi Nuquin Papan ambi chiaid chuimiaid icquin ambi chuibaniaid ambi nabanaidbidi Nuquin Papabëdtan matses dadpeshun bëdamboen isaid icposh. ²⁰Nuquin tsusio dapabobëdtan nuqui chuiquid utsibon Esus bedshun: “Unës uata,” quequin isadaidpemo chuiquid meniac cuesten decantanquin unës uaposh. ²¹Nëbi chuiquid dapa isadaidpemo iquenquicpashun, quequin Esus isadaidbo yec isadaidbo chuiquid dapa ictsiash quequin ëbitedishun tantiapombi. Ëmbi caboedi unës uaposh. Aidi unës uan daëdec ushobi. ²²Adec daëdec ushun dacuëdanquiecnuc chidobon naden chuibededposh: “Esusën dada nauedbocono badiadnuc nidshun isac ²³nibëdosh. Ambobi icnubi Nuquin Papan uaido mayan bëdabo daëd icsho isac, ‘Mimbi nibënaid nibëdec. Uincuenac,’ quiosh,” quequin chidobon chuiquid. ²⁴Aden chidobon chuisho tantienquo yec ëbëd icquido Esusën dada nauedbocono nidshun chidobon chuibocpadembi unës uaboed nibëdsho isposh —quepanëdash ambi chinunaido Esus chiec.

²⁵Adoquien: —Ma bëdiactscëc tantiaquid mibi daëdi neyoc. Nuquin Papan ambi chiaid chuimiaidon dada uampid bëdiactscëc tantiatsec tantiesabidi

ma mibi neyoc. ²⁶¿Bëdamboec tabadacno chuiquid dapa icnuec Esus mëyanaidba iquendactiosh? —quepanëdash Esus.

²⁷Aden chuibanquin Moisesën dada uampidbëdtabi Nuquin Papan ambi yuecshun nanun chiaid chuimiaidon dada uampid tantiamequin Esusën chuibampanëdash.

²⁸Aden chuibanequi shubu daëdpactscëc icquid Emaus caid yacno anoentsëqui choshon

datanshobimboecnuc Esus isun:

²⁹—Inchësheque. Nëmbo ëbi yacno tabadec cho —abi daëdshun cac nidash aidobëd tabadpanëdash.

³⁰Adashic, shubu nuntan pete sante dayun abëdi uequin pete bedshun Nuquin Papa chuishun cuësh-cuëshun Esusën menebampanëdash. ³¹Aden nasho isun badedi, Esus nec, quequin tantianubi Esus nibëdquo yampanëdash. ³²Adsho isash: —¿Podquedën choquin Nuquin Papan chiaid dada uampid chuisho tantiash, Bëdambo yanobi, quenquiodabi ëbi daëdi ictio? —quepanëdash Esus yuedquido.

³³Aden chuitanequi Emaus yacno choboed daëd badedi Edusaden yacno nidoapanëdash. Edusaden yacno choash Esusbëd icquido 11tedbëdi utsibo iccuededacno puduedacsho isash:

³⁴—Abimbo iquec. Nuquin Icho uincuempaccosh. Uincuenanec choquin aidëmbi Simon ismetuidposh

—quepanëdash iccuededquido. ³⁵Aden iccuededquidon chuisho tantiashun Emaus yacnoësh choaboed daëdshun Esusën abi chinunshun chiaidbëdta ambi pete bedshun Esusën cuësh-cuëshbamboed chuipanëdash.

Abëd icboedo yacno Esus chote

(*Mat. 28.16-20; Mad. 16.14-18;*

Uan 20.19-23)

³⁶Adec onquecuedednubi nënantanquo choshon Esusën:

—Nuquin Papan bēdamboen isaïdo yec dacuēdenquoio yec tabad —capanēdash.

³⁷Adec aid chosho isash: Podo bitsi nec, quec dacuēdequi abēd icquido tabadpanēdash. ³⁸Adsho isashien Esus: —¿Atotsi quiash, ¿Esusida nepec? mibitedi quepe? ³⁹Con mēdantebēdta con taë is. Ēbibi nebique. ¿Mētoccaid taēbēd chiuë nibēdecta ye? Mishec cho. Ēbi yacpadquid canitebēd nami icquid podobitsi nibēdec —quepanēdash Esus abēd icquido chieç.

⁴⁰Aden chuitanquin abi bēchun shuin mētoccaid chiuë aton mēdantebēdta aton taë Esusën ismepanēdash. ⁴¹Aden ismiac, Aidquiobi nec, quenquoio yec abēd icquido mamēncuededquin isec bēdambo yanec, Adec uincuentequidshenda dectampaccosh, quequin tantieç tabadpanēdash. Adec tabadsho isun: —¿Ada pete iquec? —Esusën caquien ⁴²nuēcquid shēaid cuēshē menepanēdash. ⁴³Aden meniac bedshun Esusën pepanēdash abēd icquidon isnubi.

⁴⁴Aden piash: —Mibēd icquimbi naden chuipombi: “Nuquin Papan ēbi chuiquin ambi naden nata quequin Moises dada uamiampidbēdta ambi yueçshun nanun chiaid dada uamiampid naimbudtenendac,” quequin chuibanombi —quepanēdash abēd icquido tantiamenuc. ⁴⁵Aden chuishumbic abēd icquido tantiamequioquin: ⁴⁶—Nuquin Papan dada uamiampid nad iquec: “Nuquin Papan chomiaid, Quidistu caid, matsesën mēyanquin unēs uaqui daēdec

ushash uincuenendac. ⁴⁷Aid tantiashun mibi icsaid mimbi ēnsho isash, Icsaquid nec, quenquoio yec mibi icsaid Nuquin Papa bēpiscudendac, quequin Edusaden yacnocquidoba ēbi tantiaquidon chuibanendac. Aden Edusaden yacnocquido chuishumbic nidaid utsi-utsieç yacno nidshun adomboembidi chuibanoaindac. ⁴⁸Mēyanquin unēs uaqui ēbi uincuenacsho mibitedishun ispoç. ⁴⁹Aden isun tantiaquido mibitedi icsho Nuquin Papan ambi mibitedi menenu caid aton Mayan chomendambi. Aidi Nuquin Papan nadatiambocquin natequid iquec. Aid mibitedi meniabicnuc Edusaden yacnoshon aidi caimbudta,” —capanēdash Esusën.

Esus abuc indote

(*Mad. 16.19-20*)

⁵⁰Adashic, bēyucanec nidequi Betania yacno anoentsēqui choash nidtuidshun aton mēdante abuc sananquin ismeç: —Nēidtedi bēdamboen ista, Papa —quepanēdash Esus. ⁵¹Aden chiacsho abēd capucuenequido niamequin Esus aton Papan abuc indopanēdash. ⁵²Aden indosho isash, Ēbitedishun icbo nec, quequin ismeç shuebudash: —Bēdambo iquebi —quianec Edusaden yacno nidanepanēdash. ⁵³Adec Edusaden yacno nidoash tabadec Nuquin Papa tabadte shubu uashunaid yacno badiadquidēn-badiadquidēnquieç nidted-nidtedquin Nuquin Papan naid chuidenepanēdash.

Padi. Aidedtada dada uombi, Teyopido.

UANĒN DADA UAID

Nuquin Papa tantiamanquid chiaid

1 ¹Ēndenquimboshē matses uabi yec abitedimbo uabi yequi Nuquin Papabēd Esus icpampic. Nuquin Papapadquidquiobidi yec: —Nadquio Nuquin Papa iquec —quec tantiamanquidquio nec. ²Aidēmbi Nuquin Papabēd icquin ³abitedimbo uapampic. Abubēdta nidaid uashun aidēn icquidtedi uapampic. Ambi uacmaid utsi nibēdec. ⁴Aidquio Nuquin Papa yacno tabadmianquid nec. Nuquin Papapadquidquiobidi yec: —Nadquio Nuquin Papa iquec —quequin paposhquiacbimboecnuc tantiamanquidbidi Esus nec. ⁵Adembidi matses ambi icsamboen naid tantimequid nec. Adquid icquin: —Con Pamboen bēdamboshē icquidquio nendac. Aidēn chiaid niac-niaquec mibi icsamboec tabadec —quequin chuisho tantiatipimbo icquin matsesēn Esus chieshēmpondash.

⁶Aden Esusēn chuibeniyabi icnuc con shēnision acten mentoanquidēmba Nuquin Papan chiacpadomboen ambi chiaid chuibampondash. ⁷—“Nuquin Papa yacnuēsh abi tantimequidquio choendac,” quequin Uanēn chuibansho tantiahsun ma dadpeshun ambi chuiboed tantianu —quequin Nuquin Papan con shēnision abi chuibanquid icmepanēdash. ⁸Nuquin Papa yacnuēsh choacmaidēmbi con shēnision:

—Nuquin Papan chomiaid Esus nec —quequin chuibampondash. ⁹Aden ambi chuiboedquio Nuquin Papa tantiamenuc matsespanēdash Esus.

¹⁰Adash matsesbēd tabadsho ambi matses uaidombi tantienquio icquin chieshēmpondash. ¹¹Aden con matses isadaidbon Esus tantienquio iccondash. —Isadaidbo con matses nec —Nuquin Papa quenēdacpadquiec: —Isadaidbo con matses nec —queoapondash Esus. Adsho ambi con matses caidonquiobi dadpeshun Esus tantienquio icpondash. ¹²Utsibombien daēdpactsēcshun: —Nuquin Papan Madombo Esus nec —quequin tantiahsu Nuquin Papan: —Con mado nec. Con champi nec —cabempanēdash. ¹³—Con matsesuidien Nuquin Papan: “Con mado nec. Con champi nec,” capec —¿quequidta adopanēdash? Padenquio. —Nuquin Papan mado nebi —quequin ħambembi chuiquidta con mado capanēdash? Padenquio. Nuquin Papan Mayanēn tantiamiacpadomboen aton Madombo Esus tantiahsu dada con mado caquin chido con champi capanēdash. Adembidi Esus tantiahsu adoendac.

¹⁴Adec Nuquin Papa tantimequidquio Esus matsespanēdash. Nuquin Papan Mado abentsēqui yec bēdamboshē icpondash. Ēbēd tabadquin nadatiambo icquin nabanquin matses bēdamboen nashumbampondash. Aden

Nuquin Papambo tantiamepondash Esusën. ¹⁵Aid con shënision chuipondash. —Ëmbi chuiboedquio nec. “Ëbi icsaquid icnuc bédamboshë icquidquio choec,” ëmbi caboedquio nec. “Ëmbia Nuquin Papan chiaid chuibambon aidëntsen tsyuec choshon chuibanendac. Ëbi bëyuc tishaidi tishabi icnubi aid ënden icpampic,” ëmbi caboedquio Esus nec —quepondash con shënisio.

¹⁶Con shënision chiacpadquidquio icquin abi tantiaquido Nuquin Papan bédamboen isaido icmeshun adenuidi Nuquin Papa nuqui bédamboen ismec. ¹⁷Ëndenquimboshë Nuquin Papan chiaid dada uaquin Moisesën Nuquin Papan matses icsaido cuidte tantiamepampic. Padnuen Esuquidistun Nuquin Papan bédamboen iste tantiamequin: —Nadquio Nuquin Papa iquec —quequin matses bédamboen tantiamepondash. ¹⁸Ambi isacmaidquio icsho matsesën Nuquin Papa bédamboen tantiatiapimbo iquec. Padnuen aton Mado abentsëcshunquio aton dayun tsadquidënguio matsesun Nuquin Papa bédamboen tantiamepondash. Aidquio chuinu. Tantia.

Tsusiobon chuimiac Uan acten mentoanquidën chiaid

(*Mat. 3.11-12; Mad. 1.7-8; Duc. 3.15-17*)

¹⁹Con shënisio Nuquin Papa tantiabenuid acten mentobenequid niøndash. Aden acten mentobenesho isash Moisesën chiampid namequido aid chuimenuc cho-chopondash. Edusaden yacnocquido isadaidbo tsusiobon: —Chuimetan —cac cho-choquin con shënisio chuituidpondash. ²⁰—¿Tsuntsin chiac nai? ¿Mimbembida nai? “Bédamboshë icquidquio Nuquin Papan chomendac,” quequin nuquin tsusedpan

¿dada uapampidta ne? —catuidpondash. Adoquien: —Padenquio. Aidpenquio nebi —quepondash. ²¹Adshobien: —¿Tsumintsi ne? ¿“Naden naindambi,” quequin Nuquin Papan chiaid chuibanquidquio unëspampid Edias uincuenaidta ne? —caquien: —Padenquio. Aidpenquio nebi —queoapondash. Adshobien padpiden: ¿Tsumintsimbo ne? “Moisespadquidquio choendac,” ¿capampidta ne? —caquien: —Padenquio. Aidpenquio nebi —queoapondash con shënisio.

²²Adshobien padpidemboen: —¿Tsumintsimbo ne?

¿Mimbenquioienda nao? Ëbi: “Chuimetan,” caboed chiec nidnu. Baded ëbi chui —caquien: ²³—Nuquin Papan tantiamiac nuquin tsusedpa Isayasën naden chuipampid nebi.

“Nuquin Papan bédamboshë icquid chomiabi icnuc aid bëyuec utsiba choendac. Aidën shubu nibëdacno capucuenequin chuibanendac naden.

‘Chuiquid dapambo choeque.

Podqued andëdbanshunta,’
quiacbimboen chuiquin: ‘Nuquin
Icho choeque. Icsaid ënash
bédamboec tabadta,’

quequin chiendac bëyuc choshon,”
quequin chuipampid nebi —quepondash
con shënisio.

²⁴Adnubien con tsusedpabon chiampid namequidon padiseyobo caidontsen aton chuiquid dapan chiacpadomboen con shënisio chuituidpondash. ²⁵—Utsibon: “¿Adquidta ne?” cac: “Adquidpenquio nebi,” queuidequi mibi iccoc. “¿Mitsipadquidquio icquin acten mentobano?” mibi caimbi —caquien: ²⁶—Nuquin Papan chiacpadomboen abi tantiabenuid quido acten mentobenec nebi. Ëmbi aden bédamboen nanuc utsimbien

bëdamboenshë naindac. Aidi mibëdi tabadshobi ma mimbi tantienquoio icboc.²⁷ Ëmbia Nuquin Papan chiaid chuibanombi. Aidëntsen tsyuec choshon comapenen tantiaquin Nuquin Papan chiaidquoio chuiquin Nuquin Papambo tantiamendac. “Aidi bëdamboshë icquid icnuc ëbi icsaquid icsho ðatotsieshun: ‘Aid choec,’ quequin chuiquidquoio Nuquin Papan icmioshi?” quec tsadebi —quepondash con shënisio padiseyobo chieci. ²⁸Acte Odan caid uquë cuëmatsiucueësh shubu dadpen icquid Betania caid yacnuësh adpondash.

Abided cuidadtequid nendac, Esus caid

²⁹Badiadshun padpiden con shënision matses acten mentobanoapondash. Aden mentobanubien Esus chopondash. Chosho isashien: —Is. Nuquin Papan namiaidquoio obeca bacuëbimboecquid choeque. Aidi isadaidbon obeca bacuëded cuidquin unës uacbimboec matses icsaid bedshunec abided cuidadec unësendac. ³⁰Ëmbi chianeboedquoio nec. “Ëbi bëyuc tishaidi tishabi icnubi aidi ënden icpampic,” quiash: “Ëbi bëdapabi icnuc bëdamboshë icquidquoio choendac,” quepobi. ³¹Aid chosho con matses isadaidbo tantiamenuen Nuquin Papan acten mentobenequid icmiondashi. Adondaidëmbi ëmbibi badedquoio tantienquoio iccombi. “Nuquin Papan chomiaid nec,” quequin tantienquoio iccombi —quepondash con shënisio.

Esus mentoaid

(*Mat. 3.16-17; Mad. 1.9-11; Duc. 3.21-22*)

³²Adashic abi onquec: —Nuquin Papan naden ismiac tantiabenombi. Aton Mayan aton dada nibëdquieci dëbimbimboec budec: “Matsadtoendac,” quebocpadequi Esus matsadto sho ispombi. ³³Adsho isash: “Adquidshenda

caposh Nuquin Papan: ‘Acten mentoanquid icta,’ ëbi caboedën. ‘Con Mayan dëbimbimboec budec matsadto boedën abi tantiaquidobëd con Mayan tabadmendac,’ Nuquin Papan caboedshenda nepec,” quiobi Esus caic. Ëmbembi tantienquoio ictsenombi. ³⁴Aden ismiac: “Nuquin Papan Madombo Esus nec,” quequin tantiombi. Aden tantiashun: “Nuqui caimboed Nuquin Papan chomiaidquoio Esus nec,” quequin mibi chieci nebi —quepondash con shënisio.

Nëid dada uaquid Uan Esusbëd yanaid

³⁵Adashic badiadash ambi acten mentobambocono con shënisio nidoapondash. Aid tsibanequi nidoapondabi. ³⁶Adec nidquin isquien Esus cuempec. Cuensho isashien con shënisio: —Is. “Nuquin Papan namiaidquoio obeca bacuëbimboecquid nec,” ëmbi caboed cueneque —quepondash.

³⁷Adsho tantiatanequini con shënisio bëd iccondaidd utsibëd Esus chinunec nidpondac. ³⁸Nidquin chinunac bidiadquin istanequien: —ðAtotsi quec ne? —quepondash Esus. Adshobimbi: —Mibi iseci nebi, Dabi. ðMitsimbo mibi ushaque? Isnu —capondambi. —Chuiquidquoio nec —quequin con onquetembi Dabi caondambi. ³⁹Adoac: —En iseci cho —cac abi ushacno iseci nidondabi. Ushë abucquoio icnuc puduedash yueci tabadec onquetaniash inchëstëcnebi chondabi.

⁴⁰Ëbëdntan Esus chinunondaidd Andedes niondash. Shubu dadpen icquid Betsaida caid yacnuësh caniquid niondash. Aton buchi Petedo niondash. Petedobidi Simon capondash.

⁴¹Adnubien Andedes aton buchi chieci nidpondash. Adec nidquin Petedo istuidash: —Nuquin tsusedpabon

chuiampid Nuquin Papa yacnuësh choquid Mesias caid istuidombique. En isec cho, buchi —capac caondash. Nuquin Papa yacnuësh choquid Quidistu cashumbic con onqueten Mesias caic.

⁴²Aden chiaquien aton buchi Esus isec chopondash. Chosho isash Esus: —Uanën mado mibi nec. Mibi Simon nec. “Nidaid moco utsi uatiapimbo yacimboc mibi chieshtoenquo icquid yanendac,” quequin mibi nidaid moco cuënëndambi —quepondash Esus Petedo caic. Con onqueten nidaid moco cain Sepas capondash Esusën. Quidieco masesën onqueten Petedo capondash.

Esusën Uedipebëdta Natanaid istuidaid

⁴³Badiadash: —Con nidaid Cadidia caid yacno nidnu —quianec nidpondash Esus. Adec nidquimbi Uedipe istuidpondash. Istuidshun: —Nuquibi icnu. Cho —caquien Uedipe chopondash. ⁴⁴Betsaida yacnuësh caniquidbidi nepondash aid. ⁴⁵Esusbëd icquid yanashic dada utsitsen Natanaid caid chiec nidpondash Uedipe. Adec nidquin istuidshumbien: —Isec cho. Moisesën chiampicpadomboen chuiquin nuquin tsusedpabo utsibon:

“Bëdamboshë icquid choendac,” quequin dada uapampicpadequi choshe. En isec cho. Shubu dadpen icquid Nasaded caid yacnuësh caniquid neque. Osen mado nec —quepac caondash.

⁴⁶Adsho tantiasht: —ËNasaded yacnuështa dada bëdambo icquid chopatsiasht? Auëshquo dada bëdambo icquid chotiapimbo iquendac —quepac caondash Natanaid. Adsho tantiasht: —En isquieq cho —quepac caondash Uedipe.

⁴⁷Adoac choshobien Esusën: —Is. Isadaidbombo neque. Muesambo nec —caquien ⁴⁸Natanaidën: —ËMitsipaden

ëbi tantie? Mabi mimbi isacmaidquo nepayoc —capondash. Adoquien: —Uedipen bedtanabi icnubi mibi cuëte icueda caid tayun tsadsho tantiombi —capondash Esusën. ⁴⁹Adsho tantiashtumbien: —Nuquin Papan Madombobien mibi nec. Comapenen tantiaquid yec nuquin mases isadaidbo chuiquid dapambo mibi nendac —capondash Natanaidën: —Istiapimbo yacno chiosh —quequin tantiashtun. ⁵⁰Adoquien Esusën: —“Cuëte icueda caid tayun tsadsho mibi tantiombi,” ëbi queshto ðtantiashta: “Nuquin Papan Madombobien nec,” badedquo que? Padpiden comapenen tantiaquin nabansho isun mimbi ëbi tantiaquotsiandac. ⁵¹Tantia. Mibi chuinu. Isadaidbo tsusedpa Acobon Nuquin Papan abi yacnoshon uaido mayan bëdabo Nuquin Papa yacno dectatonesho isash: “Aidbëd tabadte Nuquin Papan ëbi tantiametiadquo iquec,” quequin tantiapampicpadomboen mimbi ëbi tantienadac. “Matesun Nuquin Papan Madon mases abëd tabadte tantiamec,” quequin mimbi ëbi tantienadac —quepondash Esus abëd icquido chiec.

Esusën ambembi actequid uaid

2 ¹Aden Natanaid chiasht aton nidaid Cadidia caid yacnobi Esus tabadpondash. Ambo tabadec daëdec ushtsambi shubu dadpen icquid Cana caid yacnocquidën isadaidbon aton chido bedquin ismequin pemenuen aton shubuno mases dadpen cho-chomepondash. Adoac cho-chomiaidobëd Esusën tita puduedpondash. ²Esustsen puduedpondash. ³Adec puduedash tabadquin uba chinaid actequid uesquin acbededpondash. Adsho isumbien anin Esus chuipondash. —Actequid

naimëdoshe. Comapenen tantiaquid icquin mimbi tantiacpadomboen nata, mado —capondash. ⁴Adoaquien: —¿Atotsi quequin mimbi ëbi chuipe, tita? Chiata. Con Pan tantiacpadënquio naimbique —quepondash Esus. ⁵Adsho tantiatanquin anin yuabo actequad cushtobanquido chuipondash. —Con madon chiacpadomboen nata —capondash.

⁶Ambobi tëchu dapa 6tedi tabëcaid icpondash. Mëpamëdtembo acte nua 120 ditedos cactembi anidboedi acte naimëdaid icpondash. ⁷Adnubien Esusën: —Në tabadquidën acte cushtoban —cac cubu-cubuctsëcquio icnuc acte cushtobampondash yuabon. ⁸Cushtobanacsho isun Esusën: —Ueshun buanshun mibi ancaquid acmetan —cac acmetampondash.

⁹Adoac acquin tanaquien actequad bëdamboshë icquid icpac caondash acte icboedi. —Nibëda damboedquio žmitsimbo bedpash? —quepac caondash yuabo ancaquid. Adsho tantiashun yuabon: —Esusënquiobien naccosh —quequin tantiapac caondash. Adnubien yuabo ancaquidën chido bednuequid chuipondash: —Aidën actequad bëpash —qeshun. ¹⁰—Nuquin matsesën actequad bëdambo icquidba isedanquido acmequid nendac. Adquid acmiac matses nua cubudacsho isash: “Actequid icsactsëcquidtsen acmenu,” quequid yendac. Aden mimbi nambo. Bëdambo icquidquio ma mimbi nëbi acmianeyoc —quepondash yuabo ancaquid chido bednuequid chiech. Adnubien yuabon actequad bëdamboshë icquid abitedi acmebampondash.

¹¹Aden comapenen tantiaquid icquin ambembi actequad uaqin Esusën tauamboen ismebempondash. —Nuquin Papa yacnuësh choquid yec comapenen tantiaquidquio nebi —quequin aden

tauamboen ismebenondash nidaid Cadidia caid yacnoshon shubu dadpen icquid Cana caid yacnoshonquio. Adosho isun: —Con matsesën chiampid Nuquin Papan chomaidien nec —quequin tantiabenondambi.

Esusën chushcaquin cuemiaid

(*Mat. 21.12-13; Mad. 11.15-18;*

Duc. 19.45-46)

¹²Aden ambembi actequad uatanec nidec shubu dadpen icquid Capednaun caid yacno Esus nidondash. Aton tita yec aton buchi yec abëd icquido yec ëbi yec quec Esusbëd nidaniondabi. Ambo daëdpectsec ushec tabadondash.

¹³Ambo ushcuidanec nidequi shubu dadpen icquid Edusaden yacnotsen Esus nidaniondash. —Nuquin matses tsusedpabo unës uainquio icquin Nuquin Papan matamiampid inchësh tantiaquin obeca bacuë pec nëbi tabadeque. Isec nidnu. Nid —quianec nidanepondash. ¹⁴Nidashic Nuquin Papa tabadte shubu uashunaid dapa daquënë uaidën puduedondash nuntanquio puduedabi. Puduedshun isquien matses dadpen nëish yua chedobëd tabadpec. Baca bënë yec obeca yec dëbimbimboecquid quënëmpin sauedaid yec quec tabadpondash. Aton yua menequin piucquid bednuec utsibo tabadnubi utsibo ambi tabëcaid dayun tabadpondash. Aido nidaid utsi yacnuësh choquido aton piucquid dadpen bedshun ampeshunquin daëdpectsëc menequid niondash.

¹⁵Adec tabadsho istanquimbien Esusën cueshcate badedquio nacnentanquin cuesquin niacumpondash umanuc abitedimbo. Aden umanuc niacuntanquin tabëcaidtsen bidiacbanquin piucquid siabudshumbampondash.

¹⁶Adotanquimbic dëbimbimboecquid yuaquidotsen chushcapondash. —Baded mitsana buanec nid. ¿Pucquid bednuen shubu uaidta nedic? Ma con Pa tantiata shubu neyoc —quequin chushcapondash.

¹⁷Adsho isun naden tantiondambi. —Adquidshenda Nuquin Papan chiaid chuiquin con tsusedpan dada uapampic. “Aton Papan shubu cudasquidquo nendac,” quequin Esusën nate chuiquin dada uapampic —quequin tantiondambi.

¹⁸Aden nicacsho isumbien con matses chuiquidon: —¿Tsuntsin chiac nao? “Nuquin Papan chomiaid icquin naombi,” quequin comapenen tantiaquin nabanquin ëbi isme —caquien ¹⁹ismenquio icquin ompoacbimboen Esusën chuipondash. Abibi cadequi: —Mimbi nëid shubu icsa uabocsho padpiden nacnenoaindambi bëdambo icnuc. Daëdec ushqin nacnenquin nainendambi —quepondash Esus. ²⁰Adsho tantiash Nuquin Papa tabadte shubu uashunaid dapa ca danec: —¿Badedquioda nacnempatsia? Nëid nacnenquin seta dadpenquioshë 46tedquiobi matamiac cadenec —quepondash con matses chuiquido.

^{21,22}Yuecquio ictaneshun Esusën aden chiaid tantiondambi. Unës uacsho chococac daëdec ushash Esus uincuenaccondash. Uincuenacsho isash: —Abibi cadecshenda Esus nepondash. Abibi cadec: “Daëdec ushqin nacnenquin nainendambi,” quecshenda nepondash. Aden chuiquinshenda con tsusedpabon dada uapampic —quequin tantiondambi.

Dadpeshun Esus tantiauidaid

²³Nuquin Papa tabadte shubu uashunaid daquënë uacnoshon cuemeshumbic Edusaden yacnoshontsen

comapenen tantiaquin nabanquin Esusën ismepondash. Adsho isun matses dadpeshun: —Nuquin tsusedpabon chiampid Nuquin Papan chomiaidien Esus nechitec —queshun Esus bëdiactsëc tantiatsëccondash. ²⁴Aden tantiatsëcsho ambembi tantiash: —Ai, ëbi tantiaquidquo nec —quenquio icquin: —Ëbi bëdiactsëc tantiatsëc —quequin tantiapanëdash. ²⁵Utsin chiambobi ambembi tantianëdash. Aden matses abitedishun otacquo tantiaid ambembi tantiaquidquo Esus niondash.

Esusën Nicodemo caid chiaid

3 ¹Adnubien Edusaden yacnobi Nicodemo caid icpondash. Tsusedpabon chiampid namequido padiseyobo chuiquid dapa niondash. Tsusio utsibobëdtan aton matses namequid niondash. ²Inchëshën Esusbëd onquenuc chopondash. Choshombic aidëmbi: —“Nuquin Papan icmiacpadquid chuiquidquo mibi nec,” quequin tantiembi. Mimbi comapenen tantiaquin nabansho isun: “Nuquin Papan namiaidënuidtsëquien adotsiash,” mibi caombi —quepondash.

³Adsho tantiashun: —Ai, adquid nebi —quenquio icquin Esusën ompoacbimboen chuipondash naden. —Tantia. Mibi bëdamboen chuinu. Chuca uac Nuquin Papa yacno tabadtequid mibi ictsiandac. Chuca uabi yec mibi padenquio ictsiac ⁴—quesho tantiashien: —¿Mitsipaden tsusiobi chuca uapatsiash? Chidon padpiden usundoshon tishtiapimboen iqec —quepondash Nicodemo. ⁵Adsho tantiashun Esusën: —Nuquin Papan Mayanën tantiamiac: “Nuquin Papa tantiaquin ëbi icsaid ëntiadquo iquebi,” quiash bëdamboec tabadquid Nuquin Papabëd tabadtequid nendac. Adquid chuca uaid caimbi. Chuca uabi icquid

Nuquin Papa yacno tabadtiapimbo iquendac. ⁶Chidon tishaiduidtsëqui yec Nuquin Papabëd tabadtiapimbo iquendac. Nuquin Papan Mayanën chuca uaid Nuquin Papabëd tabadendac. ⁷“Chuca uaiduidtsëqui Nuquin Papabëd tabadendac,” ëbi qesho tantiash: “¿Midapaden chie?” quepequien mibi iquec. ⁸Tantia. Mibi chuinu. Cunquequid isadenquo icquid nec. Isadenquo icquimbi cuncac cuëte ishcutdsho isash: “Abi cunquec,” mibi quepec. Adquiobidi isadenquo Nuquin Papan Mayan iquec. Isadenquo icquimbi aidën chuca uaid bëdamboec tabadsho isun: “Nuquin Papan Mayanën nac,” quequin mimbi tantiatsiac. “Nëid utsitsen natsiash,” quequin mimbi tantienquo icnubi Nuquin Papan tantiacpadomboen aton Mayanën utsitsen chuca uatsiandac —quepondash Esus.

⁹Adsho tantiash: —¿Midapadec? —quepondash Nicodemo. ¹⁰Adoaiquen: —¿Tantienquioda ique? Ma isadaidbo Nuquin Papan chiaid chuibanquid mibi neyoc. ¹¹Ënden ushë utsin mibi chedo chiombi. Ëmbi isondaidquo chuiquinc ëmbi tantiondaidquo chuiquinc caombi. Adsho tantiash: “Tantiadenquo iquec,” ma mibi quebec. ¹²¿Ëmbi chuiboed tantiadenquo icnubi padpiden chuiquin ëmbi Nuquin Papan abi yacnoshon naid chuishomenda tantiatsia? ¹³Nuquin Papa yacno matses nidtanambo iquec. “Istanombi. Nadquo iquec,” quequin chuitiapimbo matses iquec. Ëmbien Nuquin Papa yacnuësh chondaidënquo: “Nadquo iquec,” quequin Nuquin Papa tantiamendac. ¹⁴¿Atotsi canuen nuquin tsusedpa Moisesën nisibimboecnuc shocosh nacnenaid dectampampic? “Nuquin Papan chiapadec ma aid isec nisin piaid bëdanu,” quequin cuesten dectampampic. Adomboembidi matses

cuidmenquo icnuec cuesten dectamëdendabi ëbided cuidadec unësec. ¹⁵Ëbi tantiaquido unësacsho cuidenquo icquin Nuquin Papa yacno ëbëd tabadmenuec adendabi —quepondash Esus Nicodemo chiec.

**Nuquin Papan matses
abitedi tantiaquin naid**

¹⁶Aden Esusën abided cuidadec unëste chuipondash. Nuquin Papan: —Ma adec abided cuidadec unësnu —quequin Esus chomepanëdash. —Unësquo iquec —quequin matses abitedi tantiaquidquo icquin Nuquin Papan cudasenquo icquin matsesmeshun aton Mado abentsëcquiobi abided cuidpanëdash. —Ëmbi adoaid con Mado tantiaquid unësacsho icsaido cuidacno nidmenquo icquin ëbëdi tabadmendambi —quequin aton Madoded cuidpanëdash. ¹⁷¿Matses cuidnuenda Nuquin Papan Esus matsesmepanëdash? Padenquo. Matses cuidenquo icnuen napanëdash.

¹⁸Aden aton Mado Esus tantiaquido cuidenquo icquin Esus tantiesabo cuidendac: —Con Mado chieshëmpec —qeshun. ¹⁹Nuquin Papan matsesmiaidën Esusën abi icsaid chuisho matses icsambo icquidon tantiatiapimbo iquec. Ambi icsamboen naid ëntiapimbo icquin Esus tantiatiapimbo iquec. ²⁰Adquidon: —Ëbi icsaid Esusën utsibo tantiamenushe. “Icsambo iquec,” ëbi canushe —qeshun Esus chieshëmpec. ²¹Nuquin Papan chiapadec tabadquidombien Esus chieshënenquo iquec. —Nuquin Papan namiacpadec tabadquid nebique. Ma Esusën ëmbi bëdamboen naid chuibampanuna —quiash Esus tantiate bumpec.

Uan acten mentoanquidën Esus chuioid

²²Adec Nicodemobëd onqueboshien Esus nidpondash. Edusaden yacnuësh

nidec aid nidaidëmbi Udeya caidën capucueniondash. Abëd nidshobini Nuquin Papan chiaid Esusën chuibampondash. Adec nidshun Nuquin Papa tantiabenuido acten mentobeniondambi. ²³Adnubien adomboembidi con shënisiontsen acten mentobeniac caondash. Enon caid yacnoshon Sadin caid anoentsëqui chunquen diadacnoshon matses dadpen acten mentoac caondash con shënision. ²⁴Chieshëmënuquidon quënën nauedabi adoac caondash.

²⁵Adnubien con shënisiobëd icquido con matses utsibëd: —Mimbi icsamboen chiec —quec chushcananac caondash. Con shënisiobëd icquido: —Uanën Nuquin Papa tantiabenuido bédamboen acten mentobamposh —quesho tantias: —Padenquo. Esusëmbien bédamboen acten mentobaniosh —quepac caondash. ²⁶Adshumbien con shënisiobëd icquidon: —Nuqui chuiquid chiec nidnu. Nid —quianec nidquin con shënision chuituidpac caondash. —Acte Odan caid uquë cuëmatsiucshun ïmitsicquid: “Nuquin Papan chomiaid nec,” mimbi cadio? Aidën mimbi naid dëniacquin matses dadpenquo acten mentobeniac caosh. ¿Ada bëda icpec? —caquien: ²⁷—“Nuquin Papan chiacpadomboen Esusën nash. Adomboembimbi naic,” qeshun Esus chieshëntiapimbo iquendabi. ²⁸“Nuquin Papan chomiaidpenquieni nec,” quequin mibi chiondambi. “ ‘Nuquin Papan chomiac bédamboshë icquid choendac,’ quequin bëyuc choshon aid chiec nebi,” quiondabi mibi chiec. ²⁹“Ëmbi chuibod nec,” quiash Esus chosho istanec cuishonquepobi. “Con matses aton chido bedmiombi,” quiash cuishonquiacbimboec cuishonquepobi. ¿Aden chido bedmequidën: “Min bënëbëd nidenda,” caquinda ictiosh?

Padenquo. Bënëbëd nidmiash bédambo yacbimboec Esusbëd nidanesho isash bédambo iquebi. ³⁰Ëmbi Nuquin Papan chiacpadomboen Esus tantiamequin ënquin chuibanuc ëmbi acten mentoaido daëdpactsëc yanendac. Ëmbi chuibodquo Esus tantiaquidoen dadpenquo yanendac. Aidquo bédamboshë iquec —quepac caondash con shënision abëd icquido chiec.

Nuquin Papa yacnuësh choquid chiaid

³¹Adshumbic con shënision naden chuiyac caondash. —Esusquo bédamboshë iquec. Nuquin Papa yacnuësh choquid abipadquid utsi nibëdec. Padnueni matses yec: “Nuquin Papa isondambi. Nadquo iccondash” quequin chuitiapimbo iquebi. Esusëmbien ³²ambi isondaidbëdta ambi tantiondaidquo chuipec. Aden chiaqui matses dadpen: “Abimbo caic,” quenquo icpec. ³³Esus tantiaquidon: “Nuquin Papa muesambo nec. Ambi: ‘Bédamboshë icquid choendac,’ quequin dada uamepampidquo Esus nec,” capec. ³⁴Nuquin Papan chomiaidquo icquin Nuquin Papan chiaidquo Esusën chuibanec. Nuquin Papan aton Mayan abëd tabadmiaid icquin comapenen tantiaquin ismebanquin chuibanec. ³⁵Ambi tantiaidquo icscho aton Papan abitedishun Icbombo icmiac. ³⁶Adnuc: “Abitedishun Icbombo Esus nec,” quequin aton Mado tantiaquido unësacsho Nuquin Papan abëdi tabadmendac padpidec unësenquo icnu. Esus chieshënquidoen Nuquin Papa yacno isenquo yec icsaïdo cuidquiacno nidendac —quequin con shënision chuiyac caondash.

Acte uequid chido Esusën chiaid

4 ¹Esusbëd icquin Nuquin Papa tantiabenuido acten mentobanondambi. Adnubien con

matses chuiquido padiseyo caidon:
 —“Uan acten mentoanquidën naid
 dëniacquin Esusën matses dadpenquo
 acten mentobanosh,” quiosh —queshun
 Esus chieshëmpac caondash. ²Esusën
 nainquio icnuc ëmbimbo nasho isun
 chiaqui aden Esus chieshënac caondash.
³—Mibi adosh —cac: —Con nidaidën
 nidnu —quianec nidondash Esus. Aid
 nidaid Udeya caid yacnuësh nidec aton
 nidaid Cadidia caid yacno nidondash.

⁴Aid podquedën nidequi nidaid utsi
 yacno Samadia caid yacno nidpondash.
^{5,6}Adec nidquin ushë cuembo icnuc
 shubu dadpen icquid Sicad caid yacno
 istuidpondash. Aid anoentsëqui con
 tsusedpa Acobon tied uampid
 icpondash. Aid tied caic: —Ëbi unësan
 nëid tied: “Con na nec,” cata, mado
 —quequin aton mado Ose chiampid tied
 niondash. Ambo aidën uëdëshcampid
 acte uete icpondash. Aid dayunquiobi:
 —Tiboquenu —quec Esus
 tsadtuidpondash. ^{7,8}Adec
 tsadtuidnubini: —Pete bedtanu
 —quianec shubuno nidanepondac. Esus
 abentsëqui nianec nidaniondabi. Adec
 nidan Samadia yacnocquid chido acte
 uec choquin Esus tsadsho
 istuidpaccondash. Choshobien Esusën:
 —Acte beccho. Acnu, champi
 —caquien: ⁹—“Acte beccho,”
 çcaquindabi ique? Ma isadaidbo mibi
 nepayoc. ÇIsadaidbo icquindabi: “Acte
 beccho,” cai? capac caondash acte
 uequid chidon. —Samadia
 yacnocquidbëd onquesambo isadaidbo
 nec —quequin tantiec adac caondash.

¹⁰Adshobien Esusën badedquio
 cuembo chienquio icquin chuipac
 caondash. —Nuquin Papan bëdamboen
 isquin naidbëdta ëbi tantiaquin: “Acte
 beccho,” mimi ëbi catsiac. Adsho acte
 bëdambo icmianquid mibi acmetsiambi
 —quepac caondash Esus. ¹¹Adoquien

acte uequid chidon actembo ca danquin:
 —ÇMitsipaden acte ueshun ëbi
 menetsia? Ma min tëchu nibëdpayoc.
 ÇMidapaden mimi uetiapimboen acte
 uquëducquio iquec? ÇMitsimbo acte
 bëdambo icmianquid ueshun ëbi
 acmetsia? ¹²Nëid acte nuquin tsusedpa
 Acobon uëdëshcapampid nec. Aton
 yuabobëd tan aton bacuëbon acpampid
 nec. Nuquin tsusedpa bëdambo icquin
 nampid icnuc çmitsipadquidquio icquin
 nai? ÇBëdamboshë icquid icquinda
 mimi acte bëdamboshë icquid ëbi
 acmepatsia? —capondash acte uequid
 chidon. ¹³Adoquien: —Nëid acash mibi
 bundoac. ¹⁴Ëmbi acmiac mibi
 bundoenquio ictsiac. Acte bëdambo
 icmianquid acmiac ënëdenquio yec
 tabadquid mibi yantsiac —quepac
 caondash Esus badedi cuembo
 chienquio yec. —Ëbi tantiaquidobëd
 con Mayan tabadmiac bëdambo yanec
 unësacsho ëbëdi tabadmendambi
 —quequin tantiec adac caondash.

¹⁵Adsho tantiashun padpiden acte ca
 danquin: —Adquidquio ëbi acme.
 Bundoenquio yec nëmbo acte uec
 choenquio ictsiabique —caquien:
¹⁶—Min bënë bedtan —capac caondash
 Esusën. —Nuquin Papan chomiaidquio
 yec comapenen tantiaquid mibi nec
 —camenuen adoac caondash. ¹⁷—Min
 bënë bedtan —caquien acte uequid
 chido: —Con bënë nibëdec —quepac
 caondash. Adshobien Esusën: —Abimbo
 mimi caic. Min bënë nibëdec. ¹⁸Dada
 mëdante auc abentsëctedquio mibi
 bënë icpadenec. Aidon mibi
 niambudnian nëbi mibëd icquid min
 bënëpenquio nec. Abimbo mimi caic
 —quepac caondash Esus.

¹⁹Adsho tantiash: —Isambobi
 comapenen tantiaquidien mibi nechitec.
 Mibipadquidquio chiec: “Nuquin Papan
 chomiaidquio nendac,” quepec con

matses. Adquid icquin en ëbi chui.
 ¿Mitsishunquiemi Nuquin Papa
 bédamboen tantiapè? ²⁰Con matses:
 “Nëmboen Nuquin Papa iquec. Nëid
 macuësh dapanshunuidtsëqui Nuquin
 Papa tantiac bédambo ictsiash,” quepec.
 Min matsesien: “Edusaden
 yacnoshonuidtsëqui Nuquin Papa
 tantiac bédambo ictsiash,” quepec
 —quepac caondash acte uequid chido.
²¹Adsho tantiashun Esusën: —Tantia.
 Mibi bédamboen chuinu. Nëbi nëid
 macuësh dapanshunuidtsëqui Nuquin
 Papa tantienquo icquin Edusaden
 yacnoshonuidtsëqui tantienquo icquin
 nidaid utsi-utsiec yacnoshon adembidi
 Nuquin Papa tantiabedendac. ²²Min
 matsesën Nuquin Papan chiaid
 daëdpactsëc tantiatsëcshun Nuquin
 Papa bëdiactsëc tantiatsec. Con matses
 isadaidbombien Nuquin Papan chiaid
 dadpen tantiashun: “Nuquin Papan
 chomiaid nuquin matses bédambo
 icmianquid nuquin matsesën tishendac,”
 quequin bédamboen tantiec. ²³Nëbien
 utsin-utsinquien muainquo icquin:
 “Con Icbo nec,” quequin Nuquin Papa
 tantiendac. Ambi chiacpadec
 bédamboec tabadsho isash: “Adquid ëbi
 tantiaquidquo nec,” quetsiash Nuquin
 Papa. ²⁴“Nuquin Papa tantiaquid
 ictiadquid iquebi,” quequidën Nuquin
 Papan Mayanën tantiamiacpadomboen
 abi tantiaquin ambi chiacpadomboen
 naquid nendac —quepac caondash Esus
 acte uequid chido chiec.

²⁵Adsho tantiash chido: —“Nuquin
 Papan matses bédambo icmequid
 chuiquid dapa chomendac,” quequin
 chuisho tantiondambi. Aid mesias caidi
 utsibon quidistu caposh. Aidëmbi nuqui
 tantienquo yaidtedi tantiametsiash.
 Aidbimboecquidien mibi nechitec
 —caquien: ²⁶—Mimbi chiaidquobini nec
 —quepac caondash Esus chido chiec.

Esus Samadia yacnocquido chiec tabadaid

²⁷Adnubini pete bedtanec chopondac.
 Adshun isquien chidobëd onquepec.
 Adsho isash: —¿Atotsi chiec chidobëd
 onquepec? —quepondabi utsibëd
 otacquo onquec. —¿Atotsi chiec
 chidobëd onquo? —cainquo
 iccondambi Esus. ²⁸Adec ëbi chonobi
 tëchu nianec acte uec choquid chido
 nidpondash aton matses chiec shubuno
 nidec. ²⁹—Isec cho. Ëmbi isacmaid
 dadan ëmbi naid abitedi chioshi.
 ¿Nuquin Papa yacnuësh choquid
 Quidistu caidta nioshe? En isec cho
 —catuidac: ³⁰—En isnu. Nid. Aidien
 nechitashe. Isnu —quianec matses
 dadpen cho-chopondash.

³¹Aido choabi icnubi: —Në pete, Icbo
 —ëmbi caquien: ³²—Padi. Mimbi
 tantienquo yaid con na utsi iquec
 —quepondash Esus petepenquo
 chiequi. ³³Adsho tantiashini pete ca
 danec: —¿Utsibonda pete bëshumpash?
 —quecuededpondac ëbitedi. ³⁴Adsho
 tantiash Esus: —Ëbi cuishoncamete utsi
 iquec. Ëbi chomiondaid Nuquin Papan
 chiacpadomboen naic bédambo iquebi
 pete piacbimboec. Ambi chiaidtedi
 nainuec dayacquid iquebi
 —quepondash. ³⁵Adashic padpidec:
 —“Ushë daëd-daëdquiecnuc nidmeshun
 nadquid adosbiecquid ëshëacsho
 bedembi,” quepec nuquin matses.
 Adosbiecquid ëshëacpaden çyuecshunda
 nëmbo icquidon ëbi tantiabempec?
 Padenquo. “Nëidon Esus tantierendac,”
 mimbi cacmaidobi cho-choeque. Is.
³⁶Acte uequid chido ëmbi chuiboedën
 chiac matses dadpen cho-choeque.
 Chuibanuna. Ëbi tantiash Nuquin
 Papabëd tabadtequid yanendac. Adsho
 isash nuqui cuishonquendac piucquid
 bedashbimboec. ³⁷Tied icbon: “Con na
 peta,” cac ambi nidtsinacmaid matsesën

bedec. ³⁸Aden ambi nitsinacmaid bedacimboen mimbi naic. Utsibomba Nuquin Papan chiaid chuibanëdaido nëmbo icquido mimbitsen chuibanec. Adoac nëmbo icquidon Nuquin Papabëdta ëbi tantiabenec. Cho-choeque. Is. En chuiban —capondash Esusën abëd icquido chuiquin.

³⁹Adnubien Esusbëd onqueboed chidon chuitanaido cho-chopondash. —“Comapenen tantiaquin ëmbi naid abitedi chioshi,” quioshe. Nuquin Papa yacnuësh choquidien nechitashe. Isnu. Nid —quianec cho-chopac caondash. ⁴⁰Cho-choquimbi badedi: —Ëbi yacno ushquin chiec cho —quequin beduanac Samadia yacno tabadquin chuibampondash Esusën. Aid matses chiec ambo daëdec ushpondash. ⁴¹Aden Esusën chuisho tantiashien: —Nuquin Papa yacnuësh choquid Esus nec —quiampondash anocquido dadpen. ⁴²Adashic acte uequid chido chiec: —Mimbi chuishouidi tantiaboedëmbi nëmbi aidënquio chuisho bëdamboen tantiaquioc. “Nuquin Papa matses bëdamboen ismequid nec,” quequin tantiembi —quiampondash Samadia yacnocquido dadpen.

Chuiquid dapan mado Esusën bëdamiaid

⁴³Daëdec ushanec Samadia yacnuësh Esus nidondash. Abi caniondacno nidaid Cadidia caid yacno nidpondash. ⁴⁴—Ëmbi chiacpaden abi caniondacnoshon Nuquin Papan chiaid chuibanquidën chuisho aton matsesën tantienquio iquec. Con nidaidën nidsho con matsesën abi chuiquid dapa icmetiapimbo icpebi —quianec aton nidaidën chopondash. ⁴⁵Adsho isun: —Tantiesia nendac —Esusën caboedombi abi bëdiactsëc tantiatsëccondash. —¿Choecta icco?

Nuquin Papan nuquin tsusedpabo unës uainquio icquin matamiampid inchësh tantianuec Edusaden yacno nidshun mimbi nadatiambo icquin nabansho isondambi —quepondash abi bëdiactsëc tantiatsëcquido Esus chiec.

⁴⁶Adec aton nidaidën nidequi ambi actequid uaondacno Cana yacno nidpondash Esus. Adnubien shubu dadpen icquid utsi Capednaun caid yacno con matses chuiquid dapa icpac caondash. Aidën mado unës-tiadtsëcquio yampac caondash. ⁴⁷Adashic: —Esus Udeya yacnuësh choac caoshe. Istanu —quianec chopac caondash unëstiadtsëcquio icquidën papa. Adec Esus yacno choshombien: —Con mado unëstiadtsëcquio iccoshe. Bëdamec cho —caqui ⁴⁸nidenquio yec abi datsidadquido chiec: —Ëbimbo mimbi tantienquio iquec. Ëmbi bëdameteuidtsëqui mimbi tantiec. Ëmbi comapenen tantiaquin nabansho isunuidtsëqui: “Nuquin Papan chomiaidien nechitec,” quequin mimbi tantiec —quepondash Esus.

⁴⁹Adec onqueshobien abi niacbidanquin padpiden: —Baded cho. Con mado unëstiadtsëcquio iccoshe —capondash. ⁵⁰Adoquien Esus: —Padi. Min mado unësenquio ye. Nidec nid —quesho tantiash: —Abimbo caic —quianec nidpondash. ⁵¹Adec nidquimbi abi chuinuec cho-chosho aton yuabo bëquedac caondash. Aden bëquedadaki yuan: —Min mado bëdanosh —quesho tantiashun: ⁵²—¿Mitsimbo ushë icnuc con mado bëdanosh? —cac: —Ënden ushë yaquëduidtsëcnubi da una yantsëcnubi bëdanosh —quepac caondash aton yuabo. ⁵³Adsho tantiash: —Adënquioshendabi: “Min mado unësenquio ye. Nidec nid,” caposh Esusën —quepac caondash

unëstsemboedën papa. Adshun:
—Nuquin Papan chomiaidquio yec
comapenen tantiaquin nabanquidquio
Esus nec —quequin aton shubun
icquidobëdtambi Esus tantiapac
caondash. ⁵⁴Adec Udeya yacnuësh
choash Cadidia yacnobidi ambi uba
chinaid actequid uaquin ismequin
tauaondacnobidi tabadquin
bëdamequintsen Esusën ismepondash.

Esusën dada icsatsaid bëdamiad

5 ¹Yuecquio ictanec Esus:
—Edusaden yacno cuëdënuec
nuquin matses cho-choeque. Nuquitsen
nidnu. Nid —quianec nidanepondash.
²Shubu dadpen icquid Edusaden caid
dacuenadquin daquënë uaid puduedte
shëcuë dadpen icnuc abentsëc obeca
puduedte caid icpondash. Aid
anoentsëqui acte tiqidimbo icquid
icpondash. Aid con onqueten Betesada
capondash. Ambobi daicsaido tabadte
shubumpi mëdantetedi icpondash. ³Acte
nënantanquio icnuc dacuenadquiec
shubumpi tabadquidën matses dadpen
tabadpondash daicsaidouidquio.
Bëshuaido yec capuenquio icquido yec
canite tsasiaido yec quec tabadpondash.
⁴—“Nuquin Papan abi yacnoshon uaid
mayan bëdan tèccuascaid acten abia
mentoadquid bëdanquid,” quedeneque.
Tëccuascaic ma chobono —quiash
cainec tabadpondash.

⁵Adnubien Esusën ënden caniaidquio
ambobi uesho istuidpondash.
Ëndenquimboshë aton dada icsabudash
seta dadpen 38tedquiobi matamec
capuenquio yec icsabudtsaidquio
nepondash. ⁶Adsho istuidshun:
—Ëndenquio daicsabudaid nec
—quequin tantiashun: —¿Bëdanteda
bune? —catuidpondash Esusën.
⁷Adoquien: —Ai ¿mitsipadequini
bëdampe? Èbi bëdiactsëcquio nidnuc

utsiba badedquio mentoadteniosh. Èbi
buanquin mentoquid nibëdec
—quepondash daicsatsaid. ⁸Adshobien
Esusën: —Min ushte nacnentanquin
buanec nid —cac ⁹badedquio aton dada
bëdantanquin aton ushte buanec
nidpondash. Aid ushë chonoadenquio
icte ushë niondash.

¹⁰Aden buanshobien con matses
chuiquidon: —¿Chonoadenquio icte
ushënda ushte buampaid? Chonoadte
ushëmbien ushte buanquid.
Tsusedpabon dada uapampid ma mimbi
niacpayoc —quequin chushcapac
caondash. ¹¹Adoquien: —Èbi
bëdameboedën: “Buanec nid,” cac
mambi naiyoc —quepac caondash
Esusën bëdameboed. ¹²Adsho
tantiashun: —¿Tsuntsin naosh?
—caquien: ¹³—Tsaudi. Èmbi isacmaid
ëmbi isquiambobi badedquio nidaccosh
matses dadpen icnuc —quepac
caondash bëdameboed.

¹⁴Adshumbic Nuquin Papa tabadte
shubu uashunaid daquënë uacno
puduedshun ambi bëdameboed
daicsacboed Esusën istuidpondash.
Istuidshumbien: —Tantia. Mibi chuinu.
Èmbi bëdameboedquio mibi neque.
Mimbi icsamboen naid ënash bëdambo
icta. “Nuquin Papan cuidquiac
bëdanenquio yec
daicsabudquiochitomane,” quiash adta
—capondash Esusën.

¹⁵Adoquien bëdameboed abi:
“¿Tsuntsin naosh?” caboedo chiec
nidpac caondash. Nidshumbic: —Èbi
bëdameboed Esus niosh —quequin
chuituidpac caondash. ¹⁶Aden chuisho
tantiatanequien: —Chonoadenquio icte
ushënuidi bëdamepac caosh. Icsambo
iquec —quequin con matses chuiquidon
Esus chieshëmpac caondash.
¹⁷Adnubien: —Mibi adosh —quesho
tantiashun abi chieshënuquido istuidshun

Esusën naden chuipondash. —Mimbi Nuquin Papa caid con Pa ënenquo icquin matses nashunquidquo nec. Adecbidi ënenquo icquin matses nashunquidquo nebi. Chonoadenquo icte ushëmbidi con Pabëdtan adoquid nebi —quepondash Esus. ¹⁸Adsho tantiatanequien: —“Chonoadenquo icte ushën naquid icsambo iquec,” nuqui caboedquo: “Nuquin Papambo con pa nec,” quiosh. Adquid icsamboshë iquec. “Nuquin Papapadquidquo nebi,” quechitequien nioshe. Cuesunequimbien ictiad —quepac caondash con matses chuiquido.

Nuquin Papan Mado nebi, quiaid

¹⁹Adec abi chieshënquido abi cuesunete bunshobien padpiden istuidshun chuipondash Esusën. —¿Ëmbimbo naidtambi nadio? Padenquo. Con Pan nasho isun aidën nacpadomboen mambi naboc. Adomboembidi Con Pan nacpadomboen naimbi. Ëmbentsëqui natiapimbo iquebi. ²⁰Ëbi tantiaquin Con Pan ambi naidtedimbo ëbi tantiamec. Ambentsëqui nainquo iquec. Aidën tantiamiacpadomboen bëdiactsëc naquin nëid capuenquo icquid bëdamiombi. Adembidi ambi tantiamiacpadomboen naquin dacuëdampamboecnuc naindambi ma isquionoeshun. ²¹Con Papadquidquo yec unësaid uincumequidquo nebi. Matses ëmbi tantiaidotedi ëbëdi tabadmenuen uincuemendambi. ²²Ëbi tantiesabo cuidnuen ambiuidtsëqui chuiquidta con Pa nedic? Padenquo. Ëmbien ambi chiacpadomboen naden chiendac. “Nëid nuqui tantiaquid neque. Nuquibëdi tabadmenuna. Nëid ëbi tantiesä icsambo icsho cuidnuna,” caindambi con Pa. ²³Aidëmbi: “Ëbi tantiacpaden ma con Madotsen

bëdamboen tantianu,” qeshun aden matses cuidte chuiquid icmiondashi. Ëbi adquid icmiondaid icsho ëbi tantiatiapimbo icquidon ëbi chomiondaid Nuquin Papatsen tantienquo iquec. ²⁴¿Muectabi nedi? Abimbo chuinu. Tantia. Ëbi chomiondaid con Pabëdtan ëbi tantiaquid unësascho cuidenquo icquin ëbëdi tabadmendambi. Cuidtequid icboedi ëbi tantiasch ëbëdi tabadtequid yanendac —quepondash Esus.

²⁵Adashic padpidec onquec: —Tantia. Mibi padpiden chuinu. Unësaidën tantienquo yacimboen ëbi tantienquo icboedombi ëbi tantiabensho bëdamboen tantiamequin bëdamboec tabadquid icmendambi. Adshun aido unësascho uincuemeshun ëbëdi tabadmendambi. ²⁶Con Pan icmiacpadequi unësaid uincumequid nebi. Abibi unëstiapimbo icquid icquin unësaid uincumequidquo con Pa nec. Ambi icmiacpadequi abi yacpadquidquo iquebi. ²⁷Adec unëstiapimbo iccondaidi matsesash icsaisambo icsho Con Pan matses icsaido cuidquid icmiondashi. ²⁸Ëbi adsho tantiaschun: “¿Abimbobida capeba? Muequien nechitec,” ëbi cainda. ¿Muectabi nedi? Padenquo. Con Pan tantiacpadënquo ëmbi cuënac unësaidotedi uincuenendac. ²⁹Adec uincuenascho ëbi tantiaquido ëbëdi tabadmequin ëbi tantiesabo icsaido cuidacno nidmendambi. ³⁰Ëmbentsëqui nainquo iquemb. Con Pan chiacpadomboen naquin matses cuidte chiendambi. Matsesën naidtedi tantiaquid icquin adoendambi. Ëmbi naid nainquo icquin Con Pa bëdambo icmenuen aidën chiacpadomboen naimbi —quepondash Esus abi chieshënquido chieci.

**Utsintsen ëbi chiec,
quequin Esusèn chiaid**

³¹Adshumbic Esusèn abi chieshënquido chuiopondash. —Nuquin matsesèn naden chiec. “Abentsëcshun chiaid icsambo iquec. Daëdshun chiaid abimbo iquec,” quequin chiec. Aden chiaid tantiec ëbiuidtsëqui: “Nuquin Papan Mado nebi,” quesho tantiashun: “Abimbo mimbi caic,” mimbi ëbi catiapimbo iquec. ³²Ëbi tantiaquin abimbo chuiquid ma utsi iqueyoc. Nuquin Papambini: “Con Madombo nec,” caindac. ³³Aden ëbi chuiquid utsi acten mentoanquid Uan pado icpadenec. Aidëmbi ëbi abimbo capadenec. “¿Nuquin Papa yacnuësh choquidta ne?” quequin mimbi chuitanac: “Padenquio. Esusuidi Nuquin Papa yacnuësh choquid nec,” quepadenec Uan pado. ^{34,35}Aden chieshtoenquio icquin bëdamboen chuipadenec. Chuiho tantiatsash mibi bëdambo icuidtsëcondac. “Ëmbi Uan padon naid chuisho tantiashun: ‘Abimbo mimbi caic,’ ëbi capashun. Ëbi adosho bëdamboen istsiambi,” quequin mimbi tantiondaid Uan caombi. Matses icquimbi Uanèn ëbi bëdiactsëc tantiamequin chuipadenec. ¿Adquid matsesënuidtsëquidabi abimbo chuipec? ³⁶Con Pambien: “Con Mado neque. Matses ismenu,” queshun comapenen tantiaquidquido icmepondashi. Ambi adomiaid icquin comapenen tantiaquin nabanquin ëmbi ismeho isash: “Ai, adquid nec,” quetiadquidi mibi nec. ³⁷Ëbi chiecbidi onquequin Nuquin Papan nuquin tsusedpabo dada uamepampic. Adecbidi Nuquin Papa onquesho ¿ada mimbi tantiapadio? ¿Nuquin Papada istio? Padambo mimbi iquec. ³⁸Adembidi ambi dada uamequin chiampidquido ma mimbi bëdamboen

tantienquio yoc. Aid bëdamboen tantiashumbien Nuquin Papan chomiondaid ëbitsen mimbi tantiatsiac. ³⁹Mibi nadpec. “Nuquin Papan chiaid nuquin tsusedpabon dada uampid tantiaquidquido nebi. Aid isbanquid yec Nuquin Papabëd tabadtequid nebi,” mibi quepec. Ma ëbimbo chuiquin Nuquin Papan dada uamepampid neyoc. ⁴⁰Aden dada uamepampid isbanquidombi mimbi ëbi tantienquio iquec. Ëbi tantiashoembi mibi Nuquin Papa yacno ëbëd tabadmetsiandac. ⁴¹“Ëbi adsho tantiashun ma matsesèn ëbi: ‘Bëdambo mibi iquec,’ canu,” ¿quectabi ique? Padenquio. Con Pan chiacpadomboen nanuembimbi aden chioc. ⁴²Ëbi tantienquio icsho isun: “Nuquin Papa tantiesabo nec,” quequin mibi tantiembi. ⁴³Ëmbien Nuquin Papan chiacpadomboen naic. Aden nasho mimbi ëbi tantienquio iquec. Utsi: “Nuquin Papa yacnuësh choquid nebi,” quec muaquidien mimbi badedi tantiatsiac. ⁴⁴Mibibi tantiadec: “Mibi bëdambo iquec,” cananteuidi bunquin mimbi Nuquin Papa tantiatiapimbo iquec. Aden mimbi Nuquin Papa: “Mibi bëdambo iquec,” cametiapimbo iquec —quepondash Esus abi chieshënquido chiec.

⁴⁵Adashic padpidec: —¿Ëmbentsëquidambi: “Ëbi tantiesabo neque. Cuidnuna,” quequin mimbi naid Nuquin Papa chuipe? Padenquio. Mimbi tantiaidënquio Moisesëntsen: “Nëido icsambo iquec,” mibi caindac. ⁴⁶Aidën chiampid bëdamboen tantiaquimbien mimbi ëbi tantiatsiac. Aidën chiampidi mabi neyoc. ⁴⁷Aden Moisesën chiampid tantienquio icquin ëmbi chuiboedtsen mimbi tantiatiapimbo iquec —quequin Esusèn abi chieshënquido chuipondash: —Moisesën chiampid tantiaquidquido nebi —quequido chuiquin.

Esusën pete uatanquin 5000tedi pemiaid
(*Mat. 14.13-21; Mad. 6.30-44; Duc. 9.10-17*)

6¹Yuecquio ictaniash Edusaden yacnuësh nidec Cadidia yacnobidi Esus nidpondash. Ambo nidash chian dapa Cadidia caidbidi budash cano antabëdtoshon potiacpondash. Aid chiambidi matses utsibon Tibedias capondash.^{2,3}Poteshun nandoash pudundoanec macuësh dapa dectatoash macuësh poctsebi tabadtuidpondash. Ambo tabadquin ëbi chedo chuipondash. Adnubien Esusën matses dadpen bëdamesho isboedo Esus isnuec cho-chopondash.⁴Nuquin Papan isadaidbo unës uainquio icquin matamiampid inchësh tantianuec pec tabadte ushë nëbi yanuc niondash.

⁵Aido cho-chosho istanequien Esus: —Uedipe, piucquid buanshun ÷mitsimbo pete bedtane nëido pemenun? —quepondash Uedipe chiec.⁶—¿Atoda queque? Tantianu —quiash adpondash Esus. —Pete bedabi icnuc ëmbibi pete uanu —quequin otacquio tantiequi adondash.⁷Adoquien Uedipe: —Ma aidtedquio pemetiapimbo yoc. Inchëshën ushë 8tedquiobi nidmec chonoadshun bedaidtedimbo piucquid menequin pete bedshun: “Pemenu,” cac aidtedquio pemiadenquio ictsiash —quepondash Uedipe.

⁸Adnubien Andedesën Petedon utsin:⁹—Ma në madompin panëmpi 5tedtsëc icpayoc, Icho. Nuëcquidëmpi daëdquioibi ictsec. Matses dadpenquio iquec. Aidtedtsëcquid pemetiapimbo iquec —caquien¹⁰Esusën: —Padi. Aidi bëdambo iquec. Abitedi: “Nëmbo tabad,” caban —cac: —Nëmbo tabad —cabanac sebad-sebadpambo icquidën uasinën matses dadpenquioshë tabadbudpondash. Dadaidtsëqui tambanac 5000ted icpondash. Chido

bacuëbobëdta tambanambo icpondambi.

¹¹Adshumbien Esusën madompin pete pamba bedtanquin Nuquin Papa chuipondash. —Pete uaquid yec mibi bëdamboshë iquec. Mimbi uaid nëid pete bëdambo iquec, Papa —quec onquetanquin: —Meneban —cac abëd icquidon tabadquido abitedi menebampondash. Adotanquimbic nuëcquidëmpitsen bedtanquin ademibidi Nuquin Papa chuitanquin menebanoapondash. Adoac utsibon ambi piactembi pebedednubi utsibon ambi piactembidi pebededpondash.¹²Aden ambi piactembi pebededacshobien Esusën: —Napi uaid secainda. Sandoshon dayun ua —cac¹³tsitsan dapan napiuaid sandoshon dayun uapondambi tsitsan 12tedquiobi sandoaid icnuc.

¹⁴Aden pemiaquien pemiaido: —Comapenen tantiaquin Esusën pete dadpenquio icmiac. Moisesën chuiampidshenda nepec. “Nuquin Papan bëdamboshë icquid chomendac,” capampidshenda nepec. Aidien nuqui chuiquid dapa icmetiad —quepac caondash Esus tantiamenquio yec.

¹⁵Adsho ambembi tantiashien: —Abi chuiquid icmenuen ëbi “Bednu,” caique. Nëbi abi chuiquid ictiapimbo iquebique. Cuenu —quianec abentsëqui cuempac caondash Esus macuësh dapa dectatoec nidec.

Esus acte bëntse choaid
(*Mat. 14.22-27; Mad. 6.45-52*)

¹⁶Esus cuembon inchëshbudtsëqui chian budondabi ëbitedi.

¹⁷—Capednaun yacno nidnu —quec cano antabëdtoshon potenubi inchëshpondash Esus acte bëntse chopanushta.¹⁸Adnubien cunquequid dapa cunquetuidpondash. Acte

comapenec tëccuasquenuc
¹⁹uncadenquo yampondash. Ĕnapen
 nidabi nēbi 6 quidometedos
 cactionsēqui nidshun isquien
 matsesbimboec acte bēntse chopec.
 Adsho istanec dacuēdquiondabi.
²⁰Adshobini: —Ĕbi neque. Dacuēdenda
 —capondash. ²¹Adoac: —Esus nec
 —quetanquin badedi
 antsadtomiondambi. Aid
 antsadtometanquin badedquo
 potepondambi. Nandoash ambobi
 ushondabi Capednaun yacno.

Pemiaidon Esus istuidoaid

²²Adnubien abi pemeboconobi matses
 ushpac caondash. Badiadnuc
 isucunshun isaquien Esus nibēdec.
 Nibēdsho isashien: —Ma cano
 abentsēcquidēmbi abēd icquidon
 potepaboc. Ma aidbēd nidenquo
 icpaboc. ĔMitsimbo nidpash? —quepac
 caondash pemiaido. ²³Adnubien shubu
 dadpen icquid Tibedias caid
 yacnocquidon cano dadpen bē-bēpac
 caondash. Pete pemebocono anoentsēqui
 nando-nandosho isash:

²⁴—Potequimbien Esusēn yashe. Nēid
 canobi antabēdtoshon potenuna
 —quetanec antabēdtoshon
 potiac-potiacpac caondash.

Potiac-potiacash Capednaun yacno
 pudundoshon ²⁵Nuquin Papan chiaid
 chuibante shubun abitedi puduedshun
 Esus istuidpondash. Istuidshun:
 —ĔMitsipaden potio, tsusio? —caquien:
 —Naden —quenquo yec: ²⁶—Tantia.
 Mibitedi chuinu. ĔĔbimbo tantianuecta
 chodio? Padenquo. Ĕmbi pete uasho
 isash: “Nuquin Papan namiaidēn
 naoshe. Istanu,” Ĕquecta ictio?
 Peteuidtsēqui tantiaquin ma mimbi Ĕbi
 nibēneyoc. ²⁷Peteuidtsēqui tantiaquin
 pete bednuen naquidquo ma mibi
 neyoc. Aidquo chodquetequid nendac.

Chodquetiapimbo icquid tantiaquin
 bēdamboen nata. Aden nash Ĕmbi
 icmiacpadquiec Nuquin Papanbēd
 tabadtequid mibi yanendac. Nuquin
 Papan: “Con Mado neque. Ismenu,”
 quequin namiacpadomboen comapenen
 tantiaquid icquin mibi adquid
 icmetsiambi —quepondash Esus.
²⁸Adsho tantiash: —“Nuquin Papan
 chiacpadomboen nata,” quequeien
 mibi iquec. Adomboen natiadquo
 icquin Ĕatotsimbi nape? —caquien:
²⁹—Nuquin Papan chiacpadomboen
 natiadquo icquin ambi
 chomiondaidquo tantia
 —quepondash Esus ambi pemiaido
 chiec.

³⁰Adoquien: —ĔMimbi aden
 chuishouididambi: “Adquid nec,”
 quequin tantiape? ĔAtotsi utsi
 comapenen tantiaquin mimbi Ĕbi
 ismepatsia? ³¹“Ĕendenquimboshē pete
 nibēdacnoshon Moisesēn con
 tsusedpabo nibedbēdi sequiaid pete
 pemianepampic,” quequin dada
 uapampid isombique. Adquid
 nacnenquin Ĕbi isme —quepondash
 pemiaido peteuidtsēqui tantiec.

³²Adoquien Esus: —Nuquin tsusedpa
 Moisesēn nainquien icpampic. Con
 Pambien aden pemepampic. Nēbi ambi
 chomiondaid petebimboecquid utsien
 Nuquin Papan mibi tantiametiadquo
 iquec. ³³Aid petebimboecquidēn matses
 bēdambo icmetsiash pete
 piacbimboecnuc —quepondash Esus
 abibi cadequi.

³⁴Adsho tantiash petembo ca danec:
 —Ĕnenquo icquin adquid Ĕbi pemeta
 —quepondash pemiaido ambi
 peboeuidtsēqui tantiec. ³⁵Adshobien
 Esusēn: —“Ĕbiuidtsēqui
 petebimboecquid icquin matses
 bēdambo icmequid nebi,” caimbi. Ĕbi
 tantiaquid Ĕnenquo icquin bēdambo

icmendambi petebëdi acte bundoenquo yacimboecnuc. ³⁶Ëmbi chuibocpadomboen ma mimbi ëbi tantienquo icboc. Ëmbi comapenen tantiaquin nabansho isumbi ma mimbi ëbi tantienquo icboc. ³⁷Utsibombien ëbi tantiendac. Nuquin Papan tantiamiaidtedishun ëbi tantiasho bédamboen isquin cacumenquo iquendambi. ³⁸¿Ëmbi tantiacpadomboen nauquidtabi nedi? Padenquo. Nuquin Papan chiacpadomboen nanuec mabi abi yacnuësh chondac. ³⁹Aden aidën chiacpadomboen nanuen ëbi tantiaquido unësacsho uincuemeshun cuidenquo icquin ëbëdi tabadmendambi. Unësaid abitedi uincumete ushën adoendambi. ⁴⁰Nuquin Papa bunacpaden ëbi tantiaquido uincuemeshun Nuquin Papa yacno ëbi tabadacnombo tabadmendambi —quepondash Esus ambi pemeboedo chiec.

⁴¹Adec: —Nuquin Papa yacnuësh chondaid yec petebimboecquid nebi —quesho tantiashien con matses chuiquido: ⁴²—¿Adquidida nepec? Ma icsamboen chuiPAYOC. ¿Nuquin Papa yacnuësh choaidta nedic? ¿Nuqui isacmaidta nedic? Ma Esus cuëmédquid neyoc. Ma Osen mado neyoc. Anitsen tantiemi. Matsesën tishaid Nuquin Papa yacnuësh choquid ictiapimbo iquec —quecuededpondash.

⁴³Adshobien Esusën: —Shoshquetsëcquin ëbi icsamboen chienda. Abimboemi caoc. ⁴⁴Ëbi chomiondaidën Nuquin Papan tantiamiabi yaido icquin mimbi ëbi tantiatiapimbo iquendac. Nuquin Papan tantiamiaid icquin mimbi ëbi tantiatiasiac. Aden Nuquin Papan ëbi tantiamiaido unësacsho unësaid uincumete ushën uincuemendambi. ⁴⁵Aden Nuquin Papan tantiamete

chuiquin nuquin tsusedpan dada uapampic. “Nuquin Papambien ambi bédamboen iste matses tantiamendac,” quequin chuiPAMPIC. Aden Nuquin Papan tantiamiaido ëbi tantiaquido yantsiash. ⁴⁶“Ambi tantiamiaidën matsesën Nuquin Papa isplash,” quenquo iquebi. Ëmbiuidtsëqui abëd icquin Nuquin Papa isondambi. Aden abëd icquin abi isondaiddi matsesondabi —quepondash Esus: —Matsesi nec —abi caquido chiec.

⁴⁷Adashic padpidec: —Abimbo caombi. Ëbi tantiaquido Nuquin Papa yacnombo ëbëdi tabadmendambi. ⁴⁸Petebimboecquid icquin aden tabadmendambi. Adecbidi bédamboec tabadmianquid nebi. ⁴⁹Nuquin tsusedpabon pete utsi nibëdacnoshon mana caid pepampic. Aid pequidi tsusiobudash unëspampic unëstiapimbo icquid yanabi. ⁵⁰Petebimboecquid utsien Nuquin Papa yacnuësh chondaid nëmbobi iquec. Aid piash ëmbi chiacpadquiec padpidec unësenquo yec Nuquin Papabëd tabadtequid yanendac. ⁵¹Adquidquido nebi. Con nami piash matses unëstiapimbo icquid yanendac. Adquidquido matses icmenuec ëbided cuidadquin con nami menendambi —quepondash Esus ompoacximboen chiec. —Ëbi tantiaquido nëbi bédamboen tabadmeshun unësacsho Nuquin Papa yacno ëbëdi tabadmendambi padpidec unëstiapimbo icnuc —quequin tantiec:

—Petebimboecquid icsho ëbi piash matses unëstiapimbo icquid yanendac —quepondash Esus. —Ëbi tantiaquido cuidmenquo icnuec ëbided cuidadec unësendabi —quequin tantiec: —Con nami menendambi —quepondash Esus.

⁵²Adec: —Con nami piash matses unëstiapimbo icquid yanendac —quesho tantiashien namimbo ca danec con

matses chuiquido onquecuededpondash. Utsi-utsiec: —¿Mitsipaden Esusën aton nami nuqui pemepatsiash? Aidquio tantiatiapimbo iquebi —quecuedednubi utsi-utsiec: —¿Atotsi chuitiadquio yec niosh? Chuisho tantianu —quecuededpondash.^{53,54} Adsho tantiashun Esusën ambi chiacpadomboembidi chuiopondash. —Tantia. Mibi chuinu. Matses tantiaquidquio nebi. Aden tantiaquieç ebided cuidadec unësendabi. Èbi adec unëso isun con nami pequinc con intac acquinc cash nidaidënuësh bëdamboeç tabadquid yanash Nuquin Papabëd tabadtequid mibi yanendac. Adquid icsho unësaïdo uincuemete ushënquio uincuemendambi ebëdi tabadmenuen. Èmbi chiacpadomboen nainquio yash Nuquin Papabëd tabadtiapimbo mibi iquendac.⁵⁵ Ai, con nami petebimboeçquid nec. Con intac actebimboeçquid nec. ¿Petebëdi acte naimëdanda mibi bëdambo icpatsia? Adeçbidi con intac chididiqueç con nami icsabudeç ebided cuidadec unësaïd tantienquio yec mibi bëdamboeç tabadtiapimbo iquendac.⁵⁶ Aden ëmbi namibëdta intac chuisho bëdamboen tantiashun ëmbi chiacpadomboen matsesën natiadquio yanendac. Adsho isun aïdbëd tëshnanenquio icquin bëdamboeç tabadquid icmendambi.⁵⁷ Nuquin Papa unëstiapimbo icquid yec matses uincuemequidquio nec. Aidën chomiac ambi namiacpadomboenuidi naquin ëbi tantieç tabadquid unësaçsho uincuemequin unëstiapimbo icquid icmendambi.⁵⁸ Aden ëmbi naid tantiamenuec: “Nuquin Papa yacnuësh chondaid petebimboeçquid utsi iqueç,” quiobi. Èbi adquid icsho isash ëbi tantiaquid Nuquin Papabëd tabadtequid yantsiash. Nuquin tsusedpabon

pepampidpadquidpenquio nebi. Adquid pequidi tsusiobudash unëspampic. Èbi tantiaquidien padpideç unëstiapimbo icquid yanendac⁵⁹—quepondash Esus Nuquin Papan chiaïd chuibante shubunuësh Capednaun yacnuësh.

Abi tantiauidquidon Esus nianondaid

⁶⁰Adec: —Con nami pequinc con intac acquinc cash mibi bëdambo ictsiac —Esus qesho tantiashien abëd icquido utsi-utsiec: —Aidën chiacpadomboen natiapimbo iquebi. Icsamboen chieç —quepondash Esus tantiamenquio yec.⁶¹ Adec onqesho ambembi tantiash Esus onqueopondash. —¿Èmbi chuiboed tantiash chieshtotiadquioda ique? ⁶²Nuquin Papan matsesmiaïd yequi unësaçsh ëbi iccondacno ëbi nidacsho isash ¿atoda mibi quendac? Abimbo caombi. Nuquin Papa yacnuësh chondaidini nec.⁶³ Namimbo intacquiobëdta ca danequien mibi nec. ¿Namimbo pequinc intacquio acquinc cashta mibi bëdambo icpatsia? Padenquio. Nuquin Papan Mayanën ëmbi chuiboedbëdta ëbi tantiamequin matses bëdamboeç tabadquid icmetsiash. Adoaïd unësaçsh Nuquin Papa yacno ebëdi tabadtsiash —quepondash Esus cuembo chieç.⁶⁴ Adashic padpideç: —Èmbi aden bëdamboen chiaqui utsin-utsinquien mimbi ëbi tantienquio yanendac —quepondash abi tantiauidquido chieç. Aïdo tauamboeç abëdi nidnuc: —Nëïdën ëbi tantienquio yanendac. Nëïd utsin ëbi chieshënquido ëbi bedmendac —quequin ambembi Esusën tantiapänëdash.

⁶⁵Adashic padpideç: —Èbi tantiauidquido tantiaquin naden chiombi. “Nuquin Papan tantiamiabi yaidën ëbi tantiatiapimbo iquendac. Nuquin Papan tantiamiäidënuinquien ëbi

tantiashiash,” quequin chiombi —quepondash Esus. ⁶⁶Adsho tantiashun dadpeshun Esus nianondash. ⁶⁷Aden nianaquien Esusën abëd icquido 12ted icquid chuipondash. —¿Mimbisendabi niampe? —caquien ⁶⁸Petedo: —Padenquio. ¿Tsudabëd icnuendambi mibi nianuc? Mibipadquid utsi nibëdec. Mimbuiidtsëquien: “Èbi tantiaquid bëdamboen isquin unësacsho uincuemeshun ëbëdi tabadmendambi,” quequin chuipoc. ⁶⁹“Abimboen caosh,” quequin mibi tantiambi. “Nuquin Papa yacnuësh chonëdaid yec bëdamboshë icquidquien nec,” caombi mibi. Mibi niantiapimbo iquebi —quepondash Petedo Esus caic. ⁷⁰Adoquien Esus: —Ai, mibi adquid icnuc utsien icsambo iquec. Mibitedi: “Nuquibi icnu. Cho,” cabampondambi. Èmbi adondaid abentsëc Satanasën namiaidquio yec icsamboshë iquendac —quepondash Esus. ⁷¹—Simon Iscadioten mado Udasën ëbi chieshënkuido ëbi bedmendac —quequin ambembi tantiash adondash Esus.

Aton utsibon Esus tantienquio yaid

7 ¹Abi tantiauidquidon nianac Cadidia yacnoudi yuec Esus capucuenepondash. —Nidaid Udeya caid yacnocquido con matses chuiquidon ëbi cuesunetiadquio iquec —quiash Udeya yacno nidenquio icpondash. ²Adnubien con matses abitedi: —Edusaden yacnuësh cuëdëntanu —quiampondash. Adanec nidaid utsi Udeya caidën nidec 7tedec ushec cuëdënuéc matses dadpen nidacno Edusaden yacno nidanepondash. Cuëdënuéc Esus nidenquio icpondash. ³Adec nidenquio icsho isumbien aton utsibon: —Edusaden yacno nidec nid. Mibëd ictiadquio icquid ano icnushe.

Comapenen tantiaquin nabanquin aido ismec nid. ⁴¿“Ma matses dadpeshun ëbi tantianu,” quequinda matses daëdpectsëc yacnoshonuidi napec? Matses dadpen yacno nidshun comapenen tantiaquin nabanquin ismec nid —capondash aton utsibon. ⁵—Nuquin Papan chomenëdaidquio nec —quequin tantienquio icquimbi adopondash aton utsibon. ⁶Adoquien Esus: —Matses dadpen nidnuc nidtiadquio yec mibia nidta. Abitedishun isnuc nëbi nidtiapimbo iquebique. ⁷Mibien anocquidon chieshëntiapimbo ye. Mibia nidta. “Nuquin Papan chiaid niac-niaquec mibi icsaic,” ëmbi cac chieshënondashibique. ⁸“Cuesunenushë,” quiash nëbi nidtiapimbo iquebique. Mibia nidta. Nuquin Papan tantiacpadec nidendabi ⁹—quiash anobi Cadidia yacno Esus tabadpondash.

Esustsen Edusaden yacnuësh cuëdënuéc nidaid

¹⁰Aden aton utsibo nidanemiash yuec-yuecpectsëc ictanec abitsen Esus nidpondash Edusaden yacnuësh cuëdënecc nidec. Abitedi ismenquio yec tsyuec Esus nidpondash. ¹¹Adnubien con matses cuëdëncuededacnoshon abi chieshënkuidon Esus nibëmpac caondash. —¿Mitsimbo icpec? ¿Ada nëmbo chosh? —quequin chuibenepac caondash. ^{12,13}Adsho tantiash con matses Esus chieshënkuido dacuëdënecc utsibo tantiamenquio yec sho-shoshquetsëcquiec onquepac caondash. Utsi-utsiec: —Esus bëdamboshë icquid nec —quenubien utsi-utsiec: —Ma icsambo icquid neyoc. “Nuquin Papa yacnuësh chonaidini nec,” quec ma muequi neyoc —quec onquecuededpac caondash.

¹⁴Adnubien con matses cuëdënecc taëbon abentsëc choec ushash Nuquin

Papa tabadte shubu uashunaid daquënë uaidën Esus puduedpondash. Puduedshumbic Nuquin Papan chiaid chuibampondash. ¹⁵Adsho tantiash: —¿Mitsipaden tantiashun chuiopen naic? Nuquibëdtan Nuquin Papan chiaid isbanambo aidën iquec —quepondash con matses chuiquido. ¹⁶Adsho tantiash Esus: —Ëmbembi chienquo icquin ëbi chomiondaidën chiaidquo chiec nebi. ¹⁷Nuquin Papan chiacpadomboen natiadquo icquidën bëdamboen tantiatsiash. Ëmbi Nuquin Papan chiaid chuisho tantiash: “Nuquin Papan chiaidquo chiec nec,” quequin tantiatsiash. Ëmbembi chuisho tantiash: “Ambembi chiaid nec. Nuquin Papan chiaidpenquien nec,” quequin tantiatsiash Nuquin Papa tantiaquidën. ¹⁸Ambembi chuiquidën: “Mabi matsesën bëdambo canu,” quequinuidtsëqui chuibantsiash. Adquidpenquieni nec. Ëmbien: “Ëbi chomiondaidquo ma matsesën tantianu,” quequin ambi chiaidquo chiendac. ¹⁹Mimbien adoenuquo iquec. Mimbi tantiaid nuquin tsusedpa Moisesën: “Cuesunenda,” quequin Nuquin Papan chiaidquo dada uapampic. Ëbi: “Cuesunenu,” caquin aidën chiaid ma mimbi niac-niaqueyoc —quepondash Esus abi chieshënkuido chiec.

²⁰—Mimbi ëbi: “Cuesunenu,” caoc —Esus qesho tantiashumbien ano tabadquidon: —Podobitsi icsa dapuededash mibi tantiadenquo yec onquepec. ¿Tsuntsin mibi cuesunepatsiash? —capondash. ²¹Adoquien Esus: —Nëidën ëbi cuesunetsiash —quequin chienquo yec: —Chonoadenquo icte ushën comapenen tantiaquin dada bëdamepondambi. Aden bëdamiacsho isash: “Adopenshenda naic. Chonoadenquo icte ushën daicsatsaid

bëdamequin Nuquin Papan chiaid niac-niacposh,” ma mibi quepondac. ²²¿Ëmbentsëquidambi chonoadenquo icte ushën nadi? Ma min matsesën adoapaboc. Mimbi tantiaid Moisesën chiaid tantiaquin dada bacuë tishacsho 7tedec ushun shui dëbid dëteshunequid mibi nec. Moisesën aden tauambo iquec. Moises tishabi icnubien Nuquin Papan chiacpadomboen naquin: “Nuquin Papan yuambo nebique. Ismenu,” qeshun Abadauanëmbien shui dëbid dëteshunequin tauapampic. Yuecquo ictaneshun adembidi Moisesëntsen adopampic. Nëbi adembidi naic chonoadenquo icte ushëmbi chonoadquimbi ma mimbi shui dëbid dëteshunequoc. ²³Aden Moisesën chiampid niaquenquo icquin shui nacnenquin mimbi bëdamboen naic. Ëmbitsen daicsatsaid dada abichobi bëdamequin mambi bëdamboen naondac. ¿Atotsi quequin ëbi chushcai? ²⁴Chonoadenquo icte ushën dada bëdamequid icscho: “Icsambo mibi iquec,” mimbi ëbi capec. Aden ëbi bëdamboen tantienquo icquin mimbi icsamboen chiec. Ëbi bëdamboen tantiaquioshon ëmbi naboed bëdamboen chui —quepondash Esus abi chieshënkuido chiec.

Esus bedshun cuesunetiad, cauidaïd

²⁵Adec Esus: —Chonoadenquo icte ushën naondambi —qesho tantiashien anocquido Edusaden yacnocquido naded onquecuedepac caondash. —Nuqui chuiquidon: “Cuesunetiad,” caboedien nëid nechitec. ²⁶En is. Abi chieshënkuidobëdi tabadquin chieque. Chuisho ma chuiquidon chushcainquo icboc. “Nuquin Papa yacnuësh choquid Quidistu caïd Esus nec,” quequin tantiashumbien nachitec —quetanequien ²⁷aidobidi: —Nuquin

Papa yacnuësh choquid ictiapimboen aid iquec. Abi caniacno tantiembi. Nuquin Papa yacnuësh choquid abi caniacno tantiadenquo ictsiash —quepondash ano tabadquido.

²⁸Adsho tantiashun Esusën Nuquin Papa tabadte shubu uashunaid daquënë uacnoshon chuibanquin abitedi tantiamenuen naden chuipondash. —“Ëmbi isondaid nec. Aton nidaid Cadidia caid yacnuësh caniquid nec,” ðquequindabi bédamboen tantiapadi? Ma mimbi padenquo yoc. Ëbembichondaidpenquo nebi. Ëbi chomiondaid abi iquec. Ma mimbi aidquiobi tantienquo yoc. ²⁹Ëmbien aidquo tantiendac. Aidbéd tabadondaidquo nebi. Adsho aidën: “Nid,” cac chondaid nebi —caquien ³⁰—“Con pa Nuquin Papambo nec,” quechitequien nec —qeshun abi chieshënquidon: —Cuesunemenuembien bedtiad —quetanquin: —Bednu —caqui bedadenquo icpondash. —Nëbi ma Esus unës uainquo icnu —Nuquin Papa quenuc bedmenquo icquin Esusën mëtampanëdash. ³¹Esus cuesunetiadquo icnubien utsibon dadpenshun Esus tantiabempondash. —Nëidpadquid utsi nibédtsiandac. Nuquin Papan chiaid chuiquin nuquin tsusedpabon dada uapampicpadomboen comapenen tantiaquin Esusën matses bédamebamposh. Nuquin Papa yacnuësh choaid Quidistu caid Esus nec —quequin dadpenshun Esus tantiabempondash.

**Ëbi istuidenquo iquendac,
quequin chiaid**

³²Aden Esus chiec sho-shoshquetsëcquiec onqueshobien Esus chieshënquidon padiseyo caidon tantiapac caondash. Adshun abëdtan chuiquid utsibo chuiyac caondash.

—Ëmbi chuibocpaden Esusien bedtiad. Icsamboec onquioshe —cac: —Ai, adembien ictiad —quepac caondash. Adshumbic abëd icquido sondado chuiquin: —Baded bedtan —capac caondash. ³³Adoac nidanequin tantiatuidaquien nadec Esus onquepondash. —Yuec-yuecpactsec mibëd icashic ëbi chomiondaibédtsen tabadoaic nidendabi. ³⁴Ëbi nibënquin ëbi istuidenquo mimbi iquendac. Ëbi nidacno mibi nidtiapimbo iquec —quepondash Esus.

³⁵Adsho tantiash abi chieshënquido: —Nuqui istuidmenquo icnuec ðmitsimbo nidpanuec nec? Matses utsi yacno tabadnuec con matses utsi-utsiec nidequi nidaniondacno nidshun ðanocquidoda chuiatsiash?

³⁶Tantiadenquo yec onquepec. ðAtotsi quepec? “Ëbi nibënquin mimbi ëbi istuidenquo iquendac. Ëbi nidacno mibi nidtiapimbo iquec,” quepequien iccosh. ðAtotsi quepash niosh? —quepac caondash Esus chieshënquido.

**Aton Mayan abi tantiaquidbéd
tabadmète chiaid**

³⁷Adnubien cuëdëneç ënëdte ushënquiobi con matses abitedimbo cuëdëneuc cho-chopondash. Cho-choash tabadbudnubien nidtoash comapenec onquequin Esusën chuipondash. —Acte natia bunacnimboec Nuquin Papa tantiate bunquin ëbi bédamboen tantiata. ³⁸Adsho Nuquin Papan chuiquin dada uamepampicpadomboen naindambi. Nuquin Papa tantiamequid utsi ëbi tantiaquidobéd tabadmendambi. Adoac mibéd tabadquin mibi bédamboen tabadmequin utsibotsen Nuquin Papa tantiate bumetsiash —quepondash Esus. ³⁹—Nuquin Papabëdta ëbi tantiamequidquo Nuquin Papan Mayan nec —quequin tantiec

adondash. Adquid abi tantiaquidobëd tabadmequin chomiabi aden chuipondash Esusën. Nuquin Papa yacno nidambien abi tantiaquidobëd Nuquin Papan Mayan tabadcuenondash.

¿Nuquin Papan chomiaidta nepeba? Esus caid

⁴⁰—Nuquin Papa tantiate bunquin ëbi tantiatia —Esus qesho tantiashien Esus chiec ano tabadquido onquecuedepac caondash. Utsi-utsiec: —“Nuquin Papan chiaid chuiquidquo choendac,” quequin nuquin tsusedpa Moisesën chiampidien Esus nechitec —quenubien ⁴¹utsi-utsiec: —Nuquin Papa yacnuësh choquid Quidistu caidien Esus nechitec —quenubien utsi-utsiec: —¿Cadidia yacnuështa Nuquin Papa yacnuësh choquid chopadic? ⁴²Padenquio. Nuquin Papan chiaidquio naden dada uapampic. “Nuquin Papan chomiaid nuquin tsusedpa Dabidën tsyuecquid nendac. Dabid caniampicnoshon shubu daëdpactsëcquid Beden caid yacnoshon aidi tishendac,” quequin chuipampic. Ma Esus muequi neyoc. Beden yacnoshon tishaidpenquio nec —quepac caondash. ⁴³Adec dadpen: —Bëdambo icquid nec —quenubi aidtedbidi: —Icsambo iquec —quepac caondash. ⁴⁴Adnubien: —Icsambo iqueque. Cuesunemenuembien bedtiad —queuidpac caondash. Adshun Esus bedabi icpondash.

Isadaidbo chuiquid dapabon Esus chieshënaid

⁴⁵Adnubien: —Esus bedtan —caboedo sondado bedabi Esus chieshënquido chiec chopac caondash. Chosho: —¿Atotsi quiash bedabi cho? —caquien: ⁴⁶—Ma bëdamboenshë chuiboc. “Adomboen chuibanquid utsi nibëdec,” qeshun bedtiapimbo iccobi —qesho

⁴⁷tantiashien: —Aid muasho tantiashun: “Abimbo caic,” ¿cainda icco?

⁴⁸¿Adambi Esus muasho tantiadio? ¿Ada tsusiobon tantiadiosh? Padenquio iccosh. ⁴⁹Utsibombien tantiash. Adquidon ëmbi bëdamboen tantiacpadomboen Nuquin Papan chiampid tantienquio iquec. Icsambo aido iquec. Aido cuidchitoshon. Esus icsambo iquec —quepac caondash con matses chuiquid padiseyobo Esus chieshë nec.

⁵⁰Adnubien inchëshën puduedash Esusbëd onquiondaid Nicodemo caid abitsen chuiquid yec nadpac caondash. ⁵¹—¿Abibi chuimiabida cuidpec? Nuquin Papan chuipampid nad iquec. “‘Icsambo iquec,’ caidi abibi chuimequin: ‘¿Atotsi nao?’ cac chuisho tantiashun cuidquid yendac,” quepampic. Adoac bëdambo ictsiash. Chuimiabi cuidac icsambo ictsiash —quepac caondash Nicodemo abëdtan chuiquid utsibo chiec. ⁵²Adoquien chuiquid: —Esus yacpader Cadidia yacnuësh caniquid mibi nepanui. Aid tantiaquidien mibi nec. Nuquin Papan chiampid isbanta. Aid isbanshun: “Cadidia yacnuësh Nuquin Papan chiaid chuibanquidquo choenquio iquendac,” quequin mimi tantiatsiac. Ma Esus muequi neyoc —quepac caondash chuiquid Nicodemo chushcaic. ⁵³—¿Chuimiabida cuidpec? —quetsëcsho aden Nicodemo chushcanec abitedi nidaniac caondash aton shubuno ushec nidec.

Bënëpenquio chudmequid cuënoten seshunetsenaid

8 ¹Nicodemo chushcabon Esus macuësh dapa Odibos caid yacno ushec nidondash. ²Adtanec choashic Nuquin Papa tabadte shubu uashunaid daquënë uaidën puduedpondash. Puduedsho isash matses dadpen

cho-choec abi datsidadsho Esusën chuipondash.

³Aden chuinubien con matses tsusiobon aton bënëpenquoio chudmesho istuidshun chido bëpondash. Moisesën dada uampid chuibanquidobëdtan tsusedpabon chiampid namequido padiseyobon Esus yacno bëshun chido nënantanquoio nitsimpondash.

⁴Adshumbien Esus chuipondash. —Aton bënëpenquoio chudmesho istuidshun nëid bëombi. ⁵Nuquin Papan chiaid Moisesën naden dada uapampic. “Aton bënëpenquoio chudmesho istuidshun cuënoten seshunequin unës uaquid,” quepampic. ¿Adembidida mimbi tantie? —quepondash chido bëquido.

⁶—¿Atotsi Esus quepatsiash? Nuquin Papan chiampidquoio chienquoio icsho: “Mimbi icsamboen chiec,” catiad —quiash adondash. —¿Adembidida mimbi tantie? —caquien Esusën ëcbedenquoio icquin shuebudshun mëdanten nidaid dada uapondash.

⁷Adshobien padpiden: —¿Adembidida tantie? —cado-cadoac nidtotanec: —Nuquin Papan chiaid niaquesambo icquin en mimbia cuënoten se —quetanec ⁸padpidec shuebudshun mëdanten nidaid dada uaoapondash.

⁹Adnubien: —Nuquin Papan chiaid niaquesambo icquin en mimbia cuënoten se —cac: —Nuquin Papan chiaid niaquesamboen nibëdchitec. Setiapimbo iquec —quetanec nidanepondash. Tsusioboba nidanebon caniabotsen tsyuec nidanepondash chidouidsëqui Esusbëd icnuc. ¹⁰Adec nidanian Esusën nidtoquin isquien nibëdec. Nidaniac. Abi bëboedo nidaniacsho istanquin: —¿Mitsimbo nidosh, champi? ¿Mibi cuënoten sequidta nibëdosh? —Esusën cac:

¹¹—Ai, nibëdosh —quesho tantiasien: —Ëmbimbo mibi cuënoten senquoio

iquembique. Mibi icsaid ënash bëdamboec tabadec nid, champi —capondash Esusën. Adoac chido nidondash.

Pabiate cuembo icnuc tantiamequid

¹²Yuec ictaniash Nuquin Papa tabadte shubu uashunaid daquënë uaidën Esus padpidec puduedoapondash.

Puduedshumbien abi chieshënquido tantiamequin padpiden chuiopondash. —Pabiate cuembo icnuc con Pan bëdamboen iste matses tantiamequidquoio nebi. Ëmbi tantiamiac ëbi tantiaquido icsateuidi bunenquoio yanec bëdamboec tabadte buncuenendac. Adec ëbëd tabadtequid yanendac —quepondash Esus.

¹³Adsho tantiasch abi chieshënquido: —Mibentsëqui: “Adquid nebi,” quesho tantiatiapimbo iquebi. Muequien mibi nechitec. Matses daëdshun chiac bëdambo ictsiasch —quepondash.

¹⁴Adsho tantiasch Esus: —Ëbibi abimbo cadebi. “Con Pa yacnuësh chondash anobidi nidendabi,” quec muainquoio iquebi. “Aton papa yacnuësh choash anobidi Esus nidoaindac,” quequin ma mimbi ëbi tantienquoio icboc. ¹⁵Cadidia yacnuësh choquid matsesuidien mimbi ëbi danec. Adquid danquin mimbi icsamboen chiec. Ëmbien abimbo chiec. Abimbo chuiquid icquin: “Nëid icsambo iqueque. Cuidnuna. Nëid bëdambo iqueque. Cuidenquoio icnuna,” quequin nëbi chienquoio iquembi. ¹⁶Aden chuiquin abimbo chuitsiambi. Ëmbentsëqui chienquoio icquin ëbi chomiondaid Nuquin Papabëdtambi chuiquin abimboshë chuitsiambi.

¹⁷Nuquin Papan chiaidquoio Moisesën naden dada uapampic. “‘Icsaosh,’ quequin daëdshun chuisho tantiasch: ‘Abimbo chiec,’ quequid yendac. Adecbidi: ‘Bëdambo iquec,’ quequin

daëdshumbidi chuisho tantiash:
 ‘Abimbo chiec,’ quequid yendac.
 Abentsëcshun chuishoen mua caquid
 yendac,” quequin Nuquin Papan
 chiaidquio Moisesën dada uapampic.
¹⁸Aden Moisesën dada uampid
 tantiashun ëmbentsëqui chienquio
 iquembi. Ëbi chomiondaid con
 Pabëdtantsëqui chiembi —quepondash
 Esus.

¹⁹Adsho tantiashun abi
 chieshënquidon: —¿Mitsimbo papa
 icpec? —capondash. Adoquien: —Con
 Pa ëbëdta ma mimbi tantienquio icboc.
 Ëbi tantiaquimbien mimbi con Patsen
 tantiatsiac —quepondash Esus abi
 chieshënquido chiec. ²⁰Abi
 chieshënquido onquecuededec quënën
 tabadnubi aid quënë cachoetsëqui
 Nuquin Papa tantiaquin piucquid
 menequin nauedte tabëcacnoshon
 Esusën chuipondash. Adec Esus
 anoentsëqui tabadsho abi
 chieshënquidon bedabi icpondash.
 Nuquin Papa: —Ma ëmbi
 tantiacpadënquio matsesën unës uanu
 —quenuc Esus bedabi icpondash.

Utsibon Esus tantiauidaid

²¹Adnubien Esusën abi chieshënquido
 padpiden chuiopondash. —Nidendabi.
 Ëbi nidan ëbi nibënquin mimbi ëbi
 istuidenquio iquendac. Ambi chiaid
 niac-niacquido icsho Nuquin Papan
 bëdamboen isambobi mibi unësëndac.
 Adash ëbi nidacno mibi nidtiapimbo
 iquendac —quequin chuipondash
 Esusën. ²²Adsho tantiash Esus
 chieshënquido: —¿Abibida Esus
 cuesuniadpec? Abibi cuesuniadash
 Nuquin Papan icsaido cuidacno
 nidtsiash. Ambo nuqui nidtiapimbo
 iquéc. ¿Aden chiecta: “Ëbi nidacno mibi
 nidtiapimbo iquéc,” quepec?
 —quepondash abi chieshënquido.

²³Adsho tantiash Esus: —Mibi matses
 nec. Ëbien con Pa yacnuësh
 chondaidquio nec. ²⁴“Adquid icsho ëbi
 tantienquio icquid unësacsho Nuquin
 Papan ambi icsaido cuidacno
 nidmendac,” quequin tantiaquin:
 “Nuquin Papan bëdamboen isabi mibi
 unësëndac,” mibi caombi —quepondash
 Esus.

²⁵Adsho tantiash abi chieshënquido:
 —¿Mitsipadquid icquin ëbi aden chie?
 —quepondash Esus caic. Adoquien:
 —Ëmbi chianeboedquiobi mabi neyoc
 —queopondash Esus. ²⁶Adashic padpidec:
 —Mimbi naid dadpen chuiquin mibi
 cuidte chiendambi. Ëmbembi chienquio
 icquin ëbi chomiondaid muesanquio
 chiaidquio chiendambi. Aidën chiaiduidi
 matses abitedi chiendambi —quenubien
²⁷Esus chieshënquidon: —Abi
 chomiondaid Nuquin Papambo nec
 —quequin tantienquio icpondash. ²⁸Aden
 tantienquio icsho isun Esusën padpiden
 chuiopondash. —Matsesmiadquio
 icshobi ëbi cuesten dectanshumbic mimbi
 ëbi tantiabenendac. “Ambi
 chiacpadquidshenda nepadenec. Ambembi
 chiaid chienquio icquin aton Papan
 chiaidquio chuiquin aidën
 chiacpadomboenshenda napadenec,”
 quequin ëbimbo mimbi tantiendac
 —quepondash Esus. ²⁹Adashic padpidec:
 —Nëbi ëbi chomiondaid ëbëd iquéc. Aid
 bëdambo icmenuen ambi chiacpadomboen
 nasho isun ëbi nianenquio iquéc
 —quepondash Esus.

³⁰Adsho tantiashun: —Abimboen
 Esusën caic. Nuquin Papa yacnuësh
 choquidien nec —queshun Esus
 tantiauidtsëccondash dadpenshun.

Satanasën yuabo nec, quequin Esusën chiaid

³¹Adsho isumbien Esusën abi
 bëdiactsëc tantiauidtsëcboedo

chuipondash. —Ëbi tantiaquidën ëmbi chiacpadomboen natiadquio iquendac. ³²Nuquin Papabëdta ëbi aden tantiasho icsamianquidën yua icboedi aidën yuapenquio mibi icmetsiambi —quepondash Esus abi tantiauidtsëcboedo chiec. ³³Adec Esus: —Yua —quesho tantiasbien: —Abadauan yampidën tsyuecquido yec utsin yuacmaido nebi. Tantienuquio icquin mimbi icsamboen chiec. ðAtotsieshun: “Mibi yuapenquio icmetsiambi,” quequin ëbi chio? —capondash abi tantiauidtsëcboedon Esus chuiquin.

³⁴Adoquien: —Tantia. Mibi abimbo chuinu. Uidën uacbimboen icsambo icquidën ambembi abi icsaid ëntiapimbo iquec. Abembi bëdambo ictiapimbo iquec. ³⁵¿Mitsipadquid nuquin matsesën yuaid icpec? Aton madopen yec icsambo icsho icbon cuemequid. Aton madombo bëdamboen isquid. ³⁶Aden con Pan aton Madombo icsho ëbi bëdamboen isquin ëbi tantiaquidotsen bëdamboen isendac. Aden ëbi tantiaquido bëdamboen isquin bëdamboec tabadte bumequin abi yacno ëbëd tabadtequido icmendac —quepondash Esus.

Satanasën madobimboecquido chiaid

³⁷Adshumbic Esusën abi chieshënuquido chuioapondash. —“Con tsusedpa Abadauan icpampic,” quequin mimbi abimbo chio. Adboedëmbi ëbi cuesunetiadquio mibi iquec. Ëmbi abimbo chuisho tantiate bunenquio icquin ëbi cuesunetiadquio mibi icpec. ³⁸“Con Pabëd tabadquin isondambi,” quequin ëmbi bëdamboen chuisho tantienquio icquin min papabimboecquidën chiacpadomboen mimbi naindac —quepondash Esus abi chieshënuquido chiec. ³⁹—Min

papabimboecquidën chiacpadomboen mimbi naindac —quesobien: —Con tsusedpa Abadauanën nacpadomboen mambi napaboc —capondash Esus chieshënuquidon. Adoquien Esus: —Ma mimbi adoenquio yoc. Abadauanën nacpadomboen naquin mimbi bëdamboen natsiac. ⁴⁰Bëdamboen natiapimbo icquin mimbi ëbi cuesunetiadquio iquec. Nuquin Papan chiaidquio abimbo chuisho mimbi adotiadquio iquec. Nuquin Papan chiaid tantiec ma Abadauan cuesuniantiapimbo icpampiyoc. ⁴¹Min papabimboecquidën namiacpadomboen naquidien mibi nec —capondash Esusën abi chieshënuquido chuiquin. Adoquien: —Mambi Nuquin Papauidsëqui tantieyoc. Utsi tantiatiapimbo icquin Nuquin Papauidsëqui con pa caimbi —quepondash Esus chieshënuquido.

⁴²Adsho tantiasbien Esus: —Nuquin Papambo tantiaquimbien mimbi ëbitsen tantiatsiac. Ëbembi choenuquio iccondabi. Nuquin Papan: “Matsesbëd tabadec nid,” caquini chondac. Adoaid icsho Nuquin Papa tantiaquidën ëbitsen tantiatsiach. ⁴³¿Mitsipadquid yec ëmbi chiaid tantiash: “Tantiadenquien icpec,” quepe mibi? Ëmbi abimbo chuisho tantiate bunenquio yec pamumëdacbimboec mibi iquec. ⁴⁴Min papabimboecquid Satanäs nec. Aid bunacpadenuidi mimbi natiadquio iquec. Ëndenquimboshë Nuquin Papan tauamboen matses uanubi min papabimboecquid cuesunianquidquio nepampic. Aton padibi nec. Nuquin Papan chiacpadomboen namenuquio yec chieshënec muaquidquio nec. Aton padibi icquid yec matses muamequidquio nec. Aidën madobimboecquin mimbi ëbi tantiatiapimbo icpec. ⁴⁵Ëmbi Nuquin Papan chiaidquio abimbo chuisho

mimbi tantiatiapimbo iquec. Icsambo icquidën ambembi chuisho mimbi tantienquo yaquien bëdambo ictsiash. Mabi icsambo icquidpenquo neyoc. ⁴⁶¿Tsuntsimbini: “Mibi icsaac,” capatsiash? Mabi adotiapimbo yoc. Icsaisambo nebi. Adquid icquin Nuquin Papan chiaid ëmbi abimbo chuisho ¿atotsi quequin tantienquo mimbi icpe? ⁴⁷Nuquin Papa tantianuequidën Nuquin Papan chiaidquo chuisho tantiatsiash. Nuquin Papa tantiesabombo ma mibi neyoc. Adquid icquin Nuquin Papan chiaid abimbo chuisho mimbi tantiatiapimbo iquec —quepondash Esus abi chieshënquido chushcaic.

**Esus chieshënquido cuënoten
siantiapambo yanaid**

⁴⁸—Nuquin Papa tantiesabombo ma mibi neyoc —Esus qesho tantiashien abi chieshënquido: —Ma mibi podobitsi icsa dapuduedash neyoc. Tantiadenquo yec mibi onquec. Samadia yacnocquidobimboec icsamboshë ma mibi iqueyoc —caquien ⁴⁹Esus: —Mabi podobitsi icsa dapuduedambo yoc. “Ma matsesën con Pa tantianu,” quequin mambi abimbo chuiboc. Adshobi: “Nuquin Papan chiaidquo abimbo mimbi chiec,” catiadquidi mimbi ëbi: “Muec nec,” capec. ⁵⁰“Mabi: ‘Bëdambo iquec,’ canu,” quenquo iccobi. Con Pambien: “Ma matsesën con Mado: ‘Bëdambo iquec,’ canu,” ëbi caindac. “Bëdambo iquec,” canesabotedi aidëmbi cuidendac. ⁵¹Tantia. Mibi bëdamboen chuinu. Ëmbi chiacpadomboen naquidquo unësenquo ictsiash —quepondash Esus ompoacbimboen chiec. —Ëbi tantiaquido unësacsho uincuemeshun Nuquin Papa yacno ëbëdi tabadmendambi padpidec unëstiapimbo icnuc —quequin tantiec adondash.

⁵²—Unësenquo ictsiash —qesho tantiash Esus chieshënquido: —Ma mimbi tantiadenquo icnuc chuipayoc. Adsho: “Mayan icsa dapuduedashien nec,” mibi caombi. “Ëmbi chiacpadomboen naquidquo unësenquo ictsiash,” quepequien mibi iquec. Nuquin tsusedpa Abadauan yec Nuquin Papan chiaid chuibanquido yec quequido Nuquin Papan bëdamboen isaidombo abitedi unëspampic. ⁵³¿Aido Nuquin Papan namiampidombo icnuc Nuquin Papan namequiaidquioda ne? ¿Mitsipadquid mibi nepe? Muequien mibi nechitec —quepondash.

⁵⁴Adoquien Esus: —Ëmbembi: “Mabi: ‘Bëdambo iquec,’ canu,” quequin ëmbi nac icsambo ictsiash. Mimbi: “Aiduidtsëqui tantiembi,” caboedëmbini: “Nëid con Mado Esus bëdambo iquec,” quequin ëbi comapenen tantiaquin namec. ⁵⁵“Tantiembi,” mimbi caboed Nuquin Papa ma mimbi tantienquo yoc. Ëmbien Nuquin Papa tantiaquiec. “Aid tantienquo iquemi,” quec mibi yacpade muatsiabi. Mambi con Pa tantiaquin ambi chiacpadomboen nayoc. ⁵⁶Mimbi: “Con tsusedpan nacpadomboen naimbi,” caboed Abadauan: “Nuquin Papa yacnuësh choash bëdambo icmianquidquo matsesbëdi tabadendac,” quequin tantiec cuishonquepadenec. Nuquin Papan tantiamiac ëbi aden tantiapadenec —quepondash Esus. ⁵⁷Adsho tantiashun Esus chieshënquidon: —Ma mimbi min seta ⁵⁰tedi matamiambo yoc. Adash ma mibi tsusiobudabi iqueyoc. Abadauanën mibi tantiatiapimbo icpampic —caquien ⁵⁸Esus: —Abimbo caimbique. Tantiata. Abadauan tishabi icnubi ëndenquimboshë ictenebi. Nuquin Papapadquidquo nebi —quepondash Esus. ⁵⁹Adsho tantiash nëishtanequien:

—¿Icsamboenda chuipec? ¿Nuquin Papada muauapebac? —quetanquin cuënnote dapa bedtanequin: —Seshunenu —cac siadenquo yec ompodanec cuempondash Esus.

Esusën bëshuaid bédamaid

9¹Yuecquio ictaniash chonoadenquo icte ushën capucuenequin Esusën dada bëshuaid istuidpondash. Anin bëshuacshobi tishnëdaid niondash.^{2,3}Aid istuidshumbimbi: —En chui, Icbo. Tantianu. ¿Atotsieshun Nuquin Papan bëshu uapanëdash? ¿Aton papabëd ani icsasho isun Nuquin Papan cuidquin bëshu uanëdaidta nepec? —caquien: —Padenquo. Utsi icsasho isun Nuquin Papan nambo icpanëdash —quepondash Esus. Adsho tantiashun padpiden: —¿Tishabi icnubi: “Abibi icsaindac,” quequin tantiashun Nuquin Papan bëshu uanëdaidta nepec? —caondambi. Adoacuen: —Padenquo. “Abibi icsaindac,” quequin tantiashun Nuquin Papan bëshu uambo icpanëdash. “Ma con Madon comapenen tantiaquin ismenu,” quequin ambi tantiacpaden Nuquin Papan bëshu uapanëdash. Adoacsho anin tishnëdaid nec.⁴Nëbi ambi chiacpadomboen nanuna. “Nainabi inchëshmane,” quiash comapenec chonoadnuna. Inchëshën mates chonoadesa —quepondash Esus. —“Con Pan tantiaidtedi nainabi unëshmane,” qeshun unëshabi icquin con Pan chiaidtedi nainendambi —quequin tantiec: —“Nainabi inchëshmane,” quiash comapenec chonoadnuna —quiondash Esus.⁵Adashic: —Matesbëd icquin Nuquin Papa bédamboen tantiamequidquo nebique. Nèidtsen tantiamenu⁶—quetanquin nidaidën uicchun cuishtucatanquin nidaidbëdta uicchun cabiuntsëcshun bëshuaid bëbitaccapondash.

⁷Adotanquimbic: —Acte tiquidimbo icquid Sidoe caidën bëpamëdec nid —cac nidash bëpamëdtanec bédamboen isec aton shubuno nidpac caondash. Aid acte con onqueten Sidoe quequin buanaid caic.⁸Aton shubuno nidshobi aton shubu anoentsëcquidon bëshuacboed istuidpac caondash. Adembidi utsibon: —Bëshuaid nebique. Pucquid beccho —quedonetsec tsadtsëcscho isboedontsen istuidpac caondash. Istuidshun: —¿Nuqui isboedquiobida nepec? “Beccho,” ¿quedoneboedquiobida nepec? —cabededpac caondash.⁹Utsi-utsiec: —Ai, aidquiobi nec —quenubi utsibo: —Padenquo. Aidbimboecquidien nec —qesho tantiash: —Aidi nebi —quepac caondash bëshuacboed.¹⁰Adsho tantiashun: —¿Mitsipadec bédano? —caquien:¹¹—Esus caidën bédamioshi. Nidaidën uicchun cuishtucashun nidaidbëdta uicchun cabiunshun bëbitaccashun: “Acte tiquidimbo icquid Sidoe caidën bëpamëdec nid,” cac nidash bëpamëdec bédanobi. Nëbi bédamboen isembi —quepac caondash bëshuacboed.¹²Adsho tantiashun: —Mibi bédamequid ¿mitsimbo iquec? —cac: —Tsaudi —quepac caondash bëshuacboed.

Bëshuaid bédameboed chuimaid

¹³—Bédamioshi —qesho tantiashun: —¿Abimboda capec? Ma con chuiquidon chuimenu —quequin padiseyobo yacno bëshuacboed buampac caondash.¹⁴Buanacshobien padiseyobon: —Chonoadenquo icte ushën nac caosh —quequin tantiaquin:¹⁵—¿Mitsipadec bédano? —caquien: —Esusën nidaidbëdta uicchun cabiunshun bëbitaccac bëpamëdec bédanshun nëbi bédamboen isembi —quepac caondash bëshuacboed.

16—Bëpamëdec bëdanobi —quesho tantiasien chuiquido onquecuededpac caondash. Utsi-utsiec: —Nuquin Papa tantiaquid icquin Nuquin Papan chiaid niac-niaquenquio ictsiash. Chonoadenquio icte ushën nëid bédamequin ma Nuquin Papan chiaid niac-niacpayoc —quenubien utsibo: —¿Nuquin Papa tantiesanda aden bédamepatsiash? Ma comapenen tantiaquin nacnempaboc —quepac caondash. Adshumbic abitedishun: —Esus icsambo iquec —cainquio icquin 17bëshuacboed chuipac caondash. —Mibi bédamequid ¿tsutsi mimi cape? —caquien: —Nuquin Papan: “Yuecshun naden naindambi, quequin chiaidquio chuiquidien nec,” caimbi —quetanec bëshuacboed nidpac caondash.

18Aid nidnubien Esus chieshënquido: —Bëshupenquien niash. Muequien niashe. Anibëdta amë chuimenun chomenuna —quetanquin 19,20chomeshun bëshuacboed cain: —¿Min madoda niosh? —capac caondash. Adoac: —Ai, con mado niosh —queshobien: —¿Bëshuacshobida tishonda? —capac caondash. Adoaquien: —Ai, bëshuacshobi tishonaid nec —ani queshobien: —Bëshuaid ¿mitsipadec bëdanosh? —capac caondash. 21Adoaquien: —Tsaudi. Bëdansho isambo iccomb. ¿Tсандambien bédamechitash? Dada ënden caniaid neque. Aidi chuime —quepac caondash bëshuacboedën tita amëbëdi.

22—“Nuquin Papa yacnuësh choquid Esus nec,” quequido Nuquin Papan chiaid chuibante shubun puduedmenquien ictiad —quequin chuiquidon chiaid tantiashe dacuëdec: 23—Dada ënden caniaid neque. Aidi chuime —quepac caondash.

24Adoac padpiden bëshuacboed chomeopac caondash padiseyobon.

Chomiash: —“Nuquin Papan bédamioshi. Nuquin Papa bédambo iquec,” ¿quecta icco? Ma Esus Nuquin Papan chiaid niac-niacquid neyoc. Ma icsamboshë icquid neyoc —quepac caondash. 25Adsho tantiashe bëshuacboed: —Icsamboshë icquidien Esus nechitec. Aden tantienquio iquemi. Mabi bédameboc. Isenquio icboedëmbi mambi nëbi bédamboen iseyoc. Adenuidtsëqui tantiemi —quepac caondash. 26Adsho tantiashun: —¿Mitsipaden mibi bédamiosh? —caquien: 27—Mambi mibi chuipaboc. Ma mimbimbobi tantienquio icboc. ¿Atotsi quequin padpiden: “Èbi chui,” cai? ¿Esus tantiatiadquioda icti? —capac caondash bëshuacboedën.

28Adsho tantiashe nëishtanquin chushcapac caondash. —Mibi Esus tantiaquidquio nec. Mibi icsambo iquec. Èbien nuquin tsusedpa Moises tantiaquidquio nec. 29“Moisesien Nuquin Papan chuiquin namepampic,” quequin tantiemi. ¿Tsuntsin chiac mibi bédamequidën napash? Ma mibi bédamequid ëmbi tantiacmaidquio neyoc —quepac caondash chuiquido. 30Adoaquien bëshuacboed: —¿Abida cai? “Dadpenquio tantiemi,” ma mibi quepaboc. Adboedi: “Èmbi tantiacmaidquio nec,” ¿quecta ique? Mimi tantiacmaidëmbini bédamiosh. Ma bédambo yoc. 31Abi icsaid ënabi icquidën chianesho Nuquin Papan tantienquio ictsiash. Abi tantiaquin ambi chiapadamboen naquidën chianiac tantiashun Nuquin Papan nashuntsiash. 32Anin bëshuacshobi tishaid bédamenquio ictenec. Adquid bédamequid nibëdpadened. 33Nuquin Papa tantienquio icquin Esusën ëbi bédamenquio ictsenosh. Nuquin Papa tantiaquimbini bédamiosh. Ma Esus bédambo icquid neyoc —quepac

caondash bëshuacboed. ³⁴Adsho tantiash nëishquioshon: —Bëshuacsho tishaid yec mibi icsamboshë iquec. Icsactsëcquidën chuitiapimbo iquebique. Baded nidec nid. Nëmbo padpidec puduedenda —quequin cuemepac caondash. Aden Esus chieshënquidon bëshuacboed Nuquin Papan chiaid chuibante shubun padpiden puduedmenquio icpac caondash.

**Ambi bédameboed
istuidoashun Esusën chiaid**

³⁵Adnubien: —Mimbi bédameboed cuemiac caosh —quesho tantiashun Esusën ambi bédameboed istuidpondash. Istuidshumbic: —Nuquin Papan matsesmiaidquio caic: “Nuquin Papa yacnuësh choquid nec,” ¿quequinda mimbi tantiap? —capondash Esusën ambi bëshuaid bédameboed chuiquin. ³⁶Adoquien: —¿Tsutsi neque? Isnu —cac: ³⁷—Ëbi nec. Mibi bédameboedi nebi —caquien: ³⁸—Ai, Nuquin Papa yacnuësh choquid Quidistu caidien mibi nec. Comapenen tantiaquin nabanquidquio yec mibi bédamboshë iquec —quetanec ismenuec danëshën tinquebudpondash.

³⁹Adsho isumbic Esusën matses abi datsidadsho chuipondash. —Nuquin Papa matses bédamboen ismequid nebi —quiash matsesbéd tabadec Nuquin Papa yacnuësh chondabi. Ëmbi bëshuaid bédamiac tantiesa icboedëmbi ëbi tantiasho Nuquin Papan bédamboen isec. Utsibo: “Nuquin Papa tantiaquiemi,” quec muaquidon ëbi tantiatiapimbo icquin Nuquin Papa tantienquio iquec —quepondash Esus. ⁴⁰Adsho tantiash nëishtanec: —¿Nuquin Papa tantiesabodabi nedi? —quepondash Padiseyobo. ⁴¹Adsho tantiashien: —Nuquin Papa tantiesambo icsho ëmbi tantiamiac Nuquin

Papabëdta ëbi tantiasho Nuquin Papan mibi bédamboen istiasih. “Nuquin Papa tantiaquiemi,” quec muaquin ambi chiaid bédamboen tantienquio icsho Nuquin Papan mibi bédamboen istiapimbo iquec —quepondash Esus abi chieshënquido chiec.

Obecabimboecquido chiaid

10 ^{1,2}Adshumbic abi chieshënquido Esusën padpiden chuiopondash ompoacbimboen chuiquin. —Tantia. Mibitedi chuinu. ¿Mitsipaden nuquin matsesën aton yua obeca dadpen dayun uaquin napec? Obeca daquënë uaidën puduedte shëcuënquio obeca icbo puduedquid. Daquënë uaid mayadec puduedquidien ampequid nendac. ³Obeca icbon: “Puduednu. Shëcne,” cac ambi: “Con yua ista,” caidën shëcnequid. Adshumbic puduedtanquin ambi aton yua cuëmbanacpaden cuëmbanquin: “Cho,” caquid icbon. Adoac icbo tsibanquid obecan. ⁴Adshobic icbon daquënë uaidën tabadquid abitedi niecumeshun abi buanec bëyuc nidsho aton yuan tsibanquid. “Con icbon ëbi cuëmbocpadomboen cuënëc. Con icbo nec,” quequin icbo tsibanquid obecan. ⁵Utsibon cuënaquien tsibanenquio yec dacuëdec cuenquid obeca. Icbouidsëqui tsibanquid obeca nec —Esus quesho tantiashien: ⁶—Tantiadenquio yec mibi onquec —quepondash Esus chieshënquido.

⁷Adsho tantiashun Esusën chuipondash. —Tantia. Mibi bédamboen chuinu. Obeca daquënë uaid puduedte shëcuëbimboecquid nebi. ⁸⁻¹⁰Shëcuënuidi obeca puduedquid. Adecbidi ëbiuidtsëqui tantiash Nuquin Papa yacno matses puduedtsiasih. Ëbi tantiesain Nuquin Papa yacno puduedtiapimbo iquendac. Ëbi

tantiaquido cain obeca caombi. Aido bédamboen dayun uaquin bédamboec tabadquid icmendambi. Aido unēsacsho uincuemeshun Nuquin Papa yacno ëbëdi tabadmendambi. Adec ëbi bédambo icnuc ampebimboecquid abi iquec. Ëbi tantiaquido icsamete bunquido aido nendac. Ma adquido mibi neyoc. Nuquin Papan chiaid ma mimi icsamboen chieyoc. Adoac mimi chiaid tantiaquidon Nuquin Papa tantienquio iquec. Aido Nuquin Papan cuidtequidombo nendac. Padnuen ëbi tantiaquidon mimi chiaid tantienquio icquimbi ëmbi chiaiduidtsëqui tantiendac —quepondash Esus abi chieshënquido chiech.

**Ëbi tantiaquido dayun
uaimbi, quequin chiaid**

¹¹Adashic Esus padpidec onqueoapondash. —Obeca icbobimboecquid nebi. Icbo cudasacimboec ëbi tantiaquido cudasnuec ëbided cuidadec unēsendabi. ^{12,13}Utsiboen adenquio ictsiash. Piucquid bednuen obeca isquidbimboec iquec. ¿Mitsipadopaid obeca isquidën? Bëdi dapa chosho isun: “Con napenquio nec,” quetanquin badedi obeca nianquid. Obeca nianacsho bëdin acshun siaquid. Aden utsi acsho isash acshun secabi icquid niquequid obeca. Obeca isquidën icbonpenquio nianacimboen ma mimi icsamboen napayoc. Nuquin Papa tantiate bunquido ma mimi Nuquin Papambo tantiamenquio iqueyoc —quepondash Esus abi chieshënquido chiech.

^{14,15}Adashic abi onquec: —Ëmbien matses bédamboen tantiamequin ëbi tantiaquido dayun uaindac. Nuquin Papabëd ëbi tantiananacpadquieci ëbi tantiaquidobëdtsen tantiananquiebi. Aden ëbi tantiaquido tantiec Nuquin

Papa cuidmenquio icnuec ëbided cuidadec unēsendabi. ¹⁶¿Nëid matses isadaidbouditsëqui tantiectabi adec unēspadi? Padenquio. Matses utsibontsen Nuquin Papan tantiamiaido icquin ëbi tantiendac. Aidobëdta nëid matses con matses caquin abitedi bédamboen dayun uaindambi. ¹⁷Con Pan tantiamiacpadec ëbided cuidadec unēsendabi. Aden ambi chiacpadomboen ëmbi nasho con Pan ëbi tantiaquieci. Unēsash ëbembi uincuenendabi. ¹⁸Matsesën ambembi ëbi unēs uatiapimbo ictsiash. Ëmbi tantiacpadquiequi matsesën unēs uadendabi. Adecbidi uincuentiadquio yec ëbembi uincuenendabi. Aden con Pan namiacpadomboen naindambi —quepondash Esus.

¹⁹Adsho tantiasch con matses chuiquido nadec onquecuededpac caondash. ²⁰Esus chieshënquido: —Podobitsi icsa dapuduedash tantiadempambo yec onquepec. ¿Atotsi quequin aid tantie? Aidquio tantiatiapimbo iquendabi —quenubien ²¹utsibo: —Podobitsi icsa dapuduedashta ¿adec onquepatsiash? Bédamboequien onquiosh. ¿Podobitsi icsa dapuduedaidënda aden bëshuaid bédamepatsiash? Bédambo icquidëmbien adotsiash —quepac caondash.

¿Quidistu caidta ne? quequin chiaid

²²Yuec ictanec con matses cuëdënuec Edusaden yacno cho-chopondash. “Nuquin Papa tabadte shubu uashunaidnoshon tsusedpabon icsa uaquido cuemenëdaid ushë tantiec cuëdëntanu,” quianec cho-chopondash. Ambo iquenuampamboec icpondash aton padibi. ²³Iquenuampamboec icnubien Esus Nuquin Papa tabadte shubu uashunaid daquënë uaidën

puuedash shubunquo puuedabi quënë cachoqui capupondash. Aid quënë cachoc: “Sadomonën nacnenaïd nec,” caondash. ²⁴Ambo Esus capusho isashien con matses chuiquido Esus natia datsidadshun: —En sebadënquo chui. Tantiënquo yec tsadtiapimbo iquebique. Mimi cuembo chuïsho tantiatiadquo iquebi. ¿Nuquin Papan chomiaïd Quidistu caïdta ne? —capondash con matses chuiquidon. ²⁵Adoquien Esus: —Mambi mibi chuipaboc. Ma mimbimbobi ëbi tantiënquo icboc. Con Pan: “Adota,” cac comapenen tantiaquin nabandeniombi. Mibi bëdamboen tantiamenuen adodeniombi. ²⁶Adosho isash mibi: “Ai, Nuquin Papa yacnuësh choquidien nec,” quetiadquidëmbi mimi ëbi tantiënquo iccoc. Nuquin Papan tantiamiabi yaido icquin mimi ëbi tantiatiapimbo iquec. ²⁷Con Pan tantiamiaidien ëbi tantiaquid yanendac. Adshun obecan aton icbo tsibanacimboen ëmbi chiacpadomboen natiaidquo yanendac. ²⁸Aido unësacsho uincuemeshun Nuquin Papa yacno ëbëdi tabadmendambi padpidec unëstiapimbo icnuc. Unësabi icsho: “Con na nec,” qeshun bëdamboen dayun uaindambi. Ëmbi adoacsho bedshunacimboen icsambo icquidën yuaquin Nuquin Papan cuidtequido icmeoatiapimbo iquendac. ²⁹Con Patsen ëbi tantiaquido dayun uaindac. Abipadquid utsi nibëdquiecnuc con Pan ëbi tantiaquido dayun uasho adembidi mënchtiapimbo iquendac. ³⁰Aden ëbi bedshuntiapimbo icquin con Patsen bedshuntiapimbo iquendac. Con Papadquidquo nebi —quepondash Esus.

Cuënoten seshunetiadpambo yanoaid

³¹—Nuquin Papapadquidquo nebi —Esus qesho tantiash nëishtanquin cuënote dapa bedshun abi

chieshënquidon Esus seshunetiadquo icoapondash. ³²Adsho isash: —Sianenda. Con Pan namiacpadomboen comapenen tantiaquin nabanombi. ¿Ëmbi adobansho isboedëmbidabi seshunepe? —quepondash Esus. ³³Adoquien: —¿Bëdamboen nabanshodambi: “Mibi seshunenu,” cadi? Padenquo. “Con Papadquidquo nebi,” quequin Nuquin Papa muauasho mambi mibi nayoc. Matses icquin mimi aden icsamboen chuïsho tantiashumbimbi mibi seshunec —quepondash abi chieshënquido.

³⁴Adshobien Esusën: —Nuquin Papan chiaidquo nuquin tsusedpan naden dada uapampic. “Nuquin Papa nadec onquec: ‘Min matsesën ëmbi chiacpadomboen nasho: Ëbipadquid nec, caombi,’ queposh Nuquin Papa,” quequin dada uapampic. ³⁵Matses caic: “Ëbipadquid mibi nec,” quequin Nuquin Papan chuipampid isun mimi: “Nuquin Papan icsamboen chiac,” quequin chiamo iquec. “Muesambo icquin Nuquin Papan icsamboen chuitiapimbo iquec,” qeshun mimi chushcambo iquec. Nuquin Papa adoambobi ¿ëbida chushcai? ³⁶Nuquin Papan namiacpadec abi yacnuësh chondaid nebi. Adquid yec: “Nuquin Papan Madombo nebi,” quiobi. Ëbi adsho tantiashun ¿tatotsi quequin ëbi chushcai? ¿Nuquin Papadambi muauadio? Mambi abimbo caboc. ³⁷Ëmbi chiaidquo tantiatiapimbo icquimbi ëmbi naidquo tantiata. Ëmbi Nuquin Papan namiacpadomboen comapenen tantiaquin nabanenquo icsho isun mimi ëbi mua catsiac. ³⁸Con Pan namiacpadomboen nasho isun: “Ai, ambi chuïbocpadquidshenda nepec,” ëbi cata. Ëmbi chiaiduidtsëqui tantiatiapimbo icquin adota. Adshun: “Ai, Nuquin Papapadquidquibidien Esus nec,” quequin mimi tantiabentsiac —quepondash Esus.

³⁹Adsho tantiash padpidec nëishtanquin abi chieshënquidon: —Bedchitono —caqui bedadenquio icpondash. ⁴⁰Adashic acte Odan caid potiash con shënision tauaquin matses acten mentodenecono Esus nidoapondash. Ambo ëbi chedobëdi tabadpondash. ⁴¹Adshumbic Esusën comapenen tantiaquin ismequin ambo icquido chuibampondash. Adsho tantiashun: —Uan padon chuidenedshenda nëid nepec. Ambibi comapenen tantiaquin ismiambobi comapenen tantiaquin nabanquid chuipadenec. Esusën adobansho isun: “Nëid chuiquinshenda Uan padon abimbo capadenec,” caimbi —cabededpondash anocquidon. ⁴²Adshumbic: —Nuquin Papa yacnuësh choquidien Esus nec —quequin Esus tantiabempondash.

Dasado caid unësaid

11 ¹Udeya yacnuësh Esus cuembon Dasado Esusën utsibimboecquid unëstiadsëcquio yanac caondash. Shubu dadpen icquid Betania caid yacnocquid niondash. Aidbëd icquid aton chuchu daëd icpondash. Abentsëc Madta icnuc utsi Madia icpondash. ²Madian aton manëdaidën ucbanquin Esus tanoshcabi icnuc adec aton utsi unëstiadsëcquio yanac caondash. ³Adnubien aton chuchun: —Esus chuitan —cac aton matsesën Esus chuituidpondash. —Mimbi con utsi caidquio unëstiadsëcquio yanoshe. En isec cho —catuidpondash. ⁴Adoaquien Esus: —Chiata. ¿Unëshash chodquequionoshida Dasado nepadiash? Padenquien iquec. “Ma matses: ‘Nuquin Papa bëdambo iquec. Ambi chomiondaid aton Madombotsen bëdambo iquec,’ quenu,” qeshun naindambi —quepondash. ⁵Adbosh

Dasado aton chuchubëdta tantiaquidquio yequi ⁶badedquio nidenquio yec anobi daëdec ushpondash Esus.

⁷Daëdec ushumbic Esusën: —Nuqui icbocno Udeya caidën padpidec nidnu. Nid —capondashi. ⁸Adoaquimbi: —Icbo, ma mibi anoshon cuënoten seshunetsempondac. ¿Anobidida nidtiad? ¿Ada: “Seshunequionoshe,” cadec? —capondambi. ^{9,10}Adoaquien cuembo chienquio icquimbi: —Badiadën capuec tocoshquetanec uebudesa. Inchëshëmbien tocoshquetanec uebudquid —quequin Esusën chuipondashi. —Nëbi ëbi unës uatiapimbo iquec. Badiadën nidacbimboen con Pan tantiaidtedi nainabi icsho ëbi unës uatiapimbo iquec. Inchëshën uebudacimboben ambi tantiaidtedi nainshobini ambi tantiacpadënquioi matsesën ëbi unës uaindac —quequin tantiec adondash Esus.

¹¹Adshumbic Esusën padpiden ompoacimboben chuiopondash. —Ëmbi con utsi caid Dasado ushtoaccoshe. Isucumec nidnu. Nid —quesho ¹²tantiashini: —Ma ushnu. Ushash isucunquid —quepondac. ¹³Esusën Dasado unësaid chuinubi Dasado ushe dantsëcondambi. ¹⁴Adnubien Esusën sebadënquio chuipondash. —Dasado unësaccosh. ¹⁵“Bëdamec nidtiadquidi niobi” ¿quepectabi ique? Padenquio. Mibi caic: “Ma nëidon ëbi bëdamboen tantianu,” qeshun Dasado unëso istanambo iccombique. Nëbi mibi ismec nidnu. Nid ¹⁶—caquien: —Ai, abëdquioi unësec nidnu. Nid —quiampondash Tomas anin abi ushëmbi daëdpambo tishaid. Adanec abitedi nidondash.

Unësaid uincuemquidquio nebi, quiaid

¹⁷Adashic unësacno anoentsëqui Esus chopondash. Choshon: —Unësacsho

chococash daëd-daëdquieic ushobi —quetsëcquieic onquecuededsho tantiatuidpondash. ^{18,19}Esus choabi icnuc con matses chuiquido Dasado unësacnuësh sedenquenuec Edusaden yacnuësh cho-chopac caondash. Unësaid nëbi ictsëcnuc tedes quidometedos tiontsëcquidën badedquio cho-chopac caondash. Cho-choash unësaidën chuchubëd sedenquec tabadpac caondash. ²⁰Adnubien: —Esus choec —quesho tantias Madta bëquedec chopondash aton chibi Madia shubuno sedenquec tsadnubi. ²¹Choequien Esus bëquedec: —Mibi icnuc con utsi unësenquo ictsenosh, Icbo. Con utsi unësosh. ²²Mimbi chiacpadomboen Nuquin Papan nëbi natsias —quepondash Madta: —¿Ada con utsi uincuemetsia? —quequin chuitiadquio yequi. ²³Adoquien Esusën: —Min utsi uincuenendac —capondash. ²⁴Adsho tantias: —“Ai, yuecash unësaido abitedimbo uincuemete ushën con utsi uincuenendac,” quequin tantiambi —quepondash Madta. ²⁵Adsho tantias hun Esusën: —Ëbibi matses unësaid uincuemequidquio nebi. Ëmbi tantiacpadënquo uincuenendac. Aden ëbi tantiaquido unësacsho uincuemendambi. ²⁶Ëmbi adoac Nuquin Papa yacno ëbëdi tabadendac padpidec unëstiapimbo yec. Ëmbi aden chuisho tantias: “Ai, abimbo mimbi caindac,” ¿quequina tantie? —capondash Esusën. ²⁷Adoquien Madta: —Ai, adembi tantiambi. “Nuquin Papa yacnuësh choquid Quidistu caidistu mibi nec. Nuquin Papan Madombo mibi nec. Con tsusedpabon dada uaquin chuipampidquien nec,” mibi caombi —quetanec ²⁸nidpondash aton chibi chieic. Nidshun: —Nëmbo cho, chibi. Chuinu —cac aton chibi choshobien: —Esus chosh. Mibi iste bunoshe. En isec

cho, chibi —caquien ²⁹Esus bëquednuec badedi choquin istuidpondash. ³⁰Shubu dadpen yacnombo choabi icsho Madtan bëquedacnobi Esus tabadsho Madiansen istuidpondash. ³¹Adec Madia nidsho isun chococacnobi sedencaic nide danquin abëd sedenquenequidon tsibanampac caondash. ³²Adnubien Madia Esus istuidtanec dayumbudec sedenquiampondash aton utsi tantiec. Adec shubitanec ënëdash: —Mibi unësquo iccoc, Icbo. Bëdambo icquid mibi nec. Mibi icnuc con utsi unësenquo ictsenosh —quepondash Madia Esus caic.

³³Adnubien Madia tsibanec cho-choec con matses chuiquido sedenquetuidpondash. Madiabëd sedenquecuededsho istanec: —Ai, unësquo icnuc nec —quiash Esus abitsen shubiantiadtsëcquio icpondash. ³⁴Adec shubiantiadtsëcquio tsadacnuëshien Esus: —¿Mitsimbo mimbi chococaye? En isnu. Nid —quepondash. Adoac: —En isec cho —quianec nidnubien ³⁵shubinidequi nidpondash Esus. ³⁶Adec shubinidsho isumbien: —Ma Dasado unësquo icnuc shubieyoc —cabampondash con matses chuiquidon. ³⁷Adnubien utsibo: —¿Atotsieshun bëshuaid bëdamiondaidëmbi Dasado unëso bëdamenquo icposh? —quepondash.

Esusën Dasado uincuemiaid

³⁸Nidquimbi chococacno istuidequi Esus shubiantiadtsëcquio yanoapondash. Nidaid cuënoteuidpambo icquid macuësh tsimpiduc shëcuë uaidën unësaid nauedshun cuënote dapan bëtinacnuësh shubiantiadtsëcquio iccondash. ³⁹Adashien Esus: —Cuënote bidiaquin shëcuë shëcne —quepondash. Adsho tantias

unësaidën chuchu Madta: —Padi. Ęnden pisenashe. Chococash mabi daëd-daëdquiec ushboc —quepondash. ⁴⁰Adoquien Esus: —Dacuëdenda. Mambi mibi chuiboc. Mïmbi: “Nuquin Papan Madombobien mibi nec,” ëbi casho: “Ėmbi comapenen tantiaquin nabansho mïmbi isendac,” mambi mibi capaboc. En na. Baded bëcune —cac ⁴¹cuënote shëcuë bëtinaid shëcnequin bëcunepondash.

Adsho istanquimbien Esusën abuc isquin Nuquin Papa chuipondash comapenec onquequin. —Papa, ëmbi nëbi chuisho mïmbi tantiec. Ėmbi chuibocpadomboen mïmbi naindac. Mibi bëdambo iquec, Papa. ⁴²Ėmbi otacquo chianiaid mïmbi tantioc. Ėbi datsidadaido tantiamenuen nëbi comapenec onquequin mibi chiemi. “Mibi chuitanquin ëmbi comapenen tantiaquin nabansho isun: ‘Nuquin Papan chomiaidien nec,’ quequin ma nëidon ëbi tantianu,” qeshun comapenec onquequin mibi chiemi, Papa. Padi, aidtedtsëqui mibi chiombi, Papa —quepondash Esus. ⁴³Adtanquimbien comapenen cuënquin: —Dasado, puduenec cho —capondash. ⁴⁴Adoquien Dasado badedquo puduenanec chopondash abi dashcute dataniacchobi. Unësacsho uesquin dashcuten datanetanquin dashcuten abi bëpucacchobi chopondash. Adec chosho istanquin: —Baded dashcute dachic. Ma nidnu —capondash Esusën.

Nëbien Esus unës uametiad, quiaid
(*Mat. 26.1-5; Mad. 14.1-2; Duc. 22.1-2*)

⁴⁵Aden Esusën ënden unësaidquiobi uincuemesho isashien Madia tsibanec sedenquec cho-choboedo abentse-abentsec: —Nuquin Papan chomiaidien Esus nec —quiampondash. ⁴⁶Adnubien utsin Edusaden yacno

nidshun Esus chieshënquido padiseyobo chuituidpac caondash. —Esusën unësaid uincuemiosh —quepondash. ⁴⁷Adsho tantiatanquimbien chuiquid dapan abëdtan chuiquid utsibo cho-chomepac caondash padiseyobo yec tsusio dapabo yec quenuc. Aden cho-chomiash tabadec onquepac caondash. —ĖMitsipadotiad? Nuquin matses ismequin comapenen tantiaquin dadpen nabampac caosh. ⁴⁸Aden Esusën nabansho isun nuqui ëmiabi icsho nuquin matsesën abitedishun abi chuiquid dapa Esus icmetsiash. Adnubien nuqui yuaquido Doma yacnocquidon ambi chuiquid icmiacmaidquio chuiquid yansho isun nëishun nuqui acshun siatsiash. Nuquitedi acshun siatanquin Nuquin Papa tabadte shubu uashunaid dapatsen uesquin chic-chictsiash. ĖMitsipadotiad Esus? —quepac caondash chieshëmënkuido.

⁴⁹Adnubien abëdtan chuiquido chuiquid dapambo aid setan icquin Caipas caidëntsen chuipac caondash. —ĖMidapadotsëcquien mïmbi chiendac? Tantiadentsëcquo icnuc ma mïmbi chuiaboc. ⁵⁰Tantia. Mibi bëdamboen chuinu. ĖAtotsi quec: “Abitedi unës uaindac,” mibi quepe? Ma nuquin matses abitedi unës uainquo icnueshun Esused unës uamenuna —quepac caondash chuiquid dapambo abëdtan chuiquido chiec. ⁵¹Aden chuiquin ambemi chiambo Nuquin Papan oncamiac Nuquin Papan chiaidquio aden chuipac caondash. —Nëid setan abëdtan chuiquido chuiquid dapambo nec —qeshun Nuquin Papan aden oncamiaqui Caipas onquepanëdash. —Matses cuidmenquo icnuc con Madoded cuidadec unësendac —qeshun Nuquin Papan Caipas aden oncamepanëdash. ⁵²Aden

Caipasën chuinëdaid tantiaquin
 ëmbitsen chuinu. Tantia.
 ¿Isadaidbouditsëqui cuidmenquoio
 icnuecta Esus abided cuidadec
 unëstiondash? Padenquoio. —Matses
 utsitsen abi tantiaquid yansho isun
 abëdi tabadmenuec Esusded cuidadec
 unëspondash —quequin tantiembi.
 Nëbi Caipasën chuisho tantiaashun
 tsusiobon chiaid chuinu. ⁵³Aden
 Caipasën Esus unës uamete chuisho
 tantiaashien Esus chieshënquido:
 —Nëbimbobien Esus unës uametiad
 —quecuededpac caondash.
⁵⁴—Tsusiobon mibi adosh —quesho
 tantiatanequien chieshëmënquido
 ismenquoio yec Esus cuempondash.
 Cuenequi nidaid utsin nidash masi dapa
 yacno anoentsëqui shubu dadpen icquid
 Epadain caid yacno nidpondash. Ambo
 tabadquin ëbi chedo Esusën
 chuibampondash. ⁵⁵Epadain caid yacno
 tabadnubien Nuquin Papan con
 tsusedpabo unës uainquoio icquin
 matamiampid inchësh tantiec
 cuëdënuec Edusaden yacno con matses
 nidanepac caondash. Cuëdëneç taëabi
 icnuc mishtemaid mishquidoba
 Edusaden yacno nidanepac caondash.
 —Mabi tsusion nesmenu. “Mishtemaid
 mishquid tsusion nesmiabi icquid
 cuëdëntemaid,” quedeneque —quianec
 nidanepac caondash. ^{56,57}Adshumbien
 Edusaden yacnoshon Nuquin Papa
 tabadte shubu uashunaid daquënë
 uaidën puduedtanquin Esus iste
 bunquin nibëntuidpac caondash
 mishtemaid mishquidon.
 Nibëntuidshobien: —Nuqui chuiquido
 nadpac caosh. “Esus istuidshun ëbi
 chuita. Bedshun unës uamechitono,”
 quepac caosh —quesho tantiaashien:
 —¿Ada Esus chopeba? “Unës
 uamenushe,” quiaash choenquien
 icchitec —quecuededpac caondash.

Madia Dasadon chuchun Esus tanoshcaid
 (Mat. 26.6-13; Mad. 14.3-9)

12 ¹Aden mishtemaid mishquidon
 abi nibënbien Edusaden
 anoentsëqui ambi Dasado
 uincuemiondacno Betania yacno Esus
 chopondash. Seistedec ushash Nuquin
 Papan matamiampid inchësh tantiec
 cuëdëneç taënushi niondash. ²Ambo
 chosho isash: —Esus bëdambo iqueque.
 Pemenu —queshun: —Pec cho —cac
 puduedash tabadpondash nëidtedi.
 Nëidic Esus. Nëidic Dasado. Nëidic
 shubu icbo. Nëidic Esusbëd icquid ëbi
 chedobi. Nëidic Dasadon chuchu daëd.
 Aidtedi icpondash. Adec penuec
 tabadsho Madtan pete
 menebampondash. ³Adnubien Madian:
 —Esus bëdamboshë iquec. Ismenu
 —quetanquin bëdamboshë nuadquidën
 Esus tanoshcapondash.
 Tanoshcatanquin aton manëdaidën
 tauçpondash. Aden tanoshcaid shubu
 anuestsëçquiec comapenec
 nuadpondash. Piucquid dadpenquoio
 menequin bedaid niondash. Sedunten
 cushtoaid bëdambo nuadquid nado caid
 niondash. ⁴Adsho isun Esus
 bedmequidën Udasën Madia
 chushcapondash. ⁵—Padi. Mimi
 uesquieque. Utsi uain nata. Nëid
 danoshcate meneshun piucquid
 dadpenquoio seta abentsëc matamec
 chonoadaidtedquiobien bedtiad.
 Adoshombien piucquid nibëdqido aid
 piucquid menetiad —capondash
 Udasën. ⁶Adomboen chuisho tantiaashun
 Udas bëdambo icquidquido danondambi.
 Esusbëd icquido ëbitedishun piucquid
 bedshun sauedten sauedshun dayun
 uaquidquiembi danondac. Piucquid
 bëdamboec dayun uashumënenquoio
 yequi abibi ampeshumënashi adondash
 Udas. Aden ambi ampiaid tantiequi:

—Piucquid nibèdquidoen menetiad
 —quequin muaquin Madia
 chushcapondash. ⁷Adshobien Esusèn:
 —Padi. Chushcainda. Ma nanu. Ma
 nuquin matsesèn unèsaid bédambo
 nuadnuc danoshcapaid yoc. “Nèbi con
 Mado unèsendac,” quequin Nuquin
 Papan tantiamiacpadomboen èbi unèsò
 chococate tantiaquin Madian èbi
 tanoshcaquin naic. ⁸Piucquid
 nibèdquido dadpen iquec. Nibèdenquio
 iquendac. Èbien mibéd icboedi nèbi
 nibèdquio yanendac. Èbi tantiec Madia
 bédambo iquec —quepondash Esus
 Udas chiec aidi: —Abi chieshènquido
 Esus bedmenu —quepanuda.

Dasadotsen cuesunetiadquio yaid

⁹Adnubien: —Betania yacno Esus
 choaccosh —cac Edusaden yacnuèsh
 matses dadpen Esus isec
 cho-chopondash. Ambobidi Dasado
 Esusèn uincuemiondaid icsho aidtsen
 isnuec cho-chopondash.
^{10,11}Cho-choshon Dasado
 uincuemiondaid isumbien abentsècshun
 abentsècshunquien: —Comapenen
 tantiaquin nabanquidquio yec Nuquin
 Papapadquidquibidien Esus nec.
 Nuquin Papan chomiaidien nec
 —quequin Esus tantiamempondash. Esus
 tantiabenshumbic abi chuiquidon chiaid
 tantienquio yampondash. Adsho isash
 nèishtanequien chuiquid dapabo:
 —“Uincuemiaid Dasado isun Esus
 tantiabensh,” quioshe. Dasadotsembien
 unès uatiad —quianac caondash
 chieshèmènquiec.

Chuiquid dapa ismiacimboen

Esus ismiaid

(*Mat. 21.1-11; Mad. 11.1-11; Duc. 19.28-40*)

¹²Madian tanoshcaboc ushash Esus
 Edusaden yacno puduanec nidondash.
 Nidshobien Edusaden yacnuèsh

cuèdènuec cho-choboedon: —Esus
 choec —quesho tantiatanquin ¹³niste
 podobiecquid bedbètsenec Esus
 bèquedec cho-chopondash. Esus
 bèquedshumbien: —Chuiquid dapa nec
 —quequin ismequin ambi
 bedbètsemboed uic-uiccabededpondash.
 Aden uic-uiccaiqui:

“Mibi bédamboshè iqueque. Èbi
 bédamboen ista.

Nuquin Papan chomiaid yec mibi
 bédamboshè iquec.

Con matses isadaidbo chuiquid
 dapambo mibi nendac,”

quecuededpondash Esus caic. ¹⁴Ambi
 podquedèn choquin bedbètsemboed
 cabayobitsecquidèmpi catsadtoanec
 Esus chosho isash adcuèdedpondash.
 Adec aid catsadte Nuquin Papan
 tantiamiacpadomboen con tsusedpan
 dada uaquin naden chuiampic.

¹⁵“Edusaden yacnocquido chiec:

‘Dacuèdenda, Edusaden
 yacnocquido.

Is. Cabayobitsecquidèmpi
 catsadtoanec mibi chuiquid
 dapambo choeque,’ quepec,”

quequin Nuquin Papan chiaid dada
 uapampic. ¹⁶Adec Esus catsadtoanec
 chosho isun aden chuiampid
 tantienquio iccondambi. Esus abuc
 nidambimbi èbitèdishun
 tantiabenshondac. —Esus chuiquinshenda
 nuquin tsusedpan dada uapampic.
 Aidèn chiacpadomboen niste podo
 uic-uiccaquin: “Bédambo iquec,”
 quequin nuquin matsesèn Esus
 ismebededpondash —quequin
 tantiabenshondambi.

¹⁷Esus cabayobitsecquidèmpi
 catsadtoanec choabi icnuc Esusèn
 Dasado uincuemesho isboedon:
 —Uincuemesho isombi —quequin
 matses dadpen chuibenepanèdash.

¹⁸Adsho tantiaishun: —Unèsaid

uincuemequid Nuquin Papan
chomiaidien neque. Istanu —quianec
Esus bëquedec cho-choshon aden niste
podo uic-uiccaquin ismepondash.
19—Esus bédamboshë iquec. Nuqui
chuiquid dapa nendac —quecuededsho
tantiashien Esus chieshënkuido
padiseyobo: —¿Midapadoendac nuqui?
Tantia. Abitedishun: “Nuqui chuiquid
dapa nendac,” cabededpeque.
¿Mitsipaden Esus cuesunetiad?
—quepac caondash.

Matses utsibo: Esus isnu, quiaid

20Edusaden yacno cuëdëneç
cho-choboedo matses utsibo
isadaidpembotsen icpondash.
21Adnubien adquido matses utsibon
Esus iste bunquin shubu dadpen icquid
Betsaida caid yacnuësh caniquid
Esusbëd icquid Uedipe chuituidpac
caondash. —Esus istiadquio iquebi
—quesho tantiashien: —Chiata.
Chuitambono —quianec nidshun
22Esusbëd icquid utsi Andedesba
chuibëtsenec Andedesbëd choequi
Uedipe Esus chiec chopondash.
—Matses utsibon mibi istiadquio iquec
—caquien 23aid matses utsibo
isadaidpembo tantiamenuec Esus
comapenec onquepondash. —Nuquin
Papan matsesmiondaidquio icquin
nëbimbobimbi ambi chiaidtedi
nainendac. Èmbi adoacsho Nuquin
Papan: “Mibi bédambo iquec,” ëbi
caindac —quepondash Esus abi unës
uate chiequi. 24Adshumbien
ompoacbimboen chuipondash. —Tantia.
Mibi chuinu. ¿Mitsipadquio pete ëshë
chococaid icpec? Chococac canias
bacuëec bédambo icpaid yoc. Chococabi
bédambo ictiapimbo iquec.
Adoacbimboen chococabi yac matses
bédambo icmetiapimbo iquendabi.
Unësacsho chococac matses bédambo

icmequid nendabi —quepondash Esus.
25Adashic padpidec: —Ambi naiduidi
naquin ëmbi chiaid niacquido Nuquin
Papan cuidtequido nendac. Ambi
naiduidi nainquio icquin ëmbi
chiacpadomboen naquido ëbëdi
tabadtequido yanendac. 26Adquid ëmbi
chiacpadomboen natiadquio yec ëbi
yacpadec chieshtoenquio ictsiash.
Adquidquio unësash uincuenash ëbëdi
tabadsho Nuquin Papan: “Nëid con
Mado tantiaquid bédambo iquec,”
capendac —quepondash Esus.

Esusën abi unës uate chiaid

27Adashic abi unës uate tantiec Esus
nadpondash. —Unësquioshë yanuc:
“Mimbi tantiacpadomboen natiapimbo
iquebi, Papa,” ¿quectabi icti? Mabi con
Pan chiacpadomboen nanuec chondac.
Aden nanuec nebi —quepondash Esus.
28Adtanequien Nuquin Papa chiec:
—Nuqui tantiacpadomboen nëbi
nainembi, Papa. Èmbi aden nainacsho:
“Nuquin Papa bédambo iquec,” matses
cameta, Papa —quenubien
abucuëshquio Nuquin Papa comapenec
onquepondash. —Ai, ëmbi namiaid mibi
icsho: “Nuquin Papan namiaid nec.
Nuquin Papa bédambo iquec,” matses
camepombi. Nëbi padpiden
adomeoaindambi —quepondash Nuquin
Papa.
29Abucuësh onquesho bédamboen
tantiabi yec utsibo: —Abu cuëdtoec nec
—quenubien utsibo: —Nuquin Papan
abi yacnoshon uaid mayan bédan Esus
chuiplash —quecuededpondash. 30Adsho
tantiash Esus: —¿Èbi tantiamenuecta
onquediosh? Padenquio. Mibi
tantiamenuequien niosh. Aden
tantiashun ëmbi bédamboen chuisho
tantiata. 31Nuquin Papa chieshënkuid
Satanasën yuaido matses dadpenquioshë
iquec. Nëbi Nuquin Papan

tantiacpadomboen aido utsi-utsien Satanas bedshunendambi: “Chèn. Con na neque,” quequin. ³²Èbi abuc dectanac aden matses èbi tantiaquid icmendambi —quepondash Esus. ³³—Èbi cuesten dectanquin unès uaindac —quequin tantiec: —Èbi abuc dectanendac —quepondash Esus. ³⁴Adsho tantias abi datsidadquido: —“Èbi dectanendac,” quiosh. “Unèsebi,” quepequien iccosh —quiashien Esus chiec: —“Nuquin Papa yacnuèsh choquid Quidistu caid unèsesambo nendac,” quequin Nuquin Papan chiaid nuquin matsesèn chuinubi: “Unèsebi,” ÷quecta icco? “Unèsebi,” quequid Nuquin Papa yacnuèsh choquid ictiapimbo mibi iquec. “Nuquin Papan matsesmiaid nebi,” quequid ÷tsutsi mibi nepe? —quepondash Esus datsidadquido. ³⁵Adoquien Esusèn: —Nadquid nebi —quenquo icquin ompoacbimboen naden chuipondash. —Mibi bèdamboen tantiaquid nèbi isadenquo iquendac. Aid nibèdnuc bèdamboen mimbi tantienquo iquendac. Nidabi aidèn chuisho bèdamboen tantia. ³⁶Nuquin Papan bèdamboen iste tantiaquid tantia. Adsho bèdambo icmequin Nuquin Papan cuidtiapimbo icquid mibi icmendac —quepondash Esus abibi cadequi. Adtanec nidpondash aidon istiapimbo icnuc.

Isadaidbon Esus tantienquo yaid

³⁷Èmbi dadpen chuiquin dada uabanacpadomboembi Esusèn comapenen tantiaquin dadpen nabansho isun con matses isadaidbon Esus tantiatadquidi Esus tantienquo icpondash. ³⁸Aden Esus tantienquo icte con tsusedpa Isayasèn Nuquin Papan tantiamiacpadomboen chuiquin dada uapampic.

“Nuquin Papa yacnuèsh choash nadec onquendac.

‘Mimbi chiaidquio chuibansho tantiasun: Muequien mibi nec, èbi caindac, Papa.

Mimbi namiacpadomboen comapenen tantiaquin dadpen nabansho isash: Nuquin Papa yacnuèsh choquidien nec, quetiadquidi adenquo iquendac, Papa,’ quependac,”

quequin Esusèn chuite Isayasèn dada uapampic.

³⁹Nuquin Papan pamumèdacbimboecnuc icmiac con matsesèn Esus tantienquo icpondash. Aden chuiquin Isayasèn padpiden dada uapampic.

⁴⁰“Isadaidbon èbi tantiatiapimbo icsho isun

‘Ma adembi tantienquo icpanuna,’ caimbi.

Ma adequi pabiate shècuè nibèdacbimboec icchitono.

Èbi tantiasho abi icsaid bèpiscudquin bèdamboen ismane,”

quequin Nuquin Papan ambi con matses caido nèishèshun chushcaid Isayasèn dada uapampic. ⁴¹Nuquin Papambo Esusbèd uinsadpambo yec tabadsho isonaid icquin Isayasèn aden Esus tantienquo icte chuiquampic.

⁴²Con matses dadpenshun Esus tantienquo icnubi con matses chuiquidon abentsècshun abentsècshunquien Esus tantiauidpac caondash. Adoboedi: —“Nuquin Papan chiaid chuibante shubun puduedenda,” canushe —quiash dacuèdquin: —Esus tantiaquid nebi —quequin chuitiadquidi utsibo chienquo icpac caondash.

⁴³—Ma con matsesèmbi èbi bèdamboen isnu —quequidnuidtsèqui tantiaquin aton matses chuitiapimbo icpac caondash.

—Ma Nuquin Papan ëbi bédamboen isnu. Aton Mado tantiaquid nebique —quetiadquidi adenquio yac caondash.

Cuidenquio icte chiec nebi, quiaid

⁴⁴Abi tantiauidboedo Nuquin Papan chiaid isbanquido cho-choash abi datsidadacsho chuinuec Esus padpidec comapenec onquepondash. —Ëbi tantianuequidën ëbiuidtsëquida tantiapadic? Padenquio. Ëbi tantiaquidën ëbi chomiondaitsen tantiatsiash. ⁴⁵Adembidi con Papadquiobidi ëbi icsho isun: “Ai, adquiobidien Nuquin Papa iquec,” quequin tantiatsiash. ⁴⁶Nuquin Papan matses bédamboen iste tantiamenuc matsesbéd tabadec chondabi. Adec matsesash: “Ëbi tantiaquido ma Nuquin Papan bédamboen isquin bédamboen tabadmenu,” quiaish nebi. ⁴⁷“Ëmbi aden chuisho tantiatipimbo icquido nëbi cuidnu,” ¿quetabi icti? Padenquio. Nëbi Nuquin Papan bédamboen isquin cuidenquio icte chuinuequini nec. ⁴⁸Nuquin Papan cuidte ushëmbien ëbi tantiesabon: “Nuquin Papan chiaidshenda chuipadenec. Aid tantienquio yec icsabudquiopobi,” quequin ambibi tantiendac. Adsho Nuquin Papan cuidendac. ⁴⁹Ëmbembi chuiquindambi nadi? Padenquio. Ëbi chomiondaid con Pan chiaidquio chiequini nec. ⁵⁰“Ëbi tantiaquid ëbëdi tabadendac padpidec unësenquio yec,” queshun Nuquin Papan chiaiduidtsëqui chiequini nec —quepondash Esus.

Esusën abëd icquido tapanaid

13 ^{1,2}Esusën comapenen tantiaquin nabanaid chuiquin aitedi chiombi. Nëbi abi tantiaquido tantiaquieac abided cuidadec unësaid chuiquin unësash abi uincuenaidtsen chuinu. Tantia. Nuquin Papan con

tsusedpabo unës uainquio icquin matamiampid inchësh tantiaquin pec tabadte ushë nëbi yanuc inchëshën Esusbéd pec bédamboec tabadondabi. Padnuen Udas Simon Iscadioten mado Satanasën tantiamiacpadomboen Esus bedmete tantiec tsadpanëdash. Adnubien Esus: —Nëbi con Pa yacno nidebi nëido nianec. ³Con Pabëd tabadec ambi tantiacpadec abëdi abitedishun Icbombo iccondaïdi nëbi anobidi nidoash adquiobidi icoaindabi. Adquid icquin nëido bédamboec tantianante ismenu —quequin tantiaquin ⁴yuan nacbimboen nadopondash. Uequin peboedi nidtotanec dashcute bëntse icquid dachiquidtanec daucudte tsibidiquepondash. ⁵Tsibidiquetanquin pada-padaid dapan acte cushtotanquin abëd icquido tapambampondash. Daucudten taucbanquin tapambanondash.

⁶Aden tapambanquimbi: —Mibitsen tapanu —cac Petedon: —Ëlcbonda yua tapampaid? Ëbi tapanenda, Icbo. Padi —capondash. ⁷Adoquien Esusën: —Ëmbi nasho nëbi mimbi tantienquio iquec. Yucshun mimbi tantiendac. En tapanu —caquien: ⁸—Padi. Mibi bédamboshë icquid nec. Èbien icsaquid nec. Yua namiacimboen mibi tapametipimbo iquebique. Padi —caoapondash Petedon. Adoquien: —Ëmbi tapanabi yac con yuambo mibi ictiapimbo ictsiac —capondash Esusën. ⁹Adsho tantianshun Petedon: —En na, Icbo. Tapantanquimbi mapinobëdtabi ëbi mëpanta —caquien: ¹⁰—Padi. Nesboed mibi nec. Taënouidtsëqui bëchishacsho tapanembi. Ëmbi bëchish ucac mibi bédambo iquec. Abentsëc icsambo iquec —quepondash Esus. —Bëchish ucacimboen ëmbi nasho Nuquin Papan mibi bédamboen isendac

icsaid ucudacimbocnuc —quequin tantiec: —Èmbi bëchish ucac mibi bëdambo iquec —quepondash Esus.

¹¹—Udasèn ëbi unës uamenuen bedmendac —quequin tantiec: —Abentsëc icsambo iquec —quepondash Esus.

¹²Aden tapambanash dasiuidash samëdquin pebededquin abëd icquido Esusèn chuipondash. —Èmbi naboed çada tantie? Tantia. Mibi chuinu. ¹³“Èbi chuiquidquio mibi nec,” mimbi ëbi capec. Adembidi: “Con Ico mibi nec,” mimbi ëbi capec. Bëdamboen mimbi chiec. Adquid nebique. ¹⁴Èmbi nabocpadomboen mimbitsen nata. “Èbëd icquid tantiaquioquin tapanquin nashunu,” qeshun naombique. Adecbidi nashunanta. Naden tantiashun nata. “Esus tantiaquido tantiaquiemi. Con buchibimboecnuc nashunu,” quiash nashunanta. ¹⁵Èmbi nabocpadomboen namenuen adombique. Mimbitsen nata. ¹⁶En chuinu. Tantia. çIcbon chiacta chieshpadic? ç“Nid,” cacta nidenquio icpadic? Icbon chiacpadomboen yuan naquid yendac. Adomboen tantiaquin ëmbi chiacpadomboen nata. ¹⁷Èmbi aden chuisho tantiashun ëmbi chiacpadomboen naic mibi bëdambo iquendac —quepondash Esus.

¹⁸Adashic padpidec: —Mibitedi caic: “Bëdambo iquec,” quetiapimbo iquendabi. Tauamboen: “Nuquibi icnu. Cho,” ëmbi caondaïdo con yuabotedi tantiemi. Abentsëc icsambo iquec. “Aid con yuapenquio nec,” quequin ëmbi tantiaïdi nec. Nuquin Papan tantiamiac aidën icsamboen nate chuiquin nuquin tsusedpan dada uapampic naden. “Èbëdtan planeboedëmbi ëbi unës uamenuen bedmendac,” quequin dada uapampic. ¹⁹“ ‘Abi unës uametebi chioshi. Nuquin Papapadquidquioibi icquimbien naosh,’ quequin ma

tantianu,” qeshun mibi chiombi.

²⁰Mibipadquidën nate mibi chuinu.

Tantia. Mibipadquidën ëbi chuibansho tantiash: “Ai, abimbo caic,” qeshun utsibon ëbi tantiatsiash. Adembidi ëbi tantiashun ëbi chomiondaïd Nuquin Papatsen tantiatsiash —quepondash Esus.

Abi bedmequid Esusèn chiaïd

(*Mat. 26.20-25; Mad. 14.17-21; Duc. 22.21-23*)

²¹Adshumbien abi bedmequid Udas tantiac unësquio icnuc Esusèn chuipondash. —Tantia. Mibitedi chuinu. Èbëd icquidëmbi ëbi chieshënquido ëbi bedmendac —quesho ²²tantiash abëd icquidobëd bëisnanc: —çTsutsi capec? Nëïdien cachitec —quecuededpondabi otacquio tantiec.

²³Èbi tantiaquidquio yec con cachoçtsëqui Esus uepondash. ²⁴Adec Esusèn dayuntsëqui ueshobini: —“çTsutsi cai?” ca —capondash Petedon mëdquin onquenquio icquin. ²⁵Adoaquimbi cachoc isquin: —çTsutsi cai, Ico? —capondac. ²⁶Adoaquien Esus: —En istac. Pete cuëshën ënë puntanquin menequin mibi ismenu —quetanquin pete cuëshën ënë puntanquin Udas Simon Iscadioten mado menepondash. ²⁷Adoac penubi Satanasquio Udas dapuededquioipanëdash ambi tantiaïdquio namenuc. Adshobien Esusèn: —Mimbi tantiacpadomboen baded nëbimbobi naic nid, Udas —capondash.

²⁸Adsho tantiashini ëbitedi: —Tantiadenquio yec onquepec. çAtotsi quiash: “Baded naic nid,” quepec? —quepondac. ²⁹Utsi: —Udas nuqui piucquid dayun uashunquid nec. “Piucquid buanshun pete bedtan,” quepequien iccosh —quenubien utsi:

—“Piucquid nibëdquido piucquid menetan,” quepequien iccosh
 —quecuededpondash. ³⁰Pete cuëshëmpi pesho: —Nëbimbobi baded naic nid
 —caquien Udas nidpondash.
 Inchëshëmbi nidpondash Esus
 bedmenuen chiec nidec.

Tantiananquiota, quequin chiaid

³¹Abi bedmenuen chiec Udas nidbombien Esus: —Nuquin Papan matsesmiadquio icquin ambi tantiaidtedi nëbimbobimbi nainendac. Ëmbi nainsho isash con Pa bëdambo iquendac. ³²Ëbitsen bëdambo icmenuen con Pan comapenen tantiaquin ismendac. ¿Yuecshun quectabi icti? Nëbimbobimbi caindac —quepondash Esus. Abi unës uatebëdta abi unësash uincuenash Nuquin Papa yacno nidte chiec adpondash. ³³Adashic ëbi chedo padpiden chiec: —Nëbimbobi nidebique. Chuiquid dapabo ëmbi chiondacpadomboen mibi chuiöanu. Tantia, mado. Ëbi nidacsho mimbi ëbi istuidenquio iquendac. Ëbi nidacno mibi nidtiapimbo iquendac. ³⁴Aden tantiaquin Nuquin Papan chiaid utsi mibi chuinu. Ëbi nidan ëmbi chiacpadomboen nata. Ëmbi mibi tantiaquiacpadquieic tantiananquiota. ³⁵Ëbi tantiaquido tantianansho isun: “Adec tantiananquido Esus tantiaquidombo nec,” quequin utsibon tantiatshash —quepondash Esus.

Petedo: Ëmbi isacmaid nec, quete chiaid

(*Mat. 26.31-35; Mad. 14.27-31;*

Duc. 22.31-34)

³⁶Adec —Nidebi —quesho tantiaashun Petedon: —¿Mitsimbo nide, Icbo? —capondash. Adoquien Esus: —Nëbi mibi nidtiapimbo yacno nidebi. Yuecash ambo mibitsen nidendac —quepondash Esus. ³⁷Adsho tantiaash Petedo: —¿Atotsi

quetiadquio yec: “Nëbi ëbëdi nidtiapimbo mibi iquec,” quepo mibi? Mibëd nidec dacuëdenquio ictsiabi. Mibi chieshënquidon: “Unës uanu,” mibi casho tantiaash: “Ëbien natiad,” quetsiandabi —quepondash Petedo.

³⁸Adsho tantiaashien Esus: —“Ëbien natiad,” ¿quecta icpatsia? Padenquio mibi ictsiac. Cachina bënë cuëdanabi icnuc mibi chieshtouidendac. “Ëmbi isacmaid Esus nec,” mibi quendac. Adashic padpidec adecbidi. Adashic padpidec adecbidi. Cachina bënë cuëdanabi icnuc mibi adendac —quepondash Esus. Adsho tantiaashini Esusbëd icquido ëbitedi dacuëdcuededpondac.

Nuquin Papabëd tabadmendambi, quiaid

14 ¹Ëbitedi dacuëdcuededsho isashien Esus: —Dacuëdenda. “Ëbi dayun uaquid nec,” quequin mimbi Nuquin Papa tantiacpadomboen ëbitsen tantiaquiota. ²Mimbi tantiacpadquio Nuquin Papan shubu iquec. Quënë dadpenquioshë iquec. Tsucustiapimbo iquec. Adpenquio icsho mibi aden chienquio ictsiambi. Adquid tantiaquin: “Ëbi tantiaquido ëbëdi tabadmendambi,” quequin chiombi. ³“Adquid iquec,” quiaash ëbia nidshun con Pa chiendambi. “Ëbi tantiaquido neque. Nuquibëdi tabadmenuna,” quequin chiendambi. Adashic ëbi yacno mibi buanuec choaindabi. ⁴Ëbi nidan ëbi nidacno nidte mimbi tantiec —quepondash Esus.

⁵Adsho tantiaashun Tomasëntsen: —¿Mitsimbo nide, Icbo? Tantiambo iccombi. Podqued tantienquio iquembique. Ëbi chui —caquien ⁶Esus: —Nuquin Papa yacno nidte tantiamequidquio nebi. Nuquin Papan chiaiduidtsëqui chiec muesambo nebi. Adquid icquin ëbi tantiaquid Nuquin

Papabèd tabadmendambi. Èbi tantiesan Nuquin Papa tantiatiapimbo ictsiash. Èbi tantiaquidènuidtsèqui Nuquin Papa tantiatsiash. ⁷Èbi caic: “Nuquin Papan Mado nec,” quequin mimbi Nuquin Papatsen tantiendac. Nèbi abipadquid èbi icsho isun Nuquin Papambo isacimboen mimbi tantiendac —quepondash Esus.

⁸Adshobien Uedipentsen: —Nuquin Papa èbi isme, Icbo. Nuquin Papa iste bunebique. Aid isash bèdambo ictsiabi —caquien ⁹aidtsen Esusen: —¿Tantienuioda ique, Uedipe? Yuec mibèdi tabadobi. ¿Mimbi isacmaidtabi nedi? ¿Mibi chianenquiodambi ictio? Nuquin Papapadquidquiodidini nec. Èbi adquid icsho isun: “‘Adquidquiodidi Nuquin Papa iquec,’ quequin Nuquin Papatsen mimbi tantiendac,” quequin mibi chiombi. ¿Atotsi quequimbini: “Nuquin Papa èbi isme,” cai? ¹⁰“Nuquin Papapadquidquio nebi,” èbi qesho tantiash: “Ai, abimbo caic,” ¿quenquioda icco? Èmbembi chienquio iccombi. Con Pan chiaidquio chiequini nec. Adembidi èmbembi nabanenquio iccombi. Èbèd tèshnanenquio icquin con Pan namiaquimbi naoc. Èmbembi nainquio iccombi. ¹¹“Con Papadquidquio nebi,” èbi qesho tantiashun: “Ai, abimbo caic,” cata. Èmbi chiaid tantiatiapimbo icquin èmbi comapenen tantiaquin dadpen nabamboedquio tantiata. Aden èmbi nabamboed tantiaquin: “Nuquin Papan chomiaidènuidtsèquien adotsiash,” quequin tantiata. ¹²Tantia. Mibi chuinu. Èmbi nacpadomboen èbi tantiaquidontsen comapenen tantiaquin nabanendac. Èmbi chuibanac daèdpactsècshun èbi tantiabentsèccosh. Con Pa yacno nidshun èmbi chomiaidèn con Mayanèn namiac mibipadquidèn èbi chuibanac dadpenshun èbi

tantiabenendac. ¹³Èmbi chiacpadomboen naquidèn: “Èbi nashunta, Icbo,” qesho tantiashun ambi chiacpadomboen nashunendambi. “Nuquin Papa bèdamboshè iquec,” camenuen ¹⁴èbi tantiaquidèn chiacpadomboen nashunendambi —quepondash Esus abèd icquido chieci.

Nuquin Papan Mayan tabadte chiaid

¹⁵Adashic abèd icquido padpiden chieci Esus: —Èbi abimbo tantiaquidèn èmbi chiacpadomboen natiaquio iquendac. ¹⁶Adotiadquio icsho isun con Pabèd icquin con Pa chieciambi naden. “Nuqui tantiaquido bèdamboen tantiamenuen nuquin Mayan aidobèd tabadmenuna, Papa,” èmbi cac Nuquin Papan con Mayan mibèdi tabadmendac. ¹⁷Adoac mibi nianenquio yec mibèdi tèshnanenquio iquendac. Mibèd icquin èbi chuiquin mibi abimbo tantiamendac. Aid isadenquio icsho èbi tantiesabon aid tantiatiapimbo iquec. Mimbien aid tantiec. Con Pan èbèd icmiaidquio nec. Ambi namiaid èbi icsho aid tantiashumbimboen mimbi tantiec. Èbi nidan choash mibèdi tèshnanenquio yec tabadendac con Mayan. ¹⁸¿Shiadimpi mèyadacbitsec icnudambi mibi niampe? Padenquio. Nuquin Papan Mayan con Mayambi nec. Mibèd aid icnuc èbèd yacbimboequi con Mayan tantiadendac. ¹⁹Nèbi èbi nidacsho èbi tantiesabon èbi isenquio icnuc mimbi èbi isendac uincuenacsho. Adec uincuenaid icquin con Mayan mibèd tabadmequin mibi unèsacsho uincuemeshun èbèdi tabadmendambi. ²⁰Èbi uincuenaid ushèmbi mimbi naden tantiendac. “Esusèn Nuquin Papa tantiaquieci aidbèd tèshnanenquio icquin aidèn chiacpadomboenuidi naindac. Adecbidi Esusbèd tantiananquieci aidbèd tèshnanenquio icquin aidèn

chiacpadomboen natiadquo yec tabadebi,” quequin mimbi tantiendac. ²¹Ëmbi chiacpadomboen naquid ëbi tantiaquidquo nec. Ëbi tantiaquidquo mibi icsho con Pabëdtan mibi tantiaquiquin: “Adquo aton Papabëd Esus iquec,” camequin mibi bëdamboen tantiamendambi —quepondash Esus. ²²Adsho tantishun Udas utsin abi bedmequidënpenquo: —“Nuquin Papa yacnuësh choash con matses chuiquidquo yanshun abitedi ismequin tantiamendac,” quequin Nuquin Papan chiaid nuquin tsusedpabon dada uapampic. Nuquin Papa yacnuësh choquid icquin ðatotsieshun ëbiuidtsëqui tantieme, Icbo? —caquien ²³Esus padpidec: —Ëbi tantiaquiduidtsëqui naden tantiamendambi. Ëbi tantiaquid ëmbi chiacpadomboen naquid nec. Aden nasho con Pabëdtan tantiaquiquin aidbëdi con Mayan tabadmendambi. Adoac con Mayanën tantiamiac ëbëd iquec con Pabëd iquec quiacbimboec tantiendac. ²⁴Ëbi tantienquo icquidoen ëmbi chiaid niac-niacquido nendac. ¿Ëmbiuidtsëqui chiaidta adquidën niac-niacpadic? Mambi Nuquin Papan chiaidquo chuiboc. Aidën chiaidquo adquidën niac-niaquec —quepondash Esus abëd icquido chiec. ²⁵Adashic padpidec Esus onquiondash. —Mibi bëdiactsëc tantiemequin mibëd icquin con Pan chiaid chuibanombi. ²⁶Con Pa yacno nidshun ëmbi: “Nuquin Mayan aidobëdi tabadmenuna, Papa,” cac con Pan con Mayan matsesbëd tabadmendac. Adoac ëmbi naidbëdta ëmbi chiondaidtedimbo mibi bëdamboen tantiamendac. ²⁷Con Pa yacno nidshun con Mayan mibëdi tabadmequin dacuëdenquo icquid mibi icmendambi. Adoac dacuëdenquo yec bëdamboec tabadta. Ëbi tantiesabo

dacuëdacbimboec dacuëdenda. Comapenec dacuëdtanec uinte paëdtanec aido tabadnubi mibi dacuëdenquo yec bëdamboec tabadta. ²⁸“Nëbimbobini con Pa yacno nidendac. Adtanequic choaindabi,” quepobi mibi chiec. Ëbi adsho tantiasb ëbi tantiaquidombo cuishonquetsiasb. “Esus abi namequid aton Papabëd tabadec nidec,” quiash ëbi tantiec cuishonquetsiasb. ²⁹Nidnumbi mibi chiec nebi. “Unësash uincuenendabi. Adashic con Pa yacno nidendabi,” quiobi. “Ëmbi chiacpadece ëbi adsho isun ma nëidon: ‘Esusën abimboshenda capondash. Ambi chiondacpadquid Nuquin Papan Madombo nec,’ quequin tantianu,” quiash adobi. ³⁰Nëbi ënquimbi chuinu. Ëbi tantiesabon icbo Satanas ëbi unës uamenuec choec. Ambembi aidën ëbi unës uametiapimbo iquec. ³¹Con Pan tantiacpadequini unësendac. Ëbi adec unëso isash: “ ‘Nuquin Papa tantiaquin ambi chiacpadomboen naic abided cuidadec Esus unësac,’ quequin ma matses abitedishun tantianu,” quiash adebi. Nëbimbobimbi naique. Nidec nidnu. Nid —quepondash Esus.

Shancuinbiecquid uba caid chiaid

15 ¹—Nidec nidnu. Nid —quetanquimbi padpiden chuipondashi ompoacbimboen chuiquin. —¿Mitsipadquo shancuinbiecquid uba caid icpec? Mapietsëc ictsequi cuidi-cuidipambo yanquid. Adquidic shancuin bacuëbimboec didiquequid. Uba dadan aton cuidi canimequin bëdambo icmequid. Adomboembidi ëbi tantiaquido bëdambo icmendambi. Nuquin Papain uba icbobimboecquid nec. ²Uba aton icbon cuidi utsiuc bacuëesa icsho pateshunepaid yoc. Adoacbimboen ëbi tantiauidtsëcboedon

ambi icsamboen naid ëntiapimbo icsho con Pan ambi icsaido cuidacno nënendac. Uba icbombidi bédamboen bacuëmenuen dadpen cuidi icquid cuidi dadpen pateshun siaquid.

Adomboembidi ëbi tantiaquido bédamboshë icmenuen Nuquin Papan aidon icsamboen naid ëmetsiash. ³Ëmbi chiacpadomboen naic mibi bédambo iquec. Aden ëbi tantiasho Nuquin Papan mibi bédamboen isec. ⁴Ëbi adembidi tantiaquin ëmbi chiacpadomboen nata. Adsho isash mibi bédamboen tabadmec mibéd iquendabi. Uba cuidi padquëdaid bacuëtiapimbo iquendac. ⁵Adecbidi ëbëdi tëshnanash matses bédambo ictiapimbo iqueque. Èbëd tëshnanenquio yec bédamboec tabadta. Bédamboec tabadquin mimbi utsibo ëbi tantiametsiac. ⁶Uba icbon cuidi utsiuc bacuëesa icsho pateshun tsindoshon nëdëncapaid yoc. Adoacimboen ëbi tantiesabo unësacsho Nuquin Papan ambi icsaido cuidacno nësecaindac —quepondash Esus.

⁷Adshumbic Esusën padpiden chuipondash. —Ëbi tantiaquin ëmbi chiacpadomboen naquidën: “Ëbi nashunta, Papa,” cac ambi chiacpadomboen Nuquin Papan nashuntsiash. ⁸Nuquin Papan adoshonac: “Nuquin Papa bédambo iquec,” mimbi catsiac. Adembidi utsibotsen: “Nuquin Papa bédambo iquec,” camenuen bédamboec tabadquin ëbi tantiameta. Mimbi adosho: “Ai, ëbi tantiaquidquio nec,” caindambi. ⁹Con Pan ëbi tantiaquiacpadomboembi mibi tantiaquiembi. Adoaid icquin ëbitsen tantiaquioquin ëmbi chiacpadomboen nata. ¹⁰Abi tantiaquioquin ambi chiacpadomboen nashobini con Pan tantiaquieci. Adembidi ëbi tantiaquidën ëmbi chiacpadomboen nasho ëmbitsen aid tantiaquiendambi. ¹¹“Ëbi

cuishonquiacpadquiecbidi ma ëbi tantiaquieci cuishonquequiono,” qeshun aden mibi chiembi —quepondash Esus abëd icquido chieci.

Tantiananta, quequin Esusën chiaid

¹²Adashic abëd icquido padpiden chieci Esus: —Ëmbi mibi tantiaquiacpadquieci tantiananta. ¹³Nadquieci caimbi. “Min utsi cuesnu,” cashunac: “Ëbien natiad,” quicabimboeci tantiananta. Aden mibi tantieci ëbided cuidadec unësendabi. ¹⁴Ëmbi chiacpadomboen nasho mibi con utsi caimbi. ¹⁵Ëmbi con yua caboedobi mibi con utsi caimbi. Icbon: “Tantia. Chuinu. Nadono. ¿Ada bëda icpec?” quequin aton yua chienquio icquin aton utsien aden chuipaid. Con Pan: “Ma abi tantiaquido chuinu,” caidtedi mibi chiombique. Mibi con utsi caimbi. ¹⁶“Esusbëd iquec nidnu,” ¿quequina mimbembi tantiadionda? Ëmbien mibi: “Nuquibi icnu. Cho,” caondac. “Utsibo tantiamequin ma nëidon ëbi chuibenenu. Adoac utsibotsen ëbëd tabadtequid yanendac,” qeshun mibi cho caondambi. Aden ëmbi chiacpadomboen naquidën Nuquin Papa chuiquin: “Min Mado Esus tantiaquid ëbi icsho ëmbi chiacpadomboen ëbi nashunta, Papa,” mimbi cac mimbi chiacpadomboen Nuquin Papan mibi nashuntsiash. ¹⁷Ëbi adsho tantiash ëmbi chiacpadquieci tantiananta —quepondash Esus.

Esus tantiaquido chieshënte chiaid

¹⁸Adashic padpideci Esus onquepondash. —Ëbi tantienquio icquidon chieshënac: “Aden Esusba chieshënondash,” quequin tantiata. ¹⁹Ëbi tantiesabo icsho ëbi chieshënuquidon mibi bédamboen istsiandac. Adquid iccondaidi ëmbi:

“Cho,” cac ëbi tantiaquid mibi yanondac. Adec ëbi tantiaquid icsho mibitsen chieshënoaindac. ²⁰“Yuan icbon chiacpadomboen napaid yoc,” quequin ëmbi ÷chuiboedta tantie? Aden ëmbi chiacpadomboen nasho ëbi chieshënuquidon mibitsen chieshënoaindac. Adembidi ëmbi chiaid tantiatiapimbo icquidën mimbi chiaidtsen tantiatiapimbo icoaindac. Padnuen ëmbi chiaid tantiaquidën mimbi chiaidtsen tantiendac. ²¹Ëbi chieshënuquidombi ëbi chomiondaidquio tantiaquin ëbi chieshënuquio ictsiash. Ma ëbi chomiondaid Nuquin Papa tantienquio icquin aidon ëbi chieshëmpayoc. Adomboembidi ëbi tantiaquidotsen chieshënoaindac. ^{22,23}Ëbi chieshënuquidon ëbiuidtsëquida chieshëmpadic? Ma ëbi chieshënuquin Nuquin Papatsen chieshënyoc. Adquid icsamboshë iquec. Nuquin Papa yacnuësh choshon ambi chiaid ëmbi chiabi icnuc ëbi chieshënuquido ëbi chieshë nec icsainquio ictsenash. Nuquin Papa yacnuësh choshon mambi Nuquin Papan chiaidquio chuibamboc. Adnuc Nuquin Papan ëbi chieshënuquido: “Mibi icsamboshë iquec,” caindac. ²⁴Adembidi Nuquin Papa yacnuësh choshon ëmbi comapenen tantiaquin nabanquin ismiabi icnuc Nuquin Papan: “Con Mado chieshë nec mibi icsambo iquec,” cainquio ictsenosh. Utsibon nabanacmaidquio comapenen tantiaquin mambi nabamboc. Adosho isash ëbi chieshënuquido: “Icsapenquio iquebi,” quetiapimbo iquendac. Ëmbi nabansho isun ëbi chieshënuquin con Patsen chieshë nec. ²⁵“Aden matse sën ambembi ëbi chieshëmpac,” caimbi. Ëmbi aden chuite chuiquin Nuquin Papan nuquin tsusedpa dada uamepampid ëbi chieshënuquidon isbanaid nec —quepondash Esus.

²⁶Adashic padpidec: —Ëmbi con Pa yacno nidshun: “Nuquin Mayan ëbi tantiaquidobëd tabadmenuna, Papa,” cac: “Ai,” qeshun Nuquin Papan chomiac mibëdi tabadquin abimbo chuiquin ëbi tantiamequiendac. ²⁷Adoac mimbitsen ëbi chuibanendac. “Yuec aidbëd tabadondashun Esus tantiembi,” qeshun mimbi ëbi chuibanendac. Aden mimbi chuisho ëbi chieshënuquidon mibitsen chieshënuquidon Adoac dacuëndenda.

16 ¹“Chieshtonoshe,” qeshun mibi aden chiombi. Mibitsen chieshënac dacuëndenda. Mibëd con Mayan tabadmembique. ²Ëbi tantiaquido caquin: “Isenda. Esus tantiaquid neque. Nuquin Papan chiaid chuibante shubun puduedmenda,” caindac. Shubu utsi-utsiec yacnuësh adendac. Adomboembidi mibi chieshënuquin utsi-utsien cuesun secash: “Nuquin Papa tantiaquidquio icquin Esus tantiaquido cuesun secaombi,” quependac. ³Aden Nuquin Papa ëbëdta tantienquio icquidon ëbi tantiaquidotsen chieshënuquidon. ⁴Mibi chieshënac: “‘Ai, adenshenda Esusën chuipondash. Ëbi tantiaquido cuesun secaindac, quepondash,’ ma nëido quenu,” qeshun nëbi mibi chiembi. “Ëbi icnuc ëbi tantiaquido cuesun secadenquio iquec. Ëbi nidambien aido cuesun secabenendac,” quequin tantiaquin ënden aden mibi chienquio iccondambi. “Nëbi nidebi,” qeshun nëbi mibi chiembi —quepondash Esus.

Nuquin Papan Mayan chote chiaid

⁵Adashic: —Nëbi ëbi chomiondaidbëd tabadec nidendabi —quepondash Esus. Adsho tantiash padequimbo tabadpondabi. Adec ëbi padequimbo tabadsho isash Esus padpidec onquepondash. —“Ë Mitsimbo nide?”

¿quenquioda ique? ⁶Ai, èmbi chuiboed tantiac unèsquo icnuen mimbi èbi chienquo icchitec. ⁷Èbi nibèdnuc mibi bédambo iquendac. Èbi nidenquo icnuc con Mayan mibi bédamboen tantiamenuec choenquo ictsiash. Nidshumbimbi mibèdi tabadmenuen chomendac. ⁸Adoac matses ambi icsamboen naid tantiamequin èbitsen tantiamendac. Adomboembidi Nuquin Papan cuidtetsen tantiamendac. ⁹Aden Nuquin Papan Mayanèn tantiamiac: “Esus tantienquo yec icsambo icchitebi,” quendac matses. ¹⁰Adembidi èbi bédamboshè icquid tantiamiac: “Nuquin Papan Madombo yec Esus bédamboshè icquid nec. Aid abentsèqui tantishoeni Nuquin Papan bédamboen istsiash,” quendac matses. Èbi isadenquo yec con Pa yacno nidan con Mayanèn tantiamiac matses adendac. ¹¹Adembidi Nuquin Papan cuidte tantiamiac: “Matses yuaquid Satanas ambi yuaido Esus tantienquo icquidobèdta Nuquin Papan cuidendac,” quendac matses. Con Mayanèn tantiamiac adec matses onquendac —quepondash Esus.

¹²Adashic abèd icquido chiec Esus: —Mibi dadpenquo chuitiadquo icquimbi nèbi dadpen chienquo iquembi. Nèbi èmbi chuisho mimbi tantiatipimbo iquec. ¹³Nuquin Papan Mayan choshombien mibi abimbo chuiquin èbi tantiamendac. Ambembi chienquo icquin Nuquin Papan chiaiduidi chiendac. “Nadquo iquendac. Adecbidi nadquo choendac,” quequin mibi dadpen tantiamendac. ¹⁴Adembidi èmbi naidbèdta èmbi chiaidtedi tantiamequin: “Esus bédamboshè iquec,” camendac. ¹⁵¿Èbiuidtsèqui tantiamenuenda con Mayanèn adopec? Padenquo. Èmbembi chiaid mambi chiambo yoc. Nuquin

Papan chiacpadomboenuidi naquin ambi chiaiduidtsèquimbi chuibandenioc. “Con Mayanèn èbèdta con Pa tantiamendac,” quequin tantiec: “Èmbi naidbèdta èmbi chiaidtedi tantiamendac,” quiobi —quepondash Esus abèd icquido chiec.

Abi nidte Esusèn chiaid

¹⁶Adashic padpidec: —Nèbi isadenquo yanebi. Adashic yuepactscèc yash isadcuendabi —quepondash Esus. —Nèbi unèsash uincuenash padpidec isadebi —quequin tantiec adondash. ¹⁷Adsho tantishini èbitedi: —¿Atotsi quepec? Tantiadenquo yec onquepec. “Con Pa yacno nidash èbi nibèdnuc mibi tabadendac,” ma quepaboc. ¿Atotsi chuitiadquo yec: “Nèbi isadenquo ictanec yuepactscèc yash isadcuendabi,” queposh? ¹⁸¿Atotsi quepec nec? —quepondabi Esusbèd icquidobèd onquec. Esus tantiamenquo yec sho-shoshquetsècquiec onquepondabi. ¹⁹Adsho ambembi tantias: —Èbèd icquidon èbi chuitiadquo iquec —queshun Esusèn: —“¿Atotsi chuitiadquo yec nio?” quequin èbi chuite mibi buneque. ²⁰Tantia. Mibi Chuinu. Èbi unèsò isash mibi sedenquenubi èbi tantienquo icquido cuishonquendac. Adec sedenqueboedobi mibitsen cuishonquianendac. ²¹¿Mitsipadquo bacuè tishec chido icpec? Bacuè cuididiquenuc natiamboshè icboedi bacuè tishash cuishonquepaid yoc. ²²Adecbidi nèbimbobi èbi unèsò isash mibi natiaquiendac. Adboedi yuepactscècshun èbi padpiden isash mibi cuishonquendac ènèdenquo yec. ²³Adnubini con Pa yacno nidendac. Èbi adnuc mibi bédambo iquendac. Èbi nidan: “Èbi nashunta,” èbi catiapimbo

icquimbi Nuquin Papa mimbi chianendac. Ĕbi tantiaquidën: “Min Mado Esus tantiaquiembique. Ĕbi nashunta, Papa,” cac Ĕbi tantiaquin con Pan mibi nashunendac. ²⁴Aden mimbi Nuquin Papa chianenquio iccoc. Nĕbi adomboen chianeta. “Min Mado Esus tantiaquid icsho Ĕbi nashunta, Papa,” quequin chianeta. Mimbi adoac mimbi chiacpadomboen mibi nashunquin Nuquin Papan mibi cuishoncamedac —quepondash Esus abĕd icquido chiec.

Esusĕn abĕd icquido ĕnquimbi chiaid

²⁵Adashic abĕd icquido padpiden chiec: —Ompoacimboen dadpen chuibaniombi. Yuepactsĕcshun: “Con Pa nadquio iquec,” quequin mibi sebadĕnquio chiendambi —quepondash Esus. —Uincuenshun aden chiendambi —quequin tantiec adondash Esus. ²⁶Adashic padpidec: —Con Pa yacno Ĕbi nidan mimbi: “Min Mado Esus tantiaquid nebique. Ĕbi nashunta, Papa,” quequin Nuquin Papa mimbibi chianendac. “Ĕmbiuidtsĕqui: ‘Ĕbi tantiaquid nashunta, Papa,’ cac Ĕbiuidtsĕqui tantiaquin Nuquin Papan mibi nashuntsiash,” ĩquectabi ique? Padenquio. ²⁷Mibitsen tantiaquin Nuquin Papan mimbi chianiac mibi nashunendac. “Nuquin Papa yacnuĕsh choquid Esus nec,” quequin Ĕbi tantiaquid mibi icsho con Pan mibitsen tantiaquiquin mibi nashunendac. ²⁸Matsesbĕdi tabadec Nuquin Papa yacnuĕsh chondash nĕbi con Pa yacnobidi nidendabi —quepondash Esus.

²⁹Adsho tantiashini ĕbitedi: —Adquidshenda mibi nepec. Ma nĕbi mimbi sebadĕnquio chieyoc. ³⁰Mibi: “Nĕbi isadenquio yanebi,” quioc. Adashic: “Yuepactsĕc yash isadcuenendabi,” mibi qesho tantiash

mibi tantiamenquio yec sho-shoshquetsĕcquiec: “ĩAtotsi quepec?” quecuededpobi. Mibi chuietiadquio iccobi. Ĕmbi chiambobi ma mimbibi tantiapaboc. Comapenen tantiaquidquio icquin ma mimbi abitedimbo tantiapayoc. Aden tantiaquid yec Nuquin Papa yacnuĕsh choquid mibi nec —quepondabi ĕbitedi. ³¹Adsho tantiash Esus: —Ai, nĕbi mimbi Ĕbi tantiaquiec. ³²Aden Ĕbi tantiaquidquio Ĕbi chieshĕnquin bedsho isanec mibi niquendac Ĕbi nianec. Mimbi niamĕnubi con Pan Ĕbi nianenquio iquendac. ³³“Ĕbi nidan Nuquin Papan Mayan mibĕd tabadendac. Ĕbi tantiaquid Con Pan tantiaquiec,” quequin dadpen chuibanombi. “Ĕbi tantiec dacuĕdenquio yec ma tabadnu,” qeshun mibi aden chuibanombi. Ĕmbi chiaid tantiashun chieshĕmĕnquido dacuĕdĕnenda. Satanasĕn: “Icsamenu,” cac icsainquio iccondabi. Aden Satanas yuametiapimbo icquid icquin mibi cudasquin yuametiapimbo iquebique. Dacuĕdenda —quepondash Esus abĕd icquido chiec.

Esusĕn Nuquin Papa chiaid

17 ¹—Dacuĕdenda —qeshumbic Ĕbi tantiamenuen abuc isquin Esusĕn Nuquin Papa chuipondash. —Nuqui tantiactedi Ĕbi naimeta, Papa. Ĕbi naimetanquin comapenen tantiaquin Ĕbi bĕdambo icmeta. Aden mimbi bĕdambo icmiac mibitsen bĕdambo icmendambi, Papa. ²Ĕndenquimboshĕ mimbi Ĕbi chiondac naden chuiquin. “Nuqui matses uaidon abitedishun Icbo mibi nec, Mado,” quequin mimbi Ĕbi chiondac. Mimbi adondaic icquin mimbi tantiactedi matses nuquibĕd tabadtequido icmendambi, Papa. ³Matsesĕn nadosho

adoendambi. “Abipadquid utsi nibèdnuc Nuquin Papa iquec. Ambi chomiondaidquio Esus nec,” quequin tantiasho nuquibèd tabadtequido icmendambi, Papa. ⁴Mimbi chiacpadomboen naquin nèbimbobimbi nainec. Èmbi adoacsho isash matses: “Ambi chomiaid tantiasho Nuquin Papan nuqui bédamboen isec. Nuquin Papa bédamboshè iquec,” quependac, Papa. ⁵Nuqui tantiatedi èmbi nainacsho mibi yacno nidmeshun mibèdi èbi tabadmeoata nuqui matses uabi tabadtenecpadembi. “Nuquibi abitedimbo namenuna,” èbi cata, Papa —quepondash Esus Nuquin Papa chiec.

Esusèn abèd icquido Nuquin Papa chiaid

⁶Adshumbic Esusèn abèd icquido èbitedi chuiquin aton Papa chuiopondash. —Mimbi tantiatedi mimbi èbi tantiaquid icmiacsho mimbi bédamboen iste chuibanombi. Aden mimi chiaidquio chiac: “Ai, adotiadquio iquebi,” quiosh, Papa. ⁷Adembidi aidon: “Nuquin Papan namiaidquio nec. Ambembi nainquio iquec,” quequin èbi tantiaposh. ⁸Mimbi chiaid èmbi chuisho tantiashun mimbi comapenen tantiaquin nabamiaid nasho isun: “Ma Nuquin Papan chomiaidquio nepayoc,” caposhi èbèd icquidon, Papa. ⁹Èbi tantienquio icquido mibi chienquio iquembi, Papa. Èbi tantiaquiduidtsèqui mibi chiec nebi. Mibi tantiaquido icsho mimi tantiamiac èbitsen tantiec aidon. ¹⁰Adsho isun: “Nuqui tantiaquido nec,” caimbi, Papa. Aidon: “Mibi bédambo iqueque. Con Icbo mibi canu. Mimbi chiacpadec bédamboec tabadtiadquio iquebi,” quequin bédambo icmioshi, Papa. ¹¹Mibi bédamboshè iqueque. Èbi mibi yacno nidan èbi tantiaquido dayun uata, Papa. Èbi chieshènquidon chieshtomenushe. Nèido bédamboen

dayun uata. Mimbi èbi icmiacpadquidbidi comapenen tantiaquid mibi neque. Ma nuqui tantiananquiacpadquiec ma èbi tantiaquido tantiananu. Nèido bédamboen dayun uata, Papa. ¹²Aidobèd icquin mimbi chiaidquio bédamboen chuibanquin chieshtomiambo iccombi. Aden bédamboen dayun uaqin èbi tantiaquido cudasènquin Satanas yuamiambo iccombi. Udas abentsèquien Satanasèn yuatsaccosh. Mimbi chiaid matsesèn dada uapampicpadomboen èbi bedmuen Satanasèn Udas yuaccosh. Adoac èbi bedmequid yanash mimbi cuidtequid iquendac.

¹³Nèbi mibi yacno nidendabi, Papa. “Èbi nidan dacuèdec èbi tantiaquido chieshtonoshe,” qeshun mibi otacquio chienquio iquembi. “Èmbi abi dayun uate chuisho tantiashe èbi yacpadec ma cuishonquenu,” quequin mibi otacquio chienquio iquembi, Papa. ¹⁴Mimbi chiaidquio nèido chuibanombi. Adoac èbi tantiaquido yansho èbi chieshènquidon nèidotsen chieshèmpec. Èbi yacpadec mimbi chiaid niac-niacte bunenquio icshobidi nèido chieshènquiec, Papa. ¹⁵Aden tantiashe: “Èbi tantienquio icquidobèdi èbi tantiaquido tabadmenda,” ÷quectabi ique? Padenquio. “Èbi tantiaquido chieshtomenda,” caimbi, Papa. Satanasèn yuanushe. Bédamboen dayun uaqin chieshtomenda, Papa. ¹⁶Èbi tantiesabo tabadacpadec tabadenquio icquin èmbi nabocpadomboen natiadquio iqueque. ¹⁷Mimbi chiaidquio pausunquioquin bédamboen tabadme, Papa. ¹⁸Mimbi èbi: “Matses chiec nid,” caondacpadomboen aido: “Èbi chuibeneta,” caindambi. Adoac nèidon èbi chuibenendac, Papa. ¹⁹Nèido tantiaquiec nèbimbobini mimbi

chiacpadec ëbided cuidadec unësendac. “Adomboembidi ëbi tantiaquidon ma Nuquin Papan chiacpadomboen nanu,” quiaş ëbi tantiaquido min yuabombo icmenuec adebi, Papa —quepondash Esus aton Papa chiec.

**Esusën abi tantiaquid utsibo
Nuquin Papa chiaid**

²⁰Adashic padpiden Nuquin Papa chiec Esus: —Ëbëd icquido mibi chuishumbic nëbi aidobëdta ëbi tantiaquid utsibotsen mibi chuinu, Papa. Ëmbi chiaidbëdta ëmbi naidtedi ëbëd icquidon utsibo chuibanac aidotsen ëbi tantiaquido yanendac. Adec ëbi tantiaquido dadpenquo yanendac. Ëbi tantiaquidotedi tantiaquin mibi chiec nebi, Papa. ²¹Nuqui tëshnanenquo yapcadequi nuquibëd tëshnanenquo icquid icmeta, Papa. Nuqui tantiananquiapadec ëbi tantiaquidotedi shubu abentsëquën tabadacimboecnuc tantianameta, Papa. Adsho isash nuqui tantienquo icquido nadtsiaş. “Esus tantiec bëdambo iquec. Aden Nuquin Papanuidtsëqui bëdambo icmetsiaş. Nuquin Papan chomiaidquien Esus nechitec,” quetsiaş. ²²“Mibëd ëbi tantiananquiapadquiec ma ëbi tantiaquido tantiananquiono. Ma chieshënanenquo icnu,” quequin mimbi ëbi namiacpadomboen ëbi tantiaquido namiombi, Papa. ²³Nuqui tëshnanenquo yapadec aidobëd tëshnanenquo iquendabi. “Chieshënanenquo yec tabadnu,” quec aidobëd tëshnanenquo iquendabi, Papa. Adec ëbi tantiaquido bëdamboec tantianansho isun matsesën naden tantiatsiaş. “Ambi chiacpadquid Nuquin Papan chomenëdaid icquin Esusën abi tantiaquido aden bëdamboen tabadmec. Ambi chomenëdaid aton Mado tantiaquiapadomboen Nuquin

Papan aid tantiaquido tantiaquiec,” quequin matsesën tantiatsiaş, Papa. ²⁴Mimbi ëbi tantiaquido icmiaido nuqui tabadacnombo tabadmeta. “Nuqui matses uabi icquin mimbi: “Ëmbi tantiaidquio mibi neque. Nuquibi nanuna, Mado,’ cac nuqui bëdamboshë yec tabadtenecpadequi nuqui tabadsho ma ëbi tantiaquidon isnu,” qeshun mibi: “Nuqui yacno tabadmeta, Papa,” caimbi. ²⁵Icsaisambo mibi icsho icsambo icquidon mibi tantiatiapimbo icnubimbi mibi tantiaquiec. Mibi yacnuësh choquid icshobini ëbëd icquidon: “Ai, Nuquin Papa yacnuësh choquidien nec,” quequin tantiaposh, Papa. ²⁶Aden tantiamenuen yuec ëbëd icquidobëd tabadquin mimbi naid chuibanombi. Ëbi nidan ëmbi chomiaidën con Mayanën adembi ëbëd icquido tantiamendac. “Mimbi ëbi tantiaquiapadomboen ma nuqui daëdi tantiaquiaş ma tantiananquiono,” qeshun con Mayan aidobëd tabadmendambi. Adoac ëbëd icacimboec con Mayan tantiadendac, Papa —quepondash Esus Nuquin Papa chiec.

Esus bedmiaid

(*Mat. 26.47-56; Mad. 14.43-50;
Duc. 22.47-53*)

18 ¹Aden Nuquin Papa yuen chianec Esus nidpondash. Ëbi chedobëd nidquin acte Sededon caid potiaş tiedno cüete odibos caid nitsinacno ëbitedi chiec tabadtenebocnombo chopondash. ²Ambo tabadnubien Udas: —Ëbi abëd tabadtenebocno tiednoen nidchitash —quianec Esus bedmenuec ³chopondash. Aden chieshëmënquido chuiquid dapabo chuitanshun matses dadpen bëpondash nëidtedi. Nëidic con matses chuiquid dapabobëditan padiseyobon namiaido sondado chedo. Nëidic con matses

yuaquido Doma yacnoquido sondado dadpen. Nèidic aid sondado chuiquid. Aidedi Udasèn bëpondash. Tabotebèdta cuate sanambededtsècquieic cho-chopondash. Utsibombic chèshte.

⁴Adec cho-chosho isash bëquedbanec nidquin: —Èbi unès uamec —quequin tantiaquin Esusèn: —¿Atotsi quec ne? ¿Tsutsi nibène? —cac ⁵—Nasaded yacnuèsh caniquid Esus bednuec nebi —quepondash sondado chuiquid. Adshun isac aibdèd Esus bedmequid Udas icpondash.

⁶Adshobien Esusèn: —Nè iquebi —capondash. Nuquin Papapadquidquiobi icquin adoac dacuèdec: —Aucbidi cuenu —quec uebudcuededpondash bednuequidotedi. ⁷Adshobien padpiden Esusèn: —¿Tsutsi nibène? —cac: —Nasaded yacnuèsh caniquid Esus bednuec nebi —queoasho tantiasun: ⁸—“Nè iquebi,” caombi. Èbiuidtsèqui bedta. Èbèd icquido bedenda —capondash Esusèn. ⁹—“Mimbi èbi tantiaquid icmiaido Satanas chieshtomiambo iccombi, Papa,” quequin èmbi Nuquin Papa chuibocpadomboen nèido chieshtometiapimbo iquebi —quequin tantiec: —Nèid bedenda —quepondash Esus.

¹⁰Adnubien Petedon abi tsidiadaid chèshte chictanquin chuiquid dapan yua abiucquio pateshunepondash. Aid yua Madco niondash. ¹¹Adosho isashien Esus: —Padi. Chèn. Min chèshte naued. Nuquin Papan chiacpadec paëmbo icnuc unèsendabi —quepondash Esus.

Anasèn shubuno Esus buanaid

(*Mat. 26.57-58; Mad. 14.53-54; Duc. 22.54*)

¹²Adshobien sondado chedon Esus bedpondash. Aden bedshun: —Cuidmenun chuiquid dapa yacno mibi buanu —catanquin catanepondash.

^{13,14}Aden cataneshun buanquin con matses chuiquid dapambo Caipas caidèn cucun shubunoba buanondash. Aid setambi chuiquid dapambo Caipas iccondash. Esus chieshènec: —Nuquin matsestedi unès uamenquio icnuen Esusded unès uamenuna —queboed Caipas niondash. Aton cucu chuiquid dapabidi niondash. Aidi Anas niondash. Anasèn shubunoba Esus buampondash. Ashunquio Caipas ismenuen buampondash.

Petedon: Èmbi isacmaid Esus nec, quequin chiaid

(*Mat. 26.69-70; Mad. 14.66-68; Duc. 22.55-57*)

¹⁵Esus buansho isun Petedobèditan chinunondambi. Chinuntuidash nidequi Caipasèn shubuno choash daquènè uaidèn puduednuesho tantiasun shècuè isquid chidon puduedmiondashi. Ambi isondaaid icsho aden puduedmiondashi. ¹⁶Èbi puduedmequin Petedo ambi isacmaid icsho puduedmenquio icpondash. Adsho istanquin: —Èbèd icquid neque. Shècneshun. Ma puduednu —capondambi. ¹⁷Adoac puduedmeshun shècuè isquid chidon: —¿Nè bedboed Esusbèd icquidta mibi ne? —capondash Petedo chuiquin. Adoquien Petedo dacuèdec: —Padenquio —quepondash muequi. ¹⁸Adnubien iquendoshon daquènè uacnoshon cuète dètsiadoshon sondado chedobèd anocquido yuabo cuète cuèc tabadpondash. Adsho isashien Petedotsen cuète cuènuen nidpondash èbi shubunquio puduednuc.

Caipasèn Esus chuimiaid

(*Mat. 26.59-66; Mad. 14.55-64; Duc. 22.66-71*)

¹⁹Adec èbi puduednubien Caipasèn Esus chuimepondash. —Mibèd icquid

¿tedtsi iquec? ¿Ēbēd icquido
 dēniaquecta icpec? Mibēd icquido
 ¿mitsipaden chuibano? —capondash.
²⁰Adoquien Esusēn chuipondash.
 —¿Ompoquindambi chuibandio?
 Nuquin Papa tabadte shubu uashunaid
 daquēnē uaidēn puduedshun mambi
 chuibandeneboc. Nuquin Papan chiaid
 chuibante shubun-shubunquiec
 puduedcuenequin mambi chuibeneboc.
 Ompoquin chiambo iccombi. ²¹Mimbi:
 “Icsamboen naosh,” caid ēbiuidtsēqui
 chuimenda. Ēbēd icboedotsen chuime.
 Ēmbi chiaid abitedi tantiashun aidombi
 mibi chuitsiashe. Aidotsen chuime
 —quepondash Esus.

²²Adsho tantiashun: —¿Chuiquid
 dapada adopaid? —quetanquin
 sondado chuiquidēn mēdanten
 bēcuespondash Esus. ²³Adoquien:
 —¿Icsamboendambi chuidio?
 ¿Atotsimbi icsa uaoque? En chui.
 Mambi abimbo chuiboc. ¿Abimbo
 chuiquidta cuespaid? —quepondash
 Esus. ²⁴Adondash Esus Anasēn abi
 cataniacchobi Caipasēn shubuno bēac.

**Petedon: Ēmbi isacmaid Esus nec,
 quequin chuioid**

(*Mat. 26.71-75; Mad. 14.69-72;
 Duc. 22.58-62*)

²⁵Adnubien Petedo abi cuēte cuēec
 tsadsho abēdtan cuēte cuēec
 tabadquidon: —Esusbēd icquidien mibi
 nechitec —capondash. Adoquien
 Petedo: —Padenquio. Mabi aidbēd
 icambo yoc —quepac caondash.
²⁶Adshobien chuiquid dapan yua utsin
 Petedon pateshuneboedēn matsēsēn:
 —Esus bedacnobimbi mibi ischitoc
 —caquien ²⁷padpidec: —Padenquio.
 Mabi ano nidambo yoc. Ēmbi
 isacmaidquio ma Esus neyoc
 —quenubien Esusēn chuiboedquio
 cachina bēnē cuēdampac caondash.

Pidato caidēn shubuno Esus buanaid
 (*Mat. 27.1-2; Mad. 15.1-5; Duc. 23.1-5*)

²⁸Adnubien Caipas aton chuiquid
 utsibobēd: —Nuquin matses yuaquido
 ancaquid Pidato caid ismenuembien
 Esus buantiad. Aid Esus unēs
 uamenuembien natiad
 —quecuededpondash. Badiadnubi
 Pidaton shubuno Esus buampondash.
 Buanashic: —Matses utsin shubun
 puduedshun mishtemaid mishash
 Nuquin Papan matamiampid inchēsh
 tantiec con matsesbēd pec
 tabadtiapimbo icchitomane —quiash
 Pidaton shubun puduedenquio
 icpondash. ²⁹Adnubien Pidaton aton
 shubunuēsh puduantanquin Esus
 bēquido chuipondash. —¿Atotsi
 quequin nēid bēo? ¿Icsamboen naquidta
 nepec? —caquien ³⁰—¿Bēdambo
 icquidtamibi mibi ismenuen bēdio? Con
 matses chuiquid dapa ictiadquio icquin
 icsamboen naoshe. Cuidquiota
 —quepondash chieshēmēnquido.
³¹Adoquien Pidaton: —Mimbi cuidta.
 Min matsēsēn: “Icsamboshē icquid
 naden cuidquid yendac,” cacpadomboen
 nata —caquien: —Padi. Ēmbi cuidquin
 unēs uacsho isash min matses
 chieshtonoshe. Min matsēsēn: “Con
 matsēsēnuidtsēqui unēs uaquin
 cuidaquien bēdambo ictsiashe,” qeshun
 ēbitedi chieshēnushe —quepondash
 Esus chieshēnquido Pidatombo Esus
 unēs uametiadquio yec. ³²Ēnden abi
 chieshēnquidon bedabi icnuc: —Ēbi
 cuesten dectanquin unēs uaindac
 —quequin Esusēn chiacpadomboen
 namenuec adpondash.
³³Adnubien aton shubun
 puduedtanquin Pidaton Esus
 chuimeoapondash. —Cho. Chuinu. ¿Min
 matses isadaidbo chuiquid dapada ne?
 —caquien ³⁴Esusēn: —¿Mitsipadquid

chuiquid cai? ¿Utsibon tantiacpadquidta cai? ¿Mibipadquidta cai? —capondash. ³⁵Adoquien Pidaton: —¿Isadaidbodabi nedi? Padenquio. Ĕmbi tantiacpadquid caimbi. ¿Atotsieshun min matses chuiquid dapabon mibi bëosh? ¿Atotsi icsa uasho naosh? —caquien ³⁶Esusën Pidaton bëyuc chuiboed tantiaquin: —Mibipadquid chuiquid dapapenquio nebi. Nidaidën con yua sondado nibëdec. Nidaidënuësh mibipadquid icquin con yuabo ëbi bedquido cuesun siametsenombi. Aden ëbi bedenquio ictsenosh. Mibipadquidpenquio nebi. Abucshun chuiquid dapambo nebi —quepondash Esus.

³⁷Adsho tantiashun Pidaton: —Chuiquid dapambo nebi ¿quecta ique? —caquien: —Ai, adquid nebi. Chuiquid dapambo icnuec matsespondabi. Chuiquid icquin matses uaquid tantiamenuen abimbo chuiabanombi. Adoac abimbo chuisho tantiate bunquidon ëbi tantiatsiandac —quepondash Esus.

³⁸Adsho tantiash Pidato: —¿Tsuntsin matses uaquid quequin abimbo chuiupsiash? —quetanec puduenshun Esus chieshënquido chuiopaondash. —¿Icsambo icquidta Esus nedic? Ma icsapenquio icquid neyoc. ³⁹Nëid cuidtiapimbo icquin chuinu. Nuquin Papan matamiampid inchësh tantiate ushën min matses quënën nauedaid abentsëc cuemedeniøndambi. Adembidi abentsëc cuemembi. ¿Mitsicquidimbi cueme? ¿Nëid mibi chuiquid dapa Esustambi cuemepe? —caquien: ⁴⁰—Padenquio. Esus nainda. Utsibi cuemeta. Badabas caid cuemeta —quecuededpondash. Badabas caid Doma yacnocquido cuesun siaquin cuemete bunquidquid icnuc adcuededpondash Esus chieshënquido Esus unës uamete bunquieic.

Esus cueshcaid

(*Mat. 27.27-31; Mad. 15.16-20*)

19 ¹—Badabasquio cuemeta —quesho tantiatanquin Pidaton: —Në Esus cueshcanuen buan —capondash. Adoquien buanshun sondadon canite cuëshë dëdectanquin nacnenaïd cueshcanten Esus comapenen cueshcacac caondash. ²Cueshcatanquin pinchuc-pinchucpambo icquid mauete nacnenaïd Esus mauemepac caondash. Adotanquimbic chuiquid dapan dashcutebimboecquid umucquid dasiuintanquin: ³—Adec dasiuidquid chuiquid dapambo nec —quequin sondadon Esus mamëshunmpac caondash. Aden mamëshunquimbi: —Isadaidbo matses chuiquid dapambo Esus neque. Is —quetanquin mëdanten bëcuesbanepac caondash. Adotanquin Pidato yacnobidi buanoapac caondash.

Esus unës ua, quiaïd

(*Mat. 27.15-26; Mad. 15.6-15; Duc. 23.13-25*)

⁴Buanoacsho istanequien Pidato padpidec puduenoash Esus bëquido chieic: —Mimbi bëboed Esus icsapenquio iquec. Icsambo icquid icsho: “Unës uata,” catsiambi badedi. Icsapenquio icquid icsho adotiapimbo iquebi. Padi. Cueshcaquin cuidombique —quepondash Pidato. Adnubien ⁵Esus puduempondash. Pinchuc-pinchucpambo icquid mauemetanquin dashcute umucquid dasiuinac dasiuidpamboec puduenshobien Pidaton: —Is. Mimbi bëboed choeque —cac ⁶chosho istanequien: —Cuesten dectanquin unës uata. Cuesten dectanquin unës uata —quecuededpondash Esus chieshënquido comapenec cuëdec. Adoquien Pidaton: —Mimbi cuesten dectanquin unës uatan. Ĕmbimbo

adotiapimbo iquebi. Icsapenquo icquid icsho Esus unës uatiapimbo iquebi —capondash Pidaton.

⁷Adoquien Esus chieshënkuidon: —Con matsesën: “Nuquin Papa muauaquid unës uaquid yendac,” cacpadomboen natiadquo iquebi. Esusën: “Nuquin Papan Madombo nebi,” quequin Nuquin Papa muauaoshe. Unës uaquimbien ictiad —quepondash. ⁸—“Nuquin Papan Madombo nebi,” quiosh —quesho tantiashien Pidato dacuëdquiec yampac caondash. ⁹Adash aton shubun Esusbëdi puduedoashun Pidaton Esus chuioapondash. —¿Tsutsimbo ne? ¿Mitsiuëshquo chonda? —caqui Esusën ëcbedenquo icpondash.

¹⁰Aden ëcbedenquo yac nëishashien Pidato: —¿Chuitiapimboda ique? ¿Tantienquioda ique? Ëmbi: “Cueme,” cac mibi cuemetsiashe. Ëmbi: “Cuesten dectanquin unës ua,” cac mibi adotsiashe. En chui —caquien Esus: ¹¹—¿Mibembida chuiquid yano? Nuquin Papan chuiquid icmiac mibi nec. Nuquin Papan chuiquid icmiabi adquid ictiapimbo mibi ictsiac. Chuiquidpenquo icquin mimbi ëbi cuesten dectanquin unës uametiapimbo ictsiac. Ëbi cuesten dectanquin unës uamenuec mibi icsambo icnuc ëbi bëboedo chuiquid dapabo icsamboshë iquec —quepondash Esus.

¹²Adsho tantiashien Pidato: —Esus unës uatiapimbo icchitebi. Cuemetiadquo iquebi —quetanquin padpien Esus chieshënkuido chuitanoapondash. —Esus cuemenu —caquien: —Icsambo iquec. Min matses abitedimbo chuiquid dapambo Sesad caid: “Ëbentsëqui chuiquid dapambo nebi,” quiac caosh. Aid dëniaquec Esus chuiquid dapa icte bunquiec. Esus cuemequin mibi chuiquid dapambo

mimbi nëishmeque. Esus cuesten dectanquin unës ua —quecuededpondash. ¹³Adsho tantiashun Esus puduemeoatanec cuënote nacnenaïd abuc tsadunaïdën cuidte chuinec tsadten tsadtopondash Pidato. Aid cuënote nacnenaïd con onqueten Cabata capondash. ¹⁴Nuquin Papan matamiampid inchësh tantiäte ushë badiadash icnuc niøndash. Aid tsadten tsadtoshon Pidaton: —Në mibi chuiquid dapa iquec —capondash iccuededquido chuiquin. ¹⁵Adoquien: —Cuesten dectanquin unës ua. Nëbimbobi buanshun cuesten dectanquin unës ua —quecuededpondash Esus chieshënkuido. Adoquien: —¿Mibi chuiquid dapadambi cuesten dectanquin unës uape? —Pidaton caquien Esus chieshënkuido: —Mibi chuiquid dapambo Sesad caid aiduidtsëqui chuiquid dapa caimbique. Esus cuesten dectanquin unës ua —quecuededpondash Esus chieshënkuido. —Nuquin Papa yacnuësh choshon nuqui yuaquido cuemepashun —queboedobi adondash abi yuaquidi chiequi.

¹⁶Adoquien Esus chieshënkuidon chiacpadomboen: —Esus cuesten dectanquin unës uatan —capondash Pidaton aton sondado chuiquin.

Cuesten dectanquin Esus unës uaid
(*Mat. 27.32-56; Mad. 15.21-41;*
Duc. 23.26-49)

¹⁷Adoac buanquin: —Nëïdën dectanu —qeshun sondadon cuate daëd napotiaïd Esus chiadtomebidampondash. Abi dectantebi Esus chiadtomebidanec nidquimbi macuësh mapi canite caid yacno buampondash. Aid macuësh mapi canite cain con onqueten Cocata

capondash. ¹⁸Ambo nidshun aton dashcute dachictanquin bëchun shuin mëtoccaquinc tatoccaquinc catanquin cuate daëd napotiaid ambi bëboedëmbi Esus dectampondash. Icsambo icquid daëdpambo cuesten dectanaid uquë diadbudcuenec diadnuc Esusquio nënantanquio dectampondash.

^{19,20}Adnubien Pidaton: —Nasaded yacnuësh caniquid yec Esus isadaidbo chuiquid dapa nec —quequin cuate pada uaidën dada uapac caondash. Aton matses Doma yacnocquidon onqueten dada uaquinc con onqueten dada uaquinc matses utsi Quidieco matsesën onqueten dada uaquinc catanquin Esus dectanaid cuesten dectampac caondash. —Ëmbi dada uaboed isash: “Isadaidbo chuiquid dapa icsho Esus cuidac,” ma abitedi quenu —queshun Pidaton adopac caondash. Aden dada uashun dectanaid isashien Esus chieshënquido nëishquiopac caondash. —Shubu dadpen icquid Edusaden caid anoentsëqui Esus dectanaid icnuc matses utsin onqueten-onquetenquien dada uaid matses dadpenshun isnushe —quiash ²¹Pidato chiec nidpac caondash. —Icsamboen chuiquin ma mimi dada uapac boc. ¿Con matses chuiquid dapada Esus nedic? Adquidpenquio nec. Utsi uain dada uata. “ ‘Isadaidbo matses chuiquid dapa nebi,’ quequid Esus nec,” quequin cuate cuëshë utsin dada uata —caquien ²²—Padi. Mambi ëmbi tantiaboedquio dada uaboc. Utsi uain dada uaoatiapimbo iquebi —quepac caondash Pidato.

²³Adnubien Esus dectanquido sondado daëd-daëdquieic icpondash. Esusën dashcute 5ted icsho sondadon bedbanquin abentse-abentsen bedbededpondash abentsëc abi icnuc. Aid abucshun bedanquin abichobi

daëdcaid tuscabi icquid niondash.

²⁴Adquid icsho isun: —Canchenquio icquin ðtsundanquio bedequè? Isnuna —queshun abi cuëmëdquidtedi dada uabanshun tëchun sandoshon cadotanequin dada uaidëmpi abia puduemiaid isun aid dashcute bedondash. Aidon nate Nuquin Papan tantiamiac con tsusedpan naden dada uapampic. “ ‘Abentse-abentsen con dashcute bedosh. Con dashcute utsi bednu, quequin dada uaidëmpi abia puduemiaid isnuen naosh,’ quependac,” quequin dada uapampic.

²⁵Adnubien Esus dectanaid cuate tayun nëidtedi icpondash. Nëidic Esusën tita. Nëidic Esusën tita utsi. Nëidic Madia Codopasën chido. Nëidic Madia utsi Mactada yacnuësh choquid. Aidtedi chido icpondash. ²⁶Në chido tabadnuc ambobi uquëtsëc tabadondabi. Adec ambi tantiaidquio ëbi icsho isun Esusën aniba chuipondash. —Nëid con mado cata, tita. Ma mibi bëdamboen dayun uanu —capondash Esusën. ²⁷Adshumbic ëbitsen chuiquin: —Con ta tita cata. Adshun bëdamboen ëbi dayun uashunta —cac con shubunobi buanondambi bëdamboen Esus dayun uashunuen.

²⁸Adboshien unësquionoshi Esus: —Con Pan chiacpadomboen nainembi. Matses tantiec ëbided cuidadec unësebi —quequin tantiec con tsusedpan dada uaqin chuipampicpadec: —Acte bundobi —quepondash Esus. ²⁹Adsho tantiaishun matsun acte mucambo icquid anidquid shapu-shapupactsëcquidën punshun cuate dëdectanshun abuc sananquin ëccuëscadonetsëcquin chishmepondash. ³⁰Adoac acte mucambo icquid chishtanequien: —Con Pan chiacpadomboen nainquiombi —quepondash. Adtanequi tëdquëdbudpondash Esus unësequi.

Esus uinte masiaid

³¹Adnubien Esus chieshënquido: —Badiadash Nuquin Papan matamiampid inchësh tantiante ushë iquec. Chonoadenquio icte ushë nec. Aidën cuesten dectanquin unës uaid chococac icsambo ictsiashe. Nëbimbobi chococamenu —qeshun Pidato chuitampac caondash. —Baded nidte podquënquin unës uame. Inchësheque —cac ³²Pidaton aden chiac sondadon nidte podquëntanondash. Esusbëdta dectanuid ëquë diadquidba nidte podquënshumbic utsiuc diadquidtsen. ³³Adotanquin isquien Esus ënden unësac. Adshobien nidte podquënenquio icpondash.

³⁴Adotanquimbic: —Unësabi icnushe —qeshun: —Unës uaquiobono —quetanquin sondadon cudan poddo ansequin Esus uinte masepondash. Adoac nua intac chididiqiondash actebëdi. ³⁵—Adosho ëmbimbo isondambi —caimbi. —Ëmbi dada uaid isun ma Esus tantianu —qeshun abimbo chuiquin dada uaombi nëid dada uaqin. ³⁶Nuquin Papan tantiamiac con tsusedpan: “Canite podquënenquio iquendac,” quequin dada uapampicpadomboen canite podquënenquio icpondash Esus. ³⁷Adembidi poddo ansete dada uapampic. “Ambi poddo anseboed isec tabadendac,” quequin dada uapampic.

Esus unësacsho chococaid

(*Mat. 27.57-61; Mad. 15.42-47; Duc. 23.50-56*)

³⁸Adnubien shubu dadpen icquid Adimateya yacnocquid Ose chopondash. Esus tantiaquid aid niondash. Esus chieshënquido dacuëdënquin: —Esus tantiaquid nebi —quequin utsibo chienquio icboedëmbi Pidato

chuitampac caondash. —Esus chococanun buanendambi —cac: —Ai —cac Esus buampondash. ³⁹Aidbëdi Nicodemo inchëshën Esusbëd onquiondaid nidpac caondash. Bëdambo nuadquid mida adoebëdta cabiunaid unësaid dabiunte bëac caondash. Nuamboshë. Yuëmbo icnuc 35 quidostembi icnuc bëac caondash. ⁴⁰Adshumbien Osebëdtambi Esus nua dabiunquin uesquin dataniac caondash dashcuten. Adshumbic padpiden dabiunoquin. Adshumbic padpiden dataneoquin. Adshumbic padpiden dabiunoquin. Adshumbic dataneoquin. Chococanun con matsesën adoquid. ^{41,42}Adashic: —Badiadash Nuquin Papan matamiampid inchësh tantiante ushën unësaid chococac icsambo ictsiashe. Badedquio chococanu —qeshun tied nëbi ictsëcquidën Esus buampac caondash. Buanshumbic cuënote dapa shëcuë uaid chucan matses chococabi icquidën Esus nauedpac caondash. Shëcuën nauedtanquin bëtimpac caondash cuënote dapambidi.

Esus uincuenaid

(*Mat. 28.1-10; Mad. 16.1-8; Duc. 24.1-12*)

20 ¹Esus chococan daëdec ushash badiadnuc dominco caid ushën ënden inchëshquio icnobi Mactada yacnocquid Madia chedo Esus chococacnuësh sedenquec nidpac caondash. Nidshun isquien shëcuë bëtinaid cuënote dapa bëcunepamboen shëcniac. ²Cuënote dapa bëcunepamboen shëcniacsho istanec titinquier nec choquin chuituidpondashi. —Esus padoen buanchitaccosh. ¿Mitsimbo buampash? —quepondash Madia Petedobëdta ëbi chuituidec.

³Adoquini: —Istanu —quianec ⁴titinquier nec chococacno Petedobëdi

nidpondac. Petedo nianec ëbia
nidpondabi. ⁵Adshumbimbi
puduedenquo icquin shëcuë
anshuebudshun anispondac. Adshun
isquien dashcute dataniaiduidtsëqui uec.
⁶Aden ëmbi anisnubien Petedo choequi
badedi shëcuën puduedpondash.
Aidëntsen dashcute dataniaiduidtsëqui
istuidondash. Esus nibëdondash. ⁷Në
dataniaid uenubi udictsëc dashcutempi
bëpucaid bëdamboen shëbunaid
uiondash. ⁸Aid puduedsho istanec
tsyuec puduedshun ëmbitsen isondambi.
Adash: —Uincuenac. Nuquin Papan
Madombobi nec —quepondabi
Petedobëdtsëqui onquec. ⁹—Nuquin
Papan tantiamiac con tsusedpabon aden
Esus uincuenta chuiquin dada uapampic
—quequin tantienquo icboedi
adondabi. ¹⁰Aden istanec ëbi
ushbocnobidi chiec choapondabi.

**Esusën Madia Mactada
yacnocquid ismiaid
(Mad. 16.9-11)**

¹¹Adnubien ëbi chuiamboed Madia
chococacnobidi isec nidoapac caondash.
Nidash shëcuë cuëmano tsadec
sedenquetuidpac caondash. Adec shëcuë
cuëmano tsadec sedenquetanec shëcuë
anshuebudshun isaquien ¹²Nuquin
Papan abi yacnoshon uaido mayan bëda
daëd ushumbo icquid dasiuidquid Esus
uebocno tabadpec. Esus nibëdec. Mapi
icbocno abentsëc tsadnuc utsi taë
icbocno tsadpac caondash. ¹³Adshumbic
aidën: —ËAtotsi quiash sedenque,
champi? —caquien: —Con Icbo pado
Ëmidambo buanac? Istiadquo iquebi.
ËMitsimbo buampashba? Unësquo
iquec —quetanec ¹⁴aucbidi nidnuec
bidiadshun isquien Esusquo icpec. Utsi
dansho ¹⁵Esusëntsen: —ËAtotsi quiash
sedenque, champi? ËTutsi nibëne?
—caquien Madian tied neshcaquid

danquin: —ËCon Icbo padoda buano?
ËMitsimbo buano? Ëbi isme. Shëcuë
utsin chococanun buanu —capac
caondash Madian Esusquibi
chuiquimbi.

¹⁶Abi adoshobien Esusën: —Ëbi nebi,
Madia —cac bëisquiotanequien: —Esus
nec. Ëbi chuiquidquo nec —quetanquin
con onqueten cuënquin: —Dabi —capac
caondash. Adotanquimbien Esus
dayumbudpac caondash unësquo icsho.
¹⁷Aden abi dayumbudshobien Esusën:
—Ëbi dayunenda. Padpidec nidenquo
icte danquin ëbi dayunenda. Ëmbi
chuibocpadec con Pa yacno nidabi
yuec-yuecpactsec tabadtanec nidebique.
Ëbëd icboedo ëmbi con utsibo caboedo
ëmbi chuiboedquo chuitan. “Nuquin
Papa yacno nidendabi,’ quiosh,” catan
—quepac caondash Esus. ¹⁸Adoaquien
ëbi chiec Madia chopondash. —Nuquin
Icbo Esus isombi. Uincuenaccosh. Ambi
chuiboed chuinu. Tanta —quequin
Esusën abi chiaidquo chuituidpondashi
Madian Mactada yacnocquidën.

**Uincuenshun Esusën abëd icquido ismiaid
(Mat. 28.16-20; Mad. 16.14-18;
Duc. 24.36-49)**

¹⁹Madian aden chuituidboed
inchëshbudtsëqui shubun tabadpondabi
Esusbëd icboedobëdi. Esus
chieshënquido dacuëdënquin
umanucuësh utsi puduedtiapimbo icnuc
bëdamboen bëtashash tabadnubien
shëcuënuësh puduedenquo icboedi
nuntanquibi Esus isadcuempondash.
Adtanequien: —Dacuëdenda
—quepondash. ²⁰Adtanquin abi bëchun
shuin mëtoccaid abi podo ansiaidbëda
ismiaquini cuishonquiampondac:
—Nuquin Icbo uincuenac —quiash.
²¹Adec cuishonquesho isashien ambi
chuibocpadecbidi: —Dacuëdenda
—quetanec: —Tantia. Mibi chuinu. Con

Pan: “Matses chiec nid,” ëbi caondacpadomboebidi: “Ëbi chuibeneta,” mibi caimbi —quepondash Esus. ²²Adtanquin ëbi chedo dabushcabampondash.

Dabushcabanashic: —Nuquin Papan Mayan mibëd tabadendac. ²³Mibëd icquin Nuquin Papan tantiaidquio tantiaequin Nuquin Papan Mayanë mibi utsibo chuibamendac. Adoac mimi aden chuibanaido caic: “Nuquin Papan chiaid niaquec icsambo icboedi Esus tantiaquid yansho Nuquin Papan nëid bëdamboen isec,” quequin mimbi chiacpadomboen Nuquin Papan bëdamboen istiasih. Utsien: “Nuquin Papan chiaid niaquec icsauidequi icsho nëid Nuquin Papan bëdamboen istiapimbo iquec,” quequin mimbi chiacpadomboebidi Nuquin Papan bëdamboen istiapimbo ictiasih —quepondash Esus ëbi chedo chiec. Adtanequi isadenquio yanoaondash.

Esusën Tomas ismiaid

²⁴Adec Esus isadenquio yanoanubien Esusbëd icboed utsi Tomas abi ushëmbi anin daëd tishaid chopondash.

²⁵Choshobi: —Esus isombi —cac: —¿Aidquiobida nepash? Utsien nechitash. Bëchun shuin mëtoccaid shëcuë isun aid shëcuë mëdanten bëmishquinc podo ansiaid bëmishquinc caquioshombimbi: “Ai, nuquin Ico uincuenac,” quequin tantiatsiac. Padambobi: “Con Icobien niash,” quetiapimbo iquebi —quepondash Tomas. ²⁶Tomas adbon 7tedec ushash shubu nuntambidi tabadoapondabi. Tomas chedobëdi tabadondabi. Puduedtiapimbo icnuc padpiden bëtashoash tabadnubien shëcuë shëcniabi Esus isadcuenoapondash. Adashic: —Dacuëdenda —queoapondash. ²⁷Adtanequin: —Is

con mëdante, Tomas. Shëcuë bëmishec cho. Në podo ansiaid iqueque. Aidsen bëmishec cho. Adshun: “Uincuenabien icchitash,” queboedëmbi:

“Uincuenaccosh,” quequin tantiata —caquien ²⁸mishenquio yec badedi: —Tso. Con Icbombo ma mibi neyoc. Nuquin Papapadquidquibidi ma mibi neyoc —quepondash Tomas. ²⁹Adsho tantiashien Esus: —Ëbi isun: “Nuquin Papapadquidquibidi mibi nec,” quequin mimbi ëbi tantiec. Utsibombien ëbi isabi: “Ai, Esus Nuquin Papapadquidquibidien nec,” quequin ëbi tantiasho Nuquin Papan bëdambo icmendac —quepondash Esus Tomas chiec. Adtanec isadenquio yanoapondash.

³⁰Comapenen tantiaquidquio yec abembi uincuenash Esus adpondash. Ënden unësabi icquin adembidi comapenen tantiaquin nabampondash. Aden ambi comapenen tantiaquin nabanaidtedi uesquin chiamo iccombi. ³¹Padi, aittedi chiombi. —“Nuquin Papan chomiaidquio yec Nuquin Papan Madombobien Esus nec,” quequin aid tantiash ma Nuquin Papa yacno abëd tabadtequido icpanu —quequin aittedi dada uaombi.

Chian cuëmanuësh Esus isadoaid

21 ¹Tantia. —Edusaden yacnuësh isadboshic chian Tibedias caid cuëmanuështsen Esus isadpondash —quequin mibi chuinu. ²Esus uincuenash daëdec isadan con nidaid Cadidia caid yacno nidanepondabi. Nidaniash nëidtedi tabadpondabi. Nëidic Petedo. Nëidic Tomas anin abi ushëmbi daëd tishaid ëmbi caboed. Nëidic Cana yacnocquid Natanaid. Nëidic ëbëdta tishaidquio. Nëidic ëbi. Nëidic Esusbëd icboed utsi daëd. Aittedi icpondabi. ³Adnubien Petedo:

—Ëmbi bedtenecpaden nëshaidèn nuëcquid bedtanu —quepondash. Adshobimbi: —Nid. Nuquitedi nanu —capondac. Adash chian yacno nidash cano antabëdtoanec nënantan nidpondabi. Adshun nëshaid dapa nëneshun yuecshun cadoshon isac nibëdec. Adshumbic padpiden nëneoashun cadoshon isac nibëdoaic. Inchëshbudtsëc tauash nuëcquid bedambobi ambi badiadpondabi.

⁴Badiadquionobi acte cuëman masi dapan Esus nidsho istuidpondambi. Utsiemi dampondac. ⁵Adshobini Esusèn cuëmpondash. —Con utsibo ÷tedtsi bedo? —cac: —Padambo. Nibëdosh —capondambi. ⁶Adsho tantiashun: —Mimbi nëniauc nënenquo icquin cano utsiuc nëshaid nëne. Adoac nuëcquid bedadec —cac ambi chiauc nëshaid nënetanquin: —Indono —cac nëshaid indotiapimbo yuëmboshë icpondash. Nuëcquid dadpen bedac.

⁷Adsho isumbimbi: —Ma Esus neyoc, Petedo. Nuquin Icbo nec —capondac. Adoaciquen aton tsitsumi icquiduidtsëqui icnuc abi dachiquidboed aton dashcute utsi dasiuidtanec acte nëpudunash Petedo tan-tanidec nidpondash Esus isnuec. ⁸Ëbien utsibobëd canombi tsyuec nidondac nëshaid shoyombanec. Cuëma anoentsëqui nuëcquid bedash 100 metedos cactiontsëc nidondabi. ⁹Tsyuec choash pudundoshon isquien pambëdi nuëcquid cuëten shëadtsec. ¹⁰Adnubien Esusèn: —Mimbi bedboed daëdpactsëc beccho. Penu —cac ¹¹Petedo: —Ai, bedtanu —quianec nidash cano anidtoashon nëshaid cubu-cubuctsëcquio icquid indopondash. Acte cuëmano tsindoshon isac dadpenquioshë 153tedi nuëcquid icpondash. Nua-nuaic tsadquido icpondash. Nëshaid tèsëdtiadtsëcquio icnuc indondambi.

^{12,13}Adshumbic ambi: —Pec cho —cac cho-choash tabadsho pamba menebantanquin nuëcquidtsen Esusèn menebampondashi. Adoac: —÷Ttsutsi ne? —quenquo icquin: —Esus nec. Comapenen tantiaquin nuëcquid nuqui bedmiosh —quequin tantiondambi ëbitedishun. ¹⁴Adec uincuenash shubu nuntan tabadnuc daëdec isadondashic chian cuëmanuështsen isadoapondash Esus.

Esusèn Petedo chiaid

¹⁵Aden chian dapa cuëmashun Esusbëdtan piondambi. Adshumbic Onas caidèn mado Petedo Esusèn chuipondash. —Tantia. Mibi chuinu, Petedo. Nëidon ëbi bëdiactsëc tantianuc ÷ada ëbi tantiaquie? —caquien: —Ai, mibi tantiemi. Aden ëmbi tantiaid mimbi tantiec —quepondash Petedo. Adsho tantiash: —Ëbi tantiaquin con obecabimboecquido ëbi dayun uashunta —quepondash Esus. —Obeca icbon aton yua dayun uacbimboen ëbi tantiaquido ëbi dayun uashunquin ëmbi chiaidbëdta ëmbi naidtedi chuibanta —quequin tantiec adpondash. ¹⁶Adshumbic padpiden: —÷Ada ëbi tantiaquie, Petedo? —cac: —Ai, mambi mibi tantieyoc —quesho tantiashien padpidec: —Ëbi tantiaquin con obecabimboecquido ëbi dayun uashunta —queoapondash Esus. ¹⁷Aden daëden chuishumbic padpiden Esusèn: —÷Ada ëbi tantiaquie, Petedo? —cac shubiantiadtsëcquio yanondash Petedo. —Unës uabi icnuc: “Ëmbi isacmaid Esus nec,” quequin ëmbi chuiboctedembidi Esusèn chiebi —quiash shubiantiadtsëcquio yanondash. Adashic: —Mibi con Icbo nec. Ma mimbi abitedimbo tantieyoc. “Petedon ëbi tantiaquie,” quequin ma mimbi tantieyoc —quepondash Petedo. Adsho

tantiash Esus padpidec: —Ëbi tantiaquin con obecabimboecquido ëbi dayun uashunta —queoapondash Esus.

¹⁸Adashic Petedobidi chuioaic: —Tantia. Utsien chuinu. Cania yec mibibi tsisiuidondac. Adanec mibi bunacno mibi nidtedniondac. Tsusiobudtsacshoen tsiumeshun utsibon ëquë mëdimbudcuentsëcshun mibi nidte bunacnanombo mibi buanendac —quepondash Esus. ¹⁹—Aden mimbitsen Nuquin Papan chiacpadomboenuidi nabansho ëbi chieshënuquidon mibi unës uaindac —quequin tantiec adpondash Esus. Adashic: —Ënenquoicquin ëbi tantiata —quetanquimbic: —Cho. Nidnu —cac ëbitedi puduanec nidondabi.

²⁰Tsyuec nidshobini Petedon bidiaquon ispondash. Adshumbic: —Nëid Esusën tantiaidquio nec. Esus bedmiaid inchëshën Esus aton cachoctsëqui uesho aidën: “¿Tsutsi cao, Icho?” capondash. ²¹¿Mitsipadec aid unëspatsiash? —qeshun: —Ma nëid. ¿Mitsipadec unëspec? —capondash Petedon ëbi unëste Esus chuimequin. ²²Adoquien Esus: —Ëbi bunacpadequi aidi unësendac. “Ëbi Nuquin Papa yacnuësh choabi yacpadec ma

unësenquoicnu,” ëbi quiacpadec unësenquoictsiash. Adecbidi: “Ëbi choabi icnuc ma unëspanu,” ëbi quiacpadec unëstsiash. “Nadec unësendac,” quequin mibi chienquoiquembique. Ënenquoicquin ëbi tantiata —quepondash Esus. ²³Adec: —Unësenquoictsiash —Esus qesho tantiash ëbi caic: —Esusën tantiaidquio yec Uan unësenquoiquendac —quecuededpondash Esus tantiaquido. ¿Adenda Esusën chuidiondash? Ma padenquoiccondac. —Ëbi bunacpadequi aidi unësendac. “Ëbi Nuquin Papa yacnuësh choabi yacpadec ma unësenquoicnu,” ëbi quiacpadequien unësenquoictsiash. “Adecbidi ëbi choabi icnuc ma unësnu,” ëbi quiacpadec unëstsiash —quequien iccondash.

²⁴Aden Esusën nabanondaid ënquin chiombi. Ëmbi isondaaidquio chuiquin abimbo chuiquin aitedi dada uaombi. ²⁵Esusën naidtedimbo chuiquin dada uambo iccombi. Ëmbi tantiaidtedi naombi. Ambi naidtedimbo ambi chuibanaittedimbo chuiquin dada uaqin dada uate dadpenquioshë naimbudnetsiambi. Padi. Aitedi dada uaombi.

ESUS CHUIBENEQUIDON NAID

Esus aton Papan abuc indote

1^{1,2}Ducas nebi. Mibi Esus tantiamenu, quequin ënden dada uaondambi, Teyopido. Esusën tauain ismebanaid bedanquin abi abuc indoaid dënainquin dada uaondambi. Abuc nidnun Esusën ëbi chuibeneta quequin abëd icquido chuiapanëdash aton Mayanën tantianubi. ³Cuesten dectanac unëshash uincuenshun: “Uincuenobique. Is,” quequin Esusën utsi-utsien ismebapanëdash ma abimbo iquec quequin tantiaquin ëbi chuibenepanueshun. Ushë abentsëc nidmequin utsi choaid abi choauqui usudnuc 40ted ushqin aden ismeben-ismebenequin Nuquin Papa yacno tabadaid iquec quequin Esusën chuided-chuidedpanëdash. ⁴Aden ismequimbi Edusaden caid yacnoshon ambi ëbi chuibeneta caidobëdtan pec tabadquimbi Esusën nadopanëdash: —Edusaden yacno tabadquin ëmbi chianeboed, con Mayan, Nuquin Papan mibi menetequid caimbudta. ⁵Acten mentoanquid Uan pado icpondash. Padnuen ëmbi chianeboed Nuquin Papan aton Mayan mibitedi menendac —quepanëdash Esus.

⁶Adshumbic, padpidec Esusbëd icquin abëd icquidon: —Yuen matses utsibon namiaido nuquin matses nec. ¿Nëbimbobida mibi nuquin matses chuiquid dapa icpeque? Tantianu. Chui

—capanëdash Esus chuiquin.

⁷Adoquien: —Nuquin matses chuiquid icmete ushë choaid tantiesa mibi nec. Nuquin Papanuidtsëqui tantiacpadën adquid iquendac —quepanëdash Esus abëd icquido chiec. ⁸Aden chuishumbic: —Aton Mayan Nuquin Papan meniac aidënquio tantiamequin pausunac ëbi chuibenequidquio mibi iquendac. Edusaden caid yacnoshomba mimbi ëbi chuibanendac. Adshumbic, nidaid Udeya caid yacnoshontsen ëbi mimbi chuibanendac. Adshumbic, nidaid Samadia caid yacnoshontsen, adembiti nidaid utsi-utsiec yacnoshontsen adembiti ëbi chuibanendac —quepanëdash Esus abëd icquido chiec.

⁹Aden chuibanquin Esusën nabanquin nainanec macuësh yacno choacsho aton Papan Esus abuc indopanëdash abëd icquidobëdtan abi tantiaquid utsibon isbedednubi. Aden isec tabadnubi abu ushun Esus bëtimpanëdash.

¹⁰Adec Esusbëd choboedo isec tabadnubien dashcute ushumbocquid dasiuidquid daëd choash tabadec: ¹¹—Nidaid Cadidia caid yacnoësh choquido, ¿atotsi quiash abuc isec tabadec ne? Abuc indosho mimbi isboed Esus abu ushun choec budsho mimbi isendac padpiden —quepanëdash ushumbocquid dasiuidquid abuc isbededquido chiec.

**Matias Esus chuibeneta quequin
iccuededquidon chiaid**

¹²Aden Esus abuc indosho isash abëd macuësh Odibos caid yacno choboedo Edusaden caid yacno nidoapanëdash. Chonoadtemaid ushë nec, quec aidtionsëqui capunëdash. Aido Edusaden yacno choash abuc quënë yacno abi tabadbocono dectatoash tabadoapanëdash. ¹³Aid quënë nuntan Esusën ëbi chuibeneta caido nëidted icpanëdash: nëidic Petedo, utsibic Uan, utsibic Acobo, utsibic Andedes, utsibic Uedipe, utsibic Tomas, utsibic Badtodome, utsibic Mateyo, utsibic Adpeon mado Acobo cuëmëdquid, utsibic isadaidpembo namequin chuiquid bunesa, Simon cuëmëdquid, utsibic Acobo utsin mado Udas cuëmëdquid. Aidedi Esusën ëbi chuibeneta caido aid quënë nuntan tabadnubi ¹⁴utsibo Esusën tita yec Esus tantiaquid chido utsibotedi yec Esusën utsibo yec quec ambobidi iccuededquin Nuquin Papa chiec abentsëc onquiacbimboec onquecuededpanëdash.

¹⁵Adashic Esus tantiaquid 120ted iccuedednubi nënantanquio nidtoshon Esusën ëbi chuibeneta caid abentsëcshun Petedon naden chuiapanëdash: ^{16,17}—Udas pado chuibanu. Tantiata. Esusbëd icquin piucquid dayun uaquid icquimbi Esus chieshënuquido Udasën Esus bedmepondash. ¹⁸Aden Esus bedmeshun ambi piucquid bedboed menequin aton tiedëmpi bedashic aid tied nantanuësh tëtaniadash pobidisquish paëdec aton pucu tishidpac caondash. ¹⁹Pucu tishidec intac chiuidaid tied icsho tantiaquin Edusaden yacnocquidtedishun Aquedama cain aton onqueten cuëmbededpondash.

²⁰Adembidi ëndenquimboshë Udas pado

tishabienuc chuiquin Nuquin Papan Mayanën tantiamiacpadomboen tsusedpa Dabid caidën Udas cuidte tantiec cuëdënte Sadmo caid naden dada uapampic:

“Ma adequi aton shubu
mosadpanuna ma aibidi aton
matses nibëdquid shubu
icpanuna.”

Aden Udas pado cuidte chuiquin cuëdënte Sadmo caid utsitsen naden Dabid Padon dada uaoapampic:

“Aidën icsain nacpaden
tanenquiocquin ma utsin
bëdamboen napanuna,”

quequin Dabid padon dada uapampic —quepanëdash Petedo. ²¹Aden chiashic abi onquec: —Udas pado nibëdnuc Esus chuibeneta quequin abentsëc nuquitedishun chuinuna. Nëid quënë nuntan nuquibëd capuquido dada dadpen iquec. Nuqui Esus chuibeneta caid nadquid ictiad. Chuinu. Tantia. ²²Esus Uan padon acten mentosho isash niamëdenquo yec Esusbëd capucueneshun Esus indosho isquidquido icsho, Esus chuibeneta, quequin nuqui chuitiad. Adoac Esusën ëbi chuibeneta caidobëdtan Esus uincuemiaid chuibantiad —quepanëdash Petedo iccuededquido chiec.

²³Aden Petedon chuibanac daëd istuidash Petedobëd iccuededquido, Petedon chuibocpadquid nëid daëd iquec, quequin chuiapanëdash aidon. Ambi istuidaid abentsëc Ose cashun Badsabas cashumbic Ustus, quequin cuënaid nepanëdash. Utsibic, Matias cuëmëdquid icpanëdash. Nëid daëd Petedon chuibocpadquid nec, qesho tantiaquin: —Nënantanquio tabadec cho —cac abi daëdi choash tabadsho isash ²⁴Nuquin Papa chiec nadec iccuededquido onquepanëdash: —Nënantanquio chomeboed nëid daëd

iqueque. Is, Papa. ¿Mitsicquidimbi Esus chuibeneta, cape? Ĕbitedi tantiamē, Papa. ²⁵Udas pado tauidiadpambo chian anēdēnquiacno nidboedēn nauidaid namenu, quequin mimbi bēdamboen isaid abentsēc ēbi isme. Papa. Aden mimbi ismiac ma aidēntsen Esus chuibenepanuna —quepanēdash Nuquin Papa chiec. ²⁶Aden chuitanquimbic aid daēd abi cuēmēdquid abentse-abentsen dada uatempin dada uashumbic tēchun sandoshon cadotaniac dada uatempi abia puduenaid istanquin, Matias cuēmēdquid nec, quequin isbededboshic, Esusēn ēbi chuibeneta caido onseted icboedi nēbi Matiasbēd doseted yanosh, quequin chuibededpanēdash nuntan iccuededquidtedishumbi.

Aton Mayan Esus tantiaquidtedi menebanaid

2 ¹Adashic isadaidbon ambi aton tiedēn caniquid abia ēshēaid beidaid tantiaid ushē chotsēcnubi Esus tantiaquidtedi shubunuēshi iccuededoapanēdash. ²Ambo iccuededquimbi badedquio shubu nuntan cunquequid dapa choec natiambo cunquiacimboecsho abitedishun isbededpanēdash. ³Aden aid isbedednubi cuēte dētsisidacimboecquid budec mais-maisec Nuquin Papan Mayan matsadtocuededpanēdash abi isquidtedi. ⁴Nuquin Papan ma aidobēd tabadneshun aton Mayan Esus tantiaquidtedi menebanac matses utsi-utsiec onquetenquio onquecuededpanēdash ambi matsadtomiaidotedi.

⁵Aden Nuquin Papan aton Mayan menenubien isadaidbo utsibo Edusaden yacno cho-choash dadpen

tabadpanēdash. Aido Esus tantiesabo yequi aton tsusedpabon chiampicpaden nanuec nidaid utsi-utsiec yacnoēsh Edusaden yacno cho-choapanēdash.

⁶Ambo cho-choash tabadnubi Nuquin Papan aton Mayan

meniaid-meniaidquiec nēmbobi choquidon onqueten-onquetenquiec onquesho tantias nēbi cho-chobedo utsi-utsiec: ⁷—iPadtec!

Dacuēdanquiopaic. Ĕbipadquiecshenda onquepec. ¿Onquequidotedi nidaid Cadidia yacnocquidoda nepec?

⁸¿Mitsipaden con onquete bedash onquecuededpec nec? ⁹Ĕbitedi nidaid utsi-utsiec yacnoēsh cho-choquido nebi. Padtia yacnoēsh choquido; utsibic, Media yacnoēsh choquido; utsibic, Edan yacnoēsh choquido; utsibic, Mesopotamia yacnoēsh choquido; utsibic, Udeya yacnoēsh choquido; utsibic, Capadosia yacnoēsh choquido; utsibic, Ponto yacnoēsh choquido; utsibic, Asia yacnoēsh choquido; ^{10,11}utsibic, Pidiquia yacnoēsh choquido; utsibic, Pampidia yacnoēsh choquido; utsibic, Equipito yacnoēsh choquido; utsibic, Dibia Sidene udictsēcūesh choquido; utsibic, shubu dadpen icquid Doma caid yacnoēsh choquido; utsibic, acte nēnantan nidaid nacnēdquid Quideta caid yacnoēsh choquido; utsibic, Adabia caid yacnoēsh choquido. Isadaidbobēd isadaidbopadquio icnuequido Edusaden caid yacno tsusedpabon chiampicpaden nanuec cho-chobedo ēbitedi nebi. Ĕbibimboec onquequidtedishun Nuquin Papan naid chuibansho tantiembi. ¹²¿Mitsipaden tantiaquin oncamiaquien adec onquepec? —quepanēdash Edusaden yacno cho-choquid.

¹³Adnubien: —¿Bēdamboec onquepequida onquec? Paēmboquid

cubudquin acshun tantienquioquido
nepanui —queoapanēdash utsibo.

Iccuededquido Petedon chuibanaid

¹⁴Adec onquesho tantiashun Esusēn
ēbi chuibeneta caido cho-choquin
Petedon nidtoshon tantiamenu quequin
naden cho-choboedo comapenec
onquequin chuipanēdash: —Mimbi
icsamboen tantiaid chiembique.
Tantiata. ¹⁵Ushē abuctotsēcnubi
ēbitedishun paēmboquid
acamboccombi. ¹⁶Utsin-utsinqueic
onqueten onquesho mimbi tantiaid
Nuquin Papan ēndenquimboshē
chiampicpadec onquec nebi. Tsusedpa
Oedēmbi Nuquin Papan ma matsesbēd
tabadneshun aton Mayan menenun
chiaid naden aidēn dada uampic:

¹⁷‘Nēid nidaid naimbudnubi
Con Mayan matses utsi-utsien
menendambi.
Aidon madobobēdtan aidon
champibontsen ēmbi yuecquio
icshun nanun chiaid
chuibanendac.
Adembidi caniabontsen ushquin
ēmbi chiapaden isendac.
Adembidi tsusiobontsen ushquin
ēmbi chiapaden isendac.

¹⁸Aden con Mayan meniac ambi
tantiacpadomboembidi ēmbi
chuiquin namiaidon dadan
chidobēdtan
ēmbi yuecquio icshun nanun
chiaidquiobidi chuibanoaindac.

¹⁹Adembidi, con Mayanēn tantiamiac
ēmbi yuecquio icshun nanun
chiaid matsesēn chuibanubien
abucuēsh uinsadpamboctequid
icnubi
nidaidēnshun ismete
intacimboectequidbēdtabi
nēdēnquetequid cuēte
pushudquidbimboectequid

abembi pushudquidbēdta
adquidtedi mibi ismendambi.

²⁰Adquid icnuc badiadēn ushē
chēnquenquiocnoc
inchēshacimbocctequid inchēshēn
ushē piu-piupambo yec
intacimboecsho mimbi
isbededendac.

Ēmbi ismiaidtedi icambi matses
cuidte ushē choendac.

²¹Ismequimbi con Icbombo nec ēbi
caquidquio mēnchiquendambi,
quequin Nuquin Papan chuimiapaden
Oedēn dada uapampic.

²²‘Adembidi Nuquin Papan chomiaid
chiembique. Tantiata, isadaidbo.
Nasaded caid yacnoēsh choquid, Esus,
Nuquin Papan chomiaid icquin
nadatiambocquin nabanquin
isembansho mimbi isondac. ²³Aidi
Nuquin Papan tantiampicpaden Esus
bedshun mimbi isadaidpemo chuiquid
menequin, Unēs uata, cac cuesten
dectanquin Esus unēs uapanēdash.
²⁴Aden mimbi nac unēsacsho icsaisa
chococacno yuec ictiapimbo iquec,
queshun Nuquin Papan Esus
uincuemapanēdash. ²⁵Adembidi
ēndenquimboshē tsusedpa Dabid padon
Esus chuibanquin naden dada uapampic:

‘Con Icbo abuc nidec bēyucanquid
ēbēd tsadacimboecsho isec nebi.
Aidi con dayun tsadquid icsho
isquin natiaic cametequid
dacuēdēnenquio iquendambi.

^{26,27}Aid unēsash uincuenendabi, Papa,
quec cuēdēnec bēdambo iquebi.

²⁸Nuquin Papa yacno tabadacpadec
nidaidēn tabadquin ismiac
mibi yacno nidash mibēdi tabadec
bēdamboeshē iquebi mimbi
camiaid iquendabi,
quequin Esus tantiaquin Dabid padon
dada uapampic.

²⁹“Adomboen tantiaquin dada uash Dabid unēsacsho chococapampid nēbi shēcūē iquec. ³⁰Dabid Nuquin Papan ambi yuecquio icshun nanun chiaid chuiquid icquin nadopampic. Yuecquimboshē yash mibi ēndenquimbo unēsampid icnuc min tsyuecquid chuiquid dapabidi iquendac, quequin Nuquin Papan chiaid abimbo iquec, quequin tantiaquiopampic Dabid padon. ³¹Aden Nuquin Papan nanun chiaid tantiaquin Esus uincuenta isac bimboen dada uaquin, Nuquin Papan Chomiaid unēsacsho chococaqui aton nami chodquenuio yec uincuenendac, quequin chuiampic Dabid padon. ³²Ai, Dabid padon chiampicpadembi Nuquin Papan Esus uincuempanēdash. Aid uincuemiacsho isondaic icquin mibitedi chuibaneq nebi. ³³Aid uincuenash Nuquin Papan dayunquio tabadendac nēbi. Ambo choacsho matses tantiaquin Nuquin Mayan ma aibdē tabadnueshun matses mimbi meneta, aton Papan cacpaden abi tantiaquidtedi menebanquiac onquete utsin-utsinquieq onquesho nēbi mibitedishun tantiec. ³⁴Dabid padon nami chodquiash abuc nidambocpampic. Aden aton namibi abuc indote chienquiocquin Esus chuiquin Nuquin Papan yuecquio icshun nanun chiaid naden Dabid padon chuibampampic:

‘Nuquin Papa Icho Dapa icquin abipadquid icho cain: Nēbi ēbēdi tsadec cho.

³⁵ Mibi chieshēnquido dēniacquidquio mibi icmenun nabono. Chiata,’ quequin Nuquin Papan nanun chiaid Dabid padon dada uapampic.

³⁶“Aden tantiaquin Dabid padon chuiampic Esus mimbi cuesten dectanquin unēs uaid uincuemequin matses icsaid bedshunash abided cuidadquid Nuquin Papan icmepondash.

Adoac ēmbi chiaid abimbo iqueque. Esus tantiaquidquio icta, isadaidbo —quepanēdash Petedo.

³⁷Aden Petedon chuisho tantiaquin iccuededquido abi icsaid tantiec unēsquio yec: —Esus tantianuequin ōatotsi nuqui nape? —quepanēdash utsi-utsiec Petedobēdta Esusēn ēbi chuibeneta caid utsibo chiec.

³⁸Adoquien Petedo: —Mibi icsaid ēnshun, Esus con Icbombo nec, quequin abimbo tantiaquin acten mentometa ma ēbi icsaid Nuquin Papa bēpiscudnu queshun. Adoacsho aton Mayan mibi menendac. ³⁹Adembidi tantiaquin isun min tsyuecquidtsen menendac. Adembidi nidaidtedi yacnocquidēn tantiaquin isun aton Mayan meneoaindac ambi chiampicpaden —quepanēdash Petedo Esus isquidquio.

⁴⁰Aden chuibanequi: —Mimbi icsamboen tantiaid ēnta. Aden ēnash Esus tantiaquidquio icta —quequin chuibudquin Petedon ēmpañēdash.

⁴¹Aden chuisho tantiaquin, Tantiaquiembi, quepanēdash utsi-utiec. Aid ushēmbi dadpenquioshē tedes midted Esus tantiaquid yampanēdash. Adquid icsho isun acten mentobampanēdash.

Esus tantiaquido iccuededaic

⁴²Adashic, Esus tantiembi, queboedo tantiabenebi iquec Esusēn ēbi chuibeneta caidon Esus chuibansho tantiec tabadequi Nuquin Papa chiec onquedenepañēdash. ⁴³Adec tabadcuenedsho isash: —iPadtambo! Dacuēdampambo iquec —quec utsibo tabadpanēdash. Adnubien Esusēn ēbi chuibeneta caidon nadatiambocquin nabampanēdash. ⁴⁴Adnubien Nuquin Papan aton Mayan meniaidtedi tabadcuenequi, Con na nec, quenquiocquin aton na

cusasenquiocpanëdash. ⁴⁵Aton na menequin piucquid bedshun utsin na nibëdsho isun menepanëdash.

⁴⁶Adecbidi

badiadquidën-badiadquidënquieç

Nuquin Papa tabadte shubu uashunaid yacno nidash iccuededpanëdash.

Adecbidi shubu utsi-utsieç yacno nidash iccuededquin Esus unësaid tantiaquin panëmpi cuësh-cuëshun

peded-pededpanëdash. Adembidi bundoshon pebededoapanëdash.

Adobanequi ëbi icsaid bedshunash Esus cuidadaid tantieç bëdambo iquebi, queç

⁴⁷Nuquin Papan naid chieç

cuëdëncuededpanëdash. Adec tabadsho isash, Bëdamboquido nec, queç

utsibotsen Esus tantiaquid yanash abi tantiaquid utsitedibëd

iccuededpanëdash.

Caputiapimbo icquid bëdamiaid

3 ¹Adnubien abi nidteniacpadën ushë budec 3 yanuc Petedo Uambëd Nuquin Papa tabadte shubu uashunaid yacno Nuquin Papa chieç nidpanëdash.

²Ambo nidnubien caputiapimbocquid aid shubu shëcuë Bëdaidquio caid yacno utsibon buampanëdash. Anin tishacchobi yec caputiapimbocquid icpanëdash. Aidi

badiadquidën-badiadquidënquien

buandenequin aid shëcuë cuëmano

nanded-nandedac uequimbi cho-chosho isun: —çAdabi piucquid menetsia?

—cabampanëdash. ³Ambo Petedobëd Uan chosho isquin: —çAdabi piucquid menetsia? —capanëdash

caputiapimbocquidën uequin.

⁴Adoquien Uambëd nidtuidash

nidquin Petedon: —Ëbi daëdi is

—capanëdash caputiapimbocquid

bëisquin. ⁵Adoquien, Ëbi menepashun, quequin abi daëdi isobien, ⁶Petedon:

—Piucquid con na nibëdec. Ëmbi

tantiaidën ëbi tantiamebocpaden

naimbique. Nasaded yacno iccondaidën

Esusën bëdamiapadec bëdanash

nidtoash nideç nid —capanëdash. ⁷Aden

chuiquin caputiapimbocquidën mëdante

abiucquio bedtanquin Petedon

nidtomiac badedquio nidtopanëdash

caputiapimbocboedi. ⁸Bëdambo yec

nidtoash capupanëdash. Adec bëdanash

Petedobëd Uan chedobëd capuashic

Nuquin Papa tabadte shubu

uashunaidën puduedash, Nuquin Papan

bëdamioshi, queç

pudundotan-pudundotanec: —Cuishon

—quepanëdash. ⁹Adec capusho

isquidon nadobededpanëdash:

¹⁰—Nuquin Papa tabadte shubu

uashunaid shëcuë, Bëdaidquio caid

yacno uetsequi, Piucquid ëbi

menepashun, queboedi capueque. En is.

iAdpaidie. Is! Tantiadempamboctequid

nec —quequin isbededpanëdash.

¹¹Adec capuequi Petedobëdta Uan

mëdineç Sadomonën tacpan quënë

uabicquid yacno puduednubien

iccuededquid tsibanash anotsen

tantiadempambo yec tabadoapanëdash.

¹²Adec tabadsho isun Petedon naden

chuibampanëdash: —çAtotsi quiash

padtec quequin ëbi daëdi comapenen

bëise? çËbi daëdshun nacta nëid

capupadic? çËbi bëdamboquid

icquindambi nadio? Padenquio. Nuquin

tsusedpabon Papa caidën bëdamiaid

nec. ¹³Aidi Abadauan padon Papa caid

nec. Aidbidi Isac padon Papa caid

neoaic. Aidbidi Acobo padon Papa caid

neoaic. Aidon Papa caidëmbi ambi

nidaidën chomiaid Esus nëbi aton

Papabëd tabadoaic. Aton Papa yacno

nidoabicsho Esus bedshun Pidato

meniaquien, Nëid dada icsaisa neque.

Nidmenu, quequin tantiaquin Pidaton

chiaqui, Icsambocquid nec. Unës

uauquimbien ictiad, quequin

mibitedishun chuipondac. ¹⁴Icsaisa nec, quequin utsin isnubi Esus bunenquiocquin icsaquid cuidenquiocquin nidme, quequin mimbi chuipondac. ¹⁵Abia uincuentequid mibi chuiquid dapa mimbi unēs uacshobien Nuquin Papan aidi uincuemepondash. Aid uincuenacsho ēbitedishun isondambi. ¹⁶Esusēn ēbi bēdamepec, quequin tantiash nēid taē icsacboedēn Esus tantiash capusho mibitedishun isec.

¹⁷“Utsibo, Nuquin Papan chomiaid nec, quequin tantienquiocquin mibi chuiquidobēdtan mimbi Esus unēs uamiondac. ¹⁸Ēmbi matses chuiquid dapa icmenu caid matsesēn mēyanaid iquendac, quequin ambi chuimiaidtedi Nuquin Papan dada uamiampicpaden mimbi naondac. ¹⁹Nēbi mimbi icsamboen tantiaid ēnquin Nuquin Papa tantiata ma mibi icsaid bēpiscudpanuna; adecbidi ma abēdi tabadebi, quequin tantiec mibi bēdambo icpanuna; ²⁰adecbidi ma ambi chuiquid dapa icmiaid Esus mibi bedmenuen chomepanuna. ²¹Nuquin Papan abitedi icsaisa icmete ushē choabicnuc ambi chiampicpadequi nēbi Esus abuc aton Papabēd tabadec. ²²Adembidi chuiquin Moisesēn dada uampid nad iqueque. Tantiata:

‘Chuiquid Dapa ēbipadquid ambi chuimiaid utsi yuecshun Nuquin Papan chomendac. Isadaidbobidi aid iquendac. Aid choshon chuibansho tantiashun bēdamboen nabanta.

²³ Ambiaid tantiashun Nuquin Papan nēsecaindac,’ quequin Moisesēn dada uampic.

²⁴“Adomboembidi Samuedēn chuibampampic. Adomboembidi Nuquin Papan chuimiaid utsibon chuibanoampic. ²⁵Nuquin Papan

chuimiaidon tsyuecquido mibitedi nec. Tsusedpa Abadauanēn tsyuecquidobidi mibitedi neoaic. Aidon tsyuecquido icsho Nuquin Papan Abadauan chiampicpaden chuioid mibitedi nec. Naden Abadauan Nuquin Papan chuipampic:

‘Mibi ēndenquimbo unēsampin aton matsesbēdta matses utsi-utsien min tsyuecquidēn bēdambo icmendac.’ ²⁶Nuquin Papan Abadauan chiampicpadece aton tsyuecquid choacsho mimbi unēs uapondac. Aidi Nuquin Papan uincuemiac ma isadaidbomba abi icsaid ēnsho ma ambi bēdambo icmiaid icpanuna —quepanēdash Petedobēd Uan.

Ambiaid naid Petedobēdta Uan isadaidbo tsusiobon chuibiaid

4 ¹Aden Petedobēdtan Uanēn chuibanubien isadaidbo tsusiobo cho-chopanēdash. Utsi-utsiec Nuquin Papa tabadte shubu uashunaid yacno cho-choquid bēdamboen tabadmequidquio icnubi utsi-utsiec saduseyobo icpanēdash. ²Esus unēs uacsho Nuquin Papan uincuemiacpadembi matsesten unēsacsho uincuemioaindac, quequin Esus chuibenequidon chuibanubi chopanēdash aido. ³Choshon Petedo Uambēdta bedash: —Inchēsheque. Badiadshun nēidēn chiaid tantianush nidnu. Nid —quianec puduanquimbi Petedobēdta Uan quēnēn nauedmeapanēdash isadaidbo tsusiobon. ⁴Aid daēdi bedabicnuc Petedobēdtan Uanēn chuibansho tantiaquido Esus tantiaquid dada dadpen sinco midted yampanēdash.

⁵Adashic, badiadash isadaidbo chuiquido yec tsusio utsibo yec abi ancaquido yec quec Edusaden yacnoēsh

iccuededpanēdash. ⁶Nēidtedi icpanēdash: ancanquid dapa daēd Anasbēdi Caipas icpanēdash. Nēidic aton shubun icquido abipadquido: nēidic Uan, utsibic Adecandedo, aidtedi cho-choash iccuededpanēdash.

⁷Iccuededshumbic Petedobēdta Uan bēmeshun nēnantanquio nidtomesun: —⁸Źtsuti chuiquin caputiapimbocquid bēdamio? —capanēdash tsusiobon.

⁸Adoquien Petedo Nuquin Papan Mayanēn comapenen tantiamiac nadpanēdash: ⁹—Caputiapimbocquid tantiaquin bēdamiaid isec Źmitsipaden nao, quecta mibitedi tabadpe? Ancanquidbēdtabi chuiquid utsibo isadaidbo utsibo mibitedi chiembique. Tantiata. ¹⁰Caputiapimbocquid Esuquidistu Nasaded yacno iccondaidēn bēdamiaid niosh. Mimbi unēs uacsho Nuquin Papan uincuemiaidēn nac nēid caputiapimbocboedi nēbi nidtoash capusho mimbi isec. ¹¹Aid bēdamequid mimbi tantienquio yaid Nuquin Papa yacno yuedanquid nec. ¹²Nuquin Papa yacno yuedanquid utsi nibēdec. Nuquin Papa yacno tabadte bunec aid tantiaquid icta —quepanēdash Petedobēd Uan.

¹³Adec Petedobēd Uan dacuēdenquio yec comapenec onquesho tantiaash tsusiobo: —Aid daēdi tsusiopenquio iquequi adecbidi Nuquin Papan chiampid tantiabencquid iquequi Esusbēd icquid aid daēd icquin Źmitsipadomboen caputiapimbocquid bēdamepashba? —quec tantiadempambo yec tsusiobo tabadpanēdash. ¹⁴Aden ambi bēdameboed aidbēdi icsho isash, Icsamboen mimbi naoc, quetiapimbo tsusiobo tabadpanēdash. ¹⁵Adshun Petedo Uambēdta nidmiash, Tantienu, quec onquecuededec tsusiobo:

¹⁶—ŹMitsipadomboen aid daēd nuqui

napeba? Nadatiambocquin nasho Edusaden yacnocquidtedishun isbededposh. Ad icnuc, Caputiapimbocquid bēdanambo iquec, ēbitedi quetiapimbo iquebi.

¹⁷Dadpeshun tantianushe queshun, Esus padpiden chuibanoainda, quequin aid daēdi chuinuna —quecuededpanēdash tsusiobo.

¹⁸Adshun Petedobēdta Uan chomeoashun: —Padpiden Esus chuibanoainda. Aidēn chiaid chuiquin tantiamenda —capanēdash tsusiobon.

¹⁹Adoquien: —ŹMitsicquidēn chiaid ēmbi natequid icpec? ŹNuquin Papan chiaid niacquindambi mimbi chiacpaden nadi? ²⁰Nuqui isboed nuqui tantiaboebidi chuitequidquio iquendac —quepanēdash Petedo.

^{21,22}Adoquien: —Ēmbi chiacpaden nainquiocsho isun mibi daēdi mēyantsiambique. Baded nid cueschitomane —capanēdash tsusiobon. Abi tishaid seta 40ted icquid caputiapimbocsho bēdamepanēdash. Aid Nuquin Papan bēdameiacsho isash utsibo cuēdēncuededpanēdash. Adsho tantiaash Petedobēdta Uan mēyantiadquiocboedi adotiapimbo yec tabadpanēdash tsusiobo.

**Isadaidbo tsusiobon chiaid
Esus tantiaquidon chuoaid
Nuquin Papa chiaid**

²³Tsusiobon nidmiac nidash iccuededboconombo choash puduedshun tsusiobon chuiobo Petedobēdta Uanēn chuiopanēdash. ²⁴Adoac abentsēc onquiacbimboen naden Nuquin Papa chuipanēdash: —Con Icbombo mibi nec. Abubēdta nidaid acte chedo uashun aidēnquio icquidtedimbo mimbi uabampampic. ²⁵Adembidi ēndenquimboshē mimbi tantiacpaden min Mayanēn tantiamiac mimbi

chuimiaid, Dabid padon naden dada uapampic:

“¿Atotsieshumbini ëbi
dëniactiapimbo icquidombi
isadaidpembo comapenec
nëishash ëbi dëniacte
buncuededpec? Adquiecbidi
¿Atotsi quiash ëmbi chomiaid
icsamboen nanushbimboec
isadaidbo onqueuidoapec?

²⁶ Ancanquidobëd chuiquid utsibo
ëmbi chomiaid aton Icbobi
mëyanuec iccuededec.”

²⁷ Ai, mimbi Dabid pado dada
uamiampicpadembi ënabi Edusaden
yacno isadaidpembo ancaquid daëd
Edodesbëd Ponsio Pidato icnubi
isadaidbo chedo iccuededquin mimbi
Chomiaid icsaisa Esus icsa uanuec
onqueuededpondash. ²⁸ Mimbi
tantiampicpadembi unës uapondash,
Papa. ²⁹ Adquidën Petedobëdta Uan
chushcasha mimbi tantioec.
Cuesambocquid ëbitedi icmequin mimbi
chiaid ëbi chuibame, Papa. ³⁰ Icsaisan
Esusën bëdamiacpaden
nadatiambocquin naban, Icho
—quepanëdash Esus tantiaquido
Nuquin Papa caic.

³¹ Adoac abi iccuededacno
ishcudpanëdash. Adec ishcnudnuc
ambocquid Nuquin Papan Mayanën
comapenen pausunac
dacuëdenquiocquin Nuquin Papan
chiaid chuibampanëdash.

Abentsëc yacimboec tabadaid

³² Aden chuibanequi abentsëc
onquiabimboec tabadec Esus
tantiaquido, Con na nec, quenquo yec,
Nuquin Papan na nec, quec
tabadcueneapanëdash. ³³ Adequi
tabadcuenequimbi dacuëdenquiocquin,
Esuquidistu uincuenacsho isombi,
quequin chuibenepanëdash. Adec Esus

tantiaquido tabadsho utsibon
bëdamboen isbededquin aidën
chuibansho bëdamboen tantiapanëdash.
^{34,35} Adembidi nidaid icbo
utsin-utsinquien aton nidaid menequin
piucquid bedshun Esus chuibenequido
menepanëdash. Adembidi, shubu icbo
utsin-utsinquien aton shubu menequin
piucquid bedshun meneoapanëdash.
Aden meniac aton na nibëdquid icsho
isun Esus chuibenequidon menebanac
bunenquo tabadpanëdash. ³⁶ Adecbidi
ambo acte nënantanquo nidaid
nacdëdquid shubu uaidëshun Chipide
caid yacnoshon tishaid Edusaden yacno
choash Ose tabadpanëdash. Aidi,
Bëdamboen mimbi naoque. Adobanta,
quedenesho Bednabe cuëmpañdash.
³⁷ Aidëmbi aton nidaid menequin
piucquid ambi bedaidtedimbo Esus
chuibenequido meneoapanëdash.

Ananiasbëd aton chido Sapida muaid

5 ¹ Adnubien dada utsi Ananias
cuëmëdquid aton chido
Sapidabëdta aton nidaid menequin
piucquid bedpanëdash. ² Bedshun aton
chidon isnubi musucbanshun ambi
musucaid utsi dayun uash Esus
chuibenequido yacno nidshun abitedi
meniacimboen menepanëdash
Ananiasën. ³ Adnubien, Piucquid abitedi
meniacimboen Ananiasën mua uaposh,
quequin Nuquin Papan Mayanën
tantiamic naden Petedon Ananias
chuiapanëdash: —Satanasën tantiamiaid
icquin çmitsipaden tantiaquin Nuquin
Papan Mayanën isnubi mua uaquin ëbi
menio? ⁴ ¿Min nidaid meniabi icnuc
mitsanapenquioda nediosh? Mitsana
niosh. Adecbidi, ¿aidi menequin
piucquid bedaid mitsanapenquioda
nediosh? Aidedi mitsana niosh.
¿Mitsipaden tantiaquin piucquid abitedi
meniacimboen meniano? Aden bëquin

abimbo chienquiocquin Nuquin
 Papambobi mimbi mua uaboc
⁵—Petedo qesho tantianec Ananias
 unésequi uebudpanédash. Adsho isash
 Esus tantiaquidtedi dacuédpanédash.
⁶Unésacsho isun dashcute cuëshèn
 dataneshun buanshun caniabon
 chococatampanédash.

⁷Bënë chococambo ushë abuctoan
 unésboedën chido aton bënë unésaid
 tantienquo yec choapanédash.

⁸Choasho isumbien: —¿Ada min nidaid
 menequin nëidtedi piucquid bedo?
 —Petedo qesho tantiasien:
 —Ai, aitedi bedombi —quepanédash
 Sapida.

⁹Adoquien Petedo: —¿Nuquin Papan
 Mayanën ëbi muasho tantiapec, quequin
 tantienquiocquina min bënëbëdtambi
 min piucquid abitedi meniacbimboen
 meniano? Nëbi min bënë
 chococaboedon mibitsen buanendac
 —Petedo quenubic ¹⁰Petedon tayumbi
 uebudec Sapida unésapanédash. Aidsen
 unésacsho buanshun aton bënëbëdtabi
 chococatampanédash. ¹¹Adoac aid daëdi
 unésaid tantias Esus tantiesatedi Esus
 tantiaquidobëd comapenec
 dacuëdcuedpanédash.

Bë-bëaidtedi bédanaid

¹²Adashic Sadomonën tacpan caid
 yacnoësh Esus tantiaquido iccuedednubi
 Esus chuibenequidon nadatiambocquin
 nabampanédash. ¹³Adomboen nabansho
 isash Esus tantiesabo dacuëdec tacpan
 yacno chotiapimbo yequi: —Esus
 tantiaquido bédamboshë iquec
 —quecuededpanédash. ¹⁴Adec
 tabadequi utsi-utsiec dadpen dadabëdi
 chido Esus tantiaquido yampanédash.
¹⁵Adec Esus tantiaquid yanshun,
 Daicsaido Petedon bédamepec, quequin
 tantiaquin daicsaido bë-bëshun Petedo
 capuacno nambededpanédash.

¹⁶Adembidi dëuequidon Edusaden
 yacno daicsaid bë-bënubi mayan icsan
 mëyanaido bë-bëoapanédash. Aden
 bë-bëaidtedi bédampanédash.

Esus chuibenequido tsusiobon quënë nauledmiaid

¹⁷Adnubien isadaidbo ancaquidbëd
 tsusio dapa utsibo saduseyobo caid isec
 otacquo tabadboedi matses dadpen
 Esus chuibenequido yacno cho-chosho
 isash nëishcuededpanédash. ¹⁸Adec
 nëishcuededshun Esus chuibenequido
 bedmeshun quënë nauledmepanédash.
¹⁹Aid inchëshëmbi Nuquin Papan uaid
 mayan bëda choshon quënë shëcuë
 bëtashaid bëcadoquin abitedi
 puduemec: ²⁰—Mibi puduemimbiq.
 Nuquin Papa tabadte shubu uashunaid
 yacno nidtan. Ambo puduedshun Esus
 tantiaquid uincuntequid chuibanoata
 —quepanédash Nuquin Papan uaid
 mayan bëda.

²¹Badiadnuc Nuquin Papa tabadte
 shubu uashunaidën puduedshun Esus
 tantiaquid abi uincuntequid
 chuibanoaic tabadoapanédash aitedi.
 Chuibanubien isadaidbo tsusio dapan
 abëd icquidobëdtambi tsusio utsibotedi
 cho-chomeshun: —Esus chuibanquido
 bedtan —cac ²²quënë nauledaid
 puduenushe quequin isquido chuiquid
 nidshun isquien Esus chuibenequido
 nibëdec. ²³Adsho isash choaquin:
 —Quënë shëcuë bédamboen bëtashquin
 quënë nauledaid puduenushe quequin
 isquido shëcuë cuëmano capusho
 isombi. Shëcuë bëcadoash puduedshun
 isaquien ënden puduen-puduenac
 —quepanédash quënë nauledaid
 puduenushe quequin isquido chuiquid.
²⁴Aden chuisho tantias isadaidbo
 tsusiobo: —¿Atodain nechitec?
 —quepanédash Nuquin Papa tabadte
 shubu uashunaid isquido chuiquid

chiec. ²⁵Adnubien dada utsi choshon:
—Mimbi quënën nauedboedon Nuquin
Papa tabadte shubu uashunaid
yacnoshon chuibanoasho tantiombi.
¿Ada tantio? —capanëdash.

²⁶Adoquien quënën nauedaid
puduenushe quequin isquido chuiquid
capitan caidën ambi namiaidobëditan
tantiec nidshun bedtanquin
bëoapanëdash. Matsesën cuënoten ëbi
se-senushe qeshun mëyanenquiocquin
Esus chuibenequido bëoapanëdash.

²⁷Aden bëquin Nuquin Papa tabadte
shubu uashunaid nuntan tsusiobo
iccuededacno yuedpanëdash. Bësho
isash tsusio dapambo: ²⁸—Esus
chuiবেনেদা, quequin
chiamboquidëmbimboen Esus
chuiبانquin Edusaden yacnocquidtedi
mimbi tantiamebanoc. Adoquimbic,
Esus unës uaid tsusiobon naid nec,
quequin mimbi chuibanoc
—quepanëdash tsusiobo. ²⁹Adsho Esus
chuiবেনেদো utsibon tantianubi
Petedonuidi: —¿Matsesën nata
caidodabi nedi? Nuquin Papan nata caid
icquin nabanembi. ³⁰Mimbi cuesten
dectanquin unës uaondaid Esuquidistu
Nuquin Papan padpiden
uincuemepanëdash. Nuquin Papa caid
tsusedpabon Papa caidquio nec. ³¹Esus
uincuemeshun aton dayunquio
tsadmequin matses bëyucanquin
Chuiquid abi yacno matses
Puduedmequidquio icmepac. Aden
nabanaid isadaidbo aidi abimbo
tantiaquid icpashun ma abi icsaid
Nuquin Papa bëpiscudpanuna.
³²Esuquidistun nabansho
isbempondambi. Adembidi abi unësash
uincuenacsho ispondambi. Nuquin
Papan Mayan icsaisan Esuquidistu
tantiaquidobëd icquidëmbi adomboen
ëbitedi tantiameoaic —quepanëdash
Petedo.

³³Aden Petedon chuisho tantiash
tsusiobo: —Icsambo iquec —quiash Esus
chuiবেনেদো cuesunete bumpanëdash.

³⁴Adnubien isadaidbo utsi padiseyobo,
Nuquin Papan Moises dada uamiampid
chuiبانquin tantiamequid utsibon
bëdamboen isaid, Camadied
cuëmëdquidën: —Chiata. Bëboedtedi
buantan —cac ³⁵buanambic:
—Icsamboen nanushe qeshun
bëdamboen tantiaquiota. Aido
cuesunete mibi buneeque. Cuesunenush
chiata. ³⁶Ëndenquio utsi Teyudas
cuëmëdquid icpondash. Aidi tsusio dapa
icnuequin chuisho tantiash dada dadpen
400ted abëdi capupanëdash. Teyudas
cuesuniacsho isash abëd icboedtedi udi
nidaniacsho padpiden isenquio
icpanëdash. ³⁷Adashien matses
tambanta caid ushëmbi utsi Udas
cuëmëdquid Cadidia yacno icnëdaidbëd
matses dadpen capupanëdash. Udastsen
cuesuniac abëd icnëdaidtedi padpidec
choenquio yec adecbidi udimbo
nidanepanëdash. ³⁸Adec umanuc
buamboedo chuiquid nibëdanaque.
Aidbëd icboedo mishenda.
Cuesunemenda. Aidën
chuiبانaidbëdtabi ambi naid matsesën
naiduidtsëqui icnuc badedquio
ënëdendac. ³⁹Aido Nuquin Papan
namiac chuisho mimbi ëmetiapimbo
iquendac. Nuquin Papa chieshënushe
qeshun aido nidmeta.

⁴⁰Aden Camadiedën chiac: —Adonona
—qeshun: —Buamboedo bëoata —cac
bëacsho cueshancanten cuesmepanëdash.
Aden cuestanquin: —Esus
chuiبانوainquio yec nidtan —qeshun
puduemepanëdash. ⁴¹Puduemiac Esus
mëyanaid tantiec nidequi abi
chuiبانشو mëyanaid yec bëdambo
iquebi, quec tabadpanëdash.
⁴²Adshumbic
badiadquidën-badiadquidënquien

Nuquin Papa tabadte shubu uashunaid yacnoshon matses bëyucanquin chuiquid, Nuquin Papan bëdamboen isaidquio Esus nec, quequin chuibampanëdash aidon. Shubu utsi-utsiec yacno nidshun adomboembidi chuibenepanëdash.

**Niante chidobo pete
menebanquid icta caid**

6 ¹Adashic badiadquidën-badiadquidënquiec Esuquidistu tantiaquid dadpen-dadpenquiec yanubi isadaidbo quidiecon onqueten onquequido comapenec onquec: —Niantebo menenquiocquin pete mimbi uesquin pepaboc —quepanëdash. ²Adoaquien Esuquidistu tantiaquid utsibo abi yacno cho-chomiash Esus chuibenequido 12ted: —Niantebo pemebanuec Nuquin Papan chiaid chuibanquin ëntiapimbo iquebique. ³Niantebo meneta canuen nadquidquio istuidshun chuita. Nuquin Papan aton Mayan meniac tantiamiac bëdamboec tabadsho mimbi bëdamboen isaidquio istuidta. Adquid 7ted istuidshun, Niante chidobo pete menebanquid icta, cata. ⁴Aidtedshun niante pemebanubimbi Nuquin Papa chuido-chuidoendac. Adembidi Nuquin Papan chiaid chuibenendambi —quepanëdash Esus chuibenequido.

⁵Adoaquien: —Mimbi bëdamboen chioc —quepanëdash Esuquidistu tantiaquid utsibo. Aidën chuibocpadembi aidtedi istuidpanëdash. Nëidic, Nuquin Papan Mayanën pausunaid, ambi chiacpadomboen Nuquin Papan naindac, quequin tantiaquidquio Esteban cuëmëdquid; utsibic, Uedipe; utsibic, Pëdocodo; utsibic, Nicanod; utsibic, Timon; utsibic, Padmenas; utsibic, isadaidpembo yequi isadaidbo tanquid Antioquiya

yacnoshon tishaid Nicodas cuëmëdquid. ⁶Aidtedi istuidshun Esuquidistu tantiaquid utsibon aido bëdamboen isquin buanec Esus chuibenequido yacno choash puduedash tabadquin Nuquin Papa chiec onquequimbi dada 7tedi mamishquin, Nëidted bëdamboen nameta, Papa, quequin Esus chuibenequidon chuipanëdash.

⁷Adashic Edusaden yacnoshon Esus chuibenequidon Nuquin Papan chiaid chuiban-chuibansho tantiaash utsi-utsiec Esuquidistu tantiaquid dadpen yampanëdash. Adecbidi isadaidbo tsusiobo dadpen bëdamboen tantiaash Esuquidistu tantiaquido yampanëdash.

Esteban bedaid

⁸Adnubien Nuquin Papan Mayan meniaidënquio. ambi comapenen tantiamiaidënquio, Estebanën nadatiambocquin ismebampanëdash. ⁹Aden nadatiambocquin ismenuc bëdamboen tantienquio yec utsibo comapenec onquecuedepanëdash. Nëidic, Sidene yacnoësh choquido; utsibic, Ade candedia caid yacnoësh choquido; utsibic, Sidisia caid yacnoësh choquido; utsibic, nidaid Asia caid yacnoësh choquido aidtedi Edusaden yacno cho-choash tabadec Estebambëd comapenec onquepanëdash.

¹⁰Comapenec onquequin Esteban Nuquin Papan aton Mayan meniaid icsho aidën comapenen tantiamiac onquesho dëniaquec utsibo onquetiapimbo icpanëdash.

¹¹Onquequin dëniactiapimbo icquin utsibo naden aidon chuipanëdash: —Tsusiobo naden chiec nidtan: Estebanën nuquin tsusedpa Moises caidën dada uampidbëdta Nuquin Papan chiampid chuca uain chuisho tantiombi, quequin muaquin chuita. Aden chiacsho mibi piucquid menembi

—cac chiec nidpanēdash. ¹²Aden chiac tsusiobobēd Moisesēn dada uapampid paquiacquidobēd isadaidbo utsibotedi nēishcuededshun Esteban bedshun tsusiobo iccuededacno buanquin yuedshun ismepanēdash. ¹³Ambo abi dēniactiapimbocquidon Esteban muaquin chuita caboedon naden chuibededpanēdash: —Nēid dada Nuquin Papa tabadte shubu uashunaidbēdta Nuquin Papan Moises dada uamepampid ēnenquiocquin muaquin chuibanec. ¹⁴Naden Estebanēn chioshe. Tantia: Nasaded yacno iccondaidēn, Esuquidistu caidēn Nuquin Papa tabadte shubu uashunaid yuecshun chic-chiquendac. Adembidi nuquin tsusedpa Moises caidēn dada uampid naden nata quequin chiaid natiapimboctequid nec, quequin Estebanēn chuibanosh, quequin muaquin chuipanēdash Esteban dēniactiapimbocquidon chomiaidon. ¹⁵Aden Estebanēn chiaid muaquin chuiquin naimbudquimbi tsusiobobēdtambi comapenen Esteban bēisquin Estebanēn bētantiatie ushēbimboec ushumbo yec chēnquesho isbededpanēdash.

Estebanēn chuibanaid

7 ¹Adec Estebanēn bētantiatie ushēbimboec chēnquesho isec tsusio dapambo Esteban chuiquin: —¿Abimboda mimbi naid chuiposh? ²—caquien yuecquio onquequin Estebanēn naden chuipanēdash: —Chiembique. Tantiapiqiota. Tsusedpa Abadauan nidaid Adan caid yacno nidabi yec nidaid Mesopotamia caid yacno tabadsho Nuquin Papan abi uēshēmbo yec dasiuidteniaid matsesēn istemaidd bēchomaoanquieic icquid Abadauan ismepampic. ³Aden ismec nadec onquepampic: “Min utsitedi

nianec nidaid utsi yacno mibi ěmbi ismenu caid yacno nidta.” ⁴Adsho tantiash Candeyabon nidaid yacnoēsh nidashic nidaid Adan caid yacno choash Abadauan tabadpampic. Ambo tabadashien aton papa unēsan Adan yacno nēbi nuqui tabadbocono Nuquin Papan nuquin tsusedpa Abadauan chomepampic. ⁵Aden chomeshun Nuquin Papan naden Abadauan chuipampic: “Nēid nidaidēn mibi capuacno mitsanapenquio nec. Yuecshun mibi menenun nanuna. Mimbi tishmiambochoedi min chidon tishaid abentsēc min madombo nēid nidaid menendambi. ⁶Nēid nidaid bedabi yec mimbi tishmiaidēn tishmiaid caidaidd matses utsibon nidaidēn tabadendac. Ambo tabadshobi anocquidēn aido yuashun seta dadpen 400ted matamequin mēyanendac. ⁷Adoacsho aidotsen cuidquin mēyanoaindambi,” quepampic Nuquin Papa. Adashic abi Nuquin Papa onquec: “Mīn madon tishmiaid caidaidd abi mēyanacnoēsh nidashic nēid macuēsh yacno choshon ěmbi chiacpadomboen nabanendac.” ⁸Aden chuishumbic, Nidaid menenun nanuna, quequin Nuquin Papan naden Abadauan chuioapampic: “Dada bacuēbēdta dada caniaidtedi shui dēbid dētemeta. Adobansho isun, Ěmbi chiaid bēdamboen naquidquio aidtedi nec, quequin ismendambi,” quepampic Nuquin Papa. Nuquin Papan chiaid tantiashun Abadauanēn ambia dētemeshun dadatedi aidēmbidi shui dēbid dētemeoapampic. Adoshombic yuecquio icshun Abadauanēn aton mado tishmeshun Isac cuēnquin 7tedec ushun Isaquēn shui dēbid dētemeoapampic. Adoshombic ademibidi Isaquēn aton mado tishacsho Acobo cuēnquin aidtedecbidi ushun

Isaquentsen Acobon shui dëbid dëtemeoapampic. Adoshombic, canishun Acobon tishmiaido 12ted icpampic. Abentse-abentsen tishmeshun aidtedecbidi ushun aton madon shui dëbid dëtemeoapampic. Adoaquien yuecash Acobon madotedi tsusiobudnepampic —quepanëdash Esteban isadaidbo tantiamenu quequin chiec.

⁹Aden chiec abi onquec: —Aid 12ted nuquin tsusedpabo icampic. Acobon mado, chido utsin tishaid, Ose icpampic. Aidi aton papa cudasaidquio icsho isash nëshumbic aton utsibon bedshun piucquid bedquin matses utsi menepampic. Adoac Ose bedboedon Equipito yacno choshon piucquid bedoaquin Equipito yacnocquid Ose meneoapampic. ¹⁰Adoac, Yuanu, qeshun natiamiaid Ose icsho isun Nuquin Papan aid dayun uaqin dacuëdenquio icmequin comapenen tantiaquidquio bëdamboen chuiquidquio Ose Nuquin Papan icmepampic. Adquidquio icsho isun Equipito yacnocquido ancaquidën Padaon caidën Equipito yacnocquido chuiquidquio Ose icmepampic.

¹¹“Yuecash Equipito yacnocquido chuiquid, Ose, icnubi nidaid Equipito caid yacnocquidbëd nidaid Canan caid yacnocquido natiambo buncuededpampic. Adnubi nidaid Canan yacno nuquin tsusedpabo Isadaidbon pete nibëdquieq yampampic. ¹²Adshumbic, Equipito yacno quënë uashun dayun uaid pete iquec, qesho tantiashun Osen papan Acobon ambi tishmiaido nuquin tsusedpabo chuiquin: ‘Equipito yacno pete iquec, qesho tantiombique. Bedtan,’ cac Osen utsibo aton papan chiacpadec pete bedec nidaneppampic. ¹³Adanec Acobon madotedi aton utsibo Equipito yacno

choacsho isun, Min utsi nebi, quequin chienquiocpampic Osen. Aton utsibon pete bedash abi yacno choashun ambi bedtamboed naimëdsho isun, Padpidemboen bedoatan, cac nidash Equipito yacno choacsho, Min utsi nebi, capampic Osen. Adoshon Equipito yacnocquido ancaquid Padaon yacno buanshun: ‘Con matses isadaidbo nec,’ Ose qesho tantienquioboedëmbi Padaonën tantiabempampic. ¹⁴Aton utsibo Padaon chuibanshumbic Osen aton utsibo chuiquin: ‘Nuquin pabëdta nuquin matses bedtan,’ capampic. Adoac bedoanec Equipito yacno choapampic. Abëd icquido 75ted icpampic. ¹⁵Adashic, Equipito yacno yuec tabadashi tsusio budashi Acobo unëspampic. Auëshquibidi nuquin tsusedpabo Acobon madotedi adecbidi unësoapampic. Unësascho Equipito yacno chococapampic. ¹⁶Adashic, yuecquio yash Equipito yacnoësh nidquin unësaidon tishmiaid caidaidon aton mëdimbon canite buampampic. Canite buanshumbic Siquen caid yacno nidshun ëndenquimbo matses utsi, Amod caid, piucquid menequin tsusedpa Abadauanën tied bedshunëdacno chococapampic.

¹⁷Aden chuishumbic Estebanën nadopanëdash: —Equipito yacnoësh tsusedpabo nidabi icnuc Nuquin Papan, Nidaid menenun nanuna, quequin chuipampid ushë chote anoentsëc yanuc nuquin tsusedpabo dadpen yanec caidpampic. ¹⁸Dadpen caidsho isun Equipito yacnocquido ancaquid utsin Ose pado tantienquio icpampic. ¹⁹Aidëmbi mua uaqin chuiquin natiamequin nuquin tsusedpabon dada bacuë tishacsho bedtemaid nec, quequin nemepampic. ²⁰Adnubien dada bacuë Moises tishacsho Nuquin Papan, Aid bëdaidquio iquec, quequin ispampic.

Aidi icucshun ushë abentsëc choaid nidmequin Equipito yacnocquido ismenquiocquin aton mado Moises anin ompopampic. ²¹Ompoaqui Moises shubisho tantiashun tsitsan ambi danoshcaidën aton mado acte nantan anin nuntampampic. Aden nuntanambien Equipito yacnocquido ancaquidën champi nesec budquin tsitsanën Moises noadtsëcsho istuidshun bedash, Con mado caimbi, quepampic ancanquidën champi. ²²Bedtsac canitsequi aidën shubu nuntan tabadec Equipito yacnocquid matsesën naid mëquiadec aidën chiaid Moises paquiadpampic. Aden Equipito yacnocquidon naidtedi naquin aidën chiaidtedi Moisesën tantiabenquiopampic.

²³“Adashic, Equipito yacnocquidobëd tabadquin abi tishaid seta 40ted matamiashic isadaidbon tishmiaido con matses isnu, quianec aton matses chonoadacno nidquin Moisesën istuidpampic. ²⁴Istuidnubi Equipito yacnocquid dada abentsëcshun isadaidbo dada abentsëc mëyanquin cuesunesho isun Equipito yacnocquid cuidnuequin Moisesën cuesuneoapampic. ²⁵Ëmbi adosho isun, Equipito yacnoësh nuqui bëyucanquin buanquid Moises nendac, quequin con matsesën tantiapatsiash, abibi quetsëcquieic nidnubi aton matsesën tantienquio icpampic. ²⁶Badiadash aton matses yacno padpidec nidquin aton matses daëd cuesnansho istuidshun, Ëmenu, abibi quec choquimbi: ‘¿Atotsi quec min matsesbëd cuesnane?’ Moisesën catuidpampic. ²⁷Adoquien Moises cuëscatanec: ‘¿Ëmbi nasho cuidquin ëbi chuiquid tsuntsin mibi icmioshe? Chui. Tiantianu,’ quetanequi: ²⁸‘¿Equipito yacnocquid mimbi cuesunebocpadenda ëbitsen cuesune?’

quepampic cuesnanquid Moises caic.

²⁹Aden chuisho tantiashien, Equipito yacnocquido ancaquidën tantianushe quianec dacuëdec Equipito yacnoësh Moises cuempampic. Adec cuenashi nidaid utsi Madian caid yacno nidash tabadpampic. Ambobi tabadquin chido bedshun dada bacuë daëd tishmepampic Moisesën.

³⁰“Adashic, seta dadpen 40tedbidi matamec nidaid Madian caidën tabadec cuëtempuiidquio yacno matses nibëdquieic yacno macuësh dapa Sinai caid anoentsëqui Moises chopampic. Ambobi tabadquimbi cuëtempï nëdënquiacimboecquid nënantanquio Nuquin Icbon Chomiaid tabadsho Moisesën ispampic. ³¹Aid istanequien tantiadempamboctequid nepanushe. Isbono, quianec anoentsëqui Moises chosho Nuquin Icbon naden chuiopampic: ³²‘Min tsusedpa Abadauanën Papa cain cuënaid nebi; min tsusedpa utsin Isaquën Papa cain cuënaidbidi nebi; min tsusedpa utsin Acobon Papa cain cuënaidbidi nebi,’ quesho tantiash dacuëdec uëdëquec istiapimbo yec Moises nidtuidpampic. ³³Nidtuidsho isec Nuquin Icho Moises chiec nadpampic: ‘Nëmbo ëbi icsapenquio icquid icnuc caputemaïd nidaid iqueque. Min tapucudte chicshun tantiata. ³⁴Min matses ëbi cudasaido Equipito yacnocquidon mëyanac uëshquec shubiquiosho tantiashun aido Equipito yacnoshon buanta mibi canuec chobi. Nëbi Equipito yacno mibi nidmeoaimbi,’ quepampic Nuquin Icho Moises chiec.

³⁵“Aden cuëtempï nëdënquiacimboecquid nënantanquio icboedën Nuquin Papan Chomiaidën isadaidbo bëyucanquin buanquid icta cac: ‘¿Ëmbi naid icsho cuidquin ëbi chuiquid tsuntsin mibi icmioshe? Chui.

Tantianu,' abi caondaïdo bëyucanquin buanquid Moises icpampic. ³⁶Adquid Nuquin Papan icmiac Equipito yacnoshon aton matses bëyucanquin buanun Moisesën nadatiambocquin ismepampic. Adoshombic, isadaïdbo buanquin Acte Piu yacnoshontsen nadatiambocquin ismeoapampic. Adoshombic, matses nibëdquieq yacno seta dadpen 40tedbidi matamec abi tabaducueniacnoshontsen nadatiambocquin nabanquin isadaïdbo Moisesën ismeoapampic. ³⁷Aidëmbi naden chuipampic: 'Yuecquio icshun ëbipadquid mimbi tishmiaïdën tishmiaïdon caïdaïd Nuquin Papan chuiquidquio icmendac,' quequin Moisesën chuipampic. ³⁸Isadaïdbo bëyucanquin chuiquid Moises matses nibëdacno isadaïdbobëd macuësh dapa Sinai caïd yacno choash Nuquin Papan chomiaïdobëd Moises tabadpampic. Ashunquio Nuquin Papan abëdi tabadte tantiamenuequin cuënote pada-padambocquidën ambi naden nata quequin dada uaid Moises menepampic. ³⁹Aden aid dada uaid bedshun bëyucanquin chuisho tantiesia yanec nuquin tsusedpabo Moises bunenquio yec Equipito yacno nidoate bumpampic. ⁴⁰Adashic, Moises macuësh yacno yuecquio tabadnubi Moisesën utsimbo Adon cuëmëdquid aton matses utsibon naden chuïbededpampic: '¿Moises nuqui Equipito yacnoshon bëyucanquin bëboed mitsi nidpash nec? Nibëdpequien iquec. ¿Atotsi quec nidpash? Nuquin Papan uacpadquiocnoc nacentã. Nacnenash bëyucanquin chuiquid aid iquendac,' tsusedpabon cac ⁴¹bacan bacuëbimboecnuc Adonën nacnempampic. Ambi nacnenaid tantiaquin isadaïdbon nidaidën capuquid yua cuesuneshun

cuëdënëmbededpampic. ⁴²Adquid cuëdënësho tantiaash isadaïdbobëd ictiapimbo iquec Nuquin Papa, Padi. Adenda, quenquio icpampic. Adquido Nuquin Papan ëndenquimbo tantiaquin naden chuipampic: 'Adomboen mimbi nacnenaid tantieq tabad.' Adembidi Nuquin Papan yuecquio icshun nanun chiaïd isadaïdbo chuïquin naden dada uamepampic:

¿Matses utsi nibëdquio yacnoshon seta dadpen 40ted matamequin ëbi tantiaquina nidaidën capuquid yua cuesuneshun pambid tauïdenio? Padenquio.

⁴³Ëmbi uaid badiadën ushë, ëbitedishun bëyucamembi, qeshun aidpadquid nacneshun Modoc cuënquin aton shubumpi nuntan namposh.

Aidbëdtabi uispa dapatsen ëbitedishun bëyucamembi, qeshun aidpadquidbidi nacneshun Dempan cuëneq danëshën sebudec shuebudshun, Mibi tantiaquid nebi, quequin adquid mimbi chuipoc.

Aden nasho isun ëmbi menenu caïd nidaid yacno mibi nidmenquio icquin nidaid utsi, Babïdonia caïd udi mibitedi nidmeoaindambi.'

Aden ambi chiaïd niacquido isadaïdbo tantienquio icquidobi Nuquin Papan chuipampic —quepanëdash Esteban isadaïdbo chieq.

⁴⁴Aden chieq yuec onquebudec: —Matses utsi nibëdacnombo nidanequin tsusedpabon Nuquin Papa tabadte chicbanshun buampampic. Aidëmbi Moises ismiacpadembi isadaïdbon Nuquin Papa tabadte shubu uashumpampic. ⁴⁵Adashic, tsusedpabo aid shubu uaquidotedi unësan ambi tishmiaïdonsen aid shububidi adomboembidi chicbanshun

buanoapampic. Adoshombic, isadaidpembo utsi-utsien cuemenu, quequin aidon nidaid yacno aid shubu chicbanaid bëshun bëyucanquid Osue cuëmëdquidbëdtan nuquin tsusedpabon aid nidaid nënantanquio shubu uaoampic. Aden aid shubu nacnenoanubien isadaidbo chuiquid dapa nuquin tsusedpa Dabid yampampic. ⁴⁶Aidi Nuquin Papan bëdamboen isaidquio aid nidaidën tabadquin Nuquin Papa tabadte buantiapimbocquid shubu uashuntiadquiocquin shubu uate bë-bëmepampic. ⁴⁷Aid shubu uabi Dabid unësambic ambi tishmiaidën, Sadomon cuëmëdquidën, Nuquin Papa tabadte nainquin shubu uashumpampic. ⁴⁸Aden matsesën shubu uaidën Nuquin Papa tabadenquio iquec. Adembidi Nuquin Papan chuimianiaidën naden chuiampic:

⁴⁹ “Abutenquiobi con tsadte dapa iquec. Adecbidi nidaidtenquiobi ëmbi tincatequid nendac. ¿Adquid icnubidabi matsesën nidaidën shubu uashun tabadmepadic? ¿Nidaidënuidi tsadpectabi tiboquendac?

⁵⁰ ¿Tauaquioquimbi abitedi uambodambi ictionda?”

quequin Nuquin Papan chuimiaidën dada uapampic —quequin chiašic Esteban abi onquec:

⁵¹—Pacuënëdacimboen Nuquin Papan chiaid tantiaš icsaquin ënesa mibitedi nec. Aton Mayanën tantiamenu cac tsusedpabotedišun chiešhëmpampicpadembi mibitedišun chiešhënoaic. ⁵²¿Nuquin Papan ambi yuecquio icshun naden nanuna quequin chiaid ambi chuimiaidtedi min tsusedpabon mëyanenquioda icpampic? Adembidi, Nuquin Papan chomiaid choendac, quequin chuiquido

tsusedpabon cuesunepampic. Aidon nacpaden Nuquin Papan chomiaid mibitedišun unës uamiondac.

⁵³Nuquin Papan chiaid ambi uaidon mayan bëdabon meniaqui Nuquin Papa chiešhënuquido mibi nec —quepanëdash Esteban isadaidbo chuiquin ënec.

Esteban se-siaid

⁵⁴Adec Esteban onquesho tantiašun nëiškëshun Esteban iccuededquidon chushcapanëdash. ⁵⁵Adoaquien Nuquin Papan Mayan meniaidquio icquin Estebanën abuc isquin Nuquin Papa uëshëmbo yec matsesën istiapimbo bëchomaoanquieic ictequid abichobi dasiuidteniaid chënuqueni Nuquin Papabëd tancandaëdquieic Esuquidistu nidtuidsho ispanëdash. ⁵⁶Aden isequi: —Abuc šhëcuë uaid šhëcniaye. Is. Umbo Esuquidistu, matsesondaid, Nuquin Papabëd tancandaëdquieic tsadsho isembi —quepanëdash Esteban.

⁵⁷Adsho tantiaš tsusiobo comapenec sidquianec pamumëdanec titinquequin Esteban bedshun ⁵⁸cuënoten se-senuen shubu nibëdacno udi buampanëdash. Aden Esteban buanshun aton dashcute Saudo cuëmëdquidën taëno sampanëdash Esteban se-senuequidon. ⁵⁹Sanshun se-siaquieic Estebanën Esuquidistu cuënuquin naden chuiapanëdash: —Ëbi yued, Ico —quiashic, ⁶⁰danëshën sebudash comapenec naded onquec: —Ëbi se-sequido icsaid cuidenquio yec bëpiscudta, Ico —quepanëdash. Adec onquetanec Esteban unëspanëdash.

Saudon Esus tantiaquido mëyanaid

8 ¹Esteban se-senu caquien, Ai, adota, quiash isec uano Saudo tsadpanëdash. Esteban se-siaid ushëmbi Edusaden yacnoshon Saudon Esus tantiaquid utsi-utsien comapenen

mëyanquin tauadopanëdash. Adosho isash Esus chuibenequido ambobi tabadnubien Esus tantiaquid utsibo nidanec uano-uanoec nidaid Udeya yacno utsi-utsiec choash tabadnubien Samadia caid yacno choash utsibo tabadoapanëdash. ²Adnubien Nuquin Papan chiacpadomboen naquin Esteban chococaic comapenec sedenquec shubipanëdash. ³Adnubien Saudo Esus tantiaquidtedi naimbudte bunquin shubu utsi-utsiec yacnoshon dadabëdtabi chido chedo bedmeshun quënën nauedmeapanëdash.

Samadia yacnoshon Esus chuibanaid

⁴Adashic Edusaden yacnoësh nidanec shubu dadpen icquid utsi-utsiec yacno choshon abi tantiaquidon Esus chuibenepanëdash. ⁵Adembidi niante chidobo aton na nibëdsho menequid, Uedipe cuëmëdquid nidaid Samadia caid yacno choshon adembidi Esus chuibanoapanëdash. ⁶Aidën nadatiambocquin nabanquin Esus chuibansho ambocquido iccuededquin bëdamboen tantiapanëdash. ⁷Aidëmbi nadatiambocquin nabanac mayan icsa dapudedaid icboedi mayan icsa sidquianec cuempanëdash. Adecbidi canite icsaidbëdta caputiapimbocquid dadpen bëdampanëdash. ⁸Adsho isash Samadia yacnocquido, Bëdambo iquebi, quec tabadpanëdash.

⁹Adnubien Samadia yacno ënden chondaid, Nadatiambocquin nabanquid dapa nebi, quequin mayan icsan tantiamiacpaden Simon cuëmëdquidën nabampanëdash. ¹⁰Adosho isash: “iEee! Abimboshenda caposh. Nëid dada Nuquin Papan ambi nadatiambocquin nabante tantiamiaid nec,” quequin anocquidobëdta abi chuiquidon comapenen tantiapanëdash. ¹¹Aden yuen Simonën ismiac, Isnuequid dadpen

badiadquidën-badiadquidënquiec abi yacno choash iccuededpanëdash.

¹²Adnubien, Nuquin Papa yacno puduedmianquid Esus nec, quequin Uedipen chuibansho tantiaquid yampanëdash dadabëdi chido chedo. Adsho aidtedi acten mentomepanëdash. ¹³Simontsen: —Esus tantiaquid nebi —quesho acten mentoquid Simon Uedipebëd capuquimbi Uedipen nadatiambocquin nabansho isun, Adopenshenda nabanec, quequin ispanëdash Simonën.

¹⁴Adashic yuecash Samadia yacnocquido Edusaden yacno nidash nadpanëdash: —Nuquin Papan chiaid Samadia yacnocquidon tantiabededec. Aden chuisho Esus chuibenequidon tantiashun Uambëdta Petedo Edusaden caid yacnoësh nidaid Samadia caid yacnoshon nidmeapanëdash. ^{15,16}Adec aid daëd nidaneshun: —Esus tantiaquid acten mentoaidouidi nëidtedi nec —anocquido quesho tantiashun: —Nëidtedi min Mayan mene, Papa —quec onquequin ¹⁷Petedobëdta Uanën mëdanten Esus tantiaquido mamishbampanëdash. Aden mamishbanubi aidtedi Nuquin Papan aton Mayan menepanëdash.

¹⁸Aden Petedon nasho isash Simon: —Ma adquiec mëquiadnueshun mibi piucquid menenu. ¹⁹Mimbi matses mamishacpadembi ëmbi mamishaidtedi ma Nuquin Papan Mayan meniaid icpanuna —queapanëdash.

²⁰Adoquien Petedo: —¿Piucquid menecta mibi mëquiadpe? Adoquin mimbi tantianuc tauiantiadpambo chian anëdënquiacno ma mibëdi min piucquid icpanu. ²¹Mimbi Nuquin Papan chiaid icsamboen tantiaquin ëmbi nacpadomboen natiapimbo mibi iquendac. ²²Mimbi icsamboen tantiaid ënta. Aden icsaid ënsho isash Nuquin

Papa mibi icsaid bēpiscudendac.

²³Mayan icsan yua icquin tactau tishidaid mishaid mucambo yacpadec icsamboen mimbi muaquin chuibanaido icsaindac.

²⁴Adoaquien: —Ēbi tauiantiadpambo chian anēdēnquequid nēnenushe quiash mibi Uambēd Nuquin Papa chiec bēdamboec onquebudneta —quepanēdash Simon.

²⁵Adec Samadia yacno tabadquin Petedobēdtan Uanēn: Esus ispondambi, queded-quededquin Nuquin Papan chiaid chuibanashic Edusaden yacno nidquimbi utsi-utsiec yacnoshontsen chuiopanēdash aidēmbidi.

Uedipe Etiopia caid yacnocquidbēd icaid

²⁶Adoshombic, Samadia yacno Uedipe icsho Nuquin Papan uaid mayan bēdan nadopanēdash: —Nēuēshquio puduanec nidec Edusaden datambidanec acte dapa yacno shubu dadpen icquid Casa caid yacmi matses nibēdacno podquedēn nidash nidtuidtanec chotan.

²⁷Adoac nidtoanec nidquimbi Nuquin Papan uaidēn mayan bēdan chuibocno choquin Etiopia caid yacnoēsh choquid Uedipen bēquedtuipānēdash.

Ancanquid chido Candase cuēmēdquid aton na dayun uashunquid aid dada nepanēdash. Aidi Edusaden yacno nidash tabadquin Nuquin Papa chianec

²⁸padpidec Etiopia yacno nidequi aton nidaid cano cabayon nimbanubi antsadtoshon Nuquin Papan chiaid dada uamepampid isec onquequin chuibanec tsadpanēdash. ²⁹Adnubien Nuquin Papan Mayanēn: —Nidaid cano chinunta —cac ³⁰Uedipen titinquequin chinumpanēdash.

Aden Etiopia yacnoēsh choquid dada uaid isec onquesho isash: —Īsbanec onquequinda tantiaquie? —quepanēdash Uedipe.

³¹Adoaquien: —Tantiamequid nibēdnuc ĩmitsipadentsimbi tantiape? Ēbēdi antsadtoec cho —cac Uedipe abēdi antsadtopanēdash.

³²Aidbēdi antsadtoshon Etiopia yacnoēsh choquid Nuquin Papan dada uamiampid isec onquesho Uedipen naden tantiapanēdash:

“Obeca cuesunenuen nimbambocpadomboebidi mētaneshun nimbanoaposh Nuquin Papan chomiaid unēs uanuequin.

Adecbidi obeca bacuē abi datasnuequid icnuc cuēdenquio yacpadec abi unēs uanuequid icnuc cuēdenquio icoaposh Nuquin Papan Chomiaid.

³³Aidi Icsaisa icsho mēyansho isec, Icsambocquidta neque. Isnu, quenquiocposh aton matses.

Aidi chido inesa yec ambi tishmiaid nibēdnuc ĩTsuntsin ambi naid chuiadic?”

³⁴Aidtedtsēquī abi isec onqueboed Uedipe ismeshun Etiopia yacnoēsh choquidēn: —Ēbi isec onqueboed ĩmitsicquid chiequini onquepo? ĩAbibi chiadaidtabi isec onquepo? ĩUtsida chuibaneque? Ēbi chui. Tantiānu —capanēdash Etiopia yacnoēsh choquidēn Uedipe chuiquin.

³⁵Adoaquien, Matsestedī icsaid bedshunash abided cuidadec Esus unēsaid Nuquin Papa yacno puduedmianquid nec, quequin dada uapampidēn chiec, quequin Etiopia yacnoēsh choquid tantiamenuen chuibanpanēdash Uedipen.

³⁶Adoanec nidquimbi Etiopia yacnoēsh choquid Esus tantiaquid yanshun actempi istuidshun: —Actempi iqueque. Is. ĩAdabi mentoe? —capanēdash.

³⁷Adoaquien Uedipe: —Esus tantiaquidquio nebi, quesho mibi acten mentono —capanēdash.

Adoquien: —Nuquin Papan mado Esuquidistu nec, quequin aid tantiaquid nebi —queshun Etiopia yacnoësh choquidën: ³⁸—Nidtuïd —cac nidaïd cano nidmequidën cabayo nidtuïdmian acte budshun Etiopia yacnoësh choquid Uedipen mentopanëdash. ³⁹Adashic, acte nantanuësh abi daëdi dectatosho Nuquin Papan Mayanën Uedipe buampanëdash. Adoac Uedipe padpiden isenquio yequi, Esus tantiee bëdambo iquebi, quec Etiopia yacno nidoapanëdash.

⁴⁰Adnubien Uedipe Nuquin Papan Mayanën nidaïd utsi Asoto caïd yacno buampanëdash. Ambo capucuenequin shubu dadpen icquid yacno-yacnomboen Esus chuibëec onquec choequi shubu dadpen icquid Sesadeya caïd yacnotsen choapanëdash.

Saudon tantiate paucaïd

9¹Adnubien Edusaden yacnoësh Esus tantiaquid utsi-utsiec nidanenubien Saudo Edusaden yacno tabadpanëdash. Ambo tabadec chushquec Esus tantiaquidtedi cuesunemetiadquio yec isadaïdbo chuïquid dapabo yacno Saudo choash ²shubu dadpen icquid yacno-yacnomboec nidshun Esus tantiaquido bedmeshun tanemeshun Edusaden yacno bëmete bunebi. Damasco caïd yacnoshontsen adote bunebi. ¿Ada mimbi adota quequin dada uashun ëbi menetsia? Mimbi adota, quequin dada uaid bedshun Damasco yacno nidshun ismiac anocquido chuïquid adota queoatsiash, quequin Edusaden yacnoshon Isadaïdbo chuïquido chuïpanëdash Saudon.

³Aden chiac dada uaid bedash Edusaden yacnoësh puduanec nidec Damasco anoentsëqui yanshobi abucuësh bed-bedquequin Saudo dëcatepanëdash. ⁴Aden dëcatiac Saudo

paëdash uesho isun nadece abucuësh onquec: —Saudo, ¿tatotsieshun ëbi tantiaquido mimbi mëyampeba? Èbitsen mëyantiadpambocquin mimbi aïdo mëyanec —quepanëdash.

⁵Adoquien: —Icbo, ¿Ttsutsi mibi ne?

⁶Adoquien: —Mimbi mëyanaid Esus nebi. Èmbi chiaïd chieshënece mibi tabadeque. Nidtoash Damasco yacno nidtan. Anoshon ëmbi nata cacpadomboen anocquid mibi chuïmembique. Nidtan.

⁷Adec abucuësh onquenubi Saudobëd cho-choquido nidtuïdshun tantiequi onquequid isenquio yec tabadtuïdpanëdash. ⁸Onquec ënëdan nidtoash Saudo istiadquio iquequi bëshupanëdash. Adsho isun mëdïnanquin Damasco yacno buampanëdash. ⁹Adequi Damasco yacno choash 3tedec ushec isenquio yec buna mëmunquiece Saudo tsadpanëdash.

¹⁰Adashic, Saudo puduedash tabadacno ëdibictsëc tabadquid Esus tantiaquid Ananias cuëmëdquid icpanëdash. Aid usho Esusën: —Chuïnu. Tantia —caquien:

—¿Atoda? Nëbi uebi, Icbo —quepanëdash Ananias.

¹¹Adoquien: —Nidtoash podqued cuembocquid caïd yacno nidtan. Ambo choash Udasën shubun puduedshun shubu dadpen icquid Tadso caïd yacnoshon tishaid Saudo cuëmëdquid Nuquin Papa chiece onquec tsadsho mimbi istuïdendac. ¹²Adec aid ushacbimboec tsadsho mibi choshon aïdi padpiden ismenuen mimbi mëdanten mamishac isoshe. Aïdi istan —capanëdash Esusën.

¹³Adoquien: —Con matses dadpenshun Saudon naid icsa chuïbansho tantiombi, Icbo. Aïdëmbi Edusaden yacnoshon mibi tantiaquido mëyamepac caoshe. ¹⁴Aïdbidi Edusaden

yacnocquido chuiquid dapanquio dada uaid sananquin nēmbotsen mibi tantiaquido bedmeshun tanemenuec aidi chopac caosh —quepanēdash Ananias Esus chiec.

¹⁵Adoaquien: —Aidi ēbi chuibeneta caidquio icmeshun ěmbi bēdamboen isaid neque. Aid dacuēdēnenquio yec nidshun istanta. Aidēn isadaidbo abi chuiquidobēdta isadaidpembo abi chuiquidobēdtabidi ēbi chuiben-chuibenec capuendac. ¹⁶Ēbi chuibenesho mibi mēyantequid iquendac, quequin Saudo tantiamembi —quepanēdash Esus.

¹⁷Adsho tantianec Ananias nidash Udasēn shubun puduedshun Saudo mamishec: —Con utsi, mibi podquedēn chosho chuiquidēn Nuquin Icbonquio, Esusēn mibi padpiden ismenuen Nuquin Papan Mayan mibi menenuembidi chomiaid nebi —quepanēdash Ananias Saudo chiec.

¹⁸Aden Ananiasēn chuinubi nuēcquid bitsibimboecquid ěshēnuēsh paēdnubi bēshuacboedēmbi, Saudon, bēdamboen ispanēdash. Aden isec capusho isun acten mentopanēdash. ¹⁹Adecbidi Saudo penquio yec padishacboedi piash padpidec uidēncuenoapanēdash.

Damasco yacnoshon Saudon Esus chiaid

²⁰Adec uidēncuenash Saudo Esus tantiaquidobēd tabadpanēdash. Ambo tabadec Nuquin Papan chiaid chuibante shubu yacno nidshun: —Esuquidistu Nuquin Papan madombo nec —quequin chuipānēdash Saudon. ²¹Aden chuisho tantiaish tantiadempambo yec tabadec: —¿Edusaden yacnoshon Esus tantiaquido mēyameboedida nec? ¿Adecbidi nēmbo choshon tanemeshun isadaidbo Edusaden yacnocquido chuiquid dapabo yacno buamenuc choabida ictic? —quepanēdash Damasco yacnocquido.

²²Aden anocquidon tantianubi Nuquin Papan Mayanēn oncamiac Pabadon, Nuquin Papan Chomiaidquio Esuquidistu nec, quequin isadaidbo tantiamenuen Nuquin Papan chiampid Saudon comapenen chuided-chuidedpanēdash.

Isadaidbo Esus tantiesa abi cuesunete bunsho isash Saudo cuenaiaid

²³Adembidi yuec ushquin Saudon ěnenquiocquin chuibansho tantiaish, Icsamboen chiec, quiash isadaidbo utsibo yec abi cuesunete bunsho isun tantiaquidēn chuisho Saudon tantiaapanēdash. ²⁴Adnubien Saudo cuesunenuen shubu dadpen icquid abichobi tsicatequin daquēnē uaidēn shēcuē cuēmanoshon abi chieshēnquidon caimpanēdash Saudo puduensho bednu quequin. ²⁵Aden cainsho isun Saudo cuesunenushē qeshun chiac inchēshēmbi onquenquiocquin tsitsan dapan Saudo antsaduntanquin tsicataiaid quēnē cachoc Saudo budmepanēdash.

²⁶Budanec Saudo Edusaden yacno nidoash Esus tantiaquidobēd tabadnesho isash, Saudon mua uaquin ēbi bednushe quiash dacuēdcuededpanēdash aido.

²⁷Adnubien, Saudobēd Esus tantiaquid utsitedi yacno choshon Bednaben yuedpanēdash. Aden yuedshun: —Saudon Damasco yacno nidquin Nuquin Icho ispac caosh. Nuquin Icho Saudobēd onquepac caosh. Adanec Damasco yacno choshon dacuēdenquiocquin Esus chuibampac caosh, quequin Saudon naid Bednaben chuibampanēdash. ²⁸Aden Bednaben chuibanac Esus tantiaquido Saudo dacuēdenquiocnobi aidobēdi capuquin Saudon anoshombidi Esus chuibanoapanēdash. ²⁹Ambo capuquin

isadaidbo quidiecon onqueten onquequido istuidshun Saudon adembidi Esus chuibanacsho tantiashun aid cuesunenuequin aidontsen cainoapanēdash. ³⁰Aden Saudo cuesunenuen, cainec qesho tantiashun Sesadeya caid yacnoshon Esus tantiaquidon Saudo buanshun abi tishondacno Tadso caid yacno Saudouidtsēqui nidmepanēdash.

³¹Adashic Saudo nidmian cuesunenushe quenquo yec Esus tantiaquido nidaid Udeya caid yacnocquido yec nidaid Cadidia caid yacnocquido yec nidaid Samadia caid yacnocquido yec quec dacuēdenquo yec tabadpanēdash. Adec tabadquin, Nuquin Papan chiaid tantiabenu, qesho Nuquin Papan Mayanēn adomboembidi tantiamiac bēdamboec tabadpanēdash. Adec tabadquin Esus chuisho tantiesa icboedi Esus tantiaquid dadpenquo yampanēdash.

Petodon Ananias Dodcastsen bēdamiaid

³²Adnubien, utsi-utsien isbidanec nidequi Dida caid yacnotsen Esus tantiaquid utsibo isec Petedo nidoapanēdash. ³³Ambo choshon dada, Eneyas cuēmēdquid, seta dadpen 8ted matamec canite tsasiaid Petedon istuidshun: ³⁴—Esusēn mibi bēdamiaque. Nidtoashon min uete buanun nacnenta, Eneyas —Petedon cac Eneyas badedquo nidtoash capupanēdash. ³⁵Eneyas capusho isash Dida yacnocquidobēdi nidaid Sadon caid yacnocquido Esus tantiaquid yampanēdash.

³⁶Adnubien Dida uditsēc shubu dadpen icquid Ope caid yacnocquid, Esus tantiaquid utsi, chido, Tabita cuēnshumbi quidiecon onqueten Dodcas cain cuēnaid tabadpanēdash. Aidi bēdamboequid icquin

badiadquidēn-badiadquidēnquien pete nibēdquido menedenepanēdash. Adembidi aton na nibēdquido Dodcasēn menedenepanēdash. ³⁷Aidi Petedo Dida yacno icnubi icsabudec unēsō isun abēd icquidon dapanshun shubu abuc quēnē icquidēn nampanēdash. ³⁸Aden nanshun, Petedo Dida yacno tabadec, qesho tantiashun aid chomenuequin dada daēd Petedo tabadacno nidmiac aid daēdi Petedo tabadacno choshon Dodcas unēsboed chuishun: —Nidtuidenquo yec badedquo ēbēdi cho —cac ³⁹abēdi badedquo Ope yacno Petedo nidpanēdash. Adec nidec Ope yacno chosho isun abuc quēnē icquidēn puduedmepanēdash. Ambo puduedsho isun shubiquimbi niantebon Dodcasēn tuscaboed dashcute dadpen Petedo ismepanēdash.

⁴⁰Adosho isun abitedi puduemias danēshēn sebudash Nuquin Papa chiec onquetanec nidtoashon unēsboed isquin: —Nidto, Dodcas —Petedon cac uincuenequi Petedo isec Dodcas badedi uēsēdtopanēdash. ⁴¹Uēsēdtoasho isun mēdinquin nidtomeshun niantebobēdta Esus tantiaquid utsibo cuēnquin cho-chomeshun uincuenboed ismepanēdash. ⁴²Aden Dodcas ismesho isash aton shubuno nidanequin Dodcas uincuenaid chiac Ope yacnocquido dadpen Esus tantiaquid yampanēdash. ⁴³Adnubien Petedo Ope yacnocquid nidaidēn capuquid bitsi uashun chodcashun nacnenquid Simombēd yuec Petedo tabadpanēdash.

Petedo Codnedion chomiaid

10 ¹Adnubien shubu dadpen icquid Sesadeya caid yacno Codnedio cuēmēdquid isadaidpembo nidaid Itadia caid yacnoēs Sesadeya caid yacno choash tabadpanēdash. Aidi sondado dadpen 100tedi chuiquid icpanēdash.

²Aidi aton shubun icquidobëdi Nuquin Papa tantiaquid icquin isadaidbo aton na nibëdquid icsho isun menebanquid icpanëdash. Adecbidi Nuquin Papa chiec onquianedenepanëdash. ³Adquid yec ushë budtsambi tedes yanuc Nuquin Papa chiec onquequimbi ushacimboecquin Nuquin Papan uaid mayan bëda Codnedion ispanëdash. Nuquin Papan uaid mayan bëda choshon: —Codnedio —capanëdash.

⁴Adsho tantiash dacuëdquin comapenen isec: —¿Atotsibi name, Icbo? —quepanëdash Codnedio.

Adoquien: —Abi chiec mibi onquedenesho Nuquin Papan tantiec. Adembidi aton na nibëdquid tantiaquin menedenequid mibi icsho Nuquin Papan bëdamboen isaid mibi neque. Chuinu. Tantiata. ⁵Nëbi Simon cuënshumbic Petedo cuënoaid ma bednu mimbi namiaido Ope yacno nidmetan. ⁶Simon utsi nidaidën capuquid bitsi uashun chodcashun nacnenquidbëd tabadec. Aidën shubu acte cuëmambi iquec —quepanëdash Nuquin Papan uaid mayan bëda Codnedio chiec.

⁷Aden chianec Nuquin Papan uaid mayan bëda nidambi Codnedion aton yua daëdbëdta sondado abentsëc chomeshun ⁸Nuquin Papan uaid mayan bëdan chuibocpaden Petedo bedmenuen ambi namiaido Codnedion nidmepanëdash.

Petedon ushacimboec tsadquin isaid

⁹Adashic, ushë cuemboenoc Ope anoentsëqui Codnedion nidmiaido chonobi Petedo Nuquin Papa chiec onquenuc shubu macano pada-padapambocquid yacno dectatopanëdash. ¹⁰Adec dectatoash shubu icbon codocanubi Petedo bundoec ushacimboec tsadquimbic ¹¹abu posonianec abi yacmi dabidiete

dapabiecquid bucun dënëshbudcuenaid budsho Petedon ispanëdash.

¹²Aidënquio ambi petequid ambi petemaid chedo nidaidën capuquid tacbidën capuquidbëd podochoquid chedo antabëdpanëdash. ¹³Adnubien: —Nidtoschon cuesuneshun pe, Petedo —capanëdash abucuësh onquequin.

¹⁴Adoquien: —¿Abida cai? Èmbi petemaid tauishun mibi shëdmetemaidquio antabëdquid nec. Adquid piamboccombi, Icbo —quepanëdash Petedo.

¹⁵Adoquien padpidec abucuësh onquec: —Nuquin Papan bëdambo icmiaid icsambo iquec cainda —quepanëdash. ¹⁶Adotanquimbic antabëdquid abuc buanshun adomboembidi abentsëc chotsëcnuc budmequin adembidi Petedo chuishun abuc shëcuë uaid yacno badedquio buanshun puduedmeopanëdash.

¹⁷Adosho isash Petedo ambi isboed tantiec tsadnubi Codnedion chomiaido Simonën shubu istuidash shëcuë cuëmamo choec nidtuidpanëdash. ¹⁸Choec nidtuidash: —¿Nëmboda Simon Petedo tabadec? —quetuidpanëdash.

¹⁹Aden chuituidnubi ambi isboed tantiec Petedo tsadsho Nuquin Papan Mayanën: —Dada abentsëc chotsec choshon mibi nibëne. ²⁰Èmbi chomiaido neque. Budash cacuidenquio yec aidoëdi nidtan —capanëdash.

²¹Aden chiac budshun Codnedion chomiaido isash: —Mimbi nibënaid nebi. ¿Atotsi quec cho? —quepanëdash Petedo.

²²Adoquien: —Codnedio cuëmëdquidën chomiaid nebi. Aidi sondado dadpen chuiquid bëdambocquidquio nec. Adquid icquin Nuquin Papan chiacpaden nabansho isun isadaidbon bëdamboen isaidquio nec. Aidi Nuquin Papan chomiaid

mayan bēdan naden chuipac caosh.
 “Simon cuēnshumbic Petedo cuēnoaid
 bedmetan. Bēac chuibansho tantiata,”
 quequin Nuquin Papan uaid mayan
 bēdan ēbi chuiposh quequin Codnedion
 ēbitedi chuioaposh —quepanēdash
 Codnedion chomiaido Petedo chiec.

²³Adoquien: —Pudued
 —quepanēdash Petedo.

Adashic badiadane Codnedion
 chomiaidobēd Petedo nidsho isash
 Esuquidistu tantiaquid Ope yacnocquid
 utsin-utsinquien tsibanampanēdash.

²⁴Adec nidanec Sesadeya caid yacno
 chopanēdash. Adnubien, Nēid ushēmbien
 chochitec, quequin tantiashun Codnedion
 aton shubun icquido abi isedquid chedo
 Petedon chuibansho tantiamenuen aton
 shubu nuntan iccuededmepanēdash.

²⁵Aden iccuededmiac tabadnubi
 utsibobēd choec Petedo chedo puduedsho
 isash, Mibi bēdambocquid icnubi adesa
 nebi, quequin Petedo ismec danēshēn
 sebudec shuebudash Petedo bēisenquo
 yec Codnedio uepanēdash.

²⁶Adec uesho isash Petedo:
 —Mibipadquid nebique. Nidgota
 —quepanēdash Codnedio caic.

²⁷Adtanec Codnediobēd onquetanec
 quēnē utsin puduedshun isadaidpembo
 dadpen Petedon istuidpanēdash. ²⁸Aden
 aido isec: —Isadaidbo nebi. Adquid yec
 isadaidpembobēd capuesa neyobi.
 Adecbidi min shubun puduedesa neyobi.
 Adesa icboedi Nuquin Papan, Matses
 utsibo ēmbi bēdamboen isaid icsambo
 iquec cainda, quequin ismequin ēbi
 tantiamiac ²⁹mimbi ēbi bedmiaido
 choacsho isash, Mibēd capuesa nebi,
 quenquo yec chobi. Adecbidi nēmbō
 choash isadaidpembon shubu nec.
 Nēmbō puduedtiapimbo iquebi,
 quenquo yec puduedobi. Nēbi Tantianu.
 Chui. ¿Atotsieshun ēbi chomio?
 —quepanēdash Petedo Codnedio chiec.

³⁰Adoquien Codnedio: —Abentsēc
 choec ushanec ushē budec tedes yanubi
 Nuquin Papa tantiec buna mēmunc con
 shubu nuntanuēsh Nuquin Papa chiec
 onquec tsadobi. Adnubien dashcute
 shocosh bed-bedquiacimboec
 dasiuidquid ēbi yacmi Nuquin Papan
 budmiac onquec: ³¹“Codnedio, mibi
 Nuquin Papa chiec onquesho Nuquin
 Papan tantiec. Adembidi aton na
 nibēdquido mimbi menebansho aidēmbi
 bēpiscudenquo icquin tantiec. ³²Nuquin
 Papa bēdamboen tantianuen Simon
 cashumbic Petedo caid Ope
 yacnocquidbēd tabadquid ma chono
 queshun mimbi namiaido nidmeta. Aidi
 Simon cuēmēdquid utsi nidaidēn
 capuquid bitsi uashun chodcashun
 nacnenquidbēd tabadec. Aidēn shubu acte
 cuēmambi iquec,” quec Nuquin Papan
 uaid mayan bēda onqueposh. ³³Aden
 chiac: “Petedo bedtan,” quequin ēmbi
 namiaido nidmiombi. Adoac
 bēdambocquid yec cacuidanenquo yec
 badedquo mibi choc. Adec mibi choacsho
 isash bēdambo iquebi. Nuquin Papan
 nuqui isnubi ambi mibi tantiamiacpaden
 chuibansho tantiec tabadnuna
 —quepanēdash Codnedio Petedo chiec.

Codnedion shubu nuntanshun Petedon chuibanaid

³⁴Aden Codnedion chuiban cac
 Petedon naden chuipanēdash: —Matses
 utsi nec, quenquiocquin Nuquin Papan
 yuedaid matses utsi-utsiec nec, quequin
 nēbi abimbo tantiembi. ³⁵Nuquin Papan
 chiaid tantiashun matses
 utsin-utsinquien chieshēnenquiocquin
 bēdamboen nabansho isun, Aidedi
 Nuquin Papan abi yacno yuedendac,
 quequin tantiembi. ³⁶Ēndenquimboshē
 Nuquin Papan dada uamequin con
 tsusedpabo isadaidbon tishmiaido
 caidaido naden chuipampic: Esuquidistu

abentsëqui matsestedi chuiquid icnubi utsibëd bëdamboec tabadendac. ³⁷Nidaid Cadidia yacnoshon Uan padon chuiبانquin acten mentoquien Esuquidistun ambi naid tauapondash. Mibitedishun aid tantiondac. ³⁸Ma abëd tabadnueshun Nuquin Papan aton Mayan meniac nadatiambocquin Esuquidistun nabampondash. Adquid icquin Esuquidistu shubu dadpen icquid Nasaded yacnoshon tishaid yec capuquin bëdamboen nabanquin abi chieshënuquidën Satanas caidën mëyanaido Esuquidistun bëdamebampondash. Adosho mibitedishun isbampondac. ³⁹Isadaidbon nidaid, Udeya caid yacnoshon shubu dadpen icquid Edusaden yacnoshombidi Esuquidistun nabansho ispondambi. Aidi cuestasn dectanquin isadaidbon unës uaqi ⁴⁰uincuenash, Uincuenobi, quequin Esuquidistun ismebempondashi. ⁴¹Aidi uincuenashun matsestedi ismenquiocquin aidbëdtan peshun acquidotedictisëqui Esuquidistun ismepondashi. ⁴²Abëdi icshobi, Ëbi chuiبانquin matses icsaid cuidte chuibante ushë choec quequin chui, cac nebi. ⁴³Adembidi Nuquin Papan chuiبانacpadomboen dada uampidon Esuquidistu tantiaquin, Nuquin Papan chomiaid Quidistu nec, quequin chuiquin dada uampic. Aden chuiquin dada uampid abimbo tantiaquid icquin abi icsaid ënsho isash abi icsaid Nuquin Papa bëpiscudendac. Esuquidistu chuiquin aden dada uampic —quepanëdash Petedo Codnedion shubun iccuededquido tantiamequin chiec.

**Isadaidpembo Nuquin Papan
aton Mayan meniac**

⁴⁴Aden Petedon chuibanshobi abitedi tantiaquid icsho isun Nuquin Papan ma

abëd tabadnueshun aton Mayan menepanëdash. ^{45,46}Aden meniac isadaidpembo nëbi Esuquidistu tantiaquido yanshun abi onquiacmaidënuquo utsin onqueten onquequin Nuquin Papa chiec cuëdëmpañëdash. Adsho tantias Petedobëd cho-choboedo isadaidbo aton tsusedpabon nacpaden shui dëbid dëtemequido: —iPadtec! Tantiadempanboctequid nec.

Isadaidpembotsen Nuquin Papan aton Mayan meniac —quepanëdash isadaidbo Petedobëd cho-choboedo.

⁴⁷Adoquien: —Nuquin Papan aton Mayan meniaido icquin Esuquidistu tantiaquido neque. ¿Adquid icsho acten mentoenda ictic? ⁴⁸Aid, acten mentometa —capanëdash Petedon.

Aden acten mentoquien: —Nuquibi tabadnuna —cac Petedobëd cho-choboedo acten mentoaidobëd daëdpactsëc ushec tabadpanëdash.

Isadaidbo Petedon ambi naid chiaid

11 ¹Adnubien utsibo Sesadeya caid yacnoësh puduanec nidequi nidaid Udeya caid yacno choshon, Sesadeya caid yacnocquidon isadaidpembon Nuquin Papan chiaid bëdamboen tantias Esuquidistu tantiaquido yanosh, quequin chuiبانëdash. Anoshon chuibëtsenec Edusaden yacnotsen choshon adomboembidi chuiopanëdash. ²Aden chuisho anocquidon Esuquidistu tantiaquid utsibon tantias tsusedpabon chiacpadomboen shui dëbid dëtemequido yec Petedo nëmbo choacsho isun, Aidi ambi nabanaid chuimenu, quequin caimpañëdash. Aden cainubic Petedo choacsho isash ³comapenec onquecuedec: —Isadaidpembo shui dëbid dëtemesabo icnuc aton shubun puduedtemiaidquido

nec, quequin tsusedpabon chiaid niaquec aidon shubun puduedshun mimbi pepac caoc. ¿Midapaden tantiec puduedshun mimbi piaye? Chui. Tantianu —quepanédash Edusaden yacno tabadquido.

⁴Adoaquien Petedon nadopanédash: —Aidobéd ébi tabadboed chuibanu. Tantiata. ⁵Ope yacnoësh Nuquin Papa chiec onquequin ushacimboen naden ispombi. Abuc posonianec ébi yacmi dabidiete dapabiequid dënëshbudcuenaid budposh. ⁶Aidênquiu nidaidên capuquid tacbidên capuquidbéd podochoquid chedo antabédsho ispombi. Aidên antabédquid nuqui petequidbéd nuqui petemaid icposh. ⁷Adquid icsho isnubi: ‘Nidtoshon cuesuneshun pe,’ caposhi. ⁸Adsho tantiashun: ‘Aidtedi ëmbi petemaid tauiquin mibi shëdmetemaidquio nec. Adquid pesambo nebi, Ico,’ capombi. ⁹Adoaquien abucuësh padpidec onquequin: ‘Nuquin Papan bédambo icmiaid icsambo iquec cainda,’ caposhi. ¹⁰Adomboembidi abentséc chotsécnuc tabëcaido abuc buanshun padpiden budmeshun adembidi chuishun buanshun abitedi abuc puduedmeoaposh. ¹¹Abuc buanoabombic dada abentséc chotsec Sesadeya caid yacnoësh choquido shubu shëcuë cuëmano nidtuidash nidpac caosh. ¹²Aidtedi icnubi Nuquin Papan Mayan: ‘Aidobédi cacuidenquio yec nidtan,’ qesho tantiash aidobédi nidpobi. Aidobéd Ope yacnoquido dada 6ted Esuquidistu tantiaquido puduanec nidec Codnedion shubun ëbédi puduedposh. ¹³Puduedacsho isash Codnedio: ‘Nuquin Papan chomiaidên ambi uaid mayan bédan naden chuiposhi: Simon cuëshumbic Petedo caid Ope yacno tabadeque. Aid

bedmenuen mimbi namiaido nidmeta. ¹⁴Aidëmbi mibéd icquidtedi Nuquin Papa yacno puduedmianquid chuibanendac, quequin Nuquin Papan uaid mayan bédan chuiposhi,’ quequin Codnedion chuioaposhi.

¹⁵“Adoac Esuquidistu chiombi. Aden chuinubi aton Mayan ëbitedi Nuquin Papan meniacpadembi aidotsen meneoaposh. ¹⁶Aden meniacsho isun Nuquin Ico Esuquidistu chiondaid ëmbembi tantiatsécquiec tsadpobi. Nad icpondash: Uan padon acten mentopondashi. Nuquin Papan ambi aton Mayan meniaid mibi iquendac, quequin chuipondash Nuquin Ico Esuquidistun. ¹⁷¿Aden isadaidpembotsen Esuquidistu tantiaquid yansho Nuquin Papan aton Mayan aidotsen menesho, Padi. Menenda, caindambi icti? —quepanédash Petedo shui dëbid dëtemequid utsibo chiec.

¹⁸Aden Petedon nainquin chuibanac tantiadempambo yec tabadec isadaidbo shui dëbid dëtemequido: —Isadaidpembo abi icsaid ënsho isun Nuquin Papan aidotsen abéd icquid icmeoapac —quepanédash Nuquin Papan naid chiec.

Antioquiya yacnoshomba Esus tantiaquido iccuededaid

¹⁹Esteban cuënoten seshuniash: “Esuquidistu tantiaquido cuesunenu,” qesho tantiash ëbitsen cuesunenushe quianec Edusaden caid yacnoësh Esuquidistu tantiaquid utsi-utsiec nidanepanédash. Nidequi nidaid Penisia caid yacno choash utsi-utiec tabadnubi utsi-utsiec acte nënantanquio nidaid nacdédquid Chipide caid yacno choash tabadnubi utsi-utsiec shubu dadpen icquid Antioquiya caid yacno choash utsi-utsiec tabadquin aton matses

isadaidboudi Esuquidistu chuibampanëdash. ²⁰Adshumbic, utsibo Chipide caid yacnoësh Antioquiya yacno cho-choquidobëdtan nidaid Sidene yacnoësh Antioquiya yacno cho-choquidon isadaidpembo Esuquidistu tantiamenuen chuibampanëdash. ²¹Aden chuibanu, qesho Nuquin Papan bëdamboen tantiamiac aidon chuibanaid tantiasahun isadaidpembon: Èbi icsaid ënu, quequin ënash Esuquidistu tantiaquid dadpen yampanëdash.

²²Adec isadaidpembo Esuquidistu tantiaquid dadpen yanosh, qesho tantiasahun Esuquidistu tantiaquid utsibon Edusaden yacnocquidon Antioquiya yacno Bednabe nidmepanëdash. ²³Aidi Edusaden yacnoësh puduanec nidequi Antioquiya yacno choshon anocquido Esuquidistu tantiaquido Nuquin Papan bëdambo icmiaid icsho isash: —Cuishon. Bëdambo iquec. Adembi tantiaquin chieshenquiocquin Esuquidistu tantiaata —quepanëdash Bednabe. ²⁴Bednabe bëdambocquid icsho Nuquin Papan aton Mayan meniac Esuquidistu bëdamboen tantiaquidquio icquin Esuquidistu chuibanac Esuquidistu tantiaquid utsi-utsiec dadpen yampanëdash.

²⁵Adashic Antioquiya yacnoësh puduanec Saudo bednuec nidequi shubu dadpen icquid Tadso caid yacno choshon ²⁶Saudo istuidash Antioquiya yacno aidbëdi Bednabe choapanëdash. Ambo choash seta abentsëc matamec anocquid Esuquidistu tantiaquidobëd iccuededquin Esuquidistu chuibanquin aid daëdshun tantiamepanëdash. Aden chuiban-chuibanac Esuquidistu tantiaquid dadpen yansho isun, Quidistubo nec, quequin Antioquiya yacnoshomba Esuquidistu tantiesabon Esuquidistu tantiaquido cuëmpanëdash.

²⁷Bednabebëd Saudo Antioquiya yacno tabadnubien Edusaden yacnoësh Antioquiya yacno Nuquin Papan yuecquio icshun nanun chiaid chuiquido cho-chopanëdash.

²⁸Cho-choshon abentsëqui Accabo cuëmëdquid Nuquin Papan Mayanën oncamiac: —Yuec-yuecpectsëc yash nidaidtedi yacnocquidon pete nibëdendac —quepanëdash. Aden chiambic shubu dadpenquioshë icquid Doma yacnocquido ancaquid Quëdaudio cuëmëdquid icnubi pete nibëdquiec yampanëdash. ²⁹Adnubic, Udeya yacnocquidon pete nibëdec, qesho tantiasahun Esuquidistu tantiaquidon Antioquiya yacnocquidon aton piucquid adquido menenuen ambi dayun uaidtedi Edusaden yacno buamepanëdash.

³⁰Esuquidistu tantiaquido Edusaden yacnocquido chuiquido nëid piucquid menetanta ma pete bunquido menenueshun, quequin ambi dayun uaidtedi Bednabebëdta Saudo menequin Edusaden yacno buamepanëdash Antioquiya yacno tabadquin Esus tantiaquidon.

Acobo cuesuniaiðbëdta Petedo quënën nauedaid Nuquin Papan puduemaið

12 ¹Adnubien Edusaden caid yacno tabadquid domanobo ancaquid Edodes cuëmëdquidëmbi Esuquidistu tantiec iccuededquido utsi-utsien comapenen mëyanuequin bedmeshun quënën nauedmepanëdash. ²Aido quënën nauedmeshun Esuquidistun ëbi chuibeneta caid abëd capucueñoed Acobo cuëmëdquid chështen cuesunemepanëdash. Acobon utsimbo Esuquidistun ëbi chuibeneta caid abëd capucueñoed utsi Uan nepanëdash. ³Adoac, Acobo cuesuniosh, qesho tantiasahun isadaidbo utsibo, Esuquidistu tantiesabo: —Bëdamboen Edodesën

naosh —quepanēdash aido. Adec onquesho tantiash Edodes: Isadaidbon pan bidisquesa tantiaid ushë choec, quequin Esuquidistun ëbi chuibeneta caid utsi, Petedo cuēmēdquid, bedmeshun quēnēn nauedmepanēdash. ⁴Aden quēnēn nauedmeshun Petedo cuenushe qeshun sondado 4ted quēnē nuntan tabadmeshun pan nami uambocquid petequid tantiaid ushētedi naimēdambi ambi naid icsa Petedo chuimenuequin Edodesēn caimpanēdash. Adnubien quēnē nuntanshun Petedobēdta mētaniaid sondado daēd uenubi utsi daēdshun shēcuē ēctabēdquid Petedo isec tabadpanēdash. Aid isquidotedi badiadnuc puduedshun isanec ushē abuctotsan nidnubi utsibotsen 4tedbidi choshon isanec ushē cuembocnoc nidoanubi utsibotsen 4tedbidi choshon isanec ushē budtsan nidnubi utsibotsen 4tedbidi choshon isanec inchēshtsēcunubi badiadnuc isobedo choapanēdash. Adecbidi isobedo utsibo inchēshēmbi padpiden isec choapanēdash. ⁵Adnubien Esuquidistu tantiaquido iccuededash Nuquin Papa Petedo quēnēn nauedaid chiec yuec onquepanēdash.

⁶Adshumbic, Badiadshun Petedo bēmēmbi, quequin Edodesēn tantianubi aid inchēshēmbi Petedo bucin mētaniacchobi ushnubi ⁷Nuquin Icbon chomiaid, ambi uaid mayan bēda, nibēdquiochoedi Petedon dayun choan quēnē nuntan comapenec chēnquepanēdash. Aidēn Petedon dayun choshon shictodo macuesquin: —Baded nidto —cac nidtonobi seccuduquēc shocosh bucu mētaniaid mēchiquidpanēdash. ⁸Adtanquimbien Nuquin Papan uaid mayan bēdan: —Chinēshēdtanec tapucudta —cac Petedo chinēshēdtanec tapucudpanēdash.

Adsho isash: —Min dashcute bēntsecquid dasiuidshun ëbi tsiban —quianec nidsho ⁹Nuquin Papan uaid mayan bēda nidsho isacimbocquid abimbo tantienquioquid Petedon tsibanampanēdash. ¹⁰Adec nidquimbi sondado abēdta mētaniaidēn tantienquio icnubi datanshun shēcuē isquid daēdshumbidi tantienquio icnubi aidotsen datanoashumbic umanuc puduenenubi shocosh shēcuē abēmbi shēcniadpanēdash. Adsho isash puduenash podqued abentsēcquidēn nidquimbic Nuquin Papan uaid mayan bēda abēd icboedi badedquio nidquin Petedo niampānēdash. ¹¹Abēd icboed nibēdnubien Petedo padpiden tantiaquiec: —Edodesbēd isadaidbo, Esuquidistu tantiesabo, ëbi cuesunete bunsho isun Nuquin Papan ëbi puduemenuen ambi uaid mayan bēda chomiosh. Abimbo iccosh —quianec Petedo nidpanēdash. ¹²Adec nidequi Nuquin Papan abi puduemeboed tantiequi Uan cashumbic Madcos caidēn titan shubu yacno Petedo chopanēdash. Aidēn tita Madia cuēmēdquid icpanēdash. Ambobi Esuquidistu tantiaquid dadpen iccuededec Nuquin Papa chiec onquepanēdash. ¹³Adnubien choshon Petedon shēcuē tosh-toshcasha tantiash chido yua Doda cuēmēdquid isnuec nidtopanēdash. ¹⁴Aid shubu shēcuē yacno choshon Petedon cuēnscho tantiash bēdamboshē iquequi shēcnenquio yec aucbidi titinquec: —Petedo shēcuē yacno choash nidec —quequin iccuededquido chuituidpanēdash.

¹⁵Adsho Nuquin Papa chiec iccuededquidon abimbo tantienquioquid: —Muequi mibi nec. Aidida ispash neba —quepanēdash iccuededquido.

Adoaquien: —Ma aidquiobi neboc. ¿Utsida neque? Mimbimbo mua quenun istan.

Caquien: —Petedo dayun uaquin isquid, Nuquin Papan uaid mayan bēda ischitashien nec —quepanēdash tantiesā.

¹⁶Adnubi padpiden Petedon tosh-toshcāsho shēcnequin isash: —iTso! Abimbo caic —quecuededpanēdash.

¹⁷Adnubien mēdante uic-uiccaic Petedo: —Onquenquio yec tabadquin tantiata. Ēbi nashunquin Nuquin Icbon naboed chuibanu —quepanēdash Petedo abi quēnēn nauedacnoshon Nuquin Papan puduemaiid chuibanec. Aden chiash: —Ēbi puduemaiid Esuquidistun utsi, Acobobēdta Esus tantiaquid utsibo chuitanta —quianec puduenanec utsi yacno Petedo nidpanēdash.

¹⁸Adashic, badiadnubi quēnē nuntan Petedobēd icboed sondadotedi: —¿Mitsimbo nuquibēdta mētaneboed icpec? Nibēdeque. Is —quec dacuēdpanēdash.

Adashic, Petedo nibēdec, quequin sondadon chiac ¹⁹Edodesēn: —Nibēntan —cac nidshun sondadon istuidenquiocsho isun quēnē nuntanshun Petedo isquido ambi quēnēn tabadquin nabamboed chuimeshumbi aidotedi Edodesēn cuesunemepanēdash.

Edodes unēsaid

Adashic, Edodes nidaid Udeya caid yacno abi tabadacnoēsh puduanec shubu dadpen icquid Sesadeya caid yacno choash tabadpanēdash. ²⁰Sesadeya caid yacno anoentsēcbidi shubu dadpen icquid Tido caid icnubi aid yacnoēsh anoentsēqui shubu dadpen icquid utsi Sidon caid icpanēdash. Tido caid yacnocquidbēd Sidon caid yacnocquido Edodesbēd chushcananquido icboedi padenquio yanec tabadpanēdash. Adec

chushcananenquio yec tabadquin, Sesadeya yacno Edodes choash tabadosh, qesho tantiash Edodesēn yua Bēdasto cuēmēdquidbēd onquenuec cho-chopanēdash. Cho-choshon, Ēmbi pete nibēdsho isun Edodesēn menioshi. Nēbi aid chushcainquio iquembi, quiosh, quequin cho-choquidon chuituidpanēdash. Aden chiac adomboembidi Bēdaston Edodes chuiopanēdash. ²¹Aden adomboembidi Bēdaston chuioshasho tantiashun Edodesēn: —Ēmbi chiacpadēn cho-choata, quiosh Edodes, quequin chuita —cac cho-choquido Bēdaston chuiopanēdash. Aden chiac Edodes onqesho tantianuec ambi chiacdedec ushāsh dashcute nac-nacquiocquid dasiuidash abembi onquenuec tsadten abuc tsadtoash onquec tāēpanēdash.

²²Aid onqesho tantiash: —Nidaidēnshun tishaid onquiaidpenquio nec. Abuc tabadquid nuquin papa caidien Edodes nechitec —quec iccuededquido comapenec cuēdcuededpanēdash. ²³Aden chuisho tantiash, Mimbi Nuquin Papa caidpenquio nebique. Aidi abia yampid abentsēcquiobi iqueque. Aiduidi tantiata, quequin chuitiadquidēmbi chienquio icsho tantiashun Nuquin Papan chomaiidēn ambi uaid mayan bēdan daicsa uac chichan dadpen yanec Edodes badedi unēsapanēdash.

²⁴Adnubien Esuquidistu tantiaquidon ambi tantiaid Esus chuiban-chuibanac Esus tantiaquid utsi-utsiec dadpen yampanēdash.

²⁵Adnubic Antioquiya yacnocquidon Esuquidistu tantiaquidon aton piucquid ambi menuen dayun uaid Bednabebēdta Saudo meniac buanec Edusaden yacno choshon anocquido Esuquidistu tantiaquido menetanashic auēshquio puduanec Antioquiya yacno

nidoapanēdash. Aidobēdi Uan cashumbic Madcos caid nidpanēdash.

Saudobēdtabi Bednabe nidmiaid

13 ¹Adashic, Esuquidistu tantiaquid utsi-utsiec Nuquin Papan yuecquio icshun nanun chiaid chuiquido Antioquiya caid yacno tabadnubi Esuquidistu tantiamenuen chuibanquido tabadoapanēdash. Nēidic, Bednabe; utsibic, Simon, Dada Chēshē caid; utsibic, Sidene yacnoēsh choquid, Dusio cuēmēdquid; utsibic, Cadidia yacnoēsh choquid, tsusio dapa, Edodesēn shubun icquid icboedi, Manain cuēmēdquid; utsibic, Saudo cuēmēdquid. ²Aidtedishun Esuquidistuidi tantianuen buna mēmunsho Nuquin Papan Mayanēn: —Saudobēdtan Bednaben aid daēdshun ěmbi chuibocpaden ma napanuna —capanēdash. ³Adoquien, buna mēmunquin nainash Nuquin Papa chieconqueshun abēd icquid utsibon mēdanten Saudo Bednabebēdta mamishquin nadopanēdash: —Nidaid utsi-utsiec yacno nidshun Nuquin Papan chiacpaden Esuquidistu chuibenetan —capanēdash abēd icquidon.

Chipide yacnoshon Esuquidistu chuibanaid

^{4,5}Esus tantiaquidon mamishquin chiaquien Nuquin Papan Mayanēn nidmiac Saudobēd Bednabe Antioquiya yacnoēsh puduanec nidpanēdash. Aid daēd nidsho isash Uan cashumbic Madcos cain cuēnaid nidpanēdash dada uate buanshunec. Aidtedi nidanec acte cuēman shubu dadpen icquid Sedusia caid yacno choash cano antabēdtoanec acte nēnantanquio nidaid nacdēdquid Chipide caid yacno nidtampanēdash. Chipide yacno choash nidequi shubu dadpen icquid Sadamina caid yacno

choapanēdash. Adec choash tabadec aton matses isadaidbo iccuededacno choash puduedshun Nuquin Papan chiaid dada uamiampid Saudon Bednabebēdtan chuibampanēdash. ⁶Adoshombic, Sadamina yacnoēsh nidquin chuibidanec Chipide cuēma utsiuc shubu dadpen icquid Pabos caid yacnotsen choash tabadoapanēdash. Ambo tabadquin isadaidbo Badesus istuidpanēdash Pabadobēd icquidon. Satanasēn tantiamiaid icquin abimbo chiacbimboec, Nuquin Papan yuecquio icshun nanun chiaid chuiquidquio nebi, quequin muaquin chuipanēdash Badesusēn. ⁷Aidi Pabos yacnocquido tsusion shubun tabadpanēdash. Anocquido tsusio cobednadod caid Sedquio Paudo cuēmēdquid icpanēdash. Aidi tantiaquiono, quec tabadquin, Isedquido chosh, qesho tantias, Aidon chuibanaid tantianu, qeshun Saudobēdta Bednabe chomeshun tsusion yuedpanēdash. ⁸Yuedac Pabodon Esuquidistu chuibampanēdash. Saudo quequin isadaidbon cuēnubi Pabado quequin isadaidpembon cuēmpañdash. Aden Pabodon Esuquidistu chuibansho tantiec tsusio tsadsho isun Badesusēn tantiamenquiocnuen utsi uain chuioapanēdash. Ambi ompoaid ismianesa Badesus icsho Edimus cuēmpañdash. ⁹Aden utsi uain chuisho tantiasshun Nuquin Papan Mayanēn tantiamiac Edimus bēisequi Pabado: ¹⁰—Satanasēn bacuē yec bēdamboen naidbēdta bēdamboen chiaid tantiesa mibi nec. Nuquin Papan namiaid nebi, quequin ompoaid ismenquiocquimbi Nuquin Papan chiaid utsi uaqin muaquin mimbi adenuidi chuibaneque. Tantia. ¹¹Nēbi con Icbon mibi mēyanquin bēshu uaindac. Ushē chēnquesho mimbi yuen isenquio iquendac —quepanēdash Pabado Edimus chiech.

Aden chuibon Edimusën èshë
cuen-cuempambo yec
inchëshbudac bimboec yanash:
—čTsuntsimbini mëdinhun buampeba?
—quequin nibëdacno mishquin
uëmbampanëdash. ¹²Aden Edimus
bëshu uacsho isec: —Nuquin Icbon
chiaid abimbo iquec —quiash tsusio
Sedquio Paudo cuëmëdquid Esuquidistu
tantiaquid yampanëdash.

**Nidaid utsi, Pisidia caidën shubu dadpen
icquid Antioquiya caid utsi yacno
Bednabe Pabadobëdi choash tabadoaid**

¹³Adashic, Chipide yacnoësh
puduanec nidaid Pampidia caid yacno
Pabadobëd icquido canon
potepanëdash. Aden potiash nidaid
Pampidia caid yacno choash Pabadobëd
Bednabe pudundonobi Uan cashumbic
Madcos caidbidi Edusaden yacno
nidoaic cuëshëdpanëdash. Adec
Pabadobëd Bednabe pudundoanec
nidquin shubu dadpen icquid Pedque
caid ¹⁴isbidanec nidaid Pisidia caid
yacno shubu dadpen icquid Antioquiya
yacno chopanëdash. ¹⁵Ambobi
tabadequi chonoadtemaid ushën Nuquin
Papan chiaid chuibante shubun
puduedash tabadpanëdash. Ambo
tabadnubien Nuquin Papan Moises dada
uamiampid isec onquequin
chuibanshumbic Nuquin Papan
yuecquio icshun nanun chianiaid dada
uamepampidtsen isec onquequin
nainambic tsusion: —Isedquido iqueque.
Aid daëdi tabadacno nidshun, čËbitedi
bëdambo icmenuen chuibanquin
tantiametiadquido ada mibi icpe? cata
—tsusion cac ambi namiaid nidshun
tsusion chiacpaden Pabadobëdta
Bednabe chuituidpanëdash.

¹⁶Adoquien abi tsadacnoëshi
nidtoashi Pabado: —Nuquin Papan naid
mibi chiembique. Tantiacquiota.

¹⁷Nidaid Equipito caid yacno nuquin
tsusedpabo tabadshobi Nuquin Papan
bëdamboen isec cudasquin ambi
tishmiaid dadpen caidmepampic.
Adoshombic, Nuquin Papan ambi
nadatiambocquin naidënquio
bëyucanquin tsusedpabon tishmiaidën
tishmiaid caidaido Equipito yacnoshon
buanubi ¹⁸tsusedpabon Nuquin Papan
chiaid chieshëmpampic. Adoquien
matses nibëdacno seta dadpen 40ted
matamec tabadquin, Nuquin Papan
tsusedpabon ëbi chieshënaid cuidnu,
quenquiocquin buampampic. ¹⁹Aden
buanquin nidaid Canan caid yacno
buanshun anocquido isadaidpembo
istuidmeshun matses utsibo
utsi-utsiectsëcquiec 7tedi icquido
naimbudmeshun aidon nidaidtedi
nuquin tsusedpabo menebampampic.
²⁰Aden menebudquin dadpenquioshë
seta 450ted matamequin ambobi
tabadmepampic.

“Adashic, isadaidbo chuiquid utsi-utsien
icmeshumbic Nuquin Papan ambi
yuecquio icshun nanun chianiaid chuiquid
Samued cuëmëdquid tsusedpabo chuiquid
icmepampic. ²¹Aidi isadaidbo chuiquid
icnubic, Matses utsibo ancaquidpadquid
bunebi, quequin tantiashun seta dadpen
40ted matamec tabadquin Nuquin Papan
Sis padon mado, Benaminën tsyuecquid
Saudo cuëmëdquid, isadaidbo ancaquid
icmepampic. ²²Adashic, yuecash Saudo,
con shënisio, Nuquin Papan chiaid tantesa
uasho isun utsitsen Dabid cuëmëdquid
tsusedpabo ancaquid icmeoapampic. Aidi
Nuquin Papan chiacpadomboen
nabanquidquido icsho isash Nuquin Papa:
'Dabid, Isain mado, ëbi bëdamboshë
icmequid, ëbi bunacpaden nabanquidquido
mibi nec,' quepampic Nuquin Papa
—quepanëdash Pabado aton matses
Antioquiya yacnocquido tantiamenuen
chiec.

²³Aden chiec abi onquec: —Dabidën tishmiaidën tishmiaid caidaid, Nuquin Papan chomiaid, Esuquidistu matses icsaid bedshunash abided cuidadash abi yacno isadaidbo puduedmequid Nuquin Papan icmepanëdash. ²⁴Aidën nadatiambocquin nabanquin ambi nabanaid tauabicnuc Uan padon, acten mentoanquidën: ‘Mimbi tantiaid icsa ënshun acten mentome,’ capanëdash. ²⁵Adec onquetanequic matses acten mentobudquin nainec: ‘¿Mitsipaden ëbi isquin cuëmpatsia? Nuquin Papan Chomiaid mimbi cainaidpen nebi. Mimbi cainaidquio choendac. Aidi chosho isun: ¿Ëbi icsambocquid icsho atotsieshun mibi choec? quequin chuiquidquio Nuquin Papan icmïoshi, caindami,’ quepanëdash Uan acten mentoanquid —quepanëdash Pabado.

²⁶Aden Uan padon chiacpaden chuibanashic: —Abadauanën tishmiaidën tishmiaid caidaido nuqui icsho nuquitedi icsaid bedshunash abided cuidadec Esuquidistu unëspanëdash. Adsho Nuquin Papan uincuemequin abi yacno nuquitedi puduedmequid icmequin ambi chiampicpaden napanëdash. ²⁷Padnuen, Aton madombo Nuquin Papan chomiaid Esus nec, quenquiocquin Edusaden yacnocquidobëd aton tsusio dapabo, Icsambocquid neque. Unës ua, quequin chuiapanëdash. Aden chuiquin utsibëd iccuededte ushën-ushënquien abi isec onquiaid Nuquin Papan dada uamiampicpadembi aidon napanëdash. ²⁸Esuquidistu icsaid nibëdquidquio caiqui, Icsambocquid neque. Aid unës uatiadquidi mibi nec, quepanëdash Isadaidbo Pidato caic. ²⁹Adoaquien Nuquin Papan dada uamiampicpaden nabanambien Esuquidistu cuesten dectanquin unës uacsho chicshun, Ëbi unësacsho nëidën ëbi nauedec, quequin

ambi shëcuë uain nacnenaid chucanquio Osen Esus nauedpanëdash. ³⁰Adoacsho Nuquin Papan Esuquidistu uincuemiac ³¹capusho Cadidia yacnoësh Edusaden yacno abëd capucueboedon aidi isbepanëdash. Aden isun aidombi Esuquidistu chuibededec. Adembidi aid isboedobëdtambi abimbo chuibanquidquio nebi —quepanëdash Pabado.

³²Aden chiashic: —Abi chiembique. Tantia. Nuquin Papan chometequid ambi chuiampicpamid tsusedpabon isenquiocnobi ³³Nuquin Papan uincuemiacsho nuqui isonaid aidi nec. Aidi chuiquin Nuquin Papan dada uamiampicpamid nad iqueque. Tantia. Chuinu.

‘Con madombo mibi nec.

Nëbi ëmbi uincuemiacqui ëmbi chiacdedi mimbi naimbudoc.

Adosho isun ëbipadquiocnoc chuiquid dapa mibi icmemb.’

Aden ëndenquimboshë aton mado tantiaquin Nuquin Papan chiampic.

³⁴Adecbidi ambi uincuemetequid Esuquidistun nami chodquesa icpanëdash. Aid chuiquin dada uamiampicpamid nad iqueque. Tantiata. Chuinu.

‘Dabid chiampicpadembi mibi icsaisa icsho ëmbi bëdamboen isaid mibi nec, mado,’

quequin Nuquin Papan dada uamepampic. ³⁵Ambi dada uamiampicpamid utsi nad iquec:

‘Icsaisa icsho aton nami chodquesa icmenuna,’

quequin Nuquin Papan chiampic.

³⁶‘¿Aden dada uamequin Dabid pado chiecta onquepampic? Padenquio. Aidi Nuquin Papa bunacpadomboen naimbudquin nabanash Dabid unësacsho isun aton mëdimbon nami chodquiacno Dabid chococac aidën

namitsen chodquepampic. ³⁷Nuquin Papan uincuemetequidën namien chodquesa icpanëdash. ³⁸Aidi icsainquioquid yec ëbitedi icsaid bedshunash abided cuidadpanëdash. ³⁹Adoac abi tantiaquidquiotsen icsaisabidi Nuquin Papan isec. Nuquin Papan naden nata quequin dada uamiampidtedi matsesën natiapimbo iquec. Aden ambi chiacpaden natiapimbo yec, Nuquin Papan bëdamboen isaid nebi, quetiapimbo icboedëmbi, Matses icsaquid icsho cuidnushe quiash abided cuidadec Esus unëspanëdash, quequin tantiasho, Esuspadquid icsaisa Nuquin Papan nuqui isec. ⁴⁰Nuquin Papan chomiaid choec, quequin tsusedpabon tantienquio icampidpadquid iquenda. Aido chuiquin Nuquin Papan dada uamiampid nad iqueque. Tantia.

⁴¹ ‘Ëmbi ëndenquimboshë dada uamiampicpadembi adquid chomembi.

Ëmbi chomiaid isquidon chiac mimbi tantienquio icpec.
Adquid yec, Tantiadempambo iquec, quec mamënsnumëquid ëbëdi tabadtiapimbo iquendac.
Adquid icmane qeshun tantiaquiota’

—quepanëdash Pabado iccuededquido chiec.

⁴²Aden chuibudashic Pabado Nuquin Papan chiaid chuibante shubu yacnoësh abëd choboedobëd puduananec nidsho isash: —ÿIccuededte badiad utsi chonoc iccuededquin chuinuecta mibi choape? —quepanëdash iccuededquid utsibo Pabado chiec. ⁴³Aden chianec Pabadobëd Bednabe nidsho isun isadaidbo utsin-utsinquiembëdtan isadaidpembo isadaidbopadquid icnuequid utsin-utsinquien tsibanampanëdash. Aden abi

tsibanansho isash: —Nuquin Papan bëdamboen isaid yec bëdamboec tabadta —quepanëdash Pabado Bednabebëd.

⁴⁴Adashic, chonoadtemaid ushë icnuc Nuquin Papan chiaid tantianuec Antioquiya yacnocquid dadpen iccuededoapanëdash. ⁴⁵Dadpen iccuededsho isash isadaidbo tsusiobo: Ëmbi chuibanansho tantianuec aidtedi choenquio iccosh, quequin tantiec nëishpanëdash. Adec nëishash: —Mimbi Nuquin Papan chiaid icsamboen chuibanec —quepanëdash Pabado caic.

⁴⁶Adoquien, dacuëdenquio yec Pabadobëd Bednabe: —Mibitedi con matses icsho, Nuquin Papan dada uamiampid chuibanu, queboedëmbi tantiesa icsho isun mibi chuibanenquio iquembi. Mibi tantiesa yec Nuquin Papabëd tabadte bunesabidi icnuc isadaidpembo Esuquidistu chuibanendambi. ⁴⁷Nuquin Icbon naden tantiamioshibique. Tantia. Chuinu.

“Isadaidpembo ëmbi chiaid chuibanquid mibi icmembi ma nidaidtedi yacno ëbi tantiaquido ëbi yacno puduedquid ma icpanuna,”

quequin chioshi —quepanëdash Pabado abi chieshënuquido isadaidbo Nuquin Papan dada uamiampicpaden chiec.

⁴⁸Adsho tantiash isadaidpembo: —iPadtec! Nuquin Papan chiaid bëdamboshë iquec —quecuededpanëdash. Adoquien, Nuquin Papan ëbëdi mibi tabadmendambi, quequin chiaid ambi tantiamiactedi Esuquidistu tantiaquid yampanëdash.

⁴⁹Adec Esuquidistu tantiaquid yanash auëshquio dadpen nidequi nidaid dëuequid utsi-utsiec yacno choash tabadquin aidontsen Esuquidistu chuibanoapanëdash. ⁵⁰Adosho tantiash,

Pabado icsambocquid nec, quequin isadaidbo tsusiobon Antioquiya yacnocquidon chidobobëdta anocquido chuiquid dapa nëishmeshun Pabadobëdta Bednabe mëyantinquin ashunquio nidmepanëdash. ⁵¹Aden nidta cac puduanec nidtuidash, Esuquidistu ëmbi chuisho tantiesabo aido nec, quequin nidaid putu tasequequin ismiash nidanec shubu dadpen icquid Iconio caid yacno chopanëdash. ⁵²Pabadobëd Bednabe Antioquiya yacnoësh nidan Antioquiya yacnocquid Esuquidistu tantiaquido: —Bëdambo iquebi —quecuededpanëdash. Adembidi aidtedi aton Mayan Nuquin Papan menepanëdash.

Iconio yacno

14 ¹Adashic, Pabadobëd icquido Iconio yacno choash tabadpanëdash. Ambo tabadec Nuquin Papan chiaid chuibante shubu yacno nidash puduedpanëdash. Ambo puduedshun Esuquidistu chuibanac isadaidbobëd isadaidpembro dadpen Esuquidistu tantiaquid yampanëdash. ²Aido Esuquidistu tantiaquid yanubi isadaidbo utsibo Pabadon chuibanaid tantiatipimbo icquin Esuquidistu tantiaquido muaquin chuiquin isadaidpembro utsibo nëishmepanëdash. ³Aido nëishmiambi Iconio yacno yuec tabadquin Pabadon Bednabebëdta dacuëdenquiocquin Esuquidistu chuibampanëdash. Aden chuibansho isun Nuquin Papan ambi nadatiambocquin tantiadempamboctequid ismequid Pabadobëdta Bednabe icmepanëdash. ⁴Aden icmiac aid daëdshun nadatiambocquin nasho isash, Isadaidbo tsusiobon chuibocpadec Pabadobëd Bednabe icsambocquid nec, utsi-utsiec

quenubien, Ambi chiaid abimbo iquec, utsibo quepanëdash. ⁵Aden chuishumbic, Pabadobëdta Bednabe cuestanquin cuënoten se-senuequin Esus tantiesabo isadaidpembro aton tsusio dapabobëdta cainubi adembidi isadaidbon aton tsusio dapabobëdta cainoapanëdash. ^{6,7}Aden caimbededosh, quequin tantiaquidën chiac cuenec nidequi nidaid Dicaonia caid yacno Pabadobëd Bednabe choash shubu dadpen icquid Disteda caid yacno choash tabadquin Pabadobëdta Bednaben Esuquidistu chuibampanëdash. Adtanec auëshquio puduanec nidec shubu dadpen icquid Dedbe caid yacnotsen choash tabadquin adomboembidi Esuquidistu chuibampanëdash. Adtanec auëshquio puduanec nidshun dëuequiec shubu dadpen icquid utsi-utsiec yacnocquidotsen chuibampanëdash.

Disteda yacno

⁸Disteda yacno tabadnubien anocquid taicsaidi anin tishaid caputiapimbo icpanëdash. ⁹Aidi Pabadon Esuquidistu chuibansho tantiec, Esuquidistun ëbi bëdamepatsiash, quec otacquo tsadpanëdash. Aden caputiapimbocquidën tantiacpadomboen Nuquin Papan Pabadotsen tantiamiac ¹⁰caputiapimbocquid comapenen bëisquin: —Nidto —Pabadon cac badedi nidtoash taicsaid bëdanash capupanëdash.

¹¹Aden taicsaid bëdamic capusho isash anocquido aton onqueten cuëdcuededquin: —Disteda yacnocquidon tantiaid matsesbimboec yanash abucuësh budoshe. Nëid daëdi isec cho —capanëdash. ¹²Adtanequi Bednabe otacquo tsadquid icsho isash ambi tantiaid abentsëc Upted icnuc

Upited cain Bednabe cuënquimbi
Pabado chuiquidquio icsho isun ambi
tantiaid utsi Medcudio icnuc Medcudio
cain Pabado cuëmpañédash Disteda
yacnocquidon. ¹³Aden cuënsho
tantiaishun baca bënë daëd bëec: Mibi
daëdi tantiaquido Disteda yacnocquido
nec, quequin, Ismenu, quequin ambibi
tantiacimboecnuc nacnenaid Upited
caid dayun uaquido baca cuesunenu,
quepanédash.

¹⁴Aden baca cuesunenuen bësho isun
abi dasiuidaid aton dashcute
bëntsecquid shoyonquin cancheuidashic
iccuededquidon nënantanquio nidash
Pabadobëd Bednabe comapenec
nadpanédash: ¹⁵—Èbi daëdi
mibipadquid matsesquio nebi. Mimbibi
tantiacmaid nebi que. Baca cuesunenda.
Chiaid bëda mibitedi naden chuinuec
chobi. Nuquin Papa caid abentsëcquiobi
iquec. Aidëmbi abubëda nidaid
uashumbic aidënguioquidtedi
uabanampidquio neque. Aiduidtsëqui
tantiaquin ambi uaidbimboecnuc
matsesën nacnenaid tantiesia icta.
¹⁶Èndenquimbo Nuquin Papan,
Adoenda, cainquiocnoc matsesën ambi
tantiacpaden nabampampic. ¹⁷Aden,
Adoenda, cainquiocquimbi, Abitedishun
icbo icquin bëdambocquid nebi,
quequin ismequin ue secamedenequinc,
cuëte bacuëmequinc, nuqui penun
tiedën nitsimbeniaid canimequinc
caquin Nuquin Papan nac bëdamboen
nuquitedi pebededec. Aden nabanquin
Nuquin Papan, Bëdambo iquebi.
Cuishon, camiaido nuquitedi nec
—quepanédash Pabadobëd Bednabe
Disteda yacnocquido chiec. ¹⁸Aden
chuido-chuidoquai baca cuesunenquio
icpanédash Disteda yacnocquidon.

¹⁹Adnubien Antioquiya caid
yacnocquidobëd Iconio yacnocquido
Disteda yacno cho-choshon, Pabado

icsambocquid nec, quequin chiac
Disteda caid yacnocquido
nëishcuededpanédash. Adec
nëishcuededshun Pabado cuënoten
se-siash, Unësosh, qeshun nimbanquin
buanshun shubu nibëdacno Pabado
netampanédash. ²⁰Ambo netanambic,
Esuquidistu tantiaquido cho-choshon
tsicatenubi Pabado nidoash Esuquidistu
tantiaquidobëd Disteda yacno choec
shubun puduedpanédash. Badiadash
puduanec shubu dadpen icquid Dedbe
caid yacno Pabadobëd Bednabe
nidoapanédash.

Nidaid Sidia caid shubu dadpen icquid Antioquiya yacno choaid

²¹Adec Dedbe yacno choash
tabadquimbi Pabadobëdtan Bednaben
chuiabanac Esuquidistu tantiaquid
dadpen yampanédash. Auëshquio
puduanec nidoaic padpidec Disteda caid
yacno choash tabadquin, Dadpen
tantiamequiono, quequin
chuibampanédash. ²²⁻²⁴Aden
chuibanshumbic: —Natiastianquid
iquendac. Adquid icnuc Nuquin Papa
yacno puduedash Esuquidistu
tantiaquid yec ambo nuquitedi
tabadendac, quec nëbi dayacquio yec
tabad —capanédash Pabadon.
Adotanquin ambia Esus tantiaquid
utsi-utsien Pabadobëdtan Bednaben:
—Bëdamboec tabadquin ismequin
Esuquidistu tantiaquid utsibo chuiaban
—capanédash. Adotanec, ambi
chuiboedobëd Pabado Bednabe chedo
Nuquin Papauidi tantiec buna
mëmunquin chiec onquepanédash. Aden
Nuquin Papa chuiquin naimbudquin,
Nëmbocquid mibi tantiaquido
bëdamboen dayun uata, Papa, quequin
chianec Pabadobëd Bednabe chedo
Disteda yacnoësh nidoapanédash.
Adecbidi Iconio yacno choashun

adomboembidi chuibanoapanēdash.
 Adecbidi Antioquiya yacno choashun
 adomboembidi chuibanoapanēdash.
 Antioquiya yacnoēsh puduanec nidec
 nidaid Pisia caid datambētsenec
 nidaid Pampidia caid yacno choash
 nidec ²⁵shubu dadpen icquid Pedque
 caid yacno choash tabadquin
 Esuquidistu chuibanash shubu dadpen
 icquid Atadia caid yacnosen
 chopanēdash. ²⁶Auēshquio cano
 antabēdtoanec nidec shubu dadpen
 icquid Antioquiya caid yacno, Nuquin
 Papan Mayanēn nidta, quequin
 chiondacnombo choapanēdash. ²⁷Ambo
 choash tabadquin anocquido
 Esuquidistu tantiaquid utsibobēd
 iccuededshun Nuquin Papan
 tantiamiacpaden abi
 capucueniacnoshon ambi nabanaidtedi
 Pabadobēdan Bednaben
 chuibampanēdash. Isadaidpembo
 dadpen Esuquidistu tantiaquid
 yamposh, quequin chuipanēdash.
²⁸Adtanequi yuec Antioquiya yacno
 Esuquidistu tantiaquid utsibobēdi
 Pabado Bednabe chedo tabadpanēdash.

**Edusaden yacnocquido iccuededec
 tantianu quiaid**

15 ¹Pabadobēd Bednabe
 Antioquiya yacno
 choabicnubien nidaid Udeya caid
 yacnoēsh choquido Esuquidistu
 tantiaquid utsibo Antioquiya yacno
 choash tabadquin, Nuquin Papan naden
 nata quequin chiaid Moises dada
 uamiampicpaden shui dēbīd dētemesa
 abi yacno Esuquidistun yuedtemaid
 nendac, quequin chuipanēdash.
²Adnubic Pabadobēd Bednabe
 Antioquiya yacno choash tabadquin
 aidon chiaid tantiash: —Nuquin Papan
 aden chiamo iqueque. Aden chienda
 —quepanēdash.

Adsho comapenec cuēdquin
 chushcapanēdash. Adsho tantiashun abi
 chuiquidon, Edusaden yacno nidshun
 chushcanamboed chuitanta, quequin
 Pabadobēda Bednabe chuishumbic
 Esuquidistu tantiaquid utsibo
 chuiquoquin aido nidmepanēdash.
³Adoac Antioquiya yacnoēsh puduanec
 nidec nidaid Penisia caid yacno choash
 tabadquin, Isadaidpembotsen
 Esuquidistu tantiaquid yamposh,
 quequin chuipanēdash. Adsho tantiash:
 —Aid tantiec bēdambo iquebi
 —quepanēdash anocquid Esuquidistu
 tantiaquido. Adtanec auēshquio nidequi
 nidaid Samadia caid yacno choash
 tabadquin adomboembidi chiac
 adquecbidi, Bēdambo iquebi,
 quepanēdash anocquido. ⁴Auēshquio
 puduanec nidec Edusaden yacno choash
 tabadquin anoshontsen Nuquin Papan
 chiacpadec capuquin ambi nabanaidtedi
 Pabadobēdan Bednaben
 chuibanoapanēdash. ⁵Aden chiac
 Esuquidistu tantiaquido, Nuquin Papan
 naden nata quequin chiaid
 tantiamequido: —Nuquin Papan naden
 nata quequin chiacpaden
 isadaidpembotsen shui dēbīd
 dētemetiadquidi nec. Nuquin Papan
 naden nata quequin Moises dada
 uamiampid nabantiadquid neoaic
 —quepanēdash.
⁶Adoquien Esuquidistu ambia
 tantiaquido tsusiobobēd Esuquidistun
 ēbi chuibeneta caido: Tantiabono,
 quiaish onquecuededpanēdash. ⁷Adec
 yuec onquecuededash nidtoash Petedo
 naded onquepanēdash: —Chuinu.
 Tantiata. Ēnden Nuquin Papan naden
 chuipondashi: “Isadaidpembo
 Esuquidistu tantiaquid icmete
 bunebique. Aidotsen chuibanta,”
 quequin chuipondashi. Aden ěmbi
 chuiasho mibitedishun tantiondac.

⁸Ĕmbi isadaidpembo Esuquidistu chiac abi tantiaquid aido yampondash. Matsesën tantiaid tantiaquid icquin Nuquin Papan, Esuquidistu tantiaquid nec, quequin aton Mayan nuqui meniacadembi isadaidpembo meneoapondash. ⁹Utsibo nec, quenquiocquin aidotsen tantiaquid paucoapondash. ¹⁰Aden Nuquin Papan nasho isun, ĩAtotsieshun Nuquin Papan naid icsambo iquec quiacpaden tsusedpabon natiapimboctequid nuquitsen natiapimboctequid isadaidpembon nabanta cate nuqui bumpe? ¹¹Padenquio icnuna. Matsestedi icsaquid icsho cuidnushe quiash abided cuidadac, quequin tantiaquieci unēsash abēdi tabadendac, quequin nuqui tantiacpaden isadaidpembo Esuquidistu tantiaquido yanshun tantiec —quepanēdash Petedo.

¹²Aden Petedon chuiquin ěnambic Pabadotsen Nuquin Papan tantiamiac ambi nadatiambocquin naquin isadaidpembo ismebanaid chuiapanēdash. Adembidi Bednaben chuiapanēdash. ¹³Aid daēdshun chuiabanquin nainan Esusën utsi Acobo, Esus tantiaquido tsusio dapa, nadpanēdash: —Ĕmbitsen chuinu. Tantiata. ¹⁴Isadaidpembo tantiaquin aido Esus chuibanta, quequin Nuquin Papan chiacpaden Simon Petedon chiac isadaidpembo Esus tantiaquid yansho Nuquin Papan aidtedi nuquibēda aton matses icmiac. ¹⁵Adomboembidi Nuquin Papan chuimiadēn dada uampid nad iqueque. Tantia. Chuinu:

¹⁶“Isadaidbobēd yuec tabadenquiocboedi padpidec choash aidobēd icoaindabi. Dabid padon tsyuecquido isadenquiocboedi isadcuenendac

¹⁷ma aton Icho matsestedishun istuidpanuna;

ma adembidi isadaidpembon ěmbi cuēnaidon aibidi istuidpanuna, ¹⁸quec Nuquin Icho ambi ěnden tantiampicpadomboen chiaid nec”

—quiashic abi Acobo onquec:

¹⁹—Nuquin Papan chianpid tantiaquin nuquin tsusedpabon naden nata quequin chiacpaden nata isadaidpembo cainquio ictiad. ²⁰Nēiduidtsēqui dada uaquin isadaidpembo chuibanuna nuquibi: Nuquin Papan uaidbimboecnu nacnenaid tantiaquin pete sanaid penda; adembidi, min chiduidtsēqui chudta; adembidi, min bēnēuidtsēqui chudmeta; adembidi, Nēish tētaniaid intacchobi codocaid penda, quequin isadaidpembo chuibanuna. ²¹Adec Moisesën dada uaid iccuededquin isec nuqui onquedenec. Aid icnuc, Adomboembidi nata, quequin isadaidpembo chuinuna —quepanēdash Acobo iccuededquido chiec.

²²Adashic Esuquidistu tantiaquido iccuededec onquec ěnēdshun ěmbi dada uaid Antioquiya yacno buanuec Edusaden yacnocquid daēd nidta, quequin Pabadobēda Bednabe nidmepanēdash. Abentsēc Udas cashumbic Badsabas cuēnaid; utsibic, Sidas cuēmēdquid. Aid daēdi Nuquin Papan chiaid comapenen tantiaquidquicapanēdash. ²³Isadaidpembo chuiquin Edusaden yacnoshon Esuquidistu tantiaquidon naden dada uapanēdash:

“Esuquidistun ěbi chuibeneta caidobēdi ambia Esuquidistu tantiaquido Edusaden yacnocquido yec min utsibimboecquido nebi. Isadaidpembo Esuquidistu tantiaquido Antioquiya yacno tabadquidobēda nidaid Sidia yacno tabadquido, nidaid utsi Sidisia yacno tabadquido chedo mibitedi chuiquin dada uaombique. Isec onqueta. ²⁴Ĕbēd icquido nēuēshquido nidash mibi yacno choash puuedshun,

Isadaidbon naden nata quequin chiaid natiadquidi mibi nec, quequin mibi icsamboen chiosh, quequin utsibon chioshi. ²⁵Aden chuisho tantiashun nēmbocquidobēd iccuededec onquequin abentsēcshun tantiacimboen dada uaombi. Aidi nēmbocquid daēdi Pabado Bednabebēdta buantan, quequin chiemi. ²⁶Unēsmāne, quenquo yec capucuenequin Esuquidistu chuibanquido Pabadobēd Bednabe nec. ²⁷Adquid aid daēd icsho isun aid chedobēdta Udas Sidas chedo mibi yacno nidmēmbi. Adoac ēmbi dada uacpaden ma mibitedi chuoapanuna abimbo iquec camenuen. ²⁸Nuquin Papan Mayanēn ēbitedi tantiamiacpaden isadaidbon naden nata quequin chiacpaden nata mibi caisa nebi. ²⁹Nēidtedtsēqui ēbitedishun nata caid nec: Nuquin Papan uaidbimboecnuc nacenaid tantiaquin utsibon abi yacnoshon sanaid penda; adembidi, min chiduidtsēqui chudta; adembidi, min bēnēuidtsēqui chudmeta; adembidi, mimbi nēish cuesuniaid intacchobi codocashun penda. Adoac ēmbi chiacpaden nabanec mibi bēdambo icpec. Padi aitedtsēqui chiemi.”

³⁰Aden dada uaqin nainshun ambi nidtan caboed meniac Antioquiya yacno nidoapanēdash. Antioquiya yacno choash puduedshun Esuquidistu tantiaquido Edusaden yacnocquidon dada uaid menapanēdash. ³¹Aden meniac isbanash: —Mimbi bēboed dada uaid isash bēdambo iquebi —quepanēdash isadaidpembo Antioquiya yacnocquido.

³²Adnubic Udasēn Nuquin Papan chiaid chuibanquin Esuquidistu tantiaquido Antioquiya yacno tabadquido bēdamboen tantiamēpanēdash. Adomboembidi

chuibanquin Sidasēn tantiamēapanēdash. ³³Aden dadpen ushqin chuibanshun: —Edusaden yacno nidoaibi —caquien:

—Ai, mibi nidsho isash unēsquo icquimbi mibi chomequido yacno nidtan, mibi caimbi —quepanēdash Esuquidistu tantiaquido Antioquiya yacno tabadquido. ³⁴Adec aido Edusaden yacno nidnubien ³⁵Pabadon Bednabe chedobēdtan Antioquiya yacno tabadquin Esuquidistu tantiaquid utsibo Nuquin Papan chiaid bēdamboen tantiamenuen chuibanpanēdash.

Pabadobēd Bednabe cuēshēdaid

³⁶Adashic, yuecash Pabado Bednabe caic: —ĭMidapadec nuqui capucuenequin Nuquin Papan chiaid chuibeneboedo tabadeque? Isec nuquibi nidnu. Nid —quepanēdash.

³⁷Adoquien: —Ma Madcosbidi nidoanu. Chuita —quepanēdash Bednabe.

³⁸Adoquien: —Chieshec aidi cuēshēdondashe. Padi. Nuqui daēdtsēqui nidnu. Nid —quepanēdash Pabado.

³⁹Adoquien Bednabe aden tantienquo yec Pabadobēd comapenec onquiash Madcosbēd cano antabēdtoanec Chipide yacno nidoapanēdash. ⁴⁰Adnubien Pabado Sidas abēd Edusaden yacnoēsh choboed caic: —Nuquibi nidnuna —quepanēdash.

Adec aid daēd nidnuesho isash anocquid Esuquidistu tantiaquido: —Ma Nuquin Papan mibi daēd bēdamboen nidmequin ma mibi bēdamboen namepanuna —cac Pabadobēd Sidas nidpanēdash. ⁴¹Adanec nidaid Sidia caid yacno choash capucuenequin Esuquidistu tantiaquido iccuededacno puduedshun bēdamboen tantiamenuen

chuibampanëdash. Aden
chuibeneshumbic nidaid Sidisia yacno
choshon Esuquidistu tantiaquido shubu
utsin-shubu utsinqueic
iccuededacnomboec puduedcuenequin
Pabadon chuibanoapanëdash.

Pabadobëd Timoteyo nidaid

16¹Adec nidec shubu dadpen icquid
Dedbe caid yacno choash
tabadquin adomboebidi chuibanoash
nidequi shubu dadpen icquid Disteda caid
yacno Pabadobëd Sidas choapanëdash.
Ambo Esuquidistu tantiaquid Timoteyo
cuëmëdquid tabadpanëdash. Aidën tita
isadaidbo Esuquidistu tantiaquid icnubi
aidën papa isadaidpembo quidieco matses
icpanëdash. ²Timoteyo bëdamboquid
nec, quequin Disteda yacnoquidon
Pabado chuipanëdash. Adomboebidi
shubu dadpen icquid Iconio
yacnoquidon chuiopanëdash. ³Aden
dadpeshun chuiشو tantiaش Timoteyo
buante bumpanëdash Pabado. Adec,
Timoteyo buanu, qeshun ëbi
capucueniacno isadaidbo dadpen iqueque.
Aidon Timoteyo isash, Aidën papa
quidieco matses icnuc aton madobidi
isadaidpembo nec, aido quenushe
qeshun Pabadon Timoteyon shui dëbid
dëtemepanëdash. ⁴Aden nashic nidec
Esuquidistu tantiaquid utsibo
yacno-yacnoemboec choash puduedshun
Esuquidistu tantiaquido Edusaden
yacnoquidon dada uaquin chiaid
Pabadon chuiopanëdash. ⁵Adembidi
Nuquin Papan chiaid chiac ënden
Esuquidistu tantiaquidon
tantiaabenquiocnobi utsi dadpen Esus
tantiaquid yanoapanëdash.

Ushquin Masedonia yacnoquid Pabadon isaid

⁶Adanec nidaid Sidisia caid yacnoësh
nidsho Nuquin Papan Mayanën:

—Nidaid Asia caid yacno Esuquidistu
chuibanuec nidenda —cac Pabadobëd
icquido nidaid Pidiquia caidtsen
datambidanec nidaid Cadasia caidbidi
datambidanec ⁷nidaid Misia caid yacno
chopanëdash. Ambo choash nidaid
Bitinia yacno nidnuesho, Ambo nidenda,
quequin Nuquin Papan Mayanën aido
tantiameoapanëdash. ⁸Adoac nidaid
Misia datambidanec shubu dadpen
icquid Todoas caid yacno ëbi
tabadacnobi chopondash. ⁹Ambo
choash tabadec inchëshnuc ushquin
nidaid Masedonia caid yacnoquido
Pabadon ispondash. Adec ushquin
isquin nidaid Masedonia yacnoquido:
—Ëbitedi Esuquidistu chuibanec cho
—quec onqesho Pabadon
tantiapondash. ¹⁰Aden tantiaش:
—Nuquin Papan nidaid Masedonia caid
yacnoshontsen Esuquidistu chuibanta
caid nebique. Nacnenuna —Pabadon
cac buanu nacnempondash.
Esuquidistu tantiaquid yanash ëbitsen
Pabadobëd nidpondabi.

Didia cuëmëdquid Esuquidistu tantiaquid yanaid

¹¹Adanec Todoas yacnoësh puduanec
cano antabëdtoanec cuebi nidequi acte
nënantanquio nidaid nacnëdquid
Samotodasia caid yacno choash
Pabadobëd icquido tabadtuidpondash.
Badiadash auëshquio puduanec cano
antabëdtoanec nidquimbi potebidanec
nidaid Masedonia caid yacno ëbitedi
chopondabi. Aid nidaidën acte
cuëmambi shubu dadpen icquid
Niapodis caid yacno pudundoanec
¹²nidequi shubu dadpenquio icquid
Pidipos caid yacno domanobo
dadpenquioshë tabadacno yuec ushec
tabadpondash.

¹³Pidipos yacno tabadashic isadaidbo
iccuededte badiadën Nuquin Papa chiech

utsibo onquedeniacno istuidnuec
puduanec shubu nibëdacno nidequi acte
utsi cuëmambi choapondash. Ambo
choshon iccuededquido chidobo
istuidshun Esuquidistu Pabadon
chuibampondash. ¹⁴Pabadon
chuibanacno chido Didia cuëmëdquid
shubu dadpen icquid Tiatida caid
yacnoësh choquid icpondash. Aidën
piucquid bednuen dashcute cuëshaid
umu-umumbocquid menebenepondash.
Aidi Nuquin Papa tantiaquid icquin
Pabadon chuibanubi Nuquin Icbon
tantiamiac Esuquidistu tantiaquid Didia
yampondash. ¹⁵Aidbëd aton shubun
icquido Esuquidistu tantiaquido yansho
isun acten mentobampondash. Aido
acten mentobanambic Didian:
—Esuquidistu tantiaquid mibipadquid
nebique. Con shubuno ushec cho —cac
nidash Didian shubun puduedash
Pabadobëd icquido tabadpondash.

Pabadobëdta Sidas quënën nauedaid

¹⁶Adashic padpidec Nuquin Papa
chiec onquedeniacno Pabadobëd
icquido nidoasho chido yuaidën
bëquedtuiddash. Aidën mayan icsan
tantiamiacpaden yuecash nad iquendac,
quequin chuisho piucquid dadpen aid
chido matsesën meniac aid chidon ambi
bedaidtedi abi yuaquid
meneoapanëdash. ¹⁷Pabadobëd icquido
bëquedtuiddshun tsibambëec choec aid
chido: —Nëid dadatedi Nuquin Papan
namiaidquio nec. Abi yacno
puduedmianquid iquec, quequin
chuibanquid nëid dadatedi nec —quec
¹⁸badiadquidën-badiadquidënquiec
comapenec cuëdpondash.

Adec cuëdtonesho tantiate bunenquio
yec amibidi bidiadquin mayan icsa
dapuduedaid chido chuiquin
comapenen Pabadon: —Esuquidistun
nadatiambocquin naidënquio

dapuduenta —cac badedquio mayan
icsa dapuduempondash. ¹⁹Aden
dapuduemiachido bëdanacsho isun abi
yuaquidon: —Nëbi nadquio iquendac,
quequin chuitiapimbo nuquin yua iquec.
Aden chienquiocquin piucquid
bedtiapimbocquin nuqui
meneoatiapimbo iquec, quequin
tantiasch nëishun Pabadobëdta Sidas
bedshun nimbanquin abi chuiquido
yacno chido yuaquidon buampondash.
Piucquid bednuequin aton na bëshun
utsibon sambanaid anoentsëqui abi
chuiquido icscho isun chido yuaquidon
Pabadobëdta Sidas ambo buampondash.
^{20,21}Aden abi chuiquid tsadacno bëash:
—Nëid dada daëd isadaidbo nec.
Nëmbo choshon abi chuiquidon naden
nata quequin chiaid chuibanec. Èbitedi
domanobo icquin ambi chiaid
ëbitedishun natemaid icnuc matsestedi
chushquecuededosh —quepondash
chido yuaquido abi chuiquido chiec.
²²Aden chuisho tantiaquidon chiac
dadpen cho-choash iccuededquin
Pabado bëquidon chiacpadomboen
aidontsen chuioac abi chuiquido:
—Bëboedon dashcute chicshun
cueshcaten cuesta —cac sondadon
cuespondash. ²³Aden comapenen
cuesmeshun buameshun quënën
nauedmeshun ambi quënën nauedaid
ista caid chuiquin Pidipos yacnocquido
chuiquidon: —Puduenanec cuenushe
queshun nëid daëdi bëdamboen isquiota
—capondash. ²⁴Adsho tantiaschun ambi
ista caidën Pabadobëdta Sidas
nënantanquio quënën nauedquin
tsadunshun cueste shëcuë uaidën
tausunash puduentanquin quënë
bëdamboen bëtashpanëdash.

²⁵Aden bëtashash aton shubu
dayunquiocquidën puduedambic
inchëshpotsembo Pabadobëd Sidas
Nuquin Papa chiec onquepanëdash.

Adecbidi Nuquin Papan naid chiec cuëdëmpañëdash. Adec cuëdënsho utsibon tantianubi ²⁶comapenec nidaid ishcuudnubi mëtaniaidtedi mëchiquidpañëdash. ²⁷Adnubien ista caid isec tsadboedi ushtanec isucunquin isac shëcuë bëtashaid ënden shëcniac. Adsho isash ista caid: —Quënën nauedaido puduen-puduempacnui —quetanec: —Chuiquid dapabon ëbi cuesunemetsiash —qeshun siadnuequin chështe abi tsiusudaid chicsho ²⁸istanquin Pabadon: —Quënën nauedaidtedi nëmbo iquebique. Seshuniadenda —quequin comapenen cuëmpañëdash.

²⁹Adoquien, seshuniadtsemboedën: —Tabote bec cho —cac ambi namiaidën tabote bedtanquin meniac tabote bedshun sananec badedi quënën puduedash dacuëdec uëdëquec Pabadobëd Sidas tabadacno choash danëshën sebudec shuebudpañëdash. Mibi daëdi bëdambocquid incubi adquidpenquio nebi, quequin tantiaquin ismepañëdash. ³⁰Adsho isun Pabadon nidtomiaqui seshuniadtsemboed bëyucanec nidquin aton shubun Pabadobëda Sidas yuedash: —¿Nuquin Icbo yacno puduednush mitsipadequibi ëbi icsaid cuidadpeque? Chui. Tantianu —quepañëdash seshuniadtsemboed.

³¹Adoquien Pabado: —Mibibi cuidadiapimbo iquec. Mibëda min shubun icquido icsaquid icsho cuidnushe quiash abided cuidadec unëshash Esuquidistu aton Papa yacno puduedash abi tantiaquido yuedquid neque. Mibi icsaid ënash, Esuquidistu con Icbo nec, quequin abimbo tantiata ³²—qeshumbic seshuniadtsemboedbëd icquido Esus tantiamenuen Nuquin Icbon chiaid Pabadon chuipañëdash.

³³Adoquien Pabadobëda Sidas cuesaid chiuë acten bëpanshunquin nainacsho

aton shubun icquido Esuquidistu tantiaquido yansho isun aitedi Pabadobëdtan Sidasën acten mentobampañëdash. ³⁴Aden mentobanaqui aton shubun yuedshun pemepañëdash. Adashic, Nuquin Papan chiaid abimbo tantiaquid yec ambi bëdambo icmiaido seshuniadtsemboedbëd icquido icpañëdash.

³⁵Adashic, badiadash Pidipos yacnocquido chuiquidon: —Nauedaid shubu yacno nidshun quënën nauedboed daëd pudueme, quequin chuitanta —cac quënë yacno nidshun ista caid adomboembidi chuiopanëdash. ³⁶Aden chiac ista caidën: —Quënën nauedboed daëd pudueme, quequin chuiquid dapabon chiosh, quequin aidon chomiaidën chioshibique. Dacuëdenquio yec nid —capanëdash Pabadobëda Sidas chuiquin.

³⁷Adoquien Pabado: —Ëmbi naid chuimenquiocquin ëbi daëdi domanobo icsho utsibon isnubi cuesmeposhi. ¿Nëbi puduemenuen utsibo isenquiocnobida ëbi daëdi nidmepec? Padenquio caimbi. Ëbi daëdi puduemenuec ma chuiquid dapabo abibi chopanuna —quepañëdash.

³⁸Aden chiac puduenanec nidequi abi chuiquido yacno choshon, Mimbi quënën nauedmeboed daëd domanobonec, quequin chuisho tantias chuiquid dapabo comapenec dacuëcuedpañëdash. ³⁹Adec dacuëdec nidequi nauedaid shubuno choash: —Domanobonec, quequin tantienquiocquin mibi quënën nauedmiombi —qeshun puduemetanec: —Pidipos yacnoësh nidtan —capanëdash Pabadobëda Sidas chuiquin. ⁴⁰Adoquien, puduenanec nidequi Didian shubu yacno choash

puuedshun Esuquidistu tantiaquido
iccuededsho isun bédamboen
tabadmenuequin Pabadon
chuibampanédash. Aido chuibidanec
Pabadobéd icquido nidoapanédash.

**Tesadonica caid yacnocquido isadaidbo
nëishcuededaid**

17¹Pidipos yacnoësh puduanec
shubu dadpen icquid Ampipodis caid
datambidanec shubu dadpen icquid
Apodonia caidtsen datambidanec shubu
dadpen icquid Tesadonica caid yacno
choash, Nuquin Papan chiaid chuibante
shubu iquec, qesho tantias
Tesadonica caid yacno Pabadobéd
icquido tabadpanédash.^{2,3}Ambo
tabadec isadaidbo iccuededte badiadën
abi nidteniapadec Nuquin Papan chiaid
chuibante shubu yacno choshon
Pabadon Esus tantiamenuen Nuquin
Papan ënden chiampid
chuibampanédash. Nuqui icsaid
bedshunash abided cuidadec
Esuquidistu unësaid ambi
uincuemetequid Nuquin Papan
Chomiaidquio nec. Aidi nuqui Quidistu
caid neoaic, quequin chuipanédash
Pabadon. Sabado 3ted matamequin
adomboen chuibampanédash.⁴Aden
chuibanaqui Esus tantiaquid utsi-utiec
yampanédash. Nëidic, isadaidbo
utsi-utsiec; utsibic, Nuquin Papa
tantiaquido quidieco matses dadpen;
utsibic, anocquido chuiquid dapabon
chido utsi-utsiec aido Esus tantiaquid
yampanédash.

⁵Aden Pabadon chuibanac Esus
tantiaquid dadpen yansho isash
isadaidbo utsibo nëishun utsibon
piucquid bednuequin aton na
sambanshun ismiacno nidshun
tantiesabo, icsambocquid dadpen,
iccuededmeshun aidotsen nëishmiac

natia chushquecuededpanédash. Adec
chushquec nidequi Pabadobédta Sidas
bednuec Ason cuëmédquidën shubuno
puuedec nidpanédash.⁶Ambo choshon
Pabadobéd Sidas nibédsho isun
Esuquidistu tantiaquido Asombéd
icquido bedshun abi chuiquid dapabo
yacno Pabado chieshënquidon buanec
abi chuiquid dapabo yacno choash:
—Nidaid utsi-utsiec yacno
capucuenequin chuitemaid
chuibanquido nëmbo⁷choacsho Asonën
aid daëd yuedaccosh. Nuqui ancaquid
Sesadën chiaid niacquin ancanquid utsi
Esus cuëmédquid iquec, quequin
chuibanec —quepanédash Pabado
chieshënquido abi chuiquido chiec.

⁸Aden, Ancanquid utsi iquec, quequin
Pabadobédtan Sidasën chiec, qesho
tantias chuiquid dapabo
iccuededquidobéd comapenec
chushquecuededpanédash.⁹Adtanec abi
chuiquid Asombéd icquido caic: —Nëbi,
¿Atotsi tantiaquin Pabadobédta Sidas
yuedo? quequin mibi chuimetiapimbo
iquembi. Yuecshun mibi chomeshun
chuimembi. Ëmbi chuimiabi Tesadonica
yacnoësh nidenda. Ëmbi chiacpaden
nanuequin piucquid ëbi mene
—capanédash Tesadonica yacnocquido
chuiquid dapabon Asombéd icquido
chuiquin. Adoaquien piucquid meniac
bedshun: —Min shubuno nidtan —cac
nidanepanédash Asombéd icquido.

Bedeya yacnotsen tabadaid

¹⁰Adshumbic bednushe qeshun aid
inchëshëmbi Tesadonica yacnocquido
Esuquidistu tantiaquidon Pabadobédta
Sidas shubu dadpen icquid Bedeya caid
yacno nidmepanédash. Aden nidmiac
Bedeya yacno choash tabadec Nuquin
Papan chiaid chuibante shubu yacno
Pabado nidpanédash.¹¹Anoshontsen,
Esus Nuquin Papan Chomiaid Quidistu

nec, quequin tantiamenuen Nuquin Papan ënden dada uamiampid Pabadon chuibanoasho tantiaashun bédambocquid icquin, Abimbobida chuibanoshe. Isbono, quequin Nuquin Papan chiampid isban-isbampanëdash Bedeya yacnocquidon. ¹²Aden isbanec, Abimbo caic, quiash Esuquidistu tantiaquid dadpen isadaidbobëd isadaidpembo Esuquidistu tantiaquido yampanëdash. Adecbidi isadaidpembo chuiquid dapabo quidieco matses utsi-utsiec aton chido chedobëd Esuquidistu tantiaquid yampanëdash.

¹³Adnubien, Bedeya yacnoshontsen Pabadon chuibanec, qesho tantiaash Tesadonica caid yacnocquido, isadaidbo, Asombëd icquido bedmeboedo, Bedeya yacno choshon anocquidotsen nëishmiac comapenec chushquecuededpanëdash. ¹⁴Adsho tantiaashun Esuquidistu tantiaquidon Bedeya yacnocquidon acte dapa cuëmano Pabado nidmepanëdash. Adnubi Sidasbëd Timoteyo nidenquio yec Bedeya yacno tabadnubien ¹⁵Bedeya caid yacnoshon utsibon bëyucanquin Pabado buampanëdash. Aden buanec nidequi shubu dadpen icquid Atenas caid yacno chopanëdash. Ambo choash abia bëyucanquido: —Ëbi chobocnobidi Bedeya yacno nidoaibi —qesho tantiaashun Pabadon: —Mibi yacno choash, Badedquio Atenas yacno chota, quiosh Pabado, quequin Sidasbëdta Timoteyo chuita —capanëdash. Aden Pabadon chiaquien Bedeya yacnocquido abi yacno nidoapanëdash.

Atenas yacnotsen Pabado tabadaid

¹⁶Abia bëyucanquido Bedeya yacno nidambi Atenas yacno Pabado tabadquin, Sidasbëd Timoteyo choec, qeshun cainec capuquimbi Atenas

yacnocquidon nacnenaid isbampanëdash. Aidon Nuquin Papan uaidbimboecnuc nacnenaid dadpen tabëcaid papa cain cuënaid ambi tantiaido icsho isash, Nuquin Papa Abentsëcquiobi iquec, quequin tantiesha Atenas yacnocquido nec, quequin tantiec Pabado unësquio yampanëdash. ¹⁷Adec unësquio yec Nuquin Papan chiaid chuibante shubu yacno nidshun Esuquidistu tantiamenuen Nuquin Papan chiampid Pabadon chuibampanëdash. Adembidi anocquidon piucquid bednuen aton na sambanshun ismiacno nidshun adomboembidi Pabadon chuibanoapanëdash. Isadaidbobëd onquequin Esuquidistu Pabadon chuipanëdash. Adembidi isadaidpembobëd onquequin Esuquidistu chuioapanëdash. ¹⁸Anoshon chuibansho tantiaash epicudeyo cuëmëdquidën chuinëdacpaden tantiaquido Pabadobëd onquepanëdash. Adembidi tantiaash estoico cuëmëdquidën chuinëdacpaden tantiaquido Pabadobëd onquepanëdash. Aido Pabadobëd onquequin Pabadon Esus chuisho tantienquio yec: —¿Atodain comapenec onquequin nëid dadan chuipash? —quepanëdash. Adnubien utsi: —Matses utsibon papa cain cuënaid chuibanec nepanui —quepanëdash. Pabadon Esuquidistu unësash uincuenaid chuisho tantiaash adpanëdash. ^{19,20}Adec onqueshumbic, Utsin tantiaid tantianu, quec Adeyopaco caid yacno iccuedednuequidon bëyucanquin bëash Pabado: —Mimbi chiaid ëmbi tantiacmaid nec. ¿Midapadquidquio mimbi chuibaneque? Tantianu. Chuiban —quepanëdash abi bëquido caic. ²¹Abi bëquido Adeyopaco caid yacno nidash Atenas yacnocquido dadpen utsi-utsiec yacnoësh

cho-choquido
 badiadquidën-badiadquidënquieç
 utsin-utsinquin ambi tantiacpaden
 chuibansho tantianueç
 iccuededpanëdash.

²²Aden mimbi tantiacpaden chuibanta
 caquien nënantanquo nidtoshon naden
 Pabadon chuibampanëdash:

—Chuibanu. Tantiata. Mimbi papa cain
 cuënaid mimbi tantiaid iqueç, quequin
 tantiemi. ²³Capucuenequin mimbi
 tantiaidbimboecnuc nacnenaid dadpen
 isombi. Mimbi papa cain cuënaid
 dadpen tabëcaid icnubi mimbi
 cuënacmaid abentsëc iccosh. Aid mimbi
 cuënacmaid icnuc abibimboecnuc
 nacnenaid nibëdosh. Aton
 shubumpiuidtsëqui iccosh. Mimbi
 cuënacmaid mimbi tantiacmaid mibi
 chuibanu. Tantiata.

²⁴Ëmbi Nuquin Papa cain cuënaid
 nidaidbëdtabi abu uashumbic
 aidënuioquidtedi uaquidquo nec.
 Abitedi uaquidquo yec abitedishun
 icombo aidi nec. Aidi tabadmenuequin
 matsesën shubu uashunaidën tabadesa
 nec. ²⁵Aidi abitedishun Icbo icnuc
 abitedi aton na nec. Adquid icsho, Con
 na mibi menenu, matsesën aid
 catiapimbo iqueç. Aidën tantiacpadeç
 ëbitedi nëmbobi tabadebi. Aidën
 tantiacpadeç ëbitedi tiboquebi. Aidën
 tantiacpaden ëbitedishun bedbanoaimbi.
²⁶Aidëmbi bëyuc dada uampidën
 tsyueçquido ëbitedi nec. Aid bëyuc
 dadan tsyueçquido dadpen yanash
 matses utsi-utsimboec dadpen iqueç.
 Adquid yec nidaid utsi-utsieç yacno
 tabadquido nec. Nuquin Papan
 tantiacpadequi seta taënuç ue
 yanendac. Adecbidi, inchështanec
 badiadoaic. Adecbidi, ushë nidash
 choaic. ²⁷Aidëmbi naden tantieç: Matses
 tantiaquin abitedi uaquin
 nashundenembi. Aden ambi matses abi

tantiaquin nabanaid isash matses,
 ¿Tsuntsin nabanaid nepeç? qeshun ëbi
 tantiaquin Icbo ëbi capeç, quequin
 tantiaquin Nuquin Papan nuqui
 nashunec. Aden nashunquin Nuquin
 Papan nadatiambocquin nabanaid nuqui
 ismedenec. ²⁸Aidën nac tiboquequid
 ëbitedi nebi. Aidën nac capuquidbidi
 ëbitedi nebi. Adembidi min matsesën
 dada uampid adomboen chiaid nad
 iqueque. Tantiata. Chuinu: Nuquin Papan
 bacuëbo ëbitedi nebi, quequin min
 mëdimbon chuipanëdash.

²⁹“Nuquin Papan bacuëbo ëbitedi
 iqueç tiboquequid icquin matsesën
 nacnenaid tiboquesa papa cain
 cuënenquioctiadquidi matses nec.
³⁰Ënden matsesën ambi nacnenaid aden
 cuënsho tantiaish Nuquin Papa, Chën.
 Adoenda, quenquioçboedi nëbi, Mimbi
 icsamboen tantiaid ënta, quequin chieç.
³¹Matsesën naid chuibante ushë chonoc
 matses icsaidbëdta ambi bëdamboen
 naid chuibanquin Nuquin Papan
 chomeshun matses icmiaidën
 cuidbanendac. Ambi abipadquid matses
 icmiaid, Nuquin Papan matsesën naid
 chuibanquid icmenu caid unësacsho
 isun ambi chiampicpaden nanuequin
 Nuquin Papan uincuemepondash
 —quepanëdash Pabado Adeyopaco
 yacno iccuededquido Esus
 tantiamenuç.

³²Adec aidi unësacsho Nuquin Papan
 uincuemepondash, quequin Pabadon
 chuisho tantiaish utsi-utsieç
 mamëshumëñubi utsi-utsieç: —Aidën
 chuiboed padpiden tantianuna
 —quepanëdash. ³³Adoquien, Pabado
 Adeyopaco caid yacnoësh nidpanëdash.
³⁴Adec nidshun yueç ushquin chuisho
 tantianu queç Pabadobëd iccuededquin
 utsin-utsinquin
 padpiden-padpidemboen
 tantiabededpanëdash. Aden Pabadon

chuiabanac utsi-utsiec Esuquidistu tantiaquid yampanēdash: Nēidic, Dionisio cuēmēdquid Adeyopaco caid yacno iccuededquido chuiquid nepanēdash. Utsibic, chido Damadis cuēmēdquid adecbidi Esuquidistu tantiaquid yampanēdash. Aidobēd utsi-utsiec Esus tantiaquid yampanēdash.

Codinto yacno Pabado tabadaid

18 ¹Adec Atenas caid yacno tabadash auēshquio puduanec nidec shubu dadpen icquid Codinto caid yacno Pabado chopanēdash. ²Ambo isadaidbo Aquida cuēmēdquid nidaid Ponto caid yacnoshon tishaid Pabadon istuidpanēdash. Isadaidbotedi nidaid Itadia yacnoēsh nidtan, ancanquidēn cac aton chido Pidisida cuēmēdquidbēd Codinto yacno choash Aquida icpanēdash. ³Nidaidēn capuquid yua bitsi shubumpi nacnenquid abipadquid Aquidabēd aton chido icsho isun aidobēd tabadquin Pabadon shubumpi nacnempanēdash. ⁴Codinto yacno tabadec aton matses isadaidbo iccuededte badiad icnuc Nuquin Papan chiaid chuibante shubuno nidshun, Esuquidistu Nuquin Papan madombo nec, quequin tantiamenuen Nuquin Papan chiaid dada uamiampid Pabadon chuibampanēdash.

⁵Ambo tabadnubi Sidasbēd Timoteyo nidaid Masedonia yacnoēsh choambic shubumpi nacnenenquiocquin isadaidbo Esuquidistu tantiamenuen Pabadon chuibampanēdash. ⁶Adsho, Aid tantiatiaipi, quequin isadaidbon Esuquidistu icsamboen chuisho tantiasch abi daēd dasiuidaid bēntsecquid chicshun ishcunec Pabado: —Esuquidistu mibitedi chiombi. Aid tantiesha yec unēsash Nuquin Papa yacno puduedenquio mibitedi iquendac.

Adquid Nuquin Papan cuidquin nēsecatequid nendac. Nēbi padpiden mibi chienquio iquembi. Isadaidpembon tantiatsiash, quequin aido chuibanembi —quepanēdash Pabado isadaidbo tantiesha chiec.

⁷Aden chiashic Nuquin Papan chiaid chuibante shubu yacnoēsh puduanec aid dayuntsēqui shubu icquidēn Pabado puduedpanēdash. Aid shubu icbo Usto cuēmēdquid Nuquin Papa tantiaquid icpanēdash. ⁸Uston shubunoshon Esuquidistu Pabadon chuibanac Quidispo cuēmēdquid Esuquidistu tantiaquid yampanēdash. Aidi Nuquin Papan chiaid chuibante shubun iccuededquido chuiquid dapa icpanēdash. Aidbēd aton shubun icquidtedi Esuquidistu tantiaquid yampanēdash. Adecbidi Codinto yacnocquid dadpen Esuquidistu tantiaquid yampanēdash. Adsho adquidtedi acten mentobampanēdash.

^{9,10}Adashic, yuecash inchēshēn Pabado usho Nuquin Papa: —Codinto yacnocquid dadpen Esuquidistu tantiaquid yanendac. Aden ēmbi chiac dacuēdenquiocquin comapenen chuideneta. Mibi dayun uaquidquio nebi. Aden dayun uasho ēbi tantiesabon mibi natiametiapimbo iquendac —quepanēdash Pabado caic. ¹¹Aden chiac Codinto caid yacno seta abentsēc matamiash ushē 6ted nidmec tabadquin Nuquin Papan chiaid Pabadon chuidonepanēdash.

¹²Adnubien nidaid Acaya caid yacnocquidon chushcaid chuisho tantiaschun matses icsambocsho cuidte chuiquid Cadion cuēmēdquid icnubi isadaidbon Pabado bedshun abi chushcaid Cadion chuinuen buampanēdash. ¹³Ambo bēquin puduedmiash: —Ancanquidēn chiaid niacquin matsesēn tantiatemaid nēid

dadan chiosh —quepanēdash Pabado chieshēnquido Cadion caic.

¹⁴Adoquien Pabado onquetsenubi Cadiomba onquedopanēdash: —Tantiata, isadaidbo. Mibi chuinu. Nēidēn icsamboen nabanaid mibitedishun ēbi chuisho tantiatsiambi. ¹⁵Aden chienquio yec, Nēidi mibi onquiaidbēda min matsesēn Nuquin Papa cain cuēnaid icsamboen chuiquid nec, mibi quepec. Adecbidi, Mimbi natemaid chuiquidquio nēid dada nec, mibi queopec. Aden mimbi chuisho tantiashun, Ēbi chienda caimbi. Domanobo chuiquidēn naden nata quequin chiaid niaquesa nēid nec, quequin isembi. Aden ěm̄bi isac mibi chushquiaid mibi chuiquid yacno nidshun chuitanta. ¹⁶Aden chuishumbic Cadionēn: —Aidtedi umanuc puduemeta —cac isadaidbo Pabado bēboedo Cadionēn namiaidon puduemepanēdash. ¹⁷Adoac puduēshumbic Nuquin Papan chiaid chuibante shubun iccuededquido chuiquid utsi Sostenes cuēmēdquid bedshun isadaidbon comapenen cuespanēdash. Adosho isun chiac Cadion, Icsamboen naic, quenquio yec otacquo tsadpanēdash.

¹⁸Adnubien Codinto caid yacno yuec tabadashic Esuquidistu tantiaquido nianec nidaid Sidia yacno nidoaic Pabado puduampanēdash. Abēdi Aquida aton chido chedobēd Codinto yacnoēsh nidec shubu dadpen icquid Senquedeya caid yacno chopanēdash. Ambo tabadquin, Nuquin Papan ēbi dayun uaid cuidquin Edusaden yacno choshon piucquid menembi, quequin ismenuequin aton manēdaid Pabado matasmepanēdash. ¹⁹Ambo ushē abentsēc nidmec tabadash cano antabēdtoanec acte dapa potiash Epeso yacno choshon Aquida aton chido

chedobēd, Nēmbobi tabadnu, quepanēdash. Adsho tantiashun aid daēdi nianec Nuquin Papan chiaid chuibante shubu yacno nidshun isadaidbo Esuquidistu tantiamenuen Nuquin Papan chiaid chuibampanēdash Pabado. ²⁰Aden chuibansho tantiashun: —Adomboembidi chuibanuec ĩada ēbēd yuec tabadtsia? —iccuededquidon caquien: —Nēbi padenquio iquebi. ²¹Nuquin Papan shubu dadpen icquid Epeso caid yacno Esuquidistu chuibanuec nidoata cac choatsiabi —quianec auēshquio puduanec nidequi cano antabēdtopanēdash Pabado.

²²Canon nidequi shubu dadpen icquid Sesadeya caid yacno choash Edusaden yacno Esuquidistu tantiaquido iccuededacno nidshun isanec nidequi shubu dadpen icquid Antioquiya yacno Pabado choapanēdash. ²³Ambo choash yuec tabadashic padpidec puduanec, Esuquidistu tantiec iccuededquido tantiamequiono, quec nidequi nidaid Cadasia caid yacno choash tabadquin chuibanashic auēshquio nidequi nidaid Pidiquia caid yacno choash tabadquin Esuquidistu tantiec iccuededquid dadpen bēdamboen tantiamenuen chuibanoapanēdash Pabado.

²⁴Adnubien isadaidbo Apodos cuēmēdquid shubu dadpen icquid Adecandedia caid yacnoēsh Epeso yacno chopanēdash. Aidi dadpen tantiaquid yec Nuquin Papan chiampid tantiaquid nepanēdash. ²⁵Uan pado acten mentoanquid Esuquidistu chiec onquiaiduidi tantiaquin chuibanquid Apodos icpanēdash. ²⁶Aidi Nuquin Papan chiaid chuibante shubu yacno nidshun dacuēdenquiocquin ambi tantiaid chuibampanēdash. Aden chuisho tantiash, Ēbi yacno isec cho, qeshun Aquidan aton shubu yacno

buanshun Esuquidistu choaid ambi nadatiambocquin naidbëdtabi abi unësash uincuenaid chuibampanëdash Aquidabëdtan aton chidon Apodos tantiamequin.

²⁷Aden Esuquidistu bëdamboen tantias Epeso yacno yuec tabadquin Esuquidistu Apodosën chuibampanëdash. Adec yuec tabadquin chuibanashic, Nidaid Acaya caid yacno nidnu, quepanëdash. Adec nidnuesho tantiasun, naden dada uashun Apodos menepanëdash Epeso yacnocquidon: Nëid dada uaid sananquid Apodos cuëmëdquid Esuquidistu tantiaquid nec. Ëmbi isaid neque. Yuedta, quequin dada uashun, Apodos Epeso yacnocquidon menepanëdash ma nidaid Acaya caid yacnocquido Esuquidistu tantiaquido Apodosën menenu, qeshun. Aden meniac puduanec nidec nidaid Acaya caid yacno choash puduedshun Esuquidistu tantiaquido bëdamboen tantiamenuen chuibampanëdash.

²⁸Aden chuibanquimbic isadaidbo Esuquidistu tantiesabo icsho isun abëd onquequin, Esuquidistu Nuquin Papan Chomiaid nec, quequin Nuquin Papan chiampid Apodosën chuibampanëdash.

**Epeso yacno Pabado
abëd icquido tabadaid**

19¹Codinto yacno Apodos icnubi Pabado nidaid Pidiquia caid yacnoësh puduanec podquedën choec macuësh dapa decatocuëtsenec shubu dadpen icquid Epeso caid yacno choapanëdash. Ambo choshon Esuquidistu tantiaquido istuidshun:
²—¿Esuquidistu tantiaquido icshoda Nuquin Papan aton Mayan mibitedi menepanëdash? —capanëdash Pabaton.

Adoquien: —Nuquin Papan Mayan iquec, quequin tantiamboccombi —quepanëdash Epeso yacnocquido.

³Adoquien Pabado: —¿Atotsi canuen mibi acten mentobampanëdash? —quepanëdash.

Adoquien: —Uan padon chiaid tantiaquid icsho acten mentondashi —quepanëdash Epeso yacnocquido Pabado chiec.

⁴Adoquien: —Mibi icsaid ënta, qeshun abimbo tantiaquidtedi acten mentobanquin, Ëbi tsibanec choquid Esus tantiaquid icta, quequin Uan padon chuipanëdash —quepanëdash Pabado Epeso yacnocquido chiec. ⁵Aden chiac, Esuquidistu tantiaquid nebi, quequin Epeso yacnocquidon chuisho tantiasun padpiden acten mentomepanëdash. ^{6,7}Aden aidtedi acten mentoacsho mëdanten Pabaton mamishbanac aid doseted Nuquin Papan aton Mayan menepanëdash. Aden meniac abi onquiacmaidënquo onquec Nuquin Papa chiec cuëdëmpañëdash Epeso yacnocquido.

⁸Adashic Nuquin Papan chiaid chuibante shubun puduedshun Pabaton Nuquin Papabëd tabadaid chuibampanëdash. Cuembo tantiamenuequin ushë choaid 3ted nidmequin badiadquidën-badiadquidënkien dacuëdenquiocquin Nuquin Papan chiaid Pabaton chuibampanëdash.

⁹Aden chuisho tantias pamumëdacbimboec tabadquin, Tantiatiapibi, quequin utsin-utsinquier chieshëmënquioquin Esuquidistu icsamboen chuipanëdash. Aden chiac Esuquidistu tantiaquidobëd Pabado, Nidnu, quianec Nuquin Papan chiaid chuibante shubu yacnoësh puduanec nidec Tidano cuëmëdquidën chuibante shubu yacno choshon adomboembidi tantiamenuen matsesbëd onquequin Nuquin Papan chiaid chuibampanëdash.

¹⁰Seta daëd matamequin adomboembi

chuibampanēdash Pabadon. Aden chuibansho tantiash nidaneshun chiac nidaid Asia caid yacnocquidon tantiapanēdash. Adoac isadaidbobēd isadaidpembo Esus tantiaquido yampanēdash. ¹¹Epeso yacno Pabado tabadsho Nuquin Papan nadatiambocquid icmiacsho ¹²Pabadon dada cuēscashun dashcute cuēshē buanshun daicsaid mishbanac bēdampanēdash. Adembidi Pabadon dada cuēscabanaidēn nēnquid mishac bēdampanēdash. Adembidi pashuaidtsen pamishac bēdanoapanēdash. Adembidi mishac mayan icsa dapuduempanēdash.

¹³Adnubien mayan icsa dapuduemenuen Pabadon chiacpaden tanquin isadaidbo utsibon: —Esus Pabadon chuiboedēnquo dapuduen —capanēdash. ¹⁴Pabado tanuequido isadaidbo chuiquid Esqueba cuēmēdquidēn mado 7ted icpanēdash. ¹⁵Aden chiaquien mayan icsa: —Esus iquec, quequin ěmbi tantiaid aidi nec. Pabado iquec, quequin ěmbi tantiaidbidi aidi nec. ¿Mibitedi tsutsi neque? Tiantianu. Chui ¹⁶—qeshun nebudquin dashcute ched-chedcapamboen mayan icsan cuesactaniaqui shubu nuntanuēsh puduenanec cuempanēdash Esqueban mado. ¹⁷Adec cuensho isquidon chiac Epeso yacnocquid isadaidbobēd isadaidpembo dacuēdcuededpanēdash. Adec dacuēdquin, Dacuēdampambo iquec. Esuquidistu bēdambocquid nec, quequin tantiabededpanēdash. ¹⁸Esuquidistu tanties a icboedi Esuquidistu tantiaquid yanec dacuēdenquo yec Esuquidistu tantiaquido iccuededacno nidshun abi icsaid chuibampanēdash. ¹⁹Adquid dadpeshun icsamenuen ambi ompoquin naid ismenquiocboedombi,

Nēbi adquid ictiapibi, quequin cuēte dētsiadotanquin ambi ompoquin tantiamiaid dada uatetedi tantianuen bedash utsitsen icsabudnushe qeshun abitedi tauipanēdash. Aden tauiboed menequin piucquid dadpen bedtsiandac, quepanēdash. ²⁰Aden abi icsaid dada uate tauisho isquidon chuibanac Esuquidistu tantiaquid dadpen yampanēdash.

²¹Adashien Pabado: —Edusaden yacno nidnuequin nidaid Masedonia caid yacnocquido isbidanquin nidaid Acaya caid yacnocquidotsen isbidanec nidec Edusaden yacno choash tabadashic shubu dadpen icquid Doma caid yacnotsen nidtiadquo iquebi —quepanēdash Pabado. ²²Aden chiash Asia caid yacno abi tabadquin Masedonia caid yacno abia Timoteyobēdta Edasto nidmepanēdash Pabadon.

²³Aid daēdi nidan Epeso yacno tabadquin Esuquidistu Pabadon chuibanauquien tantiesabo nēishpanēdash. ²⁴Adquid Demetedio cuēmēdquid Diana caidbimboecnuc nacnemequid icpanēdash. Aidēmbi ambi nacnemaiid menequin piucquid dadpen bedbampanēdash. ²⁵Aden Esuquidistu tantianu quesa icquin ambi Dianabimboecnuc nacenta caidobēdta abipadquid Diana nacnemequid utsibo iccuededmeshun Demetediton nadopanēdash: —Nuqui tantiaid Dianabimboecnuc nacneshun menequin piucquid dadpen nuqui bedbanec. ²⁶Aden nanubi nidaid utsi yacnoēsh Pabado cuēmēdquid nēmbō choshon utsi comapenen chuibanac Epeso yacnocquid dadpembēdta nidaid Asia caid yacnocquid dadpeshun tantiec. Dianabimboecnuc nacnenaid tiboquesa iquec. Adquid matsesēn tantiaid abimbo ictiapimbo iquec,

quequin Pabadon chiec. ²⁷Aden chiac matses dadpeshun tantiash Dianabimboecnuc nacnenquido icsambo iquec, quetsiash ëbitedi caic. Adecbidi, Dianabimboecnuc nacnenaidbëd abi tabadte shubu uashunaid icsambo iquec, queoapec. Adecbidi Dianabimboecnuc nacnenaid tiboquesa icsho matsesën tantienquo ictiadquidi nec, queoapec Pabado. Aden chiac nidaid Asia yacnocquidon dadpeshun Diana tantiaboedombi padenquo yampec. Aidëmbi tantienquo yanshun aidbimboecnuc nuqui nacnenaid bedenquo iquendac —quepanëdash Demetedio.

²⁸Aden chiac ambi chomeboedtedi, Piuquid ëbi menequin ëmbi nacnenaid matsesën padpiden bedenquo ictsias, quec nëishash: —Epeso yacnocquidon tantiaid Diana bëdambo iquec —quec comapenec cuëdcuededpanëdash.

²⁹Adec comapenec cuëdcuededsho tantiash Epeso yacnocquid utsibo aidobëd cuëdcuededpanëdash. Adec cuëdcuededquin nidaid Masedonia caid yacnoësh Pabadobëd choberoed Cayobëdta Adistadico bedshun iccuededte shubu yacno cuëdcuededquidon buampanëdash.

³⁰Aden aid daëd bedshun buansho isquidën chiac Pabado, Iccuededte shubu yacno nidnu, qesho tantiashun: —Padi. Ambo nidenda —capanëdash Esuquidistu tantiaquidon. ³¹Adembidi, anocquido chuiquid utsin-utsinquien Pabado chuiopanëdash.

³²Adnubien cuëdcuededquidon Cayobëdta Adistadico bedshun buansho isash matses dadpen, ¿Atotsieshun aid daëdi bëo? quequin tantienquo yec tabadpanëdash. ³³Adnubien, Nuqui tantiacpadomboen chuitan, quequin isadaidbon Adecandedo cuëmëdquid nënantanquo tsicunepanëdash. Aden

tsicunequien nidtoash: —Tantia. Chuinu —quequin ³⁴daëdpactsëc chiec onqesho tantiash onqueboedi ënëdash tabadnubi: —Isadaidbo aid nec —qesho tantiash: —Epeso yacnocquidon Diana cain ambi tantiaidbimboecnuc nacnenaid bëdambo iquec —quec baded-badedquiec cuëdcuededpanëdash.

³⁵Adec cuëdcuededshobien Epeso yacnocquidon naden nata quequin chiaid dada uaquidën ënëdmenuequin nadopanëdash: —Epeso yacnocquidon tantiata. Chuinu. Diana caidbimboecquid abucuësh paëdaidbimboecnuc nacnenaid nuqui comapenen tantiaidbëdta abi tabadte isquido nuqui nec. Adquid Epeso yacnocquido nec, quequin nidaid utsi yacnocquidon tantiec. ³⁶Aden utsibon tantiec, quequin tantiaquin icsamboen nainda. ³⁷Dada daëd mimbi nëmbo bëboed Diana caidën shubun puduedamboccosh. Adembidi ampiambo iccosh. Adecbidi, Diana caid chiec icsamboec onquenzioccosh. ³⁸Adenquo icnuc Demetediobëd icquido abi chushquiaid chuinuec Epeso yacnocquidon naden nata quequin chiaid tantiaquid yacno nidshun ³⁹mimbi tantiacpaden chuita cuëdcuededenquiocquin. ⁴⁰Comapenec cuëdcuededec qesho tantiash ancanquid dapan Epeso yacnocquido bëdamboen tabadmeta caid yacno nidshun chiac, Ancanquid dapan chiacpadece Epeso yacnocquido tabadenquo iqueque. Cuëdcuededquido chome, nuqui catsias. Aden chomiac ¿atotsi nuqui chuipe? ⁴¹Aidën nuqui chomenushe quiash min shubuno nidaneta —capanëdash Epeso yacnocquidon naden nata quequin chiaid dada uaquidën. Aden chiac

Demetediobëd iccuededquido
nidanepanëdash.

**Masedonia yacnocquido isbidanec
nidequi Quedesia yacnocquido
isbidanec nidaid**

20 ¹Natia cuëdcuededboedo
nidanian Esuquidistu
tantiaquido chomiash Pabado: —Nidaid
Masedonia caid yacno nidoaibique.
Bëdamboec tabadta —quianec Epeso
yacnoësh puduanuc abëdi nidondabi.
²Auëshquio puduanec nidquin nidaid
Asia caid yacnocquid utsi-utsien
chuidanec nidaid Quedesia caid yacno
choapondash Pabado. ³Ambo choash
ushë abentsëc chotsëcnuc nidmec
tabadash: —Nidaid Sidia caid yacno
nidnu —quepondash. Adsho tantiashun:
—Ambo nidacsho mibi cuesunenuquin
isadaidbon cainec —cac nidaid
Masedonia caid yacno Pabado
nidoapondash. ⁴Nidaid Masedonia caid
yacno choash Pabado tabadnubien abëd
capuquido bëyucanec nidaid Asia caid
yacno nidpondash. Abëd capuquido
nëidted icpondash. Nëidic, shubu
dadpen icquid Bedeya yacnoësh
choquid Sopated cuëmëdquid; utsibo
shubu dadpen icquid Tesadonica
yacnoësh choquido Adistadico
cuëmëdquidbëd Secundo cuëmëdquid;
utsibic, shubu dadpen icquid Dedbe
caid yacnoësh choquid, Cayo
cuëmëdquid; utsibobi, nidaid Asia
yacnoësh choquido: nëidic, Timoteyo
cuëmëdquid, utsibic Tiquico
cuëmëdquid, utsibic Tedopimo
cuëmëdquid. Aidedi icpondash.
⁵Aidedi bëyucanec Asia yacno nidec
shubu dadpen icquid Todoas caid yacno
choash tabadquin Pabado caimpondash.
⁶Aidedi nidan pan nami
uainquioctequid pete ushëtedi tantiec
tabadanec Pabadobëd cano

antabëdtoanec nidec 5tedec ushun
bëyucamboed istuidpondash. Ambo
shubu dadpen icquid Todoas caid yacno
7tedec ushec Pabadobëd icquido
tabadoapondash.

Eyutico unësacsho uincuemiaid

⁷Todoas caid yacno tabadequi
dominco ushën Esuquidistu
tantiaquidobëd iccuededquin
Pabadobëd icquidon Esuquidistu unës
uate tantiaquin pan cuësh-cuëshun
pebededpondash. Aden piashic Pabado,
Badiadash nidebi, quiash yuec
onquepondash inchëshpotsembo
yantsëcquiec. ⁸Aid onquiacno shubu
abentsëquën tacpan uaid 3tedi
icpondash. Abuc tacpan yacno
dectatoash quënën tabadnubi tabote
dadpen chënquepondash. ⁹Pabado
onquenubi nëbi caniaid, Eyutico
cuëmëdquid, iste shëcuë yacno tsadec
ushcasmash ushtotanec abucuësh
paëdpondash. Adececaid paëdsho isash
bud-budshun unësacsho isbedednubien
¹⁰Pabadotsen budquin dayumbudec:
—Unësboedi abi tiboquianeque.
Shubicuededenda —quepondash.
¹¹Aden chiash abuc quënë yacno
padpidec dectatoashun abitedishun
pebededpondash. Aden piash tabadec
Pabado utsibëd onquecuededpondash
badiadbudtsëcquiec. Adececaid
badiadbudbon Pabadobëd icquido
shubu nuntanuësh
puduem-puduenubien ¹²paëdboed aton
shubuno utsibobëd nidpondash
bëdambo yec.

**Todoas yacnoësh puduanec
Mideto yacno chote**

¹³Adashic Pabado: —Podquedën
nidebique. Shubu dadpen icquid Ason
caid yacno nidshun anoshon ëbi cainta
—quianec nidpondash Pabado. Adanec

aid nidnubi Todoas yacnoësh abëd capuquid utsibobëd puduanec nidequi cano antabëdtoanec Ason yacno nidoapondabi. ¹⁴Adec nidequi Ason yacno choshon istuidac Pabado ëbëdi cano antabëdtoanquin potiaash shubu dadpen icquid Mitidene caid yacno choapondash. ¹⁵Auëshquio puduanec nidec badiadash acte nënantan nidaid nacnëdquid Quio caid datambidanec nidadash badiadash acte nënantan nidaid nacnëdquid utsi Samos caid datambidanec shubu dadpen icquid Mideto caid yacno choapondash. ¹⁶Ambo choash: —Edusaden yacno badedquio nidebi. Adec ambo nidnuequin nidaid Asia caid yacno tabadenquiocquin shubu dadpen icquid Epeso caid datanembi. Isadaidbon chidon bëyuc tishampid dada bacuë unësmenquiocquin matante tantiaid ushë chonoc Edusaden yacnombo tabadebi quequin Epeso datanembi —quepondash Pabado.

**Epeso yacnocquido tsusiobo
Pabadon chuibanaid**

¹⁷Adashic Mideto caid yacno tabadtuidshun Epeso yacnocquido Esuquidistu tantiaquido tsusiobo Pabadon chomepondash. ¹⁸Aden chomeshun naden aido chuipondash: —Chiembique. Tantiata. Èbi ënden nidaid Asia caid yacno choash mibëd yuec tabadquin nabanaid mibitedishun istenepondac. ¹⁹Isadaidbo utsibon Esuquidistu tantiesa icquin cuesunete bunquin mëyampondashi. Aden mëyanaqui Nuquin Icbon ëbi chuibeneta cacpaden ëbi bunaid tantienquiocquin ambi chiaid mibitedi chuibanondambi. Tantiesa icsho isash shubiquiondabi. ²⁰Esuquidistu mibitedi bëdamboen tantiamenuen matses dadpen iccuededacnoshon

chuibanondambi. Adembidi shubu utsin-utsinquec puduedcuenequin chuibanondambi. ²¹Nuquin Papan chiaid abimbo tantiaquin mibi icsaid ënshun aton Mado Esuquidistu tantiaquid icta, quequin isadaidbobëdta isadaidpembo chuibanondambi.

²²“Aden chuibanshobi Nuquin Icbon Mayanën: Edusaden yacno nidta, quequin chuioposhi. Aden aidän chuibocpadequi nidebi. ¿Atotsi ëbi capatsiash Edusaden yacnocquidon? quec dacuëdenquio yec nidebi. ²³Shubu dadpen yacnoshon-yacnoshonquien Nuquin Papan Mayanën ëbi naden chuided-chuidedec: Mibi mëyanquid Edusaden yacno iquendac. Adecbidi mibi nauedte quënë iquendac, quequin chioshi. ²⁴Aden Nuquin Papan Mayanën chuisho tantiashi, Èbi cuesunepanundac, quenquio yec Edusaden yacno nidoaibi. Esuquidistun ëbi chuibeneta cacpaden naimbudquin utsi-utsiec yacno nidshun Esuquidistu abimbo tantiaquid Nuquin Papabëd tabadte iquec, quequin chuibanembi.

²⁵“Nëshunquio Nuquin Papan chiaid ëmbi chuibanasho mibitedishun tantiabenonaidon nëuëshquio ëbi nidacsho mimbi isoainquio iquendac. ²⁶Èmbi nëshunquio Esuquidistu mibitedi chuibanac, Esuquidistu chiambo iccoshi, quetiapimbo mibitedi iquendac. ²⁷Tantienquioctsiash, quenquiocquin Nuquin Papan tantiacpaden chuibanombi. ²⁸Aden chuibanash nëbi nidebi. Èbi nidan Esuquidistu tantiaquido nabanec tabadaid isbanta. ¿Nuquin Papan chiacpadectabi tabadeque? Isnu, quequin isbanta. Adembidi Esuquidistu tantiaquid utsibo bëdamboen isban icsamboen nabanec tabadnushe qeshun. Nuquin Papan Mayanën aido isbanquin chuiquid mibi icmioshe. Adota. Aido Nuquin Papa

yacno tabadmenuec Esuquidistu unēsṣanēdash. ²⁹Ēbi nidan abimbo chiacimboen chuiquid Esuquidistu tantiaquido chuiquid icnuec choendac. ³⁰Adembidi mibēdi iccuededquin utsin-utsinquien Nuquin Papan chiaid abimbo chiacimboen muaquin chiendac. Esuquidistu tantiaquid chuiquidquio icnuequin adoendac.

³¹Adquid Esuquidistu tantiec iccuededquido cuēshēdmequid neque. Ista. Adquid iquendac, quequin mibēdi tabadquin ēnenquiocquin chuibanondambi. Adquid choec, quequin mibitedi chiec shubiondabi.

³²“Bēdamboen chuibanombi, quequin tantiaquin mibi nianembi. Esuquidistu tantiaquid iquec, quequin ambi chiaid Nuquin Papan mibi tantiamendac. Aden tantiamequin mibi bēdambo icmeshun abēdi tabadmendac. ³³Mibēd tabadec, Min piucquid bec cho, quesa niondabi. Adecbidi, Min dashcute bec cho, quesa niondabi. ³⁴Ēmbibi shubumpi nacnenshun menequin piucquid bedshun con na bedondambi. Adembidi nacnenshun bedshun ēbēd capuquido menebanondambi. ³⁵Adembidi chonoadshun aton na bedshun natiapimboquid meneta, quequin mibitedi ismebanondambi. Nuquin Icbo Esuquidistu nidaidēn tabadec nadpanēdash: ‘Utsin natiapimbocho menequid Nuquin Papan bēdambo iquebi camiaid nendac. Nabanenquio yec bedshumēnquidquio icsho Nuquin Papan bēdambo iquebi camenquio iquendac,’ —quequin Esuquidistun chiacpaden Epeso yacnocquido tsusiobo chuipondash Pabado.

³⁶Aden chiashic Pabado Nuquin Papa chuinuec utsibobēd danēshēn seabducuededash onquecuededpondash. ³⁷Aden Nuquin Papa chiec onqueshumbic nidtocuededshun

abitedishun Pabado chuiboed tantiaquin Pabado dayumbededquin shubi uabededpondash. ³⁸Ēbi padpiden mimbi isoainquio iquendac, Pabado quesho tantiaquid shubicuededpondash. Adec shubiquin dayumbudash unēsquio yec Epeso yacnocquido tsusiobo Pabadobēd cano yacno nidanepondash.

Edusaden yacno Pabado nidoaid

21 ¹Epeso yacnocquido tsusiobo acte cuēman tabadnubi cano antabēdtoanec Pabadobēd capuquido nidquimbi cuebi potiaquid acte nēnantan nidaid nacnēdquid Cos caid yacno choapondash. Badiadnuc auēshquio puduanec nidec acte nēnantan nidaid nacnēdquid utsi Dodas caid yacnotsen choashic puduanec nidequi shubu dadpen icquid Patada caid yacno choapondash. ²Ambo choashic nidaid Penisia caid yacno cano dapa utsin nidnuequid istuidash antabēdtoanec Pabadobēd capuquido nidoapondash. ³Adec nidquimbi acte nēnantan nidaid nacnēdquid Chipide caid datambidanec nidaid utsi Sidia caid yacnotsen choash shubu dadpen icquid Tido caid yacno choapondash. Ambo choshon ambi ansandoshon bēaid icbo yacno buamepondash. ⁴Aden buan-buanubi Esuquidistu tantiaquido yacno nidane puduedash 7tedec ushec Pabadobēd capuquido tabadpondash. Ambo tabadnubi, Edusaden yacno Pabado cuesunenuequid iquec, quequin Nuquin Papan Mayanēn tantiamiac aidon, Edusaden yacno nidenda, quequin Pabado chuipondash. ⁵Aden chiaqui cano icbo nidnuesho isash padpidec cano antabēdtoanec, Nidnu, quepondash Pabado. Aid nidnuesho isash Esuquidistu tantiaquido bēnēbēdi aton chido aton bacuēbo chedo Pabadobēd acte cuēmano choash

Nuquin Papa chiec onquecuededpondash. ⁶Adec Nuquin Papa chiec onqueshun, Nidec nid, cac Pabadobëd icquido cano antabëdtoanubien Tido yacnoësh acte cuëmano chobedo aton shubuno nidaneopondash.

⁷Adec cano antabëdtoanec auëshquio nidec shubu dadpen icquid Todemaida yacno choash Pabadobëd capuquido tabadtuidpondash. ⁸Adec anocquidobëd tabadec badiadash cano antabëdtoanec nidec Sesadeya caid yacno choash Uedipen shubun puduedpondash. Esuquidistu tantiaquidon chido niante meneta caid utsi 6tedibëd Uedipe icpondash. ⁹Aidën champibo 4tedi aton bënën bedambocquidtedi icpondash. Aidon Nuquin Papan naden nanun chiaid tantiaquin chuibanquid icpondash.

¹⁰Adec Uedipebëd yuec tabadnubi Nuquin Papan naden nanun chiaid chuiquid utsi Accabo cuëmëdquid nidaid Udeya yacnoësh chopondash. ¹¹Adec choshon Pabadon tsiute bedash tataniadash mëtaniadash Accabo nadpondash: —Nuquin Papan Mayanën naden ëbi chioshe. Tantiata. Chuinu. Ëmbi nabocpadomboen isadaidbon Edusaden yacno tabadquidon nëid tsiute icbo bedshun tataneshun mëtaneshun buanshun, Unës uata, quequin isadaidpembo menendac —quepondash Accabo Pabado chiec.

¹²Aden Accabon chuisho tantiash shubiquin Pabadobëd chobedoed Uedipen shubun icquidobëdtan, Edusaden yacno nidenda, quequin Pabado chuioapondash. ¹³Adoquien: —¿Atotsi canuen shubiquin ëbi icsambo icme? Edusaden yacno nidshun Nuquin Icbo Esuquidistu chuibansho ëbi taneshun unës uatsiash, quequin tantiaquin abi Esuquidistu chuibanuna

—quepondash Pabado. ¹⁴Adoquien, Nidenda, caqui niacbidanec, Edusaden yacno nidebi, queoapondash Pabado.

Adec, Nidebi, qesho tantiashun: —Ma Nuquin Icbo bunacpadec nidpanuna —capondash.

¹⁵Aden chiashic Sesadeya yacnoësh puduanec Edusaden yacno Pabadobëd capuquido nidoapondash. ¹⁶Adec nidsho isash Sesadeya yacnocquid Esuquidistu tantiaquid utsi-utsiec Pabadobëd nidquin Menason cuëmëdquidën shubu yacno buanac puduedpondash. Aid shubu icbo Chipide yacnoësh choash Edusaden yacno tabadquid Esuquidistu tantiabenquidbidi nepondash.

Pabadon Acobo isaid

¹⁷Adec Edusaden yacno choacsho Esuquidistu tantiaquidon Pabadobëd capuquidtedi Pabadobëdtabi yuedpondash. ¹⁸Aden yuedac tabadash badiadash Acobo isec nidoapondash. Acobobëd Esuquidistu tantiaquido tsusiobotedi icpondash. ¹⁹Adec nidec ambo puduedshun, Mibi isec chobi, quequin, Ëmbi Esuquidistu chuibanubi Nuquin Papan tantiamiac isadaidpembo dadpen Esuquidistu tantiaquido yanosh, quequin Pabadon chuipondash.

²⁰Aden chuibanac Nuquin Papan naid bëdambo iquec, quiash Pabado caic nadpondash: —Nëmbo Esuquidistu tantiaquid isadaidbo dadpen iquec. Aido Nuquin Papan Moises dada uamiampid, Naden nata, quequin chiaid tantiaquido nec. ²¹Adquidombo icquin, Min bacuëbon shui dëbid dëtemenda, quequin isadaidpembo Pabadon chiec, qesho tantiash, Nuquin Papan, Naden nata, quequin chiaid niacmequid Pabado nec, quequin icsamboen tantiec aido tabadec. ²²Aden chiec tabadquin mibi nëmbo choaid tantiash mibi cuesunete buntsiash. Mibi cuesunete bumenquido

icmenuequin ¿Atotsi nuqui napeba?

²³Naden nac bédambo ictsiashe. Tantia. Chuinu, Pabado. Nēmbo ebéd icquido Nuquin Papauidi tantiec tabadnuequid daéd-daédquiec iquec. ²⁴Nuquin Papan ēbi bédamboen dayun uadenesho ismenu, quiaash nidaid Quedesia yacnoēsh, Ēbi matas, qesho matasac mibi: “Edusaden yacno choash Nuquin Papa tabadte shubu uashunaid yacno nidash puduedshun shubu nacnuequid piucquid menembi,” quepondac. Nēbimbobi Edusaden yacno mibi choaoc. Nēid dadatedibéd Nuquin Papa tabadte shubu uashunaid yacno nidshun mimbi ēnden chiondacted piucquid meniac, Pabado icsambo iquec, quequin chuiboedombi, Nuquin Papan, Naden nata, quequin chiacpaden naquidquio Pabado nec, quequin tantiatsiashe.

²⁵Ēmbi isadaidpembo Esuquidistu tantiaquid utsibo dada uaquin naden chuioaombi: “Nuquin Papan, Naden nata, quequin chiaid dada uamiampid nēidtedictsēqui mimbi natequid nendac. Nēidic, Nuquin Papan uaidbimboecruc nacnenaid tantiaquidon pete sanaid penda; adembidi, min chidouidtsēqui chudta; adembidi chidon min bēnēuidi chudmeta; adembidi, nēish cuesaid intacchobi codocaid penda.” Aden dada uabanquin isadaidpembo chiombi —quepondash Acobo Pabado chiec.

²⁶Aden chiaquien badiadash Nuquin Papa tabadte shubu uashunaid yacno dada 4tedbéd choash Pabado, Nēidted dadabēdtambi ēmbi Nuquin Papan chiacted piucquid meniombi, quepondash Nuquin Papa tabadte shubu uashunaid yacnocquid chiec. Aden chianec nidoapondash.

Pabado bedaid

²⁷Adashic 7tedec ushquin naimbudnubi Pabado Nuquin Papa

tabadte shubu uashunaid yacno nidoaic puduedash capusho nidaid Asia caid yacnoēsh choquidon isadaidbon ispondash. Aden isash Pabado bedmete bunec, Isadaidbo utsibo nēishmenu, quec: ²⁸—Isadaidbotedishun tantiata. Nēidēmbi Nuquin Papa tabadte shubu uashunaidēn puduedtemaid isadaidpembo yuedquin nēid shubu bēda icsa uameboed neque. Bednu. Uidēn uaic cho —quequin abimbo chiacbimboec onquecuededpondash. ²⁹Epeso yacnoēsh choquid isadaidpembo Tēdopimo Pabadoēd Nuquin Papa tabadte shubu uashunaid dayun capusho isash abimbo chiacbimboec onquecuededpondash.

³⁰Aden chiac, Icsambocquid bednu, quianec titinquec cho-choshon Pabado bedshun nimbanquin umanuc buanac Nuquin Papa tabadte shubu uashunaid isquidon shēcuē bētashpondash. ³¹Aden Pabado buanec, Cuesunenu, quec cuēdcuededsho tantiashun chuitanac ³²abi chuiquidbéd sondado cho-chosho isun Pabado cuesbededquin isadaidbon ēmpondash.

³³Adec choshon sondado chuiquidēn bedtan cac Pabado bedshun shocosh bucun mētanemepondash. Aden mētanemiash: —¿Tsutsi nēid nepec? ¿Atotsi icsamboen naosh? —quepondash sondado chuiquid.

³⁴Adoquien iccuededquid utsi-utsitsēcquien chiec onquecuedednubi utsi-utsitsēcquien utsi uain chiec cuēdcuededpondash. Adec dadpen cuēdcuededsho: —Tantiatiapibi ye. Quēnēn nauedmenu. Buanec nid —quepondash sondado chuiquid sondado chiec. ³⁵Aden Pabado buanec nidec nauedte shubun dectatonobi cuēdcuededquidon tsucscuededtsēcquien Pabado bednuesho isun Pabado abuc

cadoanquin sondadon buampondash.

³⁶Aden cadoanquin buansho isash cuëdcuededquido: —Aidien cuesunetiad —quepondash sondado chuiquid chiec.

**Ambi nabanaid iccuededquido
Pabadon chiaid**

³⁷Adec abi buanec shubun puduedtsenubi Pabado: —¿Ada ëbi onquesho tantiatsia? —quepondash Quidieco matsesën onqueten Pabado sondado chuiquid chiec.

Adoaquien: —¿Quidieco matsesën onqueten onquequidta mibi ne?

³⁸Chuiquid dapa icnuequin Equipito yacnocquid matses dadpen cuëte nibëdacno buanaccondaidien nechitec, qeshun mibi bedombi. ³⁹Adoaquien: —Isadaidbo nebi. Nidaid Sidisia caid shubu dadpen icquid Tadso caid yacnoshon tishaid yec con matses chuibante bunebique. ¿Adabi oncame? —quepondash Pabado.

⁴⁰Adoaquien: —Ai, onqueta —capondash sondado chuiquidën.

Adoac abuc dectatoten nidtoash nidec, Otacquo tabad, quequin ismequin Pabadon mëdante uic-uiccapondash. Aden nasho isash isadaidbo otacquo tantiec tabadsho isash: —Ebedeyon, nuquin onqueten mibi chuinu —quec nadec Pabado onquedopondash:

22 ¹—Ëmbi naid mibitedi chiembique. Isadaidbo tsusiobëdtan isadaidbo utsibon tantiata.

²Adec aton onqueten Pabado onquesho tantiash isadaidbo otacquo tantiec tabadpondash.

³Aden tantiec tabadsho isash Pabado: —Ëbibi Isadaidbo nidaid Sidisia caid yacnoshon shubu dadpen icquid Tadso caid yacnoshon tishaid nebi. Aden ashunquio tishaqui Edusaden yacno

choash canipondabi. Adec nëmbo Edusaden yacnoësh canidosho nuqui tantiamequid Camadiedën nuquin tsusedpabon naden nata quequin chiaid tantiamepondashi. Aidon naden nata quequin chiaid tantiaquin adomboembidi nadeniombi mibitedishun nacpadembi. ⁴Aden nabanquin Esuquidistu tantiaquido Nuquin Papan chiaid niacquido nec, quequin dadabëdta aton chido chedo bedmeshun mëyamequin quenën nauedmeshun ünës uamepondambi. ⁵Ëmbi adobanquin naonaid tsusio dapatedishun tantiec. Adondash, quequin chuitiadquio icquin aidon chuitsiash. Adembidi Damasco yacno nidshun Esuquidistu tantiaquid anocquido bedmeshun Edusaden yacno bëmenu, quesho tantiashun Edusaden yacnocquido tsusiobon, Ai, adotan, quequin dada uaid bedondambi Damasco yacnocquid tsusiobo ismnen.

⁶“Adash, ushë abuctoan Damasco caid anoentsëqui choshobi abucuësh shocosh tabote dapa bed-bedquiacbimboec chënquequin dëcatepondashi. ⁷Adec chënquequin dëcatiac nidaidën paëdshun nadec abucuësh onquesho tantiapondambi. ‘¿Atotsieshun ëbi mëyane, Saudo? Ëbi chui. Tantanu,’ capondashi.

⁸“Adoaquimbi: ‘¿Con Icbomboda mibi ne?’ capondac.

“Adoaquien: ‘Nasaded yacno iccondaid mimbi mëyanaid Esus nebi,’ capondashi.

⁹“Adnubic ëbëd icquidon shocosh bed-bedquiacbimboec chënquesho isequi con Icbon chuisho tantienquio yec tabadpondash.

¹⁰“Aden dëcatiac uequin ëmbentsëqui tantiec: ‘¿Atotsimbi nape, Icho?’ quepondabi.

“Adoaquien: ‘Nidtoash Damasco yacno niddan. Anoshon ëmbi nata quequin chiaid utsin mibi chiendac,’ capondashi Nuquin Icbon. ¹¹Adoaquini nidtoquin shocosh bed-bedquiabimboec chënquequidën bëshuacsho isun ëbëd icquidon mëdinanquin Damasco yacno buampondashi.

¹²“Adec Damasco yacno choash bëshuash ëbi tsadnubi Ananias cuëmëdquid ëbi isec chopondash. Aidi isadaidbon naden nata quequin chiaid naquidquio icsho isadaidbo utsibon bëdamboen isaidquio icpondash. ¹³Ëbi yacno choshon aidën: ‘Saudo, abuc is,’ cac cuedoquimbi Ananias ispondambi.

¹⁴“Adsho isash Ananias: ‘Nuquin tsusedpabon Papa cain cuënaidën, Nuquin Papan ambi tantiacpaden nata quequin chuiquin mibi tantiamendac. Adembidi ambi chomiaid, Icsa Nibëdquid mibi ismendac. Aidën chuisho mimbi tantiendac. ¹⁵Aden aid isquin tantiashun utsi-utsien dadpen mimbi isaidbëdta mimbi tantiaid mimbi chuibenendac,’ quequin ¹⁶chuishumbic Ananiasën: ‘¿Atotsianuen cainec tsade? Esuquidistu tantiaquid icquin mibi icsaid chuita ma mimbi icsamboen tantiaid ma paucapanuna. mibi paucacimboen utsibo ismenuen acten mentometa,’ capondashi Ananiasën.

¹⁷“Adoaqui, Edusaden yacno nidoash Nuquin Papa tabadte shubu uashunaid yacno nidec puduedash Nuquin Papa chiec onquec ushacimboec tsadpondabi. ¹⁸Adec tsadquimbi Nuquin Icho ëbi chiec onquesho isnubi nadpondash: Mimbi ëbi chuibansho tantienquiocquid yec nëmbocquido mibi cuesunete buntsiashe. Edusaden yacnoësh badedquio niddan, quequin Nuquin Icbon chuipondashi.

¹⁹“Adoaquimbi: ‘Aidon isnubi mibi tantiaquid dadpen bedmeshun quënën

nauedmiondambi. Adembidi, aidon isoanubi mibi tantiaquid utsi-utsien comapenen mëyamiondambi. ²⁰Adembidi, mibi chuibanquid Esteban cuëmëdquid utsibon cuënoten se-sequin unës uanubi se-sequidon dashcute chicshun sanacno tsadquimbi, Unës uata, capondambi. Isadaidbo tsusiobon ambobidi icquin ëbi onquesho tantiapondash. ¿Adondacshobi cuesunependabi iquec?’ quepondabi Nuquin Icho chiec.

²¹“Adoaquini Nuquin Icbon: ‘Isadaidpembo yacno mibi nidmembique. Niddan,’ capondash —quepondash Pabado ambi nabanaid iccuededquido chiec.

Pabado cuetsenaid

²²Pabadon ambi nabanaid chuibansho tantiec iccuededquido otacquo tabadboed, Isadaidpembo, quec Pabado onquesho tantiash: —Tantiatiapibi. Adec onquequid isadaidbo utsibëd tabadenquio ictiadquidi nec. Aid unës uata —quec cuëdcuededpondash iccuededquido.

²³Adec cuëdcuededec aton dashcute bëntsecquid canchepamboec dachiquidshun nidaid putu bedtanquin abuc secapondash Pabadon chuiboed tantiatemaid nec, quequin ismequin. ²⁴Adnubien, Cuesunenushe shubu nuntan buanta, quequin sondado chuiquidën chiac Pabado nuntan sondadon buanacsho isash, ¿Atotsi nasho isash isadaidbo nëid cuesunete bumpeba? Ambi naid icsa chuimenuen comapenen paëmbocnoc cuesta, quequin sondado chuiquidën chuipondash.

²⁵Adoaquien cueste nidtsinacno Pabado buanshun cuestebëdta tanenuen podon bedshun shoyonaqui Pabado: —¿Atotsi canumbini shoyonquin nai? ¿Domanobon nidaidëshun tishaid icsho ëmbi naid chuimiabida ëbi cuese?

—quepondash Pabado sondado chuiquid chiec.

²⁶Adsho tantiash sondado chuiquid puduanec nidec abi chuiquid comandante caid yacno choash: —¿Atotsi natseno? Bëboed: “Domanobon nidaidëshshun tishaid nebi,” quiosh —quepondash sondado chuiquid comandante chiec.

²⁷Adoquien Pabado yacno nidshun comandanten: —¿Domanobon nidaidëshshun tishaidta mibi nepe? —capondash Pabado chuiquin.

Adoquien: —Ai, domanobon nidaidëshshun tishaidquio nebi —quepondash Pabado.

²⁸Adoquien: —Domanobon nidaidëshshun tishaidpenquio ëbi icsho, ¿ada adquid ëbi icmetsia? quequin piucquid meniondambi —quepondash comandante Pabado chiec.

Adoquien: —Con tan tishaid yec domanobo nebi —quepondash Pabado comandante chiec.

²⁹Aden Pabado chuisho tantiash ambi naid chuimenuen cuestsemboedo nidanepondash. Aden chuisho tantiash Domanobobi Pabado shocosh bucn mëtanemechitombi, quequin tantiec comandante dacuëdpondash.

Isadaidbo tsusiobo iccuededacno Pabado buanaid

³⁰Adshumbic, badiadshun ambi mëtanemeboed chimeshun isadaidbo tsusiobo iccuededacno Pabado buamepondash. ¿Atotsi nasho isash isadaidbo nëid cuesunete bumpeque? Tantiabono, quequin comandanten Pabado buameshun isadaidbo dadpen iccuededacno puduedmeshun nënantanquio Pabado nidtomepondash.

23 ¹Aden nidtomiaquien isadaidbo tsusiouidi comapenen isec: —Utsibo, ëmbi naid chuibanu. Tantiata.

Nuquin Papan isnubi ambi naden nata quequin chiaid nabanquidquio icteniobi —quepondash Pabado.

²Aden chuisho tantiashun: —Muaquin chieque. Èccues —Isadaidbo tsusio dapan Ananiasën cac Pabado dayunquio icquidën Pabado èccuespondash.

³Aden èccuesaquien Pabado: —Mibi icsaid nibëdaccimboec mibibi tsadsho Nuquin Papan mibi èccuesmendac. Nuquin Papan naden nata quequin chiaid tantiembi, quequimbi ëbi èccuesmequin Nuquin Papan chiaid ma mimbi niacpaboc —quepondash Pabado isadaidbo tsusio dapa caic.

⁴Aden Pabado chuisho tantiash aton dayunquiocquidquio: —¿Aden Nuquin Papan isadaidbo tsusio dapa icta caid chiah dacuëdenquioda ique? —quepondash.

⁵Adoquien: —Èmbi chuiboed Nuquin Papan isadaidbo tsusio dapa icta caid nec, quequin tantiamboocombi. Aidi Nuquin Papan isadaidbo tsusio dapa icta caidquio icsho ëmbi chuibocpaden chienquio ictsenombi. Mimbi abimbo chioc. Èmbi mibi chuiquid icmiaid icsamboen chienda, quequin Nuquin Papan dada uamiampic —quepondash Pabado.

⁶Aden chuishumbic, iccuededquid utsi-utsiec saduseyobo icnubi utsi-utsiec padiseyobo iquec, quequin tantiash: —Tantia. Chuinu. Padiseyobo nebi. Èbibi padiseyobon tishmiaid nebi. Adquid yec, Unëshash uincuentequid iquec, quequin tantiaquid nebi. Aden tantiaquid icsho, Icsambocquid nec, quequin ëbi mimbi chiec —quepondash Pabado iccuededquido caic. ⁷Aden Pabado chiaquien saduseyobo, Uinciente nibëdendac, quequin ëmbi tantiacpaden Pabado tantienquio iquec, quec comapenec

onquecuedednubi padiseyobo,
Uincuente iquendac, quequin ëmbi
tantiacpaden Pabado tantiec, quec
comapenec onquecuededpondash.

⁸Unëshash uincuentequid nibëdec, quec
saduseyobo. Adecbidi, Nuquin Papan
uaid mayan bëdabëd ambi uaid utsi
mayan nibëdec, queoaic saduseyobo.
Padiseyobo, Uincuentequid iquec,
quec. Adecbidi Nuquin Papan uaid
mayan bëda, ambi uaid utsi mayambidi
iquec, queoaic.

⁹Aden ambi tantiacpaden chuibanec
comapenec onquec saduseyobobëd
padiseyobo natiambo
cuëdcuededpondash. Adec onquec
cuëdcuedednubi padiseyobo, Nëid dada
bëdambocquid nec. ¿Mayanën chioshi,
queshodambi muc nec capadi?
Adecbidi, ¿Nuquin Papan uaid mayan
bëdan chioshi, queshodambi muc nec
caoapadi? Padenquo iquembi. Pabado
chuiboed abimbo iquec, quepondash
padiseyobo saduseyobo caic. ¹⁰Adec
comapenec onquec natiambo
chushcanansho tantiashun comandanten:
—Podon shoyonquin canite dëchicnush
queshun mënchicshun shubu nuntan
bëoata —cac sondadon Pabado
mënchicpondash.

¹¹Aden mënchicshun shubu nuntan
sondadon yuedaquien Pabado ushash
badiadash padpidec inchëshën Pabado
ushnubi Nuquin Icbo chopondash:
—Mimbi Edusaden yacnoshon ëbi
chuibanacpaden shubu dadpen icquid
Doma caid yacnoshontsen mibi
chuibamembique. Dacuëdenquo yec
dayacquio icta —capondash Nuquin
Icbon Pabado chuiquin.

**Pabado cuesunenu quequin
ompoquin cainaid**

^{12,13}Adec Pabadobëd Nuquin Icbo
onquebombien badiadash isadaidbo

40ted Pabado cuesuniabi icquin buna
mëmunembi, quequin abimbo chiembi,
quepondash. ¹⁴Aden nanu quiash
isadaidbo tsusiobo yacno nidash:
—Pabado cuesuniabi icquin buna
mëmunembi, quequin muenquiocquin
chuibanombi. ¹⁵Ëbitedishun ompoquin
Pabado cuesunenuquin cainubien
mimbi comandante chuitanta caid
naden chuimeta: Pabado naid
bëdamboen tantianuna. ¿Ada padpiden
isadaidbo tsusiobo iccuededte shubuno
bëmeoatsia? quequin chuitan Pabado
bëmeoatsiashe. Aden Pabado sondadon
bësho Pabado cuesunenu
—quepondash Pabado cuesunenuquido
isadaidbo tsusiobo caic.

¹⁶Aden aidon chuishobien Pabado
piaquën tantiashun Pabado yacno
nidshun chuioapondash aton piaquën.

¹⁷Adoquien Pabado sondado 100ted
chuiquid cho, cata cac nidshun aton
piaquën chiac Pabado yacno sondado
chuiquid chopondash. Adec chosho isun:
—Nëid con piac nec. Aidi comandante
chuite buneque. Aid yacno buanta
—Pabado cac ¹⁸buampondash.

Aden Pabado piac comandante
yacno buanash sondado 100ted
chuiquid: —Quënën nauedboed Pabado
cuëmëdquidën ëbi chomeshun: “Con
piac comandante chuite buneque. Aid
yacno buanta,” cac bëombi
—quepondash sondado 100ted chuiquid
comandante chiec.

¹⁹Aden chiaquien Pabado piac
mëdianquin uidictsëc buanash
comandante: —¿Atotsi ëbi chuinuec
cho? —quepondash comandante.

²⁰Adoquien Pabado piac:
—Badiadshun isadaidbon ambi namiaid
mibi yacno chomec. Aden chomiac
nëmbo choshon naden chiec: “¿Ada
isadaidbo tsusiobo iccuededte shubuno
Pabado mimbi bëoapatsia? Aidën naid

chuibansho bēdamboen tantianuna,”
 quiosh cata, quequin chomiosi,
 quequin mibi chiendac isadaidbo
 tsusiobon chomiaid. ²¹Isadaidbon
 muaquin chiendac. Con cu Pabado
 buamenuen mibi aden chiendac.
 Comandanten Pabado bēmetsiash,
 quequin tantiaquin Pabado con cu
 cuesunenuequin caineque. Nidmenda.
 Con cu cuesunenuequid: “Pabado
 cuesuniabi icquin buna mēmunembi,”
 quiosh. Con cu cuesunenuen nēbimbobi
 podqued cuēmanshun ompodshon
 cainec —quepondash Pabodon piac
 comandante chiec.

²²Adoquien comandanten:

—Isadaidbon chiaid mimbi chuibod
 utsi chienquo yec nidec nid
 —capondash Pabodon piac chuiquin.

²³Aden Pabodon piac nidmeshun
 sondado 100ted icquido chuiquid daēd
 chomias comandante nadpondash:
 —Ēnden inchēshan Sesadeya yacno ma
 mibēdi mimbi namiaid sondado 200ted
 nidnu mitsana buanuequin nacnenta
 cata. Adomboembidi, cabayo catsadquid
 70ted icquido chuiquin nacnenta,
 quequin chuiota. Adomboembidi
 shocosh sianten senuequin sananquid
 200ted icquido chuiquin mitsana
 nacnenta, quequin chuiota.

²⁴Adembidi Pabodobēd icquido
 cobednadod Pediques yacno buanun
 cabayo nacnenta —capondash
 comandanten sondado 100ted chuiquid
 daēd chuiquin.

²⁵Aden chuishumbic naden
 comandanten dada uapondash Pediques
 cobednadod caid chuiquin:

²⁶“Quēdaudio Disias nebi. Chuiquid
 dapa cobednadod caid, Pediques, mibi
 bēdambocquid icsho chuinu. Pabado
 ěmbi bedboed mibi yacno buamenuen
 dada uaimbique. Ēmbi dada uaid isec
 onqueta. ²⁷Nadquid iccoshe. Tantia.

Chuinu. Pabado isadaidbon bedshun
 cuesunetsensho isun, Aidi domanobo
 nec, quequin utsin chiacpaden
 tantiashun sondado dadpembēd choquin
 mēnchiccombi. ²⁸Aden

mēnchicshumbic, ¿Atotsieshun Pabado
 cuesunete bumpec? quequin tantianuen
 isadaidbo tsusiobo iccuededacno
 Pabado buamiombi. ²⁹Ambo

buameshun isadaidbon chuisho
 tantiapombi. Aton tusedpabon naden
 nata quequin chiaid niacquid Pabado
 nec, quequin isadaidbo tsusiobon
 chuiposh. Adembidi, ambi nabanaid
 Pabodon chuisho tantiashun quēnēn
 nauedenquioctiadquidi

nauedmepondash, quequin
 tantiashumbi quēnēn nauedmeopombi.

³⁰Aden Pabado quēnēn

nauedmeoashumbic, Podqued
 cuēmanshun Pabado cuesunenuequin
 isadaidbon cainec, qesho tantiashun
 badedquio mibi yacno buamiombi.
 Adembidi, Pabado icsambocquid nec,
 quequin aid cuesunenuequido mibi
 yacno nidmembi. Adoac ma ambibi
 Pabodon naid icsa mibi chuipanuna.”

Aden Pabado chuiquin dada uashun
 ambi dada uaid Pabado buanquid
 menequin: —Pabadobēdta nēid
 cobednadod Pediques menenuen buanta
 —capondash comandanten.

³¹Aden comandanten dada uashun
 meniac aidēn chiacpaden Pabado
 buanec sondado aid inchēshēmbi shubu
 dadpen icquid Antipatidis caid yacno
 chopondash. ³²Ambo choash
 badiadshun sondado cabayo
 catsadquidonuidquio Pabado buanec
 nidnubi sondado utsitedi aubidi
 nidaneoapondash. ³³Adec Pabado
 buanec nidequi Sesadeya yacno
 choshon abi chuiquid comandanten
 Quēdaudio Disiasēn dada uaidbēdta
 Pabado Pediques menepondash cabayo

catsadquidon. ³⁴Aden meniaquien dada uaid isbanash: —¿Mitsicquid nidaidën icquid mibi ne? —capondash Pediquesën Pabado chuimenuen.

Adoaquien Pabado: —Nidaid Sidisia caid yacnoshon tishaid nebi —quepondash.

³⁵Adoaquien: —Mibi icsambocquid nec, quequin chuiquido isadaidbo choacsho mimbi nabanaid chuimembi —quepondash Pediques Pabado chiec. Aden chiec onqueshumbic ënden chuiquid dapa Edodes cuëmëdquidën, utsibo abi chushquiaid chuimiondaid shubuno Pediquesën buamiac ashunquio Pabado nauedsho isun: —Puduenanec cuenushe ista —capondash sondado chuiquin.

**Pediquesën tantianubi
Pabadon ambi naid chiaid**

24 ¹Adashic, 5tedec ushsh isadaidbo tsusio dapa Ananiasbëd tsusio utsibo Pabado icsaid Pediques chuinuec Sesadeya caid yacno chopondash ambi tantiacpaden chuinuequid Tedtudo cuëmëdquid bëquin. ²Aido chosho isun Pediquesën Pabado chomiasho isun isadaidbo tsusiobon tantiacpaden chuinuequidën Tedtudon naden Pediques chuipondash: —Mibi chuinu. Tantiata. Chuiquid bëdamboquid icquin mimbi bëdamboen nabanaic isadaidbo bëdamboec tabadec. ³Mimbi aden nabansho isun, Bëdamboquid mibi nec, quequin mibi chiembi. ⁴Aden chuishun mibi chieshmenquiocnuequin isadaidbon chushcaboed badedquio chuinu. Tantiata.

⁵“Nëid mimbi bëmeboed Pabado caidbëd ictiapimbo iquebi. Nëid Nasaded yacno iccondaic tantiaquido tsusio nec. Aidëmbi nidaidtedi yacno nidshun ambi tantiaid chuibanquin

isadaidbo comapenen chushcamequin cuëdcuededmiac cuëshëd-cuëshëdposh.

⁶Aidëmbi Nuquin Papa tabadte shubu uashunaidën puduedtemaid matses puduedmesho isun Pabado bedpombi.

Bedash Nuquin Papan naden nata quequin chiampicpadembi cuidte bumpobi. ⁷Aden cuidnu quenubien comandante Disias cuëmëdquid choshon Pabado mënchicanquin buamposh.

⁸Pabadon ambi naid chuisho mimbibiti tantiashun, Isadaidbo tsusiobon abimbo chiosh. Icsambocquid nec, quequin mimbi chuiopatsiac —quepondash isadaidbo tsusiobon tantiacpaden chuinuequid Pabado icsambocquid nec, Pediques camenuc.

⁹Aden Tedtudon chuiquin nainan isadaidbotedi, Ai, Tedtudon chiacpadec iccosh, quequin chuibededpondash.

¹⁰Adsho tantiashun, Onqueta, quequin mëdante uiccaquin Pediquesën ismiac Pabado naded onquepondash:

—Chuiquid dapan tantiata. Èmbitsen chuinu. Dadpen seta matamequin con matses isadaidbo abi chushquiaid tantiashun mimbi bëdamboen tantiacpaden namedenioc. Adquid mibi nec, quequin tantiaquin, Èmbi naid chuibanec bëdambo iquebi, quec dacuëdenquio yec onquebique. Tantiata.

¹¹Edusaden yacno choash ambobi 12tedec ushobi. Èbi anoshon isboedon, Abimbo iquec, quequin nëmbo choshon mibi chuitsiash. Edusaden yacno choash Nuquin Papa shubu uashunaidën puduedec Nuquin Papa tantianuec choapobi. ¹²Aambo puduedash utsibëd chushcananenquio yec tabadsho istuidash, Icsambocquid nec, queposh. Adembidi chuibanquin utsibo nëishmequin chushcamenquio iccombi. Pabado icsambocquid nec, quequido Pabadon chiaid abimbo iquec, quetiadquidi nec. ¹³Èmbi naid Tedtudon

chuibamboed, Abimbo iquec,
quetiapimbo iquec tsusiobo.

¹⁴Nëiduidtsëqui abimbo iqueque.

Chuinu. Tantia. Nuquin tsusedpabo
chuimiapaden Nuquin Papan chomiaid
tantiesä isadaidbo tsusiobo icnubi aid
tantiaquid nebi. Adembidi Nuquin
Papan naden nata quequin chiaid dada
uamiampid tantiaquin nabanquidquio
nebi. ¹⁵Adembidi, matses ünësacsho
Nuquin Papan uincuemiäc abi
tantiaquid abëdi tabadnubi abi tantiesä
chian anëdënquequid nësecaindac,
quequin tantiembi isadaidbo tsusiobon
tantiäcpadembi. ¹⁶Aden tantiaquin
Nuquin Papan, Bëdamboen mimbi naoc,
capashuni, quequin bëdamboen nabanec
tabadec nebi. Adembidi,
matestedishun, Bëdamboen mimbi
naoc, capashuni, quequin
adomboembidi bëdamboen nabanec
tabadec nebi.

¹⁷“Adequi nidaid utsi-utsiec yacno
capucuenec tabadcuenequin, Edusaden
yacnocquid isadaidbo bunec tabadec,
quesho tantiasch piucquid menenuc
choapobi. Adembidi, Nuquin Papan
bëdamboen dayun uabenioshi, quequin
piucquid menenuc choapobi. ¹⁸Aden
menenuc abi tabadte shubu
uashunaidën puduedash ëbentsëqui
capusho ëbi chushcaboedon istuidposhi.
Bëdamboec tabadsho istuidposhi. ¹⁹Ëbi
capusho istuidquido isadaidbo nidaid
Asia caid yacnoësh choquido niosh.
Aido, Pabado icsamboec tabadsho
isombi, quepac caosh. Ambi chiaid
abimbo icnuc nëshuntsen
adomboembidi chuitiadquidi nec.

²⁰Adembidi isadaidbo tsusiobon:
‘Padiseyobo yec bëdambocquid nec,’
quequin ëbi anoshon chiacpadembidi
nëshuntsen adomboembidi
chuiotiäquidi nechitec. ²¹Anoshon
nëiduidtsëqui chiec comapenec cuëdobi:

‘Unësash uincuentequid iquec,’ quequin
chuisho tantiaschun, Icsambocquid nec,
quequin isadaidbo tsusiobon ëbi mibi
chiec caimbi —quepondash Pabado
Pediques chiec.

²²Aden Pabado chuisho tantiasch
Pediques tantiauidquid iquec: —Nëbi
mimbi aidtedquio chuibansho
tantiembi. Comandante Disias nëmbo
choan mibi padpiden chuimembi
—quepondash Pediques Pabado chiec.

²³Aden chuishumbic naden Pediquesën
sondado chuipondash: —Shubuno
Pabado buanshun puduednushe
queschun ista. Abi menenucquid abi
isnuequid chedo chosho isun yuedta
—quepondash Pediques ambi Pabado
ista caid chiec.

²⁴Adashic, daëdpactsëc ushash
Pediquesbëd aton chido, Dusidia
cuëmëdquid chopondash. Aton chido
isadaidbo icpondash. Adec aton
chidobëdi choshon abi yacno
Pediquesën bëmiäcsho ambi tantiaid
Esuquidistu Pabado chuibanac
Pediquesën tantiauidpondash. ²⁵Aden
chuibanquin Pediques Pabado
nadopondash: Utsin abi utsibëd
chushcananäid chuibanacsho Nuquin
Papan chiacpaden aido nametiäc,
quequin chuipondash. Adembidi,
Icsamane quequin Nuquin Papan
chiacpadenuidi nabanta, quequin
Pediques chuioapondash Pabado.
Adembidi, Esuquidistu tantienquio icsho
chian anëdënquequid Nuquin Papan
nësecanushe quequin Esuquidistu
tantiäc, quequin Pabado
chuioapondash. Aden Pabado chuisho
tantiasch: —Padi. Ëmbi naid nibëdsho
isun padpiden chuimenuen mibi
bëmeoaimbique. Nëbi nidec nid —cac
Pabado nidpondash. ²⁶Adshumbic,
adembidi abi yacno Pabado Pediquesën
bëmeded-bëmededpondash. Nidtiäquido

icquin piucquid Pabadon ëbi menetsiash, quequin tantiaquin Pabado bëmiash aibdëd Pediques onquepondash.

²⁷Adashic, seta daëd matamiash Podsio Pesto cuëmëdquid cobednadod yampondash. Aidi cobednadod yanuc nidnuequin, Nidta, cainquiocquin Pediquesën Pabado shubu nuntan niampondash naden tantiaquin: Pabado shubun nauedshun ëmbi niansho isash, Bëdamboquid nec, quequin isadaidbon ëbi cain chuibededpec, quequin Pediquesën Pabado shubun nauedshun niampondash.

Pabadon ambi naid Peston chuimiai

25 ¹Pesto cobednadod yanash Sesadeya yacno choash 3tedec ushanec Edusaden yacno nidpondash. ²Adec Pesto Edusaden yacno choash tabadsho isadaidbo tsusiobo, Pabado chushcaquido: ³—Ëbitedi bëdambo icmenuequin Pabado Edusaden yacno ada bëmeoatsia? —quepondash Pesto chiec. Pabado bësho cuesunenuequidon cainshun cuesunepec, quequin tantiaquin isadaidbo tsusiobon aden Pesto chuipondash.

⁴Aden chuisho tantias Pesto: —Sesadeya yacnoshon nauedaid Pabado iquec. Ambo nidebi. ⁵Pabadon icsamboen naosh, quec utsi-utsiec ëbëdi nidshun anoshon Pabadon naid icsa ëbi chuita —quepondash isadaidbo tsusiobo caic.

⁶Adashic, 10tedec ushash Edusaden yacnoësh puduanec nidec Pesto Sesadeya yacno choash ushash badiadash matses chushquiaid tantiec tsadte dapan tsadtoshon Peston Pabado bëmepondash isadaidbo tabadnubi.

⁷Aden bëmiacsho isash Pabado dëcatec isadaidbo Edusaden yacnoësh chobedo Pabadon naid chiec abimbo chiacbimboec onquecuededpondash.

⁸Aden isadaidbon chiaquien: —Ëmbimbo isadaidbon naden nata quequin chiaid niacamboccombi. Adembidi, Nuquin Papa tabadte shubu uashunaid yacno nidash aid shubun puduedtemaid isadaidpembobëd puduedambocobi. Adembidi, empedadod Doma yacno tabadquid, Sesad cuëmëdquidën chiaid niacamboccombi —quepondash Pabado.

⁹Adoquien: —ËEdusaden yacno buanec anoshon adomboembidida isadaidbo tsusiobo chuiotsia? —quepondash Pesto Pabado chiec. ËEdusaden yacno Pabado ada bëmeoatsia? quequin isadaidbon chiacpaden nanuec Pesto adpondash.

¹⁰Adoquien Pabado: —Domanobo ancaquidën empedadod caidën, Sesad cuëmëdquidën, Mibi yacnoquido bëdamboen tabadmequid icta, caid icquin mimimbo chushcananquid bëdamboen tabadmeta. Isadaidbo icsamboen tantiaquin nainquioccombi. Abimbo Pabadon chiec, quequin mimi tantiec. ¹¹Icsamboquidquio iquec Pabado unës uame, qesho tantias, Adoanenda, quenquioctsiabi. Isadaidbon abimbo chiacbimboen chuisho tantias, Pabado buanshun cuidta, quetiapimbo mibi iquec. Isadaidbo yacno buanta, mibi quenec, Empedadod ëmbi naid chuite bunebi, quequin dada uaindambi —quepondash Pabado Pesto chiec.

¹²Aden Pabadon chuisho tantias Pesto udictsëc nidash abipadquidbëd onquiash choash: —Sesad ëmbi naid chuite bunebi, mibi qesho aid yacno mibi buamenuna —quepondash Pesto Pabado chiec.

ËAtotsimbi Pabado napatsia? quequin Peston Aquidipa caid

¹³Adashic daëdpectsëc ushash ancanquid utsi Aquidipa cuëmëdquidbëd aton chuchu Bedenise cuëmëdquid Pesto isedec chopondash. Sesadeya

yacnocquido cobednadod Pesto yanosh, quequin chiac aid isec chopondash.

¹⁴Adec isedec choash dadpen ushec tabadsho isash Pabado chiec Pesto nadpondash: —Pediquesën quënën nauedmiaid Pabado cuëmédquid chuinu. Tantiata. Aidi abi iquec shubu nuntan.

¹⁵Aid ambo icnubi Edusaden yacno nidobi. Ambo ëbi choacsho isun, Pabado icsambocquid neque. Aidi unës uata, quequin isadaidbo tsusiobon chuiposhi.

¹⁶“Adoaquien, Mibi abëdi chushquiaid Pabadontsen chiambo noc unës uata quetiapimbo iquebi. Domanobon naden nata quequin chiacpadpenquiocquin adotiapimbo iquebi, quequin isadaidbo tsusiobo chiombi. ¹⁷Aden chiac nëmbo choshon abi chushquiaid aidon chuisho tantiec tsadnuen Pabado bëmio mbi.

¹⁸Aden Pabado bëmiacsho ëmbi tantiacpaden abi chushcaquidon Pabaton naid chienquiocposh. ¹⁹Ëmbi tantiaidpenquio Esuquidistu unësash uincuenaid Pabaton tantiaid icsambo iquec, quequin chuiposhi isadaidbo tsusiobon. ²⁰Aden ambi tantiaidquio bédamboen tantienquio yec nadpobi Pabado caic. Min matsesën naden nata quequin chiaid tantienquio iquembique. Edusaden yacno buamiac mimbi naid anoshon chiac bédambo ictsiash, quequin chiombi. ²¹Adoaquien: ‘Empedadod, Sesad yacno nidshun ëmbi naid chuitiadquio iquebi,’ queposh Pabado. Aden chiac quënë yacnoshon aid puduedmetiapimbo iccobi. Nëmbobi Pabado quënën tabadec —quepondash Pesto Pabado chiec Aquidipa tantiamenuequin.

²²Adoaquien Aquidipa: —Ëbi aidën chuibansho tantiate bunebi —quepondash.

Adoaquien Pesto: —Badiadshun aidëmbi chuisho mimbi tantiendac —quepondash.

Aquidipa ambi naid Pabaton chiaid

²³Aden Peston chiaquien badiadsh bédaidquio dasiuidash Aquidipabèd aton chuchu choash iccuededte quënën puduedash sondado chuiquido chuiquid utsibobèd aid daëdi tabadpondash. Aido tabadsho isun Peston Pabado bëmepondash. ²⁴Bëmiac Pabado nënantanquio nidtonobi Pesto nadpondash: —Ancanquid Aquidipan mibèd iccuededquidon ëmbi bëmeboed mibitedishun isec. Aidi chuinu.

Tantiata. Isadaidbon, Nèid dada icsambocquid neque. Unës uame, quequin chioshi. Ëbi Edusaden yacno choacsho isun adoposh. Adomboembidi nëshun Sesadeya yacnoshontsen aidombidi chuioposhi. ²⁵Aden chuisho tantiaishun nëid ambi naid chuimeoapombi. Aden Pabaton chiaidtsen tantiaishun, Nèid unës uatiapimbo iquebi, quequin tantiapombi. Aden ëmbi tantianubi, Empedadod yacno nidshun ëmbi naid chuite bunebi, quequin Pabaton chuiposhi. Adoac Doma yacno aidi buamenuna. ²⁶Aden buamenuen ÷atotsimbi dada uaquin empedadod chuiopatsia? quequin tantienquiocquin Pabado ambi naid chuimeoaimbi ma aden chiac mibitedishun tantiaoapanuna. Aden tantiaishun, Naden dada uata, mimbi cac dada uatsiambi. ²⁷Ambi icsamboen naid nibèdnuc Doma yacno buametiapimbo iquebi —quepondash Pesto ancanquid Aquidipabèd iccuededquido chiec.

26 ¹Aden Peston chiaquien: —Mibibi onquequin mimbi naid chui. Tantiyanu —quepondash Aquidipa Pabado caic.

²Adoaquien Pabado nadpondash: —Ancanquid dapa Aquidipa mibi tabadnubi isadaidbon ëbi chushcaid

chuiبانec bēdambo iquebi. ³Isadaidbon naden nata quequin chiaidbēdta abi onquiaid mimbi tantiec. Aden tantiaquid mibi icsho ěmbi nabanaid ěmbi chuibansho tantiata. Chuinu.

⁴“Ĕbi tishondacnoēsh canidosho con matsesēn isadaidbon istenepondashi. Nēbi caniquid iquec Edusaden yacno choash tabadsho adembidi aidon istenepondashi. ⁵Ĕbi padiseyobo icquin padiseyobon naden nata quequin chiaid niaquesa nebi. Padiseyobon, Pabado adquid nec, quequin chuitiadquidi nec. ⁶Unēsash uincuente iqueque. Aid cainec tabad, quequin Nuquin Papan nuquin tsusedpabo chiampicpaden chuiquin dada uamiaid tantiaquid ěbi icsho isash, Icsambocquid nec, quec isadaidbo. ⁷Nuquin tsusedpa Acobo isadaid caidēn madobon tsyuecquidon, Unēsacsho Nuquin Papan uincuemete iquendac, quequin chiaid tantiaquin caimbudec. Aidon cainacpaden cainembi, qesho, Icsambocquid nec, capebi isadaidbo tsusiobon. ⁸Nuquin Papan nadatiambocquīn uincuemete chiaid mimbi tantienquo icpe.

⁹“Ĕnden ěmbitsen tantiauidquin shubu dadpen icquid Nasaded yacno ictened, Esus cuēmēdquid tantiaquid icsambocquid nec, quequin unēs uamembi, qeshun adobampondambi. ¹⁰Edusaden yacnoshon adquid dadpen mēyamepondambi. Isadaidbo tsusiobon, Adota, cac ěmbibi Esus tantiaquid bēdamboquid icsho bedshun quēnēn nauedmepondambi. Unēs uanu, qesho tantias, Ai, unēs uatiadquo iqueque. Adota, quepondabi. ¹¹Nuquin Papan chiaid chuibante shubu utsi-utsiec yacno nidted-nidtedondabi aido mēyamenuc. Esus, Nuquin Papan madopenquo nec, aido camenuen mēyamepondambi. Adembidi nidaid utsi yacnoshontsen adquid istuidshun mēyameoapondambi.

¹²“Adobanec isadaidbo tsusiobon, Adota, quequin dada uaid buanec nidaid Sidia caid shubu dadpen icquid Damasco caid yacno nidondabi. ¹³Adec nidquimbi ushē cuembo yanec ushē comapenec chēnquequidēn ěbēd icquidobēdta ěbi dēcatesho isondambi. Abimbo iquec, quequin mibi chuinu. Ancanquid dapan tantiata. ¹⁴Aidēn dēcatiac ěbitedi nidaidēn uebudcuededondabi. Ade uequimbi con matsesēn onqueten ebeyon onqueten abucuēsh onquesho naden tantiondambi: Saudo, ʔatotsieshun ěbi tantiaquido mimbi mēyampe? Ĕbitsen mēyantiadpambocquin mimbi aido mēyanec, quec onquequin chiondashi. ¹⁵“Adoquimbi: ‘ʔTsutsi mibi ne, Icbo?’ caondac.

“Adoquien, Mimbi mēyanaid Esus nebi. ¹⁶Ĕmbi namiaid mibi icmenuec chobi. Esus isombi, quequin ʔěbi chuibeneta caid nēbi mibi yanec? Ĕbi chuibenequin mimbi isaidbēdta ěmbi yuecshun ismetequid chuibeneta. ¹⁷Aden ěbi chuisho mibi cuesunete bunquid isadaidbobēd Isadaidpembo icsho mibi mēnchiquendambi. Adquid chuibanta, quequin mibi nidmembi. ¹⁸Aden chuibanac utsin-utsinquin pashuacbimboecboedēmbi tantiendac. Icsambocquid nebi, quequin tantienquioeboedi, Icsaobique. Ĕbi pauc, Papa, quependac adquid. Mayan icsan yua icboedi Nuquin Papan bacuē iquendac. Adquid yanash abi icsaid paucac Nuquin Papan bēdambo icmiaid ěbi tantiaquid utsibēd iquendac, quequin Esusēn chuipondashi.

¹⁹“Aid abucuēsh onquesho tantiashun chieshenquiocquin chuibeniombi caimbi, mibi chuiquin Aquidipa. ²⁰Damasco yacnoshomba chuibanondambi. Anoshomba chuibanshumbic Edusaden

yacnoshontsen chuibanooandambi. Anoshon chuibanshumbic nidaid Udeya caid shubu utsi-utsiec yacnoshontsen chuibanondambi. Isadaidboba chuibanombi. Isadaidpembotsen chuibanombi. Mibi icsaid ënquin Nuquin Papa abimbo tantiaquin ambi chiacpaden nabanta, quequin chiombi. ²¹Aden chuibanquid yec Nuquin Papa tabadte shubu uashunaid yacno puduedash capusho isun isadaidbon bedshun cuesunetsenoshi. ²²Padnuen ëbi dayun uaquid Nuquin Papa icquin isadaidbon cuesunenushe qeshun cudasëmposhi. Adoac nëid ushënquo mibëdtabi mimbi namiaido mibi chuibanec nebi, ancanquid Aquidipa. Moisesën, Nadquo iquendac, quequin dada uampicpaden chuiquid nebi. Nuquin Papan chuimiaid utsibon, Nadquo iquendac, quequin chiampicpaden chuiquidbidi nebi. Aidon chuipampid nadquo iqueque. Tantia. ²³Nuquin Papan Chomiaid, Quidistu, mëyanac unësash uincuenaid yec ëbi tantiaquid ëbëdi tabadendac, quequin aton matsesbëdta isadaidpembo Quidistun chiendac, quequin chiampicpadec chopanëdash —quepondash Pabado iccuededquido chiec.

²⁴Adec Pabado onquesho tantiasch: —Min tantiate icsabudash mibi onquec. Mimbi tantiaid dadpen iquec tantienquo yec onquechitequien mibi nec —quepondash Pesto Pabado caic.

²⁵Adoquien Pabado: —Bëdamboen tantiec onquebi. Ëmbi chiaid abimbo iquec, caimbi mibi ancaquid Pesto.

²⁶Ancanquid Aquidipan ëmbi chuibamboed abimbo iquec quequin tantiec. Aden aidën tantiascho dacuëdenquiocquin aid chiombi. Ëmbi chuibamboed ompoenquiocquin isquidon chuisho aidëmbi

tantiapondash. ²⁷Nuquin Papan ambi naden nanun chiaid dada uamiampidon chiaid chuisho mimbi tantioc —capondash Pabado Aquidipa chuiquin.

²⁸Adoquien Aquidipa: —ËMimbi chuiboedtedtsëqui tantiashtabi Esuquidistu tantiaquid yampe? —quepondash Aquidipa Pabado chiec.

²⁹Adoquien Pabado: —Esuquidistu tantiaquid ëbipadquid mibëd iccuededquidtedibi Nuquin Papan icmepashun. Nëid ushënquo daëdpactsëc chiombi. Aidtedtsëqui chiac tantiatiapimbocsho isun yuen chuibantsiambi ma Esuquidistu tantiaquid mibitedi yanueshun. Padnuen ma mëtaniaid ëbipadquid ma mibitedi iquenquiocpanuna —quepondash Pabado.

³⁰Aden Pabado chuibanaquien ancanquid Aquidipa nidtopondash. Nidtocho isash Pestobëd Bedenise iccuededquid utsibo chedo nidtocuededpondash. ³¹Adec nidtocuededash puduenash onquecuededec: —Chuibamboed icsamboen nainquioccosh. Adoenquiocsho unës uainquiocsiad. Adembidi ënden quënën nauedenquiocpatecnëdan —quepondash ancanquido.

³²Aden chiasch: —Empedadod chuite bunebi Pabado quiambocsho quënën nauedacnoshon aidi mimbi nidmetsenosh —quepondash Aquidipa Pesto chiec.

Doma yacno Pabado buanaid

27 ¹Adashic, Nëbi mëtaniaido nidaid Itadia caid yacno buanac bëdambo iqueque. Pabadoëdta mëtaniaid utsibo buanta, quequin sondado 100ted chuiquid Peston chuipondash. Aid sondado 100ted

chuiquid Udio cuëmëdquid icpondash. Domanobo ancaquid tantiec aid cuëmëdacpadec Aucustobo nebi quec sondado 100tedbëdi abi chuiquid abibi cuëmëdpondash. ²Aden buanta cac Pabadobëdta utsibo bedshun acte cuëmëmano buanshun cano dapa Adadamitio cain cuënaid istuidpondash. Aid cano dapa istuidashien, Ico, nidaid Asia caid cuëman shubu dadpen icquid utsi-utsiec yacno nidtuidëbi, quequin chuisho tantias Pabadobëd antabëdtopondabi. Adec antabëdtosho isash puduampondash. Pabadobëd icquid utsi Adistadico icpondash. Aidi nidaid Masedonia caid shubu dadpen icquid Tesadonica caid yacnoësh choquid icpondash.

³Adec cano antabëdtoanec nidquin shubu dadpen icquid Sidon caid yacno buampondash. Ambo choash, Mitsana nibëdeque. Mibi yuedquid yacno nid. Aidon mibi menetsiash, quequin Pabado bëdamboen tantiaquin sondado chuiquidën, Udion, chuipondash.

⁴Adshumbic Sidon caid yacnoësh puduanec nidquin potesho cunquequidën bëquedtuicac ushë choacmi cuenadtanquin acte nënantan nidaid nactëdquid Chipide caid datampondash. ⁵Adembi nidaid Sidisia caid ëquë datanash nidaid Pampidia caid ëquëtsen datanec nidaid Disia caid yacno choash nidquin shubu dadpen icquid Mida caid yacnotsen canon buampondash. ⁶Ambo choshombic sondado chuiquidën cano utsin nidnuequin nibënquin istuidpondash. Nidaid Equipito caid yacno shubu dadpen icquid Adecandedia caid yacnoësh choboedi nidaid Itadia caid yacno buanu caid istuidpondash. Aden aid istuidshun Pabadobëd icquido aid canontsen antabëdtomepondash. ⁷Adec Mida yacnoësh puduanash nidquin

potec dadpen ushacsho cunquequidën cano bëquedtuicac pondash. Aden bëquedac bëdiactsëc nidquimbi shubu dadpen icquid Nido caid ëquëbitsen datambidanec acte nënantan nidaid nactëdquid Quideta caid yacno buanoapondash. Uquë cuëma utsiuc Sadmon caid icpondash. ⁸Ushë choacmi Quideta yauc cuenadtanec choquin shubu dadpen icquid Buenos Puedtos caid yacno buampondash. Udictsëc shubu dadpen icquid Dasia caid iccondash.

⁹Cunquequidën bëquedac yuenquio potiactanetsëcquien buampondash. Comapenec cunquequidën nuqui bëquedendac, quequin tantiaquin Pabadon nadopondash: ¹⁰—Chuinu. Tantiata. Nëuëshquio puduanquin potesho cunquequid dapan bëquedshun cano chic-chictsiash. Acten mentoadmane quequin potenquio iquembi, quequin chuita —capondash Pabadon sondado chuiquid chuiquin.

¹¹Aden Pabadon chiaqui sondado chuiquidën niacbidanquin cano icbobëditan cano nidmequidën nidnu quequin chiaid tantiapondash.

¹²Cunquequid dapa cunquequid Buenos Puedtos yacno tabadec iquen uanquid dapanquio nuqui iquenendac, quiash shubu dadpen icquid Penise caid yacno nidnuna. Ambo choash nuqui tabadendac cunquequid dapa cunquequid, quequin utsitedishun chuipondash.

Acte dapa potesho cunquequid dapanquio cano bëquedte

¹³Nuqui iquenendac, quequin tantiaquin bëdiactsëc cunquequid isun abi bunacpaden nanuequin cano uidën uate shocosh yuëmboquid indoash puduanquin Quideta cuëma anoentsëqui buampondash. ¹⁴Adec nidequi udictsëc

yanshobi ushë cho-choaid
 ëquëctsäcschun Quideta caid nidaid
 mananucuësh cunquequid dapa choquin
 bëquedtuïdquin ¹⁵icbon cano
 nidmetiapimbocnobi cano
 buampondash. ¹⁶Aden cunquequidën
 buanaqui acte nënantan nidaid
 nacnëdquid utsimpi Quëdauda caid
 ëquëbictsäc cuenadquimbi canompi
 cano dapan nëshun buanaid buanushe
 qeshun anandopondash. ¹⁷Aden
 canompi anandoshon cano dapa
 canchednushe qeshun uidën uaquin
 datanebanshumbic cano buante
 dashcute abi dectante cuestebëdtabi
 imbudshun dashcute chicacsho
 cunquequidën cano comapenen
 buampondash. ¹⁸Aden cano cunquequid
 dapan buanubi badiadnuc acte
 natiambo tēcçoasquesho isun ambi
 ansandoshon bëboed acte nësiapondash.
¹⁹Adshumbic 3tedec ushun bucu
 dënëshun cano dashcute indotetedi
 nësiaoapondash. ²⁰Aden nësecanec
 nidquimbi inchëshën ushëbëdta uispa
 abu chëshën bëtinacsho isenquio
 iccondambi. Adembidi badiadën ushë
 isenquio iccondambi. Dadpen ushquin
 aidtedi isenquioccondambi. Aidted
 isenquiocnobi acte comapenen
 tēcçoascapondash. Ad icsho isash,
 Bënudchitequien nuqui iquec,
 abitedimbo quecuededpondash.
²¹Adequi nuqui iquec, qeshun buna
 mëmumbededequi abitedi
 nidanepondabi. Adec canon nidnubi
 Pabado nidtoash nadpondash:
 —Chuinu. Tantiata. Quideta caid
 yacnoësh puduanenda caombi. Adsho
 tantiaboshi tantienquio yec mibi
 puduampoc. Ëmbi chiacpaden nabanuc
 mimbi ansandoaidtedi abi ictsiandac.
 Adecbidi, Unësebi, quenquio nuqui
 ictsiandac. ²²Padnuen acte
 tēcçoasquenubi nuquitedi unëshenquio

iqueque. Dacuëdenquio yec dayacquio
 icta. Canouidi canched-canchedendac.
²³Nuquin Papan namiaidquio nebi.
 Adquid icsho inchëshën ambi uaidën
 mayan bëdan ambi chomiaidën naden
 chioishi: ²⁴“Ancanquid dapa, empedadod
 caid matses chushquiaid tantiec tsadte
 yacno mibi nidtoendac. Mibi ambo
 nidmequin canon mibëd icquidtedi acte
 yacnoshon mënchiquembique.
 Dacuëdenquio yec tabad,” caposhi
 Nuquin Papan uaid mayan bëdan.
²⁵Aden aidën chiac dayacquio icta.
 Nuquin Papa ambi chiacpaden
 nabanquid nec, quequin tantiembi.
²⁶Adembidi, acte tēcçoasquequidën
 nuqui acte nënantan nidaid nacnëdquid
 cuëmano buanshun cano
 cancheshunendac, quequin tantiombi
 —quepondash Pabado canon
 antabëdtoaïdo chiec.

Cano canched-canchedaid

²⁷Adashic, Buenos Puedtos caid
 yacnoësh ënden nidboshi 14tedec ushec
 acte Adidia caid yacnoshon
 cunquequidën buampondash. Aden acte
 tēcçoasquequin buanubi
 inchëshpotsembo yanuc, Cuëma
 anoentsëquien nuqui choendac, quequin
 cano nidmequidon tantiapondash.
²⁸Aden tantiaquin, ¿Tionda iqueque?
 Tanu, qeshun yuëmbocquid shocosh
 bucu dëdectanshun pumbudquin
 tampondash. Aden tanshun,
 Aïdtiompenuio iquec, quequin
 chuipondash. ²⁹Nidaid cuënote dapa
 cunquequidën buanquin cano
 semenushe qeshun cano uidën uate
 dapa yuëmbocquid tsitsumi
 tsidectanshun acte nënequin uidën uash
 ma badiadbono quiash tabadpondash.
³⁰Adec tabadnubi cano nidmequido
 cueneshun dëbiate yacnoshontsen cano
 uidën uate yuëmbocquid

dēductanuequin abimbo chiacbimboen canompi anandoaed nēnetsempondash. Cano dapa mentoadtsiash, qeshun cuenuequin adopondash. ³¹Adec aido nidtsenubien Pabado: —Cuenuequido canompin nidnuc cano dapan nidquido nuqui mentoadendac —quepondash sondado chuiquid caic. ³²Aden Pabodon chiaquien abi dectante bucutedi sēnac canompi nēpaēdpondash cuenuequido nidtiapimbo yec.

³³Adashic, badiadte anoentsēc yanubi Pabado nadpondash: —Catodtseted ushec, Mentoadtsiabi, quequin tantiaded-tantiadedtsēcquin mimbi piambococ. ³⁴Mibi mentoadenquio iqueque. Min manēdaid abentsēc paēdenquio iqueque. Penquiocboedi unēschtomane quenquiocquin peta —quepondash Pabado. ³⁵Aden chuishumbic utsitedi ismequin pan bedshun Nuquin Papa chuishun pan cuēshun Pabodon pepondash. ³⁶Aden Pabodon pesho isun, Nuquitsen penuna, qeshun abitedishun pebededpondash. ³⁷Cano antabēdtoquido 276ted icpondash. ³⁸Aidtedshun peshumbic, Cuēmano nidec, quequin ambi sandoaid utsitedi tiedēn caniquid ēshē acte nēsiapondash, Cano yuēmbo iquec, qeshun.

³⁹Adshumbic, badiadnuc ambi isacmaid nidaid istuidpondash. Acte cuidiantanquid cuēmambi masi icsho isun ambo cano nidmenueshun ⁴⁰uidēn uaid tebanac acte nēpaēdpondash. Adembidi, cano dēbidiadmete bucutedi secudoashun cano dēbiateno buanquin dashcute shoyontanquimbi cadoapondash, Cunquequidēn acte daēd naccuēscananacno buampashuni, quequin. ⁴¹Aden cano nidmenubi cano dēbiaten masi setuidec dēchiquidtiapimbo yec cano dapa dētocquepondash. Adec dēchiadash acte

tēccoasquequidēn cano dapa canche-canchequin tauapondash.

⁴²Adsho isash sondado, Mētaniaidtedi cuentsiashe. Cuesunenu, qesho ⁴³tantiash Pabado cuesunenushe qeshun: —iChēn! —capondash sondado chuiquidēn. Aden chuishumbic, Acten tantanec mēquiadquido tantanec nidanenubi ⁴⁴tantantiapimbocquido cano cuēsh-cuēshēdaid bedbanash noadec tantaquido tsibanec nidta, quequin chuipondash sondado chuiquidēn canon antabēdtoquido chuiquin. Aden ambi chiacpadquiec nidanec mentoadenquio yec abitedi nidaid yacno choash dectatocuededpondash abitedi.

Madta caid yacno Pabado bēd icquido choaid

28 ¹Adec nidaid yacno choash dectatoneshun, Nēid acte nēnantan nidaid nacrēdquid Madta caid nec, qesho tantiabededpondash. ²Ambo tabadquidon abitedi bēdamboen yuedpondash. Iquen uampamboec ue sequenubi Madta caid yacno chosho isun cuēte dētsiadoshon, Cuēec cho, quequin chuipondash. ³Adnubic Pabadontsen cuēte tanunquiocquid bedtanquin tsindoquin masandopondash. Aden masandoaid nēdēnquiacnoēsh puduenquin nisin Pabado mēpepondash. ⁴Aden mēpiash ēcchiquidenquio yec mēdiadsho isashien anocquido: —Nisin piaid cuesunianquid nepanui. Mentoadenquio yec actenuēsh dectatoacsho nisin piac unēschtequien iquec. Abi icsaid cuidtequidien nechitec.

⁵Adec onquecuedednubien Pabodon comapenen uicac nisi cuēte dētsiadaoidēn nēpaēdpondash. Adnubien Pabado abi bēdambo icpondash. ⁶Aden Pabodon uicac nisi

paëdsho isun Pabadon mëdante mëbidisquetsiashe. Isnu, quequin isbededpondash. Aden tantiaquin yuen cainquin mëbidisquenciuocsho isash, Nisin mëpeboed utsibon papa cain cuënaid nepanui, quecuededpondash Madta caid yacnocquido.

⁷Madta caid yacnocquido tsusio dapan shubu anoentsëqui icpondash. Tsusio dapa Pudio cuëmëdquid icpondash. Aidëmbi aton shubu yacno canon choboedotedi yuedshun abentsëc chotsëcnuc ushquin ëbitedi bëdambo icmepondash. ⁸Adnubien Pudion papa chumbo yec pienec aton madon shubu nuntan uepondash. Adec Pudion papa uec qesho tantiash Pabado aid isec nidshun ashunquobi Nuquin Papa chuishumbic Pudion papa damishquin bëdamepondash Pabadon. ⁹Pudion papa bëdanacsho isash Madta caid yacnocquido nënquidbëd daicsaid chedo cho-chopondash. Èbitsen bëdametsiasih, quiaish cho-chosho aidotsen bëdamepondash Pabadon. ¹⁰Adosho isun canon choquido bëdamboen tabadmepondash anocquidon. Nidnuesho tantiashun menebampondash mitsana nibëdec quequin.

Doma yacno Pabado choash tabadaid

¹¹Adashic ushë 3ted nidmiash Madta caid yacnoësh puduampondash. Madta caid yacno choash cano icbo, Iquenoampamboec icnuc nëmbo tabadnuna, quiaish tabadash: —Nidnu. Nid —quianec aton cano antabëdtosho isun Pabadobëd icquido sondado chuiquidën antabëdtomepondash. Aid cano shubu dadpen icquid Adecandedia caid yacnoësh chopondash. Cano icbon papa cain cuënaid daëd ambi tantiaidbimboecnuc cano dëdectanquin nacnenaid icpondash. Ambi papa cain

cuënaid abentsëc Castod icnuc utsi Podus icpondash. Adembidi aton cano cuëmpondash icbon. ¹²Aidën puduanec nidequi acte nënantan nidaid nacnëdquid utsi yacno choash shubu dadpen icquid Sidacusa caid yacno choash 3tedec ushquin tabadmepondash. ¹³Ambo tabadash puduanquin aid acte nënantan nidaid nacnëdquid cuëma anoentsëqui potequi nidaid Itadia caid cuëmmano choashun shubu dadpen icquid Dequio caid yacno buampondash. Ambo choash ushash badiadash puduanec nidec cano tsitsumishun cunquequidën buanac badiad utsin shubu dadpen icquid Puteyodi caid yacno chopondash. ¹⁴Ambo choshon Pabadobëd icquidon Esuquidistu tantiaquid abi istuidacsho abitedi yuedpondash. Sietetedec ushec Esuquidistu tantiaquidobëd tabadashic auëshquio puduanec podquedën nidequi shubu dadpenquo icquid Doma caid yacno chopondash Pabadobëd icquido. ¹⁵Podqued Apio caidën choec, quequin chuituidac Esuquidistu tantiaquid Doma yacnocquid utsi-utsiec Pabado bëquedec nidanepondash. Adecbidi Esuquidistu tantiaquid utsibo shubu dadpen icquid Tabednas Abentsëc chotsec quequin cuënaid yacnocquido Pabado bëquedoaic nidaneoapondash. Aido cho-chosho isashien, Èbi dayacquio icmenuen nëidtedi mimbi chomioc, Papa, quec dayacquio iquebi, quiampondash Pabado. ¹⁶Adec aido bëquedec choash aucbidi nidec Pabadobëd Doma yacno choapondash. Doma yacno choacshobien Pabado quënën nauedenquiocquin shubun tabadmepondash sondado abentsëcshun abëd tabadquin isnubi.

Doma yacnoshon

Pabadon Esuquidistu chuibante

¹⁷Adec aton shubun tabadec 3tedec ushun isadaidbo tsusiobo chuinuequin,

Aido chome, capondash. Aido chomiacsho isun Pabadon nadopondash: Chuinu. Tantiata. Nuquin matses icsamboen nainquioccombi. Adembidi nuquin tsusedpabon naden nata quequin chiaid niacambo iccombi. Adoenquiocshobi Edusaden yacnoshon nuquin matsesën bedshun domanobo chuiquid meniondashi. ¹⁸Aden meniac domanobo chuiquidën, Mimbi naid chuiban, cac chuibanondambi. Aden chuibansho tantiash, Unës uainquioctiadquidi mimbi naic, quepondash domanobo chuiquid ëbi caic. ¹⁹Aden domanobo chuiquidën tantianubi nuquin matses tsusiobon, Unës uatiad, quequin chiac, Empedadod, Sesad yacno nidshun ëmbi naid chuite bunebi, quequin chuipondambi, Con matses icsambo iquec, quenquiocquin. ²⁰Ëmbi chuiboed mibi chuinuequin mibitedi chomiombi. Unësash uincuenta nec, quequin tantiaquin nuquin matsesën cainacpaden cainquid icsho mëtaniaid nebi —quepondash Pabado isadaidbo tsusiobo chiec.

²¹Adoquien: —Nidaid Udeya caid yacnoshon mimbi naid chuiquin dada uaid bedamboccombi. Adembidi, Edusaden yacnoësh choquido, Pabado icsambocquid nec, quequin chienquioccosh. ²²Padnueni mimbi tantiaid chuisho tantiate bunec. Utsi dadpen Quidistubo icsambocquid nec, quec —quepondash isadaidbo Doma yacnoquido tsusiobo Pabado caic.

²³Aden Pabadon tantiaid tantianuec, Nëidted ushash padpidec choaindabi, quianec nidanepondash tsusiobo. Adec nidaniash ambi chiactedec ushash Pabado tabadacno choapondash isadaidbo tsusiobobëd utsibo dadpen. Adec cho-choash tabadsho isun: —Matses icsaquid icsho Nuquin Papan

cuidnushe quiash abided cuidadec Esuquidistu unëspaneðdash. Aid tantiaquid yec Nuquin Papabëd tabadendac, quequin Pabadon chuibampondash. Aido Esuquidistu tantiaquid icmenuequin Nuquin Papan ambi naden nata quequin chiaid Moises dada uamiampidbëdtabi Nuquin Papan naden nanun chiaid ambi utsibo dada uamiampid chuibampondash Pabadon. Ambi dada uamiampidën chiaid Nuquin Papan madombo Esuquidistu nec, quequin badiadnubi chuiquin tauashun inchëshbudtsëqui chuiquin ëmpondash Pabadon. ²⁴Aden chuibanac utsi-utsiec, Abimbo iquec, quenubi utsi-utsiec, Tantiatiapibi, quepondash. ²⁵Aden abentsëc tantiacbimboen tantiatiapimbo yec comapenec onquesho tantiashien Pabado nadpondash. —Nuquin Papan Mayanën Isayas dada uamequin nuquin tsusedpabo naden chuipampic:

²⁶ “Isadaidbo caid yacno nidshun naden chuita.

Mibitedishun
tantiaded-tantiadedquimbi
abimbo tantienquio iquendac;
Adembidi Ëmbi nadatiambocquin
nabanaid isted-istedquimbi
abimbo isenquio iquendac.

²⁷ Bëdamboen tantiaboedobi nëbi min matses pamumëdacbimboec tabadec; pashuacbimboen tantiec tabadoaic; ushacbimboebidi tabadoaic.

Adec tabadenquiocquin ëmbi nabansho mimbi istsiac.
Adembidi ëmbi chiaid mimbi tantiatsiac. Aden tantiashun mibi icsaid mimbi ëntsiac.
Adquiduidi ëmbi bëdambo icmiaid nendac.”

²⁸Adesa mibi icnus isadaidpembo Esuquidistu chuimembi. Aden aidi chuisho aidon tantiendac —quepondash

Pabado ²⁹Nuquin Papan dada
uamiampicpaden chuiquin isadaidbo
Doma yacnocquido tantiamenuec. Aden
chuisho tantiash isadaidbo
nidanepondash.

³⁰Adembidi seta daëd matamec
tabadquin Pabadon Esuquidistu
chuibampondash. Aton shubun
tabadquin abi isedec choquidtedi

Pabadon yuedpondash. ³¹Utsi, Chën,
quenuiocnobi dacuëdenquiocquin,
Nuquin Papabëd tabadte iquec, quequin
huibampondash. Adembidi Esuquidistu
tantiamenuen chuibampondash
Pabadon.

Padi. Esuquidistun, Ëbi chuibeneta,
caidon naid chuibanquin aitedi dada
uaombi, Teyopido.

DOMA YACNOCQUIDON ISTE

Tauamboen chiaid

1 ¹Esuquidistun yuambo Pabado nebi. Aidën: —Ëbi chuibeneta —caidquio nebi. Adembidi Nuquin Papantsen: —Con Mado chuibeneta —caidquio nebi. ²Aton Mado tishabi icnuc Nuquin Papan: —Con Mado nadquid iquendac —quequin abi chuibanquido dada uamedenepampic ëndenquimboshë. ³Aden Nuquin Papan chiampicpadquid chidon tishaid yec isadaidbo chuiquid dapa Dabid icpampidën tsyuecquid Esus nec. ⁴Aid abipadquid icsaisa icsho Nuquin Papan: —Con Mado yec abitedishun Icho neque. Matses tantiamenu —quequin uincuemepac caondash. Aidquiobi Nuquin Icho Esuquidistu nec. ⁵Aidën: —Pabadon chuibeniach isadaidpembon matses utsibontsen ma ëbi tantiaquin ëmbi chiacpadomboen nanu —quequin ambi naid chuibenequidquio Esusën icmepondashi. ⁶Abi chuibanquid utsi mibi yacnoshon chuimequin Nuquin Papan mibitsen Esus tantiaquido icmiac. ⁷Aden: —Unësquio iquec —quequin Nuquin Papan tantiaido mibi nec. Shubu dadpen icquid Doma yacnocquido Esus tantiec iccuedquido icsho mibitedi chuiquin dada uaic nebi. Nuquin Papa mibi chianembi. —Bëdamboen isquin min Mado Esuquidistubëdtan Doma yacnocquido bëdambo icmeta, Papa —quequin chianembi.

Doma yacnocquido iste Pabado bunaid

⁸Tantia. Mibi chuinu. Esuquidistun tantiacpaden Nuquin Papa mibi chianembi. —Mibi bëdamboshë iquec, Papa. “ ‘Doma yacnocquido Esus tantiec tabadosh,’ quequin nidaid utsi-utsiec yacno chiac caosh,” quiosh. Mimbi nac aido bëdambo iquec, Papa —quequin Nuquin Papa chianembi. ⁹Aden mibi bëshunenquio icquin Nuquin Papa chianembi. ¿Muctabi nepe? Padenquio. —Pabadon abimbo chiosh —quetsiash Nuquin Papa abi tantiaquidquio icquin ëmbi aton Madon naid chuibenenec. ¹⁰Nadembidi Nuquin Papa chianembi. —Doma yacnocquido istantiaquido iquebi. Mimbi nidmiac nëbi nidtsiabi, Papa —quequin chianembi. ¹¹Aden mibi istantiaquido iquebi. Mibëd icquin Nuquin Papan chiaid chuibantsiambi. —Nuquin Papan Mayanën tantiamiacpadomboen chieshtoenquio icquin Esus tantiaquionona —quequin mibi chuibantsiambi. ¹²—“Chieshtoenquio icquin Esus tantianuna,” quec chuianec bëdamboec tabadec aidobëd bëdambo ictsiabi —quiash mibi iste bunebi. ¹³Tantia, con utsibo. Mibi yacno ëbi nidtsemboed mimbi tantiabien icchiteque. Mibi chuinu. —Shubu dadpen icquid Doma yacnocquido istanu —queuid-queuidobi. —Nidnu —qeshobi Nuquin Papan nac

nidenquo iccobi. —Ëmbi Esusën naid chuibanac matses utsibon dadpeshun Esus tantiabenacpadomboen ma Doma yacnocquidon utsibontsen Esus tantianu —quiash mibi yacno nidiadquo iquebi. ¹⁴Esuquidistun chiacpadomboen ambi naid matses abitedi chuibantiadquo iquebi. —Dadpen tantiaquidobëdtabi tantienquo icquidotsen chuibenenu. Adembidi dada uaquidobëdtabi dada uainquo icquidotsen chuibenenu —quiash nebi. ¹⁵Aden chuibenequi shubu dadpen icquid Doma yacno nidshun mibitsen Esusën naid chuibantiadquo iquebi.

¹⁶Esusën naid chuibenec bëdambo iquebi naden tantiash. —Nuquin Papan tantiapadec matses cuidmenquo icnuec Esus abided cuidadec unësac caondash. Aid tantiasho Nuquin Papan matses cuidenquo iquec. Abia chiaidon isadaidbon Esus tantiasho cuidenquo icquin isadaidpembro matses utsibontsen Esus tantiasho Nuquin Papan cuidenquo iquendac —quiash Esusën naid chuibenec bëdambo iquebi. ¹⁷Esusën naid chuisho tantiash nuqui naden tantiec. —Nuquin Papan chiaid niac-niacboedombi Esus tantiasho Nuquin Papan nuqui bëdamboen isbenec ambi chiaid niac-niacacmaidbimboecnuc —quequin nuqui tantiapec. Adembidi chuiquin Nuquin Papan isadaidbo tsusedpa dada uamepampic. “ ‘Nuquin Papa ambi chiacpadomboen naquidquo nec,’ quequin abi tantiec tabadquid Nuquin Papan bëdamboen isec,” quequin dada uamepampic.

Matses utsibo icsamboec tabadaid

¹⁸—Abi tantiesa cuidquid Nuquin Papa nec —quequintsen nuqui tantiec. Ambi chiaid niac-niaquec icsamboecuidi tabadte bunquin matses dadpeshun

Nuquin Papan cuidte tantiatiapimbo iquec. ¹⁹Abi tantiametequid ambi uaid isun Nuquin Papa tantiatiadquidi Nuquin Papa tantiate bunenquo matses icpec. —Adquidshenda Nuquin Papa nepec —matses camenuen Nuquin Papan abitedi uapampic. ²⁰Nidaid uaquinc cuëte uaquinc aben icquid uaquinc yua uaquinc matses uaquinc capampic Nuquin Papan. Aden Nuquin Papan uaid isash: —Nëid uaquidien nadquo icchitec. Nibëdantiapimbo icquidien nechitec. Abipadquid utsi nibëdnuc comapenen tantiaquin nabanquidquo yec abitedishun Ichoen nechitec —quetiadquidi adenquo matses iquec. Adquid Nuquin Papan cuidendac.

²¹Ambi uaid isash: —Nëid uaquid bëdambo iquec. Aidëmbien ëbi nashunchitec —quetiadquidi pamumëdacbimboecquin Nuquin Papa tantiatiapimbo matses iquec. ²²—Dadpen bëdamboen tantiembi —quequimbi tantienquo matsesën iquec. ²³Aden unëstiapimbo icquid Nuquin Papambo tantiatiapimbo icquimbi unësquid-uidquo tantiaquin aidbimboecnuc nacenashun papa quequin chianec. Utsibon matsesbimboecnuc nacenashun: —Ëbi bëdamboen ista, papa —quequin ambi nacenaid chiec. Utsibombic aben icquid nidaidën capuquidbimboecnuc nacenashun adembi chiec. Utsibombic uicchun podochoquidbimboecnuc nacenashun adembi chiec. Utsibombic aben icquid tacbidën siuidquidbimboecnuc nacenashun adembi ambi nacenaid chiec. Ënden adquo matses yampicpadomboembidi nëbi adomboembidi matsesën naic.

²⁴Adsho isash Nuquin Papa: —Ma bëdamboec tabadnu —queuidboedi icsamboecuidi matses tabadsho isash:

—Ma ambi tantiacpadequi icsamboec tabadpanu —quiampampic. Adnëdambic nëbi abi bunacpadeq icsamboec tabadec utsin chido chudteuidi bunquieq dada. Adecbidi aton bënëpenquoio chudmeteuidi bunquieq chido. ²⁵—Abitedi uaquidquoio Nuquin Papa nec —quequin abimbo tantiatiadquidombi Nuquin Papan uaidobi utsi-utsien chuiquin papa cabededpec. —Nuquin Papambobien bëdamboshë iquec —quequin ënenquoio icquin chuitiadquidi aidon padenquoio icpec.

²⁶Adsho isash: —Ma abi bunacpadeq icsamboec tabadpanu —quiampampic Nuquin Papa. Adnëdambic nëbi icsabadquieq dada bunenquoio yequi chido daëdi dachudnanec. ²⁷Adecbidi chido bunenquoio yequi dada daëdi chichudnante natia bunquiopec. Aden ambi chiaid niac-niaquec icsamboec tabadsho Nuquin Papan cuidendac.

²⁸Adec abi tantiate bunenquoio icsho isash: —Ma bëdamboec tabadnu —queuidboedi Nuquin Papa: —Ma abi icsate bunacpadequi tabadpanu —quiampampic. Adnëdambic nëbi pabiate shëcuë nibëdacbimboecquin Nuquin Papan chiaid niac-niaquec icsamboec tabadpec bëdambo ictiadquidobi. ²⁹Nadquido icsamboec tabadquido nec. Nëidic aton chidopenquoio chudquido. Nëidic aton bënëpenquoio chudmequido. Nëidic icsamboshë icquido. Nëidic aton na dadpen bedteuidi bunquido. Nëidic chieshquido. Nëidic matses utsibobimboec icte bunec chieshëmënquido. Nëidic cuesunianquido. Nëidic chieshëmënquido. Nëidic muaquido. Nëidic icsa uate bunquido. Nëidic utsibo icsaiduidi chuiquido. ³⁰Nëidic ambenquiobi chuishunquin

chieshënquin muuaquido. Nëidic Nuquin Papa chieshënquido. Nëidic mamënshumënquido. Nëidic utsibo nashunenquoio icquin aton nauidi naquido. Nëidic: —Èbiuidtsëqui bëdambo iquebi —quequido. Nëidic: —¿Icsaquin atotsimbi utsi nape? —quec icsate bunquido. Nëidic anibëdtan amën chiaid niac-niacquido. ³¹Nëidic piushbimboecquin Nuquin Papan chiaid tantienquoio icquido. Nëidic aton matses tantienquoio icquido. Nëidic nëishash baded nëish bëdanenquoio icquido. Nëidic utsibo bëdamboen istiapimbo icquido. Adquidtedi Nuquin Papan chiaid niac-niacquieq icsamboec tabadquid nendac. ³²—Abi icsaid ëntiapimbo icquido Nuquin Papan cuidquin chian anëdënquiacno nësecaindac —quequin tantiequi ënëdenquoio yec icsaded-icsadedquieq. Utsibotsen icsasho isash cuishonquec. —Bëdambo iquec. Èbipadquidquoio nec —quepec.

Matsesën naid Nuquin Papan abimbo chuite

2 ¹Aden icsamboec tabadaid ëmbi chuisho tantias: —Adquid icsamboshë iquec —¿quecta ique? —Aden naic aid icsaic —queboedi mibitsen adecbidi icsapec. —Icsaquidpenquoio nebi —quec mibi muaic. ²Nuquin Papambien matsesën naidtedi tantiaquid icquin: —Nëido icsambo iqueque. Icsano nidmenu —quequin abimbo chiendac. ³—Matses utsibo icsambo iquec —queboedombi mimbitsen Nuquin Papan chiaid niac-niacpec. Adash: —Nuquin Papan nuqui cuidenquoio iquec —¿quecta ique? Mibitsen Nuquin Papan cuidendac. ⁴Ambi uaido matses abitedi icsambo icsho isash unësquoio icquin matses bëdamboen iste bunquin icsaidobi

Nuquin Papan baded cuidenquo iquec. —“Icsaboedi nēbi Nuquin Papan chiacpadec bēdamboec tabadtiadquo iquebi,” quequin ma matsesēn ēbi tantianu —qeshun Nuquin Papan matses baded cuidenquo iquec. Abi icsaid ēnenquo icsho isun cuidendac. ¿Adsho tantiashta mibi nadpe? —Mua. Nuquin Papan ēbi cuidtiapimbo iquec. Ambi chiaid niaquesambo nebi —¿quecta ique? Adec onquec mibi muapec.

⁵—Nuquin Papan chiaid niacboedēmbi ēnta —caqui: —Padi. Ēmbi naiduidi naic bēdambo iquebi —quequin ēnenquo icquin Nuquin Papan chiaid niac-niacbudec icsamboecuidi mibi tabadec. Aden mimbi Nuquin Papa cuidmendac. Nuquin Papan matsesēn naidtedi chuite ushēmbi mimbi icsamboen naidtedi chuishun Nuquin Papan mibi cuidendac. ⁶Matsesēn naidtedi tantiaquin matses cuidendac. Bēdambo icquido abēdi tabadmequin icsaido icsano nidmendac Nuquin Papan. ⁷Abi tantiec bēdambo icquido: —“Mibi bēdambo iquec,” mabi Nuquin Papan canu —quiash abēd tabadte bunec Nuquin Papan chiacpadec bēdamboec tabadec nec. Aido unēsacsho Nuquin Papan abēdi tabadmendac padpidec unēstiapimbo icnuc. ⁸Icsaquidoen Nuquin Papan chiaid chiaqui tantiate bunenquo icquin aton nauidi naic icsamboecuidi tabadsho Nuquin Papan compenen cuidendac. ⁹Adoac icsamboec tabadquido abitedi natiacuededec tabadendac. Shubiquiendac. Con matses isadaidbo Nuquin Papan chiaid ambia tantiampidi icsasho cuidquin matses utsibotsen icsasho Nuquin Papan cuidendac. ¹⁰Abi tantiec bēdamboec tabadquido unēsacsho abi yacno tabadmeshun:

—Nēid bēdamboec tabadquid niondash —quequin utsibo tantiamequin Nuquin Papan bēdambo icmendac. Ambia Nuquin Papan chiaid tantiondaido Isadaidbo abi tantiaquid icsho abēdi tabadmequimbi matses utsibotsen abi tantiaquid icsho Nuquin Papan abēdi tabadmendac. ¹¹Icsamboec tabadquido icsano nidmequin bēdamboec tabadquido abēdi tabadmendac. —Isadaidbouditsēqui bēdamboen isembi —quenquo icquin adoendac.

¹²Nuquin Papan chiaid tantiacmaido matses utsibo icsamboec tabadsho Nuquin Papan cuidendac. Isadaidbo Nuquin Papan: —Naden nata —quequin chiaid tantiashi aidēn chiaid niac-niaquec icsamboec tabadsho adembidi cuidendac. ¹³Ambi: —Naden nata —quequin chiaid tantiashumbic adomboen naisa bēdamboen istiapimbo icquin ambi chiacpadec tabadquid Nuquin Papan bēdamboen istiashi. ¹⁴¿Ada Nuquin Papan chiaid tantiacmaidon matses utsibon bēdamboec tabadte tantienquo iccuededpec? Ma bēdamboec tabadte abentse-abentsen ambembi tantieyoc. Aden tantiaquin Nuquin Papan chiacpadomboen abentse-abentsen bēdamboen naic Nuquin Papan chiaid tantiashumbimboen. ¹⁵Adec bēdamboec tabadec: —Bēdambo iquebi —quequin ambembi tantiec. Icsamboec tabadec: —Icsachitobi —quequin adembidi ambembi tantiec. ¹⁶—Adec matses abitedi bēdamboec tabadte tantiequi adquiec tabadenquo iquec —qeshun Nuquin Papan chiacpadēn Esuquidistun matses cuidendac. Matsesēn otacquo tantiaidbēdta matsesēn ompoquin naidtedi ambembi tantiashun Esusēn matses cuidendac. Esus chuibanquin aden aidēn cuidte chiombi.

**Isadaidbon Nuquin Papan
chiaid niac-niacaid**

¹⁷Tantia, con matses isadaidbo. Mibi chuinu. Mibi nadpec. —Isadaidbo nebi. Nuquin Papan ambi chiaid con tsusedpa Moises dada uamepampic. Aidën tsyuecquid icsho Nuquin Papan ëbi bédamboen isec. Utsibon Nuquin Papa tantienquo icnubi Nuquin Papambo con matsesbédambi bédamboen tantiemi. Bédambo iquebi —mibi quepec. Adboedi mibi icsaic. ¹⁸Nuquin matses tsusiobon chuibanac Nuquin Papan ambi chiaid Moises dada uamepampid mimbi tantiec. Nuquin Papan chiacpadec utsibo bédamboec tabadsho isash: —Aido bédamboec tabadec —queboedi mibi bédamboec tabadenquo icpec. ¹⁹Adecbidi: —Nuquin Papan chiaid tantiacmaido Nuquin Papan chiaidquo chuibanquid nebi. Paposhquiacbimboecnuc tantiamequidquo nebi —mibi quepec. Adboedi aidën chiaid niaquec mibi icsaic. ²⁰—Chuisho tantiabi icquido nëbi tantiabentsëcquidobédta Nuquin Papan chiaid chuibanquid nebi. Abitedimbo tantiaquid icquin Nuquin Papan abimbo chiampidquo chuibanquid nebi —mibi quepec. ²¹Adec: —Nuquin Papan chiaid niac-niaquenda —queboedëmbi aidën chiaid mimbi niac-niaquec. —Ampenda —queboedëmbi mimbítsen ampepec. ²²—Utsin chido chudenda —queboedëmbi utsin chido mimbítsen chudpec. Papa quequin matsesbimboecnuc matses utsibon nacnenaid isash: —Nuquin Papa tantienquo yec nëid nacnenquid icsambo iquec —queboedëmbi aidën nacnenaid tantiate shubun puduedshun mimbi ampepec. ²³—Nuquin Papan ambi chiaid con tsusedpa Moises dada uamepampid bedshun con matses

isadaidbonuidtsëqui Nuquin Papa tantiec —queboedëmbi ambi chiaid niac-niaquec mibi icsamboec tabadec. ²⁴Adec mibi icsamboec tabadte chuiquin Nuquin Papan naden dada uamepampic. “Isadaidbo icsamboec tabadsho isun matses utsibon: ‘Ambi Nuquin Papa caidtsembien icsambo icchitec,’ capendac,” quequin dada uamepampicpadquiec mibi icsamboec tabadsho isun matses utsibon Nuquin Papa bédamboen tantienquo iquec.

Nuquin Papa tantiaquidquo icte chiaid

²⁵—Nuquin Papan matses nebi —quequin Isadaidbon Nuquin Papan aton tsusedpa chiampicpadomboen aton bacuëbo shui dëbid dëteshun secaic. Adonëdaid ambi chiaid niac-niaquenquo yec bédamboec tabadsho Nuquin Papan bédamboen istsiash. Isadaidbo utsibon ambi chiaid niac-niacsho Nuquin Papan bédamboen istiapimbo iquec ambi con matses cacmaidobimboecnuc. ²⁶Nuquin Papan con matses cainquo icpampido matses utsiboen ambi chiacpadec bédamboec tabadsho Nuquin Papan bédamboen istsiash ambi: —Con matses nec —caidobimboecnuc. ²⁷Adec matses utsibo Nuquin Papan chiacpadec bédamboec tabadsho isash isadaidbo naded chiadpec. —Matses utsibo bédamboec tabadnubi Nuquin Papan Moises dada uamepampid isban-isbanshumbi isadaidbon Nuquin Papan chiaid niac-niacpec. Isadaidbo matses dadpen icsambo iquec —cadpec. ²⁸¿Shui dëbid dëteshun secaquido isadaidbotedi Nuquin Papa tantiaquidomboda nedic? Padenquo. ¿Matses ismenuen Nuquin Papan chiacpadomboen nashumbic ompoquin icsamboen naquido Nuquin Papa tantiaquidquioda nedic? Padenquo.

²⁹¿Ambi Moises dada uamepampiduidi ëmbimbo nanuequid Nuquin Papa tantiaquidquioda nedic? Padenquio. Nuquin Papa tantiaquidquien aton Mayanën tantiamiacpadec bédamboec tabadec. Adquid: —Mibi bédambo iquec. Con matses mibi canu —capec Nuquin Papan matsesën adoenquio icnubi.

Nuquin Papan isadaidbo tantiec, quequin chiaid

3 ¹Aden: —Abi tantiec bédamboec tabadquid Nuquin Papan con matses catsiash —quequin ëmbi chuisho tantias: —¿Isadaidbo yecta icsambo icpec? —¿quecta ique? —Padenquio iquec —caimbi. —¿Ada aido ambi con matses caido Nuquin Papan nashunac? —¿quecta ique? ²Ai, aido nashunquiac. —Ëmbi chiaid dada uaid ma aidomba tantianu —quequin con matses isadaidbo tsusedpabo ambi chiaid Nuquin Papan dada uamepampic. ³Aden dada uamiampid Nuquin Papan chiaid chuibanac con matses isadaidbo: —Nuquin Papan chiacpadomboen nanuna —queboedombi muaquin utsin-utsinquien nainquio icpampic. ¿Ada con matses isadaidbo utsi-utsiec muaquido icsho isun Nuquin Papan ambi chiacpadomboen nainquio icpatsiash? ⁴Padenquio. Ma ambi chiacpadomboen naquidquio Nuquin Papa neyoc. Muesambo nec. Matses abitedimbo muaquidquio icnuc Nuquin Papan abimbo chuiquidquio nendac. Aden chuiquin Nuquin Papan con tsusedpa dada uamepampic.

“Nuquin Papa abimbo chuiquidquio nec.

‘Nëid bédambo iquec. Nëid icsambo iquec, quequin Nuquin Papan abimbo chuibanendac, quequin ma matsesën tantianu,’ quequin

Nuquin Papan: ‘Mibi icsaoc,’ quequin ëbi chuiboed chiombi,” quequin dada uapampic.

⁵Ëbi adsho bédamboen tantiata. Icsamboen tantienda. —Nuquin Papan chiaid niac-niaquec ëbi icsasho isash: “Adquidpenquio Nuquin Papa nec. Icsaisambo nec,” quetsiash con matses. Adec icsaquimbi ëmbi con matses Nuquin Papa bédambo icte tantiameshobi Nuquin Papan ëbi cuidac icsambo ictsiash —quequin icsamboen tantienda. ⁶Matsesën naid chiec Nuquin Papa muatiapimbo iquec. Abimbo chuibanendac. Icsaido chiec: —Mibi bédambo iquec. Mibi cuidenquio iquembi —quetiapimbo Nuquin Papa iquec. Muesambo nec. ⁷Nadembidi icsamboen tantienda. —Ëbi muaquidquio icnubi: “Adquidpenquio Nuquin Papa nec. Bédamboshë iquec. Muesambo nec,” quetsiash con matses. Adec muaquimbi Nuquin Papa muainquio icte con matses tantiametsiambi. Aden ëmbi abi tantiameshobi Nuquin Papan ëbi cuidac icsambo ictsiash —quequin icsamboen tantienda. ⁸Aden icsamboen chiec nuqui nadtsiac. —Nuquin Papa tantiamenuequi icsaquionona —nuqui quetsiac. ¿Adendambi chuidio? Padenquio. —Pabado chedo: “‘Nuquin Papa tantiamenuequi icsaquionona,’ quiosh,” quequin mibi muauaosh —quequin chuituidoshi. Ëbi muauaquido Nuquin Papan cuidchitoshon.

Matses abitedi icsaquido nec, quiaid

⁹Tantia, con matses. Mibi padpiden chuinu. ¿Atotsibi quio? ¿Ada tantio? ¿Utsibon Nuquin Papan chiaid niac-niacnubida nuquiuide Nuquin Papan chiaid niac-niaquesa icpe? Padenquio. Nuquin Papan chiaid

niaquesamboen nibëdec. Matses utsibo con matses isadaidbobëd abembi bëdamboec tabadtiapimbo iquec. Abitedimbo icsamboec tabadquido nec. Aden mibi chiombi. ¹⁰Aden chuiquin Nuquin Papan dada uamepampic naden.

“Nuquin Papan chiaid niaquesambo nibëdec.

Abitedimbo icsaquido nec.

¹¹ Nuquin Papa tantiaquin ambi chiaçpadomboenuidi naquidquio nibëdec.

Nuquin Papa tantiate bunquidquio nibëdec.

¹² Bënudshun podqued tantienquio yacimboen Nuquin Papa tantienquio icquin matses abitedishun ambi chiaid niac-niaquec.

Adsho isun Nuquin Papan:

‘Abitedimbo icsambo iquec,’ capec. Ambi chiaid niaquesambo nibëdec. Abitedimbo icsapec.

¹³ Nadquio iquec. Nëid icsamboec chuishumënquido. Unësaid ënden chococacno shëdec: ‘Pisenac,’ quequin tantiacimboen adquido onquesho tantiaash: ‘Icsambo icquido nec,’ quequin matsesën tantiec.

Nëidic muaquido.

Nëidic nisin pequin icsa uacimboen icsa uate bunec icsamboec onquequido.

¹⁴ Nëidic nëishash chieshëmënc: ‘Unëschitoshon,’ quequin icsamboenuidi chuiquido.

¹⁵ Nëidic intac mëyamec badedquio cuesunianquido.

¹⁶ Nëidic abëd icquido natiamec chieshëmënquido.

¹⁷ Adquidtedi cuesnante bunec bëdamboec tabadtiapimbo iquec.

¹⁸ ‘Nuquin Papan cuidnushe,’ quenquio icquid Nuquin Papa tantiesabo nec,”

quequin dada uamepampic.

¹⁹Aden ambi: —Abitedi icsambo iquec —quequin chiaid Nuquin Papan con matses isadaidboba tantiamenuen con tsusedpa dada uamepampic. Aden dada uamiampid tantiaashun:

—Icsaquidpenquio nebi —quequin isadaidbon Nuquin Papa chuitiapimbo iquec. —Icsaquido abitedi nec

—quequin Nuquin Papan matses utsibo abitedibëdtabi isadaidbotsen chiaç:

—Abimbo chiec —quiash dacuëdec ëcbedanenquio tabadendac matses

abitedi. ²⁰Aden ambi chiaid niaquesambo nibëdnuc: —Ambi chiaid

niaquesa icscho Nuquin Papan nuqui bëdamboen isec —quequin nuqui

abimbo chuitiapimbo iquec. Nuquin Papan chiaid isash: —Ambi chiaid

niac-niaquec icsamboequien nuqui tabadchitec —quequin nuqui tantiapec.

Nuquin Papa matses bëdamboen ismete chiaid

²¹Aden ambi chiactedi natiapimbo yec matses icsasho isun Nuquin Papan abi matses bëdamboen ismete chuiquin isadaidbo tsusedpa Moisesbëdta tsusedpabo utsibo dada uamepampic ëndenquimbo. Aden ambi dada

uamepampicpadomboen nëbi Nuquin Papan abi matses bëdamboen ismequid matsesmepac caondash. ²²Adoac

Nuquin Papa abi tantiaquido bëdamboen ismenuec Esuquidistu abided cuidadec nëspac caondash.

Nëbi aidquio tantiaasho Nuquin Papan matses bëdamboen isec.

Isadaidbobëdtambi matses utsibontsen Esus tantiaasho adoendac. ²³Adec matses

abitedi Nuquin Papan chiaid niac-niaquec icsaquido yec Nuquin

Papapadquid icsaisambo nibëdec. ²⁴Adquid bëdamboen istiapimbo icquin matses bëdamboen iste bunquin aton

Mado Esuquidistu abided unës uamequin Nuquin Papan cuidpac caondash. Nëbi abided cuidadaid Esus tantiasho nuqui bëdamboen isec icsaisabimboecnuc. ²⁵—Icsaido cuidquid icquimbi nuqui cuidenquo icnuen Nuquin Papan nac —nuqui camenuen Nuquin Papan nuqui icsaid bedshumequin Esusded unës uamequin cuidpac caondash. Esus tishabi icnuc Nuquin Papan abi tantiaquido cuidenquo icpampic: —Yuecshun con Madoded cuidendambi —quequin tantiaquin. ²⁶Nëbi adecbidi: —Icsaido cuidquid nebi —quequimbi Nuquin Papan ambi chiacpadec nuqui icsaid bedshunec abided cuidadaid Esus tantiasho adembidi nuqui bëdamboen isquin cuidenquo iquendac.

²⁷Ëmbi aden chuisho tantiash: —Ambi chiacpadomboenuidi nasho Nuquin Papan bëdamboen isebe —quequin mimbi abimbo chuitiapimbo iquec. Matsesën Nuquin Papan chiacpadomboenuidi natiapimbo icsho bëdamboen istiapimbo icboedi nëbi Esus tantiasho Nuquin Papan nuqui bëdamboen isec. ²⁸Aden matsesën ambembi naquin Nuquin Papa bëdamboen ismetiapimbo iquec. Padnuen utsin: —Matsesash ëbi icsaid bedshunec abided cuidadaid tantiasho Nuquin Papan ëbi bëdamboen isec —quequin Esus tantiasho Nuquin Papan bëdamboen isec. ²⁹¿Isadaidboudida Nuquin Papan bëdamboen ispatsiash? Padenquo. Matses utsibo isadaidpembobi Nuquin Papan bëdamboen istsiash. ³⁰Matses abitedi uaquid icquin ambi chiacpadomboen isadaidbon Esus tantiasho Nuquin Papan bëdamboen isec. Adembidi matses utsibon Esus tantiasho Nuquin Papan bëdamboen isec. ³¹Adoaido: —Nuquin Papan chiaid niac-niaquec

icsamboec tabadnuna —¿quecta icpec? Padenquo. Esus tantiaquido icquin Nuquin Papan chiacpadomboen niatadquido nuqui yanec.

Nuquin Papan Abadauan bëdamboen isaid

4 ¹Tantia. Aden Nuquin Papan bëdamboen iste chuiquin isadaidbo tsusedpa Abadauan caid ënden icpampidtsen mibi chuinu. ¿Atotsieshun Nuquin Papan Abadauan bëdamboen isbempampic? ²Bëdamboecuidi tabadsho Nuquin Papan bëdamboen isaid yec Abadauan: —Bëdamboecuidi tabadquin Nuquin Papa bëdamboen ismembu —quetsempampic. Abadauan bëdamboecuidi tabadambo. Adsho: —Bëdamboecuidi tabadsho Abadauan bëdamboen isembi —quenquo icpampic Nuquin Papa. ³Nuquin Papan tantiamiac naden Abadauanën nampid chuiquin dada uapampic. “Nuquin Papan: ‘Min mado min chidon tishendac,’ cac: ‘Abimbo mimbi caic,’ Abadauan qesho: ‘Adquid bëdamboen isendambi,’ qeshun Nuquin Papan bëdamboen isbempampic icsaisabimboecnuc,” quequin chuiampic. ⁴Matsesien adenquo iquec. —Ambi chiacpadomboen nasho icbon yua bëdamboen isquid —nuqui quepec. ⁵Nuquin Papambien nadotsiash. Matses icsaboedi: —Bëdambo icquid icquin ambi chiacpadomboen Nuquin Papan naindac —quequin abi tantiasho Nuquin Papan bëdamboen isbentsiash icsaisabimboecnuc. ⁶Adembidi Nuquin Papan tantiamiac ambi bëdamboen iste chuiquin con tsusedpa Dabidën dada uapampic naden.

⁷“ ‘Ambi chiaid niac-niacboedëmbi: Bëdambo icquid icquin Nuquin Papan ambi chiacpadomboen naindac,

quequin abi tantiasho Nuquin
Papan ëbi bédamboen isec ëbi
icsaid bēpiscudacimboen.

Icsaisabimboecnuc ëbi bédamboen
isquin ëbi cuidenquo iquendac,⁷
quiash matses bédambo yec
cuishonquec.

⁸ ‘Abi tantiaquid icsho isash ëbi icsaid
bēpiscudash:

Ëmbi chiaid mimi niac-niaccoque.
Mibi cuidnu, Nuquin Papan ëbi
cainquo iquendac,⁹ quiash matses
bédambo iquec,”

quequin Dabidën chuiampic
ëndenquimbo.

⁹ ¿Shui dēbid dēteshun secaido
isadaidboudida Nuquin Papan
bédamboen ispec? Padenquo. Matses
utsibotsen bédamboen istsiash. Tantia.
Ëmbi chuiboedbidi chuiöanu. Abi
tantiaquid icsho Nuquin Papan
Abadauan bédamboen isbempampic
ambi chiaid
niac-niacacmaidbimboecnuc. ¹⁰ ¿Ambi
chiacpadomboen shui dēbid dēteshun
secacshoda Nuquin Papan Abadauan
bédamboen isbempampic? Padenquo.
Shui dēbid dēteshun secabi icsho
Nuquin Papan Abadauan bédamboen
isbempampic. ¹¹ Bédamboen
isbenschumbic: —Abadauan, ëmbi
chiacpadomboen nabenta. “Nuquin
Papan bédamboen isaido nebi. Aid
bēshunchitomane,” qeshun min
matsestedi shui dēbid dēteshun
secabanta —capampic Nuquin Papan.
Adoac Abadauanën nabempampic. Aden
shui dēbid dētiacmaid icquin
Abadauanën Nuquin Papa
tantiacpadomboen nēbi shui dēbid
dētiacmaidon Esus tantiasho Nuquin
Papan bédamboen isendac ambi chiaid
niac-niacacmaidbimboecnuc.

¹² Abadauanën tsyuecquido isadaidbo
Abadauambimboecquido Nuquin Papa

tantiaquido abi iquec. —Shui dēbid
dētemenēdaid icsho Nuquin Papan
bédamboen isebe —quenquo icquin
Nuquin Papabēdta Esus tantiasho
isadaidbo Nuquin Papan bédamboen
isaido abi iquec.

Nuquin Papan Abadauan chiaid

¹³ Ëndenquimboshē Nuquin Papan
Abadauan naden chuiampic.
—Abadauan, mibi nibēdanan yuecshun
min tsyuecquid abentsēcshun utsibo
bédambo icmendac. Nidaid utsi-utsiec
yacno tabadquido adoendac
—quepampic Nuquin Papa. —Min
tsyuecquid abentsēqui tantiasho matses
bédamboen isendambi —quequin
otacquo tantiaquin Nuquin Papan
adopampic. ¿Ambi chiacpadomboenuidi
Abadauanën nashoda Nuquin Papan
aden chuiampic? Padenquo. Nuquin
Papan chiac: —Ai, abimbo caic
—qeshoen Abadauan bédamboen
isbenschun Nuquin Papan adopampic.
¹⁴ ¿Nēbi: —Moisesën chiaid niaquesa
icsho Nuquin Papan bédamboen isebe
—quec muaquidoda Nuquin Papan
bédamboen ispadic? Padenquo. Adec
muaquidobi bédamboen isquin ambi
Abadauan chiaid niactsiash.

Adotiapimbo icquin ambi
chiacpadomboen Abadauanën
tsyuecquid tantiaquidoen bédamboen
isec. ¹⁵ —Moisesën chiaid niaquesambo
nebi —queboedombi aidën chiaid
niac-niacsho isun Nuquin Papan
cuidendac. Ambi chiaid niaquesambo
nibēdec. Nuquin Papan: —Bédamboec
tabadta —quequin chiaid nibēdnuc
ambi aden chiaid matsesën
niactiapimbo ictsiash. Ambi:
—Bédamboec tabadta —quequin chiaid
abi iquec. Aid niaquesambo nibēdec.

¹⁶ Nuquin Papan naden Abadauan
chuiampic. —Abadauan, ëmbi chuisho

tantiaash: “Mimbi abimbo caic,” quesho mibi bēdamboen isquin min tsyuecquido bēdambo icmendambi —quequin chuiampampic. Nēbi ambi chuiampampicpadomboen naquin Esus tantiaquido Nuquin Papan bēdamboen isec. Nuquin Papan ambi chiaid dada uamepampidēn Moisesēn tsyuecquido isadaidbon Esus tantiaasho Nuquin Papan bēdamboen isec. Abadauanēn Nuquin Papa tantiacpadomboen matses utsibontsen Esus tantiaasho ademibidi bēdamboen isec. Esus tantiaquidtedishun papabimboecquid Abadauan nec. Ambi Nuquin Papa tantiacpadomboen nuqui tantiec. ¹⁷Ambi aden Abadauan chiampid chuiquin Nuquin Papan isadaidbo tsusedpa naden dada uamepampic. “Mibi unēsān yuectaneshun min tsyuecquido nidaid utsi-utsiec yacno tabadquido icmendambi. Aton papabimboecquid mibi iquendac,” quepampic Nuquin Papa. Adoaquien: —Abimbo mimbi caic —quequin Nuquin Papa Abadauanēn tantiapampic. —Comapenen tantiaquin unēsaid uincuemequidquio icquin ambi chiacpadomboen ēbi bacuē tishmendac —quequin Abadauanēn Nuquin Papa tantiapampic. Nēbi ambi Nuquin Papa tantiacpadomboen Esus tantiaquido: —Nuquin papabimboecquid Abadauan nec —quepec.

¹⁸Nuquin Papan: —Min tsyuecquido dadpenquo iquendac —cac: —ĭMitsipadoac aitedti con tsyuecquido icpec? Ma con bacuēbo nibēdpayoc. Tsusiombo icquin bacuē tishmetiapimbo iquebi —queuidboedi Abadauan nadpampic. —Ai, abimbo mimbi caic —quepampic aton mado nibēdnubi. Adshun tsusioctšēcquio icquimbi aton mado tishmepampic. Nēbi aton tsyuecquido dadpenquo iquec Nuquin

Papan chiampicpadequi. ¹⁹—Con seta dadpenquo 100tedi icnuc tsusiobudtsēcshun ěmbimbo bacuē tishmetiapimbo iquebi. Con chido ěndenquo machobudtsēccondaid icquin bacuē usundotiapictšēcquio iquec —quequin tantiequi: —Nuquin Papan abimboen caosh —quepampic. ^{20,21}—Nuquin Papa mue nec —quenquo yec: —Nadatiambo icquid icquin ambi chiacpadomboen Nuquin Papan naic —queshun Nuquin Papa tantiatšēboedēmbi aid tantiaquiopampic. Adshun: —Mibi bēdamboshē iquec, Papa —quequin Nuquin Papa chuiampampic. ²²Adsho tantiaashun Nuquin Papan bēdamboen isbempampic icsaisabimboecnuc.

²³Aden Nuquin Papan ambi Abadauan bēdamboen isaid isadaidbo tsusedpa dada uamepampic. ĭAbadauanēn naiduidi tantiamenuenda aden dada uamepampic? ²⁴Padenquo. Nuquitsen Nuquin Papan ambi bēdamboen iste tantiamenuen aden dada uamepampic. Nuquin Icho Esusbēdta abi uincuemequid Nuquin Papa tantiaasho nuquitsen bēdamboen isec. ²⁵Nuquin Papan tantiacpadec nuqui cuidmenquo icnuec nuqui icsaid bedshunec abided cuidadec Esus unēsānēdash. Aden Nuquin Papa abi tantiaquido bēdamboen ismenuec unēsash uincuemanēdash Esus.

Esus tantiaquido Nuquin Papan bēdamboen isaid

5 ¹Aden Esus tantiaasho Nuquin Papan bēdamboen isaido yec abi cuidte dacuēdēnenquo yec abēdi nuqui bēdamboec tantiananec. ²Ĕmbi chuibocpaden abi tantiaquido nuqui cuidmenquo icnuec abided unēsquin Esusēn Nuquin Papa nuqui bēdamboen ismepec. Adoac nuqui nadpec. —Nuqui

bédamboen isquin unēsacsho nuqui
 abipadquid icsaisa icmequin Nuquin
 Papan abēdi nuqui tabadmendac —quec
 nuqui cuishonquec. ³Nadectsen nuqui
 cuishonquec. —Esus tantiaquid icsho
 utsibon chieshēnaqui Esus
 tantiatsēcboedi chieshtoenquoio icquin
 Esus tantiaquidquio yanebi —quectsen
 nuqui cuishonquec. ⁴Aden
 chieshtoenquoio icquin Esus tantiasho
 Nuquin Papan nuqui bédambo capec.
 Adoac: —Esus tantiaquid icsho Nuquin
 Papan ēbi bédambo icmec. Unēsacsho
 abi yacno ēbi tabadmendac ambi
 chiacpadomboen —quepec nuqui.
⁵Adec: —Abi yacno ēbi tabadmendac
 —quequin Esus tantiaquid ¿ada Nuquin
 Papan cacumepec? Padenquoio. Aton
 Mayan nuquibēd icmiac
 paposhquiabimboen nuqui naden
 tantiec. —Nuquin Papan ēbi bédamboen
 tantiaquin abi yacno ēbi puduedmendac
 —quequin nuqui tantiec.

⁶Aden matses tantiaquiec Nuquin
 Papan tantiacpadec Esus nadpanēdash.
 Matses abitedi abembi bédamboec
 tabadtiapimbo icsho isun Nuquin Papan
 uesquin cuidtsenubi abi tantiaquido
 cuidmenquoio icnuec abided ciudadec
 Esus unēsapanēdash. ⁷¿Ada adquid matses
 icpadic? Padenquoio. ¿Cuesanquidēn
 matses bédambo icquid caic: —Cuesnu
 —quesho tantiashunda dadpenshun:
 —Aid cuesenda. Ēbiquien cuesta
 —capatsiash? Padenquoio. Bédamboshē
 icquid cuesmenquoio icnuen: —Nēid
 cuesenda. Ēbiquien cuesta
 —cachitembien ictsiash abentsēcshun.
 Icsambo icquid icshoen aden chienquoio
 ictsiash. ⁸Padnuen matses abitedi
 icsamboecuidi tabadnuc nuqui
 cuidmenquoio icnuec Esuquidistu abided
 ciudadec unēsapanēdash. —Nuquin Papan
 ēbi tantiaquiec —matses camenuen
 Nuquin Papan aden Esus namepanēdash.

⁹Nēbi abided cuidadaidquio Esus
 tantiasho Nuquin Papan nuqui
 bédamboen isec icsaisabimboecnuc.
 Aden bédamboen isquin Nuquin Papan
 nuqui cuidtiapimbo iquendac.
¹⁰Matsesēn abi chieshēnsho isun aido
 cuidte bunenquoio icquin Nuquin Papan
 aton Madoded cuidpanēdash. Aden aton
 Madoded cuidash nēish bédanshun
 Nuquin Papan aton Mado tantiaquid
 bédamboen isec. Nēbi Nuquin Papan
 uincuenēdaid icquin Esusēn nuqui
 bédamboen tabadmec. ¹¹Adembidi
 aidēn tantiamiacpadomboen nuqui:
 —Ēbi cuidenquoio icnuen aton Madoded
 cuidquid bédamboshē iquec —quequin
 Nuquin Papa tantiec nuqui cuishonquec.

Adanēn naidbēdta Esusēn naid chiaid

¹²Nuqui bédamboen ismequid Esus
 tishabi icnuc abia matses uaidēn
 Adanēmba Nuquin Papan chiaid
 niac-niaquec icsasho cuidquin aidba
 Nuquin Papan unēsquid icmepampic.
 Adembidi Adanēn tsyuecquido matses
 abitedi Adan icsapadecbidi icsate
 tantiaquimbi Nuquin Papan
 unēsquidoudquio matses icmepampic.
¹³Nuquin Papan: —Adec icsainda
 —quequin ambi chiaid Moises dada
 uamiabi icnubi matses abitedi
 icsapampic. —Ēmbi Moises chuimiaid
 mimbi niac-niaquec —Nuquin Papa
 quetiapimbo icnubi matses icsapampic.
¹⁴Nuquin Papan chuiboedquiobi
 niaquec Adamba icsasho Nuquin Papan
 cuidac unēsec taēpampic. Adan
 unēsambic aidēn nacpadomboen nabi
 icsa utsi naiqui matses abitedi icsasho
 adembidi unēsquidoudquio Nuquin
 Papan icmepampic. —Naden nata
 —quequin Moises dada uamequin
 Nuquin Papan chiabi icnubi aidēn
 chiaid niactiapimbo yec utsi naic
 icsashobi adopampic. Ambia Nuquin

Papan chiaid niacampid
Adampadquidpenquo Esuquidistu nec.

¹⁵Matses abentsēcshun Adanēmba
Nuquin Papan chiaid niacsho cuidquin
aidba unēsquid icmeshun aton
tsyuecquido matses unēsquiduidquo
Nuquin Papan icmepampic. Adecbidi
Nuquin Papa matses bēdamboen
ismequid abentsēc iquec. Esusuidtsēqui
abi tantiaquidotedi cuidmenquo icnuec
abided cuidadec unēsac caondash.
Nēbi aid tantiaho Nuquin Papan nuqui
bēdamboen isec. ¹⁶Adanēn nachimboen
Nuquin Papa matses bēdamboen
ismequidēn nambo. Adan abentsēqui
icsaquin Nuquin Papa cuidmiac abi
unēsacpadquiec matses abitedi
unēsquidombo yanac. Nuquin Papa
bēdamboen ismequidēmien matses
icsaid bedshunec abided cuidadquin
Nuquin Papa abi tantiaquidotedi
bēdamboen ismec icsaisabimboecnuc.
¹⁷Ambi chuiboedi niacquin Adanēn
Nuquin Papa cuidmiash unēsquid
yanacpadec matses unēsquiduidquo
iquec. Esuquidistunuidtsēqui nac
Nuquin Papan matses bēdamboen
isendac. Nēbi aid tantiaho Nuquin
Papan nuqui bēdamboen isquin
bēdamboec tabadquid icmendac. Adec
bēdamboec tabadec unēsash Esusbēdtan
Nuquin Papan namiacno bēdamboshē
yancombo nuqui tabadendac.

¹⁸Adec matses abentsēqui icsasho
aidbēda aton tsyuecquido matses
abitedimbo cuidquin Nuquin Papan
unēsquiduidquo icmepampic.
Padnuen Nuquin Papan chiacpadec
abentsēqui abided cuidadaidēn Nuquin
Papa abi tantiaquido bēdamboen
ismequin Nuquin Papa yacno
tabadmendac. ¹⁹Nuquin Papan chiaid
niac-niaquec Adan icsaic taēambic aton
tsyuecquido abitedimbo
icsaquiduidquo yanac. Padnuen

Nuquin Papan chiaid niaquesambo
icquin Esusēn Nuquin Papa nuqui
bēdamboen ismec. ²⁰¿Matses
bēdamboen isnuenda Nuquin Papan
ambi: —Bēdamboec tabadta —quequin
chiaid Moises dada uamepampic?
Padenquo. Matses abi icsaid
tantiamenuen ambi chiaid Moises dada
uamepampic. Aden chiaid chuisho
tantiaho: —Icsaobi —quequin tantiaquin
abided cuidadaid tantiaho Nuquin
Papan matses bēdamboen isec. ²¹Taēc
matses icsasho cuidac unēsquiduidquo
yanac. Adsho isun matses bēdamboen
isnuen Nuquin Papan ambi chiaid
niaquesambo Esusded cuidac. Nēbi
Nuquin Icho Esuquidistu tantiaho
Nuquin Papan nuqui bēdamboen isec
icsaisabimboecnuc. Nuqui unēsacsho
abēdi tabadmendac padpidec
unēstiapimbo icnuc.

**Esus tantiaquid bēdamboec
tabadquid, quiaid**

6 ¹Nuquin Papan bēdamboen iste
ēmbi chuisho tantiaho naden
tantienda. —Icsaido cuidmenquo
icnuec abided Esus cuidadec
unēsapanēdash. Aid tantiaho Nuquin
Papan bēdamboen isquin nuqui
cuidtiapimbo iqueque. Aden bēdamboen
isaqui icsaqui onona —quequin
tantienda. ²Esus tantiaquido adesambo
nec. Esus tantiec icsateuidi nuqui
bunenquo yanec. ³¿Tantienquioda
ique? Naden chuiquin mimbi acten
mentomiac. —Ēbi cuidmenquo icnuec
abided cuidadec unēsaid Esus tantiaquid
nebique. Ambi chiacpadec
tabadtiadquo iquebique. Utsibo ismenu
—quequin mimbi acten mentomiac.
Adec Esus unēsaid tantiequi icsaboedobi
icsate bunenquo nuqui yanec. ⁴Aden
Esus abided cuidadec unēsaid tantiaho
Nuquin Papan utsiacimboecnuc nuqui

icmec. Esus unēsacsho comapenen tantiaquin Nuquin Papan uincuemepac caondash. Adembidi comapenen tantiaquin Nuquin Papan utsiacbimboecnuc nuqui icmec. Adoac icsateuidi bumboedobi adte bunenquio yanec Nuquin Papan chiacpadequi nuqui bēdamboec tabadcuenec.

⁵Adec abided cuidadec unēsaid tantiec icsate bunenquio yanquid yec Esus uincuemiacbimboen comapenen tantiaquin Nuquin Papan utsiacbimboecnuc icmiaidtsen nuqui nec. ^{6,7}Esus tantiabi yec icsaquido icboedi matses icsaid bedshunec Esus unēsaid tantiec nuqui icsate bunenquio yanec. Mētaniaid abibi mēnchiquidtiapimbo yacbimboec matses abembi icsaic ēnēdtiapimbo iquec. Adboedi Esus tantiec nuqui icsate bunenquio yanec.

⁸Adec Esus unēsaid tantiec icsainquio yanec nuqui nadpec. —Nuquin Papan uincuemiaidēn Esusēn nuqui bēdamboen tabadmec. Unēsacsho Nuquin Papa yacno abēdi nuqui tabadmendac —nuqui quepec. ⁹Nuquin Papan uincuemiac Esus padpidec unēstiapimbo iquendac. Aton dada unēsquid icboedi unēstiapimbo icquid yanac. ¹⁰Matses icsaido cuidmenquio icnuec abided abentsequi cuidadec Esus unēsac caondash padpidec unēsenuquio yec. Adsho uincuemiac Nuquin Papan chiacpadomboen nabanec aibbēd tēshnanenquio yec tabadec.

¹¹Ēbi adsho tantiash nadta. —Ēbi cuidmenquio icnuec abided cuidadec unēsacsho uincuemiaid Esus ēbēdi iquec. Aid tantiec icsainquio yanebi. Ambi nacpadec tabadtiadquio iquebi —queta. ¹²Icsamboec tabadenquio icnuna. Nuqui icsate bunaid nainquio icnuna. ¹³—Icsaquionona —quesho tantiash: —Padi —quenuna.

Unēsacbimboen Nuquin Papa tantienquio ictenedēmbi uincuenacbimboen Nuquin Papa nuqui tantiabenondaque. Ambi chiacpadece bēdamboequien tabadtiad. ¹⁴—Nuquin Papan ambi: “Bēdamboec tabadta,” quequin chiaid Moises dada uamiactedi naquin ěmbimbo Nuquin Papa bēdamboen ismembi —quenquio icquin Esus tantiasho Nuquin Papan nuqui bēdamboen isec. Ambi bēdamboen isaido yec nuqui icsate bunenquio nuqui yaneque. Bēdamboec tabadnuna.

¿Tsuntsin yuabo Esus tantiaquido icpec? quequin chiaid

¹⁵—Aden Nuquin Papan nuqui bēdamboen isec —quequin ěmbi chuisho tantiashun naden icsamboen tantienda. —Nēbi abided cuidadaid Esus tantiasho ēbi bēdamboen isec. Ēbi cuidtiapimbo iqueque. Ambi chiaid niac-niaquec icsabudquionona —quequin tantienda. Esus tantiaquid adesambo nec. ¹⁶¿Tantienquioda ique? Icbon chiacpadomboen yuan naquid. Icsamequidēn tantiacpadomboen icsamboen naquid aton yua nendac. Aidēn yua icquin icsaid ěntiapimbo yec unēsash icsano nidendac. Nuquin Papan yuain ambi chiacpadece bēdamboec tabadcuenendac. ¹⁷Mibi adec tabadsho isun: —Esus chuibanac icsaid ěntiapimbo icboedi Esus tantiabenash Doma yacnocquido bēdamboec tabadcuenac. Aden namec mibi bēdambo iquec, Papa —quequin Nuquin Papa chiombi. ¹⁸Satanasēn yua icquin mimbimbo mibi icsaid ěntiapimbo icsho Nuquin Papan nac ambi chiacpadquieci mibi bēdamboec tabadcuenac.

¹⁹—Matses icquin: “Nuquin Papan chiaid tantiadenquio iquec,” canushe —quequin bēdamboen tantiamenun mimbi tantiaid yuan naid mibi chiombi.

Satanasën yua yec icsateuidi bunquieci mibi icsaded-icsadedondac. Adec icsamboshë iccondaidi nëbi Nuquin Papan chiapadequien bëdamboec tabadtiad. ²⁰Satanasën yua yec icsaquieci Nuquin Papan chiapadec bëdamboec tabadtiapimbo mibi iccondac. ²¹¿Ada bëdamboec tabadonda? Ma mibi chieshëmënuieci tabadteneyoc. —Èbi chieshëmënuieci tabadondaid tantiashun: “Mibi icsambo iquec,” èbi canushe —qeshun mimbi naondaid ma mimbi chienquio iccondac. Icsaid ènabi yec unësash icsano mibi nidtsenac. Adecbidi icsaid ènenquio icquido unësash icsano nidendac. ²²Nëbi nuqui Esus tantiasho Nuquin Papan aton yuabo nuqui icmiac. Adoac icsaid èntiapimbo icboedi nëbi nuqui bëdamboec tabadcuenece. Adquid unësacsho Nuquin Papan abëdi tabadmendac. ²³Icsaido cuidquin Nuquin Papan icsano nidmendac. Abided cuidadec unësaid Esuquidistu Nuquin Icho tantiasho Nuquin Papan nuqui bëdamboen isquin unësacsho abëdi tabadmendac.

**Bëdamboec tabadte chiuinen chido
bënëchoquid Pabodon chiaid**

7 ¹Con utsibobimboecquido mibi neque. Tanta. Padpiden mibi chuinu. Naden chiaid mimbi tantianëdac. —Nuquin Papan dada uamiac Moisesën chiampicpadomboen matsesën naquid. Unësun aidën chiaid natiapimbo iquec —quequin mimbi tantianëdac. ²Nuquin Papan chiapadomboen inaidën aton bënë nianesa. Dada utsi chudmesa chidon. Bënë unësambien niante dada utsin bedadquid. ³Bënë unësabi icnubi aton bënë nianquin dada utsi bedanec cuenacsho: —Icsambo iquec. Nuquin Papan cuidtequid nec —cabededtsiash.

Bënë unësambien dada utsin bedadquid chido. Aden bedacsho Nuquin Papan: —Mibi cuidnu —cainquio ictsiash.

⁴Adecbidi ambi chiaid niac-niacsho Nuquin Papan cuidtsenaido nuqui iccondac. Adondaidi abided cuidadec unësaid Esus tantiasho Nuquin Papan: —Mibi cuidnu —nuqui cainquio iquendac. Aden Nuquin Papan uincuemenëdaidën Esusën aton yua nuqui icmequin bëdamboec tabadquid icmenuen nuqui icsaid bedshumpanëdash. ⁵Esus tantiabi yec nuqui bunacpadecuidi nuqui icsapadenece. —Adenda —quequin Nuquin Papan chiaid tantiashi: —Adequi icsaquionona —quiash nuqui icsaquiodenece. Adquid yec unësacsho icsano nidmequin Nuquin Papan nuqui cuidtsenëdash. ⁶Esus tantiabi yec nuqui nadondac. —Moisesën chiapadec bëdamboec tabadsho Nuquin Papan nuqui bëdamboen istsiash. Ambi chiaid niac-niacsho nuqui cuidendac —quiondaidi nëbi Esus tantieci nuqui adenquio iquec. Nëbi Nuquin Papan Mayanën tantiamicpadec nuqui bëdamboec tabadec.

Icsaquid nebi, quequin Pabodon chiaid

⁷—Nuquin Papan ambi chiaid Moises dada uamepampid icsambo iquec —¿quectabi iquec? Icsapenquio iquec. Nuquin Papan ambi chiaid Moises dada uamiac isun: —Nuquin Papan chiaid niac-niaquec icsachitobi —quequin nuqui tantieci. “Utsin na isash: ‘Con na adquid nibëdec,’ quec chieshëmënenada,” quequin Nuquin Papan Moises dada uamiac isun: —Adec icsachitobi —quequin tantiabenondambi. Nuquin Papan ambi chiaid Moises dada uamiabi icnuc: —Nuquin Papan chiaid niac-niacchitombi —quequin

tantienquiemi ictsenchitondac. ⁸Utsin na isash: —Adquid con na nibēdec —quiash chieshēmēntsēcboedi Nuquin Papan: —Adenda —quequin chiaid tantiashi icsaquid yec utsin na comapenec bunquiec chieshēmēnquiondabi. Nuquin Papan chiaid nibēdnuc: —Adec icsachitobi —quequin tantienquo ictsenondambi. ⁹Nuquin Papan chiaid tantiabi yec Nuquin Papan cuidte dacuēdēnenquo yec: —Bēdambo iquebi —nuqui quedenec. Adshumbic Nuquin Papan ambi chiaid Moises dada uamiampid isash: —Nuquin Papan chiaid niac-niaquec icsachitobi. ¹⁰Adquid Nuquin Papan cuidendac —nuqui quianondac. —Ma bēdamboec tabadte tantianu —quequin ambi chiaid Nuquin Papan Moises dada uamiampic. Aid dada uaid isashi: —Bēdamboec tabadenquo iccobi. Icsachitobi. Adquid Nuquin Papan cuidendac —nuqui quianondac. ¹¹—Ambi chiacpadomboenuidi nashobini Nuquin Papan bēdamboen isec —quec muadenedi Nuquin Papan chiaid abimbo tantiash: —Icsachitobi. Ambi chiaid niac-niacchitombi. Adquid Nuquin Papan icsano nidmequin cuidendac —nuqui quianondac. ¹²Aden nuqui abimbo tantiamequid Nuquin Papan chiaid bēdambo iquec. Icsaisambo icquin Nuquin Papan bēdamboen chuipampic.

¹³¿Nuquin Papan chiaid isbanashta matses Nuquin Papan cuidtequido yanactic? Padenquo. Matses Nuquin Papan cuidtequido yanambic Nuquin Papan ambi chiaid dada uamepampic. —Nēid isash: “Icsamboequini tabadchitec,” ma matses quenu —qeshun Nuquin Papan Moises dada uamepampic. Ambi chiaid niac-niacquido icquimbi ambi chiaid

tantiash nuqui nadondac. —Icsamboequini tabadchitec. Nuquin Papan nuqui bēdamboen istiapimboen icchitec. Èbien cuidchitec —nuqui quianondac. ¹⁴Nuquin Papan Mayanēn tantiamiacpadomboen con tsusedpan Nuquin Papan chiaid dada uapampic. Adembidi aton Mayanēn namiac Nuquin Papan chiacpadec nuqui bēdamboec tabadtsiac. Aidēn namiabi mētaniaid abibi mēnchiquidiapiambo yacimboen icsaquido icquin Nuquin Papan chiacpadomboen natiapiambo nuqui iquec. ¹⁵—Nuquin Papan chiacpadomboen nanu —queboedombi natiapiambo nuqui iquec. Adecbidi: —Utsibo icsacpadec icsainquo iquendabi —queboedobi nuqui adec icsachitec. Adash: —¿Atotsieshumbimbi adopoba? —quepec nuqui. ¹⁶—Nuquin Papan chiaid bēdamboen icchitec. Aidēn chiaid niacte bunenquo iquebi —queboedēmbi aidēn chiaid niac-niaquec: —Bēdamboen chiaidimbi niac-niacchitec —quebi. ¹⁷Bēdamboeuidi tabadtiaquidini icsaquid yec èbemi icsadenechitec. ¹⁸—Bēdamboec tabadnu —queboedi icsaquid yec èbemi bēdamboec tabadtiaimbo iquebi. Icsaquidini nec. ¹⁹—Bēdambo icte bunebi —queboedi èbemi bēdamboec tabadtiaimbo iquebi. —Icsate bunenquo iquebi —queboedi èbenquiobi icsaded-icsadedebi. ²⁰Icsate bunenquo icboedi icsaquid yec èbemi bēdamboec tabadtiaimbo iquebi. ²¹—Adquid nebi. Nuquin Papan chiacpadec bēdamboec tabadtiaquidi badedquo icsaded-icsadedebi —quequin tantiemi. ²²—Nuquin Papan chiaid bēdambo iqueque. Ambi chiacpadec èbemi bēdamboec tabadnu —queboedi ²³icsaquid yec èbemi bēdamboec tabadtiaimbo iquebi.

Mëtaniaid abembi mënchiquidtiapimbo yacimboen ëmbi naid ëntiapimbo iquebi. —Nuquin Papan chiacpadec bédamboec tabadnu —queboedi bédamboec tabadtiapimboeni icchitec. ^{24,25}Adquid yec shubitiadquio icchitebi. Icsaquid yec: —¿Mitsipadequini bédamboec tabadpeba? —queboedi: —Abi tantiasho Esuquidistumbini bédamboen tabadmec —quianondabi. Adshun Nuquin Papa naden chiembi. —Ëbi bédamboen tabadmequid Esus mimbi ëbi tantiamiac. Mibi bédambo iquec, Papa —quequin Nuquin Papa chiembi.

Nuquin Papan Mayanën namiaid

8 ¹Aden matses bédamboen tabadmequid Esuquidistu tantiasho: —Mibi icsambo iqueque. Cuidnu —cainquio iquendac Nuquin Papan. ²Icsaquido yec bédamboec tabadtiapimbo icsho Nuquin Papan cuidtequido icboedëmbi Esus tantiasho Nuquin Papan aton Mayan meniac aidën tantiamiacpadec nuqui bédamboec tabadanendac. ³—Moisesën chiacpadec bédamboec tabadec unësash Nuquin Papa yacno tabadebi —queboedi icsaquido yec abembi bédamboec tabadtiapimbo matses iquec. Adsho isun matses bédamboen iste bunquin Nuquin Papan aton Madombo Esus matsesmiac. Adoac Nuquin Papan tantiacpadec matses icsaid bedshunec abided cuidadec unëspanëdash. ⁴—Abided cuidadaid con Mado Esus tantiasho bédamboen isquin con Mayan matses menendambi. Adoac aidën tantiamiac ëmbi Moises chuimiampicpadec bédamboec tabadendac. Matses abi icsate bunacpadec icsainquio yec bédamboec tabadendac —queshun Nuquin Papan Esusded cuidpac caondash.

⁵Adec Nuquin Papan Mayanën tantiamiaid Esus tantiaquid Nuquin Papan tantiacpadec bédamboec tabadte bunec. Padnuen icsaquid: —Ëbi bunaid nanu —quequin ambibi tantiacpadec icsaic. ⁶Aden abi bunaidquio naic icsamboec tabadquid Nuquin Papan cuidendac. Padnuen Nuquin Papan Mayanën tantiamiacpadec tabadquid Nuquin Papan cuidte dacuëdënenquio yec bédambo yec unësash Nuquin Papa yacno tabadendac. ⁷—Icsate bunquidën ëbi chieshënec. Ambi naiduidtsëqui naquin ëmbi chiacpadomboen natiapimbo iquec —queshun Nuquin Papan cuidendac. ⁸Adquido chuiquin: —Mibi bédambo iquec —catiapimbo Nuquin Papa iquec.

⁹Esus tantiaquidien adesa nec. Esus tantiasho Nuquin Papan aton Mayan nuqui meniac aidën tantiamiacpadec nuqui bédamboec tabadendac. Nuquin Papan aton Mayan meniacmaid Esus tantiesha nec. Nuquin Papan Mayan Esusën Mayambidi nec. ¹⁰Abided cuidadaid Esus tantiasho bédamboen isquin Nuquin Papan aton Mayan meniaid yec abëd tabadtequido nuqui nec. Icsaquido yec matses abitedi unësquidombo icnubi Esus tantiaquid unësacsho Nuquin Papan abëdi tabadmendac. ¹¹Esus uincuemequidën Nuquin Papan ambi aton Mayan meniaido unësacsho nuqui uincuemequin nuquin dada utsi uaindac. Aton Mayan nuquibëd tabadsho isun nuqui adoendac.

¹²¿Ëbi adsho tantiashta Esus tantiaquid abi bunacpadequi icsapec? Padenquio. Bédamboec tabadte bunec. ¹³Utsiboen abi bunacpadec icsamboecuidi tabadec unësacsho cuidquin Nuquin Papan icsano nidmendac. Nuquin Papan Mayanën tantiamiacpadec tabadquin nuqui icsaid

nuqui ënec. Adash unësash Nuquin Papa yacno nuqui tabadendac.

¹⁴Aden aton Mayanën bédamboec tabadmiaido Nuquin Papan: —Con mado nec. Con champi nec —capendac.

¹⁵¿Icbo icsambo icquidën yua dacuëdmiacimboenda Nuquin Papan Mayanën nuqui dacuëdmec? Padenquio. Nuqui bédambo icmec. Aidën tantiamiacpadomboen Nuquin Papauidtsëqui papa nuqui capec.

¹⁶Aden Nuquin Papan Mayanën: —Nuquin Papan mado nec. Adecbidi aton champi nec —nuqui catsiash. Adoac: —Ai, Nuquin Papan mado nebi —dada quenubi chido: —Adecbidi Nuquin Papan champi nebi —quepec.

¹⁷—Con mado nec. Con champi nec —qeshun nëbi Nuquin Papan nuqui bédamboen isquin unësacsho abëdi tabadmequin nuqui bédamboshë icmendac. Utsibon chieshënac chieshtoenquo yec unësacsho Nuquin Papan abëdi tabadmequin Esus bédamboshë icmiac. Adembidi Esus tantiaquid icsho utsibon chieshënaqui chieshtoenquo icquin Esus tantiequi unësacsho Nuquin Papan abëdi tabadmequin nuqui bédamboshë icmendac. Nuquin Papa yacnombo Esuquidistun natedi nuquin na nendac.

Nuquin Papan bédamboshë icmete chiaid

¹⁸Adec Nuquin Papa yacno nuqui bédamboshë icte tantiaquin nuqui nidaidën natiaic tabadaiduidi ma nuqui tantiatipimbo iqueyoc. ¹⁹Aden Nuquin Papan nuqui bédamboshë icmete tantieci ambi uaid utsitedi nidaidën icquidtedi aben icquidtedi: —Nëbimbobi bédambo icmepashuni —queded-quededec tabadec. ²⁰Abia matses uaid Adan icsasho cuidquin ambi uaid nidaidën icquidtedi Nuquin Papan unësquiduidquo icmepampic aidon:

—Padi —catiapimbo icnuc.

²¹—Yuecshun ëmbi Esus tantiaquido uincuemequin aton dada utsi uacpadën ëmbi uaido utsi nidaidën icquidtedi chodquete icboedi utsi uain bédamboshë icmendambi —quequin tantiaquimbi unësquiduidquo icmepampic. Aden Nuquin Papan chiaid tantiaquin ambi uaidon nidaidën icquidtedishun aton dada abi bédambo icmete tantiaquin cainec tabadec.

²²Unëstiapimbo icte bunec unësquid yec: —¿Tedectsicshun Nuquin Papan nuqui utsi uapeba? Nëbimbobi Nuquin Papan utsi uapashuni —queded-quededec Nuquin Papan uaidtedi. Bacuë tishquid bacuë paëmbo icnuc: —Badedquido tishmepashuni —quiacimboec adpec. ²³Nuquin Papan meniaidën aton Mayanën tantiamiacpaden nuquitsen naden chiec.

—Con dada utsi uaquin unëstiapimbo icquid icmepashuni. Ambi chiacpadomboen naquin: “Con mado neque. Con champi neque. Utsibo ismenu,” quequin nuquin dada utsi uaquin Nuquin Papan unëstiapimbo icquid icmendac —queded-quededquin nuquin dada utsi uate tantiaquin nuqui cainec. ^{24,25}—Esus tantiaquido unësacsho Nuquin Papan nuquin dada utsi uaindac —quequin tantiaquin nuqui Esus tantiabenondac. Nuquin dada utsi uabi icnubi: —Nëbimbobi dada utsi uapashuni —nuqui queded-quededendac yuec. Nuquin Papan nuquin dada utsi uaquien nuqui adenquo iquendac.

²⁶—Aden aton dada utsi uate tantiaquin yuen cainec chieshtonoshe —qeshun Nuquin Papan Mayanën nuquibéd icquin bédamboen tantiamec. —¿Mitsipadembimbi Nuquin Papa chuipeba? —quec nuqui shubitiadquo icsho isun Nuquin Papan Mayanën abi

chiec. Unësquo icnuc onquenquo icquin chiec: —Mimbi tantiacpadomboen aid matses bédambo icmeta, Papa —quequin Nuquin Papan Mayanën nuqui comapenen chuided-chuidedec. ²⁷Aden Nuquin Papan: —Ma Esus tantiaquido bédambo icnu —quequin tantiaidbidi aton Mayanën onquenquo icquin chuisho Nuquin Papan tantiec. Otacquo tantiaidtedi tantiaquid icquin Nuquin Papan aden aton Mayanën chiaid tantiec.

Nuquin Papan nuqui bédambo icmiaid

²⁸Aden tantiasun nuqui naden tantiec. Ambi tantiamiacpadomboen abi tantiaquido bédambo icmete bunquin Nuquin Papan bédamboen nashunec. Unësquo yec tabadsho aden naic. Natiambo icsho adembidi naic. Cuishonquesho adembidi naic. ²⁹Ëndenquimboshë nidaid uabi yequi Nuquin Papa nadpampic. —Ëmbi tantiactedi ëbëdta con Mado tantiaquid icmequin Esuspadquo icnuc bédambo icquid icmendambi. Aden abi tantiaquido aton utsibobimboecnuc icmendabi —quequin ambi tantiampicpadquo icnuc bédambo icmenuen Nuquin Papan naic. ³⁰Ëndenquimboshë nidaid uabi yec: —Yuecshun naindambi —abi quiampicpadomboen Nuquin Papan nuqui Esus tantiamiac. Adoac nuqui cuidmenquo icnuec abided cuidadaid Esus tantiasho Nuquin Papan nuqui bédamboen isec isaisabimboecnuc. Nuqui bédamboen isquin nuqui bédamboen tabadmec. Unësacsho nuqui unëstiapimbo icquid icmeshun abëdi tabadmendac.

³¹Ëmbi aden chiaidtedi tantiashta Esus tantiaquido dacuëdpec? —Nuqui cudasquin Nuquin Papan nuqui

bédambo icmendac. Ëbi chieshënquidën: “Cuid,” cac Nuquin Papan ëbi cuidenquo ictsiash —quec nuqui dacuëdenquo iquec. ³²Nuquin Papan nuqui tantiaquiec. Aton Madombo cudasenquo icquimbi nuqui cuidenquo icnuen aton Madoded cuidquin unës uamepanëdash. Adshumbic Esus tantiasho ënenquo icquin bédamboen isquin nëbi bédambo icmequin unësacsho abëdi tabadmequin nuqui bédamboshë icmendac. ³³ËNuquin Papan nuqui bédamboen isquidëmbida nuqui cuidpec? Padenquo. ¿Utsibo nuqui caic: —Icsambo iquec —queshobida Nuquin Papan nuqui cuidpec? Padenquo. ³⁴ËEsusëmbida nuqui cuidpec? Abi tantiaquido cuidmenquo icnuec abided cuidadec Esus unësac caondash. Unësacsho Nuquin Papan uincuemiac Nuquin Papa yacnoshon aidëmbi abi tantiaquido chianec. —Ëbi tantiaquido bédamboen isquin cuidenda, Papa —quequin Nuquin Papa chianec tabadec. ¿Adquidënquiobida nuqui icsano nidmequin cuidpec? Padenquo. ³⁵Nuqui bédamboen isquin ënenquo icquin Esusën nuqui tantiaquiec. ¿Shubisho isunda Esusën nuqui tantienquo icpec? Padenquo. ¿Dacuëdshoda Esusën nuqui tantienquo icpec? Padenquo. Adembidi nuqui tantiaquiec. Utsibon chieshënsho bédamboen isquinc pete natia bunsho bédamboen isquin nuquin dashcute nibëdsho bédamboen isquinc nuqui Esusën caindac. —Ëbi acshunendac —quesho bédamboen isquinc chieshëmënquidon: —Cuesunenu —casha bédamboen isquinc nuqui caindac Esusën ënenquo icquin. ³⁶Aden utsibon Esus tantiaquido chieshënte chuiquin Nuquin Papan dada uamepampic naden.

“Mibi tantiasho ëbi: ‘Cuesunenu,’
caded-cadedec uimanëmënuquidon.
Aben icquidbimboecnuc:
‘Cuesunenu,’ caded-cadedebi,
Papa,”

quequin Nuquin Papan chiaid dada
uapampic Esus tishabi icnuc.

³⁷Aden utsibon nuqui chieshënsho
Esuquidistun nuqui bédamboen
tantiaquiec. Shubisho abi nuqui
tantiamec. Adoac Esus tantiatsec
shubiquimbi chieshtoenquio icquin nuqui
Esus tantiaquiec yanendac. ^{38,39}Nuquin
Papantsen ënenquio icquin nuqui
tantiaquiec. Nuquin Icbo Esus tantiasho
Nuquin Papan nuqui bédamboen isec.
Unësacsho nuqui bédamboen tantiatsiash.
Unësabi icsho nuqui bédamboen isec.
¿Nuquin Papan abi yacnoshon uaid
mayan bédan: —Aid tantienda —cashoda
nuqui Nuquin Papan tantienquio
yampatsiash? Padenquio. Adembidi
nuqui tantiaquiotsiash. ¿Podobitsi
icsabon icbo Satanasën: —Aid tantienda
—cacta Nuquin Papan nuqui
chieshëmpatsiash? Padenquio. Adembidi
nuqui tantiaquiotsiash. Nëbi nuqui
bédamboen tantiec. Yuecshun adembidi
nuqui bédamboen tantiendac.
Comapenen tantiaquidtedishun nuqui
caic: —Aid tantienda —caqui adembidi
Nuquin Papan nuqui tantiaquiotsiash.
Abuc nidacsho Nuquin Papan nuqui
bédamboen tantiatsiash. Nidaid
uquëducquio nidacsho adembidi nuqui
bédamboen tantiatsiash. Nuquin Papan
uaid utsi abitedishun nuqui caic: —Aid
tantienda —caqui adembidi Nuquin
Papan nuqui bédamboen tantiatsiash
ënenquio icquin.

Pabadon aton matses isadaidbo chiaid

9 ^{1,2}Aden con matses isadaidbo
tantiaquid Nuquin Papa nec.
—Aden abi tantiaquidi con matsesën

bédamboen tantienquio iquec —quiash
shubitiadquio iquebi. Muainquio iquebi.
Esus tantiaquid icsho Nuquin Papan
Mayanën tantiamiaid icquin abimbo
chiembique. Tantiata. ³Con matses
isadaidbo tantiec unësquio yec tsadebi.
Nuquin Papan: —Min matses abitedi
cuidenquio icnuen mibiuidtsëqui
Esusbéd tabadmenquio icquin icsano
nidmequin cuidnu —capatecnëdani.
Adoac: —Ai, con matses cuidenquio
icnuen ëbided cuid —quetseonndabi.
⁴Con matses tsusedpa Acobo caid
Nuquin Papan Isadaid caidën
tsyuecquidotedi isadaidbo tantiaquin
Nuquin Papan nadopampic. —Con
matses mibi caimbique. Mibëdi
tabadebique. Mibi ismenu —quequin
con matses tabadacno abu ushu
bëchamauanquiecquid chomequin
ismepampic. Adashic nadpampic.
—Ëmbi chiacpadec bédamboec
tabadsho mibi bédamboen isquin
bédambo icmendambi. Mibi nianenquio
iquendambi —queshun ambi: “Naden
nata,” quequin chiaid Moises dada
uamepampic. Adoac abi tabadte shubu
uashunash Nuquin Papa tantiec
isadaidbo tabadpampic. Adshumbic
matses cuidmenquio ictequid chuiquin:
—Mibi bédambo icmendambi
—quequin Nuquin Papan con matses
chuiampic ëndenquimboshë.
⁵Abadauan chuiquinc Isac chuiquinc
Acobo chuiquinc capampic. Ambi
chiacpadomboen Isadaidbon chidon
tishac Esuquidistu matsesac caondash.
Nuquin Papapadquidquobi yec
abitedishun Icbo yec matsesac
caondashe. Esus chuiquin: —Nuquin
Papa padquobi yec mibi bédamboshë
iquec —canuna ënenquio icquin.

⁶Ëmbi chiacpaden Esus tantienquio
icsho Nuquin Papan con matses dadpen
bédamboen istiapimbo iquec. ¿Aden

tantiashtabi nadpe? —Nuquin Papa muapampic. Ambi chiacpadomboen nainquo icquin con matses bēdamboen istiapimbo iquec —¿quectabi ique? Padenquo. Nuquin Papan abimbo chuiampic. Isadaidbo dadpenshun Nuquin Papa bēdamboen tantienquo iquec. Ambi tantiatedishun abi tantiasho ambi chiacpadomboen Nuquin Papan bēdamboen isec.

⁷Ēndenquimboshē con tsusedpa Abadauanēn mēdaidtedi adembidi Nuquin Papan bēdamboen isambo. Abadauanēn mado abentsēqui Isac caic: —Aidēn tsyuecquido ěmbi mibi cuēnacpadomboen con matses caindami —quequin Nuquin Papan chuiampic. ⁸¿Abadauanēn bacuēbotedishun tsyuecquidotedida Nuquin Papan con matses caido nepec? Padenquo. Ambi chiacpadomboen Isaquēn tsyuecquido Nuquin Papan con matses caido nec. ⁹Naden Nuquin Papan Isac tishte chuiampic. “Ēmbi tantiapadēn choashun ěmbi namiac Sadan min chidon dada bacuē tishendac,” quepampic Nuquin Papa Abadauan chiec.

¹⁰Aden ambi: —Adoendambi —quequin chiacpadomboen naquidquo Nuquin Papa nec. Aden Nuquin Papan Isaquēn bacuē abi ushēmbi daēd tishte chuiampic. Adnubien con tsusedpa Isaquēn aton chido Debeca caid bedshun chudquin dada bacuē daēd usundomepampic Nuquin Papan chiacpadomboen. ^{11,12}Aid dada bacuē daēd tishabi icsobi Nuquin Papan ani naden chuiampic. “Ēmbi tantiapadquid min madon utsimpi bēyucquidbimboecquid nendac,” quepampic. Aid daēd tishabi bēdamboec tabadiapimbo icnubi: —Tishacsho ěmbi tantiapadambi tsyuec tishtsaidēmpi abentsēqui bēdamboen isendambi

—quequin tantiec adpampic Nuquin Papa. ¹³Adembidi Isaquēn mado chuiquin Nuquin Papan ambi chiaid dada uamepampic. “‘Acobouidsēqui tantiaquiquin aton buchimpi Esau bēdiactšec tantiatsendambi,’ quepampic Nuquin Papa,” quequin dada uamepampic.

¹⁴¿Ēmbi aden chuisho tantiashe: —Nuquin Papa icsambo iquec —quecta mibi ique? Ma Nuquin Papa icsapenquo icquid neyoc. Icsaquido yec matses abitedi ambi cuidtequido icscho Nuquin Papan ambi tantiatedi bēdamboen isec. ¹⁵Aden Nuquin Papan con tsusedpa Moises chuiampic.

“Ēmbi tantiatedi matses bēdamboen isendambi.

Aidtedi cuidenquo iquendambi,” quequin chuiampic. ¹⁶¿—Ēmbembi nasho Nuquin Papan bēdamboen istsiash —quec matses bunacpadenda Nuquin Papan matses bēdamboen ispec? Padenquo. Ambi tantiatedishun abi tantiasho Nuquin Papan bēdamboen isendac. ¹⁷Aden ambi tantiapadomboen ambi naid Nuquin Papan Equipito yacnocquido chuiquid dapa padaon caid chuiampic. “‘Matses abitedishun ma nadono. Padaon caid icsasho Nuquin Papan cuidec. Nuquin Papa abitedishun Icbo yec nadatiambo icquidquo nec, ma ěbi canu,’ quequin mibi chuiquid dapa icmiondami. Mibi icsasho pacuēnēdacbimboecnuc mibi icmemb,” quequin Nuquin Papan padaon chiaid Moisesēn dada uapampic. ¹⁸Aden ambi tantiapadomboen utsi-utsien icsaido pacuēnēdacbimboecnuc icmequin abi tantiamenquo iquec. Adembidi utsi-utsien bēdamboen isquin abi tantiamec.

¹⁹¿Ēbi adsho tantiashta mibi nadpe? —¿Atotsieshun Nuquin Papan matses

cuidpec? ¿Abitedishun Icho icquin Nuquin Papan namiacta matsesën nainquio icpadic? —¿quecta ique? ²⁰¿Matses icquinda mimbi Nuquin Papa chushcapatsia? ¿Ambi uaido icquimbida nuqui nadope? —¿Atotsieshun ëbipadquid matses uao, Papa? —¿capenda nuqui ique? ²¹¿Ada abi nacnenquid matsun chushcapadic? Padenquio. Matsu nacnenquidën ambi tantiacpadomboen nacnenendac. —Nëid nidaid tëshë tëchu bëdambo icquid acte uetequid nacnenu. Nëid nidaid tëshë matsumpi icsactsëcquid opa acmete nacnenu —quequin matsu nacnenquid. Aden ambi tantiacpadomboen nidaid tëshun nacnenquid.

²²Adembidi nuqui uaquid Nuquin Papan ambi tantiacpadomboen naindac. —Abitedishun Icbombo yec comapenen tantiaquidquio nebi. Adquid icquin icsaido cuidquid nebique. Ismenu —queboedëmbi ambi cuidtequido baded cuidenquio iquec. Ambi ëndenquimboshë tantiacpadomboen aido icsano nidmendac. ²³—Ma ëmbi bëdamboen isaidon naden tantianu. “Icsaisambo icquin matses bëdamboen iste bunquin Nuquin Papan icsaido badedi cuidenquio iquec,” quequin ma tantianu —qeshun icsaido badedi cuidenquio iquec. Ambi ëndenquimboshë tantiacpadomboen ambi bëdamboen isaido abëdi tabadmendac.

²⁴Aden ambi tantiacpadomboen Esus tantiasho Nuquin Papan nuqui bëdamboen isec. Isadaidbon abi tantiasho bëdamboen isquinc isadaidpembo matses utsibon abi tantiasho bëdamboen isquinc nuqui caindac. ²⁵Ambi matses utsibotsen aden bëdamboen iste chuiquin Nuquin Papan con tsusedpa Oseyas caid dada uamepampic naden.

“Utsibo ëmbi con matses cacmaidobi con matses cabenendambi.

Adembidi ëmbi bëdamboen tantiacmaidobi matses utsibo bëdamboen isbenendambi,” quequin Nuquin Papan chiaid dada uashun ²⁶nadentsen dada uapampic.

“Matses utsibo ambi con matses cacmaidobi ambi tantiacpadën aido abentse-abentsen Nuquin Papan bëdamboen isendac.

Bëdamboen isquin: ‘Con mado nec. Con champi nec,’ caindac,”

quequin Nuquin Papan matses utsibo bëdamboen iste chuiquin dada uapampic.

²⁷Ambi con matses caidombi abi tantiatiapimbo icscho isash Nuquin Papa chushquaid con tsusedpa Isayasën naden dada uapampic. “Masitedi dadpenquio caidnëdaido isadaidbo daëdpactsëcshun abi tantiasho bëdamboen isquin aidentedsëqui Nuquin Papan cuidenquio iquendac. ²⁸Ambi chiacpadomboen ambi tantiacpadën matses abi tantiesabotedi Nuquin Papan uesquin cuidendac isadaidbo yec matses utsibo yec quenuc,” quequin Isayasën dada uapampic. ²⁹Nuquin Papan chiaid padpiden dada uaquin isadaidbo cuidte Isayasën chuipampic naden.

“Shubu dadpen icquid Sodoma caid yacnocquidobëdta shubu dadpen icquid utsi Comoda caid yacnocquido Nuquin Papan uesquin cuidac aton tsyuecquido nibëdquieic iquendac.

Adembidi con matses Nuquin Papan uesquin cuidtsempanëdash.

Abitedishun Icho icquin con matses nibëdquiecnuc cuidtsempanëdash. Dadpen cuidquin daëdpactsëc cuidabi icpanëdash,”

quequin dada uapampic Isayasën.

**Isadaidbo bēdamboen
istiapimbo icte chiaid**

³⁰Aden Isadaidbo dadpenshun abi tantienquo icsho Nuquin Papan bēdamboen istiapimbo iquec. Padnuen matses utsibo: —Mabi Nuquin Papan bēdamboen isnu. Ambi chiacpadec bēdamboec tabadnu —quesabobi: —Ēbi cuidmenquo icnuc abided cuidadec unēsaid Esus bēdambohē iquec —quesho Nuquin Papan bēdamboen isec icsaisabimboecnuc. ³¹Isadaidboen: —Moisesēn chiampiduidi ěmbemi nasho Nuquin Papan bēdamboen isebe —queboedombi nainquo icsho Nuquin Papan bēdamboen istiapimbo iquec. ³²Ātotsieshun Nuquin Papan isadaidbo bēdamboen istiapimbo icpec? —Ambi chiacpadomboenuidi ěmbemi naquin Nuquin Papa bēdamboen ismembi —queboedombi adotiapimbo icquin Nuquin Papa bēdamboen ismequidquo Esus chieshēnec. Adsho Nuquin Papan bēdamboen istiapimbo iquec. ³³Esus tishabi icnuc isadaidbon Esus chieshēnte chuiquin Nuquin Papan con tsusedpa naden dada uamepampic.

“Buintad bēdambo icquid istuidash:

‘Nēidquo shubu uanun
nitsinemi,’ quiacbimboen
Edusaden yacno ěbi bēdamboen
ismequidquo isadaidbobēd
tabadmendambi.

Adec tabadsho anocquidon
chieshēnendac.

Aid chieshēnquid nadquo iquendac.

‘Cuēte mabud iquec,’ quequin
tantienquo yec nidec
tocoshquetanec uebudacimboec
ěbi bēdamboen ismequid
tantienquo yec unēsash icsano
nidendac.

Aid tantiaquido: ‘Nēid tantiasho
Nuquin Papan abi yacno nuqui

tabadmendac,’ quequid
unēsacsho ěbi yacno
tabadmendambi,”

quequin Nuquin Papan ambi chiaid
dada uamepampic.

10 ¹Con matses isadaidbo tantiac
unēsquo icnuc Nuquin Papa
chianiombi. —Con matses isadaidbo
abided cuidadaid Esus tantiameta, Papa.
Esus tantiasho bēdamboen ista, Papa
—quequin Nuquin Papa chianiombi.

²Esus tantiabi ěmbi
chuidenecpadomboen chiec: —Nuquin
Papan chiacpadomboenuidi naquin
Nuquin Papa bēdamboen ismembi
—quetsēchoedombi con matsesēn
Nuquin Papa bēdamboen ismete
tantienquo iquec. ³—Abided cuidadaid
Esus tantiasho Nuquin Papan
bēdamboen isebe —quetiadquidi
icsamboen tantiec. —Nuquin Papan:
“Bēdamboec tabadta,” quequin chiaid
Moisesēn dada uactedi naquin Nuquin
Papa bēdamboen ismembi —quequin
icsamboen tantiaquin Nuquin Papan
tantiacpadomboen nainquo icquin Esus
tantienquo iquec. ⁴Esusuidtsēqui
Nuquin Papan: —Bēdamboec tabadta
—quequin chiaid Moisesēn dada uactedi
naquidquo nec. Adec icsaisa yec matses
icsaid bedshunuec abided cuidadec
unēsac caondash. Nēbi Esus tantiasho
Nuquin Papan matses bēdamboen isec
icsaisabimboecnuc.

⁵Nuquin Papan chiaid dada uaqin
Moisesēn chuiampampic naden. “Ambi
chiacpadomboenuidi naquid Nuquin
Papan bēdamboen isquin abēdi
tabadmetsiash,” quequin Nuquin Papan
chiaid Moisesēn dada uapampic. ⁶Aden
ambi chiacpadomboenuidi
natiadquidombi natiapimbo icsho
Nuquin Papan matses bēdamboen
istiapimbo icpanēdash. Nēbi abided
cuidadaid Esus tantiasho nuqui

bédamboen isec. Adoac Esus tantiaquido nadenquio iquec. —Nuquin Papa yacno nidshun źtsuntsin Nuquin Papa nuqui bédamboen ismepatsiashba? —quenquio nuqui iquec. —Esusquio Nuquin Papa bédamboen ismequidquio nec —quequin nuqui tantiec. ⁷Aden tantiec: —źTsuentsin Nuquin Papa bédamboen ismequidquio uincuemepatsiashba? —quenquio nuqui iquec. —Abided cuidadec unēsacsho Esus uincuemiāc caondash —quequintsen nuqui tantiec. ⁸Aid tantiaho Nuquin Papan nuqui bédamboen isec. Ambi bédamboen iste chuiquin Nuquin Papan naden dada uamepampic. “Nuquin Papan chiaid chuisho tantiaho: ‘Abimbo chiec. Aid tantiembi,’ qesho Nuquin Papan matses bédamboen isendac,” quequin dada uamepampic. Nēbi Nuquin Papan chomiaid abided cuidadaid Esus tantiaho Nuquin Papan nuqui bédamboen isec. Aden nuqui bédamboen ismequid Esus chuibenequid nebi. ⁹—Nuquin Papan uincuemiaid Esus abitedishun Icho neque. Con Icho Esus canu —quequin chuisho Nuquin Papan nuqui bédamboen isquin cuidenquio iquendac. ¹⁰—Ēbi cuidmenquio icnuec abided cuidadaid Esus tantiembi —quequin otacquo tantiaquidēn: —Esus tantiaquid nebi —quequin utsibo abimbo chuisho bédamboen isquin Nuquin Papan cuidenquio iquendac.

¹¹Ambi chiaid Nuquin Papan dada uamiācpaden:

“Aid tantiec: ‘Nēid tantiaho Nuquin Papan abi yacno nuqui tabadmendac,’ quequid unēsacsho ěbi yacno tabadmendambi.”

¹²Isadaidbo yec matses utsibo yec quequido Esus tantiaquidtedi adoendac.

Aden abitedishun Icho icquin abi tantiaquidtedi Esusēn bédambo icmendac. ¹³Aden Esusēn nate chuiquin con tsusedpan Nuquin Papan chiaid dada uapampic. “ ‘Abitedishun Icbombo icsho mibi tantiaquid nebique. Ēbi bédamboen ista, Icho,’ qesho bédamboen isquin cuidenquio iquendac,” quequin dada uapampic.

¹⁴źMitsipaden matsesēn Esus tantiābamepec? źEsusēn naid chiabi yacta matsesēn tantiāpec? Padenquio. Esusēn naidquio chuibanaquien tantiendac. źEsusēn naid chuisho tantiaho: —Mua —quequidta Esus tantiaquid nepadic? Padenquio. —Abimbo caic —queshun: —Min Mado Esus tantiembique. Ēbi bédamboen ista, Papa —quequidien Esus tantiaquid nec. ¹⁵źMitsipadoaidēn Esusēn naid chuibamepec? ź—Chuita —cacmaidēnda chuibamepec? Padenquio. Nuquin Papan: —Con Mado chuibeneta —caidien Esusēn naid chuibanquid nendac. Aden chuibante chuiquin Nuquin Papan naden dada uamepampic. “Nuquin Papan matses bédamboen iste chuibanquid chosho isash: ‘Bédambo iquec,’ quec matses cuishonquendac,” quequin dada uamepampic.

Isadaidbo dadpeshun

Esus tantienquio yaid

¹⁶Adquidēn Esusēn naid chuibanac isadaidbo dadpeshun Esus tantienquio iquec. Daēdpactsēcshun tantiec. Abi tishabi icnu aden abi tantiesabo Esusēn chuite Nuquin Papan con tsusedpa Isayas caid dada uamepampic naden. “Mimbi chiaidquio ěmbi chuibansho źtsuntsin tantiāpec, Papa? Daēdpactsēcshun: ‘Abimbo mimbi chiec. Mibi tantiaquin mimbi chiacpadomboen naimbi,’ ěbi caindac, Papa,” quequin Esusēn aton Papa chuite Isayasēn dada

uapampic. ¹⁷Aden Esusën naid chuibansho tantiashun: —Abimbo caic —queshun utsibon Esus tantiec.

¹⁸¿Esusën naid chuisho tantiabida con matses isadaidbon icpadic? Ma tantiapaboc. Nuquin Papan chiaid dada uampicpadomboen “nidaid utsi-utsiec yacno nidshun Nuquin Papan chomiaidën naid chuibanquidën chuibanendac.” Aden chuibansho ma con matsesën tantiaboc. ¹⁹Aden Nuquin Papan chiaid chuisho tantiash: —Tantiadenquo yec onquec —¿quepecta icnëdash con matses? Padenquo. Tantiashi abi bëdamboen tantiate bunenquo icsho isun matses utsibo bëdamboen isbente chuiquin Nuquin Papan ambi chiaid isadaidbo tsusedpa Moises dada uamepampic naden.

“Isadaidbouidi ëmbi bëdamboen iste mimbi danubi ëmbi con matses cacmaidobi matses utsibo bëdamboen isbenendambi.

Ëmbi matses utsibo bëdamboen iso isash: ‘¿Atotsieshun Nuquin Papan matses utsibo bëdamboen ispec?

Icsambo iquec,’ quec mibi chushquendac.

Matses utsibobi ëbi tantiabi icquido ëbi tantiamendambi.

Aido bëdamboen isquin mibi nëishëmendambi,”

quequin Nuquin Papan Moises dada uamepampic. ²⁰Adembidi dacuëdenquo icquin Isayasën Nuquin Papan matses utsibo bëdamboen iste dada uapampic.

“Nuquin Papa tantiatiadquo iquebi,’ quenquo icquidombi ëbi tantiabenosh.

‘¿Mitsipadembimbi Nuquin Papa bëdamboen ismepeba?’ quesabobi ëmbi bëdamboen iste tantiamiombi,”

quequin Isayasën Nuquin Papan chiaid dada uapampic. ²¹Isadaidbotsen chuiquin Nuquin Papan chiaidquibidi Isayasën naden dada uapampic. “ ‘Mibi tantiac unësquo iqueque. Ëbi bëdamboen tantiata,’ cadeniaqui: ‘Padi, mibi tantiatiapimbo iquebi,’ quequin ënenquo icquin ëmbi chiaid mimbi niac-niacpec,” quequin Nuquin Papan chiaid Isayasën dada uapampic.

Ambi chiaitedi isadaidbo Nuquin Papan bëdamboen isaid

11 ¹¿Ambi chiaid niac-niacsho isadaidbotedida Nuquin Papan chieshëmpec? —Con matses catiapimbo iquebi —¿quecta iquec? Padenquo. Isadaidbombo nebi. Ëndenquimboshë con tsusedpa Abadauan campidën baban tishmiaid Benaminën tsyuecquidon tsyuecquid yec isadaidbombo nebi. Adquid icsho Nuquin Papan chieshënenquo iquebi. ²Ëndenquimboshë nidaid uabi icquimbi Nuquin Papan: —Con matses caindambi —quequin con matses isadaidbo tantiapampic. Adshun abitedi chieshënenquo iquec. ¿Ediasën chiampid tantienquioda ique? Aton matses isadaidbo nëishënsun Nuquin Papa naden chuipampic. ³“Mimbi con matses caidotedi icsamboshë icquec, Papa. Mimbi chiaid chuibanquidobi cuesun secac. Papa quequin mibi menequin ismete cuënote nacnenaid uesquin chic-chicpac, Papa. Icsamboshë iquec. Èbiuidtsëqui bëdambo iquec. Mimbi chiaid chuibansho tantiashun ëbi cuesunetiadquo iquec, Papa,” quequin Ediasën Nuquin Papa chuipampic. ⁴Adoac ¿mitsipadomboen Nuquin Papan chuipampic? “Èbi tantiaquido abi iquec. Ëmbi namiacpadomboen isadaidbo dadpenshun 7000tedishun ëbi tantiec. Èbi tantiesabon papa quequin

nacnenaïd Bad caïd tantienquoïc icquin ëbi tantiec,” quequin Nuquin Papan Edias chuipampic. ⁵Adembidi nëbi con matses isadaïdbon ambi tantiatedishun Esus tantiasho Nuquin Papan bëdamboen isec. ⁶¿Ambembida con matsesën Nuquin Papa bëdamboen ismepec? Padenquoï. —Ëmbi chiacpadomboenuïdi nasho matses bëdamboen isembi —¿quecta icpec Nuquin Papa? Padenquoï. Aden naquïd nibëdsho bëdamboen istiapimbo icboedëmbi ambi tantiatedishun icsaboedon Esus tantiasho Nuquin Papan bëdamboen isendac.

⁷Isadaïdbon ambi tantiatedishun Esus tantiasho Nuquin Papan bëdamboen isec. Isadaïdbo utsiboen bëdamboen istiapimbo iquec. Aïdo: —Nuquin Papa bëdamboen ismete bunquin ambi chiacpadomboenuïdi ëmbimbo nanu —queboedombi nainquoï icsho Nuquin Papan bëdamboen istiapimbo iquec. Abi bëdamboen ismequïdquoï Esus chieshënsho Nuquin Papan pacuënëdacbimboecnuc isadaïdbo icmepanëdash. ⁸Aden ambi isadaïdbo pacuënëdacbimboecnuc icmete chuiquin Nuquin Papan dada uamepampic naden.

“Nuquin Papan pacuënëdacbimboecnuc icmiac Nuquin Papan chiaïd chiaqui tantiatiapimbo iquec,” quequin dada uamepampic. ⁹Adembidi ambi isadaïdbo pacuënëdacbimboecnuc icmete chuiquin Nuquin Papan con tsusedpa Dabid naden dada uamepampic ëndenquimboshë.

“Ëbi bunauïduïdï naïc ëbibi bëdambo iquebi,’ quequïdëmbi Nuquin Papa bëdamboen tantienquoï iquec.

Adsho Nuquin Papan cuidpashun.

Cuidadnushi abimbo chiaïd danec: ‘Ëmbembi naïc bëdambo iquebi,’ quendac.

Adec abi tantienquoï yec icsasho Nuquin Papan cuidpashun.

¹⁰Pacuënëdacbimboecnuc icmequin Nuquin Papan abimbo tantiamenquoï icpashun.

Natiamequin shubimepashun,” quequin Nuquin Papan chiaïd Dabidën dada uapampic.

Nuquin Papan matses utsibo bëdamboen isbenaïd

¹¹¿Aden pacuënëdacbimboecnuc icmiac Esus tantiatiapimbo icsho isadaïdbo padpiden bëdamboen tantiametiapimboda Nuquin Papa icpec? Ambi tantiacpadomboen bëdamboen tantiamendac. Nëbi isadaïdbo dadpen bëdamboen istiapimbo icquimbi matses bëdamboen iste bunquin Nuquin Papan matses utsibo Esus tantiamenquoï bëdamboen isbenec. —Ëmbi adsho isash isadaïdbotsen ma nadnu. “Nuquin Papa bëdamboen ismete bunquiebiique. Ëmbitsen Esus tantianu,” ma quenu —qeshun Nuquin Papan aden matses utsibo ambi bëdamboen iste tantiamiac. ¹²Ambi chomiaïd Esus tantienquoï icsho isadaïdbo dadpen bëdamboen istiapimbo icquimbi matses utsibon Esus tantiasho ambi con matses caïdo isadaïdbobimboecnuc Nuquin Papan bëdamboen isbenec. Ambi tantiacpadën ambi tantiamiacpadomboen isadaïdbo dadpeshun Esus tantiabensho Nuquin Papan bëdamboen isendac. Adshumbic matses utsibobëdta isadaïdbo Nuquin Papan bëdamboshë icmendac.

¹³Tantia, matses utsibo. Mibitsen chuïnu. Nuquin Papan icmiacpadomboen matses utsibo Esusën naïd chuïbenequïdquoï nebi. Ëmbi chuïbeneboed con matses isadaïdbo

chuiibanombi naden. —Esusën naid ëmbi chuibeniác matses utsibon Esus tantiabenosh. Adsho Nuquin Papan aido bédamboen isbenosh —quequin con matses chiombi. ¹⁴—Aden Nuquin Papan matses utsibo bédamboen isaid ëmbi chuisho tantiash Nuquin Papa bédamboen ismete bunquin Esus tantiatsiash. Adsho Nuquin Papan bédamboen istsiash —qeshun con matses aden chiombi. ¹⁵Aden isadaidbon Esus chieshënsho isun Nuquin Papan matses utsibo Esus tantiamequin bédamboen isbenac. Ambi tantiacpadëmbi isadaidbontsen Esus tantiasho Nuquin Papan bédamboen isbenendac. Isadaidbontsen Esus tantiabededsho isumbic Nuquin Papan matses unësaidotedi uincuemendac.

¹⁶Con tsusedpa Abadauan abi tantiaquidquío icsho Nuquin Papan bédamboen isquin: —Con matses mibi caimbi. Adembidi min tsyuecquidotsen ëmbi chiactedi con matses caindambi —quequin ambi chiacpadomboen isadaidbotedi Nuquin Papan con matses caindac. Ambi nitsinaid cuëte caniacsho: —Tapunuidtsëqui con na nec. Dada con napenquío nec —¿capenda icbon iquec? Padenquío. —Abichobi con na nec —caquid. Adembidi Nuquin Papan isadaidbotedi con matses caic. Caniec taëquid cuëte tapumbimboecquid abia con matses caid Abadauan nec. Cuëte cuidibimboecquido Nuquin Papan con matses caidobidi Abadauanën tsyuecquido isadaidbo nec.

¹⁷Aden ambi con matses caidombi ambi chomiaid chieshënsho cuëte cuidi utsi pobinun pateshuniacimboen Nuquin Papan isadaidbo dadpen bédamboen istiapimbo iquec. Matses utsibo Esus tantiamequin cuëte dada utsi pobiacimboen aton matses icmequin ëbipadquid isadaidbo ambia

Esus tantiaquidobëdta Nuquin Papan mibi bédamboen isec. ¹⁸Adoac icsamboec onquenda. —Isadaidbo dadpen bédamboen isenquío icquin Nuquin Papan ëbien bédamboen isec. Isadaidbo icsambo iquec. Èbien bédambo iquec —quequin icsamboen chienda. Aden icsamboen chuitiadquío icquimbi nëid chiaidtsen tantiata. Cuëte tapunabi icnuc dada yec podo yec quec cuëte ictiapimbo ictsiandac. Adecbidi isadaidbo tsusedpa Abadauan abia tishabi icnuc aton tsyuecquido isadaidbo nibëdtsempampic. Isadaidbo nibëdnuc isadaidbon chidon Esus tishenquío ictsempañédash. Èmbi aden chiac isadaidbo chiec icsamboec onquenda.

¹⁹¿Èbi adsho tantiashta mibi nadpe? —Ambi con matses caido chieshëmënsho isun cuëte cuidi pateshuniacimboen nëbi isadaidbo dadpen Nuquin Papan bédamboen isenquío iquec. Èbipadquid matses utsiboen bédamboen isbenac —¿queccta ique? ²⁰Abimbo mimbi caic. ¿Atotsieshun Nuquin Papan isadaidbo bédamboen istiapimbo icpec? Ambi chomiaid Esus tantienquío icsho Nuquin Papan aido bédamboen istiapimbo iquec. Padnuen Esus tantiasho mibi bédamboen isec. Adoac: —Èbi bédambo icnubi isadaidbo icsambo iquec —quenda. —Esus tantienquío icsho isadaidbo cuidacpadomboen ëbitsen Nuquin Papan cuidpanundac —quequin Nuquin Papa Esusbëdta tantiaquiota. ²¹Ambi con matses caidon Esus tantienquío icsho Nuquin Papan bédamboen istiapimbo iqueque. Adembidi matses utsibon Esus tantienquío icsho Nuquin Papan mibi bédamboen istiapimbo iqueque. Esus tantiaquiota.

²²Aden Esus tantiash nadec onqueta. —Esus tantiasho bédamboen isquid yec Esus tantienquío icsho isun cuidquid

Nuquin Papa nec —cata. Esus tantienquo icsho cuète cuidi pateshuniacimboen cuidquin isadaidbo bédamboen isenquo iqueque. —Esus tantienquo yansho adembidi èbitsen cuidpanundac —qeshun chieshtoenuo icquin Esus tantianuna. ²³—Padi, aid tantiatiapimbo iquebi —queboedombi isadaidbon Esus tantiabensho abèdi tabadmenuen Nuquin Papan bédamboen isendac. Ambi cuète cuidi pateshuneboedi abibidi pobioacimboen padpiden bédamboen isendac. ²⁴Min matses abitedi Nuquin Papa tantiesabo icnédash. Nèbien cuète icsan cuidi pateshuniaid pobiacimboen Esus tantiamequin Nuquin Papan mibi bédamboen isec. Adoac Esusbèdta Nuquin Papa mimbi bèdiactsec tantiatsec. Con matses isadaidbo tsusedpabo Nuquin Papa tantiaquido dadpenquo icpampic. Nuquin Papan tantiamiac Esus chote chuiquin ènden dada uapampic. Ambi tantiacpadèn ambi cuète bèda cuidi peteshuniaid abibidi pobioacimboembi Esus tantiamequin Nuquin Papan con matses isadaidbo bédamboen isendac. Adoac cuèshèd-uidboedombi Nuquin Papabèdta Esus bédamboen tantiaquiendac.

Ambi chiacpadèn Nuquin Papan isadaidbotsen bédamboen isoaid

²⁵Tantia. —“Isadaidbo icsambo iquec,” quequin chuinushe —qeshun mimbi tantiacmaid Nuquin Papan chiaid mibi chuinu. Nuquin Papan pacuènèdacobimboecnuc icmiac con matses dadpen Esus tantiate bunenquo iquec. Daèdpactsècshun Esus tantiec. Nuquin Papan tantiactedishun matses utsibo dadpenshumba Esus tantiambic ²⁶paposhquiacimboen con matses

isadaidbo dadpenshun Esus tantiendac. Aden tantiasho Nuquin Papan con matses bédamboen isendac. Aden ambi isadaidbo bédamboen iste chuiquin Nuquin Papan naden dada uamepampic.

“Icsambo icquidobi cuidmenquo icnuc Nuquin Papa yacnuèsh choquid isadaidbon chidon tishaid iquendac.

Aidèmbi isadaidbo Nuquin Papa tantiaquid padpiden icmendac.

²⁷‘Aden èmbi chiacpadomboen èmbi chomiaid tantiasho abi icsaid bèpiscudquin isadaidbo bédamboen isendambi,’ quependac Nuquin Papa,”

quequin ambi chiaid Nuquin Papan dada uamepampic.

²⁸Nèbi Esus chieshènsho isadaidbo bédamboen istiapimbo icquin Nuquin Papan matses utsibo mibi Esus tantiamiac. Ambi nèbi bédamboen istiapimbo yaido isadaidbo unèsquo icnuc Nuquin Papan tantiaquiec. —Èmbi aton tsusedpabo chiampicpadèn aido con matses caimbi —qeshun adoec. ²⁹Aden ambibi chiampid niactiapimbo icquin con matses isadaidbotedi tantiaquin Nuquin Papan con matses caic. ³⁰Min matsesèn isadaidpembon Nuquin Papa tantienquo yacimboen nèbi isadaidbon Nuquin Papa tantiamequid Esus tantienquo iquec. Aden Esus tantiatiapimbo icsho isun Nuquin Papan Esus tantiamequin matses utsibo bédamboen isbenac. ³¹Con matsesèmbien abided cuidadaid Esus chieshènquin Nuquin Papan chiaid niac-niacpec. Adoboedombi: —Abided cuidadaid Esus matses utsibon tantiacpadomboen tantianu —quequin Esus tantiabensho Nuquin Papan aidotsen bédamboen isendac. ³²Aden matses abitedishun ambi chiaid

niac-niacsho isun: —Abitedimbo icsaquiec —quequin matses bédamboen istiapimbo icboedëmbi nëbi Esus tantiasho Nuquin Papan bédamboen isendac isadaidbo yec matses utsibo abitedi yec quenuc.

³³Aden Nuquin Papan bédamboen iste chuisho tantiash nadnuna. Nuquin Papa bédamboshë iquec. Abipadquid utsi nibëdec. Matsesën naidtedi tantiaquidquo nec. Abitedimbo tantiaquid icquin ambi natiapimbo ictequid nibëdnuc bédamboen naquidquo nec. ¿Ada adquid icsho Nuquin Papan naidtedi matsesën tantiapadic? Padenquio. Ambi naidtedi matsesën tantienquio iquec. ³⁴“¿Nuquin Papan otacquio tantiaidtedida matsesën tantiapadic? Padenquio. ‘¿Mimbi tantienquio iquec. Èmbi chiacpadomboen nata,’ quequinda matsesën Nuquin Papa chuipadic? Padenquio. Ambi tantiacpadomboembien Nuquin Papan naindac.” ³⁵“¿Ada matsesën Nuquin Papa menepadic? Padenquio. ‘Në. Con na bedquin mitsana ëbi cuidquin mene, Papa’ ¿quequinda Nuquin Papa chuipadic? Padenquio. Matsesën: ‘Con na nec,’ caidtedi Nuquin Papan na nendac.” ³⁶Abitedimbo uaquidquo yec abitedishun Icbombo Nuquin Papa nec. —Uesadec nibëdanushe —quequin abitedimbo isquidquo nec. Aton na abitedi nec. Adec abitedishun Icbombo icsho: —Nuquin Papa bédamboshë iquec —canuna ënenquio icquin.

**Esus con Icbo cain ambi
chiacpadomboen naid**

12 ¹Con utsibobimboecquido mibi neque. Tantia. Mibi chuinu. Nuqui cuidmenquio icnuec abided cuidadaid Esus tantiasho Nuquin Papan nuqui bédamboen isequc. Nuquin Papa

bédamboen tantiatiaquidquo icquin nadonona. —Èbi bunaid nainquio yec mibi bédambo icmenuec mimbi chiacpadec bédamboec tabadtiadquio iquebique. Min yuambo ëbi icme, Papa —quequin Nuquin Papa chuinuna.

²Esus tantiesabon nacpadomboen nainquio icquin Nuquin Papan Mayanën pausunacpadomboen Esus tantiaquid nuqui icsate bunaid ënuna. Aden nuqui icsate bunaid ënquin Nuquin Papa bunacpadec bédamboec tabadquin nuqui tantiendac. Aden naic nuqui bédambo iquendac.

³Tantia. Nuquin Papan tantiamiacpadomboen mibi chuinu. Nadenda. —Èbiuidtsëqui bédambo iquebi. Utsibo abitedi icsambo iquec —quenda. Nuquin Papan Mayanën tantiamiacpadec mibibi datantiadec: —Adquid nebi —quequin abimbo chuita. ⁴Nuquin Papan Mayanën tantiamiacpadomboen naquid Esus tantiaquidën. Adquid yec ¿ada Esus tantiaquido abitedi chuiquid dapa yampatsiash? Padenquio. ¿Mitsipadquid min dada icpec? ¿Abichobida bedantequid icpec? Padenquio. Mëdanteuidtsëquien bedantequid iquec. ¿Abichobida istequid icpec? Padenquio. Èshëuidtsëquien istequid iquec. ¿Abichobida shëdtequid icpec? Padenquio. Dëbiateuidtsëquien shëdtequid iquec. ⁵Min dada yacimboec Esus tantiaquido iquec. Abentse-abentsec chuiquid dapa yanubi abentse-abentsec utsibo nashumbanequid yanec. Esus tantiaquidotedi yec bédamboec tantiananquin nashunanquido yanec. ⁶—Ma utsibo nashunu —queshun Nuquin Papan Mayanën namiaid nec Esus tantiaquido. ¿Atotsi naquid Nuquin Papan Mayanën mibi icmiac? Nuquin Papan ambi tantiaidquidquo oncamiad

iquendac. Adquid icquin Nuquin Papan Mayanën tantiamiaiduidi chuibanta. ⁷Utsibic: —Utsibo nashunquid icta —caid iquendac. Adquid icquin bédamboen nashumbanta. Utsibic Nuquin Papan: —Ëmbi chiaid bédamboen tantiasun chuibanta —caid iquendac. Adquid icquin Nuquin Papan chiaid tantiatsëcquido bédamboen tantiameta. ⁸Utsibic: —Chieshtoenquio icquin Esus tantiec bédamboec tabadnuna —quequin bédamboec tabadquin ismequid iquendac. Adquid Nuquin Papan icmiaid icquin Esus tantiaquido bédamboec tabadte tantiameta. Utsibic aton na nibédquido aton na menequid Nuquin Papan icmiaid iquendac. Adquid icquin cudasenquio icquin menianeta. Utsibic: —Esus tantiaquido chuiquid dapa icta —caid iquendac. Adquid icquin Esusën namiacpadomboen Esus tantiaquido bédamboen nameta chieshenquio icquin. Utsibic dada icsaido yec isedanquido yec aton shubu nibédquido yec aton pete nibédquido yec macho yec tsusioctšëc yec qesho bédamboen nashunquid iquendac. Adquid icquin Esusën chiacpadomboen chieshtoenquio icquin nashumbanta.

Esus tantiaquidon nadoquid, quiaid

⁹—Mibi tantiac unësquio iquec —quequin utsibo chuiquin abimbo chuinuna. Muainquio icquin utsibo tantiaquionona. Chieshëmënenquio yec bédamboec tabadnuna. Utsibon: —Icsanuna —caqui: —Padi —quiash icsainquio yec bédamboec tabadnuna. ¹⁰—Ëbédtan Esus tantiaquido con utsibobimboecquido nec —quiash bédamboec tantiananuna. —Nëid con buchibimboecquid bédambo iquec. Aidën chuisho bédamboen tantianuna —canuna nuquibédtan Esus tantiaquido

chuiquin. ¹¹Nuquin Papan chiacpadomboen naic chieshtoenda. Nuquin Papan Mayanën tantiamiacpadec Esus tantiec chieshtoenquio yec bédamboec tabadnuna. ¹²—Unësacsho abi yacno Nuquin Papan ëbi tabadmendac —quec cuishonquenuna. Esus tantiaquido icsho utsibon chieshënaqui chieshtoenquio icquin Esus tantianuna. ¿Atotsi natiamante utsi icpec? Adquid tantiec shubiquimbi chieshtoenquio icquin Esus tantianuna. Baded-badedquien Nuquin Papa chian-chianuna. ¹³Nuquibédtan Esus tantiaquido aton na nibédsho isun nuquin nabi menenuna. Isedanquido bédamboen isnuna. Pemequinc nuquin shubun ushmequinc canuna. ¹⁴Esus tantiaquido yec nuqui chieshënkuidobëdi chieshënanenquio icnuna. Chieshënanenquio icquin Nuquin Papa naden chuinuna. —Ëbi chieshënkuido bédamboen tantiameta. Chiesh bédameta, Papa —quequin Nuquin Papa chuinuna. ¹⁵Utsi bédambo yec cuishonqesho isash aidbëdi cuishonquenuna. Utsi unësquio icnuc shubisho isash aidbëdi shubinuna. ¹⁶Cuesnanenquio yec chieshëmënenquio yec bédamboec tabadnuna. —Con nauidtsëqui naimbi —quenquio icquin utsibobédtan bédamboen nanuna. —Ëbiuidtsëqui bédambo iquebi. Ëmbi tantiacpadomboenuidi naimbi. Utsibon chiaid natiapimbo iquebi —quenquio yec bédamboec tabadnuna. —Chuiquid dapabëduidtsëqui onquequid nebi —quenquio yec matses abitedibéd onquec bédamboec tabadnuna.

¹⁷Chieshënaqui cuidnanenda. —Ma utsibo: “Bédamboec tabadquido nec,” quenu —quiash bédamboecuidi tabadnuna. ¹⁸Uimanëmënkuido icsasho isun aid chuiquin: —Bédamboequien tabadtiad —canuna. Adquidobëd

chieshënanenda. ¹⁹Ëmbi tantiaido mibi neque. Tantia. Chuinu. Nuqui chieshënuquidobëdi cuidnanenquio icnuna Nuquin Papan naden chiaid tantias. “Mates cuidnanac icsambo iquec. Ëbentsëcquiobini icsaido cuidquid nec,” quequin Nuquin Papan chiaid dada uapampic. ²⁰Nuqui chieshënuquidobëdi cuidnanenquio icquin bëdamboen isnuna. “Pete bunsho pemequinc acte bunsho acemequinc canuna. Nuqui chieshënuquido: ‘Bëdambo icquidi chieshëne icsachitobi,’ quiash ma nëish bëdanu,” quiash ²¹adec cuidnanenquio icquin nuqui chieshënuquido bëdamboen isnuna.

Chuiquid dapan chiacpadomboen Esus tantiaquidën naquid

13 ¹Aton mates chuiquid dapan chiacpadomboen Esus tantiaquidën naquid. Adembidi aton nidaid pais caidën tabadquidotedi chuiquid dapabon chiacpadomboen naquid. —Nuquin Papan adquid chuiquid dapa icmiabi yac nibëdtsias. Nuquin Papan chuiquid dapa icmiaidien aido nec —queshun aidon chiacpadomboen naquid Esus tantiaquidën. ²Nuquin Papan chuiquid dapa icmiaidën chiaid niacquid Nuquin Papan chiaidbidi niacquid nec. Aden ambi chiaid niacacsho chuiquidon cuidquid. ³Bëdamboec tabadquidon chuiquid dapan cuidte dacuëdëntiapimbo iquec. Adquido cuidenquio icquin ambi chiaid niacquid chuiquid dapan cuidquid. Chuiquid dapa cuidmetiapimbo yec bëdamboec tabadta. Adsho isun: —Mibi bëdamboec tabadec —catsias chuiquid dapabon. ⁴—Ma mates bëdamboec tabadnu —quequin Nuquin Papan chuiquid dapa icmiaidën mibi bëdamboen

tabadmetiadquio iquec. Nuquin Papan icmiac icsambo icquido cuidquid nec. Adquid icnuc: —Icsasho chuiquid dapan ëbi cuidpanundac —quiash icsaquid dacuëdendac. ⁵Ëbi adsho tantias. Nuquin chuiquid dapabon chiacpadomboen nanuna. —Cuidnushe —queshun adonona. —Pabiate cuembo icquin Nuquin Papan chiacpadomboen natiadquio iquebi —queshun adonona.

⁶Bëdamboen tabadmenuen Nuquin Papan chuiquid dapa icmiaidon: —Ëmbi chiacpadomboen nata —cac naquid Esus tantiaquidën. ⁷Aden chuiquid dapan chiacpadomboen nanuna. Aid bëdamboen isnuna. Aidën: —Nata —cac nanuna chieshenquio icquin.

Utsibo tantiaquionona, quiaid

⁸—Ëmbi nashumbocpadomboen ëbi cuidquin nashunenquio iquec —camenda. Abi nashunquidobëd cuidnanquid Esus tantiaquid. Esus tantiaquidbidi bëdamboec tantiananquid. Adec bëdamboec tantiananquid Nuquin Papan Moises chiampicpadomboen nuqui bëdamboen natsiac. ⁹“Ambi naiduidtsëqui nainquio yec abibi datantiadacimboec ma mates bëdamboec isnanu,” quequin Nuquin Papan Moises naden dada uamepampic. “Min chidopenquio chudenda. Adembidi min bënëpenquio chudmenda chidon. Cuesunenda. Ampenda. Utsin na isash: ‘Adquid con na nibëdosh,’ quec chieshëmëne tabadenda,” quequin Nuquin Papan con tsusedpa Moises dada uamepampic. Aidën chiacpadomboen natiadquio icquin nuquibi datantiadacimboen utsibotsen tantiaquionona. ¹⁰Utsibo bëdamboen isquin aido icsa uatiapimbo nuqui ictsiac. Aden utsibo bëdamboen tantias. Nuquin Papan: —Aden naic ëmbi Moises chiacpadec bëdamboec tabadec —caindac.

¹¹—Nëbien abi tantiaquido abi yacno buanuec Esus chochitec —quequin Nuquin Papan chiacpadomboen nanuna. Ushacbimboen nainquio icboedi nëbi ushash isucunacbimboec dayacquo yec chieshtoenuio icquin Nuquin Papan chiacpadomboen nanuna. Esus tantiabenash: —Yuecashien Esus choec —quiondaidi: ¹²—Nëbien Esus chochitec —quedonetsëcquiec bédamboec tabadnuna. —Satanasën yuanushe —qeshun Esus tantiaquin nuqui icsaid ënshun bédamboen nanuna. ¹³Icsainquio yec: —Bédambo iquebique. Ma isnu —quiash bédamboec tabadnuna. Tantiadenuen actequad paëmbo icquid aquenquio icquinc utsin chido chudenquio icquinc utsin bënë chudmenquio icquinc chido utsi mëismenquio icquinc canuna. Adecbidi utsin na isash: —Con na adquid nibëdec —quiash chieshëmënc tabadenquio icnuna. Adembidi utsin mibi bunaid nasho isash: —Aden ëbi namenquio icpec —quec chieshëmënenquio icnuna. Icsainquio yec bédamboec tabadnuna. ¹⁴—Icsate bunchitebi. ¿Mitsipaden naiquini icsape? —quenquio yec Esus tantiaquiec abi tabadacpadquiec bédamboec tabadnuna. Nuqui icsate bunaid ënquionona.

Esus tantiaquido utsibo bédamboen isaid

14 ¹Nuquibëdtan Esus tantiatsëcquidon nuqui nacpadomboen nainquio icsho bédamboen isnuna. Ambi chiaidquio chuiquin Esus tantiaquidon natetedi Nuquin Papan uesquin chiabi iquec. —Naden nac bédambo iquec. Naden nac icsambo iquec —quequin uesquin chiabi iquec. Aden Nuquin Papan chiacmaid chiec nuquibëdtan Esus tantiatsëcquido: —Ëmbi natemaid nec —qeshobi: —Icsamboen chiec

—cainquio icnuna. ²Esus tantiaquidquio: —Pete abitedi pambidbëdta pesho Nuquin Papan nëishënenquio iquec —quenubien Esus tantiatsëcquid: —Padi. Pambid pesho isun Nuquin Papan nëishënushe. Esus tantiaquidën nitsinaid pequid. Pambid isuidquid —quepec. ³Pambid pequidobëdtan pambid isuidquidombi Esus tantiasho Nuquin Papan aid daëdi bédamboen isec. Padnuen pambidbëdta pete utsi abitedi pequidën pambid isuidquid mamënsnunac icsambo ictsias. Adembidi pambid isuidquidën: —Pambid pequid icsambo iquec —cac icsambo ictsias. ⁴¿Icbonpenquioda: —Yua icsambo iquec —capadic? Icbombien adoquid. Adembidi: —Mibi bédambo iquec —caquid icbon. Nuquibëdtan Esus tantiaquid Nuquin Icbon yua icsho: —Ëmbi nacpadomboen nainquio yec mibi icsambo iquec —cainquio icnuna. —Nëid icsambo iquec. Nëid bédambo iquec —quequin Nuquin Icho Esusën ambentsëqui abi tantiaquido chiendac. Aidën namiacpadomboen abi tantiaquidon bédamboen naindac.

⁵Esus tantiaquido utsi-utsiec: —Aid badiadquidënuidtsëqui Esus tantiec cuëdënac bédambo ictsias —quenubien utsibo: —Badiadquidën badiadquidënquiec Nuquin Papa Esusbëdta tantiec cuëdënebi —quecuededpec. Adquid daëd icsho Nuquin Papan nëishënenquio iquec. Esus tantiaquid ambi tantiacpadënquioibi cuëdënac bédambo ictsias. ⁶Aden Esus tantiaquin nac bédambo ictsias. Adembidi Esus tantiaquin: —Mimbi pete uaid bédambo iqueque. Aid penu, Papa —quequin pambid pequido iquendac. Utsibombic adembidi Nuquin Icho tantiaquin: —Mimbi pete uaid bédambo iqueque.

Aid penu —qeshun utsi pequimbi pambid isuidquid iquendac.

⁷¿Esus tantiaquid ambi naid-uidi naquidta nedic? Padenquio. ¿Ambi tantiacpadën unësquidta nedic? Padenquio. ⁸Nuquin Icbo Esusën chiacpadomboen natiadquio yec nuqui tabadec. Ambi tantiacpadën nuqui unësendac. Unësabi yec tabadec Esusën yuambo icboedi unësash adecbidi aton yuambo nuqui iquendac. ⁹Adec Nuquin Icbo icnuec abided cuidadec unësash Esus uincuempanëdash. Unësabi yec nuqui tabadnuc Nuquin Icbombo icboedi nuqui unësan adecbidi Nuquin Icbombo iquendac.

¹⁰—Adquid Nuquin Icbo iquec —qesho ¿tantiashunda nuquibëdtan Esus tantiaquid mamëshuntiad? Padenquio. ¿Nuquin Papan chiacmaid chiec: —Ëmbi nacpadomboenuidi nainquio yec icsambo iquec —quequinda chushcatiad? Padenquio. Nuquin Icbo Esusbëdtan Nuquin Papanuidtsëqui matsesën naidtedi chiendac. —Nëid bëdambo iquec. Utsi icsambo iquec —quequin chiendac matses abitedishun tantianubi. ¹¹Adote chuiquin Nuquin Papan ambi chiaid naden dada uamepampic.

“Tantia. Abimbo caimbique.

Naden matses abitedishun ëbi chiendac.

‘Abitedishun Icbombo mibi nec. Bëdamboshë icquidquio mibi nec.

Abitedishun naid tantiaquid icquin mimbiuidtsëqui: Nëid icsambo iquec. Nëidien bëdambo iquec, quequin abimbo chiendac,’ quequin matses abitedishun ëbi chiendac,”

quequin Nuquin Papan dada uamepampic. ¹²Aden ambi cuidte ushën Nuquin Papan: —¿Enda? ¿Mitsipadec tabado? —cabanac nuquitedishun nuqui naidtedi chuibanendac.

Utsibo icsamenquio icnuna, quiaid

¹³Ëbi adsho tantiashun Nuquin Papan: —Adoenda —quequin chiacmaid nuqui tantiaid chienquio icnuna. —Ëmbimbo natemaid naic aido icsambo iquec —nuquibëdtan Esus tantiaquido cainquio icnuna. Adenquio icquin nadonona. —Ëmbi ambi natemaid nasho isash chieshtoshon Esus tantienquio yanushe. Ambi natemaid naquin ismenquio iquembi —qeshun Esus tantiaquidtedi bëdamboen isnuna. ¹⁴Nuquin Icbo Esuquidistu tantiaquidquio icquin ëmbien naden tantiec. —Nëbi Nuquin Papan: “Petemaid nec,” caid nibëdec —quequin tantiembi. Ëbi adnubi utsibo: —Petemaidquio nec. Aid pec icsamane. Aid petiapimbo iquebi —qeshumbi adquid pec: —Icsachitobi —quetsiash. ¹⁵Adsho tantiashun aido bëdamboen tantiaquin ambi petemaid nuqui pemenuico ictsias. Ambi petemaid pemequin mimbi aido tantienquio iquec. —Ëmbi petemaid piash icsachitobi —quequin Esus tantienquio yanushe. Ambi petemaid pemenda. —Nëid petemaid nec —quequido aidotsen tantiaquin cuidmenquio icnuec abided cuidadec Esus unësaque. Aido tantiaata. ¹⁶—Nuquin Papan chiaid niaquenquio icquin Esus tantiaquido utsibon: “Aden naic icsatsiash,” caid naimbi. Ëmbi tantiacpadomboen naimbi —qeshun mimbi tantiacpadomboen naquin utsibo icsamboen chuimenda. —Is. Esus tantiaquid icsambo iqueque. Ëmbi natemaid naique —camenda. ¹⁷¿—Nadquid petemaid nec. Nadquid actemaid nec —quequin petebëdta acteuidi tantiecta Nuquin Papan chiacpadec Esus tantiaquido bëdamboec tabadpatsiash? Padenquio. Aton Mayan nuquibëdi tabadmiac chieshëmënenquio yec cuishonquec Esus tantiaquido

bëdamboec tabadendac. ¹⁸Adec
 Esuquidistun chiacpadec tabadsho isun
 Nuquin Papan: —Bëdambo iquec
 —caindac. Matsesëntsen: —Aido
 bëdambo iquec —caindac.

¹⁹Ëmbi chiacpadec chieshëmënenquio
 yec bëdamboec isananuna. —Esus tantiec
 chieshtoenquio yec bëdamboec
 tabadnuna —quec chuinanuna.
²⁰—Nuquin Papan bëdamboen isaidon
 Nuquin Papa Esusbëdta tantienquio
 yanushe —qeshun utsibon petemaid
 pequin aido chieshtomenda. Nuquin
 Papan: —Matsesën petemaid nec —caid
 nëbi nibëdnubi Esus tantiatsëcquidën
 petemaid pequin aid chieshtomec mibi
 icsatsiac. ²¹—Ëbëdta Esus tantiaquido
 icsamemane —qeshun ambi petemaid
 pambid penquio icquinc ambi actemaid
 acte paëmbo icquid aquenquio icquinc
 ambi natemaid utsi nainquio icquinc cac
 bëdambo ictsias. ²²Nuquin Papan:
 —Matsesën natemaid nec —cacmaid
 tantiaquin: —Ëmbimbo petequid nec.
 Ëmbimbo actequid nec. Ëmbimbo
 natequid nec. Aden nasho Nuquin Papan
 ëbi cuidenquio iquec —quequin mimbi
 tantiaid caic: —Natemaid nec —quequido
 naden chienda. —Ëmbi nacpadomboen
 nainquio yec mibi icsambo iquec
 —cainda. Adembidi aidon: —Ëmbi
 natemaid nec —caboed naquin ismenda.
 Chieshtonoshe. ²³Adquid ambi: —Aid
 pesho Nuquin Papan nëishënychitembini
 ictsias —caboed piash —Icsachitobi
 —quetsias. Adsho Nuquin Papantsen:
 —Ai, adec icsaic —catsias. —Aden naic
 icsachitequini ictsai —nuqui caidtedi
 naic nuqui icsatsiac.

**Nuqui bunaiduidi nainquio
 icnuna, quiaid**

15 ¹Esus tantiaquidënquio Esus
 tantiatsëcquid chieshënenquio
 icquid. —Natemaid nec —quequin

Nuquin Papan chiabi icnubi Esus
 tantiatsëcquid: —Esus tantiaquin
 ëmbimbo natemaid nec —qesho
 tantiashun ambi natemaid naquin
 ismequin chieshtomenda. Aid tantiaquin
 ambi natemaid nainquio icquin nuqui
 bunaiduidi nainquio icnuna. ²—Esus
 tantiatsëcboedëmbi ma Esus bëdamboen
 tantiabenquiono —quequin
 nuquibëdta Esus tantiatsëcquidën
 natemaid nainquio icnuna. —Aden naic
 mibi bëdambo iquec —camenuen ambi
 natemaid nainquio icnuna.
³Esuquidistun ambi naiduidi nainquio
 icquin Nuquin Papan
 chiacpadomboenuidi naic abi
 chieshënuquido yacnobi chopanëdash.
 Esus tishabi icnuc Esusën chuite
 chuiquin Nuquin Papan con tsusedpa
 naden dada uamepampic. “Mibi
 chieshënacpadomboen chieshënuquin ëbi
 icsamboen chuishunec, Papa,” quequin
 Esusën abi chuite Nuquin Papan dada
 uamepampic. ⁴Aden con matses
 isadaidbobëdta matses utsibo abitedi
 bëdamboen tantiamenuen Nuquin
 Papan ambi chiaid dada
 uamedenepampic. —Nëid
 isban-isbanquin ëbëdta Esus ënenquio
 icquin tantiec ma matses bëdamboec
 tabadnu. Adec bëdamboec tabadec:
 “Unësash Esusbëdi Nuquin Papa yacno
 tabadendabi,” ma matses quenu
 —qeshun ambi chiaid dada
 uamepampic. ⁵Aden matses
 chieshtoenquio icnuc bëdamboen
 tabadmequid Nuquin Papa mibi
 chianembi. —Chieshtoenquio icquin
 Esus tantiaquid icmequin dayacquio
 yacbimboecnuc matses bëdamboen
 tabadmequid mibi nec, Papa. Adquid
 icquin Doma yacnocquidon Esus
 tantiasho bëdamboec isnanquid icmeta,
 Papa. ⁶Mimbi adoac: “Nuquin Papa
 chuinanuna,” cac aidon abitedishun: “Ai,

adonona,” qeshun mibi naden chuitsiash, Papa. “Con Icho Esuquidistun Papa mibi nec. Mibi bédamboshê iquec,” quequin mibi chuitsiash, Papa —quequin Nuquin Papa mibi chianembi.

**Nuquin Papan matses utsibo
Esus tantiamiaid**

⁷Tantia. Padpiden mibi chuinu. —Nuquin Papa bédambo iquec —nuqui camenuen Esuquidistun nuqui bédamboen iseque. Bédamboec isnanuna. Isadaidbo yec isadaidpembo yec quec bédamboec isnanuna. ⁸Esuquidistu matses abitedi bédambo icmenuec matsesbéd tabadpanédash. Esus chote chuiquin Nuquin Papan dada uamepampicpadec isadaidbobèdi tabadquin Esusèn aido nashumpanédash. —Nuquin Papan abimbo chuipampic —quequin tantiamenuen adopanédash. ⁹—“Icsaboedombi Esus tantiaشو Nuquin Papan bédamboen isquin cuidenquo iquec. Nuquin Papa bédambo iquec,” ma isadaidpembo matses utsibo quenu —quecbidi Esus matsespanédash. Aidèn abi chuite chuiquin Nuquin Papan naden dada uamepampic.

“Isadaidpembo matses utsibobédtan mibi naden chiendambi.

‘Nuquin Papa bédambo iquec,’ caindambi mibi.

Adecbidi mibi bédamboen tantiec cuèdènenadabi,”

quequin Esusèn abi chuite Nuquin Papan dada uamepampic. ¹⁰Nadembidi isadaidpembon matses utsibon abi tantiabente chuiquin Nuquin Papan con tsusedpa dada uamepampic.

“Matses utsibo isadaidpembo mibi chuinu.

Nuquin Papan con matses caidobèdi cuishonqueta.

‘Nuquin Papa bédambo iquec,’ quec cuishonqueta,”

quequin Nuquin Papan chiaid dada uapampic. ¹¹Nuquin Papan chiaidbidi con tsusedpan padpiden naden dada uapampic.

“Isadaidpembo matses utsi abitedi mibi chuinu.

‘Nuquin Papa bédambo iquec,’ cata.

‘Nuquin Papa bédambo iquec,’ quec cuèdèncuededec tabadta,”

quequin dada uapampic. ¹²Adembidi isadaidpembon matses utsibon Nuquin Papabédta Esus tantiabente chuiquin Nuquin Papan con tsusedpa Isayas naden dada uamepampic.

“Dabidèn papa Isai caid ènden unèsampidèn tsyuecquid yuecash iquendac.

Nidaid utsi-utsiec yacno tabadquidotedi chuiquid dapa icquin bédamboen namendac.

Aid caic: ‘Nèidèn nuqui cuidmenquo iquendac,’

quependac isadaidpembo matses utsibo,”

quequin dada uapampic.

¹³Aden chiampid mibi nec. Nuquin Papa Esusbédta tantiaquido icsho mibi Nuquin Papa chianembi. —Mibèdi matses tabadmequidquo mibi neque. Mibi tantiamequin Doma yacnocquido cuishoncameta, Papa. Adembidi dacuèdenquo icnuc bédambo icmeta. Aden min Mayan aidobèdi tabadmequin: “Esus yacno Nuquin Papan nuqui tabadmendac,” cameta, Papa —quequin Nuquin Papa chianembi.

**Matses utsibo Esus chuibanquid
nebi, quiaid**

¹⁴Con utsibo mibi caimbique. Tantia. Mibi chuinu. —Nuquin Papan Mayanèn tantiamiacpadec bédamboec isanec bédamboec tabadtiadquo icquidien nec.

Aidën tantiamiacpadomboen Nuquin Papan chiaid bédamboen tantiec: “Nuquin Papan chiacpadec bédamboec tabadnuna,” quec chuinanquidien nec —quequin mibi tantiombi. ¹⁵Aden tantiash: —Nëishënushe —quenquio icquin: —Bédamboec tabadta —quequin chuiquin nëid dada uaimbi. Nuquin Papan: —Esus chuibeneta —caid icquin mimbi ënden tantiaidbidi Esusën naidquio bédamboen mibi tantiamenuen dada uaimbi. ¹⁶Nuquin Papan icmiacpadquid Esusën naid chuibenequidquio nebi. Adquid icquin isadaidpembo matses utsibo Esus tantiaquido Nuquin Papan bédamboen iste chuibeniombi. Adoac matses utsibon Esus tantiabensho isun aton Mayanën bédamboen tabadmesho: —Bédambo iquec —caindac Nuquin Papan.

¹⁷Aden: —Esuquidistu bédamboshë iquec —quequin matses utsibo dadpen Esusën naid chuibeniombi. ^{18,19}Esuquidistun ëbi namiaiduidtsëqui mibi chiec nendabi. Aidëmbi namiac matses utsibo Esusbëdtan Nuquin Papan naid chuibenequimbi Nuquin Papan Mayanën tantiamiacpadomboen comapenen tantiaquin nacnenquin ismebeniombi. Adosho isun Esus tantiabenshun dadpenshun Nuquin Papan chiacpadomboen natiadquido yanosh. Shubu dadpen icquid Edusaden yacnuësh ënapen nidash nidaid utsi Ididico caid yacno nidshun chuibeniombi. Ambo nidtanec choaobi Edusaden yacnobidi. ²⁰Esusën naid chiacmanouidquio Esusën naid chuibenetiadquido iquebi. Utsibon Esusën naid chuibanacno nidtiapimbo iquebi. Esusën naid chuisho tantiacmaido Esus chuite bunquiebi. ²¹Aden nate chuiquin Nuquin Papan con tsusedpa naden dada uamepampic.

“Nuquin Papan chomiaidën naid chuisho tantiacmaidon tantiabenendac.

Adshun paposhquiacbimboen bédamboen tantiendac,” quequin dada uamepampic. ²²—Aden Esusën naid chiambo yacnoba chuibeneta —quequin Nuquin Papan chiacpadec mibi yacno nidabi iccobi. —Doma yacnoquidon Esusën naid tantiash —quiash mibi yacno nidabi iccobi. Nëbi mibi yacno nidtiadquido iquebi.

Mibi yacno nidtiadquido iquebi, quiaid

²³—Nëbi Ididico yacno Esusën naid uesquin chuibenioc —quiash mibi yacnotsen nidtiadquido iquebi. Èndenquimbo taëec mibi yacno nidte bunondaiddi seta dadpen matamiashic adi nëbi mibi iste bunquiebi. ²⁴Nidaid utsi Espania caid yacno nidquimbi mibi isbidanendambi. Doma yacno nidash mibëdi cuishonquendabi. Ambo yuec-yuecpamboec tabadash: —Nidnu —qesho: —Ai, nidec nid. Mibi podqued ismequid mibëdi nidendac —ëbi caindac mimbi. Aden tantiec mibi yacno isbidantiadquido iquebi. ²⁵Nëbini Edusaden yacnoba nidendac. Anocquido Esus tantiaquido utsibon meniaid menenuc nidendabi. ²⁶—Edusaden yacnoquido Esus tantiaquido utsi-utsiec aton piucquid nibëdeque. Nuquin nabi ma buanshunu. Menenuna —qeshun Esus tantiaquido icquin Acaya yacnoquidobëdtambi Masedonia yacnoquidon: —Con na buanshun meneta —caposhi. ²⁷Aden ambi tantiacpaden nasho: —Bédambo iquec —caombi. Edusaden yacnoshon Esusën chiac isadaidbomba Esus tantiapanëdash. Adshumbic aidon chuibenioc matses utsibontsen Esus tantiapanëdash. Aden abi nashunquin

chuiquido Edusaden yacnocquido caic: —“Piucquid nibëdec,” quiac caoshe. Menenuna —quesho: —Bëdambo iquec —caombi. ²⁸Aden piucquid bedshun: —Edusaden yacno buanec nid. Anoshon meneta —quequin meniac aid buanec nidendabi. Buanshun Edusaden yacnoshon Esus tantiaquido aton na nibëdquido menebanash nidaid utsi Espania yacno nidquin mibi isbidanendambi. ²⁹Mibëdi tabadquin ëmbi Esus tantiamequin chuisho Esusën nuqui bëdambo icmendac.

³⁰Ëmbi tantiaidombo mibi neque. Tantia. Chuinu. Nuquin Icho Esuquidistun aton Mayambëdtan tantiamiacpadec nuqui bëdamboec tantiananec. Ëbi tantiaquin Nuquin Papa chianeta. —Ënenquio icquin Esus tantiamequin mimbi chiacpadomboen Pabado name, Papa. ³¹Udeya yacno nidsho Esus chieshënquidon Pabado cuesnusho. Bedmenda, Papa. Piucquid buanacsho Edusaden yacnocquido Esus tantiaquido bëdamboen bedmeta, Papa. “Matses utsibon isadaidpembon meniaid bedtemaid nec,” quequin bedenquio icnusho. Bëdamboen bedmeta, Papa —quequin Nuquin Papa chianeta.

³²Aden Nuquin Papan tantiamiacpadomboen naquin anoba istanec mibi yacnotsen nidendabi. Mibi istuidash cuishonquendabi. Nuqui bëdamboec tabadendac Esus tantiamenanec. ³³Aden mibi tantiaquin: —Nuqui dacuëdenquio icnuc bëdambo icmequid Nuquin Papa mibëd icpashun —caimbi.

Mibi unësquio iquec, quequin chiaid

16 ¹Nuquibëdtan Esus tantiaquid nuquin chuchubimboecquid Pebe caid neque. Mibi yacno mimbi isacmaid aid nidsho bëdamboen ista. Shubu dadpen icquid Senquedeya caid

yacnoshon utsibo bëdamboen nashunquidquio nioshe. ²Pebe bëdamboen ista. Utsibobëdta ëbitsen bëdamboen nashunoshe. —Nuquibëdtan Esus tantiaquid nec —queshun bëdamboen isquin aidën: —Ëbi nashunta —cacpadomboen aid nashunta.

³Aquida caidbëdta aton chido Pidisida caid chuiquin: —Mibi caic: “Unësquio iquec,” quiosh Pabado —cata. Aidon ëbëdtan Esusën naid chuibeniondash.

⁴Aden Esusën naid chuibenesho: —Cueschitomane. Aden chienda —Esus chieshënquidon caqui aidon adembidi ëbëdtan Esusën naid chuibeniondash. Adsho isun: —Mimbi bëdamboen naoc —caondambi. Adembidi aidon chiondaidon isadaidpembon chiondash.

⁵Aquidan shubuno Esus tantiec cuëdëdec cho-choquidotsen chuita. —Mibi caic: “Unësquio iquec,” quiosh Pabado —cata. Utsibic nidaid utsi Asia caid yacnoshon ambia Esus tantiabonndaïd ëmbi tantiaidquio Epeneto caidtsen adembidi chuita.

⁶Nëidtedi chuiquin: —“Mibi unësquio iquec,” quiosh Pabado —cabanta. Nëidic Madia caid mibi nashunquidquio.

⁷Nëidic con matses isadaidbo Andedonico caid. Nëidic con matses Unias caid. Aidon ëbëdtambi Esusën naid chuibenesho chieshëmënquidon bedshun quënën nauedondash. Aidombien ambia Esus tantiabempac caondash ëmbi padabi icnubi. Adsho aidoba Esusën: —Ëbi chuibeneta —cac chieshtoenquio icquin Esus chuibenequido nec.

⁸Nëidteditsen chuiquin: —“Mibi unësquio iquec,” quiosh —cata. Nëidic Esus tantiaquid utsi Ampidias caid ëmbi tantiaidquio. ⁹Nëidic Esusën naid chuiquid utsi Udbano caid. Nëidic ëmbi tantiaidquio utsi Estaquis caid. ¹⁰Nëidic

Apedes caidtsen. Utsibon chieshënaqui chieshtoenuio icquin Esus tantiaquidquio nec. Nëidic Adistobudo caidën shubun icquidotedi. Aidedi: —Mibi caic: “Unësquio iquec,” quiosh Pabado —cabanta. ¹¹Nëidotsen adembidi chuita. Nëidic con matses utsi Edodion caid. Nëidic Nadsiso caidën shubun icquido Esus tantiaquidtedi. ¹²Nëidic chido Tidipena chedo Tidiposa caidbëdi. Aido Esus tantiec dayacquio icquin ambi chiacpadomboen nabanquido nec. Nëidic chido utsi Pedsida caid con chu icbobimboecquidquio. Aidsen Esus tantiec dayacquio icquin ambi chiacpadomboen naquidquio nec. ¹³Nëidic Dupo caid Nuquin Papan Esus tantiamiaidquio. Nëidic aton tita con tabimboecquidquio. ¹⁴Nëidic Asinquidito caid. Nëidic Pedeconte caid. Nëidic Edmes caid. Nëidic Patëdobas caid. Nëidic Edmas caid. Nëidic abëd icquido Esus tantiaquido. ¹⁵Nëidic Pidodoco caid aton chido Udiabëdi. Nëidic Nedeyo caid aton chuchubëdi. Nëidic Odimpas caid. Nëidic abëd icquido Esus tantiaquido. Aidedi chuiquin: —Mibi caic: “Unësquio iquec,” quiosh Pabado —cabanta. ¹⁶Esus tantiaquido yec bëdamboec isnanta. —Mibi tantiambi —cananta. Nëmbo icquido Esus tantiaquidtedi mibi caic: —Unësquio iquec —quiosh. ¹⁷Ëmbi tantiaido mibi neque. Tantia. Mibi chuinu. ¿Ada mibëdtan Esus tantiaquido chieshëmequin cuëshëdmequido icpec? ¿Ada Nuquin Papan chiaid mimbi tantiaid chienquio yec mibi icsamenuec muaquido icpec? Adquidobëd onquec tabadenda. ¹⁸Nuquin Icbo Esuquidistun chiacpadomboen nainquio icquin ambi petequid-uidtsëqui aidon chieque. Aidon: —Mibi bëdambo iqueque. Ëmbi

chiaid tantiata —quequin ambi chiacpadomboen namequin Esus tantiatsëcquid icsamec. ¹⁹—Doma yacnocquido abi tantiec Esusën chiacpadec bëdamboec tabadosh —quequin mimbi naid chuibenesho dadpeshun tantiac caosh. Adsho tantiash bëdambo iquebi. Adecbidi Nuquin Papan chiaid tantiec bëdamboec ma mibi tabadpanuna. Utsin: —Icsaic cho —caqui: —Padi. Nuquin Papan chiaid niacmane —quiash aidbëdi icsainquio icta. ²⁰Nuqui bëdamboen tabadmequid Nuquin Papa nec. Aidëmbi matses icsamequidquio Satanas chedo comapenen cuidendac. Nëbi Satanasën mibi icsametiadquio icsho tantiashun: —Satanas yuamenquio icnuen Nuquin Icbo Esusën abibi tantiamequiopashun —mibi caimbi.

²¹Nëmbo icquidtedishun mibi tantiec. Mibi caic: —Unësquio iquec —quiosh Timoteyo ëbëdtan Esusën naid chuibenecquidquio. Adembidi con matsesën chiosh. Dusio caid yec Ason caid yec Sosipated caid yec quec adosh.

²²Pabadon —Naden na —cac nëid dada uaquidquio Tesio caid nebi. Esus tantiaquid icquin ëmbitsen mibi tantiambi. Padi. Aidedtsëqui ëmbimbo tantiaquin chuishun Pabadon chiaidbidi dada uaoaimbi.

²³Nëidteditsen mibi caic: —Unësquio iquec —quiosh. Nëidic Cayo caid. Aidën shubun ushobi. Adnuc Esus tantiaquido iccuedednuec aton shubun pudued-puduedosh. Nëidic Edasto caid. Aid nëmboquidon bedtequid bedbeneshun dayun uaquid nec. Nëidic nuquin utsibimboecquid Cuadto caid. Aidedishun mibi aden tantiosh. ²⁴Doma yacnocquido mibi tantiaquin: —Nuquin Icbo Esuquidistun bëdamboen isquin mibi bëdamboen tabadmepashun —caimbi.

²⁵—Nuquin Papa bēdambo iquec
 —canuna. Esuquidistu chuibanquin
 ěmbi: —Aid tantiasho Nuquin Papan
 mibi bēdambo icmendac —quequin
 chiacpadomboen Esus tantiamequin
 Nuquin Papan mibi bēdamboen
 tabadmetiadquio iquec.
 Ĕndenquimboshĕ Esus tishabi icnuc
 matsesĕn Esus chote bēdamboen
 tantiambo icpampic. ²⁶Adnubien
 Nuquin Papan unĕsesambo icquin con
 tsusedpabo utsi-utsien Esus chote
 chuiquin dada uamepampic. Nĕbi:
 —Esusĕn naid chuisho tantiaquin ma

nidaid utsi-utsiec yacno tabadquidon
 Esusĕn chiacpadomboen nanu
 —qeshun Nuquin Papan Esusĕn naid
 chuibenequido icmiac. ²⁷Aden namec
 Nuquin Papa bēdambo iquec.
 Abipadquid utsi nibĕdec. Ambi
 natiapimbo ictequid nibĕdec.
 Abitedimbo tantiaquid nec. Nuqui
 cuidmenquio icnuec abided cuidadaid
 Esuquidistu tantiasho Nuquin Papan
 nuqui bēdamboen isequē. —Nuquin
 Papa bēdambo iquec —canuna
 ĕnenquio icquin. Padi. Aidedi chuiquin
 dada uaombi.

CODINTO YACNOCQUIDON ISTE I

Pabadon Codinto yacnocquidon iste dada uaid

1 ¹Pabado nebi. Nuquin Papa bunacpadomboen Esuquidistun ëbi chuibenequid icta cac nebi.

Esuquidistu tantiaquidbidi, Sostenes, nuqui con utsi caid ëbëd iquec. ²Aidbëd icquimbi Esuquidistu tantiec iccuededquido mibitedi chuiquin dada uaimbi. Matses icsaquid icsho cuidnushe quiash abided cuidadec Esuquidistu unëspanëdash quequin abimbo tantiaquid yec Nuquin Papan cuëmbanaido mibitedi nec quequin mibitedi chuiquin dada uaimbi. Nuquin Papan bëdambo icmenu caido mibitedi nec quequin dada uaimbi. Abi tantiaquid utsibobëd abi tantiaquid nuquitedi nec.

³Matses icsaquid icsho cuidnushe quiash abided cuidadec Esuquidistu unëspanëdash, quequin abimbo tantiasho isun Nuquin Papan bëdamboen isaidquio nuqui nec. Adquido yec utsibobëd bëdamboec ma tabadpanuna.

Mibi tantiaquin Nuquin Papa chuided-chuidaid

⁴Mibi tantiaquin Nuquin Papa naden chuided-chuidedembi. Matses icsaquid icsho cuidnushe quiash abided cuidadec Esuquidistu unësaid chuibanac abi tantiaquido Codinto yacnocquido

yanacsho bëdambocquidbimboecnuc mimbi isec, quec bëdambo iquebi, Papa, quequin chuided-chuidedembi. ⁵Aden Nuquin Papan bëdamboen isaido icquin ambi bëdamboen tantiamiaidobidi mibitedi nec. Matses icsaquid icsho cuidnushe quiash abided cuidadec Esuquidistu unësaid mibi Nuquin Papan tantiamiac nëbi mibitedi bëdamboec tabadquin Esuquidistu chuibanac.

⁶Esuquidistu tantiesabo iccondaidi ëmbi Esuquidistun naid chuibanac tantiaquid mibitedi yanondac. Adquido yanash bëdamboec tabadquin ismequido mibitedi nec. ⁷Adquido yec Esuquidistu choate caimbudec Nuquin Papan abi bëdamboec tabadaid tantiamiaibi iccoshi quetiapimbo mibitedi iquec. ⁸Aden abi bëdamboec tabadaid tantiamequin Nuquin Papan mibitedi chieshenquo icmec ma Esuquidistupadquid icnu quequin mimbi caimbudacpadquio icpanuna aid padpidec choanuc.

⁹Adquid mibitedi icmequin ambi Esuquidistubëd icquido icta caido ambi cuëmbanaido Nuquin Papan mibitedi icmiac. Adoshon mibi badedquio Esuquidistupadquid yanenquiocsho isun chieshebi, qesa Nuquin Papa icquin abi mibitedi bëdambocquid icmebanec.

Esuquidistu tantiaquid cuëshëdacbimboec chushcananquido

¹⁰Adembidi chuinu. Tantiata. Esuquidistu tantiaquid nebi quec

Nuquin Papan bédambo icmiaid
 ènacbimboec tabadenda. Adec tabadec
 Esuquidistu tantiaquid utsitedi
 tantiananec ma cuèshèdabimboec
 chushcananesa yampanuna.

¹¹Esuquidistu tantiaquido Codinto
 yacnocquido chushcananec quec. Chido,
 Quèdoen shubunoèsh choquido nèmbo
 èbi isec choshon aden chiec. ¹²Mibi
 onquiaid chuinu. Tantia. Pabadon
 tantiamiaid nebi, quec
 chushquiabimboec utsi-utsiec
 tabadnubien; Apodosèn tantiamiaid
 nebi, quec chushquiabimboec
 utsi-utsiec tabadnubien; Petedon
 tantiamiaid nebi, quec
 chushquiabimboec utsi-utsiec
 tabadnubien; Esuquidistun tantiamiaid
 nebi, quec chushquiabimboec
 utsi-utsiec tabadec.

¹³¿Esuquidistu tantiaquido
 cuèshèdmenuenda èbipadquidon
 chuibandiondash? Padenquio. Naden
 chuinu. Tantia. ¿Matses icsaquid icsho
 cuidnushe quiash èbida cuidadec
 unèspanèda? Padenquio. Adembidi
 ¿Esuquidistu tantiaquid nebi quequin
 èbi mimbi chuishodambi mibitedi acten
 mentobandionda? Padenquio.

¹⁴Esuquidistu tantiaquid icsho
 Quidispobèdta Cayo aid daèdtsèqui
 naondambi quec tantiec tsadebi. ¹⁵Utsi
 padenquio iccondambi ma Pabadon èbi
 acten mentondacsho aid tantiaquid
 nebi, quetiapimbo ma mibitedi
 icpanuna. ¹⁶Ai, Estepanasèn shubun
 icquidobidi acten mentondambi.
 ¿Utsidambi acten mentoponda?
 Padenquio iccondambi. ¹⁷Èbi
 tantiaquido acten mentoban,
 Esuquidistun cainquio yaqui Matses
 icsaid bedshunec abided cuidadec
 Esuquidistu cuستن dectanac
 unèspanèdash quequin chuibeneta,
 Nuquin Papan cac aden chuibenec nebi.

Èmbibi tantiaid chienquiocquin ma
 matses icsaquid icsho cuidnushe quiash
 abided cuidadec Esuquidistu cuستن
 dectanac unèspanèdash quequin ma
 utsibontsen tantiapanu qeshun
 chuibenec nebi.

**Esuquidistu abitedi tantiaquidquio
 nadatiambocquin nabanquidquibidi**

¹⁸Nuquin Papabèd icquido icmenuec
 matses icsaquid icsho cuidnushe quiash
 abided cuidadec Esuquidistu
 unèspanèdash quequin chiac, ¿Adpecta
 iquec? quequin tantiesa yec Nuquin
 Papa yacno puduedtiapimbo iquec.
 Adec adquido onquenubi nuquien
 Nuquin Papa yacno puduedtequido yec
 Nuquin Papan nadatiambocquin nac
 matses icsaquid icsho cuidnushe quiash
 abided cuidadec Esuquidistu
 unèspanèdash quequin tantiec. ¹⁹Abi
 yacno puduedtemaïdo chuiquin Nuquin
 Papan dada uamiampid nad iquec:
 “Comapenen tantiaquidon ambibi
 dadpen tantiaidtedi èmendambi.
 Adquidon tantiatiapimbo
 yacpadembi natiamequin
 nabanendambi,”
 quequin Nuquin Papan dada uamiampid
 aidèmbi nèbi naid nec.

²⁰Esuquidistu tantiesa ambibi
 tantiaidtedi naimèdan ¿mitsimbo
 adquido tabadpec? ¿Nidaid abubèd
 aidèn icquidtedimbo mitsipadquidquio
 icpec? quequin isbanquin, Nadquio
 icpec, quequin comapenen adquidèn
 tantiec. Aden tantiashic ambi tantiaid
 Nuquin Papan èmiac ¿mitsimbo
 adquido tabadpec? ¿Midaquidèn
 bédamboen tantieque? Adquidèn
 tantiaid tantianu, quec
 onquecuededquid ¿mitsimbo tabadpec
 Nuquin Papan aidon tantiaid èmiac?
 Adquidon dadpen tantiaquimbi matses
 icsaquid icsho cuidnushe quiash abided

cuidadec Esuquidistu unēspaneḏash, quequin utsin-utsinquien tantiauidec. ¿Adsho isun Nuquin Papan abi yacnoda puduedmepadíc? Padenquío iquec.

²¹Nuquin Papan nadatiambocquin nac matses icsaquid cuidnushe quiash abided cuidadec Esuquidistu unēspaneḏash quequin chuisho ambibi dadpen tantiaquidon tantiauidec. Ĕmbi tantiaidpenquío tantiatiapibi quequin tantiatiapimbo iquec. Adquido tantiatiapimbo icnubi ěbi yacpadquidon Esuquidistu chuibanac abi tantiaquid utsibo yanec. Nuquin Papa yacno puduedtequidtedi adquido nendac.

²²Adquidon aden tantianubi Nuquin Papan nadatiambocquin nabantequid iste bunquin isadaidbon tantiauidec. Quidieco matsesĕmbien, Ĕbi ĕnden tantiec papuduedaid daĕd uanu queboedĕmbi Nuquin Papan chiaid tantiauidoaic. ²³Adec tabadnubi matses icsaquid icsho cuidnushe quiash abided cuidadec Esuquidistu cuesten dectanac unēspaneḏash, quequin ěbi yacpadquidon chuibanoaic. Adoaquien, Nuquin Papan chomiaid nec, quequin isadaidbon cuesten dectanenquíoctsenĕdash, quequin tantienquío yec tabadec. Isadaidpembo, Esuquidistu mimbi chuiboed ĕmbi tantiacpadpenquío iquec. Adoac mimbi Esus chuibanaid ĕmbi ĕnden tantiaidbĕdta daĕd uatiapimbo iquebi quec tabadec. ²⁴Adquidon tantiauidnubi isadaidbo utsi-utsiec adecbidi isadaidpembo utsi-utsiec Nuquin Papan cuĕmbanaido icquin naden tantiec: Nuquin Papan tantiampicpadquiequi matses icsaquid icsho cuidnushe quiash abided cuidadec Esuquidistu cuesten dectanac unēspaneḏash. Aidi matses icsaquid icsho cuidnushe quiash abided cuidtequid icmequin Nuquin Papan nadatiambocquin naid nendac, quequin

nuqui tantiec. ²⁵Abitedi tantiaquidquío icquin ambi abentsĕc tantiatsaid Nuquin Papan chiac dadpen tantiaquidĕn dĕniactiapimbo iquec. Adecbidi, Nuquin Papan nadatiambocquin nainquiocquin bĕdiactsĕc natsĕcnubi adomboen tantiaquin matsesĕn dĕniactiapimbo iquec.

²⁶Utsibo, ¿mitsipadquidquío mibi icponda? Nadquid mibi icpondaque. Chuinu. Tanta. Daĕdpactsĕc tantiatsĕcquido mibi icpondac. Namequidpenquío mibi icpondac. Chuiquid dapan bacuĕpenquío mibi dadpen icpondac. Adquid icsho Nuquin Papan mibitedi tantiaquin, Con bacuĕ caid nec, quequin mibi cuĕmbanondash. ²⁷Ai, daĕdpactsĕc tantiatsĕcquido Esuquidistu tantiaquido icsho Nuquin Papan cuĕmbanaido mibitedi nec. Adquid ambi cuĕmbanaido icnubi dadpen tantiaquid iquequi Esuquidistu tantiesa icsho Nuquin Papan cuĕmbantemaid nebi quequin tantiec natiaic ma shubiquiopanuna.

²⁸Adembidi utsibon tantiauidtsaido Nuquin Papan cuĕmbanaido neoaic. Adecbidi, ¿Ada matses utsi iqueque? Isnu quenquiocquin matsesĕn tantiambo yaid Nuquin Papan cuĕmbantequid icnuc ²⁹ĕmbi comapenen tantiaquin nabansho Nuquin Papan cuĕnoshi quequin matsesĕn chuitiapimbo iquec.

³⁰Nuquin Papan tantiamiac Esuquidistu tantiaquid mibitedi nec. Abipadquid Nuquin Papan Chomiaid Esuquidistu yec abi tantiaquidtedi Nuquin Papa bĕdamboec tabadaid tantiamequid nendac. Aidi Nuquin Papan chomeshun matses icsaquid icsho cuidnushe quiash abided cuidadec unĕsaid isun Nuquin Papan cuidtiapimbo nuqui iquec. Icsaisa icsho Nuquin Papan aid bĕdamboen isquin adomboembidi nuquitsen isoaic. Adecbidi, aidi abi yacno bĕyucanec

puduedash tsadacpadec adecbidi nuquitsen tabadoaindac. ³¹Aden nuqui tantiaquin Nuquin Papan dada uamiampicpaden, Èbibi bédambo ictiapimbocquid icsho mimbi bédambo icmiaid nebi, Icbo, quequin èmbi naid chienquiocquin Esusèn naidquio chuibanuna nuquitedi.

2 ¹Adembidi chuinu. Tantia. Mibi yacno nidshun dadpen tantiemi quenquiocquin daèdpectsèqui cuembo chuibanondambi. ²Esuquidistubèdta abi cuesten dectanaid chuinu quequin aiduidi mibitedi chuibanondambi. ³Codinto yacnocquido dacuèdampambo iquec quequin uèdèequimbi mibi chuibanondambi. ⁴Èmbibi dadpen tantiacpadomboen chuibanenquioccombi. Nuquin Papan Mayanèn tantiamiacpadomboen èmbi chuibanubi aidèmbi nadatiambocquin mibitedi tantiamiondash ⁵ma Pabadon tantiamiacpadomboen tantiamioshi, quetiapimbo mibitedi icpanuna.

Nuquin Papan Mayanèn tantiamiaid

⁶Nuquin Papan tantiamiac comapenen tantiaquin èbi yacpadquidon chuibanoaic. Aden chuibeniatic Nuquin Papan chiaid tantiabene papuedquidon bédamboen tantiec. Aden Nuquin Papan èbi yacpadquid tantiamiaido matsesèn ambibi comapenen tantiacpaden chuibanesambo nuqui nec. Adembidi matses chuiquid dapabon comapenen tantiacpaden chuibanesambo èbi yacpadquido nec. Matsesèn dadpen tantiaid uesadendac. ⁷Adnubien Nuquin Papan comapenen tantiaquin, Esuquidistu chuibeneta, quenquiocpampidèmbi nèbi, Chuibeneta, cac Esuquidistu èbi yacpadquidon chuibanec. Ushè uabi tabadquin matses bédambo icmequid con mado nendac, quequin Nuquin Papan tantiapampic.

⁸Esuquidistu nuqui bédambo icmetequid Nuquin Papan chomiasho adquid nec quequin chuiquid dapabon tantienquiocpanèdash. Aidon, Nuquin Papan Chomiaid Esuquidistu nec, quequin abimbo tantiaquin cuesten dectanenquio ictsenèdash. ⁹Aidpadquid chuiquin Nuquin Papan èndenquimboshè dada uamiampid nad iquec:

“Nuquin Papan abi tantiaquido ambi cuèmbanaido abi yacno tabadmenun nacnenaid bèda tantiesan istiapimbo iquec. Adecbidi Nuquin Papa yacno nadquio ictsiash, quetiapimbo matses iquec.”

¹⁰Adnubien Nuquin Papan Mayanèn Nuquin Papan abi yacnoshon bédamboec tabadte nacnenaid iquec quequin nuqui tantiamiac.

Nuquin Papapadquid aton Mayan icquin Nuquin Papa tabadacpadquiec tabadaid nuqui tantiamioaic.

¹¹Matsesèn ambi tantiacpaden chiabi yac utsin tantienuio iquec. Adembidi Nuquin Papan ambi tantiacpaden chiambocon matsesèn tantiatiapimbo iquec. Abipadquid aton Mayanènuidquio tantiec. ¹²Con mayan èbipadquidquio menenu quetiapimbo matses iquec. Nuquin Papambien abipadquid aton Mayan nuqui menec ma aidènquio abi yacno bédamboec tabadaid nuqui tantiamepanuna. ¹³Aden aidènquio tantiamiac adomboembidi èbi yacpadquidon chuibanoaic. Èmbibi tantiacpadpenquiocquin Nuquin Papan Mayanèn tantiamiacpadomboen chuibanembi. Adomboembidi èbi yacpadquidon chuibanoaic. Aden Nuquin Papan chiaid chuibanac Nuquin Papan aton Mayan meniaidon tantiaquiec. ¹⁴Nuquin Papan abipadquid meniacmaidon aidèn chiaid tantiatiapimbo iquec. Aden Nuquin

Papan Mayanën chiaid tantiatiapimbo icquin Nuquin Papan matses bédambo icmenu queshun Esuquidistu chomiac matses icsaquid icsho cuidnushe quiash abided cuidadec cuesten dectanac unēsplanēdash quequin aidon tantiatiapimbo icoaic. Ĕmbi tantiacpadomboen Nuquin Papan chienquo iquec, quendac Nuquin Papan abipadquid meniamaido. ¹⁵Nuquin Papan Mayanën tantiamiaidombien naden utsibo tabadaid tantiec. Matses bédamboec tabadsho isun, Nuquin Papan Mayanën tantiamiacpadec tabadquidquo nec, quequin nuqui tantiec. Adembidi utsi icsamboec tabadsho isun, Nuquin Papan Mayanën tantiamiacmaid nec, quequin nuqui tantiec. Nuquin Papan Mayanën Nuquin Papan chiaid tantiamiacmaidon nuqui naic tabadaid isash Nuquin Papan chiacpadquieq tabadquid nec quetiapiimbo iquec adquid. Adecbidi Nuquin Papan chiacpadpenquo yec tabadquid nec quetiapiimbo Nuquin Papan Mayanën tantiamiacmaido iquec. ¹⁶Nuquin Papan chuimiampid nad iquec: “Nuquin Papa Abia Yampid yec abitedi tantiaquidquo nec. ĔAdquid Nuquin Papa icsho abi chuiquin ismequid mitsicquid icpec? Adquid nibēdec.” Nuquin Papan tantiacpadomboen aton Mayanën tantiamiaido icquin Esuquidistun tantiacpadomboen nuqui tantianec.

ĔEsuquidistu tantiaquid utsi icsambo iquec, quecta ique?

3 ¹Adembidi chuinu. Adembi tantia. Mibi yacno tabadquin Nuquin Papan chiaid tantiabenicquid mibitedi icsho daēdpectsēc chuibanondambi. Codinto yacnocquido

bacuē uidēnabi yacbimboecquido nec queshun Nuquin Papan chiaid daēdpectsēc mibitedi chuibanondambi. ²ĔNēbi tishaidēnda pambid pepec? Padenquo. Mibitedi adquidbimboecsho tantienquo icnushe queshun Nuquin Papan chiaid daēdpectsēc chuibanondambi. Ĕnden iccondacpadquibi mibitedi adquiobidi icoapec. ³Esuquidistu tantiesa yec tabadondacpadec mibi tabadoaic. ĔEsuquidistu tantiaquid utsi icsambo iquec, quecta ique? Nuquin Papan Mayanën tantiamiacmaidpadquid yec nēishec chushcananec mibi. ⁴Pabardon tantiamiaid nebi, quec utsi-utsiec chushquenubien; Apodosēn tantiamiaid nebi, quec chushqueoaic utsi. Adeq chushquec Nuquin Papan Mayanën tantiamiaibi yacbimboecquido mibitedi nec.

⁵ĔMitsipadosho mimbi ēbi isponda? Adembidi, ĔMitsipadosho mimbi Apodos isoaponda? ĔĔmbembidambi mibi chuibaiponda? ĔAmbembida Apodosēnsen chuibampanēdash? Padenquo. Tantia. Chuinu. Nuquin Papan chiacpadomboen Esuquidistu chuibenequid ēbi daēdi nebi. ĔPabardon chuibanubi Nuquin Papan Esuquidistu tantiamiondashi quequina mibitedishun tantiae? Ai, Ĕmbi adobanubi Nuquin Papan Esuquidistu mibitedi tantiamiondash. ⁶Tiedēn caniquid ēshē siabi yac dēyuctiapimbo yacbimboecquid icquin Codinto yacnocquido Nuquin Papan chiaid dadpen tantiatiapimbo iquec, queshun matses icsaquid icsho cuidnushe quiash abided cuidadaid Esuquidistu nec quequin adquid chiaidba mibitedi chuibanondambi. Yuecash Apodostsen mibi yacno chopanēdash. Adeq choshon tiedēn caniquid dēyuctsash tanunquiocnoc canitiapiimbo

yacbimboecquido Codinto yacnocquido icnushe qeshun Apodosën chuibanoapanëdash. ⁷Tied nitsinshun taneshcain tiedën caniquid canimesa icbo nec. Adquiobidi Nuquin Papan chiaid chuibanquid matses tantiamesa nec. Nuquin Papambien tantiamec. ⁸Tied icbon con tied nitsinec cho cac nashunec. Aden nabanquin nainacsho icbon abi nitsinshunquid cuidec. Adembidi con tied taneshcaic cho cac nashunoaic. Adembidi abi neshcashunquid cuidoaic. ⁹Nuquin Papan chiacpaden Esuquidistu chuibenequid Apodos nendac. Adembidi Nuquin Papan chiaid chuibenequidtedi nec. Adquid ëbipadquid icnubi Nuquin Papan tiedbimboecquid mibitedi nec. Nuquin Papan shububimboecquidbidi mibitedi nec.

¹⁰Nuquin Papa tabadte shubu uashunun buintad teshun abia tabëcacbimboen Esuquidistuba chuibanondambi ma matsesën tantianueshun. Buintad tabëcacbimboen Esuquidistu ëmbi chuibanan utsibon adomboembidi aidbidi chuibeneoaic. Bëdamboen chuibenenequin ¿Nuquin Papan tantiacpadomboendambi chuibaneque? Tantianu, qeshun Nuquin Papan chiaid isted-istedtiad ambi chuibeneta caidon. ¹¹Shubu uashunquidën shubu uidën uatequid nitsinan shubu uashunquid utsibo adomboen tabëcoanu quesa nec. Adquiecbidi Nuquin Papa tabadte uashunu qeshun buintad tabëcacbimboen Esuquidistu ëmbi chuibanan adquid nec, quequin utsi chuibantiapimbo utsibon iquec. ¹²Buintad tabëcaid tabadacimboecquido icmenuequin Nuquin Papan chiaidquio abimbo chuibanoaic. Utsimbien abipenquiocnoc chuibanoaic. ¹³Adashien yuecash

Esuquidistu choanuc ¿Ëbi chuibanquidën ëmbi chiacpadomboenda naoshe? Nëdëncadoquin tanu, quependac. ¹⁴Aden nëdëncaquin tanac Nuquin Papan chiaid bëdamboen chuiquidon chuibanac Esuquidistu tantiaquidombo yec buintad taudacmaid nidacimboec abi nidendac. Adsho isun abi bëdamboen chuibanquido Nuquin Papan menetequid nendac. ¹⁵Adomboembidi utsibon abipenquio icnuc chuibanac Esuquidistu tantiatiapimbocquido taudaid bescashun secacimboen secatequid nendac. Adnubi abipenquio icnuc chuibanquido tauditsenacimboec abentsëqui ambi chuibanaido nibëdnuc Nuquin Papa yacno puduedendac. Adquido Nuquin Papan menetemaïdo nendac.

¹⁶Esuquidistu tantiaquido Nuquin Papan Mayan tabadtequid nec. ¿Adquid iquec Nuquin Papa tabadtequidbidi nebi quequin tantiatiapimboda mibitedi icpe? ¹⁷Ai, Nuquin Papa tabadtequidbidi mibitedi nec. Adquid icsho mibi icsabudmenuequido Nuquin Papan ënenquiocquin comapenen cuidendac. Abi tabadtequid Nuquin Papan cuëmbanaido ambi bëdambo icmebanaidobidi nec. Esuquidistu tantiaquido Nuquin Papa tabadtequid nec caindac.

¹⁸Adec abi tabadte yequi Esuquidistu tantiesan tantiacpadquiec mibi tabadec. Adec tabadec, Esuquidistu tantiaquid nebi, quec mibibi mua uadec. Esuquidistu tantiaquidquio icnuec Esuquidistu tantiesan tantiacpadec tabadenquiocquin Nuquin Papan tantiacpadomboen tantiaquiota. ¹⁹Esuquidistu tantiesan tantiacpadquiec tsadquidën ëbi yacno tabadte tantiatiapimbo iquec, quequin Nuquin Papan tantiec. Aden tantiaquin ambi

dada uamiampid nad iquec: “Ambibi comapenen tantiaquin nabanaid ënabi icnubi icbo unësëndac.” ²⁰Adecbidi: “Adquidën tantiaidbidi ënëdtequid nec,” quequin Nuquin Papan tantiec. ²¹Ad icnuc, Pabadon tantiamiaid nebi, quenda. Adecbidi, Apodosën tantiamiaid nebi, quenda. Abia Yampidën shubu abentsëquën tabadquid mibitedi icnuc aidën natedi mitsana nec. ²²Aidën bacuëbo icquin mibitedishun con utsi ëbi caic. Adembidi Apodostsen mimbi adoaic. Adembidi Petedotsen mimbi con utsi caoaic. Nidaid abubëdta uashumbic aidënquiocquidtedimbo uabanquid yec aidtedishun icbo Nuquin Papa nec. Adecbidi aton bacuë mibitedi icnuc aidtedimbo mitsana nec. Esuquidistu uincuenacpadeç uincuentequido mibitedi neoaindac. Nidaidën tabadec unëstequidbidi mibi nec. Nëid ushën mibi nidaidën tabadte ushë nec. Yuecash abuctsen mibi tabadendac. Abitedi Nuquin Icbon natedi nec. Aidën cuëmbanaido mibitedi icnuc aidtedi mitsanabidi nec. ²³Mibitedishun icbo Esuquidistu nec. Esuquidistun icbo, Edoen, aton Papa nec.

Esuquidistu chuishunquido

4 ¹Icbo Esuquidistu chuibenequid Pabado nec. Adquidbidi Pabado yacpadquidtedi nec, quequin mimbi tantiata. Ènden Abia Yampidën Nuquin Papan Esuquidistu chuibeneta, quenquiocpamidëmbi nëbi aid chuibeneta cac chuibanec nebi. Adembidi Pabado yacpadquidon chuibenec, quequin mibitedishun tantiata. ²Nuquin Papan, Esuquidistu chuibeneta, cacpadomboen niaquenquiocquin ëbipadquidon chuibenetiad. ³Nuquin Icbon, Èbi chuibeneta, caid ëbi icnuc ÷Pabadon

bëdamboenda chuipec? quequin tantianuna, ÷mimbi cactabi dacuëdpe? Padenquio. Adembidi, Nuquin Papan chiacpadomboen chiombi, quetiapimbo iquebi. ⁴Ambi chiacpaden niaquenquio iccombi, quetiapimboconobi abitedi isquidquio abitedi tantiaquidquio Nuquin Icbo icquin ëbi chuibanec bëdamboec tabadsho isun aidën chiendac. Adembidi ëbi chuibanec icsamboec tabadsho isun chiendac. ⁵Icsamboen natsiash, quec tsadenda. Nuquin Icbo choashun icsambocquid cuidendac, quequin cainta. Aidëmbi choashun matses icsamboen ismec tabadaid abi ompoec tabadaidbëdta chuibanashun cuidendac. Adembidi, matsesën ëquëducshun tantiaid chuibanquin cuidendac. Adembidi, utsibo bëdamboec tabadaid chuibanquin chuiöaindac, Bëdamboen mimbi naoc, quequin.

⁶Adembidi chuinu. Tantiata. Pabadopadquid Apodos nec, quequin ma mibitedishun tantianueshun chuibanombi. Aden tantiabanec, Pabadopadquid utsi nibëdec, quesa ma icpanuna. Adecbidi, Apodospadquid utsi nibëdec, quesa ma utsibotsen icpanuna. Nuquin Icbopadquid utsi nibëdec, quequin tantiec tabad. Adecbidi, Codinto yacnocquidopadquid utsi nibëdec, quenda. ⁷÷Mitsicquidën adquid mibi icmebampashba? ÷Abembida mibi adquid icpeba? Nuquin Icbon tantiamiac nabanash, ÷atotsi quiash, ëmbi tantiapaden naombi, quepe mibi?

⁸Nuquin Papan chiaid dadpen tantiaquid nebi, quequin nua cubudquin peshun isuidacpadomboen ambi chiaid nëbi mibitedishun tantiauidpec. ÷Adpecta Nuquin Papan bëdambo icmiaido tabadpadiç? Nuquin Papa yacno ënden puduedacimboec yash chuiquid dapa nebi, quiaicimboec

mibitedi tabadpec mibi Esuquidistu chuibanquidtedi adec tabadiapimbo icnubi. Mibitedibëd ëbi yacpadquido ëbi chedo ënden chuiquid dapa yacpadquido icmiondac, Cuishon, quetsiabi. ⁹Adecbidi, Bëdambo iquebi, quec mibi tabadnubi naden tantiec tsadebique. Tantia. Chuinu. Ëmbi chuibeneta caido unëseque. Is, Nuquin Papa quiacbimboecnuc ambi abi yacnoshon uaido mayan bëdabobëdtan matsestedishun isbededacimboecquid nebi, quequin ëmbibi tantiec tsadebi aden isbededec aido tabadenquiocnobi. ¹⁰Esuquidistu chuibenequidon chuibansho tantiauidash, Pabiata icsachitashien nec, quequin mamëshumbededashic Codinto yacnocquidon ambibi tantiaquin chuibansho tantiaquidquido nec, quepec Esus tantiesabo. Adecbidi, utsibo dacuëdampambo iquec, quiash uëdëequin Esuquidistu chuibenequidon Nuquin Papan chiaid chuibanubi cuesambo yacimboen mibitedishun chuibampec. Esuquidistu tantiesan yuedaido mibitedi icnubien utsin yuedtemaid Esuquidistu chuibenequido nec. ¹¹Esuquidistu chuibenequid yequi pistëc petsec abi bunec tsadebi. Adecbidi, acte acash bunec tsadquid nebi. Adecbidi dashcute icsactsëcquid dasiuidquid nebi. Adquiecbidi Esuquidistu chuibenequid utsibo iquec. Utsin mëyanded-mëyandedaid nebi. Quenenash iquenquio icquin capucuenequin Esuquidistu chuibenec nebi. ¹²Con pete bednuequin shubumpi nacnenquidquio iquec chonoadsho isquin utsibon mamëshunaid nebi. Aden mamëshunubi chonoadebi. Adecbidi Pabado icsambocquid nec, quequin chiaqui aido cuidenquiocquin bëdamboen ista, Papa, quequin aido chiemi. Utsin mëyanaqui dayacquio

yec cacuidanesa nebi. Adquidbidi Esuquidistu chuibenequid utsibo nec. ¹³Adembidi, utsin ëbi mua uaquin chiaqui cuidnanenquiocquin bëdamboen chiemi. Adembidi ëmbi Esuquidistu chuibeniaqui icsactsëcquid nec, quequin ambi secanu caidbimboecnuc ëbi ispec. ¹⁴Adecbidi, Bëdambo iquebi, quec mibitedi tabadnubi mëyamboc tsadebi. Adec ëbi tabadaid ëmbi chiac Codinto yacnocquido unësquio yampec, quenquiocquin ëbi tabadaid mibitedi tantiamenuen dada uaombi. Pabado chiaid abimbo iqueque. Bëdamboec tabadnuna mibi camenuen dada uaombi, con bacuëbo. Mibi tantiac unësquio iquec. ¹⁵Mibi chuibanquid utsi dadpen nëbi icnubi Esuquidistu ëmbia chiac mibitedi aid tantiaquid icpondac. Mibi chuibanquid utsibo min papa ictiapimbo iquec. Esuquidistu tantiaquid ëbia yanshun Esuquidistu chuibanac mibitedi Esuquidistu tantiaquido yampondac. Ëmbi chuibanacpaden chiaid tantiaquido con bacuëbo ëmbi caidtedi nec. Adquid mibitedi icnuc papa nebique. ¹⁶Ëmbi nacpadomboen naic tabadta quequin mibitedi chiemi. ¹⁷Mibi ëmbi nacpadquieq tabadte tantiamenuequin Timoteyo mibi yacno nidmembi. Aidi ëmbi chuibanac Esuquidistu tantiaquid icpondash. Adquid iccondacsho ëmbi con mado caid aidi nec. Aidi Esuquidistu tantiaquidquio icquin utsi-utsiec yacnoshon ëmbi chuibeniacpadomboen chuibanacquin Timoteyon mibi padpiden tantiamendac. Esuquidistu tantiaquid utsibo iccuededacnoshon chuibanacpadomboen ismequin chuibanquid aibidi nec. ¹⁸Mibi utsi-utsiec Pabado choainquio iquec quequin abimbo tantiacimboen chuibanec. ¹⁹Aden adquidon chuinubi

Nuquin Papa bunuc badedquio mibi yacno nidebique. Ista. Mibi yacno puduedshun abi onquiaid tantianu quenquiocquin abi naic tabadaid isnuna caindambi. ²⁰Nuquin Papa tantiaquido ambibi tantiacpadec onquesa nec. Nuquin Papan Mayanën tantiamiacpadec onquequid Esuquidistu tantiaquido nec. Adquid Icbon tantiamiacpadomboen nabanec tabadquid nec. ²¹¿Mibi yacno puduedshun atotsimbi adquid napeque? Chui. ¿Cuesnu quiacbimboendambi adquid comapenen chushcaquin tantiemepe? ¿Adenquiocquindambi ëbëd icquid nec quequin chuibanquin adquid tantiemepe?

Esuquidistu tantiaquid ambi chudtemaid chudquid cacumeta caid

5 ¹Mibëd Esuquidistu tantiec iccuededquid abentsëc ambi chudtemaid chudquid iquec quequin chieq onquec. Aden naisa isadaidbo nec. Adembidi naisa isadaidpemo nec. Aton papa icbon chido, anin dauid, bedshun chudesa aido nec. Mibëd icquid abentsëc adquid iquec quec. ²Adquid mibëdi icnuc, Bëdambo icmiaido nebi, quenquioctiadquidi mibitedi nec. Adquid icsaquid mibëd icsho isash ünësquio icquimbi aidi cacumepatecnëdan. ³Mibëd ictiapimbo yequi mibëd yacbimboecquin dada uaquin icsaquid cacumetiadquidi mibi nenëdac quequin chuibanombi. ⁴Esuquidistu tantiaquid nuquitedi nec, quec mibitedi iccuededec Nuquin Icho Esuquidistun tantiamiacpadomboen Pabadon naden natsiash quequin ⁵icsaquid nidme ma Satanasën mëyanac icsa bunesa yanacsho Nuquin Icho Esuquidistu choashun ma abi yacno yuedpanuna.

⁶Esuquidistun ënden bëdambocquid icmiaidtedi nebi, quenda. Icsaquid

abentsëc mibëd tabadquin abi icsamboec tabadaid ismiac acte maisacbimboec mibitedi adquiobidi ictsiac. ⁷Ënden mibitedi Esuquidistu tantiesabo yec icsaquin ismec maisaccondacpadec maismane qeshun icsaquid nidmeta. Ëbi cuidmenquiocnoec abided cuidadec Esuquidistu ünëspanëdash, quiash aid icsaisa yacpadquieq tabadta. ⁸Aden ambi naid tantiec icsaondacpadpenquio yec ma tabadpanuna. Aidquio tantiembi, quec abimbo tantiadonec ma tabadtenepanuna.

⁹Ambi chudtemaid chudquidbëd iccuededenda, quequin ënden dada uaondambi. ¹⁰Esuquidistu tantiesabëd iccuededenda, quenquiocquin Esuquidistu tantiaquid adquid icsho isash iccuededenda, quequin dada uaondambi caimbi. Ambi chudtemaid chudquid Esuquidistu tantiesa dadpen iquec. Adecbidi, utsin na bunquin mua uain bedquid dadpen iquec. Adecbidi, matsesën Nuquin Papan uaidbimboecnuc nacnenaid tantiaquid Esuquidistu tantiesa dadpen iquec. ¿Adquido ismane quiash mitsimbo mibi tabadpe? Nuquin Papa yacno adquid nibëdec. Nuquin Papa yacno nidash icsaquid isenquio yec mibi tabadendac. ¹¹Esuquidistu tantiaquid nebi, quequid icsadenesho isash adquidbëd iccuededenda caimbi. Esuquidistu tantiaquid nebi, qeshun ambi chudtemaid chudquin ënesabëd iccuededenda. Adecbidi, muaquin bedbanquidbëd iccuededenda. Adecbidi, Esuquidistu tantiaquid nebi, qeshun matsesën Nuquin Papan uaidbimboecnuc nacnenaid tantiaquin ënesabëd iccuededenda. Adecbidi, Esuquidistu tantiaquid nebi, qeshun ambi tantiacpadpenquiocquidën chuisho mamënshumënquin ënesabëd

iccuededenda. Adecbidi, Esuquidistu tantiaquid nebi, qeshun cuesanquin ampequin ënesabëd iccuededenda. Adecbidi, Esuquidistu tantiaquid nebi, quiash ëmbi chuibocpadquid icsaquidbëd iccuededenda. Adembidi aidobëdtan penda.

¹²¿Esuquidistu tantiesa abi icsaid chuiquin cacumeta, quequindambi chuipe? Padenquo. Esuquidistu tantiaquid mibëd icquid icsadenequin ënenquioscho isun Nuquin Papan chiaid comapenen tantiaquin mibi icsaid ënta, quequin chui. ¹³Nuquin Papambien Esuquidistu tantiesa icsaid chuiquin cuidendac. Mimbi Esuquidistu tantiaquid icsadenequid cacumeta.

Ëbi chushcananaid tantiaquid mimi tantiacpaden chui caid

6 ¹Esuquidistu tantiaquid daëd nëishash chushcananec, queoaic. Adquid chuinu. Tanta. Nëishash chushcananash Esuquidistu tantiesa yacno nidshun, Ëbi chushquiaid chuisho tantiaquid ðmidapaden mimi chieque? Ëbi chui, quequin mimi chuipec. ¿Atotsi quiash Esuquidistu tantiaquid yacno nidtiadquidi Esuquidistu tantiesa yacno nidshun mimi adquid chui, cape? ²Yuecshun, ¿Midapaden mimi Esuquidistu tantiesan naid chieque? Tantanu. Chui, abi tantiaquido Nuquin Papan caquien ¿nuqui chiacpaden aido Nuquin Papan cuidendac, quequin tantienquioda mimi icpe? Yuecshun tantiesan naid chiemi, qeshun ¿Atotsieshun Esuquidistu tantiaquidbëd chushcananash tantiesa yacno nidshun mimi chuibampe? ³Yuecshun, ¿Ëmbi uaido mayanën naid midapaden mimi chieque? Tantanu. Chui, Nuquin Papan caquien ¿nuqui chiacpaden aido cuidendac, quequin tantienquioda mimi icpe? ⁴Adquidon naid ëmbi

chiacpadomboen Nuquin Papan cuidendac, quequin tantiaquin ¿atotsieshun Esuquidistu tantiaquid daëd nëishash chushcananasho tantiaquid, Esuquidistu tantiesa yacno nidshun, Ëbi chushquiaid chiacsho mimi tantiacpaden ëbi chui, mimi capec? ⁵¿Esuquidistu tantiaquid utsibo nibëdpecta ictic? ¿Esuquidistu tantiaquidën icsamboen chuinushe qeshunda Esuquidistu tantiesa yacno nidshun, Ëbi chushquiaid chiacsho mimi tantiacpaden chui, mimi capec? ¿Bëdamboec tabadaid Esuquidistu tantiaquid utsibon comapenen tantienquioctsiash, quequinda mimi tantiape? ⁶Mibipadquid Esuquidistu tantiaquid utsibo yacno nidenquo yec mibipadquidpenquo Esuquidistu tantiesa yacno nidshun utsibëd chushcananaid mimi chieque. Adenda.

⁷Ëbi chushcananaid ëbi daëdshun chiacsho tantiaquid mimi tantiacpaden chui. Tantanu, quequid mibëd icnu Nuquin Papan bëdamboquid icmiabicquid mibitedi nec. Esuquidistu tantiaquid utsin mibi icsamboen nasho isash ¿atotsi quiash nëishash chushcanampe? Adembidi, Esuquidistu tantiaquid utsin muaquin mitsana bedacsho isash ¿atotsi quiash nëishash chushcanampe? ⁸Cuidnante bunec mibi adpec. Naden natiad. Èbëd chushcananquid Esuquidistu tantiaquid nec, quec abi cuidte bunenquo yec abi yacno nidshun abi icsaboed tantiamequin Nuquin Papan chiaid chuiban.

⁹¿Icsadenequin ënesa Nuquin Papa yacno puduedesa nec, quequin tantienquioda mimi icpe? Esuquidistu tantiesabo tabadacpadquiec tabadec icsate bunquid yec Esus tantiaquid nebi quec mibibi mua uadenda. Ambi chudtemaid chudquin ënesa Nuquin

Papa yacno yuedtemaid nendac.
 Adembidi, Nuquin Papan
 uaidbimboecnuc nacnenaid tantiaquin
 ënesa abi yacno yuedtemaido nendac.
 Adembidi, ambi inacmaid chudquido
 abi yacno yuedtemaido nendac.
 Adembidi, aton bënëpen chudmequin
 ënesa, adecbidi dada daëd
 chichudnanquin ënesa, adecbidi chido
 daëd dachudnanquin ënesa Nuquin
 Papa yacno yuedtemaido nendac.
¹⁰Adembidi, ampequin ënesa Nuquin
 Papa yacno yuedtemaid nendac.
 Adembidi, muaquin utsin na bedquin
 ënesa, adembidi, ambi
 tantiacpadpenquiocquidën chuisho
 mamëshunquin ënesa, adembidi,
 cuesunianquin ampequin ënesa.
 Adquido Nuquin Papan ambi abuschun
 nacnenaidën tabadtemaido nendac.
¹¹Ënden mibi adquo iccondaidi nëbi
 utsi-utsiec padenquo icsho isash
 Nuquin Papa mibi cuidenquo yec mibi
 icsaid bëpiscudac. Adembidi, Nuquin
 Papan mibitedi bëdambo
 icmebanuequin abipadquid aton Mayan
 mibitedi meniac. Aidi meneshun
 Esuquidistu icsapenquiocquid isacpaden
 Nuquin Papan mibitedi isoaic.

**Ëmbi chudtemaid chudmane qeshun
 adquid isuidteneta quiaid**

¹²Ëmbi natemaid naden nata caid
 nibëdec qeshun naic bëdamboquid
 ictiapimbo iquebi, quiash padenquo yec
 tsadebi. Aden nabanquin ëntiapimbo
 icmane quiash padenquo iquec tsadebi.
¹³Matsesën chebudaïd pucu yacno
 budash dada bëdambo icmianquid nec.
 Yuecash matsesën dada chodquetequid
 nendac. Padnuen, ëbi tabadte ma
 icpanueshun Nuquin Papan matses
 uapampic. Abi tantiaquid abi tabadte
 iquec. Adecbidi adquidbëd Nuquin Papa
 iquec. Ad icnuc mimbi chudtemaid

chudquid icta, quenquo Nuquin Papa
 icpampic. Ambi chudtemaid chudquid
 Nuquin Papa tabadte ictiapimbo iquec.
 Aden naquid chian anëdënquequid
 nësecatequid nendac. ¹⁴Nadatiambocquin
 Esuquidistu Nuquin Icbo Nuquin Papan
 uincuemepanëdash. Aidëmbi nuquitsen
 abi tantiaquid icsho uincuemendac.
¹⁵¿Abi tantiaquid icquin, Esuquidistubëd
 daëdash tabadquid nebi, quequin
 tantienquioda mimbi icpe? Ai, aibëdi
 daëdtequid nuqui nec. ¿Adquidbëd
 daëdashabi icsaquidbëd daëdoape?
 Padenquo iquebi. ¹⁶¿Dadpen
 chudmequid chudash
 daëdacbimboecquid nec, quequin
 mibitedishun tantienquioda icpe? Aid
 daëdi dada abentsëc yacbimboecquid nec,
 quequin Nuquin Papan dada uamiampid
 nec. ¹⁷Nuquin Icbobëd daëdaïdien Icbon
 tantiacpadquiec tabadquid nec.
¹⁸Ëmbi inacmaid chudmane qeshun
 chido utsi isuidteneta. Padenquo yec
 icsaquidbëd daëdquid mibi iqendac.
 Ambi chudtemaid chudquid aton namibëd
 ëquëducuësh daëdaïd nec. Nami
 umanucueësh icsaid namibëd daëdtiapimbo
 iquec. ¹⁹Nuquin Papan Mayan tabadtequid
 Esuquidistu tantiaquido nec. ¿Nuquin
 Papan ëbëd tabadmiïd abipadquid nec,
 quequin tantienquioda mibitedishun icpe?
 Èbibi nuquin icbo nec, quetiapimbo matses
 iquec. Adecbidi, Con icbo nibëdec. Ëmbi
 tantiacpaden naimbi, quetiapimbo mibi
 iquec. ²⁰Nuquin Icbo cuesten dectanac
 matses icsaquid icsho cuidnushe quiash
 abided cuidadec unësqid Nuquin Papan
 icmiac abi tantiaquid yec aidën na
 mibitedi nec. Adoaidi ambi chiacpaden
 ismec bëdamboec tabadteneta.

Dada chidobëdi daëdaïd

7 ¹Nëbi mimbi dada uaboed isombi.
 Aid isun ëmbi tantiacpaden
 chiembique. Tantiata. Chido inquid

dadatedida ictiad quequin mimbi tantiapec. Padnuen, Chido bedenquio iquemi, qesho chido inta cainda caimbi mibi. ²Esuquidistu tantiesa yec ambi chudtemaid chudquid Codinto yacno tabadquid utsibo dadpen iquec. Aidpadquid icmane quiash chido abentsëc inquit dada ictiad. Adecbidi dada abentsëcshun inaid chido ictiad. ³Con chido ëmbi inaid nec, quequin aiduidi chudquid icta. Adecbidi con bënë ëbi inquit nec, quequin aiduidi chudmequid chido nec. ⁴Chidon dada daëdash aton bënëñ dadabidi nec. Adecbidi dadan dada chidon dadabidi nec. ⁵Aid daëdi daëdabi yacbimboec, Padi, quenda. Adboedi, Nuquin Papa chuinec nëidtedi ushquin padenquio nuqui iquec, qeshun ënta. Aidedec ushquin padenquiocshon, Ëmbi yuen ëntiapimbocsho isun Satanasën icsamenushe qeshun padpiden nata. ⁶Ënta quenquio iquebi. Nëidtedi ushquin padenquio iquemi quiash mibi daëdi aidedecuidi ushec ënënta caimbi. ⁷Padnuen, chido inesa ëbi yacpadec dadatedi icpashun. Dada utsi-utsiec Nuquin Papan icmiacpaden chido inquit icnubi utsi-utsiec chido inesa iquec.

⁸Chido inesa ëbi tabadacpadec dada utsitedi tabadec bëdambo ictsias. Adecbidi dadan inaidpen bëdambo ictsias chido. Dada bënua adecbidi bëdambo ictsias. ⁹Adquid icquin isuidtiapimbo yec comapenec chudte bunquin chido inta. Adecbidi chido bënua dada isuidtiapimbo iquec dadan inaid icta.

¹⁰Daëdash niamënenda. Ëmbibi chienquiocquin Nuquin Icbon aden chuinëdacpadembi chiembique. Tantia. ¹¹Min bënë nianash utsin inaid iquenda. Dadan inaid icnu quec mimbi niamboedën inaid icoata. Adembidi

chido inquit min chido bunenquiocquin abi icsaid dada uashun ismequin nidmenda.

¹²Nëbi Nuquin Icbon naden chuiban cainquiocnobi ëmbia Esuquidistu tantiaquid icquin Esuquidistu tantiaquid utsibo ëmbi chuibocpadembi mibitedi chuioaimbique. Tantia. Dada aton chidobëdi Esuquidistu tantiesa icboedi aton bënë Esuquidistu tantiaquid yanuc aton chido padenquio yec, Con bënë nianu, quenquio ictsias. Adquid icsho isash. Con chido icsambocquid nec, quenquio yec abëdi tabadquid bënë.

¹³Adecbidi chido utsi aton bënëbëd Esuquidistu tantiesa icboedi aton chido Esuquidistu tantiaquid yantsias. Aden Esuquidistu tantias, Con bënë icsambocquid nec, quenquio yec bënë nianec nidesa chido. ¹⁴Esuquidistu tantiabi yec daëdacpadec aton chido Esuquidistu tantiaquid yanash aidbëd abentsëc yacbimboec tabadec bënë. Adec bëdamboec tabadsho isun Nuquin Papan chido bëdamboen tabadmequin bënëtsen bëdambo icmebampec. Chido Esuquidistu tantiaquid icquin aton bënë padenquiocnobi aton bacuëbo tantiec, Icsambocquidën bacuëbo nec, utsibo quenushe quiash bënëbëd abentsëc yacbimboec tabadquid chido. Adecbidi dada Esuquidistu tantiaquid icquin aton chido padenquiocnobi adomboembidi aton bacuëbo tantiec aton chido Esuquidistu tantiesabëd tabadquid dada. Adec abentsëc yacbimboec tabadsho isun, Bëdamboquidën bacuëbo nec, quequin utsibon ispec.

¹⁵Utsimbic ambi bedboedën aton chidon Esuquidistu tantiasho isun aton chido nidta catsias. Adoquien, Mibëd tabadte bunebique. Ëbi nidmenda, quetsias chido bënë caic. Adoqui, Nidec nid, cac cacuidenquio yec nidquid chido. Chido utsibic aton bënë

Esuquidistu tantiaquid yansho isash, Mibi nianu, quetsiash. Adoquien, Mibi unësquio iquec, quetsiash bënë. ¹⁶Adnubien dadan nidta caid aton chido Esuquidistu tantiaquid yec bédambocquid icsho isash Esuquidistu tantiaquidtsen yantsiash bënë. ¿Adquid yantsiash, quequin tantienquioda mimbi icpe? Adecbidi, chidon nianu caid aton bënë bédambocquid icsho isash Esuquidistu tantiaquid chidotsen yantsiash. Adecbidi ¿Adquidtsen yantsiash, quequin tantienquioda mimbi icpe?

¹⁷Mibi Esuquidistu tantiaquid yanash Nuquin Papan tantiacpadec tabadnu quiash adequi tabadta. Adomboembidi Esuquidistu tantiec iccuededquid utsibo chuibanombi. ¹⁸Esuquidistu tantiesa shui dëbid dëteshunaid yec Esuquidistu tantiaquid yanash ëbi shui dëbid dëteshunacmaidbimboecnuc nacnemenue quenquo yec tabadta. Adecbidi, Esuquidistu tantiesa shui dëbid dëteshunacmaid yec Esuquidistu tantiaquid yanash shui dëbid dëtemenu quenda. ¹⁹Shui dëbid dëteshunaidta nec, quenquo yec Nuquin Papa tsadec. Adecbidi, Shui dëbid dëteshunacmaidta nec, quenquo yec Nuquin Papa tsadec. Adquid nec quenquo yec, Ëmbi chiacpadomboen nadenequidta nec, quec Nuquin Papa tantiec tsadec. ^{20,21}Adec Nuquin Papa tantiec tsadnuc yua Esuquidistu tantiaquid yanash yuapen icnu quenquo yec tabad. Adecbidi, utsin yuapenquo yec utsin yua icnu quenquo yec tabadoa. ²²Yua Esuquidistu tantiesa icboedi Esuquidistu tantiaquid yansho isun, Yua nec, cainquo icquin Nuquin Icbon cuënendac. Adembidi, utsin yuapenquo Esuquidistu tantiesa icboedi Esuquidistu tantiaquid yanash Nuquin Icbon namiaidquio nendac. ²³Matses icsaquid

icsho cuidnushe quiash abided cuidadec unësquid Esuquidistu Nuquin Papan icmiac aid tantiaquid iquec, Con icbo nec, quiash utsin yuaid iquenda.

²⁴Adembidi chuinu. Tantiata. Nuquin Papan mibi cuënucc matses yec Esuquidistu tantiaquid yanash, Ëbëd tabadquid con Icbo nec, quec matses yec bédamboec tabadta.

²⁵Chido inesabëdta dadan inacmaid chuita quequin mimbi dada uaid isun aidotsen chiembi. Aido tantiaquin naden chuita Nuquin Icbon cainquo yaqui Nuquin Icbon ëbi chuibeneta caid icquin naden mibitedi chiembique. Tantia. ²⁶Natiatequid icnuc Esuquidistu tantiaquid chido inesa yec adequi tabad. Adecbidi, dadan inacmaid yec adequi tabadta chido. ²⁷Chido inquid yec chido inesa icnu quenda. Adecbidi, chido inesa yec chido inu quenda. ²⁸Chido inesa icboedi chido inquid yanash Nuquin Papan chiaid niaquesa nec. Adecbidi, dadan inacmaid icboedi dadan inaid yanash Nuquin Papan chiaid niaquesa chido nec. Natiaic cametequid icnuc, ¿Mitsipadentsimbi con chidobëdta con bacuëbo bédambo icmepeba? quec chido inquid tabadec. Chido inesain aden tantienquo yec tabadec. Natiaic cametequid choec quec chido inesa yec adequi tabad. Adecbidi, dadan inacmaid yec adequi tabadta, quequin mibi chiembi ma natiamianquiec quenquo yec ma mibi tabadnueshun.

²⁹Ëmbi chuiboed mibi bédamboen tantiamembique. Tantia. Nidaidën yuec tabadnu, quetiapimbo nuqui iquec. Nuquin Papa chieshënte ushë chonoc abi tantiaquid dadpen mëyansho isash Esuquidistu chote anoentsëqui yaneque. Abi yacno utsibo pudedtiapimbo icnushe queshun min chido icnubi Nuquin Papa bunacpadomboen nabanec

tabadta. ³⁰Adecbidi, unësquio yec shubiquimbi Nuquin Papa bunacpadomboen nabanec tabadta. Adecbidi, bédambo yequi Nuquin Papa bunacpadomboen nabanec tabadta. Adecbidi, mitsana icnubi aid tantienquio yec Nuquin Papa bunacpadomboen nabanec tabadta. ³¹Yuecshun ëmbi nidaidëshun bedaid Nuquin Papan ëmendac, quequin tantiaquin ambi chiacpadomboen nabanec tabadta.

³²Natiequid nibëdpashun, qeshumbic natiamantequid iquendac, quequin tantiembi. Aden tantiaquin chido inesa icta caombi. Chido inesa Esuquidistu tantiaquid icquin Nuquin Papan tantiacpadenuidi nanu qeshun aden nabanec tabadpec. ³³Chido inquidien, Nuquin Papan tantiacpadenuidi nanu quiash, ðmitsipadentsimbi con chidobëdta con bacuëbo bédambo iquebi camepeba? quec tabadec. ³⁴Adquid Nuquin Papan tantiacpadenuidi nanu quetiapimbo iquec. Dadan inacmaidien Esuquidistu tantiaquid Nuquin Papan tantiacpadenuidi nanu quec adequi tabadpec. Dadan inaidien, Naden nashunacsho con bënënen bédamboen istsiashi, quec tabadec. ³⁵Aden mibi chuibanquimbi chido inesa chido bednu qesho, Chën, caisa nebi. Nuquin Papan chiacpadomboen nabamboedëmbi utsi uain tantianushe qeshun ëmbi tantiaid chuibanec nebi. Nuquin Papan tantiacpadomboen bédamboen tabadmenuequin aden tantiaquin chuibanec nebi.

³⁶Adembidi, Min champi bednu queboed chudte bunec mëmuntiapimbo icsho isun, Inec cho, cata. Min champi imec icsatiapimbo mibi iquec. Adecbidi, dadan inacmaid macho budsho isash, Bacuë tishtiapimbo yantsiash, quiash,

Con champi inec cho, quiash icsatiapimbo adquid icoaic. ³⁷Adecbidi, min champi inu queboedi, Bedenquio iquembi, qesho tantiasun menenda. Aden bedmenquio yec mibi bédambo icpec. ³⁸Con champi bedec cho, qeshun bedmiash, Bédambo iquebi, quenubi, Con champi dadan inacmaid iquec quec bédamboshë utsi icpec.

³⁹Dadan inaid icquin min bënë nianenda. Min bënë nësan utsin inaid icnu quiash adta. Esuquidistu tantiesan inaid iquenda. ⁴⁰Bënu utsin inacmaid icnu quiash bédamboshë iquec aid. Ëmbi tantiacpaden ëmbi chuiboed Nuquin Papan Mayanën tantiamiacpaden chiaid nec.

Nuquin Papan uaidbimboecnuc nacnenaid tantiaquin pambid dasanaid

8 ¹Nëbi Nuquin Papan uaidbimboecnuc nacnenaid tantiaquin pambid dasanaid chuinun naden chiembique. Tantiata. ðMatsesën nacnenaidta nuqui tantiaid ictic? Padenquio. Aden tantiaquin ëmbi tantiacpadpenquio icquid utsibo nec quequin mamëshumpec. Aden tantiaquin mamëshunquins utsi tantienquio iquec. Utsien, Naden nabanquindambi utsibo bédamboen tabadmepeba, quequin tantiaquidquio nec. ²Ëmbibi tantiembi quequid tantiabnabictsëcquid nec. ³Nuquin Papa tantiaquidien Nuquin Papan tantiaidquio nendac.

⁴Aden chuishun ðNuquin Papan uaidbimboecnuc matsesën nacnenaid tantiaquin pambid dasanaidtambi pepe? quequin mimbi chuiquin dada uaboed isun chuinu. Tantiata. Nuquin Papan uaidbimboecnuc matsesën nacnenaid nanac uec. Aden nanac uequid Nuquin Papa ictiapimbo iquec. Nuquin Papapadquid utsi nibëdqieuc. ⁵Nidaidën

samèdquid papa cain utsin cuènaid dadpen iquec. Adembidi abuc samèdquid Papa cain utsin cuènaid dadpen iquec. ⁶Papa cain nuquin cuènaidien Abia Yampidquio nec. Adquid utsi Nuquin Papa cainquio nuqui iquec. Aidi abitedimbo uabampampidquio nec. Aidquio tantiec nuqui tabadec. Adembidi Nuquin Icbo cain cuènaidquio Esuquidistu nec. Aidèmbi aton Papabèdtan abitedimbo uabampampid nec. Aidi cuesten dectanac abided cuidadac nuqui cuidtiadquid icnubi Nuquin Papan cuèmbanaido yec ambi tantiaido nuqui nec.

⁷Adembidi aid abentsèqui nuqui tantiaidquio icnubi Nuquin Papan uaidbimboecnuc matsesèn nacnenaid utsibon tantiaid iquec. Aden nacnenaid tantiaquin pambid dasanaid aidon pepec. Aden peboedèmbi Esuquidistu tantiaquid yanshun nacnenaid tantiaquin pambid dasanaid èmbi pesho isun, Icsaosh, Nuquin Papan canushe, qeshun adquid petiapimbo yanebi. ⁸Nuqui piaid Nuquin Papa tantiamianesa nec. Ad icnuc Nuquin Papan uaidbimboecnuc matsesèn nacnenaid tantiaquin pambid dasanaid penquiocsho isash, Aid bèdambocquid nec, quenquio Nuquin Papa iquec. Adecbidi, nacnenaid tantiaquidèn dasanaid pesho isash, Aid bèdambocquid nec, quenquio icoaic Nuquin Papa.

⁹Padnuen Nuquin Papan uaidbimboecnuc matsesèn nacnenaid tantiaquin pambid dasanaid èmbi bedshun pesho isash, Esuquidistu comapenen tantiaquidèn tantiaid nacnenaid nec, Esuquidistu tantiabenabictsècquid quenushe qeshun padenquio iquembi. ¹⁰Aid pesho isash, Nacnenaid papa cain

cuènaid nepec, qeshun, Aid tantiaquin èmbitsen pambid dasanaid penu, quetsiash Esuquidistu tantiabenabictsècquid. ¹¹Padnuen èmbi piaid Nuquin Papa tantiamianesa nec quequin mimbi tantiec. Aden tantiaquin nacnenaid tantiaquin pambid dasanaid mimbi pec. Aden tantiaquin mimbi penubi Esuquidistu tantiabenabictsècquidèn Nuquin Papa tantiamiantequid nacnenaid tantiaquin pambid dasanaid nec, quequin pec. Esuquidistu comapenen tantiaquid mibi icquimbi nacnenaid tantiaquidèn dasanaid èbi icsainquio ictequid nec quequin pequin Esuquidistu tantiabenabictsècquido mimbi icsameyoc. Mimbi icsamiaido tantiec Esuquidistu unèspane dash. ¹²Ad icnuc Esuquidistu tantiabenabictsècquid mimbi icsamequin Nuquin Icbon chiacpadomboen niacquid mibi neyoc. ¹³Padnuen Esuquidistu tantiaquid utsibon icsamboen tantiaquin penushe qeshun padpiden penquio iquembi ma icsainquio icpanu qeshun.

Esuquidistu tantiaquidon natequid

9 ¹Esuquidistu chuibeneta cacmaid Pabado nec quequidotsen chuinu. Tanta. ¿Matsesèn nata caidtabi nedi? Padenquio. Esuquidistun èbi chuibeneta caid nebi. ¿Adquidida nepeba quecta mibi icpe? ¿Nuquin Icbon chiacpadomboen èmbi chuibanac mibitedi abi tantiaquido yanenquioda ictionda? ²Ai, èmbi Esuquidistu chuibanac Esuquidistu tantiaquid mibitedi yanondac. Utsi-utsiec yacnocquid èmbi chuibanacmaid icnubi, Èmbi chuibanaido mibitedi nec, quequin tantiembi. Èmbi chuibanac Esuquidistu tantiaquid mibitedi yanshun, Esuquidistun èbi chuibeneta caidquio nebi, quequin Pabadon chiaid

abimbo iquec, quequin bēdamboen tantiaquidquio mibi nepec tantesa uainquiocquin.

³Aden ěmbi Esuquidistu chuibanac abi tantiaquid mibitedi icquimbi utsin-utsinquien ěbi icsamboen chieci. Naden ěbi chieque. Tantia. Pabadon Bednabebēdtan chuibansho pemenuioctiad, quequin chieci. Aden chieci onquequid ěmbibi tantiaquin naden aido chiembique. Tantia.

⁴ĚSesuquidistu chuibanec bundoenquiodabi icpe? ⁵Adembidi, Esuquidistu chuibanec utsibo aton chido Esuquidistu tantiaquid buanec capucuenesho isash, Bēdambo iquec, mibi quec. Adembidi utsibon aton chido buanubi Petedon aton chido buansho isash bēdambo iquec quiashic Esuquidistu chuibanec ěbēd capuquimbi Bednaben aton chido buansho isash, Icsambo iquec, quec mibi. ĚSesuquidistu chuibanec ěbēd capuequi aton chido buante bunenquioda Bednabe icpadic? ⁶Adembidi, ĚMibi pemembique. Penuequin nabanenda, capenda Esuquidistu chuibenequid utsibo mimbi ique? Bednabebēdta ěbi chieci, ĚPenun daēdshun shubumpi nacnentiad, quepecta mibi ique?

⁷Ad yenquio utsibo iqueque. Tantia. Chuinu. ĚSondado icquina aton na buanshun pepec? Padenquio. Abi nashunquidombien pemeshun acmec. ĚIcbo abi nashunquid aton tiedēn caniquid pemesada nepadic? Padenquio. Pemeshumbien acmepaid. ĚBaca shuma chinshun icbon aquenquioda icpadic? Acquimbien icbon icquid. ⁸ĚAden chuiquin ěmbibi tantiaidatambi chuipo? Padenquio. Nuquin Papan Moises dada uamiampid ěmbi chiaid nec. ⁹Nad iqueque. Tantia. Chuinu: “Min tiedēn caniquid ěshē chicneshun min baca tsuc-tsucmequin dēpuquenda ma penu,”

quequin Nuquin Papan chiaidquio nec. ĚBacanuidi ma penu quequin Nuquin Papan chiaidta nepadic? Padenquio.

¹⁰Matsesbēdtambi ma penu quequin Nuquin Papan chiaidquio nec. Adembidi ambi piaid tantiaquin nabanquido icbo nec. Penuequin tiedēn caniquid icbon taneshcaic. Adembidi, penuequin ěshēacsho bedquid icbo nec.

¹¹Adembidi, ĚNuquin Papan chiaid mibi paquiacquid yec pete bec cho quenquiotiadquidtabi nedi? ¹²Mibi chuibanquid utsibo menebanquimbi ěbia mibi chuiquidquio icsho menetiadquidi menianenquio mibi icpoc. Aden ěbi menenquio yaqui ěmbi chiaid tantienquio icnushe quiash, Bec cho, quetiapimbo iquebi mibi caic. Aden chuibanec bundoqueic capucuenec nebi. ¹³Nuquin Papa tabadte shubu uashunaid yacnoshon nashunquidēn ashunquio peshun aquec. Adembidi ashunquio nashunquid utsibon matsesēn Nuquin Papa menenun bēaid tauishun pambid tēshē bedshun peshun aquec. ĚAden peshun acpec, quequin tantienquioda mimbi icpe? ¹⁴Adomboembidi Esuquidistu chuibansho abi tantiaquidon yuedec, quequin Nuquin Papan chiaid nec.

¹⁵Ěbi yuedtiadquidi nec, quequin tantiequi Ěadabi pemenu yuedpec? quesā nebi. Adembidi, Ěmbi dada uaid buamiacsho isun ěbi yuedtsiash, quequin dada uainquio iccombī. Bunquieci unēsbudeci mibi caic, Bec cho, quenquio iquendabi. ¹⁶Ěbibi Esuquidistu chuibenenu quenquioccobi. Ambi ěbi chuibeneta cac Esuquidistu chuibenec nebi. Abi chiesā yanash unēsquio ictsiabi. ¹⁷Ěmbibi, Esuquidistu chuibenu, quiash, Bec cho, quetsiandabi. Esuquidistun ěbi chuibeneta caid yec ambi namiaidquio nebi. ¹⁸Esuquidistu chuidenesho isash,

zatotsi Pabadon bedpash, quepecta mibi ique? Naden Esuquidistu chuibenec nebique. Tantia. Bec cho, quenquiocquin Esuquidistu chuibenec nebi. Aden Esus chuibanac abi tantiaquid yansho isash bēdambo iquebi.

¹⁹Bec cho, quesa yec utsin yuacmaid nebi. Adquid yequi utsibo chuinec nidane shubu utsin puduedcuenequin aidon namiaidbimboecquin aibēd tabadquin chuibanec nebi. Adec tabadquin ěmbi chiac ma aidotsen Esuquidistu tantiaquido yampanuna. ²⁰Adecbidi, isadaidbo Esuquidistu chuibanec aidobēd tabadquin mimbi natemaid ěmbi natemaidpenquo nec, quenquiocquin ambi natemaid nainquo iquemi. Adquiec tabadquin ěmbi chuibanac ma isadaidbotsen Esuquidistu tantiaquido yampanuna. ²¹Adecbidi, isadaidpembo chuibanec aido tabadacpadece abēdi tabadquin Esuquidistun chiacpadece niaquenquo yec tabadec nebi. Ěmbi adoac isadaidpembotsen ma Esuquidistu tantiaquido yampanuna. ²²Adecbidi, Esuquidistu tantiabenabictšēcquido chuibanec ěmbi tantiabenabi iccondacpaden bēyuc tauain chiaidquo tantiamenuen chuibanec nebi. Ěmbi adoac ma aidotsen Esuquidistu tantiabenquidquo yampanuna. Adequi tabadquin Esuquidistu chuibanec nebi. Ěmbi adoac utsibo ma Esuquidistu tantiaquidquo yampanuna. ²³Adec tabadequi ma ěmbi Esuquidistu chuibeniace Esuquidistu tantiaquido yanash Nuquin Papa yacno nuquitedi tabadendac.

²⁴Titinquecuededquido icnuc bēyuc abia titinquec choquid iquendac. Adquid icsho isun, Mibi badedquo titinquioc, quequin titinqueta quequidēn titinquec abia choquid

menendac. Adembidi, Nuquin Papan menete bēda iquec. Aid bednu, qeshun Icbon chiacpadomboen nabanta, caimbi mibi. ²⁵Badedquo titinquenuequid bedte bunaid chodquettequid icnuc, Aid bednu, qeshun abi bēdiactšēc titincamete pete icsa actequid icsabēda isuidec titinquenuequid iquec. Nuquien chodquetemaid bednuequin icsaid isuidec. ²⁶Utsien, Bednu, quenquo yec titinquiec. Adembidi, Bednu, quenquo yec utsibēd mēdanten senanu quequin nibēdacnoshombi mēdanten seded-sededec. Aden tantiaquin naisa nebi. ²⁷Utsibon ma tantianu qeshun Esuquidistu chuibeniash unēsacsho Nuquin Papan menete bēda bedtiapimbo icmane quiash icsaid mēmunc tsadebi.

Isadaidbon chieshampicpadece tabadenda quiaid

10 ^{1,2}Abi yacno abi tantiesa chosho puduedmenquo icchitoshe quiash Nuquin Papan chiaid chieshēnenquo yec bēdamboec tabad, quequin tantiamenuen, Nadec nuquin tsusedpabo tabadpampic, quequin chiembique. Tantiata. Equipito yacnoshon ambi mēnchicaidobēd Moises puduanec Nuquin Papan bēyucamiaid abu ushu tēdion nidanequin tsusedpabon Acte Piu potepampic. ³Adec nidaniash yuecash aitedi comapenec bundoacsho Nuquin Papan nadatiambocquin abucshun nebudaid tsusedpatedishun pebededpampic. ⁴Adembidi acte bundoacsho isun cuēnote cuesquin acte chomiaid acash, Ěbi bēdambo icmequin Nuquin Papan ambi yuecshun chometequid Quidistubēdan nadatiambocquin naid nec, quequin tsusedpabon utsin-utsinquien tantiabempampic. ⁵Aden tantiabenubien abēd icquid utsibon padenquo icpampic. Aden tantiesa Nuquin Papan nidaid Canan

caid menenu caid yacno niduidequi unësbudnepampic adquidtedi.

⁶Tsusedpabo chieshampicpadquid icnushe qeshun Nuquin Papan aido chuiquin dada uamepampic. ⁷Ad icnuc tsusedpabon Nuquin Papan uaidbimboecnuc nacenashun papa cain tantiampicpaden tantienda. Naden Nuquin Papan aido chuipampic. Bacabimboecnuc ambi nacenaid tantiaquin peshun acash baidacuededpampicpaden tantiaquin nainda. ⁸Adembidi, tsusedpa utsibon ambi chudtemaid chudampicpaden chudenda. Aden nasho abi ushëmbi tsusedpabo dadpen 23,000ted Nuquin Papan cuesunemepampic. ⁹Adecbidi, ¿Ambi chiaid niacshodabi Nuquin Papan cuidpeba? quiampicpadec adenda. Aden tantiaquido nisin pebededac unësbudnepampic. ¹⁰Adecbidi, Equipito yacnoshon mënchicaido abi mënchicquid chieshec nadpampic. Equipito yacno iquec bëdambo iccondaiddi nëmbo choash bunec capuebi. Anobidi tabadec nidebi, queded-quededsho ambi abi yacnoshon uaid mayan bëdabo Nuquin Papan budmiaidën aidtedi cuesunepampic.

¹¹Abi tsibanquido tantiamenuquin tsusedpabo tabadnëdaid icsa Nuquin Papan chuiquin dada uamepampid ëmbi chuiboed nec. ¹²Tsusedpabo Nuquin Papa chieshë nec icsapampicpadec icsamane quequin mibi tabadte tantiata. ¹³Ënden tsusedpabo chieshëmete icpampid abi iquec. Aдай natiatequid icnuc chieshënushe qeshun Nuquin Papan mibi tantiaquin uidën uac mibi icsainquio yec chieshtoenquio yec dayacquio iquendac.

**Nuquin Ico Esuquidistu unësaid
tantiaquin acshumbic mayan icsa
tantiaquin mimbi actiapimbo
iquec quiaid**

¹⁴Nuquin Papan chiaid niacmane quiaish, Nuquin Papan uaidbimboecnuc

matsesën nacenaid tantianu, quenda. Dacuëdec cuenac bimboec aid nanacno nidenda. ¹⁵Tantiabenquid icsho mibi chiec nebi. Pabadon chiaid abimbo iquec quequin tantiec aid nanacno nidenquio yec Esuquidistu chuibansho tantiec iccuededteneta. ¹⁶¿Iccuededquin sicaid acnun Nuquin Papa chiec onqeshun acted-actedquin matses icsaquid icsho cuidnushe quiaish abided cuidadec Esuquidistu intac chididiquiaid tantien icquinda nuqui acti? ¿Adembidi, pete cuësh-cuëshun Nuquin Papa chiec onqeshun aton dada mëyanaid tantien icquinda nuqui pedi? ¹⁷Esuquidistubëd abentsëc yac bimboecquido nebi, quequin tantiaquin pete cuësh-cuëshun meniac abentsëcshun piac bimboen abi tantiec iccuededquidon pebededec.

¹⁸Aden nuqui pebededac bimboen isadaidbo icsaid cuidnuen nidaidën capuquididd cuesuniaid pambid tauiquin Nuquin Papan shëdtequid pambid bedshun cuesunequidbëdtan nidaidën capuquid icbon pepanëdash. ¹⁹Aden ëmbi chiac ¿atotsi Pabado ëbi tantiamete bumpec, quepecta mibi ique? Mibi naden tantiamembique. Tanta. ¿Nuquin Papan uaidbimboecnuc matsesën nacenaid tibopecta iquec? Padenquio. ²⁰Adec adquid tiboquesa icnuc mayan icsa tantiaquin Esuquidistu tantiesan Nuquin Papan uaidbimboecnuc matsesën nacenaid yacnoshon pambid dasanec. Aden aid pambid penu, qeshun mayan icsabëd yac bimboecquid nebi, quequin pec. Adquidbëdtan penda. ²¹Nuquin Ico Esuquidistu unësaid tantiaquin acshun mayan icsa tantiaquin actiapimbo mibi iquec. Adembidi, Esuquidistu unësaid tantiaquin pete peshun mayan icsa tantiaquin pambid petiapimbo iquec. ²²¿Aid tantiaquin acshun pequin

Nuquin Papa nëishmenquioda mimbi icti? Ai, abitedi tantiaquidquio icquin abitedi isquidquio icquin Nuquin Papan mibi cuidendac.

**Ëmbi natemaïd naden nata caïd nibëdec,
quiash nanueboedi Esuquidistu
tantiaquid utsi icsamemane quiash
nainquiocte chiaïd**

²³Nëïd mishtemaïd nec. Nëïd petemaïd nec. Nëïd actemaïd nec, quequin ëmbi chuitequid nibëdec, quiash Esuquidistu tantiaquid utsi icsamemane quiash nainquio yec tsadebi. Matsesën ambi nacnenaïd tantiaquin pambid dasanaïd ëmbi tantiacmaïd nec, quiash pambid dasanaïd petiadquio iquequi Esuquidistu tantiabenabictsëcquidën, Nëïd nacnenaïd nuquin papa caïd nec, quequin penushe quiash penquio yec tsadebi. ²⁴Utsi tantienquiocquin nacnenaïd pambid dasanaïd piash bëdambo iquebi, quenda. Naden natiaïd. Matsesën nacnenaïd pambid dasanaïd ëmbi pesho isun utsibon icsamboen tantiatsiash, quequin penda.

²⁵Aton na sambededacno nidshun pambid bednuequin, ¿Nuquin Papan uaidbimboecnuc matsesën nacnenaïd pambid dasanaïd bedaidta nec? quenquiocquin bedta. ²⁶Abu nidaïdbëdta uashun aïdënquio icquidtedi Nuquin Papan uampidquio nec. Aidtedimbo aton na nec. Nacnenaïd yacnoshon pambid sambededaid aton na nec. Aïdën bacuëbo iquec aid pambid pequido mibi nec. ²⁷Aden tantiec Esuquidistu tantiesan, Pec cho, cac, Ai, quianec nidec puduedshun, Mimbi codocaid matsesën nacnenaïd tantiaquin pambid dasanaïd bedaidta nec, quenda. ²⁸Adnubien mibi puduedacno isedquid utsi Esuquidistu tantiabenabictsëcquid

tsadquin, Matsesën nacnenaïd papa cain cuënaïd tantiaquin dasanaïd nëïd pambid nec, cac aid pambid penda.

²⁹Ëmbi papa cain cuënaïd nec, quequin utsin tantianushe qeshun aid pambid penda. Matsesën nacnenaïd con pa nec, quequin cuënaïd tantiesa icquin ¿atotsieshumbimbi matsesën nacnenaïd tantiaquin pambid dasanaïd penquio iqueque? Chuinu. Tanta. ³⁰Nuquin Papa ëmbi tantiaïdquio icnuc penun aïdi chuïsho isash ¿atotsieshun matsesën nacnenaïd papa cain tantiaquin pepec utsibo quepec?

³¹Edoen utsibo tantiamenuen bëdamboen nabanec tabadteneta.

³²Aden naic, Esuquidistu tantiaquid isadaïdbo isadaïdpembobëdta Esuquidistu bëdamboen tantiabemequiono, quec bëdamboec tabadta. ³³Naden naic ëbibi bëdambo iquebi, quenda. Naden ëmbi nabanuc ëbëdi utsi bëdambo ictsiash, quequin tantiata ma Nuquin Papa yacno puduedtequid utsibo yanu qeshun.

11 ¹Ambia tantiaquidën Esuquidistun icmiacpadquiec tabadec nebi. Adecbidi ëmbi chuiquin ismiacpadquiec tabadteneta mibitedi.

**Nuquin Papa tantiaquin
iccuededquin naïd**

²Mimbia tantianëdaïdquio mibi nec, quequin mimbi chiaïd tantiaquin nabanec nebi, quequin mimbi dada uashun bëmiaïd isash bëdambo iquebi. Adembidi, Esuquidistu tantiabenëdaïdon chuïbanaïd mimbi chiacpadomboen tabadec, quequin mimbi dada uaid bëmiaïdon chuïbansho tantiash bëdambo iquebi.

³Mimbi natequid utsi chuinu. Tantiata. Abi tantiaquid chuiquid Esuquidistu nec. Adembidi chido chuiquid dada nec. Adembidi

Esuquidistu chuiquid aton Papa, Nuquin Papa caid, Edoen nec. ⁴Adquid Nuquin Papa nec, quequin, Aid chuinu, qeshun aton mauete chicquid dadan. Aid chuinen mauet tabadquin, Ēbi chuiquidpenquo Esuquidistu nec, quiacbimboen ismequid nec. Adembidi Nuquin Papan chiaid tantiamequin chuibanquidēn aton mauete chiquec. ⁵Chidoen, Ēbi chuiquid Esus nec, quequin ismec mapucudash tsadec. Adec mapucudenquo yec tsadquin Esuquidistu tantiaquido iccuededacnoshon Nuquin Papa chienda chidon. Adembidi anoshon Nuquin Papan chiaid chuibanenquo ictiad. ⁶Ēbi chuiquid nibēdec, quiacbimboec tabadsho matasmetiad. Matasmiash ma mapucudpanu chido. ⁷Nuquin Papa aton madobēd onquec: Nuquibimboecnuc matses uanuna, quiampicpaden dadaba uapampic. Nuquin Papabimboec icquid nebi, quiash tsadquid dada. Ēbi chuiquid Abia Yampid nec, quequin ismenuec aid chiech onquec mauete mauesa dada nec. ^{8,9}Dadaba Nuquin Papan uapampic. Dadabēd icquid uanuna qeshun dadan shictodo chicshun chido uashun, Mibēd nashunanquid nec, quequin dada menepampic. ¹⁰Adquid icmiac dada ēbi chuiquid nec, quequin nashunec chidon. Adsho isash Nuquin Icbon abi yacnoshon uaido, mayan bēdabo abi chuiquid chieshēnenquo yec Icbon chiacpadquiec tabadec. ¹¹Nēid chido nec. Nēid utsi dada nec, quenubi nashunanquid abi daēdi nec. ¹²Dadan shictodo chicshun chido uapampic. Adecbidi chidon tishaid dada nec. Ambi tantiampicpaden Nuquin Papan naidtedi nec. ¹³¿Nuquin Papa chuinuec ēbi chuiquid nibēdeque. Matasadnu quiash chido bēdamboda icpadic? ¹⁴Chido isadacpadec isadnu quec icsambo dada

ictsiash. ¹⁵Chido isadacpadec dada icsho isash, Chido nec, quetsiash. Dada isadacpadec chido isadenquo iquec.

¹⁶Ēmbi chuiboed tantiash, Icsamboen chiosh, quetsiash. Adquid naden chuinu. Tantia. ¿Ēmbentsēquidambi aden chie? Padenquo. Ēbipadquiocquin chuibenequidon adomboembidi chuibanec. Adembidi Esuquidistu tantiec iccuededquid utsibon tantiabededec.

**Nuquin Icho unēsash uincuenaid
tantiaded-tantiadedta quiaid**

¹⁷Adecbidi, Mimbi naidtedi bēdambo iquec, quetiapimbo iquebi. Adquid chuinu. Tantiata. Esuquidistu tantiabenquid utsibo icmenu, quenquo yec mibi iccuededec.

¹⁸Abentsēc yacbimboec iccuededesa Esuquidistu tantiaquido Codinto yacnocquido nec, quiosh. Adsho tantiash, Abimbo capec, quiobi. ¹⁹Nēidtedi ěmbi bēdamboen isaído nec. Utsitedi ěmbi icsamboen isaído nec, quiash cuēshēdabimboec mibi tabadcuededec. ¿Adec tabadshoda Nuquin Papan mibi bēdamboen ispec? Padenquo. ²⁰Adec tabadquin Esuquidistu unēste tantienquiocquin utsin-utsinquien peshun acted-actedec. ²¹Utsibo cainenquiocquin abia choquidon nua pebededec. Adoac utsibo choash bunec tabadnubi abia choquido paēmbocquid nua acash tantienquo yec tabadec. ²²¿Min nuntan pete nibēdpecta iquec? Mitsana iquec. Adec mitsana min shubuno icnuc ¿Esuquidistu unēste tantiec utsibobēd iccuedednu, quenquocquinda mibia choshon pebededpe? ¿Natiavianquiech pete nibēdchitec pete nibēdquid camenuenda mibia pebedede? Aden pebededquido ¿atotsimbi chuipe? ¿Bēdamboen mimbi nabanec quepectabi ique? Padenquo. Aden naquin Esuquidistu unēsaid tantienquiocquin mimbi pec.

²³Nuquin Icbon chiacpadomboen mibitedi chuibanondambique. Tantiata. Chuinu. Nēid inchēshēmbi ēbi chieshēnquido ēbēd icquidēn ēbi bedmendac, quequin Esuquidistun abi unēste tantiaquin nadopanēdash. Pete bedshun ²⁴Nuquin Papa chuishun cuēsh-cuēshun naden abēd icquido chuipanēdash: “Pete cuēshaid bedash matses icsaquid icsho cuidnushe quiash ēbided cuidadec unēste tantiaquin pebededta,” quepanēdash Esuquidistu. ²⁵Aden chuishumbic aid pebededsho isun pete utsi pebededquin nainshun adembidi dēshote bedshun sananquin naden Esuquidistun chuipanēdash: “Esuquidistu unēsquin ēbi chian anēdēnquiagno nēsecatequid icsho mēnchictequid Esuquidistu iquec, quequin tantiaquin sicaid acbededta. Sicaid acquin ēbi mēnchictequid iquec quequin tantiaquin acban.” ²⁶Aden Esuquidistun ismenēdacadomboen pete cuēshēmpi pebededshumbic sicaid acbededta. Nuquin Icho unēsaid tantiaded-tantiadedquin aid padpidec choabicnuc adobanta. ²⁷Abi unēste tantienquiocquin pete cuēshun peshun acquin Esuquidistun chiaid niacquid nec. ²⁸¿Pete cuēshēmpi penun Esuquidistubēd tabadacpadquiectabi tabadpe? quequin mibi utsi bēd tabadte tantiata. ²⁹Esuquidistu unēsaid tantienquiocquin peshun acquid Nuquin Papan cuidendac. ³⁰Aden adquidon peshun acac utsi-utsec padishec; utsi-utiec daicsambo yanec; utsi dadpen ēnden unēsac. ³¹¿Adabi Nuquin Papan chiaid niaquenquio yec tsadpe? quequin tantiec tsad. Aden tantiec tsadshumbic, Icsaobi, Papa, qeshun mibi icsaid chuiban. Aden chuishun Esuquidistu unēsaid tantiaquin pete peshun sicaid acta. Aden mibi icsaid chuishun pesho isun Nuquin Papan mibi natiaic

camenquio iquendac. ³²Adesa icsho Nuquin Papan natiaic camiaid mibi iquendac. Abi tantiesabēdta chian anēdēnquequid nēsecadenquio mibi icmenuen Nuquin Papan mibi natiaic camec ma ēmbi chiacpadomboen nabamenuequin. ³³Adembidi Esuquidistu unēsaid tantianuec iccuededquin utsibo choabi iquec quequin aido cainta. ³⁴Bundoshon min nuntanshun pe. Aden pesho isash, Icsamboen naique. Cuidnu, quetiapimbo Nuquin Papa iquec.

Padi. Esuquidistu unēsaid tantianuequin naden nata quequin chiombi. Mibi yacno nidash puduedshun ēmbi chuiboed daēd uain chiendambi.

Nuquin Papan Mayanēn tantiamiaid

12 ¹Nuquin Papan Mayanēn tantiametequid chuinu. Tantiata. ²Ēnden mibitedi Esuquidistu tantiesa yec Nuquin Papan uaidbimboecnuc ambi nacnenaid matsesēn ismec, Nēid papa cain cuēnaid nec, qesho tantiaquido mibitedi iccondac. ³Adquid iccondaidi Esuquidistu tantiaquid mibi yanacsho naden chiembique. Tantiā. Nuquin Papan Mayanēn tantiamiaido: Esus Nuquin Icbopenquio, Nuquin Papan Chomiacmaid nec, quetiapimbo adquido iquec. Adecbidi, Nuquin Papan Mayanēn tantiamiacmaido: Esuquidistu con Icho nec, quetiapimbo icoaic. ⁴Nuquin Papan Mayanēn, Naden nata, quequin tantiametequid Esuquidistu tantiaquido iquec. Adeccambi tantiametequid dadpen icnubi aid abentsēcquiobi tantiamianquid Nuquin Papan Mayan nec. ⁵Adecbidi, utsi nashunquido Esuquidistu tantiaquido icnubi utsi nashunquidon Icho abentsēcquiobi Esuquidistu nec.

⁶Adecbidi, nadatiambocquin nabanquid utsi-utsiec icnubi Nadatiambocquin namianequid abentsëcquiobi Nuquin Papa iquec.

⁷Esuquidistu tantiaquid utsibëd tantiananquin namenu, quequin aton Mayan Nuquin Papan nuqui menec. ⁸Nuquin Papan Mayanën tantiamiac ambia comapenen tantiaquidquico icquin chuibanquid utsi-utsiec iquec. Nuquin Papan Mayanën tantiamiac ambi tantiaid chuibanquid utsi-utsiec iquec. ⁹Nuquin Papan Mayanën tantiamiacpaden ëmbi chiacpadomboen Nuquin Papan naic, quequin tantiaquid utsi-utsiec iquec. Nuquin Papan Mayanën tantiamiac bédamequid utsi-utsiec iquec. ¹⁰Nuquin Papan Mayanën tantiamiac nadatiambocquin nabanquid utsi-utsiec iquec. Nuquin Papan Mayanën tantiamiac Nuquin Papan nanun chuiampid tantiaquin chuibanquid utsi-utsiec iquec. Nuquin Papan Mayanën tantiamiac matses bédamboec tabadsho isash, Nuquin Papan Mayanën tantiamiaid nec, quequin tantiaquidquico utsi-utsiec iquec. Adembidi, utsi icsamboec tabadsho isun, Mayan icsan namiaid nec, quequin tantiaoaic. Nuquin Papan Mayanën tantiamiac nidaidën icquid onquiacmaidën onquequid utsi-utsiec iquec. Adembidi Nuquin Papan Mayanën tantiamiac nidaidën icquid onquiacmaidën onquesho tantiaquidën tantienquiocsho isun aidon onqueten chuibanquid utsi-utsiec iquec. ¹¹Aden Nuquin Papan Mayanën tantiamiac nabanquido nuquitedi nec. Ambi tantiacpaden abentse-abentsen Nuquin Papan Mayanën aden tantiamiec.

Dada abentsëc yacpadquiec Esuquidistu tantiaquidtedi iquec

¹²Uidënaid dadpen icnubi matsesën dada abentsëc iquec. Adquibidi

Esuquidistu tantiaquid dadpen icnubi ambi tantiaid abentsëcquiobi Esuquidistu iquec. ¹³Ad icnuc isadaidbo yec isadaidpembo yec utsin yuaid yec utsin yuacmaid yec quec Esuquidistu tantiaquid iquec abi tantiaquido nuquitedi iquec. Adquid nuqui icsho Nuquin Papan aton Mayan meniaido nuqui nec.

¹⁴Matsesën dada abentsëqui icnubi uidënaid dadpen iquec. ¹⁵¿Médantepadquidpenquico yec matsesën dada uidënacmaidta taë icpec? Padenquico. Dada uidënaid taë iquec. ¹⁶Adecbidi, ¿ëshëpadquidpenquico yec matsesën dada dëccuësquiacmaidta dëbiate icpec? Padenquico. Dëbiate dëccuësquequid iquec. ¹⁷Matsesën dada ëshëuidpambo icquin ¿atontsin tantiapatsiash? Adecbidi, aton dada pabiateuidpambo icquin ¿atontsin shëdpatsiash? ¹⁸Nuquin Papan tantiampicpadquiequi matsesën dada uidënaid nec. ¹⁹Dëccuësquequid abentsëc icnuc dada nec quetiapimbo iquec. ²⁰Uidënaid dadpembëd dëccuësquequid dadpen icnuc matsesën nami abentsëqui iquec.

²¹Matsesën dada ad icnuc, ¿Médante bédambo icnubi ëshë padenquico iquec, quepecta mibi ique? Padenquico. ²²¿Isadesa uidënaid uquëducquid nibëdnuc matsesën dada bédamboda icpatsiash? ²³Uidënaid uquëducquid ismenquiocquin ompoaidquico utsi nec. ²⁴Nami isaidquico ompodesa nec. Nuquin Papan tantiampicpadquiequi ompoaid nibëdnuc matses cuëdenquico yec unësec. ²⁵Ad icnuc, Icsambo icmianeque. Tësnu, quetiapimbo icbo iquec. Ompoaid ompodesa aidbëdi iquec bédambo yec nashunanquid aidtedi nec. ²⁶Abentsëc paëmbo iquec matsesën dada bédambo iquenquico iquec. Adquidtedi bédambo iquec

matsesën dada abichobi paëpenquo iquec. Adecbidi, Esuquidistu tantiaquido abentsëc yac bimboec iquec abentsëc icsacsho isash abitedi unësquo iquec. Abentsëc, Bëdambo iquebi, quenuc aibdëd abitedi bëdambo iquec.

²⁷Adquidtedi matsesën dada abentsëc yacpadquiec Esuquidistu tantiaquidtedi aidën dada abentsëc yac bimboecquid nuqui nec. Abi tabadtequid iquec. ²⁸Abi tabadtequid nadquid iqueque. Chuinu. Tantia. Ambi chiacpaden ambi ëbi chuibeneta caidoba iquec. Nuquin Papan chuipampid comapenen tantiaquin chuibanquid utsi iquec. Esuquidistu tantiaquid icsho isun nadec tabad quequin chuibanquin ismequid utsi iquec. Nadatiambocquin nabanquid utsi iquec. Bëdamequid utsi iquec. Utsi nashumbanquid utsi iquec. Esuquidistu tantiaquid iccuededquido namequid utsi iquec. Abi onquiacmaidën onquequid utsi iquec. Adquidtedi nuqui iquec abentsëc yac bimboec nuqui tabadec. ²⁹¿Esuquidistu tantiaquidtedida ambi ëbi chuibeneta caid icpadic? Padenquo. ¿Esuquidistu tantiaquidtedida Nuquin Papan chiampid comapenen tantiaquin chuibanquid icpadic? Padenquo. ¿Esuquidistu tantiaquidtedida, Nadec tabad, quequin ismequid icpadic? Padenquo. ³⁰Adecbidi, ¿Esuquidistu tantiaquidtedida bëdamequid icpadic? Padenquo. ¿Esuquidistu tantiaquidtedida abi onquiacmaidën onquequid icpadic? Padenquo. ¿Utsi onquiacmaidën onquesho tantiaquidën tantienquicsho isun aidon onqueten onquequin chuibanquidtedida icpadic? Padenquo. ³¹Nuquin Papan Mayanën tantiamete utsi-utsiec icnuc, ¿Atotsibi icte bumpe? quequin tantiaquiota. Esuquidistu tantiaquid tantiabemenuequin ëmbi abia chuibambocpadquid icte bunquiota.

Utsi tantiaquidquo

Ëmbi chuiboedtedi Esuquidistu tantiaquido Nuquin Papan Mayanën tantiamete bëdambo iquec. Padnuen ambi tantiamequin bëdamboshë icmetequid iqueque. Aid tantiauidquidba chuiboshombic aid tantiaquidquo chuinu. Tantiata.

13 ¹Matses utsi-utsiecquid onquiacpadquiec anquiadquid, adecbidi Nuquin Papan abi yacnoshon uaid, mayan bëda onquiacpadquiec onquequid icquimbi utsi tantiesa icquin chuibansho abipenquo chuisho utsibon tantiendac. ²Utsibic, Nuquin Papan Mayanën tantiamiac chuibanquid adembidi Nuquin Papan chienquo icampid Nuquin Papan Mayanën tantiamiac tantiaquid aidi niosh. Aidëmbidi Nuquin Papa nadatiambocquin naquidquo nec, quequin tantiaquin, Mananuc macuësh dapa icboedi acte nantan nënitsinoac, Papa, cacpadomboen nënitsinoac nidquid isquid icquimbi utsi tantiesa icsho, Bëdambocquid mibi nec, Nuquin Papan catiapimbo iquec. ³Utsibic, aton na nibëdsho menequidquo niosh. Adembidi, Esuquidistu tantiesa nebi cata, cac padenquiocsho mëyanaid niosh. Adquid icquimbi utsi tantiesa icsho, Bëdamboen mimbi naoc, Nuquin Papan catiapimbo iquec. ⁴Padnuen Nuquin Papan Mayanën bëdamboshë ictequid tantiamiaid nadquid iqueque. Chuinu. Tantia. Utsi tantiaquidquo utsi tantiamequionec chushcanesa nec. Utsi tantiaquidquo nashundenequid nec. Utsi tantiaquidquo utsin na isash adquidquo con na bëpashun quesa nec. Utsi tantiaquidquo dëniacanquidquo yec dëniacanquidquo nebi abibi quesa nec. Utsi tantiaquidquo ëbentsëqui tantiaquidquo nebi quiacbimboen

nabanesa nec. ⁵Utsi tantiaquidquiu utsi icsamboen tantiaquin nabanesa nec. Utsi tantiaquidquiu, Ĕmbentsĕqui tantiacpadomboenuidi utsitedishun nabantiad, quesa nec. Utsi tantiaquidquiu badedquiu nĕishesa nec. Utsi tantiaquidquiu abi icsamboen nasho cuidesa nec. ⁶Utsi tantiaquidquiu utsi icsambocsho isash, Unĕsquio iquebi, quec tsadquid nec. Adecbidi, utsi bĕdamboesho isash, Bĕdambo iquebi quec tsadquid neoaic. ⁷Utsi tantiaquidquiu utsi icsaid chienquiu yec tabadquid nec. Utsi tantiaquidquiu ambi nanaid nibĕdsho isash ampiash badedquiu quenquiu yec ĩmitsimboembi nampoba? quec onquequid nec. Utsi tantiaquidĕnquiu utsi icsadenesho isun, Tantiamiac Nuquin Papan chiacpadomboen natsiash, quequin chuibanendac. Aden chuishun bĕdamboen nasho isnuen cainquid nec. Mĕyanaqui chieshenquiu yec dayacquio yec tabadtenequid utsi tantiaquidquiu nec.

⁸Utsi bĕdamboen tantiaid ĕnĕdtiapimboctequid nec. Nuquin Papan chiaid chuibantsaidien ĕnĕdendac. Adecbidi, matses onquiaidtedi ĕnĕdendac. Adecbidi Nuquin Papan ambi uaidtedi ĕmiac matsesĕn isquin tantiaid ĕnĕdoaic. ⁹Nabanaidtedi tantiabenabictsĕcquidquiu nuqui nec. Adecbidi Nuquin Papan chiampidtedi tantiabenabictsĕcquidquiu nuqui neoaic. ¹⁰Nidaidĕn tabadquin aidtedi tantiabenabictsĕcquidquiu nuqui icboedi Nuquin Papa yacno puduedash abitedi tantiaquidquiu nuqui iquendac. ¹¹Bacuĕ yec bacuĕmpi onquiacpadec onquepadenebi. Adembidi, bacuĕmpin tantiabenabi yacpaden tantiapadenembi. Adquid icquin caniaidĕn tantiacpadpenquiocquin

tantiapadenembi. Adquid icboedi caniaish bacuĕmpin tantiacpadpenquiocquin tantiabenondambi. ¹²Nĕbi isnanten bĕisadquin Nuquin Papabimboecquid nuqui isec. Yuecshun abi yacno puduedshun aidquio Edoen Nuquin Papa nuqui bĕistuidendac. Nĕbi Nuquin Papa isenquiocquimbi ambi chiaid tantiatsembi. Ambi tantiacpaden yuecshun bĕisquin nuqui tantiabenendac aid.

¹³Nidaid ĕnĕdnuc nĕidtedi ĕnĕdtemaid iqueque. Chuinu. Tania. Ambi chiacpaden nabanquidquiu Nuquin Papa nec, quequin tantiaid ĕnĕdtemaid nec. Adecbidi Nuquin Papa yacnoĕsh abipadquid bĕdamboctequidquiu iquendabi, quequin cainquin tantiaid ĕnĕdtemaidquiu nendac. Adecbidi, utsi tantiaid ĕnĕdtemaidquiu neoaindac. Aidtedi ĕnĕdtemaid icnuc nidaidĕn tabadquin, Utsi tantiembi, quequin ismiac utsi dadpen Esuquidistu tantiaquid yanash mibĕdi Nuquin Papa yacno tabadendac. Adquid bĕdamboeshĕcquid nec.

Mimbi chiaid chuibanquid ĕbi icme, Papa, quaid

14 ¹Utsi tantiaquid icta. Nuquin Papan Mayanĕn adquid icmioshi, quequin ambi tantiamete utsi bunquiebique. Adec bunsho mimbi chiaid comapenen bĕdamboen chuibanquid ĕbi icme, Papa, quequin chuiban. ²Aden tantiamiac tantiamenu qeshun tantianuequidĕn onqueten chuiban. Aton onqueten onquenquiocsho aidon tantienquiu iquec. Padnuen onquiaidtedimbo Nuquin Papan tantieque. Aden nidaidĕn icquid onquiacmaidĕnquiu Nuquin Papan Mayanĕn tantiamiacpadec onquequin Nuquin Papa chiec onqueta.

³Ma Esuquidistu utsibon tantiabenu, qeshun Nuquin Papan chiaid chuibanec. Adembidi matses ma bédamboec tabadnu qeshun chuibanec.

⁴Nuquin Papan Mayanèn tantiamiac nidaidèn icquid onquiacmaidèn onquequin onquequiduidtsëqui tantiabenquid yanec. Padnuen Nuquin Papan chiaid Nuquin Papan Mayanèn tantiamiac Esuquidistu tantiaquido ma Nuquin Papan chiaid tantiabenu qeshun chuibanec. ⁵Nuquin Papan Mayanèn tantiamiac nidaidèn icquid onquiacmaidèn Esuquidistu tantiaquidtedi onquepashun. Aden chuishumbic adec onquenquiocquin Nuquin Papan chiaid chuiban caimbi. Nuquin Papan chiaid comapenen tantiaquin chuibanac Nuquin Papan chiaid utsibon tantiabenendac. Padnuen nidaidèn icquid onquiacmaidèn chuibanac tantianuequidèn tantienquio iquendac. Aden tantienquiocsho isun abi daëdi onquiaid tantiaquin chuibanquid nibëdnuc nidaidèn icquid onquiacmaidèn chuibanenda caimbi.

⁶Adembidi chuinu. Utsibon tantia. ¿Mibi yacno choash puduedshun nidaidèn icquid onquiacpade onquenquiocquin ëmbi chuibansho tantienquio yec, Bédambo iquebi, quecta mibi tabadpe? Padenquio. Nuquin Papan chiaid dada uamiampid min onqueten ëmbi chuibansho mimbi tantiabampec. Min onqueten chuibanenquio yec ëbibi onquiacbimboecsho mimbi tantienquio ictsandac. ⁷Shoncatempi abibi shoncadiapimbo iquec. Adembidi, aid shoncaisan shoncasho tantiatiapimbo utsin iquec. Adembidi aid cuëdëmesan tentencate cuëdëmesho tantias, Adomboen cuëdëmenquio iccosh, quec. ⁸Adembidi, utsibo yacno ma cuesnanu qeshun chomenuequin sondadon

tantiabocpadpenquiocnoc shoncac choenquio iquec. ⁹Adecbidi, utsi onquiacmaidèn onquequin chuisho ¿mitsipaden tantiapatsiash? Utsibon tantienquio iquec. Aden chuibanec nibëdacno onquiacbimboec onquepec. ¹⁰Onquete utsi-utsiec dadpen iquec. Aton onqueten onquequin chuibansho matsesèn tantiec. ¹¹Utsin onqueten chiac tantiatiapimbo yec, Onquequin chuibanquid con matsespenquio nec, quequin tantiec. ¹²Ad icnuc, Nuquin Papan Mayanèn ëbi tantiameppec, qeshun, Esuquidistu tantiaquido ma tantiabenquido yampanu qeshun mimbi chiaid chuibanquidquio ëbi icme, Papa, quequin Nuquin Papa chuita.

¹³Nidaidèn icquid onquiacmaidèn onquequid nebi, quequin tantiec. Adec onquequin chuibanquin iccuededquidon onquetenquio ëmbi chuiboed chuioaquid icme, Papa, ma tantiapanu, quequin Nuquin Papa chuita. ¹⁴Nuquin Papa chiec ëbi onquiacmaidèn onquesho utsibon tantienquio iquendac. ¹⁵Aden abi onquiacmaidèn onquequin utsibon tantienquio icsho ¿mitsipadentsimbi tantiamepe? Naden naimbi. Iccuededquido onquiacmaidèn onquequin Nuquin Papa chuishumbic tantiamenun iccuededquidon onqueten onquequin chuibanooanuna. Adecbidi, iccuededquid onquiacmaidèn Nuquin Papan naid chiec cuëdënishic tantiamenuec iccuededquidon onqueten cuëdënoanuna. Adembidi abi onquiacmaidèn onquequin chuibanashun iccuededquidon onqueten chuibanooatiapimbo icquin abi onquiacmaidèn onquequin chuibanenquio iquembi. Adecbidi abi onquiacmaidèn cuëdënenquio iquebi. ¹⁶Iccuededquido onquiacmaidèn onquequin Nuquin Papa chuibanuc ¿mitsipadec, Ai, abimbo iquec, quepec

aido? Aton onqueten onquequin Nuquin Papa chuibansho tantiash, Mibi bédambo iquec, Papa, quequin chiendac. ¹⁷Abi onquiacmaidèn onquequin Nuquin Papan naboed chuibanac Esuquidistu tantiadonequidquio mibèd iccuededquido yantiapimbo iquec.

¹⁸Èbibi utsin-utsinquec onqueten onquequidquio icnubi mibitedi adesa nec. Padnueni adec onquec bédambo iquec, Papa, quequin chuided-chuidedembi. ¹⁹Padnuen chuinec Esuquidistu tantiaquido iccuededacno puduedash ma tantianu quiash aton onquete daèdpactsèc tantiash anquiadquid icquin aidtedictsèqui chiendambi aido onquiacmaidèn onquenquiocquimbi.

²⁰Adembidi chuinu. Utsibon tantia. Bacuèbo tantiabenabictsècquid yacpadquec icsaid tantiesa icta. Ènden caniaidèn tantiabenshun ismiacpaden bédamboec tabadquin ismeta. ²¹Nuquin Papan chiampid nad iqueque. Tantia: “Èmbi chuiban cac aton matsesèn chuibanac tantiate bunesa icquin niacquid isadaidbo niosh. Adshobimbi matses utsi yuamiac isadaidbo onquiacmaidèn onquequin chiac tantiesa icquin èmbi chiacpadomboen nate bunenquio icoaposh,” quequin Nuquin Papan dada uamiampid nec.

²²Adoaidi Nuquin Papan Mayanèn tantiamiac abi onquiacmaidèn onquequin chuibanquin Nuquin Papan chiaid tantiabenquid Esuquidistu tantiaquid icmetiapimbo iquec. Padnuen adec onquequin chuibansho tantiash, Nuquin Papan naid nec, quequin Esuquidistu tantiesa icboedi abi tantiaquid yantsiash. ²³Padnuen Esuquidistu tantiaquido iccuededacno Esuquidistu tantiesa puduedshun abi onquiacmaidèn abitedi onquecuededsho

tantiash, Aidon tantiate icsabudpash, quepec. ²⁴Padnuen Esuquidistu tantiaquido iccuededacno Esuquidistu tantiesa puduedshun aton onqueten abentsècshun-abentsècshunquien Nuquin Papan chiaid chuibansho tantiash, Icsaobi. ²⁵Nèbi èbi bédambo icmequid Esuquidistu tantiate bunebi, qeshun abi icsaid ambi chienquioeboed Nuquin Papa chiasic, Nèmbi iccuededquidobèd mibi iquec, Papa, quequin chuibampec Esuquidistu tantiaquid yanshun.

Abentsècshun- abentsècshunquien chuiban, quequin chiaid

²⁶Adembidi chuinu. Adembidi tantiaata. Esuquidistu tantiaquid iccuededec cuèdènu, utsi quenubien; Nuquin Papan chiaid tantiamequin chuinu, utsi quenubien; naden Nuquin Papan ismioshibique. Chuinu, utsi quenubien; mibi onquiacmaidènquio onquequin chuinu, utsi quenubien; mibi onquiacmaidèn chuisho tantiombique. Min onqueten chuinu, utsi quetsiash. ²⁷Aided, Chuinu, qesho òmitsicquid chuita nuqui cape? qeshun naden chiac bédambo ictsiashe. Chuinu. Tantia. Mibi onquiacmaidèn onquequin chuinequid daèd icnuc bédambo ictsiashe. Abentsèc chotsècnuc adecbidi bédambo ictsiashe. Aided icquin abentsècshun-abentsècshunquien onquequin chuiban, cata. Aden abentsècshun onquequin chuisho abi onquiaid tantiaquidèn iccuededquidon onqueten chuibanta, cata. ²⁸Padnuen abi onquiaid tantiaquin chuibanuequid nibèdnuc, Tsadquin Nuquin Papauidi otacquiocquin chuita, cata.

²⁹Adecbidi, Esuquidistu tantiaquido iccuededacno Nuquin Papan chiampid comapenen tantiaquin chuibanquid daèd icnuc bédambo ictsiashe. Abentsèc

chotsēcnuć adecbidi bēdambo ictsiash. Aited icquin abentsēcshun chuibanubi, ĹNuquin Papan Mayanēn tantiamiacpadomboenda chuibaneque? Isnu, quequin chuibanequid utsibon Nuquin Papan chiaid isban. Adembidi, utsin chuibanubi adomboembidi isbanoaic utsibon. ³⁰Abentsēcshun chuibanubi Nuquin Papan Mayanēn tantiamiac utsi: Ĕmbitsen chuibanu, qesho tantiaşhun ma aidēn chuibanu quiash ambia chuibanquid ēnēd. ³¹Adquidēn iccuededquidtedi tantiamenuēquin abentsēcshun-abentsēcshunquien chuibanta. Aden chuibansho tantiaş ma chieshenquio yec bēdambo icpanu. ³²Nuquin Papan Mayanēn tantiamiaid utsibēd bēdamboec tabadquid nec. ³³Nuquin Papan tantiamiacpadequi utsi onquenubi onquenquio utsibo tabadec. Onquenu, utsi quenuc, Ai, onqueta, qeshun onquenquiocquin cainec tabadec chuibanequid utsibo. Esuquidistu tantiec iccuededquido utsi-utsiec yacnocquido adecbidi tabadquido nec. ³⁴Esuquidistu tantiaquido iccuededacno otacquo tabadquid chido. Chuibanacnoēsh onquenu, quenda chido. Nuquin Papan chiacpadeć ēbi chuiquid dada nec, queć chido. ³⁵Anoshon chiaid tantienquio yec tsadquin cainec shubuno nidash, Tantienquio iccombique. Nuqui tantiaĥoed ēbi chui, qesho tantiaşhun chieć aton bēnēn. Tantienquiocquin cainenquio iqueć chido icsambo iqueć. ³⁶ĹMimbia Nuquin Papan chiaid chuibanquidoda ne? Padenquio. ĹChuibanac Esuquidistu tantiaquido mibitedictśēquida yanondac? Padenquio. ³⁷Nuquin Papan chiaid chuibanquidquio nebi, mibi quenuc, Nuquin Papan tantiamiacpaden

Pabadon chuibanquin dada uaid nec, mibitedi quepec. ³⁸Aden mimbiantianubi, Pabadon dada uaosh, quenquio utsibo icpec. Aido Nuquin Papan tantiamiacmaido iqueć. Adquid icsho isun, Pabadon dada uaid nec, quequin tantiamenu, quenda.

³⁹Adembidi chuinu. Adembi tantiata. Nuquin Papan chuipampid comapenen tantiaquin chuibante bunquiota. Aden chuibanquid mibi icnuc utsi onquiacmaidēn onquequin chuinesho, Ai, cata. ⁴⁰Adecbidi, Nuquin Papan Mayanēn tantiamiac chuibanequid dadpen icnuc utsibo bēdamboen tantiamenuēquin abentsēcshun-abentsēcshunquien chuibanta.

Esuquidistu uincuenaid

15 ¹Adembidi chiembique. Tantia. Matses icsaquid icsho cuidnushe quiash abided cuidadec Esuquidistu unēsaid ēmbi chuibansho tantiaş, Ai, abimbo iqueć. Aid tantiembi, mibi quiampondac. Aden tantiadoneć chieshenquio yec mibitedi tabadec. ²Aden, Aid tantiabenu, qesho Nuquin Papan mibitedi bēdambo icmenuēquin tauapondash. Mibi chieshenquiocsho isun adquid icmeshun abi yacno mibi yuedendac. Padnuen, Esuquidistu tantiaquid nebi, quequin abipenquiocnoc chuiquid ambi bēdambo icmebanacmaid nec. Adecbidi, ambi yuednu cacmaidquio adquid nec.

³Utsin ēbi tantiamiacpaden mibi chuibanondambi. Adembidi chuinu. Tantia. Nuquin Papan chiacpadomboen matses icsaquid icsho cuidnushe quiash abided cuidadec Esuquidistu unēsapanēdash. ⁴Unēsacsho shēcuē nacnenaidēn nauedshun bētashacsho daēdec ushtanquin ambi chiampicpaden Nuquin Papan uincuen uapanēdash.

⁵Aden uincuemiach choquin, Uincuenobi, quequin Petedo Esuquidistun ismepanédash. Adshumbic adembidi abéd 12ted icquido ismeoapanédash. ⁶Adshumbic adembidi abi tantiaquid dadpen 500ted iccuededsho choquin, Uincuenobi, quequin Esuquidistun ismeoapanédash. Aid uincuenacsho isquido dadpen abi tabadnubi utsi-utsiec padenquio iquec. ⁷Aden aitedi ismeshumbic aton utsi Santiacosen Esuquidistun ismeoapanédash. Adshumbic, ambi ëbi chuibeneta caidtedi ismeoapanédash. ⁸Aden aido ismequin nainshun yuecshun ëbitsen ismeoapondashi. Icsactsëcquiocquid nec, quenquiocquin ismebenondashi tsyuecquio. ⁹Abi tantiaquid mëyanquin cuesunemequidquio icboedi abi tantiaquid yanacsho Esuquidistun, Ëbi chuibeneta, cainquioctiadquidëmbi adquid icta caid nebi. ¹⁰Esuquidistu tantiaquid yansho isun ëbi chieshaid cuidenquio yac Nuquin Papa bunacpadomboen Esuquidistu chuibenequid nebi. Adquid Nuquin Papan icmioshi, quequin chieshenquiocquin ma dadpenshun Esuquidistu tantianu quequin chuibenembi utsibon aden chuibenenquiocnobi. ¿Ëmbentsëquidambi chuibenedio? Aton Mayan Nuquin Papan meniac aibdéd icquin chuibeniombi. ¹¹Adembidi, ëbi yacpadquidon Esuquidistu chuibanac utsitsen abi tantiaquido yampondash.

Matses unësash uincuenaid

¹²Adec Esuquidistu unësash uincuenondash, quequin chuinubi ¿mitsipaden tantiec uincuenta nibëdec quec utsi-utsiec onquepec? ¹³Uincuenta nibëdnuc Esuquidistu uincuenenquio ictsempanédash. ¹⁴Esuquidistu uincuentequid icmiambocnoc abi

chuibanquid muambo ictsiandac. Esuquidistu tantiaquid nebi, quiaidbidi muambo ictsiandac. ¹⁵Nuquin Papan naid chuibanquidtedi muaquidquio icoatsiandac. Aden tantienquiocquin ëbi yacpadquidon chuibanendac. Unësash uincuentequid nibëdnuc ëbitedishun Nuquin Papan Esuquidistu uincuen uapanédash quequin chiaid abipenquio ictsiandac. Unësash uincuenta nibëdnuc Nuquin Papan uincuenaid nibëdtsiandac. ¹⁶Unësash uincuenta nibëdnuc Esuquidistu uincuentiapimbo ictsempanédash. ¹⁷Aid uincuenambo icnuc matses icsaquid icsho cuidnushe quiaish abided cuidadquid Esuquidistu nec, cainquio mimbi ictsiandac. Matses icsaquid icsho cuidnushe quiaish cuidadquid nibëdtsiandac. ¹⁸Aid uincuenambocnoc abia tantiaquido tsusedpabo Nuquin Papa yacno puduedtiapimbo ictsempanédash. ¹⁹Nidaidënuidi Esuquidistu tantiec tabadte icnuc abi tantiaquido Esuquidistun bedoanendac quequin caimbudaqui ambi tantiaid choenquio ictsiandac.

²⁰Ëmbi chuiboedtedi adtiapimbo iquec. Esuquidistu Nuquin Papan uincuen uapanédash, quequin chiaid abimbo iquendac caimbi. Nuquin Papan ambi abia uincuenaid abi yacno puduedmequin ambi uincumetequid dadpen iquendac, quequin chiaid abimbo iquec. ²¹Unëstequid bëyuc dada yanampicpadec matsestedi adecbidi iquec. Adecbidi, unësash uincuentequid Esuquidistu yanacpadec abi tantiaquidtedi adquiobidi iquendac. ²²Bëyuc dada Adan caidën tsyuecquidtedi adecbidi unëstequido nec. Esuquidistun bédambo icmiaid uincuentequido neoaic. ²³Esuquidistubimboecquid dadpen iquendac, quequin Nuquin Papan aidba

uincuemiambien yuecshun Esuquidistu choashun abi tantiaquidtedi bedoanendac. ²⁴Aden bedoanquin abi tantiaquidtedi bëyucanec choquin Nuquin Papa Edoen caid ismequin, Nëidtedi min shubu abentsëquën tabadquido nec, quequin chiendac abi chieshënuquidtedi chën quetiapimboconoc. Aido ambi nebudac bimboecquido iquendac. ²⁵Abi chieshënuquido utsitedibëd chuiquid icquin abi chieshëntiapimboquid aido Esuquidistun icmebanendac. ²⁶Adoshombic ënquimbi unëstequid nibëdquidquido Esuquidistun icmeoaindac. ²⁷Adoacsho abitedi chuiquid Esuquidistu Nuquin Papan icmendac. Abi namiaidtedi utsitedi icnubi adquidpenquido aton Papa iquec. ²⁸Aden Esuquidistun namiaidombo abitedi icmeshumbic aton Madotsen Nuquin Papan namiaid iquendac. Adquid abitedi icnuc Edoen Nuquin Papa Chuiquid Dapa Abentsëcquiobi nendac. ²⁹Unësash uincuentequid nibëdnuc, ðatotsieshun, Ënden unësaid uincuenendac, quequin tantiembi quequin utsibon acten ambibi mentomepec? ³⁰Adecbidi unësash uincuentequid nibëdnuc ëbi unës uate utsibo comapenec buncuededsho isun ðatotsieshun, Uincuentequid iquec, quequin ëbi yacpadquidon chuibampec? ³¹Unësash uincuentequid iquec, quequin tantiembi. Aden tantiaquin Esuquidistu, Nuquin Icho, ëmbi chuibanac Esuquidistu tantiaquido mibitedi yampondac, quequin tantiembi. Aden tantiaquin unësmanc quenuiocquin Esuquidistu unësash uincuenta iquec, quequin chuibenec nebi. Aden badiadquidën-badiadquidënquien chuibanubi ëbi unës uate utsibo bunec. ³²Uincuentequid nibëdnuc, ðatotsi

quenuquini Epeso yacnoshon, Uincuenta iquec, quequin chuibansho mëyanaqui chieshenquido yec dayacquio tsadpe? quetsiabi. Adecbidi uincuenta nibëdnuc: “Unësash nibëdquiec iquebi, quequin nua peshun aquembi,” quetsiabi. ³³Aden tantienquido iquembi. Adembidi tantienda. “Uincuenta nibëdec quequidbëd capuenda aidën tantiacpadec icmane quiash.” ³⁴Adquidpadquid icquin mimbi icsamboen tantiaid ënquin Nuquin Papan chiaidquido tantiata. Esuquidistu tantiec mibëd iccuededquid utsi-utsiec, Nuquin Papa nadatiambocquin uincuemianquidquido nec, quequin tantiesha nec. ðAdquid mibëdi icnuc Nuquin Papan bëdambo icmiaido mibitedida icpe? Padenquido.

Uincuemequin dada chuca meniaid

³⁵ðMitsipadec unësaid uincuempec? utsi quepec. Adecbidi, ðmitsipadquid uincuentequidën dada icpec? utsi queoapec. ³⁶Adquidën icsamboen tantieque. Chuinu. Tanta. Mimbi tiedën chococaid tauibëd ëshë chococatequid napi dëyuctequidpadpenquido iquec. ³⁷Mimbi tiedën chococaid utsi-utsiec iquec. Adecbidi mimbi tiedën siaid utsi-utsiec iquec. Mimbi chococaid mimbi siaidbidi dëyuctequid utsi-utsiec iquec. ³⁸Nuquin Papan tantiampicpadec aton dada yanec. ³⁹Abipadquidpenquido ambi uaidtedi iquec. Abipadquidquido matsestedi iquec. Abipadquidquido nidaidën capuquidtedi iquec. Abipadquidquido podochoquidtedi icoaic. Abipadquidquido acten icquidtedi icoaic. ⁴⁰Abuc tabëcaid icnubi nidaidën icquid iquec. Abuc tabëcaid abipadquid chënquesho isec nidaidën icquid tabadec. ⁴¹Badiadën ushë comapenquiec chënquenubi inchëshën ushë daebudquido chënquéc. Aid daëdi nua

isadnubi uispa pistsëc isadoaic. Uispa utsi-utsiec iquec. Abi bedquec chënquetequid utsi-utsiecbidi iquec.

⁴²Aidtedi ënëndendac. Adecbidi tishac matses unësacsho chococac nami chodquec. Adec nami chodquian Nuquin Papan tantiacpadec uincuentequidën dada chuca chodquesa nendac. ⁴³Tishac icsaquid matses iquec. Adsho uincuemequin ambi icsaisa icmiaid nendac. Nidaidëshun tishac chonoadec uimabudquid matses nec. Yuecash unësacsho uincuemiac uimabudenquiocquin nabanendac. ⁴⁴Nidaidëshun tishac daicsambo yanash unësacsho uincuemequin dada chuca icmetequid nendac. Nidaidëshun tishac matsesën tantiacpadquid icboedi Nuquin Papan uincuemiac aidën tantiacpadquid iquendac.

Nidaidëshun tishac matsesën tantiacpadquid icboedi abuc buanac anocquidën tantiacpadquid iquendac. ⁴⁵Adembidi Nuquin Papan chuiquin dada uamiampid nad iquec: “Bëyuc matses Adan caid nacnenshun Nuquin Papan bushcac taëec tiboquequid yampampic.” Nuquin Papan tsyuec chomiaid Esuquidistu nec. Aid tantiaquid abipadquid Nuquin Papan menec. ⁴⁶Nuquin Papan matsesën tantiacpadquidba icmiac Esuquidistu tantiaquid icsho isun abipadquid meniac icbon tantiacpadquid yanec. ⁴⁷Bëyuc matses uanu, qeshun nidaid putu bedshun nacnenaid nepampic. Bëyuc matses Adan caidën tsyuecquid Nuquin Papan abi yacnoshon budmiaid nepanëdash. ⁴⁸Nidaid putu bedshun bëyuc matses nacnenshun nidaidën tabadquid icmepampic. Adquiecbidi abipadquid matsestedi yanac. Nuquin Papan abi yacnoshon Chomiaid tantiaquidtedi aton Mayan menec. Aden meniac abipadquid aido iquendac.

⁴⁹Adecbidi bëyuc matses isadacbimboecquid nidaidën tabadquidtedi nec. Nuquin Papan abucshun chomiaid isadacbimboecquid abëd icquido iquendac.

⁵⁰Adembidi chuinu. Tantiata. Matsesën dada nami intacchoquid chodquetequid icnuc Nuquin Papan shubu abentsëquën tabadtiapimbo adquid iquec. Chodquequid chodquetemaid ictiapimbo iquec.

⁵¹Nuquin Papan chienquiocpampid chuinu. Tantia. Abi tantiaquid unësabicquidbëdta ënden abi tantiaquid tsusedpabo dada chuca Nuquin Papan menendac. ⁵²Ambi namiaidën abucshun shoncanubi ëshë badedquio bëbedquiacbimboecnuc badedquio unësesambo Nuquin Papan abi tantiaquido icmendac. ⁵³Chodquetequid icboedi chodquesa yanendac. Unëstequid icboedi unësesa yanendac. ⁵⁴“Adquid icmiac unëstequid nibëdquidendac.

⁵⁵Ad icnuc ïmitsishunquio unëstequid istuidpec? Adembidi, ïmitsishunquio unësmetequid istuidpec?”

⁵⁶Icsaquid unëstequid nec. Nuquin Papan nadomboen nata quequin chiaid niacquid icash unëstequid matses yanac.

⁵⁷Adquid nuqui icsho isun Nuquin Papan Nuquin Icbo Esuquidistu chomeshun nuqui cuidenquiocquin aidi icsaisa cuidquin nuqui bëdambo icmebanec. Adoac abi yacnoësh icsaisa unësesambo nuqui iquendac. Aden Nuquin Papan naïndac, quequin, Bëdambocquid mibi nec, Papa, quequin nuqui chuided-chuidedendac.

⁵⁸Adembidi chuinu. Tantiata. Adenuidi tantiaquin utsi uaquin utsin chuisho tantienquio yec tabad. Adec tabadquin Nuquin Papan chiacpadomboen naban

Esuquidistupadquid Nuquin Papan ëbi icmendac, quequin tantiaquin.

Utsibo menenun piucquid bedbanaid

16 ¹Nuquin Papan bédambo icmebanaid utsibo menenun mimbi piucquid bedbanaid chuiquin dada uaimbique. Isec onquecuedta. Nidaid Cadasia caid yacnocquido Esuquidistu tantiaquido ëmbi chuibanacpadomboen mimbitsen nabanta. Naden Cadasia yacnocquido chiombi.

²Abentsëcshun-abentsëcshunquien mimbi bedaid musucbudcuenshun dominco ushën mimbi musucacted dayun uata. Aton na daëdpactsëc icquidën daëdpactsëc dayun uanubi mitsana dadpen icquidën dadpen dayun uata. Aden musucbudcuenshun mimbi dayun uaid icnuc ëbi choacsho isash, ¿Tedsimbi menepeba? quenquio mibitedi iquendac. ³Ëbi choshombic utsibo bédamboen tantiaquin piucquid dayun uaidtedi mimbi menenun buantan caido isun, Ëmbi isaido neque. Yuedta, quequin dada uashun aido menembi ma buanueshun. Aden ëmbi meniac buanquin utsibo ismetuidpec. ⁴Adecbidi ambo nidtiadquio iquebi, ëbi quenuc mimbi menenun buantan caido ëbëdi nidendac.

Utsi-utsien chuibanaid

⁵Nidaid Masedonia caid yacno Esuquidistu tantiec iccuededquid utsi-utsiec yacno isedbëquimbi mibi isbëtsenembi. ⁶Aden isedbëequi mibi isedash tabadebi. Iquenoanquid chonobi mibëd tabadtsiabi. ¿Aid ënëdan nidnu, qesho, adabi utsi yacno mimbi nidmepatsia? ⁷Nëbi mibëdi yuec tabadtiapimbo iquebi, quiash mibi yacno nidenquio iquebi. Yuecash mibëdi yuec tabadnuec mibi yacno

nidebi. Nuquin Papa bunuc adendabi. ⁸Nëbi padenquio iquebi. Epeso yacnocquidobëd iquebi. Nuquin Papan abipadquid aton Mayan matses meniaid ushë tantiate choan nëuëshquio nidebi. ⁹Nëmbo Nuquin Papan chiaid tantianu quequid dadpen iquec. Adsho comapenen Esuquidistu chuibanec nebi ma tantiapanueshun. Aden chuibansho tantiauidash utsibo ëbi chieshënquido nëmbo iquec.

¹⁰Mibi yacno ëbi nidenquio icnubi Timoteyo mibi yacno nideque. Aid bédamboen ista. Pabado yacpadquiocquid Nuquin Papan namiaidquiobidi Timoteyo nec, quec chieshesa icta. ¹¹Nuquin Papan namiaidquiobidi Timoteyo icsho, Ëbëd icquidta nec, quenquiocquin yuedta. Yuedac tabadash, Nidnu, qesho, Ai, nidec nid. Mibi nidsho isash unësqüo iquebi, quequin nidme ma ëbi yacno choanu. Utsibobëd Timoteyo choaic quequin cainec tsadebi.

¹²Nëbi nuqui con utsi caid Apodos mibi chuinu. Tantia. Codinto yacno Esuquidistu tantiec iccuededquido nuquin utsibobëdta istanta, quequin Apodos comapenen chiombi. Adoac, Nëbi Codinto yacno nidte bunenquio iquebi, quiosh aid. Yuecash Codinto yacno nidec bédambo ictsiash, quiash yuecash aidi mibi yacno nidendac.

¹³Icsamane quequin chieshenquiocquin Nuquin Papan chiaid tantiadoneta. Esuquidistu tantiabenuquido yanta. Adecbidi, natiatquid icnuc chieshtoenquio yec dayacquo yec tabadteneta. ¹⁴Adec tabadquin utsi bédamboen tantiaquin nabanta.

¹⁵Adembidi chuinu. Tantia. Nidaid Acaya caid yacno Estepanasën shubun icquido abia Esuquidistu tantiaquido icpondash. Adquid yanshun,

Esuquidistu tantiaquid utsibo nashumbanquido nuquibi iquendac, qeshun adobanec. ¹⁶Aidon namiaido icta. Adembidi, comapenen nashumbanquidtedishun namiaido icta. ¹⁷Codinto yacno Esuquidistu tantiec iccuededquidtedi ëbëdi ictiapimboconobi mibi yacnoësh nëidtedi chosh. Estepanas yec Podtunato yec Acaico yec quec choash puduedsho isash bëdambo iquebi. ¹⁸Mibitedi chuibanquin aidon unësquiocquidi bëdambo icmioshi. Mibi yacno padpidec nidash puduedshun chuibanquin adembidi mibitedi bëdambo icmendac aidon. Aido mibi yacno choacsho isun, Pabado chuibanquin mimbi bëdambo icmiacpaden nabanec tabadta, quequin chuiban.

**Esuquidistu tantiaquidon mibitedi
tantiaquin chuibanaid**

¹⁹Codinto yacnocquid mibitedi tantiec tabadebi, quequin dada uaquin chuita, nidaid Asia caid yacno Esuquidistu tantiec iccuededquidon cac chiembi. Adembidi, Aquidan aton chido

Pidisdabëdтан chui cac chuioaimbi. Adembidi, aidon shubun Esuquidistu tantiec iccuededquidtedishun chui cac adembidi chuioaimbi. ²⁰Aden utsibon chiaid chuishumbic, Esuquidistu tantiaquid utsibotedibëd bëdamboec tabadta, caimbi.

²¹Ëmbi chuibanac ëmbi chiaid utsin dada uashumboed nec. Nëshun bedanquin dënainquin dada uaimbique. Tanta.

²²Nuquin Icbo tantiesa nëbimbobi ma Nuquin Papan comapenen cuidquin ma nësiatequid icpanuna. Adecbidi abi tantiaquido bednuec badedquio Esuquidistu chopashun, quec tsadebi.

²³Ëbi icsaquid icsho cuidenquiocquin Nuquin Icbo Esuquidistuded Nuquin Papan cuidpanëdash, quequin tantiaquid nebi, quequin abimbo chuiquid ma ambi tantiacpadquid Nuquin Papan mibi icmepanuna.

²⁴Esuquidistun shubun icquido nuquibi icsho ëmbi bëdamboen isaido mibitedi nec.

Padi aited dada uaombique. Isec onquecuedta.

CODINTO YACNOCQUIDON ISTE II

1 ¹Pabado nebi. Nuquin Papa bunacpadomboen Esuquidistun, Ēbi chuibeneta, caid nebi. Esuquidistu tantiaquidbidi Timoteyo nuqui con utsi caid ěběd iquec. Aid ěběd icnubi Esuquidistu tantiec Codinto yacnoěsh iccuededquidon mimbi iste dada uaimbi. Ĕmbi dada uaid mibitedishun isbanshun utsibo meneta ma isnueshun.

²Mates icsaquid icsho cuidnushe quiash abided cuidadec Esuquidistu uněspanědash, quequin tantiaquiosho isun Nuquin Papan bědamboen isaidquio nuqui nec. Adquido yec utsiboběd ma bědamboec tabadpanuna.

Bědambo icmianquidquio Nuquin Papa

³Nuquin Papa nad iqueque. Tantia. Chuinu. Ĕbi uněsquo icsho isash bědambo icmianquidquio Nuquin Papa nec. Adquid icsho, Mibi bědambo iquec, quequin aidquio chuidonenuna. ⁴Natiamiaid icsho tantiaquin chieshtomenquiocquin aiděmbi nuqui dayacquio icmec. Aden ěbi tantiaquin Nuquin Papan nac, quequin natiamiaid utsi icsho tantiaquin, Bědambo iquebi, camenuna nuqui. ⁵Adembidi natiamiaid Esuquidistu icsho isun Nuquin Papan chieshtomenquiocnuen chuiquin dayacquio icmiacpadomboen Esuquidistu tantiaquid utsi tantiaquin chieshtomenquiocquin dayacquio nuqui icmendac. ⁶Adembidi ěbipadquidobědtan Esuquidistu chuibansho utsibon měyanac natiamiaid icsho Nuquin Papan, Bědambo

iquebi, cameposhi. Aden Pabado tantiaquin Nuquin Papan nashunosh, quequin chiac utsin ěbi měyanasho isun adomboembidi chieshtomenquiocquin Nuquin Papan ěbi dayacquio icmec, quec tabadta. ⁷Utsin měyanaid icquimbi Esuquidistu tantesa uainquo iquec, quequin mibi tantiec tsadebi. Ĕbi měyanacpaden mibi měnyansho isun Nuquin Papan bědambo icmiaid mibi iquendac.

⁸Nidaid Asia caid yacnoshon ěbi natinameboed mimbi tantiamboen icchitec, quequin ěbi adoboed mibi chuibanu. Tantia. Dayactiapimbocnoc natiamioshi. Adoac, Uněsebi, quiobi.

⁹Uněs uatiad, utsibo qesho tantias, Ĕbibi měnchiquidtiapimbocquimbi mates uněsacsho uincuemquiděn ěbi měnchictsiash, quequin tantiec tsadobi. ¹⁰Ai, uněs uanu, cac natiapobi. Adsho Nuquin Papan měnchicaid nebi.

Adembidi aiděmbi ěbi měnchictenec. Uněs uatsensho isun ěbi měnchicacpaden ěnenquiocquin napashun, quequin tantiec tsadebi. ¹¹Ĕbi tantiaquin mibitedishun chiac Nuquin Papan měnchicmiaid nebi. Aden mimbi chiac uněs uanu, qesho tantiasun mimbi Pabado měnchiccoc. Mibi bědamboquid nec, Papa, quequin ma dadpenshun ambi naid chuipanuna.

Něbi mibi yacno nidenquio iquebi, quiaid

¹²Bědamboec tabadquin ismequid nebi, quequin tantiec bědambo iquebi.

Adaïd chuïnu. Tantiã. Nuquin Papan ëbi tantiamiacpaden ismec utsibobëd bëdamboec tabadobi. Adquiecbidi mibëdi tabadobi. Matsesën tantiamiacpadpenquo yec tabadobi.

¹³Ma tantiamenueshun abimbo chuïquin mibi dada uashunec nebi. Ëmbi dada uaid bedshun isec, Pabado bëdamboec tabadec, quequin ënenquiocquin tantiapashun mibitedishun. ¹⁴Ëbëd Pabado bëdamboec tabadosh, quequin tantiec bëdambo iquebi, quec utsi-utsiec. Adecbidi, Codinto yacnocquido utsi-utsiec bëdamboec tabadosh, quequin utsibon chuïsho tantiasb bëdambo iquebi. Esuquidistu choanuc adquiequi Codinto yacnocquido tabadpashun, quec tsadebi.

¹⁵Aden ëbi bëdamboec tabadaïd tantiaquin Codinto yacnocquidon chiec, quequin tantiec, Aidoba istanu, quiobi. Aden istanac, Bëdambo iquebi, quepashun, caimbi mibi. ¹⁶Mibi isbidanec nidaïd Masedonia caïd yacno nidashic padpiden mibi isbëtsenec choaibi. Aden isbëtsenembi, qesho tantiasbun nidaïd Udeya caïd yacno mimbi ëbi nidmetsiac, quequin mibi chiombi. ¹⁷¿Uquëducshun, Nidenquo iquebi, quequin muaquindambi chuidio? Adenquiocquin chiombi.

¹⁸Ambi chiacpadomboen nabanquidquo Nuquin Papa nec. Aid chuïnu. Tantiã. Abimbo chuïquidquo yec utsi yantiapimbo iquec. Adquidquo icquin ambi, Esuquidistu chuïbeneta, caïdquo yec adomboen chuïquid nebi. Utsi uain chuïnu, quesa nebi. ¹⁹Ambi chiacpadomboen nabanquidquo Nuquin Papan Madombo, ëmbi chuïbeniaïd, Esuquidistu nec. Aidi Sidasën chuïbeniaïdbidi nec. Aidi Timoteyon chuïbeniaïdbidi nec. Esuquidistu abimbo chuïquidquo yec utsi yantiapimbo iquec. Abi

chuïbenequidquo adquidbidi nec.

²⁰Con Madon naden naindac, quequin Nuquin Papan chiacpadomboen Esuquidistun ënden nabanac. Aden abi nabanec. Ambi chiacpadomboen naquidquo Esuquidistu nec, quequin tantiaquin ambi naid ëbipadquidon chuïbanec. Aden chuïbanac abi tantiaquidquo yanash, Abimbo iquec. Esuquidistun ambi chiacpadomboen naindac, quec tantiec nuqui tabadec. ²¹Nuquin Papan tantiamiac: Esuquidistu tantiaquid nebi, quiash, Tantiãsa nebi, quetiapimbo nuqui iquec. Adquid icmiac aton Madombo chuïbanquid nuqui nendac. ²²Adembidi aton bacuë icmiaïd nuqui nec. Adembidi aton Mayan Nuquin Papan meniaïd nuqui nec. Ëbëd tabadquid aïdo nendac, quequin tantiamenuen Nuquin Papan aton Mayan meniac ma aïdëmbi nuqui bëdambo icmepanushun.

²³Nuquin Papan tantianubi mibi yacno nidnu quiobi. Adashic, chushcachitomane quiash mibi yacno nidenquo iccobi. ²⁴Ëmbi Esuquidistu chuïbanac abi tantiaquid dadpen iquec. Aidon icbopenquo nebi. Aidon icbopenquiobidi Esuquidistu chuïbanquid utsibo nec. Esuquidistu tantiec bëdambo iquebi ma quenu, quequin chuïbenequidquo nebi. Esuquidistu tantiaquid nebi, abimbo quequin aïd tantesa uainquo mimbi iquendac.

2 ¹Aden tantiaquin comapenen chuïquin unësquio icmenushe quec mibi yacno nidenquo iquebi caombi. ²Mibi unësquio ëmbi icmiac ¿tsuntsin ëbi bëdambo icmepatsiasb? ¿Ëmbi icsambo icmeboedënda ëbi bëdambo icmepadic? Padenquo. ³Aden tantiaquin mimbi iste dada uaombi ma ëbi bëdambo icmequid unësquio icmetiapimbo iquebi, qeshun. Bëdambo iquebi, quequin ëbi tantiec

adquibidi mibi icoatsiac, quequin tantiombi. ⁴Unësquo yec shubiquimbi mibi dada uashun, Meneta, caondambi. Unësquo icmenu, quenquiocquin mibi comapenen tantiaquin dada uaondambi.

Abi icsaboed bēpiscudnueshun yued quiaid

⁵Anocquidēn ēbi unësquo icmedenequimbi adembidi comapenquieic unësquo mibi icmeoaosh. Aidi mibi chiondambi. ⁶Aidi mibi dadpenshun cacumiac abi icsaid ēnosh quec. ⁷Adoacsho abi icsaid bēpiscudshun aidi yuedoquin bēdambo icme. Yuedenquo yac natiamanquieic unēstiadquo yantsiash. ⁸Nuquibi iccuedednuna, quequin aid tantiaquin yued caimbi. ⁹¿Ēmbi chiacpadomboen nabanquidquioda neque? Isnu, quequin icsaquid cacumeta, quequin dada uaondambi. ¹⁰Aden ěmbi dada uacpaden mimbi cacumiac abi icsaid ēnsho isun abi icsaid nibēdacimboec bēpiscudshun yued. Adsho tantiahsun adomboembidi naimbi. Aidbēdi abentsēc yacimboecquido yanosh, qesho tantiash abi icsaid bēpiscudebi Esuquidistun tantianubi. ¹¹Nuqui chieshēnquidēn Satanasēn aidi icsamenushe qeshun abi icsaid ěmboed yuedta. Yuedenda, Satanasēn quequin tantiamiac onqesho tantienda.

Nuquin Papan con Mayan meniaid adquid ěbēdi tabadtequid nec, quiaid

¹²Esuquidistu chuibanuec shubu dadpen icquid Todoas caid yacno ēbi chonoc, Tiantianu, quec cho-choquid dadpen icpondash. ¹³Adquid dadpen icnubi ěmbi con utsi caid, Tito, mibi yacnoēsh choabi icnuc ambo yuec tabadtiapimbo iccobi. Adash, Bēquednu, quianec nidaid Masedonia caid yacno nidoapobi.

¹⁴Bēdambocquid mibi nec, Papa. Mimbi Esuquidistu tantiaquid ēbi yacpadquido icmeshun mimbi, Esuquidistu chuibeneta, caid ěbitedi nec. Ēmbi chuibanaid noadte bēdabimboecquid nec. Noadte bēda pushudec noadsho uano-uanoc tabadquidon shēdec. Adembidi, Esuquidistu ēbi yacpadquidon chuibenesho uano-uanoc tabadquidon tantiec. ^{15,16}Esuquidistu chuibanac noadte bēdan danoshquiaid shēdacimboen utsibon tantiec. Adembidi, Esuquidistun ēbi chuibeneta caido Icho isacimboen Nuquin Papan tantiec. Adomboembidi Esuquidistu chuibenequido utsibon isoaic. Aden isec Esuquidistu tantiaquid yanash ēnēdenquo yec abēd icquido aidtedi iquendac. Aden nuqui isquin Esuquidistu tantiesa icsho Nuquin Papan nēsiatequid iquendac. ¿Tsutsi Esuquidistupadquidquico icpec? Adquid nibēdec. Adesa icsho ambi, Ēbi chuibeneta, caidquo nebi. Adquid icquin chuibenenubi ¹⁷piucquid bedte bunquin utsin-utsinquien Esuquidistu chuibanec. Adesa ěbipadquido iquec. Piucquid bednuequin ēbi yacpadquidon Esuquidistu chuibanenquo iquec. Nuquin Papan, Esuquidistu chuibeneta, cac aid chuibenec nebi Nuquin Papan tantianubi. Ambi namiaidquo nebi.

3 ¹¿Pabado bēdamboec tabadquin Esuquidistu chuibenequid nec, mibi camenuendambi aden mibi chuibandio? Padenquo. Adembidi, ¿Utsi yacno nidnun bēdamboec tabadquin Esuquidistu Pabadon chuibanosh, quequin dada uata, ěmbi cac mimbi dada uaidtambi buampe? Padenquo. ²Mibēdi tabadquin chuibanac Esuquidistu tantiaquid yansho isun Codinto yacnocquido mimbi chuibanaido nec, quequin chēshēten

pinchuquën tansiacbimboecnuc paucudtiapimboecnoc Nuquin Icbon tantiamioshi. Adembidi icsamboec tabadboedi nëbi bēdamboec tabadsho isun Pabadon Esuquidistu chuibanaido Codinto yacnocquido nec, quequin adomboembidi tantiabededec utsibon. ³¿Abi tantiaquid icsho isun bēdamboec tabadmenuequin ambi cuēnote bedshun dada uampicpadquidta mibi meniondash? Padenquo. Esuquidistu tantiaho isun unēstiapimbocquid aton Mayan abipadquidquo mibitedi meniondash.

⁴Nuquin Papan tantiacpadomboen Esuquidistun, Ēbi chuibeneta, cac chuibanac Esuquidistu tantiaquid mibitedi yanacsho tantiec ěmbi chuibanaido aitedi nec, quequin tantiemi. ⁵Ěmbibi tantiacpaden chuibanesa nebi. Nuquin Papan tantiamiacpaden chuibanquid nebi, quequin tantiemi. ⁶Ěmbibi Esuquidistu chuitiapimbo icsho Nuquin Papan Mayanēn tantiamiac Esuquidistu chuibenequidquo nebi. Ambi, Nadomboen nata, quequin dada uamiampicpadomboen chuibanta caidpenquo nebi. Ambi nadomboen nata, quequin dada uamiampidtedi natiapimbo yec aibdēdi matses tabadtiapimbo iquec. Aton Mayan meniaidbēd tabadtequid nec.

Abi tantiaquido bēdambo icmetequid aton Mayan

⁷Nuquin Papan nadomboen nata quequin chiaid cuēnoten dada uacpaden nainquo yec matses abi yacno tabadtiapimbo iquec, quequin dada uampid meniac abi chēnquiacpadec Moisesēn bētantiante comapenec bēchomauanquiechēnqueboedi macuēsh budec bēdiambo chēnquesho isadaidbon bēstiapimbo icpampic.

⁸Nēbi Esuquidistu tantiaquid bēdambo icmetequid aton Mayan abipadquid meniaid ěnēdenquiocquidquo nec. ⁹Ěmbi nadomboen nata quequin chiaid niaquid ěbēdi tabadtiapimbo iquec, quequin dada uaid Nuquin Papan meniac buanshun Moisesēn aton matses ěnēdenquiocnoc tabadmetiapimbo icambien matses icsaid bedshunash icsaisa abided cuidadec unēsash uincuenquidēn abi tantiaquido ěnēdtiapimbocnoc tabadmendac. ¹⁰Nēbi Esuquidistu unēsaid tantiaquid ěnēdtiapimbocquid nec, quequin chiac ambi dada uaid meniampid ěnēdacbimboecquid nendac. ¹¹Ai, nadomboen nata quequin chiaid Moisesēn bedshun meniaid ěnēdtequid icnubi bēdambo icmiantequid Nuquin Papan chomiaid icsaisa ěnēdtiapimbo iquec.

¹²Aden tantiaquin, Esuquidistu nuqui tantiaid icsaisa yec ěnēdtiapimbocquid nec, quequin chuibenequid nebi. ¹³Moises Nuquin Papabēd onquec bēchomauanquiecbœdi auēshquo nidec ushma-ushmactscēcquo yanash matses ismenquiocnuec bēpucudpampic. Adesa icquin ompoenquiocquin utsibon ma tantianu, quequin Esuquidistu chuibenequido nuqui nec. ¹⁴Nuquin Papan dada uaid Moisesēn bēaid tantiate bunesa abēd icquido icpampic. Adquiobidi pamumēdacbimboec isadaidbo abi tabadec. Nuquin Papan cuēnoten dada uacpadquid isec onquec nēbi adquiobidi utsi-utsiec tabadec. Esuquidistu tantiesa yec adequi tabadec. Abi tantiaquid ambi paucshun tantiamiaido nendac. ¹⁵Nadomboen nata quequin dada uaid Moises menepampid isec onquec pamumēdacbimboecquid isadaidbo utsi-utsiec iquec. ¹⁶Esuquidistu tantiaquid icsho Nuquin Papan

Mayanën paucquin tantiamiaid nendac. ¹⁷Nuquin Icbo icsaisa icquin ënden nadomboen nata quequin dada uapampicpaden naquidquio nec. Adquid Esuquidistu nec, quequin tantiaquin chuibenec nebi. ¹⁸Paucac, Ëbi icsaid bedshunash Esuquidistuded cuidadpanëdash, quequin nuqui tantiec. Aidënquiobi icsaisa icquin abipadquid nuqui meniac aton Mayanën adquid nuqui icmebanec.

Nuquin Papan nadatiambocquin nadenequin Esuquidistu chuibenemiaid

4 ¹Aden Nuquin Papan nuqui tantiaquin, Esuquidistu chuibanta, caidquio icquin chieshenquiocquin aidi chuibanec nuqui nec. ²Icsash ompodquid icboedi nëbi muesa icquin Nuquin Papan chiaid utsi uainquio yec nuqui bëdamboec tabadec. Nuquin Papan isec, quec adequi nuqui tabadec. Adec tabadec ëbipadquid utsi yansho isash Nuquin Papan chiaid tantiate utsibo bunquiopec. ³Esuquidistu chuibansho utsin-utsinquien bëdamboen tantiatiapimbo iquec. Adquid Nuquin Papabëd tabadtiapimbocquid nec. ⁴Nuquin Papapadquid Esuquidistu tantiaquid icnushe qeshun icsamianuequidën Satanasën pamunacbimboen utsi-utsien tantiamenquio iquec. ⁵Ëmbibi naid chiesha nebi. Matsesën Icbo Esuquidistu nec, quequin chuiquid nebi. Aid mibi tantiamenuen chuiquin mibi nashunquid nebi. ⁶Abitedi uanuna, qeshun, “Inchëshquio icboedi uëshëmbo yanquiota,” capampic Nuquin Papan. Adomboembidi Nuquin Papan chiaid pamumëdacbimboen tantienquiocboedi Nuquin Papan paucquin tantiamiac Esuquidistu Nuquin Papapadquid nec, quequin nuqui tantiec.

⁷Aden tantiec abipadquid yanabicshobi Nuquin Papan nadatiambocquin nabanquin Esuquidistu chuibenequid icmiondashi.

⁸Aden chuibansho mëyanaqui abi chuibenec nebi.

Padpiden-padpidemboen natiamiaqui, ¿Atotsimbi napeba? qesho Nuquin Papan dayacquio icmedenebi. ⁹Ëbi chieshënquid dadpen icnubi ëbi bëdambo icmequid aidi iquec.

Comapenen cuestanec, Unësec, qeshun nianaqui abi Esuquidistu chuibenembi.

¹⁰Esuquidistu mëyanquin unës uacpaden mëyanquin unës uatsen-unës uatsenshobi dayacquio icmedenioshi.

Adoacsho uincuenaidën dayacquio icmedeniaid nec, quequin utsibon isbededebi. ¹¹Adembi Esuquidistu chuibansho unës uatsiashi, quequin chuibenec nebi. Aid chuibansho unës uatsenaqui abipadquid unësesa yanebi, quec bëdamboec tabadeci. ¹²Aden tantiaquin aid chuibanac abi tantiaquid yanash aibëdi tabadec unësesa mibitedi yanendac. ¹³Ambi chiacpadomboen Nuquin Papan naindac, quequin tantiaquin chiombi, quequin Nuquin Papan dada uamiampicpaden tantiaquin Esuquidistu chuibanec nebi. ¹⁴Aden tantiaquin Nuquin Papan Esuquidistu uincuemiapaden aibëdi tabadmenuen mibitedibëdtabi ëbëd icquidtedi uincuemendac, quequin chiembi. ¹⁵Aid tantiaquid ma mibi icpanueshun chuibansho mëyanaid nebi. Mëyanaqui utsi dadpen Esuquidistu tantiaquido ma yanu qeshun chuibenec nebi. Aden chiac abi tantiaquid icsho isun, Mimbi naidtedi bëdambo iquec, Papa, quequin ma Nuquin Papa utsibon chuipanuna.

¹⁶Aden tantiec dayactiapibi quenquio iquebi. Tsusio budquimbi badiadquidën-badiadquidënquien

Esuquidistu tantiadonequidquio yanebi.
¹⁷Natiamiantequid ënëndendac.

Natiamiaid yashic Nuquin Papa yacno
 tabadec bédamboshë iquendabi.

Esuquidistupadquid icsaisa yec unësesa
 yanash ënëdtiapimbo iquendabi. ¹⁸Aden
 tantiec, Ëbi natiamiaid iquec, quiashic,
 Nuquin Papabéd tabadendabi, quequin
 comapenen tantiec tsadebi. Ëmbi
 isaidtedi ënëndendac. Nuquin Papa
 yacnocquid ëmbi isacmaidtedibéd
 ënëdtemaid iquendabi.

Nuquin Papabéd tabadte iquendac quiaid

5 ¹Con nami shëñibudash unësash
 nibëdnuc Nuquin Papabéd tabadec
 nami chuca uaid iquendabi. Nami chuca
 uaid ënëdtemaid matsesën
 nacnenacmaid nec, quequin tantiemi.
²U abucquio nidabi yec uëshquequid
 nebi. Adquiocsho nami chuca uaid
 ënden meniondac, Cuishon, quetsiabi.
³Aden meniac ëbibimboec isadsho
 isendac, quec tsadebi. ⁴Nami
 chodquequid icnuc uëshquec nuqui
 tabadec. Nami chuca uaid chodquesa
 menepashuni mabi unësesa icpanu quec
 nuqui tabadec. ⁵Con Mado Esuquidistu
 tantiaquid ëbéd abuc tabadmenuen
 ëbipadquid unësesa icmenu, quequin
 Nuquin Papan aton Mayan menetequid
 nuqui nec.

⁶Aton Mayan meniaid iquec nami
 chodquetequid abi iquequi chieshenquio
 yec dayacquio yec nuqui tabadec. Adec
 tabadash abuc Nuquin Icbobéd
 tabadendabi, quequin nuqui tantiec.

⁷Aton Mayan meniac nuqui isacmaid
 Esuquidistu cainec nuqui tabadec. Ëmbi
 isaid ëmbi caintemaid nec. ⁸Aden aid
 cainsho nami chodquesa badedquio
 menepashuni. Aden meniac Nuquin
 Icbobéd iquendabi, quequin nuqui
 tantiec. ⁹Aden tantiec nidaidën
 tabadequid Nuquin Papa bunacpadquiec

tabadnuna. Abuc nidash tabadec abi
 bunacpadquiec tabadoaindabi, quequin
 tantiemi. ¹⁰Adembidi abi
 tantiaquidtedishun naid ambi chuibante
 ushë chonoc Nuquin Icbon
 chuibanendac, quequin tantiemi.
 Utsi-utsien, Mimbi bédamboen nabanoc,
 quequin chuibanendac abitedishun naid
 cuidquid.

**Ma utsibotsen abi tantiaquid icpanu
 quequin chuibanaid**

¹¹Aden ambi tantiacpaden nabansho,
 Bédamboen mimbi nabanoc, Nuquin
 Icbon ëbi caindac, quequin tantiaquin
 ma utsibotsen Esuquidistu
 tantiapaueshun mibi chuibenec nebi.
 Aid tantiaquin nabanec bédamboec
 tabadsho Nuquin Papan tantiec. Ai,
 adec Pabado tabadsho ispombi, quequin
 adembidi mimbi chuipashun, quec
 tsadebi. ¹²Aden tantiaquin, Mibi
 bédambo iquec, ëbi camenuen mibi
 dada uashunenquio iquemi. Ëbi
 chienquiocquin, Bédamboec tabadquin
 ismiacimboecquidën ëbi icsamboen
 chuisho aido chuita, quequin mibi dada
 uashunemi. ¹³Aido, Pabado tantiate
 icsabudosh quec. Adembidi, Nuquin
 Papan chiacpadomboen ëmbi nabansho
 isun muaquin aidon chuibanec. Adec
 muatsiash quenquiocquin ma
 Esuquidistu tantianu queshun aid
 chuibenec nebi utsibon
 chuibenenuiocnobi. ¹⁴Chian
 anëdënquequid icsambocquid
 nësianushe quiash matses icsaid
 bedshunash abided cuidadec icsaisa
 Esuquidistu unësapanëdash, quequin ma
 utsibon tantiapaueshun chuibenec
 nebi. ¹⁵Ma ëmbi naid chiac ëbi
 tantiaquido ma ëbëdi icpanu, quiash
 unësash uincuempanëdash Esuquidistu.

¹⁶Adec unësash Esuquidistu
 uincuempanëdash, quequin matses

unēsash uincuenta iquec, quequin abi tantiaquidon tantiec. Ęnden, matsesquio Esus nec, quiondaidi nēbi, Nuquin Papan Chomiaid yec matses tantiec unēsash uincuepanēdash, quequin tantiemi. ¹⁷Abi tantiaquid ambi tantiamiaid nec. Ęnden matsesēn tantiacpadquieic icboedi Esuquidistun tantiacpadquieic bēdamboec tabadec abi tantiaquidquio. ^{18,19}Nuquin Papan Ęndenquimboshē tantiampicpaden Esuquidistun naid nec. Nuquin Papan chiaid niacquid nuqui icboedēmbi matses icsaid bedshunash abided cuidadec Esuquidistu unēsapanēdash, quequin tantiaquin ma aidquio utsibon tantipapanu queshun ambi naid nuqui chuibenec. ²⁰Nuquin Papan Esuquidistu chuibeneta cac nebi. Adquid icquin chiac abi tantiaquid yanash, Ębi icsaid bedshunash Esuquidistuded cuidadpanēdash, quequin abēd icnuequin aid tantiaquiota. ²¹Ambi cuiddiadquid nuqui icnubi Esuquidistu icsaisaded Nuquin Papan cuidpanēdash ma Esuquidistu ambi cuidaidpadquid tantiaquidtedi icsaisa yampanueshun.

6 ¹Matses bēdambo icmenu, quequin Nuquin Papan chiaid bēpiscudmane queshun ambi tantiamiacpaden nabanec tabadta. ²Nuquin Papan chiampid chuinu. Tantia.

“Mibi bēdambo icmete ushē chonoc cuēnsho tantiombi.

Tantiesa icboedi nēid ushēnquio mibi tantiamiombi.”

Aden Nuquin Papan chiampicpadomboen bēdamboen tantia. Nēbi Nuquin Papan bēdambo mibi icmenu cac, Ai, cata. Nēid ushēnquio ambi aton bacuē icmete ushē nendac.

Pabado natiamiaid

³Icsamboec tabadquimbi Pabado Esuquidistu chuibansho, Tantiatiapibi,

utsibo quetiapimboec bēdamboec tabadec nebi. ⁴Nuquin Papan chuimiaid yec nadec tabadebi: Chieshenquio yec dayacquiocquin ambi chiaid chuibenec bēdamboec tabadec nebi. Natiamiaid yec adequi tabadebi. ⁵Utsin cuesaqui adequi bēdamboec tabadebi. Quēnēn nauedaqui adequi bēdamboec tabadebi. Nuquin Papan chiaid ěmbi chuibanac cuesnanubi padenquio yec bēdamboec tabadebi. Natia chonoadbudequi adequi bēdamboec tabadebi. Utsi tantiaquin nabanec natia ushcasequi adequi bēdamboec tabadebi. Bunquieic bēdamboec tabadebi. ⁶Icsainquio yec bēdamboec tabadebi. Nuquin Papan chiaid tantesa uainquio yec bēdamboec tabadebi. Tantiatiapimbo yec utsibo tabadsho isun adembidi Nuquin Papan chiaid chuibenec nebi. Naden chiac tantiatsiash, queshun chuibenembi. Adembidi, Nashunquin chiac tantiatsiash, quequin adquid nashunembi. Nuquin Papan Mayanēn tantiamiaid yec bēdamboec tabadebi. Muainquiocquin utsi abimbo tantiec adecbidi tabadebi. ⁷Abimbo chuibanec tabadebi. Nuquin Papan nadatiambocquin nac adequi bēdamboec tabadebi. Nuquin Papan chiacpadomboen nabanec nebi ma utsibon abi icsaid ěmpanueshun. ⁸Ębi chiec: Pabado bēdambo iquec, quenubi adequi tabadebi. Utsin ěbi chuioaic: Pabado icsambo iquec, quenubi adequi bēdamboec tabadebi. Ębi icsamboen chuinubi adequi bēdamboec tabadebi. Ębi bēdamboen chuinubi adequi bēdamboec tabadebi. Muaquid nec, quenubi abimbo chuiquid nebi. ⁹Ębi isquidēmbi, Ęmbi isacmaid Pabado nec, caqui ěmbi chuibansho tantiaboedo nec caimbi. Ębi unēs uate bunubi abi chuibanec capucuenebi. Mēyanaqui unēsabi yec nidebi. ¹⁰Unēsquio icmiaqui

Esuquidistu tantiec bédambo iquebi.
 Con na nibédsho isun adembidi
 Esuquidistu chuibanec nebi ma
 Esuquidistu tantiec utsibo bédambo
 icpanueshun. Con na nibédsho isash
 Nuquin Papan bacuë yec aton natedi
 con na nec, quequin tantiec tsadebi.

¹¹Chuitiapibi, quenquiocquin ëbi
 natiaboedtedi mibi chuibanombi. Mibi
 comapenen tantiaquin ëmbi nabanaid
 mibi chuibanombi. ¹²Mibi
 tantiaquiquin chuibanquid ëbi icnubi
 ëbi tantiaquin chienquo mimbi iquec.
¹³Pabadon con bacuëbo caido nebi,
 quequin mimbi naid mimbi
 tantiaidbédta ompoenquiocquin ëbi
 chuiban, caimbi mibi.

**Esuquidistu tantiesabédttambi icsain
 nainda quiaid**

¹⁴Esuquidistu tantiesabédttan
 icsamboen nainda. Adembidi, chido
 Esuquidistu tantiesa bedesa dadan.
 Adecbidi, Dada Esuquidistu tantiesa con
 champi imenu, quesa aton papa. ¿Nuquin
 Papan bédambo icmiaidënda ambi chiaid
 niacquidbédttan nabampadic? ¿Nuquin
 Papan Mayanën tantiamiaidënda Icho
 chieshëquidbédttambi chieshëmpadic?
¹⁵¿Esuquidistu Satanaspadquidta nedic?
 Padenquo. ¿Esuquidistu tantiaquid abi
 tantiesapadquidta nedic? Padenquo.
¹⁶¿Nuquin Papan ambi uaidbimboecnuc
 matsesën nacenaid tantiaquidta aton
 Mayan Nuquin Papan meniaid icpadic?
 Padenquo. Abi tantiaquid aton Mayan
 menec. Nuquin Papan dada uamiampid
 dada uanu. Ista.

“Èbéd icquidbéd iquendabi;
 Aidbëdi capuebi;
 Aton papa nebi;
 Con matses adquido nec,

¹⁷Con matses icquin ëbi tantiesan
 ëmbi chiaid niacacpadomboen
 nainda.

Adecbidi aid icsacpadec tabadenda.
 Adecbidi icsainquo yec tabad.
 Adquid èbéd iquec cho caindambi.

¹⁸Adquidon papa iquendabi;
 Adquid ëmbi con madobéd con
 champi caid iquendac, quec
 Nuquin Papa.” Abi tantiaquido
 nadatiambocquidën aden chiec.

7¹Naden nanuna, quequin Nuquin
 Papan chiac nuqui naid
 icsatedibédttabi nuqui tantiaid icsatedi
 ënu, quequin Nuquin Papan
 chiacpadomboen nabanec
 tabadtenenuna.

**Unësquo icboedi mimbi naid tantias
 bédamboshë iquebi quiaid**

²Adembidi, èbédttabi èbipadquid
 tantiaquiota. Icsamboen nashunesa nebi.
 Adecbidi icsamianesa nebi. Adecbidi
 muaquin utsin na bedesa nebi. ³Pabado
 tantienquo yec icsaobi mibi camenuen
 nëid chuiquin dada uainquo iccombi.
 Mibitedi tantiec tsadebi, quequin
 padpiden chiembi. Abimbo caimbi.
 Unësequi mibi bëshuntiapimbo
 iquendabi. ⁴Mimbi
 chiacpadpenquicboedëmbi naosh,
 quequin choquidën chioshi. Aden
 chuisho tantiasahun, Nuquin Papan
 chiacpaden nabanquidquo nec, quequin
 mibi chiec nebi. Unësquo icboedi
 mimbi naid tantias bédamboshë
 iquebi. Utsin natiamiaid icshobi
 bédambo iquebi, mimbi ëbi camioc.

⁵Nidaid Masedonia caid yacno choash
 quenentiapimbo iccobi. Esuquidistu
 tantiesan nac natiapobi. Esuquidistu
 tantiaquid icboedëmbi tantesa uatsias,
 quec quenenenquo iccobi. ⁶Unësquo
 icsho ëbi tantiaquin Nuquin Papan Tito
 padpiden chomiosh ëbi bédambo
 icmeoanuen. ⁷Choashun mimbi aid
 tantiaquin nabanaid Titon chioshi.
 Adembidi, ëbi iste mibi bunaid chioshi.

Mimbi dada uaid isash unèsquo icquin, Codinto yacnocquidon mimbi chiacpaden nabanosh, quequin Titon chioshi. Aden chiac bédamboshë yanobi ad yenquo icboedi.

⁸Mimbi dada uaid isash Codinto yacnocquido unèsquo iccosh, qesho tantias, Icsambo icchitobi, quenquo iquebi. Aden dada uaic icsambo iccobi, quietiapimbo yequi mibi unèsquo yacpadequi unèsquo iccobi. Yuec mibi ad yenquo iccoc. ⁹Adecbidi nëbi bédambo iquebi. Èmbi mibi unèsquo icmiac mibi icsaid ënquin Nuquin Papan chiacpaden nabanec, quec utsibo. Aden chuisho tantiaquin mibi unèsquo icmequin mibi icsabudmiambo iccombi. Unèsquo icmiaqui mibi bédambo yanoc. ¹⁰Unèsquo icmiac, Nuquin Papan chiaid niaccombi, quiash unèsquo icquin mibi icsaid mimbi ënac. Adsho isun Nuquin Papan ënëdtiapimbo noc aibdëd mibi icmendac. Aden unèsquo icmiaqui, Bédambo iquebi, mibi quendac. Adecbidi mibi icsacpadeç icsainquo mibi icpendac. Padnuen Nuquin Papan chiacpaden niacquin ënesa abi natiamiaiduidi tantiec Nuquin Papa yacno pudedtiapimbo iquendac. ¹¹Padnuen mibi unèsquo icmiac nëbi ambi chiaid comapenen tantiate bunec mibi. Aid padpiden tantiaquin, çatotsi quiashini icsao? quequin mimbi chuihoc. Nuquin Papan cuidnushe quequin mibi icsaid mimbi ënoc. Ademibidi, Èbi padpiden bédamboen is, quequin Nuquin Papa mimbi chioc. Icsashun chienquioçboedëmbi nëbi cuembo bédamboen chuinu, quequin mimbi chuibanoc. Aden mibi icsaid ënacsho isun mibitedi icsaquin ëntiapimbo icquidën nacpaden naisa nec, quequin tantiembi. ¹²Icsaquid ambi icsa uanaidbëdtabi chuinen mibitedi

dada uainquo iccombi. Abentsëc icsash abitedi unèsquo iquec. Adquiecbidi ëbi unèsquo icmete bunesa mibitedi nec, quequin Nuquin Papan tantiamiac adomboembidi mibitedishun tantiapec, quequin ¹³ëmbi tantiacpaden naquin mimbi bédambo iquebi camiaid nebi.

Adembidi Tito yuedquin mimbi bédambo iquebi camiaidbidi niosh. Èbi yuedenquioçtsiash queboedi niosh. Yuedoshi, Tito qesho tantias bédamboshë iquebi. ¹⁴Mibi nidmembi, Tito, qeshun, Èbi yuedquin nashunacpadomboen Codinto yacnocquidon mibi yuedtsiash quequin chiombi. Aden chiac mibi yacno Tito choacsho ëmbi chuioçpadomboen mimbi nashunac. Aden tantias, Abimbo chiombi, quepobi. Èmbi mibi muainquioçquin chuibanacpadeç adquioçbidi mibi nabanec tabadaid abimbo iccosh. Adomboembidi Titon mibi isbanosh. ¹⁵Èbitedi chushcatsiash, quequin mibitedishun Tito yuedpanëdac. Aden yuedac, Naden nata, quiosh Pabado, cac cacuidanenquioçquin mimbi nabanoc, quec Tito. ¹⁶Adoaidi ambia tantiaquid icquin ëmbi chiac mibitedishun nabanendac, quequin tantiembi. Aden tantiec bédambo yec tsadebi.

Aton na nibëdquid icsho aton na dadpen icquid menequid

8 ¹Nuquin Papan tantiamiac nidaid Masedonia caid yacnocquidon, Esuquidistu tantiec iccuedquidon, nëbi bédamboen nabanec tabadaid chuinu. Tanta. ²Natiamiaqui bédambo iquebi quec aido tabadec. Adec tabadquin Esuquidistu tantiaquid utsibo tantiaquin menenuquin aton na daëdpactsëc musucshun dayun uaosh. ³Èmbi, Meneta, cainquioçnobi aton na bedtequid naimbudtsëcquien menenuquin

bedbanosh. ⁴Esuquidistu tantiaquid utsibo, nidaid Udeya caid yacnocquido, aton na nibëdec natiaic, quequin chiac Masedonia caid yacnocquidon, Aido menenuna, quequin comapenen chuiposhi. ⁵Mitsana daëdpactsëc icnuc utsibo mimbi menetiapimbo icpec, quequin chuinu quenubi Nuquin Icbon tantiamiac, Codinto yacnocquidon chiacpadomboen bedbanshun menenuna, quequin aidon chioshi. ⁶Adomboen menenun bedbamposh. Adosho isun Tito nadombi. Mimbi ënden nidaid Udeya caid yacnocquidon natiaid chuibanac Nuquin Papan tantiamiacpadomboen menenueshun Codinto yacnocquidon tauain bedbanshun dayun uapondash. ¿Ambi chiacteda bedbanoshe? Isnu, qeshun istanta, quequin Tito chiombi. ⁷Naden naquid Codinto yacnocquido nec, quequin mibi tantiembi. Nuquin Papan Mayanën tantiamiaidquio yec comapenen Esuquidistu tantiaquido nec. Esuquidistu tantiaquin aid chuibanec. Nuquin Papan chiaid ambia tantiaquidquio Pabado nec, quequin tantiaquin, Naden nata, quequin ëmbi chiacpadomboen badedquio comapenen naquidquio mibi nec. Adembidi ëbi tantiaquin naquido nec. Adquid mibi nec, quequin, Natiamiaido menenuen bedbanquin dayun uaimbi, mibi quiacpadomboen nabanquiota, quequin mimbi iste dada uaimbi.

⁸Meneta, quenquo iquebi. Natiamiaido tantiaquin menenu, abi quiacpadenda Codinto yacnocquidon menebampashe. Isnu, quianec, Codinto yacno nidta, quequin Tito chiombi. ⁹Nuquin Icho Esuquidistu abuc tabadec abitedishun Icho icboedi nuquitsen abuc abëdi tabadmenuc matsesash nidaidën tabadnuc aton na nibëdpadenec. Aidën matses tantiaquin nabanacpaden utsibo tantiaquin nabanta.

¹⁰Ëmbi tantiacpaden mibi adembi chuinu. Tantia. Mibi bunacpadomboen, Menenun bedbanshun dayun uanuna, qeshun seta utsin mitsana bedbanshun dayun uaquin mimbi tauapondac. ¹¹¿Aden nanuna, qeshun mimbi chiacted ënquinda bedshun dayun uao? Padenquiocquin adota. ¹²Mitsana daëdpactsëc icnuc daëdpactsëc musucshun menesho isash, Dadpen meneta, quenquo Nuquin Papa iquec.

¹³Aton na nibëdquid icsho, Natiacquin meneta, quenquo iquebi. Aton na nibëdquid icsho aton na dadpen icquidën menec. ¹⁴Mitsana dadpen icquid mimbi musucshun meniac aton na nibëdquid bëdambo iquebi, quepec. Aden meniac mibëdi aton na nibëdquid bëdambo iquendac. ¹⁵Nuquin Papan dada uamiampid nad iquec. Chuinu. Tantia. Petequidëmpi Nuquin Papan mana caid meniaid chuiquin: “Shubun tabadquid dadpeshun aided-aidtedquien bedbanshun peshun napi uaid nibëdosh. Adecbidi, aton shubun daëdpactsëc tabadquidon aided bedbanshun peshun napi uaid nibëdosh.” Adec Nuquin Papan meniaidtedi bëdambo yampicpadec aton na dadpen icquidbëdi ambi meniaido bëdambo yampec.

Tito Codinto yacno nidte

¹⁶Nëbi Tito mibi chuinu. Tantia. Ëbi mibi tantiamiacpadomboen Nuquin Papan Titotsen mibi tantiamiac. Aden Titon mibi tantiasho isec, Mibi bëdambo iquec, Papa, quec tsadebi. ¹⁷¿Codinto yacno tsutsi nidpatsiash? quequin ëmbi chiac, Ëbibi nidebi, quiosh Tito. ¹⁸Tito mibi yacno nidnuesho tantiashun nuqui con utsi caid utsi Titobëdi nidta caombi. Aidi Esuquidistu chuibanquid nec, quequin utsibon chiec. Bëdamboquid nec. ¹⁹Nidaid Masedonia caid

yacnoquidon, Esuquidistu tantiec iccuededquidon ěmbi dayun uaid Pabadobědtan buanec nid caidbidi Titoběd nidquid nec. ²⁰Aid daěd ěbědi nidsho isash, Nuqui na buanquin ampetsiash, quetiapimbo utsibo iquec. ²¹Nuquin Papan tantiamiacpaden aidobědtambi bědamboen Masedonia yacnoquidon dayun uaid buanshunquin mitsana bedbidanec Udeya yacno nidebi. Ampenquiocquin buanec ma quenueshun aidobědtambi buanshunembi.

²²Tsyuec nidebi, quequin utsibobědta Tido mibi yacno nidmembali. Ěmbi nata cac bědamboen nabanquid aidtedi nec. Mimbi chiacpadomboen nashunquido Codinto yacnoquido nec, quec aido mibi yacno nidec. ²³Mibi nashunquin ěbědtambi Esuquidistu chuibanquid Tito nec. Aidbědi Esuquidistu tantiaquid utsi nidec. Esuquidistu tantiec iccuededquidon nĕuĕshquio puduanec Codinto yacno nidta caboedi Titoběd nidec. ²⁴Naden mibi chuiquin aido chiombi: Abi yacno choacsho isun Codinto yacnoquidon mibi nashunendac. Ěmbi chiacpadomboen nashumbanta ma mimbi nashumbanacsho aido nidmequidon Masedonia yacnoquidon tantiapanuna.

9 ¹Ěnden Esuquidistu tantiaquid utsibo tantiaquin nashunta quequin ěmbi chiac, ²Adonona, queshun mitsana bedbanquin mimbi tauaondac. Adsho isun nidaid Masedonia yacnoĕsh Esuquidistu tantiec iccuededquido mimbi menuequin chuibocpadomboen chiombi. Abentsĕcshun-abentsĕcshunquien menebanquin dayun uanuna, quequin seta utsin mimbi chuibocpadomboen ěmbi chiac Masedonia yacnoquidotsen, Adomboembidi nabanembi, queoaposh. ³Aden aidon chuisho tantiashun nuqui

con utsi caido mibi yacno nidmembali mimbi chiondacadpaden bedbanambo icnushe queshun. ⁴Nidaid Masedonia caid yacnoĕsh Esuquidistu tantiec iccuededquido ěbědien tsyuec mibi yacno nidchitec. Aidobědi mibi yacno choshon ěmbi chiacpaden mimbi bedbanambocsho isash, Abimbo chiacbimboen chuichitombi, quec natiaic bĕpiutsiabi. Adquiecbidi mibi icoaic. ⁵Adquio icnushe queshun utsiboba mibi yacno nidmembali. Aido mibi yacno choacsho mimbi chiondacted bedbanquin dayun uaid mimbi ismetsiac, Abimbo chiombi, quequin. Aido chonoc mimbi chiated bedbanquin dayun uambocboedĕmbi nĕbi mimbi bedbampec. Aden mimbibi bedbanquin mibi menete bunacteduidtsĕqui mimbi menec. Utsimbic, Menetiapibi, queboedĕmbi utsin, Bec cho, cac aton piucquid tantiec unĕsquo icquin menetsiash. Aden tantiaquin menenda.

Nuquin Papan na dadpen bedmiadĕn aton na nibědquid menequid

⁶Nuquin Papan chiaid chuinu. Adembi tantiata. Tied icbon daĕdpactsĕc nitsinac caniaash ĕshĕacsho aidtedtsĕcbidi bedpec; dadpen ambi nitsinac caniaash ĕshĕacsho dadpen bedpec. ⁷Adquibidi aton na icquid iqueque. Tantia. Chuinu. Nĕidted menuequin ambi chiated menequid. Ěmbi meniaid tantiash bědambo iquebi, quepec adquid. Utsimbic, Menetiapibi, queboedĕmbi utsin, Nĕidted bec cho, cac menepec. Aden utsin chiated meniash, Bědambo iquebi, quetiapimbocquin menec. ⁸Mitsana menete bunquin mimbi chiated menesho isun Nuquin Papan uesadmenquiocquin mimbi bedmec ma utsi-utsien menebampanueshun.

⁹Nuquin Papan dada uamiampid adomboembidi chiaid nad iquec:

“Nuquin Papan dadpen bedmioshi, quequin tantiaquin aton na nibëdquid utsi-utsien menebanec.

Aden menequid tantiaquin ënenquiocquin ambi naboeð Nuquin Papan chuibanendac.”

¹⁰Ambi meniaido menequidën bëdambo icmec, quequin ambi chiacpadomboen Nuquin Papan matsesën na daëd uaindac. Adecbidi ambi uaid tiedën caniquid ëshë abentsëc siaid dadpen yanec. Matsesën petequid adquiecbidi dadpen yanoaic. Adecbidi utsi menequid mibi icsho isun Nuquin Papan mibi bedmedenec ma mimbi meniaido dadpen icpanueshun. Aden mimbi dadpen menebanac aidontsen ambi bedaid musucshun utsi meneoapec. ¹¹Aden mimbi meniac utsibotsen, Bëdambo iquebi, quec tabadec. Adec tabadquin mimbi meniaid tantiaquin, Nuquin Papa bëdambo iquec, quequin mimbi meniaidon chiendac.

¹²Nuquin Papa tantiaquid icquin aton na nibëdquid Esuquidistu tantiaquid dadpen icsho menebanquin mimbi bëdambo icmiaid dadpen iquendac. Adembidi, Nuquin Papa bëdamboshë iquec, quequin aidon chuibanendac.

¹³Meniacsho isash, Esuquidistu tantiaquid nebi, quequin abimbo chuiquidquo aid nec, quequin mimbi meniaidbëdtambi utsibon mibi chuibanendac. ¹⁴Adquidquo nec, quequin utsibon mibi chieç. Mimbi tantiamiacpadomboen nabanquidquo Codinto yacnocquido nec. Aido bëdambo icme, Papa, quequin mimbi meniaidon adomboembidi chiendac.

¹⁵Aden aidon chuinubi naden nuqui Nuquin Papa chieç. Mimbi chomiaid Esuquidistu ëbi bëdambo icmenuec ëbi

icsaid bedshunash abided cuidadec unësash uincuempanëdash. Aidpadquid utsi nibëdec, Papa, quequin nuqui chieç.

Ëmbi dada uacpaden mibi yacno choshon adomboembidi nabanembi quiaid

10 ¹Comapenec chushquenquiocquin matses bëdamboen tabadmenuequin chuibanquid Esuquidistu icpanëdash. Mibi yacno choshon Esuquidistupadquid icnuequin ëbi chieshënquid bëdamboen tabadmenuequin chuibanendambi. Ëbi chieshënquido nadec onquequin ëbi naden chieç, quec. Nuquibëd tabadquin dacuëdacbimboecquin comapenen Pabadon chushcainquo iquec. Utsi yacno nidshun dada uaquin comapenen chushcaic, quiosh. Mibi chieç adosh. ²Adsho tantiaish mibi yacno choash tabadquin chushcante bunenquio icquimbi, Ambibi tantiacpaden nabanquid Pabado nec, quequido bëdamboen chuibanembi. ³Esuquidistu tantiaquid yanshun icsaquidën tantiacpaden nabanesa nebi. ⁴Mibi yacno choshon matsesën tantiacpadpenquiocquin Nuquin Papan tantiamiacpaden ëbi chieshënquido Satanasën icsamboen tantiamiaido Nuquin Papan chiaid chuibanendambi. ⁵Satanasën tantiamiaidon Nuquin Papan chiacpadomboen niaquec. Utsibon Edoen Nuquin Papa caid nibëdec, qeshun ëmbibi tantiacpaden naic bëdambo iquec, quequin tantiamiaido nec. Aden tantiaquid icsho isun ambi icsamboen tantieç pamumëdacbimboe yaid ëmenu quequin Nuquin Papan chiaid ëmbi chuibanubi abi pamumëdacbimboe yaid padpidec pausudtiapimboçnoc paucbanshun ambi tantiacpaden Nuquin Papan pausunendac ma ambi chiacpadomboen

namenuquin. ⁶Aden chuibanshun Nuquin Papan chiacpadomboen utsin-utsinquin abi icsaid ënabicsho isun comapenen cuidendambi.

⁷Ambi isaiduidi tantiec utsi-utsiec onquec. Aido onquiaid chuinu. Tantia. Esuquidistu tantiaquid nebi, quequi, Pabado icsactsëcquio isadtsec, quepec aido. Aden chuíquido, Esuquidistu tantiaquid nebi, ëbi qesho tantias, Muec nec, quetiapimbo iquec. ⁸Abi tantiaquid ëbi yansho, Esuquidistun, Ëbi chuibeneta, cashumbic abi tantiaquido abi tantiadonequid icmenuequin chuibanquidbidi icmiondashi. Adquid icmiac ambi chiaid ëbi chieshënuquido tantiamenuen chuibanubi aidon tantiaid icsa paucshun ambi tantiacpaden Nuquin Papan pausunendac. Adoacsho isash, Abi chuibanquid Esuquidistun icmiosi, quequin tantiec, Adesa nebi, quetiapimbo iquebi. Aden tantiaquin ëmbi chiacpaden naimbi mibi yacno choshon caimbi. ⁹Adquid nebi, quequin, Dacuëdampambocquid Pabado nec camenuen dada uainquo iquemi. ¹⁰Mibi aden dacuëdmenu, quenquo icnubi ëmbi dada uaondaid bedshun isun naden utsin ëbi chiosh quec. Chuiquidën comapenen chushquequin chiacpadomboen Pabado dada uaic. Nëmbo choshon ambi dada uaquin chiacpaden chuitiapimbo icpec. Chichompibictsecsho ëbi isun, Chuiquidida nepec, quetsëcquin istsëccombi. Tantiatiapimbocnoc chuibanondash, quequin aidon ëbi chiec. ¹¹Aden ëbi chiec onquequidën bëdamboen tantia. Chuinu. Ëmbi dada uacpaden mibi yacno choshon adomboembidi nabanembi caimbi.

¹²¿Esuquidistun, Ëbi chuibeneta, caid nebi, quepecta ëbi chieshënuquido iquec? ¿Adenda Esuquidistun, Ëbi chuibeneta, caidënuquo utsi icsamboen chuepec? ¿Esuquidistun, Ëbi chuibeneta, caid nebi,

quequin abimbo chuiquidquio yec muaquin chuiquidpadquid nebi, quepectabi ique? Padenquo iquebi. Esuquidistun, Ëbi chuibeneta, caid nebi, quec muaid chuiquin abipadquid utsibëdtambi icsamboen nabanash, Nuqui bëdamboen naoc, cananec. Ambia icsamboen nabanquidën chuibanquin ismiac ambibi tantiacpaden nabanec abipadquid yanquidon. ¹³Ëbien Nuquin Papan tantiamiacpaden chuibanquid nec. Ambi tantiamiacpaden mibitedi chuibanquid nebi. ¹⁴Codinto yacno nidshun anouidi tabadquin Esuquidistu chuiban, Nuquin Papan cac mibëd tabadquin chuibanondambi. ¹⁵Adembidi, Utsi yacno nid, Nuquin Papan cac nidshun utsibon chuibanondash. Aden aidon chuibanac anocquidotsen Esuquidistu tantiaquid yanondash. Aido Esuquidistu tantiaquid yansho isash ëmbi chuibanaido nec, quenquo iquebi. Mibëdi tabadquin ëmbi chuibanac aid tantiaquid mibitedi yanondac. Adsho isash Esusquidistu tantiadonequidquio yampashun, quec mibi tantiec tsadebi. ¹⁶Esuquidistu ëmbi chuiban-chuibanac aid tantiadonequieci mibitedi tabadsho isash Esuquidistu utsin chuibanacmanombo chuibanoaic nidendabi caombi. ¹⁷Aden Esuquidistu chuibanac, Ëbibi bëdambo ictiapimbocquid mimbi bëdambo icmiaid nebi, Papa, quequin ma Nuquin Papa Esuquidistu tantiaquidtedishun chuibanuna. ¹⁸Bëdamboen nabanombi, abibi qesho Nuquin Papan bëdamboen istiapimbo iquec. Ambi, Bëdamboen mimbi naoc, caiduidi ambi bëdamboen isaidquio nec.

Pabado muesa icnubi muaquido

11 ¹Nëbi ëmbi dada uaid isash, tantiesa onquiacimboen mamëmenuquin Pabado chiec,

quenquiocpashun caimbi mibi. Aden tantiatsiash, quequin abi dada uaimbi. Nēid bedash ěmbi abia dada uaondaia isec mibi onquiapadec nēbi nēid mimbi iste dada uaid isec onqueta. ²Nuquin Papan tantiamiacpadec mibitedi cudasquidquio nebi. Adec cudasquin aton champi utsin, Bednu, cashunac utsin, Bednu, cac Bedadenda, quequin amēn aton champi chiacimboen, Esuquidistun bednu caid yec icsamenuequidēn, Bednu, cac, Bedadenda, caimbi. Esuquidistu ěmbi chuibanaido mibitedi bedec choeque. ³Ěmbi chuibanac Esuquidistu tantiauidquimbi nisi bēdambo isadacimboecquidēn muaquin chiac Eban Nuquin Papan chiaid tantesa uampicpaden mimbi Esuquidistu tantesa uatsiac, quec tsadebi. ⁴Adec ěbi tsadnubi Codinto yacno choshon utsin Esuquidistu ěmbi chuiboed utsi uain chuisho badedquio tantiec aidon. Adembidi, Mayan utsi iquec, qesho tantiash, Ěbi mene, quec mibi. Adembidi, Mibi bēdambo icmequid Esus utsi iqueque. Aid tantiata, quequin ěmbi chiaid utsi uain chuisho, Abimbo iquec, quequin tantiec mimbi. Aden utsibon ěmbi chuiboed utsi uain chuisho tantiec, qesho tantiash Esuquidistu tantesa uatsiash, quec tsadebi. ⁵Esuquidistun ěbi chuibeneta cac Nuquin Papan tantiamiacpaden chuibenec nebi. Aden chuibenenubi mibi, Bēdamboenshē utsibon chuibanacpaden Pabadon chuibanenquio iquec, qesho tantiash, Icsamboen chiombi, quetiapimbo iquebi. ⁶Utsibon bēdamboenshē chiapadec Pabado onquenquio iquec, mibi quenuc Esuquidistun, Ěbi chuibeneta, quequin ambia tantiaquidēn tantiamiacpadomboen mibitedi chuibanombi bēdamboen tantiaquin.

⁷ĈCodinto yacnocquido ma Esuquidistun bēdambo icmepanueshun

chuibanequi, Bec cho, quenquio yectabi icsape? ⁸Mibi Esuquidistu chuibanu quiash Esuquidistu tantiec iccuededquid utsibon na ampiacimboec tabadobi. Aidon aton na meniaqui aido nashunenquio yec mibi yacno nidash tabadquin mibi nashunquin Esuquidistu chuibanondambi. ⁹Adec mibi yacno tabadquin Esuquidistu chuibanec bunec tsadec, Bec cho, quenquio iccondabi. Nidaid Masedonia caid yacnoēsh choquidēmbini meniondash. Aden ěnden, Bec cho, mibi cainquio iccondacpadec nēbi adquecbidi tsadebi. ¹⁰Esuquidistun chuimaidquio nebi. Adquid icquin adquid nebi quequin chiembi mibēdi nidaid Acaya caid yacnocquid utsitedi, Padi. Aden chienda, quetiapimboec. ¹¹ĈAtotsi quiashini, Bec cho, quenquio icpe? ĈMibi tantienquiocquindambi mibi, Bec cho, cainquio icpe? Mibi tantiec tsadebi. Codinto yacnocquido Pabadon tantiaid nec, quequin Nuquin Papan tantiec. ¹²Aden mibi tantiaquin, Bec cho, cainquiocquin Esuquidistu chuibenec nebi mimbi bēdamboenshē chuibanquid caid: Pabado nabanec tabadacpadec tabadebi, quetiapimbo icnubi.

¹³Aido Esuquidistun ěbi chuibeneta caid nebi quec muaic. Adec muaquin mibi yuaic. Aidon abi tabadaid icsa ompoec. ¹⁴Aido tantiamequin ismequid Satanas nec. Nuquin Papan abi yacnoshon uaid mayan bēda aiddēdi tabadquido icsaisa yacpadquid nebi, quequin abipenquiocnoc chuiquin ismequin tantiamiac ¹⁵adquecbidi ambi namiaidtedi bēdamboquidimboec capucuedec. Cuidte ushē chonoc aido icsaid Nuquin Papan comapenen cuidquin chiendac.

Pabadon abi mēyanaid chuibanaid

¹⁶Adembidi chuinu. Tantia. ĈMamēmenuequin tantiesa

onquiacimboendambi ëbi icaid
 chuibandio? ¿Utsin aden chuibansho
 tantianu, quepecta mibi ictsia? Aden
 chuibanenquiocquin ëbi icaid
 chuibanuna, ¹⁷Chuita, Nuquin Icbon
 cainquiocnobi. ¹⁸Abi icaid
 utsin-utsinquien chuibanec, quequin
 tantiaquin adomboembidi ëbi icaid
 chuibanuna. ¹⁹Bëdamboen
 tantiaquidquio nebi, qeshun
 mamëmenuequin ambembi
 chiacimboen chuisho tantiec mimbi.
²⁰Ambembi chiacimboec, Yuanu,
 qesho tantias icsamboen
 tantiaquidbimboec mibi yuadte bumpec.
 Ambembi chiacimboec, Bec cho,
 qesho icsamboen
 tantiaquidëmbimboen menebanec
 mimbi. Muaquin chuiquin mitsana
 bedshunaqui cacuidenquio yec tabadec
 mibi. Aden mitsana ambembi isash,
 Mibi chuiquid nebi, qesho tantias,
 ¿Tsuntsin mibi adquid icmiosh?
 quenquiocquin aidën chiacpaden
 nabanec mimbi. Aton yuabimboecnuc
 mibi mëyanaqui, Min yuapenquio nebi,
 quenquio iquec mibi. ²¹Nuquin Papan
 yua icta cac, Padi, quetsias, quequin
 aden mibi chuitiadquidëmbi chienquio
 iccondambi.

Mibi yuanuequidon ambembi abi
 icaid chuibanac. Adomboembidi
 Pabadon abi icaid chiec, Codinto
 yacnocquido quetsias, quequin
 tantiaquin ëbi icaid chuibanu. Tantia.
²²¿Mimbi bëdamboen chuiquid nec
 caid, Isadaidbo nebi, quepecta iquec?
 Adembidi, Èbi isadaidbo nebi, caimbi.
 ¿Abadauanën tsyuecquid nebi, quepecta
 aido iquec? Adembidi, Èbi Abadauanën
 tsyuecquid nebi, caimbi. ²³¿Esuquidistu
 chuibanquid nebi, quepecta aido iquec?
 Èbibi Esuquidistun ëbi chuibeneta
 caidquio nebi. Esuquidistu chuibanquid
 ëbi yacpadquid utsi nibëdec. ¿Mibi

mamëshumenuequindambi aden
 chuipadi? Padenquio. ¿Èbi yacpadquid
 utsida iqueque? Tantiata. Chuibanu.
 Utsi bëdiactsëc chonoadnuc comapenec
 chonoadobi. Adecbidi quënën nauedaid
 utsi icnubi quënën nauedteniaid nebi.
 Adecbidi utsi bëdiactsëc cuesaid icnuc
 yuen cuesto-cuestoid nebi. Mëyanac
 unëstsenobi, utsi quenubi aden mëyanac
 unëstsen-unëstsemboedi nebi.
²⁴Isadaidbon cueshanten 39ted
 tambanquin cacuestoniondashi.
 Yuecshun aidtedembidi. Yuecshun
 aidtedembidi. Yuecshun aidtedembidi.
 Yuecshun aidtedembidi yuenquio
 cacuestonioshi. ²⁵Adembidi cuesten
 cuesoshi. Yuecshun padpiden. Yuecshun
 padpiden. Adembidi cuënoten se-sioshi.
 Adecbidi cano dapa ëbi antsadnubi
 bincudec cano dapa mentoadosh.
 Yuecash adecbidi. Yuecash adecbidi.
 Adecbidi cano dapa abentsëc bidiadec
 mentoadan abentsëc ushec cano cuëshë
 bedash mentoadmane quiash
 noadpondabi. ²⁶Adecbidi quenenenquio
 yec capucuenequin Esuquidistu
 chuibeniombi. Adece utsi-utsiec yacno
 nidnubi acte mauanaid icposh. Adecbidi
 ampequid icposh. Adecbidi con matses
 isadaidbobi ëbi mëyante bumposh.
 Adecbidi isadaidpembo adquidbidi
 icposh. Matses dadpen yacno adquidbidi
 icposh. Unës uachitoshe, quenquio yec
 matses nibëdacno capucueniobi.
 Adecbidi acte dapan capucueniobi.
 Esuquidistu tantiaquid nebi, quequin
 abimbo chiacimboen chuiquidën unës
 uachitoshe, quenquio yec capucueniobi.
²⁷Con na bednuec chonoadec
 uëshquiobi. Padpiden-padpidemboen
 ushenquio icquin chuibanombi. Piasec
 acte bunquin adembidi Esuquidistu
 chuibanombi. Iquenquimbi
 chuibanombi. Dashcute icsactsëcquid
 dasiuidquimbi chuibanombi.

Yuedenquoio yaqui adembidi chuibudombi. ²⁸Ĕmbi chuiboeo Esuquidistu tantiabenabicquido icpec, quequin capucenequin chuibeniombi. Utsi yacno nidshun, Ĕmbi chuiboeo bēpiscudnushe qeshun mibitedi chuiquin dada uaombi. ²⁹Esuquidistu tantiaquid chieshec dayactiapimbo icpec. Adquibidi iccobi, quequin tantiec tsadebi. Esuquidistu tantiaquid icsaosh, qesho tantiash unēsquoio yec, Nēbimbobi icsamianquid comapenen cuidta, Papa, quec tsadebi.

³⁰Aidted ěbi icaid icnuc chieshenquoio yec ěbi dayacquio yaid chuibanombi. Nēbi ěbi cuenondaaid chuinu. Tantia.

³¹Abia Yampidēn, Nuquin Icbo Esuquidistun Papan nabanaid ěnenquoioquin chuitequidquio iquec. Aidēn nabanaid chuibanec muesa Pabado nec, quequin ěbi cuenondaaid Nuquin Papan tantiec. ³²Ĕbi cuenondaaid nad icpondashe. Chuinu. Tantiata. Damasco yacnocquido ancanquidēn Adetas cuēmēdquidēn Pabado Damasco yacnoēsh puduēsho bedta quequin shubu dadpen daquēnē uaid dapa shēcuētedi sondado ětabēdmepondash. ³³Adec daquēnē uaid shēcuē cuēmanquoio sondado tabadnubi bednushe qeshun abuc daquēnē uaid iste shēcuēnshun tsitsan dapa antsadunshun daquēnē uaid cachoc budmepondashi. Budmiac ancanquidēn bedadtiapimbo yec cuempondabi.

Nuquin Papan Pabado ismiaid

12 ¹Ĕbi icaid chuibanquin ěmbi dada uaid isbanash, Esuquidistun ěbi chuibeneta caidquio Pabado nec, quequin Codinto yacnocquidon tantiatsiash, quequin adobamboedtedi chuibanquin dada uaombi. Ĕbi icaid chuibanquin ěmbi dada uaid isash, Abi natiamiaid dadpen

icpec, quetsiash, quenquiocquin dada uaombi. Adembidi Nuquin Papan ěbentsēqui ismiondaaid chuinu. Tantia. Nad iccondashe. ²Ĕndenquimbo seta 14ted matamequin Nuquin Papan bēdamboshē yacno indopondashi. Intacchobi abuc indopondashi, quetiapimbo iquebi. Tantienuquoio iquēmbi. Adecbidi ěmbi tantiateuidi indoac, quetiapimbo icoaibi. Tsaudi, tantienquoio iquēmbi. Nuquin Papambien tantiec. ³Abuc bēdamboshē yacno indopondashi, quequin abimbo chiēmbi. ⁴Abucshun utsi chuitemaidquoio tantiapondambi. Ĕmbi tantiondaaid chuitiapimbo icpebi. ĆMitsipadentsimbi ěmbi abucshun tantiaoeo con onqueten chuiupsiaba? ⁵Bēdambocquid icsho Nuquin Papan abi yacno indondashi, quetiapimbo iquebi. Natiamiantequid dadpen icnuc ambo abuc nidabi yec bēdambocquid nebi, quetiapimbo iquebi. ⁶Abuc nidshun ěmbi isondaaid chuibanquin dada uaid isash, Bēdambocquid Pabado nec, quequin tantianushe qeshun padenquoio iquēmbi. Ĕbi bēdamboec tabadsho isash, Pabado bēdamboec tabadec, qesho tantiash bēdambo ictsiabi. Adecbidi chuibansho tantiash, Abimbo chuiquidquio Pabado nec, qesho tantiash adecbidi bēdambo ictsiabi.

Satanasēn natiamiaid

⁷Bēdambocquid yansho Nuquin Papan abuc indoshon ismiondashi, quequin Pabado chuinushe qeshun Satanasēn chomiaidēn ěbi natiameded-natiamededsho isash, Chēn, quenquoio Nuquin Papa iquec. Satanasēn chomiaidēn natiamiac pinchuquēn siadaid namin nidaēdaid chictiapimbo yacbimboec con dada bēdanenquoio iquec. ⁸Adec con dada bēdantiapimbo icnubi, Ĕbi natiamequid cueme, Icbo,

quequin chiondambi. Adshumbic, padpiden. Adshumbic padpiden adomboembidi chuided-chuidedondambi. ⁹Adoaquien, Padi. Bëdambocquid icmenuequin naid nec. Mibi dayacquio icmequid con Mayan mibëdi iquec, quequin Nuquin Icbon chiondashi. Adoaqui, Bëdanambo icsho Nuquin Icbon ëbi dayacquio icmec quequin tantiec bëdambo iquebi, quec tsadebi. ¹⁰Aden tantiec con dada icsambo icnubi Esuquidistu chuibenec capuebi. Ëbi icsamboen chuiquin mamënsunaqui adecbidi Esuquidistu chuibenec capuebi. Utsin natiamiaqui adquiecbidi Esuquidistu chuibenec capuebi. Utsin mëyanaqui adquiecbidi Esuquidistu chuibenec capuebi. Adquid icnuc natiapimbo icsho isun Nuquin Papan ëbi dayacquio icmiac tsadtiapimbocquin chuibenec capuebi.

**Esuquidistu tantiabemenuen
chuiabanombi quiaid**

¹¹Ëbi yacpadquid utsi nibëdec, quequin chienquioctiadquidi niobi. Esuquidistu chuibanquid utsibon chiaid tantiatequidquio iquec, qeshun mibëd icquidon ëbi icsamboen chiosh qesho tantiashun Pabado Esuquidistu chuibenequid nec, quenquio utsibo iccosh, qesho tantiashun ëbi icaid chuibanquin dada uaombi. Bëdamboen tantiacimboen chuibanquid dadpen iquec. Aidon icsactsëcquio isadtsec, quequin ëbi chiec onquenubi Esuquidistu chuibenequidquio nebi. ¹²Natiamiaqui chieshenquiocquin Esuquidistu ëmbi chuibansho mibitedishun tantiapondac. Adembidi nadatiambocquin ëmbi nabansho mibitedishun isbededpondac. Adosho isun Esuquidistun ëbi chuibeneta caidquio Pabado nec, quequin chuitiadquidëmbi padenquio mimbi

icpondac. ¹³¿Esuquidistu tantiec iccuededquido utsi tantiaquin nashunquimbi mibi padenquiodambi ictio? Utsibon meniaid niondabi. Mibëdi tabadec bunec, Bec cho, quenquio iccondabi. ¿Bec cho, qeshoda ëbi bëdamboen mimbi tantiatsemponda? ¹⁴Ënden mibëdi tabadondabi. Yuecash padpidec mibëdi tabadoapondabi. Nëbi padpidec mibi yacno nidendabi. Mibëdi tabadec adecbidi, Bec cho, quenquio iquendabi. Mitsana bunesa nebi. Esuquidistu tantiaquidquio ma icpanu quequin mibëdi tabadquin chuibanendambi. Aton bacuëbo tantiaquin amën anibëdtan ambia tantiaquid icquin tied uaic adembidi shubu uaic bacuëmpibon nabantiapimbo icnubi. ¹⁵Adquibidi mibitedi tantiec Esuquidistubëd icquido yampec quec chonoadec tsusiobudquimbi chuibenendambi. ¿Ëmbi mibitedi comapenen tantiasho isunda mimbi ëbi tantienquio yampe? ¹⁶Bec, cho, quenquio yec mibëdi tabadondabi. Adsho isash, ¿Piucquid bedenquio icpecta Pabado tabadash? Muaquin chuiquin bedpash icnui, quec mibi. ¹⁷¿Mitsipadentsimbi bedpa? ¿Ëmbi mibi yacno nidmiaidonda muaquin chuiquin mitsana bedpash? Padenquio. ¹⁸Titobëdta utsi mibi yacno nidmiondambi. ¿Adoac mibi yacno choash tabadquin muaquin mitsana ampequinda ictiosh? Ma padenquio icboc. Aidbëdi abentsëc yacimboen tantiaquidquio nebi. Aduidequi tabadquid ëbi daëdi nebi. ¹⁹¿Pabado ampesa nec mibi camenuendambi dada uaquin chuibampo? Padenquio. Esuquidistu tantiaquid icquin mibi aid tantiabemenuen chuibanombi. Ëmbi chuibanaid abimbo iquec, quequin Nuquin Papan tantiec. ²⁰Mibi yacno choash ëbëdi abentsëc yacimboen

tantienquo icnushe qeshun dada uaimbi. Comapenec chushcanansho istuidmane qeshun adembidi mimbi iste dada uaimbi. Mitsana nibëdnuc utsin na dadpen icsho isash chushcanansho tantiatuidmane qeshun mibi dada uashunembi. Utsi muaquin chuisho tantiamane qeshun adembidi dada uaimbi. Abipenquo chuisho tantiamane qeshun adembidi dada uaimbi. Bëdambo icquid ëbi icnubi utsi padenquo iquec qesho tantiamane qeshun adembidi dada uaimbi. Mimbi tantiacpadpenquiocquid icsho isash comapenec cuëdcuededsho tantiamane qeshun adembidi dada uaimbi. ²¹Ai, mibi yacno choashun adquid icsho isun, Ëmbi Esuquidistu chuibaniaido nec, quequin Nuquin Papa chuitiapimbo yec natiaic bëpiuacimboec tsadmane qeshun dada uaimbi. Icsadenequidën abi icsaid ënabi icsho isash aido unësacimboecquid nec, quiash unësquo icmane qeshun dada uaimbi. Aidon naid utsin istemaidquo nec. Ambibi ambi chudtemaid chudted-chudtedec icsambo yequi, Bëdambocquid nebi, quec muacuededec.

Icsaid ënesa chuiquin cuidendambi quiaid

13 ¹Mibi yacno daëdec puduedashic padpidec puduedendabi. Choshon, Icsadenequid iquec, quequin daëdshun-daëdshunquien chuisho tantiendambi. Abentsëcshun: Icsaquid iquec, quequin chuisho tantiatiapimbo iquendabi. ²Tauamboec puduedshun Esuquidistu chuibanac abi tantiaquido mibitedi yanondac. Padpidec puduedoashun icsadenequid icsho isun, Mibi icsaid ënta, cac padenquiocsho padpidec puduedoashun Nuquin Papan tantiamiacpadomboen mibi adquid

utsibobëdta comapenen chuiquin cuidembi, quequin chiondambi utsitedishun tantianubi. ³Esuquidistun tantiamiacpaden Pabadon dada uaid nec, quequin ðmitsipadentsimbi tantiape? quequid comapenec onquequin chuibanembique. Tantiakuota, caimbi. Esuquidistun nadatiambocquin nacpaden ëmbi nasho mibitedishun ispondac. Aidën tantiamiac padpidec puduedshun adomboembidi mibi ismeoaimbi. ⁴Aidi matesash nadatiapenquo icquidbimboecsho isun cuesten dectampanëdash. Adoacsho Nuquin Papan uincuemiac unësesa yanquiopanëdash. Aid tantiaquidquo icquimbi ëmbibi nadatiambocquin nabantiapimbo icpebi. Abi chuiquid Nuquin Papan icmioshi. Aidëmbi ëbëdi icquin icsadenequid comapenen chuiquin naquidbidi ëbi icmeoaindac.

⁵Esuquidistu tantiaquid nebi, qeshun ðmitsipadentsimbi aid tantiape? Adecbidi, ðAmbi chiacpadectabi tabadpe? qeshun tantiabono, quequin Nuquin Papan chiaid isbanta. Aden isbanshun, Ambi chiacpaden niac-niaccombi, qeshun Esuquidistu ëbëd ictiapimbo iquec, quequin tantiata. Aid mibëd icnuc ambi chiaid niac-niaquenquo mimbi iquendac. ⁶Adecbidi, Pabado Esuquidistun ëbi chuibeneta caïdta neque. Isnu, quequidën ëbi nabanec tabadsho isun, Pabadon abimbo chiosh, capashuni mimbi. ⁷Aden tantiaquin Codinto yacnocquido bëdamboen tabadmeta, Papa, quequin chuided-chuidedembi. ðMibi bëdamboec tabadsho isash, Pabadon chuibaniaido nec, quequin mibi isquidon chuitsiash, quequindambi Nuquin Papa chuided-chuidedpadi? Padenquo. Esuquidistun ëbi chuibeneta caïd Pabado nec, quequin tantiesa

utsi-utsiec icnubi, Nuquin Papan
 chiacpadomboen nabanquidquo
 Codinto yacnocquido nec, quequin
 utsibon chuisho tantiatidquo iquebi.
⁸Nuquin Papan chiaid abimbo iquec,
 quequin ambi chiaidquo
 chuibanquidquibidi nebi. Ambi chiaid
 utsi uain chies nebi. ⁹Mibi bēdamboec
 tabadsho isash bēdambo iquebi, quec
 tsadtsiabi. Mibi comapenen
 chuitiapimbo iquebi. Codinto
 yacnocquido icsaisambo icmeta,
 quequin Nuquin Papa
 chuided-chuidedec nebi. ¹⁰Aden mibi
 tantiec tsadquin mimbi iste dada
 uaimbi. Mibi yacno nidabicquin dada
 uaimbi ma puduedshun icsaquid
 nibēdsho isun comapenen chienquo
 icpanu quequin Esuquidistun
 tantiacpaden Nuquin Papan nua
 pausunaid ma icpanueshun chuibanec

nebi. Mibi comapenen chuitiapimbo
 iquebi. ¹¹Nēbi ēnquin dada uaimbi.
 Icsaisa icnu quec Nuquin Papan
 chiacpadec bēdamboec tabadta. Ēmbi
 dada uain chiaid isquin adobanta.
 Abentsēc yacimboen tantiaquin
 nabanec tabadteneta. Adec tabadsho
 isash tantianquidquo utsibēd
 bēdamboec tabadquidquo Nuquin Papa
 mibēdi iquendac. Aidēnquo mibi
 adquidquibidi icmendac. ¹²Ēbi isec cho
 cananta. ¹³Mibi tantiec tabadebi, quec
 nēmbo tabadquido Nuquin Papan
 bēdambo icmebanaido. ¹⁴Nuquin Icbo
 Esuquidistun bēdambo icmiaido nebi,
 quequin mibitedishun tantiaquiota.
 Adembidi, Nuquin Papan tantiaid nebi,
 quequin tantiaquiota. Adembidi aton
 Mayan ēbēd iquec, quequin
 tantiaquiota.

Padi. Aidedi dada uaimbi.

CADASIA YACNOCQUIDON ISTE

Pabadon tauamboen chiaid

1 ¹Pabado nebi. Esus chuibenequidquo nebi. Matsesën: —Adquid icta —¿caidtabi nedi? Padenquo. Esuquidistun: —Ĕbi chuibeneta —caidquo nebi. Aid uincuemenëdaid Nuquin Papantsen: —Con mado Esus chuibeneta —caidquo nebi. ²Nidaid utsi Cadasia caidën tabadquidon Esus tantiaquidon mimbi iste dada uaic nebi. Mibi tantiac unësquio iquec. Adembidi tantiec nëmbo icquido Esus tantiaquidtedi: —Unësquio iquec —quiosh. ³Mibi tantiaquin Nuquin Papa chianembi naden. —Min Mado Esuquidistubëdtan bëdamboen isquin Cadasia yacnocquido bëdambo icmeta, Papa —quequin Nuquin Papa chianembi. ⁴Matses bëdambo icmequid Esus nec. —Ĕbi tantiesabo tabadac bimboec icsamboec tabadboedëmbi ěbi tantiasho bëdamboec tabadquid icmendambi —quiash Nuquin Papan chiacpadec abi tantiaquido cuidmenquo icnuec abided cuidadec Esus unëspac caondash. ⁵Aidën Papa tantiaquin: —Nuquin Papa bëdamboshë iquec —canuna ënenquo icquin.

Esusuidi tantienquo yanaid

⁶—Esus tantienquo yanosh —quequin mimbi naid chuisho tantias shubitiadquico iccobi. ¿Ĕbi chonobida

badedquo Esus tantienquo yano? Nuquin Papan tantiamiac abided cuidadec unësaid Esus tantiec mibi tabadondac. Aden Nuquin Papa aton Mado Esusbëdta tantiaboedëmbi ¿nëbida Nuquin Papa tantienquo yano? Utsibon icsamboen chiaquien mimbi Esus tantienquo yanac. ⁷¿Aidon chiaidta bëdambo icpec? Aidon chiaid ma Nuquin Papan chiaidpenquo neyoc. Esusquo chienquo icquin muaquin chuisho tantiasun: —Abimboen cachitec —quesun mimbi Esus tantienquo yampac. ⁸—Aton Mado Esusuidtsëqui tantiasho Nuquin Papan nuqui bëdamboen isec —quequin abimbo chiondambi. —Nuquin Papan chiaid abimbo chienquo icsho Nuquin Papan cuidpashuni —quequin aden abimbo chiondambi. Nuquin Papan abi yacnoshon uaid mayan bëdantsen muaquin chuisho tantiasun aidtsen: —Nuquin Papan cuidpashun —catsiambi. Utsibonsen muaquin chuisho tantiasun aidtsen: —Cuidpashun —quiobi. ⁹Tantia. Adembidi mibi chuinu. Ĕmbi chuibanac mimbi Esus tantiabonondac. Mimbi tantiondaid Esusquo chienquo icsho: —Nuquin Papan cuidpashun —caimbi mibi muuaquin chuiquido. ¹⁰—¿Matsesën: “Mibi bëdambo iquec,” mabi canu —quequindambi aden chuibampadi? Padenquo. Nuquin Papan chiacpadomboen mambi

natiadquio yoc. —Bëdambo iquec
—Nuquin Papa camenuen mambi
chuiabampaboc. Matsesën
chiacpadomboenuidi natiapimbo iquebi.
Adenuidi naic Esuquidistun yuambo
ictiapimbo ictsiabi.

Esusën chiaidquio chiec nebi, quiaid

¹¹Tantia, con utsibo. Mibitedi chuinu.
—Esus tantiasho Nuquin Papan matses
bëdamboen isbentsiash —quequin ëmbi
chuiboed amben chiaidpenquio nec.

¹²Matsesën chiabi Esuquidistun
tantiamiac ambi chiaidquio
chuiabanombi.

¹³Tantia. Aden Esusën ëbi
tantiamiondaid mibi chuinu. Con
matses isadaidbon chiacpadomboenuidi
natiadquio icquin Nuquin Papa
tantiesabo danquin Esus tantiaquido
comapenen chieshënquin cuesun
secatiadquio icpadenebi. Ëmbi
adodened ëmbi chuisho mimbi
tantiondac. ¹⁴Nuquin Papa
tantiatiadquio icquin con matsesën
chiaid abitedimbo natiadquio ictenebi.
Ëbëdta tishaidon caniabon bëdiactsëc
natiadquio icnubi con tsusedpabon
chiaiduidi natiadquio ictenebi. Adquid
icquin Esus tantiaquido comapenen
chieshëndenombi. ¹⁵Adshobini Nuquin
Papan aton Mado Esus tantiamiondash.
Ëbi tishabi icnubi ëbi caic: —Con Mado
Esus tantiameshun bëdamboen isquin
¹⁶Pabado: “Matses utsibo isadaidpembo
con Mado Esus chuiabeneta,” caindambi
—quequin ambi chiacpadomboen Esus
tantiamiondashi. Adoac: —Esusën
chiaid ëbi chui —quequin matses
chiambo iccondambi. ¹⁷Shubu dadpen
icquid Edusaden caid yacnocquido
Esusbëd icnëdaido ambia Esus
chuiabanëdaido chuitanambo
iccondambi. Utsibo chienquio yec
nidaid utsi Adabia caid yacno matses

nibëdacno badedquio nidtanondabi.
Adashic yuec-yuecpambo ictanec
auëshquio choec shubu dadpen icquid
Damasco caid yacnobidi choaondabi.

¹⁸Adashic ambo nidash seta abentsëc
chotsecnuc matametane Edusaden
yacno Petedo isec nidtanondabi. Adec
nidash 15tedec ushec aibbëd
tabadondabi. ¹⁹Ambobi Nuquin Icho
Esusën utsi Acobo caid isondambi.
Esusbëd icnëdaid utsi isambo
iccondambi. Aid daëdtsëqui isondambi.
Utsibo padambo. ²⁰Abimbo chuiquin
nëid dada uaic nebi. Ëmbi aden
chuibansho tantiash: —Ai, abimbo caic
—quec Nuquin Papa.

²¹Aden Edusaden yacno istanec
choashic yuec-yuecpambo ictanec
nidaid utsi Sidia caid yacno nidondabi.
Auëshquio nidshun nidaid utsi Sidisia
caid yacno istanondambi. ²²Nidaid utsi
Udeya caid yacno Esusbëd icnëdaido
yacno yuec tabadambo iccondabi.
Adsho anocquidon Esus tantiaquidon
isabi iccondashi. ²³Ëmbi naid
chuishouidi tantiapac caondash.
—Nuquipadquid Esus tantiaquido
cuesun secatiadquio icnëdaidëmbi Esus
tantiabenshun Esusquio chuibeniash
—quequin ëmbi naid chuishouidi
tantiapac caondash. ²⁴Aden ëmbi naid
chuisho tantiash: —Nuquin Papan nac
Pabado bëdambo iquec. Adomboen
Pabado tantiamec Nuquin Papa
bëdamboshë iquec —quepac caondash
Udeya yacnocquido.

Edusaden yacno nidoaid

2 ¹Yuecash seta 14ted matamiash
Edusaden yacnobidi nidoapondabi.
Ëbëdi Bednabe caid nidpondash.
Titotsen buanondambi. ²Adec Nuquin
Papan tantiamiacpadec ambo nidshun
Esus tantiaquido chuiquid dapabo
caiduidtsëqui cho-chomeshun ëmbi

naboed chuibanondambi. —Ĕmbi chiabi yac aidon: “Muequi neque. Pabadon chuisho tantienda,” canushe —qeshun naden chiondambi. —Nuquin matsespenquo isadaidpembo matses utsibo Esusquo chuibeniombi. “Esusuidi tantiasho Nuquin Papan nuqui bēdamboen istsiash,” quequin chuibeniombi. ĔAdembidida mimbi tantiape? —capondambi Esus tantiaquido chuiquid dapabo chuiquin. Ĕmbi adoac: —Ai, adembidi tantiembi —quepondash aidō. ³Ĕbēd icquid Tito caid isadaidpembo icshobi: —Shui dēbid dēteshune —cainquo iccondash chuiquid dapabon abi utsibon: —Adotiad —canubi. ⁴Adec: —Shui dēbidien dēteshunetiad —quequido Esus tantiaquid damianquiec Esus tantiaquidombo tabadacno puduedpondash. —Esus tantiaquidon: “Esusuidtsēqui tantiasho Nuquin Papan nuqui bēdamboen isec,” quequin con tsusedpan chiaid niascho tantianu —quiash ēbi yacno puduedpondash. Adec puduedshun tantiashic: —Mimbi icsamboen chiec. Nuquin tsusedpa Moisesēn chiampidtedi nasho Nuquin Papan bēdamboen istsiash —quepondash. ⁵Adec aidō: —Nuquin tsusedpan chiampicpadomboenuidien nametiad —qesho: —Padi. Mimbi icsamboen chiec —quequin aidēn chiacpadomboen nainquo iccondambi. —Ma matses utsibon: “Esusēnuidtsēqui Nuquin Papa ēbi bēdamboen ismec,” quequin ma Esusquo tantianu —qeshun nainquo iccondambi. ⁶Aden Esus tantiaquido chuiquid dapa caidon Esus tantiaquidēn natequid utsi chienquo iccondashi. —Esus tantiabenacsho isun nuquin tsusedpan chiacpadomboentsen nameta —quequin chienquo iccondashi. ĔEsusbēd icnēdaidēn: —Moisesēn chiaidtsen

nameta —cactambi nametsemponda? Padenquo ictsenondambi. ĔAtotsi Nuquin Papan aidō capec? —Esusbēd iccondaidquo neque. Bēdamboen isnu —Ĕcapenda iquēc? Padenquo. ⁷Naden Petedo chedon chiondashi. —Nuquin Papan chiacpadomboen mimbi matses utsibo isadaidpembo Esusēn naid chuibeniac. Nuquin Papan chiacpadomboebidi Petedon nuquin matses isadaidbo Esusēn naid chuibeniosh. Petedon nacpadomboen mimbi bēdamboen nac —capondashi. ⁸—Nuquin Papan namiaid icquin Petedon nuquin matses isadaidbo dadpen Esus tantiamiosh. Adembidi Nuquin Papan namiaid icquin mimbisen matses utsibo dadpen Esus tantiamiac ⁹—qeshun bēdamboen ispondashi. —Adembidi nanuna. Mimbi isadaidpembo Esusēn naid chuibenenubi adembidi isadaidbombo chuibenendambi —quepondash. Adshumbic: —Esus tantiaquidquo mibi nec —qeshun chuiquid dapabon Bednabebēdta mēdimbampondashi. Nēidic Petedo. Nēidic Acobo. Nēidic Uan. Aitedishun chuiquid dapabo icquin adondashi. ¹⁰Nadentsen chuipondashi. —Aton na nibēdquido bēdamboen isnuna —capondashi. Adsho tantiash: —Ai, adonona —quepondabi. Adanec nidpondabi.

Antioquiya yacnoshon Petedo chushcaid

¹¹Adash yuectaniash ēbi iccondacno shubu dadpen icquid Antioquiya caid yacno Petedo chopondash. Auēshquo icsashobimbi bēisquioquin chushcapondac. ¹²Abēdētan Esus tantiaquido matses utsibon codocaid pec bēdamboec tabadboedi aton pete isuidanec aidobēd cuēshēdec Petedo icsapondash. Ambo choash Esus tantiaquido con matsesēmpenquo

codocaid pec bēdamboec tabadondash. Adnubien Acobon: —Ambo istan —cac con matses Moisesēn chiampid tantiaquido cho-chopondash. Aido cho-chosho isash: —Moisesēn chiampid niacquin matses utsin codocaid pesho chushcanushe —quec dacuēdquin isadaidpembon pete meniaid isuidampondash Petedon. Adec abēdtan Esus tantiaquido matses utsibobēd cuēshēdec icsapondash. ¹³Adsho isash anocquido isadaidbotsen abēdtan Esus tantiaquido matses utsibobēd tabadenquo yec cuēshēdpondash. Adsho isash ēbēd icquid Bednabetsen adecbidi cuēshēdec icsapondash. ¹⁴Adec icsaquin Esusēn chiapadomboen nainquo icshebimbi Petedo chushcapondac Esus tantiaquidtedishun tantianuc. —¿Ada mimbi bēdamboen naoque? Tantia. Chuinu. Isadaidbo tsusedpan chiaid matses utsibo mimbi namec. Isadaidbo icquimbi matses utsibon codocaid pec aibēdi mibi bēdamboec tabadoc. Aidon piaid pec bēdamboec tabadboedi nēbi aibēd mibi cuēshēdoc. Adsho isash mimbi nianaido: “Petedon matses isadaidbo tabadacimboec tabadshoudien Nuquin Papan nuqui bēdamboen ischitotsiash,” quepec icsamboen chiec. Aden mimbi icsamboen tantiamēque. Tantia. ¿Atotsiequin mimbi naoque? —capondambi Petedo chushcain.

Nuquin Papan bēdamboen iste chiaid

¹⁵Naden con matses Petedo chiondambi. —“Moisesēn chiampicpadomboen naisabo matses utsibo icsambo iquec,” quequin nuquin matses isadaidbon tantiec. Nuquien isadaidbon chidon tishacsho tsusion shui dēbid dēteshun secanēdaido nec. ¹⁶Adquid icquin: “Moisesēn chiaiduidi naquin Nuquin Papa bēdamboen

ismembi,” quedenedi nēbi nuqui utsien chiec. “ ‘Abided cuidadaid Esusēnuidtsēqui Nuquin Papa ēbi bēdamboen ismec,’ quequin Esus tantiasho Nuquin Papan nuqui bēdamboen isec,” quequin nuqui tantiec. Adshun matses utsibobēdtambi nuqui Esus tantiaquiec. “Moisesēn chiaid niaquesa nibēdsho isun Nuquin Papan matses abitedi bēdamboen istiapimbo iquec,” quequin tantiashun nuqui bēdamboen ismequid Esus nuqui tantiabenondac —quequin Petedo chiondambi.

¹⁷Adashic Petedobidi chui-oaic: —“Esusuidi tantiasho Nuquin Papan nuqui bēdamboen istsiash,” qeshun Esus tantiabenondacsho nuquin matsesēn icsambo capondashi. “Nuquin tsusedpan chiapadomboen nainquo yec mibi icsambo iquec matses utsibobimboec,” capondashi nuquin matsesēn. ¿Ada Esuquidistun matses icsambo icmepec? ¿Ambi chiapadomboen naicta nuqui icsape? Padenquo. ¹⁸“Nuquin tsusedpan chiampicpadomboen nashoen Nuquin Papan nuqui bēdamboen isec,” quequin nuquin matsesēn chiaid nec. Esus tantiaquin aden chuitiapimbo yanondabi. Adec Esus tantiaquid icboedi: “Padpiden con tsusedpabon chiaiduidi naquin Nuquin Papa bēdamboen ismembi,” qeshun abi bēdamboen ismequidquo Esus tantienquo yequini icsambo icchitotsiac. ¹⁹Con tsusedpa Moisesēn chiacctedi natiadquo ictenebi. Adquid bēdamboen iste danquin abitedi natiadquo icquimbi abitedi nainquo iccondambi. Adshun: “Moisesēn chiacctedi ambembi matsesēn natiapimbo iquec,” qeshun ēmbimbo naid ēnondambi. Nēbini Esus tantiec Nuquin Papan chiapadec tabadec.

20“Ambi con tsusedpa Moises chuimiactedi nashouidi Nuquin Papan nuqui bēdamboen istsiash,” quedenedi Esus tantiec adenquio yanondabi. Nēbi ěmbi tantiaidquio nainquio yec Esuquidistubēdi cuēshēdenquio yec bēdamboec tabadebi. “Ĕbi tantiec ěbi cuidmenquio icnuec abided ciudadec unēsac caondash,” quequin tantiaشوeni Esusēmbi bēdamboec tabadquid icmec. 21“Abided cuidadaid con Mado Esusuidi tantiaشو matses bēdamboen isendambi,” quequin Nuquin Papan chuipanēdash. Aden Nuquin Papan chiaid niactiapimbo iquebi. Moisesēn dada uapampid ambi chiaid niaquesa icsho Nuquin Papan bēdamboen itsenac. Ambi chiaid niaquesa nibēdec. Adquid Nuquin Papan chiaid niaquesa icnuc: “Matses cuidmenquio icnuec ěbided ciudadec unēsnu,” queboedi Esus padenquio ictsempañdash —capondami Petedo chuiquin.

Nuquin Papan aton Mayan tabadmiad

3 ¹Tantia. —Cadasia yacnocquido piushbimboecquin tantienquio yanosh —quequin chuisho tantiaشun mibitedi chuinu. ĩTsuntsin: —Tantienda —cac Esus tantienquio yano? —“Cuesten dectanac abided cuidadaid Esusēnuidtsēqui Nuquin Papa nuqui bēdamboen ismec,” quequin Esus tantiaشو Nuquin Papan nuqui cuidenquio iquec —quequin mibi chuibanondambi. ĩEsus tantiatiapimboda ique? ²Mimbi tantiaid ěbi chui. Tantuanu. ĩAtotsi quiash Nuquin Papan Mayan mibēdi tabadanondash? ĩNuquin Papan ambi chiaid Moises dada uamepampid mimbi nabanuda mibēd tabadanondash? Padenquio. Ĕmbi chiondaid Esusquio mimbi tantiabensho isashien mibēd tabadanondash. ³ĩPabiate shēcuē

choquidida mibi nendac? Tantia. ĩAtotsieshun tantienquio ique? Mibēdi tabadquin Nuquin Papan Mayanēn mibi bēdamboec tabadquid icmec. ĩNēbi Esus tantienquio yanecta mibi bēdamboec tabadpatsia? Mibembi bēdamboec tabadtiapimboen mibi iquec. ⁴ĩAden Nuquin Papan aton Mayan mibēdi tabadmiad icquimbida Esus tantienquio yano? ⁵Nuquin Papan aton Mayan mibēdi tabadmequin comapenen tantiaquin nacnenquin mibi ismiondash. ĩAtotsieshun Nuquin Papan aton Mayan mibēdi tabadmec? ĩCon tsusedpa Moisesēn chiampid nashoda Nuquin Papan aton Mayan mibēdi tabadmec? Padenquio. Ĕmbi chiondaidquio Esusquio tantiaشو Nuquin Papan aton Mayan mibēdi tabadmec.

Nuquin Papa tantiaquidquio Abadauan chiaid

⁶ĩTsutsi Nuquin Papa tantiaquidquio icpampic? Abadauan nepampic. Nuquin Papan chiac Abadauan: —Abimbo mimbi caic —quesho: —Adquid bēdamboen isembi —queshun Nuquin Papan bēdamboen isbempampic. ⁷Adec Abadauan: —Nuquin Papan abimbo caic —quequin tantiapampicpadomboen nēbi matsesēn Esus tantiaشو Nuquin Papan bēdamboen isendac ambi Abadauan ispampicpadomboen. ⁸—Esus tantiaquido iquendac —quequin naden Nuquin Papan Abadauan chuipampic ěndenquimbo. “Abadauan, mibi unēsan yuecquimbo ictaneshun min tsyuecquid abentsēc tantiaquidtedi bēdambo icmendambi. Nidaid utsi-utsiec yacno tabadquidon min tsyuecquid abentsēc tantiaشو bēdambo icmendambi,” quequin Nuquin Papan chiaid con tsusedpan dada uapampic. ⁹Abi tantiaquidquio icsho ambi Abadauan

bédamboen isampicpadomboen nēbi aton Mado Esus tantiasho Nuquin Papan nuquitsen bédamboen isec.

¹⁰Utsiboen Nuquin Papan cuidtequido nendac. —Moisesēn

chiampicpadomboenuidi nasho Nuquin Papan bédamboen istsiashi

—quequidēmbi abitedimbo nainquo icsho Nuquin Papan cuidendac. Aden

ēnden Nuquin Papan chiaid dada uapampic. “Ambi chiaidedi nainquo

icsho Nuquin Papan cuidendac,” quepampic. ¹¹—Ambembi Moisesēn

chiampicpadomboenuidi nasho matses bédamboen isendambi —¿quecta

icpanēdash Nuquin Papa? Padenquo. Ambi chiaid niacquidoudiquio icsho

bédamboen istiapimbo icquin Nuquin Papan naden chuiquin dada

uamepampic. “‘Nuquin Papa ambi chiapadomboen naquidquio nec,’

quequin abi tantiec tabadquidien Nuquin Papan bédamboen isec,”

quequin dada uamepampic.

¹²¿Ēmbembi Moisesēn chiacctedimbo nanuequidta Nuquin Papambo tantiec

tabadpec? Padenquo. “Moisesēn chiacctedi naquid Nuquin Papabēd

tabadendac,” quequin chiampicpaden ambembi matsesēn natiapimbo iquec.

Natiapimbo icsho Nuquin Papan bédamboen istiapimbo iquec.

¹³Aden Nuquin Papan matses abitedimbo bédamboen istiapimbo

icnuc Esuquidistu: —Ēbided cuidshun ēbi tantiaquido ma con Pan cuidenquo

icnu —quiash abided ciudadec unēspac caondash cuesten dectanac. Aidquo

chuiquin Nuquin Papan con tsusedpa dada uamepampic. “Cuesten dectanaid

Nuquin Papan cuidaidquio nec,” quequin Nuquin Papan chiaid dada

uapampic. ¹⁴Adec matses utsi-utsien abi tantiaquido cuidmenquo icnuec abided

cuidadec Esus unēspac caondash.

Ēndenquimbo con tsusedpa Abadauan chiec: —Yuecshun bédambo icmendambi —quequin Nuquin Papan chuiampicpadomboen abi tantiaquido bédambo icmequin aidobēdi aton Mayan tabadmenuec Esus unēspac caondash.

Abadauamba chuishun Moisessten Nuquin Papan chiaid

¹⁵Tantia, con utsibo. Mibitedi chuinu.

Min matsesēn nadoquid. —Naden naindami —quequin dada uashun:

—“Abimbo chiaidquio nec,” ma isquidon canu —queshun abi

cuēmēdquidtsen dada uaquid. Aid dada uaid dada uaquidbēdtambi utsintsen

utsi uatiapimbo icquid: —Chuiquidēn cuidnushe —queshun. Adembidi ambi

chiaid utsi uatiapimbo icquid icquin ¹⁶Nuquin Papan: —Nadomboen

naindami —quequin Abadauan chuiampic. —Mibi nibēdanan

yuecquimbo ictaneshun min tsyuecquid abentsēcshun matses bédambo

icmendac —quepampic. —Min tsyuecquid abentsēc tantiaquidtedi

bédamboen isendambi —quequin tantiec adpampic. Esus caiqui: —Min

tsyuecquid abentsēc —quec adpampic. —Min matses tsyuecquido dadpen

—quenquo icpampic. ¹⁷¿Ada tantie? Ēndenquimboshē Nuquin Papan

Abadauan chuiquin: —Min tsyuecquidēn matses bédambo icmendac

—capampic. Adshumbic yuecquio ictaneshun seta dadpenquo 430ted

matameshun Moises utsitsen chuiquin Nuquin Papan dada uamepampic. Ambi

Abadauan chiampid niaquenquo icquin Nuquin Papan ambi chiaid utsi Moises

dada uamepampic. Muenquo icquin Abadauan chuiampic. ¹⁸¿—Ēmbi

chiaid ēmbi Moises dada uamiapadomboen nashouidi mibi

bëdamboen isembi —qeshunda Nuquin Papan Abadauan bëdamboen isbempampic? Padenquio. Moises tishabi icnuc ambi chiac: —Nuquin Papan abimbo caic —abi casho Nuquin Papan Abadauan bëdamboen isbempampic. Adashic: —Yuecshun min tsyuecquidën matses bëdambo icmendac —quepampic. Aden ambi ëndenquimboshë chiampicpadomboen nëbi matses bëdambo icmequin Esus tantiaquido Nuquin Papan bëdamboen isec.

¹⁹¿Atotsieshun Nuquin Papan ambi chiaid Moises dada uamepampic? —Ëmbi chiaid isash: “Ícsamboequien nuqui tabadchitec,” quequin ma matsesën tantianu —qeshun Moises dada uamepampic. Nuquin Papan Abadauan chiampid Esuquidistu choabi icnuc adopampic. Nuquin Papan abi yacnoshon uaido mayan bëdabon Moises chuiuampampic. Adoac Moisesën aton matses Nuquin Papan chiaid chuibampampic. ²⁰Nuquin Papanquo Abadauan chuipampic. Abadauan caic: —Chuitan —cainquio icquin Nuquin Papanquo Abadauan chuipampic.

Matses abi icsaid tantiamete chiaid

²¹Aden Nuquin Papan Abadauamba chuishumbic Moisesetsen chuipampic. ¿Ambi: —Min tsyuecquid tantiaquido bëdamboen isendambi —quequin Abadauan chiampid niacquinda Nuquin Papan Moises chuipampic? Padenquio. ¿Matses bëdamboen isnuenda Nuquin Papan ambi: —Naden nata —quequin chiaid Moises dada uamepampic? Padenquio. —Matses bëdamboen isnu —qeshun ambi chiaid Moises dada uameshun ambi chiaid niaquesa bëdamboen isun unësacsho abëdi tabadmetsiash. —Ëmbi chiaid niaquesa

nibëdendac —quequin tantiaquin ambi: —Naden nata —quequin chiaid Moises dada uamepampic. ²²—Ëmbi chiaid isun: “Nuquin Papan chiaid matses abitedishunquien niac-niacchitec. Mëtaniac abembi mënchiquidtiapimbo yacimboec abembi bëdambo ictiapimboen icchitec,” quequin ma matsesën tantianu —qeshun Nuquin Papan Moises dada uamepampic. Adec matses abitedi icsamboec tabadsho bëdamboen istiapimbo icquimbi ambi Abadauan chiampicpadomboen naquin Esuquidistu tantiaquiduidtsëqui Nuquin Papan bëdamboen isec.

²³Esus choabi icnuc nadquio matses icpanëdash. Moisesën chiacpadomboenuidi natiadquidi abembi bëdamboec tabadtiapimbo icpanëdash. Mëtaniac mënchiquidtiapimbo yacimboec aidën chiacpadec bëdamboec tabadtiapimbo icpanëdash. Nuquin Papan Esus tantiamiabi icnuc adquio matses icpanëdash. ²⁴Aden: —Ambi chiaid niaquec icsamboec tabadsho Nuquin Papan ëbi bëdamboen istiapimbo iquec. ¿Nuquin Papa bëdamboen ismequidta nibëdpeba? —nuqui camenuen ambi chiaid Moises dada uamepampic. Aden nuqui icsaid tantiameshun Esustsen tantiamiac: —Esus tantiasho Nuquin Papan nuqui bëdamboen isec icsaisabimboecruc —nuqui quendac. ²⁵Aden tantiec: —Isadaidbo tsusedpan chiacctedi nashouidi Nuquin Papan matses bëdamboen istsiash —quenquio nuqui iquec. —Esus tantiasho Nuquin Papan nuqui bëdamboen isquin bëdamboen tabadmec —quequin nuqui tantiec.

Nuquin Papan con mado con champi caido

²⁶Aden Esus tantiasho Nuquin Papan: —Con mado mibi nec. Con champi mibi

nec —nuqui capec. ²⁷Adec: —Esus tantiaquid nebi —quesho acten mentoaid yec Esuspadquio ictiadquio nuqui iquec. ²⁸Aden Esus tantiasho Nuquin Papan nuqui bédamboen isec. Isadaidbo yec isadaidpembo yec matses yuaido yec matses yuapenquio yec dada yec chido yec quequin Esus tantiasho nuqui bédamboen isec. —Matses utsibo bédamboen istiapimbo iquebi —quenquio icquin matses utsibombi aton Mado Esus tantiasho Nuquin Papan bédamboen isec. ²⁹Adembidi abi tantiasho ambi Abadauan bédamboen isampicpadomboen Esus tantiasho Nuquin Papan nuqui bédamboen isquin bédambo icmec ambi Abadauan chiampicpadomboen. Adec Abadauanën tsyuecquidobimboecquido nuqui nec.

Yuabimboecquid isadaidbo yaid

4 ¹Tantia, con matses. Mibitsen chuinu. Aton na dadpen dayun uaquidën nuquin matsesën nadoquid. —Ëbi unësan con madon con na abitedi bedendac. Bacuë icquimbi con madon con na abitedi bedtiapimbo iquec. Canishumbien con madon con na bedendac —quequin tantiaquidën amën aton mado aden chuiquid. Aton papa unësan caniabi yec utsibon yuabimboec aton mado iquec. ²Caniabi icquin utsibon chiacpadomboen naindac aton madon. Adashic aton papan chiacpadec canishun aton papan na bedash yuabimboecboedi adquidpenquio yanendac. ³Adquio yuabimboecquido con matses isadaidbo icpanëdash. Tsusedpabon yuabimboecquido icquin Nuquin Papan bédamboen iste bédamboen tantienquio icpanëdash. —Tsusedpabon chiacpadomboen Nuquin Papan: “Naden nata,” quequin chiaiduidi nanu —quiashi abembi bédamboec tabadtiapimbo icpanëdash.

⁴Adnubien ambi ëndenquimbo tantiampicpadën Nuquin Papan Esus chomepanëdash. Isadaidbon chidon tishaid icquin Nuquin Papan: —Naden nata —quequin chiaid naquidquio Esus nepanëdash. ⁵Adec Nuquin Papan chiaid niaquesambo Esus icnubien ambi chiaid niacash matses abitedi Nuquin Papan cuidtequido nepanëdash. Adsho isash matses cuidmenquio icnuec abided cuidadec Esus unësan caondash. Nëbi Esus tantiasho: —Con mado mibi nec. Con champi mibi nec —quequin Nuquin Papan nuqui bédamboen isec.

⁶Adec: —Con bacuëbo nec —queshun Nuquin Papan nuquibëdi Esusën Mayan tabadmec. Adoac bacuën amë: —Ëbi, papa —cacbimboen Nuquin Papa nuqui chianec. ⁷Esus tantiabi Moisesën dada uapampiduidi namenuquido yuabimboecquido icboedi nëbi Esus tantiasho Nuquin Papan: —Con bacuëbo nec —nuqui capec. Aden nuqui bédambo icmec ambi Abadauan chiampicpadomboembi.

¿Utsin yuameteda bumpe? quiaid

⁸Tantia. Nëbi matses utsibo mibi chuioanu. Ënden Nuquin Papambo tantiesa icquin matses uaquidpenquiobi utsi mimbi tantiapanëdac. Papa quequin mimbi tantianëdaidën yuabo yec mëtaniacimboecquido mibi icpanëdac. ⁹Nëbi Nuquin Papa mimbi tantiabenondac. ¿Mimbembida adonda? Padenquio. Aidëmbi mibi tantiampanëdash. Aidën tantiamiaidombo icquin ¿atotsiequin aid tantienquio yanoai? ¿Moisesën dada uapampiduidi namenuquido tanshoda Nuquin Papan mibi bédamboen ispec? Padenquio. Adquid mëtaniacimboecquid nec. ¿Mëtaniacimboecquid icoatiadquioda ique? ¹⁰Aden Nuquin Papa tantienquio

icquin mimbi icsamboen chiec. —Aid badiadën adenda. Aid inchëshën ushën adenda. Aid setambi adenuidtsëqui nanuna. Nuquin Papan cuidnushe —quequin mimbi icsamboen chiec. Mimbi chiacpadomboen naquid Nuquin Papan bëdamboen iste danquin mimbi icsamboen chiec. ¹¹Mibi caic: —Adosh —quesho tantiash shubitiadquio iquebi. —¿Ëmbi chiondaidonda Esus tantianguo yampash? —quequin tantiac mibi unësquio iquec.

¹²Con utsibobimboecquido mibi neque. Tantia. Mibitedi chuinu. Isadaidpembo yec mibi: —Moisesën chiampiduidi nanu —quenquio yac bimboec yanondabi. —Ëmbemi Moisesën chiampid naquin Nuquin Papa bëdamboen ismembî —quedenedi ënëdondabi. Nëbi Esusuidi tantiaquid nebi. Adembidi Esusuidi tantiata.

Ëbi adsho tantiash chieshenda. Tauamboen ëmbi Esus chuisho mimbi ëbi chieshënenquio iccondac. ¹³Mibi yacno tauamboec choshon daicsabudtsëcshumbi mibi Esusën naid chuibanondambi. ¹⁴Istiapicpambo yec daicsabudacshobi mimbi ëbi cacumenquio iccondac. Ëbi mibi yacno puduedsho isash mibi cuishonquiondac. Nuquin Papan abi yacnoshon uaid mayan bëda choac bimboecnuc mibi cuishonquiondac. Nuquin Icho Esuquidistu choac bimboecnubidi mibi adondac. ¹⁵—Min ëshë chicshun ëbi mene —ëmbi cac mimbi ëbi menetsenondac. Aden ëbi mimbi tantianguiondac. Adondaidi ¿atotsi quiash chieshcueno? ¹⁶¿Nëid abimbo chuiquindambi mibi chieshëmpe? Padenquio iquemi. ¿Aden chuisho mimbidabi chieshëmpe?

¹⁷Ista. Esus chienquio icquidon ambi chiacpadomboen mibi nametiadquio iqueque. ¿Mibi tantiaquioquin

bëdamboen namenuenda mibi chuipec? Padenquio. Ëbi chieshëmenuembien ambi chiacpadomboen mibi nametiadquio icchitec. Mibi abibi tantiamenuen naic. ¹⁸Ëmbien mibi tantiaquin Nuquin Papan chiacpadomboen namenuen yuen chuibanondambi. Aden chuibanac mimbi ëmbi chiaidquio tantiabenondac. Ëbëd icquimbi Esus bëdamboen tantiaboedombi ëbi nidtsëcnubi mimbi badedi utsi tantiac. ¹⁹Aden mimbi naid tantiac mibi unësquio iquec. Anin bacuë tantiac bimboen mibi tantiaquimbi. —Esusbimboec icpashun. Aid tantiec ambi chiacpadec bëdamboec tabadpashun —quequin mibi tantiemi. ²⁰Mibëd icquin bëisquioquin mibi chuitsiambi. Mibëd iquenquio icquimbi mibi bëisquioquin chiac bimboen dada uaqin mibi naden chiemi. —¿Atotsieshun Esus tantienquio yanoao? —caimbi.

Abadauanën mado daëd chiaid

²¹¿—Moisesën chiacpadomboenuidi naquin Nuquin Papa bëdamboen ismembî —quequido icquinda mimbi Moisesën chiampid bëdamboen tantieque? Tantia. Mibi chuinu. ²²Naden chuiquin Moisesën dada uapampic. Abadauanën madombo daëd icpampic. Aton chidon yuaid chido bedshun tishmiaid abentsëc icnuc aton shanunquio aton chidon tishaid abentsëcbidi icpampic. ²³Abadauanën chudac badedquio bacuë ushondoshon chido yuaidën aton mado tishpampic. Abadauanën chidombo naido icsho: —Mimbi bacuë tishendac —quequin ambi chiacpadomboen Nuquin Papan naidopenquio icmiac aton mado tishpampic. ^{24,25}Aidi Sada nepampic. Chido yuaid Acad nepampic. Aidën tishaid yec aton mado yuabidi

nepampic. Icbon chiacpadomboenuidi napampic. Yuaidën madobimboecquido Moisesën dada uapampiduidi namenuequido nec. Adquiobidi Edusaden yacnocquido iquec. Esus tantienquo yec Moisesën chiaiduidi tantiate bunquiec. Nidaid utsi Adabia caid yacno macuësh dapa Sinai caidënshun Nuquin Papan ambi chiaid Moises dada uamepampic. Aid macuësh mases utsin Acad capec. Aden tantiaquin: —Chido yuaid Acad caidën madobimboecquido Moisesën dada uapampiduidi namenuequido nec —caombi. ²⁶Edusaden caid utsi iquec. Nuquin Papa tabadacnombo Edusaden caoapec. Ambo Esus tantiaquido yec nuquiibi tabadendac. Yuaidën madobimboecquido Moisesën dada uapampiduidi namenuequidoen padenquo iquendac. ²⁷Nuquin Papan ambi chiaid dada uamepampicpadec Esus tantiaquido dadpenquo iquendac. Naden dada uamepampic.

“Tantia, chido. Naido icsho mibi chuinu.

Bacuë tishtiapimbo yequi bédambo icta.

Bacuë paëmbo icnuc tishacmaid yequi cuishonqueta.

Bënë choquidën bacuë dadpen tishquidën bacuën tsyuecquido daëdpactsëc yanubi

Bacuë nibëdquidën min mases dadpenquioshë yanendac,”

quequin ambi chiaid Nuquin Papan dada uamepampic.

²⁸Tantia, con utsibo. Mibi chuinu. ¿Ada Nuquin Papan Abadauan chiampid tantie? —Min chido naido iccondaidën tishaid Isac cuëmëdquidën tsyuecquid tantiaquido bédamboen isendambi —quequin Nuquin Papan Abadauan chuipampic. Abadauan chiacpadomboen aton Mado Esus tantiaquo Nuquin

Papan: —Con mado nec. Con champi nec —nuqui caindac. ²⁹Ënden Nuquin Papan naidopenquo icmiampidën mado chieshënquin chido yuaidën madon aton utsibi chieshëmpampic. Adembidi Nuquin Papan Mayanën tantiamiaido Esus tantiaquido Moisesën dada uapampiduidi namenuequidon chieshënendac. ³⁰Aden Abadauanën mado bëyucquidën aton utsi chieshënsho isun ¿atotsi Nuquin Papan Abadauan chuipampic? “Tantia, Abadauan. Mibi chuinu. Min chidon yuaid aton madobëdtabi cueme. Min mado utsi Sadan madon tsyuecquido dadpenquo caidmequin bédamboen tabadmembidi. Yuaidën madoembi padenquo iquendac,” quequin Nuquin Papan Abadauan chiaid dada uapampic Moisesën. ³¹Sada caidën mado Isac caidpadquid yuapenquo nuqui nec. Esus tantiaquo Nuquin Papan: —Con mado mibi nec. Con champi mibi nec —nuqui caic. —Esusënuidtsëqui Nuquin Papa ëbi bédamboen ismec —quequin Esusquo tantiaquid yec: —Ëmbembi Moisesën chiactedi naquin Nuquin Papa bédamboen ismembidi —quenquo icnuna.

Esus tantiaquo Nuquin Papan bédamboen iste chiaid

5 ¹Aden: —Esusënuidtsëqui Nuquin Papa ëbi bédamboen ismec —mases camenuc abided cuidadec Esus unëspac caondashe. Aidquo tantia. Muaquidën: —Moisesën chiampicpaden nasho Nuquin Papan nuqui bédamboen istiashe. Aidën chiacpaden nanuna —quequin chuisho tantienda. Aden muaquin chiacpaden naic isadaidbo tsusedpan yuabimboec mibi yantsiaque.

²Mimbi isonaid Pabado nebique. Tantia. Mibitedi chuinu. Moisesën

chiactedi naquid Nuquin Papan
 bédamboen iste danquin Esus
 tantienquo yanec muaquidèn
 chiapadec shui dèbid dèteshuniadacsho
 isun Esusèn Nuquin Papa mibi
 bédamboen ismetiapimbo ictsiashe.
 Adenda. ³Aden Moisesèn chiaid
 abentsëc natsëcshun aidèn chiaid
 utsitedi nainquo icsho Nuquin Papan
 mibi bédamboen istiapimbo ictsiashe.
 Moisesèn dada uapampiduidi
 namenuequido tanenda. ⁴Aido Esus
 tantiesabo nec. Aden abi bédamboec
 ismianquid Esus tantienquo icsho
 Nuquin Papan aido bédamboen
 istiapimbo iquec. ⁵Esus tantiaquidoen
 Nuquin Papan Mayanèn
 tantiamiacpaden naden tantiec. —Esus
 tantiahouidi ambi chiaid
 niac-niacacmaidbimboecnuc
 bédamboen isquin Nuquin Papan: “Mibi
 bédambo iquec,” nuqui caindac
 —quequin nuqui tantiec. ⁶Shui dèbid
 dèteshunaidèn Esus tantiasho Nuquin
 Papan bédamboen isec. Adembidi shui
 dèbid dètiacmaidontsen Esus tantiasho
 Nuquin Papan bédamboen isoaic. Aden
 Esus tantiabensash: —Ambi
 chiapadomboen Nuquin Papan matses
 tantiaquid èbi icmendac —quequin
 aden utsibo tantiasho isun Nuquin
 Papan: —Adquid con Mado tantiaquid
 nec —caindac.

⁷—Bednu —quequin
 nadancacbimboen aiduidtsèqui
 tantiaquin mimbi Esusquo tantiondac.
 ¿Tsuntsin muaquin chiac Esus
 tantienquo mimbi yanoape?
 ¿Atotsiequin abimbo chiaid niacpe?

⁸¿Nuquin Papan nacta Esus tantienquo
 yano? Padenquo. Ma aidèmbi mibi Esus
 tantiametiadquo yoc. ⁹Muaquido
 tantienda. Nadquo aid iquec. Tosho
 bedquid abentsëcshun bedmewanac
 abitedi toshoquedecdedec. Adembidi

muaquid abentsëcshun chiac matses
 dadpenshun abimbo tantienquo
 yantsiashe. Muaid tantienda.

¹⁰—Nuquin Icbo Esusèn tantiamiac
 èmbi chiapadomboen Cadasia
 yacnocquidon tantiatiashe —quequin
 mibi chiec nebi. Mibi muaquin chuiquid
 Nuquin Papan cuidendac.

¹¹—“Con tsusedpan chiapaden shui
 dèbid dèteshunaiduidtsèqui Nuquin
 Papan bédamboen istiashe,” queposh
 Pabado —quequin ¿tsundanquieni
 muauapac caosh? ¿Adendambi chuidio?
 Aden èmbi chuisho adembidi
 chuiquidon chieshënenquo ictsenoshi.
 Esus chienquo icsho èbi
 chieshënenquo ictsenosh. Abi
 tantiaquid cuidmenquo icnuec abided
 cuidadec unèsaid Esusuidi chuisho mabi
 chieshëmpaboc. ¹²Mibi muaquin
 chuiquido Moisesèn dada uapampiduidi
 namenuequido caic: —Auëshquo
 cuemepashun —caimbi.

Esus tantiaquido bédamboec tabadte chiaid

¹³—Èbi cuidmenquo icnuec abided
 cuidadec unèsaid Esusquo tantiasho
 Nuquin Papan èbi bédamboen isec
 —camenuen Nuquin Papan mibi Esus
 tantiamiac. Adoac: —Esus tantiasho
 Nuquin Papan cuidtiapimbo iquebique.
 Èbi icsate bunaid nanu —quenda. Nèbi
 Esus tantiaquin mibi icsate bunaid
 ènquin mèmunta. Esus tantiaquido yec
 tantiananquieq nashunanta.

¹⁴Adomboen Nuquin Papan Moises
 naden chuimiapadomboen mimbi
 natsiac. “Mibibi min dada
 datantiadacbimboen utsibotsen
 bédamboen tantiaquiota,” quequin
 Nuquin Papan ambi chiaid Moises dada
 uamepampic. ¹⁵—Opa penantiadpambo
 yacbimboec nèishnanash
 chushcananosh —quiosh mibi caic.

Aden naic mibi icsacuededeque. Esus tantienquo mimbi yaneque. Bëdamboec tabadta.

**Nuquin Papan Mayanën
bëdamboen tabadmete**

¹⁶Nuquin Papan Mayanën tantiamiacpadomboen naic bëdamboec tabadta. Aden mibi icsate bunaid mimbi nainquo ictsiac. ¹⁷Nuqui icsate bunaid naiqui Nuquin Papan Mayanën tantiamiacpadece bëdamboec tabadtiapimbo nuqui ictsiac. Nuquin Papan Mayanën tantiamiacpadomboen tantiaquin nuqui icsate bunaid ënquin nuqui mëmuntsiac. ¹⁸Nuquin Papan Mayanën tantiamiacpadomboen tantiec: —Esusënuidsëqui Nuquin Papa ëbi bëdamboen ismec —qeshun: —Moisesën chiactedimbo naquin ëmbimbo Nuquin Papa bëdamboen ismëmbi —quequin tantienquo nuqui iquec.

¹⁹Nadquo icsateuïdi bunquid matses iqueque. Tantia. Chuinu. Nëidic aton chidopenquo chudquido. Nëidic aton bënëpenquo chudmequido. Nëidic dada daëd chichudnanquido. Nëidic opabimboec chudnante bunquin matses ismequin adoquido. Nëidic tsienbëdta shui chuïbudquin icsamete bunquido. ²⁰Nëidic Nuquin Papan chiaïd niac-niacquin ambi matsesbimboecnuc nacenaidi papa caquido. Nëidic nënëchoquido. Nëidic dauë icsa bedash icsa uanquido. Nëidic chieshëmënquido. Nëidic chieshëmë nec chushcananquido. Nëidic cudasquido. Nëidic nëshëmënquido. Nëidic ambi naiduïdi naquido. Nëidic abitedi cuësh-cuëshëdmianquido. Nëidic: —Utsin chiaïd tantiatipimbo iquebi. Èmbentsëqui bëdamboen chiëmbi —quequido. ²¹Nëidic utsin na natiambo bunec chieshëmënquido. Nëidic

tantiadenuen paëmbo icquid acquido. Inchëshën ushenquo icquin adoquido. Adquidtedishun icsamboen naic. Adec abi icsaid ëntiapimbo yec unësash Nuquin Papa yacno tabadtiapimbo iquec. Aden mibi chuïbanondambi ënden.

²²Padnuen Nuquin Papan Mayanën namiaïd yec nadquiec tabadquid. Nuquin Papabëdta matses tantiaquiec tabadquid. Esus tantiec cuïshonquec tabadquid. —Nuquin Papan ëbi bëdamboen isec —quec bëdambo yec dacuëdenquo yec tabadquid. Utsibon chieshënaqui chieshëmënenquo yec tabadquid. Nëshëmënenquo yec tabadquid. Bëdamboen isquin utsibo nashunec tabadquid. Muainquo yec tabadquid Nuquin Papan namiaïd. ²³—Con nauïdi naimbi. Èbiuidtsëqui bëdambo iquec —quenquo icquin utsibo bëdamboen tantiec tabadquid. Abi icsate bunaid ënquin mëmunec tabadquid. Adquo yec Nuquin Papan Mayanën namiaïdo Esus tantiaquido bëdamboec tabadtsiash. ¿Adec bëdamboec tabadsho isunda: —Adec tabadenda —quequin Nuquin Papan Moises dada uamepampic? Padenquo. —Icsamboec tabadenda —quequin icsamboec tabadquid chuïpampic. Nuquin Papan Mayanën tantiamiacpadece tabadquin aden chuïpampid nuqui niaquenquo iquec. ²⁴Adoenquo icquin cuesten decatanac abided cuidadec unësaid Esus tantiaquin nuqui icsate bunaid ënquin nuqui mëmuntsiac. ²⁵Aden icsamboen nainquo yec bëdambo icnuna. Nuquin Papan Mayanën Esus tantiamiaïd icquin aidën tantiamiacpadomboen nanuna. ²⁶—Èbiuidtsëqui bëdambo iquec —quenda. Adenquo yec nuqui chuïquid dëniacte bunenquo yec bëdamboec tabadnuna. —Èbi bunacpaden ëbi

namianenquien icchitec. Utsien namechitec —quec chieshëmë nec tabadenda. Nëishnanenquio yec bédamboec tabadnuna.

**Esus tantiaquido bédamboec
isnante chiaid**

6¹¿Nuquin Papan Mayanën tantiamiacpadomboen bédamboen tantiaquidta icpec? Adquidën abëdtan Esus tantiaquidën icsamboen nasho isun: —Padi. Esus tantiaquid adesambo neque. Bédamboec tabadta —caquid yendac. —Nëishec ëbitsen icsamane —qeshun nëishenquio icquin aden chuiquid yendac. Abibi datantiadec: —Icsaquid nebi. Esus bédamboen tantienquio yec adecbidi icsatsiabi —quequin tantiec: —Bédamboec tabadta —quequid yendac. ²Adec bédamboec isnanec: —Bédamboec tabadnuna —quec chuinanquiota. Adecbidi nashunanquiota. Aden naquin Nuquin Icho Esuquidistun chiacpadomboen mimbi natsiac.

³Utsien: —Utsibëd onquetiapimbo iquebi. Èbiuidtsëqui bédambo iquebi —quec abibi muauadquid icsambo iquec. ⁴Adenquio yec mibibi datantiadta. —¿Nuquin Papan chiacpadectabi bédamboec tabadpe? —quec mibibi datantiadta. Adashic: —Ai, Nuquin Papan chiacpadec tabadebi —quiash adecbidi bédambo icta. —Utsitedi icsambo icnubi ëbiuidtsëqui bédambo iquebi —quenda. ⁵¿Mimbi utsibon naid chuibanshoda Nuquin Papan: —Mibi bédambo iquec —capatsiash? Padenquio. Mimbi bédamboen naid isun: —Mibi bédambo iquec —catsiash.

⁶Esus tantiaquidon nadoquid yendac. Nuquin Papan chiaid abi chuibanquid nashunquid yendac. ⁷Piacbo sequidbimboec matses iquec.

Tantienquio icquidën icbompin uestsaidi siac canienquio ictsiash. Padnuen tantiaquidën ëshë bédaidquio siac bédamboec canitsiash. Tantienquio icquidbimboec icsambo icquid iquec. Ambi icsamboen naid icbompin uestsaidbimboec iquec. Icsauidequi tabadec unësash Nuquin Papa yacno niytiapimbo iquec. Padnuen Esus tantiaquid ambi chiacpadomboen naic unësash Nuquin Papa yacno nidendac. Èbi adsho tantiash: —Icsaido Nuquin Papan cuidenquio ictsiash —quec muaic tabadenda. Ambi chiacpadomboen mibi cuidendac. ⁸Ambi chiaid niac-niaquec abi icsate bunaiduidi naquid cuidendac. Nuquin Papan Mayanën tantiamiacpadomboen naquidien bédamboec tabadec unësash Nuquin Papa yacno tabadendac. ⁹Èmbi aden chuisho tantiash bédamboec tabadta. Bédamboec tabadec chieshtoenuio icsho isun ambi tantiacpadën Nuquin Papan abëdi nuqui tabadmendac. ¹⁰Adec bédamboec tabadquin utsibo bédamboen isquin nashununa. Aden utsibo bëdiactsëc tantiec Esus tantiaquido yec tantiananqueic nashunanquionona. —Shubu abentsëquën tabadquidobimboec Esus tantiaquido iquec —qeshun adonona.

Pabadon ënquimbi chiaid

¹¹Is. Nua-nua icnuc dada uaquin ëmbimbo ënquimbi dada uanu. ¹²Muaquin chuiquidon mibi con tsusedpan chiacpadomboenuidi nametiadquio iqueque. Aidon chuisho tantienda. Con matses isadaidbo: —Mibi bédambo iquec —camenuen mibi adometiadquio iqueque. —Esusuidi chuisho con matsesën chieshënquin cuidnushe. Moisesën chiacpadomboen namenu —quequin mibi shui dëbid dëteshunemetiadquio icchitec. Aido

muasho tantienda. ¹³Aden mibi:
 —Adota —caquidombi Moisesën
 chiactedi nainquien icchitec. Adquid
 yec: —Is. Bëdambo iquebique. Ęmbi
 chiacpadomboen nëidon naosh
 —quenuembien mibi shui dëbid
 dëteshunemetiadquio icchitec. Aidon
 chiacpadomboen nainda. ¹⁴Ębien
 adtiapimbo iquec. Esus tantiesabimboec:
 —Ębibi bëdambo iquebi —quetiapimbo
 iquebi. Esusuidtsëqui bëdambo iquec.
 Abi tantiaquid cuidmenquo icnuec
 abided cuidadec unëspac caondash
 cuesten dectanac. —Aidquio tantiec
 bëdambo iquebi —caimbi. Aden Esus
 tantiec: —Ęmbimbo Moisesën chiactedi
 naquin Nuquin Papa bëdamboen
 ismembı —quec ënëdondabi. Adecbidi
 Esus tantiec ëbi bunaid ënash icsate
 bunenquo iquebi. ¹⁵—Moisesën
 chiactedi naquiduidi Nuquin Papan
 bëdamboen istsiash —quetiapimbo
 iquebi. Shui dëbid dëteshunaidëmbi
 Esus tantienquo icsho Nuquin Papan
 cuidtsiash. Adembidi shui dëbid

dëtiacmaidën Esus tantienquo icshobidi
 cuidtsiash. Nuquin Papan Mayanën
 chuca uaidien Esus tantiaquid Nuquin
 Papan bëdamboen isquin bëdamboen
 tabadmec. ¹⁶Ęmbi aden chuisho
 tantiash: —Ai, abimbo mimbi caique.
 Adonona —quesho: —Aido Nuquin
 Papan bëdamboen isquin bëdambo
 icmepashun —caimbi. Adquido Nuquin
 Papan: —Con matsesquio nec
 —caindac.

¹⁷—Abimbo chienquien icchitec —ëbi
 cainda. Esusën chiaidquio chiombi.
 Aidquio tantiaquin ambi
 chiacpadomboen nabanta. Ęmbi Esusën
 chiacpadomboen nasho isun
 chieshënquin cuesaniondashi.
 Cuesondaid bish abi iquec. ¹⁸Tantia,
 con utsibo. Mibi Nuquin Papa
 chianembi naden. —Mimbi
 nabocpadomboen con Icho
 Esuquidistubëdtan Cadasia yacnocquido
 bëdamboen ista, Papa —quequin
 Nuquin Papa chianembi. Padi. Aidedi
 chuiquin dada uaombi.

EPESO YACNOCQUIDON ISTE

1 ¹Pabado nebi. Nuquin Papa bunacpadomboen Esuquidistun, Ēbi chuibeneta, caid nebi. Adquidquio icquin mibitedi Nuquin Papan bēdamboequid icmenu caidombo icsho chuiquin dada uaimbique. Epeso yacnocquido mibitedi Esuquidistu tantiaquidombo yec isec onqueducdedta.

²Aden Nuquin Papan bēdamboequid icmenu caidombo icquin ma Nuquin Papan Nuquin Icbo Esuquidistubēdta enenquiocquin ēbi bēdamboen isec, quequin mibitedishun tantiapashun. Adembidi, Nuquin Papan bēdambo icmenu caido yec abēd iquebi, quequin tantiapashun mibitedishun.

Nuquin Papan abēd abuc bēdamboec tabadacpadquiocnoc icmiaid

³Edoen, Nuquin Papa, Nuquin Icbo Esuquidistun Papa bēdamboequid nec. Esuquidistu adquidquibidi neoaic. Aid tantiaquid icsho abēd abuc bēdamboec tabadacpadquidquio nuquitedi icmiac. Adoaid yec, Mibi bēdamboequid nec, Papa, quequin chiec nuquitedi onquedenec. ⁴Nidaid abubēdta uabicquin aidēnquiocquidtedi uabicquin, Nēdtedquio Esuquidistu tantiaquido icsho ēmbi cuēmbanaido iquendac, quequin Nuquin Papan tantiapampic. Ambi tantiampicpaden ma nuqui icsaisa icmepanuna. Aden nuqui tantiaquin ⁵abi bunacpadomboen

Nuquin Papan, Esuquidistu tantiaquido con bacuēbo icmendambi, quiampicpadomboen nēbi adobanec.

⁶Esuquidistu tantiaquid nuqui icsho abēd icquid nuqui icmenuen Nuquin Papan abi yacpadquidquio icmabanec. Adoac, Bēdamboequid mibi nec, Papa, quequin Nuquin Papa nuqui chuidenec.

⁷Matsestedi icsaid bedshunacsho Nuquin Papa cudasaidquio Esuquidistu icsambocquidbimboecnuc cuesten dectanquin unēs uapanēdash. Adosho isash, Nēbi Esuquidistu tantiaquid ēmbi bēdamboen isaidquio nec. Mibi cuidenquio yec mibi icsaid bēpiscudobi, quec Nuquin Papa. ⁸Naden nanuna, quequin ambi tantiampicpadomboen aton bacuē icmabanac abēd icquido nuqui nec. ⁹Abi bunacpadomboen, Icsaquid cuidte bedshunash unēsquid con Mado Esuquidistu iquendac, quequin ambi matses tantiamenquio icpampid nēbi ambi cuēmbanaido Nuquin Papan tantiamebanec. ¹⁰Adoaid iquec con mado abun icquido nidaid yacnocquidobēd chuiquid abentsēqui iquendac, quequin Nuquin Papan tantiampicpadquibidi adquidquio icmenu caidquio Esuquidistu iquendac.

¹¹Esuquidistu tantiaquid icsho isun ambi tantiampicpadomboen, Con bacuē icmiaido nec, quequin Nuquin Papan cuēmbanaido ¹²abia tantiaquido nuqui bēdamboec tabadsho isash, Nuquin Papa bēdambo iquec, quequin chiec ma

utsibo cuëdëmpanuna. ¹³Mibi icsaid bedshunash abided cuidadec Esuquidistu unësphanëdash, quequin chuibanac abi tantiaquido mibitedi yansho isun, Esuquidistun na nec, quequin aton Mayan mibi meniaid abi iquec. ¹⁴Aidëmbi mibi bëdambo icmiac Nuquin Papabëd tabadendac. Mibitedi bëdamboec tabadsho isash Nuquin Papa bëdambo iquec, quequin chiech ma utsibo cuëdëmpanuna.

Nuquin Papa chiech onquianiaid

¹⁵¿Bëdamboecta Epeso yacnocquido Esuquidistu tantiaquido tabadpec? quec tantiec tsadquimbi, Esuquidistu tantiec Epeso yacnocquid dadpen yanosh, quequin utsibon chuisho tantiombi. Adembidi, Epeso yacnocquido Esuquidistu tantiaquid yanash abipadquid utsibo tantiec abëd icte bunanec iccuededec, quequin chuisho tantiapombi. ¹⁶Aden tantiaishun mibitedi bëpiscudenquiocquin badiadquidën-badiadquidënquien naden Nuquin Papa chian-chianembi. ¹⁷Esuquidistun Papa, icsaisambo, tantiaquidquio mibi cadoque. Mibi bëdamboen tantiaquid yacpadquiocnoc min bacuëbo Epeso yacnocquido min mayan icmeban, Papa. Adquido min Mayanën icmiac mibi tantiadonequidombo ma icpanuna. ¹⁸Adecbidi, Abuc ëbëdi mibi iquendac, quequin mimbi chiacpaden tantiaquequin pausunac mibëd icnuequin cainquidombo Epeso yacnocquido ma icpanuna, Papa. Aidën tantiamiac, Mibi yacno Esuquidistu tantiaquid utsibobëd bëdamboec tabadendabi, quequin Epeso yacnocquidon ma tantiaapanuna, Papa. ¹⁹Aden tantiamiac Nuquin Papan nadatiambocquin nabanquin Esus unësascho uincuemënëdapaden ëbi

uincuemendac. Adembidi nadatiambocquin nabanquin Esus tantiaquid ëbi icmiac. Adembidi ëbi bëdamboecquid icmebanec, quequin ma Epeso yacnocquidon tantiaquiopanuna, Papa. ²⁰Esuquidistu unës uacsho uincuemeshun mibi yacno aidi indoshon min dayunquio mimbi tsadumpanëdac, quequin tantiec Nuquin Papan nadatiambocquin naidquio nec, quequin adomboembidi ëbi indoapec, quequin tantiacpadomboen ma Epeso yacnocquidon tantiaapanuna, Papa. ²¹Nadatiambocquin nabanquin Esuquidistu abuc buanshun abitedi chuiquid dapa aidi mimbi icmioc. Mibipadquid utsi nibëdec, quequin Esuquidistu min dayunquio tsadunquin utsibo mimbi ismepanëdac, Adquid nebi, chuiquid utsi quetiapimbocon. Nuquin Papan nadatiambocquin nac ënenquiocquin abitedi chuiquidquio Esuquidistu iquendac, quequin Epeso yacnocquidon ma tantiaquiopanuna. ²²Abitedishun con icbo caidquio Esuquidistu nec. Abi tantiaquidtedi aton shubun icquido nec. Aidon con icbo quequin chuidoniaidquio nec. ²³Ambi ëndenquimbo tantiampidtedi abi tantiaquido yanash aton shubun icquidombo nuqui iquendac. Nuqui Chuiquid Abentsëcquioibi Esuquidistu icquin abëd icquido nua pausunaido yec abi yacpadquio ictequid yec abentsëc yacimbocë abëdi nuqui tabadendac.

Nuquin Papan Esuquidistubëd icmiaido

2 ¹Mibi icsaquid yec Nuquin Papabëd ictiapimbo iccondac. Adboedi nëbi aidëmbi ënenquiocquin abëd icquido mibitedi icmiac. ²Ënden Nuquin Papa chieshënquin mimbi tantiacpadomboen nabanondac. Adquid icsho Nuquin Papa chieshënquid dapan Satanasën yuaido mibi iccondac. Aidën Nuquin Papan

chiaid niacacpadomboen mibitedishun niacbededpondac. ³Adquiduidquio yec nuqui tantiacpadec icsadenec nuqui tabadpadenec. Adec tabadquin Nuquin Papan chiaid niactenepondac nuqui. Aden niacsho isun adquid utsibobëdta Nuquin Papan cuidnu caido nuquitedi icpondac. ⁴Adec cuidnu queboedëmbi nuqui tantiec unësquiocquin Nuquin Papan comapenen nuquitedi tantiamepondash. ⁵Ambi cuidnu caido icsaquido yec abëd ictiapimbo nuqui tabadpondac. Adec tabadsho Esuquidistu tantiaquido nuqui icmebanquin abëd icquido Nuquin Papan nuquitedi icmiac. ⁶Esuquidistu nuqui icsaid bedshunacsho abided cuidquin unës uapanëdash. Unësacsho isun uincuemeshun abi yacno Nuquin Papan indopanëdash. Adshun abi tantiaquidtedi abuc Esuquidistubëdta ambi indoac bimboecquido icsho Nuquin Papan nuqui bëdamboen isec. Adecbidi abuc Esuquidistubëd icquid nendabi, quequin tantiec nuqui tabadec. ⁷Nuqui icsaquido icsho Nuquin Papan Esuquidistu tantiaquid nuqui icmeshun, Cuidnu, quenquiocquin Esuquidistubëd icquido nuqui icmec. Ma adquid icsho isash utsibo, Nuquin Papan naid nec, ma quepanuna. ⁸Nuquin Papan, Cuidnu, quenquiocquin Esuquidistu nuqui tantiamiac abi tantiaquidombo nuqui yanondac, Ëmbibi tantiemi, quetiapimbo nuqui icnubi, Mibi tantiamiombique. Ëbi cuidquin mene, quenquiocquin Nuquin Papan nuqui tantiamiosh. Adoac Esuquidistu tantiaquid yec abëd icquido nuqui nec. ⁹Icsaquido icquin bëdamboen naic nuqui icsaid cuidadtiapimbo nuqui iquec. Bëdamboen naic cuidadpebi, quiash abi icsaquid yequi, Bëdambocquid nebi, quec tabadsho isun utsibon icsamboen tantianushe queshun

Nuquin Papan icsaisa aton Madoded cuidpanëdash. ¹⁰Nuquin Papan uaido nuqui nec. Aidëmbi Esuquidistu tantiaquido nuqui icmebanec ma ambi tantiampicpadomboen utsibotsen nuqui tantiaquin ma nashumpanueshun.

**Esuquidistubëd abentsëc
yac bimboecquido**

¹¹Nuquin Papan, Cuidnu, quenquiocquin comapenen tantiamiaidquio mibitedi icquin mibi ënden tabadaid tantiata. Shui dëbid dëtemesa isadaidpembo nec, quequin isadaidbon shui dëbid dëtemequidon mibi cuë nondash. Nuquin Papan matsesquio nebi, quequin shui dëbid dëtemequidquio isadaidbo nec. ¹²Adquidquio isadaidbo icnuc, Nuquin Papan chomiaid choec, quequin tantiesa mibitedi icpondac. Adquido yec Nuquin Papan matses nebi, isadaidbo quiacpadec adtiapimbo mibitedi iccondac. Adecbidi, Ëbi yacno yuedanquid iquendac, quequin Nuquin Papan chiaid tantiesa mibitedi icpondac. Adecbidi, Abëdi ënëdenquio yec tabadebi, quequin chuitiapimbo mibitedi icoapondac. Adecbidi, Abia yampid Nuquin Papambo iquec, quequin tantiesa mibitedi icpondac. ¹³Adec aid tantiesa yec icsaquid yec, Nuquin Papa yacno puduednu, quetiapimbochoedi, Matses icsaid bedshunash abided cuidadec Esuquidistu unëspanëdash, quequin tantiaquid icsho aidënquio abi yacno yuedendac. Nëbi aid tantiaquid yec abi tantiaquid utsibobëd abëdi tabadac bimboecsho Nuquin Papan nuqui bëdamboen isec.

¹⁴Isadaidpembo isash isadaidbo, Ëbëd icquidpenquio nec, quequin tantiec datamëncuenepondash. Adecbidi isadaidbo isash adquiecbidi

isadaidpembo datamëncuenepondash. Adquido icboedi ëbi icsaid bedshunash Esuquidistu unëspanëdash, quequin isadaidbo utsin-utsinquien tantiec. Adembidi isadaidpembo utsin-utsinquien aid tantiec. Adec aid tantiaquid yanash datamëncuenequido yec matses abentsëc yacbimboecquido yanac. ¹⁵Esuquidistu matsesash nidaidën tabadquin isadaidbo icquin isadaidbon, Naden nata, quequin chiacpadomboen utsitedishun natiapimboconobi Esuquidistun uesquin nabampanëdash icsainquiocquin. Adec tabadquin naimbudsho icsaquidbimboecnuc unës uapanëdash. Aden unësmesho isec Nuquin Papa, Padi. Chën, quenquio icpanëdash. Èbi yacno isadaidbo isadaidpembobëdtabi con madon yuedendac, quiash chën quenquio icpanëdash. Datamëncueneboedi aido Esuquidistu tantiaquid yanash datamënenquido yanac. ¹⁶Naden nata, quequin chiaidtedi nuqui natiapimboconoc nuqui icsaid bedshunash Esuquidistu unëspanëdash, quequin tantiaquido isadaidbobëdi isadaidpembo yanac. Ambi tantiaid Esuquidistu yanash datamëncueneboedi adec datamënu quetiapimbo yanec Esuquidistun shubun icquido yanoaic. ¹⁷Matsestedi bëdamboen iste Nuquin Papa bunec quequin ambi chuibeniacpadec abided matses icsaid bedshunash unësqin isadaidbo isadaidpembobëdta Nuquin Papan bëdamboen isaido icmepanëdash. ¹⁸Adoac nëid isadaidbo nec. Nëidic isadaidpembo nec, quenquiocquin, Esuquidistu tantiaquid nec, quequin Nuquin Papan abi tantiamenuequid aton Mayan meniac. Aden meniac aidën tantiamiac, Mimbi ëbi tantiec, quec Nuquin Papa chiec Esuquidistu tantiaquidombo onquedene.

¹⁹Aden chiec onquec ambi yuedtiapimbo icboedi nëbi Esuquidistu tantiaquido yanash Nuquin Papan shubun ënden icnëdaidobëd tabadtequid mibitedi iquec. ²⁰Adquid icsho aton Mayan meniac Nuquin Papa tabadte Esuquidistu tantiaquido nec. Abi tabadte nadquido isadeque. Chuinu. Tania. Esuquidistu abia yampid abi yacno yuedanquidquio yec abia nitsinaid cueste nidquidbimboecquid nec. Nuquin Papan chiaid chuibampampidobëd Esuquidistun ëbi chuibeneta caido shubu nitsinaidbimboecquid neoaic. ²¹Aided abia icquid icnuc isadaidbobëd isadaidpembo Esuquidistu tantiaquid dadpen yansho Icbon tabëcshun tanebanaidbimboecquido neoaic. Abi tabadte Icbopadquid icsaisa yampec. ²²Mibi Epeso yacnocquido Esuquidistu tantiaquid utsibobëd Nuquin Papan Mayan meniaid yec Nuquin Papa tabadtebidi mibi nendac.

Isadaidpembo Esuquidistu chuibenequid Pabado

3 ¹Isadaidpembobëdi ma Nuquin Papa tabadte icnu quequin Esuquidistu chuibenesho quënën nauedaid icquin aidën chiacpadomboen mibi chuibanquidquio nebi. ²Isadaidpembo yacno nidshun Esuquidistu chuibeneta Nuquin Papan cac nebi. Esuquidistu chuibenequid Pabado nec, quequin mimbi tantiec. ³Èbi yacno yuedanquid Esuquidistu iquec, quequin Nuquin Papan tantiamiacpaden ënden dada uaquin mibi chiondambi. ⁴Èmbi dada uaondaid bëdamboen isec onquequin Nuquin Papan ëbia Esuquidistu tantiamiacpaden mimbi tantiapec. ⁵Èndenquio Nuquin Papan Esuquidistu nidmembali, quequin

chienquiocpampidëmbi nëbi ambi, Esuquidistu matses tantiameta, caid aton Mayan nec. Adoac Nuquin Papan, Esuquidistu chuibeneta, caidtedi ambi naden nanuna, quequin chienquiocpampidëmbi aton Mayanën tantiamiac. ⁶Ambi nëbi tantiamiaid nad iqueque. Tantia. Chuinu. Isadaidpembo Esuquidistu tantiaquido isadaidbo Esuquidistu tantiaquidobëd Nuquin Papa yacno ënëdenquoio yec tabadtequido nendac.

⁷Nuquin Papan, Cuidnu, quenquiocquin nadatiambocquin ëbi ismiaid yec ambi Esuquidistu chuibeneta caid ambi namiaid icsho ambi nadatiambocquin nabamiaidquio nebi. ⁸Esuquidistu tantiabicquid utsi bëdiactsäc icsaquid icnubi comapenec icsaquidquio icsho Nuquin Papan Esuquidistu tantiaquid icmeshun Esus bëdambo yaidbëdtabi abëd tabadte bëdaidquio tantiamequiopondashi. Adembidi ambi, Esuquidistu chuibeneta, aidquio nebi. Adquid icquimbi Esuquidistun matses bëdamboen tabadmenu, quequin tantiaid dadpen icnuc aidtedi uesquin chuitiapimbo iquebi. Aidtedi matsesën bëdamboen tantiatiapimbo icoapec. ⁹Ëbëdtambi abitedi uampidquio Esuquidistu aid tantiaquido ëbi yacno yuedquid iquendac, quequin Nuquin Papan tantiamenquiocboedi nëbi matses tantiamenuen Esuquidistu chuibeneta caidquio nebi. ¹⁰Aden ëbipadquidon Esuquidistu chuibeniäc icsaquid icboedi Esuquidistu tantiaquid dadpen yanac. Adsho isun aidtedi Nuquin Papan Esuquidistubëd abentsäc yacbimboecquid abipadquid ambi tantiampicpadomboen icmebanec. Aden icmebansho isun abi yacno tabadquin namequidon tantienquiocboedëmbi nëbi tantiendac. Nuquin Papan, Yuecshun

naden nanuna, quequin ambi bëdamboen tantiampicpadomboen nabanac nëbi abëd icquid dadpen iquec, quequin Nuquin Papan abi yacnoshon uaidon tantiec. ¹¹Matses bëdambo icmetequid Esuquidistu iquendac, quequin ambi tantiampicpadomboen Nuquin Papan Esuquidistu Nuquin Icbo icmepanëdash. ¹²Aton mado Esuquidistu ëbi icsaid bedshunash unësash uincuenash Nuquin Papan dayunquoio iquec, quequin tantiec dacuëdenquoio yec Nuquin Papa chiech nuqui onquec. ¹³Adecbidi, Esuquidistu chuibenesho bedshun Pabado quënë nauedac, quequin tantiec chieshenquiocquin Esuquidistu tantiata, Epeso yacnocquido mibi caimbi. Ëmbi chuibanac Esuquidistu tantiaquid yansho Nuquin Papan abëdi tabadmenuequin Nuquin Papan ambi, Bëdamboquid icmenu, caid mibitedi neque. Chieshenda. Adembidi Pabadon chiac ëbipadquid isadaidpembo utsi-utsiec dadpen Esuquidistu tantiaquid yampec, quequin tantiec tabadta.

Epeso yacnocquido tantiec Nuquin Papa chiech Pabado onquiaid

^{14,15}Nuquin Papan isadaidpembo Esuquidistu chuibeneta cac, chuibenesho quënë nauedaid icquin ëmbi chiac Esuquidistu tantiaquid isadaidbobëd isadaidpembo Nuquin Papan matses yanash aton shubun icquido nec. Nuquin Papan cuëmbanaido nec, quequin tantiec danëshën sebudash aid naden chiech onquebi. ¹⁶Mibi icsaisa icquin mimbi tantiacpaden Epeso yacnocquido nua pausun, Papa, ma natiamiantequid icnuc Esuquidistu tantiesa yanenquiocpanuna. ¹⁷Aden pausunac ma aido Esuquidistu

tantiadonequidombo icpanuna. Aido mimbi tantiamiac ënëdenquoio yec utsibëd tantiananec tabadquid ma Epeso yacnocquido icpanuna. ¹⁸Aden pausunac, Èbi utsibobëdta comapenen tantiaquid Esuquidistu nec. Ambi bëyuc matses uaid tantiaquinc, aidën tsyuecquid ënden icpampido tantiaquinc, nëbi tsyuec tishaido tantiaquinc, tishabicquido tantiaquinc caquin aidtedi icsaid bedshunacsho Nuquin Papan cuidpanëdash, quequin ma Epeso yacnocquidon tantiapanuna, Papa. Adembidi abuc bëdamboshë yacno icboedëmbi matses icsaid bedshunacsho Nuquin Papan cuidpanëdash, quequin ma Epeso yacnocquidon tantiaquiopanuna, Papa. ¹⁹Aden tantiaquidquio yec Esuquidistu unësnëdash, quequin tantiec papuduedash Esuquidistun matses tantiacpadquidquio Nuquin Papan ma mibitedi icmebampanuna.

²⁰Nadquid Nuquin Papan ëbi icmetsiash, quequin nuqui tantiatiapimboconobi nadatiambocquin nabanquin ambi tantiacpadomboen abi yacpadquidquio nuqui icmebanendac. ²¹Adoac ma abi tantiaquidon ënenquiocquin Nuquin Papan Esuquidistubëdtan naid chuibampanuna. Ma aidon tsyuecquidontsen adembidi chuiopanuna. Ma nuquin tsyuecquidon tsyuecquidontsen adembidi chuiopanuna. Ambi uaid utsitedi naimëdec, quenubi ma adomboembidi Nuquin Papan Esuquidistubëdtan naid matsesën chuibanoapanuna. Ai, ma ënenquiocquin adopanuna.

**Abentsëc yac bimboecquido
Esuquidistu tantiaquido**

4 ¹Nuquin Papan isadaidpembo Esuquidistu chuibeneta cac chuibenesho bedshun quënen nauedaid

icquin naden mibi chiembique. Tantia. Esuquidistu tantiaquido aton shubun icquido yec icbo bëdamboec tabadacpadquieq tabadteneta. ²Utsi icsambocsho isun, Icsaisa Nuquin Papapadquid yanabicquid nebi, quequin tantiaquin abëd onquequin abi icsaid ëmenuequin chuiban. ³Nuquin Papan Mayanën abi utsibëd bëdamboec tabadaid tantiamiacpadquieq Esuquidistu tantiaquid utsibobëd bëdamboec tabadteneta. ⁴Esuquidistu tantiaquidtedi abentsëc yac bimboecquid nec. Abentsëcquiobi mibitedi meniaid aton Mayan iquec. Adquiecbidi Nuquin Papa yacno nidash aidbëd tabadec abipadquid yec icsaisa iquendabi, quequin abuc indotequid mimbi caintequid abentsëcquiobi iquec.

⁵Abentsëcquiobi mibitedishun con Icho caid iquec. Abentsëcquiobi mibitedishun tantiaidquio Esuquidistu iquec. Esuquidistu tantiaquinc, Nuquin Papa tantiaquinc, aton Mayan tantiaquinc casho acten mentoaidtedi abentsëc yac bimboecquid nec. ⁶Abia yampid Nuquin Papa Esuquidistun Papambo abentsëcquiobi iquec. Abitedi uaquidquio yec abitedi Chuiquid Dapambo nec. Aidbidi Esuquidistu tantiaquido bëdambo icmequid neoaic. Aidëmbi Esuquidistu tantiaquidobëd tabadnuequin abipadquid meniac nuquibëd aton Mayan iquendac.

⁷Esuquidistun ambi tantiacpadomboen abi tantiaquid abentse-abentsen pausunec. Aden pausunac aid tantiec tabadendac.

⁸Ëndenquoio chiampicpadembi nëbi pausumbanec. Naden ënden chiampid neque. Tantia. Chuinu.

“Nuquin Papan abucquio indoac, Èbi tantiaquidtedi ëbëdi tabadendac, quequin Esuquidistun bedbanshun buanac bimboecquido aido nec.

Nadquidquio iquendac, quequin
 ambi tantiacpadomboen
 pausumbanac,”
 quequin ënden chiampid nec.
 9“Abucquio indoac,” quequin
 ÷mitsipadomboen tantiampampiba?
 mibi quepec. Aidquio chuinu. Tantia.
 Esuquidistu abia yampid yec abucquio
 tabadboedi, Matses icsaid bedshunash
 ëbided cuidadnu, quianacsho
 nidaidëshun chidon tishpanëdash.
 10Aid nidaidëshun tishacsho unës
 uacsho uincuemequin Nuquin Papan
 aidquio abuc abi yacno indoshon
 abitedi chuiquidquio Esuquidistu
 icmepanëdash. Adquid icmiac ma ëbi
 tantiaquidobëd icpanueshun
 abipadquidquio aton Mayan aido
 menebanec. 11Aden aid menebanac
 aidënquio Esuquidistu tantiaquido
 utsi-utsien nadquid icmebanec:
 Esuquidistu chuibenequid utsi-utsien
 icmebanquimbi, Nuquin Papan naden
 nanuna, quequin chiaid chuibanquid
 utsi-utsien icmebanoaic. Adquid
 icmebanquin utsi-utsien Esuquidistu
 chuibenequidon, Esuquidistu chuibanta,
 caidbidi aido icmebanquin utsi-utsien
 abëd iccuededquido isbanquin chuiquin
 tantiamequid icmebanoaic.
 12Bëdamboec tabadtenequido ëbi
 tantiaquidtedi icmeta, cac aidën
 tantiacpadomboen adquido icmebanac
 13ma shubu dapan icquid dadpen yanec
 abentsëc yac bimboec abi
 tantiadonequido icpanuna. Aden
 Nuquin Papan mado tantiadonec ambi
 uesquin pausunaidquio yec
 abipadquidquio iquec icsaisa iquendac.
 14Ambi pausunaidquio icquin abimbo
 chiac bimboen utsibon chuisho
 tantiabenabicquidën badedquio
 tantiacpaden tantienquio nuqui
 iquendac. 15Tantiananec abimbo
 chuinanquido Esuquidistu

tantiadonequido icmiac chuiquid
 Esuquidistupadquid yanash abëdi
 abentsëc yac bimboecquid nuqui
 yanendac. 16Ëbi chuiquidquio
 Esuquidistu nec, quequin ambi
 chiacpadomboen nabanquidquio abi
 tantiaquidtedi yec abëdi abentsëc
 yac bimboecquid nuqui iquec.
 Esuquidistun pausunacpadomboen
 abentsëcshun-abentsëcshunquien
 nabanequi tantianquiec abi
 tantiaquidtedi Esuquidistupadquidquio
 abëdi abentsëc yac bimboecquid
 yanendac.

**Esuquidistun nua
 pausunacpadquiec tabadteniaid**

17Esuquidistubëd abentsëc
 yac bimboecquid abi tantiaquidtedi
 iquendac, quiash, aidpadquid icnu, quec
 ënden icsamboec tabadnëdacpadquiec
 tabadenda caimbi mibi. Esuquidistun
 ëbi chuibeneta caidquio icquin dada
 uaquin mibitedi aden chiembi.
 Esuquidistu tantiesan ambibi
 tantiacpadomboenuidi tantiec. Adecbidi
 ambibi tantiacpadomboen nabanec.
 18Pashuac bimboen tantienquio iquec.
 Nuquin Papabëd tabadte iquec, utsibo
 qesho tantiesya yec, Tantiatiapibi,
 quepec aido. 19Icsaquid nebi, quequin
 badedquio chienquio aidon iquec.
 Adquid icsamianquidën yuaid yec,
 Icsanu, quiacpadec tabadec. Adecc
 icsasho utsin istemaid nec. 20Adpenquio
 Esuquidistun tantiamequin pausunaid
 iquec. 21Esuquidistu chuibanquisho Epeso
 yacnocquidon tantiaposh, quequin
 chuisho tantiapondambi. Mibi, Aid
 tantiaquid nebi, qesho tantiashun
 Esuquidistu chuibenequidon, Abëd
 icquid yec abipadquid yanebi quec
 adquiecbidi tabadteneta, quequin mibi
 chuipondash. 22Adoac mimbi
 tantianëdacpadec tabadoainda. Mibi

ënden icsamboec tabadacpadquiequi mibi icsaded-icsadedondac. Icsaquid yequi, Bëdambocquid nebi, quec mibi muadenepondac. ²³Mibi icsate bunaid ënta. ²⁴Adsho isun ma Esuquidistun tantiacpadomboen tantiapanu quesun Nuquin Papan Mayanën mibi nua pausunendac. Adoac adomboembidi mimbi tantiapec. Adecbidi aid bunacpadquiec bunoapec. Adoaid yec mibi bëdambocquid icnuec icsaisa yanec mibi bëdamboec tabadtenendac. ²⁵Adquid icnuec Esuquidistun shubun icquido nebi, quec muainquo yec Esuquidistu tantiaquid utsibobëd abimbo chuinanquidombo icta. ²⁶Nëishhec icsainda. Nëishash abi ushëmbi bëdanta. ²⁷Satanasën yuanushe quiash badedquo bëdanta. ²⁸Ampequid icboedi Esuquidistu tantiaquid yanshun ampenda. Adquid icboedi chonoadquin mitsana bedshun utsin na nibëdsho isun menequid icta.

²⁹Icsaquid onquiacbimboec onquenda. Utsi tantiaquin bëdambocquid icmenuequin chiec onqueta ma Nuquin Papan aidtsen bëdambo icmepanu quiash. ³⁰Esuquidistu tantiaquid mibi icsho isun Nuquin Papan, Con bacuëbo yec ëbëdi tabadendac, quequin ambi tantiametequid aton Mayan mibi meniac. Aidi mibi icsaisa icmenuequidën mibi icsasho isec unësquo yampec. Aid unësquo icmenda. ³¹Utsi icsamboen chuinu, quequin tantiaid ënta. Adecbidi comapenec nëishash bëdanta. Utsi cuestiadquo yec nëishboedi adecbidi bëdanta. Nëishash chushqueboedi adecbidi bëdanta. Utsi icsamboen tantiaquin chuiboedi adecbidi bëdanta. Utsi icsamboen tantiaid adembidi ënoata. ³²Adembidi bëdambo icmenuequin utsi bëdamboen tantiaquin nabanta. Adecbidi utsin chieshënquin

mibi icsamboen nasho isash chieshnanec cuidnanenda. Esuquidistu mibi icsaid bedshunash abided cuidadec unëso isash Nuquin Papa mibi icsaid bëpiscudacpadquiec utsi icsaid bëpiscudoata.

5 ¹Nuquin Papan bacuëbo yec ²tantiananec tabadteneta. Nuquin Papan chiampicpadquiec Esuquidistu nuqui tantiaquin nuqui icsaid bedshunash abided cuidadec unëspanëdash. Adquidquo icsho isun Nuquin Papan bëdamboen isaidquo Esuquidistu icpanëdash.

³Esuquidistu tantiaquid yec, Mimbi inacmaid isec chudnu, quesambo icta, dada. Adecbidi, Èbi inesa chudmenu, quesambo icta, chido. Opabimboec iquenda. Adecbidi, utsin na isash, Bednu, quesambo icoata. Esuquidistu tantiaquid nebi, quequin adoenda. ⁴Adecbidi, Esuquidistu tantiaquid yec tsienbëdta shui icsamboen chiec onqueboedi adec mibi onquiaid ënta. Adecbidi, utsi icsamboen oncaisambo icta. Adecbidi, bëdamboec onquequid utsi uain chuiquin mamënshunesambo icta. ⁵Chudtemaid chudnu, quequinuidi chudquid yec opabimboecuidi tabadquid Nuquin Papa yacno Esuquidistun shubun icquid ictiapimbo iquec. Adecbidi, Bednu, quequinuidi bedquid yec Nuquin Papa yacno Esuquidistun shubun icquid ictiapimbo iquec. Aden nabanquid Nuquin Papabëd Esuquidistu con icbo nec, quetiapimbo icoaic. ⁶Ambembi chiec onquiaid tantiesa icta. Adquid Nuquin Papan chiacpadomboen naisa nec. Adquid Nuquin Papan comapenen cuidendac. ⁷Adquidbëd icsainda.

⁸Ënden Esuquidistu tantiesa icquin inchëshquiocnoc isacbimboen tantienquo icboedi nëbi Esuquidistu tantiaquid mibitedi yansho ambi

tantiamebaniaido icquin badiadnuc
isucunacimboen tantiaquiota. Aden
tantiec Nuquin Papan bacuëbo yec
Nuquin Papan tantiamiacpadquiec
bëdamboec tabadteneta. ⁹Esuquidistun
ambi tantiacpadomboen pausunac abi
yacpadquiec nuqui bëdamboec
tabadtenendac. Adembidi aid
yacpadomboen abimbo chuidenequid
icta. ¹⁰¿Nadec tabadshodabi Nuquin
Papan bëdamboen istiashe? Tanu,
quequin adomboen nabanec
tabadteneta. ¹¹Utsibëd icsainda. Utsi
icsadenenubi mibi bëdamboec
tabadtenesho isun abi icsaid utsin
ëmpec. ¹²Icsaquidën ompoquin naid
chuitemaid nec. ¹³Adquidën Esuquidistu
tantiaquid bëdamboec tabadtenesho
isun, Icsambocquid nebi, qeshun
Esuquidistu tantiabempec. ¹⁴Bëdamboec
tabadquin ismedeniac
icsambocboedëmbi bëdamboen
tantiabentsiash. Esuquidistu tantiaquido
chuiquin dada uaid nad iqueque. Tantia.
Chuinu.

“Unësacimboen tantienquioeboedi
isucunshun tantiabnacimboec
bëdamboec tabadta.

Adquid icsho Esuquidistun mibi nua
pausunendac.”

¹⁵Adec bëdamboec tabadnuec
Esuquidistun tantiamiacmaid
tabadacpadec tabadenquio yec
Esuquidistun tantiamiacpadquiec
tabadteneta. ¹⁶Icsaquid dadpen iqueque.
Aidpadquid iquenda. Esuquidistun
pausunaid mibitëdi bëdamboec
tabadtenesho isec ma Esuquidistu
tantiesä icboedi abi tantiaquid
yampanuna. ¹⁷Mimbi icsamboen
tantiacpaden nabanenda. ¿Atotsi mimbi
ëbi namepatsia? quequin Nuquin Papa
chui. Aden abi chuisho Nuquin Papan
mibi tantiamiacpaden adobanta.

¹⁸Icsachitomane quequin nua

paëmbocquid aquenda. Aden aquec
icsaindac. Icsate bunenquiocquin
Nuquin Papan Mayanën
tantiamiacpadomboen nua pausunaid
icquin bëdamboen nabanta.

¹⁹Adec icsate bunenquiocquin
Esuquidistu tantiaquid utsibobëdtan
Nuquin Papan chiaid chuiquinc,
chuiquid dapa Dabidën dada uampid
sadmo caid utsi-utsien chuiquinc,
cuëdëntë utsi chuiquinc cain chiec
cuëdënteneta. Adec cuëdënquin Nuquin
Icbon naid chuideneta. ²⁰Esuquidistu
tantiaquid icsho Edoenën Nuquin Papan
bëdambo icmiaidtedi yec aidën naid
chiec onquedeneta.

Utsi tantiaquin nashunta quiaid

²¹Esuquidistu con icbo nec, quequin
ambi chiaid niacmane qeshun utsi
tantiaquin nashunta.

²²Adembidi Esuquidistun
chiacpadomboen dadan inaidën min
bënën chiacpadomboen nabanta.

²³Adembidi abi tantiaquidtedi
chuiquidquio Esuquidistu nec. Abi
yacno indoshon ënëdenquio yec
icsainquiocnoc tabadmendac. Adembidi
aton chido chuiquidbidi aton bënë nec.

²⁴Esuquidistun chiacpadomboen abi
tantiaquidon nabanacpadomboen aton
bënën chiaid naquidquio aton chido
neoaic.

²⁵Esuquidistu abuc tabadboedi abi
abuc bëdamboec tabadtequid
tantienquio yec unës uanushe quenquio
yec matses tantiec nidaidënshun tishaid
yec matses icsaid bedshunash abided
cuidadec unëspaneëdash. Abuc ëbëdi
abentsëc yacimboecnuc tabadmenu,
quec unëspaneëdash. ²⁶Adecbidi, Èbi
tantiaquido icsaisa icmenu, quiasch
abided cuidadec unëspaneëdash.

²⁷Adecbidi, icsaid nibëdquid bëdaidquio
abi tantiaquido icmeshun Nuquin Papa

yacno yuedshun, Ęm̃bi yuedboed min shubun ictequid nendac, quequin ismembi, quec Esus unēs̃panēdash. ²⁸Adomboembidi chido inquidēn abibi tantiadacpadomboen ma con chido tantiaquin, Bēdamboequid icmenu, quequin nashundeniash ma aidbēdi bēdamboequid icsho Nuquin Papa yacno Esuquidistun yuedpanuna. Aton chido tantiaquid abibi tantiaquidibidi nec. Aidbēdi abentsēc yacimboequid neoaic. ²⁹Abibi chieshēmēdesa dada nec. Bunquioquin peshun aquec. Adembidi iquenquin cuēte cuēc. Esuquidistun abi tantiaquido abēd icquido icsho aido tantiaquin nabanacimboen ³⁰dadān abēd icquid aton chido icsho aidi tantiaquin nashunquid. Dadaba uashun aidēn shictodobi chics̃hun chido uapampic. Adoshon dadan nami aton canitebēdta chido uashun daēd uac abentsēc yacimboec aid daēdi yanac. ³¹Nuquin Papan ēnden dada uampid nad iqueque. Tantiā. Chuinu. “Aidbēd icnu, qeshun bedash aton papa aton titabēdta nianacimboec daēdash aton chidobēdi abentsēc yacimboec tabadtenec.” ³²Adec dada aton chidobēd daēdash abentsēc yacimboecnuc ambi icmiampicpadec Esuquidistu tantiaquido aton shubun icquido abentsēc yacimboec tabadendac, quequin chiec. ³³Nēbi adomboembidi chido inquid ambi inaidbēdta chuioaimbique. Tantiata. Mibibi tantiadacpadomboen min chido bēdamboen tantiata dadan. Con bēnē ēbi chuiquid nec, quequin aidēn chiaid tantiata chidon.

**Bacuēbobēdta bacuēchoquid
tantiamequin chuibanaid**

6 ¹Bacuēbon Esuquidistu tantiaquid icquin papan chiacpadomboen chieshenquiocquin nabanta. Titan chiacpadomboembidi

chieshenquiocquin nabanoata. Aidon, Nata, quequin chiaid cacuidenquiocquin nata. ²Nuquin Papan, Naden nata, quequin ambi chiaid cuēnoten dada uaid Moises meniampid abentsēc nad iqueque. Tantiā. Chuinu: “Ębi chuiquid nec, quequin tantiaquin papan chiacpadomboen nabanta. Adembidi tantiaquin titan chiacpadomboembidi nabanoata,” quequin Nuquin Papan chiampid nec. Aden naquid cuidte nad iquec, quepampic: ³“Amēn anibēd̃tan chiacpadomboen naquid Nuquin Papan bēdambo iquebi camiaidquio iquendac. Adecbidi nidaidēn yuec tabadnuequin adobanta,” quepampic.

⁴Amēn anibēd̃tan con bacuēbo chieshmemane qeshun bēdamboen chuiquin tantiamequin isme. Adembidi, aido pemeshun acme. Adembidi, Ęm̃bi chiacpadomboen ma nabampanueshun Nuquin Icbon chiaid tantiamenu, quequin adobanta.

**Utsin yuaido yuaquidobidi
tantiamequin chuibanaid**

⁵Yuan mimbi Esuquidistun chiacpadomboen nabanacpadomboembidi mibi yuaquidēn chiacpadomboen nabanta. Abuc nidabicquin, Con icbo iquec, quequin chieshenquiocquin mibi yuaquidēn chiacpadomboen nabanta. ⁶Min icbon chuishun isnuc ambi chiacpadomboen bēdamboen mimbi nabanacpadomboembidi min icbon isenquiocnoc nabanoata. Esuquidistu con Icbo nec, quequin aidēn chiacpadomboen nanuna, quequin nidaidēnshun min icbon chiacpadomboen nabanta. Aden nabanquin Nuquin Papa bunacpadomboen mimbi nabanendac. ⁷Min Icbo Esuquidistun aton Papan chiacpadomboen chieshenquiocquin

nacpadomboen nidaidënshun min icbon
chiacpadomboen chieshenquiocquin
nabanta. ⁸Bëdamboen nabanquido
yuacmaidbëdta yuabo Nuquin Papan
bëdamboen cuidquin menendac,
quequin tantiaquin bëdamboen
nabanta.

⁹Yuaquidon min yuabo
chieshënenquiocquin bëdamboen
chuibanta. Mibi cuesnu, quenquiocquin
ancata. Min Ico abucquo tabadquid
min yuabon Icbobidi nec. Aidën abitedi
isec: Nëidic yua icsho daëdpactsëc
pausunembi. Utsibic, abi yuaquid icsho
nua pausunembi, qesa Nuquin Papa
nec. Yuaquid isacpadomboen yua isec.

Satanas cuemetequid dasiuidaid

¹⁰Nuquin Ico nadatiambocquin
nabanquid iquec, quiash aidënquio nua
pausunaid icta. ¹¹Satanas cacumetequid
dasiuinu, quiash, Nuquin Papa mibi nua
pausunuesho, Ai, cata Satanasën mua
uauin bedchitoshe qeshun. ¹²Matses
isadacpadpenquo nami intacbëd
isadesa Satanasbëd icquido nec. Aidtedi
Nuquin Papan abi tabadaid tédion
tabadmec. Aido icsamianquido nec.
Matses yuanuequid Satanas nec. Nuquin
Papan uaid tantiaash bëdambo mibi
iquendac, quequin muaquin aidon chiec.
¹³Aden muaquin chuiquid aidtedi iquec,
quequin tantiec Nuquin Papan
cacumetequidtedi dasiuidash
tabadteneta. Adquid dasiuidquid icquin
ambi comapenec natiatequid ushë
chonoc Satanas mibi icsamenuec
choacsho bëcuniacbimboen cacumec abi
mibi nidtoash Esuquidistu tantiaquid
yec nidendac. ¹⁴Aid cacumec abi
nidquid icnuec Nuquin Papan abimbo
chiaidquio nacrëshëdaccbimboec
tabadteneta. Adembidi, Nuquin Papan
abi bëdamboec tabadtequid
shictoncacbimboec tabadteneoata. Adec

tabadec abi nidtoash mibi nidendac.

¹⁵Adecbidi, Esuquidistu tantiaquid ëbëd
icquid iquendac, quequin Nuquin Papan
tantiamequin pausunaidën
tapucudacbimboen adomboembidi
chuibenequin Satanacacumec
nidaccbimboec abi mibi nidendac.
¹⁶Esuquidistu tantiaquid Nuquin Papan
dayun uaic, quequin Nuquin Papan
tantiamequin pausunaidënquio
dëcatemënquiash abi mibi nidendac.
Aden Nuquin Papan tantiamequin
pausunaidënquio dëcatemënquiash
Satanasën abi tantiamenuequin pian
sedo-sedoaccbimboen pausuntemaid yec
abi mibi nidendac. ¹⁷Adecbidi,
Esuquidistu tantiaquid ëmbi yuedtequid
nendac, quequin Nuquin Papan
tantiamiac utsin machictiapimbo yec
shocosh mauete uaid mauiaccbimboec
tantiec tabadteneta. Aden pausunac
tabadquin Satanac, Esuquidistu mibi
bedec choenquio iquendac, qesho
cacumiash abi nidquin mimbi
ënenquiocquin, Esuquidistu choate
cainembi, quequin abi mimbi
caimbudendac. Adecbidi, shocosh
siantebimboecquid Nuquin Papan chiaid
nec. Ambi chiaid aton Mayanën
tantiamiaidquio icquin mimbi chuisho
tantiaash Satanacuenendac. ¹⁸Adecbidi,
Nuquin Papan chiaid aton Mayanën
tantiamiaid icquin utsibo tantiaquin
baded-badedquiec Nuquin Papa chiec
onqueta. Satanacën icsamenushe quiash
Esuquidistu tantiaquid utsibo Nuquin
Papa chiec onquedeneta.

¹⁹Ëbitsen tantiaquin Nuquin Papa
chuiuoata. Dacuëdenquiocquin Nuquin
Papan tantiamiacpadomboen
Esuquidistu abi yacno yuedanquidquio
nec, quequin Pabado chuime, Papa,
quequin ëbitsen chuiuo. ²⁰Esuquidistu
chuiবেনeta caid icquin abi chuiবেনesho
mëtaneshun quënën nauedaid nebi.

Adoaid ëbi icnuc mimbi tantiacpaden
chuiبانquid Pabado icme, Papa,
quequin chuiوata.

Ënquin chiaid

²¹Nëbi ëbëd icquid chiembique.
Tantia. Tiquico mibi yacno nidec.
Aidbidi Esuquidistu tantiaquid icsho
nuqui con utsi caid nec. Nuquin Icbon
chuiمياidquio aidi nec. ²²Mibi yacno
puedeshun ëmbi naidtedi ëbi
tabadaidbëdta mibi chuiبانendac. Ëbi

mimbi chuisho tantiash, Bëdambo
iquebi, quependac Epeso yacnocquido,
quequin Tiquico mibi yacno nidmimbi.

²³Mibëd icquido Esuquidistu
tantiaquid utsibobëd ma bëdamboec
tabadpanuna caimbi mibitedi.
Esuquidistun Nuquin Papabëdta abi
tantiamiantequidbëdta utsi tantiatequid
pausunaid ma icpanuna caimbi
mibitedi. ²⁴Ënenquiocquin Nuquin Icbo
tantiaquidtedi ma abipadquid
icpanuna.

PIDIPOS YACNOCQUIDON ISTE

Pabadon tauamboen chiaid

1 ¹Esuquidistun yuambo Pabado nebi. Esusën yuabidi Timoteyo caidbëd iquebi. Aidbëd icquin shubu dadpen icquid Pidipos yacnocquido Esus tantiaquidtedi mibi chuiquin dada uaimbi. Mibi nashumbanquido chuiquinc mibi chuiquid dapabo chuiquinc utsibotedi chuiquinc caimbi. ²—Con Icbo Esusbëdtan Pidipos yacnocquido bëdamboen isquin bëdambo icmeta, Papa —quequin mibi Nuquin Papa chianembi.

Pabadon Nuquin Papa chianiaid

³Nadembidi mibi tantiaquin Nuquin Papa chianembi. —Pidipos yacnocquido Esus tantiaquido mimbi bëdamboen namiaido nec. Aden namequid yec mibi bëdambo iquec, Papa —quequin chianembi. ⁴Aden mibi tantiaquin Nuquin Papa chiech bëdambo yec cuishonquebi. ⁵Ënden ëmbi chuibanac Esus tantiabenquin mimbi ëbi piucquid meniondac. —Esusën naid ma Pabadon matses utsibotsen chuibanu —queshun meniondashumbic nëbi adembidi ëbi menete mimbi bëmeoac. Aden mimbi bëmeoaid isash mibi tantiec cuishonquebi. ⁶Nuquin Papan tantiamiac mimbi Esus tantiabenondac. Adembidi Esus tantiamequin Nuquin Papan mibi bëdamboen tabadmec. Esus padpidec chote ushën abëdi

tabadmenuen Nuquin Papan adembidi mibi bëdamboen tabadmec. Adembidi mibi tantiec cuishonquebi. ⁷—Ëbëd tantiananquidombo nec —quiash adebi. Esus chuibenesho quënën nauedondashi. Aden quënën nauedacsho: —Mimbi icsamboen naid chiech cho —cac nidshun: —Abimbo chuibanombi —quequin chuiquid dapa chuideniondambi. Aden chiac puduemenquo icquin abi quënën tsadunebi. Adquid icsho chieshënenquo icquin mimbi ëbi bëdamboen tantiec. Nuquin Papan ëbi icmiacpadquid chieshtoenquo icquid icquin mimbi ëbi adoc. Adsho mibitsen tantiembi. ⁸Esusën matses tantiacpadomboen mibi tantiac unësquo iquec. Mibi istiadquo iquebi. Ëbi adsho tantiaash Nuquin Papatsen: —Abimbo caic —quendac. ⁹Aden mibi tantiaquin Nuquin Papa chianembi. —Aido bëdiactsëc tantianansho comapenen tantianamequo, Papa. Adembidi mibimbo tantiamequinc Esus tantiamequinc mimbi chiaid tantiamequinc cata. ¹⁰Aden tantiamiac: “Nadec tabadec bëdambo ictsiabi. Adec tabadenquo yec icsambo ictsiabi,” quequin bëdamboen tantiendac, Papa. Aden tantiaquid yec chieshtoenquo icquin Esus tantiec bëdamboec tabadendac. Adsho abi chote ushën Esusën: “Icsambo icquid mibi nec,” catiapimbo iquendac. ¹¹Adec con Icbo

Esus tantiec bēdamboec tabadsho isun: “Bēdamboen tabadmec Nuquin Papa bēdambo iquec,” quetsiash utsibo, Papa —quequin Nuquin Papa chianembi mibi tantiaquin.

Utsibon Esus chuibeniaid

¹²Quēnēn nauedac ėmbi Esus chuibenetiapimbo icnubi utsibon chuibeniac utsin-utsinquier Esus tantiabenac caosh. ¹³Nēshun shubu dadpen icquid Doma yacnoshon: —Quēnēn nauedaid cuenushe —quequin ėbi isquido sondadon: —Esusēn naid chuibansho Pabado quēnēn nauedac —quequin tantiec. Aidon chiac nēmbō icquido utsitedishun adembidi tantiec. ¹⁴Quēnēn nauedaqui dacuēdenquoio iquebi. Ėbi adquoio icnuc: —Pabadon nacpadomboen dacuēdenquoio icquin Esusēn naid chuibanembi —quepac caosh Esus tantiaquido dadpen. Adshun dacuēdboedombi dacuēdenquoio yanquin Nuquin Papan chiaidquoio chuibeniac caosh.

^{15,16}Aidon ėbi bēdamboen tantiaquin Esusēn naid chuibenec. —Pabado tantiembi. Esusēn naid chuibenesho bedshun quēnēn nauedac aidēn natiapimbo icnuc ėmbiquien nanu —quequin ėbi bēdamboen tantiaquin Esusēn naid chuibeniac caosh. Utsibombien ėbi chieshēnquimbi Esusēn naid chuibeniac caosh. —Quēnēn tsadunac ma Pabado mēyadbudchitono. ¹⁷Aidēn chuibantiapimbo icnuc ėmbiquien nanu. Aden ėmbentsēqui chuibanac dadpenshun tantiasun: “Mibi bēdambo iquec,” ėbi catsiash —quequin Esusquio tantienquoio icquimbi Esusēn naid chuibenec. ¹⁸—Ėbi chieshēnec —¿quiashtabi nēishpe? Padenquoio. —Ėbi chieshēnquidon ėbi bēdamboen

tantiaquidobēdtambi Esusēn naid chuibanac matses utsibo utsi-utsiec Esus tantiaquido yanec —quiash bēdambo yec cuishonquebi. Adecbidi cuishonquebi: ¹⁹—Pidipos yacnocquidon Nuquin Papa ėbi chianiac caosh —quiash. —Mēyadsho Pabado chieshtomenda, Papa. Abi quēnēn nauedquidon puduemequin nidmeta, Papa —quequin mimbi chiaipadomboen namenuen Nuquin Papan Esuquidistu Mayan menequin cuesambo icmiac chieshtoenquoio iquendabi. Adembidi aidēn nac quēnēn tsadenquoio iquendabi. ²⁰Ėmbi naondacpadomboen dacuēdenquoio icquin Esusēn naid chuibantiadquoio iquebi. Chieshtotiapimbo iquebi. —Ma utsibon: “Esuquidistu bēdambo iquec,” canu —quiash aduidequi iquebi unēsabi yec. Utsin: —Cuesunechitono —caqui adecbidi chieshtoenquoio ictsiabi.

²¹Unēsabi Esuquidistu tantiec bēdambo iquebi. Unēsash Esusbēd tabadequic bēdamboshē ictsiabi. ²²¿Mitsipadtebi bumpeba? ¿Unēstedabi bumpeba? ¿Unēsenquoio yec tsadtedabi bumpe? Unēsabi icquin ėmbi Esusēn naid chuibanac utsibon Esus tantiabentsiash. ²³Nuquin Papa yacno nidash Esus isec bēdamboshē ictsiabi. Esus iste bunquiebi. ²⁴Aden tantiequi: —Unēsabi yec Pidipos yacnocquido Esus tantiaquido Esus bēdamboen tantiamec ano nidtsiabi —quequin tantiec unēstiapimbo icoaibi. ²⁵Unēsabi yec mibi yacno nidoatsiabi. Aden tantiec: —Nuquin Papan nēbi ėbi unēs uamenquoio iquec —queoaibi. Mibēd tabadquin Esusēn naid bēdamboen chuibantsiambi. Adoac bēdiactsēc Esus tantiatsēchoedombi Esus tantiaquieci mibi bēdambo ictsiac. ²⁶Ėbi choacsho isash: —Pabado padpidec chomequid Esus bēdamboshē iquec —mibi quetsiac. Adecc mibi cuishonquetsiac.

Chieshtoenda, quequin Pabadon chiaid

²⁷Ēbi ano nidtiapimbo icnuc Esusën chiacpadec chieshtoenquoio yec bēdamboec tabadta. Quēnēn ēbi nauedboedēn puduemiac mibi yacno nidshun mibi bēdamboec tabadsho isash: —Pidipos yacnocquidon ēmbi chiacpaden naic —quetsiandabi. Nēbi mibi yacno nidtiapimbo iquebi. Adnuc mibi istanquidon: —Chieshtoenquoio icquin Esus tantiec cuēshēdenquoio yec Pidipos yacnocquido bēdamboec tabadosh. ²⁸Esus chieshēnquidon: “Esusën naid chienda. Cueschitomane,” caqui dacuēdenquoio icquin Esusën naid adembi chuibanosh —quequin mimbi naid chuisho tantiash bēdambo ictsiabi. Adec cuesambo yec nuqui: —Nuquin Papan icmiacpadec dacuēdenquoio iquebi. Ēbi dacuēdenquoio icmequidēn ambi chiacpadomboen ēbi chieshēnquido unēsacsho icsambo icquido cuidacno nidmendac. Ambi chiacpadec Esus tantiaquid yec unēsashini Nuquin Papa yacno tabadendac —quequin nuqui tantiatsiac. ²⁹—Con Mado Esus tantiasho utsibon chieshēntsiandac —quequin Nuquin Papan tantiacpadomboen utsibon mibi chieshēnendac. ³⁰Ēbi nacpadomboen mibi chieshēnoaic. Mimbi isnuc ēbi chieshēnondash. Adembidi ēbi chieshēnoaic nēbi. Nēid dada uaid isquin: —Pabado padpiden chieshēnoac —quequin mimbi tantiendac.

Utsi tantiec tabadta, quiaid

2 ¹Tantia, con utsibo. Mibitedi chuinu. ¿Mitsipadquoio Esus tantiaquido icpec? Esuquidistu tantiaquiec dayacquio yacnimboec iquec. Adecbidi Esusën tantiaido yec bēdambo icquido nec. Adecbidi Nuquin Papan aton Mayan abēd icmequin

bēdamboec tabadquid icmiaidobidi nendac. Adoaido matses tantiaquidombo nec. ²—Adquidbidi nebi —quec adquiecbidi bēdamboec tantianancuededta. Ēbi cuishoncamenuc adta. Abitedi: —Esusën chiacpadomboen nanuna —quecuededec chieshēnanenquoio yec bēdamboec tabadta. ³Nadec onquec tabadenda. —Ēbiuidtsēqui bēdamboshē iquec. Con nauidtsēqui nanu. Con nauidtsēqui bednu —quec mibiuidtsēqui tantiadec tabadenda. —Ēbi bēdapabi icnuc utsibo bēdamboshē iquec. Aido nashuntiaquio iquebi —quec bēdamboec tabadta. ⁴Mimbi tantiacpadomboenuidi nainquoio icquin utsin tantiacpadomboentsen nata. Mitsanauidi tantienquoio icquin utsibo nashuntetsen tantiata.

⁵Esuquidistun nacpadomboen naic mibi bēdamboshē ictsiac. Aidēn chieshtoenquoio icquin Nuquin Papan chiacpadomboenuidi napanēdash.

⁶Aton Papa Nuquin Papapadquidquoio yec Esus abitedishun Icbombo nepanēdash.

Aton Papabēd yec bēdamboshē icboedi: —Padi icnuna. Nuquibi namec bēdambo iquebi —quenquoio yec Nuquin Papan chiacpadomboen naic auēshquoio chopanēdash.

⁷Adec aton Papan yuabimboecquid yanash ambi chiacpadec matsespanēdash chidon tishac.

⁸Adashic matses yec aton Papan chiacpadequi abided cuidadec unēsac caondash.

Matses icsamboshē icquido cuidacnimboen cuesten dectanquin icsaisambobi Esus unēs uapac caondash.

⁹Aden ambi chiacpadomboenuidi Esusën nasho isun Nuquin Papan

uincuemeshun abi yacno
chomeoashun abëdi Esus
tabadmepanëdash.

Aden abitedishun Icbombo
icmeoapanëdash.

^{10,11}—“Nuquin Icbombo Esuquidistu
bëdamboshë iquec,” ma abitedi
quenu —qeshun aden Nuquin
Papan abitedishun Icbombo Esus
icmeoapanëdash.

—Ëmbi ëbi yacnoshon uaido mayan
bëdabo yec nidaidën tabadquido
matses yec unësacsho
uincuemiaido yec quequido:
“Nuquin Icho Esuquidistu
bëdamboshë iquec. Abi
abitedishun Icho icmeoquid
Nuquin Papatsen bëdamboshë
iquec,” ma quenu —qeshun
adopanëdash.

Utsibo Esus tantiamete chiaid

¹²Mibi tantiaquiembique. Tantia, con
utsibo. Mibitedi chuinu. Esusën
nacpadomboen mimbisen bëdamboen
nata. Ëbi mibëd icnuc mimbi
nadeniondacpadomboen ëbi nibëdnuc
adembidi bëdamboen nata. —Nuquin
Papa dacuëdampambo icquidën chiaid
niacmane —quiash ambi
chiacpadomboen naic aidbëdi
tabadnush bëdamboec tabadta. ¹³—Ma
bëdamboec tabadnu —quequin Nuquin
Papan ambi chiacpadec tabadte
bumequin nuqui bëdamboen
tabadmeque. Bëdamboec tabadta.

¹⁴Adec bëdamboec tabadec
chushcananenda. Adecbidi:
—Bëdamboen nanuna —cac chieshec
tabadenda. ¹⁵—Esus tantiaquido
icsambo iquec —utsibo quenushe.
Adenda. Nuquin Papan: —Con mado
nec. Con champi nec —caido yec
bëdamboec tabad. Matses dadpenquio
icsamboshë icnubi adequi bëdamboec

tabad. Adec bëdamboec tabadquin
icsambo icquido mimbi Esus
bëdamboen tantiametsiac
paposhquiacbimboecnuc. ¹⁶Mimbi
adoac utsin: —Esus tantiasho Nuquin
Papan ëbi bëdamboen isec. Nëbi
bëdambo yanec unësashini aibëd
tabadendac —quequin tantiatsiash.
Aden mimbi chuibanaido Esus
tantiaquido yansho isash
cuishonquetsiabi. Esuquidistu nidaidën
padpidec chote ushën bëdambo ictsiabi.
—Ëmbi chuibanondaido Pidipos
yacnocquido ambi Esus tantiamiaidobëd
choeque. Is —quec bëdambo ictsiabi.
¹⁷—“Bëdambo mibi iquec,” Nuquin
Papan mabi canu —qeshun Esus
tantiaquin mimbi bëdamboen nac.
Utsibo nashunquin Esusën naid
chieshtoenquio icquin mimbi chuibanac.
Mimbi adoaid chuisho tantiashun:
—Mibi unës uanu —caquini bëdambo
ictsiac. —Aido bëdambo iquec
—qeshun mibi tantiec bëdambo yec
cuishonquetsiabi. ¹⁸Ëbi unës uaid
chuisho tantiash adecbidi bëdambo icta.
—Esus tantiec chieshtotiapimbo icsho
Pabado unës uac —quiash bëdambo
icta.

Pabadon Timoteyo chiaid

¹⁹Con madobimboecquid ëbëd icquid
Timoteyo mibi yacno nidmetsiambi.
—¿Midapadquiec Pidipos yacnocquido
tabadeque? Istan, mado —quequin
nidmetsiambi. Esuquidistun adembidi
tantianuc adotsiambi. Adoac istanshun
chuituidac bëdambo ictsiabi.
²⁰Timoteyopadquid utsi nibëdec. Aid
abentsëcshumbi ëmbi nacpadomboen
mibi tantiaquiec. ²¹Utsibombien aton
nauidtsëqui tantiaquin Esuquidistun
chiacpadomboen natiapimbo iquec.
²²—Timoteyon bëdamboen naondash
—quequin mimbi tantiec. Mimbi

tantianubi ëbëdtan Esusën naid
 chuibanondash con mado
 icbobimboecquin. Aid bëdambo iquec.
²³Adquid icsho mibi yacno: —Istan
 —catiadquio iquebi. Ëbi quënën
 nauedquido ëbi caic: —Unës uanu
 —quesho tantiabono. Tantiashun: —Ëbi
 quënën nauedquidon chiaid Pidipos
 yacnocquido chuitan, Timoteyo
 —catsiandambi. ²⁴Ëbitsen nëbi mibi
 yacno nidtiadquio iquebi. Ëbi caic
 Nuquin Icho: —Ma nidnu —quenuc
 anobi nidtsiabi.

Epapadodito chiaid

²⁵Epapadodito con buchibimboecquid
 mimbi: —Pabado nashuntan —cac
 Pidipos yacnuësh chonëdaid nëmbo
 iquec. Utsibon chieshënubi
 dacuëdenquio icquin ëbëdtan Esusën
 naid chuibanondash. Adondaiddi nëbi:
 —Mibi iccondacno tabadec nid, buchi
 —caombi. ²⁶Aid mibi tantiec unësquio
 yec tsadposh. —Ëbi unëstsemboed con
 matses chuineuc Pidipos yacno
 nidaccosh —quiash mibi ismete
 bunquieci shubiantiadtsëcquio tsadposh.
 Adsho isun: —Min shubuno nidec nid
 —caombi. ²⁷Adec unëstsenquiondash.
 Adshobien Nuquin Papan bëdamboen
 isquin bëdamepondash. Ëbitsen
 bëdambo icmenuen Nuquin Papan
 adopondash. Epapadodito unësquio
 icnuc ëbi shubieci tsadsho isash: —Aid
 unësan unësquio icnuc Pabado
 mëyadnushe —queshun Nuquin Papan
 Epapadodito bëdamepondash.
²⁸Adoacsho mibi yacno aid badedquio
 nidmetiadquio iquebi. Aidbëd iquec
 mibi bëdambo ictsiac. Mibi yacno
 nidsho isash ëbitsen bëdambo ictsiabi.
²⁹Epapadodito nidacsho bëdamboen ista
 cuishonquequin. —Nuquin Icho mibi
 bëdamic. Aid bëdambo iquec. Mibitsen
 bëdambo iquec —quequin chuita matses

dadpen tantiamenuen. Adquid Esus
 chuibanquido utsibo mibi yacno
 nidacsho adembidi bëdamboen ista.
³⁰Esuquidistun chiacpadomboen naic
 ëbëdi tabadec Epapadodito chondash.
 Chieshëmënquido dadpen icnubi ëbi
 nashunec tabadec daicsabudash
 unëstsenondash. Chotiapimbo icquin
 mimbi: —Pabado nashuntan —cac
 choash nibëdantsenondashe. Mibi yacno
 nidacsho bëdamboen ista.

Esusuidtsëqui tantiasho Nuquin Papan bëdamboen isaid

3 ¹Nuquin Icho Esus tantiec
 cuishonquenuna. Aduidequi icac
 bëdambo ictsiash. Tantia, con utsibo.
 —Tantienquio yanushe —quequin ëmbi
 chiondaid dada uaquin padpiden mibi
 chuioanu. ²Muaquidon chuisho
 tantienda. Aidon: —Shui dëbid
 dëteshun secaiduidi Nuquin Papan
 bëdamboen istsiash —quequin chuisho
 tantienda. Aden chieci icsa
 uanquidomno neque.
 Uimanëmënquidoen nechitec. ³—Shui
 dëbid dëteshun secaid nec
 —¿queshunda Nuquin Papan nuqui
 bëdamboen ispec? Padenquio. Aidon
 Esus tantienquio icsho bëdamboen
 isenquio icquin aton Mado Esus
 tantiaquidoen Nuquin Papan
 bëdamboen isec. Aton Mayanën
 tantiamiac: —Nuquin Icho Esuquidistu
 bëdamboshë iquec. Abided cuidadec
 unësaid tantiasho Nuquin Papan nuqui
 bëdamboen isec. Ëmbembi naquin
 Nuquin Papan bëdamboen ismetiapimbo
 iquebi —quequin nuqui tantiec.
⁴Matsesën tsusedpan chiaiduidi
 tantiasho Nuquin Papan bëdamboen iste
 icnuc nadtsiabi. —Tsusedpan chiaid
 utsibon daëdpactsëc nanuc ëmbimbo
 naquin dadpenquio nabanombi. Aden
 ëmbimbo dadpenquio nasho Nuquin

Papan ëbi bédamboen isec. Adembidi isadaidbombo icsho ëbi bédamboen isoaic —quetsiabi. Nèbi adtiapimbo iquebi. ⁵Isadaidbo nebi. Isadaidbon chidon tishacsho sietetedec ushun Moisesën chiampicpadomboen shui dëbid dëteshunenëdaidquio nebi. Con mases tsusedpa Benamin yampid icnuc Ebedeyombo nebi. Isadaidbo caimbidi Ebedeyo capec. Adquid yec aidën onqueten onquequid nebi. Moisesën chiampid namequidquio padiseyobo caid niondabi. ⁶Adquid icquin icsambo icquido danquin Esus tantiaquido cuesun secatiadquio iccondabi. Nuquin Papan chiacpadomboen natiadquio iquequi adondabi. Moisesën chiampiduidi nate bunquiondabi.

⁷Adquid icquin Esus tantiabi: —Ëmbimbo naic bédamboshë iquebi —quequin icsamboen tantiapondambi. Adondaiddi Esus tantiabensash: —Ëmbimbo naiquini icsambo iccoc. ⁸Nèbi con Icbombo Esuquidistu tantiec bédambo iquebi —quequin tantiabensondambi. Aiduidtsëqui tantiatiadquio icquin icsa secacimboben ëmbimbo naid ënondambi. ⁹Esus tantiate bunqueibi. Adquid yec: —Moisesën chiampicpadomboen ëmbimbo naiquini bédambo iquec —quetiapimbo yanashic nadondabi. —Nuquin Papambien aton Mado Esuquidistu tantiasho bédamboen isquin ëbi bédamboen tabadmec —quequin tantiabensondambi. ¹⁰Aden tantiabenshun Esusuidtsëqui comapenen tantiatiadquio iquebi. —Comapenen tantiaquin Nuquin Papan uincuemiaid icquin Esusën bédamboen tabadmetsiashi —quec Esus tantiate bunqueibi. —Nuquin Papan chiacpadomboenuidi nasho mëyanac Esus unësac caondash. Adembidi Nuquin Papan namiacpadomboen nasho

mëyanac chieshtotiapimbo ictsiabi.

¹¹Unësambo icsho Esusën bédamboen tabadmetsiashi. Unësacsho Nuquin Papan uincuemetsiashi —quec adec Esus tantiate bunqueibi.

Nuquin Papan chiacpadomboenuidi nate bunaid

¹²Tantia, con utsibo. Mibitedi chuinu. —Nuquin Papan chiaid niaquesambo nebi —çquectabi ique? Padenquio.

Adquio ictiadquidi adquio yenquieni icchitec. —Bédamboshë icmenuen Esuquidistun yuapondashi —quequin tantiec bédamboshë icte bunqueibi.

¹³Adec bédambo yanabi yec: —Ëmbi naboed naic bédamboshë iquebi —quenquio icquin Esusquio tantiaquin ambi chiacpadomboen natiadquio iquebi. ¹⁴—Bednu —quequin bedteuidtsëqui tantiec

titinquiacimboben Esusquio tantiaquiec ambi chiacpadquiec bédambo ictiadquio iquebi. —Adec tabadec unësacsho Nuquin Papan abi yacno ëbi tabadmec —quec bédambo icte bunqueibi.

¹⁵Nuquin Papan chiacpadomboen natiadquio icquin ëmbi chuibocpadomboen mimbi tantiatsiac. Utsien: —Padi. Pabadon chiaid abitedi nainquio icquin abentse-abentsen naindambi —quesho Nuquin Papan ambi tantiaid bédamboen tantiametsiash. ¹⁶Nèbi nuqui icbocpadquiec tantiananquiec bédamboec tabadnuna.

¹⁷Ëbi yacpadquiec bédamboec tabadta. Ëmbi chiacpadomboen utsibon nasho isun adomboembidi bédamboen nata.

¹⁸Ëmbi chuideniondaccpadomboen mibi padpiden chiembi shubiquimbi. Mibi yacno utsi-utsiec icsamboec tabadpec. —Abided cuidadec cuesten dectamëdaid Esus tantiaquid nebi —quetsçboedi icsamboec tabadec. Adquido Esus

tantiaquidpenquio nec. ¹⁹Peteuidtsëqui tantiec icsambo yequi: —Bëdambo iquebi —quec tabadec. Nuquin Papa tantienquio icquin nidaidën icquiduidtsëqui tantiec. Unësash Nuquin Papa yacno nidtiapimbo yec icsambo icquido cuidacno nidendac. ²⁰Padnuen Nuquin Papan bëdamboen isaido yec aibdëd tabadtequido nuqui nec. Abi yacno buanec abucüesh Nuquin Icbo Esuquidistu chosho isnueh nuqui tabadec. ²¹Choshon aidëmbi nuquin dada chuca uaindac aton dada chuca uacpadomboen. Adoac unëstiapimbo icquiduidquio nuqui iquendac. Abitedishun Icbombo icquin ambi chiacpadomboen abitedi namequidquio icquin aden nuquin dada chuca uaindac.

Esus tantiec cuishonquiaid

4 ¹Ëmbi aden chuisho tantiaish Nuquin Icbon chiaid niaquenquio yec bëdamboec tabadta. Mibi tantiaquin mibi istiadquio iquebi. Mibi caic: —Ëmbi chuibanondaido Esus tantiabensash bëdambo ictiadquio iccondash —quec bëdambo iquebique. Adquiec chieshtoenquio icquin Esus tantiec bëdamboec tabadta.

²Tantia. Nëbi chido daëd Ebodia caid Sintique caidbëdtatsen chuinu. Amicananenda. Esus tantiaquido yec: —Ai, Nuquin Icbo Esusën tantiacpadomboembien natiad —quec tabadta. ³Tantia, buchi. Èbëdtan Esus chuibanondaid icsho mibitsen chuinu. Aid chido daëd chuiquin: —Bëdamboec isnanta —cata. Utsibon chieshënubi èbëdtan aid daëdshun Esusën naid chuibeniondashe. Adembidi Quedemente caidëntsen èbëdtan chuibanondash. Adembidi utsibontsen. Adquidotedi Nuquin Papan: —Esusbëdta ëbi tantiaquido mibi neque. Èbëd tabadec cho —caindac.

⁴—Nuquin Icbo Esus tantiaquiec bëdambo yec cuishonquenuna —caimbi. Esus tantiaquiec cuishonquenuna.

⁵—Ma utsibo: “Esus tantiaquido chieshëmënenquio yec bëdambo iquec,” ma quenu —quiash bëdamboec tabadnuna. Nëbi Nuquin Icbo Esus choeque.

⁶Adecbidi chishpiquec tabadenda. —¿Atotsimbi napeba? ¿Atotsimbi pepeba? ¿Nëbida con matses unëspeba? —quequin uesquin tantienda. Padenquio icquin nuqui dacuëdquin tantiaidtedi Nuquin Papa chuinuna. —Ëbi nashunquin utsibotsen nashunta, Papa. Aden nashunec mibi bëdambo iquec, Papa —quequin Nuquin Papa chuinuna. ⁷Aden nuqui chiac aidëmbi nuqui bëdambo icmec dacuëdenquio icnuc. Adoac bëdambo icnuc utsibo: —¿Mitsipadec dacuëdenquio yampash? —quetsiash. Nuquitsen: —¿Mitsipadequini bëdambo yampo? —quetsiac. Adec: —Nuquin Papan ëbi nashunquidquio nec —quequin Nuquin Papa chianequin Esus tantiaquiec nuqui dacuëdenquio yec bëdamboec tabadtsiac.

Bëdamboshë iquec, caiduidi tantiata, quiaid

⁸Tantia, con utsibo. Nëidtsen chuinu. ¿Atotsi abimbo chiaid icpec? Adquid tantiata. ¿Atotsi bëdambo icpec? ¿Ttsutsi bëdamboec tabadquid icpec? Adquidtsen tantiata. Aden: —Bëdambo iquec —caidtedi tantiata. ⁹Adembidi ëmbi chuisho mimbi tantiondac. Aden ëmbi chiondaid tantiaquin ëmbi naondacpadomboen nata. Adsho isash mibi dacuëdenquio icmequid Nuquin Papa mibëd iquendac.

Pidipos yacnocquidon bëmiaid

¹⁰Nëbi mimbi bëmiaid bedash bëdambo iquebi. Ènden mimbi aden

menianiondashumbic yuectaneshun nēbi ēbi tantiaquin mimbi meneoaid bēacsho bedombi. —Nuquin Icbon tantiacpadomboen padpiden Pidipos yacnocquidon ēbi ma menenuequin piucquid bēmiac —quiash bēdambo iquebi. ĩĒbi tantienquioda mimbi ictionda? Ēbi tantiaquin ėnden bēmetiadquidi tsundan bētiambo icnuc mibi nepanēdac. ¹¹—Con na nibēdeque. Beccho —ĩquectabi ique? Padenquio. Adtiapimbo iquebi. Con na icnuc bēdambo ictsiabi. Con na nibēdnubi adecbidi bēdambo ictsiabi. ¹²Con na dadpen icnuc bēdambo ictsiabi. Con na nibēdnubi adecbidi bēdambo ictsiabi. Con piucquid dadpen icnuc bēdambo ictsiabi. Con piucquid nibēdnubi adecbidi bēdambo ictsiabi. Peten cubudash adecbidi bēdambo ictsiabi. Buna natiambo icnubi adecbidi bēdambo ictsiabi. ¹³ĩĒbenquiodabi adti? Padenquio. Esusēn namiaquini adquo iquec. Aidēmbi namiac ambi chiacpadomboen naimbi. ¹⁴Adnuc: —“Mēyadec,” quiosh —qeshun mimbi ēbi ma menenuequin bēmiaid bēdambo iquec.

¹⁵Min nidaid Masedonia caid yacnuēsh nidsho Esus tantiaquido shubu utsinquidon uanocquidon menenquio iccondashi. Adnubi tauamboen menequin mimbiuidtsēqui ēbi meniondac. Esus tantiabentsēcshun mimbi adondac. ¹⁶Adoquini shubu dadpen icquid utsi Tesadonica caid yacno nidondac. Ambo yuec tabadnubien: —“Pabado aton na nibēdec,” quiosh —qeshun mimbi piucquid bēmiacondac. Yuectaneshun adembidi. Adshumbic padpiden. ¹⁷—Mimbi bēmiaid bēdambo iqueque. Utsi beccho —ĩquequindambi aden chuipe? Padenquio. —Pidipos

yacnocquido Esus tantiaquido bēdambo iquec —Nuquin Papa camete bunquin: —Mimbi bēmiaid bēdambo iccosh —caimbi. ¹⁸Utsi-utsien bedshumbeneshun mimbi bēmiaid Epapadoditon bēacsho bedondambi. Mimbi bēmiaidbēd daēdash ēbi bunaid dēniaquec con na dadpenquio yanac. —Mibi bēdambo iquec —Nuquin Papa camenuen mimbi bēmenēdac. Adsho isash Nuquin Papa: —Adquido bēdambo iquec —quependac. ¹⁹Abitedishunquio Icho Nuquin Papa nec. Comapenen tantiaquin Esuquidistu tantiaquido bēdamboen isquin nashunquidquio nec. ĩAda mitsana nibēdnuc mēyadac bimboec tabadpe? Adec mēyadsho isun Nuquin Papan mitsana icmendac. Unēsquio icsho aidēmbi mibi bēdambo icmendac. Adecbidi: —Chieshtotiadquio icchitebi —qesho Nuquin Papan nac mibi chieshtoenquio iquendac. —Aid nibēdnuc unēsebi —mimbi caid Nuquin Papan icmendac. ²⁰Ēbi adsho tantiashun: —Bēdamboshē mibi iquec, Papa —quequin Nuquin Papa chuinuna ėnenquio icquin.

Pabodon ėnquimbi chiaid

²¹Anocquido Esus tantiaquidtedi chuita naden. —Esus tantiaquido icquin Pabado chedon mibi tantiec —quequin chuiban. ²²Adembidi nēmbo Doma yacnoshon Esus tantiaquido abitedishun mibi tantiec. Chuiquid dapa Sesad caidēn shubun icquido Esus tantiaquido icquin adembidi mibi tantiec. ²³Mibi tantiaquin: —Con Icho Esuquidistubēdtan Pidipos yacnocquido bēdamboen isquin bēdambo icmeta, Papa —quequin Nuquin Papa chianembi. Padi. Aidtedi chuiquin dada uaombi.

CODOSAS YACNOCQUIDON ISTE

1 ¹Pabado nebi. Nuquin Papa bunacpadomboen Esuquidistun ëbi chuibeneta caid nebi. Timoteyo ëbëdi iquec. Esuquidistu tantiaquid icsho nuqui con utsi caid aidi nec.

²Aidbëdtambi ënenquiocquin Esus tantiec Codosas yacno iccuededquido, Nuquin Papan cuënaido, Con utsibo nec, quequin mibitedi chuiquin dada uaimbique. Isec onqueta.

Esuquidistu tantiaquido icsho Nuquin Papan ëbi icsaid cuidenquiocquin ambi bëdambocquid icmebanaid nebi, quequin tantiec mibitedi Codosas yacnocquido adquiec ma mibi tabadpanuna. Adecbidi, Nuquin Papabëd icquido nebi, quequin tantiec ma tabadpanuna.

Nuquin Papa chuidoniaid

^{3,4}Nuquin Papa, Nuquin Icbo Esuquidistun Papa chiec nadec onquebi. Bëdambocquid icquin mibipadquiocnoc Codosas yacnocquido Esuquidistu tantiaquido bëdambocquido mimbi icmebanec, Papa. Utsibo Codosas yacnoësh choshon utsi-utsiec Esuquidistu tantiaquid yanosh. Adquid yanshun Esuquidistu tantiaquid utsibo bëdamboen tantiec, quequin chuisho tantiash bëdambo iquebi, Papa, quequin mibitedi tantiec Nuquin Papa chiec onquedenebi. ⁵Esuquidistu Nuquin Papa yacno yuedanquid nec, quequin, Nuquin Papan chiaid abimbo iquec, quequin

chuibanac abi tantiaquido mibitedi yanac. Adquid yanshun, Abi yacno Nuquin Papabëd bëdamboec tabadendabi, quequin aid ushë chote cainquidombo icquin Esuquidistu tantiaquid utsibo mibitedishun tantiec. ⁶Ëbi icsaid cuidtiadtsëcquio Nuquin Papa icnubi utsibon Esuquidistu chuibanac abi tantiaquid ëbi yanacsho isash Nuquin Papa ëbi icsaid cuidenquio yec ënden bëpiscudac, quequin mibitedishun abimbo tantiashun mimbi bëdamboec tabadquin ismebanendac. Aden mibitedishun ismebanac utsin-utsinquien Esuquidistu tantiaquid yanshun abi bëdamboec tabadaid ademvidi ismebanoaic. Adoac nidaid utsin-utsinquieq tabadquidon Esuquidistu tantiashun adomboembidi ismebanoaic. ⁷Epapadasën Esuquidistu chuibanac Esuquidistu tantiaquid mibitedi yampondac. Codosas yacno nidtiapimbocquin ëmbi, Ambo nidshun Esuquidistu chuibanta, cac Epapadas nidondash. Aidi ëmbi chiacpadomboen ëbi nashunquidquio nec. ⁸Adquid yec mibi yacno nidshun chuibanash choashun, Nuquin Papan Mayanën pausunac utsi tantiaquid Codosas yacnocquido nec, quequin Epapadasën chioshi.

⁹Aden Epapadasën chiac mibi tantiec baded-badedquiec Nuquin Papa chiec onquian-onquianebi. Mimbi tantiacpadomboen min Mayanën

pausunacsho Codosas yacnocquido bédamboen tantiamé, Papa, quequin chian-chianembi. ¹⁰Aden mibi bunacpaden mimbi tantiamiac Codosas yacnocquido, Esuquidistu tantiaquid nebi, quiash utsibo ismenuec bédamboec tabadec. Adec Codosas yacnocquido tabadsho isash, Bédambo iquebi, ma Esuquidistu quepanuna. Adec bédamboec tabadquin nabanquidquiu utsi iquendac. Adec tabadquido mibi tantiadonequido yanendac, Papa. ¹¹Adembidi mimbi dayacquio icmenu caid Codosas yacnocquido iquec natiatequid icnuc aido chieshenquiu yec abi tantiec mibi nidendac. Aden chieshenquiocnoc mimbi nidmiac, Bédambo iquebi, Papa, quec, Cuishon, quec aido mibi chiec onquedenendac, Papa. ¹²Mimbi bédambocquid icmewanac icsaquid nibédacno mibi tantiaquid utsibobéd mibédi tabadendabi, Papa, quequin tantiec, Bédambo iquebi, quec ma Codosas yacnocquido mibi chiec onquepanuna, Papa.

¹³Ënden adquidpenquiu yec Satanasën yuaido yec, Nuquin Papa tantianu, qesa nuqui iccondac. Aidën yuaido icsho Nuquin Papan nuqui mënchicpondash. Aden nuqui mënchicquin abi cudasaidquiu aton Madombo Esuquidistu icsaisapadquid nuqui icmenuequin aidi Nuquin Papan nuqui tantiamépondash. ¹⁴Abipadquid icmenuec matses icsaid bedshunash abided cuidadec unëspanédash. Adoacsho Esuquidistu tantiaquid icsho cuidenquiu yec mibi icsaid bëpiscudendabi, quequin Nuquin Papan tantiampicpadquiequi bëpiscudendac.

**Abia yampidquiu iquec abitedishun
icbombo Esuquidistu nec quiaid**

¹⁵Nuquin Papa isadesa icnubi abipadquidquibidi matsesash

Esuquidistu nuqui isendac. Abitedi uabi yec Esuquidistu aton Papabédtsëqui Abia Yampid icquin utsi abitedi ambi uaid nec. Ambi uaidtedi aton na nec. Aidon icbo Esuquidistu nec. ¹⁶Nidaid abubédtabi uashun aidënquiocquidtedi uanu quequin ambi uaido nec. Matsesën isaidtedi matsesën isacmaidtedibéd Esuquidistun uampidquiu nec. Mayantedi ambi uampidquibidi nec. Mayan utsi-utsiec chuiquid nebi, quenubi utsi-utsiec utsin icbo nebi, quepec. Adecbidi matses queoaindac. Aidotedi Esuquidistun uaido nec. Aidotedishun icbo Esuquidistu nec. ¹⁷Esuquidistu abia yampidquiu iquec. Aidëmbi, Ëmbi uabanaido namebanu, quequin ambi chiacpadomboen namebanec. ¹⁸Nidaid utsi-utsiec yacnocquido abi tantiec iccuededquidtedi chuiquidquiu Esuquidistu nec. Abitedi chuiquid icnu, quec Nuquin Papan Madombo Abia Yampid matsesash unëspanédash. Adsho Nuquin Papan abia uincuemeshun abi tantiaquidtedi chuiquid abentsëcquiuobi abipadquid icmepanédash. ¹⁹Utsi abipadquid ictiapimbo iquec. Aidën nabanacpaden natiapimbo utsi iquec. Èbipadquidquiu con mado nec, quiash, Bédambo iquebi, quec Nuquin Papa tsadec. ²⁰Aton Papapadquid icquin aton Papan tantiacpadomboen tantiaquid Esuquidistu nec. Adquid yec matses icsaid bedshunash ëbided cuidadec unëspebi, abi quiampicpaden matsesën cüsten dectanac unëspanédash. Adoacsho isun ambi bédamboen istiapimbocboedi Esuquidistu tantiaquid yansho isun aitedi Nuquin Papan bédamboen isec.

²¹Ënden Nuquin Papan matsespenquiu mibitedi iccondac. Icsamboen tantiec icsaquid yec Nuquin Papa

chieshënquido mibitedi iccondac.

²²Adquid icboedi, Ēbi yacno yuednu qeshun Esuquidistu tantiaquidotedi cuidenquio yec abi icsaid bēpiscudquin Esuquidistu icsaisapadquionoc aido isembi, quec Nuquin Papa tsadec.

²³Ēnenquiocquin Esuquidistu tantiaquid icsho abi yacno mibi yuedendac, quequin chuibansho mimbi tantiondac. Adenuidi ėnenquiocquin tantiata. Adomboen chuibenesho utsin-utsinquien tantiapondash. Esuquidistun, Aden chuibeneta, caid nebi.

Esuquidistu tantiadoneta, quequin Pabadon chuibanaid

²⁴Ēbi tantiaquid Nuquin Papan bēdamboen isendac. Aden isac, Ēbēd icquido iquendac, quequin Esuquidistun ambia chuibansho matsesēn mēyampanēdash. Adomboembidi Esuquidistu chuibansho mēyamposhi. Adoalui, Cuishon, quebi. Ēnden abi tantiaquid yanacsho isun, Ēbi chuibeneta, quequin chuishumbic, Ēbi chuibansho mibi mēyante dadpen iquendac, quequin Esuquidistun chuiopondashi. Aden aidēn chiondacaden mēyanaid nebi. Ma abi tantiaquid dadpen yanu quequin chuibenembi ambi tantiactedi mēyante yanuc. ²⁵Ai, Nuquin Papan, Esuquidistu ambi naidbēdta chuibeneta, caidquio nebi. Abi chuiquidquio nebi. ²⁶Nuquin Papan ambi tantiampicpaden chienquicboed nēbi aid tantiamiac Esuquidistu tantiaquido yanec. ²⁷Aden Nuquin Papan isadaidbo utsi-utsien abia Esuquidistu tantiameshun isadaidpembotsen chuibeneta caid isadaidbo nec. Esuquidistu tantiaquido icsho isun, Con matses yec ēbi yacno ēbēdi tabadendac, quequin Nuquin Papan aton Mayan Esuquidistu

tantiaquid menec, quequin isadaidpembotsen chuibeneta caid nebi.

²⁸Aden ēbēdta ēbipadquidon Esuquidistu chuibeniāc Esuquidistu tantiaquid yansho isash, Esuquidistu tantiec bēdamboec tabadteneta, quequin Nuquin Papan chiacpadomboen chuibenec nebi ma abi yacno chosho adquidquio Nuquin Papan yuedpanu qeshun.

²⁹Badiadquidēn-badiadquidēnquien aton Mayanēn nadatiambocquin nac natiatequid icnuc ma Esuquidistu tantiadonequido mibitedi icpanu, quequin dayacquiocquin chuibenec nebi.

2¹Aden dayacquiocquin Nuquin Papa chuiquin mibitedi tantiembi. Adembi chuibanquin Daudiseya yacnocquido tantiembi. Adembi utsi-utsiec yacno iccuededquido ēbi isacmaidobi Nuquin Papa chuiquin tantiembi. ^{2,3}Esuquidistu tantiadonequido ma yampaneshun dayacquiocquin chuibenec nebi. Abentsēc yac bimboec tantiananquidquio ma yampaneshun dayacquiocquin chuibenec nebi. Adquidquio yanshun utsin abimbo chuisho tantiash, Abimbo chuiquid nec, quequin ma bēdamboen tantiapanuna. Adembi, abimbo chiac bimboen chuisho tantiashun, Icsamboen chiec, quequin ma tantiaquopanuna. Nuquin Papan tantiamenquicboed Esuquidistu nec, quequin tantiamequin ambi comapenen tantiacpadomboen pausunaid ma mibitedi icpaneshun dayacquiocquin chuibenec nebi. ⁴Comapenen tantiaquid icquin, Utsi tantiata, quequin Esuquidistupenquio chuisho ma tantienquio mibitedishun icpanu, quequin aden mibi tantiaquin chiec nebi. ⁵Mibēd icte bunquiequi mibi yacno nidtiapimbo yequi mibitedi

tantiec tsadtenebi. Adec tsadnubi,
 Esuquidistu tantiaquido yanshun
 ënëdenquio yec iccuededquin
 aiduidtsëqui tantiadonec, quequin mibi
 yacnoësh choquidon chuisho tantias
 bëdambo iquebi.

**Esuquidistu tantiaquid iquec utsin
 chiacpaden naic abuc nidendabi,
 quequin tantienda.**

⁶Adecbidi Esuquidistu tantiaquid yec
 abëd icquido iquec, Aidi con Icbo nec,
 quec ambi chiacpadquiec tabadteneta.
⁷Adec tabadquin cuëte tapun
 uquëducquiocquidën cuëte uidënash
 canidoac bimboen Esuquidistu
 tantiaquid icquin tantiadonequiota.
 Aden Esuquidistu chuiquin
 ëbipadquidon mibitedi chuipondash.
 Aid tantiadonequid icquin, Mibi
 tantiaquiec bëdambo iquebi, quequin
 baded-badedquien Esuquidistu
 chuidoneta. ⁸Adembidi aid
 tantiadonequid icquin aid tantiesan
 ëndenquio ambembi chiech
 onquiampicpaden nëbi icquidën
 adomboembidi chuisho Nuquin Papan
 chiacpadomboen chiesha nec, quequin
 tantiaquiota.

⁹Matsesash Nuquin
 Papapadquidquibidi Esuquidistu
 icpanëdash. ¹⁰Esuquidistubëd icquid
 icsho Nuquin Papan mibi adembidi
 abipadquid icmëbanec. Mayan
 chuiquidtedi chuiquidbidi mibëd icquid
 Esuquidistu nec. ¹¹Aidën, Ëbëd icquid
 nec, quequin mimbi tantiaid icsa cuëte
 cuidi pateshuniac bimboen mibi
 ëmëbanec. Chështen tiac bimboen
 nainquiocquin bëdamboen tantiamëquin
 aton Mayanën mibi icsaid ëmendac.
¹²Adembidi Esuquidistu unësacsho
 chococac bimboec nuc abi tantiaquid
 paucnu quiac bimboen acten mibitedi
 mentobanondash. Adembidi Nuquin

Papan Esuquidistu
 uincuenëd ac bimboec nuc icsaisa
 icmenu, quequin acten mentotanquin
 mibitedi cadobampondash.

¹³Ënden Nuquin Papan matsespenquio
 icquin mimbi tantiaid icsa icnuc
 unësac bimboec icquin Nuquin Papan
 ënden, Naden nata, quequin chiaid
 tantienquiocquin niacquido mibitedi
 iccondac. Adquid icboedi Esuquidistu
 tantiaquid icsho isash, Con madobëd
 icquido nec, quec Nuquin Papa nuqui
 icsaidtedi bëpiscudac. ¹⁴Ënden, Matses
 icsaid bëpiscudnu, quenquiocquin, ëmbi
 naden nata quequin chiaid niacquid
 comapenen cuidnu, quequin Nuquin
 Papan dada uampid iquec, quequin
 Esuquidistun icsainquiocquin ambi
 chiaidtedi nabampanëdash. Adquid
 icshobi icsaquid bimboec nuc matsesën
 unës uaquin cuesten dectanac matses
 icsaidtedi bedshunash abibi cuidadec
 unësapanëdash. Aid unëso isun, Matses
 icsaid cuidosh, quequin abi
 tantiaquidquio icsaid ambi naden nata
 quequin dada uamiaid ucac bimboen
 tantiec bëpiscudtenec Nuquin Papa.
¹⁵Esuquidistuidi Nuquin Papan naden
 nata quequin chiaid niaquesa yec
 matses icsaid bedshunash abided
 cuidadec unësash uincuenquin Nuquin
 Papan chiaid niacquido mayan icsabo
 dëniacquec Esuquidistu abitedi chuiquid
 yampanëdash. Aden dëniacshun,
 Nëidtedi ëbi tantiaquido chuiquid
 ictiapimbo iquec, quequin bedshun
 mëtaneshun buanac bimboen Nuquin
 Papa Esuquidistun ismëpanëdash.

¹⁶Aden chuiquid utsitedi dëniacquid
 Esuquidistu nec, quequin tantias,
 Nadquid peshun nadquid utsi acsho
 Nuquin Papan ëbi bëdamboen isec,
 quenda. Adembidi, Nëid ushëmbi abi
 tantiec iccuededsho isun Nuquin Papan
 ëbi bëdamboen isec, quenda. Adembidi,

ushë chuca choaid usudsho isec
 cuëdënsho Nuquin Papan ëbi
 bëdamboen isendac, quequin tantienda.
 Esuquidistuidi tantiaquidquio icsho
 Nuquin Papan ëbi bëdamboen isec,
 quequin tantiata. ¹⁷Matses icsaquid yec
 ambi naidënquio abembi bëndantiapimbo
 iquec, quequin tantiamenuequin Nuquin
 Papan ambi, Naden nata, quequin
 chiaid Moises menepampic. Ëmbi
 bëdamboen isaidquio matses bëdambo
 icmequid choendac, quequin tantiaquin
 ambi naden nata quequin chiaidba
 Moises menepampic. ¹⁸Esuquidistun
 bëdambo icmiaid nebi, qeshun utsi
 icsamboen chiec onquesho tantienda.
 Ambibi chiec onquesho tantiashun
 Esuquidistu tantesa uaindac. Adquidbëd
 Esuquidistu ictiapimbo iquendac.
 Adquidën, Mibi chuiquidpenquio nebi,
 qeshumbic ambia
 tantiaquidbimboecquin ambi tantiaid
 Nuquin Papan uaid mayan bëda mibi
 tantiamenuequin chuibansho
 tantienquiocquin nadota. ¿Tsuntsin mibi
 adquid icmepash? cata. Aden chiaquien,
 Ushquin adquid isombique. Chuinu.
 Tantia, quequin ambembi chiec
 onquesho tantienda. ¹⁹Adquidën
 Esuquidistu abi tantiaquidon icbombo
 nec, quequin tantienquio iquec.
 Adecbidi Nuquin Papan tantiacpadquie
 Esuquidistu tantiaquid dadpen yanash
 aton utsibobëd tantiananec nashunanec
 aton icbopadquid yanec, quequin
 tantiesa adquid nendac.
²⁰Tantianu. Ëbi chui. ¿Atotsi quiash
 Esuquidistu tantiaquid yanash ëbi icsaid
 cuidnuec Esuquidistuded unësash
 uincuenacimboc bëdamboec tabadebi,
 qeshumbic, ²¹Nëid bedtemaid nec. Aid
 bedsho mayanën mibi cuidendac,
 quequin utsi chuisho mimbi tantiape?
 Adembidi ¿atotsieshun mimbi tantiaid
 icsa unësacsho chococabi yacimboc,

Nëid petemaid nec. Aid pesho mibi
 cuidendac, qesho mimbi tantiape?
 Aden Esuquidistu tantienquio
 icquidëmbimboen, Nëid mishtemaid
 nec. Aid misho mibi cuidendac, qesho
 mimbi tantiapec. ²²Nadquid petemaid
 nec. Nadquid mishtemaid nec, quequin
 matsesën ambibi chuiquin tantiamete
 nec. Ambi petemaidbëdi ambi
 mishtemaid ënëndac. ²³Matsesën
 bëdamboen tantiacimboc chiaid
 aidtedi nec. Nëid ëmbi tantiaid nec,
 qeshun aid bëdamboen ismenuen
 naden nanuna, quequin matsesën chiec.
 Aden ambibi tantiashun, Naden nata,
 quequin mibi chuitiapimbo iquebi,
 qeshumbic namenuequin comapenen
 adquidën chuibanec. Adecbidi,
 Damëyamëdsho ëmbi tantiaidën ëbi
 bëdamboen istsiash, quequin ambibi
 tantiash damëyamëdec. Adec
 damëyamë-dashic abi bunaiduidi
 tantiaquin ambi inacmaid dadan
 isuidtiapimbo iquec. Adecbidi abi inesa
 chidon isuidtiapimbo iquec.

Bëdamboec tabadaid chiaid

3 ¹Esuquidistu tantiaquid yec abia
 uincuenenëdac abuc nidash
 Nuquin Papa yacno icsate bunquid
 nibëdacno tabadacpadquie
 tabadteneta. Adec tabadec, Nuquin
 Papan dayunquio Esuquidistu tsadec
 bëdambo iquec, quequin abëd icte
 bunquin Esuquidistu tantiadonec
 tabadta. ²Abuc abëdi ëbi icnuc aton na
 con na iquendac, quequin tantiaquin
 nidaidënshun bednu, quequinuidi
 tantienda. ³Esuquidistu unësaid
 tantiaquin aidbëdtabi mibi icsaid
 chococashunacimboc icsatiapimbo
 yec nidaidën tabadta. Adecbidi
 Esuquidistu uincuenash abuc Nuquin
 Papa yacno nidash, Ëbi tantiaquidtedi
 bëdaidquio iquec. Aido ëbi

udasaidquio nec, quequin aidën dayun uaid nuqui nec. ⁴Aidën padpidec choshon abi yacno buanac abipadquidquio bëdaidquio nuqui iquendac.

⁵Adec abi yacnoësh abëdi bëdaidquio iquendabi, quequin mibi icsaittedi cuesun secacimboen ëmbanta. Ëmbi inacmaid chudnu, quenquiocquin ënta dadan. Adembidi, Èbi inesa chudmenu, quenquiocquin ënta chidon. Adembidi, Chudnu, quequinuidi tantiaid ënta dadan. Adembidi, Chudmenu, quequinuidi tantiaid ënta chidon. Adembidi mibi bunaid icsatedi ënta. Adembidi aton na daëdpactsëc icquidëmba ma bednu, quenquiocquin, Ëmbia bednu, quequin tantiaid ënta. Aden ënshun, aton na daëdpactsëc icquidëmba ma bednu, quequin tantiaquin abia bedmeta. Bednu, quequinuidi tantiaid Nuquin Papan uaidbimboecnuc matsesën ambibi nacnenaid tantiacbimboecquid mibi bedte bunaid nendac. Mibi bunaiduidi tantiaquin mimbi Nuquin Papa tantiatipimbo iquec. ⁶Abi bunaid icsabëdta ambi tantiaid icsa ënesa icsho matsesën naid chuibante ushë choan adquidtedi Nuquin Papan comapenen cuidendac. ⁷Adquid icboedi ⁸nëbi adenquiocquin ënash bëdamboec tabadteneta. Adecbidi comapenec nëishboedi adenda. Adecbidi, cuesantiadquio yec nëishboedi adenda. Adembidi, utsi icsambo icmeboedëmbi adoenda. Adecbidi, utsi icsamboen chuiboedi adenda. Adecbidi, tsienbëdta shui chedo chiec icsamboen tantiec onqueboedi adenda. ⁹Adecbidi, mua uanamboedi ënëdta. Adquid icboedëmbi icsactsëcquid niacbimboen mibi icsaid ënta. ¹⁰Min tantiate chuca uacbimboecnuc abi tantiadonequidquio icnuequin mibi tantiamequid

tantiaded-tantiadedta. ¹¹Adquid Nuquin Papan icmiac Esuquidistu tantiaquid utsibo naden mimbi tantienquio iquendac. Nëid isadaidbo nec. Nëidic isadaidpembo nec, quequin tantiesa mibi iquendac. Adecbidi, nëid shui dëbid dëtemequid nec. Nëid shui dëbid dëtemesa nec, quequin tantiesa mibi neoaic. Adecbidi, Nëid chotac nec. Nëidic mayu nec, quequin tantiesa mibi neoaic. Adecbidi, Nëid yua nec. Nëidic yuaquid nec, quequin tantiesa mibi neoaic. Adquid Esuquidistu tantiaquid icnuc abëd icquid aton matses nec. Abi tantiaquidtedi chuiquid dapa abentsëcquiobi Esuquidistu nec.

¹²Aden Nuquin Papan cuënaido yec ambi bëdamboquid icmebanaidobi abi cudasaido yec ambi tantiamiaid nebi, quiash bëdamboquid isadacbimboec naded tabadteneta. Utsibo natiamiaid icsho isun bëdambo icmenuequin nashumbanta. Adecbidi, Mimbia bedan bedembi, quequid icta. Adecbidi, Mibia nashunu, quequid icta. Utsi icsaid ëmenuec comapenec chushquenquiocquin bëdamboen chuiban. Tantesa uasho isun ismeded-ismededta. ¹³Mimbi nacpadomboen utsibon natiapimboesho isun, Padi, quenquiocquin abi tantiameban. Adecbidi utsin mibi icsamboen nasho isash cuidnanenquio yec bëpiscudta. Nuquin Papa ëbi icsaid cuidenquio yec bëpiscudosh, quec adta. ¹⁴Adec tabadtenec tantiananta. Adec tantiananec Esuquidistubëd abentsëc yacbimboec icsaisa mibitedi yanendac.

¹⁵Adec Esuquidistubëd abentsëc yacbimboecnuc icmiaid nebi, quequin tantiec bëdamboec tabadtenenu, quec mibitedi tabadteneta. Adec tabadtenequin, Mibi bëdambo iquec, Papa, quequin chuideneta. ¹⁶Nuquin Papan Esuquidistu tantiadonemiaido

icta. Adquido yec abi tantiaquid utsibobéd Esuquidistu chuinanec, Bédamboec tabadta, quec adquecbidi tabadec ismenanta. Aden naic chuiquid dapa Dabidén dada uampid sadmo caidbédta cuédénte utsi Nuquin Papan mibi bédambo icmiaidbédtabi ambi naid utsi chiec cuédencuededta. ¹⁷Adec tabadquin Esuquidistu tantiaquid nebi, quequin Esuquidistun chiacpadomboen nabanta. Adecbidi, ambi chiaiduidi chiec tabadteneta. Adec tabadquin, Esuquidistun tantiamiaid yec bédambo iquebi, Papa, quequin Nuquin Papa chuideneta.

Aton shubun icquidbéd tabadaid

¹⁸Bédamboec tabadnu, qeshun nadota. Chidon min bènén chiacpadomboen nabanta. Esuquidistu tantiaquid icquin adobanta.

¹⁹Chido inquidén, Con bènèbéd tabadec bédambo iquebi, camenuen yuacimboecquin aid chuiquin min chido namenda. Mibibi tantiadquinuidi min chido namenda.

²⁰Bacuëbon, Esuquidistu tantiaquid icquin papan chiacpadomboen cacuidenquiocquin nabanta. Adembidi, titan chiacpadomboen nabanoata. Adosho isashien, Cuishon. Bédambo iquebi, quependac Nuquin Papa.

²¹Anibédtan min bacuëbo namenuc comapenen cuédquin chieshmenda.

²²Yuan mibi yuaquidén chiacpadomboen nabanta. Aidén aden chuishun isnu adobanta. Aden chuishun min icbon isenquiocnoc adomboembidi nabanta. Aden nabansho mibi bédamboen isendac. Nuquin Icbo, Esuquidistu tantiaquid nebi, qeshun adobanta. ²³Con Icbo Esuquidistu nashunu, quiacimboen mibi yuaquidén chiacpadomboen chieshenquiocquin bédamboen nabanta. ²⁴Con Icbo

Esuquidistun abi yacno ëbi nidacsho isun ëmbi bédamboen nabanaid cuidquin ambi ismiambo yaid menendabi, quequin tantiaquin adobanta. Nidaidëshun abi nashunquid mibi neque. Adobanta. ²⁵Min icbon chiacpadomboen nata. Abi chieshênquid icbon cuidendac. Adembidi Nuquin Papan Esuquidistu tantiaquid nebi, qesho abi chieshênesa menequin bédamboen cuidendac. Abi chieshênquid menenquiocquin comapenen cuidendac. Adenuidi tantiaquin cuidendac.

4 ¹Yuanquidén, mimbi yuaido ambi nabanacpaden bédamboen menebanta. Abuc con Icbombo iquec, quequin tantiaquin mimbi yuaido bédamboen menebanta.

Chuibanaid utsi

²Esuquidistu tantiaquid utsibo natiatequidbéd abi icsaid iquec, quequin tantiec baded-badedquiec Nuquin Papa chiec onquedeneta. Aden chiec onquequin, Mimbi ëbi tantiaquin nabanaid tantiec bédambo iquebi, Papa, quequin Nuquin Papa chuideneta.

³Adecbidi ëbipadquid utsibobédta ëbi tantiec Nuquin Papa chiec onqueta. Mimbi chienquiocnèdaid Esuquidistu tantiate bunquid dadpen ma icpanuna, Papa, quequin Nuquin Papa chuideneta. Esuquidistun, Èbi chuibeneta, cac aid chuibenesho bedshun mêtaniaid nebi.

⁴Pabado utsin onqueten onqesho cuembo chume, Papa, ma aidontsen tantiapanu, quequin Nuquin Papa chuideneta. ⁵Esuquidistu tantiesan ëbi tabadaid istenec, quequin tantiec bédamboec tabadteneta. Adec tabadquin Esuquidistu tantiesatsen tantiamenuequin Esuquidistu chuideneta. ⁶¿Mitsicquid mimbi tantiaid icpec? quetsiash tantiesas. Adsho

tantiashun mibi onquiaidbëd sa
batambo iquec daëdacbimboecnuc
Esuquidistu mimbi tantiaid utsibo
chuita ma aidon tantiapanu qeshun.

Abëd icquid chuibanaid

⁷Nëbi ëbëd icquid utsi-utsien
chuibanu. Tantiata. Mibi yacno nidshun
Tiquicon ëbi tabadaid mibitedi
chiendac. Aid Esuquidistu
tantiaquidquio icsho ëmbi con utsi caid
nec. Aidi Nuquin Icho nashunquid
neoaic. ⁸Ëbëd icquid utsibo naic
tabadaid mibitedi tantiamenuequin aidi
mibi yacno nidmembi. Adoac mibi
yacno nidash puduedshun ëbi naic
tabadaidbëdtabi Nuquin Papan chiaid
chuibanac mibitedi ëbi tantiec
unësqiuochoedi cuishon queta.

⁹Onesimobëd Tiquico mibi yacno nidec.
Onesimo nuqui con utsi caidbidi nec.
Onesimo mibi yacnoshon tishaid nec.
Aidi chieshenquioquin ëbi nashunquid
nec. Aid daëdshun ëbëd icquidon
nabamboed mibitedi chuibanendac.

¹⁰Nëbi mibi yacno nidesa chuinu.
Tantiata. Adistadico ëbëd icnuec
abembi quënë nauedadonda nec.
Aidëmbi, Codosas yacnocquido tantiec
tsadebi, quequin chuisho tantiashun
dada uaimbi. Adomboembidi Madcosën
chiec. Madcos Bednaben utsi nec. Aidi
yuecash mibi yacno nidtsiash. Ambo
choshu isun yuedta. ¹¹Esus cashumbic
Ustus caidën, Codosas yacnocquido
tantiec tsadebi, quequin
chiacpadomboen dada uaimbi.
Adistadico yec Madcos yec Ustus yec
quec aidtedtsëqui isadaidbo nec. Aidon
ëbëdtambi Esuquidistu chuibanquin ëbi
bëdambo icmequido neoaic. ¹²Epapadas
mibi yacnoshon tishaid Esuquidistu
chuibanquidquio nec. Aidëmbidi,
Codosas yacnocquido con utsibo tantiec
tsadebi, quequin chiacpadomboen dada

uaimbi. Icsamenuequid icnuc mibi
bunacpaden tantiadonemequin mimbi
Codosas yacnocquido abi tabadme,
Papa, quec
badiadquidën-badiadquidënquiec
Nuquin Papa chiec onquec Epapadas.
¹³Aidi mibi Codosas yacnocquido yec
Daudiseya yacnocquido yec Yedapodis
yacnocquido yec quequin tantiec
chieshenquio yec Esuquidistu
tantiadonequidombo ma icpanu quiash
mibitedi chiec onquedenec. ¹⁴Adembidi
Ducasën dauëchoquidën Demasbëdtan,
Codosas yacnocquido tantiec tabadebi,
quequin chiacpadomboen dada uaimbi.

¹⁵Codosas yacnocquidon nëid ëmbi
dada uaid mibitedishun isun, Pabado
mibitedi tantiec tsadec, quequin utsibo
chuita. Adomboembidi Daudiseya
yacnocquido chuioata. Adomboembidi
chido Nimpas cuëmëdquidën shubun
Esuquidistu tantiec iccuededquido
chuioata. ¹⁶Adembidi, nëid ëmbi dada
uaid isec onquequin mibëd
iccuededquido tantiameshun Daudiseya
yacno iccuededquido tsusiobo
menequin, Nëid Pabadon dada uaid isec
onquequin mibëd iccuededquido
tantiaméoa, quequin chui. Adembidi
ëmbi Daudiseya yacnocquido tantiaquin
dada uaid bedshunshun isec onqueshun
mibëd iccuededquido tantiaméoa.

¹⁷Adembidi Adquipo naden chuita.
Nuquin Icbon Esuquidistun
chiacpadomboen naimbudta, quequin
chuita.

¹⁸Mibitedi tantiaquin ëmbibi nëid
dada uaombique. Ëbi tantiec
nidtiapimbo yec Pabado quënë
tsadeque. Aid puduemeta, Papa,
quequin Nuquin Papa chiec
onquedeneta. Nuquin Papan ma
mibitedi bëdamboen ispanu, quec
tsadebi.

Padi. Aidedi dada uaombi.

TESADONICA YACNOCQUIDON ISTE I

Pabadon tauamboen chiaid

1 ¹Pabado nebi. Shubu dadpen icquid Tesadonica caid yacnocquido Nuquin Papabēdta Nuquin Icbo Esus tantiaquido mibi chuiquin dada uaic nebi. —Nuquin Papan Esuquidistubēdtan bēdamboen isquin bēdambo icmepashun —caimbi mibi. Ēbēd icquin Sidbano caidbēdtan Timoteyontsen: —Nuquin Papan adopashun —quequimbidi mibi tantiec. Sidbanobi Sidas caid nec.

Tesadonica yacnocquidon Esus tantiaid

²Naden mibi Nuquin Papa chianembi. —Tesadonica yacnocquido bēdamboen namequid yec mibi bēdamboshē iquec, Papa. ³“Aidon Esus tantiaquin ambi chiacpadomboen matses tantiaquin nashumbanosh. ‘Abi yacno abi tantiaquido buanuec Nuquin Icbo Esuquidistu padpidec choec,’ quequin chieshtoenquo icquin Esusēn naid chuibanosh,” quetuidposh Timoteyo. Ma adembi aidon napanuna, Papa —quequin mibi Nuquin Papa chianembi. ⁴Con utsibobimboecquido mibi neque. Tantia. Mibitēdi chuinu. Mibi tantiaquin ambi tantiacpadomboen Nuquin Papan mibi Esus tantiamenēdash naden. ⁵Ambembi chiaid chienquo icquin Esusēn naid mibi chuibanondambi. Aden chuibanac Nuquin Papan Mayanēn

tantiamiacpadomboen: —Abimbo caic —qeshun mimbi Esus tantiabenondac. Adembidi Esus tantiamenuc Sidbanochedobēd bēdamboec ēbi tabadsho isun: —Adquid abimbo chuiquid nendac —quequin mimbi ėm̄bi chuisho tantiondac. ⁶Aden Nuquin Papan Esus tantiamiaido yec ēbi Nuquin Icbo yacpadec chieshtoenquo icsho isash mibitsen chieshtoenquo iccondac. Ēm̄bi Nuquin Papan chiaid chuibanac Nuquin Papan Mayanēn namiacpadec cuishonquequin mimbi Esus tantiondac utsibon: —Padi. Chēn —quequin comapenen chieshēnquionobi. ⁷Adec mibi bēdamboec tabadaid chuisho tantiaish min nidaidēn icquido Masedonia yacnocquido Esus tantiaquido mibi yacpadquiec tabadtiadquo icpac caosh. Adembidi tantiaish nēid nidaid Acaya caid yacno tabadquidotsen adtiadquo icpac caosh. ⁸¿Anocquidonuidida mibi Esus tantiec bēdamboec tabadaid tantiapash? Padenquo. Mimbi chieshtoenquo icquin Esusēn naid chuibanac nidaid utsi-utsiec yacno tabadquidon tantiac caosh. Adashic aido mibi caic: —Nuquin Papa tantiaquidom̄bo nec —quecuededac caosh. Aden mimbi naid chuisho tantiaishun: —Tantiaish —qeshun nēm̄bo icquido mimbi naid chienquo iccombi. ⁹Mimbi naid naden chuisho tantiombi. —Pabado chedon Esus chuibansho tantiaish: “Nuquin

Papapadquid utsi nibëdec,” qeshun Nuquin Papabëdta Esus tantiabenac caosh. Adshun ambi papa quequin nacnenaid aidon tantienquo yanac caosh. Aden Nuquin Papan chiapadomboen natiadquo yanac caosh —quequin chioshi. ¹⁰Adashic: —Adquid yec Nuquin Papa yacnuësh aton mado Esus nidaidën padpidec chosho istiadquo iquec. “Ëbi cuidmenquo icnuec abided cuidadec unësascho Nuquin Papan uincuemaiad Esus choec,” qeshun aid istiadquo iquec —quequin mimbi naid chioshi.

Pabadon bëdamboen chuibanondaid

2 ¹Mibi yacnoshon tauamboen ëmbi chuibanac Esus tantiaquid yanshun mimbitsen utsibo Esus chuibanondac. ²Shubu dadpen icquid Pidipos caid yacnoshon quënën nauedac ëbi mëyadec tsadboedi puduemeshun nidmiac mibi yacno nidshun Esusën naid mibi chuibanondambi. Utsibo dadpeshun chieshënnubi Nuquin Papan namiapadomboen cuesambo icquin mibi Esus chuibanondambi. ³Ëmbi naidquo namenuendambi adodionda? Padenquo. ¿Ëbi tantiamenuendambi chuibandionda? Mambi padenquo iccondac. ¿Ambembi chiaidtambi mibi chuibandionda? ⁴Mambi mibi abimbo chuibampondac. Matsesën naidtedi tantiaquidënquo Nuquin Papan: —Aidën abimbo chuibantsiashe. Con Mado Esusën naid chuibenequid icmenu —caidquo nebi. Adquid yec matses: —Mibi bëdambo iquec —cameteuidi bunenquo iquebi. Nuquin Papa: —Mibi bëdambo iquec —camenuembimbi ambi chiapadomboen naic. ⁵Ëmbi tantiacpadomboen mibi namenuc: —Mibi bëdambo iquec —quenquo iccondabi. Min piucquid bednuen muaquin chiambo iccondambi. Nuquin

Papan isnubi abimbo chiondambi.

⁶¿—Pabado bëdambo iquec —matses camenuendambi chuibandionda? Mibi adometiapimbo icquin utsibotsen adometiapimbo iccondabi. Esusën naid tantiamenuembimbi bëdamboen chuibanondac.

⁷—Ëbi chuibeneta —Esuquidistun caidquo nebi. Adoaid icquin tsusio dapan chiacoboen: —Nata —quequin ¿ancabudquindambi mibi chuibandionda? Mambi padenquo iccondac. Anin bacuë nëshmenquo icquin bëdamboen namiacbimboembimbi nëshmenquo icquin mibi chuibanondac. ⁸Mibi tantiaquiquin chieshtoenquo icquin Esusën naid chuibanec yuec mibëd tabadondabi. Aden naic tabadec bëdambo iccondabi. ⁹¿Ada tantie, con utsibo? Aden Esusën naid chuibanquin nidaidën capuquid yua bitsibi tuscaquin shubumpi nacnendeniondambi. Mibi caic: —Ëbi menianiac aton piucquid naimëdnushe —quiash con piucquid bednuec chonoadteniondabi. Mimbi isnubi adondabi.

¹⁰Mibëd yec Nuquin Papan chiaid niaquenquo yec bëdamboec tabadondabi. Utsibo: —Pabado chedo icsambo icquido nec —quetiapimbo icnuc aduidequi tabadondabi. Adshobini mimbi ispondac. Adembidi Nuquin Papan ispanëdashi. ¹¹Amën aton mado: —Naden na —quequin nëshmenquo icquin chiacoboen mibi abentse-abentsen bëdamboen chuibanquin ¹²mibi bëdambo icmepondambi. —Nuquin Papan: “Icsatiapimbo icquid icmequin ëbëdi tabadmendambi,” quequin Esus tantiamiaido mibi nec. Adquid Nuquin Papan chiapadec bëdamboec tabadquid neque. Ambi chiaid niaquenquo yec bëdamboec tabadnuna —mibitedi cadeniondambi.

¹³Aden Nuquin Papan chiaidquio chuibanac: —¿Ambembida chuidiosh? Nuquin Papan chiaidquio ma Pabadon chuiboc —mibi quianondac. Aden Nuquin Papan chiaidquio tantias Esus tantiaquido yanash aidquibidi chuisho tantias mibi bēdambo yanec. Mibi adaid tantiaquin Nuquin Papa chianembi naden. —Tesadonica yacnocquido aden bēdamboen tabdmequid yec mibi bēdamboshē iquec, Papa —quequin Nuquin Papa chianembi. ¹⁴Nidaid Udeya caid yacnocquido yacpadquie chieshtoenquio icquin mimbi Esus tantiec. Udeya yacnoshon Esus tantiaquido aton matses isadaidbon cuestiadquio icquin chieshēnac chieshtoenquio iccondash. Adomboembidi aid matses mibi yacno tabadquin chieshēnac mibi chieshtoenquio iccondac. ¹⁵Isadaidbombidi Nuquin Papan chiaid chuibanquido cuesun secapampic. Adembidi Nuquin Icho Esus unēs uapac caondash. Adomboembidi chieshēnquin mibi yacnoshon cuemepondashi. Aden Nuquin Papa chieshēnquinc matses abitedi chieshēnquinc caquin ¹⁶isadaidbon matses utsi isadaidpembo ēbi chuimetiapimbo icpondash. —Esus tantias Esus Nuquin Papan bēdamboen isquin mibi cuidenquio iquendac —quequin ěmbi chuisho: —Padi. Aid chienda. Cueschitomane —capondashi. Aden ambi chiaid ěnenquio icquin niac-niacsho Nuquin Papan aido cuidquiendac.

Pabado istante bunaid

¹⁷¿Mibi yacnoshon aden chieshēmēnquidon cuemiāc mibi tantienquiodambi ictionda? Mibi unēsquio icnuc mibi istantiadquio iccondabi. ¹⁸Adec: —Padpiden istanu

—quesho Satanāsēn nac padenquio iccondabi. Padpidec: —Nidnu —quesho adembidi. Padpidec: —Nidnu —quesho Satanāsēn nacbidi padenquio iccondabi. Nēbi adecbidi mibi istantiadquio iquebi. ¹⁹Nuquin Icho Esuquidistu choan aidbēd tabadquin ĩtsutsimbi ispatsia? ¿Tsutsi isashini cuishonquepatsia? ¿Tsutsi isumbimbi: —Is. Ěmbi chuibanac Esus tantiabonaido neque —capatsia? Mibibimbi caic. ²⁰—Esus tantiec bēdamboec tabadosh —quesho tantias mibi tantiec cuishonquebi. Adembidi mimbi naid isun: —Mimbi bēdamboen naondac. Mimbi chuibanac ēbi tantiabonaidash —ēbi caindac Nuquin Icbon.

Istan, quequin Timoteyo chiaid

3 ¹Aden mibi tantiec: —“¿Mitsipadec tabadpec?” quequiditseqi tantiec tsadiapimbo iquebique. Istan —caondambi Timoteyo chuiquin. Adshumbic shubu dadpen icquid Atenas caid yacno tabadec ěbēd icquid utsi Sidbano chuiquin: —Timoteyo nidan nuquiuiditseqi icnuna —caondambi. ²Ěmbi: —Nid —caonaid Timoteyo Esus tantiaquid yec nuquin utsi nec. Ěbēd tan Esus chuibenequidquio nec. Adquid icsho nadopondambi. —Tesadonica yacno nidshun Esus bēdamboen chuibantan. Adembidi: “Esus tantiec chieshtoenquio yec nadquie tabadquid nendac,” quequin bēdamboec tabadquin ismetan, Timoteyo. ³Aton matsēsēn comapēn chieshēnac chieshtoshon Esus tantienquio yanushē. Chuitan —caondambi. Aden chieshēnte mibi chiondambi. —Nuquin Papan tantiacpadomboen Esus tantiaquid chieshēnendac —quequin mibi chiondambi. ⁴Aden mibēd icquin chuideniondambi. Adsho ěmbi chiacpadomboen nuqui chieshēnondash.

⁵—“Ëbi nidan chieshënac ðadecbidida Tesadonica yacnocquido chieshtoenquo icpatsiashba?” quequinuidtsëqui tantiec tsadtiapimbo iquebique. Istan —caondambi Timoteyo chuiquin. —“Icsamequin tanu,” quequidën Satanasën namiac chieshtoshon Esus tantienquo yanushe. Istan. ðAda ëmbi Esus chuibanondaido bëdamboec tabadeque? —caondambi Timoteyo chuiquin.

Timoteyon chuituidaid

⁶Adoac mibi yacno istanec choquin Timoteyon mibi naid chuituidoshi naden. —Esus tantiaquid yequi tantianquidquo yamposh —quequin chuiposh Timoteyon. Adashic: —“Pabado chedo bëdambo iccondash. Aido padpiden istiadquo iquebi,” quiosh Tesadonica yacnocquido —queposh Timoteyo. Adembidi mibi istantiadquo iquebi. ⁷Timoteyon chuiboed tantiash bëdambo yanobi. Nëmbo icquidon chieshënac shubiantiadtsëcquo iccobi. Adboedi mibi caic: —Chieshtoenquo icquin Esus tantiosh —quesho tantiash bëdambo yanobi. ⁸Mimbi aden naid tantiash dayacquo yacnimboec iquebi. ⁹Aden tantiashun Nuquin Papa chianembi naden. —“Tesadonica yacnocquido bëdambo iccosh,” quesho tantiash cuishonquebi, Papa. Mimbiuidtsëqui namiac chieshtoenquo iquec. Aden namec mibi bëdamboshë iquec, Papa. ¹⁰Aido istiadquo iquebi. Mimbi chiaid bëdiactsëc tantiasho aidobëd tabadquin bëdamboen chuibantsiambique. Ëbi ano nidmeta, Papa —quequin Nuquin Papa chianembi.

¹¹—Nuquin Icbo Esusbëdtan Nuquin Papan nëbimbobi ambo nidmepashuni —caimbi. ¹²Adec mibëd ictiadquo icquin Nuquin Papa mibi chianembi.

—Ëmbi aido tantiaquiacpadomboen utsibobëd tantianameta, Papa. Bëdiactsëc tantianantsëcboedobi comapenec tantianamequiota, Papa. Adembidi utsibotsen bëdamboen ismeta. ¹³Aden bëdamboec tabadquid icmeta, Papa. Mimbi adoac chieshtoenquo yec bëdamboec tabadtsiash. Adsho mimbi mibi yacnoshon uaido mayan bëdabobëd nidaidën padpidec choshon con Icbo Esusën: “Tesadonica yacnocquido icsambo iquec,” catiapimbo ictsiash. Adembidi: “Icsambo iqueque. Cuidnuna,” catiapimbo mibi ictsiac, Papa —quequin Nuquin Papa chianembi mibi chuiquin.

Chidobëd bëdamboec tabadte chiaid

4 ¹Tantia, con utsibo. Chiaid utsitsen mibi chuinu. —“Bëdambo mibi iquec,” Nuquin Papa camenuc bëdamboec tabadta —quequin ëmbi chiondacadquieci tabadta. Nuquin Icbo Esus tantiaquieci adta. —Bëdamboec tabadosh —quesho tantiashun: —Adquieci tabadta —caimbi mibi. ²Nuquin Icbo Esusën namiac aidën chiaidquo mibi chuibanondambique. Aid tantiaquieci bëdamboec tabadta. ³Nuquin Papan tantiamiacpadquieci tabadquidën nadoquid yendac. Utsin chido chudenquo icquin aton chidouidtsëqui chudquid yendac. Adembidi chidon dada utsi chudmenquo icquin aton bënëuidtsëqui chudmequid yendac. ⁴Adec Nuquin Papan chiaid niaquenquo yec abi bunaid mëmunec dada ambi inaidquo aton chidouidtsëqui chudec aidbëd bëdamboec tabadsho: —Bëdambo iquec —catsiash Nuquin Papan. ⁵Nuquin Papa tantiesabimboec tabadenda. Esus tantiesambien comapenec tsien bunquin aton chidopenquo chudendac.

Adembidi Nuquin Papa tantiesa icquin chidon utsin shui bunquin aton bënëpenquoio chudmendac. Adec tabadenda. ⁶Bënë nidan aton chido abentsëqui uequid istuidshun chudenda. Adoquid Nuquin Papan cuidendac ëmbi chiondacadpadoemboen. ⁷—Opabimboec chudnanec ma icsamboec tabadnu —¿quequinda Nuquin Papan Esus tantiaquido nuqui icmediac? Padenquoio. —Ma bëdamboec tabadnu —quequimbien Esus tantiaquido nuqui icmiaque. Bëdamboec tabadnuna. ⁸Aden chuiquin aton Mayan nuqui menequidën Nuquin Papan chiaid chieci nebi. Aden ëmbi chuiboed niacquin Nuquin Papan chiaidquido mimbi niactsiac.

Adecbidi tantiananquiota, quequin chiaid

⁹—Bëdamboec tantiananta —quequin padpiden chienquoio iquemi. Nuquin Papan tantiamiac Esus tantiaquido yec mibi tantiananec. ¹⁰Min nidaid Masedonia caidën tabadquido Esus tantiaquido utsibotedi mimbi tantieci. Mibi yacpadquiecbidi tantiananquiokin utsibotsen tantiaquiota. ¹¹Ëmbi chiondacadquieci chieshëmënenquoio yec bëdamboec tabadta. Utsi icsaiduidi chienquoio yec bëdamboec tabad. Chieshenquoio yec dayacquio yec chonoadta. ¹²Adash bunenquoio mibi ictsiac. —Con na nacnenambo iccombique. Mitsana beccho —mibi quenquoio ictsiac. Mibi adquo icscho isash Esus tantiesabo: —Esus tantiaquido bëdamboec tabadec —quetshiash.

Esusën abi yacno abi tantiaquido buante chiaid

¹³Tantia, con utsibo. —“Esusën abi tantiaquido uincuemendac,” quequin chuisho mimbi tantiabi icnushu

—queshun mibi bëdamboen chuinu. Esus tantiesabo: —Ëmbi tantiaidquio padpidec isadenquoio iquec —quec yuecquio shubiabimboec shubienda. —Ëbipadquid Esus tantiaquid Nuquin Papa yacno istuidendambi —quec ma yuecquio shubianenquoio icnueshun Esusën uincuemete mibi chuinu. ¹⁴—Unës uaqui Esus uincuenacpadebidi nuquitsen uincuenendac. Esus tantiaquido unësacsho uincuemeshun Nuquin Papan abi yacno aton Mado Esus buamendac —quequin nuqui tantieci. ¹⁵Tantia. Nuquin Icbo Esusën chiaidquio mibi chuinu. Nuquin Icbo Esus nidaidën padpidec chonoc aid istuidec Esus tantiaquido unësabi icquido abia nidenquoio iquendac. ¹⁶Padenquoio icnubien Nuquin Papa yacnuësh choec Nuquin Icbo Esusba nua cuëdtuidendac. Adnubien Nuquin Papan abi yacnoshon uaido mayan bëdabo chuiquid dapatsen nua cuëdtuidoaindac. Adnubien Nuquin Papan chiacpadoemboen utsin nua shoncatuidendac. Adnubien Esusën abi tantiaquido unësaidotedi abia aton dada chuca uaquin uincuemendac. ¹⁷Adoaquien aidobëdi Esus tantiaquido unësabi icquido tsidadash aidotedi abuctoendac Nuquin Papabëd tabadec nidec. Abitedi abuctoquimbi abi bëquedec Esus chosho istuidendac. Adash Esusbëd Nuquin Papa yacno nidash anobi nuqui quenenendac. ¹⁸Ëbi adsho tantiashun nadota. Aton matses unësaid tantieci shubiquido bëdambo icmenuen ëmbi chuiboed chuita.

Esus chote chiaid

5 ¹Tantia, con utsibo. Mibi chuinu. —Nëidtedec ushash Esus padpidec choec —quequin chuitiapimbo iquebi. Adembidi: —Nëidted seta matamiash choec —quequin dada uatiapimbo

iquebi. Tantienuo iquemi. Naden mibi chiondambi. ²—“Nëid inchëshëmbi ampequid choec,” quequin tantiatiapimbo yac bimboec: “Aid ushën Nuquin Icho choec,” quequin tantiatiapimbo icnuc Esus choaindac —quequin mibi chiondambi. ³Esus tantienuo yequi matses dadpen: —Cuesnanenuo yec nuqui bédamboec tabadec —qeshobien ambi: —Ëbi cuidendac —cacmaidënuo padpidec choshon cuidquindac. ¿Mitsipadquio chido bacuë usunquid icpec? —Aid ushënuo tishëmbi —quequin tantiatiapimbo yequi badedquio nëncuenec. Adecbidi ambi: —Choec —cacmaid Esus badedquio chosho abi tantiesabon cuenëntiapimbo iquendac. ⁴¿Esus chonoda nuqui dacuëdpe? ¿Esus tantiesaboda nuqui nedi? Esus tantiaquidoen nuqui nec. Adquid yec: —Nëbien Esus chochitec —quec bédamboec nuqui tabadnubi Esus chonoc nuqui dacuëdenquio iquendac. ⁵¿Pacuënëdac bimboecquidoda nuqui nedi? Padenquio. Pabiate paposhquiac bimboecnuc Esus bédamboen tantiamiaido yec bédamboec tabadquido ma nuqui neyoc. Adecbidi bédamboec tabadnuna. ⁶Ushquin pabiaten tantienuo yac bimboen utsibon Nuquin Icho Esus tantienuo iquec. Adec tabadenquio icnuna. —Esus tantienuo icmane —qeshun nuqui icsate bunaid nainquio icquin mëmununa. Nuquin Icho chosho istiadquio yec bédamboec tabadnuna. ⁷Esus tantiesaboen inchëshën ushquin tantienuo yac bimboec iquec. Adquiecbidi tantiadenuen acte paëmbo icquid acquido nec. ⁸Adquidpenquio yec Esus tantiaquido yec bédamboec tabadnuna. Nuqui icsate bunaid nainquio icquin mëmununa. Sondado: —Shocosh tsasimbo icquid

shictonquenu. Sicsenushe —quiac bimboec icnuna. Satanasën Esus tantiamenuo icnushe. Esus tantiaquioquin matses ten tantiaquionona. Adecbidi sondado: —Masenushe. Shocosh tsasimbo icquid mauete mauenu —quiac bimboecbidi icnuna. Satanasën icsamboen tantiamenuo chieshtomenushe. —Esus tantiasho cuidenuo icquin Nuquin Papan abi yacno ëbi tabadmendac —quequin bédamboen tantianuna. ⁹¿Cuidnuenda Nuquin Papan nuqui Esus tantiamediaca? Padenquio. Abëdi tabadmenuen Nuquin Icho Esuquidistu nuqui tantiamiac. ¹⁰Aidi abi tantiaquid cuidmenquio icnuec abided cuidadec unësac caondash. Aidën padpidec choshon abi tantiaquidotedi buanshun abëdi tabadmendac. Unësaid uincuemiaidobëdta unësabi icquidotedi adoendac. ¹¹Ëbi adsho tantiashun mimbi nabocpadomboembidi Esus tantiec bédambo icnuec ëmbi chuiboech chuinanquiota. Adecbidi bédamboec tabadec: —Adequi tabadnuna —cananta.

Bédamboec tabadte Pabadon chiaid

¹²Esus mibi chuibanquido bédamboen ista. —Nuquin Icbon chiacpadomboen chieshtoenquio icquin nuqui chuiquidën nuqui bédamboen chuibanec —quequin aido bédamboen tantiaata. Mibi nashunquidombo neque. Aidon: —Nuquin Papan chiaid niaquenquio yec bédamboec tabadnuna —quequin chuisho bédamboen tantiaata. ¹³—Nuquin Papan chiaid bédamboen tantiaquidombo nec —quequin bédamboen ista. Adec chieshëmënenquio yec bédamboec tabadta. ¹⁴Mibëd icquido naden chuiban. Chieshquid icsho: —Mibitsen chonoadta —cata. Dacuëdsho:

—Dacuëndenda —cata. Esus bëdiactsëc tantiatsëcscho bëdamboen chuiquin Esus tantiamequiota. Dada padishquio icsho nashunta. Aden nëishenquio icquin abitedi bëdamboen ista. ¹⁵Utsin chieshënac cuidnänenquio yec bëdamboec tabadta. Mibëdtan Esus tantiaquidobëd bëdamboec isnanquin utsibotsen bëdamboen ista.

¹⁶Aden Esus tantiec ënëdenquio yec cuishonquianeta. ¹⁷Adembidi Nuquin Papa chianequin: —Ëmbi chiacpadomboen ëbi nashunquin utsibotsen nashunta, Papa, —quequin chianeta. ¹⁸¿Mimbi chiacpadomboen Nuquin Papan nasho isunuidida mimbi: —Nuquin Papa bëdambo iquec —cape? Nadoac bëdambo ictsias. Bëdamboec tabadquin: —Mibi bëdamboshë iquec, Papa, —cac bëdambo ictsias. Daicsabudshumbic adembidi nac bëdambo ictsias. Paëmbo icnubi adembidi. Mitsana icnuc adembidi. Utsibon chieshënaqui adembidi: —Mibi bëdamboshë iquec, Papa —cac bëdambo ictsias. Aden Nuquin Papan: —Ma Esus tantiaquidon adono —quequin tantiacpaden mimbi natsiac. ¹⁹Nuquin Papan Mayanën Nuquin Papan chiaid tantiamiac pamumëdaccimboec tabadenda. ²⁰Aden Nuquin Papan Mayanën tantiamiac utsibotsen chuisho: —Mue nec —badedquio cainda. Chuishoba tantiata. —Nuquin Papan chiaidquio chuinu —quesho mamëshunenda. ²¹Adenquio icquin: —¿Nuquin Papan

chiaidquibida chuibaneque? Tantiabono —cata. Aden tantiashun Nuquin Papan chiaidquio isbanta. Aden isbanquin abimbo chuisho tantiashun: —Ai, Nuquin Papan chiaidquio chiec —qeshun aidën chuisho bëdamboen tantiata. ²²Adembidi Nuquin Papan chiaid isbanquin icsamboen chuisho tantiashun: —Nuquin Papan chiaidpenquio chiec —qeshun aidën chuisho tantienda. Aidën chiacpadomboen nainda.

²³Mibi Nuquin Papa chianembi. —Matses bëdambo icmequid icquin mimbi chiacpadomboen aido name, Papa. Mimbi chiaidquio bëdamboen tantiamequin bëdamboen tabadme, Papa. Mimbi adoac bëdamboec tabadnuc choashun con Icho Esusën: “Aido bëdambo iquec,” catsias, Papa —quequin Nuquin Papa chianembi mibi. ²⁴Nuquin Papa nuqui Esus tantiamequid muesambo nec. Adquid icquin ambi chiacpadomboen nuqui chieshtomenquio iquendac. ²⁵Nuquin Papa ëbi chianeta. —Abëd icquidobëdta Pabado bëdamboen nameta, Papa —quequin Nuquin Papa chianeta. ²⁶Ambocquido Esus tantiaquidotedi chuiquin: —Pabado chedon nuqui tantiaquiec —quequin chuiban. ²⁷Nuquin Icbon tantiacpaden chuiquin dada uaombique. Ëmbi dada uaboed nëid isquin ambocquido Esus tantiaquidotedi chuiban. ²⁸—Nuquin Icho Esuquidistun bëdamboen ispashun —quequin mibi tantiembi. Padi. Aidtedi dada uaombi.

TESADONICA YACNOCQUIDON ISTE II

Pabadon tauamboen chiaid

1 ^{1,2}Pabado nebi. Tesadonica yacnocquido Nuquin Papabēdta Nuquin Ico Esus tantiaquido mibi chuioaquin dada uaimbi. —Nuquin Papan Esuquidistubēdtan bēdamboen isquin bēdambo icmepashun —caimbi mibi. Ēbēd icquin Sidbanobēdtan Timoteyon: —Nuquin Papan adopashun —quequimbidi mibi tantiec.

Nuquin Papan Esusbēdtan matses cuidte chiaid

³—Esus tantiaquidēn: “Aden naic mibi bēdamboshē iquec, Papa,” quequin Nuquin Papa chianequid —quequin tantiaquin mibi Nuquin Papa chianembi naden. —“Esus bēdiactsēc tantiatšcboedombi nēbi Esus tantiabededosh,” quiosh, Papa. “Adecbidi bēdiactsēc tantianamboedi nēbi comapenec tantiananosh,” quiosh. Aden aido bēdambo icmec mibi bēdamboshē iquec, Papa —quequin chianembi mibi. ⁴Mimbi aden bēdamboen naid Esus tantiaquido utsibo chuibeniombi. —Dadpenshun chieshēnaqui chieshtoenquo icquin Tesadonica yacnocquidon Esus tantiec —quequin shubu utsin shubu utsinquien chuibeniombi.

⁵Adec chieshtoenquo icquid icquin nuqui naden tantiec. —Ēbi chieshtomenquo icquid abitedishun

naid tantiaquidquo nec. Adquid icquin icsambo icquido cuidquin bēdambo icquido Nuquin Papan bēdamboen isec —quequin nuqui tantiec. Adec chieshtoenquo icquin Esus tantiasho Nuquin Papan: —Adquido ěmbi namiacnombo chomeshun ěbēdi tabadmendambi —nuqui caindac.

⁶Nuqui chieshēnquidon naidtsen tantiaquid icquin Nuquin Papan aido cuidendac. ⁷Aden nuqui chieshēnquido cuidquin aidon nuqui natiamiaid nuqui bēpiscudmendac. Abi yacnuēsh mayan bēdabo ambi comapenen tantiaquin namiaidobēd choshon Nuquin Ico Esusēn adoendac. ⁸—Icsaisambo yec matses cuidquid nebi —quequin tantiamenuc bēchamauanquiec choshon Nuquin Papa tantiesabo cuidendac. —“Nuquin Ico Esus tantiasho Nuquin Papan mibi bēdamboen istsiash,” quequin chuisho tantiatipimbo iquebi —quequin abi tantienquo icsho Esusēn cuidendac.

⁹Cacumiacimboen abi yacno puduedmenquo icquin ambi icsambo icquido cuidacno nidmendac cuentiapimbo icnuc. Adoac Esus abitedishun Ico yec bēdamboshē isadsho isec tabadtiapimbo iquendac.

¹⁰Aden ambi icsaido cuidte ushēmbi Esus chosho abi tantiaquido: —Ēbi cuidmenquo icnuc abided cuidadaid Nuquin Ico bēdamboshē iquec —quequin aton Ico isec tabadendac.

Ëmbi Esus chuibanac aid tantiabendonaido icquin mimbitsen Esus chosho isendac.

¹¹—Aidbëdtambi Esus isendambi —quequin mibi Nuquin Papa chianembi naden. —Mimbi Esus tantiamiaido Tesadonica yacnocquido bëdamboen tabadme, Papa. Aido: “Esus tantiaquin ambi chiapadomboen natiadquio iquebi,” qesho ambi chiapadomboen name, Papa. Comapenen tantiaquidquio mibi neque. Adota, Papa. ¹²Aden mimbi con Icbo Esuquidistubëdtan bëdambo icmiac Esus tantiec bëdamboec tabadtsiash, Papa. Adec bëdamboec tabadsho isash utsibo mibi caic: “Abi tantiaquid icsho Esusbëdtan Nuquin Papan aden bëdamboen tabadmec. Aton Icbo Esuquidistubëd Nuquin Papa bëdamboshë iquec,” quependac utsibo, Papa —quequin Nuquin Papa chianembi mibi tantiaquin.

Icsamboshë icquidba chote chiaid

2 ¹Tantia, con utsibo. Mibitedi chuinu. —Abi yacno tabadmenuen buanuec Nuquin Papa yacnuësh Nuquin Icbo Esus ënden choac —qesho tantiaash ²dacuëdtanenda. Mibi yacnoshon çtsuntsin adec muaquin chuiposh? Aidon: —Tantia. Nuquin Papan Mayanën tantiamiacpadomboen chuinu. Nuquin Icbo Esus ënden choac —quec muapash. Ambembi chiaidien chuichitash. —Naden Pabadon chiaid iquec —quequin ëmbi dada uaidbimboecquid isquimbien chuichitash. ³Adec muaid tantiaash: —Abimboen cachitosh —quenda. çNuquin Icbobada chopadic? Padenquio. Utsibain choendac. —Nuquin Papa caidën chiaid tantiatiapimbo iquebi —quec matses icsamboec tabadnubien Nuquin Papa chieshëncquidquio icsamboshë icquidba

choash matses dadpenquio chuiquid dapa iquendac. Aid Nuquin Papan cuidtequidquio nendac. Aidba choabi icnuc Esus choenquio iquendac. Icsamboshë icquidbain choendac. ⁴Aid chuiquid dapa yanashic Nuquin Papa dëniacte bunquiec Nuquin Papa tabadte shubu uashunaidën puduedshun: —“Comapenen tantiaquin ëbi nashunquidquio nec,” quequin mimbi Nuquin Papa caid nibëdeque. Èbiuidtsëqui tantiaata —caindac matses abitedi chuiquin.

⁵Aden mibi chuideniondambi. çTantienquioda ique? ⁶Nuquin Papan tantiacpadënquio chomenuen uidënuac icsamboshë icquid nëbi choenquio iquec. Nuquin Papan tantiacpadënquio choendac. Ëmbi chiondacpadquid abi chomenquio icquid mimbi tantiec. ⁷Nëbi isadenquio icquidën Satanasën namiac matsesën Nuquin Papan chiaid niac-niacbededec. Padnuen icsamboshë icquid choabi iquec. Aid chomenquio icquid nidabi icnubi icsamboshë icquid chuiquid dapa yantiapimbo iquendac. Abi chomenquio icquid nidmiambien ⁸icsamboshë icquid matses chuiquid dapa iquendac. Adnubien Nuquin Icbo Esusën: —Èbien matsesën Icbombo nec —quequin matses abitedi tantiamenuec choshon icsamboshë icquid: —Unësta —caquinuidtsëqui unës uashunendac.

⁹Adec Esus choabi icnuc icsamboshë icquid chuiquid dapa yanendac. Adquid yanshumbic Satanasën tantiamiacpadomboen comapenen tantiaquin dadpenquio nabanquin ismendac. —Comapenen tantiaquidquio nebique. Istac —quequin ambembi chiaid tantiamenuen aden nadatiambo icquin nabanquin ismendac. ¹⁰Adec icsauidequi tabadquid yec comapenec muasho tantiaash: —Abimbo caic —quependac Esus tantiesabo Nuquin

Papan cuidtequido yec. Aidon Esus chuibenequidën Nuquin Papa yacno tabadte abimbo chuisho pamumëdabcimboen tantiatiapimbo icquin ambembi chiaiduidtsëqui tantiendac. ¹¹Aden ambi chiaid niac-niacuidequi icsho Nuquin Papan: —Abi bunaidquio ambembi chiaidquio chuisho ma tantiapanuna —quequin namiac: —Mue nec —quequin tantienquio iquendac. Utsi muasho tantiash badedi: —Abimbo chiech —quetsiash tantienquio yec. ¹²Aden ambi chiaidquio tantiatiapimbo icquin aid niac-niaquec icsateuidi bunsho Nuquin Papan cuidquiendac.

Nuquin Papan tantiamiaid

¹³Nuquin Icbon mibi tantiaquiech. Ëndenquimboshë matses uabi Nuquin Papa nuqui caic: —Ëbi yacno tabadmenuen Esus tantiamequin aido bëdambo icmendambi —quepampic. Adshumbic aidën chiacpadomboen aton Mayanën namiac Nuquin Papan chiaidquio tantiash Esus tantiec mibi bëdamboec tabadcuenondac. —Adquibidi iccosh —qesho tantiashun Nuquin Papa chianembi naden. —Aden aido bëdamboen namequid yec mibi bëdamboshë iquec, Papa —quequin chianembi mibi tantiaquin. ¹⁴Nuquin Papan chiaidquio ëmbi chuibanac mimbi Esus tantiabenondac. Abi yacnoshon Nuquin Icho Esuquidistupadquio bëdamboshë icmenuen aden Nuquin Papan mibi Esus tantiamiac. ¹⁵Ëbi adsho tantiashun ëmbi chiondaccpadomboen chieshtoenquio icquin Esus tantiata. Ëmbi mibi bëisquin chiondaidbëdta ëmbi dada uaquin abimbo chiondaid bëpiscudenda.

¹⁶Nuquin Icho Esuquidistubëdтан Nuquin Papan nuqui tantiaquin bëdamboen isec. Adembidi: —Nuquin

Papa yacno Esusbëd iquendabi —quequin tantiamequin dayacquio yacnimboecnu nuqui icmec. ¹⁷Adquid icsho chianembi naden. —Tesadonica yacnocquido chieshtomenquio icquin Esus tantiamequin bëdamboec tabadquid icme, Papa. Adembidi bëdamboec chuinanquid icmequin nashunanquid icme, Papa —quequin Nuquin Papa chianembi mibi tantiaquin.

Nuquin Papa ëbi chianeta, quiaid

3 ¹Tantia, con utsibo. Mibi chuinu. Nuquin Papa ëbi chianeta. —Nidaid utsi-utsiec yacno nidmeshun Pabado chedo matses dadpenquio Esusën naid bëdamboen chuibame, Papa. Mimbi bëdamboen chuimiac ëmbi Esus tantibenondaccpadomboen utsibon dadpenshun Esus tantiabentsiash, Papa. ²Aden Esus chuibansho isun Esus tantiesabo chieshëmënuquidon: “Pabado cueschitono,” casho cuesmenda, Papa —quequin Nuquin Papa ëbi chianeta. ³Nuquin Icho bëdambo iquec. Muesambo icquin ambi chiacpadomboen nuqui bëdamboen dayun uaindac. —Ëbi tantienquio yanushe —qeshun nuqui chieshtomenquio icquin Satanas nuqui yuametiapimbo iquendac. ⁴—Aden Nuquin Icbon bëdambo icmiac ëmbi chiacpadomboen naboedi adembidi Tesadonica yacnocquidon naindac —quequin tantiombi. ⁵Aden mibi tantiaquin naden Nuquin Papa chianembi: —Con Icho Esuquidistun tantiamiacpaden: “Nuquin Papan ëbi tantiaquiech,” quequin Tesadonica yacnocquido tantiameta, Papa. Esusën chieshtoenquio icquin nacpadomboembidi aido chieshtoenquio icquid icmeta, Papa —quequin Nuquin Papa chianembi.

Esus tantiaquido uspuenquio icquid

⁶Tantia, con utsibo. Nuquin Icbo Esuquidistun: —Ëbi chuibeneta —caidquio icquin mibi chuinu. Esus tantiaquido utsi-utsiec ëmbi mibi chiondai niac-niaquec chieshuidequi icsho isash aibëd chieshec tabadenda. ⁷—“Ëbëd iquec Pabado dayacquio iccondacpadquiec chieshenquio yequien tabadtia,” quiosh —quiosh mibi caic. Abimbo mimbi cac. Mibëd yec dayacquio iccondabi. Chieshenquio yec chonoadteniondabi. ⁸Mimbi pete meniac ¿con piucquid mibi menenquiodambi ictionda? Bedquin mambi mibi menianepondac. —Ëbi meniac aton na naimëdnushe —quiash con piucquid bednuec chonoadteniondabi. ⁹—Esus tantiaquidon abi chuibanquid menenquio icquid —¿quectabi ique? Padenquio. Esusën naid chuibanquid ambi chuibanaidon meniaquien bëdambo ictsiash. —Chieshenquio icquin ëmbi nacnensho isun ma adembidi Tesadonica yacnocquidontsen nanu —quiashini chonoadteniondac. ¹⁰Mibëd tabadquin naden chiondambi. —Aton na nacnenenquio yec chieshuidequi icsho pemenquio icquid —quequin chiondambi.

¹¹Mibi caic: —Utsi-utsiec chieshuidequi tabadosh. Utsi icsaiduidquio chiec

tabadosh —quetuidosh. ¹²Uspun tantia. Nuquin Icbo Esuquidistun chiaid mibi chuinu. Chieshuidequi tabadenda. Mitsanabi penuec chonoadta. ¹³Nuquin Papan chiacpadomben naic chieshtoenda. Chieshtoenquio icquin bëdamboen-uidi nata. ¹⁴Nëid dada uaquin ëmbi chiaid niac-niacsho ista. Adec icsasho isash: —“Icsamboen naombi,” quequin ma tantiabenu —quiash abëduidi iquenda. ¹⁵Aid chieshënenquio yequi adta. Mibipadquid Esus tantiaquid icsho naden chui. —Esus tantiaquid adesa ye. Padi. Bëdamboequien tabadtia —quequin chuita.

Pabadon ënquin chiaid

¹⁶Mibi tantiaquin Nuquin Papa chianembi naden. —Bëdambo icmianquidquio icquin Con Icbonquio ma aido dacuëdenquio icquid icmepanuna, Papa. Aidobëd ma Esus tëshëdenquio icpanuna, Papa —quequin Nuquin Papa chianembi. ¹⁷—Ista. Ëmbimbo dada uaid nëid neque —quequin ëmbi nëidtedpactsëc dada uaid isun: —Pabadon chiaidquio nec —quequin mimbi tantiendac. ¹⁸—Nuquin Icbo Esuquidistun bëdamboen isplashun —caimbi mibi. Padi. Aidtedi dada uaombi.

TIMOTEYON ISTE I

Tauamboen chiaid

1 ¹Pabado nebi. Nuquin Papa yacno yuedanquidën Esuquidistun: —Ëbi chuibeneta —caidquio nebi. Aton Mado tantiasho nuqui bédamboen isquidën Nuquin Papan: —Con Mado Esus chuibeneta —caidquio nebi. ²Ëmbi chiondac Esus tantiabenash con mado icbobimboecquid mibi neque. Mimbi iste nëid dada uanu. Mibi tantiec: —Nuquin Papan aton Mado Nuquin Icho Esuquidistubédtan con mado bédamboen isquin bédambo icmepashun —quiobi.

Chiaid utsi chienda, quequin chiaid

³Tantia. Mibi chuinu, mado. Nidaid utsi Masedonia caid yacno nidquin ëmbi chuibidanondacpadquiec Epeso yacno icta. Mibi yacnocquidon: —Nuquin Papan chiaidquio chuinu —queboedombi aidquio chienquio icsho naden chuita. —Nuquin Papan chiaid chuiquimbi chiaid utsibédta nactsusuaquin Nuquin Papan chiaid chienda —cata. ⁴Nadembidi chuibanta. —Tsusedpabon ambembi chiampiduidi chiec tabadenda. Adembidi utsibon: “Nuquin matsesën mado nepampic. Aidën bababic nadec cuëmédpampic. Aidën tsyuecquiduidtsëqui bédambo iquec,” quequin dadpenquio ambembi chuibampac caosh. Aden chiaiduidi tantiec tabadenda —cata. —¿Adenuidi

chuiquinda mimbi Nuquin Papan chiaidquio bédamboen tantiemepe? Adenuidi chuiquin mimbi Esus tantiamenquio iquec. Aden mimbi ambembi chiaid chuisho tantiash: “Mimbi icsamboen chiec. Ëmbimboen bédamboen chiec,” quec mibédi chushcananeque. Nuquin Papan chiaidquien chuitiad —cata. Nuquin Papan chiaid bédamboen chienquio icquido aden chuita. ⁵Adshumbic aidobidi naden chuita. —“Matses ma bédamboec tantiananu,” quequin Nuquin Papan chiaidquio chuita. Adoac bédamboen tantiashun Esus tantiec bédamboec tabadec matses bédamboec tantianantsiash —cata, mado. ⁶Mimbi aden chiacpadomboen nainquio icquidoen Nuquin Papan chiaid bédamboen tantienquio yec abembi onquec. ⁷Adquidon: —Nuquin Papan ambi chiaid Moises dada uamepampid bédamboen tantiembi. Moisesën chiampicpadomboen namenuec aid chuibanquid icte bunebi —queboedombi Nuquin Papan chiaid bédamboen tantienquio icquin icsamboen chiec.

⁸—“Naden nata,” quequin Nuquin Papan chiaid Moisesën dada uapampid icsambo iquec —¿quequindambi chie? Padenquio. Ma aidi bédambo iqueyoc. —Nëid tantiashun ma abi icsaid ënu —qeshun aid abimbo chiac bédambo ictsias. ⁹¿Bédambo icquid chuiquinda

Nuquin Papan Moises dada uamepampic? Padenquo. Icsambo icquido chuiquimbien adopampic nadquido chuiquin. Nëidic Nuquin Papan chiaid niac-niacquido. Nëidic aton chuiquidën chiaid niac-niacquido. Nëidic Nuquin Papa tantiesabo. Nëidic Nuquin Papa mamëshunquido. Nëidic anibi cuesunequido. Nëidic amëbi cuesunequido. Nëidic cuesunianquido. ¹⁰Nëidic aton chidopenquo chudquido. Nëidic aton bënëpenquo chudmequido chido. Nëidic aton chido bunenquo yec dada daëd chichudnanquido. Nëidic matses utsi bedshun yuaquido. Nëidic muaquido. Nëidic Nuquin Papan chiaid niac-niacquido utsibotedi. Adquid matses icsambo icquido chuiquin Nuquin Papan chiaid Moisesën dada uapampic. ¹¹Adembidi Esus chuibenequidon: —Adquid icsambo iquec —quequin chiec. Bëdamboshë icquin Nuquin Papan aden Esus chuibenequido chuimec. Esus chuibenequidbidi icquin adembidi chiemi.

**Nuquin Icbon Pabado
bëdamboen isbenaid**

¹²Tantia, mado. Mibi chuinu. Nuquin Icho Esuquidistun: —Pabadon ëbi bëdamboen chuibantsiash —quequin tantiashun: —Ëbi chuibenequid icta, Pabado —qeshun ëbi bëdamboen namec. Adoaid icquin: —Ëbi namequid yec mibi bëdamboshë iquec, Icho —quequin Nuquin Icho Esus chianembi. ¹³Ënden adenquo iccondabi. Nuquin Papan Madopenquo danquin Esus icsamboen chuishunondambi. Abi tantiaquido chieshënquin cuesun secate bunondabi. —Aton Mado Esus tantiasho Nuquin Papan ëbi bëdamboen istsiash —quenquo icquin adopondambi. Adshobini: —Pabadon abimbo tantiabi

iquec —qeshun Nuquin Icbon cuidenquo icpanëdash. ¹⁴Adec icsambo icquid icsho Nuquin Icbon tantiamiac: —Abi tantiasho ëbi bëdamboen isbentsiash —quequin Esusquo tantiabonondambi. Esus tantiaquin matsesten tantiaquiemi.

¹⁵Tantia, mado. Naden chiaid bëdambo iqueque. —Icsambo icboedën abi tantiasho cuidmenquo icnuec Esus matsesac caondash —quequin chiaid bëdambo iquec. Ëbibil icsamboshë icpondabi. Utsibon Nuquin Papan chiaid bëdiactsëc niac-niacnubi ëmbimbo comapenen niac-niaccondambi. ¹⁶Adec ëbi yuec icsambo icsho Nuquin Icho Esusën baded cuidenquo icquin abibi tantiamequin bëdamboen isbempondashi. —Pabado bëdamboen isaid chiac utsibo: “Pabado icsambo icboedi Nuquin Papan bëdamboen isbenac. Adembidi Esus tantiasho Nuquin Papan ëbitsen bëdamboen isendac,” quequin ëbi tantiendac. Adquid unësacsho ëbi yacno tabadmendambi —qeshun abi tantiamequin Esusën bëdamboen isbempondashi. ¹⁷Aden tantiaquin nadoembi. —Nuquin Papa ambiuidtsëqui abitedi namequid yec abitedishun Icbombo nec. Unëstiapimbo icquid nec. Isadenquo icquid nec. Adquid abentsëcquiobi icnuc abipadquid utsi nibëdec. Adquid icsho abitedishun: “Mibi bëdamboshë iquec, Papa,” capashun ënenquo icquin —caimbi.

**Matsesën mibi
chiondacadombota, quiaid**

¹⁸Mibi con mado icbobimboecquid neque. Ëmbi chiacpadomboen Nuquin Papan chiaidquo chuibanta, mado. Ënden mibi Esus chuibanquid yanabi icnuc Nuquin Papan oncamiac

nuquibédtan Esus tantiaquidën mimbi chuibante chuipondash. —Esus bédamboen chuibanquin Timoteyon Esus tantiaquido bédamboen namendac —quequin mimbi chuibante chuipondash. Aidën chiacpadomboen chieshtoenquo icquin Nuquin Papan chiaidquo chuibanta. ¹⁹Aden Nuquin Papan chiaid niaquenquo icquin Esus tantiaquieç bédamboec tabadta. Utsiboen adenquo iquec. Icsamboec tabadquin Nuquin Papan chiaidquo niac-niacquin Esus tantienquo yanosh. ²⁰Adecandedo caidbédtan Imeneyo caidën aden Esus tantienquo yanosh. Aid daédshun Nuquin Papa muauaquin icsamboen chuisho nadopombi. —Adquid Satanasën natiambo icmepashun —qeshun: —Esus tantiaquido cho-choacno choenda —capombi. —“Nuquin Papa muauachitombi. Icsambo icchitebi,” quequin ma tantianu —qeshun adopombi.

Nuquin Papa bédamboen chianete chiaid

2 ¹Tantia. Utsibotedi chuinu. Matses abitedi tantiaquin Nuquin Papa chianenuna. —Matses abitedi min Mado Esusbédta mibi bédamboen tantiamequin bédamboen ista, Papa. Matses nashunquidquo yec mibi bédamboshë iquec, Papa —quequin Nuquin Papa chianenuna. ²Adembidi Nuquin Papa chuiquin: —Chuiquid dapambo pedesidente caidtedibédta chuiquid dapa utsibotedi bédamboen tantiameta, Papa. Adoac aidon bédamboen namiac cuesun secananenquo yec matses abitedi bédamboec tabadtsiash. Adnubi abi chieshënquido nibédnuc Esus tantiaquido abi tantiec bédambo ictsiash, Papa —quequin Nuquin Papa chianenuna. ³—Con matses Esus tantiameta, Papa —quequin nuqui aden

chianesho tantiasch: —Bédamboen chieç. Èbi bunaidquo chieç —quendac Nuquin Papa nuqui cuidenquo icquin abéd tabadmequid. ⁴Matses abitedimbo cuidenquo icnuen matses bédamboen iste bunquid yec: —Ma èmbi chiaid tantiaschun abided cuidadec unësaid ma tantiapanu —quec Nuquin Papa. ⁵Nuquin Papan chiaidquo tantiaschun nuqui naden tantiec. —Nuquin Papa matses uaquid abentsëqui icnuc abipadquid utsi nibédquieç. Abéd icboedi matsesun: “Nuquin Papapadquid icquin aid tantiamequid nebi,” quequin aton Madon matses chuipanédash. Adeçbidi aton Papa matses bédamboen ismequid yampanédash Esus. Aid abentsëqui Nuquin Papa bédamboen ismequid nec. ⁶Abi tantiaquid cuidmenquo icnuec abided cuidadec unëspac caondash —quequin chiaidquo nuqui tantiec. Nèbien Nuquin Papan tantiacpadomboen matsesën aden chiaidquo chuiben-chuibenec. ⁷Adomboembidi Esus chuibenequidquo nebi. —Matses utsibo isadaidpembo èbi chuibeneta —Esusën caondaid nebi. Adoaid icquin: —Ma Esus tantianu —quequin Nuquin Papan chiaidquo chuibenec nebi. Abimbo caimbi. Adquid nebi.

Esus tantiec cuédënacnoshon nate chiaid

⁸Tantia. Dadatedi chuinu. Cuédënacno puduedshun Nuquin Papa chuinuec bédamboequien tabadiad. Nëish bédanash chieshënanenquo icquimbien Nuquin Papa chuitiad. ⁹Chidobotsen chuinu. Esus tantiec Esus tantiaquido cuédënacno nidnuec: —Mabi isnu —quequin tantienquo yec bédamboec dasiuidta. Bédamboec tabadquid dasiuidacimboec dasiuidta. Chido chishpidabimboec dasiuidenda. —Mabi isnu —quenquo yec Esusquo

tantianuec Esus tantiaquido cuëdënacno puduedta. ¹⁰—Mabi isnu —quequin tantienquo yec: —Nuquin Papan tantiaquidquo nebi —quec utsibo nashumbanec bëdamboec tabadta.

¹¹Esus tantiaquido cuëdënacnoshon dadan Nuquin Papan chiaid chuibansho tantiaquid chidon. —Aidën chiacpadomboen natiapimbo iquebi —quequin tantienquo yec bëdamboen tantiec otacquo tabadquid chido. ¹²Esus tantiaquido cuëdënacno puduedshun dada chuibanesa chidon. Adembidi dada ancaisa chidon. —Otaquien tabadquid chido —caimbi. ¹³Dada Adan caidba Nuquin Papan matses uapampic. Adshumbic aton chido Eba caidtsen. ¹⁴Aden dadabëdta chido nacnenacsho isumbien Satanasën: —Icsamequin tanu —queshun muauac icsaquin chidomba Nuquin Papan chiaid niacpampic. Adan padabi. Aden tantiaquin: —Dadan chido chuibanquid —caimbi. ¹⁵Adec abia icsasho isun Nuquin Papan cuidac paëmbo icnuc bacuë tishquid chido abitedi nec. Nëbi Esus tantiaquid yanash ambi tishaido bëdamboen namequid nendac. Esusën chiacpadomboen natiadquo icquin matses tantiaquid nendac. Nuquin Papan chiaid niaquenquo icquid nendac. Aton bënëuidtsëqui chudmequid yendac Esus tantiaquid chidon. Adquid Nuquin Papan bëdamboen isquin abëdi tabadmendac.

Esus chuibanquid chiaid

3 ¹Tantia. Utsitsen mibi chuinu. —Esus chuibanquid ictiadquo iquebi —quesho: —Bëdamboen nate mibi bunec —cata. ²—Nuquin Papan chiaid chuibanquid nadquien ictiad —quequin anocquido chuita. —Bëdamboec tabadquid nec —utsibon caidquo Nuquin Papan chiaid chuibanquid nendac. Adquid chido

abentsëc inquid nendac. Abi bunaid ënshun mëmunquidquo nendac. —Bëdamboen tantiaquidquo nec —utsibon caidquo nendac. Isedanquido bëdamboen isquid Nuquin Papan chiaid chuibanquidën. Nuquin Papan chiaid bëdamboen tantimequin chuibanquid nendac. ³Tantiadenuen acte paëmbo icquid aquenquo icquid nendac. Badedquo nëishenquo icquid nendac. Uimanëmënenquo icquid nendac. Chushcananteuidi bunenquo icquid Nuquin Papan chiaid chuibanquid. Piucquid bedteuidi bunenquo icquid nendac. ⁴Aidën chiacpadomboen aton chidon aton bacuëbobëdta naquid. Chieshenquo icquin aton papan chiacpadomboen naquid aton bacuëbon. ⁵¿Ambi chiacpadomboen aton chidobëdta aton bacuëbo bëdamboen namenquo icquinda Esus tantiaquido bëdamboen namepatsiashe? Padenquo ictsiash. ⁶Ënden Esus tantiabenondaid chuiquin: —Ëbi chuibanquid icta. Ëbi bëdamboen chuiquin ëbi bëdamboen nameta —Esus tantiaquidon cac bëdambo ictsiash. Nëbimbo Esus tantiabenquid aden chienda. Chuibanquid icmiac adquidën Nuquin Papan chiaid badedquo niactsiashe. Satanasbimboec: —Ëbiuidtsëqui bëdamboeshë iquebi —quetsiashe. Adquid: —Ëbi chuibanquid icta —cainda. ⁷Ënden Esus tantiabenondaid mibi chuibanquid icmenun Esus tantiesabon: —Bëdambo icquid nec —casha tantiatia. —Icsambo icquid nec —caid chuibanquid icmenda. Adquid chuibanquid icmiac icsasho Esus tantiesabon mamënhuntsiashe. Adquid Satanasën badedi yuatsiashe. —Icsambo icquid nec —caid: —Ëbi chuibanquid icta —cainda.

Esus tantiaquido nashunquid chiaid

⁸Tantia. Esus tantiaquido nashunquidtsen chuinu. —Nuqui

chuiبانquidën chiacpadomboen ëbitedi nashunquid icta —quequin nadquid chuita. Utsibon: —Bëdambo icquid nec —caidquio nendac. Muesambo nendac. Tantiadenuen acte paëmbo icquid aquenquio icquid Esus tantiaquido nashunquidën. Piucquid bunquin ampenquio icquid nendac. ⁹Nuquin Papan chiaid bëdamboen tantiaquinc Esus tantiaquinc caic bëdamboec tabadquid Esus tantiaquido nashunquid. Adquid bëdambo ictsiash. ¹⁰Esus tantiaquido nashunquid icmenuen: —¿Bëdambo icquidida nëid nec? —quequin chuimiac utsibo: —Ai, bëdambo icquid nec —abitedi qesho tantiasun: —Esus tantiaquido nashunquid icta —cac bëdambo ictsiash. ¹¹Adquidën chido: —Bëdambo icquid nec —utsibon caidquio nendac. Utsi icsaiduidi chienquio yec bëdamboec tabadquid adquidën chido. Tantiadenuen acte paëmbo icquid aquenquio icquid aton chidon. Ampenquio yec bëdamboec tabadquid. Adquidquio Esus tantiaquido nashunquidën chido bëdambo ictsiash. ¹²Esus tantiaquido nashunquidën chido abentsëqui inquid. Ambi chiacpadomboen aton chidon naquid. Adembidi aton bacuëbon. ¹³Abi nashunquidën Esus tantiaquido bëdamboen nashunsho isun utsibon bëdamboen isendac. Adoaidën dayacquio icquin abi utsibo nashumbanquin dacuëdenquio icquin Esuquidistu tantiamendac. —Esus tantiaquido nashunquid adquidquio iquendac —quequin ënquin chiombi. ¹⁴Tantia. Utsi mibi chuinu. Mibi yacno nëbi nidtiadquio iquebi. —Nidenquio icmane —qeshun nëid dada uaic nebi. ¹⁵Ëbi mibi yacno badedquio nidabi icnuc: —“Esus tantiaquidon nadoquid,” quequin

Pabadon chiacpadomboen nanuna —cata. ¿Ttsutsi tantiaquido nuqui nepe? Unëstiapimbo icquid Nuquin Papambo nec. Aid tantiaquido yec shubu abentsëquën tabadquidobimboec nuqui iquec. Adquid icquin Nuquin Papan chiaidquio tantiaquin nuqui Esus chuibenec. ¹⁶Ëndenquio abi bëdamboen ismequid ambi tantiamiaibi icnëdaidi nëbi Nuquin Papan tantiamiaid Esus bëdamboshë iquec.

Aid Nuquin Papan

matsesmeapanëdash.

Nuquin Papan Mayanën: “Nuquin Papapadquidquio icsaisambo Esus nec,” quequin tantiamec.

Matsesën unës uaqi uincuenaid yec Nuquin Papan abi yacnoshon uaido mayan bëdabon isaidquio Esus nec.

Abi chuibenequidën nidaid utsi-utsiec yacno nidshun chuibeniactsin-utsinquinien Esus tantiabenc caosh.

Aidquiobi Nuquin Papan abuc nidmeshun abëdi tabadmeoapanëdash.

Utsibon icsamboen chiaid

4 ¹Tantia, mado. Nuquin Papan Mayanën tantiamiaid mibi chuinu. —Esus chote nëbi icnuc abi tantiaquidon utsin-utsinquinien Esus tantienquio yanendac. Satanasën yuabo podobitsi icsabon muaquin pausunac matsesën chuisho tantiasun Esus tantienquio yanendac —quequin Nuquin Papan Mayanën abimbo tantiamioshi. ²Aden muaquidon: —Abimbo caimbi —quequin bëdambo icquid damianquin aden muaquin chiendac. —Nuquin Papan cuidnushe —quequin tantienquio iquendac. ³Adquidon naden chiendac. —Dadan chido bedenda. Chidon dada bedmenda.

Padenquoio yec tabadta —quequin icsamboen chiendac. Adembidi: —Aidquoio petemaid neque. Penda —quequin pete abentse-abentsen chiendac aid pete bēdambo icnubi. ¿Atotsi quequin Nuquin Papan pete uapampic? —Ĕmbi chiaidquoio bēdamboen tantiashun Esus tantiaquidon: “Nuquin Papan pete uaid bēdambo iquec,” quequin ma penu —quequin Nuquin Papan pete uampic. ^{4,5}Aidēn pete uaidtedi bēdamboshē iquec. —Ĕmbi pete uaid bēdambo iqueque. Ma penu —qeshun Nuquin Papan pete icmiaid ma petequid neyoc. —Mimbi pete uaid bēdambo iquec, Papa —qeshun pete isuidenquoio icquin penuna.

**Esus chuibanquid icquin
bēdamboen nata, quiaid**

⁶Esus tantiaquido ĕmbi chuibocpadomboen chuibanquin mimbi bēdamboen natsiac, mado. Bacuēctšēcsho min matsesēn Nuquin Papan chiaidquoio mibi chuibanēdash. Aidēn chiaid tantiaquid icquin Esusēn chiacpadomboen nate bunquin ĕmbi chiacpadomboen mimbi chuibantsiac. ⁷Con tsusedpabon ambembi chiampidbēdta nēbi matsesēn adembidi ambembi chiaid tantienda. Nuquin Papan chiaidquoio niactiapimbo yec bēdambo icte bunquiota. ⁸Aton dada uidēnquoio icmenuec titinquetanequid nuquin matses nec. Esus tantiaquido bēdambo icnuec ¿mitsipadquoio icpec? Nuquin Papa tantiaquiec ambi chiaid niaquenquoio yec bēdamboec tabadquid nec. Adquid unēsash Nuquin Papa yacno nidash bēdamboshē icquid iquendac. ⁹Ĕbi adsho tantiash: —Abimboen caic —queta. ¹⁰Adec: —Abi yacno abēdi tabadendabi —quequin Nuquin Papan

chiacpadomboen ĕnenquoio icquin nanuna. —Esus tantiaquid unēsacsho cuidenquoio icquin unēstiapimbo icquidēn Nuquin Papan abēdi tabadmendac —quec chieshtoenquoio yec bēdamboec tabadnuna.

¹¹Ĕmbi chuiboech chuibanta, mado. —Nuquin Papan chiacpadomboen nanuna —quequin chuibanta. ¹²Mibi nēbi caniaid neque. Bēdamboec tabadta, mado. Ĕnden caniaidēn: —Nēbi caniaid icquin Nuquin Papan chiaid mimbi tantienquoio iquec —canushe. Bēdamboec tabadta. —Esus tantiaquido utsibotsen ma ĕbi yacpadec bēdamboec tabadnu —quiash adta. Bēdamboen chuibanquinc matses tantiaquinc Esus tantiaquinc Nuquin Papan chiaid niaquenquoio icquinc caic bēdamboec tabadta.

¹³Ĕbi ano nidabi icnuc Nuquin Papan chiaid adenuidi chuibanta. —Nuquin Papan chiacpadec bēdamboec tabadnuna —quequin Nuquin Papan chiaid isbanquin matses chuibanta. Aden bēdamboen tantiameta. ¹⁴Ĕnden mibi mamishquin chiondaid ¿ada tantie? Ĕnden Esus tantiaquido icquin tsusio dapabon mibi mamishbededondash. Adshobien Nuquin Papan aido mimbi chuibante chuimepondash. Adoac: —Nuquin Papan chiaid bēdamboen chuibanquid Timoteyo iquendac —quequin chuipondash. Chieshtoenquoio yec adquid icta, mado. ¹⁵Ĕmbi dada uaquin chuiboechtedi isbanshun ĕnenquoio icquin ĕmbi chiacpadomboen bēdamboen nabanta, mado. —Ĕmbi adosho isun ma ĕmbi chuibanaidon: “Nuquin Papan chiaid chuibanquidquoio yanosh,” ma ĕbi canu —qeshun bēdamboen chuibanta, mado. ¹⁶—Nuquin Papan chiaid niacmane —quec mibibi bēdamboec tantiadta, mado. —¿Adabi bēdamboec

tabadpeba? ¿Adambi Nuquin Papan chiaidquio muainquio icquin chuibampoba? —quec mibibi tantiadta. Bédamboec tabadquin Nuquin Papan chiaidquio énenquio icquin chuibanta. Aden Nuquin Papan chiacpadomboen naic aibéd mibi tabadendac. Mimbi chuibanaidobidi adoaindac.

Esus chuibanquidén bédamboen chuite

5¹Nuquin Papan chiaid chuibanquid icquin dada énden caniaid chushcainda, mado. —Esus tantiaquidén nadoquid yendac —quequin bédamboen chui: —Con pabimboecquid nec —quequin. Nébi caniquid: —Con utsibimboecquid nec —quequin adembidi bédamboen chuiban, mado. ²—Con tabimboecquid nec —qeshun macho bédamboen chuiban. Chido machobudabi icquidtedi chibibimboecnuc isquin: —Néid chudtiadquio icchitebi —quenquio icquin Nuquin Papan chiaidquio chuibanta, mado.

Chido niantembo chiaid

³Tantia, mado. Esus tantiaquidon abédtan Esus tantiaquid icsho nianten nashunte chuinu. Nianten aton matses nibédquid: —¿Tsuntsimbini nashumpatsiashba? —quequid Esus tantiaquidon nashunquid. ⁴¿Ada nianten tishaido icpec? Aidëmbi ani nashuntsiash. ¿Ada aton baba icpec? Aidëmbi aton chichi nashuntsiash. Aidëmbidi aton shanuachotsen nashuntsiash. —Ébi nashundened neque. Néid nashunu —qeshun nashuntsiash. Aden ambi chiacpadomboen nasho isash: —Bédamboen naic —quetsiash Nuquin Papa. ⁵Padnuc aton matses nibédquidénquio nianten Nuquin Papa chianequid: —Nuquin Papan ébi

nashuntsiash —qeshun. —Mimbi ébi tantiaquieque. Ébi nashunta, Papa —quequin Nuquin Papa chianequid nianten icsho abédtan Esus tantiaquidon nashunquid. ⁶Nianten utsimbien ambi tantiaiduidi naic. Petebédta acteuidi tantiaquin abi bunaiduidi naic. Adquidén unésacimbimboecquin Nuquin Papa tantienquio iquec. Adquid Esus tantiaquidon nashunenquio icquid. ⁷Émbi aden nianten nashunte chuiboed Esus tantiaquido utsibotsen chuita, mado. —Aton matses nibédquid nianten nashunenquio icsho: “Esus tantiaquido icsambo iquec,” utsibon canushe —qeshun chuita. ⁸Aton shubun icquidotsen Esus tantiaquidon nashunquid. Abéd icquido menenquio yec pemenquio yec quec nashumënenquio icquid icsamboshë iquec. Esus tantiesabo icsambo icnubi: —Esus tantiaquid nebi —queboedi Nuquin Papan chiaid niac-niaquec aton matses nashunenquio icquid icsamboshë iquec.

⁹—Néidtedi chido Esus tantiaquido nashunquidombo iquec —quequin abi cuëmédquid abi cuëmédquidquien mimbi dada uaondac. Nadquid chido: —Esus tantiaquido nashunquid icta —cata. Seta dadpenquio 60ted matamec machobudaidquio. Aton bënëuidtsëqui chudmedenedquio. ¹⁰—Matses nashunquid nec —utsibon caid. Bacuë bédamboen caniuadened machon. Isedanquido bédamboen isquid. Esus tantiaquido nashundenequid. Matses daicsabudacsho nashunquid. Adec bédamboec tabadquid: —Esus tantiaquido nashunquid icta —cata.

^{11,12}Utsi nianten machobudabi icquid: —Adquid icta —cainda. —Esusuidtsëqui tantiaquin abi tantiaquido nashunembi —queboedëmbi dada bunquin ambi chuiboedi niacbidansho isun utsibon:

—Icsambo icquid nec —catsiashe.

¹³Adquid shubu utsin shubu utsinquien isedben-isedbenec uspumbo yanash onqueteuidtsëqui buntsiashe. Utsibo icsaiduidi chuibenecuidquico ictsiash.

¹⁴—Adquid niantè machobudabi icquid dadan bedac bëdambo ictsiash —caimbi. Adoac bacuë tishoatsiashe.

Adshun codocaquinc sicaquinc daëdcaquinc catsiashe. Adec bëdamboec tabdasho: —Icsambo icquid nec —Esus tantiesabon catiapimbo ictsiash.

¹⁵Adquid niantè machobudabi icquidën utsin-utsinquien Esus tantienquico yanshun Satanasën tantiamiacpadomboen nac caosh.

¹⁶Niantebëd icquid utsi ìada Esus tantiaquid chido icpec? Aidëmbi niantè nashunac bëdambo ictsiash. —Ëmbi nëid nashumbanuc niantè utsi aton matses nibëdquidquico Esus tantiaquido utsibon nashuntsiashe —qeshun abëd icquidën nashunac bëdambo ictsiash.

Esus tantiaquido chuibanquid chiaid

¹⁷Tantia, mado. Esus tantiaquidon abi chuibanquid nashuntetsen mibi chuinu. ìAda Esus chuibanquidën bëdamboen naosh? Adquidën Nuquin Papan chiaid bëdamboen tantiamequinc Esus bëdamboen chuibanquinc casho ambi chuibanaidon bëdamboen isquin nashunquid. —Ma penu —qeshun menequid. ¹⁸Adembidi chuiquin Nuquin Papan ambi chiaid dada uamepampic. “ ‘Penushe,’ qeshun adosbitsecquid bitsi secamenuen manemiaid baca bënë utsibon dënëshquid. ‘Adec chonoadquidën ma penu,’ qeshun isadaidbon dënëshesa,” quequin Nuquin Papan dada uamepampic. Nadembidi Nuquin Papan chiaid dada uapampic. “ ‘Naic cho. Mibi bëdamboen cuidquin menenu,’ cac chonoadsho abi chonoa uaquidën menequid,” quequin Nuquin

Papan chuipampic. Adembidi Esus tantiaquidon abi chuibanquid nashunquid.

¹⁹Padnuc Esus chuibanquid caic: —Nuquin Papan chiaid niac-niacsho isombi —quequin matses abentsëcshun chuisho: —Abimboen cachitec —cainda. Daëdshun chuisho: —Abimboen cachitec —cata. Adembidi abentsë chotsecquin chuisho tantia. ²⁰Esus chuibanquidën Nuquin Papan chiaid niacacsho: —Mibi icsaoc. Padi icnuna —cata. Esus tantiaquido dadpenshun tantianubi adota. —Aden chuisho tantiashe dacuëdec: “Ëbitsen adembidi chushcapanundac,” qeshun ma utsibon Nuquin Papan chiaid niaquenquico icnu —qeshun chushcata.

²¹Esuquidistubëdtan Nuquin Papan nuqui isec. Adembidi Nuquin Papan abi yacnoshon uaido mayan bëdabon nuqui isequë. Ëmbi chuibocpadomboen nata. Min matsesën mimbi tantiaidënquibi Nuquin Papan chiaid niacacsho adembidi chushcata. Shubu utsinquidon Nuquin Papan chiaid niacacsho adembidi. —Con matses ëmbi tantiaidquico neque. Chushcainquico iquëmbi —cainda.

²²Nuquin Papan chiaid chuibanquid icmènuen nuqui naondacpadomboen badedquico mamishenda. Ambi naid yuen isquioshon ambi chiaid yuen tantiaquioshon: —Bëdambo icquid nec —quequioshon nata. —Esus chuibanquid icta —mimbi badedquico caboedën Nuquin Papan chiaid badedquico niacsho isash: —Ambi: “Adquid icta,” caidbëd Timoteyo icsamboshë iquëc —utsibo quenushe. —Ëbëdtan chuibanquid icta —badedquico cainda.

²³—Daicsabudteniaccosh. “Pucu paëmbo yan-yanebi,” quiosh —quiosh mibi caic, mado. Acteuidi acashien mibi

niaque. Actequid utsi paëmbo icquid pistsec ac ma pucu bédanuequin.
²⁴Tantia. Mibi padpiden chuinu.
 —Ëbédtan namembi —canuen matsesën naid bédamboen tantiaata. Utsi aton matses ismec icsasho: —Icsambo icquid nec —badedi catsiash aton matsesën. Utsibic ismenquio yec icsasho:
 —Icsambo icquid nec —quequin badedquio tantienquio icquin yuecshun istuidshumbi adotsiash. ²⁵Utsien ismequin bédamboen nasho:
 —Bédambo icquid nec —badedi catsiash aton matsesën. Utsimbic ismenquio icquin bédamboen nabansho:
 —Bédambo icquid nec —quequin badedquio tantienquio icquin yuecshun istuidshun adembidi tantiatsiash. Ëbi adsho tantiashun: —Nuquin Papan chiaid chuibanquid icta —badedquio cainda.

Matses yuaido chiaid

6 ¹Matses yuabo Esus tantiaquido icsho naden chuita. —Min icbo Esus tantiesa icsho bédamboen isquin ambi chiacpadomboen nashunta. “Pabadon chiaid icsambo iquec. Ambi Nuquin Papa caidtsen icsambo iquec,” quequin icsamboen chuinushe. Min icbon chiacpadomboen nata —quequin yuabo chuita. ²Utsibi chuiquin: —Min icbo Esus tantiaquidbidi icsho: “Ëbipadquidi nec. Ambi chiacpadomboen natiapimbo iquebi,” cainda. “Ëbipadquid icsho aid tantiaquin con icbon chiacpadomboen nanu,” quequin min icbo bédamboen nashunta —quequin yuabo chuita. Ëmbi chuiboedtedi Esus tantiaquido chuiban. —Adota —quequin chuibanta, mado.

Piucquid bunquin utsibon ambembi chiaid

³Mimbi: —Nuquin Papan chiaid niaquenquio yec bédamboec tabadnuna

—quequin Nuquin Icbon chiaidquio chuisho: —Aden chuisho tantiatiapimbo iquebi —quequin ambembi chiaid chuiquid icsambo iquec. Adquidën chuisho tantienda, mado. ⁴Aden icsamboen tantiaquidën: —Ëmbi chiaiduidtsëqui bédambo iquec —quequin icsamboen chuibanendac. —Mimbi icsamboen chuinuc ëmbimbo bédamboen chiec —quec chushcanantiaquido iquendac. Abembi onqueteuidi bunendac. Adquid yuec onquesho tantiash: —Utsi onquetiapimbo icnuc abentsëqui onquebudec —quec utsibo nëishendac. Adquidbéd chushcananec muauananec icsamboec tantiashunanendac. ⁵Pabiate shëcuë nibédacimboen Nuquin Papan chiaidquio bédamboen tantienquio yec chushcananendac. Nuquin Papan chiaid chuibanquidën piucquid dadpen bedte danec chuibanquidbidi ictiadquio iquendac.

⁶Nuquien Nuquin Papa tantiaquiec bédamboec tabadec nuquin na dadpen bedte bunenquio yec bédambo ictsiac. ⁷Tishac chucactsëcnuc nuquin na nibédpanëdash. Adembidi unësqin nuquin na nuqui buantiapimbo iquec. ⁸Nuquin pete dashcutebéd icnuc utsi bunenquio yec bédambo nuqui ictsiac. ⁹Piucquid dadpen bedshun dadpen dayun uate bunquido Esus tantiauidtsash badedi chieshtotsiash. Abi bunaiduidquio bednuen mëmunenquio icquin icsamboen nabantsiash. Aden Nuquin Papan chiaid niac-niacquin icsamboen naic quenenash adenuidi naic unësash icsambo icquido cuidacno nidendac. ¹⁰Adec piucquid natiambo bunquido aid bednuec baded-badedquiec icsadenendac. Adquido: —Esus tantiembi —queboedobi padenquio yanash: —Esus tantienquio yanchitombi —quec natiaic tabadendac.

Bëdamboec tabad, quiaid

¹¹Mibi Nuquin Papa tantiaquidquio neque. Piuquid bedteuidi bunenquio yec bëdamboec tabadte bunquiota, mado. Nuquin Papan chiaid niaquenquio yec chieshtoenquio icquin Esus tantiata. Matsesetsen tantiec nëishëmënenquio yec bëdamboec tabadta. ¹²Utsibon chieshënaqui chieshtoenquio icquin Esus tantiaquieci bëdambo icta. Unësash Nuquin Papabëd tabadnuec adta. —Con Mado Esus tantiaquieci unësacsho ëbëdi tabadmendambi —qeshun Nuquin Papan Esus tantiamiac mimbi Esus tantiabempondac. Adshumbic: —Nuquin Papan Mado Esus tantiaquiemi —quequin matses dadpen mimbi tantiamiondaque. Adembidi aid tantiaquieci bëdamboec tabadta. ¹³Abitedi uampidën Nuquin Papan nuqui isequé. —Adquid nebi —quequin ancanquid dapa Ponsio Pidato chieci dacuëdenquio icnëdaidën Nuquin Icho Esuquidistuntsen nuqui isequé. ¹⁴Esus tantiaquin chieshtoenquio icquin aidën naidquio chuibanta. Nuquin Icho Esuquidistu choabi icnuc ëmbi chuiboed niaquenquio yec bëdamboec tabadta. —Esus tantiaquido icsambo iquec —utsibo quetiapimbo icnuc adta. ¹⁵Nuquin Papan tantiacpadënquio aid ushëmbi Esuquidistu nidaidën padpidec choendac. ¿Esus chomequid mitsipadquio icpec? Icsaisambo yec bëdamboshë icquid nec. Aid abentsëcquiobi abitedishun Icbombo nec. Aidëmbi chuiquid utsibo abitedi namendac. Aidquio chuiquid utsin dëniactiapimbo iquendac. ¹⁶Aid abentsëqui unëstiapimbo icquid nec. Bëchamauanquiecscho istiapimbo yec utsibo tabadec. Aidi matsesën

istiapimbo icquid nec. Adquid icsho: —Mibiuidtsëqui abitedishun Icho yec mibi bëdamboshë iquec, Papa —quequin Nuquin Papa chianenuna ënenquio icquin.

Aton na dadpen dayun uaquido chiaid

¹⁷Aton na dadpen dayun uaquido naden chuita, mado. —“Con na dadpenquioshë icnuc ëbiuidtsëqui bëdambo iquebi,” quenda. Nibëdantiapimbo icquid danquin mimbi dayun uaiduidtsëqui tantienda. Nuquin Papambo tantiaquiota. Aidëmbi matses bëdambo icmenuen aton na bedmec —cata. ¹⁸Adquidobidi chuiquin: —Bëdamboec tabadquin utsibo nashumbanquiota. Adembidi cudasenquio icquin mitsana utsibo menianeta. ¹⁹“Mimbi bëdamboen naoque. Èbëdi tabadmequin mibi bëdambo icmendambi,” Nuquin Papa camenuen adota. Adash unësacsho Nuquin Papan abëdi mibi tabadmendac padpidec unëstiapimbo icnuc —quequin aton na dadpen dayun uaquido chuita.

Pabadon ënquin chiaid

²⁰Èmbi chuiboedquibidi adembidi bëdamboen chuibanta, mado. Nuquin Papan chiaid chienquio yec abembi onqesho tantienda. —Bëdamboen tantiaquin abimbo caimbi —quequidobi muasho tantienda. Adquidobëd chushcananenda. ²¹Aden icsamboen chuisho tantiaashun: —Abimbo caic —quequin utsin-utsinquien Esus tantienquio yanondashe. Adquido tantienda. Chieshtoenquio icquin Esusquio chuibanta. —Nuquin Papan con mado bëdamboen isplashun —quequin mibi tantiemi. Padi. Aidtedi chuiquin dada uaombi.

TIMOTEYON ISTE II

Tauamboen Timoteyo chiaid

1 ¹Pabado nebi. Nuquin Papan tantiacpadomboen Esuquidistun: —Ëbi chuibeneta —caidquio nebi. —Ambi chiampicpadomboen aton Mado Esuquidistu tantiaquid unësacsho Nuquin Papan abëdi tabadmendac —quequin Esus chuibenequidquio nebi. ²Con mado icbobimboecquid mibi neque. Mibi chuiquin nëid dada uanu, Timoteyo. —Nuquin Papan aton Mado Nuquin Icbo Esuquidistubëdtan bëdamboen isquin bëdambo icmepashun —quequin mibi tantiemi.

Chieshtoenuio icquin Esus chuiban, quiaid

³Con tsusedpabon nacpadomboen Nuquin Papauidi tantiaquin ambi chiapadomboen natiadquio iquebi. Adquid icquin Nuquin Papa mibi chianemi. —Mibi tantiaquid Timoteyo bëdambo iquec, Papa. Adquio icmec mibi bëdamboshë iquec. Adquiouidi icmeta, Papa —quequin Nuquin Papa chianemi. ⁴—Ëbi nidnu —quesho tantias mibi shubiondaid tantiec mibi iste bunquiebi, mado. Ambo nidash mibi isec cuishonquetsiabi. ⁵Naden mibi tantiemi. —Aton chichi Doida caidën ani Eunisebëdtan aid daëdshumba Esus tantiabenquiacpadomboen Timoteyonsen nëbi Esus tantiaquiec —quequin mibi tantiemi. ⁶Adquid

icsho mimbi tantiondaid padpiden mibi chuinu. —Min Mayan nëidbëd tabadmequin cuesambo icmequin Esus chuibame, Papa —quequin mibi mamishquin Nuquin Papa chiondambi. Adoac aton Mayan mibëd tabadmiac. Adoaid icquin dacuëdenquio icquin Esus chuibanta, mado. ⁷¿Nuquin Papan aton Mayan nuquibëd icmiacta nuqui natia dacuëdpe? Padenquio. Comapenen tantiaquid yec nuquibëd icquin nuqui cuesambo icmec. Adembidi Nuquin Papan Mayanën tantiamiac nuqui matses bëdamboen tantiec. Adembidi nuqui icsate bunaid namenquio icquin mëmunquidquio icnuc nuqui bëdambo icmec.

⁸—Adoaid nebi —qeshun dacuëdenquio icquin Nuquin Icbo Esus chuibanta. Adembidi dacuëdenquio icquin: —Pabado tantiaquiemi —cata. —Quënën nauedtsaid Pabado tantiatiaipi —quenda. Utsibon cuestiadquio icquin chieshënaqui Nuquin Papan namiacpadec chieshtoenuio icquin Esus chuibanuna. ⁹Nuquin Papan: —Bëdamboec tabadquid icmequin con Mado Esus tantiamemi —caido icquin adonona. ¿Nuqui bëdamboecuidi tabadshoda Nuquin Papan nuqui bëdamboen isbempondash? Padenquio. Ëndenquimboshë nidaidbëdta matses uabi Nuquin Papan: —Ëmbi chiaid niac-niaquec icsambo icboedëmbi con Mado Esus tantiasho cuidenquio

iquendambi —quequin ambi
 chuipampicpadomboen nuqui Esus
 tantiamiac. ¹⁰Aden ambi chuipampid
 tantiamiabi icshumbic nëbi Esuquidistu
 matsesmeshun matses tantiamiac.
 Adoac: —Abi tantiaquid unēsacsho
 icsaido cuidacno nidmenquoio icquin
 unēstiapimbo icquid icmequin Nuquin
 Papa yacno abēdi Esuquidistun
 tabadmendac —quequin nuqui tantiec.
¹¹Aden tantiaquin Esus
 chuibenequidquoio nebi. —Ēbi
 chuibeneta —Esusēn caondaid yec
 Nuquin Papabēdta Esus
 tantiaquidquoio nebi. ¹²Aden
 chuibeneshobini chieshēnquin quēnēn
 nauedondash. Adoacqui
 chieshtotiapimbo icquin Esus tantiemi.
 —Ēmbi tantiaidquoio comapenen
 tantiaquin nabanquidquoio Esus nec.
 Adquid icquin: “Ēbi tantienquoio
 yanushe,” qeshun abi tantiaquidquoin
 chieshtomenquoio iquendac. Nidaidēn
 choabi icquin Esusēn ěbi chieshtoenquoio
 icquid icmendac —quec dacuēdenquoio
 iquebi. ¹³Tantia, mado. Mibi chuinu.
 Ēmbi abimbo chiondaidquoio chuiban:
 —Nuquin Papan chiaidquoio nec
 —qeshun. Esuquidistu tantiaquinc
 matses tantiaquinc caquin adenuidi
 chuibanta, mado. ¹⁴Nuquin Papan
 Mayan nuquibēd iqueque. Aidēn namiac
 ěmbi chiondacpadomboen Nuquin
 Papan chiaidquoio chuiquin Esus
 chuibanta, mado.

Onesipodo chiaid

¹⁵Ēmbi: —Cho —cac choenquoio
 icboed mimbi tantiac, mado. Nidaid utsi
 Asia caid yacnoquido dadpen adec
 choenquoio iccosh. Edemoquenes caid
 choenquoio iccosh. Adecbidi Piquedo
 caid chedo. ¹⁶Onesipodo caidēn nëbi
 bēdamboen isposhi. Ēbi quēnēn
 nauedacsho dacuēdenquoio icquin

isuan-isuanquin bēdambo icmioshi.
 Adsho isun: —Aton shubun
 icquidobēdta aid bēdamboen ista, Papa
 —quequin Nuquin Papa chianemi.
¹⁷Aidēmbi nēmbō shubu dadpen icquid
 Doma caid yacno choboshon:
 —¿Mitsimbo Pabado icpec? —quequin
 yuen nibēmbenequin istuidpondashi.
¹⁸Mimbi isnubi Epeso yacnoshon
 aidēmbidi baded-badedquien
 nashundeniondashi. Adsho tantiaquin:
 —Nidaidēn padpidec choshon Nuquin
 Icbon Onesipodo bēdamboen ispashun
 —caimbi.

Chieshtoenquoio icquin chuiban, quiaid

2 ¹Chieshtoenquoio icquin Esus
 chuibanta, mado. —Esuquidistun
 ěbi bēdamboen isec. Aidēn bēdambo
 icmiac dayacquoio icquin naimbi
 —qeshun chieshtoenquoio icquin Esus
 chuibanta. ²Matses dadpeshun
 tantianuc ěmbi chuibansho mimbi
 tantiondac. Ēmbi aden chiondaid
 utsibotsen chuiban. Adshun mimbi
 chuiboedo abentse-abentsen chuita.
 —Nēidēn chieshtoenquoio icquin Esus
 chuibantsiash —qeshun: —Mimbitsen
 chuiban —cata, mado. ³Sondado
 bēdambo icquidēn nacbimboen
 chieshtoenquoio icquin bēdamboen
 nabanuna. Matsesēn chieshēnubi
 Esuquidistun chiacpadomboenuidi
 nanuna chieshtoenquoio icquin.
⁴Sondadon: —Mibi bēdambo iquec
 —camenuen aton chuiquid dapan
 chiacpadomboenuidi naquid. Ambi
 tantiaid nainquoio icquinc utsibon
 chiacpadomboen nainquoio icquinc
 caquin aton chuiquid dapan
 chiacpadomboenuidi naquidquoio
 sondado nec. Adomboembidi Nuquin
 Icbon chiacpadomboenuidi nanuna,
 mado. ⁵Ma nuquin matses
 titinquequidquoio. ¿Mitsipadquoio icpec?

Aton uidën tanec aton matsesën
 chiaction abia titinquec chosho:
 —Bëdamboec titinquiosh —qeshun
 mauete menequid. Ambi chiaction
 titinquiabici icscho mauete menenquio
 icquid. Adembidi: —Mimbi bëdamboen
 naoc —Nuquin Icbon camenuen ambi
 chiacpadomboen chieshtoenquio icquin
 nabanuna, mado. ⁶Ma nuquin matses
 tied uaquidquio. ¿Mitsipadquio icpec?
 Chonoaidquidënquio dayacquio icquin
 aton tied uashun ambi nitsinaid pequid.
 Adembidi Esus chuibanquid icquin
 dayacquio icquin Esus
 chuiban-chuibanuna ënenquio icquin.
 Adoac utsibon Esus tantiabentsiash.
⁷Aden ëmbi chuiboed tantiata. Adsho
 Nuquin Icbon mibi bëdamboen
 tantiametsiash.

Esuquidistu tantiata, quiaid

⁸Utsibon chieshënubi Esus tantiata,
 mado. Aidi matsesash isadaidbo tsusedpa
 Dabidën tsyuecquid nepanëdash. Nuquin
 Papan uincuemënëdaidquio yec abi
 iquec. Aidquio tantiaquiota. Aid
 chuibenequidquio nebi. ⁹Aden chuisho
 chieshënquin bedshun icsambo icquid
 uidën uacbimboen shocosh nacenaidën
 mëtaniac mëyadebi. ¿Ëbi aden uidën
 uacbimboenda Nuquin Papan chiaid
 uidën uapadic? Padenquio. Ëmbi
 chuibenetiapimbo icnuc Nuquin Papan
 chiaid chuibanquido utsibon adembidi
 chuibenendac. ¹⁰Adnubi: —Aden Nuquin
 Papan ambi tantiactedi Esuquidistu
 tantiamendac. Aid tantiaquido unësacsho
 cuidenquio icquin abëdi tabadmendac
 —quec chieshtoenquio iccobi quënën
 nauedonda yequi. ¹¹Naden abimbo
 chiaidquio tantiash chieshtoenquio
 iccobi.

—Abi bunaid ënshun Nuquin Icbon
 chiacpadomboen naquid
 chieshëmënküidën unës uacsho

Nuquin Icbon abi yacno abëdi
 tabadmendac.

¹²Utsibon chieshënaqui
 chieshtoenquio icquin Esus
 tantiec unësash abi yacno
 nidendac. Nidacsho chuiquid
 icmiac utsibo namendac.
 “Esus tantiatiapimbo iquebi,”
 quequidobic: “Ëmbi tantiacmaido
 neque. Nëid nuquibëdi
 tabadmenquien ictiad, Papa,”
 quequin Esusën Nuquin Papa
 chiendac.

¹³Aden abi tantiesabon ambi chiaid
 niac-niacsho isun Nuquin Icbon
 Esusën ambi chiacpadomboen
 naquidquio icquin icsaido
 cuidendac.

Adembidi ambi chiacpadomboen
 abi tantiaquido bëdambo
 icmendac

—quequin chiaid tantiashun ambi
 chiacpadomboen naquin Esusën naid
 chuibanuna chieshtoenquio icquin.

Nuquin Papan chiaid isbanta, quiaid

¹⁴Ëmbi dada uaquin chuiboed mibëd
 icquido naden chuibanta, mado.
 —Nuquin Icbon nuqui isnubi Esusquio
 chienquio yec ambembi chiaid chiec
 mibi chushcananqueique. Adenda. Adec
 chushcanansho tantiash matses icsambo
 yaneque. Padi —cata, mado. ¹⁵—Mibi
 bëdambo iquec —Nuquin Papa
 camenuen bëdamboen nata.
 —Dacuëdtiapimbo iquebique. Ëmbi
 naid ma Nuquin Papan isnu —qeshun
 adota. Ambi chiaid bëdamboen
 isbanshun chieshtoenquio icquin
 Nuquin Papan chiaidquio chuibanta,
 mado. ¹⁶Ambembi chiaid chuiquidobëd
 onquec tabadenda. Adec onquequido
 icsambo icboedi buëdanqueic Nuquin
 Papan chiaid niac-niaquec icsamboshë
 yaneque. ¹⁷Tosho bedacimboc

adquidën chiaid tantiaquido dadpen yaneque. Adquidën chuisho tantienda. Aden chuiquid Imeneyo caid nec. Adquidbidi Pideto caid nec. ¹⁸Aidon Nuquin Papan chiaidquio chienquio icquin muaquin chiec. —Esus tantiaquido unësabi icquido nëbimbobi uincuenacimboec icpec. Unësacsho aton dada chuca uaquin uincuemenquio iquendac —quequin muaquin chuisho tantiashun utsibon Nuquin Icbon chiaid tantienquio yanac. ¹⁹Aidon Esus tantiabien icchitash. Nuquin Papan Esus tantiamiac ënenquio icquin Esus tantiatsempanëdash. Padnuc Esus tantiaquidombo dadpen iquec. Adquido chuiquin ambi dada uamepampicpadomboen: “ ‘Ëbi tantiaquidombo nec,’ quequin Nuquin Icbon tantiec.” Adnuc Esus tantiaquidën: —Con Icbo Esus nec —qeshun ambi icsamboen naid ënendac.

²⁰Esus tantiaquido nadquio iquec. Shubu dapan tsitsan tabëcaid tabadacimboecquid nec. Tsitsan abentse-abentsec icsactsëcquio icnubi utsi-utsiec bëdambo iquec.

Icsactsëcquidën icsa secanun sandoquid yendac. Bëdambo icquidën di nandoquid yendac. Adecbidi Nuquin Papan shubun tabadtequido iquec. Utsi-utsiec Nuquin Papan chiaid natiadquio yec Esus tantiaquidquio icnubi utsi-utsiec abi icsaid ënabi:

—Esus tantianu —quetsëcquid iquec.

²¹Esus tantiaquidquio ictiadquio yec: —Muaid chuisho tantiatipimbo icquin nëbi Nuquin Icbon chiacpadomboen natiadquio iquebi —quiash Nuquin Icbon yuambo yantsiash. Adsho Nuquin Icbon bëdamboen nametsiash.

²²Caniabon mëmunenquio icquin abi bunacpadomboen naquid tanenda, mado. Adenquio yec bëdamboec

tabadte bunquiota. Nuquin Papan chiaid niacte bunenquio yec: —Nuquin Icbo Esus nec —quequidobëdtan chieshtoenquio icquin Esus tantiata. Matsesten tantiec bëdamboec isanec bëdamboec tabadta. ²³Mibi yacnoshon ambembi chuiquidon: —Mimbi icsamboen tantiec —canuen: —¿Mitsipaden mimi tantiape? —cac chienda. Adquidën chuisho tantiash mates chushcananondashe. Aidën chiac chienda. ²⁴Nuquin Papan chiaid chuibanquid chushcananenquio icquid nendac. Chieshëmënenquio icquin aton mates bëdamboen isquid nendac. Adembidi nëishënenquio icquin Nuquin Papan chiaid tantiamequid nendac. Utsibon chieshënaquí chieshënanenquio icquid nendac. ²⁵Esus tantiesabon: —Mimbi Nuquin Papan chiaid chuisho tantiatipimbo iquebi —cac adembi nëishenquio icquin Nuquin Papan chiaidquio chuibanendac. —Nuquin Papan ambi chiaidquio tantiamiac: “Icsamboen naombi,” quequin ma Esus tantiesan tantiabenu —quequin aden chuibanendac. ²⁶—Aden Nuquin Papan ambi chiaidquio tantiamiac Esus tantienquio icboedëmbi Esus tantiabenshun abi yuaquidën Satanasën namiaid ënendac. Aden Nuquin Papan chiacpadomboen naindac —qeshun chieshtoenquio icquin Nuquin Papan chiaidquio chuibanendac abi chuibanquidën.

Icsambo icquido iquendac, quiaid

3 ¹Tantia, mado. Mibi chuinu. Esus padpidec choabi icnuc mates dadpenquioshë icsamboshë iquendac. ²Nadquido iquendac. Nëidic utsi tantiatipimbo yec abiuuidsëqui datantiadquido. Nëidic piucquid bedte comapenec bunquidombo. Nëidic: —Is. Ëmbimbo naiduidi bëdambo iqueque

—quequido. Nēidic utsibo chieshēnec icsamboec onquequido. Nēidic amēn chiaid niac-niacquido. Nēidic anin chiaid niac-niacquido. Nēidic aton na nashunaqui nashumēnenquo icquido. Nēidic Nuquin Papan chiaid niac-niacquidombo. ³Nēidic aton matses tantiesabo. Nēidic chiesh bēdanesabo. Nēidic muauanquido. Nēidic abi icsate bunaid ēnenquo icquido. Nēidic cuesanquido. Nēidic bēdambo icquid chieshēnquido. ⁴Nēidic bēdambo icquid damianquiashic cuesunianquido. Nēidic bēdamboen tantienquo yec badedi icsa uanquido. Nēidic: —Ēbiuidtsēqui bēdambo iquec —quec abibi tantiadquido. Nēidic ambi naiduidi bunquin Nuquin Papa tantiesabo. ⁵Nēidic: —Nuquin Papa tantiaquid nebi —quec muaquin aidēn chiaid niac-niacquido. Adquidtedi icsambo icquido nec. —Adquidbēduidi onquec tabadenda —caimbi.

⁶Adquidon mibi yacnoshon shubu utsin shubu utsinquien isben-isbenac caosh. Adash chidouidquo icnubi shubun puduedshun ambembi chiaid chuibanac caosh. Aden chuisho tantiashun: —Padi —catiadquidi chidon: —Mimbi chiaid tantianu —quequin badedquo tantiac caosh. Nuquin Papan chiaid niacash adecbidi icsate bunquieq tabadac caosh aid chidobo. ⁷Aden icsambo icquidēn ambembi chuidenesho tantianeshun Nuquin Papan chiaidquo tantiatipimbo icpac caosh aid chidobo. ^{8,9}Aid chidobo chiec muaquido icsambo icpampidobimboec iquec. Icsambo icpampid abentsēc Canes cuēmēdnubi utsi Mambades cuēmēdpampic. Isadaidbo tsusedpa Moisesēn Nuquin Papan chiaidquo chuisho tantiashun aidon: —Mue nec. Ēmbimbo comapenen tantiaquin ismenu —queboedombi

bēdiactsēc tantiaquin nacnenuidpampic. Adsho isun: —Abimbo cainquo iccosh. Muachitosh —capampic matsesēn. Adembidi chido chiec muaquidon icsate bunquin ambi chiaid chuitiapimbo icsho Nuquin Papan bēdamboen istiapimbo iquec. Adembidi aidon muaquin chuisho tantiashun matses dadpenshun: —Muequi nec —capendac.

**Nuquin Papan chiaid
isbanec bēdamboec tabadte**

¹⁰Ēbien muaquidpenquo nec. Ēmbi naid ma mimbi tantieyoc. —Ma Esus tantianu —quequin Esusēn naid chuibanec bēdamboec tabadondabi. Esus tantiaquidquo icquin matses tantiaquin Esusēn naid chuibeniondambi. Chieshēnaqui chieshtoenquo icquin adembi chuibeniondambi. ¹¹Ēmbi aden chuibansho isun chieshēnondashi. Shubu dadpen icquid Antioquiya caid yacnoshon ēbi: —Cuesnu —casho Nuquin Icbon nac padenquo icpondash. Adshumbic shubu dadpen icquid utsi Iconio caid yacnoshontsen adembidi. Adshobini shubu dadpen icquid utsi Disteda caid yacnoshonquo bedshun cuēnoten se-sequin unēs uatsempondash. Adsho Nuquin Icbon nac unēsenuquo iccondabi. ¹²Ēbipadquido Esus tantiaquidotedi bēdamboec tabadtiadquo icsho adembidi utsibon comapenen chieshēnendac. ¹³Padnuen chieshēmēnquidobēd bēdambo icquid damianquieq muaquido bēdiactsēc icsambo icboedi muauananquieq buēdanquieq icsamboshē yanendac. ¹⁴Mibi adquidpenquo nec, mado. —Ēmbi isonaidon bēdambo icquidon abimbo chuibanondashi —quec Nuquin Papan chiaid niaquenquo yec bēdamboec tabadta, mado. ¹⁵Ēnden

bacuëmpi icquin Nuquin Papan chiaidquio min matsesën chuibansho mimbi tantianëdac. Adshun: —Aton Mado Esus tantiaquid unësacsho abëdi Nuquin Papan tabadmendac —quequin mimbi tantiabënëdac. Aden Nuquin Papan bédamboen iste tantiametembo Nuquin Papan chiaid nendac. ¹⁶Nuquin Papan chiaid aton Mayanën tantiamiac matsesën dada uapampic. Aidën chiaid abitedimbo bédamboshë iquec. Aid isec onquequin: —Nuquin Papan chiacpadec bédamboec tabadnuna. Esus tantiaquido yec icsainquien ictiad —quequin abi chuibanquidën chuibanec. Adembidi: —Esus tantiaquido adesa. Padi. Bédamboembien natiad —quequin chuibanec. ¹⁷Nuquin Papan: —Ëmbi chiaidquio tantiaquinc Esus tantiaquinc matses nashunquinc caic Esus tantiaquido ma bédamboec tabadnu —quequin ambi chiaidquio dada uamepampic.

**Nuquin Papan chiaid
chuisho tantienquio yaid**

4 ¹Nuquin Papabëdtan Esuquidistun mibi iseqe. Bédamboen nata. Esusën nidaidën padpidec choshon abitedishun Icbombo icquin unësaido uincuemiaido unësabi icquidobëdta chiendac. —Nëid ëbi tantiaquid ëbëdi tabadmemb. Nëid ëbi tantiesa cuidembi —quequin chiendac. ²Aidën chiacpadomboen naquin Nuquin Papan chiaidquio chuibanta, mado. Matsesën tantiatiaquio icnuc adota. Tantiatiapimbo icnubi adembi chuibanta. Esus tantiaquido icsasho isun: —Esus tantiaquido adesambo neque. Bédamboembien natiad —quequin nëishëmënenquio icquin chuita, mado. Utsibo bédamboec tabadsho: —Mibi bédamboec tabadoc. Aduidequi tabadta —quequin

chieshtoenquio icquin chuita. Bëdiactsëc tantiatsëcquido: —Esus tantiaquidon nadoquid —quequin chuibanta, mado. ³—Yuecshun Nuquin Papan chiaidquio matses dadpeshun tantiatiapimbo iquendac —queshun nata, mado. Aden tantiatiapimbo icquidën Nuquin Papan chiaidpenquio chuisho tantiaquid: —Mimbi ëbi bunaidquio chuisho tantianu. Ëbi chiech cho —quequin muaquid utsi-utsien abi yacno puduedmendac. ⁴Pamumëdacbimboecquin Nuquin Papan chiaid tantienquio icquin tsusedpabon ambembi chiampiduidi tantienac. ⁵Aidën nacpadomboen nainda, mado. Nuquin Papan chiaidquio bédamboen tantiaquid yec bédamboec tabadta. Adsho utsibon chieshënaqui chieshtoenquio icquin Esusquio tantiaquid, mado. Adembidi Nuquin Papan bédamboen iste Esus tantiesabo chuibanta. —Esus chuibanquidën nadoquid —caidtedi nabanta, mado. ⁶—Ëbi unës uan ëmbi nacpadomboen: “Adota,” mibi caquid nibëdtsiaish —queshun mibi aden chiech nebi. Nëbi Nuquin Papan tantiacpadën chieshëmënenquidon ëbi unës uaic. ⁷Utsibon chieshënubi ënenquio icquin Esusën naid chuibeniombi. —Ëbi bunaid bednu —quec comapenec titinquiacbimboen dayacquio icquin Nuquin Papan chiaidtedi naombi. Chieshtoenquio icquin Esus tantiaquidquio nebi. Adshobini nëbi unës uaic. ⁸Unës uacshobini matsesën naid abitedimbo tantiaquidën Nuquin Icbon: —Ëbi tantiaquin ëmbi chiacpadomboenuidi naic mibi bédambo iccoque. Nuquin Papa yacno ëbëdi tabadmequin mibi bédamboshë icmendambi —caindac. Abi chote ushën choshon aden Nuquin Icbon ëbi chiendac. Adembidi abi chosho iste

bunquidotedi abi tantiaquido Nuquin
Icbon abëdi tabadmendac.

Timoteyo: Cho, caid

⁹Nëbimbobi ëbi isec cho, mado.
¹⁰Utsibo nidanebon ëbentsëqui
tsadebique. Demas caid aton na
bedteuidi bunec ëbi nianec shubu
dadpen icquid Tesadonica caid yacno
nidosh. Quedesent caidic nidaid utsi
Cadasia caid yacno nidosh. Titobic
nidaid utsi Damasia caid yacno nidosh.
Aidtedi nidanebon ¹¹Ducas abentsëqui
ëbëd iquec. Madcos bedbëtsenec cho,
mado. Ëbëdtan aidëmbi nëshunquio
Esus chuibantsiashe. ¹²Tiquico caid
Epeso yacno mibi yacno nidmiombi.
¹³Shubu dadpen icquid Todoas caid
yacno Cadpo cuëmëdquidën shubun con
na niamëdacondashe. Con dashcute
ëmbi dada uaidbëdta bedbëtsenec cho,
mado. —Abitedi buantiapimbo iquebi
—qeshun nëish yua bitsi nacnenaid
dada uaiduidtsëqui bëta.
¹⁴Shocosh nacnenquidën Adecandedo
caidën comapenen chieshënondashi. Aid
Nuquin Papan cuidendac, mado.
¹⁵Nuquin Papan chiaid ëmbi chuisho
tantiatipimbo icquin icsamboen
chuishunondashibique. Choquin aid
isenda: —Ëbitsen icsamboen
chuishunushe —qeshun. ¹⁶Ënden
tauamboen bedshun: —Quënën
nauednu —cac cuidte chuiquid dapa
ëmbentsëqui chuibampondambi.
—¿Mitsipadosho isun ëbi bedo?
Icsamboen nambo iccombi
—capondambi. —Ëbëd icboedon
dadpenshun: “Bëdambo icquid nec,”
quequin ëmbi naid chuibanac ëbi
quënën nauedquidon ëbi nidmetsiash
—qeshun ëbëd icboedo: —Chiec cho
—caqui choenquio iccondash. Aden ëbi

cacuidondaido tantiaquin: —Nuquin
Papan aido cuidenquio icpashun
—caimbi. ¹⁷Nuquin Icbombini
nianenquio iccondash. —Isadaidpembo
matses utsibo ma ëmbi naid chuibenenu
—quequin cuesambo icmepondashi.
Adondaid icshobini chieshëmënduon:
—Cuesnu —cabededpondash. Nuquin
Icbon nac aid matsesën unës uainquio
icpondashi. ¹⁸Padpiden
chieshëmënduon ëbi caic: —Ma
mëyanac chieshtoshon Esus tantienquio
yanu —casha Nuquin Icbon nac
chieshtoenquio ictsiabi. —Nuquin
Icbombidi abi yacno ambi matses
dadpen namiacno abëdi ëbi
tabadmendac —qeshun: —“Nuquin
Icbo bëdambohë iquec,” canuna
ënenquio icquin —caimbi.

¹⁹Mibi yacnocquido: —Mibi caic:
“Unësquio iquec,” quiosh Pabado
—quequin chuiban, mado. Nëidic
Aquida caid. Nëidic aton chido Pidisida
caid. Nëidic Onesipodo caid chido.
Aidtedi aden chuiban. ²⁰Mimbi
isondaid Edasto caid shubu dadpen
icquid Codinto yacno tëshëdondash ëbi
chonoc. Utsibic Tëdopimo caid aton
dada icsabudacsho shubu dadpen
icquid Mideto caid yacno nianondambi.
²¹Ue tsasi iquenuanquid taënushe.
Baded cho, mado. Doma yacnocquido
nëmbo icquidon: —“Timoteyo unësquio
iquec,” quequin dada ua —caposhi.
Nëidic Eyobudo caid. Nëidic Pudente
caid. Nëidic Dino caid. Nëidic
Quëdaudia caid. Nëidic Esus
tantiaquido nëmbo icquido utsibotedi.
Aidtedi adosh. ²²—Nuquin Icbo Esusën
abëd icquin con mado bëdamboen
ispashun —quequin mibi tantiembi.
Padi. Aidtedi chuiquin dada uaombi,
mado.

TITON ISTE

1 ¹Pabado nebi. Nuquin Papan chiacpaden chuibenequid nebi. Adembidi Esuquidistun, Ēbi chuibeneta, caidbidi nebi. Aden chuibanac Nuquin Papan cuënaido Esuquidistu tantiadonequidquo ma icpanuna. Adquid iquec ma bēdamboec tabadpanuna.

²Muesa Nuquin Papa nec. Adquid icquin, Ēmbi ěnden chiampicpadomboen ěnenquiocquin Esuquidistu tantiaquido ěbēdi tabadendac, quequin ma aidon tantiapanesun adomboen chiaid chuiquidquo Esuquidistun icmiondashi.

³Ambi tantiampicpaděn ambi chuipampid Esuquidistu tantiamenuequin aiděn chuibeneta caid nebi.

⁴Ēmbi chuibanac Esuquidistu tantiaquid mibi yampondac, Tito. Adquid yanshun Esuquidistuběd icquid nebi, quequin ěmbi tantiacpaden mimbi tantiec. Aden tantiaquid con madobimboecquid mibi icsho ismenuequin dada uaimbique. Isec onqueta.

Esuquidistu tantiaquid icsho isash ěbi icsaid cuidenquo yec Nuquin Papa běpiscudac, quequin ma ěnenquiocquin mimbi tantiapana. Adecbidi Nuquin Papaběd tabadendabi, quequin tantiapana, Tito.

Quideta yacno nidshun Titon natequid

⁵Ēmbi nauidboed mimbi naimenu, quequin mibi Quideta yacno nianombi ma mimbi ambi tantiaid icsa chiac ma

Quideta yacnocquidon ěmpanuna. Adembidi, shubu dadpen icquid uano-uanoecquid yacno nidshun ěmbi chiacpadomboen Esuquidistu tantiadonequid istuidshun Esuquidistu tantiaquid utsibo isbanquin bēdamboen tabadmenuequin chuiquid icta, quequin adquidquidquo chuita, Tito. ⁶Mimbi Esuquidistu tantiaquid utsibo isbanquin bēdamboen tabadmequin chuiquid icta caid nadquio ictiad, Tito. Bēdamboec tabadquid ictiad. Adecbidi chido abentsěc inquid ictiad. Aton bacuěbotedi Esuquidistu tantiaquidobidi ictiad. Adquiděn bacuěbo icquin bēdamboec tabadquin aton papan chiaidbědta aton titan chiaid chieshenquiocquin nabantiad. ⁷Aidi utsiběd bēdamboec tabadquin, Nuquibi nanuna, qeshun utsiběd onquenquiocquin ambibi tantiacpadomboenuidi nabanesa ictiad. Adecbidi badedquio něishesa ictiad. Adecbidi paěmbocquid nua aquesa ictiad. Adecbidi cuesnante bunesa ictiad. Adecbidi muaquin bedesa ictiad. ⁸Adecbidi Esuquidistu tantiaquid utsibo yuedquid ictiad. Adecbidi utsiboběd bēdamboec tabadte bunquid ictiad. Adecbidi utsi bēdamboec tabadsho tantiaquid, Cuishon, quec tabadquid ictiad. Adecbidi bēdamboen tantiaquin, Naden naic icsatsiabi, qeshun naisa ictiad. Adecbidi, Naden naic bēdamboecquid yantsiabi, qeshun

adomboen naquidquio ictiad. Adecbidi abimbo chuiquidquio ictiad. Adecbidi, Nuquin Papan icsaisa icmebanaid nebi, quequin tantiec, Icsanu, quenquiocquin Nuquin Papan chiapadomboen nabanquid ictiad. Adquid nec, quequin utsibon chuisho tantiashun adquid Esuquidistu tantiaquid utsibo isbanquin bédamboen tabadmequin chuiquidquio icta, quequin chuita, Tito. ⁹Aden utsibo isbanquin bédamboen tabadmenuquin chuiquid icta, cashun nēid aido chuita. Nuquin Papan chiaid chuca uainquiocquin bédamboen chuiban. Aden mimbi chuisho tantiash ma utsibo bédamboec tabadpanuna. Adembidi Nuquin Papan chiaid chuca uaquidēn chuibansho Nuquin Papan chiapadomboen abimbo chuiban. Aden mimbi chiac, Icsamboen chiombi, quetsiash, quequin mimbi utsibo chuiquid icta caido chuiota, Tito.

¹⁰Quidetabo nad iqueque. Chuinu. Tántia. Abi chuiquidēn chiapaden naisa Quidetabo dadpen iquec. Abimbo chiosh, camenuquin abimbo chiacbimboec aido onquec. Dadpenshun isadaidbon nacpadomboen nanuequin, Shui dēbid dētemeta, quequin Quidetabon chiec. ¹¹Adquidon shubu utsin-utsinquec puduedshun ambi tantiaid icsa chuibanac utsin-utsinquen tantiash cuēshēdec. Adembidi bedte bunquin adquidon muaquin chuibanec. Adquid tantiamenuen Nuquin Papan chiaid bédamboen chuibanquin ambi muaquin chiaid ēmeta, Tito. ¹²Quidetabon matses ēnden icnēdaid abentsēcshun naden aton matses chuipanēdash. “Quidetabo muaic chuinanquidombo nec. Aben icquid yuatemaidbimboec uimanēmēnquido nec. Chonoadenquiocquin nua peshun nua actenequido neoaic,” quequin Quidetabo ēnden icnēdaidēn

chuipanēdash. ¹³Abimbo chuiquidēnquio aden chuipanēdash. Aden chuipanēdash, quequin muaquin chuiquid ambi icsamboen tantiaid tantiamequin comapenen chuiban ma Esuquidistu abimbo tantiaquid adquid yampanueshun. ¹⁴Aden mimbi chuibanac Esuquidistu tantiaquid yanash isadaidbon Nuquin Papan chiaid utsi uain chiampicpaden chuisho tanties ma icpanuna. Aden mimbi chuibanac abimbo chuiquidēn chiacbimboen niacquidon chuisho ma tanties icpanuna. ¹⁵Nuquin Papan Esuquidistu tantiamiaidēn icbon chiaid bédamboen isoaic. Adomboembidi ambi uabanaid isec. Adash abitedi bédambo iquec, quec tsadec. Ambi tantiaid icsambocquid icnuc Esuquidistu tantienquiocquin, Nēid mishtemaid nec. Nēid utsi petemaid nec. Nēid utsi actemaid nec, quequin chuibanquidēn chiaid tantiec. Aden tantiec aton tantiate icsabudec, Icsaobi, quequin tantienquio iquec. ¹⁶Nuquin Papa tantiembi, qeshumbic Nuquin Papan chiapadomboen niacquin tanties nebi, quiacbimboec tabadsho utsibon adquid isec. Nuquin Papan chiaid niacquid adquid nec. Nuquin Papan icsamboen isaidquio adquid neoaic. Naid bēda natiapimbo icquid neoaic, Tito.

Esuquidistu tantiec iccuededquido tantiametequid

2 ¹Icsateuidi bunquid icnubi mimbi Esuquidistu tantiaquido abi tantiadonequidquio icmenuequin chuibanquin tantiamē. ²Mimbi paēmboequid nua aquenquio icteniaccpadomboen Esuquidistu tantiaquid tsusiobo chuibanquin tantiamē. Adembidi, Mibi bédambocquid nec, utsibo camenu, quec bédamboec tabadtenequin tsusiobo

ismequin tantiaméoa. Adembidi, Naden naic icsatsiabi, qeshun mimbi nainquio yacpadomboen mimbi bédamboen tantiaid aido chuibanquin tantiaméoa. Adembidi, Naden naic bédambocquid yantsiabi, qeshun adomboembidi naquid nebi, quequin tsusiobo chuibanquin tantiaméoa. Adembidi mimbia Esuquidistu tantiadoniapadomboen pausunaid icquin ma adquiobidi tsusiobosen yampanueshun tantiaméquin chuibanta. Adembidi, Esuquidistu tantiec utsibobéd tantiananec mibi tabadteniapadomboen chuibanquin tantiamé. Adecbidi, natiatéquid iquendac, quequin Esuquidistu tantesa uainquiocquin abi choate mimbi caimbudacpadomboen chuiquin tantiaméoa, Tito.

³Adembidi, Esuquidistu tantiaquid ènden machoaido tantiamenuequin chuiban. Nuquin Papan bédambocquid icmiaid nebi, quec bédamboec mibi tabadteniapadomboen tantiaméquin chuihoa. Adembidi, utsi icsamboen chuiquid iquenda, quequin chuibanquin tantiaméoa. Adembidi, mimbi paëmbocquid nua aquenquio yacpadomboen chuiquin tantiaméoa. Mimbi bédamboen nabanaid nèbi machocuenaido ismequin tantiamé, quequin ènden machoaido chui, Tito.

⁴Aden chiac ènden machoaidon aton bènè aton bacuëbo chedobéd abi tabadaid tantiamenuequin nèbi machocuenaido bédamboen ismepec.

⁵Adembidi aidèn bédamboen tantiaquin, Naden naic icsatsiabi, qeshun nainquio iquec. Naden naic bédambo ictsiabi, quequin naquid, quequin ènden machoaidon nèbi machocuenaido chuibanquin tantiaméoapec. Adembidi, Mibi inesa chudmenquio yec tabadta, quequin ènden machoaidon nèbi

machocuenaido chuiquin tantiaméoapec. Adembidi, aton shubun tabadquin ambi nabanacpadomboen ismequin aidon nèbi machocuenaido tantiaméoapec. Adembidi, utsibo bédamboen tantiaquin ambi nashunacpadomboen ismequin ènden machoaidon nèbi machocuenaido tantiaméoaic. Adembidi, aton bènèn chiacpadomboen nabanquin nèbi machocuenaido ismequin tantiaméoaic. Aden ènden machoaidon abi ismiacpadomboen nèbi machocuenaidon naic tabadsho isash, Nuquin Papan chiacpadomboen naic tabadec chidobo, quequin utsibon espec.

⁶Adembidi, caniabo chuibanquin tantiamé, Tito. Naden naic icsatsiabi, quequin nainquio iquembi, quequin mimbi bédamboen tantiacpadomboen caniabo tantiaméquin chuihoa. Adembidi, Naden naic bédambo mibi icpec, quequin mimbi bédamboen tantiacpadomboen aido tantiaméquin chuihoa. ⁷Bédamboec tabadaid tantiaméquin ismenu, quec mibibi bédamboec tabadteneta. Mibibi icsainquiocquin ismequin tantiamé. Adembidi mamènenquiocquin bédamboen chuiquin tantiamé. ⁸Adec mibibi bédamboec tabadtenequin ismequin Nuquin Papan chiaid abimbo mimbi chuibanac Esuquidistu tantiesa mibi chieshènquid mibi icsamboen chuitiapimbo yec tabadendac.

⁹Adembidi yuabo chuiquin, Bédambo iquebi, min icbo camenuequin ambi chiaidtedi chieshenquiocquin nabanta, quequin tantiaméta, Tito. ¹⁰Adembidi, min icbon na ampenquiocquin bédamboen dayun uaquin nashunquin min icbo ismeta, quequin yuabo tantiamé. Aden Esuquidistu tanquin nabansho isun min icbo: Con yua Esuquidistu tantiaquid yec bédamboshè

yanac. Con yua bēdambo icmequidēn chiaid tantianu, quendac icbo.

¹¹Nuquin Papan matses abēd icmenuequin matses icsaid bedshuntequid Esuquidistu icmenuequin chomepanēdash. ¹²Aden chomiac nidaidēn tabadquin utsibo tantiaquin Nuquin Papan chiacpadomboen naquin ismiac adomboembidi naic bēdamboec tabadquid. Nuquin Papan bēdamboen tantiamiac bēdamboen tantiaho, Aidēn bēdambo icmiaid icquin naden naic bēdambo icpec, quequin naquid. Adembidi, Naden naic icsatsiabi, quequin nainquio icquin Nuquin Papan tantiamiacpadomboen naic nuqui tabatnenec. Adomboembidi Quidetabo Esuquidistu tantiaquido chuiquin tantieme, Tito. ¹³Nuquin Papapadquid con Icho Esuquidistu choaic, quequin caimbudec bēdamboec tabadebi, quequin chuiquin tantiemeoa. ¹⁴Nuqui cainaid: Ĕmbi con utsibo caid ēbipadquid iquendac, quiash nuqui icsaid bedshunash abided cuidadec unēspanēdash. Adacsho aid tantiaquidquio yec bēdamboec tabadquid nec, quequin chuiquin tantieme, Tito. ¹⁵Ĕmbi chuiboedtedi chuibanquin tantieme. Mimbia tantiaquid icquin, Ĕmbi chiacpadomboen nabanec tabatneneta, quequin Quidetabo chuiuoata. Mimbis chiacpadomboen nainquiocsho isun cuembo chuiuoata. Adecbidi, utsibon mibi icsamboen chuitiapimbocon bēdamboec tabatneneta.

Utsi tantiaquin nabantequid

3 ¹Esuquidistu tantiaquidtedi bēpiscudmenquiocnuequin naden chuibanta, Tito. Min tsusiobon bēdamboen chiaid naquimbi adembidi mibi chuiquid utsibon bēdamboen

chiaid chieshenquiocquin naban.

Adembidi, utsibo tantiaquin nashunta, quequin Quideta yacnocquido chui.

²Adembidi, Utsi muaquin chienda, quequin chuiuoata. Adecbidi, Utsibobēd tantiananec bēdamboec tabad, quequin chuiuoata. Adembidi, Mimbis naiduidi tantienquiocquin nabanta, quequin chuiuoata.

³Ĕnden Esuquidistu tantiesa nuqui iccondac. Adquid icquin Nuquin Papan chiacpadomboen nainquio nuqui iccondac. Adquid icquin nuqui bunacpaden nabanec nuqui icsaded-icsadedondac. Utsibobēd icsamboec nuqui cuidnampondac. Adembidi, utsin bēdamboen isaid icsho isash nuqui nēishpondac. Adecbidi utsibobēd nēishash nuqui chushcanampondac. ⁴Adquid nuqui icnuc matses tantiec abēd icquid icmenuec nuqui icsaid bedshunash abided cuidadec Esuquidistu chopanēdash. ^{5,6}Adec choash cuidadsho isun Nuquin Papan Esuquidistu nuqui tantiamiac. Adoac abi tantiaquid icsho isun adquidtedi Esuquidistun aton Mayan meniac. Adoac, Bēdamboen nasho abi yacno tabadmendac, quenquio yec nuqui tabadec. Aidēnquio nuqui icsate bunaid tantiemequioquin nuqui ĩmec. ⁷Adec aton Mayan nuquibēd icsho isun, Bēdambocquid nec. Aitdedi ēbēdi tabadendac, quequin Nuquin Papan tantiec. ⁸Ĕmbi chuita, quequin chiaidtedi abimbo iquec, Tito. Aden tantiaquin Quideta yacnocquido chuiban Esuquidistu tantiaquid icquin ma adomboen nabanec bēdamboec tabadpanuna. Ĕmbi chiacpadomboen Esuquidistu tantiaquidtedishun nadenec utsibobēd bēdamboec tabadquid nec, quequin chuita.

⁹Adec tabadec min tsusedpabo chiec utsibēd nēishnanash icsamboec onquenda, quequin Quidetabo chuita, Tito. Adembidi,

aton tsusedpabon naden nata quequin
 chuinëdaid chuiquin chushcanu qesho
 adembidi adenda, cata. Aden chiaid
 Nuquin Papa yacno mibi puduedmetemaid
 nec, quequin chuita. ¹⁰Adec onquequin
 Esuquidistu tantiaquido
 cuëshëdmenuequin chuibanquid icsho
 bëdamboen tantiamenuequin chuiban.
 Aden chiaqui niacbidanquin
 adomboembidi aidën chuiasho tantiasun
 aidi comapenen chuibanquin tantiaméoa.
 Aden chiaqui padpiden niacbidanquin
 adomboembidi chuiasho tantiasun
 cacumeta, Tito. ¹¹Adquid ambi icsamboen
 tantiacpadecuidi tabadquid neque. Adota.
 Mimbi chiaqui adecuidi tabadquid Nuquin
 Papa yacno nidtiapimbo yec abibi
 cuidadtequid nendac.

Utsibo chuiquin chiaid

¹²Nëbi utsibo chuinu. Tántia. Adtemas
 Tiquico chedo ëbëdi iquec. Abentsëqui
 Quideta yacno nidmëmbi. Aid mibi yacno

choambien mimbi tantiamedonequin
 chuibanquin naimbudnu quiash Nicopodis
 yacno nidoata, Tito. Ue dapa sequenuc
 Nicopodis yacno tabadnu, quianec
 nidendabi. ¹³Mates icsasho cuidte
 chuiquid, Senas mibi isbidanec Apodosbëd
 udi nidec. Aid daëdi mibi yacno chosho
 yued. Nidnu, qesho aton na nibëdsho
 isun menequin bëdamboen nidme.
¹⁴Peshun acnu, quequin Esuquidistu
 tantiaquidën chonoadquin nabanquid. Utsi
 nashunquin adomboembidi nabanec
 tabadquid. Aden nabanec tabadsho isash
 utsibo Esuquidistu tantiaquidquibidi
 yanendac.

¹⁵Mibi tantiec tabadebi, quequin Tito
 chuita, ëbëd icquidon cacpadomboen
 dada uaimbi. Adembidi mibëd icquido
 Esuquidistu tantiaquido tantiec ëbëd
 icquido tabadoaic.

Esuquidistun, Bëdambo iquebi,
 camiaido ma mibitedi icpanuna. Padi.
 Aidedt chiombi, Tito.

PIDEMONËN ISTE

¹Pabado nebi. Esuquidistun ëbi chuibeneta cac chuibansho quënën nauedaid nebi. Ëbëdi Timoteyo iquec. Aidi Esuquidistu tantiaquid icsho nuqui con utsi caid nec.

Ëbi yuedquid Esuquidistu chuibanquidquio mibi neque. Ëmbi dada uaid isec onqueta, Pidemon.

²Mibëd icquid, Apia, Esuquidistu tantiaquidquio icsho nuqui con chu caid nec. Adquipo mibëd icquidbidi nuqui con utsi caidbidi nec. Sondadon matses icsambocsho cacumiabimboen Esuquidistu tantiaquid icsamenuequid cacumequid Adquipo nec. Aido min shubun Esuquidistu tantiec iccuededquido iqueque. Ëmbi dada uaid bedash isec onquequin aido chuiroata, Pidemon. ³Esuquidistu tantiaquido icsho Nuquin Papan ëbi icsaid cuidenquiocquin ambi bëdambo icmebanaid nebi, quequin mibitedishun ma tantiaapanuna. Adecbidi, Nuquin Papabëd icquido nebi, quequin ambi tantiamiaidquio ma icpanuna.

Nuquin Papa chiec onquiaid

^{4,5}Pidemon Nuquin Icbo tantiaquidquio nec. Adquid icquin Esuquidistu tantiaquid utsibo tantiaquin nashunquid nec, quequin utsibon chuisho tantiaash, Pidemon tantiec bëdambo iquebi, Papa, quequin Nuquin Papa chiec onquebudebi, Pidemon.

⁶Aden mibi tantiaquin Pidemon ambi

tantiaid Esuquidistu chuibanquid icme. Aden aidën chuibansho mimbi Esuquidistu bëdamboen tantiamiac Esuquidistu tantiaquid utsibo ma Pidemonën bëdamboen tantiaapanuna, Papa, quequin Nuquin Papa chiec onquebudebi.

⁷Aden ëmbi Nuquin Papa chuibudacpadomboen mimbi naic. Pidemonën Esuquidistu tantiaquid utsibo tantiaquin nashunec, qesho tantiaash bëdambo iquebi, Pidemon.

Onesimo tantiaquin chuidoniaid

⁸Esuquidistun ëbi chuibeneta caid icquin aid chuibanac abi tantiaquid mibi icpondac, Pidemon. Adquid icquin Esuquidistu tantiaquid utsibo tantiaquin mimbi nashunacpadomboen ëmbi nidmiaidtsen bëdamboen tantiaquin nashunta, quequin mibi chuitiadquio icquimbi padenquio iquemi.

⁹Tantiananquid nuquibi icquin aden chienquio iquemi. Tsusio budobi. Adquid icquin Esuquidistu chuibansho padpiden quënën nauedoshi. ¹⁰Quënën nauedaid icquin ëmbi Esuquidistu chuibanac aid tantiaquidbidi Onesimo yanosh. Adquid yansho ëmbi con mado caid nec. Adquid yanash ¿Onesimo mibi yacno nidacsho ada ëbi bëdamboen tantiaquin mimbi nashunondacpaden aidi bëdamboen tantiaquin nashunoatsia? Pidemon. ¹¹Ënden min yua icquin mimbi chiacpadomboen mibi

nashunenquo iccondaidëmbi nëbi
 Esuquidistu tantiaquid yanshumbini
 nëshunquo bēdamboen nashunec. Mibi
 yacno nidshun adomboembidi
 Onesimon mibi nashunoaindac.

¹²Aidi mibi yacno nidmeoaimbi. Con
 dayunquo icquid nidmenu, quiash aid
 tantiec unēsquo tsadebi, Pidemon.

¹³Esuquidistu chuibancho quēnēn
 nauedshun tataniac caputiapimboesho
 mimbi ëbi nashuntiapimbo iquec. Adec
 mibi nashumētiapimboconbi
 Onesimombini nashunosh, qeshun
 nidmetiapimbocquimbi mibi yacno
 nidmembi. ¹⁴Onesimo ëbēdi
 tabadmenuequin chuita, mibi
 catiapimbo iquebi. Mimbibi aden chiac
 bēdambo ictsiash. ¹⁵Yuecash
 cuēshēdenquo yec Pidemombēd
 Onesimo tabadoaindac, quequin Nuquin
 Papan tantiondacpadquiec mibi
 yacnoēsh cuenēdaid mibi yacno nidash
 Onesimo tabadtsiash. ¹⁶Onesimo min
 yua iccondaid Esuquidistu tantiaquid
 yansho mimbi con utsi caid aidi nendac.
 Èbēd icquin natiapimboesho aidēn
 nashunebi. Mibi yacno nidshun mimbi
 chuisho Esuquidistu tantiaquid icquin
 chieshenquiocquin bēdamboen mibi
 nashunendac.

¹⁷Pabado ëbēd isedanquid nec,
 qeshun mimbi ëbi yuedondacpaden
 Onesimo yuedta, Pidemon. ¹⁸Con na
 utsibēdtabi con na bedtequid Onesimon
 bedaccondash, quequin mimbi
 chiactedi mibi meneoaimbi. ¹⁹Aidtedi
 meneoaimbi, quequin ëmbibi dada
 uaimbique. Isec onquequin

tantiaquiota. Èmbi Esuquidistu
 chuibanac abi tantiaquid yanshun
 Onesimon bedaidtedi daēd uaquin ëbi
 nashunquin cuidtiadquidi mibi nec,
 Pidemon. ²⁰¿Aden ëbi nashunuequinda
 mimbi Onesimo ëbibimboesho
 bēdamboen tantiaquin nashumpatsia?
 Aden mimbi aid nashunuc bēdambo
 ictsiabi. ²¹Èmbi chiactedi daēd uaquin
 mimbi natsiac, quequin tantiec tsadebi,
 Pidemon.

²²Nēidtsen chuinu. Tantia. Èmbi
 tantienquiocnoc Pabado chonoshe
 qeshun abi ushondaid nacnenueshun
 nacnenta, Pidemon. Mibi ëbi tantiec
 Nuquin Papa chiec onquiacpadomboen
 badedquo Nuquin Papan mibēd
 icmepashuni.

Utsibo chuinu quiaid

²³Esuquidistu tantiaquid utsibo ëbēdi
 iquec. Aidon chiaid chuinu. Tantia.
 Epapadas, abembi ëbēd icnuec quēnēn
 nauedadondaidēn: Mibēd icquidotedi
 tantiec tsadebi, quequin Pidemon
 chuita, cac adomboen dada uaimbi,
 Pidemon. ²⁴Madcos yec Adistadico yec
 Demas yec Ducas yec quec ëbēd icquido
 iquec. Aidombidi: Mibēd icquido tantiec
 tabadebi, quequin Pidemon chuita, cac
 dada uaoaimbi. Aidtedishun ëmbi
 Esuquidistu chuibanacpadomboen
 chuibanoaquido nec.

²⁵Nuquin Icho Esuquidistun mibitedi
 bēdamboquid icmebanacpadquiec ma
 tabadoapanuna, Pidemon.

Padi. Aidtedi dada uoambique. Isec
 onqueta.

EBEDEYON ISADAIDBON ISTE

Abi yacnoshon ambi uaidon Icbombo Esuquidistu nendac

1 ¹Ëndenquimboshë Nuquin Papan ëmbi chiacpadomboen chuibanta cac adomboembidi abëd icquido tsusedpabon chuibanoapampic. Abentsëc chuimeshun yuecshun ambi chiaid utsi tsusedpa utsitsen chuimeoapampic. Adoshombic yuecquiocshon ambi chiaid utsitsen tsusedpa utsitsen chuimeoapampic. Adembidi ambi abi yacnoshon uaid mayan bëda budmiac aidën chiacpadomboen tsusedpabon chuioapampic. Adembidi nadatiambocquin uabanquin ismequin chiac adomboembidi chuioapampic. ²Nëbi tsyuecquio Nuquin Papan chiacpadomboen abipadquiocquidëmbi aton Madon chuibanec. Aidi Nuquin Papan ambi uaido con icbo camiaidquio nec. Nidaid abubëdta uashun aidënquiocquidtedi aton Papabëdtan uabanampidquio aton Madombo nec. ³Aidi, aton Papa bëdaidquio yampidpadquidquiobidi aton Mado neoaic. Aton Papa yacpadquiocquin ismequid yec ambi nadomboen natiad, quequin nadatiambocquin ambi tantiacpadquiequi nidaid abubëd aidënquiocquidtedi adquiouidi iquec. Aidi aton Papan chiaid niaquesambo yec matses icsaid bedshunash abided cuidadec unësash, Ëmbi bëdambocquid icmebanaido matses nendac, quequin

tantiashic abuc nidoash Nuquin Papabëd tabadoapanëdash aidquiobi. ⁴Ad icnuc ambi abi yacnoshon uaido abipadquid nibëdec. Aidon con Icbombo caidquio nec. ⁵¿Ambi abi yacnoshon uaid mayan bëda isec:

“Con mado mibi nec.

Ëbi min papa nendac, quepecta

Nuquin Papa iquec? Padenquio.

Adecbidi:

¿Nëidën Papa nebi.

Adecbidi: Con mado nec, quepecta

Nuquin Papa iquec aido caic?

Padenquio.”

⁶Abëd Abiambo Yampidi nidaidën tabadash choasho isun Nuquin Papan ismequin:

“Nëid con Madombo Abentsëqui nec. Aidquio tantiec con Ico nec, quec cuishon quec, ambi naid chiec cuëdën, cac aden ambi abi yacnoshon uaido mayan bëdabo chuibanec cuëdëncuededendac.”

⁷Ambi abi yacnoshon uaido mayan bëdabo naden Nuquin Papan chiec:

“Ëmbi chiacpadequi cunquequid yanec.

Adecbidi, ëmbi chiacpadequi cuëte nëdënquedote iquendac.”

⁸Padnuen ambi uacmaid abipadquid aton Madombo utsi uatiapimbo iquec. Adquidquio icsho Nuquin Papan naden chiec:

“Ënenquiocquin ëbëdtan Chuiquid Abentsëcquio mibi iquendac.

Adecbidi namequid bēdaidquio mibi iquendac.

⁹Ēbipadquid iquec bēdamboec tabadquin nabante bunquidquio mibi nec. Adquid yec icsamboec tabadquin nabante bunesambobidi mibi nec.

Adquid yec ēbi yacpadquidquio Icho Abentsēcquiobi mibi nec. Mibēd icquido adquid nibēdec. Mibi abentsēqui adquidquio iquec. Adquid iquec, Bēdambo iquebi, quec mibi cuishon quendac.”

¹⁰Adembidi Nuquin Papan naden aton Mado chuioaic,

“Tauamboen nidaid abubēdta uashun aidēnquiocquidtedi mimbi uabampampic.

Aidtedishun icbombo mibi nec.

^{11,12}Aidtedi ēnēdendac.

Mibien nibēdantiapimbo yec abi tabadendac.

Aidtedi dashcete shēnibudaid niacbimboen chuca uaindac.

Mibien Abiambo Yampid yec abi ēnēdesa mibi iquendac.

¹³Nēbi cainec ēbēdquio tabadec cho.

Mibi chieshēnquidtedi nibēdquio icmenun nabono. Chiata,”

quequin Nuquin Papan chiampic. ĀAmbi abi yacnoshon uaido mayan bēda aden chuiampidta nepadic? Padenquio. Esuquidistu aden chuiampic. ¹⁴Ambi abi yacnoshon uaido mayan bēdabo Nuquin Papan, Ēbēd tabadtequidombo nashunta, caido nec.

Ambi chiaid tantiesa icchitomane, qeshun tantiadonequiota caid

2 ¹Adec abitedishun Icbombo aton Mado icnuc ambi chiaid chieshēnchitomane qeshun tantiadonequieic tabadnuna.

²Ēndenquimboshē ambi, Naden nata, quequin chiaid ambi abi yacnoshon

uaido mayan bēdabo chuimiapadomboenuidi naisa icsho isun Nuquin Papan cuidpampic. ĀAden ēndenquimboshē ambi chiaid chieshēnquid ambi cuidpampicpaden ³nēbi icquidtsen ambi chiaid chieshēnsho isun cuidenquioda icpadic? Ambi chiaid niacquid ambi cuidtiadquidi icnubi aton Madoded cuidpanēdash. Adoac, Ēbi yacno Yuedanquid nebi, quequin aton Madonquio Esusēmba chiambic adomboembidi abi tantiaquidontsen chuioapondashi. Aden Esusēn chiaid tantiaquidon chuibanubien, ⁴Ēmbi chiaidquio chuibanaopec, quequin ismenuequin aton Mayanēn Nuquin Papabēd icquidēn tantiamebanacpadomboen nadatiambocquin utsi-ut sien bēdamebanquinc, mayan icsa dapuedmequinc, unēsaid uincuemequinc caquin adquidēn-adquidēnquien nabededpanēdash.

Mates icnu quiash Esuquidistu matespanēdash

⁵Adembidi chuinu. Tantiata. Abi yacno Esuquidistu tantiaquido choash tabadsho isun, Nēido ēbi yacnoshon ēmbi uaido mayan bēdabo mibi chuiquid nec, quenquio Nuquin Papa iquendac. ⁶Ēndenquimbo aden tantiaquin dada uaquin naden Nuquin Papa chiec Dabid pado onquepampic: “Tantiaquiono. Ēbi chui, Papa.

ĀAtotsieshun mates mimbi uaid pistsēcquio icsho mimbi comapenen tantiatequid aido icpec? Papa. Adembidi, ĀAtotsieshun Adanēn tsyuecquido mimbi nashumpe? Papa.

⁷Nēbi chuitan mimbi cac mibi yacnoshon uaid mayan bēdan

adomboembidi chuioc matsesën nabanec.

Yuecquiocshon mibipadquid matses mimbi icmendac.

⁸ Adquid icmeshun mimbi uaidtedishun icbombobidi aid mimbi icmendac,”

quequin abimbo chiampid nec. Nēbi abitedishun icbo matses mimbi icmiambo iquec. ⁹Utsien Nuquin Papapadquidquo yequi matsesun Nuquin Papan tantiamiacpaden ambi abi yacnoshon uaido mayan bēdabon chiac nabamboedi nēbi aton Papabēd tsadec abitedishun Icbombo yanac. Aidi Nuquin Papan chiacpadomboen nanuec nidaidēnshun tishac matsesash matses tantiec matses icsaid bedshunash abided cuidadec unēsash abitedishun Icbombo yampanēdash.

¹⁰Nuquin Papa abitedi uaquidquo icnuc ambi tantiacpadec iquec. Adquid icquin ambi, Matses icsaisa icmeshun con bacuē icmēmbi, quequin tantiacpaden ēbi yacno abi tantiaquid yuedquid con Madombo iquendac, quequin ambi chiampicpadquiequi aton Mado matsespanēdash. Aidi matses yec natiacpadquiequi icsaisa yec unēsash uincuenash bēyucanec abi yacno dectatonepanēdash ma Nuquin Papan, Matses con bacuē icmēmbi, quequin tantiaido ēbi tsibanec dectatonepanu quiash. ¹¹Matses bēdambo icmequid Esuquidistun Papa ambi bēdambo icmebantequidon Papabidi nendac. Aton Papa Abentsēqui icnuc Esuquidistu Nuquin Papa yacno choash, Con utsibo nec, quependac ¹²aton Papa chiec:

“Mibi chuiquin con utsibo tantiamenu, Papa.

Aidobēd tabadquimbi mibi chuinu. Tanta, Papa, quependac.”

¹³Adembidi chuioc:

“Mibi tantiaquin mimbi chiampicpadomboen nabanash choaobi, Papa.

Ēbi tsibantequid mimbi bēdaidquio icmaidquio bēc choaobi, quequin mibi chiendambi, Papa,”

quequin matsesabi yec abuc tabadquin Esuquidistun chuipampic.

¹⁴Matses namibēd intacchoquid yec unēstequid icsho mēnchicquid icnu quiash Esuquidistu matsesash unēstequid yampanēdash. Ma matses mayan icsan dacuēdmequin dēcatemēntiapimbo yampanu quiash matsesash unēstequid yampanēdash ¹⁵ma mayan icsan ambi dacuēdmiaido ambi yuaido icboedi matses ēmbi mēnchictequid ma icpanuna. ¹⁶Ēmbi uaido mayan bēdabo unēstequid icsho mēnchicnu, quenquio yec matsesash Esuquidistu unēsapanēdash. Abaduanēn tsyuecquido mēnchicnu, quiash matsesapanēdash. ¹⁷Aden ambi chiacpaden nanuec matsespadquid yampanēdash. Adec matsesash matses nēnacpadquieci nēmpañdash. Abi bundoacpadquieci bundopanēdash. Abi natiacpadquieci natiatequid icpanēdash. Mayan icsan icsamenuequin tanaidbidi icpanēdash. Matses yanash icsaisa yec matses icsaid bedshunash abided cuidadec unēsapanēdash matses Nuquin Papan bēdamboen istequid icmenuec. Adecbidi, Matses icsaisa yanabi yec chuibanec Nuquin Papabēd onquetiapimbo iquec, quec matses chuibanec Nuquin Papabēd aidi onquec. ¹⁸Matsesacsho mayan icsan: Nuquin Papan chiaid niacmenu, quequin tanac niaquesa Esus icpanēdash. Adquid icquin nuquitsen mayan icsan: Nuquin Papan chiaid niacmenu, cac, Chieshnushe ēbi dayacquio icmec cho, cac badedquio choquin chieshesa nuqui icmendac.

**Abi yacno yuedanquidquio icquin Moises
dëniacquid Esuquidistu**

3 ¹Adec matses icsaid bedshunash abided cuidadaid Esuquidistu tantiaquido aton shubun icquido nec. Adquid icquin Nuquin Papan, Ēbi chuibeneta, cashumbic adembidi ambi matses chuibanec ëbëd onquequid dapa icoata caid Esuquidistu nec, quequin aidquio tantiaquionona. ²Nuquin Papan chiacpadomboen chieshenquiocquin naquido Nuquin Papan shubun icquido abi tantiaquido iquendac, quequin Moisesën chuided-chuidedampicpaden Esuquidistun adomboembidi chuibampanëdash. ³Aidi Abiambo Yampid yec, Ēbi tantiaquido con shubun icquido nendac, Esuquidistu quiacpadecc adecbidi adtiapimbo Moises icoapampic. ⁴Nëidted con shubun ëbëdi tabadendac, quequid shubu icbo nec. Aden Nuquin Papan chiacpadomboen aton shubun icquido bëdamboquid icmequid Esuquidistu nec. ⁵Nuquin Papan shubun icquid ambi namiaidquio Moises icquin Nuquin Papan: Matses con shubun icquido icmequid iquendac, quequin min matses chuita, cacpadomboen chuiquid Moises icpampic. ⁶Esuquidistu Nuquin Papan Madombo yampidquio aton Papan shubun icquid icquin aton Papan Moises chuimiampicpaden aton shubun icquido icmepanëdash. Aidën shubun icquid nebi, qeshun chieshenquiocquin cainquidquio aton shubun icquidquio nuqui nendac.

Chieshenda

⁷Aton shubun tabadnuequid naden Nuquin Papan Mayanën ambi chiaid mibi bëdamboen tantiamenuen chieque. Tantiata:

“Nëbimbobi Nuquin Papan chiaid chieshënenquio yec tabadta.

⁸Equipito yacnoësh cuëte nibëdacno capuquin tsusedpabon, ðNuquibëdida Nuquin Papa iqueque? Tantiabono, qeshun ambi chiaid chieshëmpampicpaden chieshënenda.

⁹Cuëte nibëdacno seta 40ted matamec capucuenequin tsusedpabon Nuquin Papan nadatiambocquin naded-nadedsho isquimbi ðAmbi chiaid niacshoda Nuquin Papan ëbi cuidpeba? Isbono, quiacpadquiecc tsusedpabo icsamboec tabadpampic.

¹⁰Adec tabadsho isash nëishpondabi. Ēmbi chiaid chieshënen ambibi tantiacpadequic icsadenepampic.

¹¹Adquid icsho isun chushcain: Ēmbi abitedi uabanquin nainash ëbi tabadacno aidtedi puduedmenquio iquembi, quequin chiacpadomboen naindambi. Abimbo caimbi,” quequin Nuquin Papan isadaidbo chiampid nec.

¹²Abiambo Yampid Nuquin Papa abi iquec, quequin tantiash cuëshëdchitomane qeshun tantiadonequiota. ¹³Nuquin Papan chiacpadquiecc tabadnuna, quec badiadquidën-badiadquidëncquiecc chuinanec onqueta ma adoac icsamianquidën chiac Nuquin Papan chiaid chieshënenquiocpanuna. ¹⁴Esusbëd icquid nebi, quiondacpaden tantiadenequic caimbudec aton matses yec Esus yacno nidanetequidquio mibi nendac. ¹⁵Nuquin Papan chiampid utsitsen chuinu. Tantia:

“Nëbimbobi Nuquin Papan chiaid tantesa uampicpaden tantesa uaina.”

¹⁶ðTsuntsin Nuquin Papan chiaid tantiashun chieshëmpampic? ðEquipito

yacnoshon bëyucanquin Moisesën buanaido Nuquin Papan chiaid tantiash chieshquido yanenquioda icpampic? ¹⁷¿Tsutsibidi seta 40ted matamec chiesho isash Nuquin Papa aidtedbidi seta matamec nëishted-nëishtedpampic? Adoac ¿Cuëte nibëdacnoësh icsaquidtedi unësbudnenquioda icpampic? ¹⁸¿Abitedi uabanquin nainash ëbi tabadacno puduedmenquio iqueubi, quequin tsutsi Nuquin Papan chuiampic? ¿Ambi chiaid chieshënquid Nuquin Papan chienquioda icpampic? ¹⁹Ai, tsusedpabon Nuquin Papan chiaid tantiash, Bëdambo iqueque. Adonona, queboedombi, Nuqui nabocpadomboen nanuna, quequin ambi chiaid chieshënsho Nuquin Papan abi yacno puduedmetiapimbo icpampic.

**Ëbi yacno puduedash ëbëd
tabadtequid quiaid**

4 ¹Ëbi yacno puduedash ëbëd tabadtequid iquendac, quequin Nuquin Papan chiampicpadomboen nëbimbobi chuiouaie. Abi yacno abëdi ictiapimbo icchitomane quequin Esuquidistu tantiadonequionona. ²Ëbi yacno puduedash tabadtequid iquendac, quequin ëndenquimboshë Nuquin Papan nuquin tsusedpabo chiampicpadomboen nëbi nuqui chuiouaic. Aden ëndenquimbo chuisho tantiash, Nuquin Papan chiaid abimbo iquec, quiaish tantienquio yanash, Aid cainu, quetiapiimbo tsusedpabo utsi-utsiec yampampic. ³Ambi chiaid tantiaquidomboen nëbi aibdëdi tabadec.

“Ënden yampidon tantienquiocsho isash, Abitedi uabanquin nainash ëbi tabadacno chotiapiimbo aido iquendac,”

quequin chushcaquin Nuquin Papan aden chuiampic. Tauamboec ambi tantiacpadomboen abitedi uabanquin

nainash Nuquin Papa quenenash tabadpampic. ⁴Abi tabadaid chuiquin Nuquin Papan naden dada uamiampique. Tantia: “Seistedec ushquin abitedi uabanash badiad utsin ënash tabadpobi.” ⁵Ashumbic nadentsen dada uamiampic:

“Ëbi ënash tabadacno ëmbi chiaid chieshënquido chotiapiimbo iquendac,”

quequin chuiampic.

⁶Aden chuimiatic ëndenquimboshë ambi chiaid tantiesa icquin niac-niacquec Nuquin Papabëd tabadtiapiimbo icpampid icnubi ambi chiacpadomboen naquin caimpampidobëd nëbi nidaid utsi-utsiec icquido Nuquin Papabëd tabadtequid nendac. ⁷Ambi tantiacpadën Nuquin Papan chuimiapaden Dabid padon: “Icsachitomane qeshun Nuquin Papan chiaid tantiaquiota,”

quequin dada uapampic. ⁸Chuiquid dapa Dabid tishambocnoc Equipito yacnoësh nidaid Canan yacno abi chuiquid dapa Osuebëd isadaidbo cho-chopampic. Capuec ënëdash nidaid Canan yacno cho-choash isadaidbo ënëdenquio yec tabadte icnuc, Ëbi yacno ënëdenquio yec tabadte iquendac, quequin Canan yacno choash tabadquidon tsyuecquid Dabid pado Nuquin Papan chuimenquio ictsenampic. ⁹Aden Dabid pado chuimiatic tantiash abi tantiadonequidombo Nuquin Papabëd tabadquido nendac. ¹⁰Aden uabanquin nainash Nuquin Papa tabadacpadec ambi bëdambo icmenuequin tantiactedi nabanquin nainash aibdëdi tabadendac. ¹¹Nuquin Papabëd tabadnuequin ambi tantiacpadec icnuen nainu, qeshun Esuquidistu tantiaquionona. Nuquin Papan chiaid tantiesa yanash tsusedpabo puduedenquiocpampicpadec icmane qeshun adonona.

¹²Nuquin Papan chiaid ambia chuiampidquio abi iquec. Nadatiambocquin tantiamete ambi chiaid nec. Shocosh siante abiuc daëdi cuënumbocquidën siaid uquëduc sënquin nami icsaid isendac. Adomboembidi Nuquin Papan chiaid chiac papuduedquin matsesën tantiaidtedi uquëduc sënaid isacimboecnuc abi icsaid tantiamendac. Ambi, Naden nanuna, quequin chiabi yaidtedi abi bunquin ambi chiabi yaidtedibidi matses tantiamequin naden: Mimbi tantiaid icsa nëid icnubi mimbi tantiaid utsi bëdambo iquec. Adecbidi, mibi bunaid icsa nëid icnubi mibi bunaid utsi bëdambo iquec, quequin tantiamebanshun mimbi tantiaid icsa mibi bunaid icsabëdtabi ënta, quequin Nuquin Papan chiaidënquio mibi tantiamendac. ¹³Abitedi isquidquio Nuquin Papa nec. Adquid icquin matses ompodtiapimboecnoc isendac. Adembidi, Ëmbi chiacpadomboenda matsesën nabanoshe. Tantianu, qeshun, abi yacno tabadnuequin cainquido bëisquioquin ambi nabanaidtedi chuimendac.

Matses chuibanec Nuquin Papabëd onquequid dapa Esuquidistu

¹⁴Adec Nuquin Papa abitedi isquidquio icnubi icsambocquid icquin ambembi matsesën aid chuitiapimbocsho isun abi tantiaquido chuibanec Nuquin Papabëd onquequid dapa ënden abi yacno dectatonëdaid Esuquidistu nec. Aidi Nuquin Papan Madombo nec, quequin tantiesa yanchitomane qeshun aidquio tantiaquionona. ¹⁵Matses chuibanec Nuquin Papabëd onquequid dapa matses yequi natiamiacmaidbimboec tsadpondash, quetiapimbo nuqui iquec.

Matsesacsho mayan icsan, Nuquin Papan chiaid niacmenu, cac niaquenquio Esuquidistun icpanëdash. ¹⁶Adquid nuqui chuibanec Nuquin Papabëd onquequid dapa iquec, quequin tantiec dacuëdenquio yec abi yacno ënden Esuquidistubëd puduedquidëmbimboen Nuquin Papa ëmbitsen chuinuna. Icsashun Nuquin Papa chiac, Con mado Esus mibi icsaid bedshunash abided cuidadpanëdash, quequin tantiec mibi icsaid bëpiscudobi, quequin mibi tantiamec. Adembidi mibi natiamiaid abi chuisho Nuquin Papan Mayanën mibi chieshmenquiocquin dayacquo icmendac.

5 ¹Ëndenquimbo Nuquin Papan, Min matses chuibanec ëbëd onquequid dapa icta, caid isadaidbo utsi-utsiec icpampic. Adquid Nuquin Papan icmiac, Con matses icsapash icnui, qeshun nidaidën capuquid yua cuesunedenequin taudidenepampic. Adembidi, Mibi bëdambo iquec, Papa, quequin ismequin, Nëid menenu, cac Nuquin Papan naden nata cain chiacpadomboen naquin aton matsesën bëaido cuesuneshun taudidenepampic. ²Aton matses chuibanec Nuquin Papabëd onquequid dapan aton matses icsasho isun, Con matsesbëdi icsaquid nebi, quequin ³nidaidën capuquid yua utsi-utsien cuesunedenepampic.

⁴Aidi, Con matses chuibanec Nuquin Papabëd onquequid dapa icnu, quenquio icpampic. Nuquin Papambi, Min matses chuibanec ëbëd onquequid dapa icta, caid nepampic. Min matses chuibanec ëbëd onquequid dapa icta, Nuquin Papan abia caid Adon cuëmëdquid icpampic. Aidi unësan abi tsibanquid-abi tsibanquidquien Nuquin Papan, Min matses chuibanec ëbëd onquequid dapa icta, caid icpampic.

⁵Adembidi Nuquin Papan, Matses

chuiбанec ëbëd onquequid dapa icta,
caid Esuquidistu iquec. Ëbibi adquid
icnu, quenquio Esuquidistu icpanëdash.
Aton Papambien:

“Mibi con Madombo neque.

Con shubun icquido mimbi icmiaido
chuiбанec ëbëd onquequid dapa
icta,”

capampic aton Papan Esuquidistu
chuiquin. Adembidi Esuquidistu
chuiquin aton Papanquio:

“Matsesash icsaisa yec min utsibo
icsaid bedshunash cuidadec
unësash uincuenash matses
chuiбанec ëbëd onquequid dapa
icta,”

capampic. ⁶Ambi chiaid utsi nad
icpampic:

“Matses chuiбанec ëbëd onquequid
dapa Medquisedec
yampidpadquid mibi nendac.
Adquid yec ënëdenquioctequidquio
mibi nendac.”

⁷Adec, Con Pan chiampicpadquid
icnu, quiash matsesacsho unës uaquin
mëyante nendabi, quequin tantiec
shubiec nadpanëdash. Matses icsaid
bedshunash cuidadquid ëbi icmenda,
quetiapimbo iquebi, Papa. Matses icsaid
bedshunash cuidadquid iquendabi.
Mimbi chiacpadomboen natiadquio
iquebi, Papa, quequin yuen
chuidonepanëdash Esuquidistun. Aden
abi chuisho aton Papan adquidquio
icmepanëdash. ⁸Nuquin Papan
Madombo iquequi matsesacsho
mëyanac Nuquin Papan
chiacpadomboen tantiabempanëdash.
⁹Aden tantiabenash matses icsaid
bedshunash abided cuidadash Nuquin
Papa yacno Yuedanquid
yanquiopanëdash. ¹⁰Adoacsho isun,
Nëbi matses chuiбанec ëbëd onquequid
dapa Medquisedecpadquid icta, cain
Nuquin Papan Esus chuiпampic.

Nuquin Papan chiaid ënden tantiaboedi tantiesa yanenda

¹¹Ambia matses chuiбанec Nuquin
Papabëd onquequid dapa Medquisedec
nepampic. Aid chuiquin tantiamete
dadpen iquec. Aidtedi
chuitiadquiocquin mibi eme uacsho
ÿmitsipadomboentsimbi chuiбанquin
mibi tantiamete? ¹²Mibia utsin
tantiamiaid icquin ënden
tantiabempatecnëdan mibitedishun.
Adembidi mimbi abia tantiaid utsibo
tantiamepatecnëdan. Bacuën shuma
chishquin tantiacpaden tantiaquid
icquin Nuquin Papan chiaid
tantiatiapimbo mimbi icpec. ¹³Shuma
chishquid bacuëmpi, Bëdamboen nata,
quequin chiaid tantiesa nec. ¹⁴Pete
pequidëmbien, Nadomboen nata,
quequin ismiac adomboembidi isbanec
mëquiadquidën icsa uainquiocquin
nabanec. Adomboembidi Nuquin Papan
chiaid tantiamiac tantiabenquidquio
yanshun adomboen nabandenec.
Adquid yanshun utsin, Naden nata,
caqui, Aden naic Nuquin Papapadquid
yampebi, quequin nabanquid. Utsin,
Naden nata, caqui, Aden naic icsatsiabi,
qeshun nainquio iquendac.

6 ¹Aden Esus chuiquin abia
tantiamiaid bëdamboen tantiashun
abipadquid icnuequin abi chuiquin
tantiamiaid utsi tantiaquionona. Abia
tantiamiaid nad iqueque. Tantia.
Chuinu. Esus tantiaquid icta. Adquid
icquin icsaid ënta. Adembidi, Nuquin
Papan chiaid tantiaquidquio icta.
²Adembidi, Esus tantiaquin acten
mentometa. Adembidi, Nuquin Papan
abi tantiaquid aton Mayan
menenuquin mëdanten mamishaid icta.
Adembidi, Abi tantiaquid unësash
uincuenta iquec, quequin
tantiaquidquio icta. Adembidi, Abi

tantiesa cuidtequid iquendac, quequin tantiec bēdamboec tabadteneta.

³Aidtedi mimbi tantioc. Aidtedi tantiaquioshon, Adembidi ambi tantiamiaid utsitedi tantianuna, quequin tantiaquin nabanta. ⁴Aden Esuquidistu tantiaho isun aton Mayan Nuquin Papan meniaid icboedi ⁵Nuquin Papan chiacpadomboen nadatiambocquin nabamboed, ⁶Esus matsesquio yec icsamboquid nepanēdash, quiash, Esus cuستن dectan, quequidbimboecquid icsho Nuquin Papan aid isendac. Aidēn oncain Esus mamēnshunec. Aden Esus tantienquio yanacsho bēdamboen tantiamenuen chuiquin, Icsaobique. Ēbi icsaid ēnu, cametiapimbo Nuquin Papan iquendac.

⁷Baded-badedquiec ue sequequin nidaid pachi uaidēn tiedēn caniquid caniacsho taneshcaquidēn petequid nendac. Adecbidi Esuquidistu chuiabanac abi tantiaquiosho Icbon yuedaido iquendac. ⁸Echobēd cana shēta chedo ēshē idash dadpen yanushe qeshun nēdēncatequid nendac. Adecbidi icsamboen chiaid tantiaquid uquē nēsiatequid nendac.

⁹Aden mibi chuiquimbi, Nuquin Papan nēsiatemaidd mibi nec, quequin tantiembi. Esuquidistu tantiaquid yec abi tantiaquid utsibobēd tantiananec bēdamboec tabadquin ismequid nec, quequin mibi chuiquin utsibon chioishi.

¹⁰Adoac abi tantiaquid utsibo tantiaquin mimbi nashundeniaid Nuquin Papan bēpiscudenquiocquin tantiec.

¹¹Adecbidi utsibobēd tantiananec mibi bēdamboec tabadpashun. Adecc tabadash abi yacno puduedsho, Bēdamboen mimbi nabanoc, Nuquin Papan mibi caindac. ¹²Aden nabanec chieshenquiocquin Nuquin Papan chiaid tantiaquioquin tsusedpabomba caimbudec unēsash Nuquin Papa yacno

puduedampicpadec Esuquidistu tantiaquioquin ēnenquiocquin caimbudequi ma Nuquin Papa yacno puduedpanuna.

Naden nanu quec Nuquin Papa muatiapimbo iquec

¹³Ēndenquimboshē Abadauan bēdamboec tabadsho isun ambia tantiaquidquio abi yampidquobidi icquin, Ēmbibi tantiacpadomboen nanuna. Abimbo caimbi, quequin Nuquin Papan naden chuiampic: ¹⁴“Mimbi tishmiaidēn tsyuecquido dadpen iquendac, qeshun ēmbi chiacpadomboen nabanquin mibi, Bēdambo iquebi, camembi,” quequin Nuquin Papan Abadauan chuiampic.

¹⁵Aden chuisho tantiahsun caimbudquin tishtiapimbocquidēmbi Abadauanēn chidon aton mado tishpampic.

¹⁶Abimbo caimbi, quequin abitedi tantiaquidēnquio Nuquin Papan chiac utsi, Muenec, quetiapimbo iquendac.

¹⁷Adembidi, Ēbi yacno tabadte iquendac, quequin ēnden yampidēn Nuquin Papan chiaid chuca uatiapimbo iquebi, quequin Esuquidistu tantiaquido tantiamenuen abimbo caimbi, quequin chuiapanēdash. ¹⁸Adec Nuquin Papa muatiapimbo icquin ambi chiacpadomboen naquidquio Nuquin Papa nec. Adembidi, Ēbi yacno tabadte iquec, quequin chiaid chuca uatiapimbo iquec. Adquid Nuquin Papa icnuc abi yacno ēbi puduedmequid Esus iquec, quequin caimbudquid nuqui nendac.

¹⁹Aden caimbudquin, Ēnden Nuquin Papa yacno puduedshun ēbi yuedquid iquec, quequin nuqui tantiec. ²⁰Nuqui caintequid Esuquidistu ēnden Nuquin Papa yacno bēyucanec abi tantiaquido chuiabanec Nuquin Papabēd onquenuec puduedash Medquisedecpadquid yampanēdash.

**Medquisedec matses chuibanec Nuquin
Papabéd onquequid dapa**

7¹Medquisedec nad icpampic, Saden yacnocquido chuiquid dapa nepampic. Ambi Saden cain cuënaidi yuecshun Edusaden cain cuënoapampic. Aidbidi Nuquin Papan, Matses chuibanec ëbéd onquequid dapa icta, caid nepampic. Adquid icquin aton mado bedboedo tsibanshun cuesuniash Abadauan chosho bëquedshun, Nuquin Papan bédamboen isaidquio mibi nec, quequin Medquisedequën Abadauan chuiampic. ²Adsho tantiaash, Nuquin Papan con mado bedmiaid nebi, quequin ambi cuesuneboedën na ambi bedboed musuctanquin abi chuibanec Nuquin Papa chiec onquequid dapa Medquisedec Abadauanën menepampic. Bédamboen tabadmequid icsho Medquisedec cuëmpampic. Adembidi, Saden yacnocquido chuiquid dapa icquin bédamboen tabadmequid icsho Medquisedec cuëmpampic. ³Aidi aton papabéd aton tita nibédquid nec. Nëid ushën tishaid nebi, quetiapimbo aid iquec. Abi unëste ushë adquiobidi iquec. Nuquin Papan Madombo aben icquidpadquid Medquisedec nec. Matses chuibanec Nuquin Papabéd onquequid dapa yanash adquiduidquio iquec. Utsi yantiapimbo iquec.

⁴Aidi ëbi chuibanec Nuquin Papabéd onquequid dapa nec, quequin ismequin ambi bedaid aton na musuctanquin Abadauanën Medquisedec menepampic. ⁵Yuecquioshon Nuquin Papan: Min matses chuibanec ëbéd onquequid dapa icta, caid mibi icquin min utsibon aton na musucaid bedshunta, quequin Debi chuiampic. Adoac adquid Debi icash unësan aton tsyuecquid abentse-abentsec icpampic. Debi Abadauanën tsyuecquid yec aton

utsibonquio aton na musucaid bedquid icpampic. ⁶Medquisedequëmbien tsyuecquidpenquio icquimbi Debin tsusedpa Abadauanën na musucaid bedshun, Nuquin Papan bédamboen isaidquio mibi nec, quequin Abadauan chuiampic. ⁷Bédambo mibi icmenu, quequin Nuquin Papan chiaid ambia chuiquid Medquisedec icpampic. ⁸Yuecshun ambia chuibanec Nuquin Papabéd onquequid dapapadquiocquin aton matsesën na musucaid bedquid Debi unëspampic. Adecbidi aton tsyuecquido unëspampic. Padnuen Abadauanën na musucaid bedquid Medquisedec unësesa yampampic. ⁹Adquid icsho Debin buchisio Abadauan caidën, Con tsyuecquid dadpen iquendac, quequin tantiaquin, Con na musucshun menenu, qeshun Medquisedec menepampic. ¹⁰Aton tsyuecquid tishambocnobi Debin buchisio Abadauan caidën Medquisedec bëquedtuidshun menepampic.

Medquisedec yampidpadquid Esuquidistu

¹¹Abadauanën tsyuecquido Debipadquidon Nuquin Papan nadomboen nata quequin chiaid nadenequin aton matses bédambocquid icmian Medquisedecpadquid choenquio ictsempampic. ¹²Debipadquidon aden nadeneshun aton matses icsaisa icmetiapimbo ican Medquisedecpadquid matses chuibanec Nuquin Papabéd onquequid dapa yampanëdash. Debipadquidën Nuquin Papan nadomboen nata cain ëndenquimbo chiaid nadenepampic. Nëbi Nuquin Papan chiaid utsi naquid Medquisedecpadquid Esuquidistu nec. ¹³Aidpadquid icquin Nuquin Papa nidaidën tabadte shubu uashunaidën puduedshun nambocpanëdash. ¹⁴Aton tita Uda cuëmëdquidën tsyuecquid

icnuc matsesash Udan tsyuecquid Nuquin Icbo Esuquidistu nec. Adquid icquin Debipadquidën nadeniampicpaden natiapimbo Esuquidistu icpanëdash. Adembidi ambi tantiaiduidi chiec Moises, Udan tsyuecquid Debipadquid nec, quenquio icpampic. ¹⁵Medquisedecpadquid matses chuibanec Nuquin Papabëd onquequid dapa Esuquidistu yanan nadomboen nata quequin chiaid utsi iquendac, quequin nuqui tantiec. ¹⁶Aton matses chuibanec Nuquin Papabëd onquequid Debi unësan Debin tsyuecquid aton matses chuibanec Nuquin Papabëd onquequid icpampic. Adquidpenquio Esuquidistu yampanëdash. Matsesash icsaisa yec unëshash uincuempañëdash. Adec uincuenquid yec unëstiapimbo iquec matses chuibanec Nuquin Papabëd onquequid dapa yanquiopanëdash. ¹⁷Aid chuiquin Nuquin Papan nadopampic:

“Ënenquiocquin matses chuibanec Nuquin Papabëd onquequid dapa Medquisedecpadquid mibi nendac,” quequin chuiampic.

¹⁸Aden chiambien matses chuibanec Nuquin Papabëd onquequid dapa Debipadquidon Nuquin Papa nidaidën tabadte shubu uashunaidën puduedshun ënden nadomboen nata cain chiacpadomboen nadenequin aton matses icsaisa icmetiapimbo icpampic. ¹⁹Adoaid Nuquin Papa yacno puduedtemaid matses icpampic. Nëbien bëyucanec puduedash Nuquin Papa yacno abi tantiaquido chuibanec Nuquin Papabëd onquec tabadec, quequin abi yacno yuedte caimbudec nidaidën Nuquin Papabëd tabadac bimboec nuqui tabadec.

²⁰Abimbo caimbi. ¿Matses chuibanec Nuquin Papabëd onquenu quec

puduedquid ënëdenquiocnoc mibi icmendambi, Mado, quenquioda Nuquin Papa icpampic? Ai, aden chuiampic. Aden Debi chienquiocquin aton madouidtsëqui chuiampic. Debi unësan aton tsyuecquid aton matses chuibanec Nuquin Papabëd onquequid dapa icpampic. ²¹Nëbi Nuquin Papan aton Madombo caic:

“Icbo icquin matses chuibanec ëbi chiec puduedoata, mado, quequin abimbo chiembi.

Aden chuiquin chuca uainquio iquembi.

Ëndenquio yampid yec ëbi yacno utsi puduedmenush ëbi chiec puduedash ënëdenquio yec tabadquid mibi nec, quequin abimbo chiembi,”

quequin chiampicpadec aton Madombo adquid yanquiopanëdash. ²²Adquid yec matses icsaid bedshunash abided bëyucanquid Esuquidistu nec. Debibëd aton tsyuecquid adecbidi adquid ictiapimbo iquec.

²³Debi adecbidi aton tsyuecquido unëstequidquio iquec yuen chuibanec Nuquin Papabëd onquequid dapa ictiapimbo iquec. ²⁴Esusien abi yacno chuibanec bëyucanec puduedash ënëdenquio yec Nuquin Papabëd onquequid dapa nendac. Adquid utsi nibëdendac. ²⁵Adec Nuquin Papa yacno ënëdenquio yec tabadquin abi tantiaquido chuibanec aton Papabëd onquedenenec abi tantiaquido Nuquin Papa yacno ambi yuedtequid iquec abipadquid icsaisa yec tabadendac.

²⁶Adec aidi abi yacno yuedanquid, icsa nibëdquid, icsa uatiapimboquid, icsa nibëdquiec yacno tabadquid yec abi tantiaquido chuibanec Nuquin Papabëd onquequid dapa yampanëdash.

²⁷Debipadquidpenquio yec, Matses

icsaquid neque. Nuquin Papan chiampicpaden baded-badedquien nidaidën capuquid yua cuesunenu, quenquio icpanëdash Esuquidistu. Matses icsaid bedshunash abided unëspanëdash padpidec unësenquio icnush. ²⁸Debibëdi abipadquid icsaquid icsho, Min matses chuibanec Nuquin Papabëd onquequid dapa aid icmeta, Nuquin Papan cac Moisesën Debi adquid icmepampic. Nëbi Medquisedecpadquidien Bëdambocquid icpampid ëbëd onquec ëbi yacno Puduedquid Abentsëcquiobi mibi iquendac. Abimbo caimbi, quequin Nuquin Papan chiampidquio Esuquidistu nendac.

Matses chuibanec Nuquin Papabëd onquec abi yacno puduedquid

8 ^{1,2}Adec Esuquidistu abi tantiaquido chuibanec Nuquin Papabëd onquequid dapa Nuquin Papa tabadacnombobi puduedoash aton Papa Abiambo Yampidbëdquio onquec tabadec. Debipadquidoen aton matses chuibanec nidaidënshun Nuquin Papa tabadte shubu uashunaidën puduedash auëshquio Nuquin Papabëd onquepanëdash.

³Con matsesbëdi icsaposh icmanendac, qeshun aid shubun puduednu qeshun umanucshun nidaidën capuquid yua aidon cuesunepampic. Adembidi Nuquin Papa tantiaquin menuequien aton matsesën bë-bëaid bedshun nadenepampic.

Esusen Nuquin Papa yacno puduedoanush, Èbi icsaid ëbibi cuidadnu, quenquio yec matses icsaid bedshunash abided cuidadpanëdash. ⁴Aidi unësabi yec nidaidën tabadnuc Moisesën chiacpadec Debipadquid matses chuibanec Nuquin Papa chiec onquequid icpanëdash. Adquid icnuc nidaidënuësh matses chuibanec Nuquin

Papabëd onquequid dapa ictiapimbo Esuquidistu icpanëdash. ⁵Nidaidën tabadquin Nuquin Papa tabadte shubu uashunaidën puduedshun Debipadquidën nashumpampic. Èndenquimbo Nuquin Papan shubu naden icchitec, quequin abi tabadte shubu uanu, qesho tantiaquid: “Macuësh yacnoshon chuibocpadomboen shubu uame,” Nuquin Papan cac Moisesën chuioapampic. Aden chiac Nuquin Papa tabadte shubu uashumpampic. ⁶Adnubien yuecash Nuquin Papa tabadacnombo aton Madombo abi tantiaquido chuibanec Nuquin Papabëd onquec puduedpanëdash. Aidi abi tantiaquido yuedquid nec. Aid ambo puduedabicnuc ambi naden nata cain chiaid Nuquin Papan Moises meniampicpadomboen naquin aton matses chuibanec Debipadquid Nuquin Papabëd onquec abi yacnombo yuedanquid ictiapimbo icpampic. Esuquidistuen Nuquin Papabëd abia yampid bëyucanec abi yacnombo nidoash abi tantiaquido chuibanec Nuquin Papabëd onquequid yec yuedanquidquio nec.

⁷Èndenquimbo nadomboen nata cain chiacpadomboen nadenequi matses icsaisa yanuc naden nata cain chiaid utsi Nuquin Papan chienquio ictsempañëdash. ⁸Nadomboen nata caqui ambi chiacpadomboen nadenequi matses icsaisa yantiapimbo icsho isash:

“Yuecash ëmbi chiaid utsi iquendac. Aid isadaidbo chiendambi. Aidbidi Udan tsyuecquido chiendambi.

⁹Aidën tsusedpabo Equipito yacnoshon bëyucamequin ëmbi chiacpadpenquiocnoc chiaid utsi iquendac.

Èmbi abia naden nata cain chiaid Isadaidbon chieshënsho

utsibon natiacquin mëyansho isun
isadaidbo
mënichamboccondambi.

¹⁰ Ënden chiaid adquo icnuc:

Nëbi ëbëd tabadmetequad chiaid
nendac, quequin isadaidbo
chiemi.

Ëmbi nadomboen nata cain chiaid
isadaidbo pausunendambi
tantiate bunquionoc.

Aden tantiamiaash aton Papa
iquendabi.

Adecbidi adquidquo con matses
iquendac.

¹¹ Adoaid Nuquin Papa tantiaquid icta,
quesa iquendac.

Abitedi ëbi tantiaquidquo
iquendac.

Nëidtedishun ëbi tantiendac:

Nëidic, bacuëbo; nëidic, caniabo;
nëidic, tsusiobo aitedshun.

¹² Aido icsaidtedi padpiden
tantienquo yec bëpiscudendabi,”

quequin Nuquin Papan chiaid utsi
nendac. ¹³Chiaid utsi nec, quequin
ënden abia nadomboen nata cain chiaid
ënëdendac.

Nuquin Papa tabadte shubu uashunaidën puduedshun naid

9 ¹Nuquin Papan ambi, Ëbi ismequin
nadomboen nata cain chiaid
dadpen dada uameshun isadaidbo
menepampic. Nuquin Papan naden ëbi
tabadte shubu uashun cacpadomboen
abi nidaidën tabadte shubu
uashumpampic. ²Nuquin Papa tabadte
shubu uashunaid nitsinaid anquënë uaid
daëd icpampic. Baded-badedquie
puduedte anquënë uaidën tabote
dectantebëd pan sante cuate nacnenaid
icpampic. Icsaisa anquënë uaid nec caid
niosh. ³Aid nuntambidi
bitsipambocquid daëdcashun
dectanëdaid shëcuë anquënë uaid dayun

uequid Isaisa Bëdaidquo cain
chianiaidquo niosh. ⁴Aid nuntan
bëdambo noadquid sandoshon tauite
shocosh icpampic. Ambobidi cuate
dabitacaid shocosh icpampic. Aid
cuesten sauedaid mana caid isadaidbon
piampid dayun uaid icpampic. Aid
sauedaid utsi Adonën cuate tiaid
dëyucaid icoapampic. Aid sauedaid utsi
cuënote pada uashun Nuquin Papan
nadomboen nata quequin dada uaid
icpampic. ⁵Aid sauedte matincash
tabadquid ambi abi yacnoshon uaid
mayan bëdambocquidbimboecnuc
nacnenaid daëd icpampic. Aid daëd
Nuquin Papa icsaisambo
bëchomauanquieac nac-nacquio
ismiantequid icpampic. Nidaidën
capuquid cuesunaidën intac daseccaid
isun Nuquin Papan matses
cuidenquioctsiash, quequin aidën podon
dëcatequin dectanaid diadpampic. Aid
Icsaisa Bëdaidquo anquënë uaid
sanaidtedi chiombi.

⁶Aden shubu uashun aidën icquidtedi
nambanash icsaisa anquënë uaidën
baded-badedquieac puduedquidon
Nuquin Papan Moises chiacpadomboen
uesquin nabampampic. ⁷Padnuen Isaisa
Bëdaidquo anquënë uaidën
setan-setanquieac matses chuibanec
Nuquin Papabëd onquequid dapa
puduedpampic. Baded-badedquieac
puduedtemaid aid nec. Ëmbi con
matsesbëdtan Nuquin Papan chiaid
niacpash icmanendac, quequin nidaidën
capuquid yua cuesuneshun intac
bedshun buanec nuntan bitsipambocnuc
daëdcashun dectanëdaid shëcuë
anquënë uaid dayun uequid Icsaisa
Bëdaidquo caidën puduedquid
abentsëqui nepanëdash. Unësaidën intac
buanenquo yec puduedtemaid aid
anquënë uaid nec. ⁸Adec aid anquënë
uaidën puduedquid isadaidbo

abentsëqui icnubi Nuquin Papa yacno aton matses puduedte nibëdec, quequin Nuquin Papan Mayanën tantiamete nendac. ⁹Adembidi, baded-badedquien nidaidën capuquid yua cuesunedenec, Ëbibi bëdambocquid nec, quetiapimbo icpampic. Adembidi aton matses icsaisa icmetiapimbo icoapampic. ¹⁰Adecbidi, Nëidic petequid nec. Nëidic actequid nec. Nëid nanush mëpamëdtequid nec, quequin chiacpadomboen nabanquin icsaisa icmetemaidbidi nendac. quequin Nuquin Papan Mayanën nuqui tantiamec.

Esuquidistu abided unësec intac chiuidaid

¹¹Ambi chiaid utsi tantiamenuc ambi uacmaid yec abipadquid Esuquidistu Nuquin Papabëd tabadboedi nidaidën budash matsesash icsaisa yec matses icsaid bedshunash abided cuidadec unësash Nuquin Papa yacno matses chuiabanec aton Papabëd onquequin chuiquid dapa iquec abi yacno Yuedanquid yampanëdash. ¹²Nidaidën capuquid yua cuesuneshun intac bedshun buanec Nuquin Papa yacno puduedenquio Esuquidistu icpanëdash. Aidi abia yampidi icsaisa matses icsaid bedshunash abided cuidadec unësacsho cudan siac aton intac chiuidash Nuquin Papa yacnombo puduedoapanëdash. ¹³Aidi matses icsaid bedshunash abided cuidadabincuc nidaidëshun natemaid nasho matses cuëshëdmepanëdash. Adoac utsibëd ictiapimboesho isun nidaidën capuquid yua cuesuneshun aidën intacbëdta sisapuc daëd uashun daseccac icsaisa icmiabi yequi aton shubun puduedoapanëdash. ¹⁴Abia abëd yampid unësesa aton Mayambëd iquec Esuquidistu icsaisambo yec, Matses icsaid bedshunash ëbided cuidadebi, Papa, quianec unësacsho siac aton intac chiuidacsho isun uincuemaidën nuqui

pauquec ma Nuquin Papan chiacpadomboen nate bunquidquio nuqui icpanueshun. ¹⁵Adoaidi Nuquin Papan chiaid utsi chuiquin tantiamequid Esuquidistu icpanëdash. Ënden matses yampid icsaidbëdtabi nëbi matses icsaid bedshunash abided cuidadec unëspanëdash ëbi tantiaquido ëbëdi tabadmenu quiaish.

¹⁶Adnubien abi unëste tantiec, Ëbi unësan ëmbi chiacpadomboen con na abitedi menebanta, matses quepec. Aden chuiquid unëso isun ambi chiacpadomboen menebanec. ¹⁷Aden chuiquid unësabi icnuc ambi chiacpadomboen utsibon metetiapimbo iquec. Icbon na abi iquec. Aid unësan aidën na icboedi utsin na yanec.

¹⁸Adembidi ambi nadomboen nata cain chiaid Moises menequin, Ëmbi chiaidtedi nadenesho isun ëmbi chiacnombo mibi buanembi, quequin Nuquin Papan chuiapampic. Aden menequin chiac Moisesën nadopampic. ¹⁹Nuquin Papan chuibocpaden chuishun nidaidën capuquid yua cuesuneshun intac bedshun actebëdta daëd uain cacushun cuëte shubi madquënaid podo mësequiabicquid bedshun sedquid piu uaid potaneshun daëd uaboed nënanshun Nuquin Papan chiaid dada uaidbëdta matses daseccabampampic: ²⁰“Nëid Nuquin Papan chuibocpaden mimbi natequidquio nec,” quequin ismequin Moisesëmba abitedi daseccabampampic.

²¹Adoshombic Nuquin Papa tabadte shubu uashunaidbëdta aidën tabëcaidtedi daseccabampampic. ²²Cuesunaidën intac daseccatequid nec. Shubu chedo cuesunaidën intaquën daseccabicquid mishtemaid nec. Adecbidi cuesunaidën intac chiuidenquiocnoc matses icsaid Nuquin Papa bëpiscudenquio iquendac.

²³Nuquin Papa yacnombo puduednush icsaisa unësendac, quequin

ismenuen matses chuibanec Nuquin Papabéd onquec nidaidèn capuquid yua cuesuneshun intac bedshun buanec Nuquin Papa nidaidèn tabadte shubu uashunaidèn puduedpampic.

²⁴Esuquidistu matses icsaid bedshunash abided ciudadec unèsash nidaidènshun Nuquin Papa tabadtebimboecnuc shubu uashunaid yacno puduedenquio icpanédash. Abi tabadacnombo abi tantiaquido chuibanec aton Papabéd onquec puduedash abi tabadec. ²⁵Ambo puduedash, Matses icsaid bedshunash èbided padpidec ciudadnu, quenquio yec tabadec. Nidaidènshun setan-setanquien Nuquin Papa tabadte shubu uashunaidèn puduedquin aton intacpenquio bedshun daseccadenec.

²⁶Matses icsaid bedshunash abided ciudadec unèsambo yec Nuquin Papa yacno puduedoash padpidec nidaid yacno choash unèsash abuc Esuquidistu puduedoatsiandac. Adenquio iquec matsesash abi unèste ushènquiobi matses icsaid bedshunash abided ciudadpanédash nèid nidaid naimèdbudte anoentsèqui icnuc.

²⁷Nidaidèn icquid unèste ushè abentsèc iquec. Unèsacsho ambi naid Nuquin Papan chuitequid ushè choendac.

²⁸Adecbidi matses icsaid bedshunash abided ciudadec Esus unèste ushè abentsèc icpanédash. Matses icsaid bedshunash cuidadoanu, quenquio yec aidquio padpidemboec choendac. Abi cainquido abi yacno puduedmenuec choaindac.

**Abided ciudadec unèste
abentsèquènquiobi**

10 ¹Setan-setanquien nidaidèn capuquid yua cuesuneshun intac bedshun buanec puduedsho isun matses icsaid bedshunash abided unèsash abi tantiaquido chuinuuec bëyucanec Nuquin

Papa yacnoèsh yuedanquidquio choec, quequin nuquin tsusedpabon tantiabempampic. Nidaidèn capuquid yua cuesuneshun intac buanquid aton matses icsaisa icmetiapimbo yec Nuquin Papa yacnombo abèd onquetiapimbo icpanédash. ²Aidènquio daseccaquin matses icsaisa icmiac nidaidèn capuquid yua padpiden cuesunenquio icsempampic. Adecbidi, Icsambocquid nebi, quenquio matses ictsiandac. ³Aton matses isaisa icmetiapimbocquin setan-setanquien nidaidèn capuquid yuaded cuesunepanédash. ⁴Adshun yuan intac bedshun daseccaidèn matses icsaisa icmetiapimbo iquec.

⁵Adoquien Esuquidistu nidaidènshun tishac caniash onquec:

“Nidaidèn capuquid yua cuesunenubi èmbi chiacpadomboen matsesèn natiapimbo iquec queshun yua cuesunete bunenquio mibi iquec, Papa.

Matsesèn tishtequid mimbi icmiaidquio nebi, Papa.

⁶Adecbidi nidaidèn capuquid abichobi tauideniac matses abi icsambo iquec, quiash, Padi. Adoenda, mibi quec, Papa.

⁷Adsho isun mimbi chuiquin dada uamiampicpadomboen naimbi, Papa.”

⁸Mimbi dada uamiampicpadomboen matses chuiquidèn nabanquimbi aton matsesbèd bédamboec tabadenquiocsho isash, Padi. Aid nainquiocquin ènta, quequin mimbi matses chuinuc ⁹mimbi ènden nadomboen nata cain chiaid naimbi, Papa, quiash matses icsaid bedshunash abided ciudadec unèsun Nuquin Papan ènden chiaid èmepanédash. Aden èmian nèbi Nuquin Papan chiaid utsi iquec. ¹⁰Aden Nuquin Papa bunacpadomboen nash

unëstiapimbo yanshun abi unëste
ushënquoio abi tantiaquid paucpanëdash.

¹¹Aden matses icsaid paucpec,
quetiapimbocnoc
badiadquiën-badiadquidënquien
nidaidën capuquid yua cuesuneshun
intac bedshun daseccaquin icbo
icsaidbëdta utsibo icsaid pauctiapimbo
iquendac. ¹²Esuquidistuen abided
unësash abi tantiaquido icsaid
pauctequid abentsëquiobi iquec aton
Papabëdi ënëdtiapimbo yec abitedishun
icbombo iquec. ¹³Ambobi tabadquimbi
abi chieshënquido ambi
chiacpadomboen naquidquoio icmete
ushë cainec. ¹⁴Abided unëste ushënquoio
abi tantiaquid ambi icsaisa icmiaid abëd
cuëshëdesambo yampanëdash.

¹⁵Adembidi Nuquin Papan Mayanën
Nuquin Papan chiaid utsi naden chiec:

¹⁶“Nëbi ëbëd tabadmenun chiaid utsi
nendac, quequin chiendambi.

Aidi aton pabiaten
puduedmendambi
paucudenquiocnoc.

Adembidi ëmbi chiacpadomboen
nate bunquidquoio icmendambi,
quec Ico.”

¹⁷Adshumbic Nuquin Papan chiaid utsi
abi chiec aton Mayan:

“Abi icsaidtedi padpiden tantianu
quenquoio yec bëpiscudendabi,
queoaic Ico,”

quequin chuipanëdash aton Mayanën.

¹⁸Adec abi icsaid bëpiscudash nidaidën
capuquid yua cuesuneta quenquoio
Nuquin Papa iquec.

Nuquin Papa yacno puduedte cainta

¹⁹Adoaidi Esuquidistu unësacscho isun
cudan siac aton intac chiuidan, Ambi
paucaid nebi, quec dacuëdenquoio yec
Nuquin Papan shubu icsaisa caid
yacnombo puduedte ushë nuqui
cainendac. ²⁰Matsesash abided cuidadec

unësash Nuquin Papa yacno
puduedoash tabadquid Esuquidistu nec.

²¹Ambo nidash Nuquin Papabëd
onquequin aton shubun icquido nuqui
Esuquidistun chuibanubi, ²²Ambi
paucaid ambi dapanacbimboecquidbidi
nebi, quequin tantiaquin abi yacno
choacbimboen nidaidënsnun Nuquin
Papa chiec onquec tabadnuna. ²³Nuquin
Papa ambi chiacpadomboen naquidquoio
nec, quequin abi tantiaquid yec abi
yacno puduedebi, quequin
caimbudnuna. ²⁴Aden tantiaquin abi
tantiaquid utsibobëd tantianec
bëdamboec tabadquin nashununa.
²⁵Aden nabanec abi tantiaquid
utsibobëd iccuededtiapimbo iquebi,
utsi-utsiec quiacpadec adenquoio icnuna.
Adec iccuededec, Nuquin Papan
chiacpadquiec bëdamboec tabadnuna,
quec chuinanta. Niacquid dadpen icsho
isash, Matsesën naid chuibanquin cuidte
ushë badedquoio choec, quiash
baded-badedquiec chuinanta
bëdamboec tabadte bunec.

²⁶Ëbi icsaid bedshunash abided
cuidadec Esuquidistu unësapanëdash,
quequin tantiash icsaded-icsadedquid
iquec, Adquidquoio Esus nec,
quetiapimbo iquec. ²⁷Aid cuidte ushë
chonoc nëishun comapenen
chushcaindac Nuquin Papan abi
chieshënquido nibëdamequin.

²⁸Nadomboen nata cain Moisesën chiaid
niacsho isun daëdshun chiac niacquid
unësmiampic. ²⁹Nuquin Papan abia
naden nata cain chiaid niactenequid
adomboen cuidnushe quiash ëbi icsaid
bedshunash abided cuidadec
Esuquidistu unësapanëdash, queboedi,
Ëmbi tantiaboed Nuquin Papan
Madopenquoio matsesquoio ëbipadquid
icsacscho cuesuniac, quequin
chieshënscho ÷comapenen Nuquin Papan
cuidenquioda icpadic? Adquid Nuquin

Papan Mayanën bédambocquid icmenu quequin chiaid chieshénquid nec.

³⁰Nuquin Papan: “Èmbimbo èmbi chiaid chieshénquid cuidendambi,” quequin chiaid nec, quequin nuqui tantiec. Adembidi: “Abi tantiaquid icboedëmbi tantienquio yansho cuidquidquio Nuquin Icbo iquendac. ³¹Abi cuidantequid dacuédampambo iquec,” quequin Nuquin Papan chiaid nec.

³²Esuquidistu tantiaquid yanash mibi bédamboec tabadondacpaden tantiamec chuinandeneta. Esuquidistu tantiabenacchuca icsho chieshëménquidon mëyanaqui, Esuquidistu tantiaquid nebi, quec dayacquio yec bédamboec mibi tabadteniondac. ³³Dadpen tabadnubi, èmbi tantiaid Esus nec, qesho mibi utsibon mamëshunondash. Adembidi aidon natiambocquin mëyanac. Adomboembidi Esuquidistu tantiaquid utsi mëyansho isun, Aidbéd icquid nebi, quequin ismequin mimbi nashundenepondac. ³⁴Esuquidistu tantiaquid utsi quënën nauedaaid icsho isash abëdi tabadacimboc natiastianquiec unësquio yec mibi tabadpondac. Adecbidi mibi chieshénquidën mitsana bedacsho isash Nuquin Papan ëbi menetequid ampetiapimbo iquec, quequin tantiec, Bédambo iquebi, quec mibi tabadpondac.

³⁵Adoaidi Nuquin Papan bacuë yec bédambo iquebi, quiash dacuëdenquio yec bédamboen nabanec mibi ënden dayacquio iccondacpadquiec adquiecbidi tabadteneta. Adquid Nuquin Papa yacno puduedquid nendac. ³⁶Utsin mëyanaqui Nuquin Papan chiaid chieshenquiocquin tantiadeneta. Adec tabadquin Nuquin Papa bunacpadomboen nabanash abi yacno tabadendac. ³⁷Nuquin Papan chiaid nadquio iquec:

“Chiata. Nëbien mimbi cainaid mibi mënchictequid choendac.

³⁸Adsho tantiec ambi pauctequid abi cainec tabadec nec.

Abi cainuidquido ambi puduedmetemaid nec.

Adquid, Cho, catiapimbo iquebi,” quec Nuquin Papa. ³⁹Aid cainuidash utsi tabadnubi abi choate nuqui cainec. Abi cainesa abi yacno puduedmenquiocquin Nuquin Papan chian anëdënquid nësiatequid nendac. Nuquin abi cainquid yec Nuquin Papa yacno puduedtequid nec.

Nad iquendac, quequin tantiaquin cainquid

11 ¹Esuquidistu tantiaquidtedi con shubun icquido nec, quequin Nuquin Papan chiaid tantiaquin abi yacno tabadendabi, quequin abéd icte ushë nuqui cainendac. Aden cainquin, Con icbo èmbi isacmaid nec, quequin aid isbenacimboen èmbi tantiaid nec, quec tabadquidquio nebi. ²Adembidi tantiec tsusedpabo tabadsho isun, Bédamboen mimbi tantiec, capampic Nuquin Papan aido chuiquin.

³Adembidi Nuquin Papan: “Abubëdi nidaid yanquiota,” cashumbic: “Aidënquiocquidtedi yanquiota,” cac ambi tantiacpadquiequi yampampic, quequin nuqui tantiec. Aden tantiec èmbi nëbi isaidtedi nibëdnuc ÷mitsipadomboentsi aidtedi icmebampampiba? quenquio nuqui iquec. Nuquin Papan: “Yanquiota,” quequin tantiacpadquiequi abitedimbo yampampic.

⁴Adembidi, Mibi tantiaquin mibi bunacpadomboen nidaidën capuquid con yua cuesuneshun tauinu, quequin chuishun Abedën naid Nuquin Papan bédamboen isaidquio icpampic. Aton utsin Cain caidën aden tantienquiocsho

Nuquin Papan icsamboen isaid icpampic. Adosho isun Cainën aton utsimbo cuesuniambien Abedën Nuquin Papa tantiaquin naid chianetequidquo abi iquec.

⁵Adnubien adecbidi abi tantiaquidquo Enoc icsho isun Nuquin Papan buanac unësesa icpampic. Bédambocquid nec, quequin Nuquin Papan buanacsho nibënquin Enoc istuidambocpampic. ⁶Abi tantiesa icsho isashien, Ëmbi bédamboen isaidquo nec, quetiapimbo Nuquin Papa iquec, quequin tantiaid aid tantiaquid icsho, Abi yacno puduemetequid nebi, quequin tantiaquid ambi bédamboen isaidquo nec.

⁷Adnubien adembidi Nuquin Papa tantiaquin Noe caidën, Nuquin Papan chiacpadomboen nanuna, queshun, Ëbéd icquid unës uanushe queshun, Con utsibo Nuquin Papan chiaid tantiesa yec unëstequid iquendac, quequin tantiaquin Noen cano dapa nacnempampic. Abi tantiaquin aden nasho Nuquin Papan bédamboen isaidquo aidquo icpampic.

⁸Adnubien adembidi, Nidaid utsi mibi menembique. Nidtan, Nuquin Papan cac abi capuacmanombo Abadauan nidpampic. ⁹Adembidi Nuquin Papa tantiec abi capuacmanombo choash, Con nidaid iquendac, quiash yuedacmaidbimboec quenenenquo yec daëdcaid shubumpi buan-buanequi aid nidaidën tabadpampic. Adecbidi aton mado Isactsen aid shububidi buanash tabadoapampic. Adecbidi Isaquën mado Acobotsen tabadoapampic. ¹⁰Nuquin Papa yacno ambi tantiampicpadomboen shubu uaidën tabadendabi, quequin cainec quenenenquo yec nidaidën Abadauan tabadtenepampic.

¹¹Adembidi Abadauanën Nuquin Papa tantiaquin aton chido Sada

machobudash bacuë tishtiapimboquid icnubi, Nuquin Papan chiacpadquiec con mado iquendac, quequin tantiacpadomboen Abadauanën chidon machobudquioshon aton mado tishpampic. ¹²Adoac Abadauan tsusiobudaidënquo tsyuecquid dadpen uispatedi yampampic. Masitedbidi yanoapampic.

¹³Aden Nuquin Papan aid nidaid ëbi menendac, quequin tantiec chieshenquo yec Abadauan ambi isacmanombo choash, Con nidaid nendac, quequi Nuquin Papan meniabicnuc quenenash tabadenquo yec nidequi unëspampic.

Adomboembidi tantiequi aton madobo unësbudnepampic. Adomboembidi tantiequi aton baba ado unësbudnepampic.

Adomboembidi tantiequi aidon tsyuecquido unësbudnepampic. ¹⁴Nuquin Papa tantiaquid yec Nuquin Papabéd tabadendabi, quiash nidaidën quenenenquo yec aidtedi tabadpampic.

¹⁵Ëbi tishondacnombo tantiec unësqiuo iquebique. Ambo nidoaibi, quiash nidtsempampic. ¹⁶Adenquo yec, Nuquin Papa yacno tabadendabi, qesho tantiaid, Con matses nec. Adecbidi aton Papa nebi, quequin chuishun abi yacno abéd tabadte shubu uapampic Nuquin Papan.

^{17,18}Mimbi tishmiaidën tsyuecquid dadpen iquendac, quequin Nuquin Papan chiaid abimbo iquec, quequin Abadauanën tantiaquiopampic. Aden tantiaho isun, Ëmbi chiaid tantiaquidquioda Abadauan neque. Isnu, queshun, Mìn mado abentsëc Isac caid cuesuneshun ëbi tantiaquin tautia, Nuquin Papan cac Nuquin Papan chiaid niacmane queshun Abadauanën tauinuequin aton mado setsempampic.

¹⁹Aden nanuequin, Nuquin Papan con

mado uincuemendac, quequin tantiaquin aton mado setsenshumbic Nuquin Papan istuidmiaid, obeca bënëded seshun tauipampic aton mado uincuen uaidbimboecquid icnu.

²⁰Adnubien adembidi Nuquin Papan chiaid tantiaquin Isaquën aton mado abi ushëmbi tishaid daëd Acobobëdta Esau Nuquin Papan ambi chiacpadomboen nanun bëdambo icmete chiaid chuiopampic.

²¹Adnubien adembidi Nuquin Papa tantiaquin tsusio budash unësbudquimbi aton cueste bedash shuebudshun, Nuquin Papa bëdambo iquec, quequin Nuquin Papan ambi chiacpadomboen nanun bëdambo icmete chiaid aton baba Osen bacuë daëd Acobon chuiopampic.

²²Adnubien adembidi Osen Equipito yacno tabadec unësnun, Nuquin Papan nidaid menenun nabono, quequin chiaid tantiequi unësebique. Mibitedi: Aid nidaid yacno nidnu, qeshun con canite buanta, quequin chuiopampic Osen.

²³Adnubien adembidi Nuquin Papan bëdambo icmiaid con mado nec, quequin tantiaquin aton mado Moises tishun aton titan aton papabëdtambi ompopampic. Equipito yacnocquid ancanquidën: Isadaidbon chidon dada bacuë tisho cuesuneta, quequin chiaid niacquid dacuëdenquiocquin aton mado adopampic.

²⁴Adnubien adembidi Nuquin Papa tantiec Moises caniacsho, Ancanquidën champin mado mibi nec, caqui chieshë nec, Aidën madopenquo nebi, queopampic. ²⁵Ancanquid Nuquin Papa tantiesa nec. Con matses isadaidboen Nuquin Papa tantiaquido nec. Adquid icsho aidobëdtabi ancanquidën mëyanaid iquendabi, quianec Moises cuëshëdpampic.

²⁶Yuecshun Nuquin Papa yacno yuedac

bëdambo iquendabi, quequin tantiaquin Equipito yacnocquidon shubun yuedshun meniaid isuidec, Natiaic icsatiapimbo iquebi, quiaish tabadquin Moisesën caimpampic. ²⁷Adembidi tantiaquin, Equipito yacnoësh ëbi nidsho isash nëishun ancanquidën con matses nidmenquo icpec, quenquo yec Nuquin Papa isacimbioec Moises tabadtenepampic. ²⁸Yuecash Equipito yacno choashun adembidi tantiaquin, Bëyuec tishaid unësmetequid ëmbi ëbi yacnoshon uaid mayan bëda ëmbi budmiaid min shubu datamenuen ëmbi chiacpadomboen nabanta, Nuquin Papan cac ambi chiacpadomboen naquidquo Moisesba icpampic. Ambi chiacpadomboen nabanquin nidaidën capuquid yua cuesuneshun shëcuë cuëmano abiuc daëdi abucbëdta intaquën ëcnoshcashun nami shuishun pan bidisquesabëdta pepampic. Adoacsho isun Nuquin Papan budmiaidën datampampic.

²⁹Adnubien adembidi Nuquin Papa tantiec Equipito yacnoësh puduanec nidquin Acte Piu potec nidquid podqued nibëdboedi tanunquiocquidën uesadmiaidën isadaidbon potepampic. Aden isadaidbon potenubi abëdtambi potenuec abi chieshënquido Equipito yacnocquido acte chomiaidën mentoadbudnepampic.

³⁰Adnubien adembidi Nuquin Papa tantiec ambi chiacpadecc matses utsi dadpen tabadacno Edico caid dacuenadtanepampic. Siete yacno cuëscaïn tambanec dacuenadtanec shubu dadpen daquënë uain tsasi uaid sec uebudpampic.

³¹Adnubien adembidi Nuquin Papa tantiaquin Edico yacnocquido cuesunenun isquido isadaidbo chosho isun, Nuquin Papan matsesbo nec. Aido ëmbi yuedac ëbëd icquido

cuesunenquiocpec, qeshun dadpen chudmequidën, Daba caidën, isadaidbo aton shubun yuedquin ompopampic. Adoac nidoash aton matses utsibobëd abia choquido choash Dababëd icquido cuesunianenquiocpampic Nuquin Papa tantienquo yec chiesho Daban matses utsibo cuesunequimbi.

³²Adecbidi Nuquin Papa tantiaquid dadpen icpampic. Nëidic Edeon, utsibic Badac, utsibic Sanson, utsibic Ecte, utsibic Dabid, utsibic Samued, utsibic Nuquin Papan nadomboen nanun nabono quequin chiaid chuibanquidtedi adquidtedi icpampic. Utsi dadpenshun Nuquin Papan chiacpadomboen naindac, quequin cainquido icpampic. Abitedi chuitiapimbo iquebi. ³³Aido utsin-utsinquien: Abi ancaidobëdtabi ancanquid Nuquin Papa tantiesa nec, qeshun cuesunepampic. Adembidi, Mibi bëdambo icmenu, quequin Nuquin Papan chiaid tantiaquin cainec adquidquo icpampic. Adquid icsho isun, Pemenu, qeshun bëdi nibëdquid deon caid tabadacno buanshun nebudpampic. Adosho isun piantiapimbo noc Nuquin Papan quiuëccac deonën penquiocpampic. ³⁴Utsin-utsinquien adembidi Nuquin Papa tantiaquid icsho, Nëdëncashun tauinu, cac taboadaidën pichiquenquiocquid icpampic. Adembidi tantiec utsi-utsiec chështen senuesho isun mënchicquin cuemepampic. Adembidi tantiequi dayacquiociapimbo boedi dayacquiocquid icpampic. Adembidi Nuquin Papa tantiaquin matses utsibon sondado cuesnanuequid choacsho cuemepampic. ³⁵Adembidi utsin Nuquin Papa tantiaquin nianten bacuë unësboed uincuemetanquin ani menepampic. Adembidi tantiec tsadsho isun Nuquin Papa tantiesa nebi, camenuquin

shoyombededtsëcquien cuesuniaqui, Nuquin Papan chiaid tantesa uainquo yec Nuquin Papa yacno nidebi, quiash unës pampic. ³⁶Utsi-utsien shocosh bucun mëtaneshun quënën nauedacsho isun mamënsnunquimbi cueshcanten cuesaqui Nuquin Papabëd tabadte tantiec dacuëdenquo yec tsadpampic. ³⁷Adembidi utsitsen cuënoten seshunepampic. Adembidi utsitsen sënten nacsënsnunepampic. Adembidi utsitsen nidaidën capuquid bitsi nacnenaid dasiuidpampic. Aton na nibëdnubi mëyanaqui Nuquin Papa tantiaquidquo yec aitedi tabadpampic. ³⁸Nuquin Papa chieshënnquid ëbëd tabadtemaido nec, quequin tantiec adpampic. Adoac quenentiapimbo yec uano tabadnubien nidaid shëcuë uaidën utsi tabadpampic.

³⁹Aidtedishun, Ëbi yacno mibi chuibanec ëbëd onquequid bëyucanec yuedanquid iquendac, quequin Nuquin Papan chiaid tantiaquin cainec aitedi unës budnepampic. ⁴⁰Aitedi icnubi abi icsaid bedshunash abided cuidadec unësash uincuenash abi yacno nidoash Yuedanquid Abentsëcquiobi Esuquidistu yanabi icpampic adboedëmbi ma nuqui nëbi icquidobëdta yuedpanuna.

**Aton bacuë Nuquin Papan
dayacmenuequin namiaid**

12 ¹Aden Nuquin Papa tantiec chieshesa dadpen icpampic, quequin dada uasho isun ëbi chieshtometequid utsi ëbi icsaidbëdtabi nainquiocquin ënuna. Adembidi dayacquiocquin Nuquin Papan chiacpadomboen nabanec tabadnuna. ²Esuquidistu, abitedishun icbombo abia yampidquo ëbi chuibanec Nuquin Papabëd onquec bëyucanec abi yacno puduedash yuedanquid nec, quequin tantiaquin aid isac bimboen adonona.

Aidi, Ēbi yacno matses yuednu, quiash aton Papabēd tabadteneboedi matsesash icsambocquidbimboecnuc cuesten dectanac chieshenquoio yec unēsasho uincuen uaid yanash aton Papabēdi Icbombo iquec. Aidquoio tantiec isac bimboec nidaidēn nuquibi tabadnuna. ³Abi chieshēnquidēn natiacquin mēyanaqui chieshenquiocquid Esuquidistu icpanēdash, quequin aid tantiec ma chieshtoenquoio icpanuna.

⁴Ēbi icsaid padpiden nainquoio icnu, qeshumbi natiatequid icnuc mimbi ēnambo iccoc. ⁵¿Con bacuē cain Nuquin Papan mibi dayacquio icmenuequin chiaid bēpiscudecta icco? Nad iqueque. Tantia:

“Abuido, min Icbon dayacquio icmenuequin chiaid cacuidenda. Adecbidi ambi natiamianquoiopec camiaid icash chieshenda.

⁶Ambi matiamianquoiopec camiaid dayacquio icmenuequin nametequid con bacuēbo nec,” quequin Nuquin Papan chiampid nec.

⁷Natiatequid mibi dayacquio icmetequid nendac. ¿Ēbi cudasaidquoio con mado dayacquio icmenuequin namebanesa nebi, quecta aton papa icpadic? Padenquoio. Ambi: Con bacuē nec, caid natiatequid icnuc, Dayacquio icmenu, quequin ancaquin chono uaic.

⁸Natiatequid icnuc ambi dayacquio icmenu quequin namiaidpenquoio yec, ambi, Con bacuē nec, caidpenquoio mibi nec. ⁹Ēnden dayacquio icmenu quequin mibi ancaquidēn mibi tishmequidēn chiacpadomboen natiatequid icnuc naquidquoio mibi icpondac. Nēbi Nuquin Papan dayacquio icmenu quequin chiacpadomboen natiatequid icnuc naquidquoio icnuna abēdi tabadnuen.

¹⁰Abi tishmequidēn ambibi tantiacpaden dayacquio icmenu

quequin aton bacuē yuen nametiapimbo iquec unēsendac. Padnuen Nuquin Papan abipadquid icsaisa icmenu quequin natiaquionoc nuqui namendac.

¹¹Adoac nuqui natiaquieq tabadec.

Adoaidi yuecash nuqui bēdamboec tabadendac. Adecbidi natiatequid icnuc dacuēdēnesa nuqui yanec. Adecbidi Nuquin Papabēd icquid nebi, quequin tantiaquidquoio yec natiatequid dacuēdēnesa nuqui yanec.

¹²Aden tantiec dayacquio ictiapimbocboedi: Abipadquid iquendabi, quiash dayacquio yec tabadta. ¹³Adenuidi naic tabadquin utsibo isme ma dayacquio ictiapimbocquin niaquec cuēshēdte bumboedi bēdambo yampanuna.

¹⁴Aden naic tabadec utsibobēd bēdamboec tabadnu, quiash adec tabadta. Adecbidi Nuquin Papa icsaisa yacpadquieq nuquibi icnuna, quiash aid tantiec tabadec isnanec chuinanec adquid yanta. Adoesa Icbobēd tabadtiapimbocquid nendac. ¹⁵Nuquin Papan bēdambo iquebi camiaid icboedi chiesho isun, Mimbi icsamboec tabadeque. Mibi icsamboec tabadquin ismiac utsibo icsabudtsiashe.

Bēdamboec tabad, quequin chuiban.

¹⁶¿Ada aton chidopenquoio chudquid icpec? Adecbidi, ¿Ada adembidi aton bēnēpenquoio chudmequid icpec?

quequin isnuequin adquid istuidshun Nuquin Papan chiaid chuiquin bēdamboen tabadmeta. Adembidi, Esaupadquid icnushe qeshun ¿ada Nuquin Papan bēdamboen tantiaid chieshēnquin isuidquid icpec? qeshun Nuquin Papan chiaid chuiban. Natia bundoshon aton utsi Acobon codocaid isun bednun Esaun: Unēs nun tsusio icquin con pan bēdamboen tantiaid chuisho mimbi tantiaata, quequin aton papan bēdambo icmenu quequin chiaid

chieshquin Esaun tantienquiocpampic.
¹⁷Yuecshun, Aton utsi Acobo aton
 papan chuibanosh, qesho tantias
 shubiquin, Mimbi bēdamboen tantiaid
 ēbitsen chui, papa, cac
 chuitiapimboquidēmbi, Ēnden
 nibēdquiocnoc uesquin min utsi
 chiombi, quequin Esau chuipampic aton
 papan.

¹⁸Adembidi, Nuquin Papan
 nadatiambocquin uabanaid tsusedpabon
 isampicpadomboen mimbi isabiccoc.
 Macuēsh Sinai caid yacno choshon
 aidon isbenampid nēid iquec: natia
 nēdēnquedote; utsibic,
 inchēshacbimboec isadquid; utsibic,
 cunquequid dapabimboec isadquid;
¹⁹utsibic, shocosh shoncaten
 shoncacimboec onquenuc pabiate
 paēmbošē icpampic. Adec onqesho
 tantiasun, Papa, mibi onqesho tantiac
 dacuēdampambo iqueque. Mibi
 chuitequid Moises icme, capampic.
²⁰Adec macuēsh yacnombo icquin:
 “Ēmbi nadatiambocquin uabanaid
 ismenubi macuēsh yacno anoentsēqui
 choenda. Adecbidi matses adecbidi
 nidaidēn capuquid. Anoentsēqui
 choquid cuēnoten setequid nendac,”
 quequin chuipampic Nuquin Papan.
²¹Aden Nuquin Papan nadatiambocquin
 uabansho isash: “Dacuēdampambo
 iquec, quiash, Dacuēdebi,” queopampic
 Moisesetsen uēdēquec.

²²Mibien dacuēdenquio yec Macuēsh
 Sion cashumbic Edusaden Chuca
 Bēdamboquid caid Nuquin Papa
 ēnēdesambo tabadacno choacbimboec
 mibi tabadec caimbi. Aid nuntan
 Nuquin Papan abi yacnoshon ambi uaid
 mayan bēdabo tambantiapimbo yec
 dadpenquioshē tabadec. Aido, ěmbi
 nashunaidtedi, Esus tantiaquid
 chotequid iquec, quiash bēdambo
 iquebi, quec cuēdēdonec tabadendac.

²³Abi tantiaquidtedi Nuquin Papan
 bacuē icbo yacpadquiec aton shubu
 abentsēquēnuēshi Icbobēd onquec
 ěnden mibi taēpoc. Aidi mimbi naid
 cuidquid ambi chiacpadomboen
 nadenequid mibi unēsesa icsaisabidi
 icmequid Nuquin Papa nec. Aidbēd
 ěnden tabadacbimboec abēdi onquec
 mibi taēpoc. ²⁴Abēd icquin Nuquin
 Papan ambi ěnden chiaid ěmeshun ambi
 nēbi chuioid, mibi chuibanec aton
 Papabēd onquec bēyucanec yuedanquid
 Esuquidistubēd ěnden mibi onquepoc.
 Mibi icsaid bedshunash abided cuidadec
 unēsō isun cudan siac intac
 chiuidnēdaid tantiec aidbēdi mibi
 onquepoc. Abedēn nidaidēn capuquid
 yua cuesuniampicpadquidēn intac
 chiuidec unēsaid tantiec Icbobēd mibi
 onquetiapimbo iquec.

²⁵Nuquin Papan chiaid niacchitomane
 quequin isquiota. Macuēsh Sinai yacno
 choquid Nuquin Papan ěnden chiaid
 chuiquid tantiate bunesa cuidpampic.
 ěAdembidi ambi nēbi chiaid abi yacno
 yuedanquid aton Madombo Esuquidistu
 tantiesa Nuquin Papan comapenen
 cuidenquioda icpadic? ²⁶Ēnden
 Macuēsh Sinai yacno Nuquin Papan
 chiacnoshonquio nidaid ishcumpampic.
 Nēbien: “Padpidemboen nidaidbēdta
 abu ěnēdmēnuen ishcuoaindami,”
 quec Nuquin Papa. ²⁷Aden chuiquin
 ambi uaidtedi ěnēdmēnuen
 padpidemboen ishcuoaindac abi yacno
 choaidtedi icsaisa icmiaido yec
 ěnēdtiapimbo iccueddnuc.

²⁸Adoaidi Nuquin Papabēd abi
 tantiaquido ambi bēdambo icmiaido yec
 abēd tabadte ěntiapimboenoc Nuquin
 Papan nadatiambocquin nabanaid tantiec
 cuēdēdonec tabadta. ²⁹Nadatiambocquid
 Icsaisabidi icquin aidēmbi, Esuquidistu
 tantiata, quequin nēbi chiaid tantiesa
 chian anēdēnquequid nēsēcaindac.

Nadomboen nata cain chiaid

13 ¹Esuquidistu tantiaquid yec aid tantiaquidtedi con utsibo nec, quiaſh tantiananec nashunanta.

²Adembidi Nuquin Papa yacnoëſh choquid abi tantiaquido nashuntequid ambi uaido mayan bédabo choſho yuedampicpaden mimbi isaçmaidquio Esus tantiaquid choſho yuedta.

³Adembidi quënën nauedaid iquec utſi iſte bunſiabi, queſhun quënën nauedaid iſtan-iſtanta. Adeçbidi bunſiabi, queſhun menetan-menetanta. Adembidi utſin mëyanaid tantieç ſhubioata.

⁴Adeç tabadeç con chidopenquio chudnu queſa iquec chido utſi iſuidquid icta. Adeſa icſho Nuquin Papan mibi cuidendac. ⁵Adeçbidi, piucquid con na bedtequid dadpen bednu, queç bunquiduidi iquenda. Adeſa iquec: Con na icnu bédambo iquebi, queç tabadta. Adeç tabadquid Nuquin Papan ënden dada uamiampid naden chieç:

“Mibëdi iquebi.

Nianenquiocquin mibi dayun uanuna.”

⁶Adſho tantiaſh:

“Con Içombo ëbëdi iquendac.

Aidëmbi ëbi çudasquin dëçatic chieſhëmënquid dachuëdënenquio iquemi,”

nuqui quendac. ⁷Adembidi nidaidën icquid mibi çhiquid dapabo Nuquin Papan chiaid mibi tantiamenuequin çhiquido bëſhunenda. Aido Esus tantesa uainquio yec bédamboeç tabadpanëdash. Aido tanec bédamboeç tabadoata. ⁸Con Içombo Esuquidistu nec. Abia Yampidquio yec nëbi adquibidi iquec. Aidi ënëdtiapimbo yec abi tabadeç.

⁹Adquid Esus icnuc Nuquin Papa chieſhënquidën çuiſho tantieſa icta.

Aidën naden chieç, Nëid petequid icnubi nëid utſi petemaid nec, quequin chieç. Mimbi piaidën mibi bédambo icmetiapimbo iquec. Padnuen matſes icſaid bedſhunash abided cuidadquidën, Nuquin Papan madonquio paucaid iquebi, quequin tantiaquidquio icſho iſun Içobëd tabadmequin ambi bédambo icmiaidquio nendac. ¹⁰Matſes icſaid bedſhunash abided cuidadash uincuenash abi tantiaquidbëd ënëdenquio yec tabadquid Esuquidistu nec. Adeç tabadquid Esuquidistu icnubi, Matſes icſapash, queſhun nidaidën çapuquid yua çueſuneshun nibëdquiocnoc tauiaidënquio matſes Nuquin Papabëd tabadmetiapimbo iquec. Adembidi aidënquio nuqui icſaiſa icmetiapimbo iquec.

¹¹Isadaidbo icſapash, queſhun nidaidën çapuquid yua çueſuneshun aidën intac bedſhun, Nëid intac Içaiſa Bëdaidquio anquënë uaid nuntan buanſhun daſeçacſho iſun abi yacno puduedaçbimboeçſho Nuquin Papan isadaidbo iſeç, queſhun nuntan buanſhun daſeçcapampic. Adnubien matſes nibëdacno nami buanſhun ueſquin tauipampic. ¹²Adembidi matſes tabadenquio yacno Esus buanſhun dëctanac unëſacſho ſiaç aton intac çhididiepanëdash nuqui icſaiſa icmenueç. ¹³Adoaidi abi tantiaquid yec abëd icquid nebi, quequin ënden çhiampicpaden nainquioçſho iſun isadaidbo Esuquidistu tantieſan çacumiaqui çhieſhenquio yec tabadta.

¹⁴Adquid iquec nidaidën yueç tabadeſa icquimbien Edusaden Chuca caid Nuquin Papa ënëdtiapimboquidbëd tabadaid cainquidquio nuqui nendac. ¹⁵Matſes icſaid bedſhunash abided cuidadquid Esus Nuquin Papan icmiac, quequin tantiaquin, Mibi bédambo iquec, quequin Nuquin Papa

chuidenenuna. ¹⁶Adodenequin
utsibobéd tantiananquin nashunquin
aton na nibédquid menequid icta. Adsho
isash, Con mado yec con champi yec
quec bédamboec tabadquid nec, quiash
bédambo iquebi, quependac Nuquin
Papa.

¹⁷Ambia Esus tantiashun chuiquidon
chiacpaden nabanta. Nuquin Papan, Ēbi
tantiaquid utsibo isbanta caid icquin
aido Nuquin Papan, Icsambo iquec,
canushe qeshun isted-istedec. Aidon
chiacpadomboen naquin ma aido
bédambo iquebi camepanuna.
¿Chieshecta mibi bédambo icpe?
Padenquio.

¹⁸Chieshenquiocquin ěbéd icquid
Nuquin Papa chui. Bédamboen nabanec
tabadteniobi. Adequi tabadebi utsibo:
Icsambocquid nec, quetiapimboconoc.
¹⁹Adembidi ěbi tantiaquin Nuquin Papa
chuidoneta. Mimbi adonoc badedquio
mibéd iquendabi.

²⁰Adembidi utsibéd bédamboen
tabadmequid Nuquin Papan aton
Mado matsesacsho utsibon unēs
uashun siacsho isun uincuemiac

bēyucanec abuc puduedoash
abitedishun Icbombo nec. Abi
tantiaquido chuinen yuedquid aidi
Nuquin Papan icmepanēdash.
²¹Adquid Esus icmeshun ambi
tantiacpadomboen ma Nuquin Papan
mibi icmepanuna. Adoac, Ēbi
puduedmenuen Nuquin Papan naid
nec, quequin ěnenquiocquin chuiquid
ma icpanuna.

²²Mibi tantiamenuen ěmbi dada
uaquin chiaid daēdpactsēcquio icsho
bédamboen isec onquequin
tantiadoneta.

²³Něbi utsi chiembique. Tantia.
Timoteyo quěněn nauedboedi něbi
puduemiac aid badedquio němbo choan
aidbědi mibi yacno nidendabi.

²⁴Mibéd icquid Esus tantiaquid
utsibobědta mibi chuiquidtedi tantiec
tsadebi quequin Pabadon dada uaosh,
quequin chuita. Adecbidi ěbitsen
tsadebi quequin chuioata, queoapēc
něuěsh Itadia yacno tabadquido.

²⁵Nuquin Papan bédambo icmiaid ma
mibitedi icpanuna. Padi. Aidtedi dada
uaombi.

SANTIACON DADA UAID

1 ¹Santiago nebi. Nuquin Papan namiaidquio, Nuquin Icho Esuquidistun namiaidquobidi nebi. Adquid yec Esus tantiaquido uano nidaniash tabadquido mibi tantiec tsadebi. Aden tantiaquin dada uaimbique. Isec onqueta.

Natiametequid

²Utsibo, mibi u tabadnuc mibi nënaid, mibi bundoaid, utsin mibi mëyanaid, mibi natiametequid utsi-utsiec iquendac. Adaid icnuc, chonoadbudec cuishon quec, Chieshenquiocquin nainembi, quiacpadquiec adecbidi tabadoata. ³Adaid icnuc, ĸĒbi tantiaquidquioda neque? Isnu, quequin, Nuquin Papan ěbi dayacquio icmec, quequin tantiec adecbidi tabadoata. ⁴Aden tantiec tabadsho isun bědamboec tabadte uesquin tantiabenuidquio mibi icmendac ma Esuquidistupadquid yampanueshun.

⁵Mimbi tantienquio yaid Nuquin Papa chuita. Aden chiaquien, Ma tantianu, qeshun mibi nua pausunec Nuquin Papan. Icsambocquid mibi neque. Padi quenquiocquin mibi pausunec. ⁶Ěbi tantiamē, queboedi, ěbi tantiamenuiocpec quequin tantienda. Ěbi tantiamēpec queboedi padenquio yanec cuěshědec capuidequi yampec. ⁷Adquid Nuquin Icbon pausuntiapimbo icpec. ⁸Adquid, Nuquin Papan ěbi tantiamēc, queboedi capuidequi icquidbimboec icpec.

⁹Shubu abentsěquěn tabadacpadquiec tabadquid icta. Adec tabadec mitsana daědpactsěc icquid yec, Con na daědpactsěc iquēc, quequin mitsanauidi tantienquiocquin naden tantiata. Nuquin Papan bacuě nebi. Abědi cuěshědenquio yec tabadebi, quequin aiduidtsěqui tantiec tabadteneta. ¹⁰Aton na dadpen icquidombien aton na bědiactsec tantiaquin naden tantiendac: Con na nědic chodquec; utsibic chiuidec. Adecbidi con nami shěnibudequi Nuquin Papan bacuě nebi. Abědi cuěshědenquio yec tabadebi quequin tantiec tabadta.

¹¹Tanunquiocquiděn tieděn caniquid uněsec podo tididiquec. Bědamboeboedi nibědquiec. Adquiecbidi icbo aton nabi bedbanequi aton nami shěnibudequi uněsec. Icho icboedi icbo ictiapimbo yanec. Adec icbo ictiapimbo yanēbi, quequin mitsana comapenen tantienda.

¹²Adecbidi natiaic shubitequid icnuc Nuquin Papan chiaid niaquenquio yec dayacquio yec tabadquid Nuquin Papan bědambo icmiaid nendac. Adquiecbidi, Ěmbi chiaid niaquenquio yec mibi tabadsho isembi. Ěběd icquid mibi neque. Puded. Něuěshquio mibi uněstiapimbo iquēc, quendac Nuquin Papa. ¹³Mibibi icsash, Nuquin Papan namiac nebi, quenda. Nuquin Papa Icsapenuiocquid nec. Aidi icsa uantiapimbo iquēc. Icsa uanesa nec.

¹⁴Nidaiděn tabadquidien icsate bunec

abibi icsaic. Adecbidi ambibi tantiacpadec icsaoaic. ¹⁵Icsamane quequin tantienquo yec unēsacsho abi yacno puduedmenquiocquin Nuquin Papan uquē nēsecaindac adquid.

¹⁶Utsibo, Nuquin Papan chiaid chieshēnesa nebi, quec mibibi mua uadenda. ¹⁷Nuquin Papan pausunaid bēdambouidi iquec. Utsi uaquin namiantiapimbo iquec. Adenuidi namec. Adquiuidi Nuquin Papa iquec. ¹⁸Ēmbi chiaid tantiaquidquo icsho con bacuē nec, caimbi, quequin Nuquin Papan tantiapampic. Aden tantiaquin Nuquin Papan abi chuidonequidquo aton Mado Esus nidaidēn budmepadene. Adec budash nidaidēn capusho isash abēd icboedo abi tantiaquido nuquitedi nec. Adquid icsho ambi bēyuc bacuē icmiaido, con nabo cain, Nuquin Papan cuēmbanoshi. Aden ambi bēyuc bacuē uaido icquin chuibanac ma tantiaquidquo dadpen yampanuna.

**Nuquin Papan chiaid
tantiaquin nabanta quiaid**

¹⁹Nēid bēdamboen tantiata. Chuinu. Nuquin Papan chiaid bēdamboen tantiaquid icta. Ambi chiaid bēdamboen tantienquiocquin aid badedquio chienda. Adecbidi badedquio nēishenda.

²⁰Badedquio nēishquidēn Nuquin Papan chiapadquiec bēdamboec tabadaid ismesa nec. Adquid, Bēdamboen mimbi naoc, Nuquin Papan catiapimbo iquec.

²¹Bēdamboec tabadesa icquin mimbi icsamboen tantiacpaden naid ēnquiota. Aden ēnu quiash, Icsaobique. Mimbi chiaid tantiaquiono. Ēbi pausun, quequin Nuquin Papa chui. Aden chuisho Nuquin Papan mibi pausunec. Ambi pausunaid iquec aton Mado Esuspadquio yec cuēshēdenquo yec abēdi mibi iquendac.

²²Nuquin Papan chiaid tantiashun nainquio yequi Nuquin Papan chiaid

bēdambo iquec, quec mibibi mua uadenda. Nuquin Papan chiaid tantiabocpadomboen nabanta. ²³Nuquin Papan chiaid tantiashun naisa isnanten ²⁴bēisadash bēpiscudac bimboec bēpiscudendac. ²⁵Padnuen Nuquin Papan nēbi chuiboed utsin comapenen tantiaded-tantiadedec. Aden tantiashun, Con Mado Esuquidistu tantiaquid con bacuē caimbi, quequin Nuquin Icbon chiapadomboen nabanec tantesa uainquiocquid adquid nendac. Aden tantiaquin nabanquid Nuquin Papan bēdambo icmendac. ²⁶Padnuen, Nuquin Papan chiaid tantiaquid nebi, queboedi ana bēdamboen oncamesa abibi onquequid nec. Adquid, Esus tantiaquid nebi, quequin ambibi tantiaquin icsamboen chuiquid nec. Abipenquo chuiquid nec. Adquidbidi bēdamboec tabadaid ismesa nec. ²⁷Nuquin Papan chiaid tantiaquid nebi, quequin utsi tantiaquin nashuntiad. Menampibo caniabictsēcquid chonoadsho isun nashuntiad. Natiaic camiaid icsho isun adembidi nashunoatiad. Adembidi shiadimpi machoabictsēcquido tantiaquin nashunoatiad. Adembidi niantie machobo utsin bedabi samēdquido tantiaquin nashunoatiad. Aden naquid Esus tantiesan nabanacpaden naisa nendac. Adquid icsho isash, Ēmbi chiaid tantiaquin naquidquo nec. Con Madopadquidquo icsaisa nec, quendac Nuquin Papa.

**Nēid bēdambo iquec. Nēidien icsambo
iquec, quesa icta quiaid**

2 ¹Utsibo, Nuquin Icho Esuquidistu Bēdaidquio nec. Aid tantiaquid mibi nec. Adquid icquin, Nēid bēdambo iquec. Nēidien icsambo iquec, quenquiocquin icsamboen nainquiocta. ²Mibi iccuededacno Esus tantiaquid mimbi isacmaid choec. Abentsēc

bëdaidquoio dasiuidash
 nac-nacquiocquid mësiuidquid
 puduednubien utsi icsactsëcquiocquid
 dasiuidtsash puduedec. Aid daëd chosho
 isun ðmitsipadentsi mimbi tantiapatsia?
 3Bëdaidquoio dasiuidquid isun naden
 mimbi tantiatiasiac: Bëdamboquid nec.
 Aton na dadpen icquid nec,
 quiacbimboen, Tsusion dayunquoio
 tsadec cho, quequin mimbi aidi
 tsadumpec. Adshumbic,
 icsactsëcquiocquid dasiuidquid isun,
 Aton nain nibëdchitec, quiacbimboen
 uano tsad mimbi caoapec. 4ÛNëid
 icsambocquid nec. Nëidien
 bëdamboquid nec, quiacbimboen Esus
 tantiaquid utsibo mimbi
 tsadunenquioda ictio? ðAton na
 tantiaquin adoenuioda ictio? Aden
 naquin bëdamboen tantiaquin naisa
 mibi neyoc.

5Nuquin Papan chiaid
 tantiesabimboecquin mimbi naid nec.
 Mimbi, Icsambocquid nec, quequin
 tantiaquin uano tsad caid tsadbudash
 nadpec: Icsambocquid nec, quequin ëbi
 isec, quequin tantiec aidi tsadpec.
 Aidbidi Nuquin Papan tantiaid nec. Aidi
 Esus tantiaquid yec abi yacno
 puduedtequid iquendac. 6Aidi
 bacuëbimboecnuc mimbi uano
 tsadumpec. ðUtsibic tsusio
 dapabimboecnuc mimbi dayunquoio
 tsadumbocpadquidën utsin-utsinquien
 chono uashun mibi daëdpactsëc
 menenquioda ictiosh? ðAdquidon mua
 uain chuiquin mibi utsi-utsien quënën
 nauedmenquioda ictiosh?
 7ðAdoanquidën baded-badedquien Esus
 quec onquequin mamënshunenquioda
 ictiosh?

8Nuquin Papan chiaid nad iquec:
 “Utsin naden ëbi nashuntiadquoio iquec
 quequin, mimbi tantiacpadomboen
 nashunta.” Nuquin Papan

chiacpadomboen tantiaquin
 nashunquidquoio iquec mibi bëdambo
 icpec. 9Nëid bëdambo iquec. Nëidien
 icsambo iquec, quiacbimboen naquid
 icnuc Nuquin Papan chiaid niacquid
 mibi iquec. 10Nuquin Papan chiaid
 utsi-utsien nabanquid icquimbi ambi
 chiaid utsi niacquid mibi icoapec.
 11“Mimbi inacmaid chudenda,” quequin
 Nuquin Papan chiaid nec. “Utsi
 cuesunenda,” quequin ambi chiaid utsi
 nec. Min chidouidi chudquid icquimbi
 utsi cuesunequid mibi iquec Nuquin
 Papan chiaid niacquid mibi nepec.

12Mibi tantiaquin mibi icsaid pauquec
 Esuquidistuded icsambocquidbimboec
 yec unëspanëdash. Aid tantiaquid icsho
 Esusën paucaid mibi nec. Adquid yec
 Icbon mibi tantiaquin
 nabanacpadomboen utsi tantiaquin
 nabanec bëdamboec tabadta.
 13Esuquidistu tantiaquid utsi
 icsambocquid nec quesa icta. Èbi icsaid
 Esuquidistun paucac. Adomboembidi
 abi tantiaquid utsi icsaidbidi paucac
 quequin bëdamboen naban.
 Icsambocquid nec quiacbimboen
 icsamboen nabansho isun Nuquin Papan
 adomboembidi mibi chuiquin
 cuidoaindac. Èbëdta Esuquidistun
 paucaid nec quequin utsi tantiaquin
 nashumënquid icquin icsambocquid nec
 quiacbimboen icsamboen
 nashuntiapimbocquid mibi nec.

**Esus tantiaquid nebi quequin ambi
 tantiacpadomboen nabanquin isme quiaid**

14Utsibo, Nuquin Papan bacuë nebi,
 qeshun ðIcbon chiaid nainquiocquinda
 utsi bëdambo mimbi icmepadi?
 Padenquoio. 15Esus tantiaquid abi
 dasiuidtebëd pete nibëdquid, Bec cho,
 qesho 16menenquiocquin, Nidec nid.
 Dashcute bedash dasiuidta. Adembidi
 pete bedshun codocashun peta, ðmimbi

cacta bédambo icpadic? Padenquo.

¹⁷Adembidi, Nuquin Papan bacuè nebi, qeshun Icbon chiacpadomboen naisa Icbon bédambo icmiaidpenquo nec. Nuquin Papan bacuè nebi, qeshun naisa Nuquin Papa yacno puduedtiapimbo icoaic.

¹⁸Adnubien, Esus tantiaquid nebi, quec onqueuidequi tabadquid icnubi, Esus tantiaquid nebi, quec onquenquiocquin Icbon chiacpadomboen nabanquidquo iquec. ¿Mitsipaden aid daédshun tantiacpadomboen mimbi tantieque? Chui. Tiantianu, quequin mimbi chuitsiac.

Adoiqui, Esus tantiaquid nebi, quequimbi Nuquin Icbon chiacpadomboen naisa naden chuitsiambi. ¿Nuquin Icbon chiacpadomboen nainquiocquin mitsipaden mimbi tantiaid mimbi tantiamepe? quetsiabi adquid chieci. Mimbi ambi chiacpadomboen nainquiocquin ismetiapimboenobi, Esus tantiaquid nebi, quequin chienquiocquimbi Esusèn chiacpadomboen naquin mibi ismembi, caimbi. ¹⁹Nuquin Papa Abentsècquiobi iquec, quequin mimbi tantiec. Aden tantiaid bédambo iquec. Adembidi, Nuquin Papa Abentsècquiobi iquec, quequin mayan icsatedishun tantiaoaic. Aden tantiaquin niacquido yec uèdèquec.

²⁰Icsamboen mimbi tantieque. Tantia. Chuinu. Nuquin Papa Abentsècquiobi iquec, qeshun Icbon chiacpadomboen naisa yec, Icbo tantiaquid nebi, quetiapimbo iquec. ²¹Nuquin Papa tantiembi, qeshun ambi chiacpadomboen naquidquo icpampid chuinu. Tantia. ¿Abadauan èbi tantiaquidquioda neque? Tiantianu, qeshun, Min mado abentsèc mibi

udasaidquo èbi tantiaquin cuesuneshun tauita, cac Abadauanèn Nuquin Papan chiaid niacmane qeshun tainuequin aton mado abentsèc setsempampic. Chèshtempi sanandosho isun, Padi. Chèn. Èmbi chiacpaden nanuesho mibi bédambo iquec, quequin mibi bédamboen isembi, ¿quequin chienquioda Nuquin Papan icpampic? ²²Abadauan Nuquin Papan chiaid cacuidenquo yec, Con Icbo Nuquin Papa nec, quec abi onquiacpaden ismepampic. ²³“Mimbi tishmiaidèn tishmiaid dadpenquioshè iquendac,” quequin chiondashumbic Nuquin Papan yuecshun adembidi: “Min mado abentsèc cuesuneshun tauita,” quequin chuiquoai, Nuquin Papa abimbo chuiquidquo nec, qeshun ambi chiaid niacchitomane quequin, Abadauanèn aton mado abentsèc setsempampic. Adosho isashien Nuquin Papa, “Èbi tantiaquin naquidquo Abadauan nec. Adquid con matsesquo aidi nec. Aden aidi tantiaquin èmbi yuecquiosshon nanuequin tantiaid Abadauan chiembi,” quepampic Nuquin Papa.

²⁴Nuquin Papan bacuè nebi, qeshun ambi chiaid naquidquo Nuquin Papa tantiaquidquo nec. Nuquin Papan bacuè nebi, qeshun ambi chiaid naisa niacquid nec. ²⁵Adashic, Nuquin Papan chiaid tantiashun naquid utsi icpampic. Aidi isadaidbon chidopenquo, Daba cuèmèdquid, dada dadpen chudmequid icpampic. Isadaidbon Icbo nadatiambocquid nec, qesho tantiashien, Adquid abu nidaidbèdta aidènquiocquid Icbobidi nec, quequin Daban tantiapampic. Aden tantiaquin Daban matses cuesunenuequido isadaidbo abia puduedquin isquid chosho, Nadatiambocquidèn matses nec, qeshun abi yacnouidtsèqui Daban puduedmepampic aton matses

ismenquiocquin. Aden puduedmequin nadomboen tantiapampic. Abi puduedmequidbèd icquido cuesunenquiocpec, quequin Nuquin Papan tantiamiacpadomboen omposhon podqued utsin nidmepampic. Aden nidmiac yuecash isadaidbo dadpen cho-chonobi abia choamboedèn chuibocpadquiobi Dababèd icquido cuesunianenquio yec isadaidbobèd icquidobimboec isec tabadpampic. ²⁶Nuquin Papa tantiaquid Daba yanshun bèdamboen nasho isun mènchicaid Nuquin Papan con matses caidbèd tabadpampic. Padnuen, Esus tantiaquid nebi, qeshun Icbon chiacpadomboen naisa cuèshèdacimboec tabadec.

**Anan icsamboen chiech
onquiaid icsa ènta quiaid**

3 ¹Utsibo, Nuquin Papan chiaid chuibanquid dadpen iquenquioctiad. Nuquin Papan chiaid tantiamenu, quequin ambi chiaidpenquiocnoc chuibanquid abi yacno chosho isun Nuquin Papan comapenen cuidendac. ²Chuibanquidtedishun chua-chuatsèquien chuibantsec. Nuquin Papan chiaid cuembo chuibanquid yec icsaisa yanec adquid. Bèdamboec tabadaid uesquin tantiaquin ismequidquio adquid nendac. ³Cabayo anèshquin dèchèdèdcash uidèn uash tsadquin nidmec. Aden uidèn uaqin bidiacmec. ⁴Adembidi uncaten cano dapa tsibidiacoaic. Cunquequidèn comapenen bècunetiadquiocnobi adembidi icbon nidmec. ⁵Cabayo canobidi nua icnuc abi bidiacmete aniactèsic iquec. Adecbidi icbo nua icnuc aton ana aniactèsic iquec. Aniactèsicquidi oncamequin icbon ambi naid dadpen comapenen chuibanec. Adembidi oncamequin onquiaid icsa

chuibanec. Nèdènquiaid dètsisidash badedquio nidacimboec onquiaid icsa badedquio nidoaic. ⁶Ana onquiaid icsa chuibanacpaden nabanec adecbidi icsabudquieic icbo. Adquid mayan icsan yua iquec adequi icsate bunec.

⁷Nidaidèn capuquid podochoquidbidi matsèsèn yuampicpaden abi yuaid iquec. Yua quenenash cuenenquiocquid. ⁸Ad yenquio ana iquec. Quenenenquio yec ana onquebudec. Onquiaid icsa adecbidi ènèdtiapimbo iquec. Ana onquiaid icsa tantianec adecbidi icsabudquieic tabadendac.

⁹Nuquin Icho bèdambo iquec, qeshumbic ana icbon, Nuquin Icbon uaid matses icsambo iquec, quequin chuibanoaic. ¹⁰Ana shècuèn utsi bèdamboen chuishumbic utsi icsamboen chuioaic. Aden nuqui chienquio ictiad. ¹¹¿Acte batapenquiocquid choaidènuèsh batambocquidta chopadic? Padenquio. ¹²Adecbidi ¿cuète bacuè batambocquidèn èshè bèchi chopecta dèyuctic? Padenquio. Adecbidi, ¿Isitodo dataniadaidèn bacuè batambo yecta dèyucpadic? Padenquio. Aidi adesa yacpadquieic Esus tantiaquidèn ana shècuèn utsi bèdamboen chuishun utsi icsamboen chiesia ictiad.

**¿Tsutsi Nuquin Papan chiaid
tantianbenquidquio icpec? quiaid**

¹³¿Tsutsi Nuquin Papan chiaid tantianbenquidquio icpec? Adquid yec comapenen Esus tantiaquid nebi, quenquiocquimbi bèdamboec tabadquin ismequid utsi-utsien ma icmebampanuna. ¹⁴Utsin tantiamenushe qeshun èmbia chiacpadomboen ma napanu quesa icta. Nuquin Papan chiacpadomboen nabanquin ismequid icta. ¹⁵Adembidi, utsin dèniacnushe qeshun namenun chuinuequid Nuquin Papan tantiacpadomboen pausunacmaid

nec. Adquid mayan icsan tantiacpadomboen pausunaid nec.
¹⁶Aden aidën icsamboen tantiacpadomboen abëd icquidon adomboembidi tantiec. Aden tantiec, Utsi dëniacnu, quiash utsi-utsiec dëniacnuequido dadpen yanec. Adquid dadpen icnuc chuiquid dapa tantiate bunesa icpec. Cuesnante bunquieic. Ad icnuc icsateuidi bunquid yampec.
¹⁷Nuquin Papan tantiacpadomboen pausunaid ad yenquio iquec. Ambi tantiacpadomboen pausunaid yec utsibëd bëdamboec tabadquid iquendac. Adembidi utsi tantiaquin nashunquidquio icoaindac. Adembidi ëbëdtan nabanec cho cac nabanendac. Adembidi, Icsamboquid nec, quenquiocquin bëdamboen nabanquin ismendac. Adembidi, Esus tantiaquid nebi, abi quiacpadomboen bëdamboen naic. Adecbidi utsibo chiec muaisa nendac. ¹⁸Ambia tantiaquid utsibëd bëdamboec tabadquin ismiac adecbidi utsibëd bëdamboec tabadquid dadpen yanendac.

Ëbi nua pausun, quequin chiash Nuquin Papan dayunquio tsadta quiaid

4 ¹¿Atotsi quiash Esus tantiaquido cuididianante buncededpec? Mibi icsate bunacpadequi mibi cuididianante bunec. Aiduidquio tantiabudequi mibi chushcananucededec. ²Nëid bunebi, queboedëmbi bedtiapimbo yanquin mimbi cuesunec. Adecbidi, Utsi dëniacnu, quiash chushcananec. Mimbi naiduidi naquin Nuquin Papan tantiacpaden naisa mibi nec. ³Aden naisa icquin Nuquin Papan chiaid niacmane quenquiocquin aidi mimbi chiec. Adec icsanueshun chuisho Nuquin Papan mibi menetiapimbo iquec.

⁴Mimbi inaiduidi chudenquio yacpadquiequi Nuquin Icbouidi

tantienquio yec Esus tantiesan icsate bunquin nacpadomboen mimbi nadenec. Adquid yec Nuquin Papa chieshënuquid nec. ⁵Adenquiocquin Esus tantiaho isun aton Mayan Nuquin Papan Esus tantiaquidtedi meniac bëdamboec tabadec. ¿Atotsieshun Esus tantiaquid aidi menepec quepecta mibi ique? Nad iqueque. Tantia. Chuinu. Con bacuë nec, quequin aton Mayan Nuquin Papan Esus tantiaquido menec. Aden tantiaquin meniac, ¿Esuquidistu tantiaquido cudasquin dëcatenquioda aidën icpec? ⁶Aidëmbi abi chieshenquio yacpaden tantiamebanac icsamane quiash chieshenquio yec bëdamboec tabadta. Nuquin Papan dada uamiampid nad iqueque. Tantiata: “Nuquin Papan chiaid niacquin ambibi naid nasho isun pausuntiapimbo Nuquin Papa iquec. Icsaobi. Ëmbibi bëdamboen tantiatiapimbo iquebique. Ëbi tantiamé, Papa, qesho Nuquin Papan nua pausunac aton icbo chieshënenquiocquid iquendac adquid.”

⁷Aden Nuquin Papan chiaid icnuc, Icsaobique. Mibia Yampidën ëbi nua pausun, Papa, quequin chiash Nuquin Papan dayunquio tsadac bimboecquin ambi chiaid tantiata. Nuquin Papa chieshënuquid mayan icsan yuadenda. Adquidën yuatiapimbo iquebique. Nuquin Papan chiaidquio nabanu, qeshun nabanuc mayan icsa cuenendac. ⁸Aton dayunquio tsadquid bimboecquidbëd tabadquidquio Nuquin Papa nec. Icsash uano tsadquid icboedi bëchishash acten dapanudac bimboen mimbi tantiaid icsa ënta. Adash, Tantiad bëda pausumenu, quiash Nuquin Papan dayunquio tsadac bimboecquin chieshenquiocquin ambi chiaiduidi tantiadeneta. ⁹Aden tantiec tsadboedi, Ëmbibi tantiembi, quec Nuquin Papa chieshënuquidën

dayunquo uano tsadashic, Con Ibo tantiec unësquo iquebi, quiash shubiec mamënenquo yec tsadta. Mibibi uano tsadquid yash unësac bimboec icboedi choec isadcuenac bimboec Nuquin Papan dayunquo tsadac bimboec yec chieshenquo yec bëdamboec tsadoata. ¹⁰Uano icboedi choash, Ēbibi icsaobi. Nēbi icsate bunenquo iquebi. Mimbi chiacpadtiadquo iquebi, Papa, quequin chui. Aden mimbi chuisho tantiaash, Puduedash nēmo ebēd tsadac bimboec mibi yanoaic, quependac Nuquin Papa.

¹¹Utsibo, Esus tantiaquidtedi min utsibimboecquid nec. Mibēd icquid icsamboec chuinanenquo yacpadquiec Esus tantiaquid utsibēd icsamboec chuinanenda. Esus tantiaquid icsamboec chuinanquid Nuquin Papan chiaid niacquid nec. Aden chuiquid Nuquin Papan chiaid icsambo iquec quiac bimboecquid nec. ¹²Nuquin Papa Chuiquid Dapa Abentsēcquiobi iquec. Ambi chiacpaden naquidquo nec. Nuquin Papa abitedi Isquidquo Abentsēcquiobi nec. Aden isquin: Nēd icsambocquid nec. Nēdien bēdambocquid nec, quequin Chuiquidquo abentsēcquiobi aidi neoaic. Adquid icquin ambi chiaid nabanquid abēdi tabadmec. Ambi chiaid niacquidien abēdi tabadmenquiocquin uquē nēsacaindac. Nuquin Papan ambi chiacpadomboen naquidbēdtabi ambi chiacpadomboen naisa isquidquo icquin ambi isacpaden cuidendac. ĀAdquidbidida mibi ne? Padenquo. Adquidpenquo icquin ėatotsieshun, Icsambocquid nec, quequin mimbi chuipe?

Ma badiadshun nanun chiaid tantiesa neyoc, quequin chiaid

¹³Tantiaquidquo nebi, quiash, Piucquid bednuec seta abentsēc

matamec chonoadec nidebi, quequid chuinu. Tantia. ¹⁴Ma adquid badiadshun nanun chiaid tantiesa mibi neyoc. ĀTedtsi seta matamec mibi tabadpe? Badiadbudnuc cuen-cuempambo yash badedquo nidac bimboec matses nidaidēn tabadash adecbidi mibi nibēdanendac. ¹⁵Naden nanu quenquiocquin nadembien tantiatiad: Nuquin Papa bunaid icnuc badiadash isedec nidebi, quetiad. Adecbidi, Nuquin Papa bunaid icnuc badiadshun tied neshcaimbi, quetiad. ¹⁶Aden chienquiocquimbi mibi utsi dēniaquec onquiaid mimbi chiec. Aden chiec icsaic. ¹⁷Nuquin Papan chiaid tantiembi, qeshun adomboen natiadquidi naisa iquec icsaic.

Na dadpen bedbanquin dayun uaquido chiaid

5 ¹Nēbi aton na dadpen bedbanquin dayun uaquido chiembique. Tantiata. Mibi unēsun mimbi bedbanquin daēd uaid mimbi tantiaidquo buantiapimbo mibi iquendac. Aden mimbi bedbanquin daēd uaiduidtsēqui icsho isun Nuquin Papan mibi cuidendac. Adquid nebi, quequin tantiaash shubita. ²Unēsosh, quequin chiac mimbi dadpen dayun uaid nibēnquin isac ēnden chodquiac. Adem bidi mimbi bēdaidquo dectanaid capishton ēnden piac. ³Min shocosh piucquid ēnden chuiidac. Adecbidi min piucquid utsi ēnden tiadac. Adenuidi tantiaquin bedbanquid unēsacsho abi yacno yuedquin, Bēdamboen mimbi naoc, quetiapimbo Nuquin Papa iquendac. Tanunēnquo shubu nēdēnquiash nibēdacpadquiec mimbi bedbanaid nibēdquendac. Adenuidi tantiaquin, Esus ēbi bedec chonoshe qeshun ĀNuquin Papa yacno puduedmenun tsutsimbi Esuquidistu

chuibampe? quequin tantienquiocquin mitsana dadpen bedbanshun mimbi dayun uaoc. ⁴Adembidi mimbi icsamboen naid utsi iqueque. Tantia. Min tied uaquido mimbi chono uaboedo bunec sidquec. Aidi mimbi menenquio yaid Esuquidistu tantiaquido Nuquin Papan tantiaido nec. Adembidi, Con tiedèn caniquidtsen dayun uanu, quequin mimbi bedmiaido uëshquec bunec sidquesho Nuquin Papan, Nadatiambocquid Abentsëcshun tantiec. ⁵Aido bunec sidquenubi chonoadenquiocquin nua pec mibi tsadec. Adec tsadquin min nami bunaiduidi tantiaquin mimbi bedbanoaic. Nua pec cubudacimboen mibi bunaiduidi bedbanquin dadpen dayun uaquido mibi nec. Aden nabanquin bédamboec tabadaid ismesa mibi nec. Adec tabadec unëshash abi yacno mibentsëqui chosho Esuquidistu tantiamibocquid nec, quequin Nuquin Papan mibi isendac. Aden isquin mimbi chono uaido mimbi cuidacpadomboen aidëmbi mibi cuidendac. ⁶Mimbi chiaid mimbi chono uaidon niaquenquiocquin nabanacshobi, Icsamboen mimbi naoc, quequin daëdpactsëc mimbi menebampoc. Aden nabanec mimbi cuesuniacimboec bunquieac chonoadequi unëshosh.

**Ma Nuquin Icbo chono
quiash chieshesa icta quiaid**

⁷Nëbi utsibon chono uaido chuinu. Tantiata. Nuquin Icbo choec quequin tantiec chieshenquo yec tabadta. Nitsinash ma caninu quianec pec nidash cainec icbo tabadec. ⁸Adembidi, Nuquin Icbo ëbi bednuec choec, quec bédamboec tabadquin caimbudta. ⁹Adec tabadquin Esus choate cainec Esuquidistu tantiaquid utsibobëd chieshënanenda. Adec utsibobëd

bédamboec tabadsho isun abitedi tantiaquidënuquo Chuiquid Dapan mibi menequin bédamboen cuidendac. Adesain menenquiocquin cuidendac. Adembidi, Nëidën bédamboen naosh. Nëidëmbien icsamboen naosh, quequin ëbi Chuiquidënuquo chiendac, quec chieshenquo yec bédamboec tabadta.

¹⁰Utsibo, natiatequid icnuc Nuquin Papan chiaid ambi chuimiaido chieshenquiocpampic. Aidquio chuibanu. Tantia. ¹¹Natiaid icnuc chieshenquiocsho isun Nuquin Papan bédambo icmendac, quequin nuqui tantiondaid nendac. Natiaic cametequid icnuc Nuquin Papa chieshënenquiocquid Obo icpampic. Aton na dadpen icboedi icsatequid utsi-utsiectsëcquieccquidën uesac nibëdquiocsho isash, Con nabëd con nabo nibëdnuc Nuquin Papa bédambo iquec, quec chieshenquiocpampic Obo. Adquid icsho isun daëd uaquin Nuquin Papan meneoapampic. Matses tantiaquin naquidquio Nuquin Papa nec, quequin ¹²abimbo chuiquidquio icta. Utsin: ¿Ada naden natsia? cac, Ai, quiacpadomboen nabanta. Adembidi, Padenquo, quiacpaden nabanoata. Mua uanec onquequid Nuquin Papan cuidendac.

**Nëidic bédampec quequin abimbo
tantianuc quiaid**

¹³¿Natiambo icsatequid icnuc dayactiapimbo icquidta icpec? Adquidënuquo Nuquin Papa chuitiad. ¿Bédambo iquebi, quec tsadquidta icpec? Adquid Nuquin Papan naid chiec cuëdëntiad. ^{14,15}¿Aton dada icsabudquidta icpec? Adquidën ambia Esus tantiaquido chuiquin, Nuquin Papa ëbi chiec cho, catiad. Adsho tantiaschoshon icsabudquid tantiaquin anoshonuidi Nuquin Papa chuidoneta.

Aden chuidoneshun cuëte bacuë ënë chinshun dashunquinqin, Mimbi utsibo bédamenédacpadomboen mimbi tantiacpaden nëidtsen bédame, Icbo, quequin chuita. Aden Nuquin Papa chuinnun mibi icsaid icnuc, Icsaobi, quequin mimbi naid Nuquin Papa chui. Adembidi dada icsabudaaid chuiquin, Mibi icsaid icnuc Nuquin Papa chui ma mibi paucnu, quequin chuita. Aden ambi naid icsa chiacsho paucacpaden ma aton dada bédamepanuna. ¹⁶Abi icsaid uesquin Nuquin Papa chiash bédamboec tabadendac. Adquidën chiac dada icsambocquid Nuquin Papan bédamendac.

¹⁷Edias nuquibimboecquid matses icpampic. Nuquin Papan nua pausunac Nuquin Papan tantiacpadomboen

Ediasën tantiapampic. Adquid icquin, Ue secamenda, Papa, cac adecbidi seta 3ted matamiash seta utsi choabicnuc ue sequenquio icpampic. ¹⁸Adembidi, aidëmbi yuecshun, Ue secame, Papa, cac ue sequenuc tiedën caniquid canipampic.

¹⁹Esus tantiaquidën Nuquin Papan chiacpadomboen nabamboedi adoesa utsi-utsiec yantsiash. Adsho isun Nuquin Papan chiaid tantiaquidëmbi icsamboen tantiaid chuibanac Nuquin Papabëd yacbimboec icoaindac. ²⁰Aden mimbi chiac chieshenquio yec tabadsho isun Nuquin Papan uquë nësiatiapimbo adquid iquendac. Adecbidi abi icsaid bëpiscudoaic Nuquin Papa.

Padi. Mibi tantiaquin aiteded dada uaombi.

PETEDON DADA UAID I

Petedon tauamboen chiaid

1 ¹Petedo nebi. Abëd icquid icsho Esuquidistun: —Èbi chuibeneta —caidquio nebi. Esus tantiaquidtedishun mimbi iste dada uanu. Isadaidbo icsho nuquin nidaidëns hun ënden cuemenëdac mais-maisacchobi yec nidaid utsi-utsiec yacno mibi tabadec. Utsi-utsiec nidaid Ponto caid yacno tabadec. Utsi-utsiec nidaid Cadasia caid yacno tabadec. Utsi-utsiec nidaid Capadosia caid yacno tabadec. Utsi-utsiec nidaid Asia caid yacno tabadec. Utsi-utsiec nidaid Bitinia caid yacno tabadec. Aidtedi nidaid yacno tabadquidon iste nëid dada uaic nebi. ²Ëndenquio Nuquin Papa: —Èmbi tantiactedi matses ëbëdta Esus tantiamendambi —quepampic. Nëbi ambi tantiacpadomboen aton Mayanën Esus tantiamequin nuqui bëdamboec tabadte bumec. Adoac: —Icsambo icquid cuidmenquio icnuec abided cuidadaid Esus tantiasho Nuquin Papan ëbi bëdamboen isec. Aidën chiacpadomboen natiadquio iquebi —quequin Esus tantiec nuqui bëdamboec tabadec. Aden tantiaquin Nuquin Papa chianembi naden. —Ënenquio icquin aido bëdamboen ista, Papa. Adembidi dacuëdenquio icnuc bëdambo icmeta, Papa —quequin Nuquin Papa mibi chianembi.

Esus tantiaquid Nuquin Papa yacno tabadte chiaid

³—Nuquin Icbo Esuquidistun Papa Nuquin Papa bëdamboshë iquec —canuna naden tantiaquin. Icsaquido cuidte bunenquio icquin utsiacbmboecnuc nuqui icmenuen Nuquin Papan abided cuidadaid Esus nuqui tantiamiondash. Adoac nuqui naden tantiec. —Esuquidistu chococac uincuenash padpidec unëstiapimbo iquendac. Adembidi nuqui unësacsho uincuemeshun Nuquin Papan abi yacno nuqui tabadmendac padpidec unëstiapimbo icnuc. ⁴Ambi chiampicpadomboen bëdamboshë yacno Esusbëdquio ëbi tabadmendac. Unëstequid nibëdec icsabudtequid nibëdec chodquetequid nibëdec quiacnombo Esusbëdquio nuqui tabadmendac —quequin nuqui tantiec. ⁵Aden Esus tantiaquid icsho isash: —Con Mado Esus tantienquio yanushe —quiash nadatiambo icquin nabanquid yec Nuquin Papa nuqui cudasec. —Esus chote ushën ëbi yacno tabadmendambi —quec Nuquin Papa nuqui cudasec. ⁶Èmbi aden chuisho tantias mibi cuishonquendac. Esus tantiesabon chieshënac shubiantiadtsëcquio yec natiaboedi mibi bëdambo yanendac. —Nuquin Papabëd tabadec quenenendabi —quec yuec nuqui shubienquio iquendac. ⁷Nuqui

cudasquid yec *átotsi* quiash Nuquin Papa: —Padi. Chën. Esus tantiaquido natiamenda —queboedi adenquio icted-ictedpec? Matsu nacnenquidën: —Ma tsasinu —quequin ambi nacnenaïd tauiec. Adembidi Esus tantiaquid chieshtoenquio icquid icmete Nuquin Papa comapenec bunec. Matsu nacnenquidën: —*Ë*Bëdambo icquidida neque? Isnu —quetanquin matsu tauiec. Adembidi: —*Ë*Esus tantiaquidquobida neque? Isnu —quequin: —Natiamenda —cainquio iquec Nuquin Papan. Aden natiamiaqui chieshtoenquio icquid icsho Esuquidistun padpidec choshon: —Mibi bëdambo iquec. *Ë*bëdi tabadec cho —quequin utsibo tantiamequin chuishun abi yacno buanendac.

⁸Aden mimbi isacmaïdi Esus mimbi tantiaquiec. —Nëbi isadenquio icquidi Nuquin Papan Madombo Esus ëbi bednuec choendac —quec mibi cuishonquianec. ⁹—Abi tantiasho icsano nidmenquio icquin Esusën abi yacno ëbi yuedendac —quec Esus tantiec mibi cuishonquianec.

Esus chote tsusedpabon chiampid

¹⁰*Ë*endenquimboshë Nuquin Papan tantiamiac isadaïdbo tsusedpabon Nuquin Papan chiaïd chuïquidon Esusën matses cuidmenquio icte dada uapampic. Esusën nate abitedi tantienquio icquin daëdpectsëc tantiaquin: —*Ë*Mitsipadquid Nuquin Papan chomepeba?

—queded-quededquin chuipampic nuquin tsusedpabo isadaïdbon.

¹¹Aïdobëd icquin Esuquidistun Mayanën tantiamiac Esus chote abentse-abentsen chuipampic. —Matsesën chieshënquin cuesten dectanac matses cuidmenquio icnuec abided cuidadec unësendac. Adec unësascho uincuemiãc padpidec abitedishun Ico icoaindac —quequin

Esus chote chuipampic. —*Ë*Tsutsi chopec? *Ë*Tedectsi yash chopec? —quequin abitedi tantiatiaquio icquimbi daëdpectsëc isadaïdbo tsusedpabon tantiapampic. ¹²Naden Nuquin Papan tantiamepampic. —Mibi nibëdanan ëmbi chuïboed ëmbi matsesmiãcsho utsibon isendac —quequin tantiamiac Esusën nate chuipampic. Aden chiampicpadomboen Esusën naondash. Nuquin Papan Mayanën tantiacpadomboen aid chuïbenequidon aidën naid mibi chiac caondash. Aden Esusën naid Nuquin Papan abi yacnoshon uaido mayan bëdabontsen tantiatiaquio icquimbi abitedi tantienquio iquec.

Bëdamboec tabadte tantiamiaïd

¹³*Ë*mbi chuïboed Esus tantiaquido icquin paposhquiacbimboen Esusuidi tantianuna. Nuqui icsate bunacpadec icsainquio yec bëdamboec tabadnuna. —Abi yacno tabadmenuen Esuquidistun abi tantiaquido beduanendac —quequin tantianuna ënenquio icquin. ¹⁴Ambi: —Con mado nec. Con champi nec —caïdo icquin Nuquin Papan chiacpadomboen nanuna. *Ë*nden Nuquin Papan chiaïd tantiabi mibi bunaid naic mibi icsanëdãcãdec icsainda. ¹⁵Mibi Esus tantiamequid icsaisambo Nuquin Papa neque. Ambï chiaïd niaquenquio yec bëdamboec tabadnuna. ¹⁶Nuquin Papan ambi chiaïd naden dada uamepampic. “*Ë* Nuquin Papa icsaisambo nec,’ quiash icsaisa ictiadquio yec bëdamboec tabad,” quequin Nuquin Papan ambi chiaïd dada uamepampicãdec bëdamboec tabadnuna.

¹⁷Papa quequin nuqui chianeboed Nuquin Papa matsesën naidtedi chuïquid nendac. —Nëïd ëbi tantiesa neque. Icsano nidmenu. Nëïd ëbi

tantiaquid neque. Ēbēdi tabadmenu —quequin matses abitedi chiendac. —Abēdi tabadmenquio icnushe —quiash Nuquin Papabēd icte bunec bēdamboec tabadnuna. ¹⁸Nuquin tsusedpabon chiaiduidi naquin Nuquin Papa tantienquio nuqui icpondac. Aden Satanasēn yuaido icsho Nuquin Papan nuqui bēdamboen istiapimbo icpanēdash. Adshun Satanas nuqui bedshunuen ėpiucquidida Nuquin Papan menepanēdash? Padenquio. Adquid icsabudtequid menenquio icquin ¹⁹aton Mado Esus icsaisambo icsho matsesmepanēdash. Aden matsesmiacsho chieshēmēnquidēn cuesten dectanac Esus aton intac chididiquec abided cuidadec unēspondash. Nēbi aton Mado Esus tantiaquido bēdamboen isquin Nuquin Papan Satanas bedshunec. Aden Nuquin Papan bedshunaid yec bēdamboec tabadnuna. ²⁰Ēndenquimboshē abitedi uabi Nuquin Papa nadpampic. —Ēmbi tantiacpadēn yuecash matsesash matses cuidmenquio icnuec mibided cuidadec unēsta, Mado —quepampic. Aden ambi chiampicpadomboen badedquio namenquio icboedēmbi nēbi nameshun Esus tantiasho mibi bēdamboen isec. ²¹Abi tantiasho Esusēmbi Nuquin Papatsen nuqui tantiamec. Adoac nuqui naden tantiec. —Esus unēsacsho uincuemeshun abēdi tabadmequin abitedishun Icbombo Nuquin Papan icmeoapanēdash. Ambi chiacpadomboen naquidquio Nuquin Papa nec. Ēbi unēsacsho uincuemeshun abi yacno ēbi tabadmendac —quequin Nuquin Papatsen nuqui tantiec.

Esus tantiaquido tantiananquiotē chiaid

²²Nuquin Papan chiacpadomboen naic bēdambo yanshun mibēdtan Esus tantiaquido utsibo mimbi tantiec.

Adecbidi muenquio yec tantiananquionona. ²³Esus tantiamequin Nuquin Papan chuca uaido nuqui neque. Adquid yec tantiananquionona. Nuqui chuca uaquid Nuquin Papa nibēdantiapimbo icquid icnuc ambi chiaid bēnudtiapimbo iquec. Aidēn chiaid tantiashun mimbi Esus tantiabempanēdac. ²⁴Ambi chiaid bēnudtiapimbo icte Nuquin Papan nuquin tsusedpa dada uamepampic naden chuiquin.

“Uasimbimboec unēsquid matses nec.

Cuēte bacuēec bēdamboshē isadboedi badedquio chodquequid nec. Adecbidi matses: ‘Con nabēdi bēdamboshē iquebi,’ queboedi badedquio unēsquid nec.

²⁵Nuquin Papain nibēdantiapimbo icquid nec. Adnuc ambi chiaid bēnudtiapimbo iquec,” quequin abimbo chuiampic. Aidēn chiaidquio mibi chiac caondash.

Nuquin Papan chiaid iste bunquionona, quiaid

2 ¹Aden Nuquin Papan chiaid tantiash chieshēmēnec tabadenda. Utsi muauainda. —Esus tantiaquid nebi —quiashi icsamboec tabadenda. Utsin na isash: —Adquid con na nibēdec —quec chieshēmēnec tabadenda. Utsibo chieshēnec icsamboec onquenda. ²Adenquio yec Nuquin Papan chiaid iste bunquionona. Tishac chucactsēc bacuēmpi shuma chishte bunquiacbimboec Nuquin Papan chiaid iste bunquionona. —Bēdiactsēc tantiaboedi aid isban-isbanquin Nuquin Papan chiacpadomboen natiadquio yantsiabi —queshun Nuquin Papan chiaid isbanuna. ³—Esus tantiec bēdambo iquebi —queshun Nuquin Papan chiaid isbanuna.

Buintadbimboecquid Esus nec, quiaid

⁴Nuquin tantiaid nadquio iquec. Shubu uanun buintadquio nacnitsinuen istuidshun: —Nëid bēdambo iqueque. Nēidquio naimbi —quiacbimboen Nuquin Papan: —Ĕmbi tantiaidquio yec mibi bēdambo iqueque. Ĕmbi chiacpadomboen mibi namenu —capanēdash Esus. Adoaid matses dadpenhunquio Esus chieshēnondash. Padnuen nuqui: —Nuquin Papa yacno puduedmianquid bēdambo iquec —quequin nuqui Esus tantiabempondac.

⁵Aden Esus tantiaquido icsho isun Nuquin Papan aton shubun icquidobimboecnuc nuqui icmec. Adoac: —Con matses Esus tantiamē, Papa —quequin Nuquin Papa chianequid nuqui yanec. —Nuquin Papa bēdamboshē iqueque. Ambi chiacpadomboenuidi natiadquio iquebi —quec bēdamboec tabadquidtsen nuqui yanec. Adsho isash: —Bēdambo iquec —quependac Nuquin Papa nuqui caic.

⁶Aden aton Mado Esus tantiate chuiquin Nuquin Papan dada uamepampic naden.

“Buintad bēdambo icquid istuidash: ‘Nēidquio shubu uanun nitsinēmbi,’ quiacbimboen Edusaden yacno ěbi bēdamboen ismequidquio isadaidbobēd tabadmendambi.

Aid caic: ‘Nēid tantiaisho Nuquin Papan abi yacno nuqui tabadmendac,’ quequin abi tantiaquido unēsacsho ěbi yacno tabadmendambi,”

quequin Nuquin Papan ambi chiaid dada uamepampic. ⁷Aid tantiec: —Bēdamboshē iquec —quependac Esus tantiaquido. Utsibombien Esus chieshēnec. Ĕndenquimbo Esus choabi icnuc aidēn nate chuiquin Nuquin Papan dada uamepampic naden.

“Buintad bēdambo icquid istuidashi: ‘Nēidquio shubu uanun nitsinēmbi,’ quetiadquidi isuidacbimboen Nuquin Papan namiaid chieshēnac.

Aden buintad isuidaid utsin bedshun shubu uanun nitsinacbimboen Nuquin Papan tantiamiacpadomboen utsibon ambi namiaid tantiosh,”

quequin Nuquin Papan dada uamepampic. ⁸Adshumbic Esus chieshētetsen dada uamepampic naden chuiquin.

“Nuquin Papan abipadquidquio Edusaden yacno isadaidbobēd tabadmiacsho ambocquidon chieshēnendac.

Aid chieshēnquid nadquio iquendac. ‘Cuēte mabud iquec,’ quequin tantienquio yec nidec tocoshquetanec uebudacbimboec ěbi bēdamboen ismequid tantienquio yec unēsash icsano nidendac,”

quequin Nuquin Papan ambi chiaid dada uamepampic. Aden Nuquin Papan chiaid tantiatiapimbo icquin Esustsen tantiatiapimbo iquec. —Adquid icsano nidmendambi —quequin Nuquin Papan tantiacpadec Esus tantiesabo yec unēsash icsano nidendac.

Nuquin Papan matses nuqui nec, quequin chiaid

⁹Esus tantiesabo dadpen icnubi Nuquin Papan Esus tantiamiaido nuqui nec. Icsambo iccondaidi nuqui Esus tantiamēpondash paposhquiacbimboecnuc. Adoac: —Nuquin Papa bēdamboshē iquec. Ambi chiacpadomboenuidi natiadquio iquebi —quec bēdamboec tabadquid nuqui yanec. Adembidi: —Con matses Esus tantiamēta, Papa —quequin

Nuquin Papa chianequid nuqui nendac. Adecbidi: —Nuquin Papa bēdambo iquec —quequin utsibo chuibanquid nuqui nendac. ¹⁰Ēnden abi tantiesabo icsho Nuquin Papan mibi bēdamboen istiapimbo icquin: —Con matses mibi nec —mibi catiapimbo icpanēdash. Nēbi Esus tantiasho Nuquin Papan mibi bēdamboen isquin: —Con matses mibi nec —mibi caindac.

Bēdamboec tabadte chiaid

¹¹Ēmbi tantiaido mibi neque. Tantia. Mibi chuinu. —Nuquin Papa yacno tabadendabi —quiash Esus tantiesab icsate bunacpadec icsainda. —Esus tantienquio yamane —quiash bēdamboec tabadta. ¹²Esus tantiesabobēdi bēdamboec tabadnuna. —Ma aidontsen Esus tantianu —quiash adnuna. Adec mibi bēdamboec tabadsho isun mibi chieshēnquin icsamboen chuishumboedombi Esus tantiabenshun Nuquin Papa naden chiendac. —Mimbi namiaido bēdamboec tabadsho isun Esus tantiabenombi. Mibi bēdambo iquec, Papa —quendac.

¹³Bēdamboec tabadnuna. —Con Icho Esus matsesēn chieshēnushe —qeshun matses chuiquid dapatedishun chiacpadomboen nanuna. Nuquin nidaidēn tabadquido abitedi chuiquid dapa pedesidente caidēn chiacpadomboen nanuna. ¹⁴Aidēn: —Mibitsen matses chuiquid icta —caidon chiacpadomboentsen nanuna. Matses icsasho isun cuidquid neque. Adecbidi bēdamboec tabadsho isun: —Bēdambo icquid nec —caquid neque. Aidēn chiacpadomboen nanuna. ¹⁵Aden Nuquin Papan chiacpadomboen naic bēdamboec tabadsho isun: —Icsamboec tabadquid nec —mibi caboedobi adtiapimbo yantsiash. Aden piushbimboecquin tantienquio icquin

icsamboen chuiboedombi ambi icsamboen chiaid ěntsiash.

¹⁶Satanasēn yuaido icsho Esusēn bedshunaid yec nēbi icsambo icquidēn yuapenquio yec bēdamboec tabadnuna. Icsanuec: —Utsin yuapenquio yec ēbi bunaiduidi naimbi —quenda. Nuquin Papan yuambo yec bēdamboec tabadnuna. ¹⁷Matses abitedi bēdamboen isnuna. Esus tantiaquido icquin nuquibēdtan Esus tantiaquido utsitedi tantiaquionona. Dacuēdampambo Nuquin Papa icsho tantiash bēdamboec tabadnuna. Chuiquid dapambo pedesidente caid bēdamboen isquin aidēn chiacpadomboen nabanuna.

Yuabo chiaid

¹⁸Tantia, yuabo. Esus tantiaquido icsho mibi chuinu. Min icbon chiacpadomboen nata. Min icbo bēdambo icquid icnuc adota. Min icbo dacuēdampambo icquid ancanquidquio icnubi adembiti nata. ¹⁹Adec Nuquin Papa tantiaquid yec bēdambo icsho cuesaqui chieshēmēnenquio icsho: —Aid yua bēdambo iquec —quequin Nuquin Papan mibi bēdamboen istiashe. Min icbon chiacpadomboen nata. ²⁰Īcsamboec tabadquid cuesac chieshēmēnenquio icquidta Nuquin Papan: —Aid yua bēdambo iquec —capatsiash? Padenquio. Nuquin Papan chiacpadquiec bēdamboec tabadquidi cuesaqui chieshtoenquio icsho: —Aid yua bēdambo iquec —Nuquin Papan catsiashe. Bēdambo icta.

Chieshtoenquio yec Esus unēsaid

²¹—Chieshēnaqui chieshtotiadquio iquebi —¿quecta ique? Tantia. Mibi chuinu. —Con Mado Esusbimboec ma icnu. Chieshēnaqui ma chieshtoenquio icnu —qeshun Nuquin Papan nuqui Esus tantiaquid icmepondash. Esus

nadondash. Nuquin Papa nuqui cuidmenquo icnuec abided ciudadec mëyadec unëspondash. ²²Nuquin Papan dada uamepampicpadquo “muesambo yec icsaisambo icpondash.” ²³Adquid icsho abi chieshënquidon mamënshunaqui Esusën chushcainquo icpondash. Aidon matonbudnetanquin buanshun cuesten dectanac: —Mibitsen cuidendambi —cainquo icpondash. Adenquo yec nadpondash. —Nuquin Papan matsesën naidtedi tantiaquid icquin bédambo icquid abëdi tabadmequin icsambo icquid cuidquin icsano nidmendac —quiash chieshëmënenquo icpondash. ²⁴Adash: —Ëbi tantiaquid ma icsaid ucdacamboec bédamboec tabadnu —quiash nuqui icsaid bedshunec abided ciudadec unëspondash. Adec aton Madoded ciudadec unësacsho isash nëish bédanshun Nuquin Papan aton Mado tantiaquido bédamboen isec. ²⁵Yuan icbo cuenënacbimboen Nuquin Icbo nuqui tantienquo icpondac. Adoboedi nëbi: —Con Icbon ëbi bédamboen dayun uaqin ëbi bédamboen namendac —qeshun nuqui Esus tantieque. Bédamboen nanuna.

Bënëbëda chido chiaid

3 ^{1,2}Tantia, chidobo. Bënëchoquid icsho mibi chuinu. Esus tantiaquid icquin min bënën chiacpadomboen nata. —Esus tantiec ëbi bédamboec tabadsho isun Nuquin Papan chiaid tantienquo icboedëmbi con bënën Esus tantiabentsiash. “Mimbitsen Esus tantiabenta,” quequin ëmbi chiambobi Esus tantiabentsiash —qeshun min bënën chiacpadomboen nata. ³Bédamboec tabadquid ictiadquo icquin casëdu payuteuidi tantienda. Adembidi dashcute bédambo icquid dasiuidteuidi tantienda. —“Bédambo

isadec. Mibi bédambo iquec,” mabi canu —quiash nacnemëdteuidi tantienda. ⁴—Bédambo mibi iquec —camenuec bédamboec tabadta. Nëishëmënenquo icquin bédamboen nabanta. Chieshenquo icquin min bënën chiacpadomboen naquid icta. Mibi adquo icsho isash: —Mibi bédambo iquec —quendac Nuquin Papa. ⁵Ëndenquimbo isadaidbo tsusedpan chido Nuquin Papa tantiaquid yec adquo icpampic. Aton bënën chiacpadomboen naic bédambo icpampic. ⁶—Con bënë con icbobimboec iquec —quequin aton bënë Abadauan caidën chiacpadomboen Sada caidën napampic. Esus tantiaquid icsho mamënshunaqui min bënë dacuëdënenquo icquin aidën chiacpadomboen naic bédamboec tabadec Sadapadquo mibi ictsiac. Adquid bédambo iquec. ⁷Tantia. Bënëtsen chuinu. Abia uimabudquid icsho min chido bédamboen ista. Mibëdtan Esus tantiaquid yec Nuquin Papa yacno mibëdi tabadtequid neque. Min chido bédamboen ista. —Ëbi bédamboen ista, Papa —quequin mimbi chiaid Nuquin Papan tantienquo icnushe. Min chido bédamboen ista.

Bédamboec tabad, quequin chiaid

⁸Nëbi Esus tantiaquido abitedi chuinu. Tantia. —Nuquin Papan chiacpadomboen nanuna —quiash bédamboec isnanuna. Cuishonquequidbëd cuishonquec shubiquidbëd shubinuna. Adec tantiananquionona. —Ëmbi naiduidi naimbi —quenquo icquin utsibon chiaidtsen nanuna. ⁹Mibi chieshënaqui cuidnanenda. Mibi chieshënquin icsamboen chuishunaqui cuidnanec icsamboec chuishunanenda. Adenquo icquin Nuquin Papa chianeta. —Ëbi

chieshënquid bédamboen isquin
bédamboen tabadme, Papa —quequin
Nuquin Papa chianeta. —Ëmbi
bédamboen isaidon ma aton matses
utsibo bédamboen isnu —qeshun
Nuquin Papan nuqui Esus tantiaquido
icmiaye. Bédamboec tabadnuna.¹⁰Adec
bédamboec tabadte chuiquin Nuquin
Papan dada uamepampic naden.

“Bédamboec tabadte bunquidën
nadoendac.

Adonante bunenquio icquidëmbi
utsibo muauainquio iquendac.

Chieshënquin utsibo icsamboen
chienquio iquendac.

¹¹ Icsamboec tabadboedi bédamboec
tabadendac. Utsibo
chieshënansho isash:

‘Padi. Chieshënanenda,’ quendac.

¹² Adec bédamboec tabadsho Nuquin
Papan bédamboen isendac.

Aden bédamboen isaidon: ‘Ëmbi
chuisho tantia. Ëbi bédamboen
ista, Papa,’ quequin abi chuisho
Nuquin Papan tantiendac.

Icsamboec tabadshoen bédamboen
istiapimbo iquendac,”

quequin Nuquin Papan dada
uamepampic.

Cuesaqui dacuëdenda, quequin chiaid

¹³ ÷Bédamboec tabadshoda bédambo
icquidën badedquio mibi cuespatsiash?
Padenquio ictsiash. ¹⁴Bédamboec
tabadsho isun icsambo icquidën
cuesacsho mibi Nuquin Papan
bédamboen istsiash. Mibi
chieshënquido dacuëdënda.

¹⁵ Dacuëdënenquio icquin: —Con Icho
Esuquidistu nec —quequin ambi
chiacpadomboen nanuna. Aden mimbi
Esus tantianuc utsibo: —÷Atotsieshun
Esus tantie? —qesho: —“Abided
cuidadec unësaid Esus tantiasho Nuquin
Papan ëbi bédamboen isquin unësacsho

abi yacno ëbi tabadmendac,” qeshun
Esus tantiembi —quequin Esus
tantiesabo chuibanuna. ¹⁶Aden
nëishëmënenquio icquin Esusën naid
chuibanuna. Aden bédamboen chuinuec
Esus tantiaquiec bédamboec tabadnuna.
—Ëbi bédamboec tabadsho isash ëbi
chieshënquin muauaquid: “Bédambo
icquidi muauachitombi. Icsachitobi,”
ma quenu —quiash bédamboec
tabadnuna. ¹⁷—Ëbi tantiaquid utsibon
chieshënenac —quequin Nuquin Papan
tantiacpadomboen Nuquin Papa
tantiaquido utsi-utsien utsibon
chieshënenac. Bédamboec tabadquid
icsho utsibon chieshënaqui nuqui
chieshtoenquio icsho isash: —Mibi
bédambo iquec —quetsiash Nuquin
Papa nuqui caic. Icsambo icsho quënën
nauedaidi nëishenquio icsho: —Mibi
bédambo iquec —cainquio ictsiash
Nuquin Papan.

Esus unësaid tantia, quiaid

¹⁸Chieshënaqui Esusbimboec
chieshtoenquio yec bédamboec
tabadnuna. Aid icsaisambo yequi nuqui
icsaid bedshunec abided cuidadec
unëspondash. Aden Nuquin Papa abi
tantiaquido bédamboen ismenuec
abentsecquiobi unëspondash padpidec
unësenquio icnuec. Aton dada unësambi
aton tantiate unësabi icpanëdash.

¹⁹Adec aton dada unësambi aton
tantiate icnuc ëndenquimboshë Noe
caidën matses abi tantiesabo icsho
Nuquin Papan cuidquin unës uampido
uidën uashun quënën sauedampicno
Esus nidpanëdash. Ambo nidshun
Nuquin Papan cuidpampido Esusën
ambi naboed chuibampanëdash.

²⁰Naden Nuquin Papan aido cuidquin
unës uapampic. Ëndenquimboshë aton
matsesbëd tabadec Noe bédambo icnubi
aton matses icsamboshë icpampic.

Adnubien Nuquin Papan: —Matses icsaquido abitedi uesquin unës uanuen nidaid abitedi acte mabudadmembique. Baded cano dapa nacnen —quequin Nuquin Papan Noe caid chuiampic. Adoac badedquo cano dapa nacnemëdenquo yacpadembi Nuquin Papan badedi cuidenquo icpampic: —Ma abi icsaid ënshun ëbi tantianu —qeshun. Adnubien cano dapa nacnantanec Noe chedo Stedpactsëc cano dapa antabëdtopampic. Adnubien aido antabëdtoaid cano dapa acten bedtoac nuadtopampic. Utsiboen acte mabudadmiaidën mentoadbudnepampic. Noe abi tantiaquidquo icsho Nuquin Papan cuidenquo icpampic.

²¹Adembidi Esus tantiaquo nuqui cuidenquo iquec. —“Esus tantiaquid nebi,” quequin utsibo ismequin acten mentomembi —qeshun nuqui acten mentomec. ¿Bëchish ucquinda nuqui adodi? Padenquo. Nuquin Papa naden chuiquin: —Esus tantiaquin icsaid ucacimboen mimbi chiacpadomboen natiadquo iquebi, Papa —quequin nuqui adoec. Aden abi tantiaquo Nuquin Papan uincuemënëdaidën Esuquidistun nuqui cuidmenquo iquec. ²²Aidi uincuenash Nuquin Papa yacno nidash aibëdi tsadoaic abitedishun Icbombo yanoac. Abitedimbo chuiquid dapa icquin ambi chiacpadomboen abitedi namendac. Nuquin Papan abi yacnoshon uaido mayan bëdabo bëdamboen namequimbic Satanäs aton yuabo mayan icsabobëda Esusën cuidendac.

Bëdamboec tabadnuna, quiaid

4 ¹Nuquin Papan tantiacpadomboen nasho utsibon chieshënquin mëyanaqui Esus chieshtoenuo icpondash. Adembidi chieshëmënuquidën

chieshënaqui adecbidi chieshtoenda. Abided cuidadec unësaid Esus tantiaquin nuqui icsaid nuqui ënendac. ²Aden nuqui tantiacpadomboen nainquo icquin Nuquin Papan chiacpadomboen natiadquo nuqui iquendac. ³Nuquin Papa tantiesabon nacpadomboen Nuquin Papan chiaid mimbi yuen niac-niacpondac. Utsin chido chudquinc utsin bënë chudmequinc tantiadenuen acte paëmbo icquid acquinc: —Nëid papa canu —quequin matsesbimboecnuc nacnenquinc mimbi capondac. Adec icsateuidi bunec mëmuntiapimbo mibi icpondac. Adquid iccondaïdi nëbi bëdamboec tabadta. ⁴Adec bëdamboec tabadsho isun mibëd icsaondaidën: —¿Atotsieshun nuqui naondacpadomboen nainquo ique? Mimbi Nuquin Papa caid nibëdec —quequin mibi icsamboen chuiquin mibi mamëshunendac. ⁵Aden mibi mamëshunquid Nuquin Papan cuidendac. Cuidnumbi matsesën naidtedi tantiaquid icquin Nuquin Papan: —¿Mitsipaden nao? ¿Ada bëdamboec tabado? —cac ënden unësaidobëdtan unësabi icquidotedishun ambi naidtedi uesquin chiendac. ⁶Aden abëdi tabadmete tantiaquin Nuquin Papan namiac Esus chuibenequidon chuibenepondash. Adoac Esus tantiaquido yanash Nuquin Papan Adan cuidquin unësquid icmiacpadec unësquid yec unësashic Nuquin Papabëd tabadendac padpidec unësenquo yec.

Utsibo nashununa, quiaid

⁷Tantia. Mibitedi chuinu. Nuquin Papan cuidte nëbi iqueque. Esus tantiec nuqui icsate bunaid ënash mëmunec bëdamboec tabadnuna. —Ma ëmbi abi chianesho Nuquin Papan bëdamboen

tantianu —quiash adta.

⁸—Tantiananquido chieshënanec cuidnante bunenquio iquec —quiash ënëdenquio yec tantiananquionona. ⁹Nuquibëdtan Esus tantiaquido isedec chosho bëdamboen isnuna. Shubu utsinquido ënapenuësh chosho adembidi chieshënenquio icquin min shubun yued. ¹⁰Nuquin Papan tantiamiacpadomboen nuquibëdtan Esus tantiaquido nashuntiad. Esus tantiaquidquio icmenuen chieshenquio icquin nanuna. ¹¹¿Ada Nuquin Papan Esusën naid chuibanquid mibi icmiac? Adquid icquin Nuquin Papan chiaidquio chuibanquiota. ¿Ada Nuquin Papan mibëdtan Esus tantiaquido nashunquid mibi icmiac? Adquid icmiac: —Nuquin Papan namiacpadomboen matses nashunembi —quequin Esus tantiaquido nashunta. —“Ëbi nashunquid bëdamboen namequid Nuquin Papa bëdamboshë iquec,” ma ëmbi nashunaido quenu —qeshun utsibo nashununa. —Abitedishun icbombo yec Nuquin Papa bëdamboshë iquec —canuna ënenquio icquin.

Chieshënaqui chieshtoenquio icte chiaid

¹²Ëmbi tantiaido mibi neque. Tantia. —¿Atotsieshun matsesën ëbi chieshëmpeba? —¿quecta ique? ¿Mibentsëquida chieshëndic? Ma Esus tantiaquido dadpenquio chieshëmpayoc. ¹³—Chieshënquín Esuquidistu comapenen mëyanacimboen Esus tantiesabon ëbitsen mëyanosh. Esus tantiaquid icshoeni adochitosh —quiash Esus tantiec bëdambo icnuna. —Utsibon chieshënaidi abi tantiaquid ambi namiacno buanuec Nuquin Icho Esus choec —quiash abi chote ushën cuishonquenush adnuna. ¹⁴—Esuquidistu tantiaquid nec —qeshun chieshëmënuquidon natiamiaid mibi bëdambo iquendac. Nuquin Papan

Mayan mibëd tabadquin Nuquin Papa yacno tabadte mibi tantiamequin mibi bëdambo icmendac. ¹⁵Utsibo icsasho abi chuiquidën natiamequin cuidquid. Cuesunianquid yec ampequid yec chieshëmënuquín icsamboen chuishunquid yec quec icsasho chuiquidën cuidsho isun: —Bëdambo iquec —catsiambi. Adec icsainda. ¹⁶Esus tantiaquid icsho utsibon chieshënac dacuëdenda. Adec dacuëdenquio icquin: —Nuquin Papa bëdamboshë iquec. Aton Mado Esus tantiaquid icmiac bëdambo iquebi —quequin ënenquio icquin Esus tantianuna. ¹⁷—Nuquin Papan cuidte ushë nëbi icnuc ambi con matses caido Esus tantiaquido chieshëmënuquidon natiamendac —quiacpaden nëbi tauaquin mibi natiamec. Adsho isun: —Chieshëmënuquidën chieshënac ëmbi tantiacpadomboen abi icsaid ëntsiash —qeshun Nuquin Papan: —Natiamenda —cainquio iquec. Aden abi tantiaquido icsaid ëmete bunquin nashun ¿bëdiactsëcta abi tantiesabo cuidpec? ¹⁸Naden chuiquin Nuquin Papan dada uamepampic. “Aden chieshëndeniác natiambo yan-yanequi unësash Nuquin Papabëd abi tantiaquido tabadendac. Nuqui adnuc ¿bëdiactsëcta ambi chiaid niac-niacquido Nuquin Papan cuidpec? Padenquio. Comapenen cuidendac,” quequin dada uamepampic. ¹⁹Nuquin Papan tantiacpadec mëyadec Esus tantiaquid ma nadpanuna. —Ëbi uaquidën Nuquin Papan ambi chiacpadomboen ëbi bëdamboen namec. Aid tantiec bëdambo iquebi —quiash ma bëdamboec tabadpanuna.

Esus tantiaquido chuibanquid Petedon chiaid

5 ¹Tantia. Esus tantiaquido chuibanquido icsho mibi chuinu. Mibipadquid Esus tantiaquido

chuiبانquid nebi. Paëmboshë icmequin
 Esuquidistu unës uasho isondambi.
 Aidën padpidec nidaidën choshon abi
 yacno buanuen nuqui beduaneque.
 Tantiã. ²Icbo yua cudasacimboec
 mibëd icquido Esus tantiaquido cudasta.
 —Esus tantienquo yanushe —qeshun:
 —Nuquin Papan chiaid niaquenquo yec
 bëdamboec tabad —quequin chuibanta.
 —Esus tantiaquido chuibanquid icta
 —cac: —“Padi,” quetiadquo icquimbi
 naimbi —quenquo icquin: —Aden Esus
 tantiaquido nashumbantsiambi —quec
 Esus tantiaquido chuibanquidquo icta.
 —Pucquid dadpen bednun nanu
 —quenquo icquin Nuquin Papan
 chiapadomboen natiadquo yec Esus
 tantiaquido chuibanquid icta.
³—Nëidtedi Esus tantiaquido
 bëdamboen name —caitedi
 bëdamboen isequi chushcanenda.
 Adenquo yec: —Ëbi yacpadec ma
 tabadnu —quec bëdamboec tabad.
⁴Aden Esus tantiaquido chuibanquidën
 bëdamboen namesho isun Nuquin Icbon
 nidaidën padpidec choshon utsibo
 ismequin: —Nëid bëdambo icquid nec
 —qeshun chuibanquid ambi
 namiaidobëdta abi yacno buanendac.

Esus tantiaquidon nate utsi chiaid

⁵Tantiã, caniabo. Mibitsen chuinu.
 Mibi chuiquid dapabon chiaid
 niaquenquo icquin aidën
 chiapadomboen nata. Aidedtsëqui
 caniabo chuishumbic mibi
 yacnocquidotedi chuinu. —Ëbiuidtsëqui
 bëdambo iquebi. Ëmbimbo naiduidi
 naimbi —quenquo icquin utsin
 nacpadomboentsen nata. Aden chuiquin
 Nuquin Papan ambi chiaid naden dada
 uamepampic.

“Nuquin Papa tantienquo icquin
 aton matses utsibo tantienquo
 icquin ambi naiduidtsëqui nasho:

‘Adquid icsambo iquec,’ catsiash
 Nuquin Papan.

Utsimbien Nuquin Papa tantiaquin
 utsibon naidtsen nasho Nuquin
 Papan bëdamboen isquin
 bëdambo icmec,”

quequin Nuquin Papan ambi chiaid
 dada uamepampic. ⁶Aden Nuquin
 Papan chiapadomboen nabanun.
 Nadatiambo icquid yec abitedishun
 Icbombo Nuquin Papa neque. Utsibon
 chieshënaqui chieshtoenquo icnuna.
 Adec chieshtoenquo icsho ambi
 tantiacpadën utsibo ismequin: —Ëbi
 tantiaquidquo mibi neque. Ëbëdi
 tabadec cho —nuqui caindac Nuquin
 Papan. ⁷Aidën nuqui tantieque.
 —¿Atotsimbi pepeba? ¿Ëbida cuespeba?
 ¿Con matsesta unëspeba? —quequin
 nuqui dacuëdaidtedi Nuquin Papa
 chuinuna.

⁸Nuqui icsate bunacpadec icsainquo
 icquin Esusuidi tantianuna. Esus
 tantiaquido icsho Satanasën nuqui
 chieshënuquec. Esus bedshunuen nuqui
 icsametiadquo icquin bëdin nëish
 nibënacimboen ambi icsametequid
 Satanasën ënenquo icquin
 nibëbeneque. ⁹Ista. Icsamenda.
 Chieshtomenda. —Satanasën
 icsamechitoshe —qeshun Nuquin
 Papan chiaid niac-niaquenquo icquin
 Esus tantiaquionona. —Ëbi
 chieshënacpadomboen Esus tantiaquid
 utsibo nidaid utsi-utsiec yacno
 tabadquido utsibon chieshënac caosh
 —qeshun chieshtoenquo icquin Esus
 tantianuna. ¹⁰Aden utsibon
 chieshënaido yec yuec-yuecpactsëc
 nuqui tabadec. Adshobien abi yacno
 buanquin nuqui bëdambo icmequidën
 Nuquin Papan Satanas nuqui icsa
 uamenquo iquendac. Adembidi Nuquin
 Papan nuqui bëdamboen isquid icquin
 dayacquio yacbimboecnuc

chieshtoenquo icquid nuqui icmendac.
¹¹Ëmbi aden chuisho tantiashun: —Mibi
 bédamboshë iquec, Papa. Mimbi
 tantiacpadomboen abitedi mimbi
 namendac. Abitedishun Icbombo mibi
 nec, Papa —Nuquin Papa canuna
 ënenquo icquin.

Petedon ënquimbi chiaid.

¹²Esus tantiaquidquo Sidas caid
 nēidtedtsëqui ëmbi dada uaboed mibi
 yacno buamembi. —Esusquo
 isondambi. Aid tantiasho Nuquin Papan
 matses bédamboen isbenendac
 —quequin abimbo mibi chiombique.

Chieshtoenquo icquin Esus tantianuna.
¹³Nuquin Papan tantiamiac
 nuquibédtan Esus tantiaquido ëmbi
 Babidonia caid yacnocquidon: —Aido
 unësquo iquec —mibi caosh. Babidonia
 caidbidi Doma caic. Con
 madobimboecquid Madcosën —Aido
 unësquo iquec —mibi caosh.
¹⁴—Ëbédtan Esus tantiaquido nec
 —quiash: —Mibi unësquo iquec
 —cananuna. —Ma Nuquin Papan mibi
 Esus tantiaquidotedi bédambo
 icmepanu —quequin Nuquin Papa
 chianembi. Padi. Aidedi chuiquin dada
 uaombi.

PETEDON DADA UAID II

Tauamboen chiaid

1 ¹Petedo Simon caid nebi. Abèd icquid yec aton yuambo icsho Esuquidistun: —Èmbi naid chuibeneta —caidquio nebi. Èbèdtan Esus tantiaquido mibi neque. Mimbi iste dada uanu. Abi tantiaquido cuidmenquio icnuec abided cuidadaid Esus tantiasho Nuquin Papan bédamboen isaido nuqui nec. ²Èbèdtan Esus tantiaquido icsho mibi tantiaquin Nuquin Papa chianembi naden. —Aidon Esus tantiatsècsho mibèdta Esus tantiamequin bédambo icme, Papa. Aido bédamboen isquiota, Papa —quequin Nuquin Papa chianembi.

Nuquin Papan bédambo icmete chiaid

³Comapenen tantiaquid icquin Nuquin Papan namiac aidèn chiaid niac-niacte bunenquio yec Esus tantiaquido bédamboec tabadec unèsash Nuquin Papa yacno tabadendac. Abipadquid utsi nibèdnuc bédamboshè icquid icquin Nuquin Papan Esus tantiamiaido nuqui nec. ⁴Abipadquidquio Esusèn chiondacpadomboen abi tantiaquidobèdta Nuquin Papan aton Mayan tabadmequin bédambo icmec. Aden abipadquio icnuc bédambo icmiac icsate bunenquio yanec nuqui bédamboec tabadec. Utsibo icsateuidi bunec icsaquionobi nuqui bédamboec tabadendac.

⁵Aden Nuquin Papan Esus tantiamiaido yec dayacquio yac bimboec ènèdenquio yec bédamboec tabadnuna. Adecbidi Nuquin Papan chiaidquio tantiec tabadnuna. ⁶Aden Nuquin Papan chiaidquio tantiec nuqui icsate bunacpadec icsainquio icquin mèmununa. Aden mèmunquid yec nuqui chieshènquidbèdi chieshènanenquio yec chieshtoenquio icquin Esus tantianuna. Nuquin Papatsen tantiec bédamboec tabadnuna. ⁷Aden Nuquin Papabèdta Esus tantiaquido yec nashunanquionona. Adec nashunanquioquin Esus tantiesabo tantianuna. ⁸Èmbi chuibodetedi nabanquin chieshtoenquio icquin adenuidi nanuna. Aden naquin Esus bèdiactsèc tantiatsècboedèmbi chieshtoenquio icquin nuqui Esus tantiaquiotsiac. ⁹Èmbi chuibocpadomboen naisa pamumèdac bimboec iquec. Adquidon: —Aton Mado Esus tantiasho icsaid ucudac bimboecnuc Nuquin Papan nuqui bédamboen isec —queboedombi bèpiscudquin tantienquio yanec.

¹⁰Èbèdtan Esus tantiaquido mibi neque. Tantia. Mibitedi chuinu. Èmbi aden chuisho tantiash chieshtoenquio icquin Esus tantiec bédamboec tabadnuna. Adec tabadquin naden nuqui tantiendac. —Èndenquimboshè èbi tishabi icnuc èbi caic: “Esus tantiamendambi,” quequin ambi chiampicpadomboen Nuquin Papan

nēbi tantiamiac Esus tantiabenombi
—quequin nuqui tantiendac. Aden
tantiec Esus tantienquo icquid nuqui
yanenquo ictsiac. ¹¹Adec bēdamboec
tabadash unēsacsho: —Ēbi tantiaquid
mibi neque. Ēbēdi tabadec cho
—qeshun ambi namiacno abēdi
tabadmequin Nuquin Icho Esuquidistun
nuqui bēdambo icmendac padpidec
unēsenuo icnuc. ¹²Ēmbi aden
chuiboedtedi mimi tantiondac. Aden
tantiabosh Esus tantiec mibi bēdamboec
tabadcuenondac. Aden mimi
tantiondaidi mibi
chuided-chuidedendambi. ¹³—Nēbi
unēsendabi —queboedi ēbi unēsabi
yacpadembi mibi
chuided-chuidedendambi. ¹⁴—Adēnquo
mibi unēsendac —quequin Nuquin Icho
Esuquidistun chiacpadēn nēbi unēsebi.
¹⁵—Ēbi unēsān ēmbi chiondaid ma
bēpiscudenquo icnu —qeshun mibi
chuiquin dada uanu.

Nuquin Papan Esus chiaid

¹⁶¿Muaquindambi mibi Esus
chuidionda? Padenquo. —Nadatiambo
icquin nabanquin Esusēn
ismedenepondash. Adquid yec abuc
nidnush: “Padpidec nidaidēn
choaindabi,” quepondash Esus
—¿quectabi muadionda? Padenquo.
Ēmbimbo isondaidquo mambi mibi
chiondac. —Nēid con Madombo nec
—quequin Nuquin Papan ismiac Esus
isondambi. ^{17,18}Nadquo iccondash.
Macuēsh dapan dectatoash Esus
bēchamauanquiec iccondash. Adnubien
Nuquin Papan: —Con Madombo nec.
Ēmbi tantiaidquo yec bēdamboshē iquec.
Nēid isec bēdambo iquebi —quequin
abucshun dacuēdampamboecnuc
chuipondash.

¹⁹¿Ēmbentsēquidambi Esus
chuiabanquin nape? Padenquo.

Ēndenquimboshē Esus chote
tantiamequin Nuquin Papan isadaidbo
tsusedpabo dada uamepampic.
Pacuēnēdacbimboen utsibon
tantienquo icnubi
paposhquiacbimboecnuc Esus chote
tantiamenuen dada uamepampic. Aden
Nuquin Papan chiaid isec onquequin
bēdamboen tantianuna: —Muaquidon
chuisho tantiamane —qeshun.
—Abitedishun Icbombo nebi —quequin
ismenuc padpidec Esus choabi
yacpadembi Nuquin Papan chiaid
bēdamboen tantianuna. ²⁰—Nuquin
Papan nadoendac —quequin ¿ambembi
chiaidta nuquin tsusedpabon dada
uapampic? Padenquo. ²¹Ambembi
chiaid dada uainquo icquin Nuquin
Papan chiaidquo dada uapampic.
Nuquin Papan Mayanēn tantiamiac
abimbo chuiampic.

Muaquido iquendac, quequin chiaid

2 ¹Nuquin Papan chiaidquo
isadaidbo tsusedpabon chuinubien
utsibo: —Nuquin Papan nadoendac
—quec muapampic. Nēbi adquidbidi
iquendac. Mibi yacno puduedash
ambembi chiaid chiec muasho
tantiashun: —Mibi muequi nec
—badedquo cainquo mimi iquendac.
—Abided ciudadec unēsaid Esus
tantiaquid nebi —queboedi: —Esusēn
chiacpadomboen natiapimbo iquebi.
Adshobi Nuquin Papan ēbi cuidenquo
ictsiash —quequin muaquin chiendac.
Adquid Nuquin Papan icsambo icquido
cuidacno nidmequin cuidendac. ²Aden
muaquidēn chuisho tantiashun Esus
tantiauidtsēcboedombi dadpenshun
aidēn chiaid tantiendac. Adashic
Nuquin Papan chiaid niac-niaquec
muaquido tabadacimboec padpidec
icsamboec tabadoaindac. Adsho isun:
—Esus tantiaquidobi icsambo iqueque.

Is —caindac utsibon. ³Muaquido tantienda. Aidon piucquid comapenec bunquin ambembi chiaidquio mibi chiec. ¿Muasho tantienquioda Nuquin Papan icpec? ¿Ada Nuquin Papa ushpec? Muasho tantiashun aido cuidendac. —Adquid icsano nidmequin cuidendambi —quequin ambi èndenquimboshë tantiapampicpadomboen comapenen Nuquin Papan cuidendac.

⁴Ambi chiaid niac-niacsho icsano nidmequin cuidquid Nuquin Papa nendac. Èndenquimboshë nidaid uabi icnuc ambi abi yacnoshon uaido mayan utsin-utsinquien: —Èmbiquen abitedi namenu —quequin ambi chiaid niac-niacsho isun Nuquin Papan icsamboshë yacno nidmequin cuidpampic. —Chian anèdënquiacno nèsecanumbi nabono —queshun aden tauamboen Satanas chedo cuidpampic. ⁵Adshumbic yuecquio ictanquin matses abitedishun ambi chiaid niac-niacsho isun nidaid abichobi mabudadmequin Nuquin Papan matses uesquin unès uapampic. Noeuidtsëqui padambo icpampic. —Bëdamboec tabadnuna —quequin Nuquin Papan chiaid chuibanquid icsho Noe chedo Stedpactsëc Nuquin Papan cuidenquio icpampic. ⁶Adshumbic yuecquio ictanquin matses utsibon Nuquin Papan chiaid niac-niacsho cuidquin nèdëncapampic. Shubu dadpen icquid nèid daëd icpampic. Nèidic Sodoma caid. Ambo tabadquido aton shububëdi abucuësh taboadampamboec paëdquidën pichiquepampic matses nibëdquio yec. —Aden icsambo icquido cuidquid nebi —quequin Nuquin Papan adopampic. ^{7,8}Sodoma caid yacnocquid abentsëqui Dod caid pichiquenquio icnuc Nuquin Papan cuemepampic. Bëdambo icquid

yec: —Nuquin Papan chiaid niac-niaquec nëmbo icquido icsamboecuidi tabadec —quec shubiec tsadsho cuemetsaidi pichiquiambo ictsampic. ⁹Aden abi tantiaquido daëd Noebëdta Dod Nuquin Papan cuidambo icpampic. Adembidi nëbi abi tantiaquido cuidenquio icquid Nuquin Papa nendac. Utsibon chieshënaidi abi tantiaquido bëdambo icmequid nendac. Icsambo icquido cuidquid icquimbi matses cuidte ushë choabi icnuc nëbi tauaquin icsambo icquido Nuquin Papan cuidendac.

¹⁰Muaquido nadquio icsho Nuquin Papan cuidendac. Abi bunaiduidi naic icsaic. Adembidi pabiate shëcuë nibëdadbimboen abi chuiquid dapan chiaid niac-niacquinc Nuquin Papan chiaid niac-niacquinc caic. —Con nauidtsëqui bunebi —queshun ambi naiduidtsëqui naic. Dacuëdtiadquidi dacuëdenquio icquin Esus tantiaquido chuiquid dapa caic: —¿Bëdamboen namequidta nedic? —quequin icsamboen chuishunec. ¹¹Padnuen Nuquin Papan abi yacnoshon uaido mayan bëdabon adec muaquido chuishuntiapimbo iquec. Muaquido bëdiactsëc tantiaquido icnubi comapenen tantiaquido icquin mayan bëdabon Nuquin Papa naden chienquio iquec. —Aido baded cuid, Papa —cainquio iquec. —Ambi cuidte ambentsëqui tantiaquid Nuquin Papa nec —queshun adoenquio iquec. ¹²Padnuen èmbi chuiboedo muaquidon Nuquin Papambo tantienquio icquin Nuquin Papa muauaquin chuibanec. Adec icsamboec tabadsho Nuquin Papan cuidendac. ¿Ada bëdi cuidnushe quepadic? Padenquio. Adembidi abi cuidte tantienquio icsho Nuquin Papan cuidendac.

¹³Nuquin Papan chiaid niac-niacmequin muaquidon utsibo

icsamesho Nuquin Papan cuidendac. Icsateuidi bunquiech inchëshën icsash badiadëntsen icsaic: —Bëdambo iquebi —quec adquido cuishonquec. Esus tantiaquin penuec mibi cho-choacno mibëd tabadec muaquidotsen chopac caosh. —Esus tantiaquidbidi nebi —quiash mibëd tabadec aid icsasho isash: —Esus tantiaquid abitedi icsaic —quependac utsibo. ¹⁴Muaquido utsin chido mëismec tabadec. Nuquin Papan chiaid niac-niaquec icsaic ënëdenquio iquec. Adquid icquin Esus tantiatsëcquido icsamec. Utsin chido chudquinc muaquin piucquid dadpen bedquinc caic abi bunaidquio naic icsaic. ¹⁵Nuquin Papan chiaid niac-niaquec icsateuidi bunquiech. Èndenquimboshë matses utsi Beyod caidën mado Badan caid Nuquin Papan chiaid chuiquid yequi piucquid dadpen bunec Nuquin Papan chiaid niactiadquio icpampic. ¹⁶Adnubien abi catsadaid cabayobitsecquid asno caid matsesbimboec onquiampampic. Ambi chiaidquio chuimequin Nuquin Papan oncamiac: —¿Atotsieshun icsamboen nai? —cac aton icbo icsanuec niduidboedi: —Aucbidi nidnu —quepampic. Adquio muaquido iquec. Piucquid comapenec bunec Nuquin Papan chiaid niactiadquio iquec.

¹⁷—Mibi bëdambo icmete chuinu —quequin muaquidon chuisho tantiash: —Ai, mimi chiacpadte bunebi —queuidtsiash matses. Uispa dadpen icboedi badiadnuc abu chëshën bëtinacsho isash: —Tanunquien badiadec —queuidacbimboec: —Ambi chiacpadquio bëdambo icnu —queuidtsiash matses. Adec muasho tantiash: —Adquid chian anëdënquiacno nësecaindambi —quendac Nuquin Papa. ¹⁸Adec muaquido abembi onqueuidequi

onquec. Utsin chiaid tantienquio icquin ambi tantiauidi chiech naden. —Mibi bunacpadec mibitsen icsata —cac Esus tantiatsëcquid Nuquin Papan chiaid nauidsëcquimbi abi icsaid ënuidboedi padpidemboec icsaquiech. ¹⁹Muaquidon: —Nuqui bunaiduidi nanuna. Adec nuqui bëdambo ictsiac —quequin chuibanec. Adboedi abi icsaid ambembi ëntiapimbo yec icsamboshë iquec. Adec icsamianquidën chiacpadomboen naic matses icsaquid nendac. Adecbidi ambi naiduidi naic icsaquid matses nendac. ²⁰Nuqui cuidmenquio icquid Esuquidistu tantiatsëcquid abi icsaid ënuidboedi padpiden Nuquin Papan chiaid niac-niaquec icsamboshë muaquido yanec. ²¹Ènden Esus chiondac: —Ai, aid tantiembi —quetsëcondaidi aden Esus tantienquio yanec icsamboshë yansho isun: —“Esus tantiembi,” quenquio icpatecnëdan —caimbi. ²²Adquid chuipanëdash naden. —Ambi ucbudaid opan chequid. Opa nesmiaqui nidaidën nocoshquec padpidec bëchishoaquid —quepanëdash. Adecbidi Esus tantiauidtsëcquido icsaid ënuidboedi muaquid padpidemboec icsadenechitequien iquec.

—Esus chote chiaid

3 ¹Tantia. Èmbi tantiaido mibi neque. —Pabiate cuembo icquin Nuquin Papan chiaid tantiaquiech bëdamboec tabad —quequin mibi chuiquin dada uaondambi. Adomboembidi mibi chuiquin nëid dada uanu. ²Esus chote chuiquin Nuquin Papan isadaidbo tsusedpabo dada uamepampid ¿ada tantie? Adomboembidi nuqui cuidmenquio icquidën Nuquin Icbo Esusën chuibanondash. Aidën chiondaid abëd ictened utsin mibi chuinëdash. Aden chiaid tantiata. Aidbidi chuinu.

³Esus nidaidën padpidec choabi icnuc Esus tantiesabon abi icsate bunaiduidi naquin Esus mamënsnunendac. ⁴—“Utsi uanuec padpidec nidaidën choaindabi,” ðquenëdaidda chopec? Ma choenquio icpayoc. “Nëbi Esus choec,” quedenedi con mëdimbo abitedi unësbudniac. Esus choambobi —quependac Esus tantiesabo. Nadembidi chiendac. —Taëc nidaid yanubi matses nidaidën tabadpampic. Adecbidi aton tsyuecquido tabadpampic. Nëbi adecbidi matses nidaidën tabadec. Èbi nibëdnuc adiquendac. Utsi uanuec Esus choenquio iquec —quependac Esus tantiesabo. ⁵ðAbimboda capec? Aden chuiquin Nuquin Papan chiaid tantienquio iquec. Èndenquimboshë ambi uaidtedi nibëdnuc: —Ad icta —quequin Nuquin Papan chiac abu yec acte yec nidaid yec quiampampic. Acteuidpambo icboedi nidaid nënantan yampampic. Aden Nuquin Papan abitedi uapampic. ⁶Aden abitedi uambic yuecquio ictaniash matses icsambo icsho isun ambi chiacpadomboen ue dapa chomeshun nidaid mabudadmequin aid matses Nuquin Papan uesquin unës uapampic. ⁷Aden ambi chiacpadomboen Nuquin Papan naindac. Ambi icsambo icquido cuidte ushën abu nidaidbëdta nëdëncaindac. Adembidi matses Esus tantiesabo cuidendac.

⁸Èmbi aden chiac: —ðTedectsiash Esus chopeba? —ðquecta ique? Tantia. Mibi chuinu. Ambi tantiacpadëmbi Nuquin Papan Esus chomendac. Naden Nuquin Papan tantiec. —Dadpen seta icquid iquequi seta abentsëcbimboecquid nec. Adecbidi seta abentsëqui icquidquio iquequi dadpen seta icquidbimboecquid nec —quequin Nuquin Papan tantiec. ⁹—Èdenquio: “Padpidec choendabi,” quenëdaiddi

Nuquin Icho Esus choenquien icchitec —quenubien Nuquin Papan: —Chiata. Cuidte bunenquio iquebique. Utsibontsen Esus tantiashun ëmbi chiaid niac-niacboedi ënushe. Isbono. Ènacsho icsamboshë yacno nidmenquio ictsiambi —qeshun Nuquin Papan Esus chomiabi iquec.

¹⁰Adnubien matses: —Nëbi choec —quenquio icnuc Esus badedquio choendac. —ðNëid ushëmbi ampequidën con na ampec —quequinda tantiapec? Padenquio. Adembidi: —Nëbi choec —quequin tantienquio icnubi Esus choendac. Choshon acquimboen toncac abitedi nibëdanendac. Uispa yec inchëshën ushë yec badiadën ushë yec queboedi nibëdquiecnuc nëdëncaindac. Nidaid abichobimbo nëdënquenuc aidën icquidtedi nëdënquendac nibëdquio yec.

¹¹—Nuquin Icbon nac adquidtedi nëdënquendac —quiash Esus tantiec bëdamboequien tabadtiad. ^{12,13}Esus chobon Nuquin Papan cuidquin ambi uaidtedi nëdëncaindac. Abu yec uispa yec inchëshën ushë yec badiadën ushë yec queboedi nëdëncaindac nibëdquiecnuc. Adshumbic ambi chiacpadomboen abu chuca nacnenquinc nidaid chuca nacnenquinc caindac. Adoshombic ambi chuca nacnenaidën bëdambo icquidoudquio nuqui tabadmendac. Èmbi aden chuisho tantiash: —Ma Nuquin Papan Esus chomenu —quequin utsibo tantiaimequin Esusën naid chuibanec bëdamboec tabadnuna.

¹⁴Èmbi tantiaido mibi neque. Tantia. —Choshon abi yacno Esusën nuqui tabadmendac —quec chieshtoenquio yec bëdamboec tabadnuna. Choshon Esusën: —Mibi icsambo iquec —cainquio icnuc Nuquin Papan chiaid niaquenquio yec bëdamboec

tabadnuna. ¹⁵Adec tabadquimbi ëmbi chuiboed tantiashun naden tantia. —“Utsitsen ma Esus tantiaquid yanu. Aden Esus tantiasho aid cuidenquoio ictsiambi,” qeshun Nuquin Papan Nuquin Icbo chomiabi iquec —quequin tantiec tabadta. Adembidi mibi chuiquin nuquin buchibimboecquidën Pabadon dada uapaccondash. Nuquin Papan tantiamiac bëdamboen chiaccondash. ¹⁶Ëmbi chuiboedbidi chuiquin dada uadenepaccondash. —Pabadon dada uaid abentse-abentsec badedquoio tantiadenquoio iquec —qeshun utsibon aidën chiacpadomboen chienquien icchitosh. Nuquin Papan chiaid niac-niactiadquoio icquidon Pabadon chiaidquoio tantienquoio icquin icsamboen chiosh cashnad-cashnadacbitsëcquiecnuc. Nuquin Papan chiaidquoio nuquin

tsusedpabon dada uapampidtsen isbanshun adembidi tantienquoio icquin icsamboen chiec. Adquido Nuquin Papan cuidendac.

¹⁷Ëmbi tantiaido mibi neque. Tantia. Chuinu. —Abimbo tantienquoio icquin Nuquin Papan chiaid niac-niacquidon muauaic —ëbi qesho tantiashun: —Esus tantienquoio yamane. Muasho tantiatipimbo iquebi —quequin ënenquoio icquin Esus tantianuna. ¹⁸—Abi tantiaquid cuidmenquoio icnuec abided cuidadec Esus unëspondash. Aid tantiasho Nuquin Papan nuqui bëdamboen isec —quequin Esus bëdiactsëc tantiatsëcshun comapenen Esus tantiaquionona. Adshumbic: —Nuquin Icbo Esuquidistu bëdamboshë iquec —canuna ënenquoio icquin. Padi. Aidedi chuiquin dada uaombi.

UANËN DADA UAIÐËMPI I

Nuquin Papabëd ënëdenquoio yec tabadte chianiaidquoio

1 ¹Abia Yampidënquoio matsesun Esuquidistun chuibansho ëbëd icquidobëdtan tantiapadenembi. Aidi ëbëd icquidobëdtan ispadenembi. Aidi ëbëd icquidobëdtan mishpadenembi. Aidi Nuquin Papabëd ënëdenquoio yec tabadte chianiaidquoio nec. Aidquoio chuiquin dada uaid nëid nendac. Aidquoio tantiaquido icquin bëdamboen ista. ²Aid, abuc Nuquin Papabëd ënëdenquoio yec tabadboedi nidaidënuësh matses icnuec chopanëdash. Choshon abipadquoio yec Nuquin Papabëd ënëdenquoio yec tabadte ismequin chianiaidquoio ëbëd icquidobëdtan istenesun chuibanec nebi. ³Aidi ëbëd icquidobëdtan ispadened adembidi ëbëd icquidobëdtan tantiapadenec chuibanec nebi ma mibitedishun tantias shubu abentsëquën tabadacimboec ma tabadpanu qeshun. Nuquin Papa tantiaquid icquin aton Madombo Esuquidistu tantiec Nuquin Icbobëd shubu abentsëquën tabadacpadec nuqui bëdamboec tabadendac. ⁴Esuquidistu tantiaquidtedi shubu abentsëquën tabadacimboecquido nec, quequin chuiquin dada uaimbi ma aid tantias, Cuishon. Bëdambo iquebi, quiacpadec ma mibitedi tabadpanueshun.

Nuquin Papa Bëdamboecquid Abentsëcquiobi nec quiaid

⁵Esuquidistun Nuquin Papa chuibansho nuqui tantiondacadomboen chuioaimbique. Tantiata. Nuquin Papa Bëdamboecquid Abentsëcquiobi nec. Icsapenquiocquid aidi nec. ⁶Adquid icnuc, Nuquin Papan shubun icquid nebi, queboedi ambi chiaid niacquin abipenquoio chuiquid nuqui nendac. ⁷Nuquin Papan chiacpadomboen nabanquidquoio iquec abi tantiaquid utsibobëd shubu abentsëquën tabadacimboecquid nuqui nendac. Adquid nuqui icmenuec nuqui icsaid bedshunash abided cuidadec Nuquin Papan Mado Esuquidistu unëspondash. Aid unësnedaidënquoio nuqui icsaidtedi paucbantequid nendac.

⁸Icsaisa nebi, quequi mua uadquin abipenquoio chuiquid nendac. ⁹Icsaobique. Èbi pauc, Papa, qesho tantiasun, Con mado unëso isun abi tantiaquid icsaid bëpiscudnu, quequin ambi chiacpadomboen niaquenquiocquin Nuquin Papan nuqui paucoaindac. Naden Nuquin Papan naïndac: Matses icsaid ëmbi paucaid padpiden tantiamenu, quenquiocquin icsaisa nuqui icmendac. ¹⁰“Matses icsaisa nibëdquiec”, quequin Nuquin Papan dada uamiampid icnubi, Icsaisa nebi, quequin chiec, Muaquid Nuquin Papa nec, quiacimboec adquid

onquepec. Aden chuiquid Nuquin Papan pausuntemaid nendac. Adquid Esuquidistu tantiesa nec.

2¹Ma icsainquio icnu qeshun con nabo quequin adembi mimbi iste dada uaimbique. Isec onqueta. Icsaobi, quiash cuenenda. Abi tantiaquid icsasho isun Esuquidistun Nuquin Papa chiendac. Èbi tantiaquid paucoata, quequin Nuquin Papan chiaid niaquesa icquin aton Madonquio Esuquidistun nuqui icsasho aden chiendac. ²Aidi matsestedi icsaid bedshunash abided cuidadec unëspondash.

³Ambi chiacpadomboen nabanquin Esuquidistu tantiaquid nebi, qeshun nuqui tantiendac. ⁴Esuquidistu tantiaquid nebi, qeshun Icbon chiacpadomboen nainquiocquin abipenquio chiendac adquidën. ⁵Ambi chiacpadomboen nabansho isun abi tantiamiantequid Nuquin Papan nua pausunendac. Aden pausunaidën, Aidbëd icquid nebi, quequin nuqui tantiendac. ⁶Aden pausunac Nuquin Papan Madonquio bëdamboec tabadquin nabanacpadomboen naimbi, quec nidaidën bëdamboec tabad.

⁷Naden nata, quequin chiaid chuca chienquiocquin mimbi tauamboen tantiondaid mibi chuiquin dada uaimbi.

⁸Mimbi tauamboen tantiondaid Esuquidistun, Naden nata, quequin chiaid chuca nendac. Nidaidën capuquin utsi tantiaquin nabanquin Esuquidistun ismiondashi. Adembidi Esuquidistupadquiocquin utsin ismiac mibi Esuquidistu tantiesa icboedi nëbi abipadquiocquin utsi tantiaquin nabante mimbitsen ismiac Esuquidistu tantiaquid utsi dadpen yanendac. Aidobidi aidën pausunac tantiananec tabadquin nabanec nec. Chieshëmënuquid icboedi aidën pausunac tantianquidquio yanec.

⁹Esuquidistu tantiaquid nebi, qeshun abi tantiaquid utsi chieshënec Nuquin Papan tantiacpadomboen pausunacmaid adquid nec. ¹⁰Esuquidistu tantiaquid utsi con utsibo nec, quequin tantianquidien Icbon pausunaid nendac. Adquid icsate bunenquio yec bëdamboec tabadquin ismequid nendac. ¹¹Esuquidistu tantiaquid utsi chieshënquid Nuquin Icbon pausunacmaid nec. Inchëshquio icnuc capuacimboecquid adquid nec. Mayan icsan yua icquin ambi natiadquio yaid tantiesa nec.

¹²⁻¹⁴Esuquidistu tantiaquid icsho Nuquin Papan cuidenquiocquin mibi icsaid paucac. Nuquin Papa Abia Yampidquio tantiaquidquio mibi nec. Ambi paucaid tsyuecquid utsi-utsiec icsho ëmbi con nabo caidtedi chuiquin dada uaid nëid nec. Abia Yampidënquio Esuquidistun chiac abi tantiaquido utsi-utsiec dadpen yanondash. Adquido chuiquin tsusiobo quequin ëmbi dada uaid nëid nec. Èmbi tsusiobo caid ambia tantiaquidën ismiac caniabobimboecquin comapenen tantiaquin tantesa uainquiocquido utsi-utsiec iquec. Aden comapenen tantiec mayan icsan yua icboedi nëbi Nuquin Papan chiaid tantiabentsëcquido yanash nëbi Nuquin Papan chiacpadomboen nate bunquido mibi nendac. Adec bunquido mayan icsan yua ictiapimbo icquido mibi nendac. Adquid ëmbi caniabo caidtedi ëmbi chuiquin dada uaid nëid nec. Èmbi dada uaid mibitedishun tantiatequidquio neque. Isec onqueta.

Icsate bunesa icta, quequin chiaid

¹⁵Mayan icsan yuadenda. Icsate bunesa icta. Mayan icsa bunquid Nuquin Papapadquiocte bunesa nec.

¹⁶Abia Yampidquio Nuquin Papa nec.

Adquidpenquoio mayan icsa nec. Aid Nuquin Papa chieshènquid nec. Adquid icquin Nuquin Papan chiaid mua uaquin chuiquin chuca uaic naden: Icsamane quenquiocquin icsaquin nanu quequin adota. Adecbidi icsamane quenquiocquin utsi icsasho isun èmbitsen nanu quequin adoata. Dadpen bednu quequin utsi dèniacnueshun adota. Adec icsamane quenquiocnoc mayan icsan Nuquin Papan chiaid matses chieshèmec. ¹⁷Mayan icsan tantiaid ènèdendac. Aidèn tantiacpadomboen tantiaquid icbobèd Nuquin Papa yacno tabadiapimbo iquec. Nuquin Papan chiacpadomboen naquidien ènèdenquoio yec Icbobèd tabadendac.

Esuquidistu chieshènquid dadpen choendac, quequin chiaid

¹⁸Adembi chiembique. Èmbi con nabo caidon tantiaata. Nèbi nèid nidaid naimbudec. Adecbidi Esuquidistu chieshènquid dadpen choendac, quequin chiondacadquieac ènden cho-choac. Dadpen cho-choacsho isun, Nèbi nèid nidaid naimbudendac, quequin nuqui tantiendac. ¹⁹Esuquidistu chieshènquid nuquibèd iccuededboedi ènden nidanepac. Nuquin Papan shubu abentsèquèn tabadacpadpenquiocquid Esuquidistu chieshènquid iquec nidaniac. Nidaniacsho isun, Esuquidistu tantiesia iquec nuquibèd shubu abentsèquèn tabadacpadpenquoio icquido niosh, quequin nuqui tantiendac.

²⁰Esuquidistu chieshènesa mibi nendac. Nuquin Papan aton Mayan meniac abimbo chiaid tantiaquid mibi nendac. ²¹Nuquin Papan chiaid abimbo iquec quequin tantiaquid icsho mibi chuiquin dada uaic nebi. Nuquin Papan chiaid tantiesia mibi

icsho chuiquin dada uainquoio ictsiambi. Abimbo chuiquid muatiapimbocquid nec, quequin mimbi tantiendac. ²²¿Tsutsi muaquid nepec? ¿quepecta mibi ique? Nuquin Papan Madombo nidaidènsun chidon tishac matsesash aton Papan chuimaidquoio nec, quesa muaquid nendac. Adquid Esuquidistu chieshènquid nendac. Abentsèquidquioibi Nuquin Papa nec, quesabidi adquid neoaic. Esuquidistu Nuquin Papan Madombo nec, quesabidi adquid neoaic. ²³Nuquin Papan Madombo Esuquidistu nec, quesa Nuquin Papa tantiesabidi nec. Nuquin Papan Madombo Esuquidistu nec, quequin chiec Nuquin Papan tantiaid papuduedaid Nuquin Papa tantiaquid nendac.

²⁴Tauamboen chiampid tantiadonec tantesa uainquiocquid yanta. Mimbi tauaquin tantiadoniaid tantesa uainquoio yec Nuquin Papan Mado Esuquidistubèd shubu abentsèquèn tabadacbimboecquido mibi iquendac. ²⁵Èbèd shubu abentsèquèn nidaidèn tabadacbimboecquido èbèd abuc ènèdenquoio yec tabadte iquendac, quequin Esuquidistun chiaid nendac.

²⁶Esuquidistu tantiaquid mibi icsho Nuquin Papan chiaid niacmenuequid iquec, quequin chuioaimbique. Tantiata. ²⁷Nuquin Icho Esuquidistun tantiamiaid icquin utsi uain chuisho tantiesia icta. Esuquidistun ambi tantiaid pausunac ambi chiaid tantiaquidquoio mibi nendac. Ambi pausunaid iquec, Mibi utsi tantiamenu, cac, Padi. Esuquidistun chiaid tantiaquidquoio nebi. Esuquidistun abimbo chiaid tantiash bèdambo iquebi, mibi quendac. Aden Esuquidistun tantiamiaidquoio yec abèd cuèshèdesa icnuec adequid tabadta.

**Nuquin Papan chiaid tantiaquid ambi
bacuë icmiaid**

²⁸Adembidi con nabo quequin mibi chuioaimbique. Adembi tantia. Esuquidistun chiaid tantiadonequieic tabadteneta. Adec tabadquin Esuquidistu choasho isash cuenenquoio yec, Èbi, ambi paucaid, bednuec choec, quependac mibi. Abëdi nidebi, quequin caindonec tabadta. ²⁹Nuquin Papa bëdamboquid nec, quequin tantiaquin nuqui Nuquin Papan chiacpadomboen naquin, Ambi con bacuë caidquio nebi, quequin nuqui tantiendac.

3 ¹Matses tantiaquin naquidquio Nuquin Papa nec. Ma ëmbi unësquioequin comapenen tantiaido ëbëdi tabadpanueshun con bacuëbo caimbi, quequin Nuquin Papan icsaisanquoio tantiapampic. Aden chiampid abimbo iquec. Ambi con bacuë caido nuqui nec. Ambi con bacuë caidpenquoio Nuquin Papa tantiesa yec aton Mado Esuquidistu tantiesabidi nec. Adecbidi Esuquidistu tantiaquid tantiesabidi nendac adquido. ²Nuquin Papan comapenen tantiaido mibi nec. Adquid icsho adembi mibi chuinu. Tantiata. Nëbi Nuquin Papan con bacuë caido nuqui nec. Aden ambi con bacuë caid icsho, Nadquidquio mibi icmendambi, ¿ada Nuquin Papa capec? Padenquoio. Esuquidistupadquioequin nabanquid Nuquin Papan nuqui icmec, quequin nuqui tantiadonetequidquio nendac. Esuquidistu nuqui bedec chosho isash, Nëbi aïdpadquidquio Nuquin Papan nuqui icmendac, quequin tantiembi, nuqui quendac. ³Aid choabienuc, Abipadquid iquendabi, quequin caindonequido nëbi Esuquidistu icsainquoio yec tabadacpadquieic tabadte bunquid nuqui nendac.

⁴Nuquin Papan nadec bëdamboec tabadta, quequin chiaid niacquid abibi icsaquid nendac. ⁵Adnubien, Esuquidistu abuc tabadboedi nidaidënsun chidon tishac matsesun nuqui icsaid bedshunash abided cuidadec unëspanëdash, quequin nuqui tantiendac. Icsapenquioequid Esuquidistu nec. ⁶Icbopadquidquio icnu quiash Esuquidistubëd tabadacimbocquid icsadenesa nec. Icsadenequid, Nuquin Papan Esuquidistu tantiamioishi, quetiapimbo iquec. Esuquidistu tantiesa adquio iquec.

⁷Con nabo, tantesa uamane qeshun muaquin chuibanaid tantiesa icta. Esuquidistu bëdamboec tabadacpadquieic tabadquid icsaisa nec.

⁸Abia icsadenequid mayan icsa nec. Aidën yua adquiecbidi icsadenendac. Mayan icsan yua matses icsho isash Nuquin Papan chiaid tantiaquidquio iquec Esuquidistu nidaidën choash matses icsaid bedshunash abided cuidadec unëspanëdash ma abi tantiaquid yec mayan icsan yua icboedi aidën yuadiapimbo yampanuna.

⁹Nuquin Papan con bacuë caido icsadenesa nec. Ambi con bacuë caido Nuquin Papapadquidquio yec icsadenetiapimbocquid nendac.

¹⁰Mayan icsan yua Nuquin Papan chiacpadomboen naisa nec. Utsi tantiesa adquid nec. Nuquin Papan chiacpadomboen naquid Icbon bacuë nec. Icbon bacuë yec utsi tantiaquidquio nendac.

Esuquidistu tantiaquido tantiananaid

¹¹Esuquidistu tantiaquid utsibo tantiaquiota, quequin chiaid nuqui abia tantiondaid nendac. ¹²Aton utsimbo chieshënuquid Cain icpampidpadquid iquenda. Mayan icsan yua icquin aton

utsi cuesunepampic. Aden cuesuniaidèn aton utsi Abedèn abi tantiaquin nadenesho Nuquin Papan aid bédamboen isnubi Cainèn ambibi tantiapaden nadenesho Nuquin Papan bédamboen istiapimbo icpampic. Aden isac Cainèn aton utsimbo Abed chieshènquin cuesunepampic. ¹³Cainèn aton utsimbo chieshènacpadomboen Nuquin Papa tantiesan Nuquin Papan con bacuè caidtedi chieshènoaic. Nuquin Papa tantiesan mibi chieshènsho isash, ¿Adquidshenda mibi nepec? quenda. Nuquin Papan chiaid tantiesabimboec adenda. ¹⁴Esuquidistu tantiaquid tantienquioeboedi Esuquidistu tantiaquid yanash abi tantiaquid utsibo tantiaquidquio nuqui nendac. Aden abi tantiaquid utsibo tantiaquid icquin, Nuquin Papabèd tabadquidbimboecquid nebi, quequin nuqui tantiendac. Aton utsibo tantiesac cuèshèdadbimboecquid nec. ¹⁵Aton utsibo chieshènquid, Con utsi cuesunenu, quiacbimboecquid nec. Adquid Nuquin Papabèd tabadtemaid nendac, quequin nuqui tantiendac.

¹⁶Mates tantiaquin nashunquidquio Esuquidistu icpondash. Nuqui tantiec, ma èbèd ènèdenquio yec tabadpanu quiash unèsmane, quenquio yec nuqui icsaquido icsho cuidnushe quiash abided cuidadec unèspodash. Abi tantiaquid icquin abi tantiaquid utsibo tantiaquin nashunec unèsmane quenquio yec nuqui tabadendac.

¹⁷¿Aton nachoquid icnuc Esuquidistu tantiaquid utsin na nibèdquiocsho isec, Con utsi menenquio iquemi, quequid Nuquin Papapadquiocquin tantiaquidta nepec? Adquid Nuquin Papan chiaid pausunacmaid nec. Nuquin Papapadquiocquin nashunu quesa adquid nec. ¹⁸Èmbi con nabo caid, Utsi tantiec bédamboec tabadquidquio nebi,

quec onquequinuidi tantiec tabadenda. Utsi tantiemi, quequin mimbi chiacpadomboen nabanquin ismeta.

¹⁹Aden mimbi chiacpadomboen nabansho isun Nuquin Papan tantiamiac dacuèdenquio yec Nuquin Papa chuinu quiash abi yacno puduedquidbimboecquin nuqui chuided-chuidedec. ²⁰Utsien Nuquin Papan chiacpadomboen abentse-abentsen naquid, Nuquin Papa dacuèdampambo iquec. ¿Abi chuisho adabi tantiapatsiash? quequin tantiec tsadendac adquid. Adec tsadsho isun Nuquin Papan nadopec: Con Mado tantiaquid èmbi paucaid, èmbi con bacuè caid mibi nec. Mimbi chuisho tantianuna. Muesa nebique. Dacuèdenquiocquin èbi chuita, quependac Nuquin Papa adquid caic.

²¹Nuquin Papa tantiaquido, adembi mibi chiembique. Tantiata. Nuquin Papan chiacpadomboen naquidèdenquio Nuquin Papa bèisquidèmbimboen, Èbi menepec, quequin dacuèdenquiocquin chianendac. ²²Nuquin Papan ambi chiacpadomboen nabansho isun ambi tantiacpadomboen tantiamendac. Aden tantiamiac ambi tantiacpadomboen abi chuisho Nuquin Papan nuqui bédamboen isquin menendac. ²³Naden tantiata, quequin Nuquin Papan chiaid nad iquec: Abèd Abia Yampidquio, Esuquidistu, nidaidèshun chidon tishac matesaid Nuquin Papan chomiaid aton Madombo nec quequin nuqui tantiaidquio nendac. Adembidi Esuquidistun chiacpadec abi tantiaquid utsibobèd tantiananendac. ²⁴Aden ambi chiacpadomboen naquidbèd Nuquin Papa iquec. Adquiduidquio Nuquin Papabèd ictequid nec. Abibimboecquid Nuquin Papan aton Mayan meniac èbèd tabadquin tantiamiac, Nuquin Papabèd icquid nebi, quequin nuqui tantiendac.

**¿Nuquin Papan chiaidquibida
chuiбанoshe? Isnu, qeshun Nuquin
Papan chiaidquio isteneta quiaid**

4 ¹Utsibo, Nuquin Papa chieshëñquidën chuimiaido dadpen iqueque. Aidën chuimiaidën chuisho tantiashun, ¿Nuquin Papan chiaidquibida chuiбанoshe? Isnu qeshun Nuquin Papan chuiquibida dada uamiaidquio isteneta. ¿Adquibida iqueque? Isnu, qeshun isteneta.

²Nuquin Papan pausunaidën naden chiendac: Nidaidëñshun chidon tishac matsesaid Nuquin Papan chomiaid aton Madombo nec, quequin chuiбанendac.

³Nuquin Papa chieshëñquidën chuimiaidën naden chiendac: Nuquin Papan chomiacmaid Esus niondash. Aid aton madopenquio nec, quequin chiendac. Aden chuiquid Esuquidistu chieshëñquid nec. “Èmbi chomiaid chieshëñquid choec,” quequin Nuquin Papan chiampid mimbi tantiec. Aden chuiquid ënden dadpen cho-choac.

⁴Con nabo quequin Nuquin Papan aton Mayan meniac aidëñquio tantiamiac Esuquidistu chieshëñquidon chuisho, Tantianu, quesa mibi nendac. Nuquin Papan meniaidën tantiamiac Nuquin Papan chiaid chiac dëniacacpadquiec mibi chieshëñquid cuenendac. ⁵Esuquidistu chieshëñquido Nuquin Papan chiacpadomboen naisa nec. Ambi tantiacpadenuidi chuiбанec. Aden chuisho tantiesia Esuquidistu tantiaquid nec. ⁶Aidën chuisho tantiesia nuqui nec. Nuquin Papan con bacuë caid nuqui nec. Adoac ambi tantiamiacpaden nuqui chuiбанsho Nuquin Papa tantiabenquid utsibon tantiendac. Adsho isun Nuquin Papan tantiamiaid aido nec, quequin nuqui tantiendac. Nuquin Papa tantiesain Esuquidistu chuiбанsho, Tantianu,

quesa iquendac. Adsho isun, Abipenquio chuiquidën yua nec, quequin nuqui tantiendac.

**Nuquin Papan ismiac adecbidi
tantiananquidquio ma nuquitedi
icoapanuna quiaid**

⁷Utsibo, Nuquin Papa tantiaquido adembi mibi chiembique. Adembi tantiata. Nuquin Papan ambia utsi tantiaquin nabanquin ismiac adecbidi nuqui abi tantiaquidobëd tantiananquin ma nabanoapanuna. Utsi tantiaquidquio Nuquin Papan bacuë nendac. Adquid Nuquin Papa tantiaquidquio nec. ⁸Utsi tantiaquidquio Nuquin Papa nec.

Adquid icnuc utsi tantiesia yec, Nuquin Papa tantiembi, quetiapimbo iquec.

⁹Matses tantiaquin Nuquin Papan aton Mado Abentsëcquiobi Esuquidistu matsesmiac matses icsaid bedshunash abided cuidadec unëspondash. Adoac abi tantiaquido abëdi ënëdenquio yec tabadendac. ¹⁰Aden Nuquin Papan matses tantiaquin naid dëniactiapimbo nuqui iquendac. Aidëmbien nuqui tantiabudquin aton Mado

Abentsëcquiobi nidaidën chomiac nuqui icsaquido icsho cuidmenquiocnoec abided cuidadec unëspondash. ¹¹Nuquin Papa comapenen tantiaquidquio icquin Nuquin Icbopadquiocquin Esuquidistu tantiaquid utsi tantiaquiotiad. ¹²Nuquin Papa matsesën istiapimbocquid iquec. Abi tantiaquid utsi tantiaquiocsho isash Nuquin Papa nuquibëd tabadec. Aden aton Mayan meniac aidën tantiamiac Nuquin Papapadquiocquin nuqui tantiaquidendac.

¹³Aton Mayan meniac ambi tantiamiaidquio yec Nuquin Papa ëbëd iquec, nuqui quendac. ¹⁴Nuquin Papan Madomboen nuqui isaidquio icpadenec. Aden isboshon uquë nësiatiadquido nuqui icsho mëñchicquid Nuquin Papan

chomiaid chosh, quequin nuqui chian-chianec.

¹⁵Esuquidistu Nuquin Papan Madombo nec, quequin tantiaquidquo Nuquin Papan pausunquin aton Mayan meniaid nec. ¹⁶Aden aid meniaid icquin, Ambi tantiaid nebi, quequin nuqui chuidonec.

Nuquin Papan matses tantiacpadomboen utsi tantiaquid Icbobèd icquidquo nendac. Adecbidi Iebo abèd icquidquo nendac. ¹⁷Nèid uquè nèsecatequid nec; nèid èbèd icquid nec, quequin Nuquin Papan chuibante ushè chonoc, Abèd icquid nebi, quec dacuèdenquo yec Nuquin Papa tantiaquid aton Madopadquiocquid Nuquin Papa yacno puduedendac. ¹⁸Nuquin Papan tantiaid dacuèdenquo iquendac. Ambi tantiamiaid dacuèdesa nec. Abi tantiesa, Èbi icsaquid icsho cuidtsiash, quec dacuèdendac. Aidi utsi tantiesa yec dacuèdec.

¹⁹Nuquin Papa Ambia Tantiaquid icquin ismiac tantiananquidombo nuqui nendac. ²⁰Èmbi isacmaidquo Nuquin Papa icsho, Aid tantiaquid nebi, quequin Esuquidistu tantiaquid utsi ambi isteniaid chieshènquid iquec muaquid nendac. Ambi isteniaid chieshènquid iquec ambi isacmaidquo Nuquin Papa chieshènquid nendac. ²¹Nuquin Papan chiaid nad iqueque. Tantiata. Nuquin Papa tantiaquid nebi, quequin Nuquin Papa tantiaquid utsibo tantiatiad.

Nuquin Papan Madombo abimbo tantiaquid

5 ¹Nuquin Papan Madombo aton Papabèd abuc icboedi nidaidèn chomiac matsesaid Esuquidistu nec, quequin tantiaquid Nuquin Papan con bacuè caid nendac. Ambi con bacuè caidènquo Nuquin Papa tantiendac.

Adembidi Nuquin Papan con bacuè caid utsibo nuqui tantiendac. ²Ambi con bacuè caidèn Nuquin Papa tantiaquin ambi chiapadomboen naquidquo icquin ambi con bacuè caido nuqui tantiendac. ³Aden tantiaquin Nuquin Papan, Naden nata, cac nabanendac. Ambi, Naden nata, quequin chiaid natiamiantemaid nec. ⁴Aden Nuquin Papan con bacuè caid icquin ambi chiapadomboen nabanec tabadquin dèniacacimboen icsamenuequid nuqui cuemendac. Adembidi Abia Yampid nidaidènshun chidon tishac matsesash tabadec aton Papabèd cuèshèdesa Esuquidistu nec, quequin tantiaquid nuqui icnuc icsamenuequid cuenendac. ⁵Esuquidistu Nuquin Papan Madombo Yampid nec, quequin tantiaquidènquo ismiac icsamenuequid cuenendac. Ai, icsamenuequidèn yuadesa Esuquidistu tantiaquidquo nendac.

⁶Esuquidistu Nuquin Papan Madombo nec, quequin abimbo chiaid iqueque. Tantiata. Chuinu. Nuquin Papan chomiaid nidaidènshun chidon tishac matsesash capusho acten mentoacsho: “Èmbi bèdamboen tantiaidquo mibi nec. Mibi isash bèdambo iquebi, Mado,” quequin Esuquidistu chuipondash Nuquin Papan. Adashic, yuec-yuecpambo yacsho cuesten dectanac diadec unèsec aton Papa chiec: “Èbi yuedta, Papa,” quiash Esuquidistu unèsacsho nacsic aton intac chididiquepondash. Adashic, Nuquin Papa abimbo chuiquidpadquidquo icquin aton Mayanèn tantiamiac, Esuquidistu Nuquin Papan Madombo nec, quequin tantiaquin chiendac nuqui. ⁷Nuquin Papa yec aton Mado yec aton Mayan yec quequin abucshun aidtedishun abentsèc yacimbocquin Esuquidistu Nuquin Papan nidmiac chosho nidaidènshun tishac matsesaid

nec, quequin chuided-chuidedec.
⁸Adecbidi nidaidënuësh Esuquidistu matsesacsho isun, Nuquin Papan Madombo nec, quequin ismenuec aton Mayan abucüësh budash aidbëd icpondash. Adembidi yuecshun ambi chiacpadomboen acten mentomiacsho, Con madombo nec, quequin chuiopondash. Adembidi yuecshun ambi chiacpadecec unëso isun, Con madombo nec, quequin inchëshac bimboecnuc icmequin Nuquin Papan nadatiambocquin ismebampondash. ⁹Aden ismiac isondaidën naden chiec. Aton Mayan budsho isombi. Adembidi Esuquidistu acten mentosho isombi. Adembidi, Unëso isombi, quequin isondaidën chiec. Aden chuinubi Nuquin Papanquo, Con madombo nec, quequin ambia Esuquidistu chuiquidquo icsho tantiadonetequidquo nuqui nendac. ¹⁰Adembidi Nuquin Papan Mayanën tantiamiac, Esuquidistu Nuquin Papan Madombo nec, quequin tantiaquin adomboembidi chuiopapec nuqui. Esuquidistu Nuquin Papan madopenquo nec, quequid, Nuquin Papa muaquid nec, quiacbimboen chuiquid nendac. ¹¹Con Madombo, Esuquidistu nec, quequin Nuquin Papan chiaid tantiaquidquo abi yacno nidash abëdi ënëdenquo yec tabadendac. Matses icsaid bedshunash abided cuidadec aton Mado unëshpanëdash, quequin tantiaquid Nuquin Papa yacno tabadtequid nuqui nendac. ¹²Esuquidistu tantiaquid ënëdenquo yec Nuquin Papa yacno tabadendac. Aid tantiesa aidbëd tabadtiapimbo iquendac.

**Ma tantiaquidquo mibi
icpanuequin chiaid**

¹³Nuquin Papan Madombo Esuquidistu nec, quequin tantiaquid,

Icbobëd ënëdenquo yec tabadtequid nendac, quequin ma tantiaquidquo mibi icpanuequin mibi chuiquin dada uaimbi. ¹⁴Adec abëd ictequid icquin ambi tantiamiacpaden chuisho, Nuquin Papan tantiec, quequin nuqui tantiendac. ¹⁵Abitedi tantiaquidquo icquin ambi tantiacpadomboen tantiamiac nuqui chuisho Nuquin Papan menendac.

¹⁶Esuquidistu tantiaquid nebi, queboedi icsasho isun, Cuëshëdnushe queshun aid bëdamboen tabadme, Papa, quequin chiacpaden Nuquin Papan naindac. Utsien, Esuquidistu tantiaquid nebi, queboedi, Icsaquionona, quiacpadecec tabadsho isun, Cuëshëdnushe queshun aid bëdamboen tabadme, Papa, cainda. Nuquin Papan chiaid tantiate bunesa aid nec. ¹⁷Nuquin Papan chiaid niaquec icsaic. Padnuen, Nuquin Papan bacuë nebi, queboedi icsash, Icsaquid nebi. Padpidec icsatiapimbo iquebi, quequin chuisho tantiaquid Nuquin Papan padpiden paucoaindac. Aid cuëshëdenquo yec Nuquin Papabëd tabadendac.

¹⁸Nuquin Papan con bacuë caid iquec icsadenesa nec, quequin nuqui tantiendac. Nuquin Papan chiaid niacmane quiaish icsate bunesa nebi, quiacpaden nanusho tantiamequin pausunendac. Adoac Nuquin Papa chieshënnquidën adquido yuadtiapimbo iquendac. ¹⁹Esuquidistu tantiec Nuquin Papan con bacuë caid nebi, quequin nuqui tantiec. Adesa Nuquin Papa chieshënnquidën yua nec, quequin nuqui tantiec. ²⁰Nuquin Papan Madombo abuc abëd icboedëmbi nidaidënsun Nuquin Papa chuibanquin tantiamiac. Aidën aton Mayan abi tantiaquid meniac, Nuquin Papa Abentsëcquiobi iquec, quequin nuqui tantiendac. Aidbëdquicoquid nuqui nendac. Aton

Madombo aton Papabimboecquid nec.
 Aid tantiec aidbëd ënëdenquio yec
 nuqui tabadendac, quequin nuqui
 tantiendac.

²¹Con nabo, Nuquin
 Papabëdtactsëqui aton Madombo

Esuquidistu tantiaquid icta. Utsin
 nacnenaaid ismequin, Nuquin Papa
 neque. Nëid tantiaquiota, cac
 tantienda. Esuquidistu nebi, qesho
 adembidi tantienda.

Nëbi padi. Aideded chiombi.

UANĒN DADA UAIĎĒMPI II

Nuquin Papan chiaid abimbo iquec, quequid tantiaid

¹Ĕmbia Esuquidistu tantiondaidquio Uan nebi. Nĕid chido Esuquidistu tantiaquid nendac, quequin Nuquin Papan tantiacpadquieic icquin mibĕd Nuquin Papan chiaid tantieic icquededquidobĕdta mibi chuiquin dada uaimbique. Isec onqueta. Nuquin Papan chiaid abimbo iquec, quioſh, quequin mibi utsin chuisho tantiaſh mibitedi tantieic tsadebi. ĴĔbentsĕquidabi mibitedi tantieic tsadpe? Padenquio. Aden chuisho tantiaſh utsibotsen adecbidi mibi tantieic tabadoaic.

²Nuquin Papan chiaid abimbo iquec, quequin ĕnenquiocquin nuqui tantienac. ³Uquĕ nĕſiatiaidquido nuqui icſho isash abĕdi ĕnĕdenquio yec nuqui tabadmenuec nuqui icſaid bedshunash abided cuidadec Esuquidistu unĕſpondash. Adembidi ambi chiaid tantiaquido utsibobĕdta bĕdamboen tabadmiaido nuqui nendac. Nuquin Papabĕdtan aton Mado Esuquidistun adquid icmiac, Ambi chiaid abimbo iquec, quequin tantieic utsibobĕd tantiananquidquio nuqui nendac.

⁴Mimbi chiac utsi-utsieic Nuquin Papan chiacpadomboen nabanec tabadſho isash bĕdambo iquebi. ⁵Naden nata, quequin chiaid utsipenquio nĕid dada uaid nendac. Esuquidistu tantiaquidtedi nuquibi tantiananuna. ⁶Esuquidistu tantiaquid utsibĕd tantiananquin Nuquin

Papan chiacpadomboen nabanquido nendac. “Ĕbi tantiaquidtedi tantiananta,” quequin Nuquin Papan chiampid mibi tauamboen tantiondaid nendac. Mibi tantiacpadquieic ma tabadpanuna.

Muaquin chuiquid

⁷Muaquin chuiquid dadpen capueque. Adquidĕn chiaid tantieſa icta. Esus Nuquin Papan chomiacmaid matsesquio nioſh, quequin adquidĕn chiendac. Adquid muaquin chuibanec Esuquidistu chieſhĕnquid nec. ⁸Adquidĕn chuisho tantiamane qeſhun chieſhenquiocquin Esuquidistu tantiaquiota. Nuquin Papa yacno nidshun ambi meniaidtedi bedembi, qeſhun Icbon chiacpadomboen nadeneta. ⁹Esuquidistu Nuquin Papan Madombo nec, quequin tantiembi, queboedĕmbi, Ambi chiaid tantianu, quenquiocquin tantieſa uatsĕcquid nendac. Adquid Nuquin Papabĕd tabadac bimboec ictiapimbo iquendac. Esuquidistu Nuquin Papan Madombo nec, quequin tantiaquidquio Nuquin Papan Madobĕd tabadac bimboec tabadendac. ¹⁰Esuquidistu Nuquin Papan Madombo nec, quequin chieſa choſho isun yuedenda. Adembidi, Bĕdambo icta, quequin adquid chienda. ¹¹Adquid yuedquid ambi yuedaidbĕdtan muaquin chuiquin ismequid nendac.

Ĕnquin chiaid

¹²Dadpen dada uatiadquio icquimbi mibi yacno nidtiadquio icquin

daëdpactsëc dada uaombi. Mibi yacno
nidash mibëdi onquebi.

¹³Mibitedi tantiec tsadebi, quequin
chuita quiosh ëbëd Nuquin Papan chiaid

tantiec iccuededquido. Adembidi dada
uaimbi.

Padi. Aitedi dada uaombi.

UANËN DADA UAIDËMPI III

Cayon naid chuiquin utsibon chiaid

¹Ëmbia Esuquidistu tantiondaidquio Uan nebi. Esuquidistun chuinëdaid abimbo iquec, quequin tantiaquid mibi icsho mibi tantiaquin dada uaimbique. Isec onqueta, Cayo.

²Mimbi Nuquin Papan chiaid tantiapadquiec min nami bëdambo icpashun. Adembidi Nuquin Papan chiapadec tabadquin ismiac ma utsibobëd bëdamboec tabadpanuna. ³Mibëd icquidon nëmbo choshon naden chioishi. Esuquidistun chiapadomboen nabanec tabadquid Cayo nec, quequin chuibanoshi. Aden chiaid tantiabosh, Bëdambo iquebi, quec tsadebi. ⁴Mimbi chuibanac Esuquidistu tantiaquin muainquiocquin utsibon chuiioaic, quequin chuisho tantiaish bëdambo iquebi, quec tsadebi. Ëmbi con mado caidën bëdamboen naid chuisho tantiaish bëdambo iquebi.

⁵Mimbi yuedaidon naden chioishi, Cayo. Esuquidistu tantiaquid utsibo chosho isun yuedshun Cayon nashunec. Esuquidistun chiaid tantiaquid utsibo ambi isacmaid chosho isun adembidi yuedshun aido Cayon nashunec, quequin chioishi. ⁶Mimbi yuedshun nashunaid utsi-utsiec nëmbo choshon mimbi abi tantiaquin nashunaid nëmbocquido Esuquidistu tantiec iccuededquidobëdta chuibanoshi. Bëdamboen mimbi naic. Adembidi nabanquin adquid mibëdi tabadash,

Nidnu, qesho meneta ma buanueshun. Aido Nuquin Papan con bacuë caido ambi chuimaidquio nec. ⁷Aido isadaidpembo chuinuec nidshun adquid yacno choshon Esuquidistu tantiesa nec quec ëbi yued quetiapimbo iquebi quec Esuquidistu tantiaquid mibi icsho isash, Ëbipadquid nec, quiash mibi yacno puduedendac. ⁸Esuquidistun chiaid tantiaquid icquin Esuquidistu tantiaquid ambi chuimaido yuedtiad. Adoquin aidobëdtambi Esuquidistun nacpadomboen ismendac.

Diotedepesën icsamboen naid

⁹Mibëd iccuededquido aden chuiquin dada uaondambi. Aden ëmbi dada uaid bedash: “Ëmbentsëqui namembi,” quec Diotedepes chieshondash. Aidi ëbëd icquidon chiaid tantiate bunesa nec. ¹⁰Mibi yacno choshon Diotedepesën muaquin chiaid mibëd iccuededquido chiendambi. Aidi Esuquidistu tantiaquid utsibo yuedesa nec. Utsi: “Yuedmenu”, qesho tantiaish: “Padi. Yuedenda,” quec yuedmianesa Diotedepes nec. Adembidi, Yuedmenu, quequido cuëshëdmequid aidi nec.

Demetedio caid bëdamboquid nec, quequin chiaid

¹¹Aidën nacpadec icsainda, caimbi mibi. Nuquin Papan Icsaisanquio chiapadomboen naquid aidën con bacuë caid nec. Icsaquidën nacpadomboen

naquid Nuquin Papan chiaid tantienquo
 yec tabadquid nendac. ¹²Utsien Demetedio
 caid bédambocquid nec, quequin utsibon
 chiec. Abimbo chiec. Aidi Nuquin Papan
 chiacpadomboen nabanec tabadquidquo
 nec, quequin ëbëd icquidobëdtan
 chuioaimbi. Uanën chiaid abimbo iquec,
 quequin mibitedishun tantiendac.

Ënquin chiaid

¹³Dadpen dada uatiadquiocquimbi
 daëdpactsëc dada uaombi. ¹⁴Daëdec

ushtanquin mimbi ispashuni. Mibi
 yacno nidash mibëdi onquendabi.

¹⁵Esuquidistun chiaid tantiaquid
 utsibëd bédamboec ma mibi
 tabadpanuna. “Mibi tantiec tsadebi,
 Cayo, quequin dada uata”,
 Esuquidistu tantiaquid utsibon
 nëmbocquidon chiac adembidi
 chuioaquin dada uaombi. Esuquidistun
 chiaid tantiaquid anocquido adembidi
 chuibanoata.

Padi. Aided dada uaombi.

UDASËN DADA UAID

Tauamboen chiaid

¹Santiacon utsi Udas nebi. Esus tantiaquidistun yuambo nebi. Esus tantiaquidon mimbi iste dada uanu. Mibi tantiaquioquin Nuquin Papan mibi Esus tantiamiac. Adoac aid tantiasho isash: —Èbi tantienquio yanushe —quiash Esus mibi cudasec. ²—Aido bédamboen isquin bédambo icme, Papa —quequin Nuquin Papa chianembi mibi tantiaquin.

Muaquido iquendac, quequin chiaid

³Èmbi tantiaido mibi neque. Tantia. Nuqui cuidmenquio icnuec Esus abided cuidadec unèsaid tantiateuidi mibi chuitiadquio iccobi. Adnuc: —Esus tantiaquido iccuededacno muaquido puduedosh —quesho tantiaboshon aid mibi chuinu. Mibi yacnoshon ambenquiobi chuisho: —Mua. Esusèn chiaidpenquio mimbi chiec. Aid tantiatipimbo iquebi —cata. Nuquin Papan tantiacpadomboen Esusèn abèd icquido chuibanèdaid nuqui tantiaid neque. Utsi tantienda. ⁴Esus tantiaquido mimbi danubi mibi icsamenuec mibi yacno muaquido puduedac caosh. Ambi èndenquio tantiacpadomboen Nuquin Papan icsano nidmetequido aido neque. Muasho tantienda. —Nuquin Papan bédamboen isaido icsauidequi icsho nuqui cuidtiapimbo iquec. Chido chishpidambo yec dada cuididimbo yec

quec icsashobi nuqui bédamboen isec —quec comapenec muaique. Muasho tantienda. Esuquidistu Nuquin Icbo abentsëcshun chiaid niac-niaquec icsaique.

⁵Adquid Nuquin Papan comapenen cuidendac. Tantia. Nuquin Papan cuidampid mimbi tantianèdaid mibi chuinu. Equipito yacnoshon unèsmenuen ancanquidèn icsamboen chonoo uasho isun ashunquio Nuquin Papan con matses isadaidbo tsusedpabo puduamepampic. Adoac yuetanquin puduamiaiombi ambi chiaid niac-niacsho isun Nuquin Papan uesquin unès uapampic. ⁶Adembidi utsibotsen cuidpampic. Abèd icpampido ambi abi yacnoshon uaido mayan chedo abèdtan namequido icboedobi Nuquin Papan chiaid niac-niacte buncuenash Nuquin Papabèd icte bunenquio yampampic. Adec Satanash chedo abèd icte bunenquio icsho isun puduentiapimbo yacno icsamboshè yacno Nuquin Papan nidmepampic. —¿Ada mibi bédambo icti? Mibi icsamboshè iqueque. Mibi cuidnu —quetequid ushèn padpiden uesquin cuidnumbi adopampic. ⁷Adembidi shubu dadpen yacnocquido cuidpampic. Shubu dadpen icquid Sodoma caid yacnoshon dadan aton chidopenquio chudnubi adembidi chidon aton bènèpenquio chudmepampic. Dada aton dada utsibèdi chichudnanquidquio

icpampic. Shubu dadpen icquid Comoda caid yacnocquido adecbidi icsapampic. Shubu utsi-utsiec uanocquido adecbidi icsamboecuidi tabadpampic. Adsho isun cuidquin Nuquin Papan nêdëncapampic nibêdquiecnuc. Aido cuidampid tantiaquin: —Adembidi icsamboec tabadquido abitedi cuidquin Nuquin Papan chian anêdënquiacno nêsecaindac —quequin nuqui tantiec.

Muaquido icsaid

⁸Cuidte tantienquo yec adecbidi muaquido icsamboecuidi tabadec. Aton dada utsibëdi chichudnanquido nec. Abi chuiquid dapabon chiaid niac-niacquinc Nuquin Papan chiaid niac-niacquinc caindac. Adembidi Nuquin Papan abi yacnoshon uaido mayan bédabo caic: —¿Nadatiambo icquidta nedic? —quequin muauaic. ⁹Mayan bédabo chuiquid dapa Miqued caidën adotiapimbo icpampic. Aidi Moises unêsacsho isash: —Chococanu —quesho podobitsi icsabon icbon Satanasën: —Ëmbiquen bednu —catuidpampic. Adoac: —Icsano nidta —cainquo icpampic Miquedën. Adenquo icquin: —Nuquin Papambien mibi cuidec —capampic Miqued caidën mayan bédabo namequid dapa icquin. ¹⁰Muaquidombien ambi tantienquo yaid icsamboen chuishunec. ¿Ada bëdi cuidnushe quepadic? Adembidi abi cuidte tantienquo icquin ambi tantiaiduidi naic tabadsho Nuquin Papan cuidendac.

¹¹Cain caidbimboecquid muaquido nec. Nuquin Papan chiaid niac-niacquin abi bunaid naiqui icsaic. Badan caidën piucquid bednuen Nuquin Papan chiaid niactiadquo yampampic. Adembidi piucquid bednuen muaquidon ambenquiobi chiec. Code caidën abi chuiquid dapan chiaid niac-niacpampic.

Adembidi abi chuiquid dapan chiaid muaquidon niac-niaquec. Adsho Nuquin Papan comapenen cuidendac.

¹²Muaquido icsambo iquec. Mibi icsametiadquien icchitec. Esus tantiaquidon pebededacno puduedshun mibêdtambi muaquidon piac caosh. —Esus tantiaquidquo nebi —quiash puduedash dacuêdenquo yec icsaiqui tabadec. —Esus tantiaquido chuibanquid nebi —¿quec muaquidonda Nuquin Papan chiaid chuipadic? Padenquo. Ambi naiduidi naquin ambembi chiaid chiac matses nadquo iquec. Uispa dadpen icboedi badiadnuc abu chëshën bêtinacsho isash: —Tanunquien badiadec —queuidacbimboec matses iquec. Pete ambi nitsinaid unêsacsho istuidash: —Pete nitsinuidombi —quiacbimboec muaquidon chuisho tantiaquido: —Bêdamboen chiaid tantianu —queuidendac. ¹³Acte têtccuasquequidën cuêmano nushan uaquin icsa uacbimboen icsaquin muaquidon mibitsen icsamec. Abi capuaid tantienquo yequi: —Ëbi capuaid tantiaquidquo nebique. Isec cho —queboedi bënudtaniacbimboen: —Nuquin Papan chiaid tantiamequidquo nebi —queboedëmbi tantiamenquo iquec. Adec muasho cuidquin Nuquin Papan puduentiapimbo yacno icsamboshë yacno nidmendac.

¹⁴Adquido con tsusedpa Enoc caidën chuipampic. Abia matses uaid Adanën madon baban tishmiaidën baba Enoc nepampic. Naden chuipampic. “Nuquin Papan abi yacnoshon uaid mayan bédabo dadpenquioshë Nuquin Icbobêd choendac. ¹⁵¿Ada mibi bédambo icti? Icsambo icquid yec mibi icsauidequi iccoc. Mibi cuidnu,’ quequin matses icsambo icquido cuidnuec Nuquin Icbo

choendac. Nuquin Papa icsamboen chuishunquinc Nuquin Papan chiaid niac-niacquinc caquido cuidnuec choendac,” quepampic Enoc Esus matses cuidnuec chote chiec. ¹⁶Aidën cuidtequido muaquido abi chuiquid dapabon chiaid cacuidec: —Icsambo iquec. Adtiapibi —quec chieshëmë nec tabadec. Abi bunacpadecuidi icsaquiec. —Ëmbentsëqui bëdamboen naic —queuidequi iquec. —Ëmbi tantiacpadomboen ma nanu —quiash matses chiec: —Ëmbi tantiaidquio mibi nec —quec muaic.

Esus tantiaquionona, quiaid

¹⁷Ëmbi tantiaido mibi neque. Tantia. Esusbëd iccondaidon chiaid mibi chuinu. ¹⁸Nadpondash. “Esus padpidec choabi icnuc Nuquin Papan chiacpadec bëdamboec tabadsho Esus tantiesabon mamëshunendac. Nuquin Papan chiaid niac-niaquec abi bunacpadec icsaquindac,” quepondash. ¹⁹Adquio muaquido iquec. Aton padi yec icsaiqui chieshëmënuquin mibi cuësh-cuëshëdmec. Nuquin Papan aton Mayan aidobëd tabadmenquio iquec.

²⁰Adquid icsacpadec icsainquio icquin Esus tantiatsëcboedëmbi Nuquin Papan chiaid isban-isbanquin ënenquio icquin Esusbëdta Nuquin Papa tantianuna. Nuquin Papan Mayanën tantiamiacpadomboen Nuquin Papa chianenuna. ²¹—Abi tantiasho bëdamboen isquin abi yacno Esusën nuqui tabadmendac —queshun Esus

chosho isnuen cainquin aidbëdta Nuquin Papa tantianuna. —Nuquin Papan ëbi tantiec —quequin ambi chiacpadomboen utsibo tantianuna. ²²Adshumbic Nuquin Papan chiaid tantiatsëcquido bëdamboen isnuna. Adquidon muaquidon chuisho tantiashe: —¿Abimbobida capeba? —quesho tantiashe nëishenquio icquin Nuquin Papan chiaidquio tantiamenuna. ²³Bacuëmpi cuëten pichiquetsensho: —Baded bed. Taidnushe —quiacbimboen —Icsano nidmequin Nuquin Papan cuidnushe —queshun utsibo Esus tantiamenuna. Icsaquidotsen bëdamboen isnuna. Esus tantiamenuen aido bëdamboen isec: —Ëbitsen icsamane —quiash aido icsacpadec icsainda. ²⁴Nuquin Papa bëdamboshë iquec. Aid tantiashe nuqui icsamenquio iquendac. Adshumbic: —Icsambo mibi iquec —utsibo quetiapimbo icnuc bëdambo icmeshun bëdamboshë yacno abëdi nuqui tabadmendac. Adoac nuqui cuishonquendac. ²⁵Aden tantiaquin nadonona. —Abipadquid utsi nibëdnuc abentsëcquiobi Nuquin Papa iquec. Nuquin Icho Esusded cuidshun abi tantiaquido cuidenquio icquid nec. Abitedishun Icbombo Nuquin Papa nec. Nadatiambo icquin nabanquidquio nec. Abitedi chuiquid dapambo yec abitedi namequidquio nec. Bëdamboshë iquec —canuna ënenquio icquin. Esus tantiaquido icquin adonona. Padi. Aidedi chuiquin dada uaombi.

ESUSËN UAN ISMIAID

Nëidba chuiquin Uanën dada uaid

1 ¹Nuquin Papan tantiamiac Esuquidistun ismeboedquio chuibanquin dada uaic nebi. Esusbëd ictenedquio aton yuambo Uan nebi. —“Nuquin Papa aton Mado Esusbëdi abitedishun Icho icquin Satanas chedo ambi yuaido matsesbëdta cuidquimbi Esus tantiaquido abëdi tabadmendac,” quequin ma nuqui tantiaquidon tantianu —quequin Nuquin Papan chiac Esuquidistun ismeposhi. Esusën namiac abi yacnoshon uaid mayan bëdabontsen ismeposhi. ²Adoac Nuquin Papan chiaidbëdta Esuquidistun ismeboedquio chuibanquin dada uaic nebi. Abimbo caimbique. Tantia. ³Nëid dada uaid tantiaash chuibanquido ambi chiaidobëdi: —Ambi chiacpadomboen nëbi Esusën nanushe. Chieshtoenquio icquin abi tantiec bëdamboec tabadnuna —quiash bëdamboec tabadsho Nuquin Papan bëdambo icmendac.

Esus tantiaquidon iste dada uaid

⁴Nidaid utsi Asia caid yacno tabadquidon Esus tantiaquidon mimbi iste dada uaic nebi. Sietetedi shubu dadpen icquid yacno-yacnomboec tabadquido Esus tantiaquido mibi chuiquin dada uaic nebi. —Ambi nacpadomboen Nuquin Papan aton Mado Esusbëdtan bëdamboen isquin

bëdambo icmepashun. Adembidi aton Mayanën bëdambo icmepashun —quequin mibi tantiembi. Nidaid uabi yec ëndenquimboshë icpampidi nëbi adquid yec nibëdantiapimbo icquid Nuquin Papambo nec. Aton Mayanën abi bëisec tabadquidëmbi nuquibëdtsen icquin Nuquin Papan chiaid nuqui tantiamec. ⁵Aton Mado Esuquidistu Nuquin Papan bëdamboen iste tantiamequidquio nec. Abia aton dada unëstiapimbo icquid icmequin uincuemaidquio nec. Adquid yec abitedishun Icbombo nec. Ambiuidtsëqui chuiquid dapa abitedimbo namendac. Aidquio nuqui tantiaquidquio yec nuqui icsaid bedshunuec abided cuidadec unëspondash. ⁶Abi tantiaasho Esusën aton Papan yuabo nuqui icmec. Aden Nuquin Papan chiacpadomboen naquin: —Con matses bëdamboen ista —quequin Nuquin Papa chianequidquio nuqui nec. Adquido icquin: —Esus bëdamboshë iquéc. Abitedishun Icbombo nec. Ambi chiacpadomboen abitedishun napashun —canuna ënenquio icquin. ⁷Aidquio tantianuna. Nëbi chonoshe. Abitedishun Icbombo yec dacuëdampamboec chosho matses abitedishunquio isendac. Con matses ambi unës uaondaidquio chosho istanec: —Padtemboshë. Ashibi cuidpec —quetanec cuidte tantiec dacuëdec natiaic shubiendac. Esus tantiesabo

utsibotsen adecbidi abi cuidte tantiec natiac shubiendac.

⁸Adnubien Nuquin Papan chiosi. —Ëmbi tantiacmaid nibëdec. Abitedi comapenen tantiaquidquio nebi. Nidaid uabi yec ictenedi nebi. Nëbi adquid yec nibëdantiapimbo icquidquio nebi. Adquid yec abitedishun Icbombo nebi —queposh Nuquin Papa. Aidquio tantianuna.

Dacuëdampamboecnuc Esusën ismiaid

⁹Esusbëd ictened Uan nebi. Mibëdtan Esus tantiaquid yec min utsibimboecquid nebi. Mibi yapadembidi Esus tantiasho Esus tantiesabon chieshëmpondashi. Adoac Esusën namiacpadec chieshtoenuio iquebi. Chieshtoesa yec Nuquin Papabëd tabadtequido nuqui nec. Esus tantiesabon chieshënquin quënën nauedacimboen cuemenquio icnuen acte dapa nuacquid mad caid nënantan nidaid icquid Pacmos caidën tsadumpondashi. Adondac Pacmos caidën abi tsadec nebi. ¹⁰Dominco ushën Esus tantiec tsadshobini Nuquin Papan Mayanën tantiameposh. Adoac cachocuësh shoncate shoncacimboec comapenec onquesho tantiapombi. Ushenquio icquimbi ushqin isacimboen tantiombi. ¹¹Naden chuiposhi. —Nëbi mibi dadpen ismenu. Adoac ëmbi ismeboedtedi dada uabanta. Nëidtedishun iste dada uata. Nëidic shubu dadpen icquid Epeso caid yacnocquidon. Nëidic shubu dadpen icquid Esmidina caid yacnocquidon. Nëidic shubu dadpen icquid Pedcamo caid yacnocquidon. Nëidic shubu dadpen icquid Tiatida caid yacnocquidon. Nëidic shubu dadpen icquid Sadis caid yacnocquidon. Nëidic shubu dadpen icquid Pidadepia caid yacnocquidon. Nëidic shubu dadpen

icquid Daudiseya caid yacnocquidon. Aidedishun iste dada uashun buame —quequin comapenec onquequin chuiposhi.

¹²Comapenec onquesho tantiatanec bidadquin isquien tabote manitsinaid 7tedi icposh. Shocosh piu nacnenaidquio neposh. ¹³Aid nënantanquio Esusquio icposh. Con matses isadaidbo chuiquid dapabimboec dasiuidaccosh. Dashcute ënapen icquid abitiombi datonquiaccosh. Abi shictonquete bëshpiu-bëshpiuctsëcquid nuacquid dapambo icposh.

¹⁴—Icsaisambo nec —camenuc aton mapi aton manëdaidbëdi abu ushubimboec ushumboshë icposh. —Matsesën naidtedi tantiaquidquio nec —camenuc cuëte isquidbimboec aton ëshë isquid-isquidquio icposh. ¹⁵—Utsin: “Ëmbiquen abitedi namenu,” catiapimbo icnuc abitedimbo namequid nec —camenuc shocosh piu nacnenaidbimboec nac-nacquio aton taë icposh. —Nuquin Papapadquidquio nec —camenuc acte chododoquiacbimboec comapenec onqueposh. ¹⁶Abiucshun uispa 7tedi sanamposh. Chështe cuënumbo icquid ana shëcuënuësh cueshqueposh. —Matses icsaid cuidquidquio nec —camenuc adposh. Aton bëtantete ushëbimboec bëchamauanquiecposh. —Bëdambo icquidquio nec —camenuc ad icposh.

¹⁷Dacuëdampamboecsho istanequini Esusën dayumbi uebudpaccoc unësaniacbimboec padishec. Adshobini Esusën camishquin bëdameposh.

—Dacuëdenda. Nuquin Papapadquidquio nebi. Nidaid uabi yec ictenedi nëbi adquid yec nibëdantiapimbo icquidquio nebi. Adquid yec abitedishun Icbombo nebi. ¹⁸Adquid yequi matsesën unës uaid yec uincuenash padpidec unëstiapimbo

icquid nebi. Adquid icquin ëbi tantiaquido unësacsho uincuemeshun Con Pa yacno ëbëdi tabadmendambi. Ëbi tantiesaboembi icsaido cuidacno nidmendac —queposh Esus.

¹⁹Adashic abi onquec: —Naden chuiquin dada uata. “Nëbi nadquid iquec. Nadquid utsi iquendac. Utsin nadotsiandac,” quequin ëmbi chuiboedbëdta ëmbi ismeboedtsen chuiquin dada uabanta. ²⁰Tantia. Ëmbi uispa 7tedi icquid abiucshun sanamboed mibi chuinu. “Nidaid Asia caid yacno 7ted shubu dadpen icquid yacno-yacnomboec ëbi tantiec iccuededquido chuibanquido 7tedbidi icoaic,” quequin tantiaquin uispa 7tedi ismec nebi. “Ëmbi namiaido nec,” quequin uispa sananquin ismec nebi. “Ëbi chuibanquidën chuibansho tantiec iccuededquidobëd iquebi,” quequin tantiaquin tabote manitsinaid 7tedi tabëcacno aid nënantanquio ëbibi iquebi —quequin aden ismeposhi Esusën.

Epeso yacnocquido Esusën chiaid

2 ¹Aden Esusën uispa 7tedi sananquin ismioshi. Tabote 7tedbidi manitsinaid tabëcacno aid nënantanquio abibi icquin ismioshi. —Ëbi tantiaquido chuibanquidën Icho yec ëbi tantiaquidobëd iquebi —quequin aden ismeposhi. Adshumbic naden chuiposhi. —Epeso yacnocquidon ëbi tantiaquidon iste ëmbi naden chuiboed dada uata. “Tantia, Epeso yacnocquido. Mibitedi chuinu. ²Mimbi naidtedi tantiaquid nebi. Dayacquo icquin ëmbi chiacpadomboen mimbi dadpen nabanoc. Utsibo chieshtonobi chieshtoenquio icquin mimbi ëbi tantioc. Ëbi tantiaquido icsamenuen chiec: ‘Esusën namiaidquido yec mibi chuinuec chopobi,’ quequin muaquidon

chuisho: ‘Mua. Nuquin Papan chiaidpenquio mimbi chuibanoque. Utsibo chienda,’ quequin mimbi aidon chiaid tantienquio iccoc. Aden mimbi bëdamboen naoc. ³Adembidi utsibon chieshënaqui chieshtoenquio icquin Nuquin Papan chiaidbëdta ëmbi naid mimbi chuibanoc.

⁴Aden bëdamboen nasho isun mibi icsaid abentsëc chuitsëcnu. Tauamboen mimbi ëbi tantiaquiopadene. Aden ëbi tantiaquidquido icquin mimbi utsibotsen tantiaquiopadene. Adodenedëmbi pacuënëdacimboen ëbi bëdiactsëc tantiatsëcquin utsibotsen mimbi bëdiactsëcbidi tantiatsec. Adec mibi icsacuededec. ⁵Ëmbi chuiboed tantiash: ‘Ai, abimbo caic. Tauamboen Esus tantiaquiondaidi nëbimbi bëdiactsëc tantiachitec. Adchitequini icsaoc,’ qeshun tauamboen mimbi naondacpadomboen ëbi tantiaquiota. Adembidi utsibotsen tantiaquiota. Adoenquio icshoembi mibi yacnoshon ëmbi chiaid mibi chuibanquid nibëdmendac. Adnuc ëbi tantiec cuëdënuec mibi pudued-puduedenquio ictsianac. ⁶Mibi icsaid ënquin chiombi. Nëbi mimbi naid utsitsen isash bëdambo iccobi. Mibi cuëdënacno puduedshun nicodaitabon mibi icsamenuen icsamboen chuisho tantiashun: ‘Aido icsamboshë iquec,’ mimbi caoc. Adembidi aido bëdamboen istiapimbo icoaibi. ⁷Nëbi ëbi tantiaquido utsibo chuinu. Ëmbi Epeso yacnocquido chuibocpadomboen con Mayanën mibitsen tantiametsiashe. Pabiate cuembo icquin ëmbi chiaid tantiata. Satanasën: ‘Icsamenu,’ caqui chieshtoenquio icquin ëbi tantiasho Nuquin Papa yacno ëbëdi tabadmendambi. Tauamboen matses uashun Nuquin Papan aid dada tsadacno tied bëdamboeshë yacno tied

nënantan icquid cuëte matses unëstiapimbo icquid icmete icmepampic. Aid cuëte bacuë meniabcimboecnuc mibi padpidec unësenquo icnuc ëbëdi tabadmendambi,” quequin ëmbi chuiboad dada uata —quequin Esusën chuiposhi.

Esmidina yacnocquido Esusën chiaid

⁸Adshumbic Esusën padpiden chuioposhi. Aid nidaid uabi yec icpampidi nëbi adquid yec nibëdantiapimbo icquid nec. Adquid yec abitedishun Icbombo icshobi chieshëmëncquidon unës uacsho chococaqui uincuemaccondash. Adondaïd yec unësaid uincuemquidquo nec. Aidën naden chuiposhi. —Esmidina yacnocquidon ëbi tantiaquidon iste ëmbi naden chuiboad dada uata. “Tantia, Esmidina yacnocquido. Mibitedi chuinu. ⁹Ëbi tantiaquido icsho utsibon chieshënac mimbi dayun uaid nibëdquëndac. Nëbi mitsana nibëdquid yequi con Pa yacnuësh dadpen dayun uaquidbimboec mibi bëdamboshë iquendac. Chieshëmëncquidon mibi icsamboen chuishumboedtsen tantiembi. Mibi yacnoshon Satanasën namiac: ‘Isadaïdbo nebi,’ quequidon mibi icsamboen chuishunosh. Nuquin Papan con matses caido yequi Nuquin Papan yuapenquo yec Satanasën yuaboen nec. ¹⁰Aido tantiashe: ‘Ashibi mëyampatsiashe,’ quec dacuëdenda. Satanasën: ‘¿Ada Esus tantiaquido chieshtoencquidon ictsashe? Tanu,’ quequin namiacpadomboen chieshëmëncquidon mibi utsi-utsien quënën nauedbanendac. Adoac daëdpactsëc ushec mibi mëyadendac. Pduenabi yec chieshtoenda. Chieshëmëncquidon: ‘Esus tantiaquido icsho mibi cuesunenu,’ caqui

chieshtoenda. Aidon cuesuniacsho mibi Nuquin Papa yacno puduedmeshun ëbëdi tabadmendambi. ¹¹Nëbi ëbi tantiaquido utsibotsen chuinu. Ëmbi Esmidina yacnocquido chuibocpadomboen con Mayanën mibitsen tantiametsiashe. Pabiata cuembo icquin ëmbi chiaid tantiata. Chieshtoencquidon icquin ëbi tantiashe isun icsaido cuidquiacno nësecainquo iquendambi,” quequin ëmbi chuiboad dada uata —quequin chuiposhi Esusën.

Pedcamo yacnocquido Esusën chiaid

¹²Adoshombic ana shëcuënuësh chështe cuënumboshë icquid ceshqueboedën Esusën naden chuioposhi. —Pedcamo yacnocquidon ëbi tantiaquidon iste ëmbi naden chuiboad dada uata. “Tantia, Pedcamo yacnocquido. Mibitedi chuinu. ¹³Mibi yacno Satanasën yuabo dadpen icnuc ëbi tantiec mibi chieshtoencquidon iquec. Ënden Satanasën namiac mibi yacnoshon chieshëmëncquidon con yua Antipas caid cuesunepondash. Aidën chieshtoencquidon icquin ëmbi naid chuibansho cuesuniacsho isumbic adembidi chieshtoencquidon icquin mimbi ëbi tantiaquidopondac. Aden mimbi bëdamboen naid tantiembi.

¹⁴Adondaïd tantiaquin mibi icsaidtsen chuinu. Mibi cuëdüencedadacno Esus tantiaquido icsamequid utsi-utsiec puduedposh. Badan caïdbimboecquido aido nec. Ëndenquimboshë matses utsibo chuiquid dapa Badac caïdën: ‘Isadaïdbo aqec cho,’ cac compapen tantiaquidën Badan caïdën isadaïdbo Nuquin Papan chiaid niacmenuequin chuitampampic. Aidën chiacpadomboen Badac caïdën matses chidobon isadaïdbo dada dadpen chudmebededpampic. Adshumbic ambi papa caïd Nuquin Papapenquo

tantiamentuen ambi papa quequin dasamboed nëish pichicaid pebededacno buampampic. Aden Nuquin Papan chiaid niac-niacmec icsamianquido mibëd iquec. Aido cuemepatecnëdan mimbi. ¹⁵Adec nicadaitabo caido ëbi tantiate shubun puduedash mibëdi cuëdëncuededec icsamiane bumpec. ¹⁶Aidon chiaid niac-niacmenushe. Aidobëd tabadenda. Mibi cuëdëncuededacno chomenda. Ëmbi chuiboed niacbidansho isun con ana shëcuënuësh cueshqueboedën chështen cuesacimboen mibi cuidtsiambique. ¹⁷Nëbi ëbi tantiaquido utsibotsen chuinu. Ëmbi Pedcamo yacnocquido chuibocpadomboembidi con Mayanën mibitsen tantiametsiashe. Pabiate cuembo icquin ëmbi chuiboed tantiata. Chieshtoenquo icquin ëbi tantiasho bëdambo icmendambi. Nuquin Papan isadaidbo mana caid pemedenequin dayun uacpadomboen mibi bëdamboen tabadmendambi. Adshumbic: ‘Ëmbi tantiaidquido yec ëbi yacno puduedtequid nec,’ qeshun cuënote ushu menendambi. Abi cuëmëdquid icnubi utsi uain cuëinquin aid cuënoten dada uatanquin menendambi. ‘Ëmbi meneboedënuidtsëqui ma isnu,’ quequin adoendambi,” quequin ëmbi Pedcamo yacnocquido chuiboed dada uata —quequin chuiposhi Esusën.

Tiatida yacnocquido Esusën chiaid

¹⁸Adoshombic aidëmbidi padpiden chuioaposhi. Cuëte isquidbimboec aton ëshë isquid-isquidquido yequi aton taë shocosh piubimboec nac-nacpambo icposh. —Icsaisambo yec Nuquin Papan Madombo nec. Adquid yec abitedishun naid tantiaquidquido icquin matses cuidquidquido nec —camenuc adquido

isadquidën naden chuiposhi. —Tiatida yacnocquidon ëbi tantiaquidon iste ëmbi naden chuiboed dada uata. ¹⁹“Tantia, Tiatida yacnocquido. Mibitedi chuinu. Mimbi naid abitedi tantiambi. Ëbi tantiaquin mimbi utsibotsen bëdamboen tantiec. ‘Aton Papabëdtan Esusën bëdamboenshë natsiash,’ quequin chieshtoenquo icquin mimbi ëbi tantiec. Adquid icquin ëbi tantiamentuen utsibo nashunquido mibi nec. Ëbi tantiesabon: ‘Padi. Esus tantienda,’ caqui mimbi chieshtoenquo icquin ëbi tantiapec. Tauamboen ëbi tantiaquin daëdpactsëc naondaiddi nëbi ëbi tantiaquioshon ëmbi chiacpadomboen mimbi dadpen naic.

²⁰Adec utsi-utsiec bëdambo icnubi icsamianquid chido abi iquec. Aid mimbi cuemepatecnëdan. Aid cuemenquo yec mibitedi icsaic. Mimbi cacumiabi mibi iccuededacno isadaidbo tsusedpan chido Esabed caidbimboecquid chido icsamboshë icquid muanuec puduedposh. Puduedshumbic: ‘Nuquin Papan chiaid chuiquid nebique. Tantia. Chuinu,’ quequin abi bunaidquido chuibanosh. Adoac ëbi bëdiactsëc tantiauidtsëcboedi aidën chiacpadecc icsacuededposh. Nuquin Papapenquo utsibon papa caid tantiabededacno puduedposh. Adshumbic aidon papa quequin dasamboed nëish pichicaid pec tabadcuededquimbi aton chidopenquo chudbededposh. ²¹Adsho isun aid chido: ‘Ma abi icsaid ënu,’ qeshun badedquido cuidenquo iccombi. Adoboqui abi icsaid ënte bunenquo iccosh. ²²Adec abi icsaid ëntiapimbo icsho isumbimbi nëbi cuidendac. Ëmbi nac daicsabudash mëyadquiec aton ueten uendac. Ambi chiacpadomboen naquido adembidi mëyadquionoc cuidendambi. Aidon ambi naid ënshoembi cuidenquo

ictsiac. ²³Aid chido cuidquiquimbi aton bacuëbobimboecquido aidën chiacpadomboen naquin ëntiapimbo icquido adembidi cuidquiendambi. Ëmbi adosho isun ëbi tantiaquidtedishun: ‘Matsesën otacquo tantiaid tantiaquidquido Esus nec. Adquid icquin abi icsaid ënenquio icquido cuidquin abi tantiaquido bëdambo icmendac,’ quequin tantiasiash.

²⁴Tantia. Ambocquido ëbi tantiaquidombotsen chuinu. Aden Satanasën chuimaidën chuisho: ‘Aden chuisho tantiatiapimbo iquebi,’ mimbi capoc. Aden bëdamboen nasho isun utsi chienquio iquembi. ²⁵Nëiduidtsëqui chuinu. Mimbi bëdamboen nabocpadomboen chieshtoenquio icquin ëbi tantiata. Ëbi choabi yacpadembi adota. ²⁶Choshombimbi chieshtoenquio icquin ëmbi chiacpadomboen naquidomac ëbëdtan chuiquid dapabo icmendac. Adoac ëbëdtan matses utsibo abitedi namendac. ²⁷Aden Nuquin Papan aido ëbëda chuiquid dapa icmiacsho utsibon: ‘Dëniacquin ëmbiquen nanu,’ catiapimbo iquendac. Ëbi chieshëquido: ‘Esus dëniacquin ëmbiquen matses namenu,’ qesho tantiasahun matsu nacnenquidën ambi nacnenaid icsambo icsho isun pos-posacimboen cuidquiendambi. ²⁸Badiadte anoentsëc uispa dapa choded-chodedbocpadquieç ënëdenquio yec ëbi tantiaquidobëd iquendabi. ²⁹Ëbi tantiaquido utsibotsen chuinu. Ëmbi Tiatida yacnocquido chuibocpadomboen Nuquin Papan Mayanën mibitsen pausuntsiashe. Pabiate cuembo icquin tantiata. Chieshtoenquio icquin ëbi tantiasho adembidi bëdambo icmendambi,” quequin ëmbi chuiboed dada uata —quequin chuiposhi Esusën.

Sadis yacnocquido Esusën chiaid

3 ¹Adoshombic Nuquin Papan Mayan abi tantiaquidobëd tabadmequidquio icquin Esusën padpiden chuiposhi. —Abi tantiaquido chuibanquid namequid nec —camenuen uispa 7tedi sananquin ismeboedën naden chuiposhi. —Sadis yacnocquidon ëbi tantiaquidon iste ëmbi naden chuiboed dada uata. “Tantia, Sadis yacnocquido. Mibitedi chuinu. Mimbi naidtedi tantiembi. Bëdamboec tabadquido danquin utsibon: ‘Bëdambo icquido nec,’ mibi canubi ëmbien adotiapimbo iquec. Mibi bëdapenquio iquec. Unësacimboen mimbi ëbi bëdamboen tantienquio iquec. ²Isucunacimboen ëbi padpiden tantiaquiota. Nuquin Papan chiacpadomboen mimbi nauidtsëccoque. Mimbi ëbi tantienquio iqueque. ‘Nuquin Papan chiacpadquieç bëdamboec tabadnuna. Esus tantiaquionona,’ cananta. ³Mimbi ëbi tantiabenondacpadomboen ëbi tantiaquiota. Bëpiscudenda. Nëbi mibi icsaid ënshun ëmbi chiacpadomboen naoata. Isucunenuquio yacimboen ëbi tantienquio icshoembi mibi cuidendac. ‘Ampequid choec,’ quequin tantienquio yacimboen ëmbi cuidte tantienquio icsho mibi cuidtsiambique. Ëbi tantiaquiota.

⁴Mibi yacno icsaquido dadpen tabadnubi utsi-utsieç daëdpactsëc ambi naid icsa ucudacimboec icsainquio yec bëdamboec tabadec. Adec bëchish ucudacimboec abi icsaid ënash bëdamboec tabadsho isun ëbëdi tabadmequin icsaisa icmendambi. ⁵Ëbi tantiaquido utsibotsen chuinu. Ëmbi chuibocpadquidën chieshtoenquio icquin ëbi tantiasho adembidi bëdamboen isun Nuquin Papa yacno

ëbëdi tabadmequin icsaisa icmendambi. Aido cuëmëdquid cuëmëdquidquien Nuquin Papa chuibanendambi. ‘Aido ëbi tantiaquidotedi neque. Nuquibëd tabadmenuna,’ quequin adoendambi Nuquin Papan abi yacnoshon uaido mayan bëdabontsen tantianuc. Aden dada uaid ucudenquoio yac bimboen bëshunenquoio icquin ëbëdi tabadtequido abitedi tantiemi. ⁶Ëmbi Sadis yacnoquido chuiboed Nuquin Papan Mayanën mibitsen tantiametsiashe. Pabiate cuembo icquin bëdamboen tantiata. Chieshtoenquoio icquin ëbi tantiasho adembidi bëdambo icmendambi,” quequin ëmbi chuiboed dada uata —quequin Esusën chuiposhi.

Pidadepia yacnoquido Esusën chiaid

⁷Adoshombic icsaisambo icquin ambi chiacpadomboen naquidënquoio Esusën padpiden chuiposhi. Con tsusedpa Dabid yampicpadquid matses namequidquoio yec ambentsëqui Nuquin Papa yacno puduedmequid nec utsibon: —Padi —catiapimbo icnuc. Abi tantiesabo cacumequid Esus nec. Aidën naden chuiposhi. —Pidadepia yacnoquidon ëbi tantiaquidon iste ëmbi naden chuiboed dada uata. ⁸“Tantia, Pidadepia yacnoquido. Mibitedi chuinu. Mimbi naid tantiemi. Mibi yacno ëbi tantiaquido daëdpactsëc iquec. Adquid yec: ‘¿Ada nuquitedictsëqui chieshtoenquoio icpatsiaba?’ queded-quededtsëcquien mimbi ëbi tantiaquioc. Chieshënaqui: ‘Esus tantiatiapimbo iquebi,’ quenquoio mibi iccoc. Adec chieshtoenquoio icsho isun ëmbi namiac ëmbi naid mimbi chuiban-chuibanendac utsibon ëmetiapimbo icquin. ⁹Aden isadaidbon mibi ëmetiadquio iquec. Aido: ‘Con matses isadaidbouidtsëqui Nuquin

Papan bëdamboen isendac,’ quec muaboedo Satanasën yuabo niosh. Ëmbimbo namiac mibi yacno cho-chosho mimbi chuibanendac. Adoac: ‘Ai, abimboen mimbi caoc. Nuquin Papan Madon Esusën tantiaidombo mibi nec,’ aidon mibi caindac. ¹⁰Ëmbi chiacpadec chieshtoenquoio icquin ëbi tantiasho isash mibi cudasendabi. ‘¿Ada Esus tantienquoio yantsiashe? Tanu,’ qeshun nidaid utsi-utsiec yacno tabadquido abitedi Satanasën natiambo icmendac. Adosho mibi chieshtoenquoio icquid icmendambi.

¹¹Tantia. Nëbi choendabi. Utsibon chieshënaqui mibi icbocpadquiec chieshtoenquoio yec bëdamboec tabadta. ‘Ëbi adenquoio icsho isun Esusën abi yacno puduedmenquoio ictsiashe,’ quiash bëdamboec tabadta. ¹²Aden chieshtoenquoio icquin ëbi tantiaquido utsibo abitedi Nuquin Papa yacno yuedendambi. Buintad nitsinaid chiquidtiapimbo yac bimboecnuc con shubun icquido mibi icmendambi auëshquoio cuentiapimbo icnuc. ¿Mitsipaden icbon: ‘Con na nec,’ quequin abi cuëmëdquid dada uaquin ismepec? Adembidi abitedi ismequin: ‘Con Pabëdtan con matses nec,’ mibi caindami. ‘Nuquin Papa yacno ëbi tabadaid Edusaden chuca caid abucuësh budtequid yacno tabadtequidombo nec,’ mibi caindami. Nuquin Papan abitedishun Icbombo icmiac ëbëdtambi chuiquid mibi icmendambi. ¹³Ëmbi Pidadepia yacnoquido chuibocpadomboen Nuquin Papan Mayanën mibitsen pausuntsiashe. Pabiate cuembo icquin bëdamboen tantiata. Chieshtoenquoio icquin ëbi tantiasho adembidi bëdambo icmendambi,” quequin ëmbi

chuiboed dada uata —quequin Esusën chuiposhi.

Daudiseya yacnoquido Esusën chiaid

¹⁴Adoshombic abitedishun naid tantiaquin abimbo chuiquidênquio Esusën padpiden chuioposhi. Nidaidbêdta abitedi uaquidênquio abitedishun Icbon chuiposhi naden. —Daudiseya yacnoquidon ëbi tantiaquidon iste naden ëmbi chuiboed dada uata. “Tantia, Daudiseya yacnoquido. Mibitedi chuinu. ¹⁵Mimbi naid tantiembi. Chieshtoenquio icquin ëbi tantiaquid ictiadquidi adquidpenquio mibi nec. ¿Ëbi bédamboen tantiaquidon adopendactic? Padenquio. ‘Esus tantiaquid nebi,’ quiondaidëmbi mimbi naiduidi naquin mimbi ëbi bëdiactsëc tantiatsëccoc. Adsho tantiashun: ‘Dayacquio yacbimboen ëbi tantiaquiopashun,’ caimbi mibi. ¹⁶Mibi adec chieshtonoc ëbitsen chieshtotiadquio iquebi. ‘Cacumiacimboen Nuquin Papa yacno ëbëdi mibi tabadmenquio iquendambi,’ mibi catiadquio icchitebi. ¹⁷Nuquin Papan chiaid niac-niaquec icsapobi,’ quetiadquidi: ‘Ëmbembi con na dadpen bedshun dayun uaic utsi bunenquio yec bédambo iquebi,’ mibi quepoc. ‘Esus tantienquio yec Nuquin Papabéd tabadtiapimbo icchitebi,’ quetiadquidi mibi adenquio iccoc. Nuquin Papa yacno tabadte tantienquio icsho isun mibi shubiuatiadquio iquebi. Bëchish ucabi yacbimboen mibi icsaid ënabi icsho mibi bédamboen istiapimbo iquebi. Pacuënëdäcimboben ëbi tantienquio mimbi iquec. ¹⁸Adboedëmbi Nuquin Papabéd tabadte bunquin ëbi tantiaquiota. Ëbi tantiaquin bëchish ucacimboben mibi icsaid ënta. Adsho icsaisabimboecnuc mibi bédamboen isquin ëbëdi tabadtequid

icmetsiambique. Pacuënëdaid paposhquiabimboecnuc ëmbi naid mibi bédamboen tantiametsiambique. Ëbi tantiata.

¹⁹Ëmbi tantiaido bédamboen tantiamembi. Aton papan: ‘Padi, mibi icsambo iquec,’ quequin bacuë ëmiacimboben ëbi tantiaquido icsasho isun ambi naid ëmenuequin natiambo icmendambi. Ëbi tantiaquin mimbi icsamboben naid ënash bédamboec tabadta. ²⁰Mibi tantiaquiembrie. ‘Ëbi tantiata,’ ëmbi cac mibi: ‘Ai,’ qesho tantiash mibëd iquendabi. Pec tabadec bëisnaniacimbobeec mibëd iquendabi. ²¹Tantia. Ëbi tantiaquido utsibotsen chuinu. Chieshtoenquio icquin Nuquin Papan chiaidtedi naquin nainash aidbëdi tabadquid nebi. Adquid yec aidbëdi abitedishun Icbombo nebi. Adembidi ëmbi con Pan chiaid nacpadec chieshtoenquio yec ëbi tantiec tabadsho ëbëdi tabadmequin ëbëdtan chuiquid icmendambi. ²²Ëmbi Daudiseya yacnoquido chuibocpadomboben Nuquin Papan Mayanën mibitsen pausuntsiashe. Pabiate cuembo icquin bédamboen tantiata. Chieshtoenquio icquin ëbi tantiasho adembidi bédambo icmendambi,” quequin ëmbi chuiboed dada uata —quequin chuiposhi Esusën.

Nuquin Papa Uanën isaid

4 ¹Asia yacnoquido Esusën ëmbudquin chuibon abuc ispombi. Adshun isquien shëcuë shëcniacimbobeec isadpec. Adnubien chuibocpadquiec shoncacimbobeec comapenec onqueoaposh. —Nëmbo cho. “Nadquid iquendac. Nadotsiandac,” quequin mibi dadpen ismenu —caposhi.

²Adoac Nuquin Papan Mayanën tantiamiac ambo nidacimboben ispombi. Ushquin isacimbobeembimbi

caindac. Adshun isquien Nuquin Papambo chuiquid dapan tsadte dapanquio tsadpec. ³—Chuiquid dapa abentsëcquiobi nec. Bëdamboshë iquec —camenuec matses bunaidquio casëdubimboec nac-nacquio yec piumbo yec bëdamboshë isadposh. Abi tsadaid nënantanquio uenquebudpamboec uen podquedbipamboec umu-umupambo icposh. —Bëdamboshë icquidquio nec —camenuec adquio icposh. ⁴Nuquin Papa nënantan icnuc abi dacuenadec matses tsusiobo Esus tantiaquido chuiquido 24tedi icquido tabadposh. Chuiquid tsadte utsi 24tedi tsadte icnuc icbo-icboec aid tsadten tabadcuededposh. Abëdi tabadmequin Nuquin Papan icsaisa icmiaido yec ushumboshë icquidquio dasiuidcuededposh. Chuiquid dapan mauetembo shocosh nacnenaaidquio mauecuededposh. ⁵Adnubien Nuquin Papa yacnuësh abubimboec bed-bedquetanenubien abu tesquianiacbimboec cuëdtoposh. —Abitedishun Icbombo nec —camenuec adec cuëdposh. Nuquin Papan bëntsiaucquio tabote taboaid 7tedi icnuc tabëcaid icposh. —Aton Mayan abentsëcshun Nuquin Papa bëisquioquimbi abi tantiaquido chianequid yequi Esus tantiaquidobëdtsen icoaic —camenuen aden ismeposhi. ⁶Bëntsiaucbidi actepenquio chian dapa acte-actetsëcquio isadposh.

Nuquin Papa tsadaid anoen daëdtsëcquio abi dacuenadec aben icquidbimboecquid 4tedi icposh. Dadano chedobi ëshë ictsëcquieci icposh. Utsi tanenquio. Abimbouidquio istequidquio icposh. Cachoc icnubi tacbiduc adquiobidi icposh. ⁷Abentsëc bëdi dapambo tëbuchoquidbimboec icposh. Utsibic baca bënëbimboec

isadposh. Utsibic matsesën bëtantetebimboec bëisadposh. Utsibic chiqui dapabimboec isadposh.

⁸Icbo-icboec aton podo uicchunën podobimboec 6tedi icposh. Podonotsen adquiobidi ëshëuidquio isadposh. Podo ananquio adquiobidi icposh.

Aidonquiobi ënenquio icquin Nuquin Papa chuiposh naded cuëdëntquin.

—Icsaisambo yec bëdamboshë icquidquio mibi nec.

Abitedishun Icbombo mibi icnuc mibipadquid utsi nibëdec.

Abitedimbo tantiaquidquio mibi icnuc mimbi tantiacmaid nibëdec.

Matses uabi yec icpampidi mibi nec.

Nëbi adquid yec mibi

nibëdantiapimbo icquidquio nec

—quec badiadquidën

badiadquidënquieci cuëdënnashic inchëshëntsen cuëdëndeneposh.

⁹Aden dadanobi ëshëcquidon:

—Mimbi nac bëdambo iquebi. Mibi bëdamboshë iquec, Papa. Abitedishun adembidi: “Bëdambo iquec,” mibi cac bëdambo ictsias, Papa —Nuquin Papa cadonenubi ¹⁰tsusiobo 24ted icquido ambo tabadquido danëshën tinquebudcuededposh. Adtanquimbi mauete chicbededtanquin Nuquin Papan tayun sambededposh:

—Abitedishun Icbombo mibiuidtsëqui

nec —quequin. Adotanquimbi aidontsen Nuquin Papa chuiposh naded cuëdëntquin.

¹¹—Mibi bëdamboshë iquec, Papa.

Adembidi abitedishun mibi:

“Bëdambo iquec,” capashun.

Abitedishun Icbombo mibiuidtsëqui nec.

Chuiquid dapambo abentsëcquiobi mibi nec.

Mibipadquid utsi nibëdec.

Nadatiambo icquidquio mibi nec.

Comapenen tantiaquidquo icquin
mimbi abitedimbo uapampic.

Mimbi tantiacpadomboen
mimbiuidtsëcquiobi abitedi
uapampic.

Adoac mimbi tantiacpadequi mimbi
uaido nibëdanabi yec abi iquec.
—quec tsusiobo cuëdëncuededposh.

**Nuquin Papan chiacpadomboen
namequid Esus isadaid**

5 ¹Adshun isquien Nuquin Papan
abiucshun ambi chiaid dada uaid
sanampec. Abiuc daëdi dada uaid
bidicabanquin: —Istemaïdën isnushe
—qeshun 7ted icnuc bitaccatempin
bitaccabanaid neposh. ²Adnubien
Nuquin Papan abi yacnoshon uaid
mayan bëda chuiquid dapa comapenec
onqueposh. —¿Tsuntsin nëid dada uaid
bedshun bitaccaid chicbanquin
chuiampatsiash? —quedo-quedoposh.
—¿Tsuntsin Nuquin Papan chiaid
bedshun isquin ambi chiacpadomboen
naquin naimepatsiashba? —quequin
tantiec adposh. ³Adoquien
ëcbedanenquo icposh abitedimbo.
Nëidic Nuquin Papabëd tabadquidotedi.
Nëidic nidaidën tabadquidotedi. Nëidic
unësaidotedi. Aidtedi dada uaid
bedshun bitaccaid chicbanquin istequid
nibëdposh. ⁴Adsho isashini unësquo
icnuc shubipoc: —Aid dada uaid
bedshun chicbanquin chuihanquid
nibëdec —quiash. ⁵Adshobini anocquid
tsusion: —Otac. Shubienda. Ènëd. Is.
Dada uaid bedshun chicbanquin
chuihanquid abi iqueque. Nuquin Papan
matsesmequin chomiondaïdquo neque.
Aton tsusedpa Uda yampid icnuc aton
tsusedpa utsi Dabidbimboecquid
chuiquid dapambo nec. Utsibon
dëniacdiapimbo icquid nec. Aidëmbi
chieshtoenuquo icquin Nuquin Papan
chiacpadomboenuïdï naquidquidquo icquin

aid dada uaid bedshun namendac
—caposhi.

⁶Adoac isquien isadaïdbon Nuquin
Papa cuidmenquo icnuen abided unës
uaid obeca bacuëbimboecquid Nuquin
Papabëd abi tsadacnombo isadtsec.

—Matses icsaid bedshunuec abided
cuidadec unësaid Esusquo nec

—camenuc adec isadposh. Utsibo
dacuenadec tabadnuc nënantanquo
Nuquin Papabëdquo icposh.

Anoentsëqui dadanobi ëshëcquido
dacuenadec tabadnuc abi uquëtsëc
tsusiobuidquo dacuenadec tabadposh.
Padnuc obecabimboecquid yec aton pais
7tedi icnuc aton ëshëmbo

aidtedquibidi icposh. —Abitedishun
Icbombo yec utsin dëniacdiapimbo
icquid Esusquo nec —camenuc aden

pais ismeposhi. Adembidi: —Aton
Mayambidi Nuquin Papan Mayan yec
nidaid utsi-utsiec yacno matses abitedi
yacno nidmiaïd icnuc

ompodëmëdtiapimbo icquid Esus nec
—camenuc ëshë 7tedi ismeposhi
ushquin isacbimboecnuc. ⁷Adshumbic
obecabimboec isadboedën Esusën

Nuquin Papan abiucshunquo sananaïd
dada uaid bedposh. ⁸Bedsho istanequien
dadanobi ëshëcquidobëd tsusiobo 24ted

icquido Esus ismec danëshën
tinquebudcuededposh. —Bëdamboshë
icquidquo mibi nec —quiash

adcuëdedposh. Tsusiobon icbo-icboen
ten-tencate sananquimbi utsiucshun
shocoshëmpi bëdambo nuadnuc

tauitempi sanamposh. —Èmbi
ten-tencamequin Nuquin Papa
cuishoncamiacbimboec Esus tantiaquido

cuëdënaïd iquec —quequin aden
ten-tencate sananquin ismeposhi.
Adembidi: —Nëshun tauiac nëid

pushudquid Nuquin Papa yacno
nidacbimboec Esus tantiaquidon
chianaïd iquec —quequin bëdambo

nuadnuc tauitempi sananquin
ismeposhi. ⁹Adashic cuëdënte chucan
Esus chiec cuëdëncuededposh tsusiobo.

—Mibi bëdamboshë iquec.

Nuquin Papan chiacpadec matses
cuidmenquo icnuec mibided
cuidadec unësondaidquo mibi
nec.

Nëbi icsambo icboedombi mibi
tantiasho Nuquin Papan
bëdamboen isendac.

Aden Nuquin Papan
chiacpadomboen naquidquo
mibiuidtsëqui nec.

Mimbiuidtsëqui Nuquin Papan
sanamboed dada uaid bedshun
bitaccaid chicbanquin isbanquin
Nuquin Papan chiac- padomboen
namendac.

Mibi tantiaquidotedi Nuquin Papan
bëdamboen isendac.

Nëidtedi matses caimbi. Nëidic
matsesquo.

Nëidic matses utsibo.

Nëidic nidaid utsi-utsiec yacno
tabadquido.

Aidtedi mibi tantiaquido yansho
Nuquin Papan bëdamboen
isendac.

¹⁰ Adoac min yuabo yanshun Nuquin
Papa yacno mibëdi tabadquin:
“Mibi bëdamboshë iquec,”
caded-cadedendac.

Mimbi tantiacpadën nidaidënuësh
mibëdtan chuiquid iquendac

—quec cuëdëncuededposh tsusiobo.

¹¹ Adnubien abi yacnoshon Nuquin
Papan uaido mayan bëdabotsen
cuëdëncuededposh dadpenquioshë.
10,000 X 10,000tedi udimbo dëniacash
cuëte podotedi tambantiapimbo
yactedimbo comapenec
cuëdëncuededposh. Nuquin Papa
Esusbëdi nënantanquo icnuc
anoentsëqui dadanobi

ëshëcquidoidquo dacuenadec
tabadposh. Abi uquëtsëc dacuenadec
tsusioboidquo tabadposh. Aid
uquëtsëc dacuenadequic mayan
bëdaboidquo tabadposh. ¹²Adec
tabadec mayan bëdabo abitedimbo
cuëdëncuededposh naden chiec.

—Isadaidbon obeca bacuëded
cuidacimboec matses icsaid
bedshunec abided cuidadec Esus
unë- pondash.

Esusquo bëdamboshë icquidquo
nec.

Adquid icsho: “Abitedishun Icho
icquin Nuquin Papan
chiacpadomboen namequidquo
mibi nec,” abitedishun capashun.

Adembidi: “Mimbi uaido yec
mitsana abitedimbo nec.

Comapenen tantiaquid mibi icnuc
mimbi tantiacmaid utsi nibëdec,”
abitedishun capashun.

Adembidi: “Mibi bëdamboshë iquec.
Mibi tantiaquiembi,” abitedishun
capashun

—quec cuëdëncuededposh mayan
bëdabo Esus tantiec.

¹³ Adnubien Nuquin Papan uaido
abitedimbo cuëdëndocuededposh. Abi
yacnocquidotedi yec nidaidën icquidotedi
yec unësaid uincuemiaidotedi yec acten
icquidotedi yec quec cuëdëncuededposh
naden chiec.

—“Abitedishun Icbombo yec tsadte
dapan tsadquidquo Nuquin Papa
bëdamboshë iquec.

Obeca bacuëbimboecquid abided
cuidadec unësaid Esustsen
bëdamboshë iquec,” canuna,
ënenquo icquin.

“Abiuidtsëqui Nuquin Icho nec. Utsi
adquid ictiapimbo iquec.

Aidën nac nuqui bëdamboshë iquec.
Abipadquid utsi nibëdec,” canuna
ënenquo icquin

—quec cuèdencuededposh abitedimbo.

¹⁴Adsho tantiash dadanobi
 èshècquido: —Ai, abimbo caic
 —quenubi tsusiobo 24ted icquido:
 —Nuquin Icbo bèdamboshè iqueque.
 Ismenu —quetanec Nuquin Papabèda
 Esus ismec danèshèn
 tinquebudcuededposh.

Bitaccaid chicaid chiaid

6 ¹Adnubien Esusèn Nuquin Papan:
 —Nadoendambi —quequin chiaid
 dada uaid 7tedi bitaccaid tauamboen
 abentsèc chicposh chicabi icquid 6tedi
 icnuc. Aid chicnubien Nuquin Papabèd
 icquid dadanobi èshècquidèn
 abentsècshun abu cuèdacbimboec
 comapenec cuèdquin: —Cho —caposh.
²Adoac cabayo ushumbo icquid
 catsadec dada canti sanampamboec
 chosho ispombi. Adec chosho isun:
 —Mibi chieshèncquido uesquin cuesun
 secaquidquio mibi nec —quetanquin
 chuiquid dapan mauemeposh. Adoac
 adecbidi abi chieshèncquido cuesun
 secanuec nidposh.

³Adnubien Esusèn dada uaid bitaccaid
 utsi udictsècquid chicposh chicabi
 icquid 5tedi icnuc. Aid chicnubien
 dadanobi èshècquid utsin: —Cho —cac
⁴cabayo piumbo icquid catsadec dada
 choposh. —Matses cuesun
 secananenquio icsho Nuquin Papan
 tantiacpadomboen aidèn nac matses
 abitedimbo matses utsibobèd cuesun
 secananendac —quesun chèshte dapa
 matses siantè dapa meneposh.
 Adomboen Nuquin Papan matses cuidte
 tantiameposhi.

⁵Adnubien Esusèn dada uaid bitaccaid
 udictsècquid chicposh chicabi icquid
 4tedi icnuc. Aid chicnubien dadanobi
 èshècquid utsintsen: —Cho —cac
 cabayo chèshèmbo icquid catsadec dada

choposh. —Pete daèdpacktsèc icmete
 chiec —camenuen pete yuè tante
 sanamposh. ⁶Adnubien dadanobi
 èshècquido dacuenadec tabadnuc
 nènantanshunquio Nuquin Papan
 cabayo chèshèmbo icquid catsadquid
 chuiposh. —Piuquid dadpenquio
 meniac aton yuè daèdpacktsèc
 tambanshun pete utsi-utsien
 daèdpacktsèc menianquid iquendac
 —quequin pete utsi-utsiec nibèdte
 chuiposh. Adshumbic: —Pete utsi-utsien
 nibèdmetanquin tiedèn icquid pete
 utsi-utsien nibèdmenquio icquin nata
 —quequin chuiposh. —Nuquin Papan
 cuidac adec pete nibèdnuc matses pete
 bunquiendac —quequin cuidte utsi aden
 ismeposhi.

⁷Adnubien Esusèn dada uaid bitaccaid
 udictsècquid chicposh chicabi icquid
 3tedi icnuc. Aid chicnubien dadanobi
 èshècquid utsintsen ènquimbi chuiquin:
 —Cho —cac ⁸cabayo bèdiactsèc
 ushu-ushupacttsècquid catsadec dada
 choposh. —Aid matses unès uaquid nec
 —quequin cuènsho tantiombi.
 Abipadquid utsin chinumposh.
 —Aidombi Nuquin Papan
 tantiacpadomboen matses cuidquin
 matses dadpenquioshè unès
 uabudnendac. Aidon namiac cuesun
 secananec dadpen naimèdbudnendac.
 Bunambi aidtedbidi unèsbudnendac.
 Daicsaidèmbic aidtedbidi. Aben icquid
 uinsadpambo icquidèn aidtedbidi
 acshun secaindac —quequin Nuquin
 Papan cuidte utsi ismeposhi.

⁹Adnubien Esusèn dada uaid bitaccaid
 utsi chicposh chicabi icquid 2tedtsèquid
 icnuc. Aid chicnubien Nuquin Papa
 yacno isombi. Abi tantiate nèish
 pichicate dapa dayun chieshèncquidon
 cuesun secaido Esus tantiaquido
 tabadsho ispombi. Aido chieshtoenquio
 icquin Nuquin Papan chiaidbèda

Esusën naid chuibanec bëdamboec tabadsho aden cuesun secaido niosh.
¹⁰Adoaido icquin comapenec cuëdquin Nuquin Papa chuidoneposh.

—Abitedishun Icbombo icquin mimbi tantiacpadomboen namequidquo mibi nec. Icsaisambo yec muesambo mibi neque. En chui, Papa. Nidaidën tabadquido ëbi chieshënquin cuesun secaboedo źtedectsicshun mimbi cuidpe? —caquin chuidoneposh.

¹¹Adoquien: —Chiata.

Yuec-yuecpactsëcshun naindambi. Min utsibobimboecquido ëbi tantiaquido utsibo ëmbi tantiactedi chieshëmënquidon ma cuesun secabono. Adoacsho isun cuesun secanquido cuidendambi —queposh. Adshumbic Nuquin Papan: —Ëbëdi tabadmequin icsaisa mibi icmimbi —qeshun abitiombi dasiuidbudte ushumbo icquid dasiumbamposh.

¹²Adshumbic Esusën dada uaid bitaccaid utsi chicposh chicabi icquid abentsëc icnuc. Adnubien nidaid abichobi shëc-shëcquemboec comapenec uëdëqueposh. Nidaid uëdëquenubi abucüesh chënquequidtedi dacuëdampambo yamposh. Ushë dashcute chëshën bëpucacimboec inchëshquio icposh. Inchëshën ushëbic intacimboec piumboshë isadposh.

¹³Uispabic natiambo cunquenuc cuëte bacuë tididiquiacimboec nidaidën tididieposh. ¹⁴Abubic dashcute bidiquiacimboec isadposh. Macuësh dapabic abitedi manëdcuededposh. Acte nënantan nidaid icquidic abitedi manëdcuededposh. ¹⁵Adsho isashien Esus tantiesabo abitedimbo: —Ashibi cuidpec —quetanec ompodec cuemposh. Nëidic chuiquid dapabo dadpenquo. Nëidic aidobëdtan chuiquid utsibo. Nëidic sondado chuiquid dapabo. Nëidic aton na dadpen dayun uaquido. Nëidic

cuesambo icquido. Nëidic matses yuabo. Nëidic matsesën yuacmaido. Aidedi matses icsambo icquido abitedimbo sidquetanec ompodec cuemposh. Utsi-utsiec nidaid shëcuë dapan ompodnobi utsi-utsiec macuësh dapa yacno cuënote dapa dayun ompodposh. ¹⁶Ompoduidtsash: —Macuësh dapa cuitiadbudnec sebudnequin mabëspashuni. Nuquin Papan istuidshun cuidnushe —quenubien utsibo: —Cuënote dapa abucüesh paëdbudnequin ompopashuni. Nuquin Papan istuidshun cuidnushe. Adembidi abided ciudadec unësaid Esusëntsen cuidnushe. ¹⁷Aidon ambi tantiacpadënquibini nëbimbobi cuidchitec. Padtembo. ¿Tsutsi cuidenquo icpatsiashba? —queposh. —Nadomboen Nuquin Papan abi tantiaquido cuesun secaquido cuidendac —quequin aden ismeposhi.

Isadaidbo Nuquin Papa tantiaquidombo bësiaid

7 ¹Aden Nuquin Papan cuidte ismeboshombic Nuquin Papa abi tantiaquido cudaste ismeposhi. Ismiac Nuquin Papan abi yacnoshon uaid mayan bëdabo 4tedi nidaid abichobi dacuenadec tabadsho isombi. Aidon cunquequid dapa 4tedbidi icbo-icboen uidën uaquin cuncamenquo icposh. —Nuquin Papa: “Ma cunquequidën icsa uabanu,” quibi icnuc abembi cunquequidën nidaid yec acte yec cuëte yec quenuc icsa uanushe —qeshun adoposh. ²Adnubien mayan bëda utsi ushë choacmiuësh choposh. Nuquin Papa abi tantiaquido cudasëmenuen dada uaquin bësete sanamposh. Aidën cunquequid uidën uaquido comapenec onquequin chuituidposh. ³—Chiata. “Nidaid yec acte yec cuëte yec quenuc icsa uanushe,” qeshun adembi cunquequid uidën uata.

Nuquin Papa tantiaquido bësebambono. Nuquin Papan matses neque. “Icsambo icquidobëdta cuidnushe,” qeshun bësebambono —quetanquin Nuquin Papa tantiaquido bësebamposh ushë choacmiuësh choquidën.

⁴Adshumbic ambi bësebamboed tambanquin chuibamposh. —Bëseboedtedi Acobo caidën madotedi 12ted icquidon matses tsyuecquido nec. Aidedi tambanac 144,000tedi icposh dadpenquioshë.

⁵Nëidic Acobo caidën mado Uda caidën matses tsyuecquido 12,000tedi. Nëidic Acobon madobidi Duben caidën matses tsyuecquido 12,000tedbidi. Nëidic Acobon madobidi Cad caidën matses tsyuecquido 12,000tedbidi. ⁶Nëidic Acobon madobidi Ased caidën matses tsyuecquido aidtedquiobidi. Nëidic Acobon madobidi Netadi caidën matses tsyuecquido aidtedquiobidi. Nëidic Acobon madobidi Manases caidën matses tsyuecquido aidtedquiobidi. ⁷Nëidic Acobon madobidi Simeyon caidën matses tsyuecquido aidtedquiobidi. Nëidic Acobon madobidi Debi caidën matses tsyuecquido aidtedquiobidi. Nëidic Acobon madobidi Isacad caidën matses tsyuecquido aidtedquiobidi. ⁸Nëidic Acobon madobidi Sabadon caidën matses tsyuecquido aidtedquiobidi. Nëidic Acobon madobidi Ose caidën matses tsyuecquido aidtedquiobidi. Nëidic Acobon madobidi Benamin caidën matses tsyuecquido 12,000tedbidi. Aid abitedi tsinacquin tanac 144,000tedi icposh —quequin chuiposhi mayan bëdan. Aden Nuquin Papabëdta Esus tantiaquido dadpenquioshë ismeposhi. —Adquido iquendac —quequin adoposhi.

**Esus tantiaquido
Nuquin Papa yacno tabadaid**

⁹Aden Nuquin Papa tantiaquido bëseboedo 144,000tedi tambanquin

ismeboshombic padpiden Nuquin Papa yacnombo ismeposhi. Adoac isquien Esus tantiaquido dadpenquioshë tabadpec. Tambantiapimbo yactedi iquec. Nëidic nidaid utsi-utsiec yacno tabadquido. Nëidic matses utsibo. Nëidic matsesquio. Aidedi Esus tantiaquido neposh. Nuquin Papa Esusbëd tabadacnombo tabadposh. Abëdi tabadmequin Nuquin Papan icsaisa icmiaido yec ushumbo icquid dasiuidcuededposh. Con matsesèn chuiquid dapa ismiacimboen: —Nuquin Papa bëdamboshë iqueque. Ismenu —quequin niste podobiecquid sananquin uic-uiccaposh. ¹⁰Aido comapenec cuëdëncuededposh.

—Abitedishun Ico icquin Nuquin Papan ambi tantiacpadomboen isadaidbon obeca bacuëded cuidacimboen aton Mado Esusded cuidpanëdash.

Adoac nuqui icsaid bedshunec abided cuidadec unëspondash Esus.

Aid tantiasho icsaido cuidacno nidmenquio icquin nuqui abëdi tabadmec.

Aton Papabëd bëdamboshë iquec —quec cuëdëncuededposh.

¹¹Adsho tantias ambo tabadquido mayan bëdabotedi danëshën tinquebudcuededposh. —Nuquin Papabëd Esus abided cuidadaid bëdamboshë iqueque. Ismenuna —quiash adposh. Nënantanquio Nuquin Papabëd Esus tabadnuc abi uquëtsëc dacuenadec dadanobi ëshëcquido 4tedi icquiduidquio tabadposh. Abi uquëtsëc dacuenadec tsusiobo 24tedi icquiduidquio tabadnuc abi uquëtsëc dacuenadequic mayan bëdabouidquio tabadposh. ¹²Aid mayan bëdabotedi danëshën tinquebudcuededequi comapenec cuëdëncuededposh.

—Aden abi tantiaquido abëdi tabadmequid bëdamboshë iquec. Esusbëdi Nuquin Papa bëdamboshë iquec. Adembidi abitedishun: “Mibi bëdambo iquec, Papa,” quequin chuipashun. Esusbëdi Nuquin Papa bëdamboshë iquec. Abipadquid utsi nibëdec. Comapenen tantiaquidquo icnuc ambi tantiacmaid utsi nibëdec. Aiduidtsëqui bëdamboen tantiaquidquo nec. Aidën nashunac bëdamboshë iquebi. Nadatiambo icquid nec. Abitedishun Icbombo nec. “Esusbëd Nuquin Papa bëdamboshë iquec,” canuna —quecuededposh mayan bëdabotedi. ¹³Adshumbic ëmbi 24ted icquid isboed abentsëcshun tsusion chuiposhi. —Ma ushumbo icquid abitiombi dasiuidquido ðtsutsi nepec? ðMitsiuëshquio aido chosh? —cac: ¹⁴—Tsaudi, tsusio. Mimbibien tantiec —capombi. Adsho tantiash: —Tantia. Mibi chuinu. Satanasën: “ðAda chieshtoenquio ictsiashe? Tanu,” qeshun natiamboshë icmiac Esus tantiec chieshtoenquio ictenedo nec. Adec chieshtoenquio icsho isun Satanasën tantiacpadomboen chieshëmënuquidon unës uapondash. Abided cuidadec unësaid Esus tantiaquido icsho icsaisa icmiaido yec dashcute ushumbo icquid dasiuidcuededposh. ¹⁵Esus tantiaquido icsho Nuquin Papan abi yacnombo puduedmeshun aton yuabo icmepondash. Adoac Nuquin Papa yacnombo tabadquimbi abi ënenquio icquin tantiendac. Adembidi Nuquin Papan: “Con mado mibi nec. Con

champi mibi nec. Nuquibi icnu. Cho,” qeshun abëdi tabadmequin bëdamboen dayun uaic. ^{16,17}Isadaidbo matsesën nëish yua obeca dadpen dayun uacpaden abided cuidadec unësaidën Esusën abi tantiaquido bëdamboenshë dayun uaindac padpidec unëstiapimbo icnuc. Adoac pete bunenquio iquendac. Actetsen bundoenquio iquendac. Abi yacnuësh ushën pichiquenquio iquendac. Chun mëyadenquio iquendac. Nidaidënuësh shubidenedi Nuquin Papa yacnuësh shubitiapimbo iquendac. Natiamiante nibëdquiec iquendac. Unësquio icmiente nibëdquiec iquendac. Bacuë shubisho anin bëucquin bëdambo icmiacimboen abi yacnoshon Nuquin Papan Esus tantiaquido bëdambouidquio icmendac —quequin chuibamposhi tsusion.

Dada uaid bitaccaid nainquin chicaid

8 ¹Nuquin Papa yacnoshon tsusion chuibombien obecabimboec isadquin Esusën nainquin dada uaid bitaccaid chicposh. Aden chicnubien Nuquin Papa yacnuësh nadimbo icposh. —Dacuëdampambo iquec —quec media oda yec yuec-yuecpactsëc otacquo tantiec tabadposh. ²Adnubien Nuquin Papan abi yacnoshon uaido mayan bëdabo sietetedi: —Nuquin Papan chiacpadomboen nanu —quec tabadposh. Adsho isun icbo-icboen shoncate sietetedi menëbamposh. ³Adnubien mayan bëda utsi ambobidi choposh. Choash bëdambo nuadquid tauinuequin shocosh nacnenaïd tauite dapa dayun nidtuidposh. Shocoshëmpin bëdamboshë nuadnuc tauitempi utsi sanamposh. Adsho isun bëdambo nuadquid nua meneposh. Adoac: —Nëid tauiac pushudquid Nuquin Papa yacno nidacimboec Esus tantiaquidon chianiaïd iquec —quequin bëdambo

nuadquid sanshun tauite nacnenaïd dapan tauiposh bêdambo nuadnuc. ⁴Aden tauiac Nuquin Papa yacnombo pushudquid nidosh. —Adembidi Esus tantiaquidon chianiaïd abi yacnoshon tantiashun Nuquin Papan abi tantiaquido chieshênquido cuidendac —quequin aden ismeposhi. ⁵Adshumbic aid mayan bêdan tauite dapan samêdquid cuête dêtsisadaïd isquidquïo icquid bedshun shocoshêmpin sandoposh. Aden sandotanquimbic shocoshêmpichobi matses tabadacno masiabudposh. Nuquin Papa tabadacnoshon adoposh. Adnubien bed-bedquetanepamboec abu tesquianiabimboec cuêdtoposh. Adnubien nidaïd abichobi saca-sacaquemboec uêdêqueposh. —“Nuquin Papan êbi chieshênquido cuidpashun,” quequin Esus tantiaquidon chianesho tantiashun aden Nuquin Papan comapenen cuidendac —quequin aden ismeposhi.

Shoncate shoncaquin ismiaïd

⁶Matses tabadacno cuête dêtsisadaïd isquidquïo icquid masiabudnubien shoncate bedboedon mayan bêdabon shoncanuen sanamposh. ⁷Adshumbic abentsêcshumba shoncadoposh. Adnubien Nuquin Papan matses yacno uebimboecquid chomeposh. Nadquïo icposh. Ue tsasi yec cuête dêtsisadaïd isquidquïo icquid yec intac yec quenuc chomeposh ue dapa choacbimboecnuc. Aden chomiaïdên nidaïd nuamboshê tauïdposh. Cuête dadpenquïoshê tauïdposh. Uasin dadpenquïoshê pichiqueposh.

⁸Adnubien mayan bêda utsin shoncaposh 5tedishun shoncabi icnuc. Shoncanubien macuêsh dpatembi icquid nêdênquepamboec abucuêsh paêdec chian dapa mad caïd

nêpaêdposh. Adnuc chian nuamboshê intac yamposh. ⁹Adec intac yanaidên acten icquid dadpenquïoshê unêsbudneposh. Adecbidi cano dapa antabêdquïodotedi abi canochobi mentoadbudneposh.

¹⁰Adnubien mayan bêda utsin shoncaposh 4tedishun shoncabi icnuc. Shoncanubien uispa dapabimboecquid abichobi tabotebimboec nêdên-nêdênquepamboec abucuêsh budec acte nêpaêdposh. Aid acte nêpaêdboedên acte utsi-utsiec dadpenquïoshê actiapimbo yamposh. ¹¹Aid uispa acte muca uaquid nïosh. Aid nêpaêdquin muca uaid acte acash matses dadpenquïoshê unêsbudneposh.

¹²Adnubien mayan bêda utsin shoncaposh 3tedshun shoncabi icnuc. Shoncanubien Nuquin Papan namiac chênquequïdtedi icsa uaposh. Ushê cuesquinc inchêshên ushê cuesquinc uispa dadpenquïoshê cuesquinc caquin icsa uaposh. Adoquien bêdambo chênqueboedi bêdiactsêcquïo chênquiantsêccosh.

¹³—Aden Nuquin Papan matses cuidquiendac —quequin êbi ismenubien chiqui dapa cuenequi matsesbimboec cuêdec comapenec cuêdcuemposh. —Esus tantiesabo Nuquin Papan cuidtequïdo tantiac unêsquïoshê iquec. Shoncabi icboedon mayan bêda utsin 3tedshun shoncabanuc Nuquin Papan icsaïdo cuidte abentsê chotsecnuc ismendac. Aid cuidte dacuêdampamboshê iquendac —quec cuêdcuemposh abuc cuenequi.

Mayan bêda utsin shoncanuc isaïd

9 ¹Adnubien chiqui dapan chiacpadomboen mayan bêda utsin shoncaposh daêdshun shoncabi icnuc. Shoncanubien Nuquin Papa yacnuêsh mayan bêda batedquïo budash matses

yacno choposh. Adsho isun Nuquin Papan chiacpadomboen bêtashte chictempi meneposh. Podobitsi icsabo uidèn uacno nidaid shècuè uquèducquio icquid bêtashte chichte neposh. ²Aid chictempin chicaquien uquèducuësh tied nêdênquedoacbipamboec pushudtoposh. Abuc inchêshquio pushudquid icnuc ushê isadenquio icposh. ³Adsho isaquien pushudacnuëshquio tsectsecbiecquid dadpenquioshê cho-choposh. Chichumbimboec sianquidquio niosh. ⁴Adsho isun aido chuiquosh. Aton petembo caic: —Nuquin Papan tantiacpadomboen tiedèn caniquidbêdta cuète podo penda. Uasintsen penda. Adembîdi Nuquin Papan cudasquin bêsemiaido abi tantiaquido sebudnenda. Aido senquio icquin Esus tantiesabo bêsiaidabi icquidouidquio sebudneta —quequin chuiquosh. ⁵Adshumbic: —Unêsnuç seshun secainda. Inchêshên ushê 5tedi nidmequin chichunên siacbimboecnuc sebudneta —cac tsectsecbiecquidên sebudnequin ismeposhi. ⁶Aid tsectsecbiecquidên siac natiamboshê yec matses unêste bunquiendac. Unêste bunquidi badedi unêsenquio iquendac.

⁷Aden tsectsecbiecquid ismeposhi. ¿Mitsipadquio nidaid cudasquid sondado catsadaid cabayo icpec? Adquio cabayobimboec tsectsecbiecquid isadposh. Shocosh mauetebimboecquid mauecuededposh. Matsesên bêtantetembobi bêsadposh. ⁸Chidon têbushumbimboec isadposh. Bêdin shêtabimboec aton shêta icposh. ⁹Bêntsiauc shicdiadquid cudaste shocosh nacnenaidbimboec sictsasimbo icposh. Aid abi maisi cuensho tantiac tied nêdênquiabimboec comapenec cuêdposh. ¹⁰Aid tsectsecbiecquid chishpichquid yec chichumbimboec

sianquidquio neposh. Inchêshên ushê 5tedi nidmequin adquidên dadpenshun natiamboshê icnuc matses sebudneposh. ¹¹Abi nidmequid aton icbo Satanasên yuaido uidèn uacnuësh choquidbidi niosh. —Unês uanquidquio nec —quequin isadaidbon onqueten abadon caposh. Quidieco matsesên onqueten apoyon caposh.

¹²—Adomboen Nuquin Papan abi tantiesabo cuidendac —camenuen aden ismeposhi. Chiqui dapan chuiboed tauaquin aden ismeposhi daêd ismiabi icnuc.

Chiqui dapan chuiboed utsi

¹³Adnubien shoncate sanamboedên mayan bêda utsin shoncaposh abentsêcshun shoncabi icnuc. Shoncanubien tauite dapa Nuquin Papan bêtntsiauc tsadunaid yacnuëshquio onquedosho tantiombi. ¹⁴Adec onquequidên nêbi shoncaboed chuiquosh. —Acte dapa Eupêdates caid yacnoshon matses cuidquido mayan bêdabo 4tedi uidèn uaccoshe. Aido nidmetan. “Mimbi tantiacpadomboen naic nid,” quequin chuitan —caquien chuitamposh. ¹⁵Aden chuitanac aid mayan bêdabo 4tedishun matses dadpenquioshê cuesun secamenuen aton matses utsibo cuesun secate tantiamebeneposh. Nuquin Papan: —Adênquibi adoendac —quequin tantiacpadomboen adoposh.

¹⁶Adoquien ambi namiaido cabayo catsadquido sondado chedo matses utsibo cuesun secanuec cho-choposh. Aido tambanaidtedi chuisho tantiombi. —Dadpenquioshê iquec cuète podotedi. 200,000,000tedi iquec —queposh. ¹⁷Êmbi isboedquio nadquio icposh. Abi catsadaid cabayobêdi sondado chedo shicdiadquid cudaste shictonquecuededposh. Shicdiadquid

cudaste isac piumbo yec umumbo yec
 bëshpiu-bëshpiu icquid yec queposh.
 Cabayon mapi bëdi dapan mapibimboec
 isadposh. Ana shëcuënuësh
 nëdënquepamboec
 pushud-pushudpambo yec choposh.
 Cachinan bacuë pisenaid
 nuadac bimboec asupede caid
 icsamboshë nuadposh. ¹⁸Adshumbien
 ana shëcuënuësh choaidën matses
 dadpenquioshë cuesun secabudneposh.
¹⁹Aid cabayo chedon ana shëcuënuësh
 matses cuesun secate icnubi aton
 incuentembi mapi utsi iccondash. Nisin
 mapibimboecquid pianquidquio niosh.
 Aidëntsen matses dadpenquioshë unës
 uabudnequin ismeposhi.

²⁰Adnubien aden Nuquin Papan
 cuidaidën unës uamiabi yaidon
 matsesën abi icsaid ëntiapimbo icposh.
 Ambi naiduidi nabamposh. Ëntiadquidi
 abi icsaquioposh. Nuquin Papa
 tantienquio icquin podobitsi icsabo
 tantiaquin ëntiapimbo icposh. Adembidi
 ambibi nacnenaïd ambi papa caid
 ënenquio icquin tantiaposh. Utsibon
 shocosh nacnenaïd tantiaposh.
 Utsibombic cuënote. Utsibombic cuëte.
 Adquid ambibi nacnenshun
 tantiabededposh. Ambi nacnenaïd anan
 onquetiapimbo icposh. Pabiaten
 tantiatiapimbo icposh. Taën
 caputiapimbo icposh. Adquid papa
 quequin tantiabededposh. Aid
 tantienquio icquin Esusquio
 tantiatiadquidi ambi nacnenaïduidi
 tantiaposh. ²¹Cuesanquidon abi cuesun
 secaposh. Nënëchoquidombic abi unës
 uabudneposh. Cuëte podo dauë icsa
 chodcaquidombic adembidi matses
 dadpen unës uabudneposh. Aton
 chidopenquio chudquidombic adembi
 utsi chudshumbededposh. Adembidi
 aton bënëpenquio chudmequidën abi
 icsaid ëntiapimbo icposh. Adembidi

aben uequidon abi chudmebededposh.
 Ampequidombic abi ampebededposh.
 Adec matses abitedi: —Nuquin Papan
 cuidnushe. Èbi icsaid ënu
 —quetiadquidobi adenquio icposh.

Mayan bëdan dada uaidëmpi pemiaid

10 ¹Cabayo uinsadpambo icquid
 ismëboshombic utsitsen
 ismeposhi. Adoac mayan bëda chuiquid
 dapa utsi dacuëdampambo icquidquio
 Nuquin Papa yacnuëshquio budsho
 ispombi. Abu ushubimboec isadec
 abitiombi dasiuidbudpaccosh. Uen
 podqued uenquebudacpamboec mapino
 icposh. Ushëbimboec bëtantete
 bëchamauanquiecposh. Buintad nitsinaïd
 nëdënquiaçipamboec isquid-isquidpambo
 nidte icposh. ²Dada uaidëmpi bëcadotsaid
 sanamposh. Budash nidtuidposh.
 Tsiembudcuenshun taë abiucshun chian
 dapa mad caid nëtincaquimbi taë
 opiocshon mananuc tincaposh.
 Ènapenquioshë icquid niosh. ³Adashien
 bëdi noshquiachimboec nuamboshë
 cuëdtoposh. Adec cuëdquin chiac abu
 7tedec cuëdtonequin ëçbedtoneposh
 Nuquin Papan chiaïd chuiquin. ⁴Aden abu
 cuëdquin ëçbedtonesho tantiashun: —Abu
 cuëdquin chiaïd dada uanu —queshobi:
 —Padi —caposhi Nuquin Papa yacnoshon
 chuiquin. —Abu cuëdquin chiaïdtedi dada
 uainda. Padi. Utsibo chuiquin dada uainda
 —caposhi. Adoac dada uainquio iccombi.
⁵Adnubien mayan bëda
 tsiembudcuenshun chian dapa
 nëtincaquin utsiucshun mananuc
 tincaboedën ambibi podo abiucquio
 cadoposh. —Nuquin Papan isnubi
 abimbo chuiquidquio nebi —quequin
 tantiamenuen aden ambibi podo
 abiucquio cadoposh. ⁶Adotanquin
 chuiposhi. —Tantia. Mibi chuinu. ¿Tsutsi
 nidaid uabi yec ëndenquimboshë
 icpampic? Aidi Nuquin Papa nëbi adquid

yec nibëdantiapimbo iquendac. Adquid icquin abitedi uapampic. Abu uashun aidën icquidtedi uapampic. Nidaid uashun aidën icquidtedi uapampic. Acte uashun aidën icquidtedi uapampic. Aden abitedi uaquidën chiaidquio chuinu. Nëbi Nuquin Papan ambi tantiacpadomboen icsambo icquido cuidquimbi abi tantiaquido abëdi tabadmendac. ⁷Ëbi padquid mayan bëda utsin shoncate sanamboedën: “Nëbi nainquin shoncanu,” cacpadënquio Nuquin Papan ambi chiampicpadomboen adoendac —queposh mayan bëda chuiquid dapa dacuëdampambo icquid Nuquin Papan matses cuidquin naimpanuda.

⁸Adnubini abucuësh cuëdquidën chuiposh. —Aid mayan bëdan sanamboed dada uaid bed —cac: ⁹—Dada uaid beccho —capombi. Adoquien: —Në bed. Bedshun che. Batambo icboedi min ana mucambo yanendac —caposhi. —Nëid bedshun chiacbimboen Nuquin Papan chiaid cuiшонquequin isban-isbanash mucambo yanacbimboec Nuquin Papan cuidte tantia shubitiadquio mibi yanendac —quequin tantiamenuen aden chuiposhi.

¹⁰Adoac aid bedshun chiash adquio yanobi. ¹¹Adquio yansho isun mayan bëdabo chuiquid dapan chuioposhi. —Nuquin Papan ambi chiaid tantiamiac matsesën nabante dadpen mimbi chuibanendac. Nidaid utsi-utsiec yacno tabadquidon nabantebëdta chuiquid dapabon nabante mimbi chuibanendac. Aden Nuquin Papan tantiacpadomboen mimbi chuibanendac —quequin chuiposhi mayan bëdabo chuiquid dapan.

Nuquin Papan namiaidon daëdshun naid

11 ¹—Nuquin Papan tantiacpadomboen mimbi chuibanendac —quequin chuishumbic mayan bëda chuiquid dapan

piabimboecquid tambante meneposhi. Adotanquin naden chuioposhi. —Edusaden yacno nidshun Nuquin Papa tabadte shubu uashunaid tambanta. Adotanquimbic Nuquin Papa tantiaquin bëdambo nuadnuc tauinuequin nacnenaid dapatsen tambanta. Adotanquimbic Nuquin Papa tantianuec aid shubun pudued-puduedquido tambanta. ²Shubu nuntanquio tambanshun umanucquid daquënë uaid tambanenda. “Ambo Nuquin Papa tantiesabo isadaidpembo pudued-puduedendac. Aidon Edusaden yacnoshon seta abentsë chotsecnuc matamequin dadpen icsa uabudnendac. Adash Nuquin Papa tabadte shubu uashunaid daquënë uaidën pudued-puduedendac,” qeshun aid shubu daquënë uaid tambanenda. Aden Edusaden icsa uaqin seta 3tedi matamendac —quequin chuiposhi. —“Muainquio icquin Esusbëdta ëbi tantiaquidombo nec,” quequin Nuquin Papan tantiec —camenuen aden tambanaido tantiameposhi. ³Adnubini Nuquin Papan chuiposh. —Aden Edusaden icsa uanubi matses daëdquioebi ëmbi chuiboedquio chuimendambi. “Nuquin Papan namiaid nec,” quequin matses tantiamenuen comapenen tantiaquido icmendambi. Adoac seta abentsë chotsecnuc matamequin ëmbi chiacpadomboen chuibanendac. Adquid yec: “Matses abitedi icsamboshë icsho isash shubitiadquio iquebi,” quequin icsambo icquid abi icsaid ëmenuec dashcete icsactsëcquidquio dasiuidendac —quequin Nuquin Papan chuiposhi.

⁴Adshobini mayan bëdan chuioposh. —Aido Nuquin Papan oncamaid daëd isadaidbo matses tsusedpan chuiampampid nendac. “Nuquin Papan bëntsiauc cuëte odibos caid nitsinaid daëd bëdambo

icquid iquendac. Ambobidi tabote daëd bëdambo icquid iquendac,” quequin chuipampid nendac. “Nuquin Papan Mayanën tantiamiaidquio icquin ambi chiaidquio chuibanendac,” camenuen aden chuipampic. ⁵Aden abi chuibanesho abi chieshënquidën: “Mibi cuesunenu,” caqui cuesuniadenquio iquendac. Nuquin Papan dayun uaid icquin ana shëcuënësh choboedën nibëdquiecnuc pichicacimboen abi cuesunenuequidotedi unës uaindac. Nuquin Papan cuidte tantiamenuen adoendac. ⁶Adembidi Nuquin Papan cuidte tantiamenuen Nuquin Papan Mayanën namiaidquio icquin comapenen tantiaquin ismebanendac. Aden ismequin nac abi nidabi yacpadequi ue choenquio iquendac seta 3tedi matamec. Adembidi aidon acte intacuaindac. Adembidi ambibi tantiacpadomboen comapenen tantiaquin dacuëdampamboecquin matses shubimendac Nuquin Papan cuidte tantiamenuen.

⁷Aden Nuquin Papan chiaidtedi aid daëdshun nainquin naindac. Aden nainshobien matses chuiquid icsamboshë icquidën bëdi dapabimboecquidën abidaëdi cuesun secaindac. Satanasën namiacpadomboen adoendac. ⁸Edusaden yacnoshon cuesun secashun chococainquio iquendac. “Ma cuesun secaid ischitono,” qeshun chococainquio icquin podqued ansanendac. Nuquin Icho Esus cuestas decatanacnoshonquio matsesën adoendac. Equipito yacno icpampido yec Sodoma yacno icpampido yec quequidbimboec icsamboshë icquin aden Nuquin Papan chiaid chuibanquido cuesun secaindac. ^{9,10}Aden cuesun secabosh: “Nuqui mëyanquid nëid daëd neque. Chococatiapimbo iquebi,” qeshun

chococainquio iquendac. Adashic matses abitedimbo cuesun secaboed isbededec tabadendac. “Nuqui shubimequido cuesun secaosh,” quiash cuishonquec abëd icquidobëd menenancuededendac. Matses abitedimbo caimbi. Nëidic matsesquio. Nëidic mayu. Nëidic nidaid utsi-utsiec yacno tabadquido. Aidtedi menenancuededendac. Abentsë chotsec ushquin aden ambi cuesun secaboed isbededec tabadendac —quequin chuiposhi mayan bëdan.

¹¹Adashic abi onquec: —Abentsë chotsec ushquin isbededec tabadbombien Nuquin Papan cuesun secaboed daëd uincuemendac. Uincuemiacsho isash cuishonqueboedobi natia dacuëdec tabadendac. ¹²Adnubi Nuquin Papan abucshun cuënquin: “Nëmbo cho,” cac abu ushu datanec cuesun secaboed daëd abuctoendac. Abi chieshënquidon isnubi adendac. ¹³Aid daëd abuctonoc nidaid saca-sacaquemboec natiambo uëdëquianendac. Nidaid uëdëquenubi shubu dadpenquio chimeshadbudnendac. Chimeshadbudnequimbi matses catashquin dadpenquio 7,000tedi unës uabudnendac. Adnubien unësabi icquido dacuëdcuededendac. Dacuëdequi: “Nuquin Papa dacuëdampamboecquidëmbien nash. Aidquien tantiatiad,” quecuededendac —quequin chuiposhi mayan bëdan. ¹⁴Aden chiqui dapan chuibocpadomboen mayan bëdan Nuquin Papan cuidte utsi chuiposhi. Nainquin chiabi iccoshi. Abi utsi iquec.

Nainquin shoncaquin Uan ismiaid

¹⁵Nuquin Papan uincumetequido daëd chuibombien mayan bëdan shoncate sanamboedën nainquin shoncaposh.

Shoncanubien Nuquin Papa yacnuësh
nua cuëdëncuededposh naden chiec.

—Nuquin Papabëdi aton Mado
Esuquidistu abided cuidadec
unësaid bëdamboshë iquec.

Abi chieshënuquidon naid ëmeshun
aid abentsëcshumbi matses
abitedimbo namendac ënenquio
icquin.

Abitedishun Icho nec
—quec cuëdëncuededposh. ¹⁶Adashic
Nuquin Papa yacnombo icho-icboec
tsadten tabadboedobi tsusiobo 24tedi
icquido: —Mibi bëdamboshë iquec
—quequin ismec danëshën
tinquebudcuededposh. ¹⁷Adtanequi
nadec cuëdëncuededposh.

—Nidaid uabi yec ëndenquimboshë
mibi icpampic, Papa.

Nëbi adquid yec nibëdantiapimbo
icquid mibi nec.

Abitedishun Icbombo mibi icnuc:
“Ëmbiquen dëniacquin namenu,”
Satanasën catiapimbo mibi iquec.

Nadatiambo icquid icquin
mimbentsëqui matses abitedimbo
mimbi namendac.

¹⁸ Nidaid utsi-utsiec yacno
tabadquidon abi chuiquidobëdta
mibi chieshëndene.

Mimbi uaidtedi icsa uadene.
Adsho mimbi tantiapadënuquo nëbi
mimbi cuidendac.

Matses abitedi uincuemetanquin
mimbi chiaid niac-niaquec
icsaquido mimbi cuidendac.

Adoshombic mimbi chiaid
chuiquanquidobëdta mibi
tantiaquido abitedimbo mibi
yacno mibëdi mimbi
tabadmendac.

Chuiquid dapambobëdta
chuiquidpenquio mibi
tantiaquidotedi bëdambo
icmequin mimbi adoendac

—quequin tsusiobon Nuquin Papa
chuisho tantiapombi ushquin
isacimboen.

¹⁹Adshun isquien Nuquin Papa
yacnombo con matses isadaidbon
Nuquin Papa tabadte shubu
uashunampid shëcniacchobi icposh. Aid
shubu nuntan isaquien Moisesën ambi
nacnenaid Nuquin Papan chiaid
sandoampid icposh. —Ëndenquimboshë
ambi chiampicpadomboen Nuquin
Papan ambi tantiaidtedi nainquin
naindac —camenuen aden ismeposhi.
Aden ëbi ismenubien bed-bedquetanec
abu teshquianiacimboec nua
cuëdtoneposh. Nidaid
saca-sacaquemboec uëdëqueposh. Ue
dapa nuamboshë choacimboec ue tsasi
choposh. —Nuquin Papambo
abitedishun Icbombo nec —camenuen
aden ismeposhi Nuquin Papa
yacnoshon.

Chidobëdta nisibimboecquid dapa ismiaid

12 ¹Adoshombic Nuquin Papa
yacnoshombidi utsitsen
dacuëdampamboecquidbidi
ismeoaposhi. Adoac chido ushë
dasiuidacimboec bëchamauanquiesho
ispombi. Inchëshën ushë tincash
tsadposh. Uispa 12tedi nacnenaid
mauete maueposh. ²Bacuë nua usunec
tishtiadtscëquio yec
shubibud-shubibudposh. —Isadaidbon
chido Esus tishquid nec —camenuen
aden ismeposhi. ³Adnubien
nisibimboecquid nuamboshë icquid
choposh. Taëchopaidquio yec
piumboshë icposh. Mapi 7tedi icposh.
Pais 10tedi icposh. Aton mapitedi
chuiquid dapabimboec mauete
mauecuededposh. Satanans niosh.
⁴Adshombic nisibimboecquidën aton
incuenta ënapen icquid uic-uiccaquin
uispa dadpen bedshun nidaidën

siabudposh. —Aden Nuquin Papabëd icquin Satanasën abipadquido utsibo mayan bédabo icboedo utsi-utsien yuapampic. Aden yuash aton yuabobëdi nidaidën choshon matsesens icsamete bunquieec —camenuen aden ismeposhi. Adshumbic chidon tishacsho bacuë penuen aiduidi bëisquin cainuidposh. ⁵Adnubien chidon dada bacuë tishposh. Bëdambo icquid matses abitedishun Icho ictequidëmpi niosh. Adshobien Nuquin Papan abi yacnombo buamposh nisibimboecquidën petiapimbo icnuc. Buanshumbic abipadquid abitedishun Icbombo icmiac. —Aden Satanasën Esus nibëdametiapimbo iquec —quequin ismeposhi. ⁶Adnubien chido nëbi bacuë tishboed nisibimboecquid dapa cuenënecc matses nibëdacnombo Nuquin Papan tantiacnombo nidposh. Ambobi tabadsho isun Nuquin Papan bëdamboen dayun uaposh yuenquio seta abentsë chotsecnuc matamequin. —Aden Esus tantiaquido Nuquin Papan dayun uaindac —camenuen aden ismeposhi.

⁷Adshumbic Nuquin Papa yacnoshon padpiden ismiac nëidtedi isoapombi. Nëidic nisibimboecquid dapa Satanasquiobi. Nëidic mayan bédabo icboedobi Nuquin Papan chiaid niac-niaquec icsash podobitsi icsabo yanaido Satanasën yuaido. Nëidic Nuquin Papabëd icquidombo mayan bédabo dadpen. Nëidic aido chuiquid dapambo Miqued caid. Aidedi ispombi. Adnubien Satanas nadposh. —Aton yuabo mayan bédabo cuemiasch Nuquin Papa dëniaquec ëbimbo abitedishun icbo yantsiabi —quiash nicantiadquio icposh. Satanas chedo nidaidën nidmiabi icnuc neposh. ⁸Adshumbic: —Niunchitono —quequin bedbidan-bedbidanaquien Nuquin Papan yuabo Miqued chedo uidënquio

icquido yec niadenquio icposh. Adshumbic Miqued chedon nisibimboecquid Satanas chedo nicaposh. Aton yuabobëdta Nuquin Papa yacnoshon nicaposh. ⁹Nicaquien matses tabadacno nidaidën choec Satanas chedo bud-budposh. Eba caid icsamepampid Satanas niosh. Nëbi matses dadpenquioshë icsamequin yuate bunquieec.

¹⁰Adnubien Nuquin Papa tabadacnoshon anocquidën comapenec onquequin chuibamposh naden chuiquien.

—Aden Nuquin Papan aton Mado Esusbëdtan abi dëniacnuequido dëniacmenquio icposh.

Nuquin Papa chieshënquidquio icquin abi tantiaquido chieshënquin icsamboen chuishunquid nec.

“¿Esus tantiaquido bëdambo icquidoda nedic? Èmbi natiamiac aido chieshtotsiash,” quequin Nuquin Papa chuidenequid Satanas nec.

Satanas chedo cuemiasch Nuquin Papa aton Mado Esus abided cuidadec unësaidbëdi dëniacadiapimbo yec abitedishun Icbombo nec

—queposh Nuquin Papa yacnuësh cuëdec. ¹¹Adashic padpidec auëshbidi:

—Nëbi ëmbi isac Satanasën Esus tantiaquido chieshtometiapimbo icposh.

Satanasën: “Chieshtomenu,” caqui: “Padi. Esusën yuambo nebi,” quec chieshtoenquio icposh.

Cuidmenquio icnuec abided cuidadec unësaid Esus tantiec chieshtoenquio icposh.

Adsho abi chieshënquidon matsesën: “Padi. Esus tantienda. Cueschitomane,” caqui

chieshtoenquo icquin adenuidi Esus
tantiasho cuesun secameposh
Satanasën aton yua icmiambobi.

¹² Satanasho cuesun secameposh
cuishonquenuna.

Nuquin Papa yacno tabadquidotedi
nuquibi cuishonquenuna.

Ëbitedi cuishonquenuc nidaidën
tabadquido matses yec mibi
cuishonquetiapimbo iquec.

Nëshun cuemiac mibi yacno budash
Nuquin Papa chieshënquieic
Satanasho chieshëmënquieic
tabadec.

Mibi icsamete bunquieic. “Nëbi
Nuquin Papan ëbi cuidquieque.
Abi tantiaquido yuashunchitono,”
quec mibi icsamete bunquin mibi
natiambo icmendac.

Adoac natiaic mibi taba- dendac
—queposh Nuquin Papa yacnuësh
cuëdec. Aden tantiameposhi.

¹³ Adshumbic ëmbi isadaidbon chido
isboed padpiden ismeposhi. Adoac Esus
tishquid isadaidbon chido unës uanuen
nadancasho ispombi. —Nuquin Papa
yacnoshon nicachitoshi —qeshun
chieshënquin nisibimboecquid
Satanasën aid chido nadancaposh.

¹⁴ Adnubien Nuquin Papan chiqui dapan
podobiecquid meniac bedanec aid
podombi cuenec matses nibëdacnombo
Nuquin Papan tantiacnombo chido
cuemposh. Anoshombi
nisibimboecquidën icsa uatiapimbo
icnuc Nuquin Papan aid chido dayun
uaposh. Seta abentsë chotsecnuc
matamequin dayun uaposh. ¹⁵ Adnubien
nisibimboecquidën: —Aid chido unës
uachitono —quequin ambibi ana
shëcuëshun chomequin acte dapa
chido dayun uacno nua chomeposh.
Aden Satanasho Nuquin Papa
tantiaquido isadaidbo matses
nibëdametiadquido iquec. Adembidi Esus

tantiaquido nibëdametiadquido iquec.

¹⁶ Acte dapa chomiacsho isun Nuquin
Papan nidaid shëcuësh uashun aid
shëcuësh acte nidmiosh chido yacno
chiuidenquo icnuc. ¹⁷ Adsho isun
nisibimboecquidën Satanasho
nëshquioshon aid chidon
bacuëbimbimboecquido Esus tantiaquido
chieshënquioposh. Uesquin cuesun
secatiadquido icposh. Nuquin Papan
chiacpadomboen chieshtoenquo icquin
bëdamboen naquido Esus tantiaquido
caimbi.

Bëdibimboecquid dapa ismiaid

13 ¹ Esus tantiaquido cuesun secate
bunquid ismeboshombic
Satanasho ëmbidi chian dapa mad caid
cuëmanshun cainquin ismeoposhi.
Aden cainubien acte uquëducuësh bëdi
dapabimboecquid pudundoposh. Mapi
7tedi icposh. —Nuquin Papa caid
nibëdquieic. Ëbiuidtsëqui abitedishun
icbombo icnu —quequin aton mapitedi
bëdada uadaid neposh. Pais 10tedi
icposh. Aid paistedi chuiquid dapan
mauete paisën dectambampaccosh.
² Aton dada bëdin dadabimboec
isadposh. Aton taë uinsadpambo icquid
utsi oso caidën taëbimboec isadposh.
Ana shëcuësh bëdi utsi tëbuchoquidën ana
shëcuëshbimboec icposh. Adsho isun
Satanasho ambi caimboed chuiquid
dapambo icmeposh. Ambi tantiaidquido
tantiamequin abi icsaid namebamposh.
Adoac matses abitedimbo chuiquid
dapambo yamposh. Aden Satanasho
matses icsamboshë icquid chuiquid
dapa icmequin ismeposhi. ³ Adshumbic
padpiden ismeposhi. Adoac aid bëdi
dapabimboecquid acte uquëducuësh
choboedën mapi abentsëc
mëmuntiapimbo icnuc cuesuniaid
uincuemiaid icsho ispombi. Aden
uincuemiaid icsho isash: —Comapenen

tantiaquidien nechitec —queshun matses abitedishun acte uquëducuësh choboedën chuiquid icsamboshë icquidën chiacpadomboenuidi nabededposh. ⁴Adshumbic: —Ëbi chuiquid dapa namequid mibi nec —quequin Satanas papa caquin matsesën tantiabededposh. —Aden Satanasën namiac ëbi chuiquid dapapadquid utsi nibëdec. Comapenen tantiaquidquio icnu utsi bon nuqui cuesun secatiapimbo iquec —queshun abi chuiquid dapa acte uquëducuësh choboedtsen tantiaquioposh. ⁵Aden matsesën tantiaid icquin Satanasën tantiamiacpadomboen Nuquin Papa chieshënquie: —Nuquin Papa caid nibëdqie. Ëmbiuidtsëqui namembi —quequin matses abitedimbo nameposh. Aden Nuquin Papan tantiacpadembi inchëshën ushë 42tedi nidmeposh seta abentsë chotsecnuc matamequin. ⁶Aidën Nuquin Papa chieshënquin naden muauaposh. —Nuquin Papa caid nibëdqie. Abi tabadaidtsen nibëdqie. Abi yacno tabadquido abitedi nibëdqie. Ambembi chiaid niosh —quec muaposh. ⁷Adshumbic Satanasën tantiamiacpadomboen Esus tantiaquido dadpen unës uabudneposh. Adembidi matses nidaid utsi-utsiec yacno tabadquido abitedimbo ambi chiacpadomboen nameposh. —Matses icsamboshë icquid matses abitedi chuiquid dapa iquendac —quequin ushquin isacbimboecnuc ismeposhi. ⁸Aid caic matses abitedishun: —Nadatiambo icquid nec —quequin tantiaquiendac. Aid tantiaquido Esus tantiesabo nendac. Ëndenquimboshë matses uabi Nuquin Papan tantiampicpadec abided ciudadec unësaid Esusquio tantiesabo nec. —Adquido yec Nuquin Papan: “Ëbëdi

tabadmendambi,” quequin chiacmaidombo nec —quequin aden ismeposhi.

⁹Pabiate cuembo icquin bëdamboen tantia. Esus tantiaquido icsho mibi chuinu. ¹⁰Nuquin Papan: —Ëbi tantiaquid chieshënquin quënën nauedquido cuidendambi —caindac. Esus tantiesabon Esus tantiaquido chështen seshun secaindac. Adsho Nuquin Papan seshun secanquido cuidquiendac. Ëbi adsho tantias mimb naccpadequi chieshtoenquio icta. Chieshtoenquio icquin Esus tantiaquin ambi chiacpadomboenuidi nabanta.

Nidaid shëcuënuësh choboedtsen ismiaid

¹¹Adshumbic padpiden ismeposhi. Adoac aben icquidbimboecquid utsitsen nidaid shëcuënuësh puduensho ispombi. Obecan paisbimboec aton pais daëd icposh. Satanasën ancanquidquio icmiacpadeccuëdampamboec onqueposh. Bëdambo icquid damianquien muaquin chuibanquidquio niosh. ¹²Adsho isun Satanasën abia chuiquid dapa icmeboedën nidaid shëcuënuësh puduemoed chuiquid dapatsen icmiac abëdtambi matses abitedimbo ancaquin nameposh. Aden namequin abi chuiquid dapa acte uquëducuësh choboedën chiacpadomboen matses abitedi nameposh naden chuiquin. —Seshuniaid uincuemiondaidën nuqui chuiquid dapan chiaiduidtsëqui natiad —caposh. ¹³Aden acte uquëducuësh choboedën abi chuiquid dapan chiaid namenuen comapenen tantiaquid icquin nidaid shëcuënuësh choboedën dadpen ismeposh. Matses dadpenshun isnubi abucshun abembi taboadaid budmequin ismeposh. ¹⁴Aden Satanasën namiacpadomboen comapenen tantiaquin ismiac matses dadpenshun:

—Abimbo caic —quequin abi chuiquid
dapa icsamboshë icquidën chiaid
nabededposh Nuquin Papambo
tantienquio icquin. Abi chuiquid
tantiemequid nidaid shëcuënuësh
choboedën: —Nuqui chuiquid dapa
uincuemiaidquio icsho tantiaquin
abibimboecnuc nuamboshë icnuc
nacnenta —cac matsesën nacnemposh.
¹⁵Nacnacsho isun Satanasën
namiacpadomboen nidaid shëcuënuësh
choboedën abi chuiquid
dapabimboecnuc nacnemboedi
tibocameshun oncameposh. Adoquien
nacnemboedquiobi chuiquid dapa
icsabimboec onquequin: —Ëbi
tantiesabo neque. Cuesun secatan —cac
yuabon abi chuiquid dapa tantiesabo
cuesun secatamposh. ¹⁶Adnubien nidaid
shëcuënuësh choboedën: —Nuqui
chuiquid dapan yuabo nuqui nec
—quequin ancabudquin matses
dadpenquio dada uaqin bësiadmeposh
nëidtedi. Nëidic chuiquid dapabo.
Nëidic chuiquidpenquio. Nëidic dadpen
dayun uaquido. Nëidic aton na
nibëdquido. Nëidic matses yuabotedi.
Nëidic yuapenquio. Aidedi matses
dadpenquioshë dada uaqin
bësiadmeposh. Utsi-utsien bëtanteteno
bësiadmeposh. Utsi-utsien mëdante
abiuquio mësiadmeposh. —Acte
uquëducuësh choboedën ëbi chuiquid
dapan yuabo nec —queshun nameposh.
¹⁷Adshumbic nidaid shëcuënuësh
choboedën chuiquid. —Adec ëmbi
chiacpadeç siadambo icquido
piucquidbëdta mitsana utsi menenda.
Ëmbi siadmiaiduidtsëqui mene
—queposh. Utsi-utsieç abi chuiquid
icsamboshë icquid cuëmëdquid dada
uaquin bësiadmiaid neposh. Utsi-utsieç
aid cuëmëdaidbimboecquid naden 666
dada uaqin bësiadmiaid neposh.
¹⁸ËAda ëmbi chuiquid tantio?

Bëdamboen tantiaquidën: —Abi
cuëmëdquidquio chienquio icquin
naden 666 chuiquid dada uapac
—catsiash. —Adec matses icsamboshë
icquidquio chuiquid dapa yansho isun
bëdambo icquid danenda —quequin
ushquin isacbimboecnuc aden
ismeposhi.

Nuquin Papan cudasënaido ismiaid

14 ¹Adoshombic padpiden ismiac
abided cuidadec unësaid
Esusquio macuësh dapa Sion caid
mananënquio tabadsho ispombi. Abëdi
abi tantiaquido dadpenquio 144,000tedi
tabadposh. —Con na neque. Chën
—quequin cudasquin Nuquin Papan abi
cuëmëdquidbëdta Esus cuëmëdquid
dada uaqin bësemiaido niosh. —Adec
Esus tantiaquido abëdi tabadendac
—quequin aden ismeposhi. ²Adnubien
Nuquin Papa yacnuësh
Ëmidapdapamboec cuëdtoposh? Acte
nua chododoquiabipamboequien
niabiposh. Abu
tesquianiabipamboequien nechitosh.
Ten-tencate dapa dadpen icbo-icboen
sananquin ten-tencacipamboec
comapenec cuëdëncuededposh. ³Adec
Esusbëdi macuësh mananënquio
tabadboedo 144,000tedi icquido
cuëdëncuededposh. Nuquin Papa
chuiquid dapan tsadten tsadacnombo
cho-choash tabadec cuëdënte chucan
cuëdëncuededposh. Tsusiobo 24tedi
icquidobëdta dadanobi ëshëcquido
4tedi icquidën ambobidi tabadquin
tantianuc adcuëdposh. Abi icsaid
bedshunuec abided cuidadec unësaid
Esus tantiaquidon matsesënuidtsëqui
aid cuëdënte chuca tantieç cuëdënosh.
⁴Aido Nuquin Papa yacno nidabi yec
nidaidën tabadnuc matses utsibo
abitedimbo icsamboecshë tabadnubi
aidoen bëdamboec tabadpanëdash.

Utsibon Nuquin Papa Esusbëdta tantiatiapimbo icnubi aidombien tantiaquiopanëdash. Abided cuidadec unësaid Esus tantiaquid icquin ambi chiacpadomboen nabampanëdash. Adonëdaid icquin Nuquin Papabëdta Esus cuishoncamequidombo niosh. ⁵Chieshtoenquo icquin Esus tantiec muesabo icpanëdash. —Adquido iquendac —quequin ushquin isacbimboecnuc aden ismeposhi.

Mayan bëda utsi 3tedshun chiaid

⁶Aido ismeboshombic utsitsen ismiac Nuquin Papan abi yacnoshon uaid mayan bëda uicchun cuenacbimboec abuc cuensho ispombi. Bënudtiapimbo icquid Nuquin Papan chiaidquio matses chuinuec niosh nëidtedi. Nëidic matsesquio. Nëidic matses utsibo. Nëidic nidaid utsi-utsiec yacno tabadquido. Aidedi chuiquin Nuquin Papan matses icsaido cuidte chuinuec niosh. ⁷Abuc cuenquimbi chuibemposh. —Nuquin Papauidtsëqui tantiatia. “Abu uaquinc nidaid uaquinc acte uaquinc caquid bëdamboshë iquec. Abipadquid utsi nibëdquio iquec,” quequin tantiatia. Nëbi ambi chiaid niac-niacquido cuidquieque. Aidquio tantiatia —quequin chuibemposh abuc cuenquimbi.

⁸Adnubien mayan bëda utsi abuc cuenoaposh. Cuenquimbi naden chuibenoaposh. —Shubu dadpen icquid Babidonia caid yacnocquido icpampidobimboec icsamboshë icquidobidi icsho Babidonia yacnocquido caimbi. Aidon uisma uanten danoshcacbimboen matses utsibo abitedi Nuquin Papa tantiamenquio icquin icsamequioposh. Aduidequi icsho ëndenquimboshë cuidampicpadomboen Nuquin Papan uesquin cuidquiendac —quequin

chuibemposh mayan bëda utsin abuc cuenquimbidi.

⁹Adnubien mayan bëda utsitsen abuc cuenoaposh. Aidënsen chuibenoaposh. —Tantia. Nuquin Papan cuidtequido chuinu. Chuiquid dapa icsamboshë icquid acte uquëducuësh choboed tantiaquin aidbimboecnuc nacnenaid tantiaquioposh. Aden abi chuiquid icsamboshë icquid tantiec: “Aton yua nebique. Ismenu,” quiash ambi tantiaidën chiacpadec utsi-utsiec bësiadcuedednubi utsi-utsiec mësiadcuededposh. Aden abi chuiquid icsamboshë icquid tantiaquidon abi tantiatiapimbo icsho Nuquin Papan cuidquiendac. ¹⁰Aidedi chuiquid icsamboshë icquidën yuabo icsho icbobëdtabi Nuquin Papan nëishënquioshon cuidquiendac. Icaquido cuidquiacno chian anëdënquiacno nësecain adoendac. Abided cuidadec unësaid Esusënquo mayan bëdabobëdtan isnubi adoendac. ¹¹Ënenquo icquin adoendac. Aden Nuquin Papa chieshënquidquio tantiec siadaido Nuquin Papan cuidquiendac. Aden cuidsho: “Chiata,” cac “Ai,” quenquo icquin adembi cuidquiendac ënenquo icquin —quequin chuibemposh mayan bëdan. Aden ismeposhi.

¹²Ëmbi chuiboed tantiashun mimbi nabocpadomboembi chieshtoenquo icquin Esus tantiaquin ambi chiacpadomboenuidi nabanta. Utsibon chieshënquin: —Padi. Esus tantienda. Cueschitomanë —caqui adenuidi ënenquo icquin Nuquin Papabëdta Esus tantiaquiota.

¹³Adnubi Nuquin Papa yacnuësh comapenec onquequin chuioposhi. —Naden chuiquin dada uata. Chieshëmënkuidon: “Esus tantiec,” queshun cuesun secaido Esus

tantiaquido cuishonquendac —quequin chuiposhi. Adnubien Nuquin Papan Mayanëntsen: —Ai, abimbo caosh. Esus tantiaquido natiac tabadtenedobi unëshash bédamboshë iquendac shubitiapimbo yacno tabadec. Ambi chiacpadquiec bédamboec tabadec unëshacsho Nuquin Papan aden bédamboshë icmendac —quequin chuiposhi.

**Intac nua icnuc Nuquin Papan
cuidtequid chiaid**

¹⁴Adoshombic padpiden ismiac abu ushunquo Esus tsadsho ispombi. —Abitedishun Icbombo nebi —quec chuiquid dapan mauetembo shocosh nacnenaïd maeshun chështebimboecquid sanamposh.

¹⁵Adnubien mayan bëda utsin abi yacnuësh choquin comapenec onquequin Nuquin Papan chuiboed Esus chuituidposh. —Nëbi nidaidën icquid sinaid butebanquin sando. Nuquin Papan tantiacpadën nëbimbobi nata ¹⁶—caquien chështebimboecquidën sinaid butebanquin sandoposh. —Aden Nuquin Papan tantiacpadomboen abi tantiaquidotedi bedshun abi yacno Esusën buanendac —camenuen aden ismeposhi.

¹⁷Adnubien mayan bëda utsi Nuquin Papa yacnuëshquiobidi choposh chështebimboecquid sanampamboec.

¹⁸Adec chështebimboecquid sanampamboec choshobien mayan bëda utsin matses tabadacno cuëte dëtsisadaid isquidquo icquid nidaid masiabudboedën tauite dapa dayunuëshquo choshon comapenec cuëdquin chuiposh.

—Shancuinbimboecquid uba caid nidaidën caniquid chështebimboecquidën mëtebanquin sandoshon buanshun uba tish-tishten

sando ^{19,20}—caquien uba caid mëtebanquin sandoshon buanshun uba tish-tishten sandoposh. Aden abi tish-tishten sandoshon taën tin-tincaquin tish-tishaquien ënë nuamboshë yec piumbo icposh. —Intac nuambo icnuc Nuquin Papan cuidendac —camenuen aden ismeposhi. Adomboen uesquin cuidnuen Nuquin Papan matses icsambo icquido cho-chomendac. Edusaden yacno cho-chomeshun ashunquo Nuquin Papan cuidac matsesën intac nuamboshë chididiquec nua mauanendac. Acte nua chëuëdacbipamboec cabayon mapi yaction intac chëuëdsho isombi. Ènapenquo quidometedos 300ted cactiombi cuësquec nuamboshë matsesën intac chëuëdsho isombi ushquin isacbimboen. —Aden Nuquin Papan abi chieshëquido cuidendac —quequin ismeposhi.

**Nuquin Papan cuidtequid
7tedbidi nabanaid**

15 ¹Adshumbic Nuquin Papan cuidte tantiamenuen Nuquin Papa yacnoshon dacuëdampamboecnuc padpiden ismeposhi. Adoac matses natiamequin cuidquido dacuëdampambo icquido 7tedi icsho ispombi. Mayan bédabo niosh. —Aidon ambi chiacpadomboen ënquimbi matses icsaïdo cuidsho isash Nuquin Papa nëish bédanendac —quequin tantiaquin ispombi.

²Nuquin Papa yacnobidi chian dapa icposh. Actepenquo yec acte-actectsëcquo isadposh. —Nuquin Papa icsaquido cuidquidquo nec —camenuen tied nëdënquiacbimboec aid bëntse isadposh. Aid cuëmambi Esus tantiaquido tabadposh. Satanasën namiaidën acte uquëducuësh choeboedën

chuiquid dapa icsamboshë icquidèn:
 —Yuanu —cauidaido niosh. Chuiquid
 dapa icsamboshë icquidbimboecnuc
 nacnenaid tantiatiapimbo icquido aidò
 niosh. Adecbidi icsamboshë icquidèn
 ancabudacpaden nainquio yec aton
 yuabo ictiapimbo yec aid
 cuëmëdaidbimboecquid 666 dada
 uaquin siadmetiapimbo icquido niosh.
 Adec abi tantiaquido icsò Nuquin
 Papan meniaid ten-tencate cuëdëmec
 cuëdëncuededpòsh. ³Nuquin Papan
 namiaid Moises: —Nuquin Papan nac
 ëbi chieshëncquidon ëbi cuesun
 secainquio icpòsh —quec
 cuëdëmpampicpadec
 cuëdëncuededpòsh. Nuquin Papa
 bëdamboen ismenuec abided cuidadec
 unësaidquio Esus aton Papabëdta
 tantiec cuëdëncuededpòsh naden chieç.
 —Nadatiambo icquin
 nabanquidquio mibi nec, Papa.
 Abitedimbo uaquidquio yec
 abitedishun Icbombo mibi nec,
 Papa.
 Matsesën naid abitedi
 tantiaquidquio abimbo
 chuiquidquio mibi nec, Papa.
 Mimbi naid bëdambo icnuc
 dacuëdampambo mibi iquec,
 Papa.
 Nidaid utsi-utsieç yacno tabadquidon
 Ico icpampidi adecbidi matses
 abitedishun Icbombo mibi nec.
⁴ Matses abitedishun: “Nuquin Ico
 dacuëdampambo icquid neque.
 Ambi chiacpadomboen nanuna,”
 mibi capashun, Papa.
 Mibiuidtsëqui icsaisambo nec, Papa.
 Adquid icquin mimbi
 chiacpadomboen icsaquido
 cuidquimbi bëdambo icquido
 mimbi bëdamboen isendac.
 Adsho isun nidaid utsi-utsieç yacno
 tabadquidon matses abitedishun:

“Mibi bëdambo iquec. Con
 Icbombo mibi nec,” caindac
 —quec cuëdëncuededpòsh Esus
 tantiaquido.

⁵ Adshun isquien isadaidbon: “Nuquin
 Papa tabadte nec,” quequin
 shubuampicpadquid shubu
 shëcniacchobi icpòsh. Nuquin Papa
 tabadacnombo tantiamenuen aden
 ismeposhi. ⁶ Auëshquio Nuquin Papan
 chiacpadec ëmbi isboedo mayan bëdabo
 7tedi cho-chopòsh. Matses icsaquido
 cuidquido niosh aidò. —Nuquin Papan
 yuabombo nec —camenuc dashcute
 nac-nacquio icquid dasiuidcuededash
 dashcute bëshpiu-bëshpiumbo icquid
 shictonquecuededpòsh. ⁷ Adsho isun
 Nuquin Papabëd icquid dadanobi
 ëshëcquid abentsëçshun maspanëmpi
 shocosh piu nacnenaid icbo-icboen
 menebamposh. Unëstiapimbo icquidèn
 Nuquin Papan nëishëncquishon cuidte
 cushtoaid maspanëmpi niosh. ⁸ Adnubien
 Nuquin Papa tabadaid nuntanuësh
 pushud-pushudpambo icpòsh. Adec
 dacuëdampamboecsho isash Nuquin
 Papa chuinuec puduedtiapimbo icpòsh.
 Ènquin cuidambi padpidec Nuquin Papa
 yacno puduednushi niosh.
 —Abitedishun Icbombo yec
 dacuëdampambo icquidèn ambi
 tantiapadomboen icsaquido uesquin
 cuidendac utsibon: “Chën,” cadiapimbo
 icquin —camenuc aden ismeposhi.

Maspanëmpin cushtoaid

16 ¹ Adec pushudacnuësh abi
 tabadacnuësh Nuquin Papambo
 cuëdsho tantiombi. Maspanëmpi
 bedboedo chuipòsh. —Matses yacno
 nidshun maspanëmpin cushtoaid
 chiuinquin matses uesquin cuidta
 —quequin chuipòsh Nuquin Papan.
² Adoquien abentsëçshun ambi
 bedboed maspanëmpin cushtoaid

nidaidëshun chiuimposh. Adnubien ëmbi isboed acte uquëducuësh choboed chuiquid dapa icsamboshë icquidën yuaidotedi natiambo yec chiuë-chiuëtsëcquio yancuededposh. Satanasën namiaidquio icsamboshë icquid tantiaquin abibimboecnuc nacnenaïd tantiaquido yec aton icbo cuëmëdquid dada uaquin siadmiaido icsho aden cuidposh.

³Adnubien utsin ambi bedboed maspanëmpin cushtoaid chian dapa mad caid nëchiuimposh. Adoquien aid chian mad caid intacac. Ënden unësaidën intacipamboecnuc intacuac. Intacuidpambo icnuc acten icquidtedi unësbudneposh.

⁴Adnubien utsintsen ambi bedboed maspanëmpin cushtoaid acte utsitedi nëchiuimbeneposh. Nëchiuimbeniac aidtsen intacposh. ⁵Adsho isun mayan bëda utsin acte dayun uaquidën Nuquin Papa chuiposh.

—Aden mimi cuidsho isun: “Mibi bëdamboshë iquec,” caimbi, Papa.

Nidaid uabi yec ëndenquimboshë icpampidi mibi nec.

Nëbi adquid yec mibi

nibëdantiapimbo icquid nec.

Adquid yec abitedishun Icbombo mibi nec.

Icsaisa icquin mimbi

chiacpadomboenuidi mimbi naic.

Muesambo mibi nec.

Aden mimi chiacpadomboen

mimbi icsaquido cuidec, Papa.

⁶“Ëmbi chiaid chuibanquidobëdta ëbi tantiaquido nua intac icnuc chieshëmëndquidon cuesun secabudnepondash,” qeshun

cuesun secanquido cuidquin mimbi aton acte intacuashunacsho isun: “Mibi bëdamboshë iquec,”

caimbi, Papa

—queposh mayan bëda acte dayun uaquid.

⁷Aden acte dayun uaquidën chuisho tantiaash Nuquin Papa tantiaquin nëish pichicate dapa yacnuëshquio utsi cuëdposh. —Ai, abimbo caic, Papa. Abitedishun Icbombo icquin comapenen tantiaquidquio mibi nec. Adquid icquin matsesën naidtedi mimbi tantiec, Papa. Icsambo icquidon naid abimbo chuiquin mimbi aido cuidec. Adsho isun: “Mibi bëdamboshë iquec,” Papa, caimbi —queposh mayan bëda utsi.

⁸Adnubien utsintsen ambi bedboed maspanëmpi cushtoaid badiadën ushë bëchiuimposh. Adoquien Nuquin Papan namiacpadecec matses baded-badedquieci ushën pichiebudneposh. ⁹Adec pichiebudneshumbien Nuquin Papa chushcabededposh. —Icsauidequi icsho Nuquin Papan nuqui cuideque. Nuqui icsaid ënash ambi chiacpadece bëdamboec tabadnuna —quetiadquidëmbi chieshënquin abi cuidquidquio Nuquin Papambo chushcabededposh.

¹⁰Adnubien utsintsen ambi bedboed maspanëmpin cushtoaid chiuimbenequin acte uquëducuësh choboed chuiquid dapa icsamboshë icquid ambi namiaidobëd tabadacno chiuimbenequin. Adoquien inçhëshposh inçhëshquio yec. Badiadenquio icposh. Adsho isash matses abitedi natiambo dacuëdcuededposh. ¹¹Adec dacuëdcuededec: —Ambi chiaid niac-niacsho Nuquin Papan nuqui cuideque. Nuqui icsaid ënash ambi chiacpadece tabadnuna —quetiadquidëmbi: —Natiambo chiuëmianec Nuquin Papa icsambo iquec —qeshun Nuquin Papa chushcabededposh.

¹²Adnubien utsintsen ambi bedboed maspanëmpin cushtoaid acte dapa Eupëdates caid nëchiuimposh. Adoquien Eupëdates caid acte nua icboedi nibëdquio yec uesadposh. Ma matses utsi-utsiec aton chuiquid dapabobëdi tsidadash Esus chedo cuesun secanuec ushë choacmiuësh choquin ma potenuequin aden acte uesadmepposh.

¹³Adec aid matses cho-choabi icnuc ushë choacmishun cho-chometequidëmpi naden ismeposhi. Coqueshbimboecquid podobitsi icsa 3tedi ana shëcuënuësh cho-chosho ispombi. Nëidic nisi dapabimboecquid Satanasën ana shëcuënuësh choquid. Nëidic acte uquëducuësh choboed chuiquid dapa icsamboshë icquidën ana shëcuënuësh choquid. Nëidic nidaid shëcuënuësh choboedën Satanasën muauamequin oncameboedën ana shëcuënuësh choquid. Aidtedi chosho isombi. ¹⁴Satanasën yuabo icquin comapenen tantiaquin nacnenquido niosh. Matses utsi-utsien abi chuiquid dapabobëdtabi namenuc niosh. —Aidon namiac chuiquid dapabo abitedi aton yuabobëdi tsidadash ushë choacmiuëshquio cho-choendac. Nuquin Papa chieshënuquin Esus chedo cuesun secanuec adec cho-choendac. Nuquin Papan tantiacpadënuquobi adendac —camenuc mayan bëdan aden ismeposhi.

¹⁵Adnubien Esusquio cuëdposh. —Tantia. Chuiinu. Mimi: “Nëbimbobi aid choec,” cacmaidquieni choendac. Ushenquio yacbiboen ëbi ënenquio icquin tantiec: “Nëbien Esus chochitec. Choshon nuqui icsaid abitedi chuiquin cuidnushe. Bëdamboec tabadnuna,” quec bëdamboec tabadta. “Nëbi nidnu. Nid,” cac: “Ai, con na ënden nacnenombique. Baded nid,”

quiacbimboec icta ëbi cainec —queposh Esus.

¹⁶Adnubimbi coqueshbimboecquid podobitsi icsabon namiac matses utsibo chuiquid dapabo abitedi aton sondadochedobëdi cho-chosho ispoc. Nidaid Isadaid caid yacno macuësh icscho isadaidbon onqueten Admaquedon caid yacno cho-choposh Esus chedo cuesun secanuec.

¹⁷Adnubien maspanëmpi bedboed utsintsen ambembi chiuinquin Nuquin Papan cuidte ënquimbi ismeposhi. Ambembi chiuinubien abi tabadacnuëshquio Nuquin Papa cuëdposh. —Padi. Nëbi ëmbi tantiacpadomboen ënquimbi cuidec —queposh. ¹⁸Adnubien abu bed-bedquetanepamboec abu tesquianenuc natiamboshë shëc-shëcquemboec nidaid uëdë-uëdëquiamposh. Nuquin Papan tauamboen matses uambi adec nidaid uëdëquiambo. Bëdiactsëc nidaid uëdëquedenedi acquimboec uëdëquiamposh. ¹⁹Adnubien matses dadpen yacno Babidonia caid yacnuësh nidaid abichobi icboedi 3tedi yanec tiadbudneposh. Aden Nuquin Papan: —Anocquido icsamboshë icquido nec —quequin Babidonia caid yacnocquido uesquin cuidquioposh. Adec nidaid uëdëquenubi nidaid utsi-utsiec yacno shubu dadpen icquid yacno-yacnomboec shubu abitedi uesadec chimeshadbudneposh. ²⁰Nidaid uëdëquenubi chian dapa mad caid yacno acte nënantan nidaid icquid abitedimbo nibëdambudneposh. Adecbidi macuësh abitedi nibëdambudneposh. ²¹Abucuëshquio ue dapa choacbimboec ue tsasi nuacquid dapa quidos 50 icnuc yuë tanaid dadpenquio paëdbudnequimbi matses tish-tishbudneposh. Aden ue tsasi dapan

mëyansho isun padenquoio
ictiadquidëmbi matsesën Nuquin Papa
chushcabededposh. —Nuqui icsaid
ënshun Esus tantianuna
—quetiadquidëmbi chushcabededposh.
—Adquido iquendac —quequin ushquin
isac bimboecnuc aden ismeposhi.

Chido chishpidabimboecquid ismiaid

17¹Adshumbic maspanëmpin
icquid chiuimboedën
abentsëschun chuiuamposhi. —Isec cho.
Mimbi isboed Babidonia caid
yacnocquido cuidte mibi ismenu.
“Babidonia caid yacnocquido matses
utsibo dadpenquoio icsamete bunquido
nec,” quequin chido
chishpidabimboecquid acte dapa bëntse
tsadsho mibi ismenu. “Adquid icsho
Nuquin Papan cuidquiendac,” quequin
mibi ismenu. ²Aido icsamboshë iquec.
Matses utsi-utsien abi chuiquid
dapabobëdta uisma uanten
danoshcabcimboen Nuquin Papambo
tantiamenquoio icquin ambi chiaid
niac-niacmequioposh. Aido cuidsho isec
cho —queposh.

³Adshumbic ushquin isac bimboecnuc
ismeposhi. Nuquin Papan Mayanën
tantiamiac masiuidquoio yacno shubu
nibëdacnombo chido aben icquid dapa
catsadsho ispombi. Aben icquid
piumboshë icposh. Aidën dadan:
—Nuquin Papa caid nibëdquoio iquec
—quequin uesquin dada uapaidquoio
icposh. Aton mapi sietetedi icnuc aton
pais 10tedi icposh. —Mimbi isboed acte
uquëducuësh choboed chuiquid
icsamboshë icquidquoio nec —quequin
aden aben icquid ismeposhi. ⁴Aid
catsadquid chido dashcute piumbo
icquidbëd umumbo icquid dasiuidposh.
Shocosh piu nacnenaid chedo
cuënotempi nac-nacquio icquid chedo
payuec aidbidi mësiuidposh. Dëshote

bëdambo icquid sanamposh. Aden
sanansho dëshote anisquin isaquien
icsambo icquiduidquoio icposh. —Chido
chishpidabimboec Babidonia caid
yacnocquido icsamboshë iquec. Uisma
uanten danoshcabcimboen: “Nuquin
Papa caid nibëdquieç,” quequin
tantiamenquin matses utsibo dadpenquoio
icsamequiendac —camenuen aden
ismeposhi. ⁵Adshun isaquien aid chido
abi tantiamete abi cuëmëdquid
bëtanteteno bëdada uadac. —Babidonia
yacnocquido bëdambo icquido
damianquidi icsamboen tabadmequido
nec —quequin dada uaid icposh. ⁶Aid
chido paëmbo icquid acac bimboec Esus
tantiaquidon intac acash tantiaquido
yamposh. —Babidonia caid
yacnocquidon Esus tantiaquido dadpen
cuesun secaindac —quequin
tantiamenuen aden ismeposhi.
Dacuëdampamboecsho isash:
—¿Mitsipadquiopequini ique?
—quebudquiobi.

⁷Adbudquioshobini aid mayan bëdan:
—“Tantiaquido iquec,” ¿queceta ique?
Tantia. Chido chishpidabëdta abi
catsadaid aben icquid chuinu. ⁸Mimbi
isboed aben icquid icsamboshë icquid
ictenedi nëbi nibëdec. Yuecshun
Satanasën abi tabadacnoshon padpiden
chomendac. Adoacsho yuecshun Nuquin
Papan chian anëdënquiacno
nësecaindac. Aden cuidabi Satanasën
chomebocsho isun Nuquin Papa
tantiesabon: “Comapenen tantiaquidien
nechitec. Matses nibëdanëdaidi
uincuenashien choachitosh. Aidi
tantianu,” caindac. Matses uabi icquin
Nuquin Papan: “Ëbi tantiaquido
iquendac,” cacmaidonquoio adoendac
—queposh mayan bëda.

⁹Adshumbic padpiden chuiposhi.
—Tantia. Ëmbi chuiboed bëdamboen
tantiamenuen chuinu. Naden

tantiamentuen aben icquidën mapi 7tedi icquid mibi ismiombi. “Babidonia caid yacno matses icsa uaquido tabadacno macuësh dapa 7tedi iquec,” quequin tantiamequimbi: “Chuiquid dapabo 7tedbidi iquendac,” camenuen aid mapi 7tedi mibi ismiombi. ¹⁰Aid chuiquid dapabo 5tedi nibëdnubi utsi abi iquec. Nëbi aidën aton matses namec. Utsitsen choendac. Choshon aton matses nametantsequi badedquio nibëdanendac. ¹¹Nibëdanëdaidi choashic ëmbi ismeboed acte uquëducuësh choboed chuiquid dapa icsamboshë icquidquio iquendac. Aidën ëmbi chuiboedo chuiquid dapabo 7tedishun namiacimboen aton matses icsamboenshë namendac. Adoacsho isun Nuquin Papan icsaido cuidquiacno nësecaindac —queposh mayan bëda.

¹²Adashic abi onquec: —Naden tantiamentuen aben icquidën pais 10tedi icquid mibi ismiombi. Chuiquid dapa utsibo 10tedi iquendac. Nëbi aton matses namiabi iquec. Padabi. Adquido yanendac. Satanasën acte yacnuësh choboedbëdta chuiquid dapabo icmiac matses icsamboenshë namiash yuec tabadabi badedquio nibëdanendac. ¹³Nibëdanabi icquin aidon acte uquëducuësh choboed abi chuiquid dapambo icmendac. “Aidën namiac abi tantiaquidobëdta Esus nuquitedishun cuesun secatsiac nibëdquio icnuc,” queshun aden icsamboshë icquid abi chuiquid dapa icmendac. ¹⁴Aden Esus chieshënuquidon: “Chieshtomenu,” cac Esusën yuaido abi tantiaquidotedi chieshtoenquio iquendac. Aton Icbo Esusën abided cuidadec unësaidën namiac chieshtoenquio iquendac. Aden abi tantiaquidobëdta chieshënuquin cuesun secanuec cho-chosho isun Esusëmbi cuesun secaindac. “Ëbien matsesën Icbombo nec,” quetanquin adoendac —queposh mayan bëda.

¹⁵Adashic padpidec: —“Nidaid utsi-utsiec yacno tabadquido dadpenquio Babidonia caid yacnocquidon icsamendac,” quequin tantiamentuen chido chishpidabimboecquid acte dapa bëntse tsadsho mibi ismiombi. ¹⁶Aden Babidonia caid yacnocquidon nasho isun mimbi isboed chuiquid dapa icsamboshë icquidën abëditan chuiquid 10tedi icquidbëditan Babidonia caid yacnocquido chieshënuendac. Aden chieshënuquin cuesun secatanquin shububëdtabi nëdëncaindac nibëdquiecnuc. ¹⁷“Ma Babidonia caid yacnocquido uesquin cuidnu,” quequin ambi tantiacpadomboen Nuquin Papan aden acte uquëducuësh choboed chedo chuiquid dapabo icmendac. ¹⁸“Matses utsi-utsien chuiquid dapabo aton matsesbëdtabi yuaquid abi iquec,” quequin mibi chido chishpidabimboecquid nëbi ismiombi —quequin mayan bëdan chuiposhi.

Nuquin Papan Babidonia caid yacnocquido cuidaid

18 ¹Aden Babidonia yacnocquido cuidte chuisho tantiaboshombic mayan bëda utsi Nuquin Papa yacnuësh abucüësh budsho ispombi. Nuquin Papan icmiacpadquid mayan bëdabo chuiquid dapa yec bëchamauanquiecposh. ²Choshombic nua cuëdquin chuiposh. —Babidonia caid yacnocquido Nuquin Papan uesquin cuidquiendac. Aden cuidac matses nibëdquiecnuc abi tabadtenecnombo podobitsiuidpambo tabadendac. Ambobidi edesteuidquio tabadendac. ³Babidonia caid yacnocquidon matses utsibo abitedimbo abi chuiquid dapabobëdta Nuquin Papa tantiamentuen icquin icsamequioposh. Adembidi abi bunaid bednuen matses

utsibo piucquid dadpen menedenequin Nuquin Papa tantiamenquo icposh. Adsho Nuquin Papan cuidquiendac —quequin mayan bédabon chuiposhi. ⁴Adnubien Nuquin Papa abucüesh onqueposh. —Tantia, Esus tantiaquido. Mibitsen chuinu. Babidonia caid yacnocquidon nacpadomboen nainda. “Aidobëdi icsasho ëbitsen cuidquionoshe,” qeshun aidon namiacpadomboen nainda. Auëshquio niqueta —qesho tantiombi. ⁵Nuquin Papa yacnoshombidi utsin chuiposh. —Ënëdenquo yec icsauidequi icsho isun ambi tantiacpadomboen Nuquin Papan cuidquiendac. ⁶Babidonia caid yacnocquidon matses utsibo dadpenquo icsamequioposh. Aden icsamequido icsho Nuquin Papan nëbi nëishquioshon uesquin cuidquiopashun —queposh mayan bëda. ⁷Adashic abi onquec: —Babidonia caid yacnocquido cuidtequido nec. Ambi naiduidi naquin aton na dadpenquo bedash: “Aidtedi dayun uaic bédambo iquebi,” quepec Nuquin Papan cuidte tantienquo yequi. Adsho tantiashun: “Natiambo icnuc comapenen cuidquiopashun,” caimbi. Otacquo tantiec: “Nuquin matses yuabo dadpen icnuc nuqui bédamboec tabadec. Chido niante bënë unësaid mëyadacimboec mëyadtiapimbo nuqui iquendac,” quechitequien iquec Babidonia caid yacnocquido Nuquin Papa tantiatiapimbo yec. ⁸Adsho ambi: “Nëbi ëbi cuidec,” cacmaidënquo cuidendac. Nuquin Papanquo abitedishun Icbombo icquin comapenen tantiaquin nacnenquidquo icquin badedquo cuidquiendac. Aden dadpenquo unës uabudniacsho isash natiambo sedenquecuededendac. Aton pete nibëdquiecnuc natia bunendac. Aton shububëdi dadpenquo nédënquendac —queposh mayan bëda.

⁹Adashic abi onquec: —Adec Babidonia yacnuësh nédënquec pushudtonesho isash: “Aidon namiacpadomboen Nuquin Papa tantienquo icquin con na dadpen bedtenembi,” quequin chuiquid dapabon nadambocain sedencabededendac. ¹⁰“Tantia. Nuqui tantiaido sidquebudneque,” quec uinte päëdtampamboec dacuëdtanash uanoshon isec tabadendac. Adec tabadec: “Aido unësquimboshë iquec. Aton matses aton yuabobëdi dadpenquo icpadenec. Ambi dayun uaid dadpenquo icpadenec. Matses utsibo dadpen namepadenec. Aido tantiac unësquimboshë iquec. Badedquo uesquin cuidquiopac,” quec sedenquecuededendac Babidonia caid yacnocquido tantiec —queposh mayan bëda.

¹¹Adashic abi onquec: —Babidonia caid yacnocquido aden cuidacsho isash utsibotsen: “Ëmbi meniaid bedshun piucquid dadpen menedenebi. Nëbi adquid nibëdquieci. ¿Tsuntsimbini ëmbi meniaid cuidquin piucquid menepatsiashba?” quec sedenquecuededendac. ¹²Aidobidi: “Nadquid Babidonia caid yacnocquido menequin piucquid dadpen bedtenembi. Nëidic shocosh piu. Nëidic shocoshquio. Nëidic casëdubimboecquid cuënote bédambo icquid. Nëidic dashcute bédambo icquid. Nëidic dashcute piumbo icquid. Nëidic dashcute umumbo icquid. Nëidic sëntebimboecquid nacnenaid. Nëidic aben icquid edepanten shëta nacnenaid. Nëidic cuëte utsi bédaidquo nacnenaid. Nëidic shocosh utsi nacnenaid. Nëidic cuënote nac-nacquo icquid nacnenaid. Piucquid dadpen menequin adquidtedi Babidonia caid yacnocquidon bedpadenec. ¹³Utsitsen dadpen

bedpadenec. Nèidic batambo icquid sabimboecquid. Nèidic bédambo nuadte. Nèidic bédambo nuadec danoshquete. Nèidic acte paëmbo icquid. Nèidic bëchi. Nèidic pan nacnentequid. Nèidic nëish yua baca caid. Nèidic nëish yua utsi obeca caid. Nèidic nëish yua cabayo caid. Nèidic matses antsadsho cabayon nimbanquin buante. Nèidic ambi chonoa uatequido matses ambi ampequin bedaïdo dadpen. Babidonia caid yacnocquidon aidtedi dadpenquid bedtenesho aton piucquid dadpen bedpadenembi,” quependac nidaïd utsi-utsiec yacno tabadquido —queposh mayan bëda.

¹⁴Adashic abi onquec: —Abi piucquid menedenedën dayun uaid nibédanesho isash: “Aid matses bunaidquio ambi dayun uaid pete nibédquiec. Ambi dayun uaid dashcute bédambo icquidbéd aton na utsi dadpen abitedi nibédquiec,” ¹⁵quiash natiambo dacuèdec uanoshon isec tabadec sedenquecuededendac abi piucquid menedenedo tantiec. ¹⁶“Aid matses tantiac unèsquimboshë iquec. Matses dadpen yuaquin matses dadpen namepadenec. Aton matses dashcute bédambo icquid dasiuidcuededtenec. Utsi-utsiec dashcute piumbo icquid dasiuidnubi utsi-utsiec dashcute umumbo icquid dasiuidcuededtenec. Utsimbic casèdubimboecquid shocosh piu nacnenaïd payudenec. Utsibic casèdubimboecquid utsi payuec mësiuidtenec. Adec: ‘Con na dadpenquio icnuc bédamboec tabadebi,’ quepadenec Babidonia caid yacnocquido. ¹⁷Adsho isun Nuquin Papan abi ushëmbi cuidquiac ambi dayun uaidbéd aid matses badedquio nibédanac,” quec sedenquecuededendac abi piucquid menedenedo tantiec. Adecbidi nidaïd utsin icquidotsen

sedenquecuededendac. Nèidic cano dapa dancha icbo. Nèidic dancha icbobèd nidquido aton yuabo. Nèidic icbo piucquid meniash dancha antabèdtoquido. Nèidic nuècquid bedshun piucquid bednuen menequido. Aidtedi uanoshon isec sedenquecuededendac. ¹⁸Nèdënquec pushudtonesho uanoshon isash: “Adquido utsi nibèdec,” ¹⁹quiash natiaguec sedenquecuededendac. Adec shubiec: “Èbipadquid dancha icbon bëaidtedi bedshun piucquid dadpen menedenedo tantiac unèsquimboshë iquec. Is. Cuidquiac badedquio nibédanaque,” quec sedenquecuededendac —queposh mayan bëda.

²⁰Adashic mayan bëdabidi: —Èbien cuishonquendac. “Nuquin Papa yacno tabadquidotsen èbèdi cuishonque,” quequin chiendambi. Esus tantiaquido chuiquinc Esusbéd icquidombo chuiquinc Nuquin Papan chiaïd chuibanquido chuiquinc caquin: “Cuishonquec tabadnuna. Mibi chieshënquin natiamiacpadomboen mibi chieshënquido Nuquin Papan uesquin cuidquioshe,” quequin chiendambi —queposh mayan bëda.

²¹Adnubien mayan bëda utsin uidënquio icquidënquio nidaïd moco nuacquid dapa yuèmboshë icquid cadotanquin acquimboen acte nënebidanquimbi chuiposh. —Èmbi acquimboen nënebocpadomboen Nuquin Papan Babidonia caid yacnocquido uesquin cuidquiendac nibédquiecnuc. ²²Adoac aïdo ictenecnombo nadimbo iquendac. Ten-tencate ten-tencainquio iquendac. Utsibobic cuèdënenquio iquendac. Utsibombic shoncate shoncainquio iquendac. Cuète chëshun nacnenenquio iquendac. Piacbo macuesenquio

iquendac. Nadimboshë iquendac.
²³Tabote taboadaid nibëdendac. Dada
 aton chido ambi nëbi bedaidbëdi
 mamënenquio iquendac. Nibëdec.
 Nadimboshë iquendac. Adsho isash
 utsibo: “Babidonia caid yacnocquidon
 aton piucquid bednuen comapenen
 tantiaquin ambi naiduidi napadenec.
 Aden naquin ambi icsamboen tantiaid
 matses utsibo abitedi adembidi
 tantiamequin icsamepadenec,” quendac.
²⁴Nuquin Papan cuidabi icnuc aden
 icsamequin Babidonia caid
 yacnocquidon Nuquin Papa
 chieshënuquin ambi chiaid
 chuibanquidobëdtabi Esus tantiaquido
 dadpen cuesun secaindac. Adsho isun
 aidon yuaido matses utsibon adembidi
 Esus tantiaquido cuesun secaindac.
 Adsho isun Nuquin Papan uesquin
 cuidquidendac —queposh mayan bëda.

**Chieshënuquido cuidacsho
 isash cuishonquiaid**

19 ¹Aden mayan bëdan Nuquin
 Papan Babidonia caid
 yacnocquido cuidte chuisho tantiombi.
 Adshun tantiaquien Nuquin Papa
 yacnuëshquio Esus tantiaquido
 dadpenquioshë comapenec
 cuëdëncuededposh.

—Nuquin Papa bëdamboshë iquec.
 Aiduidtsëqui matses abitedishun
 Icbombo nec.

Aton Mado abided cuidadec unësaid
 tantiasho matses bëdamboen isec.

²Muesambo icquin ambi
 chiacpadomboen naquidquido nec.
 Abi tantiesabo ënëdenquio yec
 icsauidequi icsho cuidquidquido
 nec.

Adquid icquin: “Icsamboshë iquec,”
 quequin matses utsibo
 icsamequido Babidonia caid
 yacnocquido cuidquidposh.

Nuquipadquid Esus tantiaquido
 cuesun secacsho isun
 cuidquidposh
 —quec cuëdëncuededposh.
³Adashic padpidemboec:
 —Nuquin Papa bëdamboshë iquec.
 Is. Pushud-pushudpambo icnuc
 nëdëncuquin Babidonia caid
 yacnocquido uesquin cuidquioshe
 —quec cuëdëncuededposh Esus
 tantiaquido dadpenquioshë.
⁴Adsho tantiasu Nuquin Papa
 chuiquid dapan tsadten tsadnuc abi
 dacuenadec tabadquido: —Nuquin Papa
 Nuquin Icho nec —quequin ismenuec
 danëshën tinquebudcuededposh. Adec
 tinquebudcuededequi: —Abimbo caic.
 Nuquin Papa bëdambo iquec
 —quecuededposh dadanobi ëshëcquido
 4tedi icquido tsusiobo 24tedi
 icquidobëdi. ⁵Adashic auëshquibidi
 abentsëc cuëdposh.

—Nuquin Papa matses uaquidquido
 yec bëdamboshë iquec, canuna.

Nuquibi abi tantiaquidtedishun:

“Nuquin Papa bëdamboshë
 iquec,” canuna.

Aton yuabo icquin nuquitedishun
 adonona.

Chuiquid dapabo aton yuabobëd
 icquimbi nuquitedishun: “Nuquin
 Papa bëdambo iquec,” canuna

—queposh.

Esusën abi tantiaquido beduante chiaid

⁶Adsho tantiasu abu
 tesquianiacimboec acte nua
 chododoquiacimboec Nuquin Papa
 yacnocquido dadpenquio
 cuëdëncuededposh.

—Abi chieshënuquidon Nuquin Papa
 dëniactiapimbo iquendac.
 Ambentsëqui abitedimbo
 namendac.

Nuquin Papa bëdamboshë iquec.

⁷ Nuquin Papa tantiec
cuishonquenuna. Nuquin Papa
bëdamboshë iquec.

Dadan aton chido buntacquo
beduanacimboen abided
cuidadec unësaid Esusën abi
tantiaquido beduanshun abi
yacno tabadmendac.

Bënën beduanabi yac chido: “Con
bënën nëbi beduanabi,” quiash
nacnemëdquiabimboec:
“Nëbien con Icho chochitec,”
quiash Esus tantiaquido bëdamboec
tabadec.

⁸ Abi tantiasho Nuquin Papan
bëdamboen isaido yec abi icsaid
ënash:

“Nëen con Icho chochitec,” quiash
bëdamboec tabadec.
Aden abi tantiasho Esusën dashcute
chuca ushumbo icquid
dasiuinacim- boen abitedi
icsaisa icmendac

—quec comapenec cuëdëncuededposh.

⁹ Adnubi mayan bëdan chuioaposhi.
—Ëmbi chuibocpadomboen dada uata.
“Isadaidbo aton chido bedquin aton
matses cho-chomiash pemec bëdamboec
tabadquid. Adembidi abi tantiaquido
Esusën: ‘Cho,’ cac abi yacno nidaniash
cuishonquequiec tabadendac,” quequin
dada uata. Abimbo caimbi. Nuquin
Papan chiaidquio chiec nebi —queposh
mayan bëda.

¹⁰ Adsho tantiashini Nuquin Icho
danec ismenuec danëshën
tinquebuduidpoc. Adshobini: —Ëbi
aden ismenda. Nuquin Papauidtsëqui
aden ismeta. Mibipadquid Nuquin
Papan yuabidi nebique. Nuquin Papan
Mayanën Esus tantiamequin Nuquin
Papan chiaid dada uamepampic.
Aidëmbidi namiac mibipadquidobëd
Esusën yua nebique. Ëbi aden ismenda
—queposh mayan bëda.

Cabayo ushu catsadquid bëdamboshë icquid

¹¹ Adshumbic abuc isquin Nuquin
Papa yacno shëcnepamboacscho ispombi.
Adshun isquien auëshquio cabayo
ushumbo icquid catsadec chuiquid
dapambo choposh. Adsho isun: —Abi
tantiaquidobëd cuëshëdtiapimbo icquid
yec ambi chiacpadomboen naquidquio
Esusquio nec —quequin tantiombi.

Ambi chiacpadomboen icsaido
cuidquidquio icquin icsaido cuesun
secanuec niosh. ¹²—Matsesën
ompodëmëdtiapimbo icquidquio nec
—camenuec cuëte isquidquio
icquidbimboec ëshë icposh.

—Abitedimbo chuiquid dapambo nebi
—quec mauete dadpen maueposh. Abi
cuëmëdquid abi bëdada uadaid
tantiadenquio icposh. Utsibon
tantiatiapimbo icnuc ambentsëqui
tantiatie niosh. —Nuquin Papabëdan
Esusën naidtedimbo matsesën
tantiatiapimbo iquec —camenuen adec
bëdada uadaid ismeposhi. ¹³Abi
cuëmëdquid utsiembi tantiatsëccoc.

—Nuquin Papapadquidquio yec abi
tantiamianquid nec —quequin cuënaid
niosh. Aton dashcute bëntse icquid
cuidaidën intaquën punacbimboec
piumboshë isadposh. —Abi tantiesabo
cuidquidquio nec —camenuen aden
ismeposhi. ¹⁴Esus bëyuc nidnuc abi
tsibanec abi tantiaquidobëd mayan
bëdabo cabayo ushucquidquidquio
catsadcuededec cho-choposh. Icsaisa
icmiaido yec dashcute ushumbo icquid
bëchish nibëdquidquio
dasiuidcuededposh. ¹⁵Abi bëyucquid
ana shëcuënuëshquio chështe cuënumbo
icquid cueshqueposh. —Ambi
chiacpadomboen matses icsaido abitedi
cuidquidquio Esus nec —camenuen
aden ismeposhi. Adquid icquin nidaid

utsi-utsiec yacno tabadquido icsauidequi icsho uesquin cuesun secaindac. Nuquin Papan chiacpadomboen naquin shancuinbimboecquid uba caid nua ënë icnuc tish-tishacbimboen nua intac icnuc cuesun secaindac. ¹⁶Aton dashcute bëntse icquidën abi cuëmëdquid utsi dada uaccosh. —Abipadquid utsi nibëdnuc abitedimbo chuiquid dapambo yec abitedishun Icbombo nec —quequin dada uaccosh. Aton bëusudquid yacnombo adembidi dada uaccosh.

¹⁷Adnubien ushë mëducuio tabadquin mayan bëda utsin edeste chedo abuc cuen-cuensho comapenec cuëdquin chuiposh. —Nuquin Papan cuidquin cuesun seaidon nami chec cho-cho. ¹⁸Ëmbi chiacpadec cho-choshon matsesën nami mimbi nua tēpuisquin chendac nēidtedi. Nēidic matses utsi-utsien chuiquid dapabo. Nēidic sondado chuiquid dapabo. Nēidic dada cuesabo. Nēidic cabayo chedo abi catsadquidobëdtabi. Nēidic matses utsibo abitedimbo. Nēidic matses yuabo. Nēidic matses yuapenquio. Nēidic bacuëbo. Nēidic caniaido abitedi. Adquidtedi uesquin chec cho —quequin edeste chedo chuiposh. —Ambi tantiacpadomboen Nuquin Papan matses uesquin cuidquiendac —quequin aden ismeposhi.

¹⁹Adshumbic mayan bëdan ismeboedo Esus chedo cuesun secanuec cho-chosho ispombi. Acte uquëducuësh choboed chuiquid dapa icsamboshë icquid chedo nidaid utsi-utsiec yacno tabadquido abi chuiquid dapa chedobëdi tsidadash cho-choposh coqueshbimboecquid podobitsi icsabon namiacpadec. —Cabayo ushumbo icquid catsadquid Esusquio abi tsibanquidobëdta cuesun secanu —caqui ²⁰cuesun secadenquio

icposh. Adshobien Esusën acte uquëducuësh choboed chuiquid dapa icsamboshë icquid bedposh. Adotanquimbic aid tantiamequid nidaid shëcuënuësh choboed Satanasën oncamiaidtsen bedposh. Aid comapenen tantiaquin ismequin muaquin abi chuiquid dapan icsamboshë icquidën chiacpadomboen matses namequidquio niosh. Adec muaquin abi chuiquid dapabimboecnuc nacnemequidtsen niosh. Adecbidi: —Ëbi chuiquidën yuabo nec —quequin matses dadpen bësiadmequid niosh. Adec icsamianquidquio icsho bedposh. Abi chuiquid dapabëdta bedshun unës uabi chian dapa ënëdenquio yec anëdënquequid icsamboshë nuadquidquio nësecaposh. ²¹Adshumbic Esusën ana shëcuënuësh chështe cuënumbo icquid cueshquequidën: —Ëbi chieshënkuidotedi unësta —caquien cho-choboed utsibo abitedi unësbudneposh. Adsho isun caimboedon edeste chedon nua-nuaic tēpuisquin matsesën nami chebededposh. —Aden Esusën abi chieshënkuido nibëdamendac —camenuen aden ismeposhi.

Satanas uidën uaid

20 ¹Adshumbic padpiden ismeoaposhi. Adoac mayan bëda utsi Nuquin Papa tabadacnuësh budsho ispombi. Podobitsi icsabo Satanasën yuabo shëcuën tabadacno bëtashaid chictëbëdta shocosh bucubimboecnuc nacnenaïd dapa sanamposh. ²Adshumbic Eba icsamenuëc nisipampid Satanasquio bedposh. Bedtanquimbic shocosh bucubimboecnuc nacnenaïdën ambi sanamboedën uidën uaposh. ³Uidën uatanquimbic aton yuabo uidën uacno shëcuë aneposh. Adotanquimbic shëcuë

bëtashquioposh puduentiapimbo icnuc. Seta dadpenquio 1000tedi matameshun bëtashte chicshun Satanas cuemenuen adoposh. —Aden seta 1000tedi matamiabi icquin abi uidën uactedembi matses muauaquin icsametiapimbo iquec —queshun chicten bidiacquin uidën uaquioposh. Aden ismeposhi.

⁴Adshumbic utsitsen ismeoaposhi. Adoac chuiquidën tsadten icbo-icboec chuiquid dapabo tabadsho ispombi. Esus tantiaquido neposh. Aido Nuquin Papan icmiacpadquid abimbo chuiquido icquin Esusbëdtambi matsesën naid abimbo chuibamposh. Aden matses bëdamboen nameposh. Satanas uidën uacpadembi seta 1000tedi matamequin adoposh. Aido utsi-utsien mapî butiaido uincuemiaido neposh. Aido Esus tantiaquin acte uquëducuësh choboed chuiquid dapabëdta abibimboecnuc nacenaid tantiapimbo icquido neposh. Adecbidi: —Aidën yua nebi —quec aid chuiquid icsamboshë icquid cuëmëdquid dada uadec bësiadtiapimbo icquido niosh. Utsibic mësiadtiapimbo icquido niosh. Adquido icsho icsamboshë icquidon cuesun secaido niosh. Aido Nuquin Papan uincuemiatic tabadposh. ⁵Unësaidotedi uincuemiambo icposh. Nuquin Papan ambi tantiactedi tauaquin uincuemeposh. —Seta 1000tedi matameshun utsibo abitedi uincuemendambi —quequin adoposh. ⁶Adnubien tauaquin uincuemiaido bëdambo yec cuishonqueposh: —Padpidec unëstiapimbo iquebi —quiash. —Adquid icquin Nuquin Papan yuabo yec: “‘Esusbëd Nuquin Papa bëdamboeshë iquec,’ canuna,” quequin chianequid nendac. Aid seta 1000tedi matamequin Esusbëdtambi utsibo bëdamboen namequid nendac —quequin aden ismeposhi.

Satanasquio chian anëdënquequid nëniaid

⁷Adshumbic aidtedquio seta 1000tedi matameshun uidën uaid chicquin Satanas cuemendac. ⁸Adoquien matses icsamenuec muaquin chiec nidaid utsi-utsiec yacno nidendac. Aden aidën muaquin namiaquien matses dadpenquio Esus chedo cuesun sianuec tsidadendac. Nëidic nidaid Coc caid yacnocquido. Nëidic nidaid utsi Macoc caid yacnocquido. Nëidic matses utsibo abitedi cuëte podotedi dadpenquioshë.

⁹Aidtedi tsidadash cho-choash Esus tantiaquido tabadacnombo Nuquin Papan tantiacnobi Edusaden yacno daquiadshun cuesun secatiadpambo iquendac. Adshobien Nuquin Papan nëdënquepamboecquid budmequin uesquin pichicaindac. ¹⁰Adshumbic aido icsa uamequidtsen Satanasquio bedshun acte uquëducuësh chondaid chuiquid icsamboshë icquidbëdta nidaid shëcuënuësh chondaid ënden nësecaondacnombo chian anëdënquequid Satanastsen nënendac. Adoac aido ënëdenquio yec natiamboshë iquendac. Aden ismeposhi.

Icsambo icquido cuidte chiaid

¹¹Adshumbic padpiden Nuquin Papan matses cuidte ismeposhi. Adoac tsadte nuacquid dapan ushumboshë icquidën Nuquin Papa tsadsho ispombi. —Icsaisambo icquin matsesën naidtedi chuibanquin Nuquin Papan icsambo icquido cuidendac —camenuec adec tsadposh. Icsambo icquido cuidquidquio yec dacuëdampamboecshë Nuquin Papa isadnuc abubëdi nidaid abichobi nibëdanaccosh padpidec isadtiapimbo yec. ¹²Nuquin Papa yacno unësaido uincuemiaido abitedimbo tabadposh. Adnubien bëshunenquio icquin dada

uaten dada uabanacimboen Nuquin Papan abitedi tantiaquid icquin matsesën naidtedi abimbo chuibamposh cuidnumbi. Abi tantiaquido abëdi tabadmequimbi abi tantiesabo comapenen cuidnun aden chuibamposh. ¹³Unësaido abitedi icposh. Utsi-utsiec unësacsho chian dapa mad caid nëniaido uincuemiaido niosh. Utsi-utsiec nidaidën chococaid uincuemiaido niosh. Adsho aidon naidtedi Nuquin Papan chuibamposh. ^{14,15}Adshumbic Esus tantiesabo icsho documento nibëdquidbimboecsho abi yacno tabadmenquoio icquin chian dapa anëdënquequid uesquin nësecabamposh. Aden Esus tantiesabo nësecan unëstequido utsibo nibëdposh. Esus tantiesabo aton dada unësan abi tantiate tabadacno utsibo tabadenquoio icposh. Adnubien Esus tantiaquido Nuquin Papa yacno tabadec unëstiapimbo icquiduidquoio icposh. —Adquid iquendac —quequin aden ismeposhi.

Nuquin Papabëd tabadaidquoio

21 ¹—Esus tantiesabo chian anëdënquequid nësecaindac —quequin ismeboshombic padpiden ismeoaposhi. Adoac abu chucambo icsho ispombi. Nidaidtsen chucambo icposh. Abubëdi nidaid shëni nibëdnuc utsi chucambo icquiduidquoio icposh. Ënden iccondaidd chian dapa mad caidtsen nibëdposh. ²Adnubien Esusbëdi Nuquin Papa tabadaidquoio abichobi Edusaden chuca caid abucuësh budposh. Chido nëbi bedboedën aton bënë cuishoncamiacimboec cuishoncamiacimboec yec bédamboshë icposh. ³Adnubien Nuquin Papa tsadacnuëshquoio comapenec cuëdposh naden chiec. —“Con matses nec,” quiash nëbi Nuquin Papa matsesbëdi tabadendac cuëshëdenquoio yec. Adsho

isun aton yuabo icquin matses abitedishun: “Nuquin Icbombo nuqui tantiaidquoio nec,” caindac. ⁴Ambo Nuquin Papan abitedi chuca uacnombo aidbëdi tabadec matses shubitiapimbo iquendac bëun ucacimboec. Nidaid shënin tabadec abitedi unëstequiduidquoio icboedi Nuquin Papa yacnuëshien matses unëstiapimbo iquendac. Adecbidi sedenquetiapimbo iquendac. Adecbidi paëmbo ictiapimbo iquendac —queposh Nuquin Papa yacnuësh onquec.

⁵Adnubien abitedishun Icbombo yec chuiquid dapan tsadten tsadquid onquedoposh. —Aden abitedimbo utsi uaqin chuca uaindami bédamboshë icnuc —queposh Nuquin Papa Esusbëdi. Adshumbic ëbi chuiposh. —Ëmbi aden chuiboed dada uata. Ëmbi miesambo icquin abimbo chiaid nec —queposh Nuquin Papa Esusbëdi.

⁶Adashic Nuquin Papa padpidec onquec: —Ëmbi chuiboctedimbo nainquin naindami utsibon: “Padi,” catiapimbo icnuc. Ëndenquimboshë nidaid uabi ictenedi nebi. Nëbi adquid yec nibëdantiapimbo icquid nebi. Adquid yec abitedishun Icbombo icquin ëmbi tauaidtedi nainendambi. Adquid icquin acte bunacimboec ëbëd tabadte bunquidon con Mado Esus tantiasho ëbëdi tabadmendambi. ⁷Satanasën: “Chieshtomenu,” cauidaiddo Esusbëdta ëbi chieshtoenquoio icquin tantiaquido ëbëdi tabadmendambi bédamboshë yacnombo. Ëbi papa casho: “Ai, con mado mibi nec. Con champi mibi nec,” caindami. ⁸Adshumbic utsibo chian dapa anëdënquequid icsamboshë nuadquid nësecaindami. Nëidtedi icsamboshë icquido adoendambi. Nëidic ëbi bëdiactsëc tantiauidtsëcboedobi chieshëmënkuidon: “Cuesnu,” cac chieshtoash tantiesanoaido. Nëidic

Esus tantiesabo abitedi. Nëidic icsamianquido. Nëidic chieshëmë nec cuesunianquido. Nëidic dada aton dada utsibëdi chichudnanquido. Nëidic aton chidopenquio chudquido. Nëidic aton bënëpenquio chudmequido. Nëidic nënëchoquidobëdtabi cuëte podon unës uante bunquido. Nëidic ambi nacnenaidi papa caquin tantiaquido. Nëidic muauanquido. Aidedi chian dapa anëdënnequid nësecaindambi —queposh Nuquin Papa.

Abi tantiaquido Esusbëd icte chiaid

⁹Adnubien mayan bëdan Nuquin Papan matses cuidte cushtoaid chiuimboed abentsëc choshon chuiapooshi. —Isec cho. Chido nëbi bedboedën aton bënë cuishoncamiacimboen abided cuidadec unësaid Esus cuishoncamequido tabadaid mibi ismenu. Cho —caposhi Esus tantiaquido ismenuen. ¹⁰Adshumbic Nuquin Papan Mayanën tantiamiac ushquin isacimboen isombi. Mayan bëdan ëbi buanquin ispombi. Aden buanshun macuësh dapa mananënquio tsadumposhi. Adoac anoshon isquien abucuësh Nuquin Papa abi tantiaquidobëd abi tabadaid abichobi shubu dadpen icquid budposh. Aid tabadaid Edusaden chuca caposh. ¹¹Aid tabadaidquio aid shubutedi Nuquin Papa tabadaid yec abi yacpadquio abichobi bëchamauanquiecposh. Casëdu bëdambo icquidbimboec isquid-isquidquio isadposh. ¹²Shubu abitedi nënantan icnuc abichobi daquënë uaid icposh. Abucquio icnuc daquënë uaid niosh. Daquënë uaid puduedte shëcuë 12tedi icposh. Aid shëcuë icbo-icboen isquid yec mayan bëdabo 12tedbidi icposh. Aid shëcuë bëtashte 12tedbidi icposh. Aid

bëtashten Acobon mado cuëmëdquid 12tedbidi dada uabampaccosh naden. Bëtashten Acobon mado Ose cuëmëdquid dada uatanquin bëtashte utsin Acobon mado utsi Uda cuëmëdquid dada uatanquimbic adenuidi bëtashten bëtashtenquien Acobon mado cuëmëdquid cuëmëdquidquien dada uabampaccosh. ¹³Aid daquënë uaid puduedte shëcuë ushë choauc 3tedi icposh. Ushë nibëdauc nodte yauc aidedbidi shëcuë icoaposh. Ushë nibëdaucbidi sud yauc aidedbidi shëcuë icposh. Ushë budauc aidedbidi shëcuë icposh. ¹⁴Ambo tauaquin daquënë uadoquin nidaid cuënote nuamboshë icquid dapa 12tedi bedshun Esusbëd icquido ëbitedi cuëmëdquid 12tedi aid cuënote dapan abentse-abentsen dada uabampaccosh naden. Cuënoten ëbi cuëmëdquid Uan dada uatanquin cuënote utsin Petedo cuëmëdquid dada uapaccosh. Adenuidi cuënoten cuënotenquien Esusbëd icquido cuëmëdquid cuëmëdquidquien dada uabampaccosh. Adoshombic nidaid uëdëshcabanshun tauaquin sandoshon cuënote utsi tsindoaaid aid daquënë uaid niosh. —Esus tishabi icnuc Nuquin Papa tantiapampidobëdi Esus tantiaquido Nuquin Papa yacno Esusbëdi tabadendac —quequin tantiamenuen Acobon mado cuëmëdquidotedi dada uaidbëdta Esusbëd icquido cuëmëdquid dada uaid aden ismeposhi.

¹⁵Adshumbic ëbi chuiboedën mayan bëdan shocosh bëdaidquio nacnenaid tambante sanamposh. —Nuquin Papa tabadacno tambanquin daquënë uaidbëdtabi puduedte shëcuëtedi tambanten tambanu —queposh. ¹⁶Adoshombic cuëma abitedi tambanac cuëma tiombi-tiombimboec icposh. Cuëma auc abentsëc tanac

quidometedos 2,200ted cactiombi iccosh ënapenquioshë. Aidtionuidi iccosh cuëma abitedi. Adoshombic abuc yacmi cuembotsen tanac aidtionquiobidi icposh. ¹⁷Nidaid cuënote nuamboshë icquid dapa tsindoquin daquënë uaid bitsipambo icquidtsen tanac nuamboshë bitsi icposh. Matsesën nacnenaaid tambanten tanac metedos 65ted cactiombi icposh nuamboshë bitsipambo.

¹⁸Daquënë uaid abichobi isquid-isquidquiao isadposh. Bëdamboshë icposh. Padnuen shubu abitedi shocosh bëshpiu-bëshpiuctsëcquid nacnenauidquiao yec nac-nacquiao icposh. ¹⁹Aid daquënë uaqin tauaqin sandoaid nidaid cuënote dapa casëdubimboecquid bëdambo icquid matses comapenec bunaidquiao utsi-utsien dabitaccabanaid niosh. Abentsëc aspe caid umu-umumboctsëcquid dabitaccabampaccosh. Utsibic sapido caid umumbo icquid dabitaccabampaccosh. Utsibic acata caid ushumbo icquid. Utsibic esmedada caid umumbo icquid utsi. ²⁰Utsibic onise caid piumbo icquid. Utsibic conadina caid piu-piupactsëcquid. Utsibic quidisodito caid bëshpiu-bëshpiupactsëcquid. Utsibic bedido caid umu-umupactsëcquid utsi. Utsibic topasio caid piu-piupactsëcquid utsi. Utsibic quidisopadasa caid nushan-nushanacbitsecquid. Utsibic asinto caid umumbo icquid utsi. Utsibic amatista caid umumbo icquidbidi. Aidtedi dabitaccabanaccosh. —Nuquin Papa yacnombo bëdamboshë iquendac —camenuen aden ismeposhi. ²¹Daquënë uaid puduedte shëcuë 12tedi icposh. Aid bëtashtetedi acte chiumbimboecquidën casëdu ushu uaid nuacquid dapambo abichobi-abichobien

nacnenaaid niosh. Ambo shubu dadpen icquid nënantanquiao podqued icposh. Aid podqued shocosh bëshpiu-bëshpiuctsëcquid acte-actectsëcquiao icnuc mabiunaid icposh. —Esusbëd Nuquin Papa tabadacnombo bëdambo icquiduidquiao iquendac —camenuen aden ismeposhi.

²²Ambobi abi bëisec tabadacnombo Nuquin Papa tabadte shubu uashunaid nibëdposh. Ambo Nuquin Icho Esus abided cuidadec unësaidbëd Nuquin Papa icsho bëisquiaoquin tantiec anocquido tabadendac. ²³Ambobidi inchështanec badiadenquiao iquendac. Badiadën ushë isadenquiao iquendac. Inchëshën ushëtsen isadenquiao iquendac. Nuqui icsaid bedshunuec abided cuidadec unësaid Esusbëd Nuquin Papa bëchamauanquiecquid icquin ambo ushëmbouidi icmendac. Inchëshaid tantiadenquiao iquendac. —Nuquin Papa icsaisambo icnuc abi yacno icsaido nibëdquiao iquendac —camenuen aden ismeposhi. ²⁴Icsaisambo icquin Nuquin Papan tantiamiac matses utsi-utsiec abi chuiquid dapabobëdi Esus tantiaquido yanendac. Adash Nuquin Papa yacnombo quenene tabadcuenash: —Esusbëd Nuquin Papa abitedishun Icbombo nec. Abipadquid utsi nibëdec —quendac. ²⁵Nuquin Papa matsesbëdi tabadacnombo inchëshenquiao icnuc: —Icsambo icquido puduednushë. Bëtashnu —quetiapimbo icsho isun daquënë uaid shëcuë bëtashenquiao iquendac. Shëcniachobi iquendac. ²⁶Padnuen nidaid utsi-utsiec yacno tabadquido chuiquid dapabo Esus tantiaquido yanash Nuquin Papa yacnombo puduedash: —Daëdpactsëc tantiaquin matses daëdpactsëc namebampadenembi. Nuquin Papa aton Mado Esusbëdi comapenen

tantiaquidquio yec abitedishun Icbombo nec. Abipadquid utsi nibëdec —quendac abitedi. ²⁷Ambo icsambo icquid puduedtiapimbo iquendac. Adecbidi omposhon abi bunaiduidi naquidobëd muaquido puduedtiapimbo iquendac. Nuquin Papan bëshunenquio icquin dada uacimboen: —Icsambo icboedi abided cuidadec unësaid con Mado Esus tantiaquido aid nec. Con bacuëbo nec —capendac. Aden ambi con bacuëbo caido abi yacno puduedendac. —Nuquin Papa yacno adquio bëdamboshëuidquio iquendac —quequin aden ismeposhi mayan bëdan.

Nuquin Papa yacno acte ismiaid

22 ¹Adshumbic aid mayan bëdan padpiden ismeoaposhi. Adoac Nuquin Papa abided cuidadec unësaid aton Madobëdquio tsadte dapan tabadacnuësh matses unëstiapimbo icmetequad acte bëdambo icquid nushan nibëdquidquio chëuëdsho ispombi. ²Nuquin Papa yacnuëshquio choec chëuëdec ambo tabadquido Esus tantiaquido tabadaid shubu nënantanquio chëuëdposh. Aid cuëmambi matses unëstiapimbo icmetequad cuëtetsen icposh. Baded-badedquieac bacuëquidquio niosh. Inchëshën ushë choan-choanquieac badedquio bacuëquidquio niosh. Aid cuëte podò nidaid utsi-utsiec yacno tabadquido bëdambo icmetequad niosh. —Aton Mado abided cuidadec unësaid tantiaquido abëdi tabadmequin Nuquin Papan unëstiapimbo icquid icmendac —camenuen aid acte ismeposhi. —Matses utsi-utsiec Esus tantiaquid icsho abëdi tabadmequin Nuquin Papan daicsabudtiapimbo icquid icmendac —camenuen cuëte aton podobëdta ismeposhi. ³Aden abitedi bëdambo

icmiac cuidtequido nibëdquio iquendac. Icsambo icquido nibëdnuc Nuquin Papa aton Mado Esusbëd tabadacnoshon aid daëdi tantiaquieac Esus tantiaquido tabadendac. ⁴Adec: —Con bacuëbo nec —quequin Nuquin Papan abi cuëmëdquid dada uaquin bësiaidon Nuquin Papambo bëisquieac tabadendac. —Nidaidën tabadec bëdamboec tabadquido Nuquin Papabëd tabadec abipadquio bëdamboshë yanendac —camenuen aden ismeposhi. ⁵Ambo bëdambouidquio yec inchëshenquio iquendac. Nuquin Papa bëchamuanquieacquidëmbi ushëmbouidquio iquendac inchëshaid tantiadenquio yec. —Aden abi tantiaquido bëdamboen isquin ënenquio icquin bëdamboshë icmendac. Chuiquid dapabo icmiac Esusbëdtambi ënenquio icquin namendac —quequin ismeposhi.

⁶Adshumbic mayan bëdan chuiuoaposhi. —Tantia. Mibi chuinu. Nuquin Papan Mayanën tantiamiac: “Yuecash adquid iquendac,” quequin min tsusedpabo isadaidbon abimbo chuiquin dada uapampic. Adembidi aton Mayanën namiaid icquin abimbo chuiquin mibi dadpen ismebanombi. “Nëbi adquid iquendac. Utsi yuecash iquendac,” quequin mibi tantiamenuen ismebanombi —queposh Nuquin Papan abi yacnoshon uaid mayan bëda.

Esus chote chiaid

⁷Adnubini Esusënquio naden chuiposh. —Chieshtoenquio icquin ëbi tantia. Nëbimbobi nidaidën choec budebique. Nëid dada uaid isquin ëbi tantiaquiota. Adsho mibi bëdambo icmendambi —caposhi Esusën.

⁸Uan nebi. Abimbo chuiquin nëid dada uaombi. Aden mayan bëdan chuibanquin ismeposhi. Aden ënquimbi ismiaquini: —Nuquin Papapadquidien

nechitec —quetanec danëshën
tinquebuduidpoc ëbi ismequid mayan
bëda ismenuec. ⁹Adshobini: —Padi.
Aden ëbi ismenda. Mibipadquid Nuquin
Papan yuabidi nebique.
Ëndenquimboshë Nuquin Papan
tantiamiac min tsusedpabo isadaidbon
ambi chiaidquio dada uapampic. Nëbi
ëmbi ismeboed tantiaquin Nuquin
Papan chiacpadomboen naquido aton
yuabobidi nec. Adquidbidi nebi aton
yuambo. Nuquin Papauidtsëqui
tantiaquin aden ismeta —caposhi
mayan bëdan.

¹⁰Adashic padpidec: —Ëmbi
chuibamboedbëdta ëmbi ismeboedtedi
chuiquin dada uata. “Nëid dada uaid
isec onquequin ma Esus tantiaquidon
tantianu. Nëbi adquid yanushe.

Chieshtoenuio icquin Esus tantiec ma
tabadnu,” qeshun dada uata.

¹¹Nëbimbobi Esus chonoc Esus
tantesabo badedquio bëdamboec
tabadcuentiapimbo iquendac. Abi icsaid
badedquio ëntiapimbo iquendac. Esus
tantiaquido abi bëdamboec
tabadacpadquiecbidi bëdamboec
tabadpashun —queposh mayan bëda.

¹²Adnubini Esusën chuioposh.
—Chieshtoenquio icquin ëbi tantiata.
Nëbimbobini choendac. Choshon
matsesën naidtedi tantiaquin icsaido
cuidquimbi ëbi tantiaquido ëbëdi
tabadmendambi. ¹³Nuquin
Papapadquidquio nebi. Ëmbi
tantiacmaid nibëdnuc abitedi
comapenen tantiaquidquio nebi. Nidaid
uabi yec ictenedi nëbi adquidquio yec
nibëdantiapimbo icquid nebi. Adquid
yec abitedishun Icbombo nebi.

¹⁴Icsambo icboedon ëbi tantiasho
icsaisabimboecnuc Nuquin Papan
bëdamboen isendac. Adshun ëbi
yacnombo puduedmequin unëstiapimbo
icquido icmendac unëstiapimbo

icmiantequid cuëte bacuë
chemiacbimboen. ¹⁵Padnuen ëbi
tantesabo bëdamboen isacmaido
Nuquin Papa yacno puduedtiapimbo
iquendac. Nadquid icsambo icquid
caimbi. Nëidic nënëchoquidobëdi cuëte
podo chodcashun unës uante bunquido.
Nëidic dada cuididimbo. Nëidic chido
chishpida. Nëidic aton chidopenquio
chudquido. Nëidic aton bënëpenquio
chudmequido. Nëidic cuesanquido.
Nëidic papa quequin ambi nacnenaidi
tantiaquido. Nëidic abi bunaiduidquio
naic muauanquido. Aidedi Nuquin
Papa yacno puduedtiapimbo iquendac.

¹⁶Ëmbi chiacpadomboen mayan
bëdan mibi ismebamposh. “Ma ëbi
tantiaquidon iste dada uanu,” quequin
ëmbi chiacpadomboen mibi
ismebamposh. Nuquin Papan dada
uamiac matsesën: “Dabidën tsyuecquid
yec abitedimbo chuiquid dapa
iquendac,” quequin chuiampid nebi.
Isadaidbon cainaidquio nebi. Utsin:
“Dëniacnu,” cadtiapimbo icquid nebi.
Adquid icquin matses abitedimbo
namendambi —quequin chuioposhi
Esusën.

¹⁷Adsho tantiashun Nuquin Papan
Mayanën tantiamiacpadomboen
chuiquin: —Nëbimbobi Esus chonoshe.
Aidquio tantiabenta —caindac Esus
tantiaquidon Esus tantesabo chuiquin.
Ëmbi chuiboed tantiaquidtedishun:
—Nëbimbobi chonoshe. Aidquio
tantianuna —cac bëdambo ictsiash.
Adsho tantiashe Esus tantesabo acte
bunacimboec Esus tantiate bunsho
Nuquin Papan bëdamboen isendac.
Nuquin Papa bëdamboen ismenuen
menete nibëdnuc Esusuidi tantiasho
Nuquin Papan bëdamboen isquin abëdi
tabadmendac.

¹⁸Tantia. Ëmbi chuiboed tantiaquido
chuinu. Nuquin Papan: —Nadquid

iquendac. Yuecash utsi iquendac
 —quequin ëbi ismeboedtedi dada
 uaombi. Ëmbi dada uaboed tsitënquin
 ambembi chiaid dada uainda. Ëmbi
 chuibocpadomboen Nuquin Papan mibi
 cuidtsiashe. ¹⁹Adembidi ëmbi dada
 uaboed utsi uainquo icquin abimbo
 chuita. Ëmbi chuibocpadomboen
 Nuquin Papan mibi unëstiapimbo icquid
 icmenquo ictsiashe. Adembidi
 bëdambohë yacno abëdi mibi
 tabadmenquo ictsiashe.

²⁰—Ma aitedi tantianu —quequin
 Esusën chiacpadomboen mayan bëdan
 aitedi ismeposhi. Ëmbi
 chuibocpadomboen Esusën:
 —Nëbimbobini choendac —caposhi.
 Adsho tantiaashun: —Ai, nëbimbobi
 chota —capombi.

²¹Mibitedi Esus tantiaquidotedi
 tantiaquin: —Ambi nabocpadomboen
 Nuquin Icbo Esusën bëdamboen isquin
 bëdambo icmepashun —caimbi. Padi.
 Aitedi chuiquin dada uaombi.